


Yak'usda bughunek:
k'andit khunek neba
lhaidinla



New Testament in Carrier, Southern (CA:caf:Carrier,
Southern)

Yak'usda bughunek: k'andit khunek neba lhaidinla New Testament in Carrier, Southern (CA:caf:Carrier, Southern)

copyright © 2002 Wycliffe Bible Translators, Inc.

Language: Carrier, Southern

Translation by: Wycliffe Bible Translators, Inc.

Carrier, Southern [caf], Canada

Copyright Information

© 2002, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Carrier, Southern

© 2002, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-22

PDF generated using Haiola and XeLaTeX on 11 Nov 2022 from source files dated 29 Jan 2022
f3f87939-bb58-59c1-9788-d872c7ab79b0

Contents

Matthew	1
Mark	41
Luke	63
John	104
Whel'a 'En Hubube 'Ut'en K'ah	131
Rome Whut'en	167
1 Corinth Whut'en	186
2 Corinth Whut'en	203
Galatia Whut'en	214
Ephesus Whut'en	220
Philippi Whut'en	226
Colossia Whut'en	230
1 Thessalonica Whut'en	234
2 Thessalonica Whut'en	238
1 Timothy	240
2 Timothy	245
Titus	249
Philemon	251
Hebrew Khunek K'uyahalhtuk	252
James	268
1 Peter	273
2 Peter	278
1 John	282
2 John	286
3 John	287
Jude	288
Revelation	290

Yak'usda Bughunek Unzoo, 'I Matthew Yuk'uné'uzguz

Sizi Gri ndunnah hube dínzut

¹ Ndi dustl'us 'uk'e'eduguz 'et ndutni, 'i be Sizi Gri 'en hube dínzut 'en 'uhínt'ah, 'i Sizi 'en David yuts'uh hainzut 'int'ah. David 'en Abraham yuts'uh hainzut 'int'ah. ² Abraham 'en Isaac bu'abá 'int'ah.

Isaac 'en Jacob bu'abá 'int'ah.

Jacob 'en Judah 'ink'ez bulhutsinkah bu'abá 'int'ah.

³ Judah 'en ndun ts'eke Tamar 'en be Perez 'ink'ez Zerah bu'abá 'int'ah.

Perez 'en Hezron bu'abá,

'ink'ez Hezron 'en Ram bu'abá 'int'ah.

⁴ Ram 'en Amminadab bu'abá.

Amminadab 'en Nashon bu'abá,

'ink'ez Nashon 'en Salmon bu'abá 'int'ah.

⁵ Salmon bu'at Rahab 'en be Boaz bu'abá.

Boaz 'en Ruth 'en be Obed bu'abá.

'Ink'ez Obed 'en Jesse bu'abá 'int'ah.

⁶ Jesse hubudayi cho David bu'abá.

'Et hubudayi cho David, ndun Uriah bu'at inle, 'en be Solomon bu'abá 'int'ah.

⁷ Solomon 'en Rehoboam bu'abá.

Rehoboam 'en Abijah bu'abá,

'ink'ez Abijah 'en Asa bu'abá 'int'ah.

⁸ Asa 'en Jehoshaphat bu'abá.

Jehoshaphat 'en Joram bu'abá,

'ink'ez Joram 'en Uzziah bu'abá 'int'ah.

⁹ Uzziah 'en Jotham bu'abá.

Jotham 'en Ahaz bu'abá,

'ink'ez Ahaz 'en Hezekiah bu'abá 'int'ah.

¹⁰ Hezekiah 'en Manasseh bu'abá.

Manasseh 'en Amon bu'abá,

'ink'ez Amon 'en Josiah bu'abá 'int'ah.

¹¹ Hoh da wheghah whudezuhl, ts'iyannah dune keyah whuti Babylon ts'ih wheobuhanla, 'et Josiah 'en Jeconiah 'ink'ez bulhutsinkah 'en bu'abá 'int'ah.

¹² Keyah whuti Babylon whuz whebuanla hukw'elh'az 'et Jeconiah 'en Shealtiel bu'abá 'int'ah.

Shealtiel 'en Zurubabel bu'abá 'int'ah.

¹³ Zerubabel 'en Abiud bu'abá.

Abiud 'en Eliakim bu'abá,

'ink'ez Eliakim 'en Azor bu'abá 'int'ah.

¹⁴ Azor 'en Zadok bu'abá.

Zadok 'en Achim bu'abá,

'ink'ez Achim 'en Eliud bu'abá 'int'ah.

¹⁵ Eliud 'en Eleazor bu'abá.

Eleazor 'en Matthan bu'abá,

'ink'ez Matthan 'en Jacob bu'abá 'int'ah.

¹⁶ Jacob 'en Joseph bu'abá 'int'ah. 'En Mary buki 'ink'ez Mary 'en be Sizi whuzdli. 'En Christ hiyulhni.

¹⁷ 'Et Abraham 'en David whuts'un, 'en ts'iyawh lanezi 'o 'at dit (14) bubé hudinde 'uhint'ah. 'Ink'ez David hoh da whudezuhl hoh ts'iyannah keyah whut'en Babylon ts'ih whebuanla whuts'un, 'en ts'iyawh lanezi 'o 'at dit (14) bubé hudinde hinli. 'Ink'ez hoh da whudezuhl hoh ts'iyannah keyah Babylon ts'ih whebuanla 'et hukw'elh'uz dich'oh bukeyah yun k'ut Judah, whuz whenáhedel, Christ 'et whuts'un, 'en ts'iyawh lanezi 'o 'at dit (14) bubé hudinde hinli ho' hint'ah.

Sizi Gri whuzdli

¹⁸ 'Aw 'et Sizi Gri whuzdli, ndez na'a 'uhooja. 'Ama Mary 'en Joseph 'en yughu tedalh ka lhahódinla, 'ink'ez yughu tedalh whutsuh hoh 'et nahoo'ai 'uda 'uski bulh 'int'ah. Ndoni, 'i be 'uja. ¹⁹ 'Et ndun Joseph 'en ts'ah'un dune unli, 'et huwa lhgho hutedukelh ts'iyannah tah yooya yoolhtselh whuch'a bubeni lhaidinla. 'Ink'ez whu'iz yuch'a natedalh hukwa' ninzun. ²⁰ 'Et howu nuni nuzut hoh 'et huwu nusúti hoh neMoodihti bulizas 'en

'uyulhni, "Joseph nyun David buts'u hainzut inli ho' 'int'ah. Wheniljut ilah Mary n'at wule. Ndun 'uski Ndoni be chainya ho' 'int'ah. ²¹ 'Aw 'et 'en duneyaz tele. Nyunch'oh boozi bugha ídon'ah. Sizi dóni. 'En 'utenilh ts'iyannah lubeshi ch'a hubutelhyih." ²² 'Et ndez na'a 'uhooja, neMoodihti ndun nus whunilh'en, 'en be daja ni, 'et nduhoolcho hoh túne' whust'en. 'Et ndun nus whunilh'en ndez na'a njan ndutni, ²³ "Soo zulhts'ai ndun ts'eke 'aw dune t'enizun 'et whunts'ih khunyaz 'uski ba 'uja, 'ink'ez buyaz dune tele, boozi Emmanuel hiduténilh, Yak'usda nelh 'int'ah, ni ho' utni."

²⁴ 'Et Joseph ts'enzaut hoh neMoodihti bulizas daja yulhni, hoh tune' 'ust'en 'ink'ez 'aw 'et Mary yilhchoot bu'at tele ka. ²⁵ 'Udechoo buyaz whutele t'eoonanzin 'et whuts'un 'aw yut'áchaghesnak. 'Aw 'et buye' whuzdli, 'et k'an zeh soo yughusda. 'Et boozi yugha íden'ai Sizi yulhni.

2

Dune whunih, Maji hubuhútni, 'en 'et Jerusalem ts'ih hunindel

¹ 'Aw 'et yun k'ut Judea, keyah Bethlehem whuz'ai, 'et Sizi whuzdli. Hoh da whuz na'a Herod hubudayi cho unli hoh 'et 'uhooja. 'Aw 'et whuzdli hukw'elh'az khunyaz nda whut'en keyah Jerusalem ts'ih hunindel. 'En whunih Maji hubuhútni, 'en 'uhint'ah. ² 'Ink'ez dune hoodulhkut, "Lizwif hubudayi cho k'an whuzdli, 'en nts'e whuzdli? 'Et ndi sum cho ts'a'en, 'i bugha lhuts'úzdel. 'Et huwa ndaz de ndun 'uski 'en buts'un teni' ts'untelhdzilh ka whusats'ándel." ³ 'Et whunts'ih hubudayi cho Herod whulh 'udúzts'ai hoh buba dzuh 'uhutni. Jerusalem whut'en, 'en chah whuz na'a zeh huba dzuh 'uhutni. ⁴ 'Ink'ez ts'iyannah ba náwhulnuk hubumoodih 'ink'ez Moses be' dustl'us 'uk'ununa'úsduguz chah, 'en ts'iyawh Herod 'anih hubudani. 'Et 'en hubuts'un nahooté'alh Christ ndet whutele. ⁵ 'Ink'ez 'uhiyulhni, "Yun k'ut Judea, keyah Bethlehem whuz'ai, 'et whutele. Nus whunilh'en 'et 'uk'e'edúguz, 'et ndutni,

⁶ 'Yun k'ut Judea ts'ih keyah Bethlehem whut'en,
'et nuhkeyah hoontsolyaz hoonli,
'et whunts'ih tube whudezti tele.

Nuhkeyah 'et whuts'un 'ilhunuh moodih ncha, 'en whusateyalh. 'Ink'ez sudune,
Israel hits'uh hainde,
'en sheep ghunli k'una'a bughu tele.' "

⁷ 'Et Herod whu'iz hoh dune whunih 'en 'anih hubudáni. 'En hubuts'un naooté'alh ka ndet dzin nts'oh whudezuhl ndi sum be hóoduteltsilh. ⁸ 'Et hukw'elh'az keyah Bethlehem ts'ih whebalh'a 'ink'ez ndo búlhni, "Ahdulh 'ink'ez soo cho hoh 'uski naoolhteh. 'Et nawhah'ai t'eh, nts'e 'int'ah 'et sts'óti'a khunek wah'alh. Si chah whuz tesyalh buts'un teni' ntelhziilh ka." ⁹ 'Et hubudayi cho ndo búlhni hoh whehándel. Hedulh hoh khunyaz ndi sum ndaz de ts'un hitel'h'en 'ink'ez hubutsuh 'ults'ulh. 'Et nts'e 'uski usda 'et bugha nduk, 'et lhghá dílts'ut. ¹⁰ 'Et ndet sum hinalh'en da tube huhóont'i. ¹¹ 'Et 'ink'ez koo dahuníndel hoh 'uski hitel'h'en, 'ama Mary 'en bulh. Hibut nachánelya 'ink'ez hits'un teni' nalhdzin. Huye 'úzdla, 'i hidah lhch'az hiyílhchoot hoh 'i hiyé ha'anla 'ink'ez hits'u hítelhdel. Gold, yoo sooltsun, 'i frankencense hiyulhni, 'ink'ez yoo Myrrh hiyulhni chah, 'i ts'iyawh hits'u hitelhdel. ¹² 'Ink'ez Yak'usda bubul be bugha dáni, 'aw Herod buk'unaoohdelh gunih hubudáni. 'Et huwa 'uts'un ts'un hubukeyah ts'ih whenáhedel.

Joseph, Mary teh, 'ink'ez Sizi bulh yun k'ut Egypt ts'uwuhútni, whuz whehándel.

¹³ 'Aw 'et whenáhedel hukw'elh'az neMoodihti bulizas Joseph nute hoh beghah hódíiltsai. 'Et ndi yúlhni, "Didinyaiah, ndun 'uski 'ama bulh hubilhchoot 'ink'ez yun k'ut Egypt 'a ts'ih whuz hubalhtel! 'Et nuhwhudutésnilh 'et whuts'un 'et doolhúts'í! 'Et 'áho Herod 'uski yuka it'é'ílh yutuzelghelh ka!" ¹⁴ 'Et 'ulh'ek dinadeja 'ink'ez 'uski 'ama bulh hubilhchoot 'ink'ez yun k'ut Egypt whuz whehandel. ¹⁵ 'Et Herod datetsah whuts'un 'et huduté'íts'ílh. 'Et ndúhut'en hoh neMoodihti ndun nus whunilh'en, 'en be daja ni 'et ndoneltsuk tune' whust'en hoh njan ndutni, "Suye' 'anih dáni yun k'ut Egypt whuch'a naooja ka."

Hubudayi cho Herod nehugan 'en ndo búlhni, "Keyah Bethlehem ts'ih duneyaz nat naooodezuhl be sulí, 'en ts'iyawh hubooghgan."

¹⁶ 'Aw 'et Herod t'eoonanzin ndunnah whunih, Maji hiyulhni, nahina'a, 'et huwa tube hunilch'e. 'Et nts'oh huwa whezulh Maji hidáni hoh bulunah nehugan keyah Bethlehem ts'ih whebalh'a. 'Et ndo búlhni, 'et keyah whut'en ts'iyawh 'ink'ez whunat whut'en chah ndunnah duneyaz nat naooodezuhl be sulí 'ink'ez whuts'un whudelhdzulh chah, 'en ts'iyawh hubooghgan. ¹⁷ 'Et whuz na'a ndun nus whunilh'en Jeremiah hiyulhni, daja ni 'et ts'iyawh nduhóolhcho tune' whust'en hoh njan ndutni,

¹⁸ "Et keyah Ramah hódants'o hoh tso yahalhtuk
'ink'ez hubuzkeh k'ehúntai.

Rachel buzkehyaz hubuk'etso yahalhtuk.

'Aw budzi nduk na'ootneh ghaif'ah, bubuzkekah hoolah huzdli 'et huwa."

Joseph, Mary, Sizi chah, keyah Nazareth huwhútni hudutélts'ilh

¹⁹'Aw 'et Herod dazsai hoh Egypt ts'ih neMoodihti bulizas Joseph huwunute hoh begghah níwhults'ut. ²⁰'Et ndi yulhni, "Didinyih! 'Uski bu'ama bulh naobilchoot. Israel yun k'ut whuz nahdulh. 'Et whutsuh da ndunnah 'uski híkuneztai hituzelghelhel ka, 'en ts'iyawh yahadla." ²¹'Et dudinya. 'Uski bu'ama bulh nabilchoot 'ink'ez Israel yun k'ut ts'ih whenáhedel. ²²'Et whunts'ih Joseph whulh uduzts'ai Herod buye' Archelaus hiyulhni, 'en bu'abá k'edanya 'ink'ez k'an Judea yun k'ut hubudayi cho unli. 'Et whuz teyalh whénuljut hoh howu nusúti 'et Yak'usda yugha dáni. 'Et huwa Galilee yun k'ut ts'ih whuz whehándel. ²³Whuz hunindel keyah Nazareth huwhútni, 'et hudutélts'ilh. 'Et whuz na'a nus whunilh'en daja hutni, hoh túne' whust'en njan nduhútni, "En Nazareth whut'en hiduténilh."

3

John dune too be 'ulh'en ts'iyannah ndo búlhni, "Nduh Yak'uz k'une' whul'en, 'aw 'et nilhdukw netah 'utet'ilh."

¹'Et whezulh hoh John dune too be 'ulh'en 'en Judea yun k'ut dune chahóot'ih ts'ih, whuz whinya 'ink'ez dune bulh yalhtuk. ²'Et ndo búlhni, "Nuhwhulubeshi ch'a nuhwhubeni náhandunoohele. 'Aw 'et nilhdukw sulí hoh ndun yak'uz k'une' whul'en, 'en nuhwhutah 'utet'ilh." ³Ndun 'en nus whunilh'en Isaiah yughu yalhtuk hoh njan ndutni, "Dune chahóot'ih ts'ih dune yiz dusduts'ai soo 'ultus hahuyih hoh njan ndutni, 'NeMoodihti buti lhaoodahleh!

Buti soo lhts'odez'a buba whulhstsi.' "

⁴'Ink'ez John dich'oh khunai bugha, camel hiyulhni, 'i ye dune unli 'ink'ez 'ukulh se be sudelhú'oo. Tulk'us cho 'ink'ez honey, 'i ya'ah. ⁵'Et hoh da dune ts'iyawh ndunnah Jerusalem whut'en, Judea yun k'ut whut'en, 'ink'ez dune 'et took'oh Jordan whut'en, 'en ts'iyawh John highu nindel. ⁶'Ink'ez bulubeshi hubugha hunahuw'hélnuk hoh 'et nyo 'et took'oh Jordan, John 'en too be' balh'en. ⁷'Et whunts'ih lhanah Pharisee 'ink'ez Sadducee chah, 'en too be' hutelnilh ka highu nindel. 'Et hubunilh'en hoh ndo búlhni, "Nuhwheni poison t'l'ughu buzkekah lí'ah't'ah! Ndan 'ún whulhni Yak'usda huntelch'oh whuch'a lhúwus? ⁸Lubeshi ch'a nuhwheni nahandunihla t'eh, ndaht'en ts'iyannah t'ehonóozin ndaht'ah. ⁹'Ink'ez khun teh na'dudoohntni gunih, nuwheni Abraham buts'u hats'ánde 'uts'int'ah. Ts'ah'un na'a 'ún whudusni Yak'usda soo 'ultus ho' 'int'ah, tse be 'i whunts'ih Abraham buts'u hahánde hubutelhtsilh. ¹⁰Nuhwheni duchun lí'ah't'ah. 'Aw 'et tsetsilh lhadínt'ah. Duchun bumai hoolah, bughih tubulh tsuhídantsel 'ink'ez hidutéllh'kun. ¹¹Nuhwheni nahundunihla 'et huwa too zai be too be' nuhwhúsdla. 'Et whunts'ih sk'elh'az ndun whusatéyalh, 'en sughanus dezti ho' 'int'ah. 'Aw bukegwun buba nutésdle huba soo cha'lhúdzooch. Ndun Ndoni 'ink'ez kwun bulh 'i be too be' nuhwhutelh'ilh. ¹²Be t'l'onuldzeh 'i t'l'o mai be tahawhúlhst'ih, 'i niyútun. 'Ink'ez ndi t'l'o mai yutahawhúlhst'ih, 'i 'ink'ez yuk'ut 'ut'en, 'i chah yuk'ut lhadút'ih t'eh, 'ink'ez yuna'ulhdoh. 'Ink'ez ndi mai ndai lhaduja, 'i déinudzih 'ink'ez mai koo ts'ih wheyúlih. Ndi kwun 'aw nachanusne, be but'ooz, duték'un," ndo búlhni.

John, Sizi too be 'uyínla

¹³'Et Sizi Galilee yun k'ut ts'ih hainya. Jordan took'oh ninya John too be' yutelilh ka. ¹⁴'Et whunts'ih John dah yúlhni. "Nyun too be' sonleh huba' hoont'ah. 'Ink'ez di ka si suts'ú tenya too be' nyoosdleh ka?" ¹⁵'Et whunts'ih Sizi ndi yúlhni, "Whute ndoh hot'e, be ts'ah'un 'uhoont'ah, 'i 'et ts'iyawh lhaoodutenilh ho' hoont'ah." 'Aw 'et whute 'et ndúyinla. ¹⁶Sizi too be' yinla hoh tooz hanája ibulh 'et 'ahoh yak'uz whuda'dutézke 'ink'ez Yak'usda buyégha yunilh'en hoh ndus de dut'ai, 'i dove hiyúlhni, 'i k'una'a Sizi buk'éinde. ¹⁷Khunyz ndus de 'uwhutni, "Nduh 'en suYe' buk'esi' 'en 'int'ah, 'ink'ez tube 'en bulh hoonúst'i," ni.

4

Netsudule Sizi tink'us yunóolht'uk hukwa'yulh'en

¹Sizi dune chahóot'ih ts'ih Ndoni Sizi whuz wheyálh'a netsudule yootéldhzih ka. ²Dit lanezi dzin (40) sahá'delya, 'et hukw'elh'az buye'élts'ul. ³'Et ndun yootéldhzih ka, 'en yughu ninya 'ink'ez ndi yúlhni, "Alha Yak'usda buYe' ninli t'eh, ndi tse lhes wule dini." ⁴'Et Sizi 'uyúlhni, "Yak'usda bughunek k'ut 'uk'une'úsduguz, "Aw lhes zeh ilah dune yugha khuna, 'et Yak'usda bughunek ts'iyawh, 'i be chah higha khuna." ⁵'Et netsudule keyah whudezti ts'ih yulh whin'az, 'ink'ez luglez whucho degha ndoh hukw'ut, 'et hukw'abah ninilhya. ⁶'Ink'ez

ndi yúlhni, “Alha Yak'usda buYe' ninli t'eh, njan whegha' dudintneh! 'Alha 'uk'e'edúguz hoh njan ndutni,

‘Yak'usda bulizas butl'aho'ai hoh 'en nyun nka huwuhinli,

'ink'ez hubula be nyooóóotetun,

'et 'aw nke tse t'aoonalh ghaif'ah.’ ”

⁷ 'Et Sizi nduyulhni, “Doo chah zeh njan 'uk'e'edúguz hoh ndutni, ‘Khun teh Moodihti nYak'usda 'en nantan'ah hukwa ólhdzih gunih!’ ” ⁸ 'Et doo chah zeh netsudule ndi dzulh yédoh hadet'ai ts'ih whuz yulh whin'az. 'Et ndi yun k'ut ndulhcho hoh whenulhtun hubudayi cho bube 'ut'en k'ah 'ink'ez huyé dezti, 'i chah. ⁹ 'Ink'ez ndi yúlhni, “Ngwutsi be nininyih 'ink'ez suts'u téni' nilhdzun t'eh, 'et sih ts'iyawh, nye'ildzun wule!” ¹⁰ 'Ink'ez Sizi ndi yúlhni, “Satan naindahl! 'Et 'uk'e'edúguz hoh njan ndutni, ‘Moodihti nYak'usda, 'aw 'en zeh bubut negwutsi be nits'uyih, 'ink'ez butsu téni' uznilhdzun, 'ink'ez 'en zeh buba né'ts'oot'en huba' hoont'ah.’ ” ¹¹ 'Et netsudule whenaja 'ink'ez lizas whusahándel 'ink'ez hiba ne'ut'en.

Sizi dune hubulh yawhénilhtuk

¹² John tsak'ehiyan'a Sizi whulh údants'o hoh Galilee yun k'ut ts'ih whinya. ¹³ Nazareth whuch'a séya 'ink'ez keyah Capernaum whuz ninya 'et tedalh ka. Keyah 'et taba whuz'ai. Yun k'ut Zebulun 'ink'ez Naphtali lhodin'ai. ¹⁴ Isaiah nus ho'en, 'et howu yailhtuk lhaóódotneh hoh njan ndutni,

¹⁵ “Yun k'ut Zebulun 'ink'ez yun k'ut Naphtali,

bun k'uz wheti 'et whuz'ai.

Galilee 'i 'udun yun k'ut whut'en,

huwhut'i.

¹⁶ Tsahólhgus yuh hudelhts'i,

'en be whét'en cho 'i hitelh'en.”

Hoh huwhut'en dahutetsah tsagwusts'it huba li'hoont'ah, ndunnah 'en huba hoolh'en.”

¹⁷ 'Et whuts'un Sizi dune hubulh yawhénilhtuk hoh ndo búlhni, “Nuhwhulubeshi ch'a nuhwhubeni náhandunoohleh! Yak'uz k'une' whul'en 'aw 'et nilhduk wuli.”

Dinah hook ka 'uhut'en Sizi, “Anih,” hubúlhni.

¹⁸ 'Aw 'et bun k'ut Galilee taba Sizi hoh wheghah uyalh 'et nanah dune lhulhutsinkah hubutelh'en. 'Ilhunuh 'en Simon hiyulhni, Peter chah hiyulhni, 'et 'ilhunuh bulhutsin 'en Andrew hiyulhni. 'En lhoombilh táhíyahdel lhook ka 'uhut'en hinli. ¹⁹ 'Ink'ez ndo búlhni, “Suneh'us. Dune ka 'ut'en nuhwhutelhsilh.” ²⁰ 'Ahooh hubuloombil hiladetnik 'ink'ez hik'ah ts'ih 'uhoot'en ka hiyuntez'az. ²¹ 'Et 'o 'un hedulh nanah dune hubutelh'en. 'En chah lhulhutsinkah Zebedee buye'kah. 'Ilhunuh James 'ink'ez 'ilhunuh 'en John hiyulhni. Bu'abá bulh ts'i cho be húdelhts'i 'ink'ez hubuloombil nahuyutl'oo. 'Et Sizi hubukahunih. ²² 'Et 'ahoh bu'abá highu dehaín'az 'aw 'et ye usda hoh 'ink'ez Sizi hik'ah ts'ih 'uhoot'en ka hiyuntez'az.

Sizi lhanah dune hunduda soo ná'ubalh'en

²³ Galilee yun k'ut Sizi ndulhcho nuya. Lizwif hubuluglez dune hubulh yálhtuk. Yak'uz k'une' whul'en, 'en hubugha khunek unzoo, 'i be hubulh yálhtuk. Ndan nduda 'ink'ez buyust'e tel'en, 'en ts'iyawh soo na'bulh'en. ²⁴ 'Et Syria huwhut'en, ts'iyawh hiyulh údits'o. Ndunnah lhenyoo dada bé hunduda, 'ink'ez ndan 'o nus bulh 'últ's'ulh chah, ndan nts'i nudúde buyúndá chah, 'ink'ez hubukaotuzuk 'ink'ez nuchahútsyah chah, 'en Sizi ts'un lhga budínla hoh ts'iyawh soo ná'binla. ²⁵ Galilee, 'ink'ez Decapolis yun k'ut whut'en chah, 'ink'ez Jerusalem whut'en, Judea whut'en, 'ink'ez Jordan took'oh 'onghoh whughah whut'en chah, 'et 'ahuneltsuk 'ilhunahuwésdel 'en ts'iyawh hiyuntezdel.

5

Sizi ndo búlhni, “Dawhuldzoo 'et hubughá whults'ut”

¹ 'Ilhunahuwésdel Sizi hubunilh'en. Dzulh yenun ts'ih whenya, 'ink'ez 'et nátl'adeda hoh yugha hódul'eh, 'en highu nindel. ² 'Et wheoobudunilh'i, 'et njan ndo búlhni,

³ “Lubeshi 'ulh'en, 'en budzi tel'en unli,

'en yak'uz k'une' whul'en bube'ildzun huzdli,

'et huwa dega nus hoonzoo hubugha whults'ut.

⁴ Hubulubeshi ghu ni hinli, 'en dega nus k'enánet'a hutele.

'En 'uhuja dega nus hoonzoo hubugha whults'ut.

⁵ Yuh údúildzun,

'en ndi yun k'ut bube'ildzun whutele, 'et huwa dega nus hoonzoo hubugha whults'ut.

⁶ Ndan ye be ts'ah'un 'uhoont'ah, 'i tube hukwa buye'élt'sul 'ink'ez ta'oosde lí'hint'ah, 'et hubugha óotelts'ulh.

'En degha nus hoonzoo hubughá whults'ut.

⁷ Bugha te'huninzun, Yak'usda chah hubugha te'untezil, 'et t'eh degha nus hoonzoo hubughá whults'ut.

⁸ Hubudzi dutsun chailah,

'en k'at le Yak'usda hute'ilh 'et huwa 'en degha nus hoonzoo hubughá whults'ut.

⁹ Ndan ts'ah'un na'a lhulh 'uhint'ah hubulh'tsi, 'en Yak'usda buzkeh ubahudaténih.

'Et huwa degha nus hoonzoo hubughá whults'ut.

¹⁰ Ndunnah ye be ts'ah'un 'uhoont'ah gha dzuh nobuhulhdeh, 'en yak'uz k'une' whul'en, 'et bube'ildzun hinli.

'Et huwa degha nus hoonzoo hubughá whults'ut.

¹¹ Dune nuhwheni ch'a yahutelhtuk 'ink'ez dzuh nunohotelhdzut, 'ink'ez ts'iyaitsuk whults'it khunek dutsun, 'i be nuhwheni ch'a 'uts'un na'a yahutelhtuk, 'et si sugha whuz na'a dune dzuh nunwhahulhdzut t'eh, 'et degha nus hoonzoo hubughá whults'ut.

¹² Whunélnik 'ink'ez degha nus hoonáht'! Yak'uz hooncha hoh nuhwhuba k'elha whutele. Nuhtsuh nus whunilh'en inle, 'en chah whuz na'a zeh bube huzula inle.

Huba 'alha 'uhoont'ah 'en lusel 'ink'ez be whét'en lí'hint'ah

¹³ Lubeshi 'uhulh'en huba lusel liaht'ah. 'Et whunts'ih lusel 'aw buzachahóolkh suli t'eh, nts'e na'a simba doo chah lusel buzahóolki naoodle? 'Aw hoonli ba chaázooh ho' 'int'ah. 'I 'ants'ih dune ti híyulhkuk 'ink'ez hik'unúdelh. ¹⁴ Ndi yun k'ut dune huba be whét'en, 'i lí'ah't'ah. Keyah whuti dzulh k'ut whuz'ai t'eh, 'aw whuntool'ih ghaít'ah. ¹⁵ Dune too dezak'un naidulhk'an 'ink'ez 'aw k'its'ai yut'ah niyóo'ah ghaít'ah. K'us kw'uzdai k'éite'ah 'ink'ez kwun 'i bugha ts'iyannah huwhuntel'hil. ¹⁶ Dune ba be whét'en ahli. 'I be nuhwhe'ut'en unzoo, 'i dune yuntel'hil 'ink'ez nuhwhe'aBá yak'uz usda, 'en degha nus hidutéhti."

Sizi ndo búlhni, "Moses be' dustl'us 'ink'ez nus whunilh'en bube dustl'us ts'iyawh lhadutésdlih"

¹⁷ "Moses be' dustl'us 'ink'ez nus whunilh'en bube' dustl'us 'i hoolah natelhtsilh ka whusaíya noohzin gunih. 'I ts'iyawh lhaoodutesdlih 'et wheni whusaíya. ¹⁸ 'Alha' dusni ndun whudusni, Moses be' dustl'us Hebrew bughunek k'una'a hoonsolyaz hoh 'uk'e'edúguz 'ink'ez hoosolyaz 'uk'e'edúsgus, ndet 'uwhulhni, 'et ts'iyawh 'et ndúhooja t'eh, 'et whults'un 'aw ndi yun 'ink'ez yat'ah chah 'ustl'e' 'uhóneh ghaít'ah. ¹⁹ Ndaí khunek neghalts'ut, hoontsolyaz whunts'ih dune k'uhinínyuz t'eh, 'ink'ez 'uyoon whuz na'a zeh wheobodutel'h'e t'eh, 'et sih yak'uz k'úne' whul'en, 'en 'aw hoonli chailah hiduténilh. 'Et ndi khunek netl'adélt's'ut, 'i dune ts'iyawh hik'une' 'ut'en t'eh, 'ink'ez 'uyoon chah whuz na'a 'az whebodutel'h'e, yak'uz k'úne' whul'en be ncha 'int'ah hiduténilh. ²⁰ Ndun whudusni ndunnah Moses be' dustl'us 'uk'ununa'úsduzug 'ink'ez Pharisee chah, 'en hiye be ts'ah'un 'uhoont'ah, 'ink'ez nuhwheni ye be ts'ah'un 'uhoont'ah, 'i be huba nus hoonzoo t'eh, 'aw 'et zeh nts'e yak'uz k'une' whul'en ts'ih téhdulh.

Nyulh dune hoonliyaz hoh nch'a detni t'ewhunínzun t'eh, bughu ninya 'ink'ez nyulh dune naooltsilh

²¹ "Whulh udahts'o netsuhda hubuhutni, 'Dune solhghelh gunih,' 'ink'ez ndan dune selhghi t'eh, 'et hukw'una'a huba nahuteyeh ho' hoon't'ah. ²² Ndun whuhdúzni, ndunnah 'ants'ih dulh dune bulh hunilch'e t'eh, 'en huba nahutedeh. 'Et ndan dudulh dune 'Raca' 'ulhni t'eh, khunek dakelh k'una'a 'Ntsi' ni hoh 'utni, 'i bugha naheyelh hububut huteyin. 'Ink'ez chah zeh ndun dune, 'Whuzinik dune inli ho' 'int'ah!' yulhni t'eh, 'en tube whewhúnjut kwuncho yuh ts'ih buhutenoh. ²³ 'Et huwa hoonliyaz Yak'usda buk'uzdai k'ut howa' té'alh, 'ink'ez nyulh dune hoonli nch'a hudetni whunailnih t'eh, ²⁴ 'et whutsuh nyulh dune bulh lhk'enahoodutseh. Hukw'elh'az k'an zeh Yak'usda buk'uzdai k'ut huwa' tan'alh, 'et huwa níoon'alh. ²⁵ 'Et khun dune hoonli nch'a hudetni t'eh, 'ahoh but's'un ts'ah'un na'hotneh. 'Et naheyelh but nínyutelhtelh whutsuh ndóneh. 'Aw ndúchainel t'eh, nch'a hudetni, 'en naheyelh but nínyutelhtelh. Naheyelh, 'en nélhghel t'anyutelhtelh 'ink'ez nch'a dána'dute'alh. ²⁶ Ts'ah'un 'un whudúzni, ts'iyaitsuk buk'elha whutelhtsilh whults'un, nts'e na'a simba whuch'a naohja?"

Ndun ts'eke yunilh'en 'ink'ez budzi yuh hoh duninzun, "Bulh tinta' test'ilh hukwa' nusuzn," 'et 'uda yulh tinta' ant'en ho' 'int'ah

²⁷ "Whulh udahts'o netsuhda hubuhutni, "Uyoon ts'eke bulh tinta' ont'en gunih."

²⁸ Sich'oh 'un whudúzni, dune ts'eke yunilh'en 'ink'ez budzi yuh hoh duninzun t'eh, 'Bulh

tínta' test'ílh hukwa' nuszun,' 'uda budzi yuh bulh tinta' ant'en ho' 'int'ah. ²⁹'Et nálnhnih ts'ih nyuna be lubeshi inla t'eh, hanón'alh 'ink'ez 'un ntolh'is. 'Et ndáhja t'eh nuhyust'e ndulhcho chadutésk'un hoh whanus soo' hoont'ah. ³⁰'Ink'ez nálnhnih ts'ih nla be tínta' nint'en t'eh, k'ont'as 'ink'ez 'un tolh'is. Nuhyust'e ndulhcho 'aw kwuncho yuh ts'ih chadutésk'un, 'et 'o nus soo' hoont'ah."

Dune ts'eke bulh lhgho delhts'i, 'ílhuz wheni 'uhoont'ah

³¹“O 'un chah nduhútni 'Nduun bu'at 'ustl'e' 'utelilh, ye' dustl'us 'istl'e' itelilh, 'i yutl'ayóólhchoos huba' hoont'ah.” ³²'Et whunts'ih 'un whudúsní, bu'at 'uyoon dune bulh tinta' 'ant'en 'et huwa zeh dustl'us ye' 'ustl'e' itelilh, 'i yutl'ayóólhchoos. Ndúchainel hoh bu'at 'ustl'e' 'uyínla t'eh, dich'oh bu'at tinta' 'ant'en yulltsi. 'Ink'ez ndun ts'eke 'uyoon dune ghu nasda t'eh, dune 'en chah tinta' 'ut'ih unli ho' 'int'ah."

Khun nyunch'oh nghunek k'ónyis gunih

³³“Et doo chah niz de whudezulh da ts'iyawh t'eeonáhzun 'uda dune daja hutni hoh njan duhutni, 'Khun nyunch'oh nghunek k'ónyis gunih. 'Et neMoodihti but's'u nahízinya 'et nduhoolcho hukw'una'a 'ont'en huba' hoont'ah.” ³⁴'Et whunts'ih sich'oh 'un whudúsní, khun whuz na'a teh ndudóohni gunih. Khun 'Yak'uz whunalh 'udusni,' doohni gunih. 'Alha yak'uz ts'ih Yak'usda bukw'usda cho dezti, 'i 'et su'ai. ³⁵'Ink'ez, 'Ndi yun k'ut whunalh 'udusni,' doohni gunih. Yak'usda duke yuk'udelhú'ez, 'i 'int'ah 'et huwa. 'Ink'ez khun teh, 'Keyah Jerusalem whunalh 'udusni,' doohni gunih. Hubudayi cho k'us dezti bukeyah wuho 'uhoont'ah 'et huwa. ³⁶'Ink'ez khun teh, 'Sutsi be 'alha' dusni,' doni gunih. 'Aw ntsigha 'ílhuk'i whuntsi dylul k'us dulhgus 'ólhtsilh hoolah. ³⁷'Et ndez na'a njan dúdoohtni, 'Aw 'et 'A,' dahtni, 'A,' 'int'ah. 'Ink'ez 'Awundooh,' dahtni t'eh chah, 'Awundooh,' 'uhoont'ah. 'Et 'uts'un na'a 'udutéhnílh t'eh, 'et síh ntsi' ts'ih hadutédoh ho' 'int'ah."

Dune ntsi', 'en buch'a nónt'uk

³⁸“Et whutsuh da whulh udahts'o nts'e na'a dune daja hutni inle njan duhutni, 'Dune buna chawhés'en silhtsi t'eh, nyunch'oh nyúna be chawhés'en tanle. 'I be kw'elha whutelt'silh. 'Et bughoo habe'alhchus t'eh, nyunch'oh nghoo be k'elha whutelt'silh,' hutni inle. ³⁹'Et whunts'ih 'un whuhdúsní, dune ntsi' k'ól'en gunih. 'Et k'us ndan nálnhnih ts'ih nuhnezkuk t'eh, 'et 'intl'as ts'ih but's'un nándunont'ah. ⁴⁰Khun ndan nts'oozt'an naheyelh but nts'u yuka 'utni t'eh, ndzoot 'i chah bughá yólhchoos. ⁴¹Dune 'et nduhóólhdzah sulh ti ínjalh nyulhni t'eh, nat 'uwuhldzah ts'ih bulh neóonya. ⁴²Ndan hoonli nts' un hukwa 'utni t'eh, hubugha yó'alh. Hoonli bughu sinla yulhni t'eh, buch'a naool'ah gunih."

Nuh'az detni, 'en buk'eeohtsi'

⁴³“Et whulh údahts'o hubuhútni, 'Nyeghah whut'i buk'eeohtsi' 'ink'ez nch'a hudetni, 'en but's'u dontnik.’ ⁴⁴Nduun whúdsni, nuhch'a hudetni, 'en buk'eeohtsi'. Ndunnah denwhútdule, 'en khunek unzoo, 'i be hubulh yaóólhtuk. Ndunnah nuhts'u dutnik, 'en but's'un wahzoo. 'Et ndunnah hoontsi' nuhts'un ne'hut'en 'ink'ez dzuh nunwhahulhdzut, 'en chah buba tenadoohdli. ⁴⁵'Et ndez na'a nuh'aBá yak'uz usda, buzkeh wahle. Yak'usda ndunnah hintsi' 'ink'ez hinzoo 'en ndi sa lhulhúgha buk'eidindi. Ts'ah'un 'uhint'ah 'ink'ez ts'ah'un cha'hít'ah, en chah lhulhúgha buk'ut nawhúltih. ⁴⁶Ndunnah nuhk'entsi', 'en zeh hubuk'ehtsi' t'eh, di simba nuhgha óokat? Sooneya nalhdzooch chah whuz na'a zeh nduhút'en. ⁴⁷Nuhwhulhutsinkah zeh dahooja hubudahni t'eh, 'uyoon degha nus ahzoo na'dunáhzun ih? Hoolah! Sooneya nalhdzooch, 'en chah whuz na'a zeh nduhút'en. ⁴⁸Nuh'aBá yak'uz usda dant'ah hoh ts'ah'un 'int'ah, nuhwheni chah whuz na'a zeh ndóht'e huba' hoont'ah."

6

'Ut'en unzoo, 'i 'ulh'en t'eh, khun ts'iyannah nalh tube cho whe 'ududoolhúti gunih

¹“Huwahlí! Khun tel'en gha' teh'alh t'eh, ts'et wuhocho ndóht'en gunih. 'Et whuz na'a ndaht'en t'eh, nuhwhe'aBá yak'uz usda, 'en 'aw nuhwuha k'elha holhtselh ghaít'ah. ²'Et huwa tel'en gha' teh'alh t'eh, khun ts'iyannah nalh tube cho 'ududoolhúti gunih. Ndunnah duba nahudzoo, 'en 'et whuz na'a 'et duhút'en. Lizwif hubuluglez k'us ti whulheguz 'et ts'iyannah hubunoohl'en ka, 'et nduhút'en. 'Alha' dusni, ndunnah ba 'uk'elha whutele, 'uda huba 'uk'elha whuzdli ho' hoont'ah. ³'Et whunts'ih tel'en gha' teh'alh t'eh, nyula 'intl'as ts'ih 'aw t'ewhunozin nyula nálnhnih ts'ih dat'en 'et. ⁴'Et whuz na'a 'uyoon t'ehonízsun 'et ndaht'en hoh tel'en bugha 'áh'aih. 'Ink'ez nuhwhe'aBá yak'uz usda, 'en dahooht'ah huwa 'et ndaht'en, 'et ts'iyawh nuhwuníhl'en ho' 'int'ah. 'Et huwa dich'oh ts'iyannah but hoonzoo hoh nuhwuha k'elha whutelt'silh."

Ndez na'a tenadoohdli huba' hoont'ah

⁵“Et tenadahdli t'eh, khun ndunnah duba nahudzoo k'ah ts'ih tenadoohdli gunih. Ndun-nah Lizwifhubuluglez nahudelhúya, k'us ti wheguz chah, 'ants'ih ts'iyannah hubunoolh'en ka tenahududli. Ndun whudúсни 'uda huba k'elha whuzdli ho' hint'ah. ⁶'Et nuh-wheni tenadutehdli t'eh, nuhwhenich'oh whaht'i, dati dána'dehtan 'ink'ez tenadoohdli. Nuhwhe'aBá, 'aw be chaoodést'en, 'en ts'iyannah nalh nuhwhuba k'elha whutelhtsilh. ⁷'Et tenadahdli t'eh, lhat cho lhtanahooohdeh gunih. Whuz na'a ndunnah 'aw Yak'usda t'echahunízun tenahududli. Lhai khunek be tenahududli t'eh, 'et sih Yak'usda hubudutés'o huninzun. ⁸'En hubuk'una'a 'udoohni gunih. Nuhwhe'aBá dant'i be ndunahdzit 'uda t'ewhunínzun ho' int'ah. ⁹'Et ndez na'a tenadoohdli, 'Ne'aBá yak'uz sinda.

Nyoozi dóoti.

¹⁰Hoh hubudayi cho inli, whusahóolts'it.

Hukwa' ninzun t'eh, ndoh honeh, ndi yun k'ut 'ink'ez yak'uz chah.

¹¹K'an dzin uzte'alh, 'i negha iní'ai.

¹²Uyoon bulh tink'us ts'uwhulh'ai t'eh, buba whunats'odoolnah. 'Et whuz na'a zeh tink'us 'uts'ut'ih 'et neba whunaoodolnah.

¹³Nts'e tink'us ts'unint'uk, whuch'a neghinli.

'Ink'ez ndun ntsi', 'en chah buch'a neghinli.

'Et yak'uz k'une' int'en int'ah, 'ink'ez be ilhtus,

be dénti, 'i chah, 'i 'ilhuz wheni, 'i ts'iyawh nye'ildzun int'ah.

'Et ndoh honeh.'

¹⁴Dune nuhwhudulhyah né'hut'en t'eh, buba whunaoodelhúnah t'eh, nuhwe'aBá yak'uz usda, 'en chah nuhwhuba whunaoodutelnah. ¹⁵'Et whunts'i dune nuhwhudulhyah né'hut'en t'eh, 'ink'ez buba whuchanaooduzulhunah t'eh, nuhwe'aBá yak'uz usda, 'en chah nuhwhuba whunaoodoolnah ghaít'ah.”

Sahá'delhuya t'eh, 'onghunnah hubuch'a nonoolh'i

¹⁶“Ndet sahá'delhuya t'eh, ndan duba nahudzoo, 'en hubuk'una'a 'ooh't'e gunih. 'En hubudzi yuh 'uhilhdzun na'hududil'i ho' hint'ah. Dunen 'uts'un 'oonint'en hiyúllts'ih, whuz na'a te'hududil'en 'ink'ez dzuh nuhuzut na'hududil'i, 'uyoon húbonoolh'en ka. 'Alha ndun whudusni, ndan nduhút'en, 'uda huba k'elha whuzdli ho' hint'ah. ¹⁷'Et nuhwheni sahá'delhúya t'eh, soo cho nuhwhunen chah na'óolhdeh 'ink'ez nuhts'igha chah naoolhlo. ¹⁸'Et whuz na'a sahá'delhúya t'eh, 'et 'onghunnah hubuch'a nonah'i. 'Et whunts'ih nuhwe'aBá cha'whést'en ts'ih whunts'ih whunilh'en, ts'iyannah nalh nuhwhuba k'elha whutelhtsilh.”

Yak'uz be hoonzoo 'uhoont'ah, 'i be yak'uz ts'ih whuz 'ilho neóohlelh

¹⁹“Ndi yun k'ut hoonáht'i, 'i 'ilho 'oohlelh gunih. Ndulh'en t'eh, 'ants'ih k'enadiduts'ih 'ink'ez muszooombaiyaz chah hoolah yutelhtsilh. 'Undunut'ih, nuhghu dá'duteyus 'ink'ez hidunter'ih. ²⁰'Et yak'uz be hoonzoo 'uhoont'ah, 'i whuz 'ilho wéhla. 'Aw buk'ena'dooduts'ih ghaít'ah. 'Ink'ez muszooombaiyaz chah 'aw hoolah yoolhtselh ghaít'ah. 'Aw nuhghu da'hooyis 'ink'ez nuhgh'e hudunoot'ih ghaít'ah. ²¹'Et ndet be hoonzoo 'uhoont'ah, ndet sáhla, nuhdzi chah 'et duté'ah.”

Dune buna too dez'k'un li'int'ah

²²“Nena neyust'e ba too dez'k'un li'int'ah. Nuhna soo int'ah t'eh, nuhyust'e be whét'en, 'i dez'bun. ²³'Et whunts'ih dune buna tink'us 'ut'en be untsi' t'eh, 'et buyust'e ndulhcho tsahólhgus be duté'bun. 'Et huwa be whét'en nohwhulh int'ah tsahólhgus k'una'a be hoodet'en t'eh, dáhoolcho, 'i be simba tsahólhgus wule?”

Yak'usda k'une' int'en t'eh, sooneya chah k'une' ont'en ghaít'ah

²⁴“Ilhunuh dune nanah moodih ba 'oot'en ghaít'ah. 'Ilhunuh 'en yuts'u dutetnik 'ink'ez 'ilhunuh yuk'etetsi'. K'us 'ilhunuh yuk'úne' tet'en 'ink'ez 'ilhunuh yuch'a dutetni. 'Aw Yak'usda k'une' int'en 'ink'ez sooneya chah k'une' ont'en ghaít'ah.”

Yinkak delhúts'i huwu ni wahle gunih

²⁵“Et huwa njan ndun whudusni, yinkak delhúts'i huwu ni wahle gunih. Teh'alh, 'i 'ink'ez tehnilh, 'i chah, 'ink'ez nuhyust'e be soo nadutehnilh, 'i chah, 'i ts'iyawh khun bugha ni wahle gunih. Teh'alh, 'i be kháhna, 'i degha nus dezti nahzun ih? K'us naih 'i nuhyust'e degha nus dezti nahzun ih? ²⁶Nduk dut'ai núdelh, 'i nulh'en! 'Aw hacha'nusdle 'ink'ez 'aw khi huba ilhucha'wesdle ilah. 'Et whunts'ih nuhwe'aBá yak'uz usda, 'en bugha 'á'aih. Nuhwheni 'en ilah 'o nus huba déhti. ²⁷Nuhtah ndan dalcho tele howu ni unli? 'Aw 'et huwa

'o nus 'ulyez wule ghaít'ah!²⁸ Di ka be dune tehleh wuni ahli? 'Indakyaz nts'e na'a haniyeh, 'et howu nuni nahzut. 'Aw cha'hust'en 'ink'ez 'aw naih chah cha'hulh'en hiye dune tele ka.²⁹ Ndun whudusni Solomon 'en whunts'ih soo nadut'ih teh, 'aw 'indakyaz yuch'a dega nus cha'ildzoo. ³⁰Yak'usda tl'o unzoo, 'i yill'h'i. 'I k'an dzin tl'o k'ut haniyeh 'ink'ez bunt'ah 'i tsehidutelhkuh 'ink'ez duték'un. 'Et dáhoolcho 'i be nuhwheni 'o nus soo nanohdutele? Nuhwheni 'aw soo cho nuhwhuba 'alha' cha'hoot'ah ho' aht'ah!³¹ 'Et huwa di simba ts'oo'alh, k'us di simba ts'ootnai, k'us di simba be dune ts'ooole, noohzin gunih. ³²Alha 'udun yun k'ut whut'en 'et zeh hukwa hités'en. 'Ink'ez 'alha 'i be nuhwhe'abá yak'uz usda, ndai hoonliyaz be ts'udunudli, 'i ts'iyawh t'eeoninzun. ³³Ndet Yak'usda nuhwhuba hubudayi cho tele 'ink'ez ye ts'ah'un na'a 'uhoont'ah, 'i nuhbe'ildzun tele, 'et zeh hukwa' nahzun t'eh, 'o 'un, 'i chah ts'iyawh nuhgha tékuh ho' hooht'ah. ³⁴'Et huwa bunt'ah dawhútenilh, 'et howu ni wahle gunih. Bunt'ah dawhuténilh, 'et ndo honeh. Dzin totsuk soo' hoolcho howun ni hoonli 'et huwa."

7

Uyoon ba nahoohyeh gunih

¹ "Uyoon ba nahoohyeh gunih. Doo ka sih nuhwhuba nahodeh. ²Nts'e na'a 'uyoon ba nahahyeh, 'et whuz na'a nuhwhuba nahutedeh. 'Ink'ez nts'e na'a 'uyoon ghu nuni nahdzut, whuz na'a zeh nuhghu nuni huntezut. ³'Et di ka nyulhutsin lhuyaz buna k'et deztan, 'i nilh'en, nyunch'oh duchun cho nyuna k'et deztan 'ink'ez? ⁴Nts'e na'a nyulhutsin 'uduténilh, 'Nyuna k'elts'ut, 'i nyuna k'éhanaóos'alh,' 'ink'ez nyunch'oh lhi'ílcho, 'i nyuna k'et su'ai, 'i 'aw chanílh'en? ⁵Buba naindzoo! 'Udechoo lhe'ílcho, 'i nyuna k'élt's'ut, 'i choo nyuna k'éhanain'aih. 'Et sih soo whunilh'en hoh buna k'élt's'ut, 'i buna k'éhanáyó'alh. ⁶Yak'usda bughunek lubeshi bughuh hoolah, 'i khun teh lhikah ndult'ah hubugha yóoh'alh gunih. K'us Yak'usda ye whúneodulh'eh, 'i kw'usul dezi, 'i pearl hiyulhni, 'et dult'ah, 'i khun teh goso dult'ah butayóohdelh gunih. 'Et ndahja t'eh, ndulhcho hik'unutélh'us 'ink'ez 'ahoh nuhts'un nahulhúya 'ink'ez yanohodutélhch'ulh."

Yak'usda nuhts'o hukwa' ninzun, 'et Yak'usda hukwa' oodolhkut 'ink'ez nuhgha whúte'ah

⁷ "Yak'usda bukayoodulhkut, 'i nuhgha ite'ah. Bukunáhta 'ink'ez nahooté'ah. Ndati whudúlhghalh 'ink'ez nuhwhuba da'dutékwus. ⁸Ndan 'oodulhkut, Yak'usda hubugha whúte'ah. Hoonliyaz hukunúta, 'en nahahooté'ah. 'Ink'ez ndati hodulhghalh 'en Yak'usda huba dá'dutet'ílh. ⁹Ndunnah nuhbákah nuhtah, buye' lhes yuts'u ka 'utni t'eh, tse yughá ndunóo'alh ghaít'ah. ¹⁰K'us lhook yuts'u ka 'utni t'eh, hoh tl'ughus yugha óolelh ghaít'ah. ¹¹Nuhwheni lubeshi 'ulh'en ahli, 'et whunts'ih t'eeonahzun nts'e na'a unzoo, 'i nohwuzkeh hubugha ité'ah. Dáwhulcho, 'i be 'o nus nduk yak'uz nuhwhe'abá, ndunnah yoodulhkut, unzoo, 'i hubugha ité'ah. ¹²'Et huwa nts'e na'a hukwa' nahzun dune danoh hotelh'ílh, 'et whuz na'a zeh nuhwheni 'et ndúboohl'en. 'Alha Moses be' dustl'us, 'ink'ez nus whunilh'en bube' dustl'us chah, 'et nawhult'ah 'et nduwhútni."

Ndi hukwuti hoondot

¹³ "Njan hukwuti hoondot 'et hukohdelh huba' hooht'ah. 'Et hukwuti hoontel, 'et hoontsi' ts'un whuz'ai, whuz whéti 'uhoont'ah 'ink'ez lhanah whuz whehúdelh. ¹⁴Njan 'et huwa 'et nduhút'en, njan hukwuti hoondot, 'i 'ílhuz be ts'ukhuna 'uhoont'ah 'ink'ez howa whulna ho' hooht'ah. 'Aw lhanah ilah nahuhóo'aih."

Dune dahút'en, 'et 'i be dahint'ah t'eeobuntehzeh

¹⁵ "Ndunnah whuts'it be nus whunilh'en na'dudil'i, 'en buka huwahli! Sheep zuz be soo dint'ah, 'en buyuh ts'ih yus soo dega nus ntsi' 'en lí'hint'ah. ¹⁶'Et huwa dahút'en, 'et 'i be t'eeobuntehzeh. 'Et mai cho whus chuntah ih oonahye? K'us ndi mai, figs hiyulhni, chuntah whuduts'ul whutah oonahye ih? 'Awundooh! ¹⁷'Et whuz na'a zeh duchun unzoo, 'i mai unzoo, 'i bugha haniyeh. ¹⁸'Ink'ez duchun dalhjut, 'i 'aw mai unzoo, 'i bugha hanóoyeh ghaít'ah. ¹⁹Ts'iyai, 'i duchun 'aw mai unzoo, 'i bugha hanooyeh ghaít'ah, 'i nánuhidutselh 'ink'ez hidelhk'un. ²⁰'Et huwa dune chah whuz na'a ndúhint'ah. 'Et huwa t'eeobunoohzin."

Yak'usda k'únucha'ust'en, 'en Sizi Gri bube'ildzun chahilah

²¹ "Aw ts'iyannah, 'SMoodihti, sMoodihti,' sulhni, 'aw nts'e yak'uz k'une' ts'uwhul'en whuz hutooya ghaít'ah. Ndan se'abá but's'o hukwa' ninzun tune' 'ut'en, 'aw 'en zeh yak'uz ts'un hutédulh. ²²'Et ndunnah njan dzin whusawhélt's'ut t'eh, 'SMoodihti sMoodihti, 'alha nyoozi be nus ts'úhoo'en. 'Ink'ez nyoozi be ntsi' nududeh, 'i 'uyoon bughu whe náts'inanyoot! 'Ink'ez nyoozi 'i be huwa 'ét'en tune' ts'ut'en, hutni. ²³'Et ndunt'ah dune ts'iyawh hubudutésnilh, "Aw t'enwhunuzúszun. Such'a nasahdel! Nuhwheni 'aw suk'unucha'aht'íl aht'ah!'"

Sizi Gri bughunek soo cho whulh ts'ooyin

²⁴“Et huwa ndunnah sughunek yoozilhts'ai, 'ink'ez daja dusni hukw'une' hut'en, ndun dune whunih bukoo tse k'ut niooni'ai, 'en k'una'a 'uhint'ah. ²⁵'Aw 'et nawhéoonilhtan 'ink'ez too 'aw 'et ulhtus sulii, 'i njan bukoo whut'agheznai. Nilhtsi ulhtus, 'i chah whudelhts'ut. 'Et whunts'ih njan bukoo 'aw dachahóonil. Njan bukoo tse k'ut whuz'ai 'et huwa. ²⁶'Et whunts'ih ndan sughunek hudits'o 'ink'ez 'aw hik'unucha'ust'en t'eh, ndun dune whusnik, 'en bukoo 'ants'ih sai k'ut niooni'ai, 'en duhúlt'ah. ²⁷'Aw 'et nawhéoonilhtan 'ink'ez too 'aw 'et ulhtus sulii, 'i njan bukoo whut'agheznai. Nilhtsi ulhtus, 'i chah whudilhts'uk. 'Ink'ez njan bukoo nawhélt's'ut. 'Ink'ez wééonujut hoh nahwélt's'ut.” ²⁸'Et Sizi ndi khunek ye hubulh yailhtuk, 'i lhaduja hoh 'ilhunahuwédsel tube huba hooncha. ²⁹Khunek be butl'awhélt's'ut hoh wheobudalh'i. Ndunnah Moses be' dustl'us k'ut 'uk'ununa'úsduzug, 'aw whuz na'a hubuchaoodílh'il.

8

Dune hubukak whulhjut 'en Sizi soo na'binla

¹'Aw 'et Sizi ndus de dzulhyaz k'uz hanaja hoh lhanah dune hinantesdel. ²'Et hoh dune bukak whulhjut, 'i leprosy hiyúlhni, 'en yududezya, yubut nachaniti 'ink'ez ndi yúlhni, “SMoodihti nyun hukwa' ninzun t'eh, ndi ndai be ilhtus, 'i 'int'i, 'i be suna'ilhdeh.” ³'Et Sizi bula be yut'aghéznai 'ink'ez, “A, hukwa' nuszun. Nyuna'alhde!” yúlhni. 'Et bukak whulhjut, 'et 'ahoh soo na'uja. ⁴'Et Sizi ndi yúlhni, “Khun teh 'uyoon doni gunih! 'Et náwhulnuk but's'inyalh 'ink'ez ts'ah'un na'a dñni nyust'e nts'e na'a hoh soo na'uja 'ink'ez nyunoolh'en. 'Et Moses be' dustl'us yuk'uyaoolhtuk. 'I bugha ndai huwa ta'alh, 'i nyudóoni. 'Et whuz na'a ts'iyannah whubuntalhtun dainja hoh soo na'inja.”

'Ilhunuh Rome whut'en nehughan bumoodih, 'en buye' Sizi soo na'yinla

⁵'Aw 'et Sizi keyah Capernaum ts'ih huwhutni ninya hoh 'ilhunuh Rome whut'en nehughan bumoodih, 'en yududezya hoh yuts'u tedudlih, ⁶“SMoodihti se'ustlenyaz, 'en njan koo yun sulhti 'aw dechadusnik hoh tube dzuh nuzut.” ⁷'Et Sizi 'uyulhni, “Buts'u tesyalh 'ink'ez soo na'tesdlíh.” ⁸'Et whunts'ih ndun nehughan bumoodih 'uyulhni, “SMoodihti sukoo ts'ih tanyalh huba 'aw soo cha'lhúdzoo. 'Ants'ih nghunek be 'et ndudénja t'eh, 'et whunts'ih se'ustlenyaz soo na'ootnelh sih. ⁹'Alha si chah 'onghunnah sugha ndoh 'uhint'ah hoh hukwa' huninzun tune' suhulh'en. 'Et si chah whuz na'a zeh nehughan huba ndoh 'ust'ah. 'Et 'ilhunuh, 'Inyahl!' dusni t'eh, 'et 'aho wheyih. 'Et 'uyoon 'Anih,' dúsni t'eh, 'et 'ahoh sughu yih. 'Et se'ulhna, 'Njan dineh!' dúsni t'eh, 'et 'ahoh 'et ndút'ih.” ¹⁰Sizi ndun dune ndét 'uwhúlhni whulhúdants'o hoh tube ba hooncha. 'Et huwa ndunnah yunedulh ndo búlhni, “Israel whuyun k'ut ndulhcho hoh, 'aw ndun dune whuz na'a buba 'alha 'uhoot'ah nachalhtel. ¹¹'Et ndun whudusni ndaz de 'ink'ez nus de lhanah whusatedulh hoh yak'uz k'une' whul'en ts'ih 'et Abraham, 'ink'ez Isaac, 'ink'ez Jacob chah, 'en 'ilho lhula na'hutet'ah. ¹²'Et whunts'ih ndunnah yak'uz k'une' hool'en huba 'int'ah inle, 'en 'az tsahólhgus ts'ih hubotelhdulh. 'Et ts'iyawh hutso 'ink'ez hubughoo lhebídutelhk'us.” ¹³'Et Sizi ndun nehughan bumoodih 'en ndi yúlhni, “Aw 'et inyahl! 'Et nts'e whula mba 'alha 'ust'ah, whuz na'a zeh mba' whuténilh.” 'Et soo 'et 'uhunet'oh hoh be 'ustl'enyaz soo na'uja.

Peter bubez, 'en chah Sizi soo na'yinla

¹⁴'Et Sizi, 'en Peter bukoo daninya hoh bubez yunilh'en. 'Et kw'usti k'ut sulhti dada nézul be nduda. ¹⁵Yuzih nininya 'ink'ez yula t'agheznai. 'Et 'ahoh ndi nézul nduda but's'uh hanaidee. 'Et 'ahoh dinadija 'ink'ez bugha ná'unt'ai.

Lhanah ntsi' nududeh hubuyidélhts'i, Sizi bughunek be but's'ah haóobunanyoot

¹⁶'Aw 'et sa yuk tez'ai hoh lhanah ntsi' nududeh hubuyidélhts'i, 'en Sizi highu buninla. Bughunek be ntsi' nududeh, 'i hubuyáh hanaínanyoot. 'Et ts'iyawh ndan nduda, 'en ts'iyawh soo na'ubinla. ¹⁷'Et whuz na'a Isaiiah nus ho'en hoh ndutni, 'et ts'iyawh 'et ndúhooja. 'Et huwa njan ndutni, “Ndai lait'ah neilh'i, 'i ts'iyawh neghu yílhchoot. 'Ink'ez nedada chah 'i nets'u hanáhonla.”

Ndun Sizi Gri ba ne'tét'en hukwa' ninzun t'eh, 'et t'eh ndai ndi yun k'ut hukw'entsi, 'et ts'iyawh whuladootni huba' hoont'ah

¹⁸'Et 'ilhunahuwédsel ts'iyawh hinasdúzug. 'Et Sizi whunalh'en hoh 'et ndunnah yulh 'ut'en, 'en ts'iyawh ndo búlhni, “Nyan uztooke.” ¹⁹'Et 'ilhunuh Moses be' dustl'us 'uk'ununa'usdúzug, 'en yughu ninya hoh ndi yúlhni, “Nehodulh'eh nts'oh tula nutányalh, 'et ndulhcho nyun tesyalh hukwa' nuszun.” ²⁰'Et Sizi ndi yúlhni, “Soo cho howu nuni ninzut! Nanguz 'en chah 'an whut'i ho' 'int'ah 'ink'ez dut'aiyaz chah ut'o ut'i. 'Et whunts'ih yinkak dune ye', 'aw hukw'ut tsin tel'alh 'et whunts'ih chahóot'ih.” ²¹'Et 'uyoon yugha hoodul'eh,

'en ndi yúlhni, “SMoodihti subailh'i. 'Se'abá wheyutelhtel choo.” ²² 'Et whunts'ih Sizi ndi yúlhni, “Sunanyalh! Dudulh yaidla dich'oh wheyunalhuhooyelh.”

Nilhtsi 'ink'ez tatsi bulh 'i whunts'ih Sizi hik'une' 'ut'en

²³ 'Aw 'et ts'i beinya 'ink'ez yugha hoodul'eh, 'en ts'iyawh hiyulh 'úja. ²⁴ Ni huzki ibulh hubulh taoodelts'ut 'ink'ez 'aw 'et ts'i be tawhenduniteh, 'et whunts'ih Sizi 'en nanisti. ²⁵ 'Ink'ez yugha hoodul'eh, 'en hits'u whendel ts'enahiylulhdzit. “NeMoodihti netalhyis! 'Aw 'et too ts'uteghan!” ²⁶ 'Et ndo búlhni, “Di ka whénlhujut? 'Aw bé 'alha' whut'en, 'i soo 'últus, 'i चाह'ih ho' dahni.” Didinya hoh khuneki be whusaw' yudáni too 'ink'ez nilhtsi bulh yatelhuk, 'ink'ez 'aw 'et dinghel. ²⁷ 'Et ndunnah dune huba hooncha hoh 'ulhódutni, “Ndun dant'ah dune simba 'int'ah? Nilhtsi 'ink'ez tatsi bulh 'i whunts'ih hik'une' 'ut'en.”

Nanah dune ntsi' nududeh, 'i hubuyudínda, 'en Sizi ntsi' nududeh, 'i buts'ah hanaóobunanyoot

²⁸ 'Aw 'et nyan nisúki ndunnah Gergese hubuyun k'ut huwhutni, whuz lghuhudindel. 'Et nanah dune highu nin'az. 'En ntsi' nududeh, 'i buyudínda. Ndet neyust'e 'ahule, 'et whuz de hahá'az. Soo cha'hunizun k'et 'aw dune buyust'e ghash lhoya ghait'ah. ²⁹ 'Et khunyaz tube cho 'uhutni, “Sizi nyun Yak'usda buYe' inli ho' 'int'ah! Ndai nets'u hukwa' ninzun? Nket'ah neba whusaóotelts'ulh whutsuh, dzuh nunetalhdzut ka 'inja whusainya?” ³⁰ 'Et njan howu nilhdza, 'et goso lhai hoh ahú'alh. ³¹ 'Et ntsi' nududeh, 'en hits'u tedudlih hoh hiyulhni, “Whusanáneuntanyulh t'eh, 'et nyooz goso yúzdookeh netl'ahó'alh.” ³² 'Et “Ahdulh!” ndo búlhni. 'Aw 'et ntsi' nududeh, 'i ndunnah dune hubuts'uh haídande hoh goso yídande. 'Aw 'i bulh goso wheghah helghaz 'ink'ez too hubanghan. ³³ 'Et ndunnah goso ghuhinli, ts'iyawh 'ahoh keyah ts'ih whehélgaz. 'Ink'ez keyah whut'en ts'iyawh ndo badáni dahooja 'et. Ndunnah nanah ntsi' nududeh, 'i hubuyidande inle, 'et dahúja nduhóolcho ndo badáni. ³⁴ 'Aw 'et keyah whut'en, ts'iyawh 'az whehélgaz 'ink'ez Sizi hidudezdel. Hitel'h'en ibulh njan buyun k'ut whuch'a naóoja, 'et hukwa hits'u tedudlih.

9

Sizi ndun dune 'et ndi yulhni, “Nlubeshe ts'iyawh mba hoolah sulí.”

¹ Sizi 'aw 'et ts'i benya 'ink'ez nyan wheháni dich'oh dukeyah ts'ih. ² 'Aw 'et ndun dechadusnik, 'en kwusuti be whusahíyankai. Sizi hubunilh'en 'ink'ez t'eeoninzun huba 'alha' hoont'ah. 'Et dechadusnik 'uyúlhni, “Dahooja 'uski, nduk 'un dunilt'uk! Nyulubeshi ts'iyawh mba hoolah sulí!” ³ 'Et 'ahoh bulunah Moses be' dustl'us 'uk'ununa'úsduzug 'ulhódutni, “Ndun dune Yak'usda ch'a yalhtuk ho' 'utni!” ⁴ 'Et daja huninzun Sizi 'et ts'iyawh t'eeoninzun. 'Et ndo búlhni, “Di ka nuhdzi yuh ntsi' ghu nuni nahzut?” ⁵ Ntsi'e na'a simba huwa chahoolnah k'una'a uzdooni? 'Lubeshe mba hoolah sulí, k'us, 'Didinyih 'ink'ez inyalh?” ⁶ 'Et njan t'eeonóhzin yínkak dune ye, 'en ndi yun k'ut huba' hoont'ah ho' 'int'ah lubeshi 'un toolhdelh ka huba' hoont'ah ho' 'int'ah,” hubúlhni. 'Ink'ez ndun dechadusnik, “Didinyih 'ink'ez kw'usinti, 'i nailchoot 'ink'ez nkoo ts'ih naindalih?” yulhni. ⁷ 'Et 'ahoh dinadija 'ink'ez bukoo ts'ih whenája. ⁸ 'Et 'ilhunahuwéedel ts'iyawh huba hooncha 'ink'ez Yak'usda hidálhti, dune, 'en chah butl'aho'ai hoh huba' hót'e ka.

Matthew 'en sooneya nalhdzooch

⁹ 'Et hukw'elh'az Sizi wheghah lhuseya hoh ndet sooneya nalhdzooch, 'et 'ilhunuh dune Matthew hiyulhni, 'et usda yunilh'en. “Sunanyalh,” yulhni. 'Et didinya 'ink'ez yuk'ah ts'ih oot'en ka yuntezya. ¹⁰ Sizi yukoo ts'ih daninya 'ink'ez buzih usda bula na'utet'alh. Sooneya 'ilhunanozew'aih 'ink'ez lubeshi 'ulh'en, 'en chah koo dahunindel 'ink'ez Sizi 'ink'ez yugha hoodul'eh hubulh hubulana'hut'alh. ¹¹ 'Ink'ez ndunnah Pharisee hinilh'en hoh yugha hoodul'eh hubuhoodulhuk, “Nuhodulh'eh, 'et di ka sooneya 'ilhunanozew'aih 'ink'ez lubeshi 'ulh'en chah hubulh na'ut'alh?” ¹² 'Et Sizi bubulh údants'o daja hiyulhni 'et ndo búlhni, “Ndunnah soo 'int'ah 'aw yoo be duyun ka cha'hunizun. Nduda, 'en zeh yoo be duyun ka' huninzun. ¹³ 'Et huwa ahdulh 'ink'ez ndet 'uk'e'whe'edúguz hoh 'et hodoohlú'eh, “Uyoon hubugha te'ntehzilh 'et nuhts'uh hukwa' nuszun. Ndai Yak'usda buk'uzdai k'ut hidutelhk'un, 'i buka' cha'núszun, ni. Si chah whuz na'a, 'aw dune ts'ah'un 'uhint'ah, 'aw hubuka ilah whusáya. 'Et lubeshi 'uhulh'en, 'en bulubeshi ch'a bubení naháhdunooleh ka, 'et huba whusáya.”

John yugha hoodul'eh, 'en sahá'delya 'et Sizi hukwa hiyoodulhukut

¹⁴ 'Aw 'et John yugha hoodul'eh, 'en Sizi ts'un humindel hoh hiyoodulhukut, “Dáhoont'ah huwa wheni chah 'ink'ez Pharisee, 'en chah lhat hoh sahá'delya. 'Ink'ez nyun ngha hoodulh'eh, 'en 'aw sahá'chahudulhuye?” ¹⁵ 'Et Sizi ndo búlhni, “Ndun bu'at whutele, 'en bulh dunekah 'awhuz hiyulh 'int'ah, 'en chah ih soo sahá'huduteliyh? 'Awundooh! 'Et whunts'ih dubulh dunekah buch'a nahítelhtel, 'et t'eh zeh sahá'huduteliyelh. ¹⁶ 'Ink'ez chah, 'aw 'uda, 'i

dzoot 'aw k'andit, 'i naih be naoolhkut ghaít'ah. 'Et nyoo k'andit, 'i naih naootétsulh 'ink'ez but's'u hanaitech'ulh, 'et 'o nus hootétsi'.¹⁷ 'Et doo chah, 'aw k'an mai too, 'i 'aw 'ujut, 'i 'uzus be yóolhdzeh ghaít'ah. 'Et nduyínla t'eh, 'et sih bukóltal. 'Et nyoo k'an, 'i mai too ts'iyawh nadutejulh, 'ink'ez ndi 'uzus 'i chah tinta' tet'ilh. 'Et k'an mai too, k'an 'uzus 'i be híyalhdze t'eh, 'aw tinta' 'oot'en ghaít'ah."

Sizi 'uski yula ilhchoot hoh dinadija 'ink'ez 'ilhunuh ts'eke soo na'yinla

¹⁸ 'Et njan dahooja 'awhuz howu yalhtuk khunyaz 'ilhunuh moodih yughu ninya 'ink'ez yubut nachániti. 'Et ndi yulhni, "Sutse' k'an 'ahoh dazsai. 'Et whunts'ih soo tulih sukoo ts'ih tónya, 'ink'ez nla be buk'édolnih, 'et sih nakhóotna!"¹⁹ 'Et Sizi didinya 'ink'ez yuntezya. Yugha hoodul'eh, 'en chah ts'iyawh hiyulh 'ut'en.²⁰ 'Et wheghah hedulh hoh khunyaz 'ilhunuh ts'eke, 'en lanezi 'o 'at nat (12) naooduzuk inle hoh 'uskai 'uyulh'en. Ndun ts'eke Sizi yut'ak ts'ih yugha ninya 'ink'ez nayits'uz, 'i yus ts'ih yut'agheznai.²¹ 'Et ndutenilh whuts'uh dich'oh nduna'dudútni, "Ants'ih bunaih but'aghénai t'eh, 'et sih soo na'oosneh."²² Sizi yuts'u náha'a 'ink'ez yunilh'en 'ink'ez ndi yúlhni, "Stse', nduk 'undunil'uk! Be 'alha' hoont'ah, 'i mba 'alha' 'int'ah 'et huwa soo na'inja." 'Et whuts'un soo na'uja.²³ 'Aw 'et Sizi ndun moodih bukoo ts'ih daninya hoh ndi be ts'ujun, 'i flute hiyulhni, 'i hiye ujun hoh hubunilh'en. 'Et 'onghunnah tube tahúdetnik hoh tso yahalhtuk, 'ink'ez ndo búlhni,²⁴ "Az náhdulh! Ndun ts'ekeyaz 'aw dáchait'sal, 'ants'ih nanisti ho' 'int'ah." 'Et highudloh.²⁵ 'Et dune ts'iyawh 'az whenaóobahalh'a. Sizi bukoo ts'ih daninya hoh 'uski yula ilhchoot ibulh dinadija.²⁶ 'Et dahooja, 'et yun k'ut ndulhcho 'et hukw'u nahuwulnuk.

Nanah dune chawhés'en, 'en Sizi soo na'binla

²⁷ 'Aw 'et Sizi natesja hoh nanah dune chawhés'en hiyuntez'az 'ink'ez hikazulh, "NeMood-ihti David but's'u hainzut negha te'nenzeh!"²⁸ 'Et Sizi koo ts'ih daninya hoh ndunnah chawhés'en highudani'az. 'Et Sizi ndo búlhni, "Nuhwhuba 'alha' hoont'ah ih njan 'et dutétsnilh huba?" 'Et 'uhiyulhni, "A, neMoodihti!"²⁹ Buna yut'agheznai 'ink'ez ndo búlhni, "Nts'e na'a nuhwhuba 'alha' hoont'ah, whuz na'a 'uhóneh."³⁰ 'Et 'ahoh nahítát'en 'ink'ez honilh'en. Sizi khunek ulhtus, 'i be ndo búlhni, "Khun 'uyoon dóohni gunih!"³¹ 'Et whunts'ih tináhunt'az 'ink'ez ndi keyah ndulhcho ts'iyannah ndo badáni.

Huba 'alha' cha'hoot'ah, 'en 'uhutni, "Sizi 'en netsudule ye ulhtus, 'i be 'ut'en"

³² 'Et tinahúndel 'ilhunuh dune 'aw yachalhtuk, ntsi' nududeh, 'i buyidínda 'et huwa. 'En Sizi highu hínilhti.³³ 'Et ndun ntsi' nududeh, 'i ye yáhanainanyoot. Ndun dune 'aw 'et yawhénilhtuk. 'Et 'ilhunahuwédel 'ulhódotni, "Israel yun k'ut nduhoolhcho hoh 'aw ndez na'a cha'whúsne, 'et k'an ts'iyai 'et 'udechoo ndúhoojal!"³⁴ 'Et ndunnah Pharisee nduhútni, "Ants'ih ntsi' nududeh, 'en bumoodih ye ulhtus, 'i bugha ndi nududeh ntsi' yuts'u hanaínanyoot!"

Sizi 'en dune hubugha te'ninzun

³⁵ 'Aw 'et Sizi njan keyah whuti 'ink'ez keyah whuyaz chah nduhóolhcho nusiya. 'Ink'ez Lizwif hubuluglez ndi khunek unzoo, 'i be yak'uz k'úne' whul'en, 'en hubugha wheboodulh'eh. 'Et dune ndunnah buyust'e nduda, 'en ts'iyawh soo na'bulh'en.³⁶ 'Ink'ez 'ilhunahuwédel hubunilh'en. 'En ts'iyawh nihunentsai k'ah hanul'en, 'aw 'uhooneh ghaít'ah. 'Ink'ez ts'iyaintsuk ladetnik li'hut'en. 'Ants'ih sheeypaz lhanah 'aw hubughunli hoolah li'hint'ah.³⁷ 'Ink'ez yugha hoodul'eh, 'en ndo búlhni, "Alha 'aw 'et ha' nukat newhúninzut 'ink'ez tl'o mai lhai suli, 'et whunts'ih ndunnah 'uhut'en, 'en 'aw soo cha'huniltsuk.³⁸ 'Et huwa Yak'usda ha' nukat whumoodih, 'en 'uyoon 'uhut'en chah whusáboolh'a, 'et huba tenadoohdli," hubúlhni.

10

Lanezi 'o 'at nanah (12) whel'a huboozi yuk'e'tegus

¹ 'Et lanezi 'o 'at nanah (12) Sizi yugha hoodul'eh, 'en 'ilho 'anilh hubudáni. Ntsi' nududeh, 'i 'en ts'iyawh ndet whehíhtus chah, 'ink'ez k'úne' boof'en ka, 'et chah, 'ink'ez ndet hukw'e húndudá chah, 'et ts'iyawh 'et whuch'a soo na'botelilh, 'et chah ts'iyawh butl'ahó'ai.² Njan 'et lanezi 'o 'at nanah whel'a huboozi yuk'e'tegus; 'udechoo Simon, 'en Peter chah hiyulhni; 'en bulhutsin 'en Andrew hiyulhni; 'et doo chah James chah Zebedee buye', 'ink'ez John 'en chah 'en bulhutsin 'int'ah;³ Philip 'ink'ez Bartholomew; Thomas 'ink'ez sooneya nalhdzooch Matthew hiyulhni; James 'en chah Alphaeus buye' 'int'ah, 'ink'ez Lebbaeus 'en buboozi 'udek'elh'az Thaddaeus hiyulhni; ⁴ 'et Simon chah, 'en Canaan yun k'ut whut'en 'int'ah, 'ink'ez Judas Iscariot 'en 'uja Sizi be 'onket 'int'ah.

Ndunnah lanezi 'o 'at nanah, 'en Sizi hubutelh'alh

⁵ 'Aw 'et ndunnah lanezi 'o 'at nanah, 'en nts'e 'uhutet'ilh, Sizi whuz hubutelh'ah. 'Et khunek ulhtus, 'i hubutl'aida'ai hoh ndo búlhni, "Khun 'udun yun k'ut whut'en hubuti ts'ih teh toohdelh gunih. 'Ink'ez Samaria hubukeyah ts'uti whuz teh toohdelh gunih. ⁶ 'Et Israel but's'u hainde, 'en 'ants'ih sheep tinta nilh'az, 'i lí'hint'ah, 'en zeh hubuts'un toohdelh. ⁷ 'Aw 'et ahdulh hoh hubutah lhohdelh, njan 'et hubudutéhnih, 'Nts'e na'a yak'uz dune k'úne' whul'en, 'aw 'et nilhduk w suli.' ⁸ Nduda 'ink'ez buka whulhjut, leprosy hiyúlhni, 'en chah ts'iyawh soo na'boolh'en. Yaidla chah dinábudóohlelh. Ntsi' nududeh, dune hubuts'ah hanábunoohyukw. Ndai 'ants'ih nuhgha nkat, 'i chah 'ants'ih huwaóohle. ⁹ Khun teh sooneya nuhsooneya zus be óohdzaih gunih! ¹⁰ Khun téhdulh t'eh hoonliyaz toohla gunih. 'Ezda 'ink'ez kesgwut, 'i chah 'ink'ez nankoh ts'oozt'an 'ink'ez nuhtuz. 'Alha ndan 'ut'en, 'en nts'e na'a ne'ut'en, 'en huba soo 'úlzoo dant'i hiye ndunidzit 'i hubutl'ahó'ah huba' hoont'ah. ¹¹ Ndet keyah ts'ih téhdulh 'et keyah whuyaz k'us keyah whuti, 'et ndunnah keyah whut'en, 'en hukwa boodolhkat k'us ndan simba dune budzi unzoo, 'en bukoo doolhúts'i. ¹² 'Et hubugha danáhdel t'eh, ndunnah bukoo hudelhts'i 'i ts'iyawh hoonzoo nuhghá holts'it, nuhwhuba hukwa' nídudzun, 'et whuz na'a 'et ndubudóohni. ¹³ 'Et ndunnah bukoo 'et hudelhts'i, 'en huhóont'i hubughu danáhdel t'eh, 'et nuhdzi dant'ah, ts'iyawh hubuts'un be óólhni. 'Aw 'et nduchahit'ah t'eh, daja hubudáhni, 'aw nuhwhula'hooneh ghaít'ah. ¹⁴ 'Et ndunnah 'aw nuhghun nuchahiyal 'ink'ez chanohuhoozilhts'ai t'eh, 'et bukoo tinaoohdelh 'et nyoh keyah whuti 'et chah whuch'a naoohdelh. 'Ink'ez nuhke ts'iyawh lhez ch'a naoohghat. ¹⁵ 'Alha ndun whudusni ndet dzin dune ba nahutedeh whusawhélt's'ut t'eh, ndunnah Sodom whut'en 'ink'ez Gomorraah whut'en chah, njan keyah whut'en ndunnah nuhghu nuchayal, 'en 'o nus 'uwulhts'i hubugha óotelts'ulh.

Sizi 'utni, "Si soozi bugha ts'iyannah nuhts'u dutetnih"

¹⁶ "Njan whunulh'en, 'ants'ih sheep yus yugha wélh'az lí'hoont'ah ts'ih whuz nuh-whutelh'a. 'Et huwa t'l'ughus k'una'a whunih wáhle, 'ink'ez dut'aiyas, dove hiyulhni, 'i k'una'a 'aw dune ndóolhdah gunih. ¹⁷ Bulunah dune buch'a kháhdli. 'En Lizwif naheyelh, 'en hububut nenóhotelelh. 'Ink'ez Lizwif luglez húbez ts'ih 'et nuhóhóotelhtus. ¹⁸ 'Et 'ants'ih yun k'ut whumoodih 'ink'ez hubudayi cho chah si sugha 'en hububut nenóhotelelh. 'Ink'ez si sugha wheoobuntelhtun. 'Udun yun k'ut whut'en, 'en chah si sugha wheoobuntelhtun. ¹⁹ 'Aw 'et whutl'anohuanla t'eh, nts'e na'a daja dutehnih, 'et huwu ni wahle gunih. Nts'oh howa whudezulh whe ndai be yátelhtuk, 'i 'et t'ewhunoozhaz. ²⁰ 'Alha 'aw nuhwhenich'oh ilah yatelhtuk. Nuhwe'aBá buyég'ha 'i 'uduténilh. ²¹ 'Et dune dulhutsin datétsah ka whutl'aitelhtel. Bu'abá 'en buzkeh chah whuz hubutelih. Bubuzkeh budusnekah chah hubuch'a nehúdatedulh 'et dahutetsah huwá botelelh. ²² 'Ink'ez si soozi bugha ts'iyannah nuhts'u dutetnik. 'Et whunts'ih ndunnah 'udek'elh'az whuts'un 'et whechahítsaz, 'aw 'en zeh hudutejih. ²³ 'Et whunts'ih njan keyah 'en dzuh nanóhahulhdzut t'eh, 'et 'udun keyah ts'ih hubuch'a tóohdelh. 'Et keyah whuti 'et chah dzuh nunohohulhdeh t'eh, doo chah 'o 'un keyah hubuch'a tóohdelh. 'Alha' dusni 'et yinkak dune ye' whusatayalh whutsun, 'aw njan Israel hits'uh hainde, 'en hubukeyah ts'iyawh whutah lhóhdelh ghaít'ah. ²⁴ Dune yugha hoodul'eh, 'en 'aw yuba dune hoodulh'eh hubugha ndoh cha'it'ah. 'Ink'ez be 'ulhna, 'en chah 'aw dumoodih bugha ndoh cha'it'ah. ²⁵ Dune yugha hoodul'eh, whuyodulh'eh k'una'a 'oot'e huba' hoont'ah, 'ink'ez be 'ulhna, 'en dumoodih k'una'a 'oot'e huba' hoont'ah. 'Et si Beelzebú* suhútni t'eh, 'et nuhwheni sugha hoodul'eh, nuhwheni chah whuz na'a zeh 'et ndunohoduténilh! ²⁶ 'Et huwa 'en bube noolhújut gunih! Ts'iyait'suk lubeshi whu'iz 'int'ah 'ink'ez ntelh'i, 'i ts'iyawh ts'et haóotekulh 'ink'ez ts'iyannah 'et t'ehontezeh.

Yak'usda 'en zeh be noolhújut

²⁷ "Njan daja nuhwhudusni tsahólhgus ts'et whucho howu yaoolhtuk. Ndet whu'iz whudahts'o, 'et bun k'ut whuts'un khuneki te howu yaoolhtuk. ²⁸ Ndun neyust'e hughan 'et 'aw nezul 'i hizoolhghelg ghaít'ah, 'et ndunt'ah, 'en bube noolhújut gunih. 'Et whunts'ih Yak'usda ndun nuhzul nuhyust'e bulh kwuncho yuh ts'ih nuhtenoh, 'en zeh be noolhújut. ²⁹ 'Alha ih ndi nankoh 'uschas, 'i 'ilho sooneya chaditi, 'i 'et 'ultsuk 'i be oohket? A, 'alha 'uhoont'ah. 'Et whunts'ih ne'aBá 'aw hukwa cha'nizun t'eh, 'aw 'ilhunuh ndi yun k'ut naoolts'it ghaít'ah. ³⁰ 'Ink'ez nuhts'igha, 'i ts'iyawh 'ilhuk'í hoh t'e'ininzun. ³¹ 'Et huwa khun whenoolhujut gunih. Nuhwheni 'uschas buch'a deg'ha nus déhti hoh aht'ah.

Dune nalh Sizi 'en zeh neulhyis 'int'ah uzdooni

³² "Et huwa ndun dune nalh 'et ndutni, Sizi, 'en zeh si sulhyis 'int'ah, ndun 'et ndutni, se'aBá yak'uz usda, 'en dutesnalh, ndun 'en se'ildzun 'int'ah. ³³ 'Et whunts'ih ndunnah dune nalh si hubulhyis ilah utetni t'eh, si chah se'aBá yak'uz usda ndunnah, 'en 'aw se'ildzun chahilah dóosni.

* 10:25 Ndunnah buboozi, Beelzebub, 'en ntsi' hubumoodihti 'int'ah, ni hoh 'utni.

Ndan si sugha dich'oh ye khuna, 'i whuladetnik, 'en ndai ye khuna, 'i nayité'ah

³⁴ "Ts'iyannah lhts'un ts'ah'un 'uhoot'e, 'et hukwa ndi yun k'ut whusáya noohzin gunih! 'Aw lhts'un ts'ah'un 'uhoot'e hubugha ootés'ah hukwa ilah whusáya. 'Et soh cho li'int'ah, 'i hubugha ités'ah 'et huba whusáya.

³⁵ Dune bu'abá ch'a nidúteyáh 'ink'ez butse' 'en be'ama ch'a nidúteyáh.

'Ink'ez 'en buyas'at 'en dubez ch'a nidúteyáh, 'et hukwa whusáya.

³⁶ Ndunnah dune bukoo huwhut'i, 'en chah hich'a nidutéduh.

³⁷ Ndan bu'abá k'us bu'ama, si sughanus hubuk'entsi' t'eh, ndunt'ah, 'en 'aw suba soo cha'hildzoo! 'Ink'ez ndan buye' 'ink'ez butse' bulh, si sughanus hubuk'entsi' t'eh, 'en 'aw suba soo cha'hildzoo. ³⁸ 'Ink'ez chah ndunnah bulhdulalghus chadestil, 'ink'ez suchahunesdulh t'eh, 'en ts'iyawh suba soo cha'hildzoo. ³⁹ Ndan dich'oh ye khuna, 'et hoolhyih hukwa 'ut'en, 'en ye khuna ts'iyawh tinta ooté'ah ho' hooht'ah. 'Et whunts'ih ndan si sugha dich'oh ye khuna, 'i tinta ooní'ai, 'en ye khuna, 'i nayité'ah.

Ndan hooht'i hoh danyunilhti, 'en si chah hooht'i hoh dasunilhti ho' 'int'ah

⁴⁰ "Ndan hooht'i hoh danyunilhti, 'en si chah hooht'i hoh dasunilhti li'hoont'ah. Ndan whesalh'a, 'en chah hooht'i hoh daínilhti ho' hooht'ah. ⁴¹ Ndan nus whunilh'en, 'en 'et huwa dune hooht'i hoh dainilhti. 'Et nts'e na'a buba k'elha whutele, 'et ndan chah whuz na'a zeh buba k'elha whutele. 'Et whuz na'a zeh ndan ts'ah'un dune, 'en 'et huwa dune hooht'i hoh dainilhti, 'en ndet buba k'elha whutele, 'et whuz na'a zeh ndunnah chah ba k'elha whutele. ⁴² 'Ink'ez ndunnah si sugha hoodul'eh, 'ink'ez ndun hubutah k'us hukw'elh'ih 'int'ah, 'en sugha hoodul'eh 'int'ah 'et huwa dune too nezk'uz yubainkai t'eh, 'alha 'ún whudusni, 'en whunts'ih buba k'elha whutale ho' hooht'ah."

11

Nanah John yugha hoodul'eh, 'en John Sizi ts'un whebalh'a John dune too be 'ulhen, 'en nanah yugha hoodul'eh, 'en Sizi ts'un wheóobalh'a

¹ 'Aw 'et Sizi lanezi 'o 'at nanah yugha hoodul'eh, 'en ts'iyaintsuk ndo budáni 'ustli'e' 'udeja, 'et bughu whénya. 'Uts'un keyah ts'un whenya dune hodutelh'eh 'ink'ez hubulh yatelhtuk wheni. ² 'Aw 'et John ndalts'ut 'et Christ be 'ut'en k'ah whulh uduzts'ai. 'Et huwa nanah yugha hoodul'eh, 'en John Sizi ts'un wheóobalh'a. ³ 'Et hiyoodulhukut, "Nyun ih whusatéyáh inli, k'us 'uyoon tulih ka ts'itóo'en?" ⁴ 'Et Sizi njan ndo búlhni, "John bughana naht'az t'eh, ndet whuné'lh'en 'ink'ez ndet whudáhts'o, 'et ts'iyawh nudúóhni. ⁵ 'Et chawhés'en chah 'et honilh'en nasdli. Dzuh nuhudelh, 'en soo nahudelh nahúsdli. Hubuka whulhjut chah leprosy hiyúlhni, butsun hoolah nasdli, 'ink'ez cha'hudusts'uk chah 'ahudits'o nasdli. Yaidla chah dináhudidel 'ink'ez tel'en chah khunek unzoo, 'i be hubulh yaintuk ho' hint'ah. ⁶ 'Et ndunnah si sugha 'aw buba dzuh chailé t'eh, 'en degna nus hoonzoo bughá whults'ut." ⁷ 'Et ndunnah nanah whehá'az, Sizi ndunnah 'ilhunahuwédsel, 'en njan John bughana hubulh yawhenilhtuk hoh ndo búlhni, "Di teh'ilh ka dune chahóot'ih ts'ih whéhdel? Tl'o ghazilh nonulhts'i, 'i tulih teh'ilh nahzun ih? ⁸ Ndet simba hukwa tsi hoolh whuteh'ilh? Dune naih duchut, 'i be soo naduja, 'en tulih teh'ilh nahzun ih? Sih soo zelhts'ai, ndunnah naih duchut, 'i be dune unli, 'aw 'en zeh hubudayi cho bukoo hudelhts'i. ⁹ 'Et ndet whuteh'ilh hukwa tsi hóohli? Nus whunilh'en tulih? A, 'alha' hooht'ah. 'Et 'unhwhudúsní, nus whunilh'en degna nus hoonzoo whunalh'en! ¹⁰ Ndun 'en bughana 'uk'üne'úsduguz, 'i 'et ndutni, 'Sih soo zelhts'ai 'uyoon khunek suba na'a, 'en ntsuh telh'alh.

Nts'oh lhutéyáh mba lhaoodutelilh ka.'

¹¹ Ts'ah'un na'a 'ún whudusni, ts'iyannah whuzdli, 'aw John dune too be 'ulh'en degna nus dezti hoolah. 'Et whunts'ih nts'e yak'uz k'úne' whul'en, ndan degna nus dezti chailah, 'en degna nus uncha ho' 'int'ah. ¹² 'Et hoh da John dune too be 'ulh'en be whe' whudit'en, 'et k'an dzin whuts'un, yak'uz nts'e k'úne' whul'en, 'et yak'uz huhoodel, 'ink'ez huhoodel, 'en ts'iyawh yak'uz da'hudutóoyis hukwa' hut'en. ¹³ John whusatéyáh whuts'un, nus whunilh'en hube' dustl'us, 'ink'ez Moses be' dustl'us chah, ndet daóotenilh hubudani, 'et 'uwulhni. ¹⁴ 'Et daja nuhwhudúsní, soo nuhwhuba 'alha' whuteh'ilh t'eh, ndun nus whunilh'en Elijah whusatéyáh, John 'en 'int'ah, 'et huwa. ¹⁵ Ndan budzo hooni, 'en 'ahoozó'lhts'a huba' hooht'ah. ¹⁶ 'Et yuk'edindeh nts'e na'a simba nuhwhuba lhuzih neooboosdlelh? Ndez na'a njan duhínt'ah hoh 'uskehyaz nduhóht'ah 'ink'ez nts'e ts'uyi, 'i be 'ooket 'et hudelhts'i. 'en dudulh dunekah buts'u hahuyih hoh ndó buhútni,

¹⁷ 'Be ts'ujun, 'i nuhwhuba be ts'ujun,

'et whunts'ih neba chanuzahdak.

'Ink'ez nuhwheni nuhwhuba tso ts'inli,

'et whunts'ih 'aw wáhtso ghaft'ahl'

¹⁸ 'Et John dune taninya hoh 'aw cha'us'al 'ink'ez 'aw tachasnai. 'Et highu yalhtuk ho' hutni, 'Nududeh, 'i ntsi' buyudínda,' dahni. ¹⁹ 'Et yinkak dune ye', 'en dune hubutaninya hoh hubula whé'ni'al 'ink'ez hubula tawhénitnai, 'et 'uhutni, 'Nduen 'en bucha hooncha 'ink'ez mai too chah 'utnai. Sooneya nalhdzoooh 'ink'ez lubeshi 'ulh'en, 'en hubulh dunekah 'int'ah,' dáhni. 'Et whunts'ih ndunnah Yak'usda bugha whunih sulí, 'en ts'iyawh ndi hiye whunih, 'i be ts'ah'un 'uhint'ah sulí."

Ndunnah hubeni lht' anahádunoooleh hukwa cha'hunízun, 'en dawhultsi' hubugha óotelts'ulh

²⁰ 'Et hukw'elh'az nts'e keyah whuti totsuk 'ut'en ncha, 'i ba' yilya, 'i ndu'en hukwa' budáni. 'Aw hubeni lht' anahádunoooleh hukwa cha'hunízun. ²¹ 'Et huwa 'utni, "Nuhwheni Chorazin whut'en, 'ink'ez nuhwheni Bethsaida whut'en chah, dawhultsi' 'et nuhts'u whélt's'ulh! Soo cho soozélt's'ai 'uda ndet nduhóolcho hoolhtus nuhnat ne'whust'en, ndunnah Tyre 'ink'ez Sidon whut'en, 'en chah bunat 'et ndúhooja t'eh, 'uda da hubeni lht' anahádunoooleh, 'ink'ez doso naih be húdelht's'i 'ink'ez lhez tsi la hidudzih wule da. ²² 'Et whunts'ih ndun whudusni, ndet dzin nuhwhuba whusawhutelts'ulh nts'e na'a nuhwhuba nahutedeh ka, 'et ndunnah hubulh dawhutenilh, 'et nuhwheni 'o nus 'uwultsi' 'et nuhts'u whélt's'ulh. ²³ 'Ink'ez nuhwheni Capernaum whut'en nduk yak'uz huba soo áht'ah nahzun ih? 'Awundooh! 'Et kwuncho yuh ts'ih nuhotelhdulh! 'Alha 'uda ndet hoolhtus nuhnat ne'whust'en, ndunnah Sodom whut'en, 'en chah bunat 'et ndúhooja t'eh, 'awhuz da bukeyah 'et whuz'ai wule da. ²⁴ 'Et whunts'ih ts'ah'un 'un whudúsní, dahooht'ah nuhwhuba whusawhutelts'ulh, nts'e na'a nuhwhuba nahutedeh ka, 'et ndunnah Sodom whut'en hubulh dawhutenilh, 'et nuhwheni 'o nus 'uwultsi' 'et nuhts'u whélt's'ulh."

Sizi ndo búlhni, "Nuhwheni ts'iyawh dez ahdulh 'ink'ez natelhuuyis nuhgha óotes'alh"

²⁵ Sizi 'awhuz hubulh yalhtuk 'et ndutni, "ABá nyun nyudélti. Yak'uz 'ink'ez yun k'ut huMoodihti inli. Whunih 'ink'ez hoodul'eh, 'en ndi 'i ts'iyawh buch'a whunte'i. 'Et whunts'ih 'uskiyaz li'int'ah, 'en bunalht's'et hahó'ai. ²⁶ 'Et whunts'ih 'ABá ndet 'uhóonah hoonint'i. Nдох honeh. ²⁷ Se'abá ts'iyawh stl'ahónla, 'ink'ez 'en buYe' ndan unli ts'iyannah t'ehonízun. Ba'aBá 'aw 'en zeh t'eininzun. 'Ink'ez ndan be'abá unli, buYe' 'aw 'en zeh t'eininzun. 'Ink'ez ndan buYe' 'onghun ts'iyawh wheoobuntelhtun hukwa' ninzun t'eh, 'en zeh huba' hoont'ah. ²⁸ Nuhwheni ts'iyawh ndan 'ut'en ulhtus, 'i 'ulh'en 'ink'ez ndan ndaz, 'i nuhle li'ah't'ah, nuhwheni ts'iyawh dez ahdulh 'ink'ez nats'ulyis nuhgha óotes'alh. ²⁹ Ndai se' 'ut'en, 'i ulhchoot 'ink'ez nedúht'aih li'ahleh 'ink'ez si sugha hoodulhú'eh. 'Aw dune ch'a nucha'zúst'en 'ink'ez ts'iyannah tah te'dudulhú'en 'et huwa. 'Et whuz na'a nuhzul náteylis huba nahóh'alh. ³⁰ Ndi úlhchoot, 'i 'aw nuhwhuba hubugha chahóolnah tele, 'ink'ez se'ut'en k'ah chah hoondzak tele."

12

Sizi 'en nats'ulyis dzin whunts'ih huMoodihti ho' 'int'ah

¹ 'Aw 'et 'ilhut dzin 'et Lizwif huba nalyis dzin huhoohl'i. Hoh da Sizi tl'o k'ut iyalh, 'ink'ez yugha hoodul'eh, 'en chah hiyulh hudulh hoh buye'élts'ul. 'Et tl'o mai huyoonuyé 'ink'ez hiya'alh. ² 'Et ndunnah Pharisee hiya'en ibulh, Sizi hiyoodulhukut, "Ngha hoodul'eh dahút'en hubunilh'en ih? K'an dzin nats'ulyis dzin 'uhoont'ah. 'Aw 'et nduhóot'en huba cha'hoot'ah!" ³ 'Et Sizi ndo búlhni, "Et hubudayi cho David daja 'aw ih hukw'e yachasulhtuk? 'Et hoh da David 'ink'ez hiyulh 'ut'en hubuye'élts'ul? ⁴ 'Aw 'et Yak'usda bukoo daninya ndi lhes ndai Yak'usda hubugha it'aih, 'i yu'alh 'ink'ez hiyulh 'ut'en, 'en chah hiyan'al. Nawhulnuk 'aw 'en zeh huyoo'alh huba' hoont'ah, 'et whunts'ih David 'ink'ez hiyulh 'ut'en 'en chah nduhuja. ⁵ 'Ink'ez Moses be' dustl'us chah, 'aw buk'eyáchasulhtuk hoh ih dahni? Ndez na'a njan ndutni, náwhulnuk nats'ulyis dzin luglez whucho dahumíndel 'ink'ez 'et 'uhut'en. Nts'e na'a 'uhuhoolhdzun, 'et k'uhoninyuz, 'et whunts'ih 'aw buk'echahoolts'ulh. ⁶ Whuz na'a ndun whudusni, njan nuhwhutah, 'et 'ilhunuh 'en njan luglez whucho whuch'a dega nus 'ilcho 'int'ah. ⁷ 'Et 'uk'e'whusdúguz 'et ndutni, "Uyoon bugha te'untezilh, 'et nuhts'uh hukwa' nuszun. Ndai Yak'usda buk'uzdai k'ut hidutelhk'un, 'i buka cha'nuszun,' ni. 'Et ndi njan ndutni, 'et t'eeonahzun t'eh, 'et sih ndan buk'echáwhulht's'it, 'en 'aw buk'ehoh'alh hukwa aht'en ilah! ⁸ 'Et huwa yinkak dune ye' nats'ulyis dzin 'et whunts'ih 'en huMoodihti ho' 'int'ah."

Nats'ulyis dzin 'ut'en unzoo, 'i 'uts'oolh'en

⁹ 'Aw 'et hukw'elh'az bugguh whinya hoh ndunnah Lizwif hubuluglez ts'ih daninya. ¹⁰ 'Ilhunuh dune 'en 'et usda 'ink'ez 'aw bula 'aw ye nucha'ust'en. 'Et Sizi hiyoodulhukut, "Et nats'ulyis dzin soo na'uztetnilh huba' hoont'ah ih?" 'Et hoonliyaz highu nahooté'ah hukwa' hut'en. ¹¹ 'Et ndo búlhni, "Ndan nuhtah 'utenilh sheeypaz tsak'et 'ált's'ut hoh hanaftelhtelh nats'ulyis dzin 'et whunts'ih? ¹² 'Et dawhulcho, 'i be dune sheep dega

nus dezti ho' 'int'ah? 'Et huwa netl'awhéls'tut nats'ulyis dzin 'ut'en unzoo, 'i 'uts'ulh'en whuba." ¹³ 'Et ndun dune nduyúlhni, "Nyla lhk'unadíntsih!" 'Aw 'et lhk'unaidezsi hoh ílhk'uz ts'ih k'una'a sóo na'uja. ¹⁴ 'Et Pharisee 'az whuhandel 'ink'ez huwu yahalhtuk nts'e na'a hituzelghel hukwa.

Sizi ndan unli, 'aw whebuntelhtun hukwa cha'nínzun

¹⁵ 'Et Sizi hituzelghel huwu yahalhtuk, 'et t'ewhunanzin ibulh bughuh whenaja. Lhanah nduda hiyuntezdel, 'en ts'iyawh soo naóo'balh'en. ¹⁶ Khunek ulhtus, 'i be ndo búlhni, "Uyoon ts'un sughu yaoolhtuk gunih." ¹⁷ 'Et nus whunilh'en Isaiah, daja ni, hoh tuné'whust'en. Ndi khunek njan ndutni,

¹⁸ "Ndun suYe' se'ustlen,
'en 'utaháilhti 'int'ah.

'En buk'esi'.

'En bugha suzul tube yé hoont'i.

Suyéghah buk'eidutelhdoh.

'Et nts'e na'a dahoont'ah dune ba nahesyelh,

suYe' whuz na'a zeh 'udun

yun k'ut whut'en ndo buduténilh.

¹⁹ 'Aw dune budulhyah 'udooni ghaít'ah.

'Aw hububúlh 'aooldzul ghaít'ah.

Ti nuya t'eh, 'aw hubulh dóoltul ghaít'ah.

²⁰ 'Aw tl'oghazilh lhbé né' dajut, 'i whunts'ih k'udóojis ghaít'ah.

'Aw too dez'k'un 'aw 'et nanutneh, 'i whunts'ih, 'aw nainoolhneh ghaít'ah.

'Aw 'et Yak'usda lubeshi ba nahyeh 'et whuch'a nilhde t'eh, whuz na'a zeh suYe' 'utet'ilh.

²¹ 'Ink'ez 'udun yun k'ut whut'en ndun suYe' se'ustlen,
'en boozí, 'i be 'et whut'aníhíntetan."

Ndunnah lhch'a nihudendel, 'en chah hoolah hutele

²² Njan 'ilhudzin 'et 'ilhunuh ntsi' nududeh buyudinda, 'en chawhés'en 'ink'ez yaoolhtuk chah ghaít'ah. 'En Sizi but'sun lhgha hidílhni hoh soo ná'yinla. 'En 'ahoh yutá'en 'ink'ez yawhenilhtuk. ²³ 'Et 'ilhunahuwédel ts'iyawh tube hoba hooncha 'ink'ez dich'oh lhulh yáhaltuk, "En 'alha David but'su hainzut tulih 'int'ah." ²⁴ 'Et Pharisee whulhódants'o hoh 'et 'uhiyulhni, "Ndun Sizi, 'en Beelzebul, ntsi' nududeh bumoodih 'int'ah, 'en be zeh ntsi' nududeh, 'i dune ts'uh hanahinuyukw," hutni. ²⁵ Daja huninzun Sizi t'eooninzun 'et ndo búlhni, "Yun k'ut k'une' huwhul'en, 'en lhch'a nehúidindel t'eh, 'en ts'iyawh hoolah hutele. 'Ink'ez keyah whuti whudune k'us bukoo hudelhts'i chah, ts'iyawh lhch'a nehúidindel t'eh, 'en chah huhoolah hutele. ²⁶ Whuz na'a Satan dich'oh dune ts'uh hanainuyukw t'eh, 'et 'alha dich'oh lhch'a detni ho' 'int'ah. 'Ink'ez nts'e na'a hubudayi cho unli, 'ilhuwhutet'ilh? ²⁷ 'Et si Beelzebul 'en be 'ust'en t'eh, 'et t'eh sudahni nuhwheni nuhye'kah, k'us ndan simba ntsi' nududeh, 'i dune ts'uh hanaóobunoooyukw? 'Et huwa 'en hubugha t'ewhuntehzeh tink'us údahni! ²⁸ 'Et whunts'ih Yak'usda buyégha be ntsi' nududeh dune ts'uh hanánusyukw t'eh, 'et 'alha' hoont'ah, nts'e Yak'usda hubudayi cho unli, 'aw 'et nuhghu whulhts'ut ho' hoont'ah. ²⁹ 'Et nts'e na'a 'utenilh 'ilhunuh dune 'et dune ulhtus bukoo daninya 'ink'ez hoonliyaz yegho telhchulh? 'Aw 'ooneh ghaít'ah. Ndun dune 'udechoo yulhghel t'eh, 'et t'eh zeh ts'iyaitsuk yegho telhchulh. ³⁰ Ndunnah sulh cha'it'ah, 'en sch'a hahetni ho' hint'ah. 'Ink'ez ndunnah 'aw dune sula 'ilhuchahowesdle 'en ts'iyawh 'ants'ih yahutedúkulh lí'hutenilh.

Ndunnah Ndoni ch'a detni be yalhtuk, 'aw buba whunaoodootnah ghaít'ah

³¹ "Et huwa 'un whuhdúsní, lubeshi ts'iyawh 'ink'ez Yak'usda ch'a yalhtuk, 'et ts'iyawh nuhwhuba whunaoodutelnah. 'Et whunts'ih Ndoni ch'a detni be yalhtuk, 'aw buba whunaoodootnah ghaít'ah. ³² 'Ink'ez ndunnah yinkak dune ye' ch'a yalhtuk, daja hutni, soo buba 'un whutelhdulh. 'Et whunts'ih ndunnah Ndoni ch'a yahalhtuk, 'aw buba 'un whutoolhdelh ghaít'ah. K'an dzin k'us nus de whunts'ih 'aw 'uhoneh ghaít'ah.

Duchun bumai gha dant'i duchun 'i t'eahzun

³³ "Mai chun unzoo, 'i hanúlhyeh t'eh, bumai unzoo tele. 'Et mai chun unt'si, 'i hanálhyeh t'eh, bumai ntsi' tele. 'Et bumai whuzdli t'eh, dant'i duchun 'int'ah, 'i bumai bugha t'entedzeh. ³⁴ Nuhwheni ts'iyawh poison tl'ughus buzkeh lí'ah't'ah! Nts'e na'a ahtsi' 'ink'ez khunek unzoo, 'i be yalhtuk? Nuhdzi ndai be dezbus, 'i be zeh yalhtuk. ³⁵ Dune unzoo 'en ndai unzoo, 'i budzi tuz 'ilhunayoole, 'aw 'i zeh but'suh háidukat. 'Et dune unt'si, 'en ndai unt'si, 'i budzi tuz 'ilhunayoole, 'aw 'i zeh but'suh háidukat. ³⁶ 'Et ndun whudusni ndunnah 'aw khunek cha'it'ah, 'i be yalhtuk, dune ba nahedelh dzin whusawhéls'tut t'eh, nts'e na'a khunek 'i be yalhtuk, whuz na'a buba nahutedeh. ³⁷ 'Et huwa nuhghunek bugha Yak'usda

nalh ts'ah'un dune tehle, k'us nuhghunek bugha kwuncho yuh ts'ih téhdulh k'una'a, whuz na'a nuhwhuba nahutedeh."

Sizi buba 'alha' cha'it'ah, 'en hoonliyaz hooncha tune' whut'en, 'et zeh huhó'en hukwa' huninzun

³⁸ 'Aw 'et bulunah Moses be' dustl'us 'uk'ununa'úsduzug, 'ink'ez Pharisee, 'en chah 'uhiyulhni, "Dune hoodulh'eh neba huwa 'et'en tune' tant'en nts'uh hukwa' uzninzun."
³⁹ 'Et ndo búlhni, "K'an ndoh whudezulh dune hintsi', 'ink'ez 'ahoolhyez dune ts'eke bulh tinta' hut'ih. Hoonliyaz hooncha tune' whut'en, 'et zeh hukwa hités'en. 'I bugha t'ehonózin. 'Et whunts'ih honilh'en bughá holts'it ghaít'ah. Nts'e na'a nus whunilh'en Jonah bulh dahooja, 'et zeh hote'ilh. ⁴⁰ Njan dúhooja, tat dzin 'ink'ez tat 'ulh'ek Jonah lhook cho chadánda. 'Et whuz na'a zeh yinkak dune ye' 'en tat dzin 'ink'ez tat 'ulh'ek yun yuh ts'ih tédalh. ⁴¹ 'Ink'ez wheghah whezulh dzin dune ba nahutedeh t'eh, Nineveh whut'en, nuhwheni k'andoh whudezulh, 'en nuhwhutah di hudutédulh 'ink'ez nuhwhuba nahoteyeh. Soo cho whunulh'en, hoh da Jonah hubulh yailhtuk da, ts'iyawh hububeni lht'anahádunezda. 'Aw 'et soo zélhts'ai, 'ilhunuh 'en Jonah dega nus 'int'ah k'an nuhtah siyin. ⁴² 'Et wheghah whezulh dzin dune ba nahutedeh t'eh, 'et nyaz de hubudayi cho ts'eke 'en nuhtah didutéyalh, 'et nuhk'ehóotelts'ulh. Ndi yun k'ut nilhdza hainya, Solomon ye whunih, 'i yudutéts'o ka 'et huwa. 'Et whunts'ih 'ilhunuh Solomon dega nus whunih k'an nuhtah siyin."

Dahooja hoh ntsi' nududeh, 'i doo chah zeh dune buyunaídede t'eh

⁴³ 'Ink'ez ndo búlhni, "'Et ntsi' nududeh dune ts'uh hanáidide hoh yun whudezgih, 'et whuz nududeh natelyis hukwu núa. 'Et 'aw nduhóont'ah nachahóo'al. ⁴⁴ 'Et dich'oh na'dudútni, "Et ndun buyudúsa, 'en buts'un zeh natóosja,' ni. 'Et whuz lhghu nadija hoh 'aw hoonli hoolah. 'Et ndun dune budzi yuh chadítsun nawhulhtsi 'ink'ez ts'ah'un na'a 'uja, 'et nahoo'ai. ⁴⁵ 'Ink'ez 'et 'uts'un whedande 'ink'ez skwunlai 'o 'at nanah ntsi' nududeh, 'i 'en dega nus 'ulsi', 'en 'et dune hiyaíndel 'ink'ez 'et nihunina. 'Et ndun dune ndun hiyudalts'i, 'en 'et whutsuh da 'o nus 'ulsi' suli. Nuhwheni k'an ndoh nuhwheghah whudezulh, nuhwheni dune tube untsi' aht'ah, 'et whuz na'a zeh nuhwhuba 'uwhuténih!"

Sizi be'ama 'ink'ez bulhutsinkah teh hiyulh yatelhtuk hukwa' huninzun

⁴⁶ Sizi 'awhuz 'ilhunahwéedel hubulh yalhtuk hoh be'ama 'ink'ez bulhutsinkah teh, 'az nahudelhúya. 'Et hiyulh yatelhtuk hukwa' huninzun. ⁴⁷ 'Et 'ilhunuh dune 'uyulhni, "Nilh'en! Nyu'ama 'ink'ez nyulhutsin 'az nahudelhúya nyulh yahutelhtuk hukwa' huninzun!" ⁴⁸ 'Et Sizi ndi yúlhni, "Ndan su'ama, 'ink'ez ndan sulhutsinkah?" ⁴⁹ 'Et Sizi ndunnah yugha hoodul'eh, 'en butune'úlhge, "Nilh'en ndunnah, 'en su'ama 'ink'ez sulhutsinkah 'uhint'ah. ⁵⁰ Se'aBá 'en yak'uz usda, k'us ndan hik'une' ut'en, 'en sulhutsin, sulhtus, 'ink'ez su'ama teh 'uhint'ah!"

13

Khunek be whuts'odul'eh, 'i 'a'nule bugha

¹ 'Et dzin Sizi koo tininya, 'ink'ez bun taba nat'adeda. ² 'Aw 'et dune lhanah higha wézel 'et ts'i beinya, 'ink'ez ts'i bet nat'adeda. 'Et ts'iyawh taba 'et nahudelhúya. ³ Ndaí khunek be whuts'odul'eh, 'i 'et lhelhdun huwa hubulh yalhtuk hoh ndo búlhni, "Sih soo zélhts'ai, 'ilhunuh 'a'nule, 'en 'a'ntelelh ts'ih whinya. ⁴ 'Et 'a'nule bulah ti nanákat. 'I dut'aiyaz whusahándel 'ink'ez ts'iyawh hineldel. ⁵ 'Et bulah tse tah nanákat, 'et huwa 'i 'ahoh hanusdúki, 'ankw'us yun hoolah huwa. ⁶ Bughih hoolah 'et huwa hasain'ai hoh ts'iyawh yanúdezezi 'ink'ez hoolah suli. ⁷ 'Et bulah chah whus tah nanákat. 'I chah whus cho whutah bulh tanenyi 'ink'ez bulh lhéwhuntlah. ⁸ 'Et 'onghoh, 'i yun unzoo, 'i k'ut nanákat hoh soo hananyi. Bumai buluh lanezi lanezi (100) bumai suli, buluh lkh'utat lanezi (60) bumai suli, 'ink'ez buluh tat lanezi (30) bumai suli. ⁹ Ndan budzo hoonli, 'en soo cho hiyoozóhlts'a huba' hooht'ah."

Khunek be whuts'odul'eh, 'i be zeh Sizi hubulh yalhtuk

¹⁰ 'Aw 'et yugha hoodul'eh highu nindel, 'et hiyoodulhukut, 'ink'ez 'uhiyúlhni, "Di ka ndi khunek be whuts'odul'eh, 'i be zeh hubulh yailhtuk?" ¹¹ 'Et ndo búlhni, "Yak'uz be k'úne' whul'en 'aw be whe' hooht'ah hooyah, 'i daja ni, nuhwheni zeh nuhghá whunt'ai. 'Et 'onghun 'aw hubugha chahóolts'ulh. 'Et huwa whuz na'a zeh hubulh yalhtuk. ¹² 'Et huwa njan duhoont'ah, ndunnah hoohtsoolyaz t'ehonínzun, 'en 'o nus lhat t'ehonínzun, 'et hubugha whútelts'ulh. 'Et ndunnah hoonli t'ehonínzun, hoohtsoolyaz, hodits'o ndai 'aw 'i hiyit'i, 'i whunts'ih bughu nayitélchulh. ¹³ 'Et huwa ndi khunek be whuts'odul'eh, 'i be zeh hubulh yalhtuk.

'Et doo ka honalh'en 'et whunts'ih 'aw chahonilh'en.

'Ink'ez hidits'o 'et whunts'ih 'aw chahodústs'o, 'aw t'ehonoozeh chah ghaít'ah. ¹⁴ 'Et Isaiah nus ho'en daja ni 'en bugha ts'iyawh lhaóodulya. Njan ndutni, 'Ahoohlheyeh whudahts'o 'et whunts'ih 'aw t'echanuzéhze.

'Ahoohlheyeh whunulh'en 'et whunts'ih 'aw ts'ah'un nechaóozah'ai.

¹⁵ Ndunnah dune budzi 'ants'ih buba' hoont'ah suli 'et huwa,

'ink'ez 'aw hoonli hodóts'o hoolah,

'ink'ez ndai be 'alha' hoont'ah,

'i 'aw hinoolh'en hukwa cha'hunízun.

'Et huwa chawhés'en lí'hint'ah.

'Et huwa 'aw honóolh'en ghaít'ah,

'ink'ez budzo be 'aw hodóts'o ghaít'ah.

'Ink'ez budzi be 'aw t'ehonoozeh hoolah.

'Et whuz na'a nducháhit'ah t'eh,

'uda da hubulubeshi ch'a nahulhya wule da,

'ink'ez da Yak'usda huboolhyih,' ni Isaiah.

¹⁶ 'Et whunts'ih nuhwheni ndai nuhna be whunulh'en, ts'ah'un na'a whunulh'en. 'Ink'ez nuhdzéh hoh soo whúdahts'o, 'et huwa degha nus hoonzoo nuhghá whults'ut. ¹⁷ Ts'ah'un 'un whúdsni, hoh da lhanah nus whunilh'en 'ink'ez ndunnah ts'ah'un 'uhint'ah, ndai nulh'en, 'i hiyuntel'h'ih hukwa' huninzun, 'et whunts'ih 'aw chahiýi'il! Ndet whudahts'o, 'et soo ts'ah'un hodutéts'o hukwa' huninzun, 'et whunts'ih 'aw chahodúts'il.

Khunek be whuts'odul'eh, 'i be 'a'nule, 'en bugha njan ndutni hoh 'utni

¹⁸ "Et huwa ndi khunek be whuts'odul'eh, 'i be 'a'nulih, 'en bugha, njan ndutni, ¹⁹ ndunnah yak'uz nts'e na'a 'uhuhoolhdzun whulh 'úhudits'o ndi khunek daja ni hoh 'utni 'et whunts'ih bubeni be 'aw t'ehonuszun. Ndai dune budzi tuz 'ahinanla, 'i ndun utni' whusayih 'ink'ez budzi be hanaída'aih! Ndi 'i 'int'ah, ti 'anélya, 'i 'int'ah. ²⁰ Ndi ndai da tse tah 'anilya, 'i ndunnah 'i k'una'a 'uhint'ah. Ndi khunek hidits'o t'eh, 'ink'ez soo 'ahoh huhóont'i hoh hiyilhchukw. ²¹ 'Et whunts'ih dich'oh 'aw bughih hoolah lí'hint'ah. 'Et huwa 'ast'iyaz zeh huba 'alha' hoont'ah. 'Ink'ez ndi khunek 'i bugha dzuu nuhudeh 'ink'ez 'onghunnah buch'a hudetni. 'Et huwa 'ahoh whulahudutnih. ²² Ndai whus tah 'anankat, 'i lí'int'ah, 'en ndez na'a 'uhint'ah. 'En khunek hidits'o, 'et whunts'ih ndi yun k'ut huwu ni ts'inli, ndi yun k'ut soo uzde'a 'uhoont'ah, 'et 'i ts'iyawh whus cho 'i be bulh lheyúllhuk ndult'ah. 'Et huwa 'aw lhahúdulya hoolé ghaít'ah. ²³ 'Et whunts'ih ndet yun unzoo, 'i k'éninkat, 'i lí'int'ah, 'en ndez na'a njan ndúhint'ah. Ndi Yak'usda bughunek hidits'o, 'i t'ehinuzih teh daja ni hoh 'utni. 'Et huwa bumai lhái lhíh lí'hint'ah. Bulah lanezi lanezi (100) suli. 'Et doo chah bulah lhk'utat lanezi (60) suli. 'Et doo chah bulah tat lanezi (30) suli."

'Uyoo khunek be whuts'odul'eh, 'i nts'e na'a yak'uz hubudayi cho 'uhuhoolhdzun

²⁴ Doo chah 'uyoo khunek be nawhutnuk, 'i be whuts'odul'eh, 'i be hubulh yalhtuk 'et njan ndo búlhni, "Nts'e na'a yak'uz hubudayi cho 'uhuhoolhdzun, 'et dez na'a njan nduhooht'ah. Dune ndi yun buk'ut 'a'nukat. Unzoo, 'i 'anukat, 'i 'ainanla. ²⁵ 'Awhuz huztez hoh dune yuch'a detni whusainya. 'Et ndi 'ainanla, 'i unzoo, 'i tah, ndi 'anukat, 'i 'ut'antsi' ts'utni, 'i yutah 'ainanla, 'ink'ez whenaja. ²⁶ 'Et ts'iyawh hanányi hoh ndi 'ut'antsi', 'i chah bulh hainanyi. ²⁷ 'Et bukoo whumoodih be 'ulhna highu nindel 'ink'ez 'uhiyulhni, 'Dahooja nemoodih, di hoh inla ndi unzoo, 'i hanuyeh butah 'anána? Di ho' 'int'ah ndi 'ut'antsi' ndult'ah?" ²⁸ 'Et ndo búlhni, 'Sch'a detni 'uja.' 'Et be 'ulhna hiyulhni, 'Ndi 'ut'an untsi', 'i butah hananyi, 'i hats'únteleh hukwa' ninzun ih?" ²⁹ 'Et ndo búlhni, 'Awundooh! Whute 'int'ah doo ka sih ndi unzoo, 'i chah bulh 'óohneh. ³⁰ Whute ndulhdzun ha' untekuh whuts'un. 'Aw 'et ha' nukat neooninzut t'eh, ha' unteleh, 'en si budóosni, 'udechoo 'ut'antsi' hanáhle 'ink'ez ulhghel duték'un huba. 'Ink'ez ndai unzoo, 'i ts'iyawh hanáhle 'ink'ez haníyeh, 'i ba bukoo whuz danáhle.' "

Nts'e na'a yak'uz hubudayi cho 'uhuhoolhdzun, ndi mai, mustard hiyulhni, 'i k'una'a 'uhoont'ah

³¹ Doo chah 'uyoo khunek be nawhutnuk, 'i be whuts'odul'eh, 'i be hubulh yalhtuk 'et njan ndo búlhni, "Nts'e na'a yak'uz hubudayi cho 'uhuhoolhdzun, 'et ndez na'a njan nduhooht'ah. Ndi mai, mustard hiyulhni, 'i k'una'a 'int'ah. 'I dune yilhchoot 'ink'ez ha'nulhyeh k'et wheyinanla. ³² Ndi mai soo degha nus ninsol, 'i hanányi 'ink'ez buchun degha nus dincha suli. Ndi mustard hiyulhni buchun, 'i ndai mai chun ts'iyawh 'ut'an hanúlhyeh bugha ndoh suli. 'Et 'i dut'aiyaz buyooschun tah 'ut'o nininla."

Nts'e na'a yak'uz hubudayi cho 'uhuhoolhdzun, 'et lhes ntuldoh, 'i ndult'ah

³³ Doo chah 'uyoo khunek be nawhutnuk, 'i be whuts'odul'eh, 'i be hubulh yalhtuk 'et njan ndo búlhni, "Nts'e na'a yak'uz hubudayi cho 'uhuhoolhdzun, 'et ndez na'a njan

nduhoot'ah, lhes ntuldoh, 'i ndult'ah. Ts'eke yílhchoot 'ink'ez lhes nudzaih, 'i tat tests'ai be lhtayudzih, 'i dezbun. 'Et yunéhus, 'ink'ez 'udun ninínkai hoh untéldoh."

Khunek be nawhulnuk, 'i be whuts'odul'eh, 'i 'et whuz na'a zeh Sizi 'ilhunahuwúdulh hubulh yailhtuk

³⁴ Ndi ts'iyai, 'i khunek be nawhulnuk, 'i be whuts'odul'eh, 'i 'et whuz na'a zeh Sizi 'ilhunahuwúdulh hubulh yailhtuk. 'Aw 'uts'un na'a cha'budínli. 'Et ndez na'a zeh hubudáni. ³⁵ 'Et whuz na'a ndun nus whunilh'en daja dani, 'et ts'iyawh lhaóoduja hoh njan ndutni, "Khunek be nawhulnuk, 'i be whuts'odul'eh, 'i be hubulh yailhtuk.

Nts'oh huwa whudezulh hoh ndi yun 'uyínla 'et whuts'un, ndai buch'a yuntez'i, 'i bugha hubudutésnilh."

Ndi hanyieh, 'i tah 'ut'an ntsi' hanányi, 'i wheoobuntelhtun daja ni

³⁶ 'Et Sizi 'ilhohuwezdél, 'en ts'iyawh whenábalh'a 'ink'ez koo danínya. 'Et yugha hoodul'eh highu nindel 'ink'ez 'uhiyúlhni, "Ndi khunek be nawhulnuk, 'i be whuts'odul'eh, 'i ts'ah'un na'a nedini ndi hanyieh, 'i unzoo, 'i tah 'ut'an ntsi' hananyi, 'i 'et daja ni hoh 'utni?" ³⁷ 'Et ndo búlhni, "Ndai unzoo, 'i hanányi bumai 'i, ndun 'ainanla, 'en yinkak dune ye' 'en 'int'ah. ³⁸ Hanyieh k'et, 'et ndi yun k'ut nduwhúlt'ah ho' hoot'ah. Ndi mai unzoo, 'i yak'uz hubudayi cho buzkeh, 'en nduhúlt'ah. 'Et whunts'ih ndi 'ut'an ntsi', 'i ntsi' buzkeh nduhúlt'ah. ³⁹ 'Ink'ez ndun yuch'a detni, ndi 'ut'an ntsi' 'ainanla, 'en netsudule. Njan ha'nukat 'et ndóh yun k'ut ts'udelhtsi' whulatah 'et 'uhóont'ah. Ndunnah ha' únteleh, 'en lizas nduhult'ah. ⁴⁰ 'Et huwa nts'e na'a ndi 'ut'an ntsi' nahidulhdzoo 'ink'ez hidelhk'un, whuz na'a zeh njan k'an ndoh whudezulh whulatah t'eh chah, nduwhtenilh. ⁴¹ 'Ink'ez yinkak dune ye', 'en bulizas nduhóolcho ts'ih whutl'abutelelh. Nts'e hubudayi cho unli, ndunnah hukwaya hoonli tune 'úst'en, 'en 'ink'ez yuk'unucha'ust'en, 'en ts'iyawh 'ilhunaooobotélelh. ⁴² Nts'e kwun dez'k'un huba' hoot'ah, 'et whuz hubatelhdulh. 'Ink'ez tso yahutelhtuk 'ink'ez hubughooh luhuhidutek'us. ⁴³ 'Et dzin nts'e na'a sa hadánat, ndunnah ts'ah'un na'a 'int'ah, nts'e be'abá hubudayi cho unli, 'en chah whuz na'a zeh sa k'una'a but'su haíteduz ho' hoot'ah. Ndunnah budzo hoonli, 'en soo cho hiyoozóhlt'sa huba' hoot'ah.

Yak'uz k'une' whul'en, daóodelti, 'et ndez na'a njan ndúhoot'ah

⁴⁴ "Doo chah zeh 'ún whudusni, yak'uz k'une' whul'en, daóodelti, 'et ndez na'a njan ndúhoot'ah. Ndun dune njan yun k'ut hoonzoo, 'et nunúta hoonliyaz dez'ti, i nayí'ai. 'Ink'ez 'onghoh nayuntel'h'i. 'Et hoot'i k'et ndun dune ndai hoonli yit'i, 'i ts'iyawh ye 'ónket 'ink'ez ndi yun yuk'ut nayí'ai, 'i yun ndulhocho whe yonket.

Doo chah zeh yak'uz k'une' whul'en daóodelti, 'et ndez na'a njan nduhoot'ah

⁴⁵ "Doo chah zeh 'ún whudusni, yak'uz k'une' whul'en, daóodelti, 'et ndez na'a njan nduhoot'ah. 'Et doo chah 'uyoon dune, 'en hoonliyaz 'i ts'iyawh yooket. 'Et 'o 'un doo chah ye ná'oonket. 'En kw'usul k'us dunezti, 'i hikunuta. ⁴⁶ 'En 'ilho kw'usul k'us dunezti, 'i nainí'ai. Ndun dune ndai hoonli yit'i, 'i ts'iyawh ye 'ónket hoh ndi kw'usul k'us dunezti, 'i yoonanket.

Yak'uz k'une' whul'en, 'et lhoombilh tahíyaldel, 'et whuz na'a njan nduhoot'ah

⁴⁷ "Et doo chah zeh 'ún whudusni, yak'uz k'une' whul'en, 'et ndez na'a njan nduhoot'ah. Ndez na'a 'uhut'en, lhoombilh tahíyaldel 'ink'ez yanáhiyigus lhawh dédowh 'i hiyuzdlooh. ⁴⁸ 'Et yahíyuzguz ts'iyawh lhtaháhiyule. Ndai lhook untsi', 'i ts'iyawh 'un whehíyulhdelh. 'Ink'ez ndai unzoo, 'i ts'iyawh nts'e 'uhitel'h'ilh ts'ú whehíyulhdelh. ⁴⁹ 'Aw 'et nts'oh whúdezulh hoh huba neóoni'ai, 'et huba whusawhélt's'ut t'eh, 'et dukw'un'a zeh 'uwhtenílh. Lizas whusahutedulh, 'en ts'iyawh dune hinzoo 'ink'ez dune hintsi' lhtahábotélelh. ⁵⁰ Ndunnah hintsi', 'en nts'e kwun dez'k'un huba' hoot'ah, 'et whuz hubotelhdulh. 'Ink'ez tso yahutelhtuk 'ink'ez hubughooh luhuhidutek'us." ⁵¹ 'Aw 'et Sizi ndo búlhni, "Njan ndun whudusni, 'et ts'iyawh ih 'eoonáhzun?" 'Et 'uhiyúlhni, "A, neMoodihti, ts'iyawh t'ets'oninzun." ⁵² 'Et ndo búlhni, "Et huwa ndan Yak'uz bughunek 'uk'e'eduguz, 'i 'ink'ez yak'uz k'une' whul'en 'et hubugha wheyodalh'i, ndun dune 'en bukoo whumoodih, 'en ndult'ah. 'Ink'ez ndai yit'i, 'i tah ts'iyawh ts'et hayúle, k'an, 'i 'ink'ez 'uda, 'i chah. 'Et whuz na'a dune hoodulh'eh."

Keyah Nazareth ts'ih ndunnah Sizi buba 'alha' cha'hoot'ah, 'en ts'iyawh hits'u desnih

⁵³ 'Et ndi khunek be nawhulnuk, 'i be whuts'odul'eh, 'i 'aw 'et Sizi ts'iyaintsuk lhaoodinla hoh njan usda 'et whuch'a nanja. ⁵⁴ 'Ink'ez dich'oh bukeyah ts'ih whénaja hoh Lizwif hubuluglez 'et wheóobudunilh'i. Et ts'iyannah huba hooncha suli, 'ink'ez 'ulhóodutni, "Ndun dune nts'ez de hahó'ai ndi khunek whunih, 'i be yalhtuk? 'Ink'ez hooncha tune 'ut'en nts'e na'a dat'en hoh 'ut'en? ⁵⁵ 'Alha ilah bukoo 'uwuhulh'en, 'en buye' 'int'ah? 'Ink'ez 'en ilah

be'ama Mary? K'us bulhutsinkah 'en James, Joses, Simon, 'ink'ez Judas? ⁵⁶ 'Et bulhutsinkah 'aw ts'iyawh nelh cha'hit'ah? 'Et ndun dune ndi ts'iyawh nts'ez de hahónla hoh 'utni?" ⁵⁷ 'Et huwa ts'iyawh hits'u desnih. 'Et Sizi ndo búlhni, "Ndun nus whunilh'en unli, 'en ts'iyannah yudelhti. 'Et whunts'ih dich'oh bukeyah whut'en 'ink'ez dich'oh bukoo, 'en chah 'aw chahidilhti." ⁵⁸ 'Et Sizi 'en 'aw buba 'alha' cha'yít'ah. 'Et huwa dich'oh bukeyah 'aw lhat hooncha tunucha'ít'il.

14

John dune too be 'ulh'en, 'en hizelghí

¹ 'Et hoh da wheghah whudezulh hoh hubudayi cho Herod 'en Sizi yulh údants'o. ² 'Et Herod tube 'ustl'en ndo búlhni, "Ndun John dune too be 'ulh'en, 'en 'int'ah. Yaidla tah nakhitna. 'Et huwa 'ut'en hoolhtus tune'út'en." ³ Ndez na'a 'uhooja hoh da Herod John hiyílhchoot, hiyulghel 'ink'ez tsak'e híya'ai. Bulhutsin Philip hiyulhni, 'en bu'at Herodias hiyulhni, 'en bula gha ts'ih 'uhíyínla. ⁴ 'Et John 'en Herod ndi yulhni, "Aw nyun mba ts'ah'un na'a cha'hoot'ah hoh 'uyoon bu'at buzih sinda." ⁵ 'Et Herod yutuzelghel hukwa' ninzun. 'Et whunts'ih ts'iyannah dune John 'en nus whunilh'en 'int'ah huninzun, 'et huwa Herod whenelhújoot. ⁶ 'Et 'ilhudzin 'et Herod whuzdli dzin 'uhoont'ah hoh Herodia butse' 'en hububat nunúdaih. Herod tube buba hoonzoo. ⁷ 'Et 'ahoh hits'u náhezya hoh ndi yúlhni, "Ndet sts'o hukwa' ninzun sts'o hukwa' dini." ⁸ 'Et ndun ts'eke be'ama, 'en, "Herod oodilhuk John dune too be 'ulh'en butsi lusyet be stl'ainkaih dóni," yulhni. ⁹ 'Et hubugha hubudayi cho budzi únduda sulí. 'Et ts'iyannah ndunnah yuzih hudelhts'i, 'en ts'iyawh hidánts'o, 'et ts'ekeyaz bughunek yutl'aida'ai. 'Et huwa whuz na'a 'uhíyooleh huba' hoont'ah. ¹⁰ 'Aw 'et nts'e tsak'esda ts'ih whuz wheyá'h'a, 'ink'ez tsak'esda ghuhinli, 'en John hitsi k'unéntsé. ¹¹ 'Ink'ez lusyet be whusahíyankai, 'ink'ez ndun ts'ekeyaz tl'ahíyankai. 'Ink'ez be'ama yughah nininkai. ¹² 'Yugha hoodul'eh, 'en whusahandel. Hiyust'e híyilhchoot 'ink'ez whuyihiyalhti. 'Et hukw'elh'az Sizi ts'un whehandel 'ink'ez nduhídani.

5,000 dune Sizi híte'alh, 'i hubugha iní'ai

¹³ 'Et Sizi whulh uduzts'ai hoh buch'a nanja 'ink'ez ts'i be inya 'ink'ez nts'e dune nuchasyah ts'ih whuz whénki. 'Et whunts'ih lhanah dune t'ehonanzin íbulh nts'e whénki ts'ih, whuz lhelhdun keyah whut'en whehínandel. ¹⁴ 'Et Sizi ts'i bé hainya hoh dune soo ts'ah'un hulai 'aw 'uzdooni ghait'ah, 'en bunilh'en. 'Et 'ahoh hubugha té'nanzin 'ink'ez nduda chah ts'iyawh soo na'binla. ¹⁵ K'an 'aw 'et hulgha 'uhoont'ah 'et huwa yugha hoodul'eh, 'en highu nindel 'ink'ez 'uhíyúlhni, "Njan dune nuchasyah 'uhoont'ah. 'Aw 'et ye 'un whezulh. Ndunnah ts'iyawh 'uts'un keyah ts'ih naobéhl'ah, 'et whuz híte'alh, 'i híyoket." ¹⁶ 'Et whunts'ih Sizi ndo búlhni, "Aw nahutoodelh huba cha'hóot'ah. Nuhwhenich'oh hubugha ná'nuht'ah." ¹⁷ 'Et 'uhíyúlhni, "Aw hoonliyaz chats'ít'ih. Lhes skwunlai 'ink'ez lhook nankoh, 'aw 'i zeh ts'ít'i." ¹⁸ 'Et ndo búlhni, "De' sugháh ninahle!" ¹⁹ 'Et ndunnah 'ilhunahuwédel, 'en ts'iyawh tl'oyaz k'ut natl'ahudoolts'ilh hubúlhni. 'Et ndi skwunlai lhes 'ink'ez nankoh lhook chah, 'i hitl'ahíyanla, nduk yetá'en hoh suchanailya ni tenadedli. Lhes taidalhuk 'ink'ez lhook 'i chah ndíyínla 'ink'ez yugha hoodul'eh butl'ayánla, 'ilhohuwédel hubugha híyoo'ah ka. ²⁰ 'Et ts'iyawh 'uhan'al 'ink'ez 'uhunesdai. Ndai ts'ih tezkat 'i ts'iyawh 'ilhunahiwezdla hoh lanezi 'o 'at nankoh (12) ts'its'ai dezibun. ²¹ 'Et ndunnah dune, 'en 'ankw'us 5000 'uha'al. 'Et 'uskeh 'ink'ez ts'ekoo 'en chah 'uha'al.

Sizi too k'ut nuya

²² 'Aw 'et Sizi yugha hoodul'eh ts'i tuz whenaóobalh'a hoh, "Sutsuh nyan ahkelh," hubúlhni. 'Ink'ez 'ilhunahuwédel, 'en chah dukeyah ts'ih whenaóobalh'a. ²³ 'Aw 'et ndunnah ts'iyawh whenaóobalh'a hoh dich'oh ndoh dzulh k'uz whinya tenadutedli ka. Dich'oh únli hoh bé nadalghel. ²⁴ 'Aw 'et ts'i bun k'ut taniz hoh wheghah tatsi cho be nilhts'i be hubududezts'i. 'I be ts'i hoh nudúlduz. ²⁵ 'Aw 'et bundada haootéhl'en hoh Sizi too k'ut buts'u tezya. ²⁶ 'Et khunyaz yugha hoodul'eh hitel'h'en hoh whenelhújoot, "Dune tsen 'ut'en!" hutni íbulh tsoya whehúnihlutuk. ²⁷ 'Et 'ahoh Sizi hubulh yatelhutuk, "Nuhdzi ulhtus úlhtsi! Si 'ust'en! Whenulhujut ílah!" ²⁸ Peter ndez na'a yoodulhuk, "SMoodihti 'alha nyun 'int'en t'eh, too k'ut nts'u toosya stl'ahóo'aih." ²⁹ 'Et 'ahoh ndi yúlhni, "Anih!" 'Aw 'et Peter ts'i be hainya 'ink'ez Sizi too k'ut yuts'u teyalh ka. ³⁰ 'Et nyo whunelhújoot, "Dune tsen ulhtus 'ink'ez whenelhújoot 'ink'ez yuk tezdlat hoh, "SMoodihti, sula 'ineh!" yulhni. ³¹ 'Et 'ahoh Sizi yula dughéllchoot hoh ndi yulhni, "Aw soo 'ultsuk, 'i be 'alha' hoont'ah, 'i chaint'ih. 'Et dahoont'ah huwa mba nawh 'uhoont'ah?" ³² 'Et ts'i be nahét'az hoh 'ahoh nilhts'i k'ah na'ja. ³³ 'Et ndunnah ts'i be hudelhts'i, ts'iyawh hibut nachánilya 'ink'ez 'uhíyulhni, "Alha nyun Yak'usda buYe' unín't'ah!"

Gennesaret whut'en nduda Sizi soo na'bulh'en

³⁴ 'Aw 'et nyan Gennesaret ts'ih yahuzki hoh, ³⁵ 'et keyah whut'en Sizi hitel'h'en ibulh, nahiyoolhúts'it hoh lhtunahunek hust'ai. 'Ink'ez ts'iyawh nduda, 'en hits'ún lhgha hohodinla. ³⁶ Hits'utédudlih, "Nдай nyunaih naints'uz, 'i 'ants'ih yus ts'ih but'áts'ughoonah," hiyulhni. Ts'iyawh ndan hit'aghéznai, 'en ts'iyawh ts'ah'un na'a soo ná'huja.

15

Nдай nedzi be yats'ulhtuk, 'i bugha ts'intsi' ulhiih

¹ 'Aw 'et Jerusalem keyah whuts'un ndunnah Moses be' dustl'us 'uk'ununa'úsduguz 'ink'ez Pharisee, 'en chah ts'iyawh Sizi highu nindel 'ink'ez 'uhutni, ² "Et di ka ngha hoodul'eh, net-suh whudelhdzulh 'uda ne'whust'en hukw'u na'a 'aw hukw'unucha'hust'en? Whunilh'en, ndunnah ngha hoodul'eh, 'aw lanacha'hulhúde 'uhute'alh whutsuh!" ³ 'Et ndo búlhni, "Et di ka nuhwhenich'oh nuhk'ah ts'ih huwa Yak'usda bughunek buk'unucha'zaht'en? ⁴ Whunulh'en, nuhwheni nts'e na'a ndaht'en! Yak'usda bughunek nuht'aida'ai hoh njan ndutni, 'Nyu'abá 'ink'ez nyu'ama bulh hubudóolhti.' 'Et doo chah 'udun 'et njan ndutni, 'Ndan be'ama 'ink'ez be'abá bulh dzuh ts'ih bughu yatelhtuk, 'en daootsah huba' hoot'ah.' ⁵ 'Et whunts'ih nuhwheni ndez na'a 'udahni, 'Ndan be'abá k'us be'ama njan ndo búlhni, ndai 'ust'i, 'i be da nuhla 'oost'en wule, 'et whunts'ih 'i ts'iyawh Yak'usda bugha iníla.' ⁶ 'Et whuz na'a nuhwe'ut'en k'ah be 'aw be'ama 'ink'ez be'abá bulh chabudlíhti. 'I be Yak'usda bughunek nuht'aida'ai, 'i 'aw hoonliyah chailah sulhtsi! ⁷ Nuhwheni duba náhdzoo ahli! Ndun nus whunilh'en Isaiah, 'en 'uda ho'en 'ink'ez ts'ah'un na'a 'utni nuhwheni nuhwhugha. Njan 'et njan ndutni,

⁸ 'Ndunnah dune bughunek be buzek be sudéhlhti.

'Et whunts'ih budzi sughun nilhdza 'int'ah.

⁹ 'Ndunnah doo ka 'ants'i 'et suts'un teni 'uhunoolhzin.

'Ink'ez ndet dune bube 'ut'en k'ah,

'i Yak'usda bughunek netl'aida'ai, 'i k'una'a 'uyoon hubuhoodoolh'eh ka 'uhut'en.' "

¹⁰ 'Et Sizi 'ilhunahuwésdel ndo búlhni, "Anih! Ndez áhdulh!" 'Et ndo búlhni, "Soo zélhts'ai 'ink'ez soo cho nt'eeonahzeh! ¹¹ Nдай dune buzai yúkat, 'i 'aw 'et ilah hintsi' hulhiih. 'Et whunts'ih ndai khunek 'aw chaizooch, 'i dune ye yalhtuk, 'i be dune hintsi' 'ulhiih." 'Et 'et yugha hoodul'eh highun nindel hoh 'uhiyúlhni, "T'eeonínzun ih ndunnah Pharisee nyudánts'o daja dini, 'et nduhóolcho huba dzuh 'údenja?" ¹³ 'Et Sizi ndo búlhni, "ABá yak'uz usda, ndai 'aw whuyuchaínile, 'i bughiih tubulh hahítel'hch'ulh. ¹⁴ Whute! Ndunnah 'aw but's'áhachaoozah'aih! 'En moodiih chawhés'en lí'hint'ah. 'Et ndez na'a njan nduhoot'ah, 'ilhunuh chawhés'en 'ink'ez 'ilhunuh chawhés'en ghuuli t'eh, nahúlt'ah tsa k'et hutelhts'ulh." ¹⁵ 'Et Peter yoodulhktuk, "Ndi be nawhutnuk 'i be whuts'odul'eh, 'i nts'e na'a daja ni, 'et ts'iyawh whenénilhtun." ¹⁶ 'Et ndi yúlhni, "Aw ih nuhwheni tachaoodulhts'it hoh ih dahni? ¹⁷ 'Awhuz ih ts'ah'un nechaóozah'ak? Dune ndai buzai yúkat, 'i ts'iyawh bubut zeh be yukat. 'Ink'ez buyust'e ts'ih hanádukat. ¹⁸ 'Et ndai dune khunek be yailhtuk, 'i budzi ts'ih hayúkat 'i 'int'ah, 'ink'ez 'i dune dilhtsi'. ¹⁹ Soo cho whunulh'en, ndi 'et ndunt'ah, 'i dune budzi tuz hayúkat, be ne-eni unt'si, 'i dune hutuzelghel, 'uyoon dune bu'at k'us 'uyoon ts'eke buki bulh tinta' ant'en, 'ink'ez 'aw lhughudelhúts'i whunts'ih whuz na'a zeh ne'hut'en. 'Uhudunut'ih, 'uyoon ba huwhuts'it, 'ink'ez Yak'usda ch'a yalulhtuk chah. ²⁰ 'Et njan 'et ndúhoont'ah, nduhoolhchoh dune hintsi' hulhiih. 'Et 'aw lanacha'zulhude hoh 'ah'ah, 'aw 'et huwa ilah hintsi' 'ulhiih."

Ndun ts'eke, 'udun yun k'ut whut'en, 'en buba 'alha' hoot'ah hooncha ho' hoot'ah

²¹ 'Aw 'et Sizi njan usda whuch'a nanja hoh Tyre keyah 'ink'ez Sidon keyah wheghah nánja. ²² 'Et whuts'un 'ilhunuh ts'eke, 'en Canaan whut'en 'int'ah, 'en yughu ninya. Tso bulh yalhtuk ho 'uyulhni, "SMoodihti sugha te'ninze, t'enyunúszun David but's'u hainzut 'unint'ah! Sutse, 'en ntsi' nududeh, 'i buyídinda!" ²³ 'Et 'aw daja chaidínil. 'Et yugha hoodul'eh highu nindel 'ink'ez 'uhiyúlhni, "Ún nailh'ah, 'et tso bulh yalhtuk 'ustl'e' 'udóoneh sih." ²⁴ 'Et Sizi, 'en ndun ts'eke 'uyúlhni, "Ndunnah Israel bukoo whut'i, 'en 'ants'ih sheep tinta níl'h'az, 'i lí'int'ah, 'en zeh but's'un whests'alh'a." ²⁵ Ndun ts'eke 'en yughu ninya hoh yubut nachaneti 'ink'ez, "SMoodihti, sula 'ineh!' yulhni. ²⁶ 'Et Sizi 'uyúlhni, "Uskehkah lhes híyu'ah, 'i lhiyazkah hubugha ts'iyaa'ah t'eh 'aw chahóozooch." ²⁷ 'Et ts'eke ndi yúlhni, "SMoodihti 'alha' dini. 'Et whunts'ih ndai moodihti bukw'uzdai k'ut tukat, 'i lhiyazkah híyeldel." ²⁸ 'Et Sizi ndi yúlhni, "O ts'eke ndi mba be 'alha' hoot'ah, 'et hooncha ho' hoot'ah. 'Et huwa hukwa' nínzun k'una'a 'uhoneh." 'Et soo ndoh wheghah whezulh, but's'e' soo ná'uja.

Lhanah hunduda, 'en Sizi usda highu nindel 'ink'ez ts'iyawh soo ná'balh'en

²⁹ 'Aw 'et Sizi bughu natesja Galilee bun ghah lhunásja hoh, ndoh dzulh k'uz whenya, 'et natl'adedá. ³⁰ 'Et khunyah lhanah dune, 'en highu nindel. Ndunnah nuchahúsdel,

chawhés'en, yachahulhtuk, buyust'e hubodi'ai, 'ink'ez 'uyoon chah, 'en ts'iyawh hits'un hubuninla. Hibut nebaninla 'ink'ez ts'iyawh soo ná'hubinla. ³¹ Yachahulhtuk chah yawhehunilhtuk, buyust'e hubodi'ai, 'en chah soo na'huja. Nucháhsdel chah nahúdelh nahusdli, chahuwhés'en chah honilh'en nahusdli. Ts'iyannah bunalh'en hoh tube huba hooncha 'ink'ez Israel budune, 'en buYak'usda 'en 'o nus hidálhti.

Sizi 4,000 dune ghá' n'ái

³² Sizi yugha hoodul'eh, 'en 'anilh hubúlhni 'ink'ez ndo búlhni, "Ts'iyawh ndunnah dune hubugha té'nuszun. Tat dzin whuts'un njan sziuh hudelhts'i 'ink'ez 'aw huya'alh, 'i chahít'ih. 'Et 'aw cha'hus'al hoh bukeyah ts'ih nabutool'h'a ghaít'ah. 'Et ndúbusdla t'eh, nahedulh hoh sih bukaootoozit." ³³ Yugha hoodul'eh hiyulhni, "Njan keyah 'aw dune hoolah 'uhoont'ah. Nts'ez de simba soo 'últuk, 'i tet'alh, 'i nats'óoleh dune lhe'huneltsuk lah?" ³⁴ 'Et Sizi ndo búlhni, "Daltsuk lhes sut'e aht'í?" 'Skwunlai 'o at nankoh 'i lhes sut'e 'ink'ez lhook nosolyaz bulh," hiyulhni. ³⁵ 'Et 'ilhuhowezdel, 'en natl'adulhúts'ih hubúlhni. ³⁶ 'Et ndi lhes skwunlai 'o at nankoh (7) lhook bulh yílhchoot 'ink'ez suchanaílya ni hoh tenadidli. Taidalhkut 'ink'ez yugha hoodul'eh butl'ayánkai. 'I ts'iyawh natl'ahadelt's'i, 'en batáhiniki. ³⁷ Ts'iyawh na'het'al 'ink'ez 'uhunesdai. 'Et yugha hoodul'eh skwunlai 'o at nankoh k'its'ai dezibun 'i highá' wez'al, 'i 'ilhunahiwezdla. ³⁸ 4,000 dune bat'en 'uha'al. 'Uskiyaz 'ink'ez ts'ekoo 'en chah 'uha'al. ³⁹ 'Aw 'et Sizi 'ilhunahuwésdel bukeyah ts'ih whuz whenaóobalh'a, 'et ts'i be naja 'ink'ez yun Magdala huwhutni ts'ih whuz wheháni.

16

Pharisee 'ink'ez Sadducee chah, 'en huwa 'ét'en huba' hooleh hukwa hiyoodulhkut

¹ 'Aw 'et ndunnah Pharisee 'ink'ez Sadducee chah, 'en highu nindel 'ink'ez hiyóolhdzih hoh hiyoodulhkut, "Aw ih yak'uz whuts'un hooncha tune' whut'en, whunénolhtun ghaít'ah?" ² 'Et ndo búlhni, "Et hulgha ts'ih nduk whunul'h'en. 'Et whudulk'un t'eh, 'et dzin hoonzoo tele dahni. ³ 'Et bundada kw'us bulh dulk'un suli whunul'h'en t'eh, 'aw 'et zeh whudutetsi' dahni. Nuhwheni duba nahdzoo ahli! 'Et nduk dawhut'en, 'et t'eeonáhzun. 'Et whunts'ih ndoh whugha whudezulh dawhut'en, 'et ndet 'uwuhulhni, 'aw t'eeonuzáhzun! ⁴ Njan k'an ndoh whudezulh, 'en lubeshi ts'un ne'hut'en 'uhint'ah. 'Ink'ez 'ahoolhyez dune ts'eke bulh tinta' hutet'ilh, 'et zeh whuts'un hunint'uk. 'Ink'ez hooncha huwa 'ét'en whuntel'h'ilh hukwa' nahzun. 'Et whunts'ih 'aw hoo'h'en nuhghu hólt's'it ghaít'ah. 'Et nts'e na'a Jonah bulh dáhooja inle, 'et zeh whuteh'ilh ho' hoot'ah!" hubúlhni, 'ink'ez bughu whenája.

Pharisee 'ink'ez Herod bules untuldoh, 'i ch'a hughohle hubúlhni

⁵ 'Aw 'et nyan yahuzki hoh yugha hoodul'eh lhes nahodelúnah. ⁶ 'Et Sizi ndo búlhni, "Ahoohlyez wheni khaadli ndunnah Pharisee 'ink'ez Sadducee chah, 'en bules untuldoh, 'i ch'a." ⁷ 'Et 'ahoh lhulh yawhehunilhtuk, "Et 'aw lhes chats'ít'ih 'et huwa 'utni." ⁸ 'Et Sizi t'eeonazun, 'et ndo búlhni, "Nuhwheni be 'alha' hoot'ah, 'i unsol! 'Et huwa 'udahni. 'Aw lhes whusachah'al, 'et huwa ih 'et howu yalhtuk? ⁹ Awhuz ih 'aw ts'ah'un t'eeonuzahzun? 'Aw whunachazulhunih hoh ih skwulai lhes 'i be 5,000 hubugha náh'ai, 'ink'ez daltsuk k'its'ai ts'utezkat, 'i 'ilhunawehla? ¹⁰ 'Et doo chah skwunlai 'o at nankoh lhes 'i be 4,000 hubugha ináh'ai, 'et daneltsuk k'its'ai ts'uhétkat, 'i 'ilhunawehla? ¹¹ 'Et nts'e na'a aht'ah t'eeonuzahzun, 'aw lhes hubugha nohwulh yachasulhtuk? 'Uda ndun whudúsní, ndunnah Pharisee 'ink'ez Sadducee chah, 'en bules untuldoh, 'i bughohle, 'i bughí yáhtuk ho' dusni." ¹² 'Et 'ahoh t'ehoninzun ndunnah Pharisee 'ink'ez Sadducee chah, dune huhodulh'eh, 'et whuch'a buch'a huwahli, 'et 'uwuhulhni. Ndi lhes bulh untuldoh, 'i ch'a huwahli ni ilah hoh 'utni.

Sizi 'en Christ 'int'ah 'et Peter howu yalhtuk

¹³ 'Et Sizi Caesarea Philippi buyun k'uz whinya hoh yugha hoodul'eh, 'en huboodulhkut, "Si yinkak dune ye' 'ust'ah. 'Et whunts'ih n'awh dune, ndan hoh 'ust'ah hutni?" ¹⁴ 'Et 'uhiyúlhni, "Bulunah, 'en nyun John dune too be 'ulh'en 'int'ah hutni. 'Et bulunah chah, nyun Elijah 'int'ah hutni. 'Et 'onghunnah chah, nyun Jeremiah 'int'ah hutni. 'Ink'ez bulunah nyun nus whunilh'en 'ilhunuh 'int'ah hutni." ¹⁵ 'Et ndo búlhni, "Nuhwheni do, ndan 'ust'ah dahni?" ¹⁶ 'Et Simon Peter yatelhtuk hoh ndi yúlhni, "Nyun ndun Christ, Yak'usda khuna, 'en buYe' unint'ah." ¹⁷ 'Et Sizi ndi yúlhni, "Simon Jonah buye', degha nus hoonzoo ngá whults'ut! Ndet sudini, 'et 'aw ndi yun k'ut dune, 'en ilah nyunalhts'et hahó'ai. Se'aBá yak'uz usda, 'en nyunalhts'et hahó'ai. ¹⁸ 'Ink'ez nyun Peter 'int'ah. 'Et ndi tse 'i k'ut suluglez neootes'alh. Njan ndun kwuncho ulhtus, 'i yuh ts'ih haindel, 'en whunts'ih 'aw whuch'a hoolhdeh ghaít'ah. ¹⁹ Nts'e yak'uz hubudayi cho usda, whuz be da'dutut'aih, 'i ntl'ates'alh. 'Et ndi yun k'ut ndai whedinguz, 'i 'et 'uda yak'uz chah whuz na'a zeh whedint'uk. 'Et ndai ndi yun k'ut k'unada'uk, 'i 'et yak'uz chah 'uda whuz na'a

zeh k'una'tet'uk.”²⁰ Et yugha hoodul'eh khunekti be ndo búlhni, “Khun teh 'uyoon dóohni gunih, si Sizi ndun Christ, 'en 'ust'ah.”

Dzuh nutezut 'ink'ez datétsah, 'et Sizi huwu yalhtuk

²¹ Et wheghah whezulh whuts'un Sizi yugha hoodul'eh, 'en wheóobunulhtun nus daootenil'et. Nts'e na'a Jerusalem ts'ih teyalh. 'Et keyah ndunnah dune netsuh whudelhdzulh, 'ink'ez náwhulnuk bumoodih, 'ink'ez Moses be' dustl'us 'uk'ununa'úsduguz chah, 'en bube lhat hoh dzuh nuhítelhdzut, 'ink'ez hituzelghel'h. 'Et whulh tat dzin, 'et dinadutédalh. ²² 'Et Peter, 'en Sizi yil'choot, 'udun neinilhti 'ink'ez hukwa' yudáni, “SMoodihti nyun Yak'usda ngha te'untezeh! 'Aw nyulh 'et ndúhoneh ghaít'ah!” ²³ Peter yuts'un nalhú'a 'ink'ez ndi yúlhni, “Satan sut'ak ninínyih! Nyun yooya suzilhts'i! Yak'usda nts'e na'a dat'en, 'et 'aw howu nuni chanuzinzut. Ndi yun k'ut dune nts'oh tuné'hut'en, 'et hukw'una'a zeh nuni ninzut!”

Ndan Sizi Gri yuntooya hukwa' ninzun, 'en ye dulhdulalghus yóolhchoot 'ink'ez yuntooya

²⁴ 'Et Sizi yugha hoodul'eh ndo búlhni, “Ndan dune se'ut'en k'ah oot'en ka sunteyalh hukwa' ninzun t'eh, ndi yun k'ut dats'int'ah, 'et ts'iyawh whula dootnih, 'ink'ez dulhdulalghus yóolhchoot 'ink'ez suntooya. ²⁵ 'Et huwa ndan ye khuna hotelhyih hukwa' ninzun t'eh, 'en tinta hóte'ah. 'Et whunts'ih ndan ye khuna si sugha tinta ooní'ai t'eh, 'en ye khuna 'i nahíte'ah. ²⁶ 'Et huwa dune ndi yun 'i ndulhcho bube'ildzun yúzdli t'eh, 'ink'ez duzul 'i tinta iní'ai t'eh, ndet buba whutézoo? 'Ink'ez dich'oh duzul nayitélchloh hukwa' ninzun t'eh, di k'el'ha simba duzul nahíyoket? ²⁷ 'Et huwa yinkak dune ye' whusatayalh, ndai be'aBá ye dezi, 'i 'ink'ez bulizas, 'en hubulh, 'et whusainya t'eh, nts'e na'a ts'yannah dahét'en, whuz na'a 'ilhunah hoh buba k'el'ha whutele. ²⁸ Soo ts'ah'un na'a ndun whudusni, bulunah njan nuhudelhúya, 'en dahutetsah whutsuh 'et whuts'un yinkak dune ye' nts'e na'a hubudayi cho tele, 'en whuz de úyalh huyuntel'hil'h.”

17

Sizi 'uts'un onent'en suli

¹ 'Aw 'et whulh l'hk'utat dzin inle hoh Sizi 'en Peter, James, 'ink'ez dulhutsin John chah, 'en ndoh dzulh k'ut dulh hobélya. ² Khunyaz hubunalh 'uts'un oonent'en suli. Bunen 'ants'ih sa k'una'a buts'u ha'ánduz, 'ink'ez bunaih 'i chah khunyaz lhiyul suli, 'ink'ez 'i chah buts'u ha'ánduz. ³ 'Et khunyaz Moses 'ink'ez Elijah hubunalh hube whédilts'ai 'ink'ez Sizi hubulh yawhénilhtuk. ⁴ Peter, 'en Sizi 'uyulhni, “NeMoodihti njan uzdelhts'i hoonzoo. Hukwa' ninzun t'eh, tat whut'ah 'uts'otelilh. 'Ilhunuh nyun mba, 'et 'ilhunuh Moses ba, 'ilhunuh chah Elijah ba.” ⁵ Peter yalhtuk hoh khunyaz kw'us be tidet'en hoh buk'eyinde. Kw'us tah ts'ih khunyaz 'uwhutni, “Nduun suYe' dega nus buk'esi' int'ah. 'En bulh hóonust'i. 'En zeh 'oozélhts'ai!” ⁶ Yugha hoodul'eh hídants'o hoh hibut nachánedel, 'ink'ez tube whehunehlújoot. ⁷ Sizi bughu ninya 'ink'ez but'agheznai hoh ndo búlhni, “Dinadahdelh 'ink'ez whenlhújut ilah!” ⁸ 'Et nduk nahítat'en, 'aw 'uyoon hoolah. Sizi dich'oh zeh hiya'en. ⁹ Ndet dzulh k'ut whenahedidel, 'et yuk nahidulh, Sizi khunek ulhtus, 'i be hubulh yalhtuk 'et ndo búlhni, “Yinkak dune ye' yaidla tah dinadutédalh whuts'un ndet whunel'h'en, 'et khun 'uyoon nudúóohni gunih!” ¹⁰ 'Et yugha hoodul'eh, 'en hiyoodulhkut, “Ndunnah Moses be' dustl'us 'uk'ununa'úsduguz, 'et di ka' hutni, Elijah 'en choo whusatayalh huba' hoont'ah hutni?” ¹¹ 'Et Sizi ndo búlhni, “'Et 'alha Elijah 'en choo whusatayalh 'ink'ez ndai hoonliyaz ts'iyawh lhanaidutedlilh. ¹² 'Et whunts'ih ndun whudusni, Elijah 'uda whusainya ho' int'ah. 'Ink'ez 'en 'aw t'ehinízun. 'Et hukwa' huninzun k'una'a 'uhiyinla. 'Et whuz na'a zeh 'en hubula be yinkak dune ye' dzuh nutezut.” ¹³ 'Et yugha hoodul'eh, 'en ts'iyawh John dune too be 'ul'h'en, 'en yughu yalhtuk t'ehonanzin.

'Uski, 'en ntsi' nudúdeh, 'i buyudínda, 'en Sizi soo ná'yinla

¹⁴ 'Aw 'et 'ilhohuwezdel 'en butanahundel hoh 'ilhunuh dune yughu ninya 'ink'ez yubut dugwútsi be nenínya. 'Ink'ez 'utni, ¹⁵ “SMoodihti suye' 'en bugha te'nonzeh! Bukaootuzuk 'ink'ez tube dzuh nuzut. Lhat tsudúts'uk 'ink'ez talts'uk chah 'ut'i. ¹⁶ 'Et ngha hoodul'eh bughí nilhti 'et whunts'ih 'aw soo ná'hiyooleh ghaít'ah.” ¹⁷ 'Et Sizi ndo búlhni, “Nuhwheni k'an ndoh whudezulh, nuhwheni 'aw be 'alha' hoont'ah, 'i chaht'ih, 'ink'ez tink'us zeh 'eht'il'h. 'Et dawhuldzah nuhwhutah tesdalh? 'Ink'ez dawhuldzah nuhwhuba 'et ndutest'il'h? De', nye' 'en sugha nínilhtih!” ¹⁸ 'Et ntsi' nudúdeh, 'i buyudínda, Sizi 'en ts'un khunek ulhtus, 'i be hukwa' yudáni. 'Et whulh hulgha zeh yuts'u hanája 'ink'ez ndun 'uski soo na'uja. ¹⁹ 'Et Sizi yugha hoodul'eh, 'en dune hoolah ts'ih highu nindel hoh 'uhiyulhni, “'Et dahoon't'ah huwa ndun 'uski, 'en ntsi' nudúdeh, 'i 'aw buts'u hanáts'inooyoot ghaít'ah?” ²⁰ 'Et Sizi ndo búlhni, “'Aw nuhwhuba 'alha' cha'hoot'ah 'et huwa 'aw 'oohleh ghaít'ah. 'Alha 'ún whudusni ndi 'anukat, 'i l'he'niltsol, 'i mustard hiyulhni, 'i k'una'a be nuhwhuba 'alha'

hoont'ah, 'i 'et 'ulcho t'eh, 'et ndez 'una'a da 'udoohni. Ndi dzulh njan whuts'un, 'et nguz nailts'ut dahni t'eh, 'ahoh 'et ndutenilh. 'Et whuz na'a ts'iyaitsuk whuz na'a 'udahni t'eh, 'et ndutét'ilh. ²¹'Et whunts'ih ndi ntsi' nududeh, 'i netenadudli, 'i 'ink'ez sahá'delya, 'et t'eh zeh dune but's'u hanáts'iyunteyolh ho' hoont'ah."

Sizi datetsah, 'et doo chah huwu yalhtuk

²²'Aw 'et Sizi 'ink'ez yugha hoodul'eh, 'en Galilee yun k'ut hudelhts'i 'et ndo búlhni, "'Aw 'et nilhduk w yinkak dune ye', 'en 'uyoon dune t'l'ahítelhtel. ²³Hituzelghel'h 'ink'ez whulh tat dzin inle t'eh, dinadutédalh." 'Et hodánts'o hoh ts'iyawh tube tso huzdli.

Sizi 'en chah luglez wuhocho whuzooneya yuk'elha hoolh'i

²⁴'Aw 'et keyah Capernaum whuz hunindel hoh 'ilhunuh sooneya 'ilhunanowes'aih, 'en Peter yughu ninya 'ink'ez yoodulhuk, "Nuhwheni whunohodulh'eh 'en chah ilah luglez wuhocho whuzooneya yuk'elha hoolh'i?" ²⁵'Et, "A," ni. 'Et Peter koo daninya. 'Et Sizi 'ahoh yulh yatélhtuk 'ink'ez ndi yulhni, "Simon, daja ninzun? Ndi ndai sooneya dune buba k'elha yutele, 'i ndi yun k'ut hubudayi cho 'en ndi sooneya 'ilhunanowes'aih? Dich'oh buzkekah tulih k'us n'awh whut'en tulih?" ²⁶'Et Peter ndi yulhni, "'Aw n'awh whut'en, 'aw 'en zeh." Sizi ndi yúlhni, "'Et 'alha' dini. Hubudayi cho dich'oh bubuzkekah 'en 'aw huba k'elha hole ghait'ah. ²⁷'Et whunts'ih ndunnah Capernaum whut'en, 'en nelh hánilch'e hukw'u na'a hubuts'oolh'en ghaít'ah. 'Et huwa ndi luglez wuhocho whuzooneya, 'i huba k'elha ts'iyoolhtsilh. 'Aw 'et, bun k'uz ts'inyalh 'ink'ez oolhjas. Soo 'udechoo lhook silhjus, 'i buzek lhch'a 'uhoonleh. 'Et sooneya naité'alh. 'I ilhchoot 'ink'ez si 'ink'ez nyun bulh neba bugha fyó'alh."

18

Yak'uz hubudayi cho dilhts'i ndan simba dega nus dezti?

¹'Et hoh da zeh Sizi yugha hoodul'eh, 'en highu nindel 'ink'ez hiyoodulhuk, "Yak'uz hubudayi cho delhts'i ndan simba k'us dezti?" ²'Et Sizi ndun 'uskiyaz 'anih yulhni, 'ink'ez hubutah neínlihti. ³'Ink'ez ndo búlhni, "'Et soo ts'ah'un na'a 'un whudúsní, 'aw 'uts'un na'a nahcha'ahní, 'ink'ez 'uskehyaz k'ah ts'ih sahli t'eh, 'aw 'et zeh huwa, nts'e yak'uz hubudayi cho unli whuz toohdelh ghait'ah. ⁴'Et huwa ndun 'uskiyaz, ndan yuk'ah ts'ih 'int'ah, whuz na'a dich'oh te'dudil'en, 'et ndunt'ah, 'en nts'e yak'uz k'une' whul'en, 'en hubutah k'us hidelhti tele ho' 'int'ah. ⁵'Ink'ez ndun dune 'uskiyaz, ndan yuk'ah ts'ih 'int'ah huhóont'i, 'i bulh highu nuseya, si chah whuz na'a zeh 'usuhinla."

Dune 'en bugha 'uyoon lubeshi yutélhcholh t'eh, ndun dune nduja, 'et dahóolts'i' 'et whute'ilh

⁶"'Et ndunnah 'uskehyaz huba 'alha' 'ust'ah, 'uskehyaz hoontsi' ts'ih hubonilht'uk, ndun dune 'et ndúja, 'en tse cho but's'ilchun yehudinguz 'ink'ez k'us takhulh 'et tábuhano t'eh, 'et 'o nus whútezoo. ⁷Ndi yun k'ut hudelhts'i, 'en ndunnah hukwaya hoonli tune' 'uhut'en, 'en dawhultsi', 'et but's'u whélt's'ulh ho' hint'ah. 'Alha njan hukwaya hoonli tune' hutet'en ho' hoont'ah. 'Et whunts'ih ndan bugha 'et 'úhooja, 'en dawhultsi', 'et hote'ilh ho' hoont'ah! ⁸'Et nla k'us nke 'i be hukwaya hoonli tune' 'ínt'en t'eh, k'unint'as 'ink'ez 'un tilh'is! 'Et dzuh ninya k'us nyust'e bodin'ai, 'et whuz na'a 'ilhuz be ts'ukhuna, 'i nghalts'ut t'eh, 'et whuz na'a dega nus mba whútezoo. 'Et whunts'ih nke 'anelht'et 'ink'ez nla 'anelht'et chah bulh 'ínt'ah hoh kwun nachanusne, 'i tanyanino t'eh, dega nus mba whutétsi'. ⁹'Ink'ez nyuna be hukwaya hoonli tune' whut'en whunilh'en t'eh, nyuna hanó'alh 'ink'ez 'un ntolh'is! 'Et nyuna 'ilho bulh zeh, 'et whuz na'a 'ilhuz be ts'ukhuna, 'i ngha nínzut t'eh, dega nus mba whútezoo. 'Et whunts'ih nyuna 'anelht'et bulh kwun nachanusne, 'i tanyanino t'eh, dega nus mba whutétsi'.

Ndunnah tinta huninkat, 'en Sizi hubutelhyih ka, 'et huba whusainya

¹⁰"'Et ndunnah 'uskehka khun buka cha'nuzoozhin gunih! 'Alha lizas yak'uz hudelhts'i, 'en bughu hinli 'ink'ez se'aBá yak'uz usda, bulizas 'en 'ahoolhyez hinalh ne'ut'en. ¹¹'Et huwa ndunnah tinta huninkat, 'en yinkak dune ye' hubutelhyih ka, 'et huba whusainya. ¹²Nts'e na'a daja nahzun? 'Et dune 'en lanezi lanezi (100) sheep 'ut'i hoh 'en hubutah 'ilhunuh tinta ninya 'et bulah 'et nébuninla 'ink'ez ndai lhuk'i tinta ninya, 'en dzulh k'uz yukawhenántai. ¹³'Et nayilhti t'eh, ts'ah'un na'a 'un whudusni, ndunnah bulah 'et nébuninla, 'en bugha whunelhnik. 'Et whunts'ih ndai lhuk'i tinta ninya, nayilhti t'eh, 'en bugha dahoolcho 'i be simba 'o nus whuntélhnik! ¹⁴'Et whuz na'a zeh ndunnah 'uskekah 'et 'ilhunuh whunts'ih kwuncho yuh ts'ih teyalh t'eh, nuhwhe'aBá yak'uz usda, 'en 'aw hukwa cha'nizun.

Nyulhutsin lubeshi be dulya 'uja t'eh, datánlih?

¹⁵ “Et nyulhutsin lubeshi be nch'ani t'eh, 'et buzih nininya 'ink'ez di ka sch'adini, 'et dóni. 'Et nyun 'ink'ez nyulhutsin bulh nuhwhenich'oh lhanaóódoohle. 'Et nghunek yílhchoot t'eh, nyulhutsin whuch'a nanilde ho' hoont'ah. ¹⁶ 'Et 'aw chanyoozilhts'ai t'eh, 'ilhunuh k'us nanah teh ilhchoot 'ink'ez 'et bukoo ts'ih natoohdelh. Nanah k'us tanah teh mba lhgha 'úhudeja t'eh, 'et whuz na'a 'uhót'e. 'Et 'i be daja hutni, ts'iyai 'i khunek ts'ah'un na'a 'uhoneh. ¹⁷ 'Et whunts'ih 'et chah 'aw chanhozilhts'ai t'eh, 'et Yak'usda ba 'ilhunahuwédel, 'en chah budóohni. 'Et 'en chah 'aw chaboozilhts'ai t'eh, 'et ndan 'aw huba 'alha' cha'hoot'ah k'us ndan sooneya 'ilhunanowes'aih, 'et ndun lubeshi be nch'ani, 'et 'en buk'una'a noolh'en. ¹⁸ 'Alha' dusni ho' dusni, nuhwheni ndai ndi yun k'ut whuladehtnik t'eh, 'et nduk yak'uz chah bulaoodutetnih. 'Et ndi yun k'ut ndai lhgha 'úhudeja t'eh, 'et ndoh yak'uz chah lhgha 'úwhutenilh. ¹⁹ Doo chah 'ún whudusni, ndai buka yoodutelhkut, 'i 'ink'ez nanah k'us tanah ndi yun k'ut lhgha nuhwhuba soo' hoont'ah t'eh, 'et se'aBá yak'uz usda, 'en nuhwhuba 'uwhtelilh. ²⁰ 'Et huwa nts'e soozí bugha nanah k'us tanah 'ilhunahuwédel t'eh, 'et sih si chah nuhtah 'ust'ah ho' hoont'ah.”

Lhba whunats'odoolnah

²¹ 'Et Peter yughu ninya 'ink'ez yoodulhkut, “SMoodihti ndun sulhutsin 'en lubeshi be sch'a 'uja. Dawhultsuk whe lubeshi be sch'a 'utet'ilh 'ink'ez buba whunaoodutelhúnah? Skwunlai 'o 'at nankoh (7) tulih 'et 'uwhuneltsuk?” ²² 'Et Sizi ndi yulhni, “Aw skwunlai 'o 'at nankoh (7) 'i chadzúsnih. 'Et skwunlai 'o 'at nankoh lanezi (70) k'us 'o 'un tulih 'et 'uwhuneltsuk dusni ho' dusni. ²³ 'Et yak'uz k'úne' whul'en, 'et ndez na'a njan duhoont'ah. Ilhunuh hubudayi cho unli da, 'et be 'ulhna, 'en daneltsuk be butsu' whulh'ai, 'i ts'iyawh ye bubúlh lhanaoodutelíh, 'et hukwa' ninzun. ²⁴ 'Et ho' whunilh'en 'ilhunuh be 'ulhna dahinilhti. Ndai ye yuts'ú whulh'ai, 'i 10,000 sooneya dezti, 'i 'et 'uneltsuk. ²⁵ Hoolah! Yuk'elha yoolhtsilh, 'i hoolah. 'Et ndun hubudayi cho bughunek be 'et ndi yulhni, 'et ndun dune, bu'at, bubuzkeh, 'ink'ez ndai yit'i, 'i chah, 'i ts'iyawh ye 'óket. 'Et t'eh soo suba k'elha whutelhtsilh. ²⁶ 'Et huwa ndun be 'ulhna yubut nacháneti 'ink'ez yuts'un tedudlih hoh ndi yúlhni, 'Sumoodih k'at, suba ilh'i! Ts'iyawh mba k'elha whutelhtsilh! ²⁷ Bumoodih tube yugha te'nanzin. 'Et ndai ye yuts'u whulh'ai, 'i ts'iyawh yuba whunaoodelahunah, 'ink'ez whenayalh'a. ²⁸ 'En 'ulhna zeh 'az whinya hoh doo chah 'ilhunuh dudulh 'ulhna, 'en nayilhti. 'En lanezi lanezi (100) sooneya ch'aditi, 'i 'et 'uneltsuk yuts'u whulh'ai. Yuzool ílhchoot hoh ndi yúlhni, 'Daneltsuk ngunelh'ai, 'i suba buk'elha hoolhtsilh! ²⁹ Ndun yubut dugwútsi be nininya 'ink'ez yuts'u tedudlih hoh ndi yúlhni, 'K'at, suba ilh'i. Ts'iyawh mba k'elha whutelhtsilh! ³⁰ 'Et whunts'ih 'aw chayoozilhts'ai. 'Et whunts'i 'ayan'ai ndai yughi nelh'ai, 'i ts'iyawh yuba k'elha whutelhtsilh 'et whuts'un. ³¹ 'Et 'onghoh 'ulhna, 'en ts'iyawh honalh'en 'et dahooja. 'Et ts'iyawh howu ni huzdli. 'Et huwa humoodih ts'un whehandel 'ink'ez ts'iyawh nuhidani. ³² 'Et ndun 'et ndúja, 'en bumoodih 'anih yudani 'ink'ez 'et ndo búlhni, 'Nyun 'ulhna k'us nts'i' zeh 'int'ah! Suts'un tedindlih ka 'et huwa ndai be sts'o zilh'ai, 'i ts'iyawh mba whunaoodelhúnah! ³³ Nts'e na'a ngha te'nazin, 'et whuz na'a 'oneh mba' hoont'ah, nyulh 'ulhna ts'un! yulhni. ³⁴ 'Et bumoodih yulh hunilch'e. 'Et ndunnah dune dzuh nuhulhdeh, 'en butl'ayálhti. 'Et ndai yughi nelh'ai, 'i ts'iyawh yuba k'elha whutelhtsilh whuts'un. ³⁵ 'Et nuhwheni chah nuhwulhutsinka tinta' hant'en, 'ink'ez nuhdzi ndulhcho, 'i be 'aw buba whunachaoozulhúhna t'eh, 'et sih se'aBá yak'uz usda, 'en chah whuz na'a zeh 'aw nuhwhuba whunaoodoolnah ghaít'ah.”

19

Dune lhghu delhts'i lhch'á nahusdel, 'et huwa Sizi hubodulh'eh

¹ 'Aw 'et Sizi hubulh yalhtuk 'ustl'e 'udeja hoh njan Galilee yun k'ut whuch'a nanja. 'Et Judea yun k'ut Jordan koh whuch'az whuz ninya. ² Lhanah dune 'et whuz hahíndel. 'Et soo na'balh'en. ³ 'Et ndunnah Pharisee, 'en chah highu nindel hiyootéldhzih ka. 'Et hiyoodulhkut, “'Et ndet huwa ne'atkah 'ants'ih hoh hubugha buch'a naztedalh t'eh, 'et Moses khunek netl'aida'ai, 'i buk'una'a ih 'uhoont'ah?” ⁴ Sizi ndo búlhni, “'Et ndi dustl'us k'ut 'uk'e'eduguz, 'i 'aw ih buk'eyáchasulhtuk? Njan 'et ndutni, 'udechoo ho' whewhudit'en da ndun dune inla, 'en dune 'ink'ez ts'eke bulh 'obíla da. ⁵ 'Ink'ez 'et ndutni, 'Njan huwa dune be'abá 'ink'ez be'ama bulh buch'a ooya huba' hoont'ah, 'ink'ez bu'at bulh lhulh zeh 'uhoot'e huba' hoont'ah. 'Et whuz na'a nahúlt'oh 'ilho hutele.” ⁶ 'Et whuz na'a 'aw 'o 'un nanah chahilah, 'ilho zeh hinli suli. 'Et huwa ndun Yak'usda lhgha hubunilhti, 'aw dune lhch'a nabóolhtelhuba cha'hoot'ah.” ⁷ 'Et hiyulhni, “'Et di ka Moses hoh da whuz na'a netl'ahó'ai 'ink'ez dustl'us chah neba inla inle hoh dune, 'en bu'at t'l'ayóolhchoos 'ink'ez naitoolh'a.” ⁸ 'Et ndo búlhni, “Nuhwhenich'oh nuhdzi dulhts'un, 'et huwa Moses nuh'at whuch'a naoohja nuhtl'ahó'ai. 'Et whunts'ih whe'whudit'en whuts'un, 'aw 'et duchahoot'ah. ⁹ 'Et 'un whudúsní, dune bu'at 'en 'uyoon dune bulh tinta' ant'en t'eeonanzin

t'eh, 'et sih zeh ndi dustl'us ndai ye 'ustl'e' itelilh, 'i bu'at tl'ayóolhchoos. 'En bu'at 'aw tinta cha'it'il t'eh 'et whunts'ih ndi dustl'us yutl'ayálhchooz, 'ink'ez 'uyoon ts'eke yughu nasda t'eh, 'et sih dune ts'eke bulh tinta' 'ant'en suli. 'Ink'ez ndun dune bu'at 'ustl'e' uyinla 'ink'ez 'uyoon dune yughu nasda t'eh, ndun dune 'en chah dune ts'eke bulh tinta' 'ant'en tele." ¹⁰ 'Et Sizi yugha hoodul'eh, 'en 'uhiyulhni, "Et dune bu'at bulh whuz na' a 'uhutet'ilh t'eh, 'aw lghu chahikah t'eh, 'et 'o nus soo' hoont'ah." ¹¹ 'Et ndo búlhni, "Ndi khunek, 'i 'aw ts'iyannah ba cha'it'ah. Ndan bughá whunt'ai, 'aw 'en zeh buba' hoont'ah. ¹² 'Et bulunah dune 'aw bughez hoolah hoh huwhuzdli. 'Et 'onghunnah 'et whuz na'a dune 'ubinla. 'Ink'ez nts'e yak'uz hubudayi cho, bulunah 'en ba whuz na'a soo whulh 'utet'ilh, 'en whuz na'a whulh 'uhoot'e."

Sizi 'uskehyaz bula be hubuk'edalník

¹³ 'Aw 'et 'uskehyaz highu buninla. Khun teh buk'édolnih 'ink'ez buba tenadoodli ka. 'Et whunts'ih yugha hoodul'eh, 'en dah hubuhútni. ¹⁴ 'Et Sizi ndo búlhni, "Whute 'uskehyaz sts'un hutoodelh. Khun teh dah budóohni gunih! Ndunnah Yak'usda hubudayi cho unli whuz delhts'i, 'en ndunnah 'uskehyaz hubunduhúlt'ah ho' hint'ah." ¹⁵ Bula be hubuk'edilnik, 'ink'ez buch'a nanja.

Dune soode'a 'int'ah

¹⁶ 'Aw 'et 'ilhunuh dune Sizi yughu ninya 'ink'ez yoodulhkut, "Dune hoodulh'eh unzoo, nts'e na'a hoonzoo k'una'a 'utest'ilh 'ilhuz khutenalh whuch'a ootélhdoh?" ¹⁷ 'Et Sizi ndi yulhni, "Et di ka nus zoo sudini? 'Aw 'ilhunuh unzoo hoolah. Yak'usda 'aw 'en zeh unzoo ho' int'ah. 'Et whunts'ih 'ilhuz be hukhutenalh hukwa' ninzun t'eh, ndai Yak'usda khunek dune tl'aida'ai, 'i buk'une' int'en da." ¹⁸ 'Et ndi yúlhni, "Et k'us ndai ho' dini?" 'Ink'ez Sizi ndi yúlhni, "Dune sóolghelh gunih! Ts'ekoo bulh tinta' 'ont'en gunih! 'Undunont'ih gunih! 'Uyoon ba honts'it gunih! ¹⁹ Nye'abá 'ink'ez nye'ama bulh hubudóhlti! Nts'e na'a ninyunch'oh k'enaindutsi", whuz na'a zeh nyulh dune buk'eontsi!" ²⁰ 'Et ndun chilh ndi yulhni, "Nusol da whuts'un, ndi ts'iyawh buk'une' zust'en. Nts'e na'a 'o 'un datést'ilh?" ²¹ Sizi ndi yulhni, "Lhadulya 'utant'ilh hukwa' ninzun t'eh, ndai 'int'i, 'i ts'iyawh be 'ónket, 'ink'ez tel'en butaininle. 'Et sih nduk yak'uz ndai 'ilhuwenla, 'i 'et mba telalh. 'Ink'ez 'anish se'ut'en k'ah tune' ónt'en ka sunanyalh." ²² 'Et ndun chilh ndi khunek yudánts'o hoh tube budzi nduda hoh yuch'a nanja. Tube soode'a 'int'ah 'et huwa.

Dune 'uhuhooleh ghaít'ah, 'et whunts'ih Yakusda ba huwa chahoolnah ho' hoont'ah

²³ 'Et Sizi yugha hoodul'eh ndo búlhni, "Ndi 'i be soo ts'ah'un na'a 'ún whudusni, yak'uz ts'ih, nts'e hubudayi cho unli, tube howa whulna hoh dune soode'a 'et whuz teyalh. ²⁴ Doo chah zeh 'un whudúzni, ndi khunai ncha, 'i camel hiyulhni, 'i buba howa whulna hoh ughabatsoh bula tah bukoni'a hukwa téyalh. 'Et whunts'ih 'o nus howa whulna hoh dune soo de'a, 'en Yak'usda hubudayi cho unli whuz dateyalh." ²⁵ 'Et yugha hoodul'eh, 'en hidants'o hoh buba hooncha 'ink'ez 'et nduhutni, "Ndan zeh dutejih ho' udini?" ²⁶ Sizi hubunilh'en 'ink'ez ndo búlhni, "Dune, 'aw ndet 'uhuhooleh ghaít'ah, 'et whunts'ih Yak'usda ba huwa chahoolnah ho' hoont'ah." ²⁷ 'Et Peter yateltuk hoh Sizi njan ndi yulhni, "Whunilh'en, ndai ts'ut'i, 'i ts'iyawh bulazdetnik, 'ink'ez nye 'ut'en k'ah ts'ih ts'oot'en ka nyuts'un ts'utezdel. 'Et huwa ndai negha ninkat?" ²⁸ 'Et Sizi ndo búlhni, "Ts'ah'un na'a 'ún whudusni, nts'oh whuye whudezulh ts'iyaintsuk k'an, 'i natedleh, 'et wheghah whudezulh hoh yinkak dune ye', yak'usda cho dezti, 'i yuk'etl'adutedalh. 'Et nuhwheni suntehdel inle, nuhwheni chah lanezi 'o 'at nankoh kw'uts'uzda, 'i dune huba nahuteyeh ka, 'et dutelhúts'ilh. 'Et Israel buts'u hainde, 'en lanezi 'o 'at nanah (12) lhendoh dédown, 'en huba nahutehyeh. ²⁹ 'Ink'ez ndan bukoo huwu tezya, k'us dulhutsinkah, k'us dulhutsakah, k'us bu'abá 'ink'ez be'ama, k'us bu'at, k'us buzkehkah, k'us dukeyah chah, njan si soozii bugha huwu tezya t'eh, 'en lanezi lanezi (100) 'et 'uwhuneltsuk butl'anaootedúkulh. 'Ink'ez 'ilhuz be ts'ukhuna, 'et chah hubugha óotelts'ulh. ³⁰ 'Et whunts'ih lhanah 'udechoo 'uhint'ah, 'en 'udek'elh'az nahutedleh. 'Ink'ez lhanah 'udek'elh'az hinli, 'en 'udetsah nahutedleh."

20

Khunek be nawhutnuk, 'i be whuts'odul'eh, Yak'usda nts'e na'a be nek'une' whul'en

¹ "Yak'uz ts'e Yak'usda hubudayi cho, 'en ts'iyawh k'une' whul'en, 'et ndez na'a njan nduhoont'ah, 'ilhunuh dune 'en ndi yun k'ut yun ut'i. 'Et mai too chun hanyeh k'et, 'et huba 'utet'ilh ka' ninzun. Bundada 'uda 'et dune telh'alh ka whuz whinya. ² 'Et ndunnah hubalh'a 'ilhuk'i sooneya chaditi 'i dzin nduhóolyez hoh hik'elha utet'ilh, huhóost'et. 'Et huwa mai too chun hanyeh k'ez whebalh'a. ³ 'Et hukw'elh'az 9:00 bat'en, ts'uyi be 'óoket daninya dune bunilh'en, 'ants'ih hoh nahudelhúya. ⁴ 'Et njan ndo búlhni, 'Nuhwheni chah whuz mai too chun hanyeh ts'ih ahdulh. 'Ink'ez nts'e na'a sooneya ts'ah'un 'int'ah, 'i

nuhwhuba k'elha telhsilh.' 'Ink'ez whuz whehándel. ⁵ 'Et doo chah hukw'elh'az dzetniz bat'en k'us 3:00 bat'en chah whuz whinya. 'Et whuz na'a zeh 'uja. ⁶ Doo chah hulgha ts'ih bat'en whuz whinya 'ink'ez 'uyoon chah 'ants'ih hoh nadelhúya hubunilh'en. 'En chah ndo búlhni, "Et di ka dzin nduwihulez 'ants'ih hoh nudelhúya?" ⁷ "Et 'aw dune nechalh'ah, 'et huwa 'uts'int'ah,' hiyulhni. 'Et ndo búlhni, 'Nuhwheni chah whuz mai too chun haniyeh ts'ih ahdulh. 'Ink'ez nts'e na'a sooneya ts'ah'un 'int'ah, 'i nuhwhuba k'elha télhsilh.' ⁸ 'Aw 'et hulgha ts'ih dune 'ustl'e' hut'ih ndun mai too chun 'ut'i, 'en bughunli 'anih yudani 'ink'ez ndi yúlhni, "Uhut'en ts'iyawh whusábinle, 'ink'ez huba k'elha hoolhtsi. 'Et ndun 'udek'elh'az whe'dit'en, 'en choo huba k'elha holhtsi.' ⁹ Ndunnah hulgha ts'ih bat'en ul'a whusahandel 'ilhunah hinli 'ilhuk'i sooneya chaditi, 'i buba k'elha yulhtsi. ¹⁰ 'Et ndunnah 'udechoo ul'a, 'en chah whusahandel. 'O nus lhai duba k'elha tele huninzun. 'Et whunts'ih whuz na'a zeh 'ilhunah hinli 'ilhuk'i sooneya chaditi, 'i buba k'elha yulhtsi. ¹¹ 'En ts'iyawh buba 'uk'elha whuzdli hukw'elh'az, 'et ndun yun ut'i hich'a yawhenilhtuk. ¹² 'Et 'uhiyúlhni, 'Ndunnah 'udek'ah wheóbalh'a, 'en 'iloh sadzi hukw'e' hoonist'ah zeh 'uhet'en. 'Ink'ez wheni dzin ndúhoolyez hoh sa ulhtus, 'i niz 'uts'et'en. 'Et whunts'ih 'en nelhulhúgha zeh buba 'uk'elha whuzlhtsi.' ¹³ 'Et ndun yun ut'i 'et ndo búlhni, 'Sulh dunekah 'aw hoonliyaz tink'us na'a cha'unwhúsil. 'Et ts'iyawh nuhwhuba soo' hoot'ah 'ilhuk'i sooneya chaditi, 'i mba k'elha silhsi. ¹⁴ 'Aw 'et ndai nuhwe'ildzun ulhchoot 'ink'ez nahdulh. 'Et ndunnah 'udek'elh'az hubalh'a, 'en nuhwheni nuhk'una'a zeh 'et 'uneltsuk 'i zeh buba k'elha tesilh 'et hukwa' nuszun. ¹⁵ 'Alha ilah ih ndai ust'i, 'i nts'e na'a hukwa' nuszun tune' 'úlh'en? Nuszoo 'et huwa ih sugha 'aonilh ahli?' hubúlhni." ¹⁶ 'Et 'awhuz Sizi njan howu yalhtuk ndo búlhni, "Ndunnah 'udek'ah hinli, 'en 'udechoo nahutedleh. 'Ink'ez ndunnah 'udechoo hinli, 'en 'udek'ah nahutedleh. 'Et huwa Yak'usda lhanah 'anih dáni, 'et whunts'ih ntsoolyaz zeh 'utahaóobanla."

Sizi datetsah 'ink'ez dinadutedalh 'et whulh tat huwi yatelhtuk

¹⁷ 'Aw 'et Sizi Jerusalem ts'ih tezya. 'Ink'ez ndunnah lanezi 'o 'at nanah ndunnah yugha hoodul'eh, 'en 'udun nibuninla 'ink'ez ndo búlhni, ¹⁸ "Soo zúlh'ts'ai, Jerusalem ts'iztedulh 'ink'ez yinkak dune ye', 'en ndunnah náwhulnuk moodih, 'ink'ez Moses be' dustl'us 'uk'ununa'úsduguz chah, 'aw 'et butl'ahitelhtel, datetsah ka hiba nahuteyeh. ¹⁹ 'Ink'ez 'udun yun k'ut whut'en butl'ahitelhtel. 'En highu tedloh, hiyootelhtus, 'ink'ez 'et lhdulalghus k'ehitelhtel. 'Ink'ez hukw'elh'az whulh tat dzin dinadutédalh."

James 'ink'ez John hube'ama, 'en hoonli hukwa Sizi yoodulhuk

²⁰ 'Aw 'et Zebedee buzkeh hube'ama, 'et Sizi hits'un tezdel hiyoodutelhtuk ka. Hube'ama yubut nachaniti. ²¹ 'Et Sizi ndi yulhni, "Ndet sts'o hukwa' ninzun?" 'Et ts'eke 'utni, "Nts'e hubudayi cho inli, ndunnah nanah suzkeh, 'en 'ilhunuh nalnhih ts'ih tedalh 'ink'ez 'ilhunuh intl'as ts'ih tedalh, sugha óoni'ai." ²² 'Et Sizi njan ndutni, "Ndet hukwa' hoodulhuk 'aw t'eeonuzahzun. Ndi lubot 'aw 'et be' tesnilh, 'i nuhwheni chah be' tehnilh nahzun ih? 'Ink'ez ndai dune be too be 'ul'en, 'i be 'usotelilh. Nuhwheni chah whuz na'a zeh ih too be' tehnilh?" 'Et ndi híyulhni, "A, 'et sih nduts'óoneh!" ²³ 'Et ndo búlhni, "Alha sulubot be' tehnilh, 'ink'ez be too be' lhúya, 'i too be' tehnilh. 'Et 'aw doosni ghaft'ah ndan nalnhih ts'ih sts'un tedalh 'ink'ez ndan intl'as ts'ih sts'un tedalh. Ndunnah se'aBá huba lhaóodinla, 'aw 'en zeh buba' hoot'ah." ²⁴ 'Et 'onghunnah lanezi hidants'o hoh, 'aw 'et ndunnah nanah lhulhutsinkah huba dzuh 'uhudeja. ²⁵ 'Et Sizi ndunnah ts'iyawh 'anih hubudani 'ink'ez ndo búlhni, "Nuhwheni t'eeonahzun ndunnah 'udun yun k'ut whut'en bumoodih, 'en dune k'une' buhul'en. 'Ink'ez ndunnah ncha, 'en ndunnah bumoodih huba hubugha ndoh 'uhint'ah. 'Et whuz na'a hube 'ut'en k'ah hooni. ²⁶ 'Et whunts'ih nuhwheni nuhtah whuz na'a 'uteht'ilh nóohzin gunih. 'Et ndan nuhtah ncha tele hukwa' ninzun, 'en nuhwhuba ne'út'en wule. ²⁷ 'Et ndan nuhtah 'udechoo tele hukwa' ninzun, 'en nuhwe'ulhna wule. ²⁸ Whuz na'a yinkak dune ye', 'aw ba ne'whutet'en hukwa whusáchaiyal. 'Et dune buba ne'ut'en tele 'ink'ez buba datetsah, 'et whuz na'a lhanah naootekulh, 'et hukwa whusainya."

Nanah chawhés'en, 'en honilh'en nasdli

²⁹ 'Aw 'et hukw'elh'az Jericho keyah whuch'a náhusdel hoh lhanah dune hiyuntezdel. ³⁰ Nanah chawhés'en ti whuzih huzke. 'Et Sizi wheghah uyalh hoh hiduzts'ai. Soo tube cho hits'uh hahuyih, "Moodihti, David buts'u haínzut, negha te'nonzeh!" ³¹ 'Et 'ilhunahuwésdel, 'en "T'eduzahnih!" hubuhútni. 'Et whunts'ih 'o nus 'uhutni, "Moodihti, David buts'u haínzut, negha te'nonzeh!" ³² 'Et Sizi bughah nininya 'ink'ez ndo búlhni, "Dez áh'us. Ndet nuhwhuba 'uwhtesdlilh hukwa' nahzun?" ³³ "NeMoodihti nena be ts'onolh'en hukwa' uzninzun," hiyúlhni. ³⁴ 'Ink'ez Sizi hubugha te'nanzin hoh bula be hubuna yut'aghezna. 'Et 'ahoh honilh'en sulí. 'Aw 'et hiyuntez'az.

21

Lhanah huhoost'et hoh Sizi keyah Jerusalem ninya

¹ 'Aw 'et Jerusalem wheghah hedulh keyah whuyaz Bethphage huwhutni, 'et whuz hunindel. 'I dzulh yenun, Olive huwhutni. 'Et Sizi nanah yugha hoodul'eh, 'en dutsuh whébalh'a, ² 'et ndo búlhni, "Njan keyah whuyaz nuhgha nch'az whuz ah'us. 'Et whuz lhgha dah'az t'eh, 'et 'ahoh yeztliyaz, donkey hiyulhni, buyaz bulh whehudint'uk, 'et whunoolh'en. Sk'unaoobudooh'uk 'ink'ez dez sts'un naoobutoohlooh. ³ 'Et dune nuhoodulh'kut, 'Di ka 'ulh'en?' nuhuwhútni t'eh, 'NeMoodihti yuka' ninzun, dóohtni. 'Et 'ahoh sts'un bula dóohtnih." ⁴ 'Et whuz na'a ndi ts'iyawh tune' whust'en, 'i be nus hon'en daja ni, 'et ndulhcho 'et dúhooja. 'Et njan ndutni,

⁵ "Zion bukeyah whuti whut'en,
whunulh'en! Nuhhubudayi cho te'dudil'en hoh nuhts'u teyalh.
Donkey buyaz, 'en yuk'usda.
'En be nuhts'u teyalh."

⁶ 'Et ndez na'a njan dúhooja, Sizi yugha hoodul'eh whuz wheha'az, 'ink'ez Sizi daja hubúlhni, hoh tune'hust'en. ⁷ 'Et whuz na'a Donkey buyaz bulh hits'u hinilhti. Dunaih hik'éhiyinla 'ink'ez 'on dus de Sizi hik'etl'ahidilhda. ⁸ Lhanah dune dunaih ti hiba néhiyuzbus nts'oh lhuteyalh. 'Ink'ez 'onghunnah, 'en chah 'ul nanehidutselh 'ink'ez ti hiba nehídenla. ⁹ 'Aw 'et 'ilhunahuwésdel bulunah butsuh 'ink'ez bulunah buk'ah ts'ih hedulh 'ink'ez tube cho hahuyih ho' hutni,
"David buts'u haínzut ba ts'odélhti!
NeMoodihti boozí be whuz de úyalh.
'En dega nus hoonzoo bugha whulst'ut.
'Et soo degan doh hidélhti!" hutni.

¹⁰ 'Aw 'et Sizi keyah Jerusalem whuz ninya, 'et keyah whut'en khunahuntesdel hoh 'ulhódutni, "Ndan dune ho' 'int'ah?" ¹¹ 'Et 'ilhunahuwésdel hubuhútni, "Ndund 'en Sizi nus whunilh'en, 'en 'int'ah. Keyah Nazareth yun k'ut Galilee whuz'ai, whuz de hainya 'int'ah."

Ndunnah luglez wucho 'ooket 'ink'ez 'e'ooket, 'en ts'iyawh Sizi tinaoobunenyoot

¹² 'Aw 'et Jerusalem hubuluglez wucho whuna'neztl'oo daninya 'et ndunnah 'ooket 'ink'ez 'e'óoket, 'en ts'iyawh tenabunenyoot. Sooneya lkh'enaduleh bukw'uzdai 'i chah ts'iyawh buch'a yuntez'ai. Ndunnah dut'aiyaz, dove hiyulhni, be 'óoket, 'en bukw'usuda 'i chah buch'a yuntez'ai. ¹³ 'Et ndo búlhni, "Uk'e'duguz hoh njan ndutni, "Njan sukoo tenadudli ba koo dahni, 'et whunts'ih 'et chah njan ndutni, "Undunut'ih, 'en bukoo whuzúlhtsi." ¹⁴ 'Et luglez wucho 'et chawhés'en 'ink'ez bukechun nduda, 'en highu nindel, 'et soo na'balh'en. ¹⁵ Ndunnah náwhulnuk bumoodih 'ink'ez Moses be' dustl'us 'uk'ununa'úsduguz, 'en njan huwa 'ét'en tune' 'ust'en hinalh'en. 'Ink'ez 'uskeh 'en chah luglez wucho sulyahalhtuk 'et njan nduhutni, "David buts'u haínzut buba ts'odélhti!" 'Et njan ts'iyawh honalh'en hoh hukwa hanilch'e. ¹⁶ 'Ink'ez Sizi 'et ndi hiyulhni, "Ndi daja hutni huboozéhts'ai ih?" 'Et ndo búlhni, "A, 'ink'ez dah'úja 'aw hukw'uyachasulhtuk hoh ih dahni? Ndez na'a 'uk'e'wheduguz 'et njan ndutni,
"Uskeh 'ink'ez 'uskehyaz chah,

'en bughunek 'i be' hutni, ts'ah'un na'a suba hodilhti hubulhtsi.' "

¹⁷ 'Et ndunnah 'aw 'et buch'a nanja 'ink'ez keyah whuti huwu whenája. 'Ink'ez keyah whuyaz Bethany ts'un ninya 'et usda.

Ndi duchun mai buts'u haníyeh, 'i Sizi yek'éhanya

¹⁸ 'Et 'om bun 'uda 'et keyah whuti whuts'u hédulh hoh khunyz buye'élts'ul. ¹⁹ 'Et ti whuzih khunyz ndi mai chun, fig hiyulhni, yutelh'en. 'Et 'i yuts'un lhgha dinya hoh 'et 'aw bumai bughoh hoolah. 'Ut'an zeh bugha hoonli hoh ndi yúlhni, "Et 'aw 'ilhuz nyumai hootélah." Ni ibulh ndi duchun 'uyulhni, 'i dezgi.

Ndi duchun, fig hiyulhni, 'i be whuts'odutel'eh

²⁰ Ndunnah yugha hoodul'eh hiya'en hoh tube hoba hooncha. 'Et 'uhutni, "Nyoo mai chun, fig hiyulhni, daja hoh 'uja khunyz dezgi?" ²¹ 'Et Sizi ndo búlhni, "Alha 'un whudusi, bé 'alha' hoon't'ah, 'i aht'i, 'ink'ez 'aw nuhwhuba nawh cha'whutést'il t'eh, 'et ndi mai chun khunsih doogi. 'Aw 'et zeh ilah, njan dzulhyaz, 'Didilhts'i 'ink'ez bun k'ut wucho ts'ih tailhts'i, 'i dáhtni t'eh, 'et whuz na'a 'et ndoh whútenilh. ²² 'Et ndai buka' dahni tenadudli be, nuhwhuba 'alha' hoon't'ah t'eh, 'i ts'iyawh nuhgha tékulh."

Sizi ndan bugha dune gha ndoh 'int'ah, 'et hukwa hiyoodulh'kut

²³ 'Aw 'et luglez wucho daninya 'et hudélhts'i wheoobudunilh'i. 'Et nawhulnuk dega nus dézti 'ink'ez dune netsuh whudelhdzulh chah, 'en highu nindel 'ink'ez 'uhiyúlhni, "Nedini ndan bugha dune gha ndoh 'unint'ah njan dint'en. K'us ndan nt'ahó'ai dune

gha ndoh 'unint'ah?" ²⁴ 'Et Sizi ndo búlhni, "Si chah 'ilhun hukwa nuhoodutelhkut. 'Et ndusudáhni t'eh, 'et nuhwhudutesnilh ndan bugha dune gha ndoh 'ust'ah. ²⁵ Nts'e na'a John dune too be 'úlh'en? Ndan yutl'aho'ai dune too be telilh huba? Yak'uz ts'ih tulih hawhélt's'ut, k'us dune tulih ts'ih hawhélt's'ut?" Dich'oh lhtah howu yahalhtuk 'ink'ez 'uhutni, "Et yak'uz ts'ih hawhélt's'ut ts'utni t'eh, 'et neundúdoni, "Et di ka John nuhwhuba 'alha' cha'dusnih?" ²⁶ 'Et whunts'ih, 'Dune ts'ih hawhélt's'ut whutéla 'uhoont'ah,' ts'utni t'eh, 'aw uzdooni ghaít'ah, dune hububéznuljut, ts'iyana John 'en nus whunilh'en 'int'ah huninzun 'et huwa." ²⁷ 'Et Sizi ndi hiyulhni, "Aw nts'ez de hawhélt's'ut nt'ets'onízun." 'Ink'ez Sizi ndo búlhni, "Ndan be dune bugha ndoh 'ust'ah ndi njan nduwhúlh'en, 'et si chah 'aw ndun whudóosni ghaít'ah."

Ndunnah nanah ndet be'abá huba hukwa' ninzun, k'us nts'oh tune'hut'en

²⁸ "Njan hubugha daja nahzun? 'Ilhunuh dune nanah buye'. 'En 'udechoo yughu ninya 'ink'ez ndi yulhni, 'Suye' mai too chun haniyeh ts'ih whuz inyalh 'ink'ez suba 'int'en.' ²⁹ 'Et yuch'a tsí'desni. 'Et whunts'ih hukw'elh'az ndunát'e 'ink'ez whuz whinya. ³⁰ 'Et bulh nat buye', 'en chah yughu ninya 'ink'ez ndi yulhni. 'A, whuz toosya 'ink'ez 'oost'en!' ni. 'Et whunts'ih 'aw whuz chatíyal.'" ³¹ 'Et Sizi 'utni, "Ndunnah nanah k'us ndan ndet be'abá huba hukwa' ninzun hoh teh hukw'une' hust'en?" "Et 'udechoo, 'en zeh," hutni. 'Et Sizi ndo búlhni, "Ts'ah'un 'ún whudusni, ndunnah sooneya nalhdzooch 'ink'ez ts'ekoo 'ul'en chah, nts'e Yak'usda hubudayi cho unli, whuz nuhtsuh hutedulh. ³² Soo whunulh'en, be ts'ah'un 'uhoont'ah, 'i be John dune too be 'ulh'en nuhts'uh whusainya, 'ink'ez 'aw nuhwhuba 'alha' cha'hoont'ah. 'Et whunts'ih sooneya nalhdzooch 'ink'ez ts'ekoo 'ul'en, 'en ts'iyawh huba 'alha' hoont'ah. 'Et nuhwheni whunulh'en 'et whunts'ih 'aw nuwheni k'ah nácha'ahlil, 'ink'ez 'aw nuhwhuba 'alha' cha'hoont'ah."

Mai haniyeh k'et whulh'ai, 'en bugha whúts'odul'eh

³³ "Njan 'uyoo be nawhutnuk, 'i be nuhwhudutesnilh. Sih soozólhts'a! 'Ilhunuh bukoo whumoodih, 'en haniyeh k'et 'uhoonla, 'ink'ez mai too mai too chun 'ananla. 'Ink'ez whuna'nezt'oo. 'Et tsak'et hahónkai mai too 'utahahúlt'sus, 'et chah neóoni'ai. 'Ink'ez buk'ut yutes't'en, 'i chah wheni 'uhinla. 'En njan haniyeh k'et ndunnah ha' nulhyeh butl'ahó'ai, 'ink'ez nilhdza keyah ts'ih whinya. ³⁴ 'Aw 'et 'oouje neoninzuh hoh bukoo whumoodih 'en 'ulhna, 'en whuz whebalh'a 'ink'ez ndun 'uhut'en, 'en buts'un mai hitelchulh ka. ³⁵ 'Et ndunnah ha' nulhyeh, 'en bukoo whumoodih 'en 'ulhna hubílhchoot. 'Ink'ez 'ilhunuh soo yayalchus. 'Ilhunuh chah hizelghí. 'Ilhunuh chah tse be yahiyalh'uz. ³⁶ 'Et doo chah zeh 'onghunnah 'ulhna 'o nus 'uhuneltsuk whuz whebalh'a. 'En chah whuz na'a zeh 'et ndo buhínla. ³⁷ 'Et 'udek'elh'az bukoo whumoodih buye' whuz buts'ú wheyálh'a. "En tulih hidóolhti," ni. ³⁸ 'Et whunts'ih ndunnah bughu whulh'ai hitel'h'en hoh 'et 'ulhódotni, 'Ndu 'en nyoo haniyeh k'et bube'ildzun, 'en buye' 'ut'en. Ts'uzoolhghel! 'Et t'eh ndet buts'i telts'ulh, ts'iyawh 'et nduhóolcho ts'ohólhchoot!' ³⁹ 'Et hiyílhchoot 'ink'ez njan haniyeh k'et t'ahinino 'ink'ez hizelghí. ⁴⁰ 'Et huwa 'et njan mai too chun haniyeh, 'en bube'ildzun, 'en whusatayalh. Whusainya t'eh, 'et dabóoleh simba?" ⁴¹ 'Et ndi hiyulhni, "Et ndunnah untsi', 'en hooncha hukw'un'a hoolah hubutelhtsilh 'ink'ez njan haniyeh k'et 'uyoon ha' untelhyeh bugho télh'alh. 'Et whuz na'a niwhúzuk totsuk ndi mai higha' híteleh." ⁴² 'Et Sizi ndo búlhni, "Aw ih hukw'e yachazultuk Yak'usda bughunek daja ni inle da? 'Et ndez k'e'eduguz,

'Ndunnah 'en ndi tse be koo 'uwuhulh'en 'i 'ún hidutelh'us,

'i ba koo buk'uwuhuz'ai huba soo degha nus tse 'int'ah, 'i sulí.

'Et Moodihti whuz na'a 'uhoonla.

'Ink'ez nuwheni tube neba hooncha ho' hoont'ah,' ni.

⁴³ 'Et huwa nuhwhudúsní, nts'e Yak'usda hubudayi cho unli, 'et ts'iyawh nuhghu nahootélchulh 'ink'ez 'uyoon hudedowh butl'aóote'alh. 'En 'ut'en unzoo, 'i buts'u haóokat. ⁴⁴ 'Ink'ez ndunnah ndi tse hik'elht's'ut, 'en ts'iyawh yahidutelh'kulh. 'Ink'ez ndunnah ndi tse buk'édiht's'ut, 'en ts'iyawh hoolah hutele." ⁴⁵ 'Et ndunnah Lizwif náwhulnuk bumoodih 'ink'ez Pharisee chah, 'en ndi khunek be nawhutnuk, 'i whulh 'úhudants'o hoh t'ehonanzin Sizi 'en didut bughu yalhtuk. ⁴⁶ Nts'e na'a simba Sizi hitelchulh 'et hukwa' hut'en. 'Et whunts'ih dune yé hunuljut. 'En Sizi 'en nus whunilh'en 'int'ah huninzun 'et huwa.

22

Yak'uz k'une' whul'en, 'et hubudayi cho buye' bu'at whutele, 'et ndult'ah

¹ 'Et doo chah zeh Sizi be nawhutnuk, 'i be whuts'odul'eh, 'i be hubulh yalhtuk 'et ndo búlhni, ² "Et yak'uz k'úne' whul'en, ndez na'a njan dóohoont'ah, 'ilhunuh hubudayi cho buye' bu'at whutele, 'en huba lhadútenilh. ³ 'Ink'ez ndunnah bughu núseya, de'ulhna buts'u whebaoolh'a, 'anih hubadooni ka, 'et whunts'ih buch'a tséhudesni. ⁴ 'Et doo chah zeh

'uyoon chah de'ulhna whuz wheóolh'a. Ndunnah bughu nusja suba budoohni, "Aw 'et ts'uyi, 'ilhadint'ah. Njan musdus ts'iyawh ndai nilhúk'a, 'i ts'iyawh suba nahiyanghan dune yute'alh whuba. Ts'iyai 'i lhadint'ah. 'Aw 'et ndunnah lhghusdúke hubulh na'uztet'alh. Soo 'a dezáhdulh! suba hubudóohni." ⁵ 'Et whunts'ih ndunnah bughu nusja huba 'ants'ih 'uhoont'ah. Ts'iyawh lhents'un whehándel. Bulunah chah há' hunulhyeh ts'ih whenáhedel. 'Et bulunah chah hube 'ut'en k'ah whuz'ai ts'ih whenáhedel. ⁶ Bulunah hubudayi cho be 'ulhna hubihúlhchoot 'ink'ez dzuh ne'buhalh'en 'ink'ez hubuhanghan. ⁷ 'Et hubudayi cho whulh údants'o hoh tube hunílich'e. Ndunnah nehughan hubít'i ts'iyawh whuz whe-balh'a. Ndunnah be 'ulhna inghan, 'en ts'iyawh hoolah hubulh'tsi 'ink'ez bukeyah ts'iyawh hodáhk'un. ⁸ 'Et hukw'elh'az 'uyoon chah be 'ulhna, 'en ndo búlhni, "Aw 'et na'tet'alh lhaoodint'ah, 'et whunts'ih bughu nusja, 'aw huba soo cha'hildzooch." ⁹ 'Et huwa 'aw 'et ti ts'ih ahdulh. 'Ants'ih lhanah cho nahla t'eh, 'en ts'iyawh bughu nóhdelh. ¹⁰ 'Et ndun be 'ulhna ti ts'ih whehandel. Ndan nabuhinla, ntsi' 'ink'ez unzoo tubulh 'ilho ts'iyawh whusábahanla. 'Aw 'et na'huter'alh bukoo whudezbun. ¹¹ 'Aw 'et hubudayi cho buts'un danínya bughu nusja hubuntel'h'ilh ka. 'Et 'ilhunuh dune 'en 'aw naih dune lhghu delhts'i whunaih be dune chaillah hoh yutelh'en. ¹² 'Et ndi yúlhni, 'Sulh dune 'aw dune lhghu delhts'i whunaih be dune chainlah. 'Ink'ez nts'e na'a danínya?' 'Et ndun dune 'aw whé 'uyoodoni hooel. ¹³ 'Et hubudayi cho duba ne'ut'en ndo búlhni, 'Ndun dune ulhchoot 'ink'ez ulhghel. 'Ink'ez 'az tsahólhgus yuh ts'ih táhneh! 'Et whuz tetso 'ink'ez dughoo lheidútelh'us.' ¹⁴ Njan 'et ndutni hoh 'utni, lhanah ghu nusja 'et whunts'ih bulunah zeh 'utahálya."

Yun k'elha huhoohl'i hukwa' hoodulh'kut

¹⁵ 'Aw 'et ndunnah Pharisee 'udun nehúnindel 'ink'ez howu yahalhtuk, nts'e na'a Sizi ye yalhtuk, 'i be hitelzhaz hukwa' hut'en. ¹⁶ 'Et Pharisee hubugha hoodul'eh 'ink'ez Herod dédowh chah, 'en Sizi ts'un wheoobuhalh'a. 'Et ndi hiyúlhni, "Dune hoodul'h'eh t'ets'oninzun nyun ts'ah'un dune 'int'ah 'ink'ez khunek 'alha' 'int'ah, 'i be Yak'usda k'una'a dune hodilh'eh. Ts'iyannah mba lhgha 'int'ah. Nts'e na'a dune dahút'en 'et whunts'ih mba 'ants'ih 'uhoont'ah. ¹⁷ 'Et huwa nedini, ndi yun hik'elha hiyilh'i, 'i 'et ts'ah'un tulih 'uhoont'ah hoh hubudayi cho Caesar 'en tulih buba k'elha ts'uyoolhtselh, k'us 'awundooch tulih? Daja ninzun?" ¹⁸ 'Et Sizi t'eeoninzun nts'e na'a hooontsi' k'ah ts'ih 'uhoont'ah, 'et huwa ndo búlhni, "Et di kah sóolhdzih? Nuhwheni ts'iyawh duba nahdúdzoo aht'ah! ¹⁹ De' nyoo sooneya sunalh ts'et nah'al!" 'Ilhuk'i sooneya chaditi, 'i hit'ahína'ai. ²⁰ 'Et ndo búlhni, "Ndan bunen 'ink'ez booz chah buk'e'edúguz?" ²¹ "Hubudayi cho Caesar," hiyúlhni. 'Et ndo búlhni, "Et huwa ndai hubudayi cho Caesar bube'ildzun, 'i butl'anáyahle. 'Ink'ez ndai Yak'usda bube'ildzun, 'i Yak'usda butl'anáyahle." ²² 'Et hidants'o hoh ts'iyawh huba hooncha 'ink'ez hich'a nandel.

Nat ts'ukhítinah hukwa Sizi hiyoodulh'kut

²³ 'Et dzin zeh ndunnah Sadducee, 'en highu nindel. 'En 'uhutni dats'úsai 'ink'ez 'aw nats'ukhótnah ghaít'ah. ²⁴ 'Et ndi hiyúlhni, "Dune hoodul'h'eh Moses ndez na'a njan ndutni, 'et dune 'aw buzkeh hoolah hoh dazsai 'ink'ez bu'at zeh khuna t'eh, 'et bulhutsin 'en yughu naooda huba' hooht'ah. 'Et ndun bulhutsin 'en dughe yughu nasda t'eh, 'en ts'un dulhtsin ba buzkeh whutele. ²⁵ 'Et netah skwunlai 'o 'at nanah lhulhutsinka, 'en 'udetsah whudelhdzuhl, 'en 'at ut'i. 'Ink'ez 'aw buzkeh hoolah hoh dazsai. 'En bu'at dulhtsin ba nayoosdzi. ²⁶ Whúlh nanah whuz na'a zeh dazsai. 'Et whulh tat, 'en chah whuz na'a zeh 'uja. 'Et nduwhúleyz hoh skwunlai 'o 'at nanah ts'iyawh yahadla. ²⁷ 'Et 'udek'elh'az ndun ts'eke 'en chah dazsai. ²⁸ 'Et huwa nedini 'ilhudzin whusawhutelts'ulh hoh ts'iyannah dinadutédulh, 'et t'eh ndun ts'eke ndan bu'at tele? 'Et whunulh'en skwunlai 'o 'at nanah ts'iyawh hubughinda." ²⁹ 'Et Sizi ndo búlhni, "Nuhwhenich'oh na'dunáht'ah! 'Aw Yak'usda bughunek nt'enuzahzun. Ye ulhtus, 'i chah 'aw nt'enuzahzun. ³⁰ 'Et ndet dzin dune dinadidel t'eh, 'aw lhghu chahudutelhts'il 'et huwa. Dune dinadidel, 'en Yak'usda bulizgas k'una'a 'uhuter'ilh ho' hooht'ah. ³¹ 'Et daja sudahni yaidla tah dinadutédalh hubugha, Yak'usda daja ni, 'aw ih hukw'u yachazulhtuk? Njan ndutni, ³² 'Si Abraham, Isaac, 'ink'ez Jacob, hubuYak'usda 'ust'ah.' 'Aw yaidla hubuYak'usda ilah 'int'ah. Hukhuna 'en hubuYak'usda nusli unli 'et huwa." ³³ 'Et 'ilhunahuwédel 'en dahoont'ah hubugha hubudani tube huba hooncha.

Ilhuk'i khunek degha nus dezti, 'i netl'aída'ai

³⁴ 'Et Pharisee whulh 'úhudants'o nts'e na'a Sizi ndunnah Sadducee hubudani, 'et hukwa Sadducee 'aw yahutooldih ghaít'ah hoh hinat 'ilhunahuwédel. ³⁵ 'Aw 'et 'ilhunuh hubu-tah, Moses be' dust'us k'ut, daja ni hoh beni hoonli be yalhtuk unli, 'en Sizi yóolhdzih hoh yoodulh'kut, ³⁶ "Dune hoodilh'eh k'us undai khunek neba yutulhúhezya, 'i k'us degha nus dezti?" ³⁷ 'Et Sizi ndi yúlhni, " 'Yak'usda nyuMoodihti ndzi ndulhcho 'i be, nzul

ndulhcho 'i be, nyunut'uk ts'iyawh 'i be, 'ink'ez nyeni ts'iyawh 'i be chah, 'et whuz na'a 'en buk'eoontsi.' ³⁸ Ndi ndai nuhwhuba yutulhuhezya, 'i 'udechoo 'ink'ez dega husa dezti, 'i 'int'ah. ³⁹ 'Et bulh nankoh, 'i 'udechoo, 'i k'una'a 'int'ah, ndez na'a njan ndutni, "Et dahoont'ah hukw'una'a nyunch'oh k'enaindutsi', 'et whuz na'a zeh 'onghunnah chah buk'eoontsi!'" ⁴⁰ Ndi nankoh khunek nuhtl'adélts'ut, 'i be Moses be' dustl'us, 'ink'ez nus whunilhi'en hube dustl'us chah, 'i ts'iyawh 'ants'ih koo buk'ut whuz'ai, 'i li'int'ah."

Christ ndan unli 'int'ah?

⁴¹ 'Et 'awhuz ndunnah Pharisee 'ilhunahuwésdel hoh Sizi huboodulhuk, ⁴² "Christ ndan unli 'int'ah nahzun? K'us ndan yuts'u hainzut simba 'int'ah?" "En David yuts'u hainzut 'int'ah," hiyulhni. ⁴³ 'Et ndo búlhni, "Nts'e na'a 'int'ah David Ndoni be nyun sMoodihti 'int'ah nyudúzni ni 'et ndez na'a njan ndutni,

⁴⁴ 'Moodihti 'en sMoodihti ndi yúlhni,

nalnhnih ts'ih sinda t'eh nch'a detni, 'en buk'ut nke naóolyis mba hólshilh.'

⁴⁵ 'Et whuz na'a David, 'sMoodihti, 'uyulhni. Nts'e na'a simba 'en yuts'u hainzut wule?"

⁴⁶ 'Aw dune yuts'u yatoolhdih hoolah. 'Et ts'iyannah whehunuljut 'aw 'o 'un hiyoodolhuk ghaít'ah.

23

Moses be' dustl'us 'uk'ununa'úsduguz 'ink'ez Pharisee chah, 'en dawhultsi' 'et butsu' whélt'sulh

¹ 'Aw 'et Sizi ndunnah 'ilhunahuwésdel 'en 'ink'ez yugha hoodul'eh chah hubulh yawhenilhtuk hoh ndutni, ² "Ndu Moses be' dustl'us 'uk'ununa'úsduguz 'ink'ez Pharisee, 'en chah 'en dune hodutelh'eh 'et wheni Moses yuk'usda, 'i k'ut natl'ahudélts'i. ³ 'Et ndai khunek hiye nohwulh yalhtuk, 'i 'et ts'iyawh wúlhchoot 'ink'ez buk'úne' 'ooht'en. 'Et whunts'ih khun hubuk'una'a ne'óoht'en gunih. 'Et 'alha daja hutni, hoh tunuchá'hust'en. ⁴ 'Et ndez na'a né'hut'en, lhai cho lhughel tube howa whulna dune neyúge huba. Dune buwus k'ehiyále. 'Et hedich'oh hubulasgek lhuk'i whunts'ih nuhghoolhnaah ghaít'ah. ⁵ Ndai 'uhiyulh'en, 'i 'uyoon yunoolh'en huba 'uhiyulh'en. 'Ink'ez ndi Yak'usda bughunek zus, Phylacteries hiyulhni, 'o nus ncha hiyilh'i ts'iyannah hinoolh'en ka. 'Ink'ez ndi nayidúts'uz 'i tenahududli teh nahuyits'uz, 'i chah butsuh 'o nus 'udelyez nahiyulhstsih. ⁶ 'Et 'uhuté'ah 'ink'ez luglez chah soo k'us hoonzoo 'et zeh hudutélt's'ilh hukwa' huninzun. ⁷ 'Ink'ez ndet ts'uyi, 'i be 'óoket, 'et ts'iyannah hubodélhti hoh dahooga hubuhútni, 'et huóoont'i. 'Ink'ez ts'iyawh 'ihunah hinli hoh, 'Rabbi! Nehodulh'eh!' huba hudóoni hukwa' huninzun. ⁸ 'Et whunts'ih khun teh 'uyoon 'Rabbi,' nuhodóoni gunih! 'Aw 'ilhunuh zeh whenohodulh'eh hoonli 'et huwa, Christ 'en 'int'ah. 'Et nuhwheni ts'iyawh lhulhutsinkah ahli. ⁹ 'Et ndi yun k'ut 'ants'ih ndan, 'Abá,' hubudóohni gunih. 'Aw 'ilhunuh zeh nuh'abá unli 'et huwa, Yak'uz usda, 'en 'int'ah. ¹⁰ 'Ink'ez khun teh 'uyoon 'Nemoodihti,' nuhwhudóoni gunih. 'Aw 'ilhunuh zeh nuhMoodihti hoonli 'et huwa, Christ 'en 'int'ah. ¹¹ Ndunnah nuhtah hincha, 'en nuhwhuba ne'hut'en wule. ¹² 'Ink'ez ndan dich'oh ncha nadudil'i, 'en deganyuk tel'en tele. 'Et ndan deganyuk 'ududildzun, 'en dega ndoh ncha tele." ¹³ 'Et nuhwheni Moses be' dustl'us 'uk'ununa'úsduguz nuhwheni Pharisee chah, nuhwheni duba nahdúdzoo aht'ah! Dawhultsi' 'et nuhts'u whélt'sulh. Ndez na'a njan ndaht'en, nts'e hubudayi cho yak'uz usda, 'et whudáti dune ch'a dána'dehtan. Nuhwhenich'oh whunts'ih daóohya ghaít'ah. 'Ink'ez ndunnah whuz hedulh, 'en chah 'aw dabóohleh ghaít'ah. ¹⁴ Nuhwheni Moses be' dustl'us 'uk'ununa'úsduguz, nuhwheni Pharisee chah, nuhwheni duba nadúdzoo aht'ah! Dawhultsi' 'et nuhts'u whélt'sulh! Tsandelh hubukoo hubugha haoondunaht'ah. 'Et ndi tenadudli 'i be whuz na'a zeh 'aonilhka sa cho tenadahdli. 'Et huwa 'o nus 'uwulhcho nuhwhuba nahutedeh. ¹⁵ Nuhwheni Moses be' dustl'us 'uk'ununa'úsduguz, nuhwheni Pharisee chah, nuhwheni duba nadúdzoo aht'ah! Dawhultsi' 'et nuhts'u whélt'sulh! Ndi yun k'ut ndulhcho hoh náhdelh 'ink'ez too k'ut ndulhcho hoh nahke, 'ilhunuh tulih nuhwhenich'oh nuhk'una'a 'int'ah wulhstsih. 'Et whuch'a nulhde t'eh, 'et sih ndan nat 'uwulhstsi' hoh nuhghanus kwuncho yuh whuye' tele. ¹⁶ Nuhwheni chawhés'en li'ah't'ah, dawhultsi' nuhts'u whélt'sulh. Lhe'ah't'ah whuzeh'en 'et whunts'ih dune ti wheobuntelhtun hukwa' aht'en. 'Et ndez na'a dune whubodulh'eh, njan luglez whucho boozi be dune nahuhezya t'eh, 'et 'ants'ih 'uhoont'ah. 'Et whunts'ih luglez whucho 'et gold 'ink'ez silver bulh 'uhoolya, 'et 'i be whuz na'a nahuhezya t'eh, 'et whuz na'a 'uhuhoolleh huba' hoon't'ah, dáhni. ¹⁷ Nuhwheni whuzáhnik 'ink'ez chaoozéh'en ahli! K'us ndet dega nus whudezti? Luglez whucho k'us gold bulh 'úhoolya, 'et 'i tulih? 'Et luglez whucho 'et dega nus whudezti. 'Et gold bulh 'uhoolya, 'i 'ants'ih Yak'usda ba 'udun nenínkat, 'i 'int'ah. ¹⁸ Ndi 'i chah dune whubodulh'eh, ndan Yak'usda buk'uzdai 'i be hoonliyaz yuts'u nahezya, 'et 'ants'ih 'uhoont'ah. 'Et whunts'ih ndai 'ants'ih huwa t'aih,

'i Yak'usda buk'uzdai k'e'iyai, 'et 'i be dune yuts'u nahezya t'eh, 'et nduyóoleh huba' hoot'ah. 'Et whuz na'a dune whubodulh'eh. ¹⁹ Nuhwheni whuzahnik 'ink'ez chaozéh'en ahli. K'us ndet dega nus whudezti? 'Ants'ih huwa t'aih, 'i tulih k'us Yak'usda buk'uzdai tulih? Ndi Yak'usda buk'uzdai 'i dega nus dezti! Ndi 'ants'et huwa t'aih, 'i Yak'usda buk'uzdai 'i buga Yak'usda bube'ildzun suli 'et huwa. ²⁰ 'Et huwa ndan Yak'usda buk'uzdai 'i be hoonliyaz yuts'u nahezya, ndi Yak'usda buk'uzdai 'ink'ez buk'uyuzdla, 'i ts'iyawh 'i be yuts'u nahezya. ²¹ 'Ink'ez ndan luglez whucho yuts'u nahezya, luglez whucho 'ink'ez Yak'usda usda, 'et ts'iyawh yuts'u nahezya. ²² 'Ink'ez ndan yak'uz yuts'u nahezya, Yak'usda yuk'usda cho dezti, 'i 'ink'ez ndan yuk'usda, 'en be yuts'u nahezya. ²³ Nuhwheni Moses be' dustl'us 'uk'ununa'úsduguz, nuhwheni Pharisee chah, nuhwheni duba nahdzoo aht'ah! Dawhulsi' 'et nuhts'u whélt'sulh! Ndez na'a njan daht'en, ndai haníyeh, 'i 'ut'an sooltsun, 'i chah, anise hiyullhni, 'i chah, 'ink'ez cummin hiyullhni, 'i chah, 'i bulah zeh, 10%, 'i Yak'usda gah'aih. 'Et whunts'ih Moses be' dustl'us k'ut dega nus whudezti, 'et ts'iyawh whuladehtnik. Ndez na'a ts'ah'un 'uhoont'ah. Njan ndet ts'ah'un na'a ne'áht'en, ye nega te'untezeh, 'i chah, 'ink'ez be néba 'alha' hoot'ah, 'i chah, njan 'et ts'iyawh whuladehtnik, 'et whunts'ih whuz na'a ndóht'en huba' hoot'ah, 'ink'ez 'onghun, 'i chah 'aw lhachaduzahle bula doohtnih gunih. ²⁴ Lhe'aht'ah whuzeh'en 'et whunts'ih, dune ti whúbuntelhtun hukwa' aht'en. Lhe'aht'en, ndai ahnai, 'i sts'uz yé tat'o t'eh, 'i ahguz 'et whunts'ih nuhwheni ndi khunai cho, camel hiyullhni, 'i telhnoh li'hoont'ah! ²⁵ Nuhwheni Moses be' dustl'us 'uk'ununa'úsduguz, nuhwheni Pharisee chah, nuhwheni duba nahdzoo aht'ah. Dawhulsi' 'et nuhts'u whélt'sulh! Lusyet 'ink'ez lubot chah yoo 'az ts'ih tooánahgus. 'Et whunts'ih bet ts'ih 'et ndai 'uyoon be, bé whulhts'it, 'i 'ink'ez nts'e na'a hukwa' nahzun tune' aht'en 'et 'i be nuhlusyet 'ink'ez nuhlubot teh dezibun. ²⁶ Nuhwheni Pharisee chawh'é'en ahli! Ndi lusyet 'ink'ez lubot bulh 'udechoo bet ts'ih tooánawahgus 'et t'eh yoo 'az chah 'aw chaditsun wule. ²⁷ Nuhwheni Moses be' dustl'us 'uk'ununa'úsduguz, Pharisee nuhwheni chah, duba nahdzoo aht'ah! Dawhulsi' 'et nuhts'u whélt'sulh! 'Ants'ih ts'un k'ut whuduchun dustl'us 'i lí'ah't'ah. yoo 'az ts'ih tube soo 'awhut'en, 'ink'ez bet ts'ih whudutsun 'ink'ez dune ts'un be whudezbun. ²⁸ 'Et whuz na'a zeh dune nalh nuhyust'e yoo 'az ts'ih ts'ah'un dune hinli ndoonéht'en. 'Et whunts'ih nuhyuh ts'ih ts'ah'un cha'ah't'ah. Ndi duba nahdzoo 'ink'ez 'uk'únucha'ust'en, 'i chah, 'i be whudezbun. ²⁹ Nuhwheni Moses be' dustl'us 'uk'ununa'úsduguz, Pharisee nuhwheni chah, duba nahdzoo aht'ah! Dawhulsi' 'et nuhts'u whélt'sulh! Nuhwheni nus whunilh'en, 'en buba tse bet 'ahudutelhtel 'uwuhulh'en. 'Ink'ez ts'ah'un 'int'ah, 'en buts'un k'ut hoonzoo whulhtsi. ³⁰ 'Ink'ez ndez na'a njan ndudáhtni, 'Hoh da nsetsuh whudelhdzul hubulh ts'ukhuna inle ndúcha. Hoh da ts'ukhuna t'eh, 'et nus whunilh'en hubuhughan da, 'aw bulah ts'oot'en ghait'ah inle.' ³¹ 'Et ndi njan ndudáhtni, 'i be nuhwhenich'oh ch'a déhtni. Ts'iyannah hobunulhtun 'aw 'uyoon ndunnah nus whunilh'en hubahanghan, nuhwheni 'en buts'uh háde ahli! ³² 'Aw 'et ndai 'ut'en untisi', 'i nuhwhubákah whe'hidilh'en, 'et ts'iyawh lhaóodahla. ³³ Tl'ughus poison buzkehkah lí'ah't'ah! Njan kwuncho yuh wheni nuhwhuba nahutedeh, nts'e na'a 'utehnilh wheghoo tehduh? 'Aw 'uhóneh ghait'ah! ³⁴ 'Et hukwa soo cho soo zélt's'ai, 'et nus whunilh'en, 'ink'ez dune huwhunih, 'ink'ez Yak'usda bughunek hodulh'eh chah, 'en ts'iyawh nuhts'ún butelh'alh. 'En bulunah buteghan. 'Et whuz na'a lhdulalh'gus hubunduntélt'ah. Bulunah nuhluglez bez ts'ih 'et hubootelhtsus. 'Ink'ez lhelhdun keyah totsuk zah nohbutelhzut. ³⁵ 'Ink'ez 'et huwa 'et ndez na'a nuhk'eóotelts'ulh. Ndunnah ts'ah'un 'int'ah buzkai yun k'ut nájul, 'en bughá 'utehnilh nuhk'eóotelts'ulh. Hoh da Abel'en 'uja buzkai yun k'ut nájul. 'Et njan Zechariah buzkai yun k'ut nájul 'et whuts'un. 'En 'int'ah Berechiah buye'. Ndun 'en njan luglez whucho 'et Yak'usda buk'uzdai ye guz 'et nuhtsuh whudelhdzulh, 'en hizelgh'i inle. ³⁶ Ts'ah'un na'a be 'ún whudusni k'an whudelhdzulh, 'et nuhwheni hukw'elha whutelhtsilh ho' aht'ah.

Jerusalem whut'en, 'en hubugha Sizi budzi nduda suli

³⁷ "Nuhwheni Jerusalem whut'en, dáwhulsi' nuhts'u whélt'sulh! Nuhwheni aht'en nus whunilh'en ahghan. 'Ink'ez ndunnah nuhts'u télh'a, 'en chah tse be hubahghan. Dant'ah ligok duduzkeh dints'un be huboontun, whuz na'a nuhwheni chah lhat hoh 'ilhunanohwutésdlel hukwa' nuszun, 'et whunts'ih 'aw hukwa chah'nahzun. ³⁸ Soo cho whunulh'en, 'aw 'et nuhwheni Jerusalem whut'en nuhkeyah 'aw hoonli hoolah suli hoh nuhwhuba 'et nenáwhults'ut, 'et whuz na'a Yak'usda nuhladutetnih. ³⁹ 'Et 'un whudusni, 'aw 'o 'un chasutuzeh'il. 'Et ndet dzin whusaóotelts'ulh, 'et ndudutéhnilh, 'Ndun Yak'usda booz'i be whusatéyah, 'en dega nus hoonzoo buts'ó telts'ulh,' 'et k'an zeh suteh'ilh!"

¹ 'Aw 'et njan luglez whucho Sizi 'az whenaja hoh yugha hoodul'eh highu nindel. Njan luglez whucho nts'e na'a 'uhóólya 'et whuhínulhtun. ² 'Et Sizi ndo búlhni, "Njan ts'iyawh 'aw chaoonuzulh'en 'ih? Ts'ah'un na'a 'ún whudusni, 'aw lhuk'i tse lhk'uchadutédsila, ts'iyawh nadúntejullh ho' hoont'ah."

Ndet hoh wheóoduteltsilh, 'et huwa nt'ets'onoozeh

³ 'Aw 'et haoodet'aiyaz dzulh Olive hiyulhni, 'et usda. 'Et ndunnah yugha hoodul'eh ts'iyawh highu nindel, 'ink'ez whu'izyaz hiyoodulhuk, "Njan nket'ah 'uwhuténih? Nts'oh whudezulh hoh whusanátandalh, 'ink'ez nts'oh huwa whudezulh hoh whulatah whutele? Ndet hoh wheóoduteltsilh, 'et huwa nt'ets'onoozeh? 'Et nendudíni!" ⁴ 'Aw 'et Sizi ndo búlhni, "Soo cho howahli. Khun teh dune nanohwhunoo'ah gunih. ⁵ 'Alha lhanah soosi bugha whusahutedulh 'ink'ez 'uhudutenilh, ndun Christ unli, si 'ust'ah, nduhutni hoh lhanah nahunte'ah. ⁶ Dune nehughan whulh 'udutéhts'o. 'Ink'ez dune lhutegan chah howu yahutelhtuk. 'Et chah whudutéhts'o. Khun teh whénoolhujut gunih. Njan dawhutenilh, 'et ts'iyawh nduwhutenilh, 'et whunts'ih 'awhuz whulatah ilah 'uhoont'ah. ⁷ 'Et huwa lhelhdowh dédowh lhc'az nehúdadulh. 'Ink'ez yinkak ndulhcho hubudayi cho be 'ustl'ennah, 'en chah lhelhédulh. 'Et dai whúteleh, 'ink'ez dada chah whutéleh. 'Et lhelhdun yun nutughetnah. ⁸ Ndi ts'iyawh be dzuh nuts'udeh, 'i k'an be whewhudít'en. ⁹ 'Et neoninzut t'eh, 'et dzuh nunohotílhdeh ka whutl'anohotelelh. Bulunah nuhoteghan. 'Ink'ez si soosi bugha 'udun yun k'ut whut'en nuhts'o dutetnik. ¹⁰ 'Et hukw'elh'az 'et lhanah huba dzuh tele, 'ink'ez nuhwhénich'oh nuhtah lhgha hawhútelhyih 'ink'ez lhts'udutehtnih. ¹¹ Lhanah whuts'it be nus whunilh'en hinli, 'en lhanah dune nahunte'ah. ¹² 'Ink'ez ndunnah 'uk'unucha'ust'en, 'en 'o nus 'uhulsi' tele. Dune ye lhk'etsi', 'i chah k'ah 'utenilh. ¹³ 'Et whunts'ih ndunnah soo whulatah whuts'un whechahitsaz, 'aw 'en zeh hudutejih. ¹⁴ 'Et nts'e na'a Yak'usda yak'uz ts'un dune k'une' whul'en, 'en bugha khunek unzoo, 'i yun k'ut ndulcho hoh be yatetuk. 'I be 'udun yun k'ut whut'en, 'en huba whubuntelhtun tele. 'Et zeh 'aw 'et whulatah whusawhételts'ulh."

Degha nus whewhunuju

¹⁵ "Et huwa ndi degha nus be whunuju, 'en hoolah yutelhtsilh, 'en degha nus whudezti ts'ih siyin hoh nulh'en t'eh, ndun Daniel nus whunilh'en hoh da howu yalhtuk inle. (Soo zélhts'ai, ndi ndan yuk'eyalhtuk, 'en soo cho bubeni taóodoolts'it). ¹⁶ 'Et ndan Judea yun k'ut hudelhts'i, dzulhyaz k'uz tsihutooldelh. ¹⁷ Ndan bukoo hukw'usda khun teh nanaóója 'ink'ez bukoo ts'ih na'óólhchoot gunih. ¹⁸ Ndan haníyeh k'et 'ut'en, 'en khun bukoo ts'ih dunaih kunaóóda gunih. ¹⁹ 'Et hoh t'eh, ndan ts'ekoo helchan, 'ink'ez ndan buzkeh ye'úht'ukw, 'en huba tube 'o nus whutetsi'. ²⁰ Nket'ah whuch'a tsiz telhdulh, khi k'us nats'ulyis dzin, 'et teh 'uhoneh gunih, 'et huba tenadahli. ²¹ 'Et 'alha whusawhélt'sut t'eh, hooncha dune dzuh nuhutedeh. 'Et ndi yun k'ut whe'whudít'en da, 'ink'ez k'an dzin whuts'un, 'aw whuz na'a doo chah zeh ndó honeh ghaít'ah, 'iluh zeh 'uwhutenilh. ²² Hoh t'eh nts'oh whugha whudezulh hoondukw nachahwháhdlel t'eh, 'aw dune hudoojih hoolah. 'Et whunts'ih 'utahálya, 'en hubugha hoondukw whutelhtsilh. ²³ 'Et ndun Christ njan usda k'us nwun usda, 'et ndun nuhwhuhútni t'eh, khun nuhwhuba 'alha hudooni gunih. ²⁴ 'Alha lhanah whuts'it be Christ la'dadil'i 'ink'ez whuts'it be nus whunilh'en, 'en lhanah nuhtah whutele. 'Ink'ez nuhtah tube hooncha tune'hutet'en. 'Ink'ez huwa 'et'en chah nuhtah ne'hutet'en. 'Et ndi njan ndótet'ilh, khun teh 'utahálya nabonoo'ah huninzun, 'et hukwa' hutet'ilh. ²⁵ 'Et sih soo zullhts'ai, whutsuh whudelhdzulh 'uda nuhwhudáni. ²⁶ 'Et huwa dune ndun whulhni t'eh, 'Nulh'en nda 'et dune chahóot'ih 'et usda!' hutni t'eh, khun whuz toohdelh gunih. K'us, "Et bukoo bez ts'ih usda,' hutni t'eh, khun nuhwhuba 'alha hudooni gunih. ²⁷ Ndez na'a njan nduwuhútenilh, 'et ditnik kwun ndaz de hadánat 'ink'ez nuk ts'un whedanat. 'Et ts'iyannah dune yunoolh'en ka, 'et whuz na'a yinkak dune ye' whusanatedalh. ²⁸ 'Et huwa nts'e neyust'e súlht'i, 'et sbalyan 'ilhuwezedel.

Yinkak dune ye' whusanátedalh

²⁹ "Et dune dzuh nuhutedeh, 'et ndúhooja t'eh, hukw'elh'az 'ahoh sa dulhghus tele. 'Ulh'ek oozá chah 'aw be chahoodest'en tele. Sum chah ts'iyawh ndus de hantejullh.

'Ink'ez ndai yak'uz whelhtun ndulhcho hoh notughetnah.

³⁰ 'Et njan nduhóója t'e, ts'iyannah dune yunoolh'en ka yinkak dune ye' yak'uz ts'ih be hóoduteltsilh. 'Et hoh wheghah whezulh t'eh, 'et dune ndi yun k'ut ndulhcho tso yahutelhtuk. 'Et yinkak dune ye' whuz de úyalh hiyuntel'ilh. Kw'us k'ut yak'uz ts'ih hatéyalh. Ye dezi, 'i 'ink'ez ye ulhtus, 'i be' tenilh. ³¹ Be ts'ujih, 'i tube cho be' duts'o hoh bulizas whuz

haóobutelh'ah. 'Utahálya, 'en ts'iyawh 'ilhunaooboohootélelh. Diwh hukw'un'a hutedulh 'ink'ez yaz ndulhcho notedulh. 'Et ndulhcho hoh 'ilhunaooboohootélelh.

Mai, fig hiyulhni, buduchun, 'i be nawhutruk be whuts'odul'eh

³² "Ndi mai, fig hiyulhni, buduchun, 'i be nawhutruk be whuts'odul'eh. Ndi 'i 'int'ah, buzooschum 'ulghih teh, 'Aw 'et but'an whulhlhlih, 'i bugha t'ewhunáhzun 'aw 'et dain nilhduk w suli. ³³ Nuhwheni chah whuz na'a zeh ndi ts'iyawh nuhwudusni. 'Et hoh nket'ah nulh'en 'aw 'et t'ewhunóhzin, 'en nuhweghah. 'Ants'ih ndati siyin li'hoont'ah. ³⁴ 'Alha ts'ah'un na'a 'ún whudusni, k'an ndoh whudezuhl 'aw yachahútesdla, 'et ndi ndó tenilh ts'iyawh 'et lhawhúduutenilh, 'et whuts'un. ³⁵ Yaz 'ink'ez ndi yun k'ut 'i chah hoolah whutele. 'Et whunts'ih ndi sughunek 'aw hoolah chatesdle. ³⁶ Ndet dzin 'ink'ez nts'oh whugha whudezuhl 'uwhtutenilh, 'aw dune nt'echaonízun. Lizas yak'uz hudelhts'i, 'en whunts'ih 'aw nt'ehonízun. Se'abá yak'uz usda, 'aw 'en zeh nt'eeonínzun. ³⁷ 'Et hoh da Noah khuna da, dune dahant'e, 'et whuz na'a zeh 'uwhtut'íilh hoh yinkak dune ye' whusanátedalh. ³⁸ Soo cho whunulh'en, yinkak too be' whutenilh da, whutsuh da, ts'iyannah 'a'ahl 'ink'ez 'uhutnai. Dune 'ink'ez ts'ekoo bulh lhgho delhts'i, Noah ts'i cho be teyalh 'et whuts'un. ³⁹ Dune 'aw t'ehonízun nket'ah too hadutébílh. 'Aw 'et hadámhun hoh ts'iyawh too hubanghan. 'Et whuz na'a zeh yinkak dune ye' whusanátedalh t'eh, 'et ndó tenilh. ⁴⁰ 'Et dzin nanah, 'en hanyeh k'et 'uhut'en. 'Ilhunuh, 'en hitélhcholh 'ink'ez 'ilhunuh 'aw 'et tedalh. ⁴¹ Nanah hite'ulh, 'i hidunulhduz. 'Ilhunuh hitélhcholh 'ink'ez 'ilhunuh 'aw 'et tedalh. ⁴² 'Et huwa soo cho huwahli! Nts'oh huwa whezuhl hoh nuhMoodihti whusatayalh 'aw nt'eeonuzahzun. ⁴³ 'Et ndi nuwheni taonahle, ndun bukoo moodih, nts'oh huwa whudezuhl undunut'ih whusatayalh, 'et t'ewhunínzun t'eh, 'et soo ts'ah'un da huwole, 'ink'ez 'aw hikoo da'óoyis ghaít'ah. ⁴⁴ 'Et huwa nuwheni chah lhadóoht'e. 'Alha nts'oh huwa whudezuhl, 'et buka ts'ih chawhahlíh, 'et yinkak dune ye', 'et whusanátedalh."

'Ulhna ts'ah'un 'int'ah

⁴⁵ "K'us ndan 'ulhna, 'en ts'ah'un 'int'ah 'ink'ez whunih 'int'ah? 'en 'int'ah, bumoodih dich'oh 'en 'onghunnah 'ulhna bukoo humoodih yutelhtsilh. 'Et soo hoh hite'ahl, 'i hubugha ite'ahl. ⁴⁶ 'Et bumoodih whusanaja teh 'ink'ez 'ulhna whuz na'a nduja, 'en degba nus honzoo but'suh whélt'sulh. ⁴⁷ 'Alha 'ún whudusni, ndai yit'i, 'i chah ts'iyawh k'une' yul'en yutelhtsilh. ⁴⁸ 'Et whunts'ih ndun be 'ulhna ntsi' dich'oh budzi yuh 'et ndunínzun, 'SMoodih sa sla whusanádaih.' ⁴⁹ 'Et khunyaz 'onghunnah dudulh 'ulhna hububeyih, 'ink'ez tatnai chah hubula whe'ni'al 'ink'ez hubula tawhénitnai. ⁵⁰ Ndet dzin ndun bumoodih whusanátedalh 'ink'ez nts'oh huwa 'uhunit'oh utenilh 'aw t'ewhunínzun, 'et wheghah 'uhunet'oh whusanátedalh. ⁵¹ 'Et lhucho lhk'ube' yutelht'oh 'ink'ez ndunnah duba nahudzoo 'en hubuts'itekulh, 'i bulah but's'itekulh. 'Et whuz na'a tso bulh dughoo lhidutelhk'us."

25

Ndi be nawhutruk 'i be whuts'odul'eh, 'i lanezinah t'etdukah 'en dune t'ehunízun, skwunlanah, 'en huwhunih 'ink'ez skwunlanah, 'en huwhusnik 'et hubugha

¹ "Yak'uz nts'e hubudayi cho usda ndi yun k'ut whusawhélt'sut teh, 'et ndez na'a ndó tenilh, lanezi t'etdukah 'en dune t'ehunízun, ndi kwun be whét'en, 'i hiyilhchoot 'ink'ez ndun dune 'at tet'ílh 'az 'et hibalh'i. ² Skwunlanah, 'en huwhunih 'ink'ez skwunlanah, 'en huwhusnik. ³ Ndunnah huwhusnik ndi too dez k'un hit'i 'et whunts'ih ndi too dez k'un hiye náhitelhdzoh, 'i hi'et uja. ⁴ 'Et huwhunih 'en too dez k'un denáhitelhdzoh, 'i chah hitez'ai. ⁵ 'Et 'at tet'ílh sa sla whesayih. 'Et ts'iyawh nehunentsai 'ink'ez ts'iyawh bulh buk'eóodilts'ut hoh nahunéstez. ⁶ Tuzniz bat'en 'ilhunuh hahuyih, 'Aw 'et 'at tet'ílh 'az de íyalh. Di-nadahdelh 'ink'ez bududéhdelh!' ⁷ 'Et ndunnah t'etdukah ts'iyawh dihudíndel 'ink'ez too dez k'un, 'i ts'iyawh nahídulhk'an. ⁸ Huwhusnik, 'en ndunnah huwhunih hubuhutni, 'Too dez k'un negha núlhdzeh, netoo dez k'un 'aw 'et bé haoduk'aih!' ⁹ 'Et ndunnah huwhunih, 'Awundooh!' hutni 'Nuhgha nidulze t'eh, nuwheni 'ink'ez nuwheni chah 'aw neba soo cha'ilt'suk.' 'Et hubuhutni, 'E'óoket ts'ih whuz ahdulh, 'ink'ez nuwhenich'oh 'óohket.' ¹⁰ 'Et whuz whehandel, 'at tet'ílh buk'el'ah'at whusáinya. 'Ink'ez ndunnah yuba lhadint'ah, 'en na'hutet'ahl ts'ih hiyúlh danindel, 'ink'ez ndati daná'hudentan, 'ink'ez dána'hude'ai. ¹¹ 'Et hukw'elh'az ndunnah t'etdukah huwhusnik whusánahedel hoh, 'Nemoodih, nemoodih, neba dana'dutintih!' hiyulhni. ¹² 'Et ndo búlhni, 'Alha 'aw nt'enwhunuzúsun!' ¹³ 'Et whuz na'a nuwheni chah soo cho huwahli! 'Alha ndet dzin 'ink'ez nts'oh whugha whezuhl hoh yinkak dune ye' whusanátedalh, 'aw dune t'eeonínzun hoolah."

Dune dade 'ulhna, ndai yit'i, 'i butl'ayánla, 'et yak'uz hubudayi cho usda ndult'ah be nawhutruk

¹⁴ “Yak’uz ndet hubudayi cho usda, ndi yun k’ut whusawhéls’ut teh, ‘et whuz na’a ndó tenilh, ndun dune dukeyah huwu teyalh. ‘Et teyalh whutsuh dude ‘ulhna ‘anih hubudani. Ndai yit’i, ‘i hubut’ayánla. ¹⁵ ‘Ilhunuh skwunlai sooneya dezti, ‘i yutl’aina’ai. ‘Et ‘ilhunuh chah nankoh sooneya dezti, ‘i yutl’ainanzai. ‘Et doo chah ‘ilhunuh ‘en ‘ilho zeh yutl’ainanzai. ‘Ilhunuh hinli hoh nts’e na’a soo hoonzoo hukw’un’a hiye’ whutelilh, ‘et wheni butl’ainanzai. ¹⁶ ‘Et hukw’elh’az ‘aw ‘et whinya. ‘Et ‘ilhunuh skwunlai yutl’ainanzai, ‘en ‘o ‘un skwunlai uneltsuk, ‘i ye na’yínla. ¹⁷ ‘Et whuz na’a zeh ‘ilhunuh ‘en nankoh yutl’ainanzai hoh nankoh ye yúba na’yínla. ¹⁸ ‘Et whunts’ih ‘ilhunuh lhuk’i zeh yutl’aina’ai, ‘en yun hahónkai ‘ink’ez whuz dumoodih buzooneya yuntel’h’i. ¹⁹ ‘Et hukw’elh’az sa inle hoh ndunnah ‘ulhna hubumoodih whusanája. ‘Et nahooté’alh hukwa’ ninzun nts’e na’a dahiyínla. ²⁰ ‘Et ndun skwunlai yutl’ainanzai, ‘en skwunlai be ‘o ‘un ‘uneltsuk, ‘i yuba whusanáinanzai. ‘Et ndi yulhni, ‘Sumoodih skwunlai sooneya dezti, ‘i stl’ananzai. Nah! Nilh’en skwunlai be ‘o nus mba na’usdla.’ ²¹ ‘Et bumoodih ndi yulhni, ‘TUBE soo ‘inja! Nyun tube inzoo. Nduhóolhcho k’une’ nyutel’h’en. Nyun tube ‘ulhna unzoo inli. ‘Et hoontsoolyaz k’une’ nyutel’h’en inle. ‘Et k’an n’un hoh lhái ghu tanleh. ‘Anih! Ndai nyumoodih ye hoont’i, ‘i nyun chah be hóotant’i.’ ²² ‘Et ‘ilhunuh nankoh sooneya dezti, ‘i yutl’ainanzai, ‘en chah whusainya. ‘Et ndi yulhni, ‘Sumoodih nankoh sooneya dezti, ‘i stl’ananzai. Nah! Nilh’en nankoh be ‘o nus mba na’usdla.’ ²³ ‘Et bumoodih ndi yulhni, ‘TUBE soo ‘inja! Nyun chah tube inzoo. Nduhóolhcho k’une’ nyutel’h’en. Nyun chah tube ‘ulhna unzoo inli. ‘Et nyun chah hoontsoolyaz k’une’ nyutel’h’en inle. ‘Et k’an nyun chah n’un hoh lhái ghu tanleh. ‘Et ndi yulhni, ‘Sumoodih ye hoont’i, ‘i nyun chah be hoont’i.’ ²⁴ ‘Et doo chah ‘ilhunuh ‘ilhuk’i sooneya dezti yutl’ainanzai, ‘en chah whusainya ‘ink’ez ndi yúlhni, ‘Sumoodih t’oonuzun nyun ‘aw t’echa’nínzun ‘unint’ah. Nts’e ‘acha’ninlel ‘et whunts’ih ‘et ha’ninle. Nts’e haneyeh whuyúchaninlel ‘et whunts’ih ‘et chah ha’ninle. ²⁵ TUBE whenl’hut ‘et huwa ndi sooneya dezti yun yuh ts’ih ntéhl’i. Nah! Nilh’en ndi stl’ana’ai, ‘i ntl’ananús’aih.’ ²⁶ ‘Et bumoodih ‘uyúlhni, ‘Nyun nínsti’ ‘ink’ez ts’idintrik ‘ulhna ‘int’ah. ‘Alha t’oonuzun nts’e ‘acha’nuzusdla, ‘et whunts’ih ‘et chah ha’ nusdle. ‘Ink’ez nts’e haníyeh whucha’núsdelel, ‘et whunts’ih ‘et chah ha’ nusdle. ²⁷ ‘Et huwa hoh da ndez na’a njan ndónleh huba’ hoont’ah. Ndi uszooneya ntl’anadzai, ‘i sooneya lkh’enadunudzih, ‘en butl’achainuzínzai. ‘Et t’eh da uszooneya ‘o nus ‘uneltsuk, ‘i be na’óotneh wule da.’ ²⁸ ‘Et huwa ndo búlhni, ‘Ndunnah ndi uszooneya dezti, ‘i bugha nailhúhoot. Ndun lanezi sooneya dezti, ‘i yit’i, ‘en bugha inéhzaih. ²⁹ ‘Et ndan yulah zeh ut’i, ‘en ‘o nus lhái bugha itéls’ulh. ‘Et whuz na’a lhái tet’ih. ‘Et whunts’ih ndan ntsoolyaz ut’i, ‘i whunts’ih bughu nayutéelchulh. ³⁰ ‘Aw ‘et ndun ‘ulhna ntsi’, ulhchoot ‘ink’ez ‘az tsahólgus yuh ts’ih téhnoh.’ ‘Et whuz tso bulh dughoo lhudoolh’k’us sih.”

Yinkak dune ye’ whusanátedalh teh, ‘et t’eh yinkak dune, ‘en ts’iyawh huba nahuteyeh

³¹ “Aw ‘et yinkak dune ye’ nket’ah buts’u ha ‘ánduz hoh whusanátedalh teh, ‘et ndunnah lizas lubeshi bughoh hoolah, ‘en hiyulh whusanátedulh. ‘Et ‘ink’ez yuk’usda cho dezti, ‘i k’ut nanát’adutedalh. ³² ‘Et ‘ink’ez yinkak dune, ‘en ts’iyawh hibut ‘ilhunaobuhootélel. ‘Et sheep ghunli k’una’a sheep, ‘i sbai tahananáteleh. ³³ Sheepyaz ‘en nalnhni ts’un ts’ih nebutelel. ‘Ink’ez sbai ‘en ‘intl’as ts’un ts’ih nebutelel. ³⁴ ‘Et hubudayi cho ‘et ndunnah nalnhni ts’un ts’ih ‘int’ah ‘et whuz na’a ndubudutenilh, ‘Nuhwheni se’abá dega nus hoonzoo nuhghá whults’ut ahli. ‘Et huwa ‘anih! Ndi yun ‘utelnilh whutsuh, ndet hubudayi cho yak’uz úsda, ‘et ndet nuhwuba lhaoodinla, ‘et k’an zeh nuhtl’aootelts’ulh. ³⁵ Soo cho whunulh’en, suye’élts’ul hoh ‘ates’alh, ‘i sugha náh’ai. Ta’oosde hoh ndai tesnilh, ‘i sugha náhkai. ‘Uts’un whút’en usdli ‘et whunts’ih nuhwukoo ts’ih dásunulhti. ³⁶ ‘Aw naih chaúst’i hoh ‘enásalhti. Ndsuda hoh sts’un nusahdel. Stsak’esida hoh suts’un nusahdel.’ ³⁷ ‘Ink’ez ndunnah ts’ah’un ‘int’ah hiyoodutélhkut, ‘NeMoodihti nkeda nye’élts’ul hoh nts’a’en ‘ink’ez tá’alh, ‘i ngházni’ai? ‘Ink’ez tá’óonde hoh tantnilh, ‘i ngházni’ái? ³⁸ ‘Et nkeda ‘uts’un whút’en inli hoh dánt’s’unilhti inle? K’us naih chaint’ih hoh naih ngházni’la inle? ³⁹ Nkeda ndinda hoh nts’unálh’en k’us tsak’esinda hoh nts’un nuts’uzdel inle?’ ⁴⁰ ‘Et hubudayi cho njan ndoh dúbudutenilh, ‘Alha, ‘i be ‘ún whudusni, ndunnah sulhutsinkah, ndunnah ‘aw ncha chailah, ‘en ‘ilhunuh whunts’ih whuz na’a ‘et ndóbahla t’eh, ‘et si ‘usáhla ho’ hoont’ah.’ ⁴¹ ‘Aw ‘et ndunnah ‘intl’as ts’ih ‘int’ah, ndez na’a ndo ba duténilh, ‘Ndai Yak’usda ye hunilch’e, ‘i nuwhulh ‘int’ah sahlí! Sch’a nanahdelh! ‘Aw ‘et ndi kwun ‘aw nachanusne, ‘i netsudule bulizas huba ‘uhóolya, ‘et nuhwheni chah whuz tehduhl! ⁴² Suye’élts’ul inle ‘et whunts’ih ‘aw tes’alh, ‘i sugha chah’al. Ta’oosde ‘et whunts’ih ‘aw tesnilh, ‘i sugha chahkal. ⁴³ ‘Uts’un whut’én usdli, ‘aw ‘et dachasúlhtel. Hoh da ‘aw naih chast’ih ‘et whunts’ih ‘aw be oosda, ‘i hoolah naih sugha chahlel. Hoh da ndusda hoh ‘ink’ez tsak’esida, ‘aw suts’un nuchahdulh.’ ⁴⁴ ‘Et dez na’a ‘uhidutenilh, ‘NeMoodihti nkeda da nts’a’en ho’ dini? Nkeda nye’ilts’ul ‘ink’ez ta’ónde? K’us ‘uts’un whut’én inle, k’us be dune onle, ‘i cháint’ih? K’us ndinda

'ink'ez tsak'esinda? 'Et whuz na'a nts'a'en 'et whunts'ih 'aw hoonlyaz hoh nlacha'ts'ínil dini?" ⁴⁵ 'Et ndoh budutenilh, "Alha 'i be 'un whudusni, ndunnah sulhutsinkah 'aw ncha chahílah, 'et 'aw 'ilhunuh whunts'ih whuz na'a nuchaoobahlil. 'Et huwa si chah 'aw nduchásahlil'li'hoont'ah.' ⁴⁶ 'Et nduhint'ah, 'en 'ilhuz wheni dzuh nahutedoh ts'ih hutedulh. 'Et whunts'ih ndunnah ts'ah'un 'int'ah, 'en 'ilhuz hoh ts'ukhuna hubugha ootékulh."

26

Sizi whu'lyaz hikunúta hituzelghelha ka

¹ 'Aw 'et Sizi ts'iyaintsuk lhadúja yugha hoodul'eh 'et ndo búlhni, ² "Et t'oonahzun 'aw 'et nat dzin whuz'ai butus lhuseya 'et whunahutelnih. 'Et 'ink'ez yinkak dune ye' 'aw 'et butl'ahitelhel 'ink'ez lhdulalhgus k'ehiyutelhelh." ³ 'Et soo wheghah whezulh hoh, 'et nahuwulnuk degha ndoh, 'ink'ez Moses be' 'uk'ununa'úsduguz, 'ink'ez dune netsuh whudelhdzulh chah, 'en ts'iyawh náwhulnuk degha nus dezti, 'en Caiaphas hiyulhni, bukoo soo' whulcho 'et 'ilhunahuwutéduh. ⁴ 'Et 'ilho yahalhtuk 'ink'ez huwhuts'it hoh hoonli hiba' hoonla hoh Sizi hitéhlcholh 'ink'ez hituzelghelh. ⁵ "Et whunts'ih 'et njan butus lhuseya 'et whutah 'uts'inla t'eh, 'et hukwa dune lhtahahót'alh." hutni.

Datetsah whutsuh ts'eke Sizi k'unuts'újul, 'i yutsi k'eyilhdze

⁶ 'Aw 'et keyah whuyaz Bethany huwhútni, 'et Simon buka whulhjut ínle, leprosy hiyúlhni, bukoo 'et Sizi yuzih usda. ⁷ 'Et 'ilhunuh ts'eke bughu daninya hoh 'en ndi tse dezti, 'i Alabaster hiyúlhni, 'i be ndi luboodai 'ulya, 'i ye'alh. Ndi k'unutsutjul sooltsun, 'i tube dezti ho' 'int'ah. 'Et kw'uzdai k'ut na'ut'alh hoh yutsi k'eyilhdze. ⁸ 'Et ndunnah yugha hoodul'eh hinilh'en hukwa cha'hunizun. 'Ink'ez 'en ndúlhodutni, "Et di ka ndi 'ants'ih tinta' yulh'ih? ⁹ Ndi yoo dezti, 'i bé' ts'onket 'ink'ez, 'i ts'iyawh tehel'en, 'en hubugha íts'oodzaih wule da!" ¹⁰ 'Et Sizi t'oonanzin 'et ndo búlhni, "Ndun ts'eke 'aw buts'áhachaoozah'ak. 'Ut'en unzoo, 'i suba 'uyínla ho' 'int'ah. ¹¹ 'Ahoohyez tehel'en hubulh áht'ah, 'et whunts'ih si 'ahoohyez 'aw nohwhulh cha'tuzest'íl. ¹² 'Alha ndi k'unutsutjul sooltsun, 'i 'adutesstelh huba suyust'e yuk'eyilhdze hoh 'ut'en. 'Et whuz na'a lhasúdinla. ¹³ 'Alha 'un whudusni ndi yun k'ut ndulhcho ndi khunek unzoo, 'i nudutékat, ndun ts'eke ndet 'uhoonla, 'et hukw'u naootitnuk 'et hoh dune yunatelnih."

Judas 'en Sizi be 'óotekulh hukwa' ninzun

¹⁴ 'Aw 'et ndunnah lanezi 'o 'at nanah, 'en hubutah 'ilhunuh Judas Iscariot hiyulhni, 'en náwhulnuk bumoodih buts'uh whinya. ¹⁵ 'Et ndo búlhni, "Daltsuk sugha ntéh'alh ndun dune nuhwhutl'aílhti t'eh?" "Et tat lanezi sooneya, silver," hiyulhni, 'et 'uneltsuk hiba hiyoodalhto. ¹⁶ 'Et whuts'un nts'e na'a butl'aitelhelh 'et hukwunúta.

Sizi 'en yugha hoodul'eh butus lhuseya hubulh na'ut'alh

¹⁷ 'Et k'an 'aw 'et ndi lhes chantíldoh dzin whusawhélt's'ut hoh ndunnah Sizi yugha hoodul'eh, 'en highu nindel 'ink'ez huyoodulhkut, "Njan Hubutus Lhuseya 'ute'alh, nts'e mba lhats'odutelilh hukwa' ninzun?" ¹⁸ 'Et ndo búlhni, "Nyooz keyah whuti whuz ahdulh. 'Ilhunuh dune suba ndudóohotni, 'Nehodulh'eh njan ndutni, 'aw 'et suba nilhdukwh whezulh. Nkoo ts'ih ndunnah sugha hoodul'eh njan butus lhuseya, 'et 'ilho hubulh whunatelnih.' " ¹⁹ 'Ink'ez yugha hoodul'eh Sizi daja hubudani, 'et whuz na'a nduhuja. 'Ink'ez njan Hubutus Lhuseya 'et wheni llaháduja. ²⁰ 'Aw 'et hulhgha whusahonzut lanezi 'o 'at nanah yugha hoodul'eh, 'en hubulh natl'adeda hubula na'tet'alh ka. ²¹ 'Et 'uha'alh hubutah ndo búlhni, "Alha 'ún whudusni njan nuhtah 'ilhunuh whutl'asutelhelh." ²² 'Et ts'iyawh ni huzdli, 'ink'ez 'ilhunah hinli hoh hiyoodulhkut, "SMoodihti si tulih sudini?" ²³ 'Et ndo búlhni, "Ndan dules sulh toonayuz'ai, 'en 'utenilh whutl'asutelhelh. ²⁴ 'Alha yinkak dune ye' nts'e na'a ba 'uk'e'eduguz, whuz na'a 'utenilh datetsah. 'Et dune ndan whutl'ayáhlhti, 'en dune degha nus hoontsi' bugha ootélt's'ulh. Ndun dune 'aw cha'hóole t'eh, 'et sih 'o nus buba hózoo wule da." ²⁵ 'Et Judas, ndun whutl'aitelhelh, 'en Sizi yoodulhkut, "Rabbi si ih sudíni?" 'Et ndi yúlhni, "Nyunch'oh 'udini."

Sizi 'udek'elh'az na'ut'alh

²⁶ 'Aw 'et 'uhan'al hoh Sizi lhes yilhchoot. Suchanaílya ni hoh tenadedli. Taidalhkut 'ink'ez yugha hoodul'eh hubutaininik. 'Et ndo búlhni, "Úlhchoot 'ink'ez ah'alh. Ndi suyust'e 'int'ah." ²⁷ 'Et lubot 'i chah yilhchoot 'ink'ez suchanaílya ni hoh tenadedli. 'Et ndo búlhni, "Nuhwheni ts'iyawh ndi wahnai. ²⁸ Ndi k'andit khunek 'i sukzai be nuhts'u nahuziya. Lhanah ba nadútelt'ih. 'Et 'i be bulubeshi huba hoolah natedleh. ²⁹ Njan 'et 'un whudusni, ndi mai too, doo chah zeh 'aw chatuzésmil. 'Et whunts'ih ndi mai too k'an, 'i nuwhulh tesnilh. Nts'e se'abá hubudayi cho unli, 'et whuz lhgha dahdel, 'et dzin nuhwhulh tesnilh." ³⁰ 'Et Yak'usda buyun be héjun 'ink'ez ndoh dzulhyaz k'uz Olive hiyulhni, whuz

whehandel. ³¹ 'Aw 'et Sizi ndo búlhni, “K'an 'ulh'ek nuhwheni ts'iyawh skahóoyatehle. Ndez na'a 'uk'e'edúguz hoh ndutni,

'Sheep ghunli, tuzelghelhuba whutl'aitelhtelh.

'Ink'ez 'et sheep ts'iyawh lhtatelht'us.'

³² 'Et dinadusja hukw'elh'az t'eh, 'et yun k'ut Galilee ts'ih nuhwhutsah tesyalh.”

Sizi, 'en Peter ndi yúlhni, “T'echasunuzinzun dutanilh”

³³ 'Et Peter ndi yúlhni, “'Et ts'iyawh nyun nkayahutele, 'et whunts'ih si 'aw nkayáchatuzésdle.” ³⁴ 'Et Sizi njan ndi yulhni, “Alha, 'i be 'un nyudúsní, 'et k'an 'ulh'ek ligok dune 'uduténilh whutsuh, 'et tat t'echasunuzinzun dutanilh.” ³⁵ 'Et Peter 'utni, “Nyúlh datesah t'eh, 'et whunts'ih 'aw t'echanyunuzúszun doosni ghaít'ah.” 'Et 'onghun yugha hoodul'eh, 'en chah whuz na'a zeh 'uhutni.

Sizi Gethsemane 'et tenadedli

³⁶ 'Et 'ilhunuh haniyeh k'et Gethsemane huwhútni ts'ih whuz hunindel hoh Sizi yugha hoodul'eh ndo búlhni, “Nuhwheni njan delhúts'i. 'Et si ye'at tenadutesdli.” ³⁷ Peter 'ink'ez Zebedee buzkeh, nanah, 'en hubilhchoot 'ink'ez dulh whebeldel. 'Aw 'et tso cho buk'édíts'ut 'ink'ez budzi tube yuk 'uja. ³⁸ 'Ink'ez ndo búlhni, “Suzul tube tso sulí k'et 'aw 'et datesah lí'ust'ah. Njan delhúts'i 'ink'ez sula huwahli.” ³⁹ 'O 'unyaz whinya hoh 'et nachaneti 'ink'ez tenawhéndunídli 'ink'ez njan ndutni, “ABá ndi lubot be dzuh nuteszut, 'i whuz na'a 'int'ah t'eh, 'et whute senghólts'it. 'Et whunts'ih 'aw si hukwa' nuszun k'una'a ilah. Nyun hukwa' ninzun hukw'un'a 'et 'uhóneh.” ⁴⁰ 'Et ndunnah yugha hoodul'eh nahunístez hoh bughu nanja. 'Et Peter ndi yulhni, “Aw ih lhuk'í hukw'e'uhunint'o whuts'un sula ghónle ghaít'ah? ⁴¹ Tink'us nínt'uk whuch'a howinli 'ink'ez tenadinli! 'Alha dune yéghah whuz na'a hukwa' ninzun, 'et whunts'ih buyust'e laít'ah.” ⁴² 'Et doo chah zeh whull nat bugho whenaja tenadedli ka. 'Et njan ndutni, “ABá ndi lubot ts'iyawh usnai t'eh, 'et k'an zeh sughu natalcholh. 'Et whuz na'a zeh hukwa' ninzun t'eh, 'et ndó hot'e.” ⁴³ 'Et doo chah zeh nahuneztez hoh bughu nanja. Bulh huba yilhtus k'et 'aw hitóo'en ghaít'ah. ⁴⁴ 'Aw 'et bugho whenaja 'ink'ez whull tat, 'i khunek 'i be zeh tenadedli. ⁴⁵ 'Aw 'et yugha hoodul'eh bughu nanja 'ink'ez ndo búlhni, “Awhuz nalhúyís 'ink'ez sahtez hó ih aht'ah? Soo zélhts'ai 'aw 'et suba whusawhélt's'ut. Yinkak dune ye' 'en ndunnah lubeshi 'uhull'en, 'en butl'asátelhtelh. ⁴⁶ Soo 'a dinadahdelh! 'Aw 'et uztoodelh síh! Whunulh'en ndun butl'asátelhtelh, 'aw 'et seghah uyalh!”

Sizi 'aw 'et hiyílhchoot

⁴⁷ 'Awhuz yalhtuk hoh 'et khunyaz Judas, 'en whusainya, 'en ndunnah lanezi 'o 'at nanah whuhé'la, 'en ndun 'ilhunuh 'int'ah. 'En bulh lhanah dune yulh whusaindel. Bulunah soh cho nuhule, 'ink'ez bulunah be netunuzdult'o nadule. Náwhulnuk bumoodih 'ink'ez dune netsuh whudelhdzulh, 'en whusaoohábahalh'a. ⁴⁸ 'Aw 'et ndun Sizi hubutl'aitelhtelh, 'en 'ilhunahuwésdel ndo búlhni, “Ndan nandunests'ooz, 'en 'udúsní. 'En 'ahoh olhchoot!” ⁴⁹ 'Et 'ahoh Sizi yughu ninya hoh “Dahooja Rabbi,” yulhni 'ink'ez 'en naindunants'ooz. ⁵⁰ 'Et Sizi ndutni, “Sulh dune di ka whusainya?” 'Aw 'et whusahandel 'ink'ez Sizi 'aw 'et hiyílhchoot. ⁵¹ 'Et khunyaz 'ilhunuh Sizi yulh 'int'ah ndi soh cho hayálhtsus 'ink'ez náwhulnuk degha nus dezti be 'ulhna, 'en yudzoo yuts'ah habé' yalht'o. ⁵² 'Et Sizi ndi yulhni, “Nyoo soh cho t'unádintih! 'Alha ndunnah 'et nduhút'en, 'en 'et hukw'e dahutetsah. ⁵³ 'Et si hukwa' nuszun t'eh, se'abá oodalhkut t'eh 'ink'ez k'an 'ahoh 70,000 lizas 'o 'un 'uhuneltsuk, 'en da sts'o tl'aboooleh wule da sula huténih ka. 'Et 'aw t'oonuzinzun hoh 'int'en. ⁵⁴ 'Et zeh ndust'en t'eh, nts'e na'a Yak'usda bughunek lhadútenilh? Nts'e na'a sts'un dawhut'ih, 'et whuz na'a 'uhóneh huba' hoont'ah.” ⁵⁵ 'Aw 'et wheghah 'uhunet'oh hoh Sizi 'ilhunahuwésdel ndo búlhni, “'Et di ka soh cho 'ink'ez be netunuzdult'o chah nudáhle 'ink'ez 'undunah't'ih hukw'u n'a'a skaoótéhdel? Dzin totsuk luglez whucho 'et nuhwhutah sída 'ink'ez whunohodulh'eh. 'Et whunts'ih 'aw chasúlhchulh. ⁵⁶ 'Et huwa, nus whunilh'en bube' dust'us hukw'e'edúguz, 'et ts'iyawh lhawhúdütenilh.” 'Aw 'et higha hoodul'eh, 'en whulahúdetnik 'ink'ez highut sitélhdel.

Sizi naheyelh hububut ninínya

⁵⁷ 'Aw 'et ndunnah Sizi hiyílhchoot, 'en náwhulnuk degha nus dezti, Caiaphas hiyulhni, ghu hiníhtí. Moses be' dust'us 'uk'ununa'úsduguz, 'ink'ez dune tsuh whudelhdzulh chah, whuz 'ilhunahuwésdel. ⁵⁸ 'Et Peter 'o niz de hubuneyalgh hoh náwhulnuk degha nus dezti bukoo whuna'nezdút'oo whuz níbenyena. Whuz hubughu daninya hoh nélghel buzih natl'adeda 'ink'ez na'dunildzilh, daootenilh whuntel'hilh 'et hukwa. ⁵⁹ 'Et náwhulnuk bumoodih, 'ink'ez dune netsuh whudelhdzulh chah, 'ink'ez nahuheyelh chah, 'en ts'iyawh hoonliyaz whuts'it hubugha highu nahó'ah hukwa' hut'en hituzelghelh ka. ⁶⁰ 'Et whunts'ih 'aw hiyulh náho'ah hoolah. Lhanah dune whusahánde! 'ink'ez huwhuts'it be

higu yalhtuk. 'Et whunts'ih 'awhuz hoonli hiyulh nachawhus'ai. 'Et khunyaz nanah dune huwhuts'it whuz haha'az ⁶¹ hoh nduhútni, "‘Et ndun dune 'utni Yak'usda hubuluglez wucho hoolah whutelhtsilh 'ink'ez tat dzin whutah 'udun na'whutelilh ni,' hutni. ⁶² 'Aw 'et náwhulnuk degha nus dezti didinya 'ink'ez Sizi yoodulhukut, "‘Aw ih daja chadáhni? Daja hutni 'et hubugha daja ninzun?" ⁶³ 'Et Sizi 'aw nt'edusnih. 'Et náwhulnuk degha nus dezti, 'en 'uyulhni, "‘Ndun Yak'usda khuna, 'en be nyudusni yatalhuk huba' hooht'ah. 'I be mba nahutedeh. Nedini Christ Yak'usda buYe,' 'en ih 'unint'ah?" ⁶⁴ 'Et Sizi ndi yulhni, "‘Nyunch'oh 'et 'udíni. 'Et njan hubugha nohwhulh yalhtuk, nk'atlih t'eh yinkak dune ye,' 'en ndun be hóolhtus, 'en nalhnih ts'ih yughu usda, 'et whuteh'ilh. 'Ink'ez kw'us k'ut ndus de hatéyah, 'et chah whuteh'ilh." ⁶⁵ 'Et náwhulnuk degha nus dezti ye usda, 'i bubut gha lhts'e yalhch'ul 'ink'ez 'utni, "‘Yak'usda ch'a detni hoh yalhtuk. 'Aw 'uyoon nedóni hukwa cha'uznizun. K'an whunulh'en Yak'usda ch'a detni ts'iyawh nuhwheni nuhnal 'utni. ⁶⁶ Daja nahzun?" 'Et 'uhutni, "‘Daóotsah huba 'uhoont'ah!" ⁶⁷ Hinen ts'ih huyoodunuzewh. Huyoolhchis 'ink'ez bulunah hiyoonuk. ⁶⁸ 'Et whuz na'a nduhíyulhni, "‘Neba nus whutan'ilh. Nyun 'int'ah Christ inli t'eh, ndan 'unyinla nyunézkuk?" hiyúlhni.

Peter 'utni, "Sizi 'aw t'echanuzúszun"

⁶⁹ 'Et Peter n'az whuna'nesdút!oo whez ts'ih usda hoh ts'ekeyaz yughu ninya. 'Ink'ez ndi yulhni, "‘Ndun Sizi Galilee whut'en, nyun chah bulh 'int'en inle!" ⁷⁰ 'Et ts'iyawh hububut whuts'oodedlai hoh ndutni, "‘Daja dini 'aw nt'echoonuzúszun." ⁷¹ 'Et 'az tíanaja. 'Uyoon ts'eke chah yunilh'en, 'ink'ez hoh nahudelhúya, 'en ndo búlhni, "‘Ndun 'en chah Sizi Nazareth whut'en bulh 'int'ah inle." ⁷² 'Et doo chah zeh neghan ndoh nalh whuts'oodésdlat hoh ndutni, "‘Ndun dune 'aw nt'echanuzúszun!" ⁷³ Hukw'elh'az ndunnah yuzih nuhudelhúya, 'en higu nindel hoh 'uhiyúlhni, "‘Alha ndunnah yulh 'uhant'e, 'en nyun chah 'ilhunuh 'int'ah. Nts'e na'a yailhtuk, 'et huwa t'ents'unínzun." ⁷⁴ 'Et Peter ndutni, "‘Yak'usda sts'e'telhtsus 'aw ts'ah'un cha'duzusnih t'eh, ndun dune 'udáhni, 'aw t'echanuzúszun." 'Et 'ahoh ligok dune 'udéja. ⁷⁵ 'Et Sizi daja ni 'et Peter whunalnik hoh njan ndutni, "‘Et ligok dune 'uduténilh whutsuh, tat 'aw t'echasunuzinzun dutenilh." 'Et 'az whenaja 'ink'ez tube cho howintse.

27

Sizi, 'en Pilate but ninínya

¹ 'Et 'om bun bundada 'uda náwhulnuk bumoodih, 'en ts'iyawh, dune netsuh whudelhdzulh, 'en chah, 'en Sizi hich'a detni hoh howu yahalhtuk hituzelghelh hukwa. ² 'Et Sizi hiyulhghel 'ink'ez yun k'ut whumoodih, 'en Pontius Pilate hiyulhni, hits'un hinilhti.

Judas tsená'usduguz

³ 'Et ndun whutl'ayálhti, 'en Judas hiyúlhni, 'aw 'et Sizi datetsah huba ba nahisda hoh, 'et nt'eeonanzin hoh tube budzi nduda suli. 'Et ndi tat lanezi sooneya silver hiyulhni, ndunnah náwhulnuk bumoodih 'ink'ez dune netsuh whudelhdzulh chah, buba whusanáyandzai. ⁴ 'Et ndo búlhni, "‘Njan ndusja hoh tinta' nust'en. Ndun dune nuhts'un whutl'aílhti, 'en 'aw tinta cha'it'il." 'Et 'uhiyúlhni, "‘Nuwheni neba cha'hóot'ah. Nyunch'oh zeh mba' hooht'ah!" ⁵ 'Et ndi tat lanezi silver ts'utni, 'i sooneya luglez wucho yun hububut nayántsut. 'Et 'ink'ez 'az whenaja 'ink'ez tsená'usduguz. ⁶ 'Et ndunnah náwhulnuk bumoodih ndi sooneya silver ts'utni, 'i hiyilhchoot 'ink'ez 'uhutni, "‘Dune buzkai suli, 'i 'int'ah. 'Et huwa 'aw Yak'usda ba be 'úzdla, 'i be náts'oodzaih ghaít'ah." ⁷ 'Et dich'oh dutah howu yahalhtuk. 'Ink'ez ndan lhez 'oosa' 'ulh'en, ndi sooneya 'i be yun hiyónket. 'I k'ut 'uts'un whut'en wheyóbahule 'et wheni. ⁸ 'Et huwa soo k'an njan dzin 'et whuts'un ndi yun boozi 'i 'uskai yun hiyulhni. ⁹ 'Et whuz na'a hoh da ndun nus whunilh'en Jeremiah, daja ni 'et nduhóolcho túne' whust'en 'et lhaóodija njan ndutni, "‘Ndi sooneya silver ts'utni, 'et tat lanezi 'et 'uneltsuk ulhchoot. 'Et 'uneltsuk hiyoodolhto, ndun Israel hits'uh hainde, 'en huba k'elha hiyoolhtsilh. ¹⁰ 'Ink'ez lhez 'oosa' 'ulh'en, 'en buyun hiyónket. 'Et whuz na'a Moodihti sudani."

Sizi, 'en Pilate yubut siyin

¹¹ 'Aw 'et Sizi ndun yun moodih 'en yubut siyin. 'En yun moodih yoodulhukut, "‘Nyun ih 'int'ah Lizwif hubudayi cho inli?" 'Et Sizi ndi yúlhni, "‘A, 'alha dini." ¹² 'Ink'ez ndunnah Lizwif bumoodih 'ink'ez dune netsuh whudelhdzulh chah, 'en hik'eho'alh hukwa' hut'en. 'Et whunts'ih 'aw hoonliyaz cha'díní. ¹³ 'Et Pilate yoodulhukut, "‘Aw ih cha'duzints'uk, 'aw daooneltsuk hoh nch'a yahálhtuk?" ¹⁴ 'Et 'aw lhuk'i khunek be whunts'ih daja chadinil. 'Et hoh yun k'ut whumoodih tube buba hooncha.

Pilate, 'en Barabbas buba yulanadetik

¹⁵ 'Et nawhudezulh totsuk Lizwif butus lhuseya 'et whunahulnih, 'et whutah yun moodih ndan tsak'esda 'ilhunuh hika' ninzun, 'en ts'iyannah buts'un lanadutetnih. 'Et whuz

na'a buk'ah ts'ih 'uhoont'ah. ¹⁶ 'Ilhunuh tsak'esda, 'en Barabbas hiyulhni, ts'iyannah t'e hininzun. ¹⁷ 'Et ts'iyawh 'ilhunahuwésdel hoh Pilate huboodulhukut, "Ndan nuhwhuba bulanadutesnih hukwa' nahzun, Barabbas k'us Sizi, 'en Christ hiyulhni?" ¹⁸ T'ooninzun 'oolnih bugha butl'ahiyalhti. ¹⁹ 'Et Pilate dune ba nahedilh, 'i kw'usuda k'usda hoh bu'at 'en khunek yuts'ó t'l'aida'ai, 'et ndi yulhni, "Ndan dune 'en ts'ah'un 'int'ah. Hoonliyaz onleh gunih! 'Alha k'an dzin 'en bugha huwu nusíti 'et hoh dzuh nusízut." ²⁰ 'Et ndunnah náwhulnuk bumoodih 'ink'ez dune netsuh whudelhdzulh chah, 'en 'ilhunahuwésdel ba hubahoot'i 'et whuz na'a 'uhóoneh ka, 'en Pilate, Barabbas yulanadootnih 'ink'ez Sizi hoolah hiyoolhtsilh. ²¹ 'Aw 'et yun moodih 'en huboodulhukut, "Ndunnah nanah, 'en k'us ndan nuhwhuba bulanadutesnih hukwa' nahzun?" 'Ink'ez 'et 'uhiyúlhni, "Barabbas." ²² 'Et Pilate ndo búlhni, "Et ndun do, Sizi ndun Christ hiyúlhni, 'en nts'e na'a chah daóosdleh ka?" 'Et 'ilhunahuwésdel nduhiyulhni, "Lhdulalhghus kélhtih!" ²³ 'Et yun moodih 'et ndutni, "Di ka? Ndet hoh tinta' ant'en?" 'Et whunts'ih sulyehúdelya, "Lhdulalhghus kélhtih!" hutni. ²⁴ 'Et Pilate t'ewhunínzun 'aw hoonliyaz 'uhooleh ghaít'ah. Ndunnah 'ilhunahuwésdel 'aw 'et lhtahotét'ah li'hoont'ah. 'Ink'ez 'ilhohuwezdle hububut too be lana'elde 'ink'ez ndo búlhni, "Ndan ts'ah'un dune buzkai but'aghóosnalh hukwa cha'nuzúszun. Nuhwhenich'oh zeh nuhwhuba 'uhoont'ah." ²⁵ Ts'iyannah dune 'et nduhútni, "Nuwheni ts'iyawh neuzkeh tubulh buzkai whuteleh, 'et nek'éholts'it!" ²⁶ 'Aw 'et Barabbas buba yulanadetnik 'ink'ez Sizi hiyolhtsus. 'Et hukw'elh'az butl'ayálhti lhdulalhghus k'ehiyoolhtelh ka.

Nehughan Sizi highu nolh'éya

²⁷ 'Aw 'et yun moodih 'en nehughan huwhut'i, 'en Sizi hiyílhchoot 'ink'ez bukoo ts'ih whehíyalhti, 'et Praetorion huwhut'ni. 'Et ts'iyawh ndunnah nehughan Sizi higha' wezgz. ²⁸ 'Et hinaih hits'u húnuhuyulhch'ul hoh nalhti dulk'un, 'i be hiyalhti. ²⁹ Whus cho nahinelh-baz, 'i hitsi nihída'ai. 'Ink'ez t'oghazilh nalnih ts'ih hila k'ehídantan. Hubudayi cho k'una'a oot'e ka hitl'ahídantan. Hibut nachánuldulh cha' hiyulh'en. 'Et whuz na'a highudloh. 'Ink'ez "Lizwif hubudayi cho sa cho khona!" hiyúlhni. ³⁰ Highá dizoh, 'ink'ez t'oghazilh be hitsi oonulht'ah. ³¹ 'Et highudloh 'ust'l'o 'uhudeja hoh ndi nalhti highun náhuylhchoot 'ink'ez dich'oh bunaih be nahíyalhti. 'Aw 'et lhdulalhghus k'ehítelhtelh ts'ih hítelhti. ³² 'Aw 'et Sizi tehínilhti hoh 'ilhunuh dune Cyrene whut'en 'int'ah, 'en Simon hiyúlhni, 'en hidudezdel hoh ndi Sizi bulhdulalhghus buba idantilh hiyúlhni. ³³ 'Aw 'et njan Golgotha ts'uwútni whuz lhgha hundindel. 'Et ndi khunek "Útsints'un nez'ai," ni hoh 'utni. ³⁴ 'Et mai too dunink'ooz, 'i 'ink'ez yoo, gall ts'utni, hitaidenla. 'I yulh yootnai hukwa' huyinla. 'Et yálkha 'ink'ez 'aw yootnai hukwa cha'nízun. ³⁵ 'Et lhdulalhghus yehídunilht'o hukw'elh'az hinaih higha 'áinlih. Dahúja 'et hoh da nus whunilh'en nts'e na'a 'udani, 'et ts'iyawh hukw'u na'a 'uhooja. Ndez na'a njan dudani, "Ndi sunaih dich'oh lhtahiyulya. 'Ink'ez bulah higha 'ainli cha' hiyínla."

³⁶ 'Aw 'et nátl'ahudelts'i 'ink'ez highunli. ³⁷ Butsi huwa ndoh ts'ih lhustelyaz whehindunilht'o. 'Ink'ez ndet hik'ehoo'ai 'et 'uk'e'hanguz. 'Et ndutni, ndun Sizi 'en 'int'ah Lizwif hubudayi cho.

³⁸ Nanah 'uhundunut'ih, 'en chah hiyulh lhdulalhghus k'ebuhilhti. 'Ilhunuh nalnih ts'ih, 'ink'ez 'ilhunuh 'intl'as ts'ih. ³⁹ Ndunnah wheghah whehúdelh nodunul'us 'ink'ez hich'a detni hoh yahalhtuk. ⁴⁰ 'Et 'uhiyúlhni, "Nyun 'int'ah luglez whucho nanaóodutanlelh 'ink'ez tat dzin zeh na'whutanlelh dini! Nyunch'oh 'ududilyih! Yak'usda buYe' inli t'eh, ndi lhdulalhghus k'ut buk'ut nanaíndaih!" ⁴¹ 'Et ndunnah náwhulnuk bumoodih, 'en chah whuz na'a zeh highudloh. Moses be' dustl'us 'uk'ununa'úsduzug, 'en chah 'ink'ez dune netsuh whudelhdzulh chah, ts'iyawh whuz na'a zeh 'uhutni hoh ndez na'a njan duhutni, ⁴² "Uyoon ulhyis 'et whunts'ih dich'oh 'aw 'ududooliyih ghaít'ah. Israel buts'u hahánde, 'en ba hubudayi cho unli t'eh, 'et t'eh ndi lhdulalhghus yuk'ut nanaóoja wule da. 'Et t'eh da neba 'alha 'oot'e. ⁴³ 'En Yak'usda t'anínentan. 'Et huwa Yak'usda yuka' ninzun t'eh, k'an 'ahoh da yoolhyih. 'En 'utni si Yak'usda buYe' 'ust'ah." ⁴⁴ Ndunnah 'uhundunut'ih yuzih lhdulalhghus k'usulhti, 'en chah whuz na'a zeh 'et nduhiyulhni.

Sizi ye khuna, 'i yuladetnik

⁴⁵ Dzetniz hukw'elh'az 3:00 bat'en 'ink'ez hulhgha 6:00 bat'en 'et whuts'un ndi yun k'ut ndúwhulcho tsahólhghus suli. ⁴⁶ 'Et 6:00 bat'en Sizi tube cho ka' deduja hoh, "Eli, Eli, lama sabachthani?" Ndi khunek, "SuYak'usda, SuYak'usda di ka sula dantnik," ni hoh 'utni. ⁴⁷ Bulunah dune 'et nuhúdelhuya hidánts'o 'ink'ez 'uhutni, "Ah! Elijah hahayih hoh 'utni!" ⁴⁸ 'Et 'ahoh 'ilhunuh whusalgai, 'ink'ez duchun bula'dul'oo, 'i mai too dunink'ooz, 'i ye toonayuztan 'ink'ez nduk Sizi yuzek be naóonulhtsul. ⁴⁹ 'Onghunnah 'uhutni, "Bukaza'ez! Khunsih, Elijah yughu ninya 'ink'ez tulih yoolhyih." ⁵⁰ Doo chah Sizi tube cho 'udéja 'ink'ez duyégah yula detnik. ⁵¹ Khunyah luglez whucho bez ts'ih hukwadelhchooz 'i lhulcho

lhk'énych'ul. 'Et yun chah nughésnai, 'ink'ez tse cho chah lhts'edankat. ⁵² Ts'un k'ut dune 'adlnla 'et cha da' dutezkat. 'Ink'ez lhanah dune Yak'usda bube'ildzun, 'en nahunestez inle, 'en dináhudidel. ⁵³ 'Aw 'et tse be tsa k'et ts'ih hanáhedel, 'ink'ez keyah Jerusalem ts'ih whehandel. 'Et lhanah nalhts'et hube hóodiltsai, 'et whébumelhtan. Sizi nakhitna hukw'elh'az ndulhcho 'et ndúhooja. ⁵⁴ 'Aw 'et ndun nehughan bumoodih 'en, 'ink'ez yulh 'uhut'en, 'en ndunnah Sizi yughunli, yun nughésnai 'ink'ez nts'oh tuné'whust'en, 'et honalh'en, 'et hoh tube whehunelhújoot 'ink'ez 'et 'uhutni, "Alha ndun dune, 'en Yak'usda buYe' 'int'ah." ⁵⁵ Lanah ts'ekoo chah 'et nahudelhúya ye 'az de whuts'un honilh'en. 'En Galilee ts'ih haháandel 'uhut'en. 'En Sizi whusahánandel 'ink'ez hiba ne'úst'en 'uhint'ah. ⁵⁶ 'En hubutah Mary, Magdala whut'en, 'en chah 'ut'en, 'ink'ez Mary, James 'ink'ez Josés bulh 'en hube'ama, 'en chah 'ut'en, 'et Zebedee buyekah 'en be'ama chah, 'ut'en.

Joseph, Sizi whuyiyalhti

⁵⁷ 'Aw 'et hulgha wheghah whezulh hoh 'ilhunuh Arimathea whut'en, dune soode'a 'int'ah, 'en Joseph 'uhiyulhni. 'En chah Sizi yugha hoodul'eh 'ilhunuh suli. ⁵⁸ 'En Pilate ts'ih whinya, 'ink'ez Sizi buyust'e yuts'un ka na'dutni dutl'ayóolhtelk ka. 'Et Pilate ndo búlhni, "Sizi buyust'e ndunnah butl'ayúlhthi." ⁵⁹ 'Et Joseph Sizi buyust'e ndus de hanáyalhti 'ink'ez naih dezti, 'i 'aw chaditsun, 'i yugha iwézdus. ⁶⁰ 'Et dich'oh butse be tsa k'et k'an 'uhoonla, 'et bez ts'ih 'et nefnilhti. 'Et tse cho be whudanaindunelhmul 'ink'ez whenája. ⁶¹ Mary Magdala whut'en, 'en chah 'et usda. Njan tsa k'et huwanch'az, 'et 'uyoon Mary chah 'et usda.

Sizi nts'e whuhíyalhti, ndi tse k'ut whuduná'hudelhdze

⁶² 'Et njan dzenis whuti 'et wheni lhazdutneh dzin 'uhoont'ah. 'Et 'om bun dzin ndunnah náwhulnuk bumoodih 'ink'ez Pharisee chah, 'en ts'iyawh Pilate ts'un whehandel. ⁶³ 'Et ndi hiyulhni, "Nemoodih ndun nena'a 'awhuz khuna hoh daja neúlhni, 'et whunats'ulnih hoh "Tat dzin inle t'eh dináduésdalah," ni. ⁶⁴ 'Et hoh nghunek be budóoni njan tsa k'et da'dute'a whulh tat dzin 'et whuts'un. 'Et 'aw ndúchainel t'eh ndunnah yugha hoodul'eh 'ulh'ek whusaháandel 'ink'ez hiyust'e hindutet'ih tulih. 'Ink'ez ts'iyannah ndoh budóoni ndunnah yaidla hubutah dinadeja ho' 'int'ah. 'Et whuz na'a 'udek'elh'az whuts'it, 'i 'udechoo, 'i degaha nus 'ulsi' whutéleh," hiyulhni. ⁶⁵ 'Et Pilate ndo búlhni, "Nuhwheni chah nohhowunli aht'i hoh aht'ah. 'Aw 'et nahdull 'ink'ez nuhwhenich'oh soo duts'o cho hoh dána'deh'aih!" ⁶⁶ 'Et wheháandel 'ink'ez ndi tse k'ut whuduná'hudelhdze. 'I be duts'o cho whuzdli. 'Et 'ink'ez howu hinli 'en 'et nibanínla.

28

Sizi dinadija

¹ Nats'ulyis dzin hukw'elh'az hukw'enilghel, 'et 'udechoo dzin, soo haotelh'en, 'et Mary Magdala whut'en 'ink'ez 'uyoon Mary bulh ts'un k'uz huni'az 'ink'ez honilh'en. ² Khunyaz 'ilhunuh neMoodihti bulizas yak'uz hainya. 'Et huwa yun chah nughesnai. Whusainya 'ink'ez ndi tse whudahaidunalhmul, 'ink'ez yuk'étl'adida. ³ Bunen 'ants'ih ditnik kwun nduwht'én. Bunaih tsil k'una'a lhiyul. ⁴ 'Et huwa ndunnah howuhinli nujut k'et hudulduz, 'ink'ez 'ants'ih dune dahuzas li'huja. ⁵ Lizas ndunnah ts'ekoo ndo búlhni, "Nulhújut ilah. T'eeonuzun Sizi ndun lhdulalhghus k'ut dazsai, 'en bukunáhta hó 'aht'en. ⁶ 'Aw njan hoolah! Dinadeja ho' 'int'ah. Nts'e na'a datenilh ni, whuz na'a dinadija hó 'int'ah. 'Anih, njan whunulh'en, ndet neMoodihti ilhte! ⁷ 'Et 'a cho whuz ah'us 'ink'ez ndunnah yugha hoodul'eh hubudáhni yaidla tah dinadija hó 'int'ah. Soo zelhts'ai nuhtsuh Galilee ts'ih iyahl. 'Et teh'ilh. Soo cho soo zelhts'ai 'uda ndun whudáni." ⁸ 'A tsih tse be tsa k'et whuch'a nahúnt'az. Whehunelhújoot 'et whunts'ih 'o nus huhóont'i cha' hint'ah. 'Ink'ez ndunnah yugha hoodul'eh 'en buts'un whuhelgai ndoh buduténilh ka.

Sizi hits'u teni' nílhdzun

⁹ 'Et ndunnah yugha hoodul'eh ts'ih he'us hoh khunyaz Sizi bududezya 'ink'ez ndo búlhni, "Whunélnnik." Hizih neni'az 'ink'ez híke óontun 'ink'ez hits'u téni' nalhdzin. ¹⁰ 'Et Sizi ndo búlhni, "Aw whénuhujut ilah. sulhutsinkah buts'un naht'us 'ink'ez sba dobudóohni, nuhwheni ts'iyawh Galilee ts'ih toohdelh. 'Et si suhunoolh'en."

Lhuhúdughan 'en sooneya hubugha hinendzai

¹¹ 'Aw 'et hutezdel hoh 'et howuhinli bulunah Jerusalem ts'ih hunindel. 'Et whuz hunindel hoh 'et ndunnah náwhulnuk bumoodih, 'en 'et nduhóolcho hubudáni njan ndet dahooja 'et. ¹² 'Aw 'et náwhulnuk bumoodih 'ink'ez dune netsuh whudelhdzulh, 'en ts'iyawh 'ilhunahuwésdel 'ink'ez howu yahalhtuk. 'Ink'ez lhai sooneya 'i lhadudughan hubugha hinendzai. ¹³ 'Et ndo buhútni, "Et nuhwheni ndez na'a 'uduténilh, "Et 'ulh'ek 'awhuz ts'uztez hoh ndunnah yugha hoodul'eh whusahanel'i 'ink'ez buyust'e neghu hitelhti." ¹⁴ 'Et yun moodih whulh 'údants'o t'eh, soo kháznent'a hoh bulh yats'oolhtuk sih. 'Et t'eh whuz

na'a 'aw hoonliyaz nuhts'u cha'hosne.” ¹⁵ 'Et huwa ndunnah lhahudughan ndi sooneya hiyoolhchoot, 'ink'ez nts'e na'a ndo badáni, 'et whuz na'a zeh 'o 'unnah chah hubudáni. 'Et soo k'an dzin 'et whuts'un, 'et whuz na'a Lizwif dich'oh dutah howu yahalhtuk.

Sizi yak'uz whenaja whutsuh khunek netl'aída'ai khunek buk'une' ts'oot'en ka

¹⁶ 'Aw 'et ndunnah lanezi 'o 'at 'ilhunuh 'en yugha hoodul'eh, 'en Galilee ts'ih whehandel. Ndi dzulh k'uz Sizi hubudani, whuz whehandel. ¹⁷ Hiyan'en hoh hits'un teni' nalhdzin. 'Et whunts'ih bulunah huba cha'hoot'ah. ¹⁸ Sizi hubuts'un whusainya hoh hubulh yalhtuk 'ink'ez njan ndo búlhni, “Yak'uz 'ink'ez ndi yun k'ut 'i ts'iyawh huwandoh 'ust'ah, 'et sutl'awhélts'ut. ¹⁹ 'Et huwa lhelhts'un keyah whut'en, 'en ts'iyawh buts'un nahdulh 'ink'ez si sugha hoodul'eh hubulhtsi. Se'aBá 'ink'ez 'uYe' 'ink'ez Ndoni, ndi boozi be 'i be too be' butelh'ilh. ²⁰ Ndai khunek nuhtl'adá'ai, 'i ts'iyawh hik'une' 'oot'en hubodoolh'eh. 'Ink'ez sih soo zelhts'ai, 'et dzin whulatah lhaoodija t'eh, 'et whuts'un 'ahoolhyez nohwhulh 'útest'ilh ho' hoont'ah.” 'Et ndoh honeh.

Yak'usda Bughunek Unzoo, 'I Mark Yuk'uné'uzguz

John dune too be 'ulh'en 'en Yak'usda bughunek be hubulh yalhtuk

¹ Ndi khunek unzoo, 'i khunek 'udechoo, 'i Sizi Gri, Yak'usda buYe' bughu. ² Uda Yak'usda be nus whunilh'en, ndi Yak'usda bughunek bughu 'uk'une'úsduzuguz, 'i 'et njan ndutni,

“Yak'usda 'ust'ah, sóo zelhts'ai,
'uyoon khunek suba na'á ntsuh tes'alh,
mba lhaoodutelilh 'et wheni.’

³ 'Et keyah, 'aw dune chahóot'ih,
dune 'ultus hahuyih hoh,

'NeMoodihti whuz de uyalh, buti buba lhaoodahleh.

Lhuteyalh hoonzoo 'ink'ez lhts'e whudez'a buba whulhtsi,” ni.

⁴ 'Et 'uhóoja John dune too be 'ulh'en, 'aw dune chahóot'ih ts'ih ninya 'ink'ez tube 'o budáni, “Lubeshi whuch'a nuwhubeni náhandunooheh, 'ink'ez too be 'oohneh, 'aw 'et t'eh zeh Yak'usda nuwhulubeshi nuwhuba 'ún yutelhdulh.” ⁵ Ts'iyannah Judea whunat whut'en 'ink'ez Jerusalem whut'en chah hits'un lghadindel 'ink'ez John dune too be 'ubulh'en hiyoozéhlhts'ai. 'Ink'ez hubulubeshi hubugha hunáhuwhulnuk hoh nyo 'et took'oh Jordan huwhútni toot 'et John dune too be balh'en. ⁶ 'Ink'ez John dune too be 'ulh'en khunai[†] gha sdútl'oo, 'i ye dune unli 'ink'ez 'uzuz se be sudelhú'oo. Tulk'us cho 'ink'ez honey, 'i ya'alh inle. ⁷ 'Et ndo búlhni, “Dune sk'élh'az whusatéyalh sughanus dezti ho' 'int'ah. 'Aw bukechun ketl'oolh buba k'unaidutes'uk 'et whunts'ih huba soo cha'lhútdzooch. ⁸ Too be 'unwhulh'en 'et whunts'ih ndun dune 'en Ndoni be too be 'unwhutelilh 'ink'ez Ndoni nuhyédute'alh.”

Sizi too be 'úlya 'ink'ez netsudúle tink'us 'óneh hukwa yóolhdzih

⁹ 'Et sa ilah hukw'elh'az Sizi Gri Nazareth[†] ts'ih hainya 'ink'ez took'oh Jordan huwhútni toot 'et John dune too be 'ulh'en Sizi too be 'uyínla. ¹⁰ Soo Sizi tooz hanaja ibulh, nduk yak'uz dá' dutékeze whutéhl'en, 'ink'ez Ndoni, dut'aiyaz k'una'a, dove hiyúlhni, ndus de buk'eyit'o. ¹¹ 'Et 'uwhtútni, “Nyun suYe' inli. Tube nk'esi, 'ink'ez tube nyulh hoonúst'i.” ¹² 'Et 'ahoh Ndoni 'en Sizi nye'un 'aw dune chahóot'ih ts'ih wheyálh'a. ¹³ 'Et dit lanezi dzin (40) Sizi 'aw dune chahóot'ih inda 'ink'ez Satan tink'us 'óneh hukwa yóolhdzih. Khunai tsiyaini 'i chah hoonli. 'Et lizas whusahánde, 'ink'ez hiba ne'ut'en.

Dinah lhook ka 'uhut'en, 'en Sizi, “Anih,” hubúlhni

¹⁴ John dune too be 'ulh'en, tsak'ehiya'ai hukw'elh'az, Sizi Galilee ts'ih ninya 'ink'ez hubulh yalhtuk nts'e na'a Yak'usda buk'úne whut'en, 'et hubugha. ¹⁵ 'Ink'ez 'et 'utni, “Ndi khunek unzoo, 'i 'int'ah. K'an 'aw 'et whusahóonzut. 'Aw 'et nilhdukw Yak'usda buk'úne whutet'en ho' hoont'ah. Lubeshi whuch'a nuwhubeni náhandunooheh, 'ink'ez ndi khunek unzoo, 'i nuwhuba 'alha 'oot'e 'ink'ez wúlhchoot!” ¹⁶ 'Et Sizi bun k'ut Galilee taba nuya hoh nanah lhook ka' hut'en hubunilh'en 'en Simon 'ink'ez bulhutsin Andrew bulh lhoombilh tahiyalhdel lhook ka 'uhut'en hinli 'et huwa. ¹⁷ 'Et Sizi ndo búlhni, “Suneh'us, dune ka 'ooh't'en whunwhudoolh'eh sih.” ¹⁸ 'Et 'ahoh hubuloombil hiladetnik 'ink'ez hik'ah ts'ih 'uhoot'en ka hiyuntez'az. ¹⁹ 'Et 'o 'unyaz hahánde 'et 'uyoon nanah lhulhutsinkah James 'ink'ez John bulh Zebedee buye'kah 'en hubutelh'en buts'i bet buloombil nahut'oo. ²⁰ Soo Sizi hubutelh'en ibulh, “Anih,” hubúlhni. 'Aw 'et Zebedee buye'kah Sizi bulh whehá'az. Zebedee 'ink'ez yuba 'ut'en chah 'aw 'et ts'i bet hudéhlts'i hoh bughoh whehá'az.

Dune ntsi' buyudúnda

²¹ Keyah Capernaum[‡] huwhútni whuz hunindel. 'Om bun dzin Lizwif nahulyis dzin, 'et Sizi Lizwif hubuluglez 'et bughut danínya 'ink'ez whehubondunilh'i. ²² Dune yudánts'o tube huba hooncha, soo buba 'uhoont'ah k'una'a hoh dune wheoobodalh'i, 'aw Moses be' dustl'us 'uk'une'úsduzuguz buk'una'a ilah 'utni. ²³ 'Et 'ilhunuh dune hubutah usda, 'en ntsi' nududeh, 'i k'úne' 'ut'en, 'alzul hoh 'utni, ²⁴ “Sizi Nazareth whut'en ndet nets'ú hukwa' ninzun? Hoolah netalhtsilh ka ih whusaínya? Ndan ninli t'enyunúszun, nyun Yak'usda ba lubeshi bughu hoolah, 'en 'unint'ah.” ²⁵ 'Et Sizi hukwa' yudani hoh ndi yúlhni, “T'eduzinih hoh buyáh hanaindaih!” ²⁶ 'Et ntsi' nudúdeh, 'i ndun dune yukaootelhdzut, 'alzul, 'ink'ez yuyáhanaja. ²⁷ Ts'iyannah huba hooncha k'et 'et 'ulhóduhni, “Dant'un dune 'int'ah, whutsuh da chats'udústs'uk 'et whuneoodulh'eh? Bughunek be whúnujut k'et ntsi'

* 1:6 Ndi khunai, “camel” hiyúlhni. † 1:9 Nazareth, yun k'ut Galilee 'et whuz'ai. ‡ 1:21 Capernaum, yun k'ut Galilee 'et whuz'ai.

nudúdeh, 'i whunts'ih hik'úne' 'ut'en." ²⁸ 'Ahohe Galilee keyah whuti whunat whut'en Sizi hiyulh údants'o.

Sizi lhanah dune hunduda soo ná'bulh'en

²⁹ 'Aw 'et Lizwif luglez tínahundel. Simon 'ink'ez Andrew bukoo ts'ih hunindel, James 'ink'ez John bulh chah whuz huni'az. ³⁰ Simon bubez kwusuti k'ut sulhti. Buyust'e nezul, 'i be undúda. Sizi whuz ninya íbulh ndi hidáni. ³¹ 'Et yughu ninya 'ink'ez yula t'az nduk yilhchoot. 'Ahohe ts'eke soo 'uja 'ink'ez hubugha ná'unt'ai. ³² Hulhgha sa yun ts'ih tez'ai hukw'elh'az, ndan húnduda 'ink'ez dunnah ntsi' nudúdeh, 'i k'úne' hut'en chah Sizi gha banínla. ³³ Ts'iyannah 'et keyah whut'en ndati 'ilhúhowezdel. ³⁴ Lhawh dédowh dada, 'i be húnduda, 'en Sizi soo ná'balh'en 'ink'ez ntsi' nudúdeh, 'i k'úne' hut'en, 'en chah dune yé hanabunanyoot. Ntsi' nudúdeh, 'i 'aw yahoolhtuk butl'achahóo'al, t'ehinínzun 'et huwa.

Keyah Galílee huwhútni, 'et Sizi Yak'usda bughunek be yáhtuk

³⁵ 'Om bun 'uda 'awhuz hootel'eh whutsuh da, 'et Sizi didinya 'ink'ez 'az whenya. 'Et nyo keyah whuch'a siya, ndet soo nehoolah ts'ih, whuz ninínya. 'Et tenadedli. ³⁶ Simon 'ink'ez dulh 'úhut'en, 'en Sizi hikunuta. ³⁷ Nahuyilhti hoh 'et 'uhiyúlhni, "Ts'iyannah nkúnuta." ³⁸ 'Et Sizi ndo búlhni, "Uts'un keyah ts'ih chah uztoodelh huba' hoont'ah dune bulh yatelhtuk, 'et huba whusáya." ³⁹ Galílee ndulhcho nukéhudezde luglez totsuk hubulh yáhtuk 'ink'ez ntsi' nudúdeh, 'i dune ye hanábuneyukw.

Dune bukak whulhjut, 'i leprosy hiyúlhni, 'en Sizi soo ná'yinla

⁴⁰ 'Ilhunuh dune, bukak whulhjut, leprosy hiyúlhni, 'en Sizi ghu ninya, dugwútsi bé nenínya 'ink'ez yuts'u tédudli dula 'ooneh ka. "Nyun hukwa' ninzun t'eh, be ilhtus, 'i 'int'i, 'i be suná'ilhdeh," yulhni. ⁴¹ Sizi yugha té'nanzin, yuts'un delhúnik 'ink'ez yut'agheznai. "Hukwa' nuszun, soo na'íntneh," yulhni. ⁴² 'Et zeh ndun dune bukak whulhjut, 'en soo ná'uja. ⁴³ Sizi khunekti be yulh yáhtuk 'ink'ez 'aw 'et whenáyalh'a. ⁴⁴ Ndun dune natesja 'et Sizi ndi yúlhni, "Soo zelhts'ai, 'uyoon dóni gunih! Inyalh ts'ih náwhulnuk 'en buts'ínyalh 'ink'ez nyunoolh'en. 'Et 'ants'ih soo ná'inja hukw'élha ndet Moses bughunek k'uná'a náwhulnuk nts'u húkwa' 'utni, 'i hubugha íon'alh. 'Et ts'iyannah whúntalhtun ts'ah'un soo ná'inja." ⁴⁵ 'Et whunts'ih ndun dune whenája 'ink'ez ts'iyannah ndo budáni 'o nus huwe yalhtuk k'et Sizi 'aw keyah dune tunóya ghaít'ah. 'Et n'awh dune chahóot'ih hoh dune unli. Lhelhts'un teh whut'en whuz highu lhk'esúdel.

2

Dune buyust'e dechadusnik, Sizi soo ná'yinla

¹ 'Et hukw'elh'az whutezut hoh Sizi koo Capernaum ts'ih lhgha nadija. Ts'iyannah whulh 'úhuduzts'ai. ² 'Et 'ahoh dune 'ilhuhowezdel. Whuz dune lhanah 'ilho daníndel k'et 'aw whuz'ai hoolah, ndati 'i bulh whudezbun. 'Et Sizi Yak'usda bughunek bugha hubulh yáhtuk. ³ Yalhtuk hoh dinah dune, 'en 'ilhunuh dune buyust'e dechadusnik Sizi ts'un hítezkaí. ⁴ Whuz dune hulan 'ink'ez 'aw Sizi highah níóodelh ghaít'ah. 'Et nduk bun 'i k'ehiyilhti 'ink'ez soo ndet Sizi 'int'ah bat'en, whuz ndun dune buyust'e dechadusnik ndus de yuk'usti, 'i bulh hukwu hininkai. ⁵ 'Et Sizi dahóolcho huba 'alha 'uhoont'ah t'eeonínzun, ndun dune buyust'e dechadusnik 'ulhni, "Uski nyulubeshi ts'iyawh mba hoolah suli." ⁶ Bulunah Moses be' dustl'us 'uk'une'úsduguz, 'en nyo 'et hudelhts'i 'ink'ez 'uhinínzun, ⁷ "Ndan na'dunúdzun bulh 'utni, Yak'usda ch'a yalhtuk. 'Aw dune lubeshi n'un hutoolhdelh ghaít'ah, Yak'usda 'en zeh lubeshi n'un yutelhdulh ho' 'int'ah." ⁸ 'Et Sizi buyeghah be daja huninzun t'ewhunínzun 'et 'ahoh ndo búlhni, "Dáhoont'ah huwa hoh teh nuni nahzut?" ⁹ Ndet dega nus huwa chahóolnah, ndun dune buyust'e dechadusnik 'udutésnilh, 'Nyulubeshi mba 'un telhdel,' k'us 'Dínadindaih 'ink'ez ninya?" ¹⁰ Whunuh whuntelhtun, yinkak dune ye, 'en njan ndi yun k'ut lubeshi n'un tulhdelh huba' hoont'ah." 'Et ndun dune buyust'e dechadusnik yúlhni, ¹¹ "Nyudútsni, buk'usinti 'i ilhchoot 'ink'ez nkoo ts'ih naínalch." ¹² Ts'iyawh hinilh'en hoh 'a hoh dinadija, yuk'usti, 'i yilhchoot 'ink'ez ts'iyannah nalh whenája. Soo ts'iyawh huba hooncha 'ink'ez Yak'usda hidálhti 'ink'ez 'uhútni, "Aw whutsuh da 'et nduhoont'ah 'aw chats'uwhe'sen."

Sizi, 'en Levi, "Anih," yulhni

¹³ 'Et chah Sizi taba ts'ih lhghanadija. Hulan hoh highu nindel hoh 'et whubodalh'i. ¹⁴ 'Et Sizi wegghah uyalh hoh Alphaeus buye' Levi, Capernaum hoonkuti huwunli ka sooneya 'ilhunughesdzaih, 'en Sizi yutelh'en, 'et ndi yúlhni, "Sunanyalh." 'Et Levi dudinya 'ink'ez yuk'ah ts'ih oot'en ka yuntezya. ¹⁵ Hukw'elh'az 'et Levi bukoo lhannah ndunnah sooneya 'ilhughnesdzaih 'ink'ez lubeshi 'ulh'en, Sizi yugha hoodul'eh chah 'et hubula na'ut'alh. ¹⁶ 'Et Moses be' dustl'us yuk'ununa'úsduguz 'ink'ez Pharisee dédowh, Sizi hinilh'en ndunnah lubeshi 'ulh'en, 'ink'ez sooneya 'ilhughnesdzaih hubula na'ut'alh. Ndunnah Pharisee Sizi

yugha hoodul'eh hubuhoodulhukut, “Dáhoont'ah huwa ndunnah hubula 'ah'alh?” ¹⁷ Sizi hubuduzts'ai 'ink'ez ndo búlhni, “Ndan soo 'int'ah, 'aw yoo be duyun ka cha'hunizun, ndan nduda, 'en zeh yoo be dúyun ka' huninzun. 'Et whuz na'a zeh si chah dune ts'ah'un 'int'ah na'dunúdzun ba whusáchasyal, lubeshi 'ull'en lht'anahunoodelh hubudutésnilh 'et wheni whusáya.”

Dune saha'húdelya 'et hukwa Sizi hiyoodulhukut

¹⁸ 'Et John dune too be 'ull'en yugha hoodul'eh 'ink'ez Pharisee hubugha hoodul'eh chah sahá'hudelya hoh 'uyoon Sizi highu nindel 'ink'ez 'uhiyúlhni, “Et dáhoont'ah huwa John dune too be 'ull'en yugha hoodul'eh 'ink'ez Pharisee hubugha hoodul'eh chah saha'húdelya 'et whunts'ih nyun nga hoodul'eh, 'en 'aw sahácha'hudilyel?” ¹⁹ Sizi ndo búlhni, “Aw ih k'an lghusduke bulh dunekah sahá'hudutelyel? 'Awundooh! Ndunnah hubughun ts'úzdel, ndun dune bu'at whuzdli, 'et hubutah usda t'eh, 'aw sahácha'hudilyel. ²⁰ 'Et whunts'ih whusawhutélts'ullh ndet ndun dune 'at ut'i bughu nayitélchulh. 'Et dzin whusawhélt'sut t'eh, 'et sih saha'hudutelyel.” ²¹ “Aw 'ilhunuh naih k'an, 'i naih jut be lhudunoolhkalh ghait'ah. 'Et ndúja t'eh, ndi naih k'an, 'i be lht's'etech'ullh, 'et nyoo naih jut lht's'ench'ul 'i bulh hanaitech'ullh 'ink'ez 'o nus hooncha tele. ²² 'Et whuz na'a 'aw 'ilhunuh mai too, 'awhuz 'ut'en, 'i uzus 'ujut, 'i be hiyoolhdzeh huba cha'hóot'ah. 'Et nduhíyínla t'eh ndi mai too zus jut, 'i buk'otéltulh 'ink'ez mai too nadutejulh 'ink'ez buzus bulh tinta' tet'ilh. Mai too 'awhuz 'ut'en, 'i uzus k'an, 'i be yóoldzeh huba' hoont'ah.”

Nahulyis dzin hukwa' hoodulhukut

²³ 'Et doo chah nahulyis dzin 'uhoont'ah hoh, Sizi 'ink'ez yugha hoodul'eh tubulh tl'o k'ut wheghah hidulh hoh, tl'o mai hoonuye. ²⁴ 'Et Pharisee Sizi 'uhiyúlhni, “Nilh'en dáhoont'ah huwa nga hoodul'eh nats'ulyis dzin 'et 'uhut'en? 'Aw 'et nduhóot'en huba cha'hoont'ah.” ²⁵ Sizi ndo búlhni, “Aw ih hukw'e yachalhtih David dája hoh da, yoo'alh, 'i hoolah, yulh 'úhut'en teh buye'élts'ul 'et 'uja, ²⁶ Yak'usda bukoo 'et danínya 'ink'ez ndi lhes Yak'usda bugha iní'ai, 'i yu'alh 'ink'ez yulh 'uhut'en, 'en chah hiya'al. Nawhulnuk 'aw 'en zeh hiyoo'alh huba' hoont'ah, 'et whunts'ih David 'ink'ez yulh 'uhut'en chah nduhuja. Hoh da Abiathar 'en nawhulnuk bumoodih unli ho' hooja.” ²⁷ 'Et Sizi ndo búlhni, “Nahulyis dzin dune huba whulhtsi, 'ink'ez dune, 'en 'aw nahulyis dzin huba cha'hílnel. ²⁸ 'Et huwa yinkak dune ye', nahulyis dzin 'et whunts'ih nts'e na'a ne'hutet'ilh hukwa' huninzun huba' hoont'ah.”

3

Sizi Gri dune bula únduda 'en soo na'yínla

¹ 'Et Sizi Lizwif hubuluglez ts'ih danínya. 'Ilhunuh dune bula 'aw ye nucha'ust'en, 'et usda. ² 'Et Pharisee tube Sizi highunli nahulyis dzin tulih ndun dune ka hoonli nayoolhyih, hukwa hik'ého'alh, 'et hukwa highunli. ³ Sizi ndun dune bula ka hoonli 'en 'uyúlhni, “Didinyih 'ink'ez 'udez inyahl!” ⁴ 'Et Sizi huboodulhukut, “Neghá whunt'ai ih nats'ulyis dzin, hubula 'uts'utenilh k'us 'uts'uduntélda, uztelhyih k'us hoolah ts'utelhtsilh?” 'Aw dája chahudinil. ⁵ Sizi tube hunilch'e hoh hubutunuyú'en tube budzi ndesda, ndunnah stabe hubudzi duts'un. 'Et ndun dune ka hoonli yulhni, “Lhk'utdughelnih!” Ndun dune 'en lhk'udughellhúnik ibulh 'ilhk'us ts'ih k'una'a soo ná'uja. ⁶ 'Et 'ahoh Pharisee nyo luglez tinahundel 'ink'ez Herod dédowh bulh highu yalhtuk nts'e na'a Sizi hituzelghel'h 'et wheni llahóduleh.

Ilhuhowezdel bun k'ut taba hudilhts'i

⁷ 'Et chah Sizi yugha hoodul'eh tubulh Galilee bun ts'ih lgha hudindel. Galilee keyah whut'en whuz lgha hidunindel 'ink'ez lhelhyoo keyah ts'ih huhandel tubulh. Judea ts'ih hahandel chah, ⁸ Jerusalem whut'en, Idumea ts'ih hahándel, Jordan took'oh wheghah whut'en, 'ink'ez ndunnah Tyre 'ink'ez Sidon whut'en, 'en chah, ts'iyawh Sizi higha 'il-huhowezdel lhat tune'út'en hiyulh 'udánts'o 'et huwa. ⁹ Lhanah 'ilhuhowezdel Sizi lhube' hinteljhulh 'et whuch'a yugha hoodul'eh, “Ts'iyaz suba lhadáhleh,” hubulhni. ¹⁰ Lhanah hunduda soo na'ubinla 'ink'ez 'uyoon hit'aóonah hukwa' hut'en, ¹¹ 'ink'ez ndunnah ntsi' nudúdeh, 'i hubuyudínda, Sizi hitulh'ih teh, hibut nachánuldulh, 'ink'ez hahúzulh hoh 'uhutni, “Nyun Yak'usda buYe' inli ho' 'int'ah.” ¹² 'Et Sizi khunekti be ndunnah ntsi' nudúdeh, 'en ndo búlhni, “Khun ndan 'ust'ah doohtni gunih!”

Lanezi 'o 'at nanah (12), 'en Sizi 'et 'utaháobanla

¹³ Dzulhyaz k'ut nduk whenya hoh ndunnah hubuka' ninzun 'en hubuka' dani 'ink'ez hits'uh whendel. ¹⁴ Lanezi 'o 'at nanah, 'en 'utaháobanla. 'Et ndo búlhni, “Sulh 'óoht'e ka 'utahanhóla, dune bulh yátelhtuk ka nuhwutélh'alh, ¹⁵ 'ink'ez ntsi' nudúdeh, 'i dune buyuh hanainóohyukw 'ink'ez dune soo na'boolh'en, 'et nuhwutl'ahó'ai.” ¹⁶ Ndunnah lanezi 'o 'at nanah, 'en 'utaháobanla Simon, 'en Sizi “Peter” naidútni. ¹⁷ James 'ink'ez bulhutsin

John, Zebedee buye'k'ah 'en Sizi Boanerges nabudát'ni, ndi boozi, 'i "Huhuske" ni ho 'utni; ¹⁸ Andrew, Philip, Bartholomew, Matthew, Thomas, James Alphaeus buye', Thaddaeus, Simon 'en ts'ah'un 'ut'udil'i, ¹⁹ 'ink'ez Judas Iscariot chah 'en Sizi be ná'oodutekulh.

Netsudule Sizi Gri buyudínda hutni

²⁰ 'Et doo chah zeh 'ilhohuwezdél hulai k'et Sizi 'ink'ez yugha hoodul'eh bulh 'uhute'ah, 'et whunts'ih 'aw 'uhooneh ghaít'ah. ²¹ Lhanah dune 'uhutni, "Beni hoolet" hutni 'ink'ez bulhutsinkah hiyulh údants'o hoh hika natesdel budeni 'et tinta' 'oot'en whuch'a. ²² Moses be' dustl'us 'uk'ununa'úsduzug, Jerusalem ts'ih huhandel, 'en 'uhutni, "Beelzebul buyudínda 'ink'ez ntsi' nududeh bumoodih 'en ye últus yugha óoni'ai, 'et huwa ntsi' nududeh, 'i dune buts'u hanaoobuneyukw." ²³ 'Et Sizi, "Anih," hubúlhni, 'ink'ez hubulh náwhulnuk higha hodool'eh ka, "Nts'e na'a Satan dich'oh na'dudúntejulh? ²⁴ Keyah whut'en lhch'az nihúndendel t'eh, 'et keyah hoolah whutéle, ²⁵ k'us 'ilhunuh bukoo whut'en lhch'az nihúndendel t'eh, 'et bukoo whut'en hoolah whutéle. ²⁶ 'Et Satan dich'oh dulh duch'a nenadenja 'ink'ez lhch'az nihúndendel t'eh, 'aw sa 'uhoot'e ghaít'ah 'ink'ez hoolah whutele.

Ndan Ndoni ch'a detni be yahulhtuk, 'aw buba whunaoodootnah ghaít'ah

²⁷ 'Aw 'ilhunuh dune whunts'ih njan dune ulhtus bukoo 'et datdutooyis 'ink'ez te'oolet'ah, 'et ndunah dune ulhtus 'en yulghel choo, 'et sih yughu te'oolet'ah. ²⁸ Soo ts'ah'un nuhwhudúsní, ts'iyannah dune bulubeshi 'ink'ez Yak'usda ch'a yátuk chah, ts'iyawh hububa n'ún whuteldulh. ²⁹ 'Et whunts'ih ndan Ndoni ch'a yáhalhtuk, 'en 'aw bulubeshi buba n'un yutoolhdelh ghaít'ah, 'ilhuwheni huba nahutedeh." ³⁰ Sizi hubudani, 'et huwa ndunnah Moses be' dustl'us 'uk'ununa'úsduzug 'uhútni, "Ntsi' nudúdeh, 'i buyudínda!"

Sizi bu'ama 'ink'ez bulhutsinkah hits'u tédulh

³¹ 'Et Sizi bu'ama 'ink'ez bulhutsinkah teh whusahándel koo yoo 'az ts'ih, 'et nahudelhúya hoh koo whez ts'ih khunek hits'o t'adá'ai. ³² Dune 'ilhuhowezdel Sizi hinat delhts'i 'ink'ez 'et 'uhiyúlhni, "Nih'en nyu'ama 'ink'ez nyulhutsinkah ye'at 'az 'uhint'ah 'ink'ez nka' hoodulhukut." ³³ 'Et Sizi ndo búlhni, "Ndan su'ama k'us ndunnah sulhutsinkah?" ³⁴ Ts'iyawh hudelhts'i hubutunúyuz'en 'ink'ez 'utni, "Whunulh'en njan ndunnah, 'en su'ama 'ink'ez sulhutsinkah chah 'uhint'ah. ³⁵ Ndunnah Yak'usda k'úne' 'ut'en unli, 'en sulhutsin, sulhtus, 'ink'ez su'ama 'uhint'ah."

4

Ha'nule bugha whúts'odul'eh

¹ 'Et nule k'ut Galilee huwhútni, 'et doo chah 'ilhuhowezdel Sizi higha wezdel 'ink'ez hubodulh'eh. 'Ilhuhowezdel hulai k'et ts'iyaz bet nat'l'adede. 'Et 'o nus lih dudekelh 'et whuts'un 'ilhuhowezdel taba nahudelhúya hubodulh'eh. ² Lhat hukw'e hubulh nawhulnuk huwa ha hodool'eh 'et wheni. ³ "Soo suzelhts'ai, 'ilhunuh ha'nule, há'unteleh ts'ih whenya. ⁴ 'Et ha'nule hoh bulah ti nanákat. 'I dut'aiyaz whusahándel 'ink'ez ts'iyawh hineldel. ⁵ 'Et bulah tse tah nanákat, 'ankw'us yunyaz hoolah, 'et huwa 'ahoh hanusduki. ⁶ Bughih hoolah 'et huwa hasain'ai hoh ts'iyawh yanúdezi 'ink'ez hoolah suli. ⁷ 'Et bulah chah whus cho taníkat. 'I chah whus cho whutah bulh hananyi bulh lhéwhuntlah 'ink'ez 'aw hachániyel. ⁸ 'Et 'onghah, 'i yun unzoo, 'i k'ut nanákat hoh soo hananyi 'ink'ez bumai bulah tat lanezi (30) bumai suli, bulah lhk'utat lanezi (60) bumai suli, 'ink'ez bulah lanezi lanezi (100) bumai suli." ⁹ 'Et Sizi ndo búlhni, "Ndan budzo hooni, 'en huyoozóhlts'a huba' hoont'ah."

Bugha whúts'odul'eh, 'i di unli ho' 'int'ah?

¹⁰ 'Et Sizi dich'oh 'int'ah hoh bulunah hiyoozáhlts'ai whel'a bulh Sizi higha wézdél 'ink'ez 'uhiyúlhni, "Dája dani, 'et neba hukw'u nuhílhye." ¹¹ Sizi ndo búlhni, "Nts'e na'a 'utenilh Yak'usda budune hik'úne' 'ut'en, k'an whuts'un dune ch'a nonú'i. 'Et k'an ts'iyawh nuhwhuba hahónla t'oonoozhé ka, 'et whunts'ih 'uyoon dune, 'en higha hodool'eh k'una'a zeh hubulh yáhtuk. ¹² 'Et huwa:

'Honilh'en 'et whunts'ih 'aw chahuwhés'en wule.

'Hoozóhlts'ai 'et whunts'ih 'aw t'echahonoosze.

'Et bubeni taóodelts'ut 'ink'ez Yak'usda ts'un nahulhú'a t'eh, 'et bulubeshi buba 'ún yutelhdulh."

Ha'nule bugha whúts'odul'eh, 'et Sizi neba hukw'u nuhúlhne

¹³ 'Et Sizi ndo búlhni, "Ndi bugha hodulhú'eh, 'aw ts'ah'un nichawhah'al t'eh, 'ink'ez 'uyoo bugha hoodelhú'i t'eh, 'et nts'e na'a simba 'oohneh ts'ah'un neooteh'ah?" ¹⁴ 'Et Sizi ndo búlhni, "Ha'nule 'en Yak'usda bughunek 'aínule. ¹⁵ Buluh Yak'usda bughunek ti nanúkat, 'i hidits'o teh, 'et 'ahoh Satan khunek budzi bughu yílhchokw. ¹⁶ Ndi ndai da tse tah 'anelya, ndunnah 'i k'una'a zeh 'uhint'ah. Ndi Yak'usda bughunek hidits'o 'ink'ez soo

'ahoh huhóont'i hoh huyilchchuk. ¹⁷ 'Et whunts'ih dich'oh 'aw bughih hoolah li'hint'ah. 'Et huwa 'astl'iyaz zeh buba 'alha' hooont'ah. 'Ink'ez ndi khunek 'i bugha dzuh nuhudeh 'ink'ez 'onghunnah buch'a hudedni. 'Et huwa 'ahoh ndi khunek hiladutnih. ¹⁸ Ndaí whus tah 'anankat, ndunnah 'i k'una'a zeh 'uhint'ah. ¹⁹ 'En khunek hidits'o, 'et whunts'ih ndi yun k'ut huwu ni udli, ndi yun k'ut soo uzde'a 'uhoont'ah, 'ink'ez ndai ndi yun k'ut huhóont'i tune' hut'en, 'et 'i ts'iyawh whus cho 'i be bulh lhewhullhuk. 'Et huwa 'aw lhadooneh wule ghaít'ah. ²⁰ 'Et bulunah yun unzoo, 'i k'ut nanánkat 'i li'hint'ah. Yak'usda bughunek hidits'o, hiyilchchukw, 'ink'ez budzi yuh nihíyu'aih, 'et bumai whulhlhíh. Bulunah tat lanezi (30), bulunah lhk'utat lanezi (60), 'ink'ez bulunah chah lanezi lanezi (100)."

Too dez'k'un 'i hukw'usu'ai 'i Sizi yughi yailhtuk

²¹ 'O 'un Sizi ndo búlhni, "Too dez'k'un dune dainí'ai 'ink'ez k'its'ai tulih yeyuh niyúte'alh, k'us kw'usuti t'ah tulih niyúte'alh? 'Awundooh! Hukw'usu'ai ba'hoont'ah, 'et hukw'eíte'alh. ²² 'Et huwa ndai whu'iz 'int'ah, 'i ts'iyawh ts'et haóotekulh." ²³ 'Et Sizi ndo búlhni, "Ndan hubudzo hooni, 'en hiyoozólh's'a huba' hooont'ah." ²⁴ 'Et chah ndo búlhni, "Huwahlh 'ink'ez soo cho soo zélh's'ai t'eh, soo bugha hóodolhu'eh whuz na'a Yak'usda 'o 'un chah síh nuhla 'ooneh. ²⁵ Ndunnah sughunek soo cho hiyoozólh's'ai, 'en 'o 'un chah hiyootuzélh's'ilh 'ink'ez higha hódut'eh. 'Et bugha óotet'alh 'ink'ez ndunnah chahiyootuzélh's'ilh, 'en sughunek hidánt's'o 'et whunts'ih hinaoodutelnah."

Haníyeh, 'i bugha whúts'odul'eh

²⁶ 'Et Sizi 'utni, "Nuhwhubulh naóotelhúnuk Yak'usda buk'úne' whut'en, 'et hubugha dune lí'ut'en 'a'nulye, 'i 'ainúle whuz na'a 'int'ah. ²⁷ 'Et hukw'elh'az 'ulh'ek usti 'ink'ez dzenis 'et n'awh ne'út'en, 'et nduhoolyez hoh 'ainanla, 'i buk'unónultah 'ink'ez haníyeh 'et whunts'ih 'aw t'eeonízun dat'en hoh hanúlhyih. ²⁸ 'Et yun 'i bugha hanúlhyih 'ink'ez bumai whulhlhíh. 'Udechoo yun yuh hanúduki, 'et nuyeh 'ink'ez dinyez 'ulhíh teh bumai whulhlhíh. ²⁹ 'Et bumai nut'ih teh, 'et dune tl'o be dut'as 'i be yut'us 'aw 'et há' nukat newhúninzut 'et huwa."

Haníyeh, 'i Mustard hiyúlhni, 'i bugha whúts'odul'eh

³⁰ 'Et Sizi 'utni, "Daja uzduteníh Yak'usda buk'úne' whut'en, 'et hukw'u nuts'úhulhye higha hódool'eh 'i buk'únats'otelnu'k? ³¹ Degha nus 'anulye, 'i nintsool, 'i mustard hiyúlhni. 'I dune yilchchuk 'ink'ez yun 'ainulíh. ³² 'Et hanúlhyih teh, 'ink'ez soo k'enulhyi, 'i ts'iyawh 'ut'an hanúlhyih degha nus 'udelcho 'ulhíh. 'Et huwa buzooschum díntcha hoh lh's'enunúlhye, 'et dut'aiyaz yutah 'ut'o nilíh." ³³ Lhat higha hódool'eh ka hubulh yáhtuk dáhooolcho 'i be t'ehontezeh, 'et zeh hukw'u hubulh náwhulnu'k. ³⁴ Higha hódool'eh, 'i be zeh hubulh yáhtuk, 'et whunts'ih dich'oh 'úhint'ah teh, yugha hoodul'eh, 'en soo cho huba hukw'ú nuhúlhye.

Nilhtsi cho 'ink'ez tatsi cho, 'i Sizi yuk'úne'ut'en

³⁵ 'Et hulgha Sizi yugha hoodul'eh, 'en ndó bulhni, "Nyan tadatus ts'ih uztóoke." ³⁶ 'Et 'ilhohuwezdel buch'a nahusdel, yugha hoodul'eh ts'i be hándel, Sizi 'uda ye usda, 'i be nyan hutezki, 'uyoo ts'iyaz chah hubulh tezkát. ³⁷ Khunyaz nilhtsi 'i ulhtus tezt's'i hoh tatsi díntcha k'et ts'i be tadutih 'ink'ez 'ankw'us too be whendunimbun. ³⁸ 'Et Sizi ts'i niz ts'ih 'et ts'i'alh k'ut tsilhu'al 'ink'ez nanésti. 'Et yugha hoodul'eh ts'ih nahiníh'dzut 'ink'ez 'uhíyúlhni, "Nehodulh'eh, 'aw 'et yats'utedlah! 'Aw ih neghu ni cháínlah?" ³⁹ Sizi didinya hoh too k'ut nilhtsi khunek ulhtus, 'i be hukwa' yudáni, "Nilhts'i, 'ust'l'e' íneh," 'ink'ez, "Tatsi nughuzina," 'ink'ez 'Aw 'et dóngheh. ⁴⁰ 'Et Sizi yugha hoodul'eh ndo búlhni, "Dahoont'ah huwa stabe whenlhujut, 'aw ih bé 'alha' hooont'ah, 'i chaht'ih hoh 'aht'ah?" ⁴¹ 'Et tube whehunelhújoot 'ink'ez 'ulhóodutni, "Dant'ah dune unli ho' 'int'ah? Nilhts'i 'ink'ez tatsi bulh 'i nts'ih yuk'úne' 'ut'en."

5

Dune ntsi' nudúdeh, 'i buyidélhts'i Sizi soo ná'yinla

¹ 'Et bun k'ut nyan nahuninki whuz Gadarene whut'en hubukeyah 'et 'uhoont'ah. ² Soo Sizi ts'i bé háinya íbulh 'ilhunuh dune tse bet dune 'adinla whuz de háinya. ³ Ndun dune tel'en ntsi' nudúdeh, 'i buyudínda 'ink'ez ts'un k'ut 'et whut'i. 'Aw dune tse tl'oolh be whunts'ih whehídoohl'tuk ghaít'ah. ⁴ Lhat hoh bula 'ink'ez buke bulh hiyulghel 'et whunts'ih hoh totsuk tse tl'oolh k'unuyéyuz 'ink'ez tse tl'oolh buke be lhulhú'oo, 'i chah yayal'us. Ulhtus k'et 'aw dune hich'a 'oolhdeh ghaít'ah. ⁵ Dzin 'ink'ez 'ulh'ek 'i bulh ts'un k'ut whatah 'ink'ez nódest'ai, hoh nuya hoh 'alzul 'ink'ez tse be bubut na'dudut'as. ⁶ Dzuh nilhdza, 'et yughu siyin hoh Sizi yutel'h'en. 'Aho' yuts'u téh'gai 'ink'ez dugwutsi be yubut nachánetno, ⁷ 'ink'ez soo 'ultus 'alzul hoh 'utni, "Sizi degha nus Yak'usda buYe' ndet suts'o húkwa' nínzun. Yak'usda 'en be suts'un nahútanyelh dzuh nusíh'dzut ílah." ⁸ 'Et ndutni hoh Sizi ndi yulhni ntsi' nudúdeh, 'i ndun dune buyáh hanáindaih. ⁹ 'Et Sizi yoodulh'kut, "Ndaí nyoozi?" yúlhni. 'Et 'utni, "Legion, 'i soozí 'int'ah. 'I lhanah nehughan 'uts'int'ah ni

hoh 'utni." ¹⁰ 'Et ntsi' nudúdeh, 'i Sizi soo yuts'u tédudlih, "Njan keyah whuch'a netolh'a gunih," yúlhni. ¹¹ Dzulh yeghah 'et goso lhai 'et 'ahú'alh. ¹² 'Et ntsi' nududeh, 'i Sizi ts'un tehududleh ndunnah n'ún goso 'en buts'un neítelh'alh, 'et t'eh buyúzdooodeh. ¹³ 'Et huwa 'ahoh Sizi hubutl'ahó'ai ntsi' nudúdeh, 'i dune yuts'ah hanádeh 'ink'ez goso 'i yeyúdande. Goso 'ankw'us 2,000 'int'ah, 'i ts'iyawh wheghálghaz 'ink'ez too yanghan. ¹⁴ 'Et ndunnah goso ghuhinli whuhélgahz 'ink'ez keyah whutah khunek nihuni'ai. 'Et lhanah whusaíndel dáhojja hontelh'ilh ka. ¹⁵ 'Et Sizi highu nindel 'ink'ez dune hinilh'en ntsi' nudúdeh, 'i buyudelhts'i inle, 'et hukw'usda beni bughá nádelts'ut 'ink'ez soo dint'ah chah 'int'ah. Huba hooncha k'et tube whéhunelhújoot. ¹⁶ 'Et ndunnah ho'en, 'en dune hubadáni ndun dune ntsi' nudúdeh, 'i buyudéhts'i inle, dája 'ink'ez goso bughá chah. ¹⁷ 'Et Sizi highut tedudlih hubukeyah whuch'a naóoja ka. ¹⁸ 'Et Sizi ts'i be nádaih, 'et ndun dune ndun ntsi' nudúdeh, 'i buyudéhts'i inle, 'en Sizi yuts'u tédudlih, "Nyulh 'óosneh," yúlhni. ¹⁹ 'Et Sizi, "Awundooh," yúlhni 'ink'ez ndi yúlhni, "Nkoo ts'un naíndalh 'ink'ez nyulh 'uhut'en teh hubudóni dálhcho 'i be nyuMoodihts' nts'un budzi únzoo 'ink'ez dálhcho 'i be nla 'uja." ²⁰ 'Et ndun dune whenája 'ink'ez lanezi keyah 'et whutah lhuséya Sizi dáiyinla hoh yula 'uja 'et ndo búlhni. 'Et ndan yudants'o ts'iyawh huba hooncha.

Sizi, 'en Jairus butse' dinaidilhti 'ink'ez ts'eke, 'en Sizi yunaih t'agheznai

²¹ 'Et Sizi nyan tadatus ts'ih whenahedúki 'ink'ez bun k'ut whuzih lhanah dune higha wezdel. ²² 'Et Lizwif hubuluglez whumoodih Jairus hiyúlhni, 'en yughu ninya 'et Sizi yutelh'en hoh yubut nacháneti. ²³ 'Ink'ez tube cho yuts'un tédudlih, "Sustse'yaz 'aw 'et datétsah, sulh naínt'us 'ink'ez buk'edólnih sih soo ná'ootneh 'ink'ez khoona sih." ²⁴ 'Aw 'et Sizi yulh nánt'az. 'Et whuz lhanah dune yulh tezdel k'et lhts'un na'a hiyúlh lgha dindel. ²⁵ 'Ilnuh ts'eke tube dzuh nuzut, lanezi 'o 'at nat naooduzuk (12) 'et nduhóolhyez hoh 'uskai 'uyulh'en, ²⁶ yoo be dúyún lhanah chah hukwa' hiyalh'en. Duzooneya ts'iyawh hoolah yulhtsi 'et whunts'ih 'aw nus zeh lhe'enilh. ²⁷ 'Et Sizi yulh údants'o 'et huwa dune tah Sizi yut'ak ts'ih yugha ninya 'ink'ez bunaih yut'agheznai. ²⁸ Dich'oh 'et nduninzun, "Ants'ih bunaih 'i teh but'aghenai t'eh, 'et sih soo ná'ootneh." ²⁹ 'Et Sizi yunaih 'i yut'agheznai ibulh 'et 'ahoh 'uskai 'iyulh'en 'ustl'e' 'uja 'ink'ez 'ahoh t'éoonanzin dzuh nuzut soo ná'uja. ³⁰ 'Et 'ahoh Sizi t'éoonanzin ye úlhtus ye dune la'ut'en, 'i bulah buts'ah haidéts'ut. 'Et 'ilhuhowezdel hubuts'un nalhú'a 'ink'ez 'utni, "Ndan hoh 'uja sunaih yut'agheznai?" ³¹ 'Ink'ez yugha hoodulh'eh hiyúlhni, "Dadíni ho' dini? Lhe'uneltsuk 'ilhohuwezdel lhanah hoh nyan do hahúneldo 'ink'ez, 'Ndan 'uja sunaih yut'agheznai dini?" ³² 'Et whunts'ih Sizi ndan 'uja yukiyú'en. ³³ 'Et ndun ts'eke dája soo ná'uja t'éoonanzin hoh butaháinya whenuljut k'et duldz 'ink'ez Sizi yubut nacháneti. Khunek 'alha' 'int'ah, 'i be ts'iyawh yulh náwhelnuk. ³⁴ Sizi ndi yúlhni, "Sutse' be 'alha' hoont'ah, 'i yint'i, 'et huwa soo ná'inja. Ndzi hóont'i hoh natonja 'ink'ez ndai be dzuh ninzut, 'i buch'a soo ná'ontneh." ³⁵ 'Et 'awhuz Sizi naheyelh hoh, khunek na'á Jairus bukoo ts'ih hahánde 'uhiyúlhni, "Ntse'yaz dazsai, ndun dune hoodulh'eh di ka 'o 'un bughá tédindlih?" ³⁶ 'Et Sizi whulh 'udufts'ai ibulh dája hutni ndun luglez whumoodih ndi yúlhni, "Aw whéchanuzíljut hoh ma 'alha' hot'e." ³⁷ 'Aw 'uyoon dune duntoodelh gunih, ndunnah Peter, James, 'ink'ez bulhutsin John chah, 'aw 'en zeh hiyulh tezdel. ³⁸ 'Aw 'et Lizwif luglez whumoodih bukoo ts'ih hunindel, 'et Sizi whunilh'en ndulhcho tahudetnik 'ink'ez tso yahalhtuk. ³⁹ Sizi koo danínya 'ink'ez ndo búlhni, "Di ka sdabe tadétnik 'ink'ez ahtso? Ndun 'uski 'aw dáchaisal, 'ants'ih usti ho' 'int'ah." ⁴⁰ 'Aw 'et ts'iyawh highudloh. 'Et ts'iyawh tinaóobunilh'a. 'Uski bu'abá 'ink'ez bu'ama bulh hubílhchoot, yugha hoodulh'eh tanah chah 'ink'ez 'uski sulhti ts'un dahunindel. ⁴¹ 'Et ts'ekeyaz yula ílhchoot 'ink'ez ndi yúlhni, "Talitha koui," 'et dakelh k'una'a, "Ts'ekeyaz dinadindaih nyudúdni," ni hoh 'utni. ⁴² 'Et 'ahoh dinadíja 'ink'ez nádínya. Ndun ts'ekeyaz lanezi 'o 'at nat be naoodezulh (12) 'et ndúhojja hoh soo ts'ah'un buba hooncha. ⁴³ Sizi soo khunek ulhtus, 'i be ndo búlhni, "Et dune ndo budóohtni gunih, 'ink'ez hoonliyaz yute'alh, 'i bughá yóoh'alh."

6

Sizi, ndunnah Nazareth whut'en, 'en ch'a hínesjoot

¹ 'Et Sizi 'ut'en inle 'et whuch'a nanja 'ink'ez dukeyah ts'ih whenája. Yugha hoodulh'eh chah hiyulh whenel. ² Nahulyis dzin 'et Lizwif hubuluglez whubodulh'eh hoh lhanah dune 'et hudelhts'i hidánts'o tube huba hooncha 'ink'ez 'uhútni, "Ndun dune nts'ez de hahónla hoh 'utni? Ndi be ts'uwuhunih, 'i be nts'ez de hahónla hoh 'utni? 'Et nts'e na'a 'ut'en sdabe hooncha huwa 'ut'en tuné'ut'en?" ³ Koo 'uwuhulh'en, 'en ilah ih 'int'ah? Mary buye' 'ink'ez bulhutsinkah chah James, Joses, Judas, Simon, 'ink'ez budestl'ahkah chah 'en ts'iyawh njan huwhut'i?" 'Et hits'a desnih. ⁴ 'Et Sizi ndo búlhni, "K'us ndan Yak'usda be nus whúnilh'en yalhtuk teh ndulhcho hoh hidelhti, 'et whunts'ih bukeyah whut'en,

bulhtuskah, 'ink'ez bukoo huhuwhut'i chah, 'en zeh chahidílti." ⁵ 'Et huwa nyoh 'et Sizi 'aw huwa 'oot'en tune 'óot'en ghaít'ah, 'et whunts'ih bulunah nduda, 'en zeh buk'edilnih hoh soo ná'bulh'ih. ⁶ 'Et ndunnah 'aw be 'alha' hoon't'ah, 'i chahiyít'ih, 'et Sizi buba hooncha. 'Ink'ez whunat keyah hoh neya 'ink'ez dune hubodulh'eh.

Yugha hoodul'eh lanezi 'o 'at nanah (12), 'en Sizi whébalh'a

⁷ 'Aw 'et ndunnah lanezi 'o 'at nanah, "Anih," hubudáni* 'ink'ez nanah hinli hoh lhelhts'un whebalh'a. 'Ink'ez hiye últus, 'i hubugha iní'ai ntsi' nudúdeh, 'i dune yudúts'i 'i hits'ah hanáhinoooyoot ka. ⁸ 'Ink'ez khunek ulhtus, 'i hubutl'aida'ai, "Teh'us ts'ih hoonliyaz teh whutoohla gunih! Teh'alh, 'i chah, ézdlai, 'i chah, k'us sooneya teh bulh sudoolhú'oo gunih! Tuz 'i zeh dutóohtan. ⁹ Nuhkesgwut, 'i 'ink'ez dzoozt'an 'ilhuk'i be súhke, 'i zeh be 'óohneh." ¹⁰ 'Et 'udun chah ndo búlhni, "Keyah lhghadah'az t'eh dune bukoo danah honilhti t'eh, 'et bukoo 'et wahke 'uts'un keyah ts'ih téh'us whuts'un. ¹¹ 'Et keyah nenáh'az 'ink'ez dune 'aw hachanwhuhílh'al t'eh, k'us chanuwuhudúts'uk t'eh huwu nátoóht'as 'ink'ez whulez ch'a nuhke nadoghghat. 'Et dahúja t'ehonoozeh. Ts'ah'un nuhwuhudútsi Sodom 'ink'ez Gomorrah whut'en sdabe hintsi'. 'Udék'elh'az dzin t'eh hiyé dzuh nutézut, ndunnah keyah whut'en, 'en 'o nus ba dzuh nahutezut ho' hoon't'ah." ¹² 'Aw 'et whehándel 'ink'ez dune Yak'usda bughunek be hubulh yahúltuk, "Nuhwhulubeshi ch'a lht'ananoohdelh," hubuhútni. ¹³ Lhanah ntsi' nudúdeh, 'i hubugha delhts'i hubugha whenabunanyoot 'ink'ez dune lhanah nduda khe be hubuhulho hoh soo ná'bulhalh'en.

John dune too be 'ulh'en, 'en hizelghhi

¹⁴ 'Aw 'et hubudayi cho Herod hiyúlhni yulh údants'o Sizi dulhcho hoh búlh khunek bughidenzut. 'Ink'ez 'utni, "John dune too be 'ulh'en 'ut'en. Dazsai inle 'ink'ez nakhítna, 'et huwa Yak'usda ye ulhtus, 'i buyidi'ai hoh 'út'en whunul'en teh ne'út'en." ¹⁵ 'Et bulunah chah, "Elijah 'ut'en," hutni. 'Et 'uyoon chah 'uhutni, "Uda hukw'u na'a Yak'usda be nus whunil'h'en 'ut'en," hutni. ¹⁶ 'Et hubudayi cho Herod whulh 'údants'o hoh 't' utni, "John dune too be 'ulh'en 'ut'en. Butsi suba k'uhinentsel inle da, 'et whunts'ih nakhítna," ni. ¹⁷ Herod dich'oh John dune too be 'ulh'en 'ahiyoo'alh huwá bulh'a inle. Hiyulhghel 'ink'ez tsak'ehíya'ai. Ndon ts'eke Herodias hiyúlhni, 'en yughusda. 'En gha 'uyílna inle. Dulhutsin Philip bu'at 'en lhch'a bunenjoót, 'et whunts'ih yughusda. ¹⁸ John dune too be 'ulh'en Herod yudani, "Yak'usda bughunek k'uninyuz ho' 'int'ah nyulhutsin bu'at zih silda." ¹⁹ 'Et huwa bu'at Herodias, 'en John dune too be 'ulh'en yuts'u dutnik 'ink'ez yuzoolghelhel hukwa'ninzun. 'Et whunts'ih Herod, 'en bugha 'aw yuzoolghelhel ghaít'ah. ²⁰ 'Et Herod 'en chah John dune too be 'ulh'en yé nuljut, t'eeonínzun John dune too be 'ulh'en, ts'ah'un dune unli, 'ink'ez Yak'usda budune 'int'ah. 'Et huwa yugha 'óoli. John whulat tune 'út'en, 'et huwa hóont'i hoh yoozéltsh'ái. ²¹ 'Et 'ilhudzin Herodias bughá whulst'ut Herod whuzdli dzin 'et dune dézti 'ink'ez nehugan moodih chah 'ink'ez Galílee whut'en moodih tubulh, ts'iyawh bughu nuséya. ²² Herodias butse' danínya 'ink'ez huba nedak. Herod 'ink'ez hubugha nusja tubulh huba hoonzoo. 'Et hubudayi cho Herod ndun ts'eke ndi yúlhni, "Ndai suts'un buka' dini, 'i n'gha tesdlelh," yúlhni. ²³ Lhat yuts'u náhezya hoh ndi yúlhni, "Ndai suts'un buka' dini, 'i n'gha tesdlelh, ndai hubudayi cho be usdli, 'i lhulcho 'i whunts'ih n'gha tesdlelh," yúlhni. ²⁴ 'Et ndun ts'ekeyaz 'az whenája 'ink'ez bu'ama 'en yoodalhhut, "Ndai simba butsu' hukwa' doosni?" yúlhni, "John dune too be 'ulh'en butsi," yúlhni, bu'ama. ²⁵ 'Et ts'ekeyaz 'ahoh hubudayi cho yuts'un lhgha nadija 'ink'ez ndi yúlhni, "John dune too be 'ulh'en butsi k'an 'ahoh tssets'ai be sugha ninínkaih," yúlhni. ²⁶ 'Et hubudayi cho 'ahoh ni sulí 'et whunts'ih 'aw yuch'a 'uts'un 'udooni ghaít'ah, bughu nusja 'en hubunalh yuts'u náhezya 'et huwa. ²⁷ 'Et 'ahoh 'ilhunuh huwuhinli, 'adinla delhts'i ts'ih wheyálh'a, John dune too be 'ulh'en butsi whusaínoo'alh wheni. Huwuhinli 'en 'adinla delhts'i ts'ih whénya 'ink'ez John dune too be 'ulh'en yutsi k'éninentsel. ²⁸ Tssets'ai bé na'ai 'ink'ez ts'ekeyaz yutl'ayánkai. 'En be'ama yutl'ayánkai. ²⁹ 'Et John dune too be 'ulh'en yugha hoodul'eh hiyulh 'údants'o, buyust'e hikunasdel 'ink'ez whuyihyalhti.

5,000 dune Sizi hiyoo'alh, 'i hubugha inílna

³⁰ 'Aw 'et ndunnah whel'a whusanáhedel 'ink'ez Sizi ts'un 'ilhuhowezdel 'et 'uhidáni nts'oh tuné'hust'en 'ink'ez ndet dune whéobuhodalh'i. ³¹ Lhanah dune whusahúdulh 'ink'ez whenáhudelh, 'et huwa Sizi 'ink'ez yugha hoodul'eh tubulh 'uhúte'alh 'et whunts'ih búgha chawhulhts'it, 'et ndo búlhni, "Uts'un uztoodelh nts'e whenich'oh úztet'ilh, 'et 'astl'iyaz naoolhuyis." ³² 'Aw 'et nus ts'i be hutezki, dune hoolah ts'ih whuz nehúninki. ³³ 'Et whunts'ih lhanah dune huba'en hutezki hoh 'ink'ez 'ahoh t'ehonínzun ndun 'int'ah, 'et huwa keyah totsuk whut'en lhanah helwus. Sizi 'ink'ez yugha hoodul'eh tubulh butsuh 'et whuz lhgha hadílg haz. ³⁴ 'Et Sizi ts'i be hainya lhanah 'ilhuhowezdel 'et

* 6:7 Ndunnah whel'a 'uhint'ah.

hubunilh'en, tube hubugha té'nanzin 'ants'ih sheeppaz bughu chaídlah lí'hint'ah. 'Et lhat 'et whubuwhéodunilh'i. ³⁵ 'Aw 'et ye 'ún whezulh hoh yugha hoodul'eh highu nindel 'ink'ez 'uhíyúlhni, "Aw 'et tube ye 'ún whezulh 'ink'ez njan dune hoolah chah 'uhoont'ah. ³⁶ Ndunnah dune ts'iyawh n'awh keyah ts'ih nabalh'alh 'ink'ez 'i ts'uyi, 'i náhiyoododuket hiyoo'alh wheni, ndunnah 'aw hiyoo'alh hoolah 'et huwa." ³⁷ 'Et Sizi ndo búlhni, "Nuhwhenich'oh hie't'ulh, 'i hubugha ínah'ai daja." 'Et hiyoodulh'kut, "Whuz uztedulh hukwa' ninzun 'ink'ez \$200.00 k'ah ts'uyi, 'i ts'onket 'ink'ez ih hubugha ízte'alh?" ³⁸ 'Et whunts'ih Sizi huboodulh'kut, "Lhes dáltsuk aht'i 'et whunulh'en." 'Et nahuhoon'ai hoh 'et 'uhíyúlhni, "Skwunlai lhes 'ink'ez nankoh lhook chah." ³⁹ Sizi 'et yugha hoodul'eh ndo búlhni, "Ts'iyawh dune lhelhdun nibunahle 'ink'ez t'l'oyaz k'ut hudoólt's'i." ⁴⁰ 'Aw 'et dune nátl'ahudelts'i t'l'oyaz k'ut lanezi lanezi (100) 'ink'ez skwunlai lanezi (50) hoh lhanooowh teh lhuhsudúguz. ⁴¹ 'Aw 'et Sizi nyoo lhes 'ink'ez lhook bulh yílhchoot, ndoh yak'uz ts'ih yuta'en 'ink'ez, "Suchanailya," ni hoh tenadedli. 'Et lhes taidalh'kut hoh yugha hoodul'eh hubutunyooole ka butl'ayánla. 'Et nankoh lhook chah 'et ndúyínla hoh butainínla. ⁴² Ts'iyawh 'uha'al 'ink'ez 'uhunesdai. ⁴³ 'Et yugha hoodul'eh lanezi 'o 'at nankoh (12) k'its'ai dezbun, 'i lhook 'ink'ez lhes bulh 'et ninínkat, 'i 'ilhunahíghezdlá. ⁴⁴ 5,000 dune, 'en ndi lhes hiya'al.

Sizi too k'ut nuya

⁴⁵ 'AhoH Sizi yugha hoodul'eh ts'i be naóobalh'a 'ink'ez Bethsaida huwhútni keyah whuz dutsuh whebalh'a nyan tadatus ts'ih whuz'ai. 'Et didut ndunnah 'ilhuhowezdel whenaóobalh'a. ⁴⁶ 'Et whenáhedel hoh tenadutedli ka 'aw 'et buch'a násja 'ink'ez dzulh k'uz ts'ih whénya. ⁴⁷ 'Aw 'et húlhgha suli 'et nyoo ts'i be k'an zeh taniz hekelh 'ink'ez Sizi 'en dich'oh 'awhuz nyoh yun k'ut 'int'ah. ⁴⁸ Yugha hoodul'eh hubunilh'en nilhts'i 'i yenah hekelh, tube hunint'uk, 'aw 'uhoot'o chah ghaít'ah. 'Et bundada haotelh'en, 'et Sizi too k'ut uyalh hoh nus whuz hubughu ninya hube ghoótéyálh inle. ⁴⁹ 'Et whunts'i hitelh'en too k'ut uyalh hoh, "Dune tsen 'ut'en," huninzun. Tube whéhunelhújoot 'ink'ez 'uhúldzul. ⁵⁰ 'Et Sizi 'ahoh ndo búlhni, "Nuhdzi ulhtus úlhtsi! Si 'ust'en. Whenuhújoot ílah." ⁵¹ 'Et ts'i bet hubughu dénya. 'Aw 'et nilhts'i chah 'ilhuz ninints'i, 'ink'ez yugha hoodul'eh tube buba hooncha. ⁵² Whutsuh whudelhdzulh lhes dáyinla 'et 'aw ts'ah'un nechahohoo'al, 'et huwa njan lhes bugha dahóoja hubeni taóodoolts'it ghaít'ah.

Gennesaret whut'en hunduda, Sizi soo ná'bulh'en

⁵³ 'Aw 'et nyan bun k'ut yahúnik'i 'ink'ez keyah Gennesaret huwhútni, 'et ts'i whehídinguz. ⁵⁴ Ts'i bez hahándel 'aw 'et Sizi 'en nahuyoolhúts'it. ⁵⁵ 'Et huwa ndulhcho nahulhúghaz 'ink'ez nts'oh Sizi usda hiyulh 'údits'o hoh, nduda hik'usútez 'i be hits'ú butule. ⁵⁶ 'Ink'ez nts'oh Sizi nuya keyah whuyaz k'us keyah whuti k'us khunai nuyéh 'e'óoket whutah dune 'ilhodulh whuz nduda nébuhunle 'ink'ez Sizi híghu tédudlih, "Nyunaih 'ants'ih buk'abah 'et hunduda 'en hit'aóonalh," hiyúlhni. 'Et ndunnah yut'agheznai, ts'iyawh soo ná'huja.

7

Sizi, 'en Lizwif butsuh whudelhdzulh wheóobuhodalh'i, ndai dune buts'u haídults'it, 'i bugha lubeshi hihlchokw.

¹ 'Aw 'et Pharisee 'ink'ez Moses be' dustl'us 'uk'ununa'úsduguz tubulh Jerusalem ts'ih huhándel 'en Sizi higha wézel. ² 'Et hubunilh'en bulunah Sizi yugha hoodul'eh dula tsun bulh 'uha'alh. 'Uda Pharisee, 'en 'et, "Me" huwhútni inle 'et buts'ú hahuhó'ai. ³ Pharisee 'ink'ez 'o 'awh Lizwif ts'iyawh butsuh whudelhdzulh whebuhodalh'i whuz na'a 'uhint'ah soo ts'ah'un na'a dula toonáhugus k'ez 'uhá'alh. ⁴ 'Ooket bukok ts'ih hanahudulh teh la'huldoh 'et k'an zeh 'uha'alh. Lhat huba hoosdzi teh né'hut'en, dulubot, hube 'oosa, 'ink'ez 'uyoo hiyé ne'ut'en, 'i chah, hubukw'usti chah, soo buba'hoont'ah k'una'a zeh toonahiyugus. ⁵ 'Et huwa Pharisee 'ink'ez Moses be' dustl'us 'uk'ununa'úsduguz Sizi hiyoodulh'kut, "Et dáhoont'ah huwa ngeha hoodul'eh netsuh whudelhdzulh whuneodalh'i k'una'a cha'hust'en 'ink'ez hubula toonáchahugus hoh 'uha'alh?" ⁶ 'Et Sizi ndo búlhni, "Nuhwheni duba nahdzoo! 'Alha zeh Isaiáh nuhwhugha nus whunilh'en 'uk'e'ánguz inle hoh njan ndutni, 'Ndunnah bughunek be suba hodelhti, 'et whunts'ih 'aw budzi yuh hoh buba 'alha' cha'úst'ah.

⁷ Suts'un téni hunilhdzun doo ka 'uhutni,

ndi yun k'ut dune nihini'ai, 'i Yak'usda bughunek hiyílh'i hoh dune whubuhodulh'eh."

⁸ 'Et Sizi 'utni, "Yak'usda bughunek nuhtl'aída'ai, 'i 'aw chaoozulhts'ai 'ink'ez yinkak dune whubuhodalh'i, 'i zeh buh'úne 'uht'en, tsets'ai, lubot, 'ink'ez 'uyoo hiyé ne'ut'en, 'i tóonahugus hoh ndúhoont'ah, 'et zeh dune whubodulh'eh." ⁹ 'Et 'o 'un chah Sizi 'utni, "Tube 'uyoo ahli! Yak'usda bughunek nuhtl'aída'ai 'i buladehtnik, 'ink'ez nuhwhenich'oh be dune hoodulh'eh, 'i zeh nuht'uk hoh whubodulh'eh. ¹⁰ 'Et Moses be' dustl'us 'uk'une'uzguz, 'i njan ndutni, 'Nye'abá 'ink'ez nye'ama bulh hubudólhti," 'ink'ez 'Ndan bu'ama k'us bu'abá

dzuh ts'ih bughu yatelhtuk, 'en daóotsah huba' hooht'ah.' ¹¹ 'Et whunts'ih ndan be'ama 'ink'ez be'abá chah ye yula tet'ilh, 'i dune yit'i t'eh 'ink'ez 'i 'Corban 'uhoont'ah' ní t'eh, (ndi 'Corban' Lizwif bughunek 'et dakelh k'una'a 'Yak'usda be'ilhdzun' ni hoh 'utni), ¹² 'et hoh 'aw be'ama 'ink'ez be'abá bulh hubula 'oot'en whuch'a hobodelh'i ho' dahni. ¹³ 'Et njan huwa Yak'usda bughunek 'aw chaoózúlhts'ai 'ink'ez buk'únucha'zah't'en. Whuz na'a dune whúbunulhtun lhat hoh 'udun chah nuhwhenich'oh nuhk'una'a hoh, whuz na'a wheoobunulhtun."

Nts'e na'a lubeshi ts'ilhchuk

¹⁴ 'Et 'ilhuhowezdel Sizi doo chah, "Anih! Soo zélhts'ai ts'iyannah 'ink'ez nuwheni taoodóolts'it," hubúlhni. ¹⁵ "Ndaí dune hiyillhchuk, 'i 'aw bugha lubeshi ólhchoot ghaít'ah, 'et whunts'ih ndai dune butsu'u haídults'it, 'i bugha lubeshi hihlchokw. ¹⁶ Ndan hubudzo hooni, 'en hiyoózólhts'a huba' hooht'ah." ¹⁷ 'Ilhuhowezdel 'et hubutahanája 'ink'ez koo danánja hoh yugha hoodul'eh ndi higha hódul'eh yé yaílhtuk, 'et hukwa hiyoodulhuk. ¹⁸ 'Et ndo búlhni, "Nuhwheni chah ih nuhwheni hoolah? 'Aw nuwheni taóodulhts'it hoh ndai dune yu'alh, 'i bugha lubeshi wulhchoot ghaít'ah. ¹⁹ 'Aw budzi be chayuskat, bubut zeh be yúkat 'ink'ez buyust'e ts'ih hanaidukat, 'et whuz na'a untsi', 'i neyust'e ts'uh hanádukat." ²⁰ 'Ink'ez ndo búlhni, "Ndaí dune budzi yuh whuts'ahaidults'it, 'i bugha lubeshi ts'ilhchokw. ²¹ 'Et dune budzi yuh ts'ih whuz de 'ut'en untsi' butsu'uhaidukat, 'et huwa 'uyoon dune bu'at bulh lubeshi hihlchokw, dune ts'eke bulh tinta' 'ut'ih, nehughan chah, ²² 'uhundunut'ih chah, 'uyoon be'ilhdzun ka' huninzun, hoohtsi' k'una'a túne' hut'en, dune nahuna'ah chah 'uhut'en, yooyá chailah, 'uhoolnih chah, Yak'usda ch'a yahalhtuk, 'uhudelhúti, 'ink'ez yílah tune' hut'en. ²³ 'I ts'iyawh ndi dune budzi yuh ts'ih hadúts'it, 'i bugha lubeshi hihlchokw."

Ndan 'udun yun k'ut whut'en ts'eke, 'en buba 'alha' hooht'ah

²⁴ 'Et Sizi whenája hoh Tyre 'ink'ez Sidon keyah 'et whunat whuz lhghu nadija. 'Et 'ilhunuh koo danánja 'ink'ez 'et usda 'uyoon t'ehonóiz hukwa cha'nízun, 'et whunts'ih 'aw buch'a ntool'ih ghaít'ah. ²⁵ 'Ilhunuh ts'eke buyats'e ntsi' nudúdeh, 'i buyidánda, Sizi yulh údits'o hoh yughu ninya 'ink'ez yubut nachánetno. ²⁶ Ndan ts'eke nts'iz de haínja 'ink'ez 'en Greek buk'una'a yalhtuk 'ink'ez Phonecia, Syria whuz'ai, 'et whuzdli 'int'ah. 'En Sizi yughu tédudlih hoh ndi yúlhni, "Ntsi' nudúdeh, 'i suyats'e butsu'uhanaónyoot." ²⁷ 'Et whunts'ih Sizi ts'eke ndi yúlhni, "Uskeh, 'en choo hububé' ts'oolh'alh. 'Aw ts'ah'un cha'hóot'ah 'uskeh hiya'alh, 'i ts'ilhchoot 'ink'ez lhiyazkah hubugha ts'iyoo'alh ghaít'ah." ²⁸ 'Et ts'eke 'uyúlhni, "Moodihti, 'alha' dini, 'et whunts'ih whulutah teh lhiyazkah 'en whunts'ih kw'uzdai t'ah yun nakat, 'i 'uskeh yugha' wéz'al, 'i hiya'alh." ²⁹ 'Et Sizi ndi yúlhni, "Et ndedénja 'et huwa nkoo ts'ih naíndalh, ntsi' nudúdeh, 'i nyats'e buyuh hánaidede." ³⁰ 'Et koo ts'ih whenája 'ink'ez buyats'e kw'usuti k'ut usti ntsi' nudúdeh, 'i buyah hanaidede."

Dune cha'dústs'uk 'ink'ez yachalhtuk cha' 'int'ah, 'en Sizi soo ná'yinla

³¹ Doo cha zeh Sizi 'en Tyre 'ink'ez Sidon keyah hoh wheghah lhuséya, 'Et Decapolis keyah whutah lhuséya 'ink'ez Galilee Bun k'ut whuz ninya. ³² 'Ilhunuh dune cha'dústs'uk 'ink'ez yachalhtuk cha' 'int'ah, 'en Sizi highu nihinílhya 'ink'ez Sizi highu tédudlih yuk'édoolnih ka. ³³ 'Et Sizi bughah 'udunyaz nínilhya hoh yudze 'alhge, 'ink'ez 'ún whenzo, 'ink'ez dune yutsoola yut'agheznai. ³⁴ Sizi nduk yak'uz ts'ih yutá'en, telhayiz 'ink'ez dune 'uyúlhni, "Ephphatha!" Ndi Lizwif bughunek 'et "Mba dá' dutoolts'it," ni hoh 'utni. ³⁵ 'Et 'ahoh dune 'udits'o nasdli 'ink'ez soo yálhtuk chah nasdli. ³⁶ 'Et ndo búlhni, "Khun teh dune dóohnti gunih!" 'Aw 'et, "Dah" ndo búlhni, 'et whunts'ih 'o nus huwu yahulhtuk. ³⁷ 'Ink'ez ndan hubodits'o ts'iyawh huba hooncha, "Sóo 'usdla ts'iyantsuk né'whul'en, cha'hudústs'uk 'uhudits'o 'ink'ez yachahúlhtuk chah yahulhtuk hubulhtsi," hutni.

8

Sizi 4,000 bughá' ni'ai

¹ 'Aw sa ilah hukw'elh'az doo chah zeh dune lhanah 'ilhuhowezdel 'aw 'et 'uhute'alh, 'i hoolah suli hoh Sizi yugha hoodul'eh, "Anih," hubudáni 'ink'ez ndo búlhni, ² "Ndunnah dune hubugha te'nuszun. 'Aw 'et tat dzin sulh 'úhet'en 'ink'ez hiyoo'alh, 'i hoolah. ³ 'Et nduhint'ah bukoo ts'ih whenábalh'a t'eh nahedulh hoh bukaootodeh. Bulunah tube nilhdza ts'ih hahánde'l 'et huwa." ⁴ 'Et yugha hoodul'eh hiyoodulhuk, "Ndoh dune chahóot'ih, nts'e simba hite'alh, 'i nats'óolelh l'he'huneltsuk dune gházte'alh wheni?" ⁵ 'Et Sizi huboodulhuk, "Daneltsuk lhes sut'e aht'i?" 'Et ndi hiyulhni, "Skwunlai 'o 'at nankoh lhes sut'e." ⁶ 'Et 'ilhuhowezdel yun natl'ahudóolts'ih huwa bulh'a. 'Et skwunlai 'o 'at nankoh lhes yilhchoot 'ink'ez, "Suchanaílya," ni ho' tenadedli. Taidalhtuk 'ink'ez yugha hoodul'eh yutl'aiyanla hubutunyoonihi ka, 'ink'ez hudelhtsi' butaininik. ⁷ 'Et lhook chah ntsoolyaz hit'i, 'i chah Sizi "Suchanaílya," ni hoh yuba tenadedli 'ink'ez 'i chah yugha hoodul'eh ndo

búlhni, “Hubutunyooni.”⁸ Ts'iyannah 'aha'al 'ink'ez 'uhunesdai. 'Et yugha hoodul'eh skwunlai 'o 'at nat k'its'ai dezbun 'i highá' wez'al, 'i dih tezkat.⁹ 4,000 bat'en 'en 'aha'al. 'Aw 'et Sizi hoh whenaóobalh'a.¹⁰ 'Et 'ahoh yugha hoodul'eh bulh ts'i be náhedel 'ink'ez keyah Dalmanutha huwhútni whuz yanahúsduki.

Náunnah Pharisee, 'en Sizi buba hooncha tune'tet'ilh 'uhooleh hukwa hiyoodulhkut

¹¹ 'Et bulunah Pharisee, 'en Sizi highu nindel 'ink'ez hiyenah hoh hiyóólhdzih hiyóóólhdkut, “Alha Yak'usda ntl'ahón'ai t'eh, yak'uz ts'ih hooncha tune'tant'ilh 'uhonleh, 'i be t'ets'onoozeh ka.”¹² Sizi tube cho hiba dzuh 'uhídeja 'ink'ez ndo búlhni, “Di ka k'an dune huwa ne'ut'en hukwa' hutni? 'Alha 'un whudúsní 'aw ndi yun k'ut whudune ndúhóont'ah honóólh'en ghaít'ah.”¹³ 'Et 'ahoh buch'a nanja, ts'i be nája 'ink'ez bun k'ut nyan whenadúki.

Huwohle Pharisee 'ink'ez Herod hubules untéldoh, 'i ch'a hubúlhni

¹⁴ Yugha hoodul'eh lhes nahodelhúnuh, lhes lhuk'i zeh ts'i be húlh'ai.¹⁵ 'Et Sizi hubugha utni, “Huwohle, 'ahoolhye khuhdli Pharisee 'ink'ez Herod hubules untuldoh, 'i ch'a,” hubúlhni. ¹⁶ 'Aw 'et lhulh yáwhehunik, “Et 'aw lhes chats'ít'ih 'et huwa 'utni.” ¹⁷ 'Et Sizi daja hutni 'uda t'eeoninzun, 'et ndó bulhni, “Et di ka lhes cháht'ih 'et huwa yalhtuk, 'awhuz nt'eeonuzúhzun k'us nuhwheni t'achaoodulhúts'it nuhdzi 'awhuz ih duts'un ho' dahni? ¹⁸ Nuhna hoonli be chaóózeh'en, nuhdzo hóonli be cha'duzahts'uk. 'Aw ih whu-nachasulhúnik? ¹⁹ 5,000 dune skwunlai lhes hubutaidalhkut hoh daneltsuk k'its'ai dezbun 'i dune yugha' wéz'al, 'i dih tezkat inle?” “Lanezi 'o 'at nankoh,” hiyúlhni. ²⁰ “Ink'ez skwunlai 'o 'at nankoh lhes 4,000 dune butaidalhkut, daneltsuk k'its'ai dezbun, 'i highá' wez'al, 'i dih tezkat inle?” hubúlhni. “Skwunlai 'o 'at nankoh,” hiyúlhni. ²¹ Ink'ez ndo búlhni, “Et 'awhuz ih nuwheni tachaoodulhúts'it?”

Keyah Bethsaida 'et Sizi dune chawhés'en whé'en nayulhtsi

²² 'Et Sizi yugha hoodul'eh bulh keyah Bethsaida huwhútni whuz hunindel hoh 'ilhunuh dune chawhés'en, 'en Sizi highu nihínihya 'ink'ez highu tedudilh yuk'edoolni ka. ²³ 'Et Sizi chawhés'en yula ilhchoot 'ink'ez keyah whuch'a inílhya hoh lhch'az dune yuna k'ézno 'ink'ez yuna k'édilnik hoh ndi yulhni, “Dahooja, hoonliyaz ho'en ih?” yúlhni. ²⁴ Dune yutá'en 'ink'ez 'utni, “A, dune nulh'en, 'et whunts'ih 'aw ts'ah'un chaoozes'en, dune 'ants'ih duchun li'hint'ah hoh nuhúdel.” ²⁵ Sizi doo chah zeh lhch'az dune yuna k'édilnik 'ink'ez yeduk yuta'en hoh 'et 'aw 'et whe'en nasdli 'ink'ez ts'iyaitsuk huba hoolsai. ²⁶ 'Et Sizi dune chawhés'en bukoo ts'ih whenáyalh'a 'ink'ez khunek ulhtus, 'i be ndi yúlhni, “Bethsaida ts'ih nátonja gunih 'ink'ez Bethsaida whut'en ndo budóni gunih!”

Sizi ndan unli, 'et Peter huwu yalhtuk

²⁷ Ink'ez yugha hoodul'eh bulh Caesarea Philippi 'et keyah whuz whehándel. Hedulh hoh huhoodulhkut, “Nduen dune sughu yalhtuk t'eh, ndan usdli hutni?” ²⁸ 'Et yugha hoodul'eh 'uhiyúlhni, “Bulunah 'uhutni John dune too be' 'ulh'en inle 'int'ah. 'Et 'uy-oon 'uhutni Elijah 'en Yak'usda whusaítel'h'ah 'int'ah. 'Et 'uyoon chah Yak'usda be nus whunílh'en 'ilhunuh 'int'ah hutni.” ²⁹ Ink'ez yugha hoodul'eh ndo búlhni, “Nuhwheni do, ndan 'ust'ah dahni?” 'Et Peter 'utni, “Nyun Christ* 'unint'ah.” ³⁰ Sizi khunek ulhtus 'i be ndo búlhni, “Si sugha dune dóohni gunih!”

Dzuh nutezut, 'ink'ez datetsah, 'et Sizi huwu yailhtuk

³¹ 'Aw 'et Sizi yugha hoodul'eh whubodulh'eh 'ink'ez ndo búlhni, “Yinkak dune ye' tube cho dzuh nuhítelhdzut. 'Et netsuh whudelhdzulh, náwhulnuk moodih 'ink'ez Moses be' dustl'us 'uk'ununa'úsduguz chah ts'iyawh 'aw hiyoozólh'sa ghaít'ah. Hituzelghelh 'ink'ez whulh tat dzin dinadutédalh.” ³² Soo ts'et cho hubúlhni, 'et huwa Peter, 'en Sizi 'udun nenílhti 'ink'ez hukwa' yudáni. ³³ Sizi yugha hoodul'eh buts'un nalhú'a 'ink'ez Sizi, 'en Peter hukwa' yúlhni, “Satan sut'ak ninínyih! Ndi yun k'ut hoonliyaz zeh yugha nuni nuzut. 'Aw Yak'usda be 'ut'en k'ah bugha nuni chanuzinzut.” ³⁴ 'Et Sizi 'ilhohewezdel 'ink'ez yugha hoodul'eh tubulh, “Anih,” ndo búlhni, “Ndan suntédulh hukwa' huninzun, dich'oh duba moodih nahoodle ghaít'ah. Dulhdulalhgus hídutootan 'ink'ez suntooya. ³⁵ 'Et ndan duk'una'a zeh hukwa' huninzun, 'en 'aw 'ilhuz wheni hukhoona ghaít'ah. 'Et whunts'ih ndan si suba, 'ink'ez khunek unzo, 'i bugha 'et huwa daházai t'eh, 'en 'ilhuz wheni hukhutenal. ³⁶ 'Et dune yinkak ndulhcho 'uhoolhdzun 'ink'ez dazsai t'eh, ndet simba whuch'a hólhdeh? 'Aw 'uhónéh ghaít'ah! ³⁷ K'us dahóont'ah simba dats'úzsai t'eh, 'aw hoonli be whunts'ih 'ilhuz ts'ukhutenal nats'uhoket ghaít'ah. ³⁸ 'Et k'an yuk'edinzut lhanah dune ts'eke bulh tinta' hut'ih, 'ink'ez Yak'usda nahodilnah ho' hint'ah. 'Et huwa ndan dune si 'ink'ez sughunek bulh hukwaya unli t'eh, 'et sih yinkak dune ye', 'en yukaya hutele hoh lizas bulh be'abá buts'u hayánduz, 'i tah whusanája t'eh.”

* 8:29 Ndi boozi, “Yak'usda nets'ítel'h'a” ni ho 'utni.

9

¹ 'Et 'o 'un chah ndutni, “Njan whunaoohlúni, ndet ts'iyannah Yak'usda ye úlhtus, 'i be hik'úne' 'ut'en, 'i whusáwhutelts'ulh, bulunah dune njan hudelhts'i hote'ilh dahútetsah whutsuh.”

Sizi 'uts'un na'a be hóodiltsai

² Lhk'utak'i dzin inle hoh 'et Sizi, Peter, James 'ink'ez John dulh hubutelhúdel ndoh dzulh k'uz dulh 'óbilya. 'Et hinilh'en hoh 'uts'un na'a be hóodiltsai. ³ 'Ink'ez bunaih be hóodiltsai, lheyul k'et 'ants'ih soo tsil 'et nduja, dega nus ndi yun k'ut soo toonasdúguz, 'i bugha 'o nus lheyul sulí. ⁴ Ndunnah tanah yugha hoodul'eh khunyaz Elijah 'ink'ez Moses bulh Sizi hizih siyin 'ink'ez hiyulh yálhtuk hoh hiya'en. ⁵ 'Aho Peter Sizi yulh yatelhtuk, “Nehodulh'eh hoonzoo ho' hoont'ah njan uzdelhts'i. Tat bun nuhwhuba nets'ooel, 'ilhuk'i nyun mba, 'ilhuk'i, 'i Moses ba, 'ink'ez 'ilhuk'i, 'i Elijah ba.” ⁶ Peter ndi khunek be yalhtuk hoh daja dutenilh 'aw nt'oonízun, ndunnah tahult'ah 'en tube hunelhújoot 'et huwa 'utni. ⁷ Khunyaz kw'us buk'einde 'ink'ez yedoh kw'us tah ts'ih yazelhtuk, “Ndun sich'oh suYe' int'ah, tube buk'esi'. 'En soo óozelhts'ai,” whutni. ⁸ 'Et 'ahoh dunat nuhúyuz'en, 'aw 'uyoon chah'il, Sizi 'en zeh hubulh 'út'en. ⁹ 'Aw 'et dzulh k'ut ntsun nahedulh hoh Sizi khunek ulhtus, 'i be ndo búlhni, “Khun teh 'uyoon dóohni gunih! Ndet whunulh'en, yinkak dune ye' dinadutédalh 'et whuts'un.” ¹⁰ Sizi bughunek hiyoontun hoh lhulh yawhehúniluk, 'ink'ez nduhútni, “Ndi khunek 'Dazsai 'ink'ez dinadutédalh?” dant'i ni hoh 'utni?” ¹¹ 'Ink'ez Sizi hiyooodulhuk, “Et Moses be' dustl'us 'uk'ununa'úsduguz di ka hubodulh'eh Elijah 'en 'udechoo whusatyalh?” ¹² Sizi 'et ndo búlhni, “Elijah 'alha 'udechoo whusaína ts'iyaintsuk lhaóodutelilh ka. 'Et whunts'ih di ka Yak'usda bughunek 'uk'ununa'usdúguz, 'i 'et ndutni 'Yinkak dune ye' 'en ye dzuh nutezut 'ink'ez tube hits'u dutnik tele?” ¹³ 'Et whunts'ih nuhwhudúzni Elijah 'uda whusaína 'ink'ez dune nts'e na'a hukwa' huninzun t'eh, hoh teh né'hiyulh'en. 'Et Yak'usda be' dustl'us k'ut whuz na'a 'uk'une'úsduguz ínle.”

'Uski ntsi' nudúdeh, 'i buyúinda, 'en Sizi soo na'yínla

¹⁴ 'Et Sizi 'onghunnah yugha hoodul'eh butananja hoh, dune hubugha 'ilhuhowezdel 'en hubunilh'en 'ink'ez bulunah Moses be' dustl'us 'uk'ununa'úsduguz yugha hoodul'eh hiyenah 'uhutni. ¹⁵ 'Ilhuhowezdel Sizi hitel'h'en ibulh huba hooncha hoh hidudelhúghaz 'ink'ez, “Dahooja,” hiyúlhni. ¹⁶ 'Et Sizi Moses be' dustl'us 'uk'ununa'úsduguz huboodulhuk, “Dant'i ghu yalhtuk ho' udahni?” ¹⁷ 'Ilhuhowezdel 'ilhunuh dune butahaína, “Nehodulh'eh suye' ntsi' nudúdeh, 'i buyúinda 'et huwa 'aw yaoolhtuk ghaif'ah, 'en nts'un nilhti. ¹⁸ 'Et ndet ndi ntsi' buyéinda 'i hubugha buba hoolhtus t'eh, 'et yun nadélduz, huwus buzek hanányi, dughoo lhedúlh'us, 'ink'ez lhts'edunukw. Ngha hoodul'eh ntsi' nudúdeh, 'i yeyuhanahinooyoot, hubodúzni 'et whunts'ih 'aw 'uhiyooleh ghaif'ah.” ¹⁹ 'Ink'ez Sizi ndi yúlhni, “Aw nuhwheni dune nuhwhuba 'alha' uhot'e ghaif'ah! Dáwhuldzah nuhzih tesdalh? Dawhuldzah nuhwhutah tesdalh sudutéhts'o whuts'un 'ink'ez nuhwhuba 'alha' test'ih? 'Uski ndez suts'u tóolhte!” ²⁰ 'Et highu hinílhni. 'Et ndi ntsi' nudúdeh, 'i ye yúndi Sizi yutel'h'en ibulh, 'ahoh 'uski bukaootezut 'ink'ez nadélduz, 'ink'ez huwus buzek haneldo hoh núkallhah. ²¹ 'Et Sizi be'abá yoodulhuk, “Dáhoodzah ndun 'uski 'et ndunt'ah?” yúlhni. “Ntsool da whuts'un,” ní be'abá. ²² “Lhat hoh 'uski yuzoolhghel hukwa' yalh'en. Too be chah yuzoolhghel hukwa' yalh'en 'ink'ez tsidunoh cha' yulh'en. Soo' tenilh t'eh, negha té'nonzeh 'ink'ez nela 'oneh!” ²³ “A,” yúlhni, “Soo 'úlcho 'i be be 'alha' hoont'ah int'i t'eh, ndan be 'alha' hoont'ah hit'i t'eh, 'en ts'iyaintsuk ne'hutet'en buba huwa chaootel'hunah.” ²⁴ 'Aho Peter be'abá bunatsultoo hoonli hoh 'utni, “SMoodihti be 'alha' hoont'ah 'ust'i, 'et whunts'ih 'aw soo cha'lhutus. 'Et huwa sula 'ineh, 'o nus 'iltus, 'i be 'alha' nudúdeh, 'i be 'oost'e ka, 'et hukwa' nuszun.” ²⁵ 'Et Sizi whutel'h'en 'ilhuhowezdel 'aw 'et higha welhúghaz hoh 'ahoh khunek ulhtus, 'i be ntsi' nudúdeh, 'i hukwa' yudáni, 'ink'ez ndi yúlhni, “Ntsi' nudúdeh, 'i cha'hudústs'o 'ink'ez yachahulhtuk hubilh'i, ndun 'uski buyáh hanaindaih nyudúzni, 'ink'ez doo chah 'o 'at buyunádondzit gunih!” ²⁶ 'Et ntsi' nudúdeh, 'i ndunnah 'uski yukaootelhdzut, 'ink'ez tube cho dulduz, 'alzul, 'ink'ez yeyáhanaja. Ndunnah 'uski 'ants'ih dazsai li'uja. 'Et huwa lhanah, 'Dazsai ho' int'ah,” hutni. ²⁷ 'Et whunts'ih Sizi 'uski yula ilhchoot 'ink'ez nduk 'úyinla. 'Et 'uski dich'oh dinadija. ²⁸ 'Et hukw'elh'az Sizi koo danína hoh yugha hoodul'eh whu'izyaz hiyooodulhuk, “Et dáhoont'ah huwa wheni ntsi' nudúdeh, 'i 'aw buts'u hanáts'inooyoot ghaif'ah?” ²⁹ 'Et Sizi ndo búlhni, “Ndan tenahududli, 'ink'ez sahá'hudulyih, 'aw 'i zeh ntsi' nudúdeh, dune nahiyunteyukw.”

Sizi datetsah doo chah huwu yailhtuk

³⁰ 'Aw 'et keyah whuch'a nahundel 'ink'ez 'et keyah Galilee wheghah lhunáhusdel. Sizi nts'e whénya ts'ih dune t'eoónózin hukwa cha'nízun, ³¹ yugha hoodul'eh hubodulh'eh 'et huwa. 'Ink'ez ndo búlhni, “Yinkak dune ye', 'uyoon dune tl'ahitelhtel 'ink'ez hituzelhghel.

Hizelhghi hukw'elh'az whulh tat dzin 'et dinadutédah." ³² 'Aw daja ni hoh 'utni nt'ehonízun 'ink'ez hiyé nuljut 'aw hiyoodolhkt ghaít'ah.

Ndan simba netah dega nus dune uncha unli

³³ 'Et keyah Capernaum ts'ih whuz lhghu nahudidel. Koo danáhandel hoh 'et Sizi yugha hoodul'eh huboodulhkt, "Njan ni ti ts'ih ahdulh hoh, dant'i ghu yalhtuk ho' dahni?" ³⁴ Daja hutni hukwaya hinli 'et huwa t'echahudusnih. Ti 'et lhenah'uhutni ho' hutni, "Ndan simba netah dega nus dune uncha unli?" ³⁵ Sizi nátl'adeda ndunnah lanezi 'o' at nanah yugha hoodul'eh, "Anih," hubúlhni 'ink'ez ndo búlhni, "Ndan dega nus dune uncha tele hukwa' ninzun t'eh, 'en 'udek'ah wule huba' hoont'ah, 'ink'ez ts'iyannah nané'tet'en." ³⁶ 'Et Sizi 'ilhunuh 'uskiyaz yílhchoot 'ink'ez hububut ninílhya 'ink'ez yunasúnik hoh ndo búlhni, ³⁷ "Ndan si soozí gha ndun 'uski ndult'ah danílhti t'eh, si dasunílhti. 'Ink'ez ndan dasunílhti, si zeh ilah dasutálhtel. Ndun sutélh'a, 'en chah dahinílhti ho' hoont'ah."

Sizi ndo búlhni, "Ndan nech'a chadítini, 'en neba 'int'ah."

³⁸ 'Et John ndi yúlhni, "Nehodulh'eh, 'ilhunuh dune nyoozi be ntsi' nudúdeh, 'i dune buts'u hanaídulhdoh, 'en uznilh'en. "Ustl'e' ineh ts'utni, 'aw nelh cha'ust'en 'et huwa." ³⁹ Sizi ndo búlhni, "Aw whuch'a néhyoot ilah, ndan soozí bugha huwa 'ét'en 'uwuhulh'en, 'en 'aw hukw'elh'az t'eh dzuh k'una'a sughi yaoolhtuk ghaít'ah. ⁴⁰ Ndan nuhch'a chahudítini, 'en nuhts'un hudetni ho' hint'ah." ⁴¹ 'Ink'ez 'utni, "Njan whunalhúnih, nuhwheni Christ bube'ildzun ahli huwa ndan too whunts'ih nuhgha nílhdze t'eh, 'en Yak'usda buba k'elha whutelhtsilh."

Sizi dune tink'us nílht'uk bughi yalhtuk

⁴² 'Et 'ilhunuh 'uski buba 'alha' 'ust'ah, 'ink'ez 'ilhunuh dune lubeshi be such'a itélhtel t'eh, ndun dune 'uski tink'us na'a wheyúntelhtun 'et whutsuh tse be hits'ilchun ye'ulhchuz 'ink'ez hiyulh tase doolh'is 'o nus soo' whut'e'. ⁴³ 'Et nla 'i bugha lubeshi inla t'eh, nla k'ont'as! 'Et nla k'us zeh int'i hoh yak'uz whénia t'eh whuz 'ilhuz khutanalh, 'et dega nus mba whutézo. 'Et lhch'az nla bulh kwuncho yuh ts'ih whénia t'eh dega nus mba whutétsi!, whuz kwun nachanusne ho' 'int'ah. ⁴⁴ 'Et whuz hube 'usgoo 'aw yachatésdla 'ink'ez kwun nachanusne. ⁴⁵ 'Et nke 'i bugha lubeshi inla t'eh, nke k'ont'as! 'Et nke k'us zeh int'i hoh yak'uz whénia t'eh whuz 'ilhuz khutanalh, dega nus mba whutézo. 'Et lhch'az nke bulh kwuncho yuh ts'ih whénia t'eh dega nus mba whutétsi!, whuz kwun nachanusne ho' 'int'ah. ⁴⁶ 'Et whuz hube 'usgoo 'aw yachatésdla 'ink'ez kwun nachanusne. ⁴⁷ 'Et nyuna 'i bugha lubeshi inla t'eh, hanó'alh! 'Et nyuna k'us zeh int'i hoh Yak'usda buk'úne' whut'en whénia t'eh, 'et dega nus mba whutézo. 'Et lhch'az nyuna bulh kwuncho yuh ts'ih whényuhano t'eh, dega nus mba whutétsi!, whuz kwun nachanusne ho' 'int'ah. ⁴⁸ 'Et whuz hube 'usgoo 'aw yachatésdla 'ink'ez kwun nachanusne. ⁴⁹ Lizwif Yak'usda ts'un khunai hidéllh'k'un hoh 'udechoo lusel hik'unhiyudzih. 'Et whuz na'a ts'iyannah dzuh nutezut ho' hoont'ah. ⁵⁰ Lusel unzoo ho' 'int'ah, 'et whunts'i lusel buzachahoolkih 'uts'ulh'ih t'eh, nts'e na'a doo chah lusel buzahóolki 'uztelhtsilh? Whuz na'a nuhdzi wútsi' gunih 'ink'ez nuwhulh dune ts'un nuhdzi dóoghel."

10

Dune lhghu hudelhts'i lhch'á nahoodelh, 'et hubugha Sizi huboodulh'eh

¹ 'Et Sizi whuch'a nasja 'ink'ez Judea huwah nenínya, 'et took'oh Jordan huwhútni, 'et yasúya. 'Et lhanah dune yugha wézel. 'Et whutsuh da datni 'ahoolhyez whuz na'a doo chah zeh huboodulh'eh. ² 'Et bulunah Pharisee highu nindel 'ink'ez hiyóolhdzih hoh hiyoodulhkt, "Nedíni, dune 'en ih bughá whunt'ai bu'at lahudotnih ka?" ³ 'Et Sizi 'utni, "Daja ni hoh Moses khunek nuhtl'aída'ai inle, 'i?" ⁴ 'Et 'uhiyóulhni, "Moses bugha óonin'ai dune dustl'us yuk'une'úgzuz, 'i be bu'at buch'a nayólhel." ⁵ 'Et Sizi ndo búlhni, "Stabe nuhdzi duts'un 'et huwa ndi khunek Moses nuhwhuba yuk'e'ánguz. ⁶ 'Et whunts'ih 'udechoo Yak'usda ts'iyaintsuk inla hoh dune 'ink'ez ts'eke chah inla. ⁷ 'Et njan huwa dune be'abá 'ink'ez be'ama bulh buch'a óoya, 'ink'ez bu'at 'en zeh zih wuda. ⁸ 'Et nuhult'ah 'ilho hutele, 'et 'o 'un hoh nanah chahílah. ⁹ Ndan Yak'usda lhghá buninla, 'en 'aw dune lhch'a nabuhóolelh huba cha'hóot'ah." ¹⁰ 'Et koo danáhandel hoh yugha hoodul'eh Sizi njan dáhoont'ah 'et hukwa hiyoodulhkt. ¹¹ 'Et ndo búlhni, "Dune ndan bu'at 'ún tezno 'ink'ez 'uyoon ts'eke ghu nasda t'eh, 'en 'uyoon ts'eke bulh tinta' tét'ilh ho' 'int'ah. ¹² 'Et whuz na'a zeh ts'eke buki 'ún tezno 'ink'ez 'uyoon dune ghu nasda t'eh, 'en chah 'uyoon dune tinta' tet'ilh."

Sizi 'uskeh buk'udelhúnik 'ink'ez buba tenadulli

¹³ Bulunah dune 'uskeh Sizi ts'un nibaninla buk'edoolni ka, 'et yugha hoodul'eh ndunnah 'uskeh whusainla hukwa' búdani. ¹⁴ 'Et Sizi whunalh'en hoh humílich'e 'ink'ez yugha

hoodul'eh ndo búlhni, "Whute 'uski suts'un hutoodelh. Khun teh dah hubudóohni gunih. Ndan Yak'usda hubudayi cho unli whuz hudelhts'i, 'en ndunnah 'uskehyaz hubunduhúlt'ah ho' hint'ah. ¹⁵ Soo ts'ah'un 'alha' 'un whudúsni, ndan 'uskehyaz k'una'a njan Yak'usda hubudayi cho unli chahoolhchulh t'eh, 'aw whuz dahóoya ghaít'ah." ¹⁶ 'Et 'uskehyaz ts'iyawh bunasunik 'ink'ez 'ilhunah hinli hoh hubuk'edilnik 'ink'ez huba tenadedli.

Dune soode'a 'int'ah

¹⁷ 'Et Sizi doo chah natesja hoh dune yududelhgai, yubut bugwutsi be nenínya 'ink'ez yoodalhkut, "Dune hoodulh'eh unzoo, nts'e na'a dast'en hoh 'ilhuz khutesnalh whuch'a ootélhdoh?" ¹⁸ 'Et Sizi 'uyúlhni, "Di ka 'usudíni, ninzoo sudíni? 'Aw 'ilhunuh unzoo hoolah. Yak'usda 'aw 'en zeh unzoo ho' 'int'ah. ¹⁹ Ndi khunek Yak'usda nuht'l'aída'ai, 'i 'et t'eninzun: nesóolhgheih gunih, dune k'us ts'eke bulh tinta' 'ont'en gunih, 'undunont'ih gunih, honts'it gunih, ha'ndunont'ah gunih, nyu'abá 'ink'ez nyu'ama chah hubudólhti." ²⁰ 'Et dune 'utni, "Nehodulh'eh ndet chilh usdli 'uda whuts'un, ndi khunek ts'iyawh buk'úne' zust'en." ²¹ 'Et Sizi soo yuk'entsi' hoh yunalh'en 'ink'ez ndi yúlhni, "Ilhun zeh whu'et 'int'ah, inyalh 'ink'ez ndai int'i, 'i ts'iyawh be 'ónket 'ink'ez sooneya tehel'en hubugha inondzaih, lhudalhgus ilhchoot 'ink'ez 'anish, se'ut'en k'ah tune' 'ónt'en ka sunanyalh. 'Et t'eh nduk yak'uz hoonzoo, 'et whuch'a ootálhdoh." ²² 'Et ndun dune ndi khunek whudánts'o hoh tube budzi ndesda, 'ink'ez tso unli hoh yughu natesja, tube soode'a 'int'ah 'et huwa. ²³ Sizi yugha hoodul'eh bunilh'en 'ink'ez ndo búlhni, "Dáhoont'ah huwa whúlna hoh ndan soode'a, 'en Yak'usda hubudayi cho unli, 'et dahútedulh." ²⁴ 'Et yugha hoodul'eh ndi khunek hídants'o hoh tube huba hooncha. 'Et Sizi whuz heyel'h hoh ndutni, "Suzkehkah dahoon't'ah huwa whúlna hoh 'en duzooneya hit'az 'int'ah Yak'usda hubudayi cho unli, 'et dahútedulh. ²⁵ Dant'ah khunai cho, camel'eh búlhni, 'i 'aw yubatsoh buna 'aw yukólget ghaít'ah. 'Et whuz na'a dune soode'a 'int'ah, 'o nus buba huwa whúlna Yak'usda hubudayi cho unli datéyahl huba." ²⁶ 'Et yugha hoodul'eh tube buba hooncha 'ink'ez lhuhoodulkut, "Ndan simba doojih?" ²⁷ 'Et Sizi hubunilh'en 'ink'ez ndo búlhni, "K'us njan 'et dune ba 'uhóneh ghaít'ah, 'et whunts'ih Yak'usda ba ts'iyaintsuk 'aw huwa chahóolnah ho' hoon't'ah." ²⁸ 'Et yugatélhtuk, "Soo cho whunilh'en, ts'iyaintsuk bulazdetnik 'ink'ez nts'un tezdel." ²⁹ 'Et Sizi ndo búlhni, "A, ts'ah'un nuhwhudúsni, ndan bukoo huwu tezya 'ink'ez dulhutsinkah, k'us dulhtuskah, be'ama, be'abá, bu'at, buzkehkah, k'us duyun k'ut t'eh, si sugha 'ink'ez ndi khunek unzoo, 'i k'uz ts'iyaintsuk whuladetnik, 'ink'ez suntezya t'eh, ³⁰ nus de 'o nus lhái úni hoh butl'anaítekulh: bukoo 'ink'ez bulhutsinkah, bulhtuskah, be'ama, buzkehkah, 'ink'ez buyun k'ut 'ink'ez dune hiye tena'tel'ilh chah, 'ink'ez nus de 'ilhuz khutena. ³¹ 'Et whunts'ih lhanah 'udechoo 'int'ah 'en 'udek'elh'az hutele, 'ink'ez lhanah ndunnah 'udek'elh'az hinli, 'en 'udechoo hutele."

Sizi datetsah 'ink'ez dinadutédalh whulh tat huwu yatelhtuk

³² 'Aw 'et Jerusalem ts'ih ti hedulh Sizi, 'en yugha hoodul'eh hubutsuh úyah. Hoh hedulh tube huba hooncha k'et whéhunuljut. 'Et doo chah Sizi yugha hoodul'eh lanezi 'o 'at nanah 'udun nébuninla 'ink'ez nus de bulh daóotenilh, 'et hubugha hubulh yaílhuk. ³³ 'Et ndo búlhni, "Sih soo zélhts'ai, Jerusalem ts'ih ts'utedulh 'ink'ez yinkah dune ye', 'en Lizwif náwhulnuk moodih 'ink'ez Moses be' dustl'us 'uk'ununa'úsduguz, 'en butl'aihítelhtelh. 'Et datétsah wheni hiba nahuteyeh, 'ink'ez ndunnah 'udun yun k'ut whut'en, 'en butl'aihítelhtelh. ³⁴ 'Et 'en highu tedloh, higha dútezoh, hiyootélhtsus 'ink'ez hituzelhgheih. 'Et tat dzin inle t'eh, dinadutédalh."

James 'ink'ez John bulh Sizi hiyoodulhkut

³⁵ 'Et James 'ink'ez John bulh Zebedee buye'kah Sizi highu nin'az 'ink'ez hiyoodulhkut, "Nehodul'eh ndai nts'un buka' ts'utni, 'i 'et neba 'uwhtanalilh hukwa' ts'uninzun." ³⁶ Sizi huboodulhkut, "Ndet nuhwhuba 'uwhtesdlilh hukwa' nahzun?" ³⁷ 'Et 'uhutni, "Ndet yak'uz dega nus dénti ts'ih sinda t'eh, nzih taduke 'et hukwa' níduzun, 'ilhunuh 'en nalnhnih ts'ih 'ink'ez 'ilhunuh 'en 'intl'as ts'ih 'int'ah." ³⁸ 'Et Sizi ndo búlhni, "Ndet suts'u hukwa' dahni 'aw t'éoonuzúhzun k'us ndi lubot be tesnilh, 'i soo tulih wahnai 'ink'ez nts'e na'a too bé' 'ulya soo tulih whuz na'a too be' 'óohneh?*" ³⁹ "Soo sih 'uts'ooneh," hiyúlhni. 'Et Sizi ndo búlhni, "Ndaí lubot be tesnilh, 'i nuhwheni chah téhtnilh ho' 'int'ah. 'Ink'ez too bé' 'ulya whuz na'a nuhwheni chah too be' téhnilh. ⁴⁰ 'Et ndan nalnhnih ts'ih sughu tedalh, 'ink'ez 'intl'as ts'ih sughu tedalh, 'aw si huwá hos'alh ghaít'ah, ndunnah huba lhawhúdulya, 'en zeh buba' hoon't'ah." ⁴¹ 'Et 'o 'un lanezi yugha hoodul'eh, 'en James 'ink'ez John hubulh hánilch'e. ⁴² 'Et Sizi soo ts'iyawh, "Anih," hubudáni, 'ink'ez ndo búlhni, "Et nt'éoonáhzun 'udan yun k'ut whut'en hubutah, ndun dune tsuh whudelhdulh hinli, 'en dune buk'ut moodih hinli. 'Ink'ez ndan bumoodih hinli, 'en chah bumoodih hinli. ⁴³ 'Et whunts'ih

* 10:38 Nts'e na'a dzuh nuteszut, whuz na'a dzuh nuhtézut ih?" ni ho 'utni.

nuhwheni nuhtah 'aw whuz na'a ilah ho' hoot'ah. 'Ilhunuh nuhtah dune uncha tele hukwa' ninzun t'eh, 'o 'awh chah huba ne'óot'en wule huba' hoot'ah. ⁴⁴ 'Et nuhtah 'ilhunuh 'udetsah tele hukwa' ninzun t'eh, ts'iyannah 'e'ulhna wule huba' hoot'ah. ⁴⁵ Yinkak dune ye, 'en whunts'ih 'aw ba né'whute't'en huba whusachaiyal 'et huwa. Dune buba né'tet'en 'ink'ez dune buba datétsah 'et hoh dune ts'iyawh nabootekulh."

Dune chawhés'en Bartimaeus hiyúlhni, 'en Sizi whe'en nayulhtsi

⁴⁶ Jericho ts'ih hunindel, Sizi yugha hoodul'eh tubulh nahutesdel hoh, lhanah 'il-huhowezedel chah 'ut'en. Dune chawhés'en Bartimaeus hiyúlhni, Timaeus buye, 'en ti whuzih usda hoh tedudlih, ⁴⁷ Sizi Nazareth whut'en wheghah uyalh whulhúdants'o. 'Aho h hazulh hoh 'utni, "Sizi, David but's'u hainzut sugha té'ninze!" ⁴⁸ Lhanah t'edoosnih hiyulhni 'ink'ez whuch'a hínenyoot. 'Et whunts'ih 'o nus 'alzul hoh 'utni, "Sizi, David but's'u hainzut sugha té'ninze!" ⁴⁹ Sizi 'ilhuneni'nya 'ink'ez ndo búlhni, "Anih sba dáhni," hubúlhni. 'Et dune chawhés'en yuka hunih, "Hoonínt'i 'ink'ez didinyih, 'anih nyúlhni," hiyúlhni. ⁵⁰ Dunaihts'uz 'i ts'ahayét'ah, dudillhah, 'ink'ez Sizi yugah nininya. ⁵¹ "Et dányutesdlilh 'et suts'u hukwa' ninzun?" ni hoh Sizi yoodulhuk. "Nehodulh'eh doo chah whes'en naosle, 'et sugha holts'it," yúlhni. ⁵² "Naindahl, si suts'un be 'alha' hoot'ah, 'i be soo ná'inja," yúlhni. 'Et 'ahoh dune 'aw 'et whe'en nasdli, 'ink'ez Sizi ti yuntezya.

11

Lhanah honelnhik hoh Sizi Jerusalem lhgha d'nya

¹ 'Aw 'et Jerusalem whéghah hedulh, nat keyah Bethphage 'ink'ez Bethany chah 'et dzul-hyaz Olive be hóodzi, 'et whuz nihúnindel. 'Et Sizi nanah yugha hoodul'eh whébalh'a, 'et ndo búlhni, ² "Keyah whiyaz nda ts'ih whuz'ai whuz ah'us. Whuz lhgha dah'az, 'et yeztliyaz, donkey hiyúlhni, whutsuh da dune yak'uchaidah, 'i 'et whédint'uk, 'i lkh'unadooh'uk 'ink'ez suts'u toolhdlooh. ³ Dune, 'Di ka 'et ndaht'en?" nuwhúlhni t'eh, 'NeMoodihti yuka' ninzun' doohnti. 'Aw 'et sih nuhtlayoolhtelh." ⁴ 'Et whehá'az 'ink'ez keyah 'et yeztliyaz nahuyilhti, 'ilhunuh bukoo ndati 'et whédint'uk, 'ink'ez lkh'unahida'uk. ⁵ 'Et bulunah n'awh nahudelhúya, 'en hubuhoodulhuk, "Et daht'en hoh aht'en yeztliyaz lkh'unadah'uk?" hubuhútni. ⁶ 'Et Sizi buba nahezya k'una'a hubuhútni, 'et 'ants'ih t'ehudínel 'ink'ez hubula hudetnik. ⁷ 'Et Sizi yeztliyaz highu hinílti hoh bulunah nahiyíts'uz 'i hiba hik'ehiyílhdel 'ink'ez Sizi yuk'étl'adida. ⁸ Lhanah dune chah nahiyíts'uz, 'i ti 'et nehíyuzbus. Bulunah chah 'ul k'us 'ut'an k'unuhídut'as, 'i ti nahídhdelh Sizi yuk'ut lutetayalh 'et wheni. ⁹ Ndunnah dune Sizi hitsuh hedulh, 'ink'ez hik'ah hedulh, ts'iyawh hahuzulh hoh 'uhutni, "Yak'usda ba whudélhtli!

NeMoodihti boozu bughá whusaínya,

'en dega nus hoonzoo bughá whulst'ut.

¹⁰ Netsuh whudelhdzulh, David hubudayi cho keyah 'et dúhoot'ah chah zeh whu-sawhutélt's'ulh, 'et Yak'usda ba ts'odóolhti."

¹¹ 'Aw 'et Sizi Jerusalem keyah neninya hoh Lizwif hubuluglez whucho ts'ih danínya 'ink'ez dulhcho níyuz'en. 'Aw 'i ti náwhendunilhghel 'et huwa Bethany huwhútni ts'ih whuz lanezi 'o 'at nanah yugha hoodul'eh whuz hubulh whén'az.

Ndi mai chun hanulhye, 'i fig hiyulhni, 'i Sizi yek'ehanya

¹² 'Om bun Bethany ts'ih whuz de nahédulh 'et Sizi buye'élt's'ul. ¹³ Nilhdza 'et mai chun yunílh'en but'an chah hoonli. 'Et yughu nínya mai ntéhlcholh ka. Yughu nínya hoh 'ut'an zeh ínt'ah, nk'achah bumai hoolah. ¹⁴ 'Et Sizi ndi mai chun ndi yúlhni, "Aw 'o 'at dune nyumai hunoo'alh ghait'ah!" 'Et ndutni hoh yugha hoodul'eh hídants'o.

Sizi, 'en Lizwif hubuluglez whucho ts'ih tezya

¹⁵ 'Et Jerusalem ts'ih hunindel. Sizi Lizwif hubuluglez whucho 'et daninya. Ndunnah 'e'óoket 'ink'ez 'ooket ts'iyawh tinábuninyoot. Sooneya lkh'enáhuhuduzaih bukw'uzdai chah naína'ai, 'ink'ez dut'ai be 'óoket chah, ¹⁶ 'aw luglez hoonli ne'hóole butl'achahoo'al. ¹⁷ 'Ink'ez Sizi dune whubodulh'eh ndo búlhni, "Yak'usda be' dustl'us k'ut 'uk'ut ne'úsduzug, 'Njan sukoo ts'iyannah tenadudli bakoo 'úhoot'ah,' ni. 'Et 'uwháhla undunut'ih 'ink'ez nanúli bakoo whuzúhltsi!"

¹⁸ 'Et náwhulnuk moodih 'ink'ez Moses be' dustl'us 'uk'ununa'úsduzug hodánts'o hoh, hizoolhghelh hukwa húnuta, tube hiyé nuljut, ts'iyannah 'ilhuhowezdel hubodulh'eh, 'en huba hooncha 'et huwa. ¹⁹ Soo nadálhghel ibulh Sizi yugha hoodul'eh hubulh Jerusalem whuch'a nahúndel.

Ndi mai chun bughá hahóodul'eh

²⁰ Hoh bundada 'uda 'et ti hedulh ndi mai chun hinílh'en. Soo ts'ah'un bughih tubulh desuz. ²¹ 'Et Peter, 'en whunalnik hoh Sizi bulh yátelhtuk, "Nehodulh'eh nilh'en ndi mai

chun bulh buk'éhanya, 'i desuz," yúlhni. ²² 'Et Sizi ndo búlhni, "Njan whunaoolhúni, Yak'usda nuhwhuba 'alha' 'int'ah t'eh, ²³ ndi dzulhyaz 'i 'udóohni, 'Didilts'it 'ink'ez bun k'ut whucho ts'ih tailts'it.' 'Et soo nuhdzi yuh 'aw nawh cha'hoot'ah 'ink'ez nuhwhuba 'alha' hoont'ah t'eh, dawhútenilh dahní, ts'iyawh nuhwhuba 'et ndó tenilh. ²⁴ 'Et huwa' 'un whudúsní, ndi be 'alha' hoont'ah, 'i be tenadahdí, 'ink'ez hoonlí ka' dahní 'et 'alha' nahzun hoh nuhgha tekulh t'eh, ndai buka' dahní, 'i nuhgha tekulh ho' 'int'ah. ²⁵ 'Et sahyin hoh tenadahdí, 'ink'ez 'uyoon ts'un nuhwhuba dzuh t'eh, buba n'ún whutulhdelh, 'et síh nuhwhé'aBá, yak'uz úsda, 'en nuhwheni chah nuhwhulubeshi nuhwhuba 'un yutoolhdelh. ²⁶ 'Et 'uyoon buba n'ún chaootulhdulh t'eh, nuhwhé'aBá, yak'uz úsda, 'en chah 'aw nuhwhulubeshi nuhwhuba 'un yutoolhdelh ghaít'ah."

Sizi be 'ut'en k'ah 'et hukwa' hoodulhkut

²⁷ 'Ink'ez doo chah Jerusalem ts'ih nahundel, Sizi Lizwif hubuluglez whucho nuya hoh náwhulnuk moodíh, Moses be' dustl'us 'uk'ununa'úsduguz, 'ink'ez dune tsuh whudelhdzulh, 'en Sizi highu nindel, ²⁸ 'ink'ez ndi híyulhni, "Nedini ndai bugha dune bugha ndoh 'int'ah hoh njan ndint'en?" Ndan ng'há ooni'ai hoh 'int'en?" ²⁹ 'Et Sizi ndo búlhni, "Ílhun zeh hukwa nuhoodutelhkut. 'Et ndusudáhni t'eh, 'et síh ndun whudóosni ndi dune bugha ndoh 'ust'ah hoh njan ndust'en. ³⁰ Ndsudóohni ndun John dune too be' 'ulh'en ndan yutl'ahón'ai hoh dune too be' 'úlh'en inle, Yak'usda tulih k'us dune tulih yugha ooni'ai?" ³¹ 'Et 'ahoh dich'oh dutah hukw'u nahúhulhye hoh njan duhútni, "Daja chah uzdooni, 'Yak'usda yugha ooni'ai,' ts'utni t'eh, 'et síh dooni, 'Di ka John nuhwhuba 'alha' cha'dusni?" ³² 'Et, 'Dune yugha ooni'ai ts'utni t'eh," 'et njan dune hubé hunuljut 'et huwa, ts'iyawh dune John dune too be' 'ulh'en, 'en Yak'usda be nus whunilh'en unli inle huninzun. ³³ 'Et huwa Sizi 'uhíyúlhni, "Aw t'ets'onízun." Sizi 'et ndo búlhni, "Si chah ndan sugha óoni'ai 'aw nuhwhudoosni ghaít'ah."

12

Mai haníyeh k'et huwhulh'ai bugha whúts'odul'eh

¹ 'Aw 'et Sizi khunek hiye oodool'eh hubugha hubulh yálhtuk, "Ílhunuh dune, 'en mai haníyeh, mai too 'úlh'ih, 'i 'ainana. Yuna'nezt'oo, tsak'et hahónkaih, mai tahúndununi huba, 'ink'ez yutést'en chah 'uhóonla. 'Et dune bughu whulh'ai 'ink'ez ninza keyah whenya. ² 'Et 'aw 'et mai oonteje niwhuninzut t'eh, 'ulhna 'ílhunuh 'en mai haníyeh k'et butl'ahúhonla buts'ú wheyalh'a, ndai ooneje, 'i bulah buts'itookat huba' hoont'ah, 'i ka. ³ 'Et 'uhíyínla ndunnah mai k'et butl'ahúhonla, 'ulhna híyílhchoot yahúyalht'o 'ink'ez ílhni higha cháfel hoh whenáhinanyoot. ⁴ Ndun dune be'íldzun, 'en doo chah 'uyoon 'ulhna whuz whel'h'a. 'En tse be nahínelh'uz hítsi ts'e' nalh'uz hoh nukai híyulhtsi, 'ink'ez hukwa yáhoonli k'una'a 'uhíyínla hoh whenáhinanyoot. ⁵ Doo chah 'uyoon 'ulhna whuz wheyalh'a. 'En hízelhghi. Lhanah 'uyoon chah 'et ndo buhinla. Bulunah hubuhoolht'ah 'ink'ez bulunah chah hubuhangan. ⁶ 'Ílhunuh zeh 'udek'elh'az whuz buts'un wheyálh'a, 'et usda, 'en buye' yuk'entsi, 'Suye, 'en síh hídóolhti, 'ni 'et huwa.* ⁷ Ndunnah dune mai k'et butl'ahúhonla 'et 'ulhódútni, 'Ndun njan mai k'et be'íldzun, 'en buye' 'int'ah. Anih, ts'uzoolhghelh. 'Et síh ndun buye' buts'ítekulh, 'i ts'iyawh ne'íldzun wule.' ⁸ 'Et ndun buye' híyílhchoot, hízelhghi 'ink'ez híyust'e 'i nyoh haníyeh k'et t'ínahinino." ⁹ 'Et Sizi huboodulhkut, "Daóoneh simba ndun mai k'et whulh'ai? Whusanája, 'ink'ez ndunnah dune ts'iyawh hubóoghan, 'ink'ez mai k'et 'uyoon gho hohóh'a. ¹⁰ 'Aw whutsuh whudelhdzulh ndi Yak'usda bughunek 'uk'tse'úsduguz, 'i, 'aw ih buk'eyáchasulhtuk? 'Et ndutni, 'Ndi tse be koo 'uwwhulh'en 'ún hídutelh'uz, 'i 'uja dega nus bukadaoodílt'ah, 'i suli.

¹¹ 'Et Moodihti whuz na'a 'uhóonla.

Tube huba hooncha k'una'a 'obínla ho' hoont'ah.'

'Et whuz na'a Yak'usda be' dustl'us k'ut ndutni," ndo búlhni.

¹² 'Et Lizwif bumoodíh, 'en Sizi híyoolhchoot hukwa' hut'en, t'ehonínzun didut buch'a yálhtuk hoh dune hoodalh'i, 'et whunts'ih dune 'ílhuhowezdel hiye nuljut huwa Sizi dachahíyílih hoh whenáhedel.

Yun k'elha huhoohl'i hukwa' hoodulhkut

¹³ 'Et bulunah Pharisee 'ink'ez Herod budune chah 'en Sizi khunek be híyoolhgooh ka híts'ú wheóobahalh'a. ¹⁴ 'Et Sizi highu nindel 'ink'ez 'uhutni, "Dune hoodulh'eh t'ets'onínzun ts'ah'un zeh 'udanilh. 'Aw 'uyoon daja huntezilh huwu ni chainlah hoh dune dant'ah whunts'ih chabunílh'en hoh Yak'usda beni k'ah ts'ih hubugha khunek 'alha' 'int'ah, 'i be whúbodilh'eh. 'Et nedíni wheni khunek netl'ahon'ai, 'i whudulhyah 'uts'oot'en ih tulih

* 12:6 Njan mai k'et haníyeh humoodíh, 'en Yak'usda 'int' ah, 'ink'ez buYe' 'en Sizi Gri 'int' ah. 'Et ndun bugha téhl'a, ndunnah Lizwif hubumoodíh 'uhint' ah, ni ho' utni.

Roman keyah whumoodih buts'un yun k'elha ts'uhoohli 'i buba buk'elha ts'otelh'i tulih k'us 'awundoooh tulih?" ¹⁵ 'Et whunts'ih Sizi hiyoohgooh hukwa' hiyulh'en t'oonanzin, 'ink'ez ndo búlhni, "Et di ka sóolhdzh? Sooneya st'lanah'aih noolh'en sih." ¹⁶ 'Aw 'et 'ilhunuh sooneya yutl'ainá'ai. 'Et Sizi huboodulh'kut, "Ndan ho' int'ah bunen 'ink'ez boozi 'ukw'e'usdúguz?" 'Et 'uhiyúlhni, "Yun k'ut whumoodih Caesar, 'en 'int'ah." ¹⁷ 'Et Sizi ndo búlhni, "Ndaí Caesar be'ildzun, 'i buts'un buk'elha whulh'i, 'ink'ez ndaí Yak'usda be'ildzun, 'i Yak'usda ts'un buk'elha whulh'i." 'Et soo tube huba hooncha.

Nats'ukhít'naih 'i buka 'oodul'kut

¹⁸ 'Aw 'et ndunnah Sadducee hubuhútni, 'en Sizi highu nindel. 'En 'uhutni, "Dats'úzsai 'ink'ez 'aw nats'ukhóotnah ghaít'ah." ¹⁹ 'En hiyoohulh'kut hoh 'uhutni, "Nehodulh'eh Moses 'en khunek negha ide'ai, 'i neba yuk'une'úgzuz, 'Dune bu'at 'en dazsai, 'ink'ez buzkeh hoolah t'eh, ndun dune dazsai bulhutsin 'en ndun tsandelh' yughu naooda, ndun dune dazsai, 'en ba buzkeh hole ka.' ²⁰ 'Et skwunlai 'o 'at nanah lhulhutsinkah hinli, 'udetsah whudelhdzuhl, 'en 'at ut'i, 'awhuz buzkeh hoolah hoh dazsai. ²¹ 'Et yuk'ah whúdelhdzuhl, 'en tsandelh' yughu nasda. 'En chah buzkeh hoolah hoh dazsai. 'Et whulh tat chah whuz na'a zeh 'uja. ²² Ts'iyawh skwunlai 'o 'at nana 'ilho dunedzuhl 'en ts'iyawh highu dalts'i, ts'iyawh bubuzkeh hoolah hoh yahadla. 'Udek'elh'az ndun ts'eke dich'oh chah dazsai. ²³ Ndunnah yahadla ts'iyawh dinahudutédulh dzin dinahudidel t'eh, k'us ndan simba bu'at tele, ts'iyawh skwunlai 'o 'a nanah, 'en highu dálts'i?" ²⁴ 'Et Sizi ndo búlhni, "TUBE 'uts'un na'a 'udahni. Ndet daja dahni t'oonuzáhzun ih? Yak'usda ye ulhtus, 'i 'ink'ez bughunek k'e'eduguz, 'i t'énuzáhzun, 'et huwa whuz na'a 'udahni. ²⁵ Ndet yahadla dinahudidel t'eh, ndoh yak'uz lizas li'hint'ah. 'Et ndó tet'ilh dune chah 'ink'ez ts'ekoo chah 'aw lhgha hudóolts'i ghaít'ah." ²⁶ 'Ink'ez ndunnah yaidla dinahudidel'ah bugbaha, ndi Moses 'uk'une'úsduguz, 'i 'aw ih buk'uyachálhdh, whus delhtan, 'i tah whudezk'un hoh Yak'usda yulh yalhtuk inle? 'Et 'uk'une'úsguz, 'i ndutni ndun Moses Yak'usda ndi yulhni, 'Si 'ust'ah Abraham 'en buMoodihti 'ust'ah, Isaac, 'en buMoodihti 'ust'ah, 'ink'ez Jacob, 'en chah buMoodihti 'ust'ah.' ²⁷ 'Et huwa huhukhuna hubuYak'usda int'ah, 'aw yahadla hubuYak'usda ilah ho' int'ah. 'Et 'ilhuz 'uts'un na'a 'udahni."

Ilhuk'i khunek neba yutulhúhezya, 'i deg'ha nus de'zti

²⁸ 'Ilhunuh dune Moses be' dustl'us 'uk'ununa'úsduguz, 'en 'et 'ut'en, 'ink'ez hubudánts'o 'ink'ez 'en t'éoonanzin Sizi ndunnah Sadducee soo ndo budáni. 'Et didut chah Sizi yoodulh'kut, "K'us ndai khunek neba yutulhúhezya, 'i k'us de'zti?" ²⁹ 'Et Sizi 'uyúlhni, "Ndi deg'ha nus de'zti, 'i int'ah, 'Israel budune, oozéllhts'ai, neMoodihti 'en Yak'usda unli. 'En zeh 'ilhunuh Moodihti int'ah. ³⁰ Yak'usda nuhMoodihti nuhdzi ndulh'cho, 'i be, nuhzul ndulh'cho, 'i be, 'ink'ez nuhwubeni ts'iyawh ndulh'cho chah." ³¹ Whulh nat khunek higha nélh'a, 'i chah deg'ha nus de'zti, 'i int'ah, 'Nts'e na'a nuhwhenich'oh k'enahdutsi, whuz na'a nuhwulh dune chah buk'eohtsi.' 'Aw 'uyoo khunek higha nélh'a, 'i ndi nankoh 'o nus de'zti, 'i hoolah." ³² 'Et ndun Moses bughunek 'uk'ununa'úsduguz, 'en Sizi 'uyúlhni, "Nehodulh'eh soo' denja! Khunek 'al'ha int'ah, 'i be yailhtuk! Deg'ha ndoh Moodihti 'en zeh Yak'usda unli, 'aw 'uyoon Yak'usda cha'ilah. ³³ 'Ink'ez dune budzi ndulh'cho 'i be Yak'usda yuk'eootsi' huba' hoot'ah, budeni ts'iyawh 'i be, buzul be, bunut'uk ts'iyawh, 'ink'ez dich'oh k'enadutsi' chah, whuz na'a bulh dune hubuk'eootsi'. 'Et deg'ha nus neba hooncha ndi nankoh khunek yug'ha nélh'a, 'i buk'úne' ts'oot'en. Khunai 'ink'ez 'uyoo hoonliyaz Yak'usda bukw'uzdai k'ut Yak'usda bug'ha idézk'un, 'i ba 'o nus whudezti." ³⁴ Sizi t'éoonanzin dalcho 'i be whunih k'una'a 'udéja 'et ndi yúlhni, "Aw 'et nilhduk'w hoh Yak'usda k'úne' nyul'en tele." 'Et hukw'elh'az 'aw 'udun hukwa chahiyoodílhkulh hiyéntsaz 'et huwa.

Christ, 'en nts'e na'a David buts'u haínzut, 'et hukwa hiyoohulh'kut

³⁵ 'Et Sizi, 'en Lizwif hubuluglez whucho dune hoodulh'eh hoh huboodulh'kut, "Nts'e na'a ndunnah Moses be' dustl'us 'uk'ununa'úsduguz, 'Christ 'en David buts'u hainzut tele ho' int'ah, hutni?" ³⁶ 'Et David, 'en Ndoni bug'ha 'et ndutni, 'Moodihti 'en suMoodihti 'uyúlhni njan nalnih ts'ih sug'ha sinda. Hoh t'eh sih nch'a húdetni, 'en buk'ut nke naóolhyis mba hóhshilh.'

³⁷ David dich'oh, 'Sumoodihti, 'yúlhni, 'et nts'e na'a Christ 'en David ts'ih haínzut wule?" 'Et nyoh dune, 'en huhóont'i hoh hidants'o.

Sizi dune ndo búlhni, "Ndunnah Moses be' dustl'us 'uk'ununa'úsduguz, 'en buch'a kháhdi"

³⁸ 'Et Sizi hubodulh'eh hoh 'et ndo búlhni, "Ndunnah Moses be' dustl'us 'uk'ununa'úsduguz, 'en buch'a kháhdi. Ndunnah 'e'óoket bakoo 'et dune tah hoh nahúduchun t'asus nyez be húdelhts'i, 'ink'ez dune hubaoodelhti hukwa ne'hutdudul'en. ³⁹ Njan luglez ndet huntel'ilh, 'et 'utaháoodet'aih, 'ink'ez dune dahúlih teh, 'et chah k'us whudezti, 'et didut nátl'ahudadaih.

⁴⁰ Tsandelh chah khábonut'ah, 'ink'ez bukoo huwa hahuwhút'aih. 'Ink'ez ncha ná'hadudil'i hoh sa cho tenahududli. 'En 'et hukw'elha 'o nus dzuh nahútezut ho' hint'ah."

Tsandelh sooneya huwa iné'ai

⁴¹ Lizwif hubuluglez whucho sooneya dekat, 'et Sizi usda, 'ink'ez hubunilh'en sooneya dehínudzaih. Lhanah soode'a 'uhint'ah, 'en sooneya lhai hoh dehínudzaih. ⁴² 'Et 'ilhunuh tsandelh tel'en, 'en 'óh wheghah uyalh, 'ink'ez nankoh sooneyayaz dénalhdel.† ⁴³ 'Et Sizi yugha hoodul'eh ts'un bé' buntel'húnik 'ink'ez ndo búlhni, "Nuhwhudúсни ndun tsandelh tel'en, ndunnah ts'iyawh huba nus lhai 'i denandzai ho' 'int'ah. ⁴⁴ Ndunnah 'uyoon, 'en ndai hiye soode'a 'int'ah, 'i 'un hakat, 'i 'uhiyulh'en dehínudzaih. 'Et ndun lhe'int'ah tel'en ndai 'aw 'i yit'i, 'i yuk'ekhutenaal, 'i whunts'ih ts'iyawh deyándzai."

13

Njan Lizwif hubuluglez whucho hoolah whutéeh, 'et Sizi huwu yailhtuk

¹ 'Et Sizi Lizwif hubuluglez whucho tinanja hoh 'ilhunuh yugha hoodul'eh ndi yúlhni, "Nehodilh'eh whunilh'en, njan luglez whucho 'ink'ez tse chah 'i lhe'íldzoo 'i be 'uhóolya." ² 'Et Sizi 'utni, "Njan koo whucho whuzda whunulh'en ih? 'Aw lhuk'i tse 'i whunts'ih lhk'uchaditésdal, 'i ts'iyawh nadúntejullh ho' hoont'ah."

Ndan Sizi Gri hinedulh, 'en hiye dzuh nutezut, 'i hubugha hubulh yátelhtuk

³ 'Aw 'et Lizwif hubuluglez whucho huwanch'az dzulhyaz Olive hiyúlhni, 'i k'ut, 'et Sizi usda. Peter, James, John, 'ink'ez Andrew chah, 'et dune hoolah, 'et Sizi hiyoodulhukut. ⁴ 'Et hiyúlhni, "Nedíni nket'ah 'uwhuténilh? 'Ink'ez ndet huwa t'ets'ontézin daóotenilh hoh 'et neóotelts'ulh?" ⁵ 'Et Sizi ndo búlhni, "Huwuhli dune nanwhanoo'ah gunih. ⁶ Lhanah dune whusahútedulh 'ink'ez soosi bugha 'uhudutenilh, 'Christ 'ust'ah!' 'Et nduhútni hoh dune lhanah nahuntet'ah. ⁷ 'Et nuhgha ha'nóojoot gunih. Nilhdukw dune lhutedughan whulh 'uhudzuts'ai, 'ink'ez nilhdza lhuhudughan whulh 'uhúdzuts'ai t'eh, 'en ndoh honeh huba' hoont'ah. 'Et whunts'ih 'awhuz whulatah ilah ho' hoont'ah, 'awhuz 'udun chah whusawhútekuh ho' hoont'ah. ⁸ Lhelhts'un keyah whut'en, 'en lhch'a nihúdatedulh, 'ink'ez lhelhts'un hubudayi cho hinane'ut'en 'en chah lhch'a nihúdatedulh. Nduhóolhcho yun chah natughetnah, 'ink'ez dai chah whutéeh 'ink'ez nduhóolhcho hoh dune dzuh nulluwhuteldh. 'Et nduwhút'en sulí t'eh, t'ewhuntehzin 'o nus hooncha nuté'whut'en. 'Et dzuh nutehdeh k'an ho' whe'whudit'en. ⁹ Nuhwhenihch'oh chah huwahli. Keyah huwunli but nenówhutelleh 'ink'ez luglez koo 'et chah yanwhuts'utelht'oh. 'Et si sugha ndunnah moodih 'ink'ez hubudayi cho chah bubut ninhótelleh, khunek unzoo, 'i be hubulh yaoolhtuk ka. ¹⁰ 'Ink'ez 'udechoo ndi yun k'ut ndulcho dune ts'iyawh khunek unzoo, 'i bugha hubulh yatetuk. ¹¹ Tsak'e nawhuanla 'ink'ez naheyelh but nenóhnilhti t'eh, dája dutehnilh, 'aw huwu ni wahle gunih 'ink'ez nuhdzi dóoghel. 'Et níóoninzut t'eh, 'ants'ih ndai nuha dánkát, 'i be yaoolhtuk, Ndoni bughunek 'i be yatelhtuk. ¹² Dune, 'en dulhutsinkah dahúetsah huwa butel'eh. 'Et hube'abákah 'en chah, buzukkeh 'en ndúbotel'h'ilh, 'ink'ez 'uski, 'en chah, hube'ama 'ink'ez hube'abá, 'en hubuch'a nahútel'ah 'ink'ez dahóotsah hukwa' hubutelilh. ¹³ Si sugha sunehdulh huwa ts'iyannah nuhts'uh dútetnik. 'Et whunts'ih ndan 'udek'elh'az whuts'un whechahítsaz, 'aw 'en zeh hudutejih."

Degha nus whewhúnujut 'et

¹⁴ "Ndan degha nus be whunjut, 'aw buba cha'hóot'ah 'et siyin nulh'en t'eh, (ndi yuk'é yalhtuk soo cho nuwheni taóodoolts'it. Daniel, Yak'usda be nus whúnilh'en, 'en 'uda húwu yailhtuk íne). Judea hudelhts'i dzulhyaz k'uz ts'ih, whuz tsi hutoolhdelh. ¹⁵ Dune bukoo hukw'ut* usda t'eh, 'aw bukoo ts'ih nuchátesdal 'ink'ez ndai be'ildzun yutelelh, 'i 'aw nayóolchoot gunih! ¹⁶ 'Ink'ez dune haniyeh k'et 'ut'en chah, 'aw bukoo ts'ih nayítsuz kunaóoda gunih. ¹⁷ Dahoolcho 'i be whéwhunujut tele, hoh t'eh ts'ekoo, 'úlchan 'int'ah t'eh, 'ink'ez buzkeh yé'ulht'ukw chah. ¹⁸ Njan dzuh nutehzut whuch'a ténadoohdi 'et khi 'uhoneh whuch'a. ¹⁹ 'Et Yak'usda yun inla k'an dzin whuts'un 'aw cha'whúsne 'ink'ez 'aw 'et 'ulcho 'i be whutsuh da hiye dzuh nulháulzut, 'i be dzuh natezut. ²⁰ 'Et whunts'ih neMoodihti lhat dzin hoh k'ah ná'hoonla. 'Et nduchánil t'eh, 'aw 'ilhunuh whunts'ih doojih ghait'ah. 'Et ndunnah 'utaháooanla, 'en bugha' hoonla hoh t'eh hoondukw whutelhtsilh. ²¹ 'Et hoh t'eh dune ndunóhowhutni t'eh, 'Nulh'en njan Christ 'en njan usda!' K'us, 'Ngut usda!' nuhuwhútni t'eh, khun teh nuhwhuba 'alha' 'uhudooni gunih. ²² 'Et whunts'ih ndunnah Christ ná'dudil'i, 'ink'ez nus whúnilh'en ná'dudil'i chah, 'en lhanah hitele hoh lhat teh huwa ne'ut'en 'ink'ez hooncha túne' hutet'en, ndunnah Yak'usda 'utuhaóoanla, 'en whunts'ih nabunoo'a hukwa' butel'ih. ²³ Ahoohlhyez tsi hóohli! Ts'iyaintuz whutsuh da 'un whudáni.

† 12:42 Ndi sooneya deghanus chaditi, 'i 'int'ah.

* 13:15 Lhat Lizwif hubukoo, 'et bun k'ut lhk'eodeez'a.

Yinkak dune ye' whusatéyáh

²⁴ “Et hukw'elh'az dune dzuh nuhuzde t'eh, sa 'i chah dulhgus tele,

'ink'ez 'ulh'ek oozá chah 'aw be chawhest'en tele.

²⁵ Sum chah natekulh 'ink'ez nduk yaz be hóolhtus, 'i be notughetnah.

²⁶ Hoh t'eh yinkak dune ye', 'en ndoh kw'us tah bé wheóonujut ye ulhtus, 'i bulh 'ink'ez Yak'usda buts'u hayánduz, 'i be ndoh be wheóoduteltsilh. ²⁷ 'Ink'ez bulizas 'en haóobutelh'alh, ndus de, n'az de, niz de, 'ink'ez ndaz de, 'ink'ez ndi yun k'ut 'ink'ez yaz chah ndulhcho hoh Yak'usda ndunnah 'utaháooanla 'en 'ilohhubutughélelh 'et wheni.”

Mai chun, fig hiyulhni, bumai 'i be bugha whúts'odul'eh

²⁸ “Ndi mai, fig hiyulhni, buduchun, 'i be buk'unats'uwulhnik be whuts'odul'eh, 'i soo ts'ah'un boodulhú'eh. Ndi 'i 'int'ah, buzooschum delghih t'eh, 'aw 'et but'an whulhlhnh, 'i bugha t'oonáhnun 'aw 'et shen nilhduk wuli. ²⁹ 'Et ndez na'a ndun whudúsní, ndet whusawhé'ten whuté'lh'en t'eh, 'et sih whuz na'a zeh t'oonóhzn 'aw 'et nilhduk w' whe'oodutet'ilh. ³⁰ 'Alha ts'ah'un na'a 'un whudusni, k'an ndoh whudezulh 'aw yachahútesda, 'et njan ndó tenilh, ts'iyawh 'et lhawhúdutenilh, 'et whuts'un. ³¹ Yaz 'ink'ez ndi yun k'ut 'i chah hoolah whutele. 'Et whunts'ih ndi sughunek 'aw hoolah chatesdle.”

'Aw dune nt'éonízun ndet dzin 'ink'ez nts'oh huwa whudezulh hoh 'uwhuténilh

³² “Aw dune t'oonízun ndet dzin k'us nts'oh huwa 'uhunet'oh 'et whusawhútelts'ulh. 'Aw lizas yak'uz hudelhts'i, 'ink'es Yak'usda buYe' whunts'i 'aw t'ehonízun, se'abá dich'oh zeh t'oonínzun. ³³ 'Ahoohyez huwahli 'ink'ez tenadahdli. 'Aw nt'éonuzáhnun nts'oh t'eh whusawhútelts'ulh. ³⁴ 'Et ndez na'a 'uwhtenilh, 'ilhunuh dune bukoo huwu tezya 'ink'ez hiba 'ut'en 'et 'en nibuninla 'ilho hinli hoh dude 'ut'en 'uhoohl'en ka, 'ink'ez 'et ndati huwunli ndi yúlhni, 'Soo cho huwonle!' ³⁵ 'Et whuz na'a nuhwhudúsní, huwahli! 'Et nts'oh teh bukoo humoodih whusanatedalh 'aw nt'éonuzáhnun, hulgha tulih, tuzniz tulih, yilhkaz tulih, k'us sa ha'ai t'eh tulih. ³⁶ 'Et huwa 'ahoolhyez lhadáht'ah. 'Aw hukwa tsi chawhahlih 'ink'ez naneynt t'eh, nuhche tulih nuhwhumoodih nuhghun naooja. ³⁷ 'Et daja nuhwhudúsní, 'et ts'iyannah chah ndo budúsní, huwahli!”

14

Sizi whu'izyaz hikunuta hituzelghelh ka

¹ 'Awhuz nat dzin whuz'ai Lizwif Hubutus Lhuseya* whewhúnahulnih 'ink'ez lhes chantulhúdh, 'i ts'uyi, whewhúnahulnih chah, 'et náwhulnuk moodih 'ink'ez Moses be' dustl'us 'uk'ununa'úsduguz, Sizi whu'izyaz hikunúta hituzelghelh ka. ² 'Et 'uhutni, “Njan butus lhuseya, 'et whutah ilah 'uts'ooléh, dune lhtahohót'alh 'et whuch'a.”

Bethany 'et ts'eke Sizi k'unuts'újul yutsi k'eyílhdze

³ 'Ilhunuh keyah wheyaz Bethany huwhútni, 'et Simon buka whulhjut ínle, leprosy hiyúlhni, bukoo 'en Sizi yuzih 'usda. 'Et na'ut'alh hoh ts'eke k'unuts'újul dezti, 'i tse be idézbun, 'ink'ez 'i be buda' deldze ye'alh hoh danínya. Ndi 'i lhts'eyalhkut 'ink'ez k'unuts'újul 'i Sizi yutsi k'eyílhdze. ⁴ Bulunah dune hukwa humí'ch'e 'ink'ez ndulhóhudutni, “Et di ka ndi k'unuts'újul 'ants'i 'et tinta' yulh'ih. ⁵ Dezti hoh bé' ts'onket t'eh† 'ink'ez da sooneya tehel'en hubugha ts'ínoodzaih,” hutni, 'ink'ez koo ts'ih ts'eke tube cho hich'a yá'lhutk. ⁶ 'Et Sizi ndo búlhni, “Buts'áhachaoozah'ak! Di ka tedulhlih? 'Ut'en unzoo, 'i suba inla ho' 'int'ah. ⁷ 'Ahoohyez tehel'en nuhwhunat whutéle. Ndet hukwá' nahzun t'eh, hubula 'ooh'ten. 'Et si 'ahoolhyez huba nuhwhúbulh cha'tuzest'il ho' hooht'ah. ⁸ K'unuts'újul, 'i suyst'e yúk'eyílhdze 'adutes'alh wheni lhasúdinla. Ndun ts'eke 'aw 'o 'un 'ooneh ghaít'ah, 'et 'uhóonla ho' 'int'ah. ⁹ 'Alha 'un whudusni, ndi yun k'ut ndulhcho hoh ndi khunek unzoo, 'i nudutekat, ndun ts'eke ndet 'uhoonla, 'et hukw'u naootetnuk, 'et hoh dune yunatelnih.”

Judas, 'en Sizi ye 'óotekulh hukwa' nínzun

¹⁰ Lanezi 'o 'at nanah yugha hoodul'eh, 'ilhunuh Judas Iscariot hiyúlhni, 'en Lizwif bunáwhulnuk bumoodih buts'un whinya Sizi hubut'l'áitelhtelh ka. ¹¹ Dája ndo búlhni huhóont'i 'ink'ez sooneya hits'óozi. 'Et Judas, 'en Sizi ye 'óotekulh, 'et hukwa hités'en.

Sizi 'en yugha hoodul'eh butus lhuséya whunahutelnih, 'et hubulh na'ut'alh

¹² 'Et 'udechoo dzin lhes chantíldoh, 'i nahíyut'alh, 'et dzin sheeppaz na'hitet'alh, 'i naihizulghih, ndi sheeppaz Lizwif Hubutus Lhuseya huba 'int'ah. 'Et Sizi yugha hoodul'eh

* **14:1** Nawhudezulh totsuk 'ilohuwudulh 'ink'ez ndi sheep k'us unzoo 'i nahiyut'alh. Njan whunahulnih 'oh da Yak'usda yun k'ut Egypt whuch'a hanaóoanla da. † **14:5** Tehul'en ba 'iluh yus k'ut yuk'elha 'et'en, 'et 'uneltsuk.

'uhíyúlhni, "Nts'e netalh'alh ndi na'tant'ulh, 'i mba lházdutelih?"¹³ 'Et Sizi nanah, 'en wheóobalh'a 'ink'ez ndo búlhni, "Jerusalem ts'ih ah'us 'ink'ez dune too nulhtun, 'en sih nuhdudóoya. Nts'e bukoo tezya whuz bun tooh'as,¹⁴ 'ink'ez bukoo be'ildzun njan du-doohtni, 'Dune hoodulh'eh njan ndutni ndet sugha hoodul'eh bulh Hubutus Lhuséya huwa na'uztet'alh bukoo negho téh'alh ih?"¹⁵ 'Et nduk hukw'uz hooncha lhaóodint'ah whunwhunoolhtun, 'et na'uztet'alh, 'i lhádoohleh."¹⁶ 'Aw 'et yugha hoodul'eh Jerusalem ts'ih whehá'az 'ink'ez Sizi soo daja ndo búlhni, ts'iyawh whuz na'a nahuhóó'ai 'ink'ez Hubutus Lhuséya wheni lhahodinla.¹⁷ 'Et hullgha 'aw 'et Sizi, ndunnah lanezi 'o 'at nanah bulh, 'en whusaháandel.¹⁸ 'Et na'hut'alh hoh Sizi ndo búlhni, "Et njan ndun whudusni 'ilhunuh nuhtah sulh ná'ut'alh, 'en se'óotekulh."¹⁹ 'Et yugha hoodul'eh hubudzi únduda hoh 'ilhunuh hinli hoh hiyoodulhkut, "Si ih 'usudíni?" hiyúlhni. 'Et 'uyoon chah ndutni, "Si ih 'usudíni?"²⁰ 'Et Sizi ndo búlhni, "Et lanezi 'o 'at nanah njan netah ndan bules sulh toonayuz'ai, 'en 'utenilh.²¹ Ndi Yak'usda bughunek 'uk'une'úgzuz, 'i 'et ndutni, 'Yinkak dune ye', 'en datetsah. 'Et ndun ye'ónket. 'En dalcho 'i be bubu wheóonujut tele.' Ndun dune 'aw chahóolel t'eh, 'et da 'o nus soo' hot'e wule da."

Sizi 'udek'elh'az na'ut'alh

²² 'Et na'hut'alh hoh Sizi lhés yílhchoot yuba tenadedli 'ink'ez taídalkhut. 'Et yugha hoodul'eh hubugha ínínla 'ink'ez ndo búlhni, "Ndi ulhchoot, 'ink'ez ah'alh. Ndi suyust'e 'int'ah."²³ 'Et lubot yílhchoot, 'ink'ez be'abá "Schanailya," yúlhni. Hubut'ayankai 'ink'ez ts'iyawh hiyetnai.²⁴ 'Ink'ez ndo búlhni, "Ndi 'i suzkai 'int'ah. Lhanah huba nadútelt'ih 'ink'ez ndi k'andit khunek 'i suzkai be nuhts'u nahuzíya.²⁵ 'Et 'alha' 'un whudusni, ndi mai too 'aw doo chah zeh naóosnai ghaít'ah. Ndet dzin ts'iyannah Yak'usda buk'úne' hutet'en 'et whuts'un, 'et ndet t'eh, ndi mai too k'an natesnai."²⁶ 'Et Yak'usda buyun be hújún 'ink'ez ndoh dzulhyaz k'uz Olive be hóodzi whuz whehandel.

Sizi, 'en Peter 'uyúlhni, "T'esunuzínzun dutanilh"

²⁷ 'Ink'ez Sizi ndo búlhni, "K'an 'ulh'ek nuhwheni ts'iyawh sukayátehle, 'ink'ez si sugha tintuz telhúwus, ndi Yak'usda bughunek ndutni, "Et huwa Yak'usda 'en sheep ghuñli yutuzelghelh 'ink'ez ndi sheep ts'iyawh lhtatelwus."

²⁸ 'Et dinadusja hukw'elh'az t'eh, 'et yun k'ut Galilee ts'ih nuhtsuh tesyah."²⁹ Peter ndi yúlhni, "Ts'iyannah nkaya tele, 'et whunts'ih 'aw si ilah!"³⁰ 'Et Sizi ndi yúlhni, "Peter, njan whunaoolnih, 'en 'ulh'ek ligok dune nat 'uduténilh whutsuh, tat 'et 'T'esunuzínzun,' dutanilh."³¹ 'Et Peter soo khunek ulhtus, 'i be ndutni, "Nyulh datésah 'et whunts'ih 'aw t'enyunuzúszun doosni ghaít'ah." 'Onghunnah yugha hoodul'eh chah ts'iyawh whuz na'a nduhútni.

Sizi, 'en Gethsemane 'et tenadedli

³² 'Et 'ilhunuh haníyeh k'et Gethsemane huwhútni ts'ih wheháandel 'ink'ez Sizi yugha hoodul'eh ndo búlhni, "Njan delhúts'i. Si nye'un tenadetsdli."³³ 'Et Peter, James 'ink'ez John teh 'o 'un hubulh when'az. 'Aw 'et buyust'e 'i be tso be teni'nelhts'it 'i buk'edilts'ut,³⁴ 'ink'ez ndo búlhni, "Suzul tube tso sulí, 'aw 'et datesah 'et suts'un whelhts'ulh ho' hoont'ah. Njan delhúts'i 'ink'ez howohleh."³⁵ 'Et 'o 'unyaz nenínya 'ink'ez nachanétno. 'Et tenadedli hoh ndutni, njan huba whusawhutelts'ulh, 'et whuz na'a senghoholts'it t'eh 'et ndoh honeh.³⁶ 'Ink'ez ndi yúlhni, "Abba, 'aBá, nyun zeh ts'iyaintsuk nk'úne' whut'en. Ndi be dzuh nuteszut suba hoolah nahoolhtsi, 'et whunts'ih si hukwa' nuszun ilah, nyun hukwa' ninzun hukw'u na'a 'et ndoh honeh."³⁷ 'Et ndunnah tanah yugha hoodul'eh nahunéstez hoh bughu nanja 'ink'ez Peter 'uyúlhni, "Simon nanenti hoh ih 'unint'ah? 'Aw ih 'astl'iyaz whunts'i honih ghaít'ah?"³⁸ 'Ink'ez ndo búlhni, "Howahlí tink'us nteht'uk whuch'a tenadoohdli. Nuhyéghah be tehzoo hukwa' nahzun, 'et whunts'ih nuhyust'e latet'ah ho' 'int'ah."³⁹ 'Et doo chah 'o 'un whenaja 'ink'ez whutsuh da tenadedli whuz na'a zeh tenadedli.⁴⁰ Doo chah zeh yugha hoodul'eh, 'en nahunéstez hoh bughu nanja 'aw huhoonih ghaít'ah 'ink'ez 'aw whé' hidooni hooyah.⁴¹ Whulh tat bughu nanja 'et ndo búlhni, "Whute sahtez 'ink'ez nahúyis. 'Aw 'et whusawhélt's'ut, soo cho whunulh'en, yinkak dune ye', 'en dune ntsi' butl'ahítelhtel.⁴² Dinadahdelh! 'Uztoodelh! Nulh'en ndun dune se'óotekulh, 'aw 'et nyoh hiyalh."

Sizi 'aw 'et hiyilhchoot

⁴³ 'Et 'awhuz Sizi yalhtuk hoh Judas 'en whusaínya. Ndun Judas 'en lanezi 'o 'at nanah whel'a 'en, 'ilhunuh 'int'ah. Dzuh sa inle Lizwif náwhulnuk bumoodih, Moses be' dustl'us 'uk'ununa'úsduguz, 'ink'ez dune tsuh whudelhdzulh chah, 'uda buts'un nuséya, 'ink'ez Sizi ye búts'e'onket. 'En Judas buts'un whenáhiyalh'a, 'ink'ez dune lhanah yulh údulh soh cho chah 'ink'ez tuz chah hiyelleh hoh whusaháandel.⁴⁴ Héduhlh hoh Judas ndo búlhni, "Ilhunuh dune bunenk'us k'ut nadests'ooz, 'en wahgooh 'ink'ez bugha 'óohli hoh tóolhte!"⁴⁵ 'Et

huwa Judas Sizi yughu ninya ibulh ndi yulhni, “Dahooja, Rabbi,” ‘ink’ez naindunants’ooz. ⁴⁶ ‘Aw’ et Sizi hiyilhchoot ‘ink’ez duts’o cho hiyoontun. ⁴⁷ ‘Et whunts’ih ‘ilhunuh Sizi zih siyin soh cho hayálhtsus ‘ink’ez Lizwif náwhulnuk degha nus dezti be ‘ulhna, ‘en yudzo k’uz habe’yahl’t’o. ⁴⁸ ‘Et Sizi ndo búlhni, “Et di ka soh cho ‘ink’ez tuz chah nahle ‘ink’ez ‘undunust’ih hukw’u na’a skaootehdel?” ⁴⁹ Dzin totsuk nuhwhubulh ‘úst’ah ‘ink’ez luglez whucho whunwhudulh’eh, ‘et di ka hoh da chasulhchulh inle. ‘Et whunts’ih Yak’usda bughunek dája ni whuz na’a ‘uhóneh huba’ hoont’ah.” ⁵⁰ ‘Et ts’iyawh yugha hoodul’eh hich’a sudel ‘ink’ez tinta hulghaz. ⁵¹ ‘Ilhunuh chilh naih ts’ut’on, ‘i zeh khaíwesdúduz, ‘en Sizi yuneyalh. Ndun chilh ‘en ‘uyoon chilhkah hiyoohlchoot. ⁵² ‘Ust’et whelgai hoh naih zeh hubula k’éyano.

Sizi ndunnah naheyelh ‘en hibut nihínihya

⁵³ ‘Et Sizi hiyilhchoot ‘ink’ez Lizwif náwhulnuk degha nus dezti bukoo ts’ih whehíyahl’ti. ‘Et Lizwif náwhulnuk bumoodih, dune tsuh whudelhdzulh, Moses be’ dustl’us ‘uk’ununa’úsduguz chah ‘ilhuhowezdel. ⁵⁴ Peter ye niz de hubuneyalh. Lizwif náwhulnuk degha nus dezti bukoo ‘et whuna’nesdut’oo, whuz bughu danínya. ‘Et howuhinli buzih natl’adeda ‘ink’ez na’dunildzilh. ⁵⁵ Lizwif náwhulnuk bumoodih ‘ink’ez naheyilh chah ‘en hibut Sizi nihínihli hituzelghelhel hukwa highu nahó’al’h hukwa’ hut’en, dune yuch’a yaoolhtuk nahóolhtelhel hukwa’ hut’en, ‘et whunts’ih ‘aw’ ‘ilhunuh nachahilhtel. ⁵⁶ Lhanah dune huwhuts’it hoh hich’a yailhtuk, ‘et whunts’ih ts’iyawh lhelhts’un na’a ‘uhutni. ⁵⁷ Bulunah dune dihudíndel ‘ink’ez Sizi hiba whuts’it hoh njan nduhútni, ⁵⁸ “Njan ndutni hoh nenalh ‘útni, ‘Njan luglez whucho dune ‘uhóonla, ‘et nanaóoduntesyus. ‘Et hukw’elh’az tat dzin inle t’eh, ‘aw dune bula be nacha’hoollil hoh ‘udun na’whutesdlilh.” ⁵⁹ ‘Et whunts’ih ‘aw ts’ah’un lhgha ‘úhudooni ghaít’ah. ⁶⁰ ‘Et Lizwif bunáwhulnuk degha nus dezti hubutah didinya ‘ink’ez Sizi ‘uyúlhni, “Ndunnah dune nch’a yahúhtuk daja dutenilh?” ⁶¹ ‘Et whunts’ih Sizi t’edusnih ‘ink’ez ‘aw yachatíhtih. ‘Et doo chah náwhulnuk yoodulhukut, “Nyun ih Christ ‘int’ah? Yak’usda dezti buYe’ inli ih?” ⁶² Sizi ‘et ndi yúlhni, “A, ‘en ‘ust’ah, ‘ink’ez nuhwheni ts’iyawh yinkak dune ye’, hiyuntel’ihl Yak’usda bugha nalnih ts’ih sida hoh ndus de kw’us tah hanátedal’h.” ⁶³ ‘Et ndun náwhulnuk tube hunlch’e k’et dunaih lhts’e yalhch’ul ‘ink’ez njan ndutni, “Aw’ o’ un ‘uyoon ts’oodolhukut ghaít’ah. ⁶⁴ Ndi bughunek Yak’usda yech’a yailhuk, ‘i dahts’o! Nuhwhuba dáhoont’ah?” ‘Et ts’iyawh ‘úhutni, “Daóotsah huba’ hoont’ah.” ⁶⁵ ‘Et bulunah highá whenduninzoh, hina ka’dal’h’oo ‘ink’ez hiyoonukut cha’ hiyulh’en ‘ink’ez, “Ndan nyunezkuk?” hiyúlhni. ‘Et ndunnah dune ghunli hiyilhchoot ‘ink’ez ‘en chah hiyoonankat.

Peter ‘utni, “Sizi ‘aw t’enuzúszun.”

⁶⁶ ‘Et Peter ‘onghoh nanestl’oo bet ‘ut’en hoh Lizwif bunáwhulnuk degha nus dezti ts’ekeyaz yuba ‘ut’en ‘ut’en, ‘en wheghah úyah. ⁶⁷ Peter na’dunildzilh yutelh’en ‘ink’ez ndi yúlhni, “Nyun chah Sizi Nazareth whut’en bulh ‘int’en inle.” ⁶⁸ ‘Et Peter ‘utni, “Aw t’éoonuzúszun ndet ‘uwhudini,” ‘ink’ez ‘az whenya. Soo ‘aw’ et lígok dune ‘udéja. ⁶⁹ ‘Et ts’ekeyaz njan ‘et ya’en ndunnah hoh nuhudelhúya chah ‘et ndo búlhni, “Ndunnah ‘en chah ‘ilhunuh ‘int’ah.” ⁷⁰ ‘Et whunts’ih Peter doo chah, “Awundooh!” ni. ‘Et astl’iyaz inle ndunnah hoh nahudelhúya, ‘en chah Peter ‘et ndi hiyúlhni, “Alha nyun chah ‘ilhunuh ‘unint’ah. Nyun chah Galilee hoont’en ‘unint’ah, whuz na’a yailhtuk ‘et huwa.” ⁷¹ ‘Et Peter ‘utni, “Ndukni bunalh, ‘alha’ dusni ho’ dusni, ndun dune ‘udáhni, ‘aw nt’enuzúszun!” ⁷² ‘Et lígok dune whulh nat ‘udeja. ‘Et Peter Sizi dája yulhni whunalnik, “Lígok dune nat ‘uduténiil whutsuh, ‘et tat t’esunuzúszun dutenilh.” ‘Et huwun ni ninzut ‘ink’ez intse.

15

Sizi Pilate yubut nenínya

¹ ‘Et bundada ‘uda Lizwif náwhulnuk moodih, dune tsuh whudelhdzulh, Moses be’ dustl’us ‘uk’ununa’úsduguz, ‘ink’ez dune ba naheyilh chah, ts’iyawh yahalhtuk. ‘Et Sizi hiyulhghel ‘ink’ez Pilate tl’ahíyahl’ti. ² ‘Et Pilate ndi yúlhni, “Nyun ih Lizwif hubudayi cho inli?” ‘Et Sizi ‘utni, “Alha’ dini ho’ dini.” ³ Lizwif náwhulnuk moodih lhat Sizi hich’a yalhtuk, ‘ink’ez hiba honts’it, ‘et whunts’ih Sizi t’edusnih. ⁴ ‘Et Pilate doo chah Sizi yoodulhukut, “Daóonelsuk nk’ehuhó’oi, ‘et hubugha ‘aw ih dája chadutuzanil?” ⁵ ‘Et doo chah Sizi ‘aw yachatíhtih. ‘Et Pilate buba hooncha.

Pilate Sizi datétsah whuts’uyúlh’a

⁶ Naoodezulh totsuk Lizwif butus lhuséya whunahulnih, ‘et ‘ilhunuh dune tsak’esda Lizwif ‘utahíyulhtih, ‘en Pilate yula nadutnih. ⁷ ‘Et hoh da ndunnah lhtahuwhunt’ái da dune lhtughan ts’iyawh tsak’ebahanla. Barabbas ‘en chah hubutah tsak’esda dune selghih hukwa. ⁸ Ts’iyannah ‘ilhuhowezdel ‘ink’ez Pilate ‘uhiyúlhni, “Nawhudezulh totsuk

'ilhunuh dune tsak'esda 'en bulanadantnik. Doo chah 'et ndoneh.'⁹ 'Et ndo búlhni, "Lizwif hubudayi cho, 'en ih bulanadutesnih hukwa' nahzun?"¹⁰ Dich'oh soo t'eeonínzun Lizwif náwhulnuk bumoodih 'oonih bugha Sizi hitl'ahiyálhti 'et huwa.¹¹ 'Et whunts'ih Lizwif náwhulnuk bumoodih dune huba nus hódélhti, Barabbas 'en Pilate yulanadootnih hidóoni ka.¹² 'Et Pilate doo chah dune 'ilhuhowezdel ndo búlhni, "Ndun Lizwif hubudayi cho dáhni datésdlih hukwa' nahzun?"¹³ 'Et tube cho 'uhiyúlhni, "Lhdulalhugus yundunilht'ah!"¹⁴ 'Et Pilate ndo búlhni, "Ndet hoh tink'us 'úja?" 'Et whunts'ih 'o nus 'uhutni, "Lhdulalhugus yundunilht'ah!" hutni.¹⁵ 'Et 'ilhuhowezdel 'en huhót'i ka Barabbas 'en Pilate huba yulanadetnik. 'Et Sizi yahiyalhtsus, 'ink'ez lhdulalhugus k'ehiyoolhtel ka butl'ayálhti.

Nehughan Sizi highu nolhúya

¹⁶ 'Et nehughan moodih* bukoo whuna'nesdul'too, 'i tuz ts'ih Sizi dahínilhti 'ink'ez 'onghoh nehughan ts'iyawh buka' hudáni.¹⁷ Naiyits'uz dulk'un, 'i Sizi higha híwezduz. Whus nahínelhwut, 'i hitsi nihída'ai.¹⁸ 'Et hidélhti lahoohóolh'i, 'ink'ez 'uhiyúlhni, "Lizwif hubudayi cho sa cho khona."¹⁹ Duchun be hitsi ts'e' nalht'o, highá dízoh, hibut dugwútsi be nihúdulh, 'ink'ez hibut nachánuldulh cha' hiyulh'en.²⁰ Sizi highu núwhulhya 'ustl'e' 'uhiyínla hukw'elh'az nayits'uz dulk'un, 'i highu nahiyílchoot, 'ink'ez dich'oh bunaih be nahiyálhti. 'Aw 'et lhdulalhugus k'ehítelhtel ts'ih hítelhti.

Sizi lhdulalhugus k'ehiyílhti

²¹ 'Et hedulh hoh 'ilhunuh dune, Simon hiyúlhni, Jerusalem ts'ih tezya. 'En hidudezdel 'ink'ez Sizi bulhdulalhugus yuba idutetilh ka, 'et nihíneyoot, ndun Simon, 'en Cyrene whut'en, 'en Alexander 'ink'ez Rufus 'en hube'abá 'int'ah.²² 'Et Sizi Golgotha huwhútni ts'ih lhgha hídilhti. Ndi Golgotha 'utsints'un nez'ai hutni ho' hutni.²³ 'Et mai too 'ink'ez yoo, myrrh hiyúlhni, hitaídenla, 'i Sizi hiyíhiyoolhnaí hukwa' hiyínla, 'et whunts'ih 'aw chaítítnil.²⁴ 'Et lhdulalhugus k'ehiyílhti 'ink'ez bunaih 'i higha 'aínlih hoh lhtahiyulya.²⁵ Bundada 9:00 'uhunet'oh bat'en Sizi lhdulalhugus k'ehiyílhti.²⁶ Ndet hukwa' hiyínla hutni, 'et 'uk'e'hanguz, 'i higha ndoh huwuhidi'ai. Ndi khunek hík'e'anguz, 'i ndutni,

Lizwif hubudayi cho, ni.

²⁷ Nanah 'uhundunut'ih chah hiyulh lhdulalhugus k'ébuhilhti, 'ilhunuh bugha náilhni ts'ih 'ink'ez 'ilhunuh bughe 'intl'as ts'ih.²⁸ 'Uda Yak'usda bughunek 'uk'une'úsduzuguz, 'i whuz na'a 'uhóoja ndutni hoh, "Dune ntsi' dult'ah huninzun."²⁹ Dune whúghha hoh nahúdelh nohóndunul'us 'ink'ez Sizi highudloh, "Lhoonk'a! Nyun lah 'udini, 'Luglez whu-cho yanawhutduntanyus 'ink'ez tat dzin na'whutanlilh,' dini?"³⁰ K'an 'ahoh nanaíndaih, 'ink'ez 'ududílyih,' hiyúlhni.³¹ Whuz na'a Lizwif náwhulnuk bumoodih 'ink'ez Moses be' dustl'us 'uk'ununa'úsduzuguz, 'en chah, Sizi highudloh 'ink'ez njan ndulhóduhni, "Uyoon úlhyis, 'et whunts'ih dich'oh k'an 'ududoolyih ghaít'ah.³² K'an Christ, Lizwif hubudayi cho ts'unoolh'en nanaóoja, 'et neba 'alha' 'oot'e." 'Et ndunnah nanah hizih lhdulalhugus k'ut sulhti, 'en chah highudloh.

Sizi dazsai

³³ Dzetniz 'et 'o 'un 3:00 bat'en 'uhúnet'oh keyah nduhoohlcho hoh tsahólhugus whuzdli.³⁴ Whulh skwunlai 'o 'at díit (9) hukw'e' hunít'o, 'et Sizi soo tube cho haínzul, bughunek k'una'a 'utni, "Eloi, Eloi, lama sabachthani," "SuYak'usda, suYak'usda, di ka suladantnik?" ni hoh 'utni.³⁵ 'Et bulunah dune 'et nahudelhúya hoh hídants'o, 'ink'ez 'uhutni, "Null'en! Ndun Elijah yuka hahuyih."³⁶ 'Ilhunuh whusálgai, 'ink'ez duchun bulá'del'oo, 'i mai too dunink'ooz, 'i ye tóonayuzsi, 'ink'ez nduk Sizi yuza bé' yunantan, 'ink'ez 'utni, "Kw'azi'ez! Elijah tusih whusatéyalyh 'ink'ez lhdulalhugus k'ut nanaitelhtel."³⁷ 'Et Sizi tube cho haínzul 'ink'ez dek'elh'az hanáji.³⁸ Lizwif hubuluglez whucho njan dadelhchooz, 'i bugha nduk 'ink'ez butl'az ts'ih lhts'ench'ul.³⁹ Nehughan moodih lhdulalhugus yubut siyin. Sizi nts'e na'a haínzul 'ink'ez dazsai 'et yunalh'en. "Ndun dune 'alha hoh Yak'usda buYe' unli," ni.⁴⁰ Ts'ekoo chah 'et nudelhúya yoo 'az de ts'un honilh'en. Butah Mary Magdala whut'en, 'ink'ez Mary Jamesyuz, 'ink'ez Josés bulh be'ama, 'ink'ez Salome chañ.⁴¹ 'En Sizi Galilee 'et 'ut'en hoh hiyunanézdel 'ink'ez hila 'ét'en. 'Uyoon ts'ekoo lhanah chah 'et 'uhut'en. 'En Jerusalem ts'ih hahínandel.

Joseph, 'en Sizi whuyíhiyalhti

⁴²⁻⁴³ 'Aw 'et hulhgha ts'ótezut hoh Joseph, 'en Arimathea whut'en whusaínya. 'En nahéyelh tah boozí unzoo 'int'ah. 'En, Yak'usda buk'úne' whut'en, 'et hukwa ités'en. 'Et dzin nats'ulyis dzin huba lhahúduhneñ 'úhoont'ah. Joseph soo budzi ulhtus 'udulhútsi hoh Pilate yubut ninínya, 'ink'ez Sizi buyust'e yuts'un ka' dani.⁴⁴ 'Et Pilate buba hooncha Sizi 'uda dazsai. Nehughan moodih, 'en yuka' dani 'ink'ez ndi yúlhni, "Sizi 'uda tulih dazsai?"

* 15:16 Ndun moodih Pilate 'int'ah.

⁴⁵ 'Et hukw'elh'az nehughan moodih, "Alha' dazsai," ni. 'Et Pilate, 'en Joseph 'uyúlhni, "Sizi buyust'e nailchoot." ⁴⁶ Joseph naih dezti, 'i yonket, 'ink'ez buyust'e nanáyalhti, 'ink'ez ndi naih dezti, 'i yughá iwezduz. 'Et tse 'an whuz wheyíyalhti, 'ink'ez tse cho whudunáindunelhumul. ⁴⁷ Mary Magdala whut'en, 'ink'ez Mary, 'en Josés be'ama bulh 'en bunalh, Sizi 'et nihínilhti.

16

Sizi dinadija

¹ Lizwif nahulyis dzin hukw'elh'az hulhgha ts'ih Mary Magdala Whut'en, 'ink'ez Salome, 'ink'ez Mary James be'ama chah, yoo sooltsun, 'i hiyónket, Sizi buyust'e hiye hítelho huba. ² Bundada 'uda hukw'enilghel 'et 'udechoo dzin, 'et sa haín'ai hoh, ts'un k'uz hutezdel. ³ Whuz hedulh hoh 'ulhódutni, "Tse cho ts'un k'ut whudándune'ai, 'i ndan simba neba 'udun nindunoolhmelh?" ⁴ Tse 'uda 'udun nindunelhumul hoh hotelh'en. Tse tube ndunincha. ⁵ 'Et tse 'an 'uhandel hoh chílh lheyl, 'i be dune unli, 'en náihnih ts'ih 'usda hoh hitelh'en. 'Et hubugha tube huba hooncha hoh hunelhújoot. ⁶ 'Et ndo búlhni, "Nulhújut ilah! T'eoonúszun Sizi Nazareth whut'en, Ihdulalhghus k'ehíyilhti, 'en bukunáhta hoh 'aht'en. 'Aw hoolah! Dinadija ho' 'int'ah! Njan whunulh'en ilhte 'et. ⁷ 'Aw 'et nahdulh, Peter 'ink'ez 'onghunnah Sizi yugha hoodul'eh, 'en ndo hubudóohni, Sizi dája nuwhúlhni da, nuhtsuh Galílee ts'ih téyalh 'et sih wah'en." ⁸ 'Aw 'et tse 'an tinahalgaz 'ink'ez nahutelhúghaz tube hubughá ha'nejoot 'ink'ez 'aw dune nduchahudinil, hunelhújoot 'et huwa.

Sizi Mary Magdala whut'en yunalhts'et háinya

⁹ 'Et Sizi dinadija hukw'elh'az, Lizwif nahulyis dzin bundada 'uda 'et Sizi 'udechoo Mary Magdala whut'en, 'en choo yunalhts'et háinya. 'En skwunlai 'o 'at nankoh (7) ntsi' nudúdeh, 'i ye yáhanainanyoot ínle. ¹⁰ Sizi yulh 'út'en inle hík'enude, 'ink'ez hutso hoh hubughu ninya 'ink'ez ndo budáni, ¹¹ Sizi khuna hoh ya'en, 'et whunts'ih 'aw huba 'alha' cha'dusnih.

Sizi nanah yugha hoodul'eh hubunalhts'et háinya

¹² 'Et hukw'elh'az Sizi 'uts'un na'a be hóodet'en, nanah 'uts'un keyah ts'ih he'us hoh hubunalhts'et háinya. ¹³ Hoh wheha'az, 'onghunnah hubulh náwhuhulnuk 'aw huba 'alha' cha'hudusnih.

Sizi lanezi 'o 'at 'ilhunuh hubunalhts'et háinya

¹⁴ 'Et hukw'elh'az Sizi yugha hoodul'eh lanezi 'o 'at 'ilhunuh (11) na'hut'alh hoh hubunalhts'et háinya. 'Et 'aw be 'alha' hoont'ah, 'i chahí'ih 'ink'ez 'uts'un 'uhuninzun. 'Et huwa ndunnah hiya'en 'aw huba 'alha' cha'hudusnih, 'et Sizi hukwa' hubudáni, ¹⁵ 'ink'ez ndo búlhni, "Yinkak ndulhcho hoh náhdelh, 'ink'ez khunek unzoo, 'i ts'iyawh yinkak dune wheóobunulhtun. ¹⁶ Ndan huba 'alha' hoont'ah, 'ink'ez too be 'úlya t'eh, 'en dutejih. Ndan huba 'alha' cha'hoot'ah, 'en hoontsi' hukw'u na'a huba ne'whutet'ilh. ¹⁷ Ndunnah huba 'alha' ust'ah, 'en be úlhtus hubugha ootés'ah. Si soosi bughá ntsi' nudúdeh, 'i dune ts'uh hanáhiyunteyulh. K'an khunek 'i cha be yahutelhtuk. ¹⁸ Tl'ughus ntsi' hiyílhchoot, k'us poison hétnai t'eh, 'et whunts'ih 'aw dachahutesniil. 'Ink'ez hunduda butsi k'ehudilnih, 'en chah soo ná'hutetnih."

Sizi yak'uz whenaja

¹⁹ 'Et hukw'elh'az 'et Sizi neMoodihti dune hubulh yálhtuk 'ustl'e' 'udéja hoh, 'et yak'uz whenája 'ink'ez Yak'usda bughá nálhni ts'ih nátl'adedá. ²⁰ Yugha hoodul'eh 'en ndulhcho nahúdelh, 'ink'ez ndi khunek unzoo 'i be dune bulh yahúlhtuk. 'Et neMoodihti hubulh 'út'en 'ink'ez be úlhtus, 'i hubutl'aida'ai, 'et huwa bughunek be yahulhtuk, 'alha' hutni ho' hutni. 'Et ndoh honeh.

Yak'usda Bughunek Unzoo 'I Luke Yuk'uné'uzguz

Luke ndi dustl'us ndun Theophilus ba yuk'uné'uzguz

¹ Lhanah 'uda hoolthus hoh hét'en ndi be nawhutnuk ts'ah'un na'a 'uhidáni, 'i ts'iyawh hik'e'anguz. 'Et hik'e'anguz whutsuh, 'i ts'iyawh ndi whenich'oh netah neba 'alha' int'ah. ² Soo 'udechoo whe' whudit'en 'et dich'oh hubuna be honalh'en 'ink'ez Yak'usda bughunek be ne'hút'en huzdli, 'en ndi khunek netl'ahídánla, 'i int'ah. ³ 'Et Theophilus nyun dune uncha inli. 'Ink'ez si chah ndi 'uk'une'tésguz hoh 'ust'ah. 'Udechoo whe' whudit'en whuts'un nts'e na'a dahooja 'ink'ez ndet 'uwuhulhni, 'et ts'iyawh soo ts'ah'un na'a t'eoontszun 'et huwa. ⁴ 'Et ndet 'onghun whunyohodalh'i, 'et tink'us na'a 'uhoont'ah k'us ts'ah'un na'a 'uhoont'ah, 'et ts'ah'un na'a t'ewhuntanzeh.

Zacharias bu'at, Elizabeth, 'en duneyaz buyaz tele. 'En int'ah John dune too be ulh'en int'ah

⁵ 'Et hoh da Herod 'en Judea yun k'ut hubudayi cho inle, 'et da 'ilhunuh náwhulnuk, 'en Zacharias hiyulhni, 'en Abijah bulh dédowh int'ah. Bu'at Elizabeth hiyulhni, 'en Aaron yé dinzut int'ah. ⁶ 'En nahult'ah Yak'usda nalh ts'ah'un dune 'uhint'ah. Ndet Yak'usda bughunek huba yutulhuhézya 'ink'ez ndet hubuts'u hukwa' ninzun hik'une' tet'en ka, 'et ts'iyawh hukw'ú ne'hut'en. 'Aw hoonliyaz hukwa hubuk'eho'alh gháit'ah. ⁷ 'Et whunts'ih Elizabeth 'aw buyaz hole gháit'ah tube ye'un hezulh 'et huwa. ⁸ 'Aw 'et Zacharias bulh int'ah k'una'a hoh Yak'usda nalh náwhulnuk be 'ut'en k'ah huwaghúna, ⁹ nts'e na'a 'ilhuk'i hinli hoh náwhulnuk k'una'a né'hutelelh, 'et whuz na'a Zacharias, 'en chah nawhulnuk 'utahayálhti yoo sooltsun dutélhk'un ka. 'Et neMoodihti hubuluglez whucho ts'ih danínya. ¹⁰ 'Et yoo sooltsun yudelhk'un hoh 'et nduwihulez lhanah 'az ts'ih tenahududli. ¹¹ 'Et Yak'usda buk'uzdai k'ut yoo sooltsun delhk'un, 'et nalhnih ts'ih, 'et lizas be hoodiltsai. ¹² Zacharias khun yutelh'en 'i be bugha 'uts'un 'úja 'ink'ez whenelhújot. ¹³ 'Et lizas ndi yúlhni, "Zacharias wheniljut ilah. Yak'usda ntenadudli yudánt's'o. N'at Elizabeth, 'en dune buyaz yaz tele, 'ink'ez boozí John be beootanzi. ¹⁴ 'En bugha dawhulcho be hootant'i 'ink'ez whuntélhnik. 'Ink'ez whuzdli t'eh, lhanah chah hohontélhnik. ¹⁵ 'Alha neMoodihti bunalh dune uncha tele. Mai too k'us too ulhtus, 'i chah chaitesnil. Whutele whutsuht' bu whunts'ih Ndoni be dutebun. ¹⁶ 'Ink'ez Israel hits'uh hainzut, 'en lhanah neMoodihti buYak'usda ts'ih hubutelelh. ¹⁷ 'Et nus whunilh'en Elijah hiyulhni, 'en k'una'a 'et whuz na'a Ndoni ye ulhtus, 'i be neMoodihti yutsuh teyalh. Ndez na'a njan ndotet'ilh, lhanah hubuzkekka hube'abákah hubudzi hubuts'un tezoo dutebun nabutelhtsilh. Ndan 'uk'unucha'ust'en, 'en lhanah ts'ah'un int'ah ye whunih hitélhchulh. 'Ink'ez dune, 'en lhanah neMoodihti but's'un teyalh, 'et wheni lhábudutelih," lizas ndi yúlhni. ¹⁸ 'Et Zacharias ndun lizas yoodulhukut, "Nts'e na'a t'ewhuteszeh? Nilh'en duneti 'ust'ah 'ink'ez su'at 'en chah ye 'un uzulh ho' int'ah." ¹⁹ 'Et lizas ndi yúlhni, "Si Gabriel 'ust'ah. Yak'usda zih siyin 'ust'ah. Nts'un sutélh'a nyulh yatelhtuk ka. Ndi khunek unzoo, 'i nyudutétsniilh wheni. ²⁰ Soo zélhts'ai! Sughunek daja dusni, soo 'et néwhults'ut t'eh, 'et ts'iyawh 'et ndótenilh. 'Et whunts'ih daja dusni 'aw mba 'alha' cha'hoot'ah. 'Et ndet dzin 'uwuhutenilh whuts'un, 'aw yachatuzalhtuk!" yulhni. ²¹ 'Ink'ez dune, 'en ts'iyawh Zacharias hika tsi hooli, 'ink'ez daja hoh simba int'ah, sa luglez whucho ts'ih 'ut'en. ²² Tinanja hoh 'aw hubulh yaóolhtuk gháit'ah. 'Ink'ez t'ehoninzun hoonliyaz beggah hawhelts'ut ho' int'ah. 'Ink'ez 'ants'ih huba núlhni hoh hubulh yalhtuk. ²³ 'Et hukw'elh'az ne'úle 'ustl'e' uhooja hoh, 'aw 'et bukoo ts'ih whenája. ²⁴ 'Et hukw'elh'az bu'at Elizabeth buyaz 'ucháinya hoh skwunlai sanun 'et nduwihulez 'et whu'iz inda. 'Et njan ndutni, ²⁵ 'Et whuz na'a azeh neMoodihti sulh 'ut'en. Hoh da dzin sanalih inle hoh ndet hukwaya usdli, ts'iyawh sch'ah hanáhonla."

Ndun lizas Gabriel, 'en Mary ndi yúlhni, "Uski ba' tanilh. 'En Sizi dutanilh."

²⁶ 'Aw 'et bulh lhk'utat sanun hoh Yak'usda ndun lizas Gabriel hiyulhni, 'en keyah Nazareth ts'ih wheyalh'a. Njan keyah 'et yun k'ut Galilee whuz'ai. ²⁷ Whuz ts'ih 'ilhunuh ts'eke 'aw dune yut'achaghessnak unli, 'en ts'un whel'a. 'Ilhunuh dune, Joseph hiyúlhni, 'et David hits'uh haínde, 'en 'ilhunuh int'ah. 'En yughu tedalh yuts'un lhaoodinla. 'Et ndun ts'eke 'aw dune yut'achaghessnak, 'en Mary hiyúlhni. ²⁸ Lizas yuts'uh whusainya 'ink'ez 'et ndi yulhni, "Whunélnik! Yak'usda nts'un unzoo! Nemoodihti nyulh int'ah 'et huwa ts'ekoo tah degna nus hooht'i inli!" ²⁹ 'Et yutelh'en hoh 'et tube bugha ha'nejoot. 'Ink'ez 'et howun nuni nuzut bughunek daja ni ho' 'utni. ³⁰ 'Ink'ez lizas 'en ndi yúlhni, "Mary niljut ilah! Yak'usda nyulh hooht'i. ³¹ Dája 'uski ba' tenilh. Duneyaz nyaz tele. 'En Sizi dutanilh. ³² 'En ncha tele. 'En 'uhidutenilh soo 'uk'enus 'en buYe' tele. 'Ink'ez Yak'usda neMoodihti David butsuh whudelhdzulh, ndet hukw'inda, 'et yutl'aóote'alh. ³³ 'Et whuz

na'a Jacob hits'uh hainde 'ilhuz wheni huba hubudayi cho tele. 'Ink'ez njan hubudayi cho tele, 'aw whulatah whutélah." 34 'Et Mary, 'en lizas 'uyúlhni, "Nts'e na'a 'uw'hutenilh, 'aw dune t'enuzuzsun hoh 'ust'ah." 35 'Et lizas yulh yalhtuk, "Ndoni nk'edinde 'ink'ez degna nus 'en ye ulhtus, 'i nk'ut sakwhusts'it be whútele. 'Et huwa ndi 'uyust'e lubeshi bughoh hoolah, 'i whuzdli t'eh, 'en Yak'usda buYe' hidutenilh. 36 K'an 'aw 'et nyunat Elizabeth ye'un uzulh, 'en whunts'ih duneyaz buchainya. Ndun 'aw buzkeh hole ghaif'ah hiyulhni, 'et whunts'ih 'en 'aw 'et whulh lkh'utak'i sanun be suli. 37 'Alha 'i be Yak'usda 'en 'aw hoonliyaz buba hoolhtus hoolah." 38 'Et Mary ndi yúlhni, "Daja, si neMoodihti be 'ulhna 'ust'ah! Nts'e na'a nghunek k'una'a daootenilh dini, whuz na'a sulh 'úhoneh." 'Et lizas yugho whenája.

Mary 'en Elizabeth 'astl'iyaz whuba yuzih usda

39 'Et hukw'elh'az Mary lhadúja. 'Et yun k'ut nódest'ai whuz Judea yun k'ut 'ilhun keyah whuz'ai, 'ahoh whuz whinya. 40 Zacharias bukoo daninya 'ink'ez Elizabeth dahooja yulhni. 41 'Et Elizabeth, en Mary daja ni yuduzts'ai ibulh 'uski buchan ts'ih télah. 'Ink'ez 'ahoh Ndoni be dezibun. 42 Elizabeth soo tube cho ndi yúlhni "Ts'ekoo tah degna nus hoonzoo nyulh 'uhoaja. 'Ink'ez nyaz whutéleh, 'en dawhuldzoo nghá whults'ut! 43 Nts'e na'a hoh sugha whults'ut sMoodihti 'ama 'en sughu ninya. 44 'Alha, dahooja 'usudini hoh nyuduzts'ai ibulh, 'uski schan ts'ih hoont'i k'et nüllah. 45 Ndun ts'eke buba 'alha' hoont'ah, 'en degna nus hoonzoo bugha whults'ut. Nts'e na'a neMoodihti daja yulhni, buba 'alha' hoont'ah, 'et huwa hoh teh buba ne'whutet'en."

Mary buyun

46 'Et Mary njan ndutni,
"Suzul, 'i be neMoodihti ye uncha yudélhti.
47 'Ink'ez Yak'usda súlh yih.
'En be suyégghah whuneílnik.
48 'Alha ndun be 'ulhna,
nts'e na'a yuh 'ududildzun, 'et t'ewhuninzun.
'Et whunulh'en, k'an whuts'un, nus de chah,
'ilhuz wheni ndi yun k'ut ts'iyannah soo degna nus hoonzoo bulh 'úhoaja soo 'uduténilh.
49 'Alha ndun hooncha hoh tune' sulh'en,
'en be óonujut 'int'ah 'ink'ez boozi, 'i degna nus dezti.
50 Ndi yun k'ut hudedowh, 'ink'ez 'o 'un hubundunedoh,
ndunnah 'en k'una'a hidóolhti,
'ink'ez ndan hiyé nuljut, 'en ts'iyawh hubugha te'ninzun.
51 Dugan bunut'uk 'i be hoolhtus tune' 'ut'en.
Ndunnah budzi be 'ududelhúti, 'en ts'iyawh yabanla.
52 Ndunnah dune ncha hukw'adálts'i, 'et 'en nanábanla.
'Et ndunnah te'dadildzun, 'en hincha hubulhtsi.
53 Ndunnah buye'últs'ih, 'en unzoo 'i be hubudelhbun.
'Ink'ez ndunnah soode'a, 'en 'aw hoonliyaz bughá chai'al hoh whenábalh'a.
54 Be 'ustl'en Israel, 'en hubugha te'ninzun,
'et whunalnih hoh hubula 'uja.
55 'Et whuz na'a netsuh dune hanle hubulh yailhtuk hoh Abraham 'ink'ez yuts'u hainde,
'en 'ilhuz wheni 'uhint'ah, 'et whuz na'a hubudáni."
56 'Et Mary tat sanun bat'en hoh Elizabeth yuzih inda. 'Et hukw'elh'az bukoo ts'ih whenaja.

John dune too be 'ulh'en 'aw 'et whutele

57 'Aw 'et Elizabeth buyaz whutele 'et níoodelhdzut 'ink'ez buye' whúzdi. 58 'Et highah delhts'i 'ink'ez hinat hudélhts'ikah whulh 'úhuduzts'ai nts'e na'a neMoodihti yugha te'nanzin. 'Ink'ez ts'iyawh hiyulh whunélnik.

John 'aw 'et yuka dune unli, 'i k'ut hitet'us

59 'Aw 'et whulh lkh'udink'it dzin hoh 'uski 'en yuka dune unli, 'i k'ut hitet'us. 'Ink'ez bu'abá boozi Zacharias 'i be hiyootézilh. 60 'Et whunts'ih bu'ama, "Awundooh! Ndi boozi John 'i be hiyootézilh," ndo búlhni. 61 'Et hiyúlhni, "Aw nyulh dunekah hubutah 'aw John boozi 'i hoolah!" 62 'Et bu'abá ndi boozi higha idúte'alh 'et t'ehontezeh hukwa' huninzun. 'Et dula be hiba núlnih whuz na'a hiyoodulh'kut. 63 Dula be núlnih hoh dustl'us hubuts'u ka' dani, 'ink'ez 'uk'une'uzguz, "Boozi John hidutenilh." 'Ink'ez ts'iyawh huba hooncha. 64 'Et khunyaz yanawhéniltuk hoh Yak'usda dálhti. 65 Yunat whut'en, 'en ts'iyawh nujut hubughu nidelts'ut. 'Ink'ez Judea yun k'ut nodest'ai ndulhcho 'et whut'en, 'en ts'iyawh howu yahalhtuk. 66 'Et ndunnah whulh uzduzts'ai, ts'iyawh hubudzi be hódanla 'ink'ez 'ulhódutni, "Ndan 'uski dant'ah simba wule?" hutni. 'Ink'ez neMoodihti bula be yula 'ut'en.

Zacharias nus whunilh'en

- ⁶⁷ 'Aw 'et be'abá Zacharias, Ndoni be dezibun 'ink'ez nus whunilh'en hoh ndutni,
⁶⁸ "Israel buYak'usda 'ink'ez neMoodihti, 'en dalzoo!
 Budune, 'en buts'un nusiya nabootekulh ka.
⁶⁹ David 'en Yak'usda be 'ustl'en, 'en yuts'u hainde,
 'en hubugha neulhyis hooncha, 'en neba yulhtsi.
⁷⁰ 'Uda whe' whudit'en whuts'un,
 'et whuz na'a Yak'usda be nus whunilh'en, 'en hube yailhtuk.
⁷¹ 'Et hoh nech'a yalhtuk 'ink'ez ndunnah nets'u detni,
 'en ts'iyawh hubula k'éhaoodelts'ut, 'et neulhyis.
⁷² Ne'abákah 'en Yak'usda hubugha te'ninzun.
 'Ink'ez ndi khunek huba lhaáidinla, 'i 'et yunalnih.
⁷³ Netsuh whudelhdzulh Abraham nts'e na'a Yak'usda bughunek yutl'aída'ai hoh 'ink'ez
 yuts'un náhezya,
 njan 'et wheni neba' whutelilh ka,
⁷⁴ 'et hoh nech'a hudetni, 'en hubula k'éhaoodelts'ut, 'et hoh neulhyis.
 'Ink'ez 'aw whechats'uniljut hoh Yak'usda ba' uztef'ilh.
⁷⁵ Lubeshi cha'ulh'en uztele 'ink'ez ts'ah'un na'a uztef'ilh,
 'et whuz na'a Yak'usda bunalh dzin totsuk ts'ukhuna hoh 'en ba' ts'ut'en.
⁷⁶ 'Ink'ez nyun 'uskiyaz 'en ndun degha nus dedo, 'en ba nus whunilh'en nyuhudutenilh.
 NeMoodihti 'en ti hoonzoo buba whutelhtsilh ka butsuh tanyalh 'et huwa.
⁷⁷ 'Ink'ez wheni budune soo cho t'ets'onózin dahoot'ah hoh uzdutejih 'ink'ez nelubeshi
 chah neba hoolah yutelhtsilh,
 'et hubugha nedutenilh.
⁷⁸ 'Et whutsuh neYak'usda nek'entsi' hoh negha te'nanzin.
 'Et ndun sa yilhkaz ts'utni,
 'en ndus de whuts'un nets'ún k'unadaih.
⁷⁹ Ndunnah tsahólhgus yuh hudélhts'i 'ink'ez datsah huba 'int'ah chah,
 'en ts'iyawh hubuk'eiduténolh.
 'Ink'ez lhuteyalh hoh nedzi soo 'uhot'e, 'et nts'e wheho'a, 'et newhuntehnut.
 'Et huwa Yak'usda be nus whunilh'en nyudutenilh," ni Zacharias.
⁸⁰ 'Et ndun 'uski John, 'en nezyi 'ink'ez buyégha ulhtus suli. 'Ink'ez nket'ah Israel budune
 hubunalh haooya dunábunteltun ka, 'et whuts'un nts'e dune chahóot'ih ts'ih inda.

2*Mary 'udechoo buyaz whuzdli, Sizi 'en 'int'ah*

¹ 'Et da 'ilhunuh dune Caesar Augustus hiyulhni, 'en nduhoolhcho keyah hudelhts'i,
 'en ndi khunek yutah lhuhezya. Ts'iyannah boozi 'i ts'iyawh hik'e'tegus ka. ² 'Et hoh da
 whudezuhl whutah, 'ilhunuh dune Cyrenius hiyulhni, 'en whuyun k'ut Syria whumoodih
 inle. 'Et wheghah whudezuhl 'et whuts'un huboozi 'uk'e'whehininguz. ³ 'Et ts'iyannah
 dich'oh dukeyah whuz whehandel huboozi k'éhutegus ka. ⁴ 'Et Joseph 'en yun k'ut Galilee
 'ink'ez keyah Nazareth, 'et whehúdin'az 'ink'ez David bukeyah, Bethlehem huwhutni, whuz
 wheha'az Joseph, 'en David yuts'uh hainzut 'int'ah 'et huwa. ⁵ Ndun Mary yughu tedalh
 hoh yuts'un náhezya, 'en njan Mary 'uski ba 'int'ah hoh yulh when'az huboozi k'é'hutegus
 ka. ⁶ 'Aw 'et huzke hoh buyaz whutéleh 'et neoodenzut. ⁷ 'Aw 'et 'udechoo buyaz whuzdli.
 'Et ndi layin naih yugha iwézdud 'ink'ez musdus yez 'uyi, 'i be yalhti. 'Aw ts'uztez bakoo
 nachahúo'al, ts'iyawh whudézbun 'et huwa.

NeMoodihti buts'uh hayanduz, 'i ndulhcho hoh hubunat hube dendi

⁸ 'Ilhunuh yun k'ut dzuh nilhdzayaz, 'et sheep ghuhinli t'l'o k'ut 'et huwhut'i, 'ink'ez
 'ulh'ek nduwuhlyez hoh hubughunai ghuhinli. ⁹ 'Ink'ez nilh'en, 'aw 'et neMoodihti bulizas
 hububut siyin. 'Ink'ez neMoodihti buts'uh hayanduz, 'i ndulhcho hoh hubunat hube dendi.
 'Ink'ez 'aw 'et tube hoh hunelhújoot. ¹⁰ 'Et lizas ndo búlhni, "Whenoolhujut gunih! Nulh'en
 ndi khunek unzoo 'i soo ts'iyannah dune ye hóotet'i, 'i nuhwhuts'u té'ai. ¹¹ K'an dzin
 David bukeyah, nuhwhutelhyis nuhwhuba whuzdli. 'En Christ neMoodihti ts'utni, 'en 'uja.
¹² Ndez na'a hoh t'ewhuntehze'h ka nuhwhuba hoh hoodel'en nts'e na'a dahooja, l'he'int'ah
 layin bugha iwésduduz 'ink'ez musdus yez 'uyi, 'i bet usti." ¹³ Khunyez lizas 'ink'ez lhanah
 lizas nehughan, 'en ndus de hahandel. 'Et Yak'usda 'o nus hiba hodélti hoh nduhútni,
¹⁴ "Yak'usda degha ndoh yak'ut, 'en uzdelhti.

'Ink'ez ndi yun k'ut nedzi dooghel, 'i be ts'iyannah dune hubuts'un hoonzoo hole!"

¹⁵ 'Aw 'et ndunnah lizas yak'uz ts'ih hubugho whenáhedel. Ndunnah Sheep ghuhinli
 ndulhodutni, 'Aw 'et Bethlehem ts'ih ts'utoodelh. 'Ink'ez nts'e na'a dahooja 'et neMoodihti

nedani, 'et ts'onoolh'en!" ¹⁶ 'Et 'a tsih ndaz de hedulh. 'Et Mary 'ink'ez Joseph 'ink'ez 'uski musdus yez 'uyi bet usti hoh hubughu hunindel. ¹⁷ Hiya'en hukw'elh'az, nts'e na'a 'uski bugha lizas 'en hubudáni, 'et whunat ts'iyannah t'ehonandzin hoh ¹⁸ ndunnah yudants'o sheep ghunli daja hubulhni, 'en ts'iyawh huba hooncha suli. ¹⁹ 'Et Mary dahooja, budzi be yodanla 'ink'ez 'ahoolhyez howu nuni nuzut. ²⁰ 'Aw 'et ndunnah sheep ghuhinli 'en sheep ts'un whenahedel. 'Et ndet hodants'o, 'ink'ez honalh'en, 'ink'ez nts'e na'a hubulh yahalhtuk chah, 'et hubugha Yak'usda hidélhti 'ink'ez 'o nus hoonzoo k'una'a highu yalhtuk.

Sizi 'aw 'et yuka dune unli 'i lhk'ihité'us

²¹ Whulh lhk'udit dzin lhaóodija hoh 'uski yuka dune unli 'i lhk'uhinint'az, 'ink'ez hiyoози be hiyootezilh, Sizi hiyulhni. 'Awhuz 'ucha dinda hoh 'et ndi boози, 'i lizas yugha íde'ai.

Sizi luglez whucho ts'ih, 'et neMoodihti bunalh hahítelhtelh

²² 'Et Moses be' dustl'us k'ut daja ni hoh ts'ekoo buyaz whulhik hukw'élh'az soo ná'hut'ih 'et luglez danáhudaih, 'et ndúwhulcho hoh Mary lhaóodinla. 'Ink'ez 'uski Jerusalem ts'ih whehíyallhti neMoodihti bunalh hahítelhtelh 'et hukwa. ²³ NeMoodihti, 'en Moses bugha ndi bughunek butl'aida'ai, 'i whuz na'a 'uk'e'hanguz 'et njan ndutni, "Ndunnah duneyaz 'udechoo whuzdli, 'en ts'iyawh neMoodihti ba 'udun nelti hinli ho' hint'ah." ²⁴ 'Ink'ez ndai Yak'usda buk'uzdai k'ut hidutéllh'k'un, "I nankoh dut'aiyaz, dove hiyulhni, k'us nankoh dut'aiyaz, 'i dih hiyulhni." NeMoodihti, en Moses bugha ndi bughunek butl'aida'ai, 'et whuz na'a 'utni.

Simeon 'en neMoodihti buChrist yunalh'en

²⁵ 'Et 'ilhunuh dune Simeon ts'utni, Jerusalem whut'i. Ts'ah'un na'a 'int'ah 'ink'ez 'ahoolhyez Yak'usda be 'ut'en k'ah 'uwhulh'en. Ndun Israel budune k'enábunte'ah, 'en yuka tsi hóolih. 'Ink'ez Ndoni chah yulh 'int'ah. ²⁶ Ndoni 'en whut'einalhdzin, datetsah whutsuh neMoodihti buChrist ts'utni, 'en yute'ilh. ²⁷ 'Et Ndoni bugha luglez whucho daninya. 'Ink'ez 'uskiyaz Sizi, 'en be'abá 'ink'ez be'ama, 'en hik'uz dahinilhti. Moses bughunek 'uk'une'usdíguz butl'aida'ai, ndet hubuts'un hukwa' ninzun, 'et hukw'u ne'hutet'en ka. ²⁸ 'Et 'ahoh Simeon yillhchoot 'ink'ez njan ndutni hoh Yak'usda yudélhti, ²⁹ "SMoodihti si nye 'ulhna usdli.

'Ink'ez nts'e na'a nghunek k'una'a, 'et 'uhoont'ah sudzi dezghel hoh daóosah.

³⁰ 'Alha be suna be netelhyis null'en.

³¹ Ts'iyannah dune hubunalh lhaoodinla.

³² 'Udun yun k'ut whut'en, 'en chah huba be whét'en, 'i 'int'ah. 'En be hite'ilh.

'Ink'ez nyudune, 'en Israel budune, 'en chah huba idézti 'en 'int'ah," ni.

³³ Nts'e na'a yughu yatelhtuk 'et huwa Joseph 'ink'ez 'uski 'ama bulh huba hooncha. ³⁴ 'Et Simeon Yak'usda ts'un hukwa' dani hubuts'un wuzoo ka. 'Ink'ez 'ama Mary 'en ndi yulhni, "Ndet huba ndun 'uski Yak'usda 'en huba 'utahayálhti 'int'ah, 'et nyudutésnih. Israel hits'uh hainde, 'en bugha lhanah natekulh 'ink'ez lhanah dinadutéduh. 'Ink'ez highu t'ooninzun 'et whunts'ih hich'a yatelhtuk. ³⁵ 'Ink'ez nyunch'oh nzul soh cho be huyuzgwut li'tenilh. 'Ink'ez lhanah hubudzi be daja huninzun, 'et ts'iyawh ts'iyannah nalh ts'et haootelts'ulh."

Anna 'en chah Sizi ya'en 'ink'ez Yak'usda délhti

³⁶ 'Aw 'et 'ilhunuh ts'eketi, Anna hiyulhni, Yak'usda be nus whunilh'en. Phanuel butse', 'ink'ez Asher hubulh dédowh, 'ilhunuh 'int'ah. Tube ye 'un uzulh. 'Udechoo ki tet'ilh whutsuh, 'aw dune t'enizun 'int'ah. Skwúnlat 'o 'at nat naoodezuhl duki zih inda. ³⁷ Ndun tsandelh, 'en lhk'udit lanezi 'o 'at dit be naoodezuhl bat'en (84). 'Et 'aw luglez whucho whuch'a cháiyal. 'Et whunts'ih lhat hoh dzenis 'ink'ez 'ulh'ek ibulh sahá'dulyih 'ink'ez tenadudli, 'i be Yak'usda ba ne'ut'en unli. ³⁸ 'Et ndun ndoh whudézulh hoh daninya 'ink'ez Yak'usda yudélhti. Jerusalem hudelhts'i, ndun nabootekulh, 'en hika ítes'en, 'et 'en bugha Anna hubudáni.

Joseph 'ink'ez Mary, 'uski bulh hubukeyah Nazareth ts'un whenahedel

³⁹ 'Aw 'et Joseph 'ink'ez Mary, neMoodihti, 'en Moses bugha ndi bughunek hubutl'aida'ai, 'et ts'iyaintsuk lhahuduja hoh yun k'ut Galilee 'ink'ez hubukeyah Nazareth ts'un whenahedel. ⁴⁰ 'Et 'uski 'aw 'et nuyeh 'ink'ez buyégha be ulhtus súli. Ye whunih be dezbum 'ink'ez Yak'usda ye unzoo, 'i bulh 'int'ah.

Sizi 'aw 'et chílh unli hoh keyah Jerusalem usda. Ndan yudits'o tube huba hooncha suli

⁴¹ 'Aw 'et be'abá, be'ama bulh naoodezuhl totsuk Jerusalem ts'ih k'unáhut'us. Na'hutet'alh hoh Hubutus Lhusiya whunahutelnih, 'et hukwa whuz whehándel. ⁴² Hoh da ndunnah 'uski 'en lanezi 'o 'at nat be naoodezuhl (12) 'et Jerusalem ts'ih k'unáhudulh, butus lhusiya da hukw'un'a 'et huwa 'uhut'en. ⁴³ Nkeda 'ustl'e' hooja hoh k'ah nahutest'az. 'Et whunts'ih 'awhuz 'uski Sizi Jerusalem 'aw 'et usda. Joseph, 'ink'ez be'ama bulh 'aw t'ehonízun.

44 'Uyoon bulh 'ut'en huninzun. 'Ilhudzin bat'en huni'az 'et k'an zeh hika ités'en. 'Et bulh dunekah 'ink'ez bulhutsinkah 'en hubutah hikunúta. 45 'Et 'aw nachahuyílltel 'et doo chah Jerusalem ts'ih whenáhet'az, 'ink'ez 'et hikunúta. 46 Tat dzin hukw'elh'az 'et k'an zeh nahuyilhti. Luglez whucho 'et whubodulh'eh hubutah usda. Huboozéllts'ai 'ink'ez huboodulhkt. 47 Ndan hidits'o tube huba hooncha suli. Ts'iyaintsuk t'ewhunínzun 'ink'ez ts'iyawh ts'ah'un na'a ndó bulhni. 48 Be'ama 'ink'ez Joseph bulh ndet 'ut'en 'et usda hinilh'en hoh huba hooncha. 'Et be'ama 'uyúlhni, "Uyaz di ka whuz na'a nene'ilh'en? Nyu'abá 'ink'ez si bulh tube nk'enedutai." 49 'Et ndó búlhni, "Di ka sukunahta? 'Aw nt'echaonuzúhzun se'aBá be 'ut'en k'ah huwa óosna huba' hooht'ah?" 50 'Et daja ni hoh 'utni, 'et 'aw t'echahonízun. 51 'En hubulh whenát'az, Nazareth ts'ih whenahédel 'ink'ez hubutl'a'dudelti. 'Et be'ama ndi ndet 'uwuhulhni, budzi yídanla. 52 'Ink'ez Sizi 'o nus whunih chah 'ulheh hoh nus lhaneyelh. Yak'usda yuba hooht'i, 'ink'ez dune, 'en chah hiba hooht'i.

3

John dune too be 'ulh'en ts'iyannah, "NeMoodihti buti buba lhaoodahleh" ndo búlhni

1 'Aw 'et Caesar Tiberius, 'en yun k'ut ndulhcho hoh hubudayi cho inle. Lanezi 'o 'at skwunlai naodezuhl (15) ant'e. 'Et Pontius Pilate, 'en Judea yun k'ut whumoodih unli. Herod, 'en Galilee yun k'ut whumoodih unli. Bulhutsin Philip, 'en Iturea 'ink'ez Trachonitis yun k'ut whumoodih unli. 'Ink'ez Lysanias, 'en Abilene yun k'ut whumoodih unli. 2 Annas 'ink'ez Caiaphas, 'en nawhulnuk dega nus dézti 'uhint'ah. 'Et whughah whudézulh whutah 'et John, 'en Zacharias buye', 'en dune chahóot'ih ts'ih usda hoh Yak'usda bughunek buk'édilts'ut. 3 'Et Jordan koh 'et whunat nuya hoh dune hubulh yalhtuk too be' hoonesh ka hukwa. 'Et whibunulltun dulubeshi ch'a bubeni náhubudunoooleh ka. 'Et hoh bulbeshi buba hoolah yutelhtsilh. 4 'Et whuz na'a Isaiiah bughunek 'uk'e'eduguz 'et njan ndutni, "Dune chahóot'ih ts'ih dune yiz dusduts'ai, 'et 'ultus hahuyih hoh njan ndutni, 'NeMoodihti buti lhaoodahleh!

Buti soo lhk'e oodez'a buba whulhtsil!

5 Too k'oh totsuk naoodutebun.

Dzulh 'ink'ez dzulhyaz bulh ts'iyawh lhgha yuk na'tetnilh.

Whudéyah 'et chah lhk'enaoodutedukih.

Yun nudest'ai 'i chah lhgha na'whuténilh.

6 'Ink'ez nts'e na'a Yak'usda dune ulhyis, 'et ts'iyannah hontelh'ilh."

John dune too be 'ulh'en, 'en dune hubulubeshi hubugha khunek ulhtus 'i be ndo búlhni

7 Dune lhanah yughu nindel too be' hutenilh hukwa' huninzun. 'Et ndo búlhni, "Nuh-wheni poison tl'ughus buzkehkah li'ah't'ah. Yak'usda lubeshi 'ulh'en hubulh húnitelch'oh 'et whuz de whélt'sulh, ndan 'un whúlhni which'a lhúwes? 8 Nuhwhulubeshi ch'a nuwheni náhundunehla t'eh, nuhwhé 'ut'en be ts'iyannah whibunoolhtun nuhwhulubeshi buladehtnik. 'Ink'ez khun lhts'un njan dudooh'tni gunih wheni Abraham hits'uh hats'ánde 'uts'int'ah. 'Alha ts'ah'un na'a 'un whudusni, Yak'usda soo 'ultus ho' 'int'ah, ndi tse 'i whunts'ih 'i be Abraham buts'uh hahánde hubutelhtsilh. 9 Njan soo cho whunulh'en, nuwheni duchun li'ah't'ah. 'Aw 'et 'tsetsilh ba lhadínt'ah. 'Et nuhwheni bulunah duchun bumai hoolah, 'et ndaht'ah. K'an whunts'ih ndai bumai hoolah, 'i tsetsilh be bughih tubulh tahídantsel 'ink'ez hidutéllhk'un." 10 'Ink'ez dune ts'iyawh hiyoodulhkt, "Ink'ez nts'e na'a simba dats'óneh." 11 'Et ndo búlhni, "Ndan dzoozt'an nankoh 'ut'i, ndan dzoozt'an chait'ih, 'en 'ilhuk'i yugha óolchoos. 'Ink'ez ndan ts'uyi 'ut'i, 'en chah whuz na'a zeh ndóneh." 12 Ndunnah sooneya 'ilhunanowes'aih, 'en chah too be' hutenilh ka hits'uh whusaindel 'et hiyoodulhkt, "Whuneodulh'eh nts'e na'a daztenilh?" 13 'Et ndo búlhni, "Ndet ndanélt'suk hutni téllcholh huba' hooht'ah, 'et 'aw 'o 'un chawhuzóolhchoot." 14 Nehughan, 'en chah hiyoodulhkt, "Nuwheni do daztenilh." 'Et ndo búlhni, "Khun nuwheni dune sooneya nuhgha hoo'ah huboolhtsilh gunih! Khun dune whuts'it be buk'éhoh'alh gunih! 'Ink'ez ndet daneltsuk nuhwhuba k'elha whútele, 'aw 'et hóht'i huba' hooht'ah!" 15 Ts'iyannah hoonliyaz hukwa tsi huholi. 'Et budzi be dahoont'ah simba John 'en bugha, ndun Christ ts'utni, 'en tulih 'int'ah k'us 'awundoo. 16 John ts'iyawh 'et ndo búlhni, "Too zeh 'i be too bé' nuhwhulh'en. 'Et whunts'ih sk'elh'az whusatéalh, 'en sughanus dezti ho' 'int'ah. 'Aw buke tl'oolh buba lhk'unadutes'uk 'et whunts'ih huba soo cha'ust'ah. Ndun 'en Ndoni 'ink'ez kwun bulh 'i be too be' 'un whutelilh. 17 Be tl'o nuldzeh tl'o mai be tahawhúlt's'it, 'i lhaídilh'zun. 'Ink'ez ndi tl'o mai yuk'ut tahawhúlt's'it, 'i chah yuk'ut lhadút'ih t'eh, 'ink'ez yuna'ulhdoh. 'Ink'ez ndi mai lhaduja, 'i ts'iyawh denúdzih 'ink'ez mai bakoo ts'ih wheyúlih. 'Et whunts'ih ndi kwun 'aw nachanusneh, ndi but'ooz 'i be duték'un." hubúlhni. 18 Ndi Khunek 'ink'ez 'uyoo khunek 'i bulh 'et whuz na'a khunek ulhtus, 'i be hubudáni. 19 'Aw 'et ndi yun k'ut whumoodih Herod, 'en 'ilhunuh 'int'ah. 'En dulhutsin Philip bu'at 'en yuzih

usda. John 'uyúlhni, “Lubeshi 'ilh'en.” 'Udun tink'us na'a chah 'ut'en. 'Et chah ts'iyawh lubeshi 'uhoont'ah yulhni. ²⁰'Et ndi lubeshi 'uyulh'en, 'i 'uyoo chah yuts'u na'whuleh hoh John 'en tsak'eya'ai.

Sizi too be 'úlya

²¹'Aw 'et ts'iyannah dune too be 'úlya. Sizi 'en chah too be 'uyínla. Tenawhéndunidli 'i bulh yat'ah dá'dutezkez, ²²'ink'ez Ndoni dut'aiyaz, dove hiyulhni, 'i k'una'a ndus de hát'o 'ink'ez yuk'eit'o. 'Et nduk yak'uz khunek huduzts'ai, 'i ndutni, “Nyun suYe' nk'esi' unint'ah. Tube nyulh hoonúst'i.”

Sizi hubuts'u haiyanzut

²³'Et Sizi tat lanezi naoodezut bat'en suli (30), 'aw 'et whe'dít'en. Ts'iyannah 'en Joseph buye' huninzun.

'Ink'ez 'en Heli buye'.

²⁴'En Matthat yuts'uh hainzut,

'en Levi yuts'uh hainzut,

'en Melchi yuts'uh hainzut,

'en Janna yuts'uh hainzut,

'en Joseph yuts'uh hainzut.

²⁵'En Mattathiah yuts'uh hainzut

'en Amos yuts'uh hainzut,

'en Nahum yuts'uh hainzut,

'en Esdli yuts'uh hainzut,

'en Naggai yuts'uh hainzut.

²⁶'En Maath yuts'uh hainzut,

'en Mattathiah yuts'uh hainzut,

'en Semei yuts'uh hainzut,

'en Joseph yuts'uh hainzut,

'en Judah yuts'uh hainzut.

²⁷'En Joannas yuts'uh hainzut,

'en Rhesa yuts'uh hainzut,

'en Zerubbabel yuts'uh hainzut,

'en Shealtiel yuts'uh hainzut,

'en Neri yuts'uh hainzut.

²⁸'En Melchi yuts'uh hainzut,

'en Addi yuts'uh hainzut,

'en Cosam yuts'uh hainzut,

'en Elmodam yuts'uh hainzut,

'en Er yuts'uh hainzut.

²⁹'En Jose yuts'uh hainzut,

'en Eliezer yuts'uh hainzut,

'en Jorim yuts'uh hainzut,

'en Matthat yuts'uh hainzut,

'en Levi yuts'uh hainzut,

³⁰'En Simeon yuts'uh hainzut,

'en Judah yuts'uh hainzut,

'en Joseph yuts'uh hainzut,

'en Jonan yuts'uh hainzut,

'en Eliakim yuts'uh hainzut,

³¹'En Melea yuts'uh hainzut,

'en Menan yuts'uh hainzut,

'en Mattatha yuts'uh hainzut,

'en Nathan yuts'uh hainzut,

'en David yuts'uh hainzut,

³²'En Jesse yuts'uh hainzut,

'en Obed yuts'uh hainzut,

'en Boaz yuts'uh hainzut,

'en Salmon yuts'uh hainzut,

'en Nahshon yuts'uh hainzut,

³³'En Amminadab yuts'uh hainzut,

'en Ram yuts'uh hainzut,

'en Hezron, yuts'uh hainzut,

'en Pharez yuts'uh hainzut,

'en Judah yuts'uh hainzut,
³⁴ 'En Jacob yuts'uh hainzut,
 'en Isaac yuts'uh hainzut,
 'en Abraham yuts'uh hainzut,
 'en Terah yuts'uh hainzut,
 'en Nahor yuts'uh hainzut,
³⁵ 'En Serug, yuts'uh hainzut,
 'en Reu yuts'uh hainzut,
 'en Peleg yuts'uh hainzut,
 'en Eber yuts'uh hainzut,
 'en Salah yuts'uh hainzut,
³⁶ 'En Cainan yuts'uh hainzut,
 'en Arphaxad yuts'uh hainzut,
 'en Sem yuts'uh hainzut,
 'en Noah yuts'uh hainzut,
 'en Lamech yuts'uh hainzut,
³⁷ 'En Methuselah yuts'uh hainzut,
 'en Enoch yuts'uh hainzut,
 'en Jared yuts'uh hainzut,
 'en Mahalaleel yuts'uh hainzut,
 'en Cainan yuts'uh hainzut,
³⁸ 'En Enos yuts'uh hainzut,
 'en Seth yuts'uh hainzut,
 'en Adam yuts'uh hainzut,
 'ink'ez 'en Yak'usda yuts'uh hainzut.

4

Netsudule, 'en Sizi tink'us 'óoneh hukwa yóolhdzih

¹ 'Et Sizi, en Ndoni be dezibun hoh Jordan koh ts'ih hanája. 'Ink'ez dune chahóot'ih ts'ih Ndoni whuz wheyalh'a. ² 'Et whulh dit lanezi (40) dzin 'et dzin totsuk netsudule tink'us ooneh hukwa' yulh'en 'et yoolhdzih. 'Et nduwuhulyez hoh 'aw hoonli chas'al. 'Et lhaóodinla hukw'elh'az buye'élts'ul. ³ 'Et netsudule 'uyúlhni, "Alha Yak'usda buYe' inli t'eh, ndi tse lhes wule dini." ⁴ 'Et Sizi njan ndi yúlhni, "Ndez na'a Yak'usda bughunek k'ut 'uk'une'úsduzug 'et njan ndutni, "Aw lhes zeh ilah dune yuk'ekhuna. 'Et ndai Yak'usda bughunek 'i ts'iyawh dune yuk'ekhuna." ⁵ 'Et netsudule nyedoh dzulh k'ut yulh whin'az. 'Et 'ahoh yun k'ut nts'oh tula dune whut'i, 'ink'ez hubudayi cho bube 'ut'en k'ah, 'et nduwulhcho wheínulhtun. ⁶ Netsudule 'uyúlhni, "Et nyun ndi ts'iyawh humoodih tanle, 'ink'ez hiye dezti 'et chah nga ootés'alh. Njan sugha whulya. 'Et huwa ndan hubuka', nuszun, 'en hubutl'aootes'alh. ⁷ 'Et ngwutsi be nininya 'ink'ez sts'u téni' nilhdzun t'eh, 'et sih ndi ts'iyawh nye'ílhduza wule." ⁸ 'Et Sizi ndi yulhni, "Satan st'ak inyalh! 'Et 'uk'e'éduguz hoh njan ndutni, 'Moodihti nYak'usda 'aw 'en zeh bubut negwutsi be nits'eyih, 'ink'ez 'en zeh but's'uh teni' uznilhdzun. 'Ink'ez 'en zeh ba nets'ut'en." ⁹ 'Et Jerusalem ts'ih yulh whin'az 'ink'ez njan luglez whucho yedoh hukw'ut 'et soo hukw'abah ninílhya 'ink'ez ndi yúlhni, "Alha Yak'usda buYe' inli t'eh, 'et njan whegha' dudintneh!

¹⁰ 'Alha 'et 'uk'e'éduguz hoh njan ndutni,

'Yak'usda bulizas ngho hoole ka 'ink'ez nyuhotun

'ink'ez wheni hubutl'ahó'ai.

¹¹ Bula be nyedoh nyuhóotetun,

'et huwa 'aw nke be tse t'aoonalh ghaít'ah."

¹² 'Ink'ez Sizi ndi yúlhni, "Njan 'et 'uk'e'uduguz hoh njan nduwutni, 'Khun teh Moodihti nYak'usda 'en nantá'ah hukwa ólhdzih gunih." ¹³ 'Et netsudule ts'iyaintsuk hoh tink'us ooneh hukwa yóolhdzai, 'aw 'et lhaooduja hoh 'astl'iyaz whuts'un yugha whenája.

Sizi bube 'ut'en 'aw 'et whe'yudilh'en

¹⁴ 'Et Sizi, en Ndoni ye ulhtus, 'i be yun k'ut Galilee ts'ih whenaja. 'Ink'ez yughu yalhtuk Galilee yun k'ut hudelhts'i ndulhcho hiyulh údants'o, 'ink'ez ts'iyawh highu yalhtuk. ¹⁵ 'Et ts'iyawh Lizwif luglez totsuk whéooobondunilh'i 'ink'ez ts'iyannah hidélhti. ¹⁶ 'Et ndet keyah nezyi Nazareth huwhutni, whuz whinya. 'Et dzin dune nalyis dzin 'uhoont'ah, 'et Lizwif hubuluglez whuz ninya. 'Et whuz na'a dich'oh be 'ut'en k'ah 'uhoont'ah. 'Ink'ez buba 'uk'eyatelhtuk ka didinya. ¹⁷ 'Ink'ez nus whunilh'en Isaiah be' dustl'us 'i hitl'ahúya'ai. Lhk'inélhghal 'ink'ez ndet hukw'uyatelhtuk 'et nahoo'ai. 'Et buba k'eyawhénilhtuk 'et njan ndutni,

18 “Moodihti buyégha 'i sulh 'int'ah.

'I be 'utahasalhti, ndunnah tehel'en, 'en khunek unzoo, 'i hubugha ités'alh ka.

Ndunnah, en hubudzi nduda,

'en nabutélyih ka hubuts'un whusaíya.

Ndunnah ílchoot,

'en hobuntelhtun nts'e na'a hubulanadetnik hutele.

'Ink'ez hobuntelhtun ndunnah chahuwhés'en,

'en chah honilh'en nahutedleh.

Ndunnah dune nts'e whuts'un yuk nihininkat,

'en chah dinábudutésdleh.

19 'Et ndet nawhudezulh soo 'et neMoodihti buba hoonzoo,

'et ts'iyannah hubudutesnilh.”

²⁰ Aw 'et dustl'us nainílhghal 'ink'ez 'et 'ut'en yutl'anayá'ai 'ink'ez nanát!adedá. 'Ink'ez ndunnah Lizwif luglez hudelhts'i, ts'iyannah 'en zeh hinílh'en. ²¹ 'Ink'ez 'aw 'et hubulh yawheníltuk, “Et nuhweni ndi Yak'usda bughunek dáhts'o, 'et k'an dzin ts'iyawh lhaoooduja.” ²² Ts'iyannah soo highu yalhtuk. Khunek unzoo, 'i ye yailhtuk, 'i ts'iyannah huba hooncha. Dich'oh 'ulhódutni, “Ndun 'en Joseph buye' 'en ilah ih 'int'ah?” ²³ 'Et ndo búlhni, “Aw nawh cha'hoot'ah ndi khunek 'ahoolhyez 'et dudáhtni hoh njan ndutni, 'Yoo be duyun nyunch'oh cho soo na'dudílnéh,' 'et whuz na'a si chah 'et ndusúdatehnilh. 'Et ndez na'a ndutehnilh, 'Ndet keyah Capernaum huwhút'ni, dawhut'en whulh údzít's'o, 'et njan nyunch'oh nkeyah 'et chah whuz na'a zeh ndint'en.” ²⁴ 'Ink'ez 'et ndutni, “Alha ts'ah'un 'ún whudusni, nus whunílh'en dich'oh bukeyah ninya hoh 'aw 'ílhunuh whunts'ih yuka cha'nizun. ²⁵ Ndet nuhwhudutésnilh soo ts'ah'un 'et 'alha' hooht'ah. 'Et hoh da ndun Elijah, 'en yun k'ut Israel nus whunílh'en huba unli inle. 'Et lhanah tsandelh hoonli inle. Hoh da tat naooduzuk 'o 'at lhk'utat sanun 'et nduhóolhyez 'aw chan hoolah. 'Et 'uhooja yun k'ut nduulcho hoh da whuzdli. ²⁶ 'Et Elijah 'aw 'ílhunuh whunts'ih hubuts'un chaitílh'al. 'Ílhunuh tsandelh, 'aw 'en zeh. 'En yun k'ut Sidon nts'e keyah Zerephath 'et whut'en, 'aw 'en zeh but's'un wheyal'h'a. ²⁷ 'Ink'ez hoh da Elisha, 'en nus whunílh'en huba unli inle, 'et hoh da yun k'ut Israel hubukák whulhjut, leprosy hiyulhni, hulai. 'Aw 'ílhunuh whunts'ih soo nacha'yítlil, 'et Naman, ndun Syria whut'en, 'aw 'en zeh soo na'yínla,” ndo búlhni. ²⁸ 'Et Lizwif luglez húdelhts'i hidánt's'o hoh tube huyulh húnílh'e. ²⁹ Ts'iyawh dihudíndel 'ink'ez hiyílhchoot njan keyah hukw'un nahítelhya. 'Ink'ez nyedoh dzulhyaz k'ut keyah whuzdla, 'et whukw'abah nihinílhya whegha hitenoh ka. ³⁰ 'Ink'ez ts'iyannah hubutah lhuseya 'ink'ez nts'e hukwa' ninzun ts'ih whénya.

Dune ntsi' buyudínda

³¹ Aw 'et Galílee yun k'ut 'et keyah Capernaum whuz'ai whuz whinya. Nats'ulyis dzin totsuk whubodulh'eh. ³² 'Et njan hubodulh'eh tube huba hooncha. Bughunek hoolhtus hoh buk'une' hóot'en ka hubulh yalhtuk. ³³ 'Et nyo Lizwif luglez 'et 'ílhunuh dune, 'en ntsi' nududeh, 'i yudínda. Ndun ntsi' nududeh tube cho 'alzul, ³⁴ 'ink'ez 'utni, “Ah! Nyun Sizi Nazareth whut'en 'unint'ah. Ndet nets'u hukwa' ninzun? Nehoolah ka netalhtsilh 'et hukwa whusainya ih? Ndun inli t'enyunúszun! Yak'usda ba lubeshi bughoh hoolah, 'en 'unint'ah!” ³⁵ 'Et Sizi hukwa' yudáni hoh ndi yúlhni, “T'eduzinih hoh buyáh hanaindaih!” Ntsi' nududeh, 'i ndun dune hubutah nayáno 'ink'ez yuts'u hanája. 'Ink'ez 'aw chayundílh'al. ³⁶ Ts'iyannah hubugha ha'nejoot 'ink'ez whe hunelhújoot 'ink'ez 'ulhahudutni, “Ndi khunek ndai ho' 'int'ah? Ulhtus 'ink'ez buk'une' whut'en. Ndai ntsi' nududeh, 'i 'et ndi yulhni íbulh 'et yuts'u hanaja.” ³⁷ 'Et yun k'ut nduhoolcho hoh hiyulh údants'o.

Sizi Peter bubez soo na'yínla

³⁸ 'Et Sizi Lizwif luglez dinadíja 'ink'ez Simon bukoo ts'ih whuz whinya. 'Et Simon bubez dada nezul 'i be nduda. 'Et Sizi ndi hiyúlhni khun teh yula 'ooneh ka. ³⁹ 'Et kw'usuti yuzih nininya 'ink'ez yutus chah tez'a. 'Ink'ez dada hukwa' yudáni hoh ndi nezul ye nduda, 'i yuts'ahanádools'tit yúlhni, 'ink'ez but's'ah hanaídelts'ut. 'Et 'ahoh dinadíja 'ink'ez hubugha ná'unt'ai.

Nats'ulyis dzin 'et lhanah nduda, Sizi soo na'ubinla

⁴⁰ Aw 'et sa yun ts'ih tez'aih hoh ndunnah bulh dunekah lhelhyoo dédowh, 'i dada be nduda ts'iyannah Sizi higho bunínla. 'Ink'ez ts'iyannah hubuk'edálnik 'ink'ez 'et soo ná'ubinla. ⁴¹ 'Ink'ez bulunah dune ntsi' nududeh, 'i 'ahúlzul hoh hubuts'uh hanaídede, 'ink'ez 'uhutni, “Nyun Yak'usda buYe' ndun Christ hiyulhni, 'en 'unint'ah!” T'eduzanih ndo búlhni 'aw yahutéltuk whunts'ih hubutl'achahoo'al, t'ehonínzun Christ 'en 'int'ah 'et huwa.

Yun k'ut Galílee ndulhcho hoh Sizi dune hubulh yalhtuk

⁴² 'Et 'om bun bundada sa hawhéni'ai 'et 'aw nehoolah ts'ih whenya. 'Et dune ts'iyannah hikunúta. 'Et nts'e usda highu nindel, hubughu tooya whuch'a né'hiyulh'en. ⁴³ 'Et ndo búlhni, "Udun keyah chah ndi khunek unzoo, 'i be yatelhtuk, dant'ah hoh nts'e whuba Yak'usda hubudayi cho unli hubudutesnilh. 'Et huba whusáts'alh'a." ⁴⁴ 'Et Galilee yun k'ut ndulhcho Lizwif whuluglez whuz lhghadínya 'ink'ez hubulh yalhtuk.

5

Dinah lhook ka' hut'en, 'en Sizi, "Anih," hubúlhni

¹ 'Ilhut dzin Gennesaret bun k'ut taba siyin, 'et dune ts'iyannah higha wezdel, Yak'usda bughunek hidutéts'o ka. ² Ts'i cho nankoh yasá'a yunilh'en. 'Et whunts'ih lhook ka' hut'en, 'en 'udun loombilh toonahugus. ³ 'Ink'ez 'ilhunuh Simon, 'en butsi 'i yeínya. 'Ink'ez ndi yúlhni, "Nusyaz le 'inleh." 'Ink'ez 'et ts'i bet natl'adeda 'ink'ez dune, 'en wheobudunilh'i. ⁴ 'Njan hubulh yalhtuk 'ustl'e déja 'et Simon ndi yúlhni, "Nts'e soo takhulh 'et nuwhuloombilh ts'iyawh tenahle 'utehlooh huba." ⁵ Simon ndi yúlhni, "Sumoodih wheni 'ulh'ek nduhoolyez hoh 'uts'et'en 'et whunts'ih 'aw hoonliyaz nts'ih chats'flood. Nedin t'eh 'et lhoombilh 'ilho tenaosoedleh sih." ⁶ Te'huninla hoh lhook lhai hiyuzdlooh. Lhai huzdlooh k'et hubuloombil 'aw 'et lhk'enich'oolh. ⁷ 'Et 'onghunnah ts'i cho bet 'uhut'en, 'en 'anih hubuhútni hubula 'uhooneh ka. 'En chah whusahanki 'ink'ez 'ahunélt'et ts'i cho hidelhbun 'ink'ez 'aw 'et tewhéniinat. ⁸ Simon Peter, 'en whunalh'en hoh Sizi yubut dugwútsi be neninya 'ink'ez, "Sumoodihti sch'a naindalh, si lubeshi 'ulh'en usdli," yúlhni. ⁹ Peter 'ink'ez yulh 'ut'en, 'en ts'iyawh hubugha ha'nejoot 'ink'ez whe hunelhújoot ndi lhook lhe'neltsuk hoh hiyuzdlooh 'et huwa. ¹⁰ 'Et James 'ink'ez John Zebedee buye'kah, 'en Simon ts'udetni, 'en chah hubugha ha'nejoot 'ink'ez whehonorhújoot. 'Et Sizi 'uyulhni, "Simon khun whenoljut gunih. K'an whunts'un dune ka' tant'alk." ¹¹ 'Aw 'et yanahusdúki hoh ts'iyaintuk 'et hiladetnik. 'Ink'ez hik'ah ts'ih 'uhóot'ka ka hiyuntezdel.

Bukak whulhjut, 'en Sizi soo ná'yinla

¹² 'Et hukw'elh'az Sizi 'ilhunuh keyah 'ut'en. 'Ink'ez 'ilhunuh dune ndulhcho hoh bukak whulhjut, 'i leprosy hiyulhni, 'i be nduda, 'en chah 'et keyah whut'en. Sizi yutelh'en hoh yubut nachaneti, yuts'un tedudlih, "SMoodihti nyun hukwa' ninzun t'eh be ilhtus 'int'i, 'i be suna'ilhdeh," yulhni. ¹³ 'Et Sizi bula be yut'aghéznai 'ink'ez ndi yúlhni, "A, hukwa' nuszun hoh nyuna'alhde." 'Et ndunnah bukak whulhjut 'en 'aw 'et soo na'uja. ¹⁴ 'Et Sizi khunekti be njan ndi yulhni, "Khun teh 'uyoon ndudóni gunih! 'Et ndun náwhulnuk butsi'inyalh 'ink'ez nyulh dahooja, 'et nyunoolh'en. 'Et Moses be' dustl'us k'ut daja ni hoh 'aw ts'ah 'un cha'it'ah, 'et hoba hoolah whutele, 'et whuz na'a Yak'usda bukw'uzdai k'ut hoonliyaz dutálkh'ri. 'Et hobunolhtun dainja hoh soo na'inja," yulhni. ¹⁵ 'Et whunts'ih be nawhutnuk 'i Sizi Gri 'en bugha lha'un teh whulh 'úhudits'o. 'Et whu la gha ts'ih 'o nus hulai 'ink'ez 'o nus 'uhuneltsuk hoh highudulh, ndai hiye nduda, 'i ts'iyawh hubutelhyih hits'uh hukwa' ninzun. ¹⁶ 'Et dich'oh lhat nehoolah ts'ih wheyih tenadutedli ka.

Dune dechadusnik, Sizi soo ná'yinla

¹⁷ 'Ilhut dzin dune hoodulh'eh, 'et ndunnah Pharisee, 'ink'ez Moses be' dustl'us hodulh'eh chah, 'en Sizi highah delhts'i. Ndunnah yun k'ut Galilee 'ink'ez Judea, 'ink'ez Jerusalem chah, 'en whuz haháandel. 'Ink'ez neMoodihti ye ulhtus, 'i nduda soo ná'hubutelh'ilh ka, 'i yulh 'int'ah. ¹⁸ 'Aw 'et ndun dune dechadusnik, 'en kw'usuti be whusahúyankai, 'ink'ez Sizi bukoos ts'ih hits'uh hitoolhte hukwa' hiyulh'en. ¹⁹ 'Et whunts'ih dune hulai 'ink'ez 'aw 'uhiyoolleh ghaí'ah. 'Et nduk bun hukw'ut, 'et hukw'ehiyilhti, 'i k'ehiyilhti. Bun hikonintsi 'ink'ez whuz hukwu hinínkai. 'Et soo buniz Sizi bubut yun nihíninkai. ²⁰ Ndooh ts'iyannah hubunilh'en 'et 'eooninzun huba 'alha 'uhoont'ah 'ink'ez dechadusnik ndi yúlhni, "Dahooja dune nlubeshi ts'iyawh mba hoolah sulí." ²¹ 'Et Moses be' dustl'us 'uk'ununa'úguz 'ink'ez Pharisee, dich'oh 'et ndonínzun, "Ndun dune 'en Yak'usda ch'a yalhtuk. Ndun na'dunúdzun hoh 'utni? Ndun lubeshi 'un tulhdelh? Yak'usda dich'oh zeh lubeshi 'un tulhdelh!" ²² 'Et Sizi nt'eoonínzun daja huninzun, 'ink'ez ndo búlhni, "Et di ka nuhdzi yuh 'et ndunahzun? ²³ Nts'e na'a simba huwa chahoolnah k'una'a uzdooni, 'Lubeshi mba hoolah sulí, k'us, 'Didinyih 'ink'ez nínya?" ²⁴ 'Et njan t'eoonóhzin yinkak dune ye, 'en ndi yun k'ut huba' hoont'ah ho' 'int'ah lubeshi 'un toolhdelh huba' hoont'ah ho' 'int'ah," ndo búlhni. 'Ink'ez ndun dechadusnik, "Didinyih, bukw'usinti nailchoot, 'ink'ez nkooz ts'ih naindalh!" yulhni. ²⁵ 'Et 'ahoh ts'iyannah nalh didinya, yuk'usti nayilchoot 'ink'ez Yak'usda délhiti hoh bukoos ts'ih whenaja. ²⁶ 'Et ts'iyannah huba hooncha. 'En chah Yak'usda hidálhti. Tube whe hunuljut, "Njan tube huwa 'et'en tune'ust'en, 'et ts'onalh'en," hutni.

Sizi, 'en Levi, "Anih," yúlhni

²⁷ 'Et hukw'elh'az Sizi 'az whenya 'ink'ez 'ilhunuh sooneya 'ilhunaoonughés'aih, Levi hiyulhni, 'en 'ut'en usda hoh yunilh'en, 'ink'ez ndi yúlhni, "Sunanyalh." ²⁸ 'Et didinya, 'ink'ez ts'iyaintsuk yula ditnik hoh yuk'ah ts'ih oot'en ka yuntezya. ²⁹ 'Et Levi bukooz ts'ih hooncha 'et dune hubugha na'tét'alh, Sizi ba. 'Et sooneya 'ilhunaoonughés'aih 'en chah hulan. 'Ink'ez 'uyoon chah hulan hubulh 'et húdelhts'i. ³⁰ 'Et ndunnah Moses be' dustl'us 'uk'ununa'úsduguz 'ink'ez Pharisee, 'en dich'oh highu yalhtuk 'ink'ez Sizi yugha hoodul'eh, 'en hubuhútni, "Et ndunnah sooneya 'ilhunaoonughés'aih 'ink'ez lubeshi 'ughul'h'en, 'en di ka hubulh áh'alh 'ink'ez hubulh táhtnai?" ³¹ Sizi 'et ndo búlhni, "Ndunnah soo 'ínt'ah, 'aw yoo be duyun ka cha'hunízun. Nduda, 'en zeh yoo be duyun ka' huninzun. ³² Si chah whuz na'a zeh 'aw dune ts'ah'un 'int'ah, 'en bulubeshi ch'a bubeni naháhunduntele huba ilah whusáya. 'Et lubeshi 'ulh'en, 'en bulubeshi ch'a bubeni naháhundunoolelh hubudutésnilh ka, 'et huba whusáya."

Dune saha'délya soo hukwa' hoodulhkut

³³ 'Et hiyoodulhkut, "Dahoot'ah huwa John yugha hoodul'eh, 'en lhat soo saha'dulyih 'ink'ez tenahuduldi? 'Ink'ez Pharisee hiye hoodul'eh, 'en chah 'et nduhút'en. 'Et whunts'ih nyun ngha hoodul'eh, 'uha'alh cha' hut'en 'ink'ez 'uhutnai cha' hut'en?" ³⁴ 'Et ndo búlhni, "Ndun bu'at whutele, 'en bulh dune 'en 'awhuz hiyulh 'ut'en, 'en do soo saha'dutélyelh ih? 'Awundooh! ³⁵ 'Et whusawhutelt's'ulh, hoh t'eh bu'at whutele bughu nayitélcholl. Hoh t'eh zeh soo sahá'hudutelyelh." ³⁶ 'Et be nawhutnuk 'i be whuts'o dul'eh, 'i be hubulh yalhtuk 'et njan ndutni, "Aw 'ilhunuh naih k'an ts'ih hayáhlch'ul 'ink'ez 'ujut, 'i lhunaidunóokalh ghaít'ah. 'Et whuz na'a nduja t'eh, 'et ndi k'an naih, 'ink'ez naih jut bulh 'aw lhk'una'a oot'e ghaít'ah. ³⁷ 'Et doo chah, 'aw 'ilhunuh k'an mai too 'i 'aw 'ujut mai too 'uzus be yóolhdzeh ghaít'ah. ³⁸ 'Et ndúja t'eh, k'an mai too ndi 'ujut mai too 'uzus buk'e ootéltul. 'Et ts'iyawh mai too bé haitejullh. 'I 'uzus 'i chah tinta' tet'ilh. ³⁸ 'Et whunts'ih k'an mai too, 'i k'an mai too 'uzus be naooldzeh huba' hoont'ah. 'Et whuz na'a 'anelht'et soo' tet'ilh. ³⁹ 'Aw 'ilhunuh mai too 'ujut utnai t'eh, 'ahoh k'an mai too ka' noozin ghaít'ah. "Ujut, 'i zeh 'o nus unzoo, 'hutni," 'et hubúlhni.

6

Yinkak dune ye', 'en nats'ulyis dzin, 'et chah huMoodihti unli ho' 'int'ah

¹ K'an whulhnat dune nalyis dzin, 'udechoo 'et hukw'elh'az 'uhoont'ah. Sizi 'ink'ez higha hoodul'eh, 'en bulh tl'o k'ut hedulh hoh, tl'o mai hiyooneye. 'Ink'ez hubula k'et nuhínulhmul 'ink'ez hiya'alh. ² 'Et bulunah Pharisee hubuhútni, "Daht'en hoh 'aht'en? K'an dzin nats'ulyis dzin 'uhoont'ah! 'Aw 'et nduhóot'en huba cha'hoot'ah!" ³ Sizi ndo búlhni, "Hubudayi cho David daja 'aw ih hukw'e yachazulhtuk. 'Et hoh da David 'ink'ez yulh 'ut'en buye'élts'ul. ⁴ 'Et 'úja, Yak'usda bukooz daninya. Lhes 'i Yak'usda bughu yu'aih, 'i ndi lhes nawhulnuk 'aw 'en zeh hiyo'alh huba' hoont'ah. 'Ink'ez 'i yilhchoot 'ink'ez ya'al. 'Ink'ez dulh 'ut'en, 'en chah bulah hubugha iní'ai." ⁵ 'Ink'ez Sizi ndo búlhni, "Yinkak dune ye', 'en njan nats'ulyis dzin, 'et chah huMoodihti unli ho' 'int'ah."

Nats'ulyis dzin 'et Sizi Gri dune bula ndúda soo na'yínla

⁶ 'Et hukw'elh'az 'o 'at nats'ulyis dzin Lizwif luglez daninya 'ink'ez whubodulh'eh. 'Et 'ilhunuh dune 'en chah 'et usda. Ndun bula nalhnih ts'ih 'aw yé nucha'ust'en. ⁷ Ndunnah Moses be' dustl'us 'uk'ununa'úsduguz 'ink'ez Pharisee chah soo cho high-unli 'ink'ez hinilh'en daténilh simba. 'Et dune nalyis dzin 'et tulih soo na'yooleh. 'Et hoonliyaz hiyulh nahó'alh hukwa' hut'en. ⁸ 'Et daja huninzun t'eeoninzun. 'Et dune bula yunucha'ust'en ndi yúlhni, "Didinyih 'ink'ez hubuniz sinyin." 'Et didinya 'ink'ez hubuniz ninínya. ⁹ 'Ink'ez Sizi ndo búlhni, "Hoonliyaz hukwa nuhoodutelhkut. 'Et nats'ulyis dzin, nts'e na'a netl'awhélt's'ut, 'et ts'ah'un na'a 'uztenilh, k'us hootsi' k'una'a 'uztenilh? Dune hiye khuna 'uztelhyih k'us daztelhtsah?" ¹⁰ 'Ink'ez 'et ts'iyawh hubunilh'en. 'Et ndunnah dune ndi yúlhni, "Nla ts'ih 'un lhk'ut dughelnih!" 'Et ndúja 'ink'ez bulak'uz ts'ih dachait'ah, 'et whuz na'a zeh ndunája. ¹¹ 'Et 'onghunnah tube whuske be honilch'e, 'ink'ez dich'oh howu yahalhtuk Sizi dahítelilh 'et hukwa."

Lanezi 'o 'at nanah whel'a, 'en Sizi 'utahaóobanla

¹² Hool da 'et dzin njan ndúhooja, Sizi dzulhyaz k'ut tenadutedli ka whuz whenya. 'Ulh'ek nduhoolhyez Yak'usda ts'un tenadedli. ¹³ 'Et yilhkai higha hoodul'eh, 'anilh hubulhni. 'Et hubutah lanezi 'o 'at nanah, 'en 'utahaóobanla. 'En whel'a huboozi yúhtsi. ¹⁴ Simon, 'en ndi booz Peter, 'i yugha íde'ai. 'Ink'ez bulhutsin Andrew, James, John, Philip 'ink'ez Bartholomew. ¹⁵ Matthew 'ink'ez Thomas. James Alphaeus buye', 'ink'ez Simon 'en huwu daóodit'ah hiyulhni. ¹⁶ Judas, 'en James buye', 'ink'ez Judas Iscariot chah, 'en 'utenilh whu'iz buch'a niduteyalh.

Lhanah nduda 'ink'ez ntsi' nududeh, 'i be dzuh nuhúdeh, 'en Sizi soo ná'balh'en

¹⁷ 'Et whududlun ndus de yugha hoodul'eh hubulh hainya 'ink'ez lhts'e oodez'a nináhundel. Yun k'ut Judea whut'en, Jerusalem whut'en chah, 'ink'ez yatoo ba keyah Tyre 'ink'ez Sidon whut'en, 'en chah hulan 'ink'ez 'aw uzdooni ghaít'ah. Hiyootuzéilhts'ilh 'ink'ez soo na'butelilh, 'et hukwa 'iluhowezedel. ¹⁸ 'Ink'ez ndunnah ntsi' nududeh 'i be dzuh nudeh, 'en chah 'et hudelhts'i, 'ink'ez soo na'balh'en. ¹⁹ Ts'yannah hit'aghoodal hukwa' hut'en. Ye ulhts buts'uh haidults'uk, 'i be ts'iyawh hubudada 'et soo na'ubinla.

Sizi ndo búlhni, "Degha nus hoonzoo nohwhulh 'uhooja"

²⁰ Sizi 'et yugha hoodul'eh, 'en ts'iyawh hubutuniyú'en hoh njan ndo búlhni, "Nuhwheni tel'en ndet Yak'usda 'et hubudayi cho unli, 'et nuhwheni nuwhe'ilhdzun 'uhoont'ah.

'Et huwa degha nus hoonzoo nuhgha whults'ut.

²¹ Nuhwheni k'an buye'últs'ilh,

untehdai, 'et huwa degha nus hoonzoo nuhgha whults'ut.

Nuhwheni k'an ahtso, 'et tehdlah, 'et huwa degha nus hoonzoo nuhgha whults'ut.

²² Hoh t'eh dune nuhts'u hudutrik 'ink'ez 'aw hubulh 'óoh't'e ghaít'ah nuhowhulhts'i.

'Ink'ez nuhch'a yahutelhtuk hoh yinkak dune ye'

'en bugha, 'et huwa nuhozi dutsun hitelhtsilh 'ink'ez 'un hitelhdulh.

'Et whuz na'a ndunóhowulh'en t'eh,

'et degha nus hoonzoo nuhgha whults'ut.

²³ 'Et dzin ndóohooja t'eh, 'et hooteht'i 'ink'ez hoonah't'i hoh nduk tóolhutluk. 'Alha 'uhoont'ah nduk yak'uz hooncha 'et nuhwhuba k'elha whutele. Hoh t'eh whu-sawhutelts'ulh ndunnah whuz na'a zeh ndunohotel'ihl, 'et ndunt'ah butsun whudelhdzulh, 'en chah niz dak'ez nus whunilh'en inle, whuz na'a zeh ndubuhahl'en 'et huwa.

Bulunah degha nus hoontsi' hubugha whútelhts'ulh

²⁴ "Et whunts'ih nuhwheni soode'a 'aht'ah, soo cho howahli!

Ndai be hoonah't'i, 'i be 'uda ts'iyawh nuhwhuba 'uk'elha whuzdli 'et huwa.

²⁵ Nuhwheni ndunnah soo 'a'ah, nuhwheni chah soo cho howahli!

Nuhyé'telst'ulh! Ndunnah hédlah howahli!

Nuhdzi dúnteda 'ink'ez tehtso!

²⁶ 'Et huwahli ndunnah sóo nuhghu yalhtuk.

Hoh da nus whunilh'en la'dudil'i, 'en chah butsun whudelhdzulh, 'et zeh ndó buhutni."

Nuhch'a húdetni, 'en hubuk'ehtsi'

²⁷ "Et whunts'ih ndez na'a ndun whudusni, nuhch'a húdetni, 'en buk'ehtsi'. Ndunnah nuhka cha'nizun, 'en chah sóo ne'bulh'en. ²⁸ Ndunnah nuhk'ehuyih, Yak'usda buts'un wúzo ka huba tenadóohdli. 'Et ndunnah dzuh ne'nohulh'en, 'en chah huba tenadóohdli.

²⁹ Ndunnah nuhnen k'ut nuhnezkuk t'eh, huba 'awh nandunóoh't'ah 'ink'ez 'ilhk'us ts'ih chah 'unohuhooleh. Ndan ndzoot nghu halchooz, ndzoozt'an chah buch'a yóntun gunih.

³⁰ Ts'yannah hoonliyaz ka nuhts'u ka 'utni t'eh, hubugha iyoohlelh. Ndai nuhwe'ilhdzun 'uyoon yilhchoot t'eh, buts'un ka na'doohtni gunih. ³¹ Nts'e na'a hukwa' nahzun dune danoh hotelh'ilh, 'et whuz na'a zeh nuhwheni chah 'et né'boolh'en. ³² Ndunnah nuhk'entsi',

'en zeh buk'ehtsi' t'eh, whuz na'a hoonzoo nahzun ih? 'Awundooh! Ndunnah lubeshi 'uhulh'en, 'en whunts'ih ndunnah buk'entsi', ts'iyawh hubuk'ehintsi'.

³³ Ndunnah soo ne'nohulh'en, 'en zeh soo ne'bulh'en t'eh, whuz na'a hoonzoo nahzun ih? 'Awundooh!

'Et lubeshi 'uhulh'en chah whuz na'a zeh 'et nduhút'en. ³⁴ 'Et ndunnah bughi zilh'ai t'eh, 'en nuhtl'anaíte'ah nuhzun t'eh, whuz na'a hoonzoo nahzun ih? 'Awundooh!

'Et lubeshi 'uhulh'en, 'en whunts'ih lubeshi 'uhulh'en ghe' hulh'ai 'ink'ez 'et 'uneltsuk zeh hubutl'anáha'aih. ³⁵ 'Et whunts'ih nuhch'a húdetni, 'en hubuk'eohtsi', 'ink'ez soo ne'boolh'en. Hubughe 'oohla 'ink'ez hoonliyaz nuhtl'anaíte'ulh hukwa tsi hólhi gunih.

'Et whuz na'a ndaht'en t'eh, hooncha hoh nuhwhuba k'elha whutele. 'Et ndun yak'uz soo 'udedo 'int'ah, 'en k'una'a tihleh. 'Alha ndunnah suchanailya chadusnih 'ink'ez ntsi' chah,

ts'iyawh hubuts'un unzoo. ³⁶ 'Et nuhwe'abá nts'e na'a te'ninzun, nuhwheni chah whuz na'a zeh te'noohzin.

'Uyoon ba nahoohyeh gunih

³⁷ "Uyoon ba nahoohyeh gunih, doo ka sih 'aw nuhwhuba nahoodeh ghaít'ah. 'Uyoon k'ehoh'alh gunih, 'et sih 'aw nuhk'eholts'it ghaít'ah. 'Uyoon ba whunaoodoolhunah,

'et t'eh nuhwheni chah nuhwhuba whunaoodutetnah. ³⁸ 'Uyoon hubugha' náh'ai, 'i nuhtl'anátedukulh ho' 'int'ah. Lht'usúkat 'ink'ez lhai cho tele. 'Et niyulh'uz hoh bé haitekulh. 'Et 'uneltsuk hoh nuhbut nehítekalh. Daltsuk hubugha ináh'ai, 'et 'uneltsuk

zeh nuhtl'anátedukulh 'et huwa." ³⁹ Be nawhutnuk be whúts'odul'eh, 'i be hubulh yailhtuk,

“Soo ih chawhés'en 'uyoon chawhés'en nutéguz? 'Alha nahúlt'ah ka háwhedukai 'ahoolts'it! 40 Hodul'eh 'ink'ez whuyodulh'eh, 'en 'aw yagha ndoh cha'ít'ah. 'Et whunts'ih ndunnah soo ts'ah'un na'a hodul'eh, 'et hubodulh'eh 'en k'una'a 'uhutet'ilh. 41 'Et di ka nyulhutsin lhusyaz buna k'et deztan, 'i nilh'en, 'et whunts'ih 'aw t'oonuzinzun nyunch'oh duchun cho nyuna k'et deztan? 42 Nts'e na'a nyulhutsin 'uduténihl, 'Sulhutsin nyo lhusyaz nyuna k'éhanádoostan.' 'Et whunts'ih nyunch'oh duchun cho nyuna k'et deztan 'aw chasá'en. Nyunch'oh duba naindzoo! 'Udechoo duchun cho nyuna k'éhanadintih. 'Et t'eh soo yutó'en hoh nyulhutsin nyo lhusyaz 'i buna k'éhanaidontan.

Dune budzi yuh be whudezbun, 'i be yatelhtuk

43 'Et duchun dinzoo 'aw mai untsi', 'i bughi noot'ai ghaít'ah. 'Et whuz na'a zeh duchun dintsi' mai unzoo, 'i bughi noot'ai ghaít'ah. 44 'Et whuz na'a zeh bumai bugha duchun dant'ah 'int'ah t'enudzun. 'Et whuz na'a zeh ndi mai unzoo, figs hiyulhni, 'aw whus chun bughu hiyoonoye ghaít'ah. 'Ink'ez whuz na'a zeh whuscho chun, 'aw mai cho ndoh whut'en bughu hiyoonoye ghaít'ah. 45 'Et whuz na'a zeh dune unzoo, ndai unzoo budzi yuh hoonli, 'i bugha khunek unzoo be yalhtuk. 'Ink'ez dune untsi', ndai untsi' budzi yuh hoonli, 'i be khunek untsi' be yalhtuk. Ndez na'a njan nduwhtuni, dune di budzi yuh be whudezbun, 'i be yatelhtuk.

Sizi Gri bughunek soo cho whulh ts'ooyin

46 'Ink'ez di ka 'SMoodihti, sMoodihti,' sudahni, 'ink'ez daja nuhwhudusni 'aw húk'w'u nucha'zagt'en? 47 Ndan sts'un teyih 'ink'ez soo zelhts'ai 'ink'ez hukw'ú ne'ut'en, 'et ndan 'uhint'ah 'en bunwhuntelhtun. 48 Ndez whuz na'a 'et ndúhint'ah. Dune bukoo 'uwhtelilil hoh, soo ye yoh hahónkai 'ink'ez bukoo buk'uwhez' ai 'et tse k'ut newhúte'ah. 'Et ndet too telhbun t'eh, 'et ninli ulhtus bukoo whut'agheznai, 'et whunts'ih bukoo 'aw dachahóonil. Tse k'ut niwhuni'ai 'et huwa. 49 'Et whunts'ih ndunnah sughunek yoozelhts'ai 'ink'ez 'aw hik'unucha'ust'en t'eh, 'et ndez na'a njan nduhint'ah. Dune yun k'ut bukoo 'uhoonla. 'Ink'ez bukoo buk'uwhez' ai 'i 'aw cha'hiyílil. 'Et ninli ulhtus bukoo whut'agheznai 'et 'ahoh nawhonet'ai. Tube wheóonujut hoh hoolah whuzdli.”

7

Nehughan whumoodih yuba ne'út'en, Sizi soo ná'yinla

1 'Et dune Sizi yoozelhts'ai ndet hubugha ndo búlhni, 'aw 'et ts'iyawh lhaoodinla. 'Ink'ez keyah Capernaum huwhutni whuz lhgha dinya. 2 'Ink'ez njan 'et keyah whut'en 'et 'ilhunuh nehughan whumoodih yuba ne'út'en. Tube yúk'entsi', 'en tube nduda 'ink'ez 'aw 'et datetsah. 3 'Et ndun nehughan whumoodih Sizi yulh údants'o 'ink'ez Lizwif tsuh whudelhdzuhl, 'en whuz whebalh'a. Sizi hiyoodutélhktu nehughan whumoodih yuba ne'út'en soo na'yooleh ka. 4 'Et Sizi highu nindel hoh soo tube cho hits'uh tedudlih 'ink'ez 'uhiyulhni ndun nehughan whumoodih, 'en tube unzoo ho' 'int'ah yuba ne'út'en, 'en soo na'yooleh ka. 5 'Nedune, 'en hubuk'entsi' 'ink'ez 'en bugha Lizwif buluglez neba 'uhóonla,' hiyulhni. 6 'Et hubulh tez'as. 'Et Sizi koo wheghah uyalh hoh, 'et ndan nehughan whumoodih 'en hubulh dune Sizi hits'ú whebalh'a. Hidudezdel 'ink'ez Sizi 'uhiyulhni, "Nehughan whumoodih njan ndunyulhni, 'SMoodihti 'ants'i' 'et dzuh ne'dudoldzut gunih. Sukoo datányah huba 'aw soo cha'lhudzoo 'et huwa. 7 'Et si chah 'et ndunusuzun 'aw soo cha'lhudzoo ndudutésyahl huba. 'Et whunts'ih 'ants'ih nghunek be dini t'eh, 'et suba ne'út'en soo na'óotneh. 8 'Alha si chah 'onghunnah sgha ndoh 'uhint'ah hoh hukwa' huninzun tune' satel'h'en. 'Et si chah whuz na'a zeh nehughan huba gha ndoh 'ust'ah. 'Et 'ilhunuh, 'Inyahl!' dúsni t'eh, 'et 'ahoh 'aw 'et teyahl. 'Et 'uyoon, 'Anih!' dúsni t'eh, 'et 'ahoh sts'u teyih. 'Et suba ne'út'en, 'Njan dineh!' dúsni t'eh, 'et 'ahoh 'et ndút'ih.' ” 9 Sizi ndun dune daja ni yulh údants'o hoh tube buba hooncha. 'Et ndunnah hinedulh, 'en hubuts'un nalhú'a 'ink'ez ndo búlhni, 'Israel ndulhcho keyah ndun dune 'en k'una'a 'aw 'ilhunuh ndulhcho be huba 'alha' hoot'ah nachasulhtek.” 10 Ndunnah yuts'un whel'a ndun nehughan whumoodih bukoo ts'ih nahundel, 'et ndun yuba ne'út'en nduda, 'en 'aw dáchait'ah hoh highu danáandel.

Dune dazsai, Sizi dinaidilhti

11 'Et 'om bun dzin Sizi njan keyah Nain huwhutni, yugha hoodul'eh bulh, 'ink'ez hooncha hoh lhanah hinedulh, 'en chah ts'iyawh whuz haíndel. 12 Njan keyah na'nestl'oo ghu ti wheghah nihúnindel, 'et khunyaz dune dazsai hidihídezkaí. 'Et 'ama tsandelh, 'aw 'ilhunuh zeh buye' 'int'ah. 'Et keyah whut'en, 'en lhanah yulh údulh. 13 'Et neMoodihti ya'en hoh yugha te'nanzin 'et ndi yúlhni, "Intso ilah!" 14 'Ink'ez be nesulhti yughu neninya 'ink'ez yut'agheznai. Ndunnah yelhtel, 'en chah 'ilhuz nihunindel. 'Ink'ez 'et 'utni, "Chilh dune didinyih nyudúsni!" 15 'Ink'ez ndun dune dazsai nduk ninatl'adenda 'ink'ez yawhénilhtuk.

'Ink'ez Sizi, 'en be'ama t'anayalhti. ¹⁶ Ts'iyannah hunelhújoot, 'ink'ez Yak'usda hidélhti hoh njan duhutni, "Njan netah nus whunilh'en hooncha unli, 'en whusainya." 'Ink'ez 'et chah nduhútni, "Yak'usda budune hubutah nunasja." ¹⁷ 'Et Judea yun k'ut nduhoolcho 'ink'ez 'et whunat keyah nduhoolcho chah, ts'iyannah hiyulh údants'o.

John dune too be 'ulh'en yugha hoodul'eh, 'en Sizi ts'un whebalh'a hiyoodutélhkut ka

¹⁸ John yugha hoodul'eh ts'iyawh ndi hiduténilh dahooja 'et. ¹⁹ 'Ink'ez nanah 'anih hubúlhni 'ink'ez Sizi ts'un whebalh'a hiyoodutelhkut ka, "Nyun ih whusatányalh inli, k'us 'uyoon tulih ka ts'itóo'en?" ²⁰ 'Et Sizi highu ni'az 'ink'ez 'uhiyúlhni, "John dune too be 'ulh'en, 'en nts'u nételh'a nts'oodutelhkut ka, nyun ih whusatányalh inli, k'us 'uyoon tulih ka ts'itóo'en?" ²¹ 'Et 'ahoh ndunnah hunduda 'ink'ez buka, 'ink'ez ntsi' nududeh buyudínda, 'en chah lhanah hoh soo na'balh'en. Chawhés'en, 'en chah honilh'en butl'anáho'ai. ²² 'Et Sizi John yugha hoodul'eh ndo búlhni, "John buts'un ah'us. Ndet whunelh'en 'ink'ez whudáhts'o 'et dóohtni, nts'e na'a chawhés'en honilh'en nasdli. Nuchahúsdel, 'en nahúdelh nahusdli. Bukak nóduksi', leprosy hiyulhni, 'en chah soo ná'binla. Cha'hudusts'uk, 'en chah 'ahudits'o nahusdli. Yahadla, 'en chah dináhudidel. Tel'ennah, 'en chah khunek unzoo, 'i be hubulh yaíntuk ho' hint'ah. ²³ 'Ink'ez ndunnah si sugha buba dzuh chahoolah, 'en degha nus hoonzoo bughá whults'ut." ²⁴ 'Et John khunek yuba na'a whenáhet'az, 'aw 'et Sizi John yughu yatelhtuk hoh 'ilhunahuwésdel njan ndo búlhni, "Dune chahóot'ih ts'ih ndet hukwa tsi hooih whuteh'ih? Tl'o ghazilh nónulhts'i, 'i tulih teh'ilh nahzun ih? ²⁵ Ndet simba hukwa tsi hooih whuteh'ih? Dune naih duchut 'i be soo naduja, 'en tulih teh'ilh nahzun ih? 'Alha ndez whuz na'a soo nadut'ih, 'en lhai sooneya ts'iya hulhtsih 'ink'ez hubudayi cho bukoo huwhut'i. ²⁶ 'Et ndet simba hukwa tsi hooih whuteh'ih? Nus whunilh'en tulih? A! 'Alha 'un whudúсни nus whunilh'en ba nus unzoo 'et nulh'en! ²⁷ 'En bugha 'uk'une'usguz inle hoh njan ndutni, 'Soo zilhts'ai, khunek suba na'a, 'en ntsuh tes'alh. 'En ti lhutanyalh, mba lhaoodutelih'et wheni.'

²⁸ 'Alha 'un whudúсни nus whunilh'en ndunnah whuzdli, 'en hubutah John dune too be 'ulh'en, 'en degha nus ncha 'int'ah. 'Et whunts'ih nts'e Yak'usda hubudayi cho unli, ndan degha nyoh 'int'ah, 'en 'o nus uncha unli." ²⁹ Ts'iyannah dune 'ink'ez sooneya 'ilhuhunughes'aih, Sizi daja ni hidants'o hoh Yak'usda buba 'alha' yija, John 'en too be' balh'en 'et huwa. ³⁰ 'Et whunts'ih ndunnah Pharisee 'ink'ez Moses be' dustl'us k'ut daja ni hoh beni hoonli be yalhtuk, 'en ts'iyawh Yak'usda nts'e buts'uh hukwa' ninzun, 'ants'ih 'et 'un hubutelhdel. 'En 'aw John too be cha'bilel 'et huwa. ³¹ 'Et Sizi ndo búlhni, "Dune k'an yuk'edídeh nts'e na'a simba nuhwhuba lhzihiboosdleh, k'us dant'ah dune hinli, 'et nuhwhudutésnilh. ³² Ndez na'a njan nduhínt'ah, 'uskehyaz duhúlt'ah hoh hiya'alh be 'e'óket 'et hudelhts'i. 'Ink'ez lhts'i háhudih hoh njan ndulhóduetni, 'Be ts'ujun be nuhwhuba ts'ujun,

'et whunts'ih 'aw chanuzahdak.

'Ink'ez nuhwhuba tso ts'inli,

'et whunts'ih 'aw chasáhtso!'

³³ Soo cho whunulh'en, John dune too be 'ulh'en whusainya, 'aw lhes chas'al 'ink'ez mai too chah chasnai. 'En 'údahní 'Ntsi' nududeh buyudínda, dahni. ³⁴ 'Et yinkak dune ye' whusainya, 'a'alh 'ink'ez 'utnai. 'Et 'udáhní, 'Ndun dune 'en bucha hooncha 'ink'ez tanutnai. Sooneya 'ilhunawanowes'aih 'ink'ez lubeshi 'ulh'en, 'en hubudune, dahni. ³⁵ 'Ink'ez ndunnah hiye whunih na'dudil'i, 'en bugha ndi be whútnih, 'i ts'ah'un na'a 'uhóoja."

Ts'eke lubeshi 'ulh'en bulubeshi lhai, Sizi ts'iyawh yuba whunaoodelhúnah

³⁶ 'Et Pharisee 'ilhunuh yughu nusíya dudulh ná'oot'ah yulhni. 'Et whuz bukoo ts'ih yughu danínya. 'Et kw'uzdai yeyoh 'int'ah, 'i yuzih nilget ute'ulh wheni. ³⁷ 'Et 'ilhunuh keyah whut'en, 'en lubeshi 'ulh'en ts'eke. 'Et Pharisee bukoo ts'ih 'et Sizi 'a'alh yulh údants'o hoh whuz whinya. Ndi k'unutsutjul sooltsun, 'i dezti, 'i alabaster luboodai bé yalhdze, 'i whuz wheya'ai. ³⁸ 'Et yut'ak suyin. Utso 'ink'ez bunatsultoo buke k'eidil'tik. 'I dutsigha be yuna'ulhdéh, 'ink'ez buke naidunants'ooz. 'Ink'ez ndi k'unutsutjul sooltsun, 'i dezti, 'i be yuke yulhlho. ³⁹ 'Et ndun Pharisee, ndun 'anih yudani, dich'oh na'dudutni, "Et ndun nus whunilh'en unli t'eh, t'eeonózin da dant'ah ts'eke 'int'ah yut'aghunah. 'En lubeshi 'ulh'en 'int'ah." ⁴⁰ 'Et Sizi ndi yúlhni, "Simon, hoonliyaz nyudutésnilh." "Nehodulh'eh dini." ni. ⁴¹ 'Et Sizi ndi yúlhni, "Ilhunuh sooneya yughu sulh'ai nanah dune ghe 'ulh'ai. 'Ilhunuh 'en 500 unli sooneya, 'ink'ez 'ilhunuh 50 unli sooneya. ⁴² 'Aw hiba k'elha hitelhtsilh chahít'ih. 'Et nahúlt'ah huba whuladetnik. 'Et sudini, k'us ndan degha nus yuk'entsi'?" ⁴³ 'Et Simon 'utni, "Si ndunúszun, ndun degha nus lhai yuba ladetnik, 'en degha nus yuk'entsi'." 'Et Sizi ndi yúlhni, "Soo ts'ah'un na'a 'udenja." ⁴⁴ 'Et ndun ts'eke ts'un nalhu'a 'ink'ez Simon 'uyúlhni, "Ndun ts'eke nilh'en ih? Nkoo daníya hoh 'aw too suba 'et néchainkal suke

be tóona'tesgus huba. 'Et whunts'ih ndun ts'eke dunatsúlto be suke nainelhtsul 'ink'ez butsi'gha be yuna'alhde. ⁴⁵ Nyun 'aw na'duts'oos be dahooja chasudínel. 'Et whunts'ih ndun ts'eke 'udechoo danínya whunts'un 'aw suke naduts'oos st'lecha'ínil. ⁴⁶ 'Aw sutsi khe be chaílhoh 'et whunts'ih ndun ts'eke ndi khe be suke yulho. ⁴⁷ 'Et huwa ndi ndusni, bulubeshi lhai ts'iyawh huba whunaoodelhúnah. Nilh'en ih 'ilhuz tube skentsi' ho' 'int'ah? 'Et whunts'ih ndunnah hoontsolyaz lubeshi huba hoolah unli, 'en whunts'ih hoontsolyaz zeh whe skehinti'." ⁴⁸ 'Ink'ez Sizi ts'eke ndi yulhni, "Nlubeshi ts'iyawh mba hoolah suli." ⁴⁹ 'Et ndunnah 'onghunnah kw'uzdai k'ut na'hut'alh, 'en dich'oh 'ulhódutni, "Ndun, ndan ho' 'int'ah? Lubeshi 'i whunts'ih yuna'alhdeh?" ⁵⁰ 'Ink'ez ts'eke ndi yulhni, "Mba 'alha' hoont'ah, 'i be dinjih. 'Aw 'et ndzi dezghel hoh naindahl!"

8

Lhanah ts'ekoo 'en Sizi hila 'ut'en

¹ 'Et hukw'elh'az Sizi kedutezut keyah whucho 'ink'ez keyah whuyaz totsuk, ndet hoh Yak'usda hubudayi cho unli, 'et hubugha khunek unzoo, 'i be yatelhtuk. 'Et ndunnah lanezi 'o 'at nanah, 'en chah hiyulh 'ut'en. ² 'Ink'ez ndunnah ts'ekoo 'en chah hiyulh 'ut'en hoh ntsi' nududeh, 'i buyudinda 'ink'ez bukak nódutsi', 'en ts'iyawh soo na'binla. Mary Magdala whut'en, 'en chah 'ut'en. 'En 'int'ah skwunlai 'o 'at nankoh ntsi' nududeh, 'i buyáh hanaide. ³ 'Ink'ez Joanna, Chuza bu'at, 'et Chuza, 'en Herod bukoo hudelhts' i bumoodih unli, 'en bu'at 'ink'ez Susanna, 'ink'ez 'uyoon lhanah chah, ndai hiyit'i, 'i be hila 'ut'en.

Ha'nule bugha whúts'odul'eh

⁴ 'Et njan nduhoolhcho keyah whut'en 'ilhuhowezdel 'ink'ez Sizi nawhutnuk, 'i be whuts'odul'eh, 'i be yatelhtuk, ⁵ "Ilhunuh 'a'nule 'en 'a'untelelh ka. 'Et 'a'nule 'et ndi ninutsut 'et bulah 'ants'ih 'et nts'oh nanánkat. 'Ink'ez hik'ut nusúdel 'et dut'aiyaz chah ts'iyawh yuneldel. ⁶ 'Et bulah chah tse tah nanánkat. 'Et ndet hanálhyi hoh 'et ndi hanulhyeh, 'i too hoolah 'et huwa yanúdezgi. ⁷ 'Et 'onghuh, 'i chah whus cho tanínkat. 'I chah whus cho bulh taninyi 'ink'ez whus cho 'i bugha chaniyel. ⁸ 'Et 'onghuh, 'i yun unzoo, 'i k'ut nanánkat, 'ink'ez hanálhyi. 'Ink'ez bumai 'i lhan'un teh lhai suli lanezi lanezi (100) 'et 'uneltsuk suli." 'Et hukw'elh'az 'et tube cho ndo búlhni, "Ndunnah budzo hooni, 'en hiyoozóhlt's'a huba' hoont'ah!"

Di ka Sizi ndi be nawhutnuk, 'i be whuts'odul'eh, 'i be hubulh yalhtuk?

⁹ 'Et yugha hoodul'eh hiyoodulhukut, "Ndi be whuts'odul'eh, 'i daja ni hoh 'utni?" ¹⁰ 'Et ndo búlhni, "Ndi Yak'usda hubudayi cho unli huba whe' hoont'ah hooyah, 'i bugha t'eeonoozhch ka, 'i 'uda nuhtl'awhélt's'ut. 'Et whunts'ih 'onghunnah ndi khunek be whuts'odul'eh, 'i whuz na'a zeh hubulh yalhtuk. 'Et sih, 'Honah'en 'et whunts'ih 'aw chahuwhés'en.

'Et hodits'o 'et whunts'ih 'aw t'ehonínun daja ni."

'A'nule bugha whuts'odul'eh, 'et Sizi neba hukw'u nuhúlhye

¹¹ "Ndi be nawhutnuk, 'i be whuts'odul'eh, 'i ndi 'et ndutni. Ndi mai 'anukat, 'i Yak'usda bughunek 'int'ah. ¹² Ndunnah ti 'int'ah, 'en Yak'usda bughunek hidits'o 'ink'ez netsudule ndi khunek budzi be hanaída'aih. 'Et whuz na'a 'aw huba 'alha cha'hoot'ah 'ink'ez 'aw hudoojih ghaít'ah. ¹³ Ndai tse tah nanánkat, 'i li'int'ah hodits'o 'ink'ez huhóont'i hoh khunek hiyilhchuk. 'Et whunts'ih 'aw bughih hoolah. 'Et huwa 'astl'iyaz huba 'alha' hoont'ah. 'Et 'ahoh bé tink'us hunint'uk, 'i be tinch'a haninkat, 'en 'uhint'ah. ¹⁴ Ndai ndi whus cho tah nanánkat, 'i 'et njan nduwhutni, dune Yak'usda bughunek hidits'o 'et whunts'ih ndi yun k'ut huwu ni ts'inli, ndi yun k'ut soo uzde'a 'uhoont'ah, 'ink'ez ndai ndi yun k'ut huhoont'i tune' hut'en, 'i ts'iyawh whus cho 'i bulh 'ilho ndunt'ah. 'Et huwa 'aw lhaoodoolneh wule ghaít'ah. ¹⁵ 'Et whunts'ih ndai yun unzoo, 'i k'ut nanánkat, 'i ndez na'a njan nduwhutni, 'en huhóont'i 'et khunek hidants'o 'ink'ez budzi unzoo hoh hiyoontun. Nts'oh dahooht'ah whunts'ih 'ilhuz hiyilhchoot. 'Et whuz na'a bumai lhai tele.

'Et nts'e too dez'kun, 'i hukw'usú'ai, 'et hukw'e yi'ai, 'i Sizi bugha yalhtuk

¹⁶ "Dune too dez'kun 'ink'ez 'i nahidilh'k'aih 'ink'ez 'aw 'oosa' yuk'uz koo naídoo'ah ghaít'ah. K'us kwusuti t'ah ts'ih whuyuh neyoo'alh ghaít'ah. 'Et nts'e too dez'kun, 'i hukw'usú'ai, 'et hukw'e yi'ai. 'Et sih ndunnah dahúndel' ts'iyawh 'i be hinoolh'en. ¹⁷ Ndez na'a 'et ndúhoont'ah, ndai nest'i, 'i whunts'ih nus de 'et ts'iyawh haootekulh. Ndai whu'iz 'uts'ulh'en hukwa' ts'ut'en, 'i 'et whunts'ih ts'iyannah t'ewhuntezeh. 'I ts'iyawh ndet whét'en, nus de ts'et haootekulh. ¹⁸ 'Et soo cho howahli nts'e na'a ndi khunek dutéht's'o. Soo ts'ah'un 'alha ndunnah hoontsolyaz t'ehonínun, 'en 'o nus lhat t'ehonínun, 'et hubugha whútelts'ulh. 'Ink'ez ndunnah hoonli t'ewhunúszun, hoonts'olyaz 'uhudits'o, ndai 'aw 'i hiyit'i, 'i huninzun, 'et whunts'ih 'i bugha nayútelcholh."

Sizi be'ama 'ink'ez bulhutsinkah bulh hiyulh yatelhtuk hukwa' huninzun

¹⁹ 'Aw 'et be'ama 'ink'ez bulhutsinkah bulh, hits'un hukwa' hut'en. Dune hulan 'et huwa 'aw highah niooya ghaít'ah. ²⁰ Bulunah ndi hiyulhni, "Nyu'ama 'ink'ez nyulhutsinkah bulh, 'az nahudelhúya, nyuhuntel'hil hukwa' huninzun." ²¹ 'Et ndo búlhni, "Ndunnah Yak'usda bughunek yoozélhts'ai 'ink'ez hik'une' 'ut'en, 'en se'ama 'ink'ez sulhutsinkah hinli, ho' hint'ah." ²² 'Et hukw'elh'az 'ilhuh dzin yugha hoodul'eh bulh ts'i be handel. 'Ink'ez "Nyan uztooke," hubúlhni. 'Aw 'et nus níhuzki. ²³ Nus níhuzki 'et Sizi 'ahoh nanesti. Khunyah hubulh taoodelts'ut 'ink'ez 'aw 'et ts'i too be táduteh. 'Ink'ez tube wheóonujut hoh hube naints'i. ²⁴ 'Et ts'enahinílhts'ut, "NeMoodihti, neMoodihti, 'aw 'et too ts'uteghan!" hiyúlhni. 'Et ts'enahinílhdzut, 'ink'ez didinya hoh too k'ut nilhts'i 'i khunek ulhtus 'i be yuts'un nahezya. 'Et 'ahoh k'ah na'hooja 'ink'ez dínghel. ²⁵ 'Et ih, "Nuhwhuba 'alha' ust'ah, dáhooja?" hubúlhni. Ts'iyawh whehunelhújoot 'ink'ez huba hooncha. 'Et 'ulhódotni, "Ndun dune, 'en ndan unli ho' int'ah? Nilhts'i 'ink'ez tatsi 'i whunts'ih dah yúlhni, 'aw 'et yuk'une' 'ut'en."

Dune ntsi' nududeh, 'i buyidélhts'i, Sizi soo ná'yinla

²⁶ 'Aw 'et Gadaren hubuyun k'ut yahuzki. 'Et njan 'et Galilee howanch'az whuz'ai. ²⁷ 'Et dehainya 'et 'ahoh dune 'et keyah whut'en yududezya. 'En sa whuts'un ntsi' nududeh, 'i lhái buyidélhts'i. 'En tsan 'et nuya, 'ink'ez 'aw koo chailah, 'et ts'un k'ut whut'i. ²⁸ 'Et Sizi yutel'h'en hoh yuts'u hahuyih 'ink'ez yubut nacháneti. 'Ink'ez tube cho yuts'u tédudli, "Sizi nyun soo deghan doh Yak'usda buYe' unint'ah! Ndet uts'u hukwa' ninzun? Nts'u tedusdlíh, dzuh nusilhdzut ilah!" ²⁹ 'Et 'uda ndi ntsi' nududeh, 'i khuneki be ndo búlhni ndun dune ye yáhanadoodeh ka. Hoh da 'ut'es tl'ool be hiyulhghel bula 'ink'ez bukechun chah, 'et whuz na'a highunli inle. 'Et whunts'ih lhat hoh ndi ntsi' nududeh, 'i yilchukw hoh ndi 'ut'es tl'ool lhtánuduch'us 'ink'ez ndi ntsi' nududeh, 'i 'en dune chahóot'ih ts'ih whuz wheniyukw. ³⁰ 'Ink'ez Sizi 'en yoodulhkut, "Ndai nyoozi?" "Legion," yulhni. Lhanah ntsi' nududeh, 'i ye yudúlt's'i 'et 'utni. ³¹ Ntsi' nudúdeh, 'i Sizi hits'u tedudli 'et nyo tsak'et whucho whut'ah hoolah, whuz teh netólh'a gunih, hiyúlhni. ³² 'Et goso lhái hoh 'onghun whenun núlh'as. 'Et ntsi' nududeh, 'i Sizi hits'u tedudli goso hubuyidoodeh ka. 'Et hubut'l'aho'ai. ³³ 'Et ntsi' nududeh, 'i dune, 'i but's'uh háidande hoh goso buyidande. 'Aw 'i bulh goso bulh wheghah helghaz 'ink'ez too buhanghan. ³⁴ 'Et ndunnah goso ghuinli 'en dahooja honalh'en hoh ts'iyawh whehélghaz. Hedulh hoh keyah whunat whut'en 'ink'ez keyah whut'en ts'iyawh ndo badáni. ³⁵ 'Et ndunnah dune hodánts'o hoh 'et whuz whehándel 'ink'ez honalh'en. 'Et Sizi highu nindel hoh 'et ndun dune ndun ntsi' nududeh, 'i but's'uh hanaádede, 'en Sizi yuk'et'l' usda hoh hinalh'en. Naih be dune unli 'ink'ez beni chah bugha nádelts'ut hoh soo 'int'ah. Ts'iyawh hinalh'en 'ink'ez hunelhújoot. ³⁶ 'Et ndunnah dahooja honalh'en, 'uyoon chah hudáni 'et dahooja ndun ntsi' nududeh, 'i buyidánda 'aw 'et dujih. ³⁷ 'Et ndunnah Gadaren huwhut'en 'et whunat whut'en nduhóolcho hoh whe hunelhújoot. 'Et huwa Sizi hubuch'a naooja hiyúlhni. 'Et ts'i be naja 'ink'ez hugho whenaduki. ³⁸ 'Et ndun dune ndi ntsi' nududeh, 'i but's'uh hanáide, 'en Sizi yuts'u tedudli yulh útenilh hukwa' ninzun. 'Et whunts'ih Sizi whenáyalh'a 'ink'ez ndi yúlhni. ³⁹ "Nkoo ts'un naindalh 'ink'ez dáhoolcho hoh Yak'usda mba daja, ts'iyawh hubudóni." 'Et whenaja 'ink'ez keyah ndulhcho hoh ts'iyannah Sizi dahoolcho yuba' hoonla ts'iyawh 'et hubugha dune ndo budáni.

Sizi Jairus butse' dináidilhti, 'ink'ez ts'eke Sizi yunaih t'agheznai

⁴⁰ 'Aw 'et nyan whenadúki. Ts'iyannah Sizi hikonúta hoh whusanaduki ts'iyannah huhóont'i hoh nahiyet'en. ⁴¹ Soo yanasdúki íbulh 'ahoh dune Jairus yughu ninya. 'En Lizwif hubuluglez whumoodih 'int'ah. Yubut nachaneti 'ink'ez yuts'u tedudlih bukoo ts'ih yulh nátoot'as ka. ⁴² 'Ilhunuh zeh butse', lanezi 'o 'at nat be naooduzuk bat'en. 'En 'aw 'et dáwhenintsai. Sizi, 'en Jairus bukoo ts'ih yulh nátest'az. 'Aw 'et 'ilhohuwedel lhanah higha wézedel. ⁴³ 'Ilhunuh ts'eke tube dzuh nuzut lanezi 'o 'at nat naodezuhl 'et dúwhulez hoh 'uskai 'iyúlh'en, yoo be dúyun lhanah chah hukwa' hiyálh'en. 'Et hukw'uz duzooneya ts'iyawh hoolah yulhtsi, 'et whunts'ih nus zeh lhe'enilh. ⁴⁴ Ndun 'en ts'eke Sizi yut'ah ts'ih yughu ninya 'ink'ez nayits'uz, 'i yus ts'ih but'ah 'et yut'agheznai. 'Et 'ahoh uskai 'uyulh'en 'i 'ustl'e' uja. ⁴⁵ 'Et Sizi 'utni, "Ndan 'uja st'agheznai?" "Ts'iyawh wheni ilah 'uts'uja," hutni. Peter 'ink'ez ndunnah yulh 'ut'en, 'en 'uhutni, "Nemoodih lhe'huneltsuk nyunat hahúneldo 'ink'ez nyuhoolghas. 'Ink'ez di ka' dini 'Ndan st'agheznai? dini?" ⁴⁶ 'Et Sizi 'utni, "T'eeonuszun 'ilhunuh st'agheznai. Be ulhtus, 'i sts'u hadélt's'ut 'et nt'eeonuszun." ⁴⁷ 'Et ndun ts'eke t'eeonanzin 'aw yuch'á ntool'ih ghaít'ah. Duldud hoh yughu ninya 'ink'ez yubut nachaneti. 'Et ts'iyannah nalh Sizi ndi yúlhni ndet huwa yut'agheznai 'ink'ez daja hoh 'ahoh soo ná'uja. ⁴⁸ 'Ink'ez ndi yúlhni. "Sútse' mba 'alha' hoon't'ah 'et huwa soo na'inja. 'Aw 'et ndzi dezghel ho' unint'ah naindalh." ⁴⁹ 'Et 'Awhuz ndun ts'eke yulh yalhtuk hoh Lizwif hubuluglez whumoodih bukoo usda, 'en yughu ninya 'ink'ez ndi yúlhni, "Ntse'

dazsai. Whute ndun dune hoodul'eh, 'aw 'o 'un dzuh nilhdzut ilah. 'Aw 'et dazsai ho' 'int'ah." ⁵⁰ 'Et Sizi yulh údants'o hoh Jairus ndi yúlhni, "Whenoljut gunih, njan 'et zeh mba 'alha' hot'e, 'ink'ez soo na'tetnilh ho' 'int'ah." ⁵¹ 'Ink'ez bukoo ts'ih daninya. 'Et 'aw 'uyoon chah dachaóosya. Peter, James, John, 'ink'ez ndun 'uski be'abá 'ink'ez be'ama chah, 'en zeh dahóodelh. ⁵² 'Et ts'iyannah tso yahalhtuk 'ink'ez hik'etedudlih. 'Et Sizi ndo búlhni, "Ahtso ilah! 'Aw dachaital 'ants'ih nanesti ho' 'int'ah." ⁵³ 'Ink'ez ts'iyawh highudloh, t'ehonínzun dazsai ho' 'int'ah. ⁵⁴ Sizi ts'iyawh tinaóobunilh'a, 'ink'ez 'uski yula ilhchoot 'ink'ez, "Uski didinyih," yúlhni. ⁵⁵ Buyégha buyunaídede 'ink'ez 'ahoh didinya. 'Ink'ez 'et 'obúlhni, "Hoonliyaz yute'alh, 'i bugha ináh'aih." ⁵⁶ Be'ama 'ink'ez be'abá tube huba hooncha, 'ink'ez khunek ulhtus, 'i be ndo búlhni, "Uyoon dudóohtni gunih njan bulh nduhooja."

9

Lanezi 'o 'at nanah yugha hoodul'eh, Sizi whebalh'a hiye 'ut'en k'ah húhodutel'eh ka

¹ 'Et lanezi 'o 'at nanah yugha hoodul'eh, Sizi ts'iyawh buka' dani. Ntsi' nududeh, 'i ts'iyawh ndet whehíltus chah, 'ink'ez himoodih wule ka, 'et hubugha óoni'ai. 'Ink'ez dune ndet hukw'e hunduda, 'et chah soo na'boohoolh'en, 'et chah hubugha óoni'ai. ² 'Uyoon nts'e na'a Yak'usda hubudayi cho unli 'et hubugha hubulh yalhtuk 'ink'ez nduda soo na'hubuhooleh, 'et wheni wheóobal'h'a. ³ 'Ink'ez ndo búlhni, "Nts'e tehdulh 'et ndi nuhtuz, k'us nuhwhu'ezdlai k'us lhes, k'us sooneya chah, 'et ndunt'i, 'i toohla gunih. 'Ink'ez nankoh dzoort'an nyez, 'i waht'i gunih. ⁴ Ndet koo danáh'az, 'et zeh wahke, 'ink'ez 'et koo zeh whenádooh't'as. ⁵ 'Et ndunnah danáh'as 'aw chanwhadusnih t'eh, 'et keyah whunateht'us whutsah, 'et hubulez ch'a nuhwhuke naóohghat. 'I bugha t'ehonózin buk'ewhutelts'ulh 'et but's'uh whélt's'ulh." ⁶ 'Et whenáhedel 'ink'ez keyah totsuk whutuh lhunáhusdel. 'Et whuz na'a dune khunek unzoo, 'i be hubulh yalhtuk. 'Ink'ez keyah totsuk dune soo na'hulh'en.

John dune too be 'ulh'en, 'en hizelghí

⁷ 'Aw 'et hubudayi cho Herod hiyulhni whulh uduzts'ai nts'oh teh Sizi ne'ut'en. Bulunah nduhútni, "John yaidla hubutah nakhítina, 'en 'int'ah," hutni. 'Et huwa ba nawh 'uhooja. ⁸ 'Ink'ez 'uyoon chah 'uhutni, "Ndun 'en Elijah 'int'ah hoh nenalhts'et hainya." 'Et 'onghunnah chah nduhútni, "En 'uda yinkak Yak'usda be nus whunilh'en, 'ilhunuh nakhítina 'ink'ez 'en 'ut'en." ⁹ 'Et Herod 'utni, "John butsi k'unélt'o inle. 'Et whunts'i ndan nakh'oh 'ut'en ndun lhe'hoont'ah teh ne'ut'en bulh 'údusts'o?" 'Ink'ez yuntel'hil hukwa' ninzun.

5,000 dune, Sizi hiyoo'alh, 'i hubugha ní'ai

¹⁰ 'Et ndunnah whel'a whusanáhedel hoh dahét'en, 'et ts'iyawh hidani. 'Ink'ez "Aw 'et uztoodelh!" hubúlhni, 'ink'ez njan Bethsaida keyah whunat dune nuchasyah ts'ih wheóobanla. ¹¹ 'Et whunts'ih 'ilhohuwezdél nahuhoon'ai hoh hiyuntezdel. 'Et Sizi hoont'i hoh highu nindel 'ink'ez nts'e na'a Yak'usda hubudayi cho unli hukw'un'a hubugha hubulh yalhtuk. 'Ink'ez ndunnah soo na'tetnilh hukwa' ninzun, 'en chah ts'iyawh soo ná'balh'en. ¹² 'Aw 'et ts'etniz hukw'elh'az ye'un whezulh 'ink'ez ndunnah lanezi 'o 'at nanah, 'en highu nindel 'ink'ez 'uhiyúlhni, "Ndunnah 'ilhohuwezdél nabal'h'alh njan dune nuchasyah 'uts'int'ah. 'Et ndo ho keyah whunat hiya'alh, 'i hoket 'ink'ez 'et huteteh chah nahohólelh sih." ¹³ 'Et whunts'ih Sizi ndo búlhni, "Hoonliyaz hiyoo'alh, 'i hubugha naínuht'aih." 'Et 'uhiyulhni, "Lhook nankoh 'ink'ez lhes skwulai chah, 'aw 'i zeh ts'it'i. 'Et ndunnah 'ilhohuwezdél ts'uyi, 'i huba ts'onket t'eh, 'et zeh soo hubugha ná'uztet'alh." ¹⁴ 'Et njan 'ilhohuwezdél 'ankw'us 5,000 dune hinli. 'Et Sizi yugha hoodul'eh ndo búlhni, "Skwunlat lanezi hinli hoh (50) lhendun natl'ahudoolts'ilh budáhni." ¹⁵ 'Et whuz na'a 'uhuja. 'Aw 'et ts'iyawh natl'ahudelts'i hoh ¹⁶ 'et skwulai lhes yilhchoot 'ink'ez lhook nankoh chah, 'et nduk yutá'en 'ink'ez suchanaílya ni hoh yuba tenadedli. 'Et taidalhtuk 'ink'ez yugha hoodul'eh butl'ayánla, 'ilhohuwezdél hubugha hiyo'alh ka. ¹⁷ Ts'iyawh 'uha'al 'ink'ez soo' na'hunesdai hoh ndai ts'utezkat, 'i ts'iyawh 'ilunahíwezda hoh lanezi 'o 'at nankoh k'its'ai cho dezbun.

Sizi, 'en Christ unli, 'et Peter huwu yalhtuk

¹⁸ 'Et hukw'elh'az Sizi dich'oh zeh tenadedli 'ink'ez higha hoodul'eh hiyulh 'ut'en 'ink'ez huboodulh'kut, "Ilhohuwezel, 'en ndan usdli hutni?" ¹⁹ 'Ink'ez 'uhiyúlhni, "John dune too be 'ulh'en 'int'ah hutni. 'Et 'onghunnah Elijah 'int'ah hutni. 'Ink'ez 'onghunnah 'uhutni 'uda nus whunilh'en, 'ink'ez 'ilhunuh dinadíja, 'en 'int'ah, hutni." ²⁰ 'Et, "Nuhwheni do?" hubúlhni, "Ndan usdli dahni?" Peter yatelhtuk hoh ndi yúlhni, "Ndun Yak'usda buChrist ts'utni, 'en 'unint'ah."

Dzuh nutezut 'ink'ez datétsah, 'et Sizi huwu yalhtuk

²¹ 'Et khunekti be ndo búlhni, "Khun teh 'uoyon dóohtni gunih!" ²² 'Ink'ez ndo búlhni, "Yinkak dune ye' lhat whé dzuh nutezut buba 'uhoont'ah. 'Ink'ez ndunnah tshuh whudelhdzulh, nawhulnuk degha nus dézti, 'ink'ez Moses be' dustl'us 'uk'ununa'úsduzug chah, 'en ts'iyawh hich'a dutétni ho' hint'ah 'ink'ez 'et hituzelghelhel. 'Ink'ez whulh tat dzin dinadutédalh."

Sizi ndo búlhni, "Ndan sulh tídulh hukwa' ninzun, dich'oh duba moodih nahoodle ghaít'ah"
²³ 'Ink'ez ts'iyawh 'úbulhni, "Ndan dune se'ut'en k'ah ts'ih oot'en ka hukwa' ninzun, 'et ndunt'ah ndai dats'int'ah, ts'iyawh whuladootnih 'ink'ez dzin totsuk dulhdulalhgus yóolhchoot 'ink'ez suntooya. ²⁴ 'Et huwa ndunnah hoh húkhuna hotelhyih, 'en 'et whunts'ih tinta hoté'ah. 'Et whunts'ih ndan ye khuna si sugha tinta ooni'ai t'eh, 'en hoh ye khuna hotelhyih. ²⁵ 'Et dune ndi yun k'ut nduhoolcho whuch'a oonilhe t'eh, 'et whunts'ih dich'oh ye khuna tinta ní'ai k'us ye khuna yugha nahooté'chulh t'eh, 'et ndet simba whuch'a hóhldheh? ²⁶ 'Et k'us ndan dune si, 'ink'ez sughunek 'i yukaya unli, 'et nket'ah yinkak dune ye', nts'o t'eh 'i be'abá 'ink'ez Yak'usda bulizas hiye dezti chah, 'i 'et whuz na'a whusanaja t'eh, 'et sih ndunnah dune hukwayá tele. ²⁷ 'Alha 'un whudusni, bulunah njan nuhedulhúya ndet dahutetsah 'et whuts'un, ndet Yak'usda hubudayi cho unli, 'et dahutetsah whutsuh hote'ilh." ²⁸ Lhk'udit dzin bat'en hukw'elh'az 'et njan ndutni, 'et Peter, John, 'ink'ez James ndoh dzulh k'uz dulh wheóobedel whuz tenadutedli ka. ²⁹ 'Et 'awhuz tenadudli hoh 'et bunen ts'ih 'uts'un be hoonet'en suli. 'Ink'ez bunaih chah soo ts'ah'un lheyul suli, 'ink'ez buts'uh ha'ánduz suli chah 'uja. ³⁰ Khunyaz nanah dune, 'en hiyulh yáhlhtuk. 'Ilhunuh Moses 'ink'ez 'ilhunuh Elijah. ³¹ Whet'en buts'uh hayánduz 'i be hóodet'en. 'Et Jerusalem ts'ih datenil hoh datétsah lhaóodutelil, 'et huwa hubulh yáhlhtuk. ³² 'Et Peter 'ink'ez hiyulh 'u'en sa tube hantez. 'Et ts'ah'un na'a ts'enawhehunde hoh 'et Sizi buts'uh hayánduz, 'i nanah dune yuzih siyin hoh hitel'h'en. ³³ 'Et hukw'elh'az highu when'az hoh Peter, 'en Sizi ndi yúlhni, "Nemoodih hoonzoo njan uzdelhts'i. Tat whut'ah uztezetz 'uts'uhooleh. 'Ilhunuh nyun mba, ilhunuh Moses ba, 'ink'ez 'ilhunuh chah Elijah ba." 'Et whunts'ih Peter daja dutenil 'aw t'eeonuzun. ³⁴ Awhuz yalhtuk hoh kw'us buk'eyinde. 'Et kw'us hubunanezdo hoh 'et whe hunelhújoot. ³⁵ Kw'us tah ts'ih khunek huduzts'ai, "Ndun suYe' 'en buk'esi' int'ah. 'En oozólhts'a" ni. ³⁶ 'Et yatuk 'ustl'e' 'uwuhudeja hoh Sizi dich'oh zeh 'int'ah hinil'h'en. 'Et 'aw hoonliyaz cha'hudínil ndet hohon'en. 'Et hoh da dzin 'aw dune nduchahudinil nts'e' na'a hinalh'en 'et.

'Uski ntsi' nudúdeh, 'i buyúinda, 'en Sizi soo ná'yinla

³⁷ 'Et 'om bun dzin dzulhyaz k'ut ts'ih hanáhedel hoh 'ilhohuwezdel Sizi hidudezdel. ³⁸ 'Ilhunuh dune 'ilhohuwezdel hubutah, 'en Sizi 'últus be yuts'u háyih hoh njan ndi yulhni, "Nehodilh'eh nts'u tédusdlih suye' nolh'en. 'En 'aw 'en zeh 'ilhunuh suye' int'ah. ³⁹ 'Et khun-yaz ntsi' nududeh, 'i yilchuk íbulh hazulh, bukaootuzuk, 'ink'ez huwus buza hanúldoh. 'Et huwa ndulhcho hoh bukaootúzik. 'Ink'ez tube howa whúlna hoh yeyáhanadudoh. ⁴⁰ 'Et nye hódul'eh hubuts'uh tédusdli hits'uh hanáhidoolhdeh ka, 'et whunts'ih 'aw 'uhooneh ghaít'ah." ⁴¹ 'Et szi 'utni, "Nuhwheni k'an ndoh whudezulh 'alha 'i be nuhwhuba 'alha' cha'hoot'ah. Nuhwheni dune 'aw ts'ah'un chaít'ah ahli. Dawhuldzah nuhtah 'utest'ilh hoh nohwhulh whúsyin? Nye' suts'ilhtelh!" ⁴² 'Et 'awhuz Sizi ts'un yelhtel hoh ndi ntsi' nududeh, 'en 'uski nayáno 'ink'ez yukaootelhzut. 'Et Sizi ntsi' nududeh, 'i khunekti be hukwa' yudáni, 'ink'ez 'uski soo na'uja hoh bu'abá yutl'anáyalhti.

'Aw 'et nilhdukw yinkak dune ye', 'en dune ntsi' tl'aitelhtel k'une' hitel'ilh ka

⁴³ 'Ink'ez Yak'usda daltus 'et huwa ts'iyannah hoba hooncha suli. 'Ink'ez Sizi nts'oh tune'ust'en hoba hooncha k'et, 'aw buk'eóodoozit ghaít'ah. Hoh da zeh yugha hoodul'eh 'en 'úbulhni, ⁴⁴ "Ndi khunek be nohwhulh yatelhtuk, soo cho nuhdzi be wheooodolts'it. 'Aw 'et nilhdukw yinkak dune ye', 'en dune ntsi' tl'adutelhtel k'une' hitel'ilh ka." ⁴⁵ 'Et whunts'ih njan daja ni 'aw ts'ah'un t'echahonízil. 'Aw hoba ts'et ka hachahóolts'ulh. 'Et huwa daja ni, 'aw ts'ah'un nachahuho'al. 'Et whunts'ih whehúnuljut, 'aw hukwa hiyoodolhkt ghaít'ah.

Ndan netah simba degha nus dune uncha unli?

⁴⁶ 'Ink'ez hedich'oh lhtah 'ulhadutni, k'us ndan degha nus uncha tele. ⁴⁷ Hubudzi yuh daja huninzun 'et Sizi t'eeoninzun. 'Et huwa 'ilhunuh 'uskiyaz yilhchoot 'ink'ez buzih ninílhti. ⁴⁸ 'Ink'ez ndo búlhni, "Et soo ts'ah'un na'a 'un whudusni, ndunnah soozí bugha ndun 'uskiyaz hik'esutset, 'en sk'ehintsi' ho' hint'ah. 'Ink'ez ndunnah sk'esutset, 'en ndun whuz de sùtelh'a, 'en chah hik'esutset ho' hoont'ah. 'Et huwa, ndan nuhtah degha nus dune ba tel'en, 'en degha nus ncha tele."

Sizi ndo búlhni, "Ndan nech'a chaditni, 'en nelh 'int'ah"

⁴⁹ 'Et John ndi yúlhni, "NeMoodihti 'ilhunuh dune nyoozi be ntsi' nududeh, 'i dune buts'uh hanaídulhdoh, 'et ts'uh'o'en. 'En 'aw nelh 'ilhunuh chailah, 'et huwa 'et ndut'en whuch'az

nényoot.” ⁵⁰ 'Et whunts'ih Sizi ndi yúlhni, “Whuch'a' nehyoot ilah! 'Alha ndan 'aw nech'a chahuditni, 'en nets'ú détni 'int'ah.”

Keyah Samaria whut'en, 'en Sizi hikacha'nízun

⁵¹ 'Aw 'et Sizi buba whusahonzut nduk yak'uz nátedalh huba, 'aw 'et Jerusalem whuts'u nalhú'a 'ink'ez whuz natedalh howun nanínuzut. ⁵² Khunek yuba na'a dutsuh wheoobalh'a. 'En hutezdel hoh 'aw 'et 'ilhunuh Samaria keyah ts'ih hunindel hiba lhaoodutelilh ka. ⁵³ 'Et whunts'ih Jerusalem ts'ih tezya 'et nahuhoo'ai hoh njan keyah Samaria whut'en 'aw hikacha'nízun. ⁵⁴ 'Et yugha hoodul'eh James 'ink'ez John honalh'en bulh dahooja hoh Sizi hiyoodulhkut, “NeMoodihti Elijah k'una'a ndi kwun ndus de yak'uz ts'ih hadóonat 'ink'ez ts'iyawh hadóok'un uzdooni, 'et ih neba hukwa' nínzun?” ⁵⁵ 'Et whunts'ih hubuts'un nalhú'a 'ink'ez hukwa' hubudani, 'ink'ez 'utni, “Aw daja nahzun nt'ewhunuzáhzun 'et huwa' dahni! ⁵⁶ Soo cho soo zélhts'ai, yinkak dune ye', dune ye khuna hoolah yutelhtsilh ka ilah whusainya, hubutelhyih ka whusainya.” 'Ink'ez 'et 'udun keyah whuyaz ts'ih whehándel.

Ndan yun wheoonilhch'ul 'ink'ez k'ah naidutut'ih t'eh, ndunt'ah ndet Yak'usda hubudayi cho unli, 'et 'aw huba soo cha'hit'ah ho' hint'ah

⁵⁷ 'Aw 'et ti hedulh hoh 'ilhunuh dune Sizi yughu ninya 'ink'ez ndi yúlhni, “SMoodihti nts'e ténya ts'ih 'ilhuz nyun tesyalh.” ⁵⁸ 'Et Sizi ndi yúlhni, “Nanguz 'en chah 'an whut'i ho' 'int'ah 'ink'ez dut'ayaz chah t'o ut'i. 'Et whunts'ih yinkak dune ye', 'aw netsin tet'alh 'et whunts'ih chahóot'ih.” ⁵⁹ 'Et 'uyoon chah 'ulhni, “Nyun chah sunanyalh.” 'Et whunts'ih ndi yúlhni, “SMoodihti, k'at 'udechoo se'abá buyust'e wheyútelhtelh choo.” ⁶⁰ 'Et whunts'ih Sizi ndi yúlhni, “Whute dudulh yahadla didutch'oh wheyúnalhuhooyelh. 'Et whunts'ih nyun ndulhcho hoh nónya 'ink'ez ndi Yak'usda hubudayi cho unli, ts'iyannah 'et hubugha dóni.” ⁶¹ 'Et 'uyoon chah 'utni, “SMoodihti nyun tesyalh, 'et whunts'ih 'udechoo sukoo hudelhts'i ts'ih hubuts'un nunatesda choo 'ink'ez 'ilhuz wheni nuhghu tesyalh budutésnilh, 'et st'l'ahóo'aih.” ⁶² 'Et whunts'ih Sizi ndi yúlhni, “Ndan wheoonilhch'ul 'ink'ez k'ah naidutut'ih t'eh, ndunt'ah ndet Yak'usda hubudayi cho unli, 'et 'aw huba soo cha'hit'ah ho' hint'ah.”

10

Skwunlai 'o 'at lanezi (70) yugha hoodul'eh, Sizi dutsuh wheoobalh'a

¹ 'Et hukw'elh'az neMoodihti skwunlai 'o 'at lanezi (70) 'en 'utaháooobanla keyah whuti totsuk nuteyalh, nanah hinli hoh dutsuh wheoobalh'a. ² 'Et ndo búlhni, “Alha 'aw 'et há' nukat newhúninuzut 'ink'ez tl'o mai lhai sulí, 'et whunts'ih 'uhut'en, 'en 'aw soo 'ahumeltsuk. 'Et huwa Yak'usda ba ha'nukat whumoodihti, dich'oh 'adunenla 'uyoon chah 'uhut'en whuz haóobalh'a, 'et huba tenadehldi. ³ 'Aw 'et ahdulh 'ink'ez soo zélhts'ai! Lhe'un whusla 'ants'i Sheep k'una'a yus tuz whenwhalh'a. ⁴ 'Aw sooneya zuz, k'us 'ezdlai, k'us kegwn chah, 'i ndunt'i, 'i toohla gunih. 'Ink'ez ti dune dudéh'az t'eh, khun teh dahooja dóohni gunih. ⁵ Ndet koo danáhya t'eh, 'et koo hudelhts'i njan ndo budóohni choo, nuhkoo whudóoghel wule. ⁶ 'Et dune t'edusnih 'et usda t'eh, 'et nuhdzi dezghel 'et butl'á whutelts'ulh. 'Et 'aw ndunt'ah hoolah t'eh, be nuhdzi dezghel 'i nuhts'u nádutelts'ulh. ⁷ 'Et koo zeh wahke. Ndaí nuhgha híya'aih 'i zeh wah'alh 'ink'ez wahnai. 'Alha ndun 'ut'en bube 'ut'en, 'en k'elha hole huba' hoont'ah. 'Ink'ez lhelhdun koo teh danaóohdaih gunih. ⁸ 'Ink'ez nts'e 'udun keyah lhgha dah'az, 'et 'anih nuhwháh hutni t'eh, 'et ndai nuhbut nehiniinla, 'i wah'alh. ⁹ 'Et ndan 'et koo nduda, 'en chah soo na'ubóohleh 'ink'ez ndo budóohni, 'Yak'usda hubudayi cho unli, 'aw 'et nuhwhughah 'uhoont'ah.’ ¹⁰ 'Et nts'e keyah lhgha dah'az, 'et 'aw nuhghu nuchahiyal t'eh, 'et ti k'enaoojha, 'ink'ez 'udóohni, ¹¹ “Et njan nuhkeyah whulez, ndai neke ghu hoonli, 'i whunts'ih, nuhch'a búna'ts'alhde. 'Et whunts'ih t'ewhunóhzin huba' hoont'ah, Yak'usda hubudayi cho, 'et nuhwhughah 'uhoont'ah,’ 'et hubudóohni. ¹² 'Alha ts'ah'un 'un whudusni, 'et dzin whusaootelts'ulh, 'et keyah Sodom whut'en, hoh da nts'e na'a hubulh dahooja inle, 'et njan keyah whut'en, ndunnah nuhka cha'nízun, 'en 'o nus hoontsi' hubugha óotelts'ulh.”

Ndunnah hubeni nahádunooleh hukwa cha'hunízun, dáwhultsi' butsuh whélt'sulh ho' hoont'ah

¹³ “Et nuhwheni Chorazin whut'en, 'ink'ez nuhwheni Bethsaida whut'en, nuhwheni chah 'aw 'et dawhultsi' 'et nuhts'u whélt'sulh! Soo cho soo zélhts'ai, ndet hoolhtus nuhnat 'uhooja, ndunnah Tyre 'ink'ez Sidon whut'en, 'en bunat 'et chah 'et ndúhooja t'eh, 'uda hubeni náhondunezdla wule. 'Ink'ez doso be hudelhts'i 'ink'ez lhusts'iz k'enahidudzih. 'Et whuz na'a 'uhooneh wule. ¹⁴ 'Et dzin nuhwhuba whuz de whélt'sulh nuhwhuba nahutedeh ka, 'et ndunnah hubulh dawhuténilh, nuhwheni 'o nus nuhwhuba whutétsi'. ¹⁵ 'Et nuhwheni Capernaum whut'en nduk koo huba soo áht'ah nahzun ih? 'Awundooh! 'Et k'us kwuncho yuh ts'ih nóhotelhldulh! ¹⁶ 'Ink'ez nuhwheni sutsuh tehduh ndunnah

nuhoozelhts'ai, 'en si chah soo hoozelhts'ai. Ndan ch'a nuwhunehsjoot, si chah ch'a sunésjoot ho' hooht'ah. 'Ink'ez ndan ch'a sunésjoot, ndun whuz de sùtelh'a, 'en chah ch'a inésjoot ho' hooht'ah."

Nduk yak'uz nuhoozi 'uk'une'úsduguz, 'et huwa whunoolhnik

¹⁷ 'Et hukw'elh'az skwunlai 'o 'at lanezi (70) huhoont'i hoh whusanáhedel. 'Et nduhúyulhni, "NeMoodihti ndunnah ntsi' nududeh, 'i 'en whunts'ih, nyoozi bugha nek'une' hut'en!" ¹⁸ 'Ink'ez ndo búlhni, "Satan, 'en ditnik kwun hadanat k'una'a ndus de yak'uz hadélduz, 'et nalh'en. ¹⁹ Sih soo zélhts'ai, tl'ughus 'ink'ez poison unli, 'i scorpion hiyulhni, tube cho buk'unahya. 'Ink'ez ndai nuhch'a detni, 'en hiye ulhtus, 'i 'et ts'iyawh ndi bugha ndoh 'ooht'e, 'et nuhtl'ahó'ai 'ink'ez 'aw hoonli nuhwhundóolhda ghaít'ah. ²⁰ 'Et whunts'ih ntsi' nududeh, 'i nuhk'une' 'oot'en huba 'int'ah, 'aw 'et huwa ilah whunélnik. 'Et k'us nduk yak'uz nuhoozi ts'iyawh 'uk'une'úsduguz, 'et huwa zeh whunóolhnik."

Sizi, 'en Ndoni be whunoolhnik

²¹ 'Et hoh wheghah 'uhunet'oh Sizi, 'en Ndoni be whunélnik hoh njan ndutni, "ABá nyun 'un yudúsní! Yak'uz 'ink'ez yun k'ut huMoodihti inli. Whunih 'ink'ez hodul'eh, ndi 'i ts'iyawh buch'a whunte'i. 'Et whunts'ih 'uskiyaz lí'int'ah, 'en bunalhts'et haho'ai. 'Alha 'aBá mba soo 'uhooja. ²² Se'aBá ts'iyawh stl'ahónla, 'ink'ez 'en buYe' ndan unli ts'iyannah t'ehonízun. Be'aBá 'aw 'en zeh t'eininzun. 'Ink'ez ndun be'aBá unli, buYe' 'aw 'en zeh t'eininzun. 'Ink'ez ndun buYe' 'onghunnah wheóobuntelhtun hukwa' ninzun t'eh, 'en zeh buba 'uhooht'ah." ²³ 'Ink'ez yugha hoodul'eh hubuts'un nalhú'a 'ink'ez whu'ízyaz ndo búlhni, "Ndet hoh'en 'uyoon duna be honilh'en, 'en dega nus hoonzoo hubugha whults'ut. ²⁴ Ndan whudusni, lhanah nus whunilh'en, 'ink'ez hubudayi cho chah 'en dalcho 'i be ndet hoh'en hote'ilh hukwa' huninzun, 'et whunts'ih 'aw chahúó'íl. 'Ink'ez ndet whudáhts'o 'enyach hidutés'o hukwa' huninzun 'et whunts'ih 'aw cha'hudits'íl."

Dazet'ilh hoh 'ilhuz be ts'ukhuna, 'i ts'utélhchoh?

²⁵ 'Et hukw'elh'az 'ilhunuh Moses be' dustl'us k'ut, daja ni hoh beni hoonli be yalhtuk, 'en didinya 'ink'ez Sizi 'aonilhka yoodulhkt, "Nehodulh'eh datest'ilh hoh 'ilhuz be ts'ukhutena, 'i whutélhchoh?" ²⁶ 'Et Sizi 'utni, "Ndet hukw'eéduguz Moses be' dustl'us k'ut? Buk'eyáilhtuk hoh nts'e na'a mba daja ni?" ²⁷ 'Et ndi yulhni, "Ndez na'a njan ndutni, 'Yak'usda nyuMoodihti ndzi ndulhcho 'i be, nzul ndulhcho 'i be, nyunut'uk ts'iyawh 'i be, 'ink'ez nyeni ts'iyawh 'i be chah, 'et whuz na'a 'en buk'eoontsi.' 'Et dáhoont'ah hukw'u na'a nyunch'oh k'enaindútsi', 'et whuz na'a zeh nyenghoh whut'i 'en chah buk'eoontsi.'" ²⁸ Sizi ndi yulhni, "Soo ts'ah'un 'udini. 'Et ndint'en t'eh, 'et 'ilhuz wheni khutanalh." ²⁹ 'Et whunts'ih ndun dune ts'ah'un 'int'ah na'dudil'i. 'Et hubugha Sizi yoodulhkt, "Ndan sugghah whut'i?" ³⁰ 'Et Sizi njan di yulhni, "Ilhunuh dune Jerusalem ts'ih hainya 'ink'ez Jericho ts'un úyalh hoh 'uhundunut'ih hiyílhchoot. Bunaih ts'iyawh higha hahíyulya 'ink'ez nukai hiyulhtsi, 'et nehinihlti, 'ink'ez higho whenádel, 'aw 'et dawhenintsai. ³¹ Soo hoh da zeh 'ilhunuh náwhulnuk ti uyalh hoh ndun 'en yutelh'en. Yutelh'en hoh 'ants'ih yagha nch'az lhusiya. ³² 'Ink'ez doo chah 'ilhunuh dune Levi yuts'uh hainzut, 'en chah hoh uyalh 'et yunalh'en 'ink'ez 'ants'ih yugha nch'az lhusiya. ³³ 'Et whunts'ih 'ilhunuh Samaria whut'en, 'en chah hoh uyalh 'et yutelh'en 'ink'ez 'aw 'et yugha te'nanzin. ³⁴ Yughu ninya 'ink'ez khe yuk'eyílhde 'ink'ez mai too bulh yuka' dalh'oo. 'Et dughunai k'eyílhlti 'ink'ez dune ts'uztez bakoo ts'ih wheyalhti, 'et yughunli. ³⁵ 'Et 'om bun dzin teyalh whutsuh nankoh sooneya ts'uztez whumoodih tl'aya'ai 'ink'ez ndi yúlhni, 'Bughonle. 'Ink'ez ndai 'o 'un buk'uz ts'íya silhtsi t'eh, 'et whusanásja, 'et sih mba k'elha hólhtsilh." ³⁶ 'Et Sizi 'ilhunuh Moses be' dustl'us k'ut, daja ni hoh beni hoonli be yalhtuk, 'en yoodulhkt, "Et ndun dune untsi' 'ankw'us hizelghhi, 'et ndunnah tanah dune hinalh'en da, 'et k'us ndan soo ts'ah'un na'a yegghah whut'i 'int'ah ninzun ih?" ³⁷ 'Et ndi yúlhni, "Ndan yugha te'nezit, 'en 'int'ah!" 'Et Sizi ndi yúlhni, "Aw 'et inyalh 'ink'ez nyun chah whuz na'a zeh 'et ndónt'en!"

Mary dega nus hoonzoo 'utahahó'ai

³⁸ 'Et hukw'elh'az hedulh hoh Sizi 'udun keyah ninya 'ink'ez ts'eke Martha hiyulhni, hubukoo ts'ih yughun seya. ³⁹ Bulhtus Mary hiyulhni, 'en chah Sizi yukéti'ah usda 'ink'ez yughunek yoozélhts'ai. ⁴⁰ 'Et whunts'ih Martha nts'e na'a hubugha ná'tet'alh 'et tube 'unest'it. 'Et Sizi yughu ninya 'ink'ez ndi yúlhni, "SMoodihti 'ants'ih mba 'uhoont'ah ih sulhtus sich'oh zeh 'et nesunilhlti buba'oost'en ka? Sula oot'en dini!" ⁴¹ 'Et whunts'ih Sizi ndi yúlhni, "Martha Martha lhat teh howu ndzi nduda 'ink'ez howu nuni ninzut!" ⁴² 'Et whunts'ih 'aw 'ilhunuh zeh dega nus nduts'ooneh huba' hooht'ah. 'Et Mary dega nus hoonzoo 'utahahó'ai ho' hooht'ah 'ink'ez 'aw bula k'ehahólt'sit ghaít'ah."

11

Ndez na'a tenazdoodli huba' hoont'ah

¹ 'Et 'ilhut dzin, Sizi tenadudli. 'Istl'e' deja hoh 'ilhunuh yugha hoodul'eh 'uyúlhni, "John nts'e na'a yugha hoodul'eh huboodalh'i, nyun chah whuz na'a tenazdutedli whuneood-ilh'eh." ² 'Et ndo bulhni, "Njan ndudáhni hoh tenadoohdli, 'Ne'aBá yak'uz sinda.

Nyoozi dooti.

Dahoont'ah hoh hubudayi cho inli,
'et chah nets'ó tools'tit.

'Ink'ez ndet yak'uz ts'ih hukwa' ninzun dahooja,
ndi yun k'ut chah, 'et whuz na'a zeh 'et ndúhoneh.

³ Ndai k'an dzin ts'uté'ah, 'i negha ní'aih.

⁴ 'Ink'ez 'uyoon bulh dulhyah ts'uwhulh'ai t'eh, buba whunats'odoolnah.

'Et whuz na'a zeh nelubeshi neba whunaoodoolnah.

Nts'e tink'us ts'unint'uk whuch'a neghinli.

'Ink'ez ntsi' 'en ch'a neghinli."

⁵ 'Ink'ez Sizi ndo búlhni, "Nuhwheni nuhtah ndan 'int'ah bulh dune hoonli 'ink'ez tuzniz but'su téhyalh 'ink'ez 'udutéhniilh, 'Sulh dune lhes tak'i sughu sinla! ⁶ Njan sulh dune 'ilhunuh sughu ninya. Nilhza ts'ih hainya, 'aw bugha yóos'ah, 'i hoolah, 'yúlhni. ⁷ 'Ink'ez bukoo whuts'un idóoni, 'Aw sugha ghínai ilah. Ndati 'aw 'et dana'déls'tut ho' hooht'ah. Suzkehkah ts'iyawh nahunéstez. 'Aw dinadóosja ghaít'ah. 'Ink'ez hoonliyaz ngha óos'ah ghaít'ah.' ⁸ 'Et ndun whudusni, 'aw dinadóoja ghaít'ah 'ink'ez hoonliyaz yugha óo'ah ghaít'ah, bulh dune 'int'ah 'et whunts'ih. 'Et whunts'ih 'awhuz yoodulhkut zeh 'utni, 'et huwa dinadutédalh 'ink'ez ndai yuka' ninzun ts'iyawh yugha itélelh. ⁹ 'Et whuz na'a 'un whudúsi, Yak'usda ndai buka yoodulhkut, 'i nuhgha ité'ah. Bukunáhta 'ink'ez nahooté'ah. Ndati whudulhghalh 'ink'ez nuhwhuba dá'dutetilh. ¹⁰ 'Et ndunnah Yak'usda hoonli hits'u hukwa 'utni t'eh, 'en 'et bugha whútekuh. Ndunnah hoonliyaz hukwunúta, 'en nahuhooté'ah. 'Ink'ez ndunnah ndati whudulhghalh, 'en chah huba dá'dutetilh. ¹¹ Ndunnah nuh'abákah nuhtah, buye' lhes yuts'u ka 'utni t'eh, 'aw tse yutl'adóo'ah ghaít'ah. K'us hook yuts'u ka 'utni t'eh, 'aw 'i gha t'l'ughus yutl'a oolelh ghaít'ah. ¹² K'us ligok ghez yuts'u ka 'utni t'eh, 'aw 'i gha ntsi' neoolht'ah, 'i scorpion hiyulhni, 'i yutl'ayóolhtel' ghaít'ah. ¹³ 'Et njan nduhoont'ah, nuhwheni lúsheshi 'ulh'en ahli, 'ink'ez t'oonáhzun nts'e na'a unzoo, 'i nuwhuzkeh hubugha itélelh. 'Et 'aduhulcho, 'i be 'o nus nduk yak'uz nuhwh'e'aBá, k'us ndan yoodulhkut, 'en Ndoni hubugha ite'ah."

Huba 'alha' cha'hoont'ah, 'en 'uhutni, "Sizi, 'en netsudule ye ulhtus, 'i be 'ut'en"

¹⁴ 'Aw 'et ndi ntsi' nududeh buyudínda 'aw yaoolhtuk ghaít'ah hoh Sizi dune yuts'ah hanaínanyoot. 'Et yuts'ah hanaínanyoot hoh dune yalhtuk 'aw 'et yawhenilhtuk. 'Et 'ilhoahuwezdél ts'iyawh huba hooncha. ¹⁵ 'Et bulunah nduhútni, "Beelzebub ndun ntsi' nududeh bumoodih, 'en be ntsi' nududeh dune yuts'u hanaínanyoot." ¹⁶ 'Et 'uyoon hiyoolhdzi hoh hiyoodulhkut, "Yak'uz ts'ih whuts'un neba huwa 'et'en tune' tant'en ih, 'et whunenilhtun?" ¹⁷ Daja huninzun t'eeoninzun, 'et ndo búlhni, "Nts'e hubudayi cho hinli, 'en lhch'a nihúndendel t'eh, 'en ts'iyawh huhoolah hutele. 'Et whuz na'a zeh 'ilhunuh bukoo delhts'i, 'en chah lhch'a nihúndendel t'eh, 'en chah huhoolah hutele. ¹⁸ 'Et whuz na'a zeh nts'e Satan hubudayi cho unli, 'et dich'oh lhch'a nidinja t'eh, nts'e na'a buk'úne' whut'en tele? Lhe'dahni Beelzebub 'en be ntsi' nududeh, 'i dune ts'ah hanánusyukw dahni. ¹⁹ 'Et si Beelzebub 'en be 'ust'en t'eh, 'et sudahni nuhwheni nuhye'kah k'us ndan be simba ntsi' nududeh, 'i dune ts'ah hanaóobunooyukw? 'Et huwa 'en bugha t'ewhuntehzeh tink'us údahni! ²⁰ 'Et whunts'ih Yak'usda bulasgek be ntsi' nududeh, 'i dune ts'ah hanánusyukw t'eh, 'et 'alha' hoont'ah, nts'e Yak'usda hoh hubudayi cho unli, 'aw 'et nuhghu whults'ut ho' hooht'ah. ²¹ 'Et dune ulhtus lhahutedughan huba lhahudint'ah, 'et bukoo huwunli 'ink'ez ndai 'et yuzdla, 'i 'aw but'aghóohnalh ghaít'ah. ²² 'Et 'uyoon yugha nus 'ultus yundélhda 'et yuch'a nilhde. 'Et dune ye lhuhutughan, 'i yut'aninintan, 'i ts'iyawh hubugha hayulya. 'Et hukw'elh'az ndun buch'a ninde, 'en ndai 'et yuzdla, 'i chah ts'iyawh 'uyoon ba lhk'eyanla 'ink'ez butainíla. ²³ Ndunnah sulh cha'it'ah, 'en such'a uhedtni ho' hint'ah. 'Ink'ez ndunnah 'aw dune sula 'ilhuchawesdle, 'en ts'iyawh yadutékuh.

Dahoosja hoh ntsi' nududeh, 'i doo chah zeh dune buyunaídede t'eh

²⁴ "Et ntsi' nududeh, 'i dune ts'ah hanádide hoh, yun whudezgi 'et whuz nududeh natelyis hukwu níta. 'Et 'aw nduhóont'ah nachahóo'al 'et dich'oh na'dudútni, "Et ndun buyudúsda, whuz zeh natoosja." ²⁵ 'Et whuz lhghu nadidaih 'ink'ez 'et nahoo'aih ndun dune budzi yuh chaoóditsun nawhulhtsi 'ink'ez ts'ah'un na'uja. ²⁶ 'Ink'ez 'et 'uts'un whedudoh 'ink'ez

skwunlai 'o 'at nankoh ntsi' nududeh, 'i 'en 'o nus 'iltsi', 'en 'et dune ye yuná'dudoh 'ink'ez 'et nihúnih. 'Et ndun dune ndun hiyudúts'i, 'en 'et whutsuh da 'o nus 'ulsi' suli."

K'us ndan Yak'usda bughunek yudits'o 'ink'ez yoontun, 'en dega nus hoonzoo buts'un whéts'ulh

²⁷ 'Et Sizi njan ndutni hukw'elh'az, 'ilhohuwezdel hubutah 'ilhunuh ts'eke yuts'uh hahúyih, "Ndun buchan yuts'uh hainzut 'ink'ez ndun nye 'alht'ukw, 'en ts'eke dega nus hoonzoo bugha whults'ut," ni. ²⁸ 'Et whunts'ih Sizi ndi yúlhni, "Et dega nus hooncha 'uhoot'ah, k'us ndan Yak'usda bughunek yudits'o 'ink'ez yoontun, 'en dega nus hoonzoo hubulh 'uhooja!"

Hooncha tune' whut'en, 'et zeh hukwa hités'en

²⁹ 'Et 'ilhohuwezdel lha'un teh nus lhe'huneltsuk 'ink'ez ndo búlhni, "Njan k'an whudezuhl dune, 'en hintsi'. 'Et hoonliyaz hooncha tune' whut'en 'et zeh huwhuntel'ih hukwa' huminzun. 'I bugha t'ehonózin. 'Et whunts'ih 'aw honilh'en bughá holts'it ghaít'ah. 'Et nts'e na'a nus whunilh'en Jonah bulh dahooja, 'et zeh hote'ilh. ³⁰ 'Alha nts'e na'a Nineveh whut'en, 'en Jonah be huba whehóodal'en inle, 'et whuz na'a zeh 'en k'una'a k'an whudezuhl dune, yinkak dune ye', 'en be huba whehoodel'en tele. ³¹ Njan dzin dune ba nahutedeh whusawhéts'ut t'eh, 'et nyaz de hubudayi cho ts'eke 'en hubuniz didutéyalh, 'et hububa nahutedeh. Soo cho whunoolh'en, ndi yun k'ut nilhdza de hainya hubudayi cho Solomon ye whunih, 'i yudutets'o ka. 'Et whunts'ih 'ilhunuh hubudayi cho Solomon ch'a dega nus 'int'ah k'an 'et nuhtah siyin. ³² 'Ink'ez hoh wheghah whezuhl dzin dune ba nahutedeh t'eh, Nineveh whut'en nuhwheni k'an ndoh whudezuhl nuhwhutah di hudutéduh 'ink'ez nuhwhuba nahuteyeh. Soo cho whunulh'en, hoh da Jonah hubulh yailhtuk da, ts'iyawh bubeni náhundenezdla. 'Aw 'et soo zults'ai, 'ilhunuh 'en Jonah ch'a dega nus 'int'ah k'an 'et nuhtah siyin.

Nena 'i neyust'e ba too dez k'un 'et ndunt'ah

³³ "Dune 'aw too dez k'un naidulhk'an 'ink'ez whunest'i k'us k'its'ai t'ah chah 'aw níyoo'alh ghaít'ah. 'Et too dez k'un hukw'usú'ai 'et hukw'eyi'ai. 'I bugha ts'iyannah dahúndelh ndi be whét'en, 'i hinilh'en gha. ³⁴ 'Et whuz na'a nuhwheni nuhna 'i nuhyust'e ba too dez k'un li'int'ah. 'Et nuhna soo 'int'ah t'eh, 'et nuhyust'e ndulhcho hoh be whét'en, 'i be whudezbun. 'Et whunts'ih nuhna chanizoooh t'eh, 'et nuhyust'e 'i chah tsahólhgus be dezibun. ³⁵ 'Et huwa ndai be nuhyust'e be whét'en, 'i ahli, khun teh nuhyust'e tsahólhgus naoodle gunih. 'Et whuch'a soo cho huwohle! ³⁶ 'Et huwa nuhyust'e ndulhcho hoh be whét'en, 'i dezibun, 'ink'ez 'aw hoonstolyaz whunts'ih tsahólhgus bughoh hoolah t'eh, 'et ndulhcho, 'i be, be whét'en wule. 'Et whuz na'a soo ts'ah'un be whét'en, 'i ulhtus, 'i k'una'a whedéndi, 'i bugha soo whunoolh'en."

Duba nahudzoo, 'en dawhulsi', 'et hubugha whútelts'ulh

³⁷ Sizi 'awhuz yalhtuk hoh 'ilhunuh Pharisee yoodulhkut, "Sulana'int'alh sukoo ts'ih." 'Et Sizi bukoo daninya 'ink'ez natl'adeda 'ute'ulh wheni. ³⁸ 'Ute'alh whutsuh lanacha'ildoh. 'Et Pharisee yunilh'en 'ink'ez tube huba hooncha. ³⁹ 'Ink'ez neMoodihti 'et ndi yulhni, "Nuhwheni Pharisee soo cho whunulh'en, nuhlusyet 'ink'ez lubot bulh, bukak zeh toonáwhahgus. 'Et whunts'ih nuhdzi yuh dátáni, 'ink'ez 'ut'en ntsi' 'i bulh, 'i ts'iyawh 'i be nuhyuh whudezbun. ⁴⁰ Whuzahník ahli! 'Aw ih t'oonuzáhzun? Ndan yoo 'az ts'ih 'uhoonla 'ink'ez bez ts'ih chah, 'en zeh 'uhoonla. ⁴¹ 'Et whunts'ih ndai aht'i, 'i be bulah ndunnah tehel'en hubula 'ooht'en. 'Et sih ts'iyaintsuk nuhwhuba whuna'doodeh. ⁴² 'Et whunts'ih nuhwheni Pharisee 'aw 'et dawhulsi' 'et nuhts'u whéts'ulh! Ndai hanúlyeh, 'i 'ut'an sooltsun, 'i rue hiyulhni, 'ink'ez 'onghoh, 'i buluh, 10%, 'i Yak'usda gha'haih. 'Et ndóht'en huba' hooht'ah. 'Et whunts'ih ndet ts'ah'un na'a ne'áht'en, 'ink'ez Yak'usda ye nek'entsi', 'i 'aw nduchazaht'en. 'Et whuz na'a chah ndóht'en huba' hooht'ah. ⁴³ Nuhwheni Pharisee 'aw 'et dawhulsi' 'et nuhts'u whéts'ulh! Lizwif luglez dahyih teh, soo hoonzoo, 'et natl'adahdaih, 'et zeh hukwa' nahzun! 'Ink'ez ndet 'e'óoket, ssoo ts'iyannah nohwhudóolhti hukwa' nahzun. ⁴⁴ 'Et nuhwheni Moses be' dustl'us 'uk'ununa'úsduzug, 'ink'ez nuhwheni Pharisee, dune nalh duba nadudzoo. 'Aw 'et dawhulsi' 'et nuhts'u whéts'ulh! Nuhwheni ts'un k'ut 'adahla, 'aw dune chanohwhes'en li'áht'ah. 'Ink'ez 'adahla dune t'ehonízun hoh nuhk'unuhudelh." ⁴⁵ 'Et 'ilhunuh Moses be' dustl'us k'ut daja ni hoh beni hoonli be yalhtuk, 'en Sizi 'uyúlhni, "Nehodulh'eh njan 'udini, 'et nuwheni chah, 'en nelh 'udini, 'et huwa neba dzuh 'udénja." ⁴⁶ 'Et ndi yúlhni, "Nuhwheni chah Moses be' dustl'us k'ut daja ni hoh beni hoonli be yalhtuk, 'aw 'et dawhulsi' 'et nuhts'u whéts'ulh! Nuhwheni nuhgha dune 'ut'en howa whúlna butl'awhahle, 'aw hoonstolyaz be hubula 'oohneh ghaít'ah. ⁴⁷ Nuhwheni 'aw 'et dawhulsi' 'et nuhts'u whéts'ulh! Nuhtsuh whudelhdzulh nus whunilh'en, 'en huba tse bet 'ahudutelhtelh 'uwulh'en. 'Ink'ez nuhwhabákah 'en hubuhanghan inle.

⁴⁸ 'Et 'alha nuhwhubákah 'et dahája, 'et nuhwheni nuhwhuba ts'ah'un 'uhoont'ah nahzun. 'Et soo cho whunulh'en, nuhwhubákah nus whunilh'en hubuhangan 'ink'ez nuhwheni 'ahudutelalh huba 'uwuhulh'en. ⁴⁹ 'Et huwa njan Yak'usda ye whunih, 'i be 'et ndutni, 'Nus whunilh'en 'ink'ez whel'a, 'en nuhts'un hubutelh'alh. 'En bulunah dzuh nubotelhdzut 'ink'ez 'onghunnah chah huboteghan.' ⁵⁰ 'Et ndi yun 'udechoo 'ulya 'et whuts'un ndunnah nus whunilh'en hubuzkai whúzdlí, nuhwheni k'an whudezuhl dune nuhwheni hukw'elha whutelhtsilh ho' hoont'ah. ⁵¹ 'Et huwa hoh da Abel buzakai whuzdli whuts'un 'ink'ez Zacharias buzakai whuzdli da, ndan 'en 'int'ah Zacharias njan luglez whucho 'et Yak'usda bukw'uzdai beguz 'et hizelghí, 'alha ts'ah'un 'ún whudusni, hoh da dahooja, 'et k'an whudezuhl dune, 'et nuhwheni hukw'elha whutelhtsilh ho' aht'ah. ⁵² 'Et nuhwheni Moses be' dustl'us k'ut daja ni hoh beni hoonli be yalhtuk, 'aw 'et dawhultsi' 'et nuhts'u whélt's'ulh! Nts'e na'a dune t'ehonózin, 'et bughu naoolhúchoot! Nuhwheni'oh 'aw chawhúl'hculh. 'Et ndunnah hóolhdzih, 'en chah k'ah húboohtun!" ⁵³ 'Et 'awhuz héyelh hoh, ndunnah Moses be' dustl'us 'uk'ununa'úsduguz, 'ink'ez Pharisee, 'en tube hiyóolhdzi. khun teh hoonliyaz 'uts'un na'a 'udooni ka 'et lhelhdun hukwa hiyoodulh'kut. ⁵⁴ 'Ahoonlyez hinilh'en 'aonilhka khun teh tink'us 'údooni. Khunyaz hoonliyaz 'udeja t'eh, 'et hik'eóote'ah 'et huba.

12

Pharisee hubules be untuldoh, 'et whuch'a khohdle

¹ 'Et whulhugha da lhanah dune 'ilhuhowezdel. Hulan 'ink'ez lhk'ut nahúdelh cha'hut'en. Ndunnah yugha hoodul'eh, 'en choo ndubulhni, "Ndunnah Pharisee hubules be untuldoh, 'i ch'a soo cho howahli. 'I dune nalh ye dúbá naudzoo, 'i 'int'ah. ² 'Alha ndai ts'iyawh whunest'i, ts'iyawh ts'et haóotekulh. 'Et ndai whu'iz 'int'ah, 'i chah ts'iyawh t'entedzeh. ³ 'Et huwa ndet tsahólh'gus yuh ts'ih yalhtuk, 'et whét'en hidutets'o. 'Et ndet koo whez ts'ih 'uyoon yudzek khunek i'aih daja dani, 'et bun k'ut whuts'un khunekti be howu yatelhtuk.

Yak'usda 'en zeh be noolhújut

⁴ "Ink'ez sulh dunekah ndun whudusni, ndunnah nuhyust'e ughan, 'et whunts'ih 'aw 'o 'un hoonliyaz 'uhooneh ghaít'ah, ndunt'ah hube noolhújut gunih. ⁵ 'Et whunts'ih ndun be ntelhújut, 'en bunwhunelhtun. Ndun nuhyust'e selhghí, 'et hukw'elh'az, 'en zeh buba 'uhoont'ah hoh kwuncho yuh ts'ih chah nuhwhutenoh, 'en zeh be noolhújut! 'Alha 'ún whudusni, soo ts'ah'un na'a 'en be noolhújut! ⁶ 'Alha ih 'uhoont'ah skwunlai 'uschas, 'i nankoh sooneya chaditi, 'i be 'óoket? 'Ink'ez ndi dut'aiyaz Yak'usda 'aw lhuk'i whunts'ih yunachaoodulhúnah ho' hoont'ah. ⁷ 'Ink'ez daneltsuk nuhtsigah 'i whunts'ih ts'iyawh t'einínzun. 'Et huwa whenoolhújut gunih! Nuhwheni 'uchas degaha nus dénti ho' aht'ah!

Dune nalh Sizi 'en zeh neulhyis 'int'ah ts'udooni

⁸ "Ink'ez 'et chah 'ún whudusni, k'us ndan dune, 'en dune nalh, Sizi Gri 'en zeh sulhyis unli ni t'eh, 'en yinkak dune ye' Yak'usda bulizas ndo ba duténilh, 'en se'ildzun unli ho' 'int'ah. ⁹ 'Et whunts'ih k'us ndan dune, 'en dune nalh 'aw sulhyis ilah ni t'eh, 'en Yak'usda bulizas bunalh 'aw se'ildzun ilah hubuduténilh. ¹⁰ 'Ink'ez ndunnah yinkak dune ye' ch'a detni be yahulhtuk, daja hutni, soo huba 'un whutelhdulh. 'Et whunts'ih ndunnah Ndoni ch'a detni be yahulhtuk, 'aw huba 'un whutookat ghaít'ah. ¹¹ 'Ink'ez Lizwif luglez, k'us naheyelh k'us moodih chah, 'en hububut nenohonilhya t'eh, daja dutehnilh, 'et huwu ni oohle gunih. ¹² 'Et soo 'et whudezuhl Ndoni whunohunelhtun daja dutehnilh."

Khunek be nawhutnuk, 'i dune whusnik, 'en bugha

¹³ 'Aw 'et dune tah 'ilhunuh dune 'utni, "Whuneoodulh'eh nedusnekah hubuk'elhaítezkat, 'i sulhtusin ndai se'ildzun unli, 'i stl'ayóoleh suba dini!" ¹⁴ 'Et Sizi ndi yúlhni, "Dune, ndan 'usinla nuhwhuba naheyelh, k'us nuhwhuba yatelhtuk sulhtsi?" ¹⁵ 'Ink'ez Sizi ndo búlhni, "Nuhwheni soo cho khahdlí! 'Uyoon dune be'ildzun ka noohzin gunih! Dune daneltsuk hoonli yut'i ndi yun k'ut, 'et ndi 'ants'ih ho' 'int'ah." ¹⁶ 'Ink'ez 'et khunek bugha whuts'odul'eh hubugha hubulh yalhtuk hoh njan ndutni, "Ilhunuh dune soode'a 'int'ah, buyun k'ut ts'iyaintsuk soo haníyeh. ¹⁷ 'Ink'ez dich'oh 'uninzun, 'Nts'e na'oa daosneh? Haníyeh, 'i bakoo whudezbun k'et. 'Aw 'o 'un chah 'uyoo dánosdzaih ghaít'ah.' ¹⁸ 'Ink'ez 'et ndutni, 'Njan duténilh lhai hananyi, 'i sutl'o bakoo nawhutesyes 'ink'ez 'o nus 'uhoolcho na'whútesdlilh. 'Ink'ez 'et ndai hanálh'yi, 'i 'ink'ez ndai ust'i, 'i ts'iyawh, 'et datésdlilh. ¹⁹ 'Ink'ez 'et sih na'dudóosni, lhai unzoo, 'i mba 'ilhowezkat, lhat naooduzuk whuba. 'Et nailyis, 'in'alh, taintnai, 'ink'ez whunélnik.' ²⁰ 'Et whunts'ih Yak'usda ndi yúlhni, 'Tube slah whuzinik! K'an 'ulh'ek nzul naité'elch'oh. 'Ink'ez ndai int'i, 'i ndan simba butse' ítookat?' ²¹ 'Et whuz na'a ndan lhai duba 'ilhowezdla 'ink'ez Yak'usda ba hoonli chait'ih."

Yinkak delhús'i huwu ni wahle gunih

²² 'Ink'ez yugha hoodul'eh ndo búlhni, "Et huwa 'ún whudusni, yinkak delhúts'i, ndai teh'alh, 'ink'ez be sóo nadutehnilh, 'i ts'iyawh bugha ni wahle gunih!" ²³ Ndaí ts'uyi, 'ink'ez ndi naih chah, 'ants'ih unli ho' 'int'ah. Yinkak sahda, 'ink'ez nuhyust'e chah 'i 'o nus dezti. ²⁴ Ndunnah datsan cho dahint'ah buk'un nuni nulhzut. 'Aw whuyucha'hunusdzai 'ink'ez 'aw hacha'hunusdzai cha' hint'ah. 'Aw uzda bakoo 'ink'ez haníyeh bakoo chah chahuhóot'ih. 'Et whunts'ih Yak'usda hubugha 'á'aih. 'Et njan whunul'h'en, nuhwheni ndi dut'ai ch'a dega nus déhti ho' 'aht'ah. ²⁵ Nuhwheni nuhtah ndan 'int'ah dalcho tele howu ni unli? 'Aw 'et huwa 'o nus 'ulyez wule ghaít'ah. ²⁶ Ndi hoontsol'az whunts'ih 'ohooheh ghaít'ah t'eh, 'et di ka 'udun chah howu ni ahli? ²⁷ 'Ink'ez 'indakyaz unzoo, 'i nts'e na'a haníyeh, howu nuni nahzut. 'Aw cha'ust'en 'ink'ez 'aw hoonliyaz híye soo nadootnih, 'i chah cha'husdle. 'Et hubudayi cho Solomon naih dezti 'i be soo nadut'ih teh, 'et whunts'ih 'aw 'indakyaz dega nus cha'ildzooch ho' 'int'ah. ²⁸ 'Et Yak'usda t'l'o unzoo, 'i yilhi. 'I k'an dzin t'l'o k'ut haníyeh 'ink'ez bunt'ah 'i tshidutelkhulh 'ink'ez duték'un. 'Et nuhwheni dalcho 'i be 'o nus soo nuhgutele. Nuhwhuba 'alha' hoont'ah, 'i t'eh usdah nuhwhuba ntsol. ²⁹ Ndaí teh'alh, 'ink'ez tehtnilh, 'i chah, 'ahoolhyez tube cho buka daóohtne 'ink'ez bughunek wahle gunih. ³⁰ 'Et ndi yun k'ut 'udun yun k'ut whut'en 'et zeh hukwa hunúta. 'Et whunts'ih Yak'usda nuh'aBá ndai be ndunahdzit, 'i ts'iyawh t'einínzun ho' 'int'ah. ³¹ 'Et whunts'ih nts'e na'a Yak'usda hubudayi cho unli, 'et zeh hukwa it'éh'en t'eh, 'et ndi chah 'o nus nuhghá tekulh ho' hoont'ah. ³² Nuhwheni se'usheep 'ilho núlh'as, 'aw whenoolhújut gunih! Njan whunul'h'en, nuh'aBá nts'e na'a hubudayi cho unli, 'et hoont'i hoh nuhgha óote'alh. ³³ Ndaí aht'i, 'i ts'iyawh be 'óhket 'ink'ez tehel'en, 'en hubugha yoohlelh. 'Et whuz na'a 'et ndaht'en t'eh, 'ink'ez nuhsooneya zus 'aw tinta cha'test'il, 'i 'ahleh. 'Ink'ez ndai unzoo, 'i 'ilhuz wheni bula tah hoolah, 'i ts'iyawh be yóohlelh, 'i yak'uz ts'ih níóohlelh. 'Aw whuz undunut'ih daóoya ghaít'ah 'ink'ez 'aw yun nulh'as, 'i whunts'ih tinta' yoohl'en ghaít'ah. ³⁴ 'Et ndai oonaht'i be sahla 'i 'ilhughehla, ndet sula, nuhdzi chah 'et zeh da' duté'alh.

Lhazdoot'e, 'aw nket'ah t'ets'onízun neMoodihti whusanátedalh

³⁵ "Nuhwheni nuhnaih be 'áht'en, 'i ts'iyawh be náhdelh 'ink'ez nuhtoo dez'k'un, 'i chah dóok'un. ³⁶ 'Et nuhwheni'oh dune ndunnah dumoodih ba lh'i, 'en buk'una'a 'ooht'e. Nts'e dune lghusdúke ts'ih hanája, 'ink'ez ndati whudulhghalh t'eh, 'ahoh hiba dá' dutootan. ³⁷ 'Et ndet moodih whusanaja t'eh, 'ink'ez be 'ulhna hika tsi hooli, 'ink'ez hika ites'en, ndunnah moodih ndut'en bunil'h'en t'eh, 'en dega nus hoonzoo hubugha whults'ut. 'Alha 'un whudúsi, bumoodih soo nadutehnilh ka, 'ink'ez dude 'ulhna natl'adulhúts'ih hubuduténih, 'ink'ez hububut ní'telelh. ³⁸ 'Ink'ez moodih tuzniz tusih k'us tuzniz hukw'elh'az tusih, 'et whusanatedalh 'ink'ez be 'ulhna hika tsi hooli hoh hika ites'en, 'et whuz na'a moodih ndut'en hubunil'h'en t'eh, 'en dega nus hoonzoo hubugha whutelts'ulh. ³⁹ 'Ink'ez soo cho t'eeonahzeh, ndun bukoo whumoodih nts'owhuga whudezull undunut'ih whusatéyahl, 'et t'ewhuninzun t'eh, 'et soo ts'ah'un da huwole, 'ink'ez 'aw hikoo da' dutooyis ghaít'ah. ⁴⁰ 'Et huwa nuhwheni chah lhadóoht'e. 'Alha nts'owhuga 'uhunet'oh 'et buka tsichahóohlih, 'et yinkak dune ye' 'en whusanátedalh," ni Sizi. ⁴¹ 'Ink'ez 'et Peter ndi yúlhni, "NeMoodihti, ndi khunek bugha whuts'odul'eh, 'i be yailltuk, 'i nuwheni zeh tulih k'us ts'iyannah ba tulih 'udini?" ⁴² 'Ink'ez neMoodihti 'utni, "K'us ndan ts'ah'un 'int'ah 'ink'ez whunih unli hoh bukoo huwunli? 'En bumoodih bukoo whumoodih yutelhtsilh, soo 'et neoduzuk t'eh, 'et 'onghunnah hite'alh, 'i hubugha náitet'aih. ⁴³ 'Et bumoodih whusanaja t'eh, 'ink'ez hibe 'ulhna whuz na'a ndut'en yunil'h'en t'eh, 'et tsih ndan bukoo whumoodih yulhtsi, 'en dega nus hoonzoo bulh 'uwhútenilh. ⁴⁴ 'Alha 'ún whudusni ndan bumoodih ndai yit'i, 'i ts'iyawh k'une' yul'en yutl'aóote'alh. ⁴⁵ 'Et whunts'ih ndan be 'ulhna dich'oh budzi yuh hoh 'et nduninzun t'eh, 'Sumoodih sa slah whusanádaih.' 'Ink'ez 'et dune bumoodih hiba 'uhú't'en 'ink'ez ts'ekoo hiba 'uhú't'en chah whéboonilhtsus. 'Ink'ez whé'ni'al 'ink'ez tanutnai, hoh tanutnih, ⁴⁶ hoh t'eh ndet dzin 'et ndan be 'ulhna 'aw yuka ts'ih chahoolih 'ink'ez nts'oh howa 'uhunet'oh utenilh 'aw t'eeonízun, 'et hoh wheghah 'uhunet'oh hoh bumoodih whusanátedalh. Tube ye'whudutelhyah, 'ants'ih lhulcho k'eitet'us li'yutelilh 'ink'ez ndai Yak'usda k'unucha'ust'en hubuts'ítelk'ulh, 'et didut chah whuz na'a zeh bugha ootét'alh. ⁴⁷ 'Ink'ez ndan 'ulhna 'en bumoodih ndet yuts'u hukwa' ninzun, 'et ts'iyawh t'eeoninzun, 'et whunts'ih 'aw wheni lháchadit'ah 'ink'ez yuk'unucha'ust'en, 'et huwa lhat hoh hubooteltsus. ⁴⁸ 'Et whunts'ih ndan t'eeonízun dumoodih ndet yuts'u hukwa' ninzun, 'ink'ez dude 'ut'en k'ah huwa hubooteltsus huba, dzuhuz zeh hubooteltsus. 'Et ndun dune lhái bugha nt'ai, 'en lhat yuts'u hukwa' ntezilh. 'Ink'ez ndan lhat butl'awhélya, 'en 'o nus lhat yuts'u hukwa' untezilh.

Sizi 'utni, "Dune lhch'a nihuduté'dulh 'et hukwa whusáya"

⁴⁹ “Ndi yun kwun buk'eítes'ah ka whusáya. 'Uda ncha duzk'an. ⁵⁰ 'Et whunts'ih be dune too be 'ul'en, 'i be too be' tesnilh huba' hoont'ah. 'Et lhaoodutenilh 'et whuts'un 'et huwa tube dzuh nuszut. ⁵¹ Ts'iyannah lhts'un ts'ah'un 'úhoot'e, 'et hukwa ndi yun k'ut whusáya nahzun ih? 'Awundooh! 'Et ndun whudusni, dune lhch'a nehúdatedulh 'et hukwa whusáya. ⁵² 'Et k'an njan whuts'un skwunlanah 'ilhughun bukoo hudelhts'i, 'en lhch'a nihúdatedulh. Tanah, 'en nanah ch'a nihúdatedulh, 'ink'ez nanah, 'en tanah ch'a nihúdated'us. ⁵³ Be'abá buye' ch'a niduteyalh, 'ink'ez buye' 'en be'abá ch'a niduteyalh. Be'ama 'en chah dutse' ch'a niduteyalh, 'ink'ez butse', 'en be'ama ch'a niduteyalh. 'Ink'ez bubez 'en chah beyas'at ch'a niduteyalh, 'ink'ez beyas'at, 'en chah bubez ch'a niduteyalh.”

Sizi Gri whusanatedalh soo cho buka tse ts'úholi

⁵⁴ 'Et lhanah 'ilho huwezdél, 'en chah ndo búlhni, “'Et ndet nus de kw'us whúzdli nulh'en t'eh, 'et 'ahoh 'udahni, 'Dzuh st'iyaz nawhulhtih.’ 'Ink'ez 'et nduw'hút'ih. ⁵⁵ 'Ink'ez n'az tézts'i teh 'et 'udahni, ‘Tube whuntézulh ho' whut'en,’ 'ink'ez 'et nduw'hút'ih. ⁵⁶ Nuhwheni dune nalh duba nahdzoo aht'ah! Ndi yun k'ut 'ink'ez yat'ah chah dawhutenilh, 'et nt'oonuhzun. 'Et whunts'ih dáhoont'ah huwa k'an dawhutenilh 'aw nt'oonuzáhzun? ⁵⁷ 'Ink'ez nuhwhenich'oh dahoont'ah huwa nts'e na'a ts'ah'un na'a 'uhoont'ah, 'et 'aw nt'oonuzáhzun? ⁵⁸ 'Et ndan nch'a detni, 'en naheyelh but ninyutélhtel, 'et whuz ah'us hoh 'et tube buts'un lhanaoodonleh hukwa' ont'en. 'Et sih naheyelh but ninyutelhtel 'ink'ez naheyelh nehúlhghel t'anyutelhtel, 'ink'ez nehúlhghel tsak'enyute'ah. ⁵⁹ 'Et ndun whudusni ndi sooneya ntsolyaz whunts'ih, 'i ts'iyawh buk'elha whutelhtsilh, 'et whuts'un tsak'etanda.”

13

Nuhwheni lubeshi whuch'a nuhwhubeni nahadunoohlelh, 'et ndúchahnel t'eh, 'et nuhwheni ts'iyawh kwuncho yuh ts'ih téhdulh

¹ 'Et hoh da bulunah dune, 'en Sizi 'uhiyulhni nts'e na'a Galilee whut'en hubanghan hubulh dahooja. 'En 'uhint'ah Galilee whut'en Yak'usda ba 'uhudé'lhk'un hoh Pilate hubanghan 'ink'ez hubuzkai nyoo hidé'lhk'un, 'i butayunjut. ² 'Et Sizi ndo búlhni, “Ndunnah Galilee whut'en, 'en nts'e na'a 'uhuja dzuh nuhuzde, 'et huwa 'uyoon Galilee whut'en degaha nus lubeshi 'uhulh'en nahzun ih? ³ 'Awundooh nuhwhudúsní! 'Et whunts'ih nuhwheni chah nuhwhubeni lubeshi whuch'a náhandunoohlelh, 'et nduchahnil t'eh, 'et nuhwheni chah ts'iyawh, whuz na'a zeh yatáhdlah! ⁴ 'Et keyah Siloam huw'hútni, 'et tse whedi'a, 'i ndunnah lanezi 'o 'at lhk'udinah, 'en hubuk'eninghez hoh ts'iyawh hedúghan. 'Et Jerusalem whut'en, 'en huba nus lubeshi 'uhulh'en 'uhint'ah nahzun ih? ⁵ 'Awundooh nuhwhudúsní! 'Et whunts'ih nuhwheni chah nuhwhubeni lubeshi whuch'a náhandunoohlelh, 'et nducháhní t'eh, 'et nuhwheni chah ts'iyawh, whuz na'a zeh yatáhdlah!”

Ndi duchun, fig hiyulhni, 'i be Lizwif hubodutel'eh

⁶ 'Et doo chah Sizi huwa whuts'odul'eh, 'i be hubulh yalhtuk hoh njan ndutni, “Ilhunuh dune 'en mai chun, figs hiyulhni, 'i bumai haníyeh, 'i k'ut, 'et 'ilho ha ínulhyeh. 'Ink'ez 'ilhudzin yumai ka ités'en. 'Ink'ez 'aw mai bughoh hoolah. ⁷ 'Ink'ez 'et bumai haníyeh huwunli ndi yúlhni, 'Whunilh'en ih? Tat naodezulh whuts'un ndi mai chun, figs hiyulhni, bumai ka ités'en 'ink'ez 'aw bumai bughoh hoolah. Di ka yun k'ut bulh hóonsol? Ntintselh!’ ⁸ 'Ink'ez 'utni, 'Moodih whute k'an naodezulh zeh buts'un ha chaoozí'aih. K'at bunat naooteskalh 'ink'ez bugha soo ha' niyeh, 'i butaíduteslelh. ⁹ 'Et soo bumai whúzdli t'eh, 'et soo' hoont'ah. 'Et ndúchahnil t'eh, 'et sih ntooselh.”

Ts'eketi, 'en Satan yulhghel

¹⁰ 'Aw 'et dzin nats'ulyis 'et 'ilhunuh Lizwif luglez 'et whubodulh'eh. ¹¹ Khunyaz 'et 'ilhunuh ts'eke lanezi 'o 'at lhk'udit naodezut (18) 'et ntsi' nududeh, 'i lait'ah yulhtsi hoh 'en yudinda. 'Et huwa nachaneti 'ink'ez dich'oh 'aw nduk na'ootneh ghaít'ah. ¹² Sizi yutelh'en ibulh, yuka hunih 'ink'ez 'anih yúlhni, 'ink'ez ndi yúlhni, “Ts'eke lait'ah 'aw 'et mba whulaoodetnik!” ¹³ 'Et yuk'edilnik 'ink'ez 'ahoh lhk'unadesduki 'ink'ez Yak'usda dálhiti. ¹⁴ 'Et nats'ulyis dzin 'et Sizi ndun ts'eke soo na'yinla, 'et hukwa ndun Lizwif luglez whumoodih hunilch'e. 'Ink'ez 'ilho huwezdél, 'en ndo búlhni, “Lhk'utat dzin (6) 'et dune 'uhoot'en huba' hoont'ah. 'Et huwa 'uts'ut'en dzin 'aw 'et zeh soo na'nohohoolah huba' hoont'ah. 'Et nats'ulyis dzin 'et huba cha'hoot'ah.” ¹⁵ 'Et neMoodihti ndi yúlhni, “Nyun dune nalh duba naindzoo 'unint'ah! 'Alha nuhwheni ilhughun ahli hoh nats'ulyis dzin nuhmusdus dune, k'us nuhmuyool teh musdus bakoo hundel'húya, 'et lhk'unadúh'uk 'ink'ez too k'ez toolhdlooh ghaít'ah ih? ¹⁶ Ndun ts'eke 'ilhunuh Abraham yuts'u haínzut 'ink'ez Satan lanezi 'o 'at lhk'udit (18) naodezulh hoh yulhghel. Soo cho howu nuni nahzut! 'Alha nats'ulyis dzin 'et 'aw buk'una'óot'uk ghaít'ah hoh ih 'udahni?” ¹⁷ 'Et Sizi ndi khunek

'et ndudáni hoh yuch'a detni, 'en ts'iyawh hooya huzdli. 'Ink'ez 'onghunnah lhanah 'en hubugha hoonzoo tune' 'ust'en 'et huwa honélnnik.

Haníyeh, 'i mustard hiyúlhni, 'i bugha whúts'odul'eh

¹⁸ 'Et Sizi ndo búlhni, "Yak'usda hubudayi cho unli, 'et nts'e na'a nuhwhuba dahoont'ah? 'Ink'ez di bulh simba nuhwhuba nduwúhlt'ah nahzun? ¹⁹ Ndez na'a nduhoont'ah, ndi mai nintsolyaz butse, 'i mustard hiyulhni, 'i k'una'a 'uhoont'ah. 'I dune yunílhchokw 'ink'ez ha'neyeh whuyína'aih 'ink'ez haneyih. 'Ink'ez duchun cho ulhih. 'Et dut'aiyaz buzooschum tah 'ut'o nilih."

Yak'usda buk'úne' whut'en 'et, lhes ntuldoh, 'i ndult'ah

²⁰ 'Ink'ez doo chah ndo búlhni, "Nts'e na'a simba whunwhunoollhtun Yak'usda buk'úne' whut'en? Ndez na'a Yak'usda buk'úne' whut'en 'et. ²¹ Lhes ntuldoh, 'i dunt'ah. Ndaí ts'eke yílhchukw 'ink'ez lhes nudúzaih, 'i ta tsatsai be yúnde'oolhdzih, 'i dezibun. 'I ntuldoh, 'i bulh 'ilho be yandzai, 'ink'ez yunelhlhus. 'Et hukw'elh'az 'udun ninínkai hoh untelhúdo."

Hoondot ndati hukwa 'óohneh

²² 'Et hukw'elh'az Sizi Jerusalem whuz tezya. 'Ink'ez keyah whuti 'ink'ez keyah whuyaz 'et dune hoh uyalh 'ink'ez dune hoodulh'eh. ²³ 'Et 'ilhunuh ndi yúlhni, "Nemoodihti bulunah zeh ih hudutejih?" 'Ink'ez Sizi ndo búlhni, ²⁴ "Hoondot ndati hukwa 'óohneh. 'Et ndun whudúsní lhanah 'et ndati dahátédulh hukwa' huntezilh, 'et whunts'ih 'aw 'uhooneh ghaít'ah. ²⁵ 'Et 'ilho bukoo whumoodih didinya 'ink'ez ndati dána'dentan, 'et nuhwheni 'az nudelhúya 'ink'ez ndati whudulhghalh 'ink'ez 'udahni, 'Moodihti, moodihti neba dá'dutentih!' 'Et 'un whudóoni, "Aw nt'énohwhunuzúszun nts'ez de háhdel." ²⁶ 'Ink'ez 'udoohni, 'Nyulh 'uts'un'alh 'ink'ez nyulh 'úts'utnai. 'Ink'ez nekeyah whuti 'et da whuneood-ih'e inle.' ²⁷ 'Et whunts'ih 'udóoni, 'Nuhwhudusni, nuhwheni 'ink'ez nts'ez de háhdel 'aw t'énohwhunuzúszun. Sch'a nasáhdelh! Nuhwheni ts'iyawh tink'us ne'zacht'en!' ²⁸ Abraham, Isaac, Jacob, 'ink'ez nus whunilh'en, 'en ts'iyawh, ndet Yak'usda hubudayi cho unli, 'et hudutélts'ih 'et hubunoolh'en. 'Et whunts'ih nuhwheni tinanohonilhdel. 'Et tehtso 'ink'ez nuhgoo lhedutelhk'us. ²⁹ 'Ink'ez lhanah ndaz de, nus de, nyaz de 'ink'ez nts'iz de, whuz de hahutedulh 'et ndet Yak'usda hubudayi cho unli, 'et nátl'ahudutelts'ih 'uhute'alh ka. ³⁰ 'Et ndóhoont'ah, bulunah 'udechoo hinli, 'en 'udek'ah hutele. 'Ink'ez bulunah 'udek'ah hinli, 'en 'udechoo hinli nahutedleh." ³¹ 'Et dzin zeh bulunah Pharisee, 'en Sizi highu nindel 'ink'ez 'uhiyúlhni, "Naindahl 'ink'ez njan whuch'a nasindaih. Herod nyutuzelghelhl hukwa' ninzun!" ³² 'Ink'ez ndo búlhni, "Ndun 'uyoo nanguz 'en sba dóohni, 'Sih soo zolhts'ai! K'an dzin 'ink'ez bunt'ah chah ntsi' nududeh, 'i dune ch'a hanánusyukw 'ink'ez dune soo ná'ulh'en, 'ink'ez whulh tat dzin 'et hukwa whusáya 'et lhaodúlya tesdle." ³³ 'Et whunts'ih k'an dzin, bunt'ah dzin, 'ink'ez 'om bun dzin kedutooszit huba' hoont'ah. 'Alha' hoont'ah, 'aw nus whunilh'en, 'en 'aw keyah Jerusalem whu'az daóotsah huba cha'hóot'ah.

Jerusalem whut'en, 'en hubugha Sizi budzi nduda suli

³⁴ "Nuhwheni Jerusalem whaht'en, Jerusalem whut'en, nuhwheni aht'en nus whunilh'en, 'en aghhan. 'Ink'ez ndunnah nuhts'uh whel'a, 'en chah tse be hubaghan. Dant'ah ligok duduzkeh dut'a bugha hubudelhts'i, whuz na'a nuhwheni chah dáwhultsk hoh 'ilhunanohtwúts'dlehl hukwa' nuszun, 'et whunts'ih 'aw hukwa cha'názhun. ³⁵ Soo cho whunulh'en, 'aw 'et nuhwheni Jerusalem whut'en nuhkeyah 'aw hoonli hoolah suli hoh nuhwhuba 'et nenáwhults'ut, 'et whuz na'a Yak'usda nuhladutetnih. 'Ink'ez 'alha 'un whudúsní, ndet whusawhútelts'ulh, 'et hoh t'eh 'et ndudútehnilh, 'Ndun Moodihti boozí be whusatayalh, 'en degaha nus hoonzoo bugha whults'ut.' 'Et ndudútehnilh 'et whutsuh, 'aw sooh'en ghaít'ah."

14

Nats'ulyis dzin, 'et Sizi nduda soo ná'yinla

¹ 'Aw 'et 'ilhut dzin 'ilhunuh Pharisee bumoodih bukoo, 'et nats'ulyis dzin, 'et Sizi lhes natet'alh ka danínya. 'Et soo ts'ih hinilh'en. ² 'Et khunyaz 'ilhunuh dune buyust'e tah too whudezibun suli, 'et hukw'é nduda, 'en Sizi yubut suyín. ³ 'Ink'ez Sizi ndunnah Moses be' dustl'us k'ut, daja ni hoh beni hoonli be yalhtuk, 'ink'ez Pharisee, 'en chah ndo búlhni, "Et neba ts'ah'un 'uhoont'ah ih nats'ulyis dzin dune soo nats'oolh'en?" ⁴ 'Et ts'iyawh t'ehudusnih. 'Ink'ez ndun dune yílhchoot 'ink'ez soo ná'yinla, 'ink'ez yulanadetnik. ⁵ 'Et ndo búlhni, "Ndunnah 'int'ah nuhtah muyool 'ut'i k'us bumusdus dune tsa k'et 'alts'ut t'eh, 'aw nats'ulyis dzin 'uhoont'ah 'et huwa ih 'ahoh 'aw hanáchitelhtel nahzun ih?" ⁶ Njan 'et hubugha huboodulhkut, 'aw whe' hudooni hooyal ghaít'ah.

Dune ncha unli tehleh, 'et hukwa 'ooht'en gunih

⁷ Ndunnah hubugha nusja k'us hoonzoo 'utahahódet'ai 'ink'ez hubunilh'en ho' hut'en. 'Et huwa whuts'odul'eh, 'i be hubulh yalhtuk hoh njan ndutni, ⁸ "Nts'e dune lhghu tekellh ts'ih nuhghu nusja t'eh, k'us hoonzoo teh natl'adoohdalh gunih. Doo ka nohghan do 'int'ah tulih highu nóya. ⁹ 'Et t'eh ndun nuhghu nuseya, 'en 'un yudooni, 'Sinda 'et ndun 'et butl'ahó'aih.' 'Ink'ez 'et hooya sinli hoh degha nus 'on yuk 'et nanát'adondalh. ¹⁰ 'Et whunts'ih nts'e nuhghu nuhúzya whuz toohya 'ink'ez 'ants'ih ndati weghah nátl'adondalh. 'Et t'eh ndun nuhghu nusiyá 'en tulih 'un whudóoni, 'Sulh dune soo hoonzoo 'et natl'adindaih.' 'Et ndunnah kw'uzdai k'ut nyulh hudelhts'i, 'en nyahudóolhti. ¹¹ Soo cho whunulh'en, ndan ncha na'dudil'i, 'en hooya tele. 'Ink'ez ndan te'dudil'en, 'en ncha hiyoohltsilh." ¹² Ndun yughu nusiyá, 'en Sizi ndi yúlhni, "Ndet dzetniz k'us hulhgha huwa' tan'alh t'eh, khun teh nyulh dunekah, k'us nyulhutsinkah, k'us nyulhtuskah, k'us nghah whut'i ndunnah soode'a 'int'ah, 'en ts'iyawh hubughu nóya gunih. 'En hubughu nusiyá t'eh, 'en tulih nghu nunáhooda hoh mba k'elha whutele. ¹³ 'Et whunts'ih huwa' tan'alh t'eh, 'et ndan tehel'en, 'ink'ez dzuh nuhudelh, 'ink'ez hubuyust'e hubodi'ai, 'ink'ez chawhés'en chah, 'en ndunt'ah, 'en zeh hubughu nonya. ¹⁴ 'Et nyun degha nus hoonzoo nyulh 'úhoneh. 'En 'aw mba k'elha huhoolhtsilh ghaít'ah. 'Ink'ez nk'et'ah dune tsah'un 'int'ah, 'en dináhudidel t'eh, 'et sih mba k'elha whuteleh 'et huwa."

'Udechoo hubughu nusiyá, ndunnah 'awundooh hutni, 'aw 'ilhunuh whunts'ih ndi tet'ah 'aw चाहितेस्यि

¹⁵ 'Et 'ilhunuh dune kw'uzdai k'ut yulh usda, 'en yudants'o, 'en ndi yúlhni, "Ndet Yak'usda hubudayi cho unli, ndunnah 'en 'uha'alh, 'en degha nus hoonzoo hubugha whutelts'ulh!" ¹⁶ 'Ink'ez Sizi ndi yúlhni, "Ilhunuh dune hulhgha hooncha hoh huwa' ni'ai. 'Ink'ez lhanah ghu nusiyá. ¹⁷ 'Et hulhgha na'hutet'alh dude 'ulhna yálh'a 'ink'ez ndunnah hubughu nusja ndo budóoni, "Aw 'et ts'iyai lhadúja, dez ahdulh!" ¹⁸ Ts'iyawh 'ilhunah hinli hoh 'aonilhka 'aw 'uhooneh ghaít'ah hutni. 'Et 'udechoo njan ndutni, 'Si yun oket 'ink'ez whuz tesyalh whuntel'hil ka, 'et huwa 'aw oosneh ghaít'ah suba dóni.' ¹⁹ 'Et 'uyoon dune 'en chah njan ndutni, 'Skwunlai musdun dune lhuzih ndel'húya oket. 'Ink'ez nantel'hú'ilh dant'ah simba, 'et huwa 'aw oosneh ghaít'ah suba doni.' ²⁰ 'Uyoon chah 'et ndutni, 'K'an zeh 'at ust'i 'et huwa 'aw whuz toosya ghaít'ah.' ²¹ 'Et hoh 'ulhna yughu nanja 'ink'ez dumoodih 'en hubugha ts'iyawh ndi yúlhni. 'Ink'ez ndun bukoo whumoodih 'aw 'et hunilch'e 'ink'ez dude 'ulhna ndi yúlhni, 'Soo 'a tsih! Keyah whuti ts'ih inyalh 'ink'ez ti wheyaz ndulhcho hoh ninya 'ink'ez tehel'en, dzuh nuhudelh, chahuw'hés'en, 'ink'ez hubuyust'e hubodinla chah, 'en ts'iyawh whusaobonlehl!' 'Ink'ez wheyálh'a. ²² 'Ulhna whusanája 'ink'ez 'utni, 'Sumoodih nts'e na'a 'udini, hukw'u na'a 'usja, 'et whunts'ih 'awhuz hooncha whuz'ai.' ²³ 'Ink'ez moodih dude 'ulhna ndi yúlhni, "Aw 'et ti whucho ts'un inyalh 'ink'ez ti whuyaz ts'un chah inyalh 'ink'ez dune ts'iyawh dez hutoodelh hukwa' bilh'en, sukoo whudooobun ka. ²⁴ 'Alha' dusni hoh nyudusni, ndunnah 'udechoo hubughu nusiyá, 'aw 'ilhunuh whunts'ih ndi tet'alh, 'i 'aw चाहितेस्यि."

Nuhwheni nuhtah 'ilhunah ahli hoh ts'iyai aht'i, 'i 'aw bulachadzahnik t'eh, 'aw sugha hoodul'eh wahle ghaít'ah

²⁵ 'Et lhanah 'ilhohuwezdel hiyulh tezdel. 'Et hubuts'u nalhú'a 'ink'ez ndo búlhni, ²⁶ "Ndan suts'u teyalh se'ut'en k'ah 'uwhtel'hil 'ink'ez bu'abá, bu'ama, bu'at, buzkehkah, dulhutsinkah, 'ink'ez dulhtuskah, 'alha 'ink'ez dich'oh hoh yinkak usda chah, ndi njan ts'iyawh si sugha whuladetnik t'eh, 'en 'aw sugha hoodul'eh wule ghaít'ah. ²⁷ 'Ink'ez chah ndan bulhdulalhgus chaidestil 'ink'ez suntezya, 'en 'aw sugha hoodul'e wule ghaít'ah. ²⁸ Soo cho whunulh'en, ndan 'int'ah nuhtah, 'en whedi'a, 'i 'itelihl t'eh, 'en 'udechoo nátl'adeda 'ink'ez daneltsuk whutele neooni'ai, 'i bé lhaoodutenilh. ²⁹ Doo ka 'aw nduchaínli t'eh, 'ink'ez koo buk'uwhez'ai inla, 'et 'aw soo 'uneltsuk ye lhaoodutelilh, 'i chayí'ih t'eh, 'et ndunnah whuhunilh'en, ts'iyawh highu tedloh. ³⁰ 'Ink'ez 'uhudooni, 'Ndun dune whedi'a, 'i whe'yuninle 'ink'ez 'aw lhái dooleh ghaít'ah!' ³¹ K'us ndan hubudayi cho 'utenilh 'uyoon hubudayi cho bulh lhuhutedúghan hukwa' ntezilh. 'Alha 'udechoo nátl'adeda 'ink'ez hukw'u nuni noolhdzut datenilh. 'Et soo tulih 10,000 budune, 'en be ndun 'uyoon hubudayi cho 'en 20,000 lhadudugan, 'en soo tulih ndunnah 10,000 be hubududóoya. ³² 'Et k'us ndan 'uyoon hubudayi cho 'en 'awhuz nilhdza 'az de hédulh hoh, 'et khunek yuba na'a yuts'u whébahalh'a, nts'e na'a simba ts'ah'un nenáhoho'alh 'et huwa. ³³ 'Et huwa nuhwheni nuhtah 'ilhunah ahli hoh, ts'iyai aht'i, 'i 'aw bulachadzahnik t'eh, 'aw sugha hoodul'eh wahle ghaít'ah.

Lusel buzachahóolki t'eh, 'aw hoonli huba cha'ildzooch ho' 'int'ah

³⁴ Lusel 'i unzoo ho' 'int'ah. 'Et whunts'ih 'aw buzachahóolki sulí t'eh, nts'e na'a simba doo chah buzahóolki naoodle? ³⁵ Lusel buzachahóolki t'eh, 'aw hoonliyaz huba cha'ildzooch

ho' 'int'ah. 'Aw yun ba whunts'ih cha'ildzoooh. 'Ink'ez 'aw musdus ndálya 'et whunts'ih huba cha'ildzoooh ho' 'int'ah. 'I 'ants'ih dune tihíyulhukuk huba 'int'ah. Ndan hubudzo hooni hiyoozóhlt's'a huba' hoont'ah!"

15

Sheep tinch'a ninya

¹ 'Aw 'et ndunnah sooneya 'ilhunaoonughés'aih 'ink'ez lubeshi 'uhulh'en, 'en chah ts'iyawh Sizi hiyootuzélt's'ihl ka highu nendél. ² 'Ink'ez ndunnah Pharisee 'ink'ez Moses be' dustl'us 'uk'ununa'úsduuguz chah highu yawhenilhtuk hoh njan nduhútni, "Nullh'en ndun dune 'en lubeshi 'uhulh'en, 'en hubulh ne'ut'en 'ink'ez hubulh 'á'alh chah 'ut'en." ³ 'Et huwa bugha whuts'odul'eh, 'i be hubulh yalhtuk hoh njan ndutni, ⁴ "Ndan 'int'ah nuhtah dune 'en sheep 100 ut'i hoh 'ilhuk'i tinta ninya. 'Aw 99 'en chuntah 'aw 'et nífubinla 'ink'ez 'ilhunuh tinta inilhti, 'en naitéltelhel whuts'un yukunúta? ⁵ 'Ink'ez ndet nayilhti hoh duwus k'eyilhti 'ink'ez hooté'ti. ⁶ 'Et hoh da bukoo ts'ih lhgha nadija, budunekah 'ink'ez hubeghah huwhut'i, 'en ts'iyawh 'anih hubudani 'ink'ez ndo búlhni, 'Sulh hoonah'ti. Ndun se'usheepyz tinch'a nilhti inle, 'en nailhti!' ⁷ 'Et ndun whudusni, whuz na'a zeh ndan 'ilhunuh dune lubeshi whuch'a bubeni nahundunez'ai, 'en 99 ts'ah'un 'int'ah, 'en 'uda dulubeshi ch'a hubeni nahundunezdla. 'Et whunts'ih ndan 'ilhunuh dune 'en bugha nduk yak'uz hudelht's'i, 'en huba nus 'o nus howun télnhik."

Lhuk'i sooneya dezti, 'i tinch'a iné'ai, 'i

⁸ "Et doo chah zeh 'ilhunuh ts'eke lanezi silver ut'i 'ink'ez lhuk'i tinch'a iné'ai. 'Aw 'et too dez'k'un nadulhk'an 'ink'ez bukoo t'nawhulhtsas, 'ink'ez nayunté'ah whuts'un yukunúta. ⁹ 'Ink'ez ndet naini'ai t'eh budusnekah 'ink'ez bughah huwhut'i, 'en 'ilho 'anih hubudani 'ink'ez hubudútenil, 'Sulh hoonah'ti! Ndi sooneya lhuk'i tinch'a ne'ai, 'i nan'ai!' ¹⁰ Whuz na'a zeh 'un whudúsní, 'ilhunuh lubeshi 'ulh'en bubeni nahundunez'ai t'eh, 'et sihYak'usda hubulizas, 'en ts'iyawh huwhun télnhik."

'Ilhunuh tintal'ts'ut inle 'aw 'et nailti

¹¹ Sizi 'et 'utni, "Ilhunuh dune, nanah buye' hooni. ¹² 'Udek'ah 'et bu'abá ndi yulhni, 'Abá ndai suba naootándzil, 'i k'an ts'iyawh st'l'ainle.' 'Et ndun be'abá ndai buye' buba nayootedzil, 'i ts'iyawh huba lhk'éyanla. ¹³ 'Et hukw'elh'az 'aw lhat dzin chailah, 'et 'udek'ah yugha ninla, 'i ts'iyawh soo ninla. 'Ink'ez keyah nilhdza ts'ih whinya. 'Et whuz ninya hoh ndai yit'i, 'i ts'iyawh tinta yunilh'en 'ink'ez hoolah yulhtsi. ¹⁴ Hoh da 'et ndai yuts'u yoozi, 'i ts'iyawh hoolah yulhtsi hoh, 'et nyoh yun k'ut dai cho whúzdli. 'Ink'ez ndun chilh ts'iyai, 'i ye ndunidizt suli. ¹⁵ 'Et 'ilhunuh dune 'et yun ut'i, 'en 'ut'en yugha ní'ai. 'Ink'ez hanulhyeh ts'ih wheyá'h'a, 'et goso ghá' te'aih ka. ¹⁶ 'Et buye'élt's'ul k'et 'et ndunúnun, ndi goso yu'alh, 'i úncha us'alh, ninzun. 'Et whunts'ih 'aw dune yugha cha'us'aih. ¹⁷ 'Et beni bugha nadelts'ut li'uja 'ink'ez 'utni, 'Dahúneltsuk se'abá ba 'uhut'en hiya'alh, 'i huba nus 'unélt'suk, 'ink'ez si njan lhe'ust'ah! 'Aw 'et dai súzullhge! ¹⁸ Dinadoosja 'ink'ez se'abá but's'uh nátoosja 'ink'ez njan ndudóosni, su'abá yak'uz whudulhyah chah lubeshi usdla 'ink'ez nyun mbut chah. ¹⁹ 'Aw 'o 'at suye' sudutenilhuba soo cha'lhúdzoooh. 'Et huwa ndunnah mba 'uhut'en k'una'a 'usolhdzin.' ²⁰ 'Aw 'et be'abá ts'un natesja. 'Awhuz yoo 'az de nádalh, be'abá yutelh'en hoh 'ahoh yugha te'nanzin. Yududelhgai 'ink'ez buye' bushih be na'yilchoot 'ink'ez naindunants'ooz. ²¹ 'Ink'ez buye' ndi yúlhni, 'Se'abá yak'uz whudulhyah 'ink'ez nyun nyunalh chah lubeshi usdla. 'Aw 'o 'at nye' sudutániilhuba soo cha'lhúdzoooh.' ²² 'Et whunts'ih be'abá be 'ustl'en hubuts'un 'et ndutni, 'Naih degha nus unzoo, 'i whusaoolhchoos 'ink'ez be sóo naidahleh, lande'ai bula nidah'aih 'ink'ez kegwun chah beyúh'eh. ²³ 'Ink'ez musdusyaz nilhúk'a, 'i ulhchoot 'ink'ez nasulhge! 'Et 'uts'oo'alh 'ink'ez ts'onóolhnik. ²⁴ 'Suye' dazsai inle 'ink'ez k'an nakhítina li'hoont'ah. Tinta nilhti inle, 'ink'ez k'an nailhti.' 'Aw 'et ts'iyannah hiyulh whunélnhik. ²⁵ 'Et buye', 'udetsah whudelhdzulh, 'en ha'níyeh ts'ih 'ut'en. 'Et koo ts'ih natesja. 'Aw 'et wheghah nadalh hoh 'et shun chah 'ink'ez hanudaih 'et whuduzts'ai. ²⁶ 'Ink'ez 'ilhunuh 'uski ye 'ulhna 'anih yulhni 'ink'ez yoodulhukut, 'Dawhutni ho' whutni?' ²⁷ 'Ink'ez ndi yúlhni, 'Nyulhutsin whusanája. Soo 'int'ah 'ink'ez dáchait'ah hoh whusanája. 'Et huwa nye'abá musdusyaz nilh'ka, 'i naselghí.' ²⁸ 'Et whunts'ih bulhutsin 'udetsah hunilch'e. 'Ink'ez 'aw koo ts'ih nátoosja hukwa cha'nizun. 'Et be'abá tenínya 'ink'ez yughu tedudlih. ²⁹ 'Ink'ez be'abá ndi yúlhni, 'Nilh'en lhe'whuldzuh mba 'ust'en. 'Ink'ez 'aw nghuneklhuk'i whunts'ih k'uchásyus. 'Et whunts'ih 'aw sheepyz whunts'ih sugha chailhtel sulh dunekah hubulh whúnoolhnik ka. ³⁰ 'Et whunts'ih ndun nye', 'en, ndai bugha íni'ai, 'i ts'ekoo 'uhul'en, 'en buk'uz ts'iyai, 'i yulhtsi 'ink'ez musdusyaz nilhúk'a, 'i buba naizélhghi!' ³¹ 'Ink'ez ndi yúlhni, 'Suye' 'ahoolhyez sulh 'ínt'ah. 'Ink'ez ndai ust'i, 'i ts'iyawh nyun nye'ildzun 'int'ah. ³² 'Et ts'ah'un

na'a 'uhoont'ah ts'onóhnik 'ink'ez ts'ohót'i huba' hoont'ah. Nyulhutsin dazsai inle, 'en nakhitna. Tintal'sut inle, 'aw 'et nailhti."

16

'Aw Yak'usda chah 'ink'ez sooneya chah ba 'ont'en ghaít'ah

¹ 'Ink'ez 'et chah yugha hoodul'eh, 'en ndo búlhni, "Ílhunuh dune soode'a 'int'ah, 'en bukoo whumoodih unli. 'Et 'uyoon 'uhiyulhni, 'Nkoo whumoodih ndai int'i, 'i tinta' inílh'en." ² 'Et 'anih yudani 'ink'ez ndi yúlhni, 'Daja hutni nyulh udusts'o? Nts'e na'a sukoo whumoodih inli, 'et ts'iyawh suba 'uk'e'ónges. 'Aw 'et sukoo whumoodih inli 'ustl'e' 'inja ho' hoont'ah!' ³ 'Et ndun bukoo whumoodih inle dich'oh na'dudutni, 'Daoosneh simba? Sumoodih 'aw 'et se'ut'en sughu nayílhoot. 'Aw soo cha'lhútsun yun whuteskaih whuba. 'Ink'ez da'dutelhúne chah hukwayá usdli. ⁴ Datésnelh howu nuni nuszut. Ndet se'ut'en njan tinta ni'ai t'eh, dune bukoo ts'ih soo dasuhoolhtel.' ⁵ 'Et ndunnah bumoodih 'ilhunah hinli hoh hubuts'ún 'ít'i, ts'iyawh 'anih hubudáni. 'Ink'ez 'udechoo 'en yoodulhkut, 'Sumoodih daneltsuk but'sun int'i?' ⁶ 'Et ndi yúlhni, 'Khe 100 bundé'oolhdzai, 'i.' 'Ink'ez ndi yúlhni, 'Soo 'a natl'adindaih 'ink'ez bé nts'uh whuz'ai, 'i 50 zeh 'uk'e'inges!' ⁷ 'Et 'ilhunuh chah ndi yúlhni, 'Nyun do, daneltsuk but'sun int'i?' 'Ink'ez ndi yúlhni, 'Tl'o mai 100 bundé'oolhdzai, 'i.' 'Et ndi yúlhni, 'Bé nts'uh whuz'ai, 'i 80 zeh 'uk'e'inges!' ⁸ Ndun ts'ah'un cha'it'ah bukoo whumoodih, tube 'uyoo unli hoh 'uja. 'Et ndi yúlhni bumoodih, 'Aw soo ts'ah'un na'a cha'inil, 'et whunts'ih 'uyoo inli hoh 'inja!" 'Et Sizi ndo búlhni, "Ndez na'a njan nduhoont'ah, ndunnah huba 'alha' cha'hoot'ah, 'en 'uyoo hinli 'int'ah 'ink'ez ndunnah Yak'usda ba be whét'en hinli, 'en huba nus 'uyoo hinli. ⁹ 'Ink'ez ndun whudusni, ndi sooneya, 'i be dulh dunekah nahulsih. 'Ink'ez datéhtsah t'eh, 'et sih, 'ilhuz 'uhoont'ah ts'ih, whuz danánhohoolleh. ¹⁰ Ndai 'aw hoonli chahóolah, 'et ts'ah'un ne'whulh'en t'eh, ndai hooncha 'et chah ts'ah'un ne'whutelh'en. 'Et ndan hoontsolyaz be tink'us 'int'ah, 'en hooncha whuz na'a zeh 'et ndutet'ílh. ¹¹ 'Et huwa ndi sooneya, 'i be ts'ah'un nucha'zagt'en t'eh, nts'e na'a simba ndai be soode'a 'uhoont'ah, 'i nuhtl'ayóo'ah? ¹² 'Et nuhwheni ndai 'uyoon be'ildzun 'i be ts'ah'un cha'áhnél t'eh, 'et ndan simba óoneh ndi nuhbe'ildzun unli, 'i nuhtl'ayóo'ah? ¹³ 'Aw 'ilhunuh 'ustl'en 'en 'aw nanah moodih ba né'oot'en ghaít'ah. 'Et 'ilhunuh 'en yuts'u dutetnik 'ink'ez 'ilhunuh yuk'etetsi'. K'us 'ilhunuh yuk'úne'tet'en 'ink'ez 'ilhunuh yuch'a dútetni. 'Aw Yak'usda k'une' 'int'en 'ink'ez sooneya chah k'une' 'ont'en ghaít'ah."

Ndai dune ba dezti, 'i Yak'usda yuts'u dutnik ho' 'int'ah

¹⁴ 'Et ndunnah Pharisee, 'en sooneya huba dezti 'uhint'ah. 'En chah soo nts'e na'a daja ni ts'iyawh hidants'o, 'ink'ez highudloh. ¹⁵ 'Et ndo búlhni, "Nuhwheni ndez na'a njan daht'ah. Dune tah nuhwhenich'oh soo ts'ah'un 'int'ah na'dudulhú'i, 'et whunts'ih Yak'usda nuhdzi dant'ah ts'iyawh soo ts'ah'un nt'eeoninzun. Ndai dune ba dezti, 'i Yak'usda yuts'u dutnik ho' 'int'ah. ¹⁶ Moses be' dustl'us 'ink'ez nus whunilh'en bube' dustl'us chah ndet whuts'un John dune too be 'ulh'en khuna da, 'et whuts'un dune hik'une' 'oot'en huba' hoont'ah. 'Et whuts'un whudutezut ndet Yak'usda hubudayi cho unli, 'et hubugha khunek unzoo, 'i dune hiye yalhtuk. 'Ink'ez ts'iyannah 'et whuz na'a húkwa' hut'en. ¹⁷ 'Et tube howa whulna hoh nduk yat'ah 'ink'ez ndi yun chah hoolah whutele. 'Et whunts'ih njan Moses be' dustl'us k'ut dega nus hoontsolyaz hukw'e'éduguz, 'et 'o nus howa whulna hoh hoolah whutele. ¹⁸ 'Et ndan dune bu'at 'ustl'e' 'inla 'ink'ez 'uyoon ts'eke ghu nasda t'eh, ndun dune 'en lubeshi 'ulh'en. 'Ink'ez ndun ts'eke duki ch'a nasja 'ink'ez 'uyoon dune ghu nasda t'eh, ndun dune 'en chah lubeshi 'ulh'en ho' 'int'ah."

Lazarus 'ink'ez dune soode'a, 'i

¹⁹ 'Aw 'et 'ilhunuh dune soode'a 'int'ah, 'en nail duk'uh, dezti, 'ink'ez laiyyin dezti, 'i chah, ye dune unli. Dzin totsuk unzoo, 'i zeh yu'alh, ²⁰ 'ink'ez 'ilhunuh dune tel'en, 'en Lazarus hiyulhni, 'en buyust'e 'et ndulhcho hoh buka whulhjut. 'Ink'ez ndun dune soode'a 'int'ah, 'en bughu dati 'et hiyulhti. ²¹ Ndun soode'a buk'uzdai k'ut wheghakat, 'i uncha us'alh ninzun. Lhikah 'en whunts'ih highuh nilgok hoh hika k'et whúdlat. ²² 'Et ndun dune tel'en dazsai. 'Ink'ez lizas, 'en Abraham zih nihinílti. 'Ink'ez ndun soode'a 'int'ah chah dazsai. 'Ink'ez wheyih hiyalhti. ²³ 'Et ndun 'en yaidla tah usda 'ink'ez tube dzuh nuzut. 'Et nduk yutá'en hoh nilhdza 'et Lazarus, Abraham yuzih usda hoh hubutelh'en. ²⁴ 'Et tube soo cho yuts'u ha huyih 'ink'ez 'uyulhni, 'Se'abá, Abraham, sugha te'nonzeh! Lazarus 'en suts'ílh'ahl! 'Astl'iyaz dulasgek be toot nudoolnih 'ink'ez 'i be sutsoola k'ut nawhunoolhtsul, 'i be nanoosdúk'as! Ndi kwun 'i be dzuh nuszut! 'yulhni. ²⁵ 'Et whunts'ih Abraham ndi yúlhni, 'Suye' yinkak sinda da whunailnih ih? Ts'iyaintsuk unzoo, 'i nghánkat. 'Et whunts'ih Lazarus ntsi' zeh bughankat. 'Ink'ez 'aw 'et 'en hoonzoo bughá whults'ut, 'ink'ez nyun k'an dzuh ninzut. ²⁶ 'Ink'ez 'aw 'et zeh ílah, nyun 'ink'ez nuwheni nuhwhéguz

tube nadalhdzat ho' hoont'ah. 'Et huwa njan whunts'un 'aw nts'ó tooya ghaít'ah k'us nyun nts'un ts'ih whunts'un chah 'aw dez hutooya ghaít'ah.' ²⁷ 'Et ndi yúlhni, 'Se'abá Abraham nts'u tedusdli, Lazarus 'en se'abá bukoo ts'ih ilh'alh. ²⁸ Skwunlanah sulhutsinkah hooni. Khun teh khunek hubugha óo'alh. Doo ka sih njan dune dzuh nudeh ts'ih hutoodelh.' ²⁹ 'Et Abraham ndi yúlhni, 'Moses be' dustl'us 'ink'ez nus whunilh'en bube' dustl'us chah hit'i. 'I hiyoozólhts'a da.' ³⁰ 'Ink'ez ndi yúlhni, 'Awundooh se'abá Abraham. 'Et 'ilhunuh yaidla tah ts'ih hanája 'ink'ez hubuts'u tezya t'eh, 'et huwa lubeshi whuch'a hubeni nahodunooleh.' ³¹ 'Ink'ez ndi yúlhni, 'Moses be' dustl'us 'ink'ez nus whunilh'en bube' dustl'us chah, daja ni 'aw hiyoozólhts'a hukwa cha'hunízun t'eh, 'et nts'e na'a 'ilhunuh dazsai yaidla tuz hanaja t'eh, 'en whunts'ih 'aw hubeni 'uts'un ná'yooleh ghaít'ah."

17

Ndun dune tink'us nehúnilht'uk, 'en bugha 'et nduwhut'en, 'et dawhultsi' but'suh whélt's'ulh

¹ 'Ink'ez Sizi yugha hoodul'eh 'et ndo búlhni, "Njan tink'us uznint'uk 'ahoolhyez 'et whuzdla ho' hoont'ah. 'Et whunts'ih ndun dune bugha tink'us 'úwhut'en, 'en dawhultsi' but'suh whélt's'ulh. ² Ndunnah 'uskehyaz 'ink'ez ndun dune 'en bugha tink'us 'úh'ut'en sulí t'eh, 'en dune tse cho hits'ilchun edinguz 'ink'ez soo takhulh tahiyano t'eh, 'et 'o nus whutézoó. ³ 'Et huwa soo cho khahdlí. 'Et nuhulhutsinkah nuhdulhyah 'uhuja t'eh, 'et hukwa' budóohtni. 'Et hubeni náhudunez'ai t'eh, 'et huba whunaoodoolhúnah. ⁴ 'Et 'ilhut dzin skwunlai 'o at nankoh ndulhyah 'uja t'eh, 'et totsuk nghu nadaih 'ink'ez, "Seni náhandune'ai, 'nyúlhni t'eh buba whunaoodolnah."

Nts'oh dahooja whunts'ih, be 'alha' hoont'ah, 'i be neMoodihti buk'une' ts'oot'en

⁵ 'Ink'ez ndunnah whel'a, 'en neMoodihti 'uhiyúlhni, "Be néba 'alha' hoont'ah, 'i 'o nus 'ultus neba ilhtsi." ⁶ 'Et neMoodihti ndo búlhni, "Degha nus haníyeh mai tseyaz, 'i mustard hiyulhni, 'et nuhwhuba 'alha' hoont'ah, 'et 'uwulhcho t'eh, 'et njan duchun, 'i mulberry hiyulhni, 'et Yak'usda boodolhkut, 'Ndi duchun bughih tubulh hanaílhch'oolh 'ink'ez nye bun cho k'ut 'et whuyuni'aih.' 'Et Yak'usda nuhk'ah ts'ih 'ooneh. ⁷ 'Ink'ez nuhwheni nuhtah 'ilhunuh nuhwe'ulhna unli. 'Et ndan 'en haníyeh k'et nawhulhch'ul k'us sheep ghunli. 'Et ndi hanúlhyeh k'us whuz de hanája. 'Et ndez na'a tulih 'udóoni, 'Soó 'a! Natl'adindaih 'ink'ez na'int'alh!' ⁸ Awundooh! K'us ndez na'a njan dudóoni, 'Hulhgha natest'alh, 'i suba lhadinle, 'ink'ez soo cho soo nadintneh! 'Ink'ez suba hukw'e'inle, bulh na'test'alh, 'i chah suba hukw'e'inkaih. 'Ink'ez na'est'al hukw'elh'az 'et na'ont'alh.' ⁹ 'Et ndun be 'ulhna ndet yutl'ahonla 'et ts'iyaintsuk lhaoodinla. 'Et nduja 'et huwa ih suchanaílya yudutenilh? 'Awundooh nuszun. ¹⁰ 'Et whuz na'a zeh nuhwheni chah, ndet daóoht'en nuhwhudani, 'et ts'iyawh lhaoodahla t'eh, 'et 'ink'ez njan dudutéhnih, "Aw 'ilhun whunts'i huba soo cha'ts'ilzooh. Daja nehutni, 'et zeh ne'ts'ut'en."

Dune bukak whulhjut, buba 'alha' hoont'ah, 'i be soo ná'uja

¹¹ 'Aw 'et Sizi Jerusalem tezya hoh yun k'ut Samaria 'ink'ez yun k'ut Galilee chah wheguz lhuseya. ¹² 'Et whuz uyalh hoh keyah whuyaz ninínya. 'Et lanezi ndulhcho hoh bukak whulhjut, 'i leprosy hiyúlhni, 'i be hunduda, hidudezdel. 'Ink'ez highu nilhdza nahudelhúya. ¹³ 'Et whunts'un hits'un ha huyih, "Sizi neMoodihti, negha te'ninzeh!" ¹⁴ 'Et Sizi hubunilh'en 'ink'ez ndo búlhni, "Náwhulhuk but's'un ahdulh." 'Et 'awhuz whuz hédulh hoh soo na'huja. ¹⁵ 'Et 'ilhunuh soo na'uja t'ewhunanzin hoh 'et nuhundunezya. 'Et soo tube cho Yak'usda dálhti. ¹⁶ 'Et Sizi yubut yun 'et nacháneti, 'ink'ez lhk'uz teh suchanaílya yulhni. 'En dune Samaria whut'en 'int'ah. ¹⁷ 'Et Sizi ndi yúlhni, "Lanezinah ih soo na'huja? Ndunnah lhuk'i hoolah lanezinah nts'e whehándel? ¹⁸ 'Et ndun 'udun keyah ts'ih hainya, 'en zeh whusanaja 'ink'ez Yak'usda suchanaílya yulhni." ¹⁹ 'Ink'ez Sizi ndi yúlhni, "Didinyih 'ink'ez naindalh. Mba 'alha' hoont'ah, 'i be soo na'inja."

Nket'ah 'uwwhutenilh Yak'usda hubudayi cho unli whusaóotelts'ulh

²⁰ 'Et bulunah Pharisee, 'en Sizi hiyoodulhkut, "Nket'ah 'uwwhutenilh Yak'usda hubudayi cho unli whusaóotelts'ulh?" 'Et ndo búlhni, "Yak'usda hubudayi cho unli, 'aw nts'e na'a whusaóotelts'ulh, 'et 'aw whunóh'en ghaít'ah. ²¹ 'Aw 'ilhunuh whunts'ih dooni ghaít'ah, 'Njan whunulh'en 'et 'uhoont'ah, k'us, 'Nghah 'uhoont'ah.' 'Et Yak'usda hubudayicho unli 'uda nohwhulh 'uhoont'ah ho' hoont'ah." ²² 'Ink'ez 'et yugha hoodul'eh ndo búlhni, "Et hoh dzin whusaóotekulh 'ink'ez yinkak dune ye', 'ilhut dzin whuteh'ilh hukwa' ntehzilh, 'et whunts'ih 'aw hooch'en ghaít'ah. ²³ 'Et 'onghunnah dune 'en ndun núhwhudooni, "O 'un whunulh'en!' k'us 'Njan whunulh'en!' Khun hubuts'u toohdelh gunih 'ink'ez hubun toohdelh gunih! ²⁴ Nts'e na'a ditnik kwun 'oolhges teh ndulhcho hoh bé wheóodiltsih, 'et whuz na'a zeh yinkak dune ye', budzin t'eh ndulhcho hoh ts'iyannah ba be hooduteltsilh. ²⁵ 'Et whunts'ih 'udechoo lhat hoh dzuh nutezut huba' hoont'ah. 'Ink'ez k'an whudzulh

dune, 'en hikacha'uteszil. ²⁶ 'Et nts'e na'a Noah budzin whudezulh da, dahoont'ah inle, 'et whuz na'a zeh yinkak dune ye' dzin 'et ndo whútenilh. ²⁷ 'Et ts'iyannah 'uha'alh zeh 'uhut'en, 'ink'ez tahunutnai. Dune 'ink'ez ts'ekoo chah lhgho delhts'i. 'Ink'ez hoh da nts'e na'a Noah ts'i cho be inya 'ink'ez too hadámbun, 'et ts'iyannah too hubanghan. ²⁸ 'Ink'ez ndun Lot 'en khuna da whuz na'a 'et ndúhooja. 'Et ts'iyannah 'uha'alh zeh 'uhut'en 'ink'ez tahunutnai. 'Ohooket 'ink'ez 'e'hooket. 'A'hunule 'ink'ez koo 'uhuwuhul'en cha' hut'en. ²⁹ 'Et hoh da dzin Lot, 'en keyah Sodom huwhutni huwu whenaja hoh kwun 'ink'ez tse dez'kun, 'i ndus de yak'uz ts'ih naílhtan, 'ink'ez ts'iyawh hoolah hubulhtsi. ³⁰ 'Ink'ez ndet dzin 'uwhtenilh yinkak dune ye' be hóoduteltsilh, 'et whuz na'a ndó tenilh. ³¹ 'Et hoh dzin, ndun dune bukoo hukw'ut nalyis hoh, 'en 'aw koo natooja 'ink'ez bukoo ts'ih ye 'int'ah, 'i 'aw nayóolchoot gunih. 'Et whuz na'a zeh ndun dune ha'niyeh k'et 'ut'en, 'en bukoo ts'ih 'aw ye 'int'ah, 'i yukunaóoda gunih. Khun 'uwhténilh 'et huwa. ³² Lot, bu'at 'en bunalhúni! ³³ Ndan dich'oh ye khuna, 'et 'ududoolyih hukwa 'ut'en, 'en ye khuna, 'i tinta ité'alh. 'Ink'ez ndan dich'oh ye khuna tinta oon'ai t'eh, 'en 'udutelyih ho' int'ah. ³⁴ 'Et ndun whudusni ndez na'a njan nduwhútenilh, 'et 'ulh'ek nanah lhuk'i kw'usuti k'ut huztez. 'Ilhunuh 'en itélchhoh, 'ink'ez 'ilhunuh 'aw 'et ndutét'ilh. ³⁵ Nanah hite'alh, 'i hidunulhdzuz. 'Ilhunuh itélchhoh, 'ink'ez 'ilhunuh 'aw 'et ndutét'ilh. ³⁶ Nanah, 'en haníyeh k'et 'uhut'en. 'Ilhunuh itélchhoh, 'ink'ez 'ilhunuh 'aw 'et ndutét'ilh." ³⁷ 'Et hukwa hiyoodulhuktu, "NeMoodihti nts'e 'udini?" 'Ink'ez ndo búlhni, "Ndet neyust'e sula, 'et sbalyan 'ilhowútuwédulh."

18

Nuwheni 'ahoolhyez tenazdoodli 'ink'ez whulazdootnih gunih

¹ 'Et Sizi be whuts'odul'eh, 'i bugha ndo búlhni. 'Et ndez na'a whunehodulh'eh hoh njan ndutni, dune 'ahoolhyez tenazdoodli 'ink'ez 'et whulazdootnih gunih. ² 'Et ndo búlhni, "Et 'ilhun keyah, 'et ndun nahéyeh, 'en 'aw Yak'usda yé chanijlut, 'ink'ez dune ba 'ants'ih 'int'ah. ³ 'Et keyah zeh 'ilhunuh tsandelh, 'en 'ahoolhyez yugheyih 'ink'ez ndi yúlhni, 'Ndun such'a detni, dásinla suba ts'ah'un na'honleh!" ⁴ 'Et 'ast'iyaz whuts'un hooont'i hoh 'aw yoozólhts'a ghaít'ah. 'Et 'udek'elh'az na'dudútni, "Aw Yak'usda be chanuzulhújut 'ink'ez dune chah 'ants'ih suba hinli. ⁵ 'Et whunts'ih ndun tsandelh sdabe tesudule, 'et huwa buba ts'ah'un na'whutesdlilh, doo ka sih suk'a'doolhdzas!" ⁶ 'Ink'ez neMoodihti ndo búlhni, "Ndun nahéyeh ts'ah'un cha'it'ah, daja ni oozélhts'ai. ⁷ 'Et whuz na'a zeh k'us ndan Yak'usda budune, dzin 'ink'ez 'ulh'ek 'i bulh hits'u tedudlih, 'ink'ez soo hubulh whulh'ai. 'Aw hiyoozólhts'ai ghaít'ah nahzun ih? ⁸ 'Et 'un whudusni, 'a cho huba k'utetnih! 'Et whunts'ih yinkak dune ye' ndi yun k'ut whusanája t'eh, soo ih dune buba 'alha' hooont'ah naootéleh?"

Dahoont'ah huwa dune Yak'usda nalh ts'ah'un na'uja

⁹ Bulunah ts'ah'un na'a 'ust'ah na'hundunúdzun, 'ink'ez 'onghunnah, 'en hintsi' hubunínzun. 'Et huwa Sizi 'en ndi nawhutnuk 'i be whúts'odul'eh 'i be 'ubulh yalhtuk hoh njan ndo búlhni, ¹⁰ "Nanah dune Lizwif hubuluglez wucho tenahudutedli ka whuz wheha'az. 'Ilhunuh 'en Pharisee 'int'ah, 'ink'ez 'ilhunuh sooneya 'ilhunanowes'a'ih 'int'ah. ¹¹ 'Ndun Pharisee 'en dich'oh siyin 'ink'ez tenadudli hoh njan ndutni, 'Yak'usda suchana'ilya nyudusni. 'Aw 'uyoon dune dúlh nduchaust'ah. 'Uyoon 'en huwhilhtsi' sooneya be, 'en 'aw ts'ah'un cha'it'ahnah 'uhint'ah, 'ink'ez ts'ekoo k'us dune bulh tinta' ut'ihnah. 'Ink'ez ndun sooneya 'ilhunanowes'a'ih, 'en whunts'ih bunduchalhút'ah. ¹² Hukw'enilhghel 'et totsuk nat sahá'delhuya. 'Ink'ez ndai suba k'elha unli, 'i chah bulah, 10%, luglez huwas'a'ih, 'ni Pharisee. ¹³ 'Et ndun sooneya 'ilhunanowes'a'ih, 'en chah 'udun siyin. 'Aw nduk whunts'ih yutóo'eh ghaít'ah 'ink'ez yuk nelhú'ai. 'Ink'ez budzi k'ut hoolhchis, 'Yak'usda sugha te'ninze! Lubeshi 'ulh'en 'ust'ah, 'ni." ¹⁴ 'Et Sizi ndo búlhni, "Ndun whudusni ndun sooneya 'ilhunanowes'a'ih, 'en Yak'usda nalh ts'ah'un na'uja hoh bukoo ts'ih nanja. 'Et 'ilhunuh 'aw nduchainil. 'Et ndez na'a njan ndúhooont'ah, ndun duba nahúdzoo, 'en hooya yutelhtsilh. 'Ink'ez ndun yuk 'ududildzun, 'en Yak'usda nduk na'yutelilh."

Sizi 'uskehyaz huba tenadudli

¹⁵ 'Aw 'et 'uskehyaznah highih hininla khun sih buk'edoolnih ka. 'Et yugha hoodul'eh honilh'en hoh, 'Dah!' buhútni. ¹⁶ 'Et whunts'ih Sizi yugha hoodul'eh 'anih hubúlhni, "Whute 'uskehyaz suts'un toohdelh. Khun teh dah budoohni gunih. Ndunnah Yak'usda hubudayi cho unli whuz hudelhts'i, 'en ndunnah 'uskehyaz hubunduhúlt'ah ho' hint'ah. ¹⁷ 'Soo ts'ah'un 'alha 'ún whudusni, ndet Yak'usda hubudayi cho unli ts'ih, ndunnah Yak'usda hubudayi cho unli 'aw 'uskehyaz k'una'a chahuhóolhchulh t'eh, ndunnah 'aw whuz dahóoya ghaít'ah."

Dune soode'a, 'en daténilh hoh 'ilhuz khutenalh whuch'a ootéldhoh

¹⁸ 'Aw 'et 'ilhunuh dune moodih uncha 'en Sizi yoodulhkut, "Dune hoodulh'eh unzoo, nts'e na'a datesnilh hoh 'ilhuz khutesnalh whuch'a ootélhdoh?" ¹⁹ 'Et Sizi ndi yúlhni, "Di ka' sudini, nuszoo sudini? 'Aw 'ilhunuh unzoo hoolah. Yak'usda 'en zeh unzoo ho' 'int'ah. ²⁰ Ndai Yak'usda khunek dune butl'aida'ai, 'i t'eininzun. Khun teh ts'ekoo bulh tinta 'ooht'en gunih. Dune soolhghel' gunih. 'Undunooh't'ih gunih. 'Uyoon ba hohts'it gunih. Nuhwhé'aba 'ink'ez nuhwe'ama bulh budóolhti." ²¹ 'Et ndi yúlhni, "Nusol da whuts'un, ndi ts'iyawh buk'une' zust'en." ²² 'Et Sizi njan oozalhts'a hoh 'et ndi yúlhni, "Awhuz 'ilhunuh mba 'et whuz'ai. Ndai int'i, 'i ts'iyawh be 'ónket, 'ink'ez tel'ennah hubugha íyo'ah. 'Et sih nduk yak'uz dezti, 'i 'et mba téla. 'Ink'ez 'anih se'ut'en k'ah tune' ónt'en ka sunanyalh." ²³ 'Et whudánts'o hoh tube budzi yuk 'úja. Ndun dune tube soode'a 'int'ah 'et huwa. ²⁴ 'Et Sizi yunilh'en hoh ndun dune tube budzi nduda suli, 'et 'utni, "Ndunnah soo hude'a 'uhint'ah dahóolhcho huba howa whulna hoh Yak'usda hubudayi cho unli ts'un hutedulh. ²⁵ 'Et ndi khunai ncha, 'i camel hiyulhni, 'i buba howa whulna hoh ughabatsoo bulatah bukoní'a hukwutelgwulh. 'Et whuz na'a 'o nus howa whulna hoh ndunnah soo hude'a 'uhint'ah, 'en Yak'usda hubudayi cho unli dahútedulh." ²⁶ 'Et ndunnah hodants'o 'uhutni, "Ndan zeh simba doojih?" ²⁷ 'Et whunts'ih ndo búlhni, "Dune ndai bulh 'uhuhooléh ghaít'ah, 'et whunts'ih Yak'usda ba huwa chahoolnah ho' hoont'ah." ²⁸ 'Et Peter yatelhtuk hoh Sizi njan ndi yulhni, "Whunilh'en ndai ts'it'i, 'i ts'iyawh bulazdetnik 'ink'ez nye'ut'en k'ah ts'ih ts'oot'en ka nyuts'un tezdel." ²⁹ 'Ink'ez ndo búlhni, "Alha 'un whudúsní, ndet Yak'usda hubudayi cho unli, 'et huwa dune bukoo huwu tezya t'eh, k'us budusnekah, k'us dulhutsinkah teh, k'us bu'at, buzkeh chah, ndi ts'iyawh huwu tezya t'eh, ³⁰ 'et ndan 'et ndúja, 'en 'o nus lhat butl'anaóotedúkulh. 'Et nus de whusawhélt's'ut t'eh, 'et 'ilhuz khutena."

Sizi datetsah whulh tat huwu yatelhtuk

³¹ 'Aw 'et ndunnah lanezi 'o 'at nanah, 'en 'udun nibuninla 'ink'ez ndo búlhni, "Sih soo zulhts'ai, Jerusalem ts'ih ts'utedulh 'ink'ez yinkak dune ye', ndunnah nus whunilh'en, 'en bugha hik'e'anguz, 'i ts'iyawh lhawhudutenilh. ³² Lizwif 'udun yun k'ut whut'en butl'a'duteltelh. 'En highu notelyoh, 'ink'ez highu tedloh, 'ink'ez higha dútezoh. ³³ Hiyootelhtsus 'ink'ez hituzelghel. 'Et whulh tat dzin dinadutédalh." ³⁴ 'Ink'ez njan ndo búlhni, 'aw hubeni tachaóodulhts'it. Bughunek daja ni hubuch'a whuntest'i ho' hoont'ah. 'Aw daja ni ho' 'utni, 'aw t'ehonízun.

Dune chawhés'en, 'en Sizi whé'en nayulhtsi

³⁵ 'Et hukw'elh'az Sizi keyah Jericho wheghah uyalh hoh, dune chawhés'en, 'en ti whuzih usda, 'ink'ez dune ts'un datni. ³⁶ 'Et dune lhanah hoh wheghah hudulh hoh 'et hubuduzts'ai. 'Et ndo búlhni. "Et dawhut'en ho' whutni?" ³⁷ 'Et 'uhiyúlhni, "Sizi Nazareth whut'en 'en wheghah uyalh." ³⁸ 'Et hahuyih, "Sizi, David buts'ah hainzut, sugha te'nenzeh!" ³⁹ 'Et 'udetsah hedulh khunek ulhtus, 'i be, "T'eduzinih!" hiyúlhni. 'Et whunts'ih 'o nus 'ultus hoh hahuyih, "David buts'ah hainzut, sugha te'ninzeh!" ni. ⁴⁰ 'Et Sizi 'ilhuz nininya 'ink'ez dune chawhés'en duts'un hitoolhte hubúlhni. 'Et Sizi hizih nehinihlhti hoh yoodulhkut, ⁴¹ "Ndet mba 'uwhutesdlilh hukwa' ninzun?" "Moodihti doo chah whunulh'en nasilh'tsi!" ni. ⁴² 'Et Sizi ndi yúlhni, "Ho'en naoondle! Mba 'alha' 'ust'ah 'et huwa soo na'inja." ⁴³ 'Et 'ahoh whunilh'en nasldi, 'ink'ez Sizi yuntezya 'ink'ez Yak'usda délhti. 'Et ts'iyannah, njan 'et honalh'en, 'en chah ts'iyawh Yak'usda hudélhti.

19

Zacchaeus 'en chah dune hiye dujih, 'i bugha íyults'ut

¹ 'Et Sizi 'aw 'et Jericho ts'ih whutalhúséya. ² 'Ink'ez 'et 'ilhunuh dune 'en 'et usda, Zacchaeus hiyulhni. 'En sooneya 'ilhananowes'aih hubumoodih, 'ink'ez soode'a. ³ 'Ink'ez Sizi ndan 'int'ah yuntel'ih hukwa' ninzun. 'Et whunts'ih 'ilhanahuwédel, 'en bugha 'aw yoo'en ghaít'ah. Ndun dune tube ndukw 'et huwa. ⁴ 'Et butsuh telhgai 'ink'ez duchun, Sycamore hiyulhni, yuntel'ih ka, 'et hukwa 'i k'ut dugaiget. Whuz na'a Sizi hoh wheghah lhuteyalh. ⁵ 'Et Sizi 'et nininya, 'et nduk yútan'en hoh yutel'h'en, 'ink'ez ndi yúlhni. "Zacchaeus 'a cho k'an 'ahoh nanaíndaih! K'an dzin nkoo tesdahl huba' hoont'ah." ⁶ 'Et 'a cho nanája. 'Ink'ez hoont'i hoh bukoo ts'ih yughu nuséya. ⁷ 'Et ts'iyannah hinalh'en hoh whuts'uh destni, 'ink'ez howa yahalhtuk hoh 'ulhódutni, "Ndun lubeshi 'ulh'en, 'en yukoo tedalh." ⁸ 'Et whunts'ih Zacchaeus didinya 'ink'ez Moodihti ndi yúlhni, "SMoodihti whunilh'en, ndai ust'i, 'i ts'iyawh lhulcho tehel'en hubugha itésdleh. 'Ink'ez ndunnah hubuts'un whuts'it, 'en dit 'et 'uneltsuk, 'i hubutl'anaítes'ah." ⁹ 'Et Sizi ndi yúlhni, "K'an dzin dune hiye dujih, 'i hoh njan bukoo hudelhts'i hubugha íyults'ut. Ndun 'en chah Abraham yuts'uh hainzut ho' 'int'ah 'et huwa. ¹⁰ 'Alha ndunnah tinta huninkat, 'en yinkak dune ye', 'en hubukúnteta 'ink'ez hubutelhyih ka, 'et whuba whusainya."

Ndi khunek be whuts'odul'eh, 'i be t'ezninzun neMoodihti whusanátedalh whuts'un, ndez na'a ndi yun k'ut uzdoóls'i

¹¹ 'Et njan hidants'o hoh ndai 'uyoo khunek be whúts'odul'eh, 'i be hubulh yawhenílhuk. Jerusalem wheghah hedulh 'ink'ez ts'iyannah 'uhuninzun ndet Yak'usda hubudayi cho unli, 'aw 'et soo 'ahoh wheóoduteltsilh huninzun. ¹² 'Et huwa ndez na'a ndo búlhni, 'Ílhunuh dune ncha, 'en nilhdza keyah ts'ih teyalh. 'Et whuz ninya t'eh, 'et hoo nts'e z de dukeyah ts'ih hainya, 'et whuz hubudayi cho hitelhtsilh. 'Ink'ez dukeyah ts'ih nátedalh. ¹³ Teyalh whutsuh lanezi dude 'ulhna 'anih hubudani. 'Ink'ez ilhughun hinli hoh sooneya dezti, 'i 'ílhuk'i hoh butl'aína'ai, 'ink'ez ndo búlhni, 'Whusanátedalh whuts'un be 'óoh't'en 'ink'ez be 'ahóhleh.' ¹⁴ 'Et whunts'ih bulh keyah whut'en hika cha'nizil. 'Et whinya hukw'elh'az 'ahoh njan keyah whudune, 'en bulunah 'utahaóobahanla, 'en keyah whunat whuz whebahalh'a huba yahutelhtuk ka, 'Aw ndun dune 'aw nedayi cho wule hukwa cha'uznizun, hutni. ¹⁵ 'Et ndun dune hubudayi cho suli hoh whusanája, 'et ndunnah dude 'ulhna, ndunnah sooneya hubutl'aín'ai, 'en 'anih hubúlhni. 'Ílhunah hinli hoh daltsuk hiba inla 'et nahooté'ali hukwa' ninzun. ¹⁶ 'Et 'udechoo yughu ninya 'ink'ez ndi yúlhni, 'SMoodih ndi sooneya dezti, 'i suzih nini'ai, 'i be lanezi 'uneltsuk, 'i be mba 'usdla.' ¹⁷ 'Ink'ez ndi yúlhni, 'Se'ulhna, tube soo 'ínja! Ntsolyaz ntl'anádzai, 'i ts'ah'un na'a be ne'zint'en. 'Et huwa lanezi keyah whuti whumoodih tanleh 'et ntl'ahó'ai.' ¹⁸ 'Et bulh naneh whusainya 'ink'ez ndi yúlhni, 'SMoodih nzooneya dezti, 'i suzih nine'ai, 'i be skwunlat 'uneltsuk, 'i be mba 'usdla, yúlhni. ¹⁹ 'Et ndun ndi yúlhni, "Et huwa nyun chah skwunlat keyah whuti whumoodih tanleh, 'et ntl'ahó'ai." ²⁰ 'Et 'uyoon chah yughu ninya 'ink'ez ndi yúlhni, 'SMoodih soo zelhts'ai. Nah njan nzooneya dezti, 'i suzih neni'ai. 'I dzezoh be be' lhasilhchuz 'ink'ez 'et mba nine'ai. ²¹ 'Aw dune gha te'ninzun chaínlah t'enyunúszun, 'et huwa nyenlhújut. Ndi nye'ildzun chailah, 'i whunts'ih nailchukw. Ndi hachanilel, 'i whunts'ih hanínle,' yúlhni. ²² 'Et ndi yúlhni, 'Nyunch'oh nzek hoh dája dini, 'et hoh mba nahutesyih. Se'ulhna intsi, 'aw huba inzoo hoolah. T'eeoninzun dant'ah dune usdli. Ndi 'ílhuchaghuzus'ai 'i whunts'ih 'ulhchukw. 'Ink'ez ndai hachaznílel, 'i whunts'ih hanúsdlih 'ink'ez be sooneya 'ulh'en. ²³ 'Et hoh da di ka ndunnah sooneya lhk'enanduna'aih suzooneya 'en butl'achayi'al? 'Et t'eh da, whusanásja t'eh, 'o 'un be 'ahósdleh?" ²⁴ 'Et t'eh 'onghah nadelhúya ndo búlhni, 'Ndi sooneya dezti, 'i bugha nailhúchoot. 'Ink'ez ndun lanezi 'inla, 'en bugha ínah'aih.' ²⁵ 'Et whunts'ih 'uhiyulhni, 'Moodih 'uda 'aw 'et lanezi ut'i. ²⁶ 'Et ndun hubudayi cho 'en 'utni, 'Ndunnah hoonliyaz hit'i, 'en 'o 'un lhái bugha itét'alh. 'Ink'ez ndan hoonliyaz chait'ih, ndai 'aw 'i yut'i, 'i whunts'ih bugha nayutéhchulh. ²⁷ 'Et ndunnah such'a hudetni 'en, sukacha'humízun hoh hubudayi cho tesdle, 'en ts'iyawh sábahle 'ink'ez soo subut 'et hubahghan."

Yak'usda hudelhti hoh keyah Jerusalem hunindel

²⁸ 'Et ndo hubudani hukw'elh'az Sizi Jerusalem ts'ih hutezdel hoh hubutsuh tezya. ²⁹ 'Aw 'et dzulhyaz, Olive hiyulhni, 'et keyah whuyaz Bethphage 'ink'ez Bethany huwhutni dzulhyaz zih whuzdla. 'Et dzulhyaz wheghah hedulh hoh nanah yugha hoodul'eh hubutélh'a. ³⁰ 'Ink'ez 'utni, "Keyah wheyaz nuhghanch'az ts'ih whuz ah'us. 'Aw 'et keyah wheyaz nenah'az t'eh, 'et 'ílhunuh yeztliyaz, donkey hiyúlhni, whédint'uk, 'i 'aw whutsuh da 'awhuz dune yuk'uchaídúh, 'i teh'ílh. 'Ílhk'unadóoh'uk 'ink'ez ndez tóolhlooh. ³¹ 'Et dune nuhuhóodulhukut t'eh, 'et dant'i ka 'ulh'en lhk'unaduh'uk? 'Et njan ndúdoohni, neMoodihti yuka' ninzun." ³² 'Et ndunnah whebalh'a whuz lghuhudi'az hoh, soo nts'e na'a dája ni, 'et whuz na'a nahuhoo'ai. ³³ 'Aw 'et ndi yeztliyaz lhk'unaidú'uk hoh ndunnah hubube'ildzun, 'en 'uhútni, "Ndi yeztliyaz dant'i ka 'ulh'en lhk'unaduh'uk?" ³⁴ 'Ink'ez 'et ndo buhútni, "NeMoodihti yuka' ninzun." ³⁵ 'Aw 'et Sizi highu hinílhdlukw. 'Ink'ez dich'oh dunaih yeztliyaz hik'éhiyinla, 'ink'ez Sizi hik'éhiyilhti. ³⁶ 'Aw 'et tezya hoh ti yun dunaih hiba nehíyuzbuz. ³⁷ 'Aw 'et njan dzulhyaz, Olive hiyúlhni, 'aw 'et wheduhándel hoh 'et huwu nilhduk'w hoh, 'et lhanah yugha hoodul'eh huhóost'et. 'Et ndet huwa 'ét'en tune'ust'en 'et honalh'en, 'et huwa soo tube cho Yak'usda hidélhti. ³⁸ 'Ink'ez 'uhutni, "Hubudayi cho 'en Moodihti boozí be whusainya, 'en degna nuh hoonzoo bugha whults'ut! Nduk yak'uz 'et soo whudutéghel, 'ink'ez 'et soo dugha ndoh 'et k'us whudutéti."

³⁹ 'Et bulunah Pharisee hubutah hits'un hahúyih, "Dune hoodulh'eh, ndunnah nye hóodul'eh, 'en hukwa' hubudini!" ⁴⁰ 'Et whunts'ih ndo búlhni, "Ndun whudusni, njan t'ewhuhudusnih t'eh, tse 'i whunts'ih da 'ahoh yatooldih."

Jerusalem whut'en hubulh dawhutenílh, 'et huwa Sizi howintse

⁴¹ 'Et keyah whuti wheghah uyalh, 'et Jerusalem whutell'en hoh howintse. ⁴² 'Ink'ez 'et ndutni, "Nuhwheni Jerusalem whut'en, nuhwheni whunts'ih, k'an dzin soo cho uncha t'eeonahzun nuhdzin 'uhoont'ah. 'Et huwa da t'eeonóhzin nts'e na'a hoh nuhwhaba whudutéghel. 'Et whunts'ih k'an whuts'un nuhna ch'a whuntést'i. ⁴³ 'Et hoh t'eh dzin whusawhutelts'ulh ndet nuhch'a detni, 'en nuhna'hutegus. 'Ink'ez lhez lhk'ehitelhukulh

nuhnát ndulhcho hoh, 'ink'ez whez ts'ih nuhuhootetun. ⁴⁴ 'Ink'ez njan keyah whuti lhk'unahuhootéllhkuh. 'Ink'ez ndunnah whez ts'ih hudelhts'i, 'en chah ts'iyawh hubulh 'uwuhútenilh. 'Aw 'ilho tse lhk'udez'ai, 'i nuhwhuba 'et nenacháidutes'al. Nts'oh huwa whudezuhl 'uhooja nuhulyis nuhts'un whusateyalh, 'aw t'echaonáhzil, 'et huwa whuz na'a 'uwuhútenilh."

Luglez whucho ts'ih 'uhóoket 'ink'ez 'é'hooket, 'en ts'iyawh Sizi tinaóobunenyoot

⁴⁵ 'Et luglez whucho whuna'nesdut'oo daninya 'ink'ez 'uhooket 'ink'ez 'é'hooket, 'en ts'iyawh tinaóobunenyoot. ⁴⁶ 'Ink'ez ndo búlhni, "Uk'e'eduguz ho' njan ndutni, 'Sukoo 'et tenadudli bakoo 'úhooht'ah.' 'Et whunts'ih 'et chah njan ndutni, "Uhundunut'ih bakoo whuzúhtsi." ⁴⁷ 'Ink'ez 'et nyooz luglez whucho dzin totsuk dune hubodulh'eh. 'Et whunts'ih soo nawhulnuk dega nus dézti, 'ink'ez Moses be' dustl'us 'uk'ununa'úsduzug, 'ink'ez dune tsuh whudelhdzuhl chah, ts'iyawh nts'e na'a hituzelghelhel 'et hukwa hités'en. ⁴⁸ 'Et whunts'ih 'ilhunahuwédel, ts'iyawh hinat nodelhúya 'ink'ez soo cho hiyoozéhts'ai. 'Et huwa 'aw ndunnah hizoolghelhel ghaít'ah.

20

Sizi ndai bugha dune bugha ndoh 'int'ah, 'et hukwa hoodulhkut

¹ 'Et hoh da 'et 'ilhudzin ndez na'a 'et ndúhooja. Luglez whucho Sizi dune hoodulh'eh hoh khunek unzo, 'i be hubulh yalhtuk hoh nawhulnuk dega nus dézti, 'ink'ez Moses be' dustl'us 'uk'ununa'úsduzug chah, 'ink'ez ts'iyannah dune netsuh whudelhdzuhl, 'en khunek be hik'udughainya. ² 'Ink'ez 'uhiyúlhni, "Nedini ndai bugha dune bugha ndoh 'int'ah hoh ndi 'ut'en oowaghina? K'us ndan nt'ahón'ai hoh 'udini?" ³ 'Et whunts'ih ndo búlhni, "Si chah 'ilhunuh hukwa nuhoodutelhkut, 'et úsdáhni, ⁴ nts'e na'a John dune too be 'úlh'en? Ndan yut'aho'ai dune too be telh'ilh huba? Yak'uz ts'ih tulih hawhélt'sut, k'us ndi yun k'ut dune tulih ts'ih hawhélt'sut?" ⁵ Dich'oh lhtah howu yahalhtuk 'ink'ez 'ulhadutni, "Et yak'uz whuts'un tulih hawhélt'sut ts'utni t'eh, 'Et di ka John nuhwhuba 'alha' cha'dusnih, nedóni. ⁶ 'Et whunts'ih dune ts'ih hawhélt'sut, ts'utni t'eh, 'et dune ts'iyannah tse be nehooghan. John 'en nus whunilh'en 'int'ah 'et huba 'alha 'uhooht'ah 'et huwa." ⁷ 'Et Sizi ndi hiyulhni, "Aw nts'ez de hawhélt'sut t'ets'onizun." ⁸ 'Ink'ez Sizi ndo búlhni, "Ndaí be dune bugha ndoh 'ust'ah hoh ndi njan nduwhúlh'en, 'et si chah 'aw nuhwhudóosni ghaít'ah."

Mai haníyeh k'et whulh'ai bugha whuts'odul'eh

⁹ 'Aw 'et 'uyoo khunek be whúts'odul'eh, 'i be hubulh yawhénilhtuk hoh njan ndutni, "Ilhunuh dune haníyeh k'et mai too mai 'ananla. 'En njan haníyeh k'et ndunnah há' nulhyeh bughu whulh'ai, 'ink'ez sa whuts'un nilhdza keyah ts'ih whinya. ¹⁰ 'Aw 'et mai oonteje néwhuninzut hoh 'ilhunuh 'ulhna hubuts'ú whoyalh'a. 'Et ndai mai but's'itekulh, 'i bulah higha ínoodzaih. 'Et whunts'ih ndunnah haníyeh k'et bughu whulh'ai, ndun 'ulhna yahíyalhchus 'ink'ez, whenáhinanyoot. ¹¹ 'Et doo chah 'uyoon 'ulhna but's'ú whel'h'a. 'En chah yahíyalhchus, 'ink'ez hooya hiyulhtsi, 'ink'ez 'en chah, whenáhinanyoot. ¹² 'Et búlh tanah dude 'ust'en but's'ú whel'h'a. 'En chah nukai hiyulhtsi 'ink'ez tináhinino. ¹³ 'Et haníyeh k'et whut'i 'utni, 'Daosneh chah simba? Sich'oh suye' buk'esi', 'en but's'ítoolh'a. 'En tulih hiyan'en t'eh, 'int'ah k'unana né'hiyoolh'en,' ni. ¹⁴ 'Et whunts'ih ndunnah bughu whulh'ai hítel'h'en hoh 'et 'ulhóodutni, 'Ndu' 'en nyoo haníyeh k'et bube'ildzun 'en bue'út'en. Ts'uzoolghelhel! 'Et t'eh ndet but's'ó telts'ulh ts'iyawh 'et ndúwhulcho hoh nets'ó toolts'it.' ¹⁵ 'Et njan haníyeh k'et tináhinino 'ink'ez hizelghí. 'Et huwa soo cho 'ún whudusni, ndan haníyeh k'et bube'ildzun hoonli, dabóoleh simba? ¹⁶ Ndez na'a njan dutenilh, whusanátedal 'ink'ez ndunnah mai k'et bughu whulh'ai, 'en ts'iyawh hoolah hubutelhtsilh. 'Ink'ez bumai haníyeh k'et 'uyoon, 'en bugha íte'ah." 'Et dune hohodánts'o hoh 'uhutni, "Aw uncha 'et nduchahóonil!" ¹⁷ 'Et Sizi hubunilh'en 'ink'ez 'utni, "Ndi Yak'usda bughunek daja ni hoh 'uk'e'eduguz, 'Ndi tse koo 'uwuhulh'en 'ún hidutelh'uz,

'i koo huk'uwuhz'ai huba soo dega nus tse 'int'ah, 'i suli.'

¹⁸ Ndunnah ndi tse hik'elts'ut, 'en ts'iyawh yahutelkulh. 'Ink'ez ndunnah ndi tse buk'édilts'ut, ts'iyawh hoolah hutele." ¹⁹ Ndunnah Lizwif náwhulnuk bumoodih, 'ink'ez ndunnah Moses be' dustl'us 'uk'ununa'úsduzug, 'en chah, 'et soo 'et dzeh 'uhunet'oh, 'en Sizi hiyólhchoot hukwa' hut'en. 'Et whunts'ih ndunnah dune hubé hunuljut 'et hubugha 'aw 'uhooneh ghaít'ah. T'ehonizun ndi khunek bé whuts'odul'eh, 'i be didut chah'a yalhtuk hoh 'utni 'et huwa.

Yun k'elha huhoohl'i hukwa' hoodulhkut

²⁰ 'Ink'ez highunli, 'ink'ez ts'ah'un 'int'ah na'dudil'i nunúl'i, 'en hits'un whehíyahl'a. 'En khun teh Sizi ye yalhtuk, 'i bugha hiyoolhgooh. 'Et t'eh yun k'ut whut'en bu-moodih yutl'ahiyoolhtelh. 'En 'int'ah hoolhtus tune'út'en ne'ut'en, 'ink'ez ts'iyannah k'une'ul'en. ²¹ 'Et nunúl'i hiyoodulhukut, "Whunehodulh'eh t'ets'oninzun ts'ah'un na'a yayilhtuk. Ts'iyannah mba lhgha 'int'ah. 'Et ts'ah'un na'a Yak'usda k'una'a dune hodilh'eh. ²² Nedini ndi yun hik'elha hiyilh'i, 'i tax hiyúlhni, 'i 'et ts'ah'un tulih 'uhoot'ah hoh hubudayi cho Caesar 'en buba k'elha ts'uyoolhtsilh, k'us 'awundooh tulih?" ²³ 'Et whunts'ih Sizi t'ooninzun 'aonilhka 'uhutni. 'Ink'ez ndo búlhni, "Di ka sóolhdzih? ²⁴ De' nusooneya sunalhts'et nah'a! Ndan bunen 'ink'ez boozhi chah 'uk'une'úsduguz?" 'Et 'uhiyúlhni, "Hubudayi cho Caesar 'int'ah." ²⁵ 'Et Sizi 'utni, "Et huwa ndai hubudayi cho Caesar bube'ildzun, 'i butl'anáyahle. 'Ink'ez ndai Yak'usda bube'ildzun, 'i chah Yak'usda t'anáhle." ²⁶ Ndai khunek be dune hubulh yayilhtuk, 'i bugha 'aw huyoolhgooh ghaít'ah. 'Et njan ts'iyannah nalh hubudáni hoh tube huba hooncha sulí, 'ink'ez ndunnah nunúl'i, 'en ts'iyawh t'ehudíníli.

Sizi dinadutédalh bugha hiyoodulhukut

²⁷ 'Et bulunah Saducee Sizi highu nindel. 'En 'uhutni dats'úzsai 'ink'ez 'aw nats'ukhóotnah ghaít'ah. 'Ink'ez hiyoodulhukut, ²⁸ "Dune hoodulh'eh njan Moses daztet'ilh neba 'uk'e'anguz ho' hoot'ah. 'Et 'ilhunuh dune buzkeh hoolah hoh dazsai 'ink'ez bu'at khuna t'eh, ndun dune bulhutsin 'en dughe inle yughu naooda huba' hoot'ah. 'Ink'ez bubuzkeh whúzdli t'eh, 'et ndunnah buzkeh ndan dazsai, 'en boozhi hiyóolhchoot huba' hoot'ah. ²⁹ 'Et 'uhoot'ah skwunlat 'o 'at nanah lhulhutsinkah hoonli. 'En 'udetsah whudelhdzulh, 'en 'at ut'i. 'Ink'ez 'aw buzkeh hoolah hoh dazsai. ³⁰ 'Et bulh nánah 'en ndun ts'eke yughu nasda. 'En chah ndun dune buzkeh hoolah hoh dazsai. ³¹ 'Et bulh tanah, 'en chah yughu nasda. 'Et whuz na'a zeh ts'iyawh skwunlat 'o 'at nanah 'en ts'iyawh ndun ts'eke highu dált'si. 'Ink'ez ts'iyawh bubuzkeh chahóolel hoh yahadla. ³² 'Et 'udek'elh'az ndun ts'eke 'en chah dazsai. ³³ 'Et ndet dune dinadidel t'eh, ndun ts'eke ndan bu'at tele? Ndunnah skwunlat 'o 'at nanah, 'en ts'iyawh ndun ts'eke 'en hubughinda 'et huwa." ³⁴ 'Et Sizi ndo búlhni, "Dune 'ink'ez ts'eekoo teh ndi yun k'ut ts'iyawh lhgho delhts'i. ³⁵ 'Et ndet hoh t'eh whusawhútelts'ulh hoh ndunnah Yak'usda ba hoonzoo hoh bughá whults'ut yaidla tah dinahudutédulh 'ink'ez yak'uz hutedulh. Whuz 'aw dune lhghu chadílts'ih ho' hoot'ah. ³⁶ 'Aw doo chah yahódlah ghaít'ah. 'En Yak'usda buzkeh huzdli 'ink'ez lizas hubulh lhgha 'uhint'ah. 'En hudujih 'uhint'ah. ³⁷ 'Ink'ez Moses 'en ts'ah'un newhuni'ai yaidla dinahudutédulh ho' hoot'ah. 'Et hoh da njan dahooja 'ut'an delhtan, 'i tah whudezk'un 'et whunts'ih 'aw whudóok'un ghaít'ah. 'En Moodihti ghu yalhtuk hoh njan ndutni, 'Abraham buYak'usda, Isaac chah buYak'usda, 'ink'ez Jacob chah buYak'usda 'int'ah,' ni. ³⁸ Nuhwheni 'uts'un na'a 'unahzun. 'Aw yahadla hubuYak'usda chaillah, hukhuna hubuYak'usda 'int'ah. Soo cho whunulh'en, 'en be ts'iyannah hukhutena." ³⁹ 'Ink'ez bulunah Moses be' dustl'us 'uk'ununa'úsduguz 'uhiyúlhni, "Dune hoodulh'eh tube soo' denja!" ⁴⁰ 'Et whehunelhújoot k'et 'aw 'o 'un hiyoodulhukut ghaít'ah.

Nts'e na'a Christ 'en David yuts'a hainzut 'int'ah?

⁴¹ 'Ink'ez ndo búlhni, "Nts'e na'a bulunah nduhútni, Christ dahni, 'en David yuts'a hainzut 'int'ah?" ⁴² David dich'oh 'et ndutni njan Yak'usda bughunek Shun be' dustl'us k'ut, 'Moodihti 'en SMoodihti ndi yúlhni,

Sunailhni ts'ih sinda,

⁴³ hoh t'eh nch'a hudetni, 'en hubuk'ut nke naóolhyis mba huboolhtsilh.'

⁴⁴ 'Et huwa David, 'SMoodihti,' yulhni, nts'e na'a simba Christ 'en yuts'un hainzut wule?"

Sizi dune ndo búlhni, "Moses bughunek 'uk'ununa'úsduguz buch'a kháhdi"

⁴⁵ 'Et ts'iyannah dune huyoozelhts'ai hoh Sizi yugha hoodul'eh 'et ndo búlhni, ⁴⁶ "Moses be' dustl'us 'uk'ununa'úsduguz, 'en nailh nyiz, 'i be húdelhts'i, 'ink'ez ndet ts'uuyi, 'i be 'óoket, 'et ts'iyannah hubodélti hoh dahooja buhútni, 'et huhóont'i. 'Ink'ez Lizwif hubuluglez soo k'us hoonzoo hudutélts'ilh hukwa' huninzun. 'Ink'ez dune ghnunuda, soo k'us hoonzoo huteda huka' huninzun. 'Et ndunt'ah soo cho buka tsi hoohlí! ⁴⁷ 'En 'uhint'ah tsandelh bukoo hubugha ha'hudument'ah 'ink'ez bughu huhoohlchukw. 'Ink'ez 'aonilhka sa cho tenahududli huhoohl'i. Ndunnah, 'en 'o nus 'uwulcho hoh huba nahutedeh."

21

Tsandelh tel'en, ndai huwa iné'ai, 'i

¹ 'Et doo chah nyoh yutá'en hoh ndunnah soode'a 'uhint'ah ndai sooneya howa híte'alh, 'en sooneya bé kat, 'i be hína'aih, 'et hubunilh'en. ² 'Ink'ez 'ilhunuh tsandelh tel'en, 'en ndai 'aw 'iyaz yit'i, 'i nankoh sooneya chaditi, 'i dená'aih. ³ 'Ink'ez ndo búlhni, "Alha 'ún whudusni, ndun tsandelh tel'en, ndunnah ts'iyawh huba 'o nus lhái dená'aih ho' 'int'ah.

⁴ Soo cho whunulh'en, ndunnah soode'a 'uhint'ah ndai lhai hiyít'i, 'i Yak'usda ba hilah zeh dehína'aih. 'Et ndun tsandelh tel'en 'aw 'i yuk'ehútenalh, 'i ts'iyawh dená'aih."

Njan luglez whucho hoolah whutéle, 'et Sizi huwu yalhtuk

⁵ 'Et bulunah 'aw 'et luglez whucho howu yahalhtuk 'ink'ez 'uhútni, "Lhe'whuldzoo tse lhe'ildzoo 'i be 'uhoolya. 'Ink'ez Yak'usda bugha t'aih 'i chah 'i be 'uhoolya." 'Et Sizi ndo búlhni, ⁶ "Ndaí ndi ts'iyawh nulh'en, 'et njan whusawhútelts'ut t'eh 'aw lhuk'i tse lnh'uchadutésdlal, ts'iyawh nadúntejullh ho' hoont'ah."

Nket'ah 'uwhuténilh?

⁷ 'Ink'ez hiyoodulhukut, "Whuneoodulh'eh, nts'oht'ah 'uwhuténilh? 'Ink'ez 'aw 'et nilhduk'w sulí t'eh, dant'i be wheóoduteltsilh, 'i be t'ewhuntehze?" ⁸ 'Ink'ez ndo búlhni, "Soo cho howahli. Khun teh dune nanohonoo'ah gunih. Lhanah soozi bugha whusahútedulh 'ink'ez 'uhudutenilh, 'Si 'en 'ust'ah,' 'ink'ez 'aw 'et whusawhútekuhl, hutni t'eh, khun teh hubuntoohya gunih. ⁹ Dune nehugan whulh 'úduzahts'ai t'eh, 'ink'ez dune lhulhulhyah nehóninla t'eh, njan 'et 'udechoh whusawhútekuhl ho' hoont'ah. Khun teh whéonoolhujut gunih. 'Awhuz whulatah, 'aw wheghah ilah 'uhoont'ah." ¹⁰ 'Et ndo búlhni, "Lhulhyoo dédowh, 'en lhch'a nehúdatedulh. 'Ink'ez yinkak ndulhcho hubudayi cho be 'ustl'en, 'en chah lhch'a nehúdatedulh. ¹¹ Lhelhdun, 'et chah ndulhcho hoh wheóonujut yun nutughétnah. 'Ink'ez dai chah 'ink'ez lhanah lhelhdun chah dada whutéleh. 'Et nduk yat'ah dune wheonujut hote'ilh, 'ink'ez hooncha hoh be wheóoduteltsilh chah hote'ilh. ¹² 'Et nduwhtútenilh whutsuh, 'et nanwhútelcholh 'ink'ez dzuh nunóhotelhdeh. Lizwif hubuluglez whumoodih, 'en butl'anóhotelehl 'ink'ez tsak'e nohotelehl. 'Ink'ez hubudayi cho 'ink'ez yun humoodih, si soozí bugha 'en hububut ninuhotelehl. ¹³ 'Et t'eh si sugha khunek unzoo, 'i be yatelhtuk. ¹⁴ 'Et hoh t'eh, 'Daja doosni simba,' noohzin gunih. ¹⁵ Khunek 'ink'ez be wháhnih, 'i nuhtl'adutes'alh. 'Et sih ndunnah nuhch'a hudetni, 'en 'aw nuhts'ooohodódlai ghaít'ah. 'Aw 'et buch'a' nilhde 'ink'ez 'aw 'o 'un hoonliyaz 'uhudooni ghaít'ah. ¹⁶ 'Ink'ez nuhwulhudsnekah, 'ink'ez nuhwulhutsinkah, 'ink'ez nuhwulhutsinkah, 'ink'ez nuhwulhdunekah, 'en whutl'anóhotelehl 'ink'ez bulunah nuhtah nuhoteghan. ¹⁷ 'Ink'ez si soozí bugha ts'iyannah nuhts'u dutetnik. ¹⁸ 'Et whunts'ih Yak'usda 'aw nuhla dootmih ghaít'ah. Nuhtsigha 'aw lhuk'i whunts'ih tinta dóokes ghaít'ah. ¹⁹ Yak'usda ba soo cho bulh nudelhúya. 'I bugha nuhzul óhtun.

Jerusalem hoolah whutelhtsilh

²⁰ "Ndet Jerusalem nehugan whuna'húsduguz, 'et whunulh'en t'eh, 'et huwa t'oonoozhze 'aw 'et nilhduk'w sulí njan keyah whuti hoolah whutelhtsilh. ²¹ 'Et ndúhooja t'eh, 'et Judea whut'en dzulhyaz k'uz ts'ih hutoohlhelh. 'Ink'ez ndunnah 'et keyah whuti 'et hudelhts'i, ts'iyawh whuch'a hóodelh. 'Ink'ez ndunnah whunan huwhut'i, 'en chah khun teh keyah whuti ts'ih hutoooya gunih. ²² 'Alha 'un whudusni 'aw 'et dzuh nutehzut whusawhutelts'ulh ho' hoont'ah. 'Et hubugha 'uk'e wheduguz, 'et ts'iyawh lhaóodutenilh. ²³ 'Et hoh dzin ndunnah hélchan chah, 'ink'ez ndunnah hubuzkeh 'e'últ'ukw chah, 'en huba tube 'o nus whutés'i. Ndi yun hoonstsi' buk'e whudutelts'ulh 'et huwa. 'Ink'ez tube Yak'usda ye húnilch'e, 'i chah ndunnah dune hubuk'eidutelts'ulh. ²⁴ 'Et bulunah soh cho buk'a be ts'iyawh hudutedúghan. 'Ink'ez 'onghunnah hitélhcholh 'ink'ez lhelhdun keyah ts'ih hubotelhna. 'Ink'ez 'udun yun k'ut whut'en, huba ni'unduguz, 'et whuts'un, Jerusalem 'et nduhóolhcho hoh hukw'unátedulh.

Yinkak dune ye' whusanátedal

²⁵ "Sa, 'ink'ez 'ulh'ek oozá, 'ink'ez sum chah, 'i ts'iyawh hoonliyaz 'i be hóoduteltsilh. 'Et ndi yun k'ut ndulhcho hoh lhenyoonah dune, 'en ts'iyawh tube dzuh natedeh 'aw dahútenilh ts'iyawh t'ehonizun. Hoh t'eh yatoo 'i chah tatsi tadetnik hoh taba ndulhcho yánteghus. ²⁶ Ndi yun k'ut daóotenilh hukwa tsi húhooli 'ink'ez whehunuljut k'et, bulunah budzi 'ustl'e' utenilh. Nduk yat'ah ts'ih be hóolhtus, 'i ts'iyawh ndulhcho nuhówutughetnah 'et huwa. ²⁷ 'Et t'eh, yinkak dune ye' kw'us tah ye últus, 'i be 'ink'ez buts'uh hayánduz, 'i chah, 'et whuz na'a hiyuntel'ih hoh whusatéyah. ²⁸ 'Et ndez na'a njan nduwheóonit'en t'eh, nduk yutooh'en 'ink'ez whunoolhnik. Lubeshi buch'a nanhóotekulh 'aw 'et niooninzut sulí 'et huwa."

Mai cho chun, fig hiyúlhni, 'i bugha whúts'odul'eh

²⁹ 'Et be náwhutnuk 'i be whuts'odul'eh 'i be hubulh yalhtuk hoh njan ndo búlhni, "Ndi fig hiyulhni buduchun 'ink'ez 'uyoo duchun chah nulh'en. ³⁰ Bindak 'aw 'et hawhenilh'az 'i bugha t'oonohzin dain 'aw 'et nilhduk'w ho' hoont'ah. ³¹ 'Et nuhwheni chah whuz na'a nuhnalh 'et nduwhtúten t'eh, 'et huwa t'oonoozhze nts'e na'a hoh Yak'usda hubudayi cho unli 'aw 'et nilhduk'w ho' hoont'ah. ³² 'Alha ts'ah'un na'a 'ún whudusni, k'an njan whudezulh, 'en 'aw yachahutésdla 'et njan ndótenilh ts'iyawh 'et lhawhúdutenilh 'et

whuts'un. ³³Yat'ah 'ink'ez ndi yun k'ut 'i chah hoolah whutéleh, 'et whunts'ih ndi sughunek 'aw hoolah chatesdle.

Soo cho khaadli

³⁴"Et whunts'ih soo cho khaadli. Khun teh stabe zoodulhu'i, 'ink'ez tanahtnai, 'ink'ez ndi yun k'ut hooni 'et zeh huwu nuni nahzut, ndi ts'iyawh 'i be nuhndzi be whudoobun gunih. Doo ka si 'et dzin soo hukwa tsi chawhahlil 'et whusawhútelts'ulh. ³⁵Hoh t'eh, ndi yun k'ut ndulhcho hoh whudune lhugoo li'hutenilil whuz na'a khun whusaóotelts'ulh. ³⁶'Et huwa 'ahoolhyez hukwa tsi hóohli 'ink'ez nts'oh whute daóotenilil nuh'et 'uwhtuténilil huba soo 'ulhúdzoo 'ink'ez yinkak dune ye' 'en bubut tehyin, 'et huba tenadoohdli." ³⁷'Aw 'et dzin totsuk Sizi luglez whucho dune hubodulh'eh. 'Ink'ez hulhgha totsuk ndoh dzulhyaz, Olive huwhútni, 'et whuz whenádaih, tetelh ka. ³⁸'Et ts'iyannah soo 'uda cho luglez whucho dahúdulh hiyootuzélhts'ilh ka.

22

Sizi whu'ízyaz hikinúta hituzelghel ka

¹'Aw 'et ndi lhes nachantulhúdoh, 'i nahitet'ulh, 'aw 'et wheghah whezulh. 'Et Hubutus Lhuseya dzin huwhútni. ²'Ink'ez ndunnah nawhulnuk degha nus dézti, 'ink'ez Moses be' dustl'us 'uk'ununa'úsduzug, 'en Sizi hituzilghel, 'et hukwánuta. 'Et dune hube hunuljut 'et huwa nonut'i be né'hut'en. ³'Ink'ez Satan, 'en Judas ye ghínya. 'En 'int'ah Iscariot hiyulhni. Lanezi 'o 'at nanah, 'en hubutah 'ilhunuh 'en 'int'ah. ⁴'Et náwhulnuk bumoodih 'ink'ez lhuhudúghan bumoodih chah 'en hubuts'uh whinya 'ink'ez hubulh hukw'anótelhye nts'e na'a Sizi hubut'aitelhtel 'et. ⁵'Ink'ez 'aw 'et huhóost'et hoh ts'ah'un hiyúlh ni-whuni'ai 'ink'ez sooneya highan té'alh hiyulhni. ⁶'Aw 'et Judas buts'uh náhezya nts'e na'a 'ilhuhowezdel hubuch'a hubut'aitelhtel, 'et hukwunúta.

Sizi 'en yugha hoodul'eh butus lhuséya hubulh na'tet'alh lhaodutele

⁷Ndet 'aw 'et lhes nachanteldoh, 'i nahitet'alh dzin whusawhélt's'ut. 'Et Hubutus Lhuseya 'et whunahulnih hoh ndi sheep k'us unzoo, 'i nahituzelghel. ⁸'Et Sizi, Peter 'ink'ez John bulh whuz wheobal'h'a 'ink'ez ndo búlhni, "Ah'us 'ink'ez neba lhaoodahleh nts'e Hubutus Lhuseya 'et na'uztet'alh." ⁹'Ink'ez ndi hiyulhni, "Nts'e hukwa' ninzun mba lhats'ódutelelh?" ¹⁰'Ink'ez ndo búlhni, "Soo zelhts'ai, ndet keyah whuti nináh'az t'eh, 'et dune nuhdudutéyalh. 'En too be dezibun 'i niya'a. 'En nts'e bukoo danátedalh ts'ih whuz buntóoh'as. ¹¹'Ink'ez 'et ndun bukoo whumoodih 'en 'udóohni, 'Whuneodulh'eh njan ndúnyulhni, ndet 'uhoont'ah nkoo dune 'ilhoghudulh 'uha'alh wheni? 'Et sugha hoodul'eh ndi Hubutus Lhuseya hubulh ná'test'alh." ¹²'Ink'ez 'et nduk yuh hooncha lhaoodint'ah whunóhnoolhtun. 'Et lhaoodahleh." ¹³'Et whehá'az hoh soo nts'e na'a hubudáni, whuz na'a nahahoo'ai. 'Ink'ez 'et Hubutus Lhuseya 'et wheni lhaadája.

Sizi 'udek'elh'az na'ut'alh

¹⁴'Aw 'et wheghah whudezulh whusawhélt's'ut, 'et ndunnah lanezi 'o 'at nanah whel'a hubulh natl'adeda. ¹⁵'Ink'ez ndo búlhni, "Dzuh nuteszut whutsuh sudzi ndulhcho, 'i be njan Hubutus Lhuseya 'et nohwulh ná'test'alh tube hukwa' nuszun. ¹⁶Alha 'ún whudusni, nts'e Yak'usda hubudayi cho unli, 'et ts'iyawh lhaoodutenilil, 'et whuts'un, 'et ndi Butus Lhuseya 'aw 'o 'at naóost'alh ghaít'ah." ¹⁷'Aw 'et lubot yilhchoot 'ink'ez be'aBá suchanaílya yulhni 'ink'ez 'utni, "Ulhchoot 'ink'ez ts'iyawh 'ilho ahtnai. ¹⁸Ndun whudusni, nts'e Yak'usda hubudayi cho unli, 'et whusawhutelts'ulh 'et whuts'un, doo chah 'aw ndi mai too wusnai ghaít'ah." ¹⁹'Et lhes yilhchoot. Be'aBá suchanaílya yulhni, taidalhtuk 'ink'ez butainínla, 'et ndo búlhni, "Ndi suyust'e 'int'ah. Nuhwheni nuhwhuba huwalti. 'Et ndaht'en t'eh, 'et hoh sunaoolhúni." ²⁰'Uhan'al hukw'elh'az 'et whuz na'a zeh lubot yilhchoot 'ink'ez 'utni, "Ndi lubot 'i suzkai be k'an khunek nuhwhuba lhadúsla, 'i 'int'ah. Nuhwheni nuhwhuba nadútel't'ih. ²¹'Ink'ez soo cho whunulh'en, ndun whu'ízyaz dune ch'a detni, 'en njan kw'uzdai gha sulh usda. ²²'Alha' hoont'ah yinkak dune ye', nts'e na'a buba 'et niwhults'ut, 'et whuz na'a 'et 'uwhtuténilil. 'Et whunts'ih ndun dune whu'ízyaz dune t'aitelhtel, 'en dáwhulsi' buts'uh whélt's'ulh!" ²³'Ink'ez hedich'oh lhutah lhuhoodulkut, "K'us ndan simba 'uyúlhni, ndan 'utenilil hoh 'utni?"

Yugha hoodul'eh hubutah, k'us ndan simba degha nus ncha wule?

²⁴'Et chah 'ilho dich'oh 'ulhtah 'uhútni k'us ndan suba degha nus ncha wule? ²⁵'Ink'ez Sizi ndo búlhni, "Udun yun k'ut huwhut'en hubudayi cho dune k'une' bul'en 'int'ah. 'Ink'ez ndunnah hubugha ndoh 'int'ah, 'en nets'un hinzoo 'uhint'ah hubuhútni. ²⁶'Et whunts'ih nuhwheni nuhtah 'en ndóht'e gunih! 'Et k'us nuhtah ndan degha nus 'int'ah wule, 'en 'udek'ah k'una'a wule. Ndan nuhtsuh whudelhdzulh, 'en nuhwhuba ne'út'en k'una'a wule. ²⁷Daja nahzun? K'us ndan degha nus 'int'ah? Ndan kw'uzdai k'usda 'ute'alh ka, k'us yuba

ne'út'en? 'Alha 'uhoont'ah ndan kw'uzdai k'usda 'ink'ez 'ute'alh 'en 'int'ah. 'Et whunts'ih nuhwheni nuhtah nuhwhuba ne'út'en, 'en 'ust'ah. ²⁸ Nuhwheni aht'ah ndet dzuh nusuzut, 'et nduhóolyez hoh sulh 'éht'e. ²⁹ 'Et nts'e na'a se'abá stl'ahó'ai hoh hubudayi cho usdli, whuz na'a zeh nuhwheni chah hubudayi cho tehleh nuhgha ótet'alh. ³⁰ 'Et nts'e hubudayi cho usdli, 'et suk'w'uzdai k'ut sulh 'uteh'alh 'ink'ez sulh 'utehtnai. Ndet kw'usuda cho dezti, 'i 'et hukw'u dutelhúts'ilh 'ink'ez lanezi 'o 'at nat Israel hits'uh hainzut bulh dédowh, 'en huba nahutehyeh."

Sizi, 'en Peter 'uyúlhni, "T'esunuzínzun dutanilh"

³¹ 'Ink'ez neMoodihti 'utni, "Simon, Simon, soo zelhts'ai! Satan tube nuhka' ninzun. T'lo mai k'una'a lhtahontéyulh hukwa' ninzun. ³² 'Et whunts'ih mba tenadesdli, ndet mba 'alha'ust'ah, 'et 'aw nla k'éhahoolts'it'ghaít'ah. 'Ink'ez ndet suts'u nanínja t'eh, nyulhutsinkah 'en hilhtus nabolhtsilh." ³³ 'Et whunts'ih ndi yúlhni, "SMoodihti lhadúst'ah nyulh tesyalh, tsak'edutes'alh k'us mba datésah." ³⁴ 'Ink'ez 'uyúlhni, "Peter ndi nyudúsi, k'an dzin ligok dune 'uduténilh whutsuh, tat, "Aw ndun t'enusuzun,' dutanilh."

Ts'iyawh lhawhúdoneh huba' hoont'ah

³⁵ 'Ink'ez ndo búlhni, "Hoh da whénwhalh'a hoh, sooneya zus, 'ezdai chah, 'ink'ez nuhkesgwut, 'i ts'iyawh be'et. 'Aw ih hoonliyaz whechandunuzáhdzit?" 'Ink'ez, "Hoolah!" hiyulhni. ³⁶ 'Ink'ez ndo búlhni, "Et k'an ndan sooneya zus 'ink'ez be ne'ughe ut'i, whute yóolhchoot. 'Ink'ez ndan soh cho chait'ih, 'en budzoot ye'óket 'ink'ez soh cho lhuk'i óket. ³⁷ 'Et huwa 'un whudusni, ndet Yak'usda bughunek k'ut si sugha 'uk'une'úsduguz, 'i ts'iyawh lhaódoneh huba' hoont'ah. 'Et nduwhtni, 'Ndunnah 'uk'unuchá'hust'en, 'en hubun dult'ah hudooni,' ni. 'Et huwa si sugha 'uk'une'úsduguz 'et lhawhúdoneh huba' hoont'ah." ³⁸ 'Ink'ez 'uhiyúlhni, "NeMoodihti njan whunilh'en nankoh soh cho 'et 'ustan." 'Ink'ez ndo búlhni, "I 'aw 'et soo 'úlsuk."

Sizi, 'en Gethsemane 'et tenadudli

³⁹ 'Aw 'et tinánja hoh whutsuh da hukw'una'a nyoo dzulhyaz, Olive hiyulhni, 'i yuk'uz whenaja. 'Ink'ez yugha hoodul'eh, 'en chah whehínandel. ⁴⁰ Whuz hunindel hoh 'et ndo búlhni, "Tink'us úteht'uk whuch'a ténadahdli." ⁴¹ Nts'e tse nadulh'us, 'et nduwuldzah ts'ih bughu ninínja. Dugwútsi be ninínja 'ink'ez tenadudli. ⁴² 'Et njan ndutni, "ABá hukwa' ninzun t'eh, ndi be dzuh nuteszut, 'i sughu naoolchoot. 'Et whunts'ih 'aw si hukwa' nuszun k'una'a ilah. Nyun hukwa' ninzun k'una'a 'uhóneh!" ⁴³ 'Et khunyaz ndus de yak'uz lizas be hoodiltsai. 'En ulhtus nayúhtsi. ⁴⁴ Tube budzi nduda hoh 'o nus 'íltus hoh tenadedli. 'Uskai k'una'a buts'uh halhdzilh hoh yun nadúluz. ⁴⁵ Tenadedli 'ist'le' udeja 'ink'ez dinadija hoh yugha hoodul'eh tso k'et nahunéstez hoh bughu nanja, ⁴⁶ 'ink'ez ndo búlhni, "Di ka sahtez? Doo ka sih tink'us nóoht'uk dinadahdelh 'ink'ez whuch'a tenadahdli."

Sizi 'aw 'et hiyúlhchoot

⁴⁷ 'Awhuz hubulh yalhtuk hoh khunyaz lhanah dune whuz de údulh. Ndun Judas hiyulhni, 'en butsuh uyalh. 'En lanezi 'o 'at nanah, 'en hubulh 'ilhunuh 'int'ah. 'Et Sizi yughah neninya naduntets'oos ka. ⁴⁸ 'Ink'ez Sizi ndi yúlhni, "Judas, yinkak dune ye' nadutants'oos 'i be ih whunést'i hoh butl'aítalhtelh?" ⁴⁹ Sizi bunat nuhudelhúya, dawhútenilh 'et honalh'en, 'et 'uhiyúlhni, "NeMoodihti soh cho be ih lhts'utedughan?" ⁵⁰ 'Et 'ilhunuh yuzih seyin, 'en Lizwif náwhulnuk degna nus dezti be 'ulhna nalhnih ts'ih yudzo habe' yalht'o. ⁵¹ 'Ink'ez Sizi ndo búlhni, "Ndez na'a njan dutésnilh, 'et stl'awháh'aiah." 'Ink'ez ndunah budzo yut'agheznai 'ink'ez soo na'yinla. ⁵² 'Ink'ez ndunnah náwhulnuk hubumoodih, luglez whucho nehúghan hubumoodih, 'ink'ez butsuh whudelhdzulh chah, 'en highu nindel, 'ink'ez Sizi ndó bulhni, "Et di ka soh cho chah 'ink'ez tult'oh chah nuhle 'ink'ez 'undunust'ih hukw'una'a sukaóotehdel? ⁵³ 'Et dzin totsuk luglez whucho nuhtah sída hoh, 'aw hoh da 'aw sóolhchoot hukwa cha'záht'en inle. 'Et whunts'ih k'an netsudule, tsahólhghus yuh usda, 'en nuhmoodih tele, 'Aw 'et nuhwhuba ní'hunent'o."

Peter 'utni, "Ndon dune 'aw t'enusuzun"

⁵⁴ 'Aw 'et Sizi hiyúlhchoot 'ink'ez náwhulnuk degna nus dezti highu dáhinilhti. 'Ink'ez Peter yoo niz de yuneyalh. ⁵⁵ 'Et nanezt'oo tuz whuniz ts'ih kwun húdulhk'an 'ink'ez 'ilho nátl'ahudelts'i. Peter 'en chah hubutah usda. ⁵⁶ 'Et kwun zih usda hoh 'ilhunuh 'ust'le ts'ékeyaz 'en soo yunen ts'ih yunilh'en 'ink'ez ndi yúlhni, "Ndon dune 'en chah yulh 'ut'en inle." ⁵⁷ 'Et whunts'ih yuts'oodesdlai 'ink'ez ndi yúlhni, "Ts'eke, ndunah dune 'aw nt'echanuzusun." ⁵⁸ 'Et hukw'elh'az 'astl'iyaz inle hoh 'et chah 'ilhunuh dune ndi yúlhni, "Nyun chah hubulh 'ilhunuh 'unint'ah." 'Et whunts'ih Peter 'utni, "Awundooh!" ⁵⁹ 'Et doo chah 'iluh hukw'e'hunint'o 'et doo chah 'ilhunuh ndi yúlhni, "Alha' hoont'ah ndun 'en chah yulh 'ut'en. 'En chah Galilee whut'en 'ilhunuh 'int'ah 'et huwa." ⁶⁰ 'Et Peter ndun dune 'en ndi yúlhni, "Aw daja dini 'aw nt'echaonuzúszun!" 'Et 'awhuz yalhtuk hoh lígok dune

'udéja. ⁶¹ 'Et neMoodihti Peter yuts'un nalhú'a 'ink'ez soo yunen ts'ih yunalh'en. 'Et Peter 'ahoh neMoodihti yughunek yunalnik daja yudani inle hoh njan ndi yullhni, "Ligok dune 'uduténihl whutsuh tat nt'echasunuzinzun dutanilh." ⁶² 'Et Peter 'az whinya 'ink'ez tube cho intse.

Nehughan, 'en Sizi highu nolhúya

⁶³ Ndunnah dune Sizi huyilhchoot, 'en highudloh 'ink'ez hiyoolhchis. ⁶⁴ 'Ink'ez hina k'úna'uzguz 'ink'ez hiyoonukat 'ink'ez hiyoodulhkut, "Neba nus whunóolh'en, 'ink'ez nedini ndan 'unyinla nyunezruk?" ⁶⁵ 'Ink'ez lhat hoontsi' hoh hich'a yalhtuk.

Sizi naheyelh hububut nehinihlhti

⁶⁶ 'Aw 'et yilhkai ibulh dune tsuh whudelhdzuhl, ndunnah nawhulnuk dega nus dézti nahúlt'ah, 'ink'ez Moses be' dustl'us 'uk'ununa'úsduzuguz chah, 'en 'ilhuhowezdel 'ink'ez huba naheyelh but nehinihlhti. 'Ink'ez 'uhiyúlhni, ⁶⁷ "Nyun Christ inli t'eh, nedíni!" 'Et whunts'ih ndo búlhni, "Ndun whudáni t'eh, 'aw nuhwhuba 'alha' doosni ghaít'ah. ⁶⁸ Si chah hoonliyaz nuhoodulhkut t'eh, 'aw sudóohni ghaít'ah 'ink'ez 'aw sula nadoohtnih ghaít'ah. ⁶⁹ 'Et 'ink'ez k'an whuts'un yinkak dune ye' 'et nalhni ts'ih Yak'usda whelhtus whuda." ⁷⁰ 'Ink'ez ts'iyawh 'uhutni, "Nyun Yak'usda buYe' ih 'int'ah?" 'Ink'ez ndo búlhni, "Ts'ah'un na'a 'udahni, si 'en 'ust'ah." ⁷¹ 'Ink'ez 'uhutni, "Aw 'o 'un buga hoonliyaz highun nedóoni hukwa cha'ts'unízun. 'Aw 'et whenich'oh buzek ts'udánt's'o."

23

Sizi, 'en Pilate but nehinihlhti

¹ 'Et ndunnah dune 'ilhohuwezdél ts'iyawh dináhudidel 'ink'ez Pilate but nehinihlhti. ² 'Aw 'et hik'e whehoni'ai 'ink'ez 'uhutni, "Ndun dune 'en Lizwif tink'us úbunilht'uk 'et bulh náts'uhoo'ai. 'Ink'ez hubudayi cho Caesar ts'un ndi yun hik'elha hiyilhi, 'i tax hiyulhni, 'et chah whuch'a bunézyoot. 'Ink'ez didut ndun hubudayi cho Christ ts'utni, 'en usdli na'dudútni." ³ 'Et Pilate yoodulhkut, "Nyun ih 'int'ah Lizwif hubudayi cho inli?" 'Et Sizi 'utni, "A, 'alha' dini." ⁴ 'Ink'ez 'et Pilate, ndunnah Lizwif bumoodih, 'ink'ez 'ilhohuwezdél ts'iyawh ndo búlhni, "Ndun dune 'aw hoonliyaz tinta' ant'en buga nachawhus'al." ⁵ 'Ink'ez 'et 'o nus huhuníh'e 'ink'ez 'uhutni, "Yun k'ut Judea ndulhcho hoh, Galilee yun k'ut, 'ink'ez njan chah, dune nuhwheni nuhch'a nihudoodelh whuz na'a whebodulh'eh."

Hubudayi cho Herod, 'en chah Sizi yóolhdzih

⁶ 'Et Pilate njan oozalhts'a hoh, 'et huboodulhkut, "Alha ih ndun dune Galilee whut'en 'int'ah?" ⁷ 'Et Pilate Sizi hubudayi cho Herod bukeyah be'ildzun unli t'eeonanzin, 'et 'ahoh yuts'un wheyálh'a. Ndun hubudayi cho 'en chah hoh da soo 'et Jerusalem 'ut'en inle. ⁸ 'Et Herod tube hont'i hoh Sizi yutelh'en. 'Et tube sa whuts'un yuntelh'ih hukwa' ninzun 'et huwa. 'Et lhat hoh yulh údants'o inle. 'Et huwa khun teh huwa 'ét'en dunalh 'uhooleh. ⁹ 'Ink'ez khunek lhai be yoodulhkut. 'Et whunts'ih Sizi 'aw yuts'un t'édusnih. ¹⁰ 'Et hoh da zeh njan ndúwhut'en ndunnah nawhulnuk dega nus dézti 'ink'ez Moses be' dustl'us 'uk'ununa'úsduzuguz, ts'iyawh dináhudidel 'ink'ez soo tube cho whúske be hik'éhóo'ai. ¹¹ 'Et Herod 'ink'ez yuba nehughan, 'en hubulh ts'iyawh hoonliyaz huba chaílha hininzun 'ink'ez highudloh. 'Et hubudayi cho nayits'uz, 'i be híyalhti 'ink'ez Pilate ts'un whunahíyalh'a. ¹² 'Et soo 'et dzin Pilate 'ink'ez Herod bulh dune nulhuhulhtsi. 'Et whutsuh da lhch'a hudetni inle.

Pilate Sizi butl'ayálhti datetsah ka, 'ink'ez Barabbas huba yulanadetnik

¹³ 'Aw 'et Pilate ndunnah nawhulnuk dega nus dézti, dune k'une' bul'en, 'ink'ez ts'iyannah dune, 'en ts'iyawh ilho hubughezdla, ¹⁴ 'ink'ez ndo búlhni, "Ndun dune, 'en dune tink'us hubunilht'uk k'una'a, 'en sughu nulhti. 'En nuhwhubut soo ts'ah'un na'a buga nunéstai. 'Et whunts'ih ndet buk'éwhah'ai 'aw hoonliyaz buga nachawhús'al. ¹⁵ 'Awundooh! 'Ink'ez Siz, 'en Herod buts'un nohwhulh whélh'a. 'En chah hoh tink'us 'int'ah yughu nachahóo'al. 'Alha' hont'ah ndun dune 'aw hoonli hukwa daóotsah hoolah. ¹⁶ 'Et hiyootelhtus 'ink'ez bulanadatesnih." ¹⁷ 'Et njan butus lhuseya na'hut'alh, 'et naodezulh totsuk, 'ilhunuh dune tsak'edi'ai, 'en lana'hudutnih. 'Et whuz na'a buk'ah ts'ih 'uhoont'ah. ¹⁸ 'Et 'ilho hits'uh hahúyih 'ink'ez 'uhutni, "Ndun Barabbas neba bulanadintnih, 'ink'ez ndun dune sulhge!" ¹⁹ Ndun Barabbas 'en buga lhtahuwhunt'ai hoh 'ilhunuh dune selhghi 'et hukwa tsak'eya'ai inle. ²⁰ 'Et whunts'ih Pilate 'en Sizi lanadetnih hukwa' ninzun, 'et 'ilhohuwezdél doo chah zeh hubulh yaílhtuk. ²¹ 'Et whunts'ih 'o nus hits'uh hahuyih, "Lhdulalhgus k'eilhtih! Lhdulalhgus k'eilhtih!" hutni. ²² 'Ink'ez 'aw 'et whulh tat ndo búlhni, "Et di ka? Ndet dáhoont'ah hoontsi' tinta' ant'en? 'Aw hukw'elha daootsah buga nachawhús'al! 'Et huwa 'ants'ih hiyootelhtus 'ink'ez bulanadatesnih." ²³ 'Et whunts'ih 'aw hiyoozóolhts'a ghaít'ah. 'Ink'ez 'et 'o nus hits'uh hahuyih, "Lhdulalhgus

k'eilhtih!" Daja hutni 'ink'ez ndunnah nawhulnuk dega nus dézti, 'en chah, daja hutni 'et hoh Pilate hich'a' nilhde. ²⁴ 'Et Pilate nts'e na'a hukwa' huninzun hukw'u na'a yuba nahezya. ²⁵ 'Ink'ez ndun Barabbas 'en buga lhtahuwunt'ai hoh 'ilhunuh dune selhghi, 'et hukwa tsak'eya'ai 'en Pilate hubuts'un yulanadetnik. 'Et whunts'ih Sizi 'en nts'e na'a hukwa' huninzun k'una'a 'uhiteleh ka hubut'ayálhti.

Sizi lhdulalghus k'ehiyilhti

²⁶ 'Aw 'et Sizi hitelhti hoh 'ilhunuh dune Simon hiyulhni, 'en Cyrene whut'en 'int'ah, 'en wheghah keyah ts'ih hainya, 'en Sizi bulhdulalghus yuba yudutootan ka hiwus k'ehidintan. ²⁷ Lhanah dune hiyuntezdel, ts'ekoo chah. 'En buga tso hinli 'ink'ez hutso. ²⁸ 'Ink'ez Sizi hubuts'un nalhú'a 'ink'ez ndo búlhni, "Nuhwheni Jerusalem whuts'ekoo, si sughahtso ilah. 'Et k'us nuhwhenich'oh khunahdutso, 'ink'ez nuhwhuzkehkah chah ghahtso. ²⁹ Soo cho whunulh'en, dzin whuz de whékul ho' hoont'ah, 'et 'uhudooni, 'Ndunnah buzkhe hoolah, ndunnah 'aw cha'híltsil, 'ink'ez ndunnah 'aw 'uski yetcha'úht'ukw 'en 'o nus huba soo 'uwhtet'ilh.' ³⁰ 'Et hoh dune 'uhudooni

'Ndi dzulh 'i uncha nek'énit'ai 'ink'ez ndi dzulhyaz 'i chah ndulhcho be nek'oonookat.'

³¹ 'Alha' hoont'ah, duchun 'awhuz duli hoh 'et whunts'ih 'awhuz njan 'et nduhút'en. Duchun desuz t'eh, dawhútenilh nahzun?*" ³² 'Et nanah untsi', 'en chah, hiyulh hubutuzelghelh. ³³ 'Ink'ez ndet dzulhyaz Calvary huwhútini, 'i 'utsints'un nez'ai huwhutni, whuz hinilhti 'ink'ez lhdulalghus k'ehiyilhti. Ndunnah dune ntsi, 'en 'ilhunuh nalhni ts'ih 'ink'ez 'ilhunuh 'intl'as ts'ih, 'en chah lhdulalghus k'eoobuhilhti. ³⁴ 'Aw 'et Sizi 'utni, "ABá huba whunaoodolnah. 'Aw dahút'en t'ehonizun, 'et huwa 'uhut'en." 'Ink'ez hinaih lhk'ehiyelya 'ink'ez higha 'ainlih. ³⁵ 'Et dune hundelhúya 'ink'ez honilh'en. Ndunnah bumoodih, 'en chah buzih nuhudelhúya 'ink'ez highudloh hoh nduhútni, "Uyoon, 'en hubulhis inle. 'Et huwa ndun 'en Christ ndun Yak'usda 'atahayálhti 'int'ah t'eh, dich'oh 'ududoolyih da!" ³⁶ Nehughan, 'en chah highudloh. Hizih niníndel 'ink'ez mai too dunink'ooz, 'i hits'un dihidinkai. ³⁷ 'Ink'ez 'uhíyulhni, "Lizwif hubudayi cho inli t'eh, nyunch'oh 'ududílyih!" ³⁸ Lhustelyaz hik'une'úgzuz. 'Udechoo Greek hubughunek k'una'a, Latin hubughunek k'una'a, 'ink'ez Hebrew hubughunek k'una'a chah, 'aw 'et lhdulalghus k'ut sulhti, higha ndoh ts'ih whehidunilht'o. Ndez na'a njan ndutni, c Ndun 'en Lizwif Hubudayi Cho 'int'ah.

³⁹ Ndunnah nanah hintsi', hizih lhdulalghus k'ehiyilhti, 'ilhunuh hich'a' 'uts'un 'utni hoh 'et di yulhni, "Nyun Christ inli t'eh, 'et nyunch'oh 'ududílyih 'ink'ez nuwheni chah neilhyih!" ⁴⁰ 'Et 'ilhunuh untsi' hukwa' yudáni hoh ndi yúlhni, "Aw Yak'usda whunts'ih bé chanuziljut hoh ih 'udini? 'Aw nt'oonuzinzun nts'e na'a huba nahesda, 'et whuz na'a zeh nuwheni chah neba nahesda. ⁴¹ 'Ink'ez wheni ts'ah'un na'a neba nahesda. Daidút'en 'et huwa k'an lhdulalghus k'ut neba k'elha sidúti. 'Et huwa neba 'uk'elha whuzdli. 'Et whunts'ih ndun dune 'aw hoonliyaz tinta cha'ít'il. 'Et whunts'ih wheni nek'una'a zeh huba nahesda." ⁴² 'Et ndun dune untsi' 'en Sizi ndi yúlhni, "SMoodihti nts'e hubudayi cho inli, whuz lhgha nadinja t'eh, sunaoolnih!" ⁴³ 'Et Sizi ndi yúlhni, "Ts'ah'un na'a nyudusni, nts'e dega nus hoonzoo, 'et soo k'an dzin sulh 'útant'ilh."

Sizi lhdulalghus k'ut ye khuna, 'i yuladetnik

⁴⁴ Dzetniz hukw'elh'az 3:00 bat'en 'et whuts'un ndi yun k'ut ndúhoolcho tsahólhgus inle. ⁴⁵ Sa chah 'aw chast'en suli. 'Ink'ez luglez whucho dutai, 'i hukwa délhchooz, 'i chah lhulcho lhk'eninch'ul. ⁴⁶ 'Ink'ez Sizi tube cho 'utni, "ABá, suyégghah 'i nts'un bula desnik." 'Ink'ez 'et ndudéja 'aw 'et 'udek'elh'az hanáji. ⁴⁷ 'Et dahooja ndun nehughan bumoodih whunalh'en hoh Yak'usda yudélti 'ink'ez 'utni, "Ndun 'alha soo ts'ah'un dune zeh 'int'ah." ⁴⁸ 'Et 'ilhohuwezdel ts'iyawh 'et nehunindel howhunteh'ilh ka, ndet ndulhcho dáhooja howhunalh'en, tso k'et 'et budzi k'ut huhoohlchis 'ink'ez whusanáhedel. ⁴⁹ Ndunnah t'ehininzun, 'ink'ez ndunnah ts'ekoo Galilee whuts'un whusanáhedel, 'en chah nilhdzayaz highu nudelhúya njan ndulhcho hoh dawhut'en honilh'en.

Joseph, 'en Sizi whuyíyalhti

⁵⁰ 'Aw 'et 'ilhunuh dune Joseph hiyulhni, ndunnah Lizwif buk'úne' whut'en, 'en 'ilhunuh 'int'ah. Dune unzoo 'ink'ez ts'ah'un dune unli. ⁵¹ Ndunnah buk'úne' whut'en, dahúja, 'aw huba ts'ah'un chahoot'ah. Joseph 'en Arimathea whut'en 'int'ah. 'En chah ndet Yak'usda hoh hubudayi cho unli, 'et chah hubalhi. ⁵² 'Et Joseph, 'en Pilate ts'un whinya 'ink'ez Sizi buyust'e yuts'u ka ná'dutni dutl'anáyoolhtel ka. ⁵³ 'Aw 'et buyust'e nanáyalhti hoh ndi naih dezti, 'i layin hiyulhni, 'i be yugha iwezdud. 'Et tse bet hahuhontsel, 'et

* **23:31** Ndi duchun duli, 'i Sizi Gri ndi yun k'ut nuséya, 'uwúlhni. 'Ink'ez ndi duchun désuz, 'i ndunnah chahúdjih 'uwúlhni. 'Ink'ez Sizi Gri yak'uz whenája t'eh, tube hoontsi 'et hubuts'úwhelts'ulh, ni ho 'utni.

whuts'uh da, 'aw 'uyoon 'et 'achadílhtah, 'et wheyíhiyalhti. ⁵⁴ 'Aw 'et njan dzin wheni lhahúdtneh 'uhoont'ah. 'Aw 'et Lizwif nats'ulyis dzin hoolh'en. ⁵⁵ 'Ink'ez ndunnah ts'ekoo Galilee whuts'un whusahínandel, 'en Joseph hiyuntezdel, 'et buyust'e 'et wheyíhiyalhti 'et hinalh'en. ⁵⁶ 'Et whenáhedel. Yoo sooltsun, 'i khe sooltsun, 'i chah ts'iyawh lhahídínla. 'Et nats'ulyis dzin, 'et Yak'usda bughunek be buba' hoonla, 'et dzin nahelyiz.

24

Sizi dinadija

¹ 'Aw 'et ndi k'enílghel 'udechoo dzin 'uhoont'ah. Bundada 'uda, ndunnah ts'ekoo 'ink'ez 'uyoon chah bulh 'et ts'un k'uz ts'ih hutezdel. Ndi yoo sooltsun, 'i lhahídínla, 'i chah hitezdlá. ² Tse 'uda 'udun dez'ai hoh hotelh'en. ³ 'Et dahúnindel 'ink'ez neMooðihti Sizi buyust'e hoolah nahuhoo'ai. ⁴ 'Et ts'iyawh hububa whe' hooja hooyal 'et dáhooja hoh simba 'uhoont'ah. 'Et khunyaz nanah dune buzih siyin. Bunaih soo tube be hoodet'en. ⁵ 'Ink'ez ndunnah ts'ekoo tube whehonenljoot hoh butsi be nachahúnelya. 'Ink'ez ndunnah dune 'uhutni, "Et di ka yaidla tah dune khuna, 'en bukunáhta?" ⁶ 'Aw njan hoolah, dinadija ho' 'int'ah! 'Awhuz Galilee 'ut'en hoh, daja nuhwhulhni, 'aw ih whunachasulhúnik? ⁷ Njan ndun whulhni, 'Ndez na'a njan ndótenil, yinkak dune ye', 'en lubeshi 'ulh'en t'ahítelhtel 'ink'ez lhdulalghus k'ehítelhtel ka. 'Ink'ez whulh tat dzin dinadutédalh." ⁸ 'Ink'ez 'ahoh highunek hinalnih. ⁹ 'Et ts'un k'uz hanáhedel, 'et ndi ts'iyawh lanezi 'o 'at 'ilhunuh, 'ink'ez 'onghunnah chah, ts'iyannah ndo budáni. ¹⁰ Ndunnah, 'en Mary Magdala whut'en, Joanna chah, Mary, James be'ama chah, 'ink'ez 'uyoon ts'ekoo bulh 'uhut'en, 'en 'uhuja ndunnah whel'a ndo budáni. ¹¹ 'Et whunts'ih ndunnah whel'a, 'ants'ih hoh ne'huduni whula 'uhutni hubunínzun 'ink'ez 'aw huba 'alha' cha'hudusnih. ¹² 'Et whunts'ih Peter didillhah 'ink'ez ts'un k'uz ts'ih whélgai. Yuk lih 'uja 'ink'ez tsa k'et whunilh'en. 'Et naih dezti, 'i zeh 'et sulhchooz hoh yutelh'en. 'Et koo ts'ih whenaja. 'Et howu nuni nuzut 'ink'ez buba hooncha dahooja hoh simba 'uhoont'ah.

Sizi nanah yugha hoodul'eh bunalhts'et hainya

¹³ 'Aw 'et dzin zeh keyah whuyaz, Emmaus ts'uwhtúni, nanah dune whuz hutez'az. Jerusalem whuts'un 7 miles bat'en 'uhoont'ah. ¹⁴ 'Et whuz he'us hoh 'et ndóhoolhcho dawhút'en hoh howu yahulhtuk. ¹⁵ 'Awhuz 'et howu yahulhtuk dawhút'en ne'whust'en, 'et Sizi hubugan ninya 'ink'ez hubulh tez'az. ¹⁶ Buna be hinilh'en 'et whunts'ih 'aw butl'acháho'o 'al 'et huwa 'aw t'echahinízi. ¹⁷ 'Ink'ez ndo búlhni, "Et wheghah ah'us hoh, ndet ho' whudahni? Stabe hubugha nuhdzi nduda hoh howu yalhtuk?" ¹⁸ 'Et ndun 'ilhunuh, Cleopas hiyulhni, 'en ndi yúlhni, "Aw nyun zeh ilah ih nts'oh teh k'an ne'whust'en, 'aw ih nt'ewhunuzínzun. 'Aw Jerusalem whut'en chainlah ho ih 'udini?" ¹⁹ 'Et ndo búlhni, "Ndet 'uwhudahni?" 'Ink'ez 'uhiyúlhni, "Sizi Nazareth whut'en, 'en bugha dahooja. Ndun dune nus whunilh'en 'int'ah. Yak'usda 'ink'ez dune chah bunalh ts'iyawh hoolhtus hoh ne'whúst'en 'ink'ez hoolhtus whe chah yailhtuk. ²⁰ 'Ink'ez 'et chah dahooja nawhulnuk degna nus dézti, 'ink'ez nuwheni nemoodih chah, 'en Rome whut'en hiba nahuhooyeh ka butl'ahíyalhti, 'ink'ez lhdulalghus k'ehíyilhti. ²¹ 'Et whunts'ih 'en úncha Israel hits'uh hainzut nabootekulh uzninzun da. Nts'oh tuné'whust'en 'et whuts'un k'an 'aw 'et whúlh tat dzin 'uhoont'ah. ²² A, 'alha 'uhoont'ah, 'ink'ez bulunah ts'ekoo nelh 'uhet'en, daja hutni, tube neba hooncha. Soo 'uda bundada ts'un k'uz huníndel. ²³ 'Aw hiyust'e nachahíyilhtel. 'Ink'ez lizas ha'en hoh 'en 'uhutni, 'Khuna ho' 'int'ah! ²⁴ 'Ink'ez 'et bulunah nelh 'uhut'en, 'en chah ts'un k'uz nahúz'az. Soo nts'e na'a ts'ekoo daja hutni, whuz na'a nahuhoo'ai. 'Et whunts'ih Sizi 'aw chahíy'il." ²⁵ 'Et Sizi ndo búlhni, "Tube nuhwheni whuzahnik ahl! Ndet ts'iyawh nus whunilh'en daja hutni, tube sa nuhdzi be nuhwhuba 'alha 'uhoneh! ²⁶ 'Alha ih 'uhoont'ah Christ, 'en dzuh nutezut huba 'uhoont'ah 'ink'ez 'et hukw'el'h'az whudezti ts'ih natedalh?" ²⁷ 'Ink'ez soo 'udechoo Moses be' dustl'us 'uk'ununa'úgzuz 'ink'ez nus whunilh'en bube' dustl'us chah, ndai hik'une'úgzuz 'en bugha, 'i ts'iyawh Yak'usda bughunek yubunelhtan ho 'utni.

'Et hitán'en li'huja 'ink'ez nahiyoolhúts'it

²⁸ 'Et njan keyah wheyaz hutezdel ts'ih, 'aw 'et wheghah hedulh. 'Ink'ez Sizi 'aonilhka njan keyah wheghah lhuteyalh li'ut'en. ²⁹ 'Ants'ih tube cho duzih wuda hukwa' hiyulh'en, 'ink'ez 'uhiyúlhni, "Aw 'et sa nain'ah, hulhgha 'uhoont'ah." 'Ink'ez koo hubulh danánt'az buzih tedalh ka. ³⁰ 'Et hukw'elh'azyaz natl'ahudelts'i 'ink'ez 'uhute'ah. Sizi lhes yílhchoot 'ink'ez Yak'usda suchanailya yulhni. 'Ink'ez lhtaídalkhut 'ink'ez hubutl'ayánla. ³¹ 'Et khunyaz hitán'en li'huja 'ink'ez nahiyoolhúts'it. 'Ink'ez 'et khunyaz hoolah nasdli. ³² 'Et 'ulhódutni, "Nus de ti nelh yalhtuk 'ink'ez Yak'usda bughunek daja ni whunenulhtun hoh 'aw ih nedzi dézk'un lí'ts'int'ah inle?" ³³ 'Aho' 'et wheghah 'uhunet'oh hoh dihudíndel 'ink'ez Jerusalem ts'ih nahutesdel. 'Et ndunnah lanezi 'o 'at 'ilhunuh 'ink'ez ndunnah

hubulh 'uhut'en, 'en ts'iyawh ndet 'ilho 'úhint'ah hoh hubughun nahúndel, ³⁴ 'ink'ez njan 'et hudelhts'i, 'en 'uhutni, "Alha neMoodihti dinadija ho' 'int'ah! 'Ink'ez Simon yunalh be hóodiltsai!" ³⁵ 'Ink'ez ndunnah nanah njan ti dahooja 'et hubugha hubulh náhohoolnuk nts'e na'a Sizi ndi lhes taídalkut hoh ndun unli nahiyoolhúts'it.

Sizi dich'oh hubuniz be hóodiltsai

³⁶ 'Awhuz njan howu yahalhtuk hoh, Sizi dich'oh hubuniz be hóodiltsai, 'ink'ez ndo búlhni, "Nohwhulh soo whudooghel." ³⁷ 'Et whunts'ih hubugha ha'nejoot 'ink'ez tube hunelhújoot. Dune dazsai butsen ha'en huninzun. ³⁸ 'Ink'ez ndo búlhni, "Et dahoot'ah huwa whenlhujut? 'Ink'ez dahoot'ah huwa nuhdzi yuh hoh nuhwhuba nawh 'uhoont'ah? ³⁹ Sula chah 'ink'ez suke chah nulh'en. Si 'ust'ah. St'agháhnaih 'ink'ez sunulh'en! 'Alha nuhwhenich'oh whunulh'en. Suyust'e chah hoonli 'ink'ez suts'un chah. Dune butsen 'aw whuz na'a nduchait'ah, buyust'e 'ink'ez buts'un chah hoolah, ndi ts'iyawh bulh 'ust'ah." ⁴⁰ 'Aw 'et ndudáni hoh, dula chah 'ink'ez duke chah hubunalh ts'et niyuzdla. ⁴¹ Soo ts'ah'un huhóont'i 'ink'ez tube huba hooncha, 'et whunts'ih 'awhuz huba 'alha' cha'hoot'ah. 'Ink'ez ndo búlhni, "Aw njan ts'uyi, 'i cháht'ih?" ⁴² 'Et lhook sut'e, 'i 'ink'ez honey, 'i yoo'alh ka higha híninla. ⁴³ 'I yílhchoot 'ink'ez hubunalh ya'al.

Sizi whubunulhtun Yak'usda bughunek daja ni

⁴⁴ 'Ink'ez ndo búlhni, "Awhuz nohwhulh 'úst'ah da ndi khunek 'i da be nohwhulh yalhtuk, 'et ndi ts'iyawh lhaoodoneh ndai Moses be' dustl'us 'ukune'usdúguz, ndunnah nus whunilh'en, 'ink'ez Yak'usda bughunek Shun be' dustl'us k'ut chah, si sugha 'uk'une'úsduzuguz." ⁴⁵ 'Et hubeni t'ehonoozeh ka butl'ahó'ai Yak'usda bughunek t'ehinoozeh ka. ⁴⁶ 'Ink'ez ndo búlhni, "Ndi 'i 'uk'une'úsduzuguz hoh 'et ndutni, Christ, 'en dzuh nozut huba' hoot'ah, 'ink'ez whulh tat dzin dinadutédalh. ⁴⁷ 'Ink'ez ndunnah boozi be yatelhtuk, 'en boozi bugha nts'e na'a hoh ts'iyannah bulubeshi ch'a bubeni naháhundunooleh, 'ink'ez nts'e na'a hoh bulubeshi huba 'un tukuk chah, ndi bugha boozi hubugha ts'iyannah ndudóohni huba' hoot'ah. 'Et njan Jerusalem 'et choo whe'dooht'en. 'Et hukw'elh'az t'eh, ts'iyannah yun k'ut nduhoolcho hoh whebodoohl'eh. ⁴⁸ 'Ink'ez nuhwheni njan 'et ts'iyawh dune whúntelhtun ahli hoh aht'ah. ⁴⁹ 'Ink'ez soo zélhts'ai, ndi se'aBá nuhts'u yoozi, 'i nuhts'o t'l'adutes'ah. 'Et whunts'ih yak'uz ndus de whelhtus, 'i nuhk'edútelts'ulh 'et whuts'un, njan Jerusalem keyah 'et zeh doolhúts'i."

Sizi nduk yak'uz whenálti

⁵⁰ 'Aw 'et keyahyaz Bethany ts'uwhútni, whuz nabuninla. Bula nduk 'uyínla 'ink'ez Yak'usda yoodulhkut hubuts'un wuzoo ka. ⁵¹ 'Et 'awhuz Yak'usda yoodulhkut hoh hubuts'un wuzoo ka, 'et hubuch'a nduk yak'uz whenabe'whéldzut. ⁵² Hits'un teni' nalhdzin, 'ink'ez tube hooncha huhóont'i hoh Jerusalem ts'ih whunáhedel. ⁵³ 'Et 'ahoolhyez luglez wuhocho hudelhts'i hoh Yak'usda hidelhti 'ink'ez dalzoo ho' 'int'ah hutni. 'Et ndoh honeh.

Yak'usda Bughunek Unzoo 'I John Yuk'uné'uzguz

Ndi khunek 'ilhuz 'int'ah

¹ Soo 'udechoo da 'et khunek hoonli 'ink'ez ndi khunek 'i Yak'usda yulh 'int'ah. Ndi khunek 'i Yak'usda 'int'ah. ² Ndun 'en soo 'udechoo da whuts'un Yak'usda bulh 'int'ah. ³ 'En bula tah ts'ih ts'iyaitsuk 'ulya ínle. Ndai 'ulya, 'i tah 'aw ilhuk'i cha'yíli hoolah. ⁴ Be ts'úkhuna 'en buts'un haidanzut 'ink'ez ndi be ts'úkhuna 'i ts'iyannah dune huba be whét'en 'int'ah. ⁵ Ndi be whét'en tsahólhgus* yuh ts'ih whé'ndi 'ink'ez ndi tsahólhgus yuh ts'ih haínya, 'aw yuch'a 'oolhdeh ghaít'ah. ⁶ 'Ilhunuh dune John hiyulhni, 'en Yak'usda whusayáll'ah. ⁷ Ndun dune 'en ts'iyannah dóni ndi be whét'en, 'i bugha. Hukwa' huninzun t'eh, 'en bugha ts'iyannah huba 'álha 'uhot'e. ⁸ Ndun John, 'en 'aw be whét'en ilah 'int'ah. 'En 'int'ah be whét'en, 'i bugha ts'iyannah dóni 'int'ah. ⁹ Ndun ts'ah'un 'en be whét'en, ts'iyannah dune ndi yun k'ut k'eínya, 'en ndi be whét'en hubugha ite'alh. ¹⁰ Ndi yun k'ut inda. Ndi yun 'uyinla 'et whunts'ih yinkak dune t'ehinóozin hukwa cha'hunízun. ¹¹ Ndunnah dulh whút'en 'en lhtahaobanla 'ink'ez hubutaninya hoh 'aw chahayílhoolh. ¹² 'Et whunts'ih ndan ho' 'int'ah hiyílhchoot, Yak'usda buzkeh huzdli 'et hubugha óoni'ai. Ndan 'uhint'ah ndi boozi huba 'álha' yint'ah. ¹³ 'Aw dune hits'u hainzut whu la ts'ih ilah Yak'usda buzkeh huzdli, k'us buyust'e hukwa' nínzun huwa ilah, k'us dich'oh dune hukwa' huninzun huwa chah ilah, Yak'usda 'en bugha zeh huwhuzdli. ¹⁴ 'Et ndi khunek Yak'usda unli, 'i dune suli 'ink'ez netah dune ínle, 'et hoh dadélti ts'onalh'en. Ndi yé dadélti, 'i Yak'usda 'aw 'ilhunuh zeh buYé' yé dezti 'i 'int'ah. Ye unzoo 'i 'ink'ez khunek 'alha' 'int'ah 'i zeh ye dézbun. ¹⁵ 'En bugha John hubudáni ínle, dune bulh yálltuk hoh, "Ndun 'en nuhghu dáni, sk'el'h'az whusatéyah 'et whunts'ih whutesdleh whutsuh da whunts'ih, 'uda 'et khuna ho' 'int'ah, 'et huwa 'int'ah sugha ndoh 'int'ah," hubúlhni. ¹⁶ 'Ink'ez ndai yé dezibun 'i ts'iyawh negha íninla. Dzin totsuk ye unzoo 'i neba 'o 'un 'int'ah. ¹⁷ 'Yak'usda ndi bughunek 'i buk'une'ts'oot'en, 'i Moses 'en bugha netl'aidá'ai ínle. 'Et whunts'ih k'an Sizi Gri 'en bugha ye unzoo, 'i 'ink'ez khunek 'alha' 'int'ah, 'i neghals'ut. ¹⁸ 'Aw Yak'usda 'en ya'en, 'et whunts'ih ndunnah 'aw 'ilhunuh buYé', be'aBá degha nus yuk'entsi, 'en Yak'usda bugha 'et wheinélhtan.

John dune too be 'ulh'en, 'en ndó bulhni 'aw ndun Christ 'en ilah 'ust'ah

¹⁹ 'Et 'ilhudzin ndan Lizwif Jerusalem whut'en, 'en náwhulnuk 'ink'ez Levitenah, 'en John buts'un wheóobahalh'a hiyoodolhuk ndan unli 'et hukwa. 'Et John ndo búlhni, ²⁰ soo ts'ah'un na'a 'aw whuts'u chaoodíldai hoh hubudáni, "Aw Christ, 'en ilah 'ust'ah," hubúlhni. ²¹ 'Et doo chah hiyoodulhuk, "Ndan inli? Elijah tulih 'int'ah?" "Awundooh, 'aw 'en ilah 'ust'ah," hubúlhni. "Ndan Yak'usda be nus whunílh'en hubugha yatuk ínle, 'en tulih 'int'ah?" hiyúlhni. 'Et chah, "Awundooh," hubúlhni. ²² 'Et 'uhiyúlhni, "Aw ndan hó nint'ah. Nyunch'oh daja ho' dini? 'Et ts'ah'un ne'díni, 'et ndez na'a ndunnah whuz denétehl'a hubuzdóoni," hiyúlhni. ²³ 'Et John ndo búlhni,

"Si 'ust'ah 'aw dune chahóot'ih ts'ih dultul hoh ts'iyannah dune hubudúni, neMoodihti lhuteyah hoonzoo 'ink'ez lkh'owhudez'a huba whulhtsi.

'Et whuz na'a Yak'usda 'en be nus whunílh'en Isaiah ndutni ínle," ndo búlhni.

²⁴ 'Et ndunnah John buts'un whets'iyalh'a ndunnah Pharisee bulunah zeh 'uhint'ah. ²⁵ 'Et doo chah hiyoodulhuk, "Aw Christ, k'us Elijah, k'us ndan Yak'usda 'en be nus whunílh'en, ndunnah ilah 'int'ah t'eh, di ka dune too bé' bilh'en?" hiyúlhni. ²⁶ 'Et John ndo búlhni, "Si too zeh 'i be dune too be' 'ulh'en, 'et whunts'ih nuhwhutah 'ilhunuh dune hoonli, 'en 'aw t'enuzáhzun. ²⁷ 'En 'int'ah sk'el'h'az whusatéyah sughanus dezti ho' 'int'ah. 'Aw bukechun ket'oolh buba k'unáiduts'uk, 'et whunts'ih huba soo cha'lhudzoo," hubúlhni. ²⁸ 'Et njan keyah Bethabara wuhútni Jordan took'oh whanch'az whuz'ai, 'et John dune too be' 'óbulh'en. ²⁹ 'Om bun dzin khuniaz Sizi yuts'un úyah hoh John yutelh'en, 'ink'ez 'utni, "Nulh'en, Yak'usda busheepaz 'int'ah. 'En 'ut'en, yinkak dune hubulubeshi hubuts'u hanáyule," hubúlhni. ³⁰ 'En bugha 'un whudúni sk'el'h'az whusatéyah, 'et whunts'ih whutesdleh whutsu da whunts'ih, 'uda khuna ho' 'int'ah, 'et huwa sughanus dezti ho' 'int'ah. ³¹ Ndan unli 'aw seni be t'énuzúszun ínle, 'et whunts'ih nuhwheni Israel buts'u háhde nuhwhuts'un whuz haya be t'ewhunoohzeh 'ink'ez too zeh 'i be too be' 'un whulh'en, 'i bugha ndan 'int'ah soo cho t'ewhunoohzeh," hubúlhni. ³² Njan 'et Sizi bugha John ndutni, "Ndoni dut'aiyaz nduwhút'en hoh yak'uz ts'ih hadánde 'ink'ez buyédande, 'et whunalh'en. ³³ Hoh da 'aw seni be t'éoonuzúszun ndun 'int'ah, 'et whunts'ih ndun whuz de sutéhl'a too zeh 'i be dune too be' oolh'en ka, 'en sudáni, "Ndan Ndoni ndus de yuk'édilts'ut 'ink'ez 'ilhuz

* 15 Ndi tsahólhgus yuh ts'iyaini hoonsti 'ink'ez tink'us 'int'ah 'i ni ho 'utni.

yulh 'ínt'ah, 'en 'int'ah Ndoni be dune too be 'ulh'en unli,' 'et sudáni. ³⁴ 'Et ndúhooja 'et whunalh'en. Soo ts'ah'un khunek be nuhwudúzni, 'alha ndun 'en Yak'usda buYe' 'int'ah," hubúlhni John. ³⁵ 'Et 'om bun dzin John 'ink'ez yugha hoodul'eh nanah 'et nahudélhuya. ³⁶ Sizi hoh wheghah uyalh hoh John yunilh'en, "Nulh'en ndun Yak'usda busheepya 'int'ah!" hubúlhni. ³⁷ 'Et ndunnah nanah dune John yugha hoodul'eh daja ni hidánts'o hoh 'aw 'et Sizi Gri hiyuntez'az. ³⁸ 'Et Sizi hubunilh'en hine'us hoh 'et huboodulhukut, "Dí kunahta hoh 'aht'en?" hubúlhni. 'Et 'uhiyúlhni, "Rabbi, nts'e hoont'í?" ('Et ndi khunek "Rabbi" 'i Lizwif k'una'a dune hoodulh'eh ni ho' utni.) 'Et Sizi hubúlhni, ³⁹ "Anih, whunoolh'en si!" hubúlhni. 'Et hiyúlh tez'az 'ink'ez nts'e sída 'et honalh'en. 'Et dzin nduhoolyez hoh hizih hinke 'ink'ez, hoh da 10:00 bat'en 'uhun'oh. ⁴⁰ 'Et ndunnah nanah dune John hidánts'o huwa Sizi hiyuntez'az, 'en 'ilhunuh, Andrew hiyulhni, 'en Simon Peter bulhutsin 'int'ah. ⁴¹ 'En 'ahoh dulhutsin, Simon hiyulhni, 'en yughu ninya 'ink'ez yudáni, "Ndun Messiah 'aw 'et nats'ilhti," yúlhni. (Ndi boozi 'Messiah," Christ ni ho' utni.) ⁴² 'Et Sizi 'en yughu inílhti. 'Et soo cho Sizi yunalh'en 'ink'ez ndi yúlhni, "Nyun Simon Jonas buye' 'en 'int'ah, 'et whunts'ih Cephas nyuhuduténilh," yúlhni. (Ndi Cephas 'i Peter 'i zeh 'int'ah 'ink'ez 'i "tse" ni ho' utni.) ⁴³ 'Et 'om bun dzin Sizi Galilee yun k'ut huwhútni ts'ih teyalh hukwa' ninzun. Whuz ninya hoh dune Philip hiyúlhni, 'en nayilhti 'ink'ez "Sunanyalh," yúlhni. ⁴⁴ 'Et ndun Philip 'en keyah Bethsaida huwhútni, 'et whut'en 'int'ah. Keyah 'et Andrew 'ink'ez Peter bulh huwhut'i. ⁴⁵ 'Et Philip 'en dune Nathanael hiyúlhni, 'en nayilhti, "Ndun dune Moses dune dustl'us k'ut yugha 'uk'une'úgzuz, 'ink'ez Yak'usda be nus whunilh'en highun 'uk'une'úgzuz, 'en 'aw 'et nats'ilhti. 'En 'int'ah Sizi, Joseph buye' unli. Keyah Nazareth huwhútni, 'et whut'i," yúlhni. ⁴⁶ 'Et Nathanael 'utni, "Nts'e na'a simba hoonliyaz 'unzoo 'i Nazareth ts'ih haóolts'it?" 'Et Philip 'utni, "Anih, sulh ín'us 'ink'ez whunolh'en si!" yúlhni. ⁴⁷ 'Et Sizi Nathanael 'az de úyalh yunilh'en 'ink'ez yugha 'et ndutni, "Ndun 'en soo Israel but's'u hainzut 'int'ah, 'aw t'ínk'us 'uhóont'ah teh nucha'ust'en," ni. ⁴⁸ 'Et Nathanael Sizi yoodulhukut, "Dí bugha t'ewhunínzun dant'un dune usdli?" 'Et Sizi 'uyúlhni, "Mai chun t'ah sinda da, Philip 'anih nyuduténilh whutsuh da, 'et 'uda nyunalh'en," yúlhni. ⁴⁹ 'Et Nathanael ndi yúlhni, "Rabbi, 'alha' Yak'usda buYe' inli 'ink'ez Israel hits'u hainde, huba hubudayi cho chah inli," yúlhni. ⁵⁰ 'Et Sizi ndi yúlhni, "Mai chun t'ah sinda hoh nyunalh'en nyudúzni. 'Et huwa Yak'usda buYe' usdli mba 'álha 'uhoont'ah, 'et whunts'ih 'o nus ts'un 'o nus hooncha, 'et whuntalh'ilh. ⁵¹ 'Et soo ts'ah'un 'ínt'ah nyudut'esnilh, yak'uz da' dutékez 'ink'ez Yak'usda hubulizas ndus de hahánde! 'ink'ez doo chah whenáhudéde ndun yinkak dune ye'† 'en but's'un 'uhut'en, 'et whuntalh'ilh," yúlhni.

2

Sizi huwa 'ét'en túne' 'ut'en 'et huwa dune 'en Christ 'int'ah t'ehonózin.

¹ 'Et whulh tat dzin suli hoh Galilee yun k'ut 'et 'ilhun keyah Cana huwhútni, 'et keyah 'et k'an nalgha húsduke huba honélnik. 'Et Sizi be'ama 'en chah 'et usda. ² Sizi 'ink'ez yugha hódul'eh 'en chah hubughu nahúdzél. ³ 'Et njan lhghahúsduke ba honelnhik whut'ah 'et ndi mai too ntso suli. 'Et Sizi be'ama yughu ninya 'ink'ez 'uyúlhni, "Aw mai too cha hít'ih." ⁴ Sizi 'et ndi yúlhni, "Ts'eke dant'i ka 'uyoon mba 'uhoont'ah 'et si hukwa' sudini, njan 'et 'aw suba 'et nicha'hunest'o!" ⁵ 'Et be'ama ndunnah ustlen, 'en búlhni, "Daja nuhwúlhni hoh tuné'ooht'en." ⁶ 'Et njan lhk'uta tse 'oosa' cho, too hiye 'ílhduzun wheni, 'et súla. Lhanah Lizwif hube 'ut'en k'ah hukw'un'a lana'huldeh wheni. ⁷ 'Et Sizi ndunnah ustlen, 'en búlhni, "Ndi tse 'oosa' cho ts'iyawh too be nadulh'ibun." 'Et soo ts'iyawh budah whuts'un yanahídelh'ibun. ⁸ "Aw 'et buyé' 'ahkai' 'ink'ez ndun njan howunli, 'en but's'un yéhkalh," hubúlhni. 'Ink'ez bulah hits'un whinkai. ⁹ Ndi too mai too suli, 'i 'aw nts'ez de hahuyalhdze ndan howunli 'en t'éoonízun, 'et whunts'ih ndunnah ustlen, 'en hiyínkai, 'en t'ehonínzun. 'Ink'ez ndet huwunli 'en dune 'at ut'i, 'en 'anih yúlhni, ¹⁰ 'ink'ez ndi yúlhni, "Dune ts'iyannah ndi mai too unzoo, 'i choo howu hínilhdze, 'et hukw'elh'az soo' neltsuk hutni, 'et 'ink'ez hukw'elh'az 'int'ah 'i mai too 'i bughu hínilhdze. 'Et nyun ndi unzoo, 'i 'udek'ah whunts'un ontun!" yúlhni. ¹¹ Njan keyah Cana Galilee yun k'ut whuz'ai 'et soo 'udechoo Sizi huwa 'ét'en teh whená'dit'en, 'ink'ez dádeli 'et hóbunelhtan. 'I bugha hodul'eh 'en bugha ba 'alha yint'ah suli.

Jerusalem luglez whucho Sizi 'uhooket tinábunenyoot

¹² 'Et ndúhooja hukw'elh'az Sizi keyah Capernaum huwhutni ts'ih whinya. Be'ama chah 'uja, 'ink'ez bulhutsinkah chah, 'ink'ez yugha hoodul'eh chah, 'aw sa ilah 'et hudáts'i. ¹³ 'Aw 'et wheghah whúdezulh ndet da Lizwif bukoo Yak'usda lizas Butus Lhuséya whunahulnih,* 'et Sizi Jerusalem ts'ih whénya. ¹⁴ 'Et luglez whucho whuna'nesduti'oo wheyah ts'ih tézya

† 1:51 Yinkak dune ye' ni, 'et dich'oh na'dudútni.

* 2:13 Nawhudezulh totsuk 'ilhunahowudulh 'ink'ez ndi sheep k'us unzoo 'i nahiyut'alh. Njan whewhúnhulnih hoh da Yak'usda yun k'ut Egypt ts'a hanaóobanla da.

'et dune 'e'óoket hubunílh'en. Khunai cha, musdus cha, sheep cha, 'ink'ez dut'aiyaz cha, dove hiyúlhni, hiye 'óoket, 'ink'ez dune sooneya lkh'enáhudunedzih, 'en chah 'et 'uhut'en. ¹⁵ Tl'oolhyaz be dutsus inla. 'I be khunai ts'iyawh tináinyoot. Sooneya lkh'enáhudunedzih chah hubuzooneya nus wheyantsut, 'ink'ez kw'uzdai chah yun tez'ai. ¹⁶ 'Ink'ez dut'aiyaz be 'óoket chah ndó bulhni, "K'an 'aw 'et tiná'nuhle! 'Aw se'abá bukooyah 'et 'e'óoket bakoo whulhsti ilah!" hubúlhni. ¹⁷ 'Et ndunnah yugha hoodul'eh 'et whunahulnih huwa 'uk'une'huzguz 'i daja ni, 'et ndutni, "Njan nkoo hukwa' nuszun k'et 'ants'ih siyah whudezk'un li'nust'ah." ¹⁸ Lizwif 'uhiyúlhni, "Njan nts'oh teh ne'int'en nts'ez na'a 'int'en hooncha túne' 'int'en, 'et whunénilhtun?" ¹⁹ 'Et Sizi ndo búlhni, "Njan bukoo whudézi nuhwheni hoolah whulhsti 'ink'ez tat dzin inle t'eh, 'et dinaooodutés'alh." ²⁰ 'Et ndunnah Lizwif 'uhiyúlhni, "Njan koo whudézi dit lanezi 'o 'at lkh'utat naoodezut inle hoh lhaoodúlya. 'Et daja ninzun ho' dini, tat dzin whutuh zeh dinaooodutá'alh dini," hiyúlhni. ²¹ 'Et njan Sizi bukoo whudézi howu yalhtuk hoh, dich'oh buyust'e, 'i ghu yalhtuk ho' utni íne. ²² 'Et huwa Sizi Gri dázai hubutuh dinadija hoh yugha hoodul'eh whunahulnih daja hubúlhni inle da, 'ink'ez ndi Yak'usda bughunek 'uk'une'úsduzuguz, 'i 'ink'ez khunek 'i Sizi ye yailhtuk, 'i bulh daja ni ts'iyawh huba 'álha 'uhoont'ah. ²³ 'Awhuz Jerusalem 'et zeh 'ut'en hoh njan Hubutuh Lhusíya, 'et whutat ne'whut'en, bulunah ndunnah Sizi yunilh'en nts'o túne'ut'en, 'et huwa k'us lhanah boozí huba 'álha' yint'ah suli. ²⁴ 'Et whunts'ih Sizi dich'oh chah 'aw dune hubut'achanítan, t'eoobunínzun dune dahínt'ah 'et huwa. ²⁵ 'Ink'ez 'aw 'uyoon dune dahínt'ah 'et ndudóoni ghaít'ah, dich'oh dune dahínt'ah chah t'eoobunínzun 'et huwa.

3

Sizi Nicodemus yúlhni doo chah zeh whutanle huba 'uhoont'ah

¹ 'Ilhunuh dune Pharisee bulh dezulh, 'en 'ilhunuh Lizwif hubutsuh whudelhdzulh, 'en Nicodemus hiyúlhni. ² 'En 'ulh'ek 'et Sizi yughu ninya 'ink'ez ndi yúlhni, "Rabbi, Yak'usda yulh 'int'ah dune, 'en zeh njan huwa 'ét'en tune' oot'en huba 'uhoont'ah. 'Et huwa soo t'ets'onínzun dune hoodul'eh Yak'usda ts'ih haínya, 'en inli ho' nint'ah." ³ 'Et Sizi 'uyúlhni, "Soo ts'ah'un na'a nyudúsní, dune doo chah zeh whuzdli t'eh, 'et t'eh zeh nts'e Yak'usda 'en hubudayi cho unli whute'ílh." ⁴ 'Et Nicodemus ndi yúlhni, "Nts'e na'a suba 'ilhunuh dune tube ye'un uzulh, 'en doo chah 'uhóoleh ho' dini? 'Aw whulh nat be'ama yuchan naooja 'ink'ez doo chah 'uhóoleh ghaít'ah!" yúlhni. ⁵ 'Et Sizi ndi yúlhni, "Soo ts'ah'un na'a nyudúsní, dune too 'ink'ez Ndoni be chah whuzdli t'eh, 'et zeh nts'e dune Yak'usda dich'oh zeh hubudayi cho unli 'et 'aw dahóoya ghaít'ah. ⁶ 'Ndun dune bugha whuzdli, 'en dune budune 'int'ah, 'ink'ez ndan Ndoni be whuzdli, 'en Ndoni budune 'int'ah. ⁷ 'Et nyudúsní nuhwheni doo chah zeh hóhle huba' hooont'ah. Khun teh 'et huwa mba hócha gunih! ⁸ 'Ants'ih nilhts'i delts'ulh li'hoont'ah. Nilhts'i dints'o 'et whunts'ih nts'ez de hadélt's'ut k'us nts'e dutelts'ulh 'aw t'éoonuzinzun. 'Et whuz na'a zeh 'aw t'éoonóznin ghaít'ah nts'e na'a dune Ndoni be whuzdli," yúlhni. ⁹ 'Et Nicodemus ndi yúlhni, "Et nts'e na'a 'uwhuté'ílh?" ¹⁰ 'Et Sizi ndi yúlhni, "Et nyun Israel but's'u hainde whubodilh'eh inli, 'ink'ez nts'e na'a 'int'ah njan 'aw nyeni be t'éoonuzinzun? ¹¹ 'Soo ts'ah'un na'a njan nyudúsní, t'ets'onínzun ndet howu yats'ulhtuk 'ink'ez ts'ah'un na'a nuhwhuts'útni ndai ts'a'en 'ink'ez nuhwheni 'aw neghunek nuhwhuba 'álha' cha'ít'ah. ¹² 'Ndi yun k'ut nts'oh tulih né'whut'en, 'et hubugha 'ún whudusní, 'et whunts'ih nuhwhuba 'álha cha'hóot'ah nts'e na'a simba nduk yak'uz né'whut'en, 'et hubugha 'ún whudusní, 'et nuhwhuba 'álha 'uhoon'e? ¹³ 'Aw 'ilhunuh dune nduk yak'uz whenya hoolah, 'aw 'ilhunuh zeh 'uja ndus de yak'uz haínya. 'En 'int'ah yinkak dune ye' unli, 'en 'int'ah yak'uz whukeyah whuz'ai. ¹⁴ 'Uda 'aw dune chahahóot'ih 'et Moses 'en t'ughus k'edélt'si díbe' yudilhts'i inle, whuz na'a yinkak dune ye' díbe na'hidóolhts'ih huba 'uhoont'ah. ¹⁵ 'Et huwa ndunnah 'en bugha huba 'álha 'uhoont'ah, 'en 'aw dachatesa,* 'ilhuz wule wheni hukhutenal. ¹⁶ 'Yak'usda dalhcho 'i be ndi yun k'ut dune húbuk'entsi, 'aw 'ilhunuh zeh buYe' 'en hubugha inilhti. 'En bugha ndan huba 'álha' yint'ah 'aw dachahútesa, 'ilhuz wheni hukhutená 'et huwa. ¹⁷ 'Aw dune ba nahuteyeh ílah Yak'usda buYe' ndi yun k'uz yuté'lh'a. 'En bugha ndi yun k'ut whut'en 'en ts'iyannah hudoojih, 'et wheni ndi yun k'uz yuté'lh'a. ¹⁸ 'Ndunnah huba 'álha' yint'ah 'en 'aw huba nachahuté'syel. 'Et ndunnah 'aw huba 'álha cha'yít'ah, 'en 'uda huba nahézya ho' hint'ah, 'aw Yak'usda buYe' boozí 'aw huba 'álha cha'yít'ah 'et huwa. ¹⁹ 'En 'int'ah be né'hoon' en unli ndi yun k'éinya. 'I 'aw 'i hikacha'nízun njan tsahólh'ugus yuh 'et 'o nus tinch'a 'uhút'ih, 'et huhóont'i. 'Et huwa huba nahoooyeh. ²⁰ 'Ndunnah hooont'si' tune'hút'en, 'en ndi be whét'en hits'u dutnik. 'Et huwa ndi be whét'en, 'aw hits'un tóoya ghaít'ah, doo ka tink'us ne'hút'en 'et ts'et haootélt's'ulh 'et

* 3:15 Njan ndachátesa ni, 'aw neyust'e ílah, nezul 'ink'ez neyégha gha yalhtuk ni ho' utni.

whuch'a. ²¹ 'Et whunts'ih ndan ts'ah'un na'a 'et'ilh, 'en ndi be whét'en ts'un teyalh, 'et hoh ts'iyannah t'ehonózin, nts'oh tune'út'en, Yak'usda 'en bugha ne ts'oot'en."

John dune too be ne'úlh'en doo chah zeh Sizi yuba whudélhti

²² Njan hoh túne' whust'en hukw'elh'az Sizi 'ink'ez yugha hoodul'eh Judea yun k'ut ts'ih whehándel. 'Et yugha hoodul'eh higha hudálts'i 'ink'ez dune too be 'óobalh'en. ²³ Hoh da zeh John 'en chah keyah Aeon huwhútni, keyah Salem huwhútni wheghah whuz'ai, 'et dune too be 'óobalh'en, 'et too lhai 'et huwa. Dune hits'u lhadulh 'ink'ez bulunah dune too be' binla. ²⁴ 'Et John nk'ácha tsak'echalhts'it 'et huwa. ²⁵ 'Et hoh da John yugha hoodul'eh Lizwif bulh lhk'engahudítzdut Lizwif hube 'ut'en k'ah hukw'una'a lana'huldeh 'et huwa. ²⁶ 'Et huwa John highu nindel 'ink'ez hiyoodulhkut, "Rabbi ndun dune 'ilhunuh nga hoodul'eh, Jordan took'oh nyaz ts'ih, 'en dune hubulh yailhtuk ínle, 'aw 'et 'en dune too be 'úlh'en 'ink'ez ts'iyannah hits'un lhadulh," hiyúlhni. ²⁷ 'Et John ndo búlhni, "Yak'usda yugha óoni'ai t'eh zeh, 'et huwa 'aw 'ants'ih 'et hoonliyaz 'oot'e ghaít'ah. ²⁸ Nuhwhenich'oh 'et whunts'ih daja dusni t'éoonáhzun, si 'aw Christ 'en ilah 'ust'ah, 'et whunts'ih 'ilhunuh yutsuh whusál'a, 'en 'ust'ah. ²⁹ 'Et nduhónt'ah hoh, 'ilhunuh dune ts'eke yughusda, 'en 'at uti 'int'ah. 'Et hubuk'entsi' yuzih syoin 'ink'ez yughunek yoozélhts'ai whuz na'a tube yuba hóont'i. 'Et nuhwhúdsusi si chah whuz na'a tube cho hoonúst'i.† ³⁰ 'O nus tube cho hidóolhti 'ink'ez si hukw'elh'ih suba hodóolhti, 'et whuz na'a 'uhót'e huba' hooht'ah. ³¹ Ndun ndus de haínya, 'en ts'iyannah hubugha ndoh 'int'ah 'ink'ez ndan yinkak ts'ih haínya, 'en yinkak dune unli, 'et huwa ndi yun k'ut hoonli, 'i zeh highu yalhtuk. 'Et ndun yak'uz haínya, 'en ts'iyannah hubugha ndoh 'int'ah. ³² 'Et ndet ndun whunalh'en 'ink'ez whudánts'o, 'et 'uyoon chah hubúlhni, 'et whunts'ih daja hubúlhni 'aw highunek chaílhchoh. ³³ 'Et whunts'ih ndun yughunek ilhchoot daja ni, 'en 'utni ndun Yak'usda 'en buba 'alha' yint'ah, ni. ³⁴ Ndun 'en Yak'usda whusayálh'a, 'en 'ink'ez didut Ndoni be yudelhubn, 'et huwa Yak'usda bughunek zeh be yálhtuk. ³⁵ Yak'usda 'en buYe' yuk'entsi 'et huwa ts'iyaintsuk k'úne' hool'en, 'et yugha óoni'ai. ³⁶ 'Et ndunnah ndan Yak'usda buYe' buba 'alha' yint'ah, 'en 'ilhuz wheni be ts'úkhuna, 'i huyit'i, 'et whunts'ih ndunnah huba 'alha' cha'yít'ah, 'en 'aw honoolh'en ghaít'ah, Yak'usda yé hubulh húnilch'e 'ahoolhyez wheni buk'uz 'uztét'ih," ni John.

4

'Ilhunuh ts'eke Samaria yun k'ut whut'en, 'en Sizi ndi 'ilhuz wheni be ts'ukhuna 'i bugha yulh yálhtuk.

¹ 'Et ndunnah Pharisee hiyulh údits'o hoh 'uhíyulhni, "Sizi 'en John degha nus lhanah dune chah yugha hoodul'eh sulí, 'ink'ez dune too be 'úlh'en chah 'ut'en," hutni. ² 'Et whunts'ih 'alha Sizi 'aw dich'oh ilah dune too be' bulh'en, yugha hoodul'eh, 'en zeh 'uhut'en. ³ 'Et neMoodihti whulh úduzts'ai 'aw 'et Judea yun k'ut whuch'a nasja 'ink'ez Galilea yun k'ut ts'ih natesja. ⁴ 'Et nadalh hoh Samaria yun k'ut hoh lhunátedalh, ⁵ 'ink'ez Samaria yun k'ut keyah Sychar huwhútni ts'ih ninya. Njan keyah 'et yun k'ut Jacob buye' Joseph yugha óoni'ai ínle, 'et wheghah whuz'ai. ⁶ 'Et Jacob too k'et 'uhóonla, 'et whuz'ai. 'Et Sizi tube sa nuséya 'ink'ez ninéntsai, 'et huwa too k'et whuzih 'et nátl'adeda. 'Et 6:00 'uhúnet'oh hoh 'ut'en. ⁷ 'Et usda hoh 'ilhunuh ts'eke, Samaria whut'en, 'en too kéya. 'Et Sizi ndi yúlhni, "Too sugha nínkaih!" yúlhni. ⁸ Dich'oh zeh 'int'ah, yugha hoodul'eh keyah ts'ih ts'iyi hootekulh ts'ih whehándel 'et huwa. ⁹ 'Et ndun Samaria ts'eke 'en 'uyúlhni, "Nyun Lizwif 'int'ah 'ink'ez si Samaria ts'eke 'ust'ah, 'ink'ez di ka dini too suts'un ka' dini?" Lizwif, 'en Samaria whut'en 'aw buka cha'hunízun 'et huwa 'utni. ¹⁰ 'Et Sizi ndi yúlhni, "Ndi Yak'usda huwa íni'ai, 'i soo cho t'enínzun t'eh, 'ink'ez ndun 'utni nyulh yálhtuk hoh too nts'u ka 'utni, 'en t'enínzun t'eh, 'et nyun 'uda oodolhkut 'ink'ez ndai too bugha hiye khuna, 'i da nughá yoolhdzeh ínle," yúlhni. ¹¹ 'Et ndun ts'eke ndi yúlhni, "Nyun 'aw be ta'ónkalh 'i chaínt'ih, 'ink'ez njan too k'et nádalhdzat, nts'e na'a ndi too be ts'úkhuna, 'i be 'útankalh?" ¹² Netsuh whudelhdzulh Jacob 'en njan too k'et negha óoni'ai. Didut, buye'kah, 'ink'ez bughunai teh, njan too k'et 'et too hutnai ínle, 'et huwa nyun buba nus incha nínzun ih?" yúlhni. ¹³ 'Et Sizi ndi yúlhni, "Ndunnah njan too k'et too utnai, doo chah zeh ta'hóosde hulhli, ¹⁴ 'et whunts'ih ndunnah too bugha ítelhdzoh, 'i hiyetnai t'eh, 'aw 'o 'at ta'hóde ghaít'ah. Ndun ndi too bugha ínulhdze, 'i too 'ahoolhyez ninli 'int'ah, 'i be 'ahoolhyez wheni hukhutena," yúlhni. ¹⁵ 'Et ts'eke ndi yúlhni, "Hoh ndi too 'udíni 'i sugha nílhdzeh, 'et huwa 'aw 'o 'un tacha'ootuzesde 'ink'ez 'aw 'o 'at njan too ooskalh ghaít'ah." ¹⁶ "Nki 'anéh dini 'ink'ez 'en bulh dez náht'us," yúlhni Sizi. ¹⁷ 'Et ts'eke 'utni, "Aw suki hoolah hoh 'ust'ah." 'Et Sizi ndi yúlhni, "Soo' díní! Ts'ah'un na'a sudíni, 'aw nki chah hoolah dini. ¹⁸ T'éoonúszun skwunlanah nkikah ínle, 'ink'ez k'an bughu sinda, 'en chah 'aw nki ilah 'int'ah. 'Et ts'ah'un na'a 'udenja," yúlhni.

† 3:29 Ndun dune 'at uti 'en Sizi Gri dult'ah, 'ink'ez buk'esi, 'en John dune too be 'ulh'en dult'ah ni ho 'utni.

19 'Et ts'eke ndi yúlhni, "Nyun nus whunilh'en tuli' nint'ah? 20 Netsuh whudelhdzulh, 'en ndi dzulh k'ut 'et teni 'uhunilhzun inle. 'Et nuhwheni 'udúhni Jerusalem 'et 'ilhun whuz'ai, 'et dune teni 'uhunoolhzin huba 'uhoont'ah," yúlhni. 21 'Et Sizi ndi yúlhni, "Mba 'alha 'udoosni, 'ilhudzin dez whélt's'ulh hoh 'uhoont'ah, 'aw ndi dzulh k'ut k'us Jerusalem 'et zeh ilah Yak'usda 'en but's'u téni 'untelhdzin hoh 'uhoont'ah. 22 Nuhwheni ndai but's'u téni 'unulhdzun 'i 'aw nuhwheni be 'enudzúhun. Wheni ndun but's'u téni 'uznilhzun t'ezninzun, Lizwif, 'en hubula tah ts'ih zeh dune hudutejih 'et huwa. 23 Ndet whuz de whúdezulh k'an 'et huba 'uhoont'ah, ts'ah'un na'a teni 'uhunilhzun soo ndzi ndulhcho 'i be ts'ah'un na'a Yak'usda hits'un téni 'uhunoolhzin wheni. 'En ndunt'ah, 'en Yak'usda buka' ninzun but's'u téni 'uhunoolhzin ka. 24 Yak'usda 'en nudúdeh 'i unli ho 'int'ah. 'Ink'ez ndunnah hits'un téni 'hunilhzun, 'en ts'ah'un na'a buyégha be hits'un teni 'unoolhdzin huba' hoont'ah," yúlhni. 25 'Et ndan ts'eke ndi yúlhni, "T'éoonúszun ndan Messiah whusatéyahl, ndan Christ hiyúlhni, 'en whusaínya t'eh, dutsuk newhutelhtun." 26 'Et Sizi ndi yúlhni, "K'an 'et ndan nyulh yáhlhtuk, 'en si usdli hoh 'ust'ah." 27 Soo 'et ndutni 'aw 'et 'ustle' udeja hoh, yugha hoodul'eh whusanáhedel. Tube huba hooncha Sizi ndun ts'eke 'en yulh yáhlhtuk, 'et whunts'ih 'aw 'ilhunuh nts'ih chahiyoodulhkt, "Di ka ndun ts'eke 'en bulh yáhlhtuk?" k'us, "Ndet 'et nahoote'alh?" chahidínil. 28 'Et ndun ts'eke too ye kuya 'i chah 'aw 'et nínin'ai 'ink'ez keyah ts'ih whenája. 'Et dune ts'iyawh ndó bulhni, 29 "Anih! Ndu dune noolh'en si! Nts'oh tula né'zuste'en inle, ts'iyawh ndusúlhni. 'En tulih Christ 'int'ah?" hubúlhni. 30 'Et huwa soo ts'iyannah keyah ts'ih hahánde! 'ink'ez Sizi highu nindel. 31 'Et ho da yugha hoodul'eh 'uyúlhni, "Rabbi, na'int'ahl!" 32 'Et Sizi ndo búlhni, "Uda ndi ts'iyi 'aw nuhwheni t'enuzulh, 'i úst'i." 33 'Et yugha hoodul'eh dich'oh 'úlhodutni, "Uyoon dune yute'elh 'i yuba whusayánla ho tulih ni?" 34 'Et Sizi ndo búlhni, "Ndun whuz de sutel'h'a, ndet suts'u húkwa' ninzun, hoh tune'óost'en 'ink'ez be 'ut'en lhadóosdeh huba 'uhoont'ah. Ndi 'i zeh suts'eyi 'int'ah. 35 'Awhuz dink'i sanun whuz'ai, t'l'o 'utelilh whuts'un. 'Et whunts'ih 'un whudusni hoh soo zélt's'ai, soo cho nuhwhuna be whunulh'en. T'l'o k'ut 'aw 'et whudezgi t'l'o 'utenilh huba. 36 Ndan whut'as, 'en huba k'elha hóle, 'ink'ez ndan 'ilhodughulhdzeh 'en, 'et ndunnah 'ilhunabughesde, 'en 'ilhuz wúle hiye khúna, 'i bugha itélt's'ulh. 'Et huwa ndan 'a'nule 'ink'ez ndan 'ilhodughulhdzeh, nahúlt'ah 'en hóntelhnik. 37 'Et whuz na'a daja ni 'alha 'utni, "Ilhunuh dune 'en whuye' nule 'ink'ez 'uyoon dune 'en ha' nule.' 'Et ndi 'utni 'i 'alha 'uhoont'ah. 38 'Aw whutsah da cha'záht'en 'et whunts'ih whetél'h'a na'oolhdzoo wheni. Whuz whutsuh da 'uyoon suba 'et'en inle. 'Et k'an nuhli whusáhdel 'ink'ez 'uyoon ha' nanla 'et ha' nilhla," hubúlhni. 39 'Et ndun ts'eke, njan keyah whut'en, 'en ts'iyannah hubadáni, "Dast'en inle, ts'iyawh ndusúlhni," ni. 'Et huwa 'en bughunek bugha lhannah Samaria whut'en huba 'alha' yint'ah suli. 40 'Et huwa Samaria whut'en dune Sizi highu nindel hoh hubuzih ónda hiyúlhni. 'Et huwa nat dzin 'et hubuzih inda. 41 Bughunek 'i bugha tube 'o no unelít'suk, 'en bugha hubaba 'alha 'uhoont'ah. 42 'Et ndun ts'eke 'uhiyúlhni, "Aw nyun nghunek 'i bugha zeh ilah neba 'alha' 'int'ah, whenich'oh bughunek ts'udánts'o. 'I bugha 'alha ndun 'en dune telhyis wheni, Christ, 'en ndi yun k'einya t'ets'onanzin," hiyúlhni. 43 Nat dzin inle hoh Sizi Galílee yun k'ut ts'ih whénya, 44 'ink'ez dich'oh hoh ndútni, "Yak'usda be nus whúnilh'en dich'oh dukeyah inda, 'et whunts'ih, 'aw chahidílti," ni. 45 'Et Galílee yun k'ut ts'ih haínya hoh ndunnah Galílee whut'en 'en dune tube huhóont'i hubughu ninya. Didut chah Jerusalem dzenis whuti nduhóolyez hoh 'et 'uhet'en 'ink'ez Sizi hiniilh'en hoh hubunalh hooncha túne' 'ust'en. 46 'Et doo chah Sizi Galílee yun k'ut, keyah Cana huwhútni ts'ih lhunásja. 'Et 'uja too, 'i mai too yulhtsi inle. 'Et 'ilhunuh dune keyah dune tsuh whudélhdzulh buye' tube únduda keyah Capernaum huwhútni 'et. 47 'Et Sizi Judea yun k'ut ts'ih haínya 'ink'ez Galílee yun k'ut whuz tezya, 'et whulh úduzts'ai hoh yuts'un ninya, Capernaum ts'ih dudulh nátoot'as buye' 'aw 'et datétsah, 'en soo ná'yooleh, 'et hukwa yuts'un tedudlih. 48 'Et Sizi ndi yúlhni, "Nyunalh huwa 'int'en tune' 'ust'en 'ink'ez hooncha tune' 'úst'en t'eh, 'et t'eh zeh mba 'alha 'oost'e." 49 'Et ndun keyah dune tsuh whudélhdzulh ndi yúlhni, "Sumoodih 'anah soo 'a! Siyaz datétsah whutsah da!" 50 'Et Sizi ndi yúlhni, "Naíndalh, nye' khuna." 'Et ndun dune daja yulhni, Sizi yuba 'alha deja 'ink'ez whenája. 51 'Awhuz bukoo whuts'un nádalh hoh, be' ustle hidudezde! 'ink'ez, "Nye' khuna," hiyúlhni. 52 'Et huboodulhkt, "Soo nts'oh da whudézulh hoh soo na'uja?" 'Et hiyúlhni, "Hulhda 7:00 'uhunit'oh hoh ndi dada but's'u háidelt's'ut." 53 'Et ndun dune t'ewhunínzun soo hoh wheghah whezulh hoh Sizi ndi yúlhni, "Nye' khuna." 'Et didut 'ink'ez 'on ghoh 'int'ah tubulh, ts'iyawh Sizi bugha hubaba 'alha' yint'ah suli. 54 'Et Judea yun k'ut ts'ih haínya 'ink'ez Galílee yun k'ut 'et ninya hoh whulh nat 'i yun k'ut Sizi hooncha tune' 'ust'en.

5

Tadez'ai Bethesda huwhútni, 'et Sizi 'ilhunuh dune soo ná'yínl

¹ Njan hoh tune' whust'en hukw'elh'az 'et Lizwif budzenis whuti 'et wheni Sizi Jerusalem ts'ih whinya. ² Nyoh Jerusalem 'et sheep ba da'dentan hoonli, 'et wheghah tádez'ai whuz'ai. Njan tádez'ai, 'et Hebrew k'una'a Bethesda huwhútni, 'et whunat skwunlat bun tsilh t'ah whuzdla. ³ Njan bun tsilh t'ah 'et tube lhanah nduda 'et husdla. Bulunah chahuwhés'en, 'ink'ez bulunah hubódin'ai, 'ink'ez bulunah chah nchahúghusna. 'En ndi too nutughetnah, 'et huba hihl'i. ⁴ Soo nenaódughidzuk te'whut'ih totsuk, lizas ndus de hadúdoh 'ink'ez tadez'ai, 'et too nunáhighelnaih. Ndan soo 'udechoo toot tayih 'en, nts'oh dant'i dada be nduda, 'et whunts'ih soo na'ut'ih. ⁵ 'Ilhunuh dune tat lanezi 'o 'at lhk'udit (38) naóodezut, 'en 'et ndúda. ⁶ 'Et sulhti hoh Sizi yunilh'en. T'ewhunúnzun tube sa 'et ilhte. 'Et ndi yúlhni, "Soo ná'tantnilh hukwa' ninzun ih?" ⁷ 'Et 'ahoh dune nduda 'utni, "Ndi too nunaghetnaih teh, 'aw dune tasóolhtelh hoolah. 'Awhuz whuts'un húkwa 'ust'en hoh 'uyoon whusayih 'ink'ez sutsun tayih." ⁸ Sizi 'et ndí yulhni, "Didinyih, kw'usinti 'i ílhchoot, 'ink'ez ninya!" ⁹ 'Et 'ahoh dune nduda soo ná'uja. Yuk'usti 'i yílhchoot, 'ink'ez tezya. Lizwif nahulyis 'et dzin 'et 'uhójo. ¹⁰ Ndan dune soo ná'uja, 'en Lizwif ndi hiyúlhni. "K'an dzin nahulyis ho' uhoont'ah. 'Aw bukw'usinti 'i 'aw nólhchoos huba chahóot'ah!" ¹¹ 'Et ndo búlhni, "Ndan soo ná'sinla, 'en 'usúlhni, 'Kw'usinti 'i ílhchoot 'ink'ez ninya, 'sulhni." ¹² 'Et huwa hiyoodulhkut, "Ndan ho' int'ah, ndi kw'usinti 'i ílhchoot 'ink'ez ninya nyúlhni 'en?" ¹³ 'Et ndun dune dich'oh chah 'aw t'eyunízun ndan 'uyínla soo ná'yínla. Tube lhanah dune tadez'ai, 'et 'uhut'en hoh Sizi whu'iz ts'ih whenya, 'et huwa 'aw t'echahínzil. ¹⁴ Njan 'et ndúhooja hukw'elh'az luglez whucho 'et Sizi ndun nayilhti 'ink'ez ndi yúlhni, "Dahooja, k'an 'aw 'et soo ná'inja. Lubeshi 'ilh'en 'ustl'e' oneh, doo ka 'o nus hoontsi' 'et ts'ih ngha hólts'it!" ¹⁵ 'Et ndun dune whenája 'ink'ez Lizwif hubudáni Sizi 'en 'uyínla soo ná'yínla. ¹⁶ 'Et huwa Lizwif Sizi dzuh nahidilhdzut 'ink'ez hituzelghel'h 'et hukwa húnuta. Njan nahulyis dzin 'et hoh tune' 'ust'en 'et hukwa. ¹⁷ 'Et whunts'ih Sizi ndo búlhni, "ABá 'ahoolhyez 'ut'en, 'et huwa si chah 'oost'en huba 'uhoont'ah." ¹⁸ 'Et hukwa Lizwif 'o nus hituzelghel'h hukwa' huninzun. 'Aw nahulyis dzin lhk'onínyuz 'et huwa zeh ilah, 'ink'ez chah Yak'usda 'en be'ABá yulhni. 'Et ndutni hoh 'et bugha ts'ih Yak'usda yulh lhúgha 'int'ah ni, 'et huwa hituzelghel'h hukwa' huninzun.

Sizi Yak'usda buYe' unli 'ink'ez ts'iyannah hubugha ndoh sulí, 'et be'ABá yugha óoni'ai, 'et wheóobunlhtan.

¹⁹ 'Et Sizi 'et ndo búlhni, "Soo ts'ah'un na'a 'un whúdsni, si Yak'usda buYe' usdli, 'et whunts'ih 'aw sich'oh hukwa' nuszun tune' 'oost'en ghaít'ah. Yak'usda se'ABá nts'oh ne'út'en nulloh, 'et whuz na'a zeh buYe' ne'út'en. ²⁰ Se'ABá buYe' yuk'entsi' 'et huwa ts'iyai tsuk be 'ut'en k'ah whénulhtun. det whunal'h'en, 'et 'o nus 'ut'en k'ah hooncha, 'et whuyúntelhtun. 'I be tube nuhwhuba hóoncha. ²¹ Se'ABá 'en 'ut'en, yahadla 'en dinabudilé 'ink'ez ndunnah hubuka' ninzun, 'en 'ilhuz hiye khúna 'i hubugha yú'aih. Whuz na'a zeh si Yak'usda buYe', ndunnah hubuka' nuszun, 'en 'ilhuz hiye khúna 'i hubugha yús'aih. ²² Se'ABá 'en 'aw dune ba nahéyelh ilah, k'us buYe' 'en dune ba nahooyeh, 'et yutl'ahó'ai. ²³ Njan 'et ndúja, 'et huwa buYe' dune ts'iyannah 'en hidóolhti nts'e na'a be'ABá hidéilhti hukw'una'a. Ndunnah buYe' chadílhti 'en 'aw be'ABá 'en chah chahidílhti, 'ink'ez 'en 'uyínla buYe' whusayálh'a inle.

Ndunnah sughunek ílhchoot 'ink'ez ndun whuz de sútelh'a, 'en hubugha hububa 'alha' 'int'ah, 'en 'ilhuz hiye khúna 'i hiyít'i.

²⁴ "Soo ts'ah'un na'a nuhwhudúsní, ndunnah sughunek ílhchoot 'ink'ez ndun whuz de sútelh'a, 'en hubugha hububa 'alha' uhoont'ah, 'en 'ilhuz hiye khúna 'i hiyít'i. 'Aw hubuna'doodeh ghaít'ah, 'uda be dats'útsaih 'i hiye ghóozdel 'ink'ez 'ilhuz hiye khúna, 'i hiyít'i. ²⁵ Soo ts'ah'un na'a 'un whudúsní, ndet whuz de whúdezulh k'an 'aw 'et néwhults'ut. K'an 'aw 'et yahadla Yak'usda buYe' bughunek hidutés'o, 'ink'ez ndan hidánts'o, 'en hukhutenalh. ²⁶ Se'ABá 'en dich'oh hiye khúna 'i yit'i. 'Et whuz na'a zeh buYe', 'en chah be khútna 'i dich'oh yit'i, 'et yugha óoni'ai. ²⁷ 'Ink'ez ts'iyannah hubugha ndoh 'oot'e, 'et chah yugha óoni'ai. Yak'usda buYe' unli 'ink'ez yinkak dune ye' chah unli, 'et huwa ts'iyannah dune huba nahuteyelh huba 'uhóont'ah. ²⁸ Daja 'un whudúsní 'aw nuhwhuba hócha gunih! 'Aw 'et whuz de whúdezulh, 'et ts'un k'ut yahadla chah highunek hidutés'o, ²⁹ 'ink'ez dinahudutédlh. Ndunnah 'ut'en unzoo 'i 'ahiyulh'en, 'en dinábudutélelh 'ilhuz wheni hukhutena, 'ink'ez ndunnah hoontsi' tune' húst'en, 'en chah dinábudutélelh 'ilhuz wheni dzuh nahutezet huba nahuteyeh. ³⁰ 'Aw sich'oh ndúhoont'ah whunóolh'en ghaít'ah. 'Aw sich'oh hukwa' nuszun tune' 'óost'en ghaít'ah. Nts'oh tula se'ABá suts'u húkwa' ninzun hoh teh zeh ne'úst'en. 'Et huwa dune ba nahutesyeh t'eh, se'ABá súlhni, 'et whuz na'a zeh dune ba nahusyeh, 'et ts'ah'un na'a 'uhoont'ah. ³¹ Sich'oh sugha 'un whudúsní t'eh, 'aw nuhwhuba 'álha cha'zóost'e. ³² 'Et 'uyoon 'int'ah, 'en si sugha ts'iyannah dune wheóobunlhtun 'ink'ez si sugha daja ni, 'alha' uhoont'ah 'et t'ewhunúszun. ³³ 'Et nuhwheni 'uyoon, 'en John ts'un wheóobal'h'a, 'et daja ni, 'et khunek 'alha' 'int'ah 'i be hubudáni. ³⁴ 'Aw dune si sugha daja ni, 'et huwa zeh ilah, njan ndúhoont'ah huwa ndun nuhwhudúsní, 'et huwa whedóohjih,

'et huwa ndun whudúsní. ³⁵ John 'en too dez'k'un 'ink'ez be whét'en, 'i hubut ts'u hayáandi 'et ndánt'e. 'Astl'iyaz wheni ndi be né'hoot'en, 'i be ndunwhúhlni inle. ³⁶ 'Et whunts'ih John si sugha 'uyoon wheóobunelhtan, 'o nus 'uhóolcho, 'et whust'i. Ndi 'ut'en 'i se'aBá stl'ayá'ai lhadóosdeh wheni, 'i 'ut'en 'aw 'i zeh bughá khusna, 'i bugha 'uyoon t'ehonózin, se'aBá 'en whuz de súdeh'a. ³⁷ 'Ink'ez se'aBá, ndun whuz de súdeh'a, 'en dich'oh si sugha ts'ah'un na'a whulhtsi. 'Aw yalhtuk chah suduzah'ts'o, 'ink'ez dant'ah unli 'aw chasé'en. ³⁸ 'Ink'ez bughunek 'aw chaóozah'tun. Ndund whuz de yúdeh'a 'aw nuhwhuba 'alha' cha'ít'ah, 'et huwa bughunek 'aw nuhwhéyah chadí'ah. ³⁹ Yak'usda bughunek 'uk'une'úsduguz, 'i be 'ilhuz hiye khúna 'i aht'i nahzun, 'et huwa 'áht'en soo cho hoodulhú'eh, 'ink'ez ndi khunek 'uk'une'úsduguz, 'i si sugha zeh 'int'ah. ⁴⁰ Si sugha 'ilhuz wule hiye khúna 'i 'ooh't'e, 'et whunts'ih 'aw suts'u tóohdelh hukwa cha'nuzuhzun. ⁴¹ 'Aw dune ye súdeh'ti 'i wulhchoot ghaít'ah. ⁴² 'Et whunts'ih nuhwheni nuhwhugha ts'iyawh t'éoonúszun. Nuhwhuyuh ts'ih daht'ah hoh 'aw Yak'usda buk'echatsi' 'et t'ewhunuszun. ⁴³ Se'aBá 'en boozí bugha whusáya, 'et nuhwheni 'aw suka cha'nuzáhzun, 'et whunts'ih 'uyoon teh dich'oh buboozi bugha whusáinya t'eh, 'et t'eh da 'en buka' noohzin. ⁴⁴ Nuhwhenich'oh nuhtah chaoodúlhti. 'Et whunts'ih, ndai be 'uzdélhti 'i Yak'usda dich'oh but's'u haidelts'ut, 'i 'aw bakancha'zaht'o 'et huwa nts'e na'a nuhwhuba 'alha' 'uwhutét'ilh? ⁴⁵ Se'aBá 'en bubut nuhk'éhos'alh noohzin gunih! 'Uyoo chah hoonli. Ndi khunek Yak'usda neba lhuhezuya, 'i Moses 'en yutl'aída'ai ínle, 'i but'anínuhtan, 'en, 'i nuhk'éhoo'ai. ⁴⁶ Ndi Moses 'uk'uné'uzguz 'i, nuhwhuba 'alha' 'int'ah t'eh, 'et si sugha chah da nuhwhuba 'alha' 'uhót'e, Moses si sugha 'uk'uné'uzguz 'int'ah 'et huwa. ⁴⁷ 'Et whunts'ih ndi Moses 'uk'uné'uzguz 'i 'aw nuhwhuba 'alha' cha'ít'ah 'et huwa nts'e na'a suba si sughunek 'i nuhwhuba 'alha' 'oot'e?' 'et Sizi ndubulhni.

6

Huwa 'ét'en tune'ust'en, 'et huwa 5,000 dune 'en Sizi hiyoo'alh ka, 'i hubugha iní'ai

¹ 'Et hukw'elh'az Galilee bun k'ut 'et Sizi nyan whinki, 'i bun k'ut zeh Tiberias cha huwhútni. ² Hunduda hubutah tube huwa 'ét'en tune' 'úst'en 'et hinil'en, 'et huwa tube lhanah 'ilhunahuwéedel, 'en 'et nihínudelh. ³ 'Et Sizi yasúya hoh yugha hoodul'eh tubulh, 'on ndoh dzulhyaz k'ut 'et nátl'ahúdelts'i. ⁴ 'Aw 'et wheghah whudezulh Lizwif Yak'usda bulizas Hubutus Lhuséya whunahulnih. ⁵ 'Et nyoh dzulhyaz k'ut Sizi whunilh'en tube lhanah dune hits'ú lhadulh, 'et hubunilh'en hoh Philip 'uyúhni, "Nts'e lhes ts'ootekulh, ndunnah dune hite'alh huba?" ⁶ 'Et Sizi dich'oh daténilh 'et nt'éoonínzun, 'et whunts'ih Philip 'en yóolhzi ho 'utni. ⁷ 'Et Philip 'utni, "\$200.00 K'ah dust'l'us lhes 'aw huwa soo cha'nútsuk, 'i 'ilhunuh hinli 'et whunts'ih ntsólyaz hite'alh, 'i hiya'al." ⁸ 'Et 'ilhunuh Sizi yugha hoodul'eh, Andrew, Simon Peter bulhutsin, 'en Sizi ndi yúhni, ⁹ "Njan 'ilhunuh duneyaz netah 'ut'en, 'en lhes sut'e skwunlai (5) chah 'ink'ez lhookyaz nankoh (2) chah, 'i yit'i, 'et whunts'ih di wule l'ehuneltsuk yute'ulh huba?" ¹⁰ 'Et Sizi 'utni, "Ts'iyannah nitl'ahudoolts'ilh hubuhútni." 'Et 'uhut'en t'oyaz k'ut hoonli, 'et dune 5,000 bat'en hinli hoh 'et natl'ahudelts'i. ¹¹ 'Et Sizi lhes yilhchoot, Yak'usda ts'un suchanailya ni hoh tenadédli, 'ink'ez yugha hoodul'eh hubutl'áyanla, hudélhts'i ts'iyawh hubutah niyoowhni ni. 'Et lhookyaz yilhchoot 'ink'ez 'i chah 'et ndúyinla. Ts'iyannah soo 'uneltsuk hoh hiyilhchoot 'ink'ez hiya'al. ¹² 'Ink'ez ts'iyannah 'uhunesdai hoh, Sizi yugha hoodul'eh ndo búhni, "Ndaí ts'íttezkát, 'i soo ts'iyawh 'ilhunawoohlelh, 'et huwa 'aw tintaookat ghaít'ah." ¹³ 'Et huwa soo ts'iyannah 'an'al hukw'elh'az, ndai highá wéz'al 'i ndi skwunlai lhes sut'e 'ink'ez nankoh lhookyaz bulh, díhtezkat, 'i lhunahighezdlá hoh lanezi 'o 'at nankoh (12) hoongwun 'i dezbu. ¹⁴ 'Et ndunnah dune honal'h'en hoh Sizi dahoolcho 'uja, "Et 'alha' hoot'ah hoh ndun 'en nus whunilh'en 'et njan yun k'e teyalh, 'en 'int'ah," utni. ¹⁵ 'Et Sizi t'éwhunínzun hubudayi cho tele, 'et k'ehinté't'a hukwa' hunínzun, 'et huwa doo chah zeh dich'oh dzulhyaz k'uz whenája.

Sizi too k'ut nuya

¹⁶ 'Aw 'et hulgha suli hoh yugha hoodul'eh 'en bun k'ut ts'ih whenahedel, ¹⁷ 'ink'ez ts'i be nahédel nyan keyah Capernaum ts'ih whuz nahutekelh hukwa' hunínzun. 'Aw 'et tube tsahólhgus suli 'ink'ez Sizi 'awhuz bughu nachasdak. ¹⁸ Tube nilhtsi ulhtus, 'et huwa too k'ut tatsi díncha suli. ¹⁹ 'Aw 'et bun k'ut l'ulcho 'uhut'en hékelh hoh, Sizi too k'ut uyalh hoh hitelh'en, 'ink'ez 'aw 'et hubuts'i hubughah haínya hoh tube hiyenehujoot. ²⁰ 'Et, "Aw senlhujut ílah, si 'ust'en!" hubúhni. ²¹ 'Et ndo búhni hukw'elh'az huóont'i hoh hubuts'i be naja. 'Et hubughu denája íbulh, 'a hoh nts'e yun k'ut hutézi, whuz yáhuuki.

Sizi 'ilho huwezel ndo búhni, "Si ndi lhes 'ilhuz wule hiye khútena, 'i 'ust'ah"

²² 'Om bun dzin 'et ndunnah bun k'ut ts'ih 'ilho huwezel ínle ts'iyaz 'ilho zeh 'et hinalh'en ínle, 'et huwa Sizi 'aw yugha hoodul'eh hubughut denachaídaal, hi'et whenadúki t'éhonínzun. ²³ 'Et whunts'ih ndet neMoodihtí Yak'usda ts'un lhes ba tenadédli 'ink'ez dune tainínla

huyoo'alh wheni, 'et whuzih, 'et hukw'elh'az 'uyoo ts'i chah Tiberias whuz de hainkat. ²⁴ 'Et ndet 'ilho huwezdél ts'iyawh t'ehonanzin Sizi chah hoolah 'ink'ez yugha hoodul'eh chah ts'iyawh chah huhóolah, 'et huwa didut chah ts'iyawh ts'i be hándel 'ink'ez nyan Capernaum ts'ih whehánci Sizi hikunúta wheni. ²⁵ 'Et ndunnah 'ilho huwezdél bun k'ut nyan nahuninki hoh Sizi nahiyilhti 'ink'ez hiyoodulhkt, "Rabbi nkeda njan 'et nínya?" hiyulhni. ²⁶ 'Et Sizi ndo búlhni, "Soo ts'ah'un na'a 'un whudúsi, 'aw njan nuhnal huwa 'ét'en túne' 'ust'en, 'et huwa zeh ilah skunáhta. Ndi lhes nuhgha ní'ai, 'ink'ez be soo 'uhja, 'i ka zeh 'aht'en skunúhta. ²⁷ Ndi naht'alh 'i hoolah nadleh ho' 'int'ah, 'aw 'i ilah bukunáhta, k'us ndi ah'alh 'i dune 'ilhu z wule beye khútena, 'i zeh bukunóohta. Yinkak dune ye, 'en 'i nuhwughá yoo'alh, be'aBá Yak'usda 'en yugha óoni'ai, 'en behóodel'en, buYe' 'int'ah 'et huwa." ²⁸ 'Et 'uhiyúlhni, "Dats'út'en hoh ndi Yak'usda be 'ut'en 'uts'utéh'ilh?" ²⁹ 'Et Sizi ndo búlhni, "Ndu dune Yak'usda nuhts'u whusayáhl'a, 'en nuhwuha 'alha 'oot'e. Ndi 'i Yak'usda be 'ut'en, 'i 'int'ah." ³⁰ 'Et 'uhiyúlhni, "Dant' 'ut'en 'utal'h'ilh? 'Ilhunuh huwa 'ét'en neba 'uhoonleh, 'et t'eh ts'onoolh'en, 'ink'ez neba 'alha 'ont'e. ³¹ Wheni netsuh whudelhdzulh 'aw dune chahóot'ih ts'ih manna ndus de hainkat, 'i hiya'al. Yak'usda be' dustl'us k'ut 'uk'une'úsdu guz bughunek, 'i 'utni, 'Lhes yak'uz háinkat, 'i bugha íni'ai hiyoo'alh wheni," hiyulhni. ³² 'Et Sizi ndo búlhni, "Soo ts'ah'un na'a 'un whudúsi 'aw Moses 'en bugha ílah ndi lhes yak'uz háinkat, 'i nuhgha yá'aih inle, 'et k'us se'aBá 'en 'ut'en yak'uz wuhles nuhgha yú'aih. ³³ Ndi Yak'usda bules 'en 'int'ah ndus de yak'uz háinya 'ink'ez yinkak whudune 'ilhu z wheni hiye khútenal 'i bugha íni'ai." ³⁴ 'Et 'uhiyúlhni, "NeMoodihti, k'an whuts'un 'ahoolhyez ndi lhes 'i negha óon'alh." ³⁵ 'Et Sizi ndo búlhni, "Si 'ust'ah ndi lhes ndai dune yugha khúna 'i usdli. Ndan sughuyih, 'en 'aw 'ilhu z wheni buye'óolts'ilh ghaít'ah, 'ink'ez ndan si buba 'alha' 'ust'ah, 'aw 'ilhu z wheni ta'hóde ghaít'ah. ³⁶ 'Et 'un whudúsi, k'an sunulh'en 'et whunts'ih 'aw nuhwuha 'alha' cha'úst'ah. ³⁷ Ndu nah 'en se'aBá sugha buninla, 'en suts'un hutoodelh, 'ink'ez ndan sughuyih, 'aw hubuch'a naóolhu'ah ghaít'ah. ³⁸ 'Et húkwa ndus de yak'uz ts'ih háya. 'Aw sich'oh hukwa' nuszun tuné' test'en huba ílah, ndun whuz de súdehl'a, 'en nts'oh tula daóotenilh hukwa' ninzun, 'i 'ut'en 'óosdeh wheni whusáya. ³⁹ 'Ink'ez se'aBá, whuz de súdehl'a, 'en ndunnah sugha buninla 'aw 'ilhunuh whunts'ih yudóonih hukwa cha'nízun, 'ink'ez dek'elh'az dzin t'eh dinabudutélelh. ⁴⁰ Ndu nah Yak'usda buYe' t'eínízun 'ink'ez 'en buba 'alha 'uyint'ah, 'ilhu z wheni hiye khúna 'i hiye'tét'ilh, 'ink'ez dek'elh'az dzin t'eh 'en dinabudutélelh. Ndu whuz de súdehl'a njan 'et hukwa' ninzun 'et huwa," hubúlhni. ⁴¹ 'Et Lizwif 'en Sizi hich'a yáwhenilhtuk, "Datni hoh 'utni ndi lhes yak'uz ts'ih halts'ut 'i 'ust'ah ni?" ⁴² 'Ink'ez chah 'uhutni, "Nilh'en lhe'hoont'ah k'una'a yalhtuk! Ndu 'utni, 'en Joseph buye' Sizi 'en 'int'ah, 'ink'ez be'abá chah, be'ama chah, t'ébuznínzun. Nts'e na'a 'utni ndus de yak'uz ts'ih háya ni?" hutni. ⁴³ 'Et Sizi ndo búlhni, "Aw nuhwheni tah sughu yáhtuk ílah! ⁴⁴ Ndu nah se'aBá sts'ó bunilht'uk, 'en zeh suts'un hutoodelh, 'ink'ez dek'elh'az dzin t'eh 'en dinabudutélelh. ⁴⁵ Ndu nus honilh'en, 'en ndi 'i hik'une'úzguz íne, 'Yak'usda 'en ts'iyannah hubodutelh'eh,' 'Et huwa ndunnah se'aBá bughunek hidánts'o 'ink'ez 'i bugha huhodul'eh t'eh, 'en 'uhutenilh suts'un hutedulh. ⁴⁶ 'Aw se'aBá ya'en hoolah 'et whunts'ih ndun Yak'usda butsu háinya 'int'ah, 'en zeh ya'en. ⁴⁷ 'Alha 'un whudúsi, ndunnah si buba 'alha' 'ust'ah, 'en 'ilhu z wule hiye khúna 'i hiyít'i. ⁴⁸ Si 'ust'ah lhes dune ye khúna, 'i usdli. ⁴⁹ Nuhtsuh whudelhdzulh, 'en 'aw dune chahóot'ih ts'ih huwhut'í inle, 'ink'ez manna 'i hiya'al, 'et whunts'ih yahadla. ⁵⁰ 'Et ndi lhes yak'uz ts'ih háinkat, 'i, ndan ya'al t'eh, 'aw dahóotsah ghaít'ah. ⁵¹ Ndi lhes yak'uz ts'ih háinkat 'i, 'ilhu z wule wheni hiye khúna, 'i 'ust'ah. Ndu nah ndi lhes ya'al t'eh, 'en 'ilhu z wheni hukhutenal, 'ink'ez ndi lhes nuhgha té'alh, 'i suyst'e 'int'ah. 'Et ndi bugha ités'alh, 'i hubugha yinkak whudune, 'ilhu z wule wheni hukhutenal," húbulhni. ⁵² 'Et doo chah ndunnah Lizwif 'et lkh'enahudidzut 'et nduhútni, "Nts'e na'a ndun dune buyust'e ts'ute'ulh?" hutni. ⁵³ 'Et Sizi ndo búlhni, "Ts'ah'un ndun whudusni, 'aw ndun yinkak dune ye' buyust'e cháh'ulh 'ink'ez buzkai chah cháhtn'il t'eh, 'et ndi 'ilhu z wheni hiye khúna 'i 'aw chatuzeht'ih hoh 'uht'ah. ⁵⁴ Ndan suyst'e ya'al 'ink'ez suzkai chah yétnai, 'en 'ilhu z wheni hukhutenal 'ink'ez 'udek'elh'az dzin t'eh dinabudutélelh. ⁵⁵ Suyst'e soo ts'uyi 'i 'int'ah, 'ink'ez suzkai chah soo ts'utnai 'i 'int'ah. ⁵⁶ Ndan suyst'e ya'al, 'ink'ez suzkai chah yetnai, 'en 'ilhu z wheni sulh 'útet'e 'ink'ez si chah bulh 'útest'ilh. ⁵⁷ Se'aBá, 'ilhu z wheni khuna, 'en whuz de súdehl'a. 'En bugha si chah 'ilhu z wheni khusna. 'Et whuz na'a ndan sk'ut dune unli, si sugha 'ilhu z wule hukhutenana. ⁵⁸ 'I 'int'ah, ndi soo lhes unli hoh ndus de yak'uz ts'ih háinya. 'Aw manna dulh nduchait'ah nuhtsuh whudelhdzulh 'aw dune chahóot'ih huwhut'í 'ink'ez hiya'al inle, 'et whunts'ih yahadla. Ndi lhes k'an bughu yalhtuk, 'i ndan ya'al, 'ilhu z wheni hukhutenal," hubúlhni. ⁵⁹ Sizi njan 'et ndutni inle keyah Capernaum huwhútni 'et luglez dune hodul'eh da.

⁶⁰ Lhanah yugha hoodul'eh daja hutni hidánts'o hukw'elh'az 'uhutni, “Njan whuneodul'eh, 'et neba howu whulna k'una'a 'utni. Nts'e na'a buk'úne' 'uztet'en?” ⁶¹ Sizi dich'oh t'éwhunínzun daja ni 'et huwa hubudzi yuh ts'ih hich'a yalhtuk, 'et huwa yugha hoodul'eh huboodul'eh, “Nuhwhuba dzuh 'udusni ih? ⁶² 'Ink'ez yinkak dune ye' ndohnts'e whutsuh da usda ts'ih, whuz nadalh nulh'en t'eh, daja ntehzilh? ⁶³ Ndoni 'en 'ut'en yinkak dune 'en 'ilhuz hukhutenalh bugha whu'aih. Dune yust'e yu'alh, 'aw hoonli chahoolah ho' hoot'ah. Ndi khunek be nóhwhulh yalhtuk, 'i Yak'usda buts'u haidankat, 'i 'int'ah 'ink'ez 'i be 'ilhuz wheni hukhutenalh. ⁶⁴ 'Et whunts'ih nuhtah bulunah 'aw nuhwhuba 'alha' cha'hoot'ah.” Sizi 'uda t'ooninzun ndunnah hububa 'alha' cha'hoot'ah, 'ink'ez ndun ye 'óotekulh, 'et chah t'ooninzun 'et huwa. ⁶⁵ 'Et Sizi 'utni, “Et huwa 'un whudúsni, ndunnah se'abá bugha óoni'ai, 'en zeh sts'un hutédulh ho' 'int'ah,” hubúlhni. ⁶⁶ 'Et whuts'un lhanah yugha hoodul'eh hich'a nasdel 'ink'ez 'aw 'o 'at highah lhúnasdel. ⁶⁷ 'Et Sizi ndunnah lanezi 'o 'at nannah (12) yugha hoodul'eh huboodul'eh, “Nuhwheni chah ih such'a natehdulh hukwa' nahzun?” hubúlhni. ⁶⁸ 'Et Simon Peter ndi yúlhni, “NeMoodihti, ndan simba buts'uztoodelh? Nyun zeh khunek 'ilhuz wheni be ts'úkhuna, 'i 'int'i, ⁶⁹ 'ink'ez neba 'alha' 'int'ah. T'éts'onínzun nyun Christ 'en 'int'ah. Yak'usda 'ilhuz wheni khuna, 'en buYe' 'int'ah!” hiyúlhni. ⁷⁰ 'Et Sizi ndo búlhni, “Alha nuhwheni lanezi 'o 'at nanah, 'en lhtahanhóla, 'et whunts'ih nuhtah 'ilhunuh 'en netsudule unli. ⁷¹ Judas Iscariot, Simon buye', 'en bugha yughi yalhtuk hoh 'utni, 'en 'utenilh, ye 'óotekulh t'éwhunínzun 'et huwa 'utni. 'En chah lanezi 'o 'at nanah 'ilhunuh butuh 'int'ah.

7

Sizi bulhutsinkah 'aw huba 'alha' cha'hóot'ah Sizi 'en Christ 'int'ah

¹ Njan hukw'elh'az Sizi Galilee yun k'ut zeh hoh nuséya. Lizwif hituzelghel'el hukwa' huninzun 'et whuch'a 'aw Judea yun k'ut nóya hukwa cha'nízun. ² Lizwif budzenis whuti, 'et 'ulbun be ko nihúwhulih* chah huwhútni, 'aw 'et nilhdukw whuz'ai. ³ 'Et bulhutsinkah khunek be 'uhiyulhni, “Njan huwinyalh 'ink'ez Judea yun k'ut ts'ih inyalh, 'et ndet nga hoodul'eh ndai 'ut'en bugha ghina 'et honolh'en. ⁴ Ndan ts'iyannah t'einóozin hukwa' nínzun 'aw whu'iz ne'oot'en ghaít'ah. 'Alha hooncha túne' 'int'en t'eh, ndi yun k'ut dune ts'iyannah nyun nga t'ehonóozin huba 'uhoont'ah!” ⁵ Bulhutsinkah 'en whunts'ih 'aw ndun Christ 'en 'int'ah 'aw huba 'alha' cha'hóot'ah, 'et huwa hoh tune' hiduni. ⁶ 'Et Sizi ndo búlhni, “Sutsuh whudezulh 'awhuz whusachawhulhts'it, 'et nuhwheni nuhwhuts'u whélt's'ulh, 'et 'ahoolhyez lhawhúndit'ah. ⁷ Ndi yun k'ut dune 'aw nuhwheni nuhwhuts'u dootnik ghaít'ah, 'et si suts'u hudutnik. Tink'us 'úhut'en ts'iyawh 'et hubugha ndo budúzni, 'et huwa. ⁸ Whute dzenis whuti ts'ih whuz ahdulh. Sughá whunt'ai 'awhuz 'aw lhachaduzusne, 'et huwa 'awhuz 'aw si dzenis whuti ts'ih toosya ghaít'ah,” hubúlhni. ⁹ Njan 'et ndubúdani hukw'elh'az Galilee yun k'ut 'et inda. ¹⁰ Bulhutsinkah dzenis whuti ts'ih whehandel hukw'elh'az, Sizi dich'oh chah whu'iz 'et whuz whinya, 'aw dune bunalh ilah. ¹¹ 'Et nyo dzenis whuti whutuh 'et Lizwif hika ités'en 'ink'ez 'uhutni, “Nts'e 'ut'en ho' 'int'ah?” hutni. ¹² 'Et 'ilho huwezdél dich'oh dutuh whu'izyaz hoh highu yalhtuk. Bulunah chah 'en unzoo hutni, 'ink'ez bulunah chah 'awundooh ts'iyannah nana'ah, 'et huwa 'en unt'si' hutni. ¹³ 'Et 'aw 'ilhunuh whunts'ih ts'et highu yachalhtuk, ndunnah Lizwif moodih hubé hunuljut 'et huwa. ¹⁴ 'Aw 'et dzenis whuti lhuhooolcho bat'en 'uw'hét'ilh, 'et Sizi ndoh luglez whucho ts'ih ninya, 'ink'ez dune huboodul'eh, ¹⁵ 'ink'ez daja ni Lizwif tube huba hooncha 'ink'ez 'uhutni, “Aw dune hoodul'eh ts'ih inda ilah, 'ink'ez nts'e na'a stabe 'o nus lhat t'éwhunínzun?” ¹⁶ 'Et Sizi ndo búlhni, “Nda be hoonwhudul'eh, 'i 'aw si 'ilhdzun cha ilah 'int'ah. Ndund whuz de sútelh'a, 'en buts'u haidelts'ut, 'i 'int'ah. ¹⁷ Ndund Yak'usda yuk'úne' tet'ilh hukwa' nínzun, 'en t'ehonózin, ndi khunek Yak'usda buts'u haidelts'ut 'i 'int'ah, k'us sich'oh sughunek be yalhtuk, 'et t'ehonózin. ¹⁸ 'Et dune dich'oh khuyanaluk t'eh, dich'oh dutéti 'et zeh hukwunúta hoh 'utni. 'Et whunts'ih dune yalhtuk, ndun whuz de yútelh'a, 'en yudutélti hukwunúta t'eh, 'en ts'ah'un na'a dune unli hó 'utni 'ink'ez tink'us ne'ut'en 'i 'aw bughi yóolah. ¹⁹ 'Aw ih Moses 'en ndi khunek buk'úne'ooht'en, 'i nuhwhutl'aída'ai, 'et whunts'ih 'aw hubuk'uncha'zúht'en, 'ink'ez di ka sutuzelghel'el hukwa' nahzun?” hubúlhni. ²⁰ 'Et 'ilho huwezdél 'uhiyulhni, “Ntsi' ndúdeh, 'i nyudínda! Ndan nyutuzelghel'el hukwunúta ho' dini?” ²¹ 'Et Sizi ndo búlhni, “Et nats'ulyis dzin 'ilhun 'ut'en, 'i ncha, 'i 'úsda, 'et nuhwheni tube nuhwhuba hóncha. ²² K'an daja nuhwhudutésniilh 'et hubugha nuní nahzut. Moses, 'en bugha buka dune ahli, 'i óonaht'as ínle. ('Aw Moses 'en bugha zeh ilah, nuhwhutsuh whudelhdzulh, 'en buts'u hawhélt's'ut hoh 'uht'en.) 'Ink'ez

* 7:2 Njan bun nehulih huwhútni, 'et t'lo 'uhulh'ih hukwell'az Lizwif 'uda Moses bulh dune chahóot'ih ts'e inle ho whúnahulnih. 'Et whutuh 'et Jerusalem 'et hiyulhbun be yah, 'i hoonli ts'ah'un na'a k'us tink'us 'uhóont'ah 'i bugha t'ets'oninzun ts'utni ho' ts'utni.

'et nats'ulyis dzin 'uskiyaz duneyaz whulih teh, 'o 'at nats'ulyis dzin 'et yuka dune unli, 'i hiyut'as. ²³ 'Et ndúhooont'ah hoh Moses be' dustl'us k'ut butulhúhesde k'ohyis whuch'a, nats'ulyis dzin 'et dzin whunts'ih 'uskiyaz dune whulih teh yuka dune unli hiyóot'as. 'Ink'ez di ka 'et si dune nats'ulyis, 'et dzin dune soo ná'usdla 'et hukwa sulh húnlhuch'e? ²⁴ 'Aw whunulh'en 'et huwa ilah dune ba nahahye, ts'ah'un na'a 'uhoont'ah hukw'una'a zeh dune ba nahoohyeh," hubúlhni.

Bulunah dune Sizi 'en Christ 'int'ah huninzun.

²⁵ Bulunah Jerusalem whut'en 'uhutni, "Ndunnah 'en tulih 'int'ah hituzilghelhel hukwa' huninzun? ²⁶ 'Et njan whunulh'en! Dune ts'iyannah tah usda 'ink'ez hubulh yáhtuk, 'et whunts'ih 'aw dune dachahidusnih. 'Aw whuz na'a cha'hoot'ah whutele ndunnah moodih, 'en t'ehonínzun tulih ndunnah 'en 'alha Christ 'int'ah? ²⁷ 'Et whunts'ih ndunnah 'en nts'ez de haínya t'ets'onínzun, 'et whunts'ih Christ whusaínya t'eh, nts'ez de haínya, 'aw 'ilhunuh whunts'ih t'ehonózin ghaít'ah," hutni. ²⁸ 'Et 'aw 'et nyo luglez whucho dune hoodulh'eh hoh Sizi soo khunek ti be ndo búlhni, "Nuhwheni t'esunázhun 'ink'ez nts'ez de haíya chah nt'eeonázhun, 'aw sich'oh sughá ilah whusáya, 'et whunts'ih ndun whuz de há sálh'a, 'en soo ts'ah'un 'en unli ho' 'int'ah, 'et 'aw nuhwheni t'enuzuhzun. ²⁹ 'Et 'en buts'u haíya 'et huwa t'enusuzun 'ink'ez 'en whuz de ha sálh'a!" hubúlhni. ³⁰ 'Et hukwa hiyóolhchoot hukwa hét'en, 'et whunts'ih buts'un whudelts'ulh 'awhuz whuchasawhulh'tit, 'et huwa 'aw dachahíyilil. ³¹ 'Et 'ilhuhowezdel hubutah lhanah 'en huba 'alha' yint'ah sulí 'ink'ez 'uhutni, "Ndun Christ whusaínya t'eh, ndun yenus túlih huwa 'ét'en teh tuné'tet'en? 'Awundooh!" hutni. 'Et huwa 'en Christ 'int'ah huninzun. ³² 'Et ndunnah 'ilhuhowezdel whuz na'a Sizi highu yalhtuk hoh Pharisee hubuduzts'ai, 'et Pharisee 'ink'ez náwhulnuk moodih, nélhghel whuz whéobuhah'a Sizi hiyóolhchoot ka. ³³ 'Et Sizi nt'ewhunínzun 'et huwa 'ilhuhowezdel 'en 'obúlhni, "Awhuz sáyaz tele 'et nuhwhulh 'utest'ilh, 'et 'ink'ez ndun whuz de ha sálh'a, 'en buts'un nátesdahl. ³⁴ Nuhwheni skunúhta 'et whunts'ih 'aw nasóolhtel ghaít'ah, 'ink'ez nts'e 'ust'ah 'aw nuhwheni whuz toohya ghaít'ah." ³⁵ 'Et Lizwif dich'oh 'ulhóduhni, "Nts'e teyalh hoh 'utni? 'Aw nats'oolhtel ghaít'ah néulhni. 'Udun yun k'ut whut'en, 'en butuz tulih teyalh, whuz Lizwif bulunah hahandel inle, 'ink'ez whuz tulih 'udun yun k'ut whut'en hubodutelh'eh? ³⁶ 'Ink'ez njan néulhni inle, 'Nuhwheni skunúhta 'et whunts'ih 'aw nasóolhtel ghaít'ah, 'ink'ez nts'e tesdahl ts'ih 'aw nuhwheni whuz toohya ghaít'ah,' 'et daja ni hoh 'utni?" hutni.

Sizi ndo búlhni, "Ndoni 'en nuhwhuts'u télh'alh."

³⁷ 'Aw 'et nuhwhújech cho whutah, 'et 'udek'elh'az dzin, 'et dzin dega nus hooncha. 'Et dzin 'et Sizi hubutah síyoin 'ink'ez soo khunekti be hubulh yáhtuk, "Ndan ta'óosde suts'un hutóodelh 'ink'ez tahóotnai! ³⁸ Ndunnah si huba 'alha' 'ust'ah, Yak'usda bughunek 'uk'une'úsduguz ndutni, 'Ndi too, 'i 'ilhuz wheni be ts'úkhutena, 'i 'en buts'u haíteli," hubúlhni. ³⁹ 'Et Sizi ndutni hoh Ndoni bugha hubulh yaíhtuk. Ndunnah 'en huba 'alha' yint'ah, 'en buyéduhtel's'ulh. 'Aw 'ahoh ilah. Sizi huba whudálhti hukw'elh'az t'eh, 'et nduwhútenilh.

Dune Sizi ndan 'int'ah huninzun hoh lhch'a níhudendel

⁴⁰ 'Et 'ilhuhowezdel hubutah ndi khunek hidánts'o hoh bulunah 'en 'uhutni, "Alha 'i be ndun 'en ndun ye nus whunilh'en bughu yatuk inle 'en 'int'ah." ⁴¹ 'Et bulunah chah 'uhutni, "Ndun 'en Christ 'en 'int'ah." 'Et 'uyoon chah 'uhutni, "Awundooh! Ndunnah Christ 'en Galílee ts'ih ih hatéyalh's ⁴² Yak'usda bughunek 'uk'une'úsduguz, 'i ndutni, David buts'uh háidanzut, 'en keyah Bethlehem huwhútni, David bukeyah íne, Christ whuz de ha téyalh," hutni. ⁴³ 'Et huwa ndunnah 'ilhuhowezdel ndun 'en bugha lhch'a nehúhendel. ⁴⁴ Bulunah, 'en hitéhlcholl hukwa' huninzun, 'et whunts'ih dachahíyilil. ⁴⁵ 'Et ndunnah nélhghel ndunnah náwhulnuk moodih 'ink'ez Pharisee 'en whuz wheobuhah'a, 'en chah hi'et whuz hanahédel hoh hubuhoodulh'kut, "Di ka whuz hachalhtel?" ⁴⁶ 'Et nélhghel 'uhutni, "Aw whutsu da 'uyoon dune 'en ndun dune k'una'a yachalhtuk." ⁴⁷ 'Et Pharisee 'uhutni, "Nuhwheni chah nuhwhunan'a ho ih 'udahni? ⁴⁸ Nuwheni moodih k'us Pharisee wheni chah neba 'alha' 'int'ah nahzun ih? 'Awundooh! ⁴⁹ 'Et whunts'ih ndunnah 'ilhuhowezdel luglez whucho, 'et ts'iyawh di chahílah 'uhint'ah 'et huwa ndai Moses yuk'uné'uzguz 'i 'aw beni be t'éhinízun!" hutni. ⁵⁰ 'Et Nicodemus, 'en 'ilhuh 'úlh'ek Sizi yughu ninya inle, 'en chah Pharisee hubulh 'ilhunuh unli hoh dulh Pharisee hubúlhni, ⁵¹ "Wheni neba khunek butulhúhesde 'i 'utni, dune bughunek uzdánts'o 'ink'ez be 'ut'en uznalh'en t'eh, 'et hoh ih whunts'i buba nats'uhoooyeh huba 'uhoont'ah." ⁵² 'Et 'uhíyúlhni, "Nyun chah ih Galílee yun k'ut ts'ih haínya inli? Yak'usda bughunek 'uk'une'usduguz 'i soo cho nilh'en, 'et nts'e nyeni be t'éoonóznin, 'aw 'ilhunuh whunts'ih nus whunilh'en, 'en Galílee yun k'ut ts'ih haínya hoolah!" ⁵³ 'Et 'aw 'et ts'iyannah bukoo ts'ih whenáhidel.

8

¹ 'Et Sizi dzulhyaz Olive hiyulhni, 'i yúk'uz whinya.

Ts'eke dune bulh lubeshi 'úhuleh hoh nahilhútus. Sizi highu hinlíhti 'ink'ez tse be hituzel-hghelhel hutni.

² 'Et 'om bun dzin soo 'uda 'et Sizi luglez whucho ts'ih ninya. Ts'iyannah dune highu nindel. 'Et nátl'adedá 'ink'ez whehobudunilh'e. ³ 'Et whubodulh'eh hoh ndunnah Moses be' dustl'us 'uk'ununa'úsduguz, 'ink'ez ndunnah Pharisee teh, ts'eke dune bulh lubeshi 'uleh hoh nahiyulhtus, 'en soo hubuniz 'et nihínilhti. ⁴ 'Et Sizi 'uhiyúlhni, "Neoodulh'eh ndun ts'eke 'en dune bulh lubeshi 'uhuleh hoh soo 'et naobuts'ulhútus. ⁵ Moses khunek butulhúhesde, 'i butl'aidét'ai, 'i k'ut 'utni, 'Ndunnah ndi lubeshi 'ulh'en, 'en tse be hubuts'uzoolhghelhel, 'ni. Nyun do 'et hubugha daja dini?" ⁶ 'Et 'aonilhka hiyóolhzhin hoonliyaz hukwa hik'éóote'ah 'et huka 'uhutni. 'Et Sizi nyuk 'uja 'ink'ez dulasgek be yun k'ut hukw'uné'uzguz. ⁷ 'Et 'awhuz hiyoodulh'kut hoh 'et njan nduk naja 'ink'ez ndo búlhni, "Nuhwheni nuhtah ndan lubeshi chait'ih, 'en 'udechoo tse be yuts'e 'oolh'is," hubúlhni. ⁸ 'Et doo chah yuk na'uja 'ink'ez doo chah yun k'ut hukw'u ne'úgzuz. ⁹ 'Et ndunnah hodánts'o hoh neyuh ts'ih bugha t'ets'oninzun* wheóobunelhtan hedich'oh chah lubeshi 'uhulh'en hínli, 'ink'ez 'ilhunuh hinli hoh hoonyan 'udetsah hedulh hoh ts'iyawh highu whenáhedel 'ink'ez ndun ts'eke dich'oh zeh Sizi yubut séyin suli. ¹⁰ 'Et Sizi nduk na'uja hoh ndun ts'eke whusahiyálhti 'en 'aw huhoolah honilh'en hoh ndun ts'eke ndi yúlhni, "Ts'eke ndunnah nk'éhoo'ai nts'e whenahedel? 'Aw 'ilhunuh whunts'ih ih mba nahooyeh ghaít'ah?" ¹¹ 'Et ts'eke ndi yúlhni, "Awundooh, 'aw 'ilhunuh whunts'ih huhoolah." 'Et Sizi ndi yúlhni, "Aw si chah mba nahooyeh ghaít'ah. 'Et huwa naindahl 'ink'ez 'aw whulh nat whuts'un lubeshi cha'zolph'en!" yúlhni.

Yinkak whut'en didut 'int'ah buba be whét'en 'i unli hubúlhni Sizi

¹² 'Et Sizi doo chah zeh hubulh yálhtuk hoh ndutni, "Si 'ust'ah yinkak whudune huba be whét'en 'i usdli. Ndan suneyalh, 'en 'aw tsahólh'gus yuh hutooya ghaít'ah, k'us ndai be whét'en, 'i higha 'ilhuz wheni hukhutenalh, 'i hitet'i," hubúlhni. ¹³ 'Et Pharisee 'uhiyúlhni, "Nyun ch'oh khuyanailtuk ho' dini, 'et huwa nghunek daja nedíni, 'i 'aw ts'ah'un cha'ít'ah." ¹⁴ 'Et Sizi ndo búlhni, "Nts'ez de háya nt'éoonúszun 'ink'ez nts'e tesyalh chah nt'éoonúszun, 'et huwa daja dusni, si sugha 'alha 'uhoont'ah, sich'oh 'údsusni 'et whunts'ih. 'Et nts'ez de háya 'ink'ez nts'e tesyalh nuhwheni 'aw t'éoonuzázhun. ¹⁵ Nuhwheni dune ba nahéhyelh, 'i 'aw dune ba nahusyeh hoolah. ¹⁶ 'Et si chah dune ba nahusyeh t'eh, ndi be nahusyeh, 'i ts'ah'un na'a 'int'ah. 'Aw sich'oh zeh ilah 'ust'ah, se'aBá, ndun whuz de sútelh'a, 'en sulh 'int'ah, 'et huwa ndi be dune ba nahéhyelh, 'i ts'ah'un na'a zeh 'int'ah. ¹⁷ 'Et whuz na'a zeh 'uk'une'úsduguz ndi khunek nuhwuhba butulhúhesde, 'i k'ut hoh ndutni, 'Nanah dune ndet huhonen lhgha 'úhudeja hoh howu yahulhtuk t'eh, 'et ts'ah'un na'a 'uhoont'ah,' ni hoh 'utni. ¹⁸ Sich'oh duba yanalhútuk 'ink'ez se'aBá ndun whuz de sútelh'a, 'en chah suba yalhtuk," hubúlhni. ¹⁹ 'Et hiyoodulh'kut, "Nyu'aBá 'en nts'e usda?" 'Et Sizi ndo búlhni, "Si 'aw t'esunuzázhun. 'Ink'ez se'aBá 'en chah 'aw t'echanuzázhun. Si t'esunázhun t'eh, se'aBá chah da t'enóohzin wule." ²⁰ Sizi ndi khunek 'i be yailhtuk luglez whucho 'et dune hoodulh'eh da. Nts'e sooneya nahulhdzooch, 'et dune hoodulh'eh. 'Et 'awhuz huba whudezulh whuts'un whezulh, 'et huwa 'aw chahiyílh'cholh. ²¹ 'Et Sizi doo chah ndo búlhni, "Nuhghu tesyalh. Ska itéh'en, 'et whunts'ih nuhwulubeshi bulh yatáhdlah, 'et huwa nts'e tesyalh ts'ih nuhwheni chah 'aw whuz toohdelh ghaít'ah." ²² 'Et doo chah ndunnah Lizwif 'ulhódotni, "Ndund dich'oh tulih na'dutuzelghel? 'Et huwa tulih 'utni, 'Nts'e tesyalh ts'ih nuhwheni chah 'aw whuz toohdelh ghaít'ah,' neúlhni?" ²³ 'Et ndo búlhni, "Nuhwheni ndi yun k'ut ts'ih hahdel, 'et si ndus de háya ho 'ust'ah. Nuhwheni ndi yun k'ut ts'ih hahdel, 'et si 'aw ndi yun k'ut ts'ih haizut ilah ho 'ust'ah. ²⁴ 'Et huwa ndun whudusni nuhwulubeshi bulh yatáhdlah. 'Aw nuhwuhba 'alha' cha'hóot'ah si ndun 'ust'ah 'et hubugha, 'et huwa nuhwulubeshi bulh yatáhdlah," hubúlhni. ²⁵ "Ndan inli ho' nint'ah?" hiyúlhni. 'Et Sizi ndo búlhni, "Ndund whudusni soo 'udechoo whuts'un, 'en zeh 'ust'ah. ²⁶ 'Awhuz tube lhat nuhwheni nuhwuhga howu yatélhtuk, 'ink'ez tube lhat nuhwheni nuhwuhga nahutesyeh whuz'ai, 'et whunts'ih ndun whuz de sútelh'a, 'en ts'ah'un na'a 'int'ah. Ndaí buts'un whudásts'o, 'et whuz na'a zeh yinkak whudune hubulh yálhtuk," hubúlhni. ²⁷ 'Et whunts'ih 'aw hubeni be t'ehonizun, be'aBá, 'en bugha hubulh yálhtuk ho 'utni. ²⁸ 'Et Sizi ndo búlhni, "Yinkak dune ye'nduk dube dibe' dulhtsi t'eh, 'et t'eh soo ts'ah'un ndan usdli, 'en 'ust'ah t'éoonóhzin. 'Ink'ez 'aw sich'oh duba moodih nasdli ilah, se'aBá nts'e na'a whusodalh'i, 'i khunek zeh be yálhtuk, ²⁹ 'ink'ez ndun whuz de sútelh'a, 'en sulh 'int'ah. 'Ahoohlhyez wheni se'aBá hóont'i zeh hoh

* **8:9** Ndi khunek, "neyuh ts'e hoh bugha t'ets'oninzun", 'i hoonli ts'ah'un na'a k'us tink'us 'uhóont'ah 'i bugha t'ets'oninzun ts'utni ho' ts'untni.

ne'úst'en, 'et huwa 'aw such'a nachasadak," hubúlhni. ³⁰ 'Et ndi khunek 'i ye yáilhtuk hoh tube lhanah 'en huba 'alha' int'ah suli. ³¹ 'Et ndunnah Lizwif, ndunnah Sizi yuba 'alha' int'ah, 'en ndo búlhni, "Sughunek 'óohtun 'ink'ez buk'úne 'uht'en t'eh, 'alha 'uhoont'ah hoh sugha hoodul'eh ahli. ³² 'Ink'ez 'et huwa ndai khunek 'alha' int'ah 'i t'enoohzin, 'ink'ez 'i bugha 'aw 'o 'un 'ulhna wahle ghaít'ah." ³³ 'Et 'uhiyúlhni, "Nuwheni Abraham but's'u hahwánda 'uts'int'ah. 'Aw whutsuh da 'uyoon ba 'ulhna chats'ílah, 'ink'ez di ka ne'díni, nuhshúla na'dutetnih nedíni?" ³⁴ 'Et Sizi ndo búlhni, "Soo ts'ah'un na'a 'un whudúsni, ndunnah lubeshi 'uhulh'en, 'en lubeshi ba 'ulhna hinli. ³⁵ 'Ndan koo 'ilhunuh 'ulhna unli, 'en 'aw 'ahoolhyez 'et 'usda ílah, 'et whunts'i ndan koo whudune buye', 'en 'ahoolhyez wheni, 'et 'usda. ³⁶ 'Et huwa ndun buYe' lubeshi ch'a nuhwhulanadutnih t'eh, 'et t'eh 'alha 'uhoont'ah 'aw 'o 'un 'ulhna wahle ghaít'ah. ³⁷ 'T'ewhunúszun Abraham but's'u háhde ahli, 'et whunts'ih sughunek 'aw buka cha'nuhzun, 'et huwa sutuzelghelhel hukwa' nahzun. ³⁸ 'Ndet se'aBá whusunelhtan, 'et 'un whudúsni. 'Et whunts'ih nuhwheni nuhwé'abá 'unwhúlhni, hoh teh né'ah't'en." ³⁹ 'Et 'uhiyúlhni, "Abraham 'en but's'u hatsi'ánde ts'inli." 'Et Sizi ndo búlhni, "Abraham 'en but's'ah háhde t'eh, 'en be 'ut'en k'ah zeh da ne'óoht'en. ⁴⁰ 'Et whunts'ih k'an si nts'oh teh 'unuhwhudúsni ts'ah'un na'a 'uhoont'ah hoh Yak'usda ts'un whudásts'o. 'Et whunts'ih nuhwheni sutuzelghelhel hukwa' nahzun. 'Njan 'et 'aw Abraham be 'ut'en k'ah ílah 'uhoont'ah. ⁴¹ 'Nuhwé'abá be 'ut'en k'ah 'uwulh'en." 'Et doo chah 'uhiyúlhni, "Aw nuwheni nuwhusulhutsi ílah 'uts'int'ah! 'Ilhunuh ne'aBá 'en Yak'usda unli!" ⁴² 'Et Sizi ndo búlhni, "Yak'usda 'en nuhwhu'aBá unli t'eh, si suk'eoohts' wule da, Yak'usda but's'un háya 'et huwa. 'Aw sich'oh sughá ílah whusáya, Yak'usda whusásalh'a. ⁴³ 'Nts'e na'a nuhwulh yalhtuk, 'aw t'ewhunuzázhun. 'Daja nuhwhudúsni 'aw súdóhts'o hukwa cha'nuzázhun 'et huwa. ⁴⁴ 'Netsudule 'en nuhwé'abá 'int'ah. 'Ndet 'en hukwa' ninzun, hoh zeh ne'óoht'en hukwa' nahzun. 'Soo 'udechoo da whuts'un dune ughan unli. 'Aw ts'ah'un 'uhoont'ah hukwa cha'nizun, 'et huwa 'aw ndi khunek 'alha' int'ah 'i bughu yoolah. 'Nts'oh tula ne'duni tink'us na'a zeh yalhtuk, dich'oh duk'una'a 'utni. 'Ndi whuts'it 'en int'ah, 'ink'ez khunek whuts'it, 'i 'en zeh but's'u háidukat 'et huwa. ⁴⁵ 'Et si khunek 'alha' int'ah 'aw 'i zeh be yalhtuk, 'et 'aw nuhwhuba 'alha' cha'duzusni. ⁴⁶ 'Aw nuhtah 'ilhunuh whunts'ih si lubeshi 'ulh'en 'úsdlí doohtni ghaít'ah. 'Et huwa khunek 'alha' int'ah, 'i be 'un whudúsni 'ink'ez, di ka 'et nuhwhuba 'alha' cha'duzusnih? ⁴⁷ 'Ndunnah Yak'usda budune unli, 'en zeh Yak'usda bughunek hidíts'o. 'Nuhwheni 'aw Yak'usda budune cháhlah 'et huwa bughunek 'aw dóohts'o ghaít'ah," hubúlhni. ⁴⁸ 'Et Lizwif 'uhiyúlhni, "Alha 'i be nts'utni, nyun Samaria whut'en int'ah 'ink'ez ntsi' nudúdeh 'i nyudínda!" ⁴⁹ 'Et Sizi ndo búlhni, "Aw ntsi' nudúdeh 'i sughu hoolah hoh, se'aBá 'en délhí, 'et nuhwheni 'aw chasadulhti. ⁵⁰ 'Aw 'uyoon súdóolhti hukwa cha'núszun, 'et 'ilhunuh suba whudutélhti hoonli, 'en naheyelh chah int'ah. ⁵¹ 'Soo ts'ah'un na'a 'un whudúsni, ndan sughunek yoontun, 'en 'aw dahóotsah ghaít'ah." ⁵² 'Et Lizwif 'uhiyúlhni, "K'an 'aw 'et t'éts'onínzun ntsi' nudúdeh 'i nyudínda! 'Abraham 'ink'ez nus whúnílh'en yahadla, 'et whunts'ih né'díni, ndunnah nghunek yoontun, 'aw dahóotsah ghaít'ah díni. ⁵³ 'Ne'abá Abraham dazsai inle. 'En ba nus 'ilcho hoh ih 'udini? 'Et nus whúnílh'en, 'en chah yahadla. 'En chah huba nus 'ilcho ih? 'Soo ndan inli díni ho' díni?" ⁵⁴ 'Et Sizi ndo búlhni, "Sich'oh duba nadesduti t'eh, sich'oh be núscha 'ants'ih int'ah. 'Et whunts'ih nuhwheni ndun nuhYak'usda dáhni, 'en si se'aBá int'ah, 'ink'ez 'en sudélti. ⁵⁵ 'Et nuhwheni 'aw t'echanázhil, 'et si t'enuszun. 'Aw si t'enusuzun dusni t'eh, 'et nuhwheni nuhk'una'a whahts'it usdlí ho' dutesnill. 'Et whunts'i ndun soo t'enuszun 'ink'ez bughunek 'ahoolhyez wheni buk'úne 'ust'en. ⁵⁶ 'Nuhwé'abá Abraham tube hóont'i whe suts'ó dezulh, 'et whute'ílh. 'Aw 'et whunalh'en 'ink'ez tube whunalhnik." ⁵⁷ 'Et Lizwif 'uhiyúlhni, "Nílh'en cha'hoont'ah teh ne'díni! 'Awhuz skwunlai lanezi (50) nyeyus k'ut ílah, 'ink'ez 'udini Abraham 'uda in'en díni!" ⁵⁸ 'Et Sizi ndo búlhni, "Soo ts'ah'un na'a 'un whudúsni, Abraham whuteleh whutsuh da, 'et 'uda si usdlí ho 'ust'ah." ⁵⁹ 'Et ndo búlhni hoh, ts'iyawh tse hiyeni dézgooh, 'i be whusa be 'hínal'h'uz 'ink'ez hituzelghelhel 'et hukwa. 'Et Sizi hubuch'a untelhú'i 'ink'ez soo hubutah 'et lhunásja hoh luglez whucho 'et tinánja.

9

Dune whuzdli da whuts'un chawhés'en Sizi soo na'yínla

¹ 'Et Sizi uyalh hoh, dune whuzdli da whuts'un chawhés'en yutélh'en. ² 'Et yugha hoodul'eh hiyoodulhkut, "Whuneoodílh'eh ndun dune, ndan simba bulubeshi yugha 'úja chawhés'en hoh whuzdli? Dich'oh k'us be'abá k'us be'ama hubulubeshi k'elha tulih 'uja?" ³ 'Et Sizi ndo búlhni, "Aw dich'oh bulubeshi bugha, k'us be'abá k'us be'ama hubulubeshi hubugha ílah chawhés'en unli. Yak'usda be 'ut'en k'ah bughá t'ewhunoodzeh, 'et huwa 'uja chawhés'en hoh whuzdli. ⁴ 'Awhuz dzenis whét'en hoh, ndun whuz de sùtelh'a, 'en hube 'ut'en oolh'en huba 'uhoont'ah. 'Ul'h'ek whusawhutélts'ulh 'ink'ez tsahólhgus yuh suli

t'eh, 'aw dune 'oot'en ghaít'ah. ⁵ 'Awhuz ndi yun k'ut sída hoh, ndi yun k'ut whudune huba be whét'en 'i usdli." ⁶ 'Et ndúdeja hukw'elh'az yun 'úntezno, buzek too, 'i be whutl'us inla, 'ink'ez ndun dune chawhés'en yuna yé yulhlho, ⁷ 'ink'ez ndi yúlhni, "Nyooz too dez'ai Siloam ts'ih inyalh 'ink'ez ni'nildeh." 'Et ndi khunek Siloam ni, 'et whé!a, ni ho 'utni. 'Et huwa whuz whinya, ni'nelde, 'ink'ez whunilh'en hoh whusanája. ⁸ 'Et ndun hinat whut'i 'ink'ez 'uyoon chah, ndunnah chawhés'en hoh hinalh'en da, 'en 'ulhódtuni, "Ndun 'en da hoh úsda 'ink'ez hubuts'udatso inle, 'en ih 'int'ah?" ⁹ Bulunah 'uhutni, "A, 'en 'int'ah." 'Et bulunah chah 'uhutni, "Awundooh, 'ants'ih yunduwút'en 'int'ah." 'Et ndun chawhés'en inle obúlhni, "A, si 'ust'ah." ¹⁰ 'Et 'uhiyúlhni, "Dáínja hoh ho'en sulí?" ¹¹ 'Et ndo búlhni, "Ihunuh dune, Sizi hiyulhni, 'en whutl'us 'ínla, suna k'ut yé sulhlho, 'ink'ez 'usulhni, 'Ta dez'ai ts'ih, Siloam huwhútni, whuz inyalh 'ink'ez ni'nildeh.' Whuz lhgha diya 'ink'ez nine'lhúde hoh whes'en sulí." ¹² 'Et doo chah hiyoodulhukut, "Ndun dune, nts'e 'ut'en?" "Aw t'éoonuzúszun," hubúlhni. ¹³ 'Et ndun chawhés'en inle, Pharisee bughu hinílti. ¹⁴ Njan dzin ndun dune Sizi whutl'us 'ínla 'ink'ez whes'en nayulhtsi, 'et nats'ulyis dzin 'uyínla. ¹⁵ 'Et doo chah zeh Pharisee hiyoodulhukut, "Dáhoont'ah huwa ho'en sulí?" 'Et ndo búlhni, "Ndun dune whutl'us 'ínla, suna k'ut yé whulhlho, hukw'elh'az ni'nelhude, 'ink'ez whes'en sili." ¹⁶ 'Et ndunnah Pharisee bulunah 'uhutni, "Ndun dune bughu yayiltuk, 'en 'aw Yak'usda butsu hainya ilah 'int'ah. 'Aw nats'ulyis dzin hukw'u nucha'ust'en 'et huwa." 'Et 'uyoon chah 'uhutni, "Nts'e na'a 'uwhutét'ilh, 'aw lubeshi 'ulh'en, 'en huwa 'ét'en túne' óot'en ghaít'ah!" 'Et hubugha lhch'a nihudendel. ¹⁷ 'Et doo chah zeh ndun chawhés'en inle 'uhiyúlhni, "Hó'en nyúlhtsi, 'et huwa 'en bughu daja dini?" "Alha nus whunilh'en 'int'ah," hubúlhni. ¹⁸ 'Et whunts'ih Lizwif moodih 'aw hububa 'alha' cha'hóot'ah, chawhés'en inle hoh whuzdli 'ink'ez k'an 'et whe'en, 'et huwa be'abá 'ink'ez be'ama 'anih hubúdani, ¹⁹ 'ink'ez hubuhútni, "Ndun 'en nuhye' 'int'ah 'ink'ez whuzdli whuts'un chawhés'en nedúhni, 'ink'ez nts'e na'a k'an whe'en?" ²⁰ 'Et be'abá 'ink'ez be'ama 'uhutni, "T'ets'onízun ndun 'en neye' 'int'ah 'ink'ez whuzdli whuts'un chawhés'en inle. ²¹ 'Ink'ez ndet huwa k'an whe'ah, 'ink'ez ndun whe'en yulhtsi, 'aw t'éts'onízun. 'Aw 'uski chailah ho' 'int'ah, oodilhukut da. Dich'oh ts'ah'un na'a 'unwhudóoni." ²² 'Et be'abá 'ink'ez be'ama t'ehonínzun Lizwif moodih 'uda lhgha 'úhudeja ndunnah Sizi Christ 'int'ah, 'uyoon hudáni t'eh, luglez 'et whuch'a tinabunteyolh. 'Et huwa ndun dune be'abá 'ink'ez be'ama Lizwif moodih hube hunuljut. ²³ Njan hunuljut, 'et huwa 'uhutni, "Aw 'uski chah ilah ho' 'int'ah, 'en huboodilhukut daja," hutni. ²⁴ 'Et doo chah zeh whulh nat ndun dune chawhés'en inle, "Anih," hiyúlhni, 'ink'ez 'uhutni, "Njan dáinja Yak'usda 'en buba whudélhti, 'aw ndun dune 'en ilah, t'ets'onínzun lubeshi 'ulh'en 'int'ah 'et huwa." ²⁵ 'Et ndo búlhni, "Lubeshi 'ulh'en tulih 'int'ah, 'aw t'éoonuzúszun. 'Et 'iluh nt'éoonúszun, chaozes'en inle, 'et k'an naitast'en." ²⁶ 'Et doo chah zeh 'uhiyúlhni, "Danyín la inle? Nts'e na'a hó'en nyulhtsi?" ²⁷ 'Et ndo búlhni, "Uda ndun whúdsuni 'et whunts'ih 'aw chasóozulhts'ai, di ka 'et doo chah 'un whudóosni hukwa' nahzun? Soo tuzélhts'ilh hukwa' nahzun ih? Nuhwheni chah ih bughu hodutelhu'eh tehleh hukwa' nahzun ih?" hubúlhni. ²⁸ 'Et soo hoontsi' tune' hiduni, "Nyun 'en yugha hoodul'eh inli! 'Et wheni Moses bulh 'út'en ts'inli! ²⁹ T'éts'onínzun Yak'usda 'en Moses yulh yayiltuk inle. 'Et ndun 'en, 'aw nts'ez de hainya whunts'ih t'éts'onízun," hiyúlhni. ³⁰ 'Et ndun dune chawhés'en inle ndo búlhni, "Ndun dune whes'en sulhtsi 'et whunts'ih nuhwheni 'aw t'éoonuzúszun nts'ez de haíya duhni! TUBE suba hooncha! ³¹ T'ets'onínzun Yak'usda 'aw lubeshi 'ulh'en chaboozílhts'ai. 'Et ndunnah Yak'usda ts'un t'eni' nilhzun, 'ink'ez butsu 'u húkwa' nínzun tune' 'út'en, 'en zeh huboozélhts'ai. ³² Soo 'udechoo yinkak 'uhóolya whuts'un 'aw dune chawhés'en hoh whuzdli, 'en dune soo ná'yinla whucha'dilhts'o. ³³ Ndun dune 'en 'aw Yak'usda butsu 'un ilah 'int'ah t'eh, 'aw hoonli whe ndóneh ghaít'ah," hubúlhni. ³⁴ "Whuzinli da whuts'un nyun lubeshi 'ulh'en zeh inli! Ndun na'dunínzun hoh whuneeodolh'eh hukwa' dini?" hiyúlhni 'ink'ez 'az tináhinino. ³⁵ 'Et Sizi whulh údants'o hoh Lizwif ndun dune tináhinino, hukw'elh'az nayilhti, 'et ndi yúlhni, "Yak'usda buYe' bughu mba 'alha 'uhoont'ah ih?" ³⁶ 'Et dune 'utni, "Moodihti ndan ho' 'int'ah? Busúniltun 'et sih suba 'alha 'uhot'e." ³⁷ 'Et Sizi ndi yúlhni, "Uda ah'en ho' 'int'ah, 'ink'ez 'en 'utni nyulh yáiltuk." ³⁸ 'Et dune yubut nacháneti 'ink'ez, "SMoodihti, suba 'alha' 'int'ah!" yúlhni, 'ink'ez yuts'u teni' nalhzin. ³⁹ 'Et Sizi 'utni, "Ndi yun k'ut ts'un whusaíya 'et huwa yinkak dune huba nahoooyeh ka. Whusaíya, 'et huwa chawhés'en 'en huwhe'en hutele. 'Et ndunnah whe'en, 'en chah chawhés'en hutéle." ⁴⁰ 'Et bulunah Pharisee yugha hoodul'eh hidánts'o hoh, 'et 'uhiyúlhni, "Wheni chah chats'uwhes'en dini hoh ih 'udini?" ⁴¹ 'Et Sizi ndo búlhni, "Chawhuzeh'en t'eh, nuhwheni 'aw lubeshi nuhwhaba hoolah. 'Et 'uduhni, "Nuhwheni ts'uwhe'en," dahni, 'et huwa lubesh nuhwhaba hoonli."

10

Sizi hubodulh'eh hoh 'utni, "Si susheep ghunli 'ust'ah. Ndunnah soo sulh 'út'en, 'en

se'usheep hinli."

¹ Et Sizi ndo búlhni, "Soo ts'ah'un na'a 'un whudúсни, ndan sheep ba nanestl'oo 'aw dáti k'et dáchayal 'ink'ez 'ants'ih nanestl'oo tus telhget t'eh, 'en dune 'undunut'ih 'int'ah. ² Et ndan dáti ts'ih dayih, 'en sheep ghunli 'int'ah. ³ En dáti ghunli yuba da'dututih. 'Et t'eh sheep buboozi be hubuka hunih t'eh, hidits'o huwa t'ehinínzun 'ink'ez 'az hiyuntulh'us. ⁴ Tinaóobulih hukw'elh'az, 'et hubutsuh teyih 'ink'ez sheep ts'iyawh hiyunell'h'us, highunek t'ehinínzun 'et huwa. ⁵ Et 'ants'ih hoh neya, 'en 'aw hiyuntoolh'as ghaít'ah. 'Ants'ih hoh n'úya 'int'ah 'aw bughunek t'ehinínzun 'et huwa hich'a nutsalhdelh," hubúlhni. ⁶ Et Sizi ndi higha hódool'eh ka hubulh náwhulnuk, 'et whunts'ih daja ni hoh 'utni 'aw t'ehonínzun. ⁷ Et huwa doo chah zeh Sizi ndo búlhni, "Soo ts'ah'un na'a 'un whudúсни, Si susheep ba dáti usdli ho 'ust'ah. ⁸ Ndunnah sutsuh whusahándel, 'en 'undunut'ih 'uhint'ah, 'et huwa 'aw sheep chaboozílhts'ai. ⁹ Si dáti 'ust'ah. Ndunnah si sugha dahúnindel, 'en ts'iyawh hudutejih. Dahúnindel 'ink'ez whuz 'az whehándel t'eh, t'l'o k'ut nahuhóote'ah. ¹⁰ Undunut'ih, 'en 'uduntet'ih 'ink'ez dune tuzelghel'h 'ink'ez tinta óobutel'hlih 'et wheni dayih. 'Et si whusáya hoh 'ilhuz wheni hiye khúna 'i 'utet'ilh 'ink'ez ndi 'ilhuz hiye khúna, 'i hiyit'i t'eh, 'aw hoonli whe ndunoodzit ghaít'ah. ¹¹ Si nuszoos sheep ghudli 'en 'ust'ah. Sheep ghunli unzoos, 'en ye khúna 'i dudu'susheep ba yuladutetnih. ¹² Et lhuhul'a, 'en 'aw sheep ghunli ilah 'int'ah. 'Ants'ih sheep yughole ka 'ul'a. Sheep 'aw busheep ilah 'uhint'ah, 'et huwa yus whuz de úlgwulh yunilh'en t'eh, sheep hubula dutnih 'ink'ez whetsílhyih. 'Et yus bulunah huboogoo 'et 'onghun chah hich'a wheyálwus. ¹³ Ndan lhúhul'a, 'en 'ants'ih 'ul'a 'int'ah, 'et huwa sheep 'ants'ih hiba unli 'ink'ez didut bugho whetsílhyih. ¹⁴ Si nuszoos sheep ghunli 'en 'ust'ah, 'et huwa ndunnah sudune t'ebunúszun 'ink'ez didut chah t'ésanínzun. ¹⁵ Et whuz na'a zeh se'aBá 'en t'ésunínzun 'ink'ez si chah t'enuszun. 'Ink'ez se'usheep be khúсна 'i huba hubula dutesnih. ¹⁶ Uyoo sheep chah 'i 'ust'i. Ndi tah, 'en chahoonli. 'Aw ndi tah ilah. 'En chah whusáboosdeleh huba 'uhoont'ah. Sughunek hidóots'o, 'ink'ez 'ilho 'ulh'us zeh hutele 'ink'ez 'ilhunh zeh sheep ghunli hutele.* ¹⁷ Se'usheep ba be khúсна 'i bula dutesnih 'et huwa be khúсна 'i doo chah naoolhúchoot. 'Et huwa se'aBá tube sk'entsi. ¹⁸ Aw be khúсна 'i dune sughu yóolhchoot hoolah. Sich'oh zeh huwa tés'alh. Ndi be khúсна 'i huwa tés'alh 'ink'ez naitéchoh, 'et sughá whunt'ai hoh 'ust'ah. Se'aBá 'en 'uja ndi khunek stl'aída'ai ndi 'ut'en 'oolh'en ka," hubúlhni. ¹⁹ Ndi khunek 'i bugha doo chah Lizwif dich'oh dutah lhch'a nínahudéndel. ²⁰ Tube lhanah, 'en 'uhutni, "Ntsi' nudúdeh 'i yudínda! Whusnik ho' 'utni, di ka oozéhts'ai?" ²¹ Et 'onghunnah chah 'uhutni, "Aw ntsi' nudúdeh 'i yughudínda, 'en bughunek ilah 'utni. Nts'e na'a ntsi' nudúdeh, 'i dune chawhés'en 'en chah whe'en yutelhtsilh?"

Lizwif, 'en Sizi 'aw hika cha'nizun

²² Aw 'et khi sulí. Jerusalem keyah 'et nowhújeh nihoní'ai. 'Et whunahulnih k'ahoondit nahuwulhtsi huwhútni.† ²³ Et luglez whucho bun 'un hayalbun buyah, 'et Solomon bubun 'un hayalbun buyah huwhútni, hoh whéghah Sizi uyalh, ²⁴ 'ink'ez Lizwif higha wézedel hoh hiyoodulhkut, "Dahooldzah 'et nech'a nontalh'i. 'Alha hoh Christ 'en 'int'ah t'eh, k'an 'et ts'ah'un na'a nedíni." ²⁵ Et Sizi ndo búlhni, "Uda ndun whudúсни 'et whunts'ih 'aw nuhwhaba 'alha' cha'duzusnih. Ndi se'aBá boozí bugha 'ut'en 'ilh'en, 'i bugha si sugha chah t'éwhunóohzin huba 'uhoont'ah. ²⁶ Et whunts'ih nuhwheni 'un whudúсни hukw'un'a 'aw se'usheep ilah 'aht'ah. 'Et huwa ndi 'ut'en 'ulh'en 'i 'aw nuhwhaba 'alha' cha'ít'ah. ²⁷ Si se'usheep t'ebunúszun. Sughunek hidits'o 'ink'ez nusáhunudelh. ²⁸ Ilhuz hiye khúna, 'i bugha iní'ai. 'Aw yachahutésdlah 'ink'ez 'aw dune sula k'éhaboolelh hoolah. ²⁹ Se'aBá, ndan sughá buninla, ts'iyannah sugha ndoh 'int'ah, 'ink'ez ndunnah sudune sulí, 'en 'ilhuz sulh 'átet'ilh. 'Aw dune soo 'últus hoolah se'aBá yula k'éhanabutelelh wheni. ³⁰ Si 'ink'ez se'aBá bulh 'ilho zeh nidudli," hubúlhni. ³¹ Et doo chah Lizwif tse hiye tuzelghel'h 'i hidílhchoot. ³² Et Sizi ndo búlhni, "Se'aBá be 'ut'en k'ah hoonzoo lhat si sugha whunulh'en. 'Ink'ez k'us dant'i ka 'usutelhlilh tse be suzoolhghel'h hukwa' nuhzun?" ³³ Et Lizwif 'uhiyúlhni, "Aw 'ut'en unzoo, 'i ka ilah tse be nts'utuzelghel'h! Nyun 'ants'ih hoh dune inli 'ink'ez Yak'usda ch'a yailhtuk. Nyunch'oh Yak'usda na'dudil'i, 'et hukwa tse be nts'utuzelghel'h." ³⁴ Et Sizi ndo búlhni, "Soo cho whunalhúnih hoh Yak'usda bughunek k'une'úsduguz 'i nuhtlaidai hoh ndutni, 'Nuhwheni yak'usda ahli?" ³⁵ T'éts'onínzun 'aw Yak'usda bughunek 'uk'une'úsduguz, 'i k'uyooyis ghaít'ah, 'ink'ez ndunnah Yak'usda bughunek bughi delts'ut, 'en yak'usda hubulhni. ³⁶ Et Yak'usda buYe' usdli 'un whudúсни, 'et huwa Yak'usda ch'a yalhtuk dahni hoh sk'éhóoh'aih. Se'aBá 'en 'udun nésunilhti hoh ndi yun k'ut ts'ih sutel'h'a. ³⁷ Se'aBá

* **10:16** 'Et ndi 'udechoo 'ulh'us Israel buts'u hainde ubúlhni. 'Et ndi 'uyoo 'ulh'us 'i yughu yailhtuk, 'i 'udun yun k'ut whut'en 'uhint'ah. Ndannah 'awhuz Sizi hiyulhcha'dusts'o. 'Et huwa huba 'alha cha'ít'ah. † **10:22** 'Et njan nowhújeh 'et Lizwif whunahulnih 'udayaz inle ho luglez whucho dune untsi' 'en daninya ho tinta' whunilh'en. 'Et huwa Lizwif k'andit nahuwulhtsi. 'Et huwa dahóodelh 'ink'ez Yak'usda buts'un téni 'uhunoolhdzin.

be 'ut'en cha'zúh'en t'eh, whute, nuhwhuba 'alha' cha'úst'ah. ³⁸ 'Et whunts'ih se'abá be 'ut'en 'ulh'en t'eh, si nuhwhuba 'alha' cha'ust'ah, 'et whunts'ih ndi 'ut'en 'ulh'en, 'i bugha nuhwhuba 'alha' uhot'e. 'I bugha nuhwheni be t'éwhunóhzin 'ink'ez nuhwhuba 'alha' uhot'e se'abá 'en syudínda 'ink'ez si chah buyudúda," hubúhni. ³⁹ 'Et doo chah zeh hiyóolhchoot hukwa 'uhuja hoh Sizi butáhanája 'ink'ez hubula k'ah hanaja. ⁴⁰ Jordan took'oh nyaz ts'ih ndet da John 'udechoo dune too be 'ulh'en inle, whuz whenaja 'ink'ez 'et inda. ⁴¹ Lhanah dune highu nindel 'ink'ez 'ulhódutni, "John 'aw huwa 'ét'en teh nucha'it'il, 'et whunts'ih ndun dune 'en bugha daja dani, ts'ah'un 'udani." ⁴² 'Ink'ez nyoh 'et tube lhanah huba 'álha' yint'ah suli.

11

Lazarus dazsai hoh Sizi nahiyúlhma

¹ 'Ilhunuh dune Lazarus hiyúlhma, keyah whuyaz Bethany huwhútni, 'et whut'en. 'En nduda suli. Bulhustakah nanah Mary 'ink'ez Martha bulh hizih whut'i. ² Ndun Mary 'en 'uja inle neMoodihti khe 'i be yuke 'ink'ez butsigha be yuna'alhde inle. 'En bulhutsin Lazarus 'en nduda. ³ Bulhustakah 'en Sizi khunek hits'ó t'l'aidá'ai, "NeMoodihti ndun dune buk'entsi", 'en nduda," hiyúlhma. ⁴ 'Et Sizi hoozéhlts'ai hoh 'utni, "Aw ndi dada 'ilhuz ye daóotsah ghaít'ah. Njan nduda bugha, 'et hoh Yak'usda buba whudélhti, 'ink'ez 'i bugha Yak'usda buYe', 'en chah ba whudélhti." ⁵⁻⁶ 'Et Lazarus nduda Sizi whulh 'udúzts'ai hoh Martha, bulhtus chah, 'ink'ez Lazarus chah tube hubuk'entsi' 'et whunts'ih whut'i 'et, nat dzin, 'et naná'el'ai. ⁷ Nat dzin 'et whut'i hukw'elh'az 'et yugha hoodul'eh 'et ndo búhni, "Doo chah Judea yun k'ut ts'ih uztoodelh," ni. ⁸ 'Et yugha hoodul'eh 'uhiyúlhma, "Rabbi, k'an 'ahoh Lizwif tse be nyotúzelghelh hukwa' huninzun 'ink'ez di ka whuz natandalh hukwa' ninzun?" ⁹ 'Et Sizi ndo búhni, "Et 'ilhudzin 'et lanezi 'o 'at nat (12) hukwe'hunít'oh 'uhoont'ah. Ndan dzeni neya, 'en 'aw dughun tooghalh ghaít'ah. Ndi yun k'ut be whét'en, 'i be honilh'en 'et huwa. ¹⁰ 'Et whunts'ih ndunnah 'ulh'ek nuya t'eh, 'en dughun teghulh, 'aw be whét'en 'i bu'et 'int'ah 'et huwa." ¹¹ 'Et ndo búhni hukw'elh'az 'et 'utni doo chah, "Ndunnah buk'ets'inti' Lazarus nanésti 'et whunts'ih buts'u tésyalh 'ink'ez ts'enatehdzulh." ¹² 'Et yugha hoodul'eh 'uhiyúlhma, "NeMoodihti Lazarus nanesti t'eh, 'et soo na'tetnilh ho' int'ah." ¹³ 'Et Sizi njan dazsai, 'et howu yalhtuk hoh 'utni. Yugha hoodul'eh, 'en 'ants'ih nanesti 'ink'ez nalyis 'et howu yalhtuk hoh 'utni huninzun. ¹⁴ 'Et Sizi soo ts'et gaih ndo búhni, "Lazarus dazsai. ¹⁵ 'Et nuhwheni nuhwhuba hoonúst'i 'aw 'et chásdah hoh 'uja. 'Et t'eh nuhwhuba 'alha' oost'e. 'Et whunts'ih k'an 'aw 'et butsztoodelh." ¹⁶ 'Et Thomas, 'en 'ut'adánda hiyúlhma, ndunnah yugha hoodul'eh ndo búhni, "Wa'ih! Bulh úztoodelh! Wheni chah sih, bulh yats'odlah!" ¹⁷ Sizi whuz whenya 'et nahoo'ai Lazarus whiyahiyalhti whuts'un dit (4) dzin inle. ¹⁸ Njan keyah wheyaz Bethany huwhútni, 'et Jerusalem tube wheghah whuz'ai. Ts'éyalh hoh 'ilhuz (1) hukw'e hunít'oh bat'en 'uhooldzah 'uhoont'ah. ¹⁹ Tube wheghah whuz'ai, 'et huwa lhanah Lizwif highu nindel. Mary 'ink'ez Martha bulh hubulhutsin dazsai 'et hoh hinidoolhya ka 'et huwa highu nindel. ²⁰ 'Et Sizi whuz de úyalh Martha whulh údzuts'ai hoh yududezya. Mary 'en koo 'aw 'et usda. ²¹ 'Et Martha Sizi ndi yúhni, "SMoodihti, njan sinda inle t'eh, 'aw da sulhutsin dachátésa wule da. ²² 'Et k'an whunts'ih, ndai Yak'usda buts'un kwa' dini, 'i ngha íte'alh, 'et t'éwhunúszun." ²³ 'Et Sizi ndi yúhni, "Nyulhutsin dinadóoja." ²⁴ 'Et Martha ndi yúhni, "T'éwhunúszun 'udek'elh'az dzin t'eh, ts'iyannah dinadutédalh, 'et t'eh 'en chah sih dinadóoja." ²⁵ 'Et Sizi ndi yúhni, "Si 'ust'ah dune ts'iyannah dinadubudjéts'del'el 'ink'ez 'ilhuz wheni hiye khúna 'i hubugha ités'alh. Ts'iyannah ndunnah huba 'alha' 'ust'ah, dahúzsai 'et whunts'ih hukhutenal. ²⁶ 'Ink'ez ndunnah 'awhuz khuna 'ink'ez huba 'alha' 'ust'ah, 'aw dahóotsah ghaít'ah. 'Et mba 'alha' 'uhoont'ah ih?" ²⁷ 'Et Martha ndi yúhni, "A sMoodihti, suba 'alha' 'uhoont'ah nyun Yak'usda buYe', Christ, ndun ndi yun k'et'éyalh, 'en 'unint'ah." ²⁸ Njan 'et nudáni hukw'elh'az 'et dulhtus Mary yughu nanja 'ink'ez whe'ízyaz 'uyúlhma, "Whuneodulh'eh whusaínya 'ink'ez nka 'oodulh'kut." ²⁹ Soo whudants'ob íbulh didinya 'ink'ez yuts'un whenya. ³⁰ Sizi 'awhuz keyah wheyaz whuts'un úyalh hoh, ndet da Martha yududezya, 'et zeh 'ut'en. ³¹ 'Et ndunnah Lizwif, dubutah hudélhts'i, hinidélhya wheni, Mary soo 'a ts'ih didinya 'ink'ez 'az whinya, hinilh'en 'et hiyuntezdel 'ink'ez 'ulhódutni, "Ts'un k'ut ts'ih tétso wheni whuz tezya hoh 'ut'en." ³² Sizi ndet da 'ut'en Mary whuz ninya. Soo yutelh'en íbulh yubut dugwútsi be nenínya 'ink'ez ndi yúhni, "SMoodihti, njan 'unint'ah inle t'eh, 'aw da sulhutsin dachaít'sal wule da." ³³ 'Et Sizi yunilh'en utso, 'ink'ez Lizwif ndunnah hiyulh nudelh, 'en chah hutso hubunilh'en hoh, tube whuts'u desnih 'ink'ez buyégha hoh huba dzuh 'uhooja, ³⁴ 'ink'ez huboodulh'kut, "Nts'e wheyalhti?" 'Et 'uhiyúlhma, "Anih, whunolh'en sih!" ³⁵ 'Et Sizi intse. ³⁶ Lizwif 'et 'ulhódutni, "Nulh'en ndulh'cho 'i be yuk'entsi!" ³⁷ 'Ink'ez bulunah 'uhutni, "Chawhés'en 'en whé'en yulhtsi inle, 'aw ih ndun dune 'en chah datésah whuch'a 'uyooleh

ghaít'ah inle?"³⁸ 'Et Sizi doo chah budzi yuh hoh buba dzuh 'uhooja, 'ink'ez ni suli hoh ts'un k'uz ninya. Njan ts'un k'ut 'et 'an tse whudá'de'ai 'uhoont'ah.³⁹ 'Et Sizi ndo búlhni, "Ndi tse 'udun dutah'aih!" 'Et Martha dune dazsai bulhtus, 'en 'utni, "SMoodihti, ndun 'aw 'et dit (4) dzin 'adalhte 'ink'ez 'ulhtsun chah suli."⁴⁰ 'Et Sizi ndi yúlhni, "Aw ih chanyudúsnil inle, si sugha mba 'alha 'uhoont'ah t'eh, 'et t'eh Yak'usda yé dezti 'i tant'ilh?"⁴¹ 'Et nyoh ts'un k'ut dune wheyudílhni, tse 'udun hidutez'ai. 'Et Sizi nduk yutá'en 'ink'ez 'utni, "ABá sudánts'o 'et huwa suchanailya nyudúsní. ⁴² 'Ink'ez t'éwhunúszun 'ahoolhyez wheni soozélhts'ai. 'Et whunts'ih njan 'udusni ndunnah 'ilhuhowezdel njan nahudelhúya, 'et huwa nyun whuz de sutélh'a 'alha 'uhot'e."⁴³ 'Et ndudéja hukw'elh'az soo khunekti be yatélhtuk, "Lazarus, ndez ingyahl!" yúlhni. ⁴⁴ 'Et ndun dune dazsai tsa k'ez ts'ih hanája. Bula 'ink'ez buke chah 'awhuz naih be híyulhti, 'i be bugha' wésduduz, 'ink'ez dzezoh chah bunen 'awhuz bugha' wésduduz. "Buk'una'ah'uk 'ink'ez bula duhni!" hubúlhni Sizi. ⁴⁵ Ndunnah Lizwif, Mary yughu nindel inle, Sizi bunalh 'uja 'et huba 'alha' yint'ah suli. ⁴⁶ 'Et whunts'ih bulunah, 'en Pharisee ts'un whehandel 'ink'ez Sizi nts'oh tune' 'ust'en, 'et ndó ba dani. ⁴⁷ 'Et hukwa náwhulnuk bumoodih 'ink'ez Pharisee yahútelhtuk wheni 'ilhúnahuwesdel 'ink'ez 'uhutni, "Nts'e na'a dáztenilh? Ndun dune stabe lhat hooncha tune' 'út'en!⁴⁸ Whute 'ut'en ts'ilh'i t'eh, ts'iyannah huba 'alha oot'e 'ink'ez Roman whusahándel hoh njan neluglez whucho 'ink'ez njan neyun k'ut chah negha hahóolhchoot, 'ink'ez ts'iyawh yats'óodelh."⁴⁹ 'Et 'ilhunuh hubutah Caiaphas hiyulhni, 'en 'et naoduzuk wheni náwhulnuk degha nus dezti unli inle, 'en ndo búlhni, "Aw hoonli t'éwhunuzáhzun!⁵⁰ 'Aw ih hubuk'ut chanunínulhzut, ts'iyannah ba 'ilhunuh dune zeh dazsai t'eh, 'et t'eh 'o nus soo whuté'ilh, 'et huwa 'aw neyun k'ut hoolah hole ghaít'ah."⁵¹ Caiaphas dich'oh ilah ndi khunek yaka ni tenezut, 'et náwhulnuk degha nus dezti unli, 'et naoduzuk huba, 'et huwa whuz na'a nus whunilh'en Sizi 'en 'aw 'et nilhduk w hoh ts'iyannah Lizwif 'et yun k'ut whut'en ba datétsah. ⁵² 'Et 'aw Lizwif hiyúlh dedowh, 'en huba zeh ilah. Ndunnah Yak'usda buzkeh hinli, nts'e ahahand, hoh whut'en, 'en huba chah. 'Et huwa ts'iyawh 'ilho ninaoobutélelh 'ink'ez 'ilho whut'en dune whutéleh. ⁵³ Soo 'et dzin whuts'un lhaóóduleh hituzelghel wheni. ⁵⁴ 'Et wheghah ts'ih Sizi 'aw ts'et Lizwif hubutah nuchásyah. K'us yun k'ut 'aw dune chahóot'ih ts'ih whuzih whuz'ai, 'ilhun keyah Ephraim huwhútni, whuz whinya 'ink'ez yugha hoodul'eh tubulh 'et hudáts'i. ⁵⁵ 'Et doo chah Lizwif budzenis whuti ndet da Hubutus Lhuseya huwhútni, 'aw 'et wheghah whudezulh. 'Et huwa lhanah yun k'ut whut'en Lizwif hubuna'udoh hukw'un'a 'uhutenilh wheni keyah whuti Jerusalem ts'ih hunindel. ⁵⁶ Lulez whucho nahudelhuya 'ink'ez Sizi hika ités'en, 'et 'ilhodutni, "Daja nahzun? 'Aw tulih dzenis whuti wheni whasachásyah nahzun ih?"⁵⁷ 'Et náwhulnuk bumoodih 'ink'ez Pharisee chah, 'uda dune tah khunek butl'áida'ai Sizi nts'e 'ut'en t'éhonínzun t'eh, 'ahoh ndobadooni, 'et t'eh 'aw 'et hitélhcholh.

12

Soo 'udek'elh'az Sizi Jerusalem ts'ih tezya

¹ Dzenis whuti Hubutus Lhuseya huwhútni 'awhuz lhk'utat (6) dzin whuz'ai, 'et Sizi keyah wheyaz Bethany huwhútni, 'et 'uja Lazarus dazsai hoh yaidlah tah dinaidilhti inle, 'et Lazarus whut'i, whuz lhugha dínya. ² 'Et hulhgha na'tet'alh wheni hiba lhadúja. Martha 'en huba hukw'e'ile. 'Et Lazarus 'en chah hubulh na'ut'alh. ³ 'Et Mary lubot dezbu ba'en, k'unuts'újul soo dezti, 'i khe, nard hiyulhni, 'i luboodai be whusayá'ai. 'I be Sizi yuke yulhlho 'ink'ez dutsigha be yuna'alhde. Bukoo ndulhcho hoh k'unuts'újul be soo whultsun suli. ⁴ 'Et 'ilhunuh yugha hoodul'eh Judas Iscariot, Simon buye, 'en 'utenilh ye 'óotekulh, ⁵ 'en 'utni, "Di ka ndi k'unuts'újul be chá'ookulh 'ink'ez tel'ennah hubugha chanuzáhdzaih? Tube dezti ho' 'int'ah!" ni.* ⁶ 'Et 'aw tel'ennah huba dátni ilah huwa 'et ndutni. Undunut'ih unli 'ink'ez sooneya zus ndai be yúkat, 'i didut buba niyú'a, 'ink'ez hukwa' ninzun totsuk ndai be yúkat 'i 'ants'ih ye hainá'aih 'et huwa 'utni. ⁷ 'Et Sizi 'utni, "Ndun ts'eke buts'áhachaozah'ak, ndi wheyosuhutelhtel dzin wheni, 'et yálh'a 'i 'int'ah. ⁸ Tehul'en 'en 'ahoolhyez nohwhulh 'úhint'ah, 'et si 'ahoolhyez ilah nohwhulh 'útest'ilh."⁹ 'Et Lizwif 'en Sizi 'et usda t'éhonanzin hoh, soo tube lhanah 'ilhuhowezdel, 'en whusahándel. 'Aw Sizi 'en bugha zeh ilah, Sizi, 'en Lazarus dinaidilhti inle, 'en huyuntel'hil ka. ¹⁰ 'Et náwhulnuk bumoodih, 'en chah 'ilhuhowezdel Lazarus 'en chah hituzelghel 'et howu yahutelhtuk wheni. ¹¹ 'En bugha tube lhanah Lizwif hube 'ut'en k'ah whuch'a huzdel 'ink'ez Sizi 'en bugha huba 'alha' yint'ah suli.

Sizi Jerusalem lhugha dínya

* 12:5 Tel'en buba 'iluh yus k'ut yuk'elha 'et'en, 'et 'uneltsuk.

¹² 'Et 'om bun dzin lhanah 'ilhuhowezdel, 'en dzenis whuti wheni Jerusalem ts'ih hunindel Sizi hiyúlh údants'o whuz de úyalh hutni 'et huwa. ¹³ 'Ul hidílhchoot 'ink'ez 'i hidelelh hoh hidudezdel 'ink'ez tube cho 'uhutni, "Yak'usda buba whudélhti!

Ndun neMoodihti boozi bugha whusaínya, 'en dega nus hoonzoo hubugha whults'ut! 'En Israel but's'u hainde hubudayi cho 'int'ah!"

¹⁴ 'Et Sizi yeztliyaz hiba whusaíhti 'ink'ez yuk'etl'adida. 'Et whundúlya hoh ndi 'uda bugha 'uk'une'úsduguz, 'i ndutni,

¹⁵ "Zion† whut'en nuhdzi ulhtus ulhtsi!

Nulh'en nuhwhubudayi cho yeztliyaz k'ut usda 'ink'ez nuhts'un úyalh!"

¹⁶ 'Et 'udechoo hoh Sizi yugha hoodul'eh 'aw hubeni be t'éhonízun 'i bugha. 'Et yak'uz buba whudélhti ts'ih, whenája hukw'elh'az 'et whunahelnik ndi bugha 'uk'une'úsduguz 'i 'et ndutni 'ink'ez 'et Jerusalem whuts'un úyalh hoh didut hoh chah hiba ne'úst'en. ¹⁷ 'Et ndunnah 'ilhuhowezdel, ndunnah yugha hoodul'eh hoh Lazarus yuka hezya 'ink'ez ts'un k'ut yuhadla tah dinaidilhti hoh hinalh'en inle, 'et howu yawhehunilhtuk. ¹⁸ 'Et ndunnah 'ilhuhowezdel hooncha túne' 'ust'en whulh 'úhudants'o 'et huwa 'uhuja hidudezdel. ¹⁹ 'Et Pharisee dich'oh 'ulhódutni, "Nulh'en! 'Aw hoonliyaz cha'ts'uhóoli! Ndi yun k'ut dune, ts'iyawh huyúntezdel!"

Bulunah 'udun yun k'ut whut'en, 'en chah Sizi hite'ilh hukwa' huninzun!

²⁰ Ndunnah dune Jerusalem ts'ih hutezdel, 'en hubutah, bulunah Greek cha 'uhut'en. Dzenis whuti 'et Yak'usda ts'un teni 'uhuntelzhil, 'et wheni. ²¹ Philip, 'en keyah Bethsaida huwhútni, Galílee yun k'ut whuz'ai, 'et whut'en 'int'ah, 'en highu nindel 'ink'ez 'uhiyúlhni, "Wheni chah Sizi ts'ute'ilh hukwa 'uzninzun." ²² 'Et Philip, Andrew yughu ninya 'ink'ez 'uyúlhni, 'ink'ez Andrew Philip bulh Sizi nduhíyulhni. ²³ 'Et Sizi ndo búlhni, "Aw 'et yinkak dune ye'huba whudutélhti, 'et whusahónzut. ²⁴ Soo ts'ah'un 'un whudúsní, haniyeh 'i bumai 'aw yun k'ut nachaníts'ulh t'eh, dant'ah dich'oh 'et zeh ndutet'ilh. 'Et whunts'ih soo ndi yun k'ut ná'nest'ai t'eh, soo lhai bumai, 'i bugha hanantejeh.† ²⁵ Ndan dune ye khuna 'i yuk'entsi' t'eh, 'et t'eh ye khúna 'i tinta ité'alh ho' 'int'ah. 'Et whunts'ih ndan ndi yun k'ut ye khúna 'i buba 'ants'ih yint'ah t'eh, 'ilhuz wule wheni whuz na'a khutena. ²⁶ Ndan suba né'tet'en hukwa' ninzun, 'en suhuntoodelh 'ink'ez nts'e 'ust'ah suba ne'ut'en chah 'et 'uhutet'ilh. 'Ink'ez ndan suba ne'ut'en unli, 'en se'aBá hubudutélhti.

Sizi datetsah howu yalhtuk

²⁷ "K'an 'aw 'et tube suzul ba dzuh neooninzut, 'ink'ez daja doosni simba? Se'aBá njan sts'un whudélts'ulh khuz'ha sula 'ineh doosni ih? 'Awundooh! Njan sts'un whudélts'ulh, 'et wheni whusáya. 'Ink'ez 'udusni, ²⁸ "ABá nyoozi 'o nus dezti ílhtsi." 'Et yak'uz whuts'un khunek huduzts'ai, "Uda soozí dézti 'ink'ez doo chah zeh 'o nus dutésti, whutni. ²⁹ Bulunah 'ilhunahuwédsdel, 'et nuhúdelhuya 'ink'ez hodánts'o. 'Et ndulhódútni, "Ditnik desni!" 'Et bulunah, "Lizas yulh yálhtuk hoh 'uwhutni," hutni. ³⁰ 'Et Sizi ndo búlhni, "Ndi khunek duzáhts'ai, 'i 'aw sí suba ilah 'uwhutni, nuhwheni nuhwhuba 'uwhutni. ³¹ K'an 'aw 'et yinkak whudune huba nahuteyeh 'ink'ez whutsuh da ndi yun k'ut humoodih,§ 'en 'ilhuz 'un hítenoh. ³² 'Ink'ez ndi yun k'ut díbe' sadunintan t'eh, 'et síh soo ts'iyannah suts'un buntelhut'uk.* ³³ 'Et ndutni hoh nts'e na'a datétsah, 'et hobunelhtun 'i hoh 'utni. ³⁴ 'Et 'ilhunahuwédsdel 'uhiyulhni, "Moses yuk'one'úzguz inle, 'i bugha whulh 'úzdits'o ndun Christ 'en 'ilhuz khutena. 'Ink'ez dálhti 'udini yinkak dune ye' díbe na'hidóolhtsih huba 'uhoont'ah. Ndan ho' 'int'ah ndan yinkak dune ye'?" hutni. ³⁵ 'Et Sizi ndo búlhni, "Awhuz sayaz whuz'ai 'et ndi be whét'en 'i nohwulh 'útet'ilh. 'Awhuz ndi be whét'en 'i nohwulh 'int'ah hoh ahdulh zeh aht'en. 'Et nduht'en t'eh, 'aw tsahólhgus nuhk'éoodoolts'it ghaif'ah. Ndunnah tsahólhgus yuh hédulh 'aw nts'e hédulh t'éhonízun. ³⁶ Dáhooldzah ndi be whét'en aht'i, 'ink'ez nuhwhuba 'alha' 'int'ah t'eh, 'et ndi be whét'en 'i buzkeh téleh." 'Et Sizi ndo búlhni hukw'elh'az, bughu whenája 'ink'ez buch'a ntelhu'i. ³⁷ Tube 'ut'en uncha 'i bunalh 'alh'en 'et whunts'ih 'aw huba 'alha' cha'ít'ah. ³⁸ 'Et nus whúnoolh'en Isaiah yuk'úne'uzguz, 'i bugha whuz na'a hoh teh ne'whust'en. Njan ndutni hoh 'uk'une'úzguz, "Moodihti ndi khunek whutl'azdá'ai, 'i ndan zeh buba 'alha yint'ah?"

NeMoodihti yé ulhtus 'i ndan ts'un ye nénelhtan?"

³⁹ 'Et huwa huba 'alha' cha'hóot'ah, Isaiah njan chah ndutni 'et huwa,

⁴⁰ "Yak'usda, 'en hubuna be chahuwhés'en hubulhtsi,

† **12:15** Njan Zion ni, 'et Jerusalem keyah, 'et 'uwulhulhni. ‡ **12:24** Ndi haniyeh bumai, 'i Sizi Gri dulh ndúlt'ah, 'ink'ez ndi bumai bugha hanányih, 'i ndunnah buba 'alha 'uyint'ah, 'en 'uhint'ah ni ho 'utni. § **12:31** Ndi yun k'ut humoodih, 'en netsudule 'int'ah. * **12:32** Díbe' hidunintan ni, 'et lhahlgus yulhni ho 'utni.

'ink'ez hubudzi chah duts'un yulhtsi.

'Et 'aw hubuna be honóolh'en ghaít'ah

'ink'ez hubudzi be 'aw t'ehonozin ghaít'ah.

'Soo na'butésdíilh huba suts'un nahoolyeh ghaít'ah,' ni Yak'usda."

⁴¹ 'Et Isaiah Yak'usda yé dezti 'i yunalh'en hoh 'et yugha ndutni inle. ⁴² 'Et whunts'ih 'alha 'i be lhanah dune gha ndoh 'uhínt'ah, 'en Sizi huba 'alha yint'ah, 'et whunts'ih 'aw hudooni ghaít'ah. 'Et ndo deja t'eh, Pharisee Lizwif hubuluglez whuch'a 'ilhuz tibuhoneh 'et whehunuljut. ⁴³ 'En dune Yak'usda buch'a 'onus huba délhí. ⁴⁴ 'Et Sizi khunek ulhtus 'i be ndutni, "Ts'iyannah Ndunnah si huba 'alha' 'ust'ah, 'aw si sugha zeh ilah, ndun whuz de sítel'h'a, 'en huba 'alha' yint'ah. ⁴⁵ 'Ink'ez ndunnah sunilh'en, 'en ndun whuz de sítel'h'a, 'en inílh'en. ⁴⁶ 'Yinkak whudune ba be whét'en 'et hukwa ndi yun k'ut níniya. 'Et huwa ndunnah huba 'alha' 'ust'ah, 'aw tsahólhgus yuh hudoolts'i ghaít'ah. ⁴⁷ 'Ink'ez ndunnah sughunek hidíts'o 'et whunts'ih huba 'alha' cha'yít'ah, 'aw huba nahoooyeh ghaít'ah. Ndi yun k'ut whudune huba nahutesyeh ilah ka whusáya, hubutelhyih ka whusáya. ⁴⁸ 'Ndan sts'u desnih 'ink'ez 'aw sughunek chayílhcholh, 'ilhunúya 'en huba nahuteyeh. Ndi khunek be nohwhulh yalhtuk, 'i khunek zeh 'udek'elh'az dzin t'eh be nuhwhuba nahutedeh. ⁴⁹ 'Aw sich'oh zeh ilah yalhtuk. Se'aBá, ndun whuz de sítel'h'a, 'en dich'oh khunek yutulhuhézya, 'i stl'aída'ai daja doosni hoh yaoolhtuk 'et wheni. ⁵⁰ 'Ink'ez t'éwhunúszun ndi khunek yutulhuhézya, 'i bughá 'ilhuz be khútna 'i unli. 'Et huwa ndai sich'oh be yáltuk, 'i nts'e na'a se'aBá sudáni, si chah whuz na'a zeh yalhtuk," hubúlhni.

13

Ndi yun k'ut howu natedalh, Sizi yugha hoodul'eh sshubulh yáltuk

¹ Dzenis whuti ndet hoh da Hubutus Lhuséya huwhútni, 'et whutsuh da Sizi 'aw 'et bunts'uh whúdelts'ulh ba 'et newhúnzut t'éwhunínzun ndi yun k'ut howu teyalh 'ink'ez be'aBá ts'un natedalh. Ndi yun k'ut ndan budune 'en ts'iyawh hubuk'entsi'. Soo nts'e whuts'un hubuk'entsi'. ² 'Et hullgha na'het'al hukw'elh'az 'uda netsudule Judas Iscariot Simon buye' Sizi ye 'ootékulh hukwa' nizun, yudzi yuh niioode'ai. ³ 'Et Sizi t'éwhunínzun be'aBá ts'iyaitsuk k'úne' yool'en, 'et yugha óoni'ai. 'Ink'ez Yak'usda ts'un haínya 'ink'ez Yak'usda ts'un nátedalh 'et chah t'éwhunínzun. ⁴ 'Et na'het'al 'ink'ez yoo 'az ye dune unli 'i 'udúninílna. Lusima ilhchoot hububut neínílhbal 'ink'ez yulh ts'ú delhú'oo. ⁵ 'Aw 'et be la'ts'uldeh ts'ih too deínnyul 'ink'ez yugha hoodul'eh hubuke toonagus 'ink'ez lusima yulh ts'ú delhú'oo, 'i be hubuke yuna'ulhdeh. ⁶ 'Et Sizi Simon Peter yughu ninya hoh 'et Simon Peter ndi yúlhni, "SMoodihti, si chah suke tóona'tangus hoh ih 'int'en?" ⁷ 'Et Sizi ndi yúlhni, "K'an dast'en 'aw nyeni be t'éwhunuzínzun, 'et k'at lih sih t'ewhunonzeh." ⁸ 'Et Peter ndi yúlhni, "Awundooh! 'Aw suke toonaóongus ghaít'ah!" 'Et Sizi ndi yúlhni, "Aw too nachainyúsgus t'eh, 'aw sulh 'ónt'e ghaít'ah." ⁹ 'Et Simon Peter ndi yúlhni, "SMoodihti, 'aw suke zeh ilah, sula 'ink'ez sutsi chah too naóongus!" ¹⁰ 'Et Sizi ndi yúlhni, "Ndan buna'éde, duke zeh toonaogus huba' hoon't'ah. 'Et whunts'ih ndulhcho hoh chadátsun hoh aht'ah. 'Et nuhwheni ts'iyawh nuhwhuna'dóodeh 'et whunts'ih nuhtah 'aw ts'iyawh ilah nuhwhuna'déde." ¹¹ 'Et 'uda t'éwhunínzun ndun ye 'ootékulh 'et huwa 'utni, "Aw ts'iyawh ilah nuhwhuna'déde." ¹² Hubuke toonagus 'aw 'et lhadúja hoh, ye dune unli 'i yé naja 'ink'ez hubutah nanát'l'adedá, 'ink'ez ndo búlhni, "Dahooja, njan k'an danóhusdla, soo cho ih nuhwheni be t'éwhunúhzun? ¹³ Whuneoodulh'eh 'ink'ez Moodihti sudúhni. 'Et 'alha duhni ho' duhni, si 'en 'ust'ah 'et huwa. ¹⁴ 'Et si 'en 'ust'ah dune hodul'eh 'ink'ez Moodihti usdli hoh nuhke toonasíguz, 'et nuhwheni chah whuz na'a nuhwhuke lhuba toonaóongus huba' hoon't'ah. ¹⁵ K'an nuhwhunalh danówhusdla whuz na'a nuhwheni chah 'et ndusóolh'en. ¹⁶ Soo ts'ah'un na'a 'un whudúzni, 'aw ustle, 'en bumoodih yugha ndoh cha'ít'ah. 'Et whuz na'a zeh khunek na'a 'aw ndan yughatél'h'a yugha ndoh cha'ít'ah. ¹⁷ 'Et nuhwheni be t'éwhunáhzun t'eh daja nuhwhudúzni, 'ink'ez danwhúsdla, 'et nuhwheni chah whuz na'a 'aht'en t'eh, 'et tube hootéht'i. ¹⁸ 'Aw soo ts'iyawh ilah nuhwhugha 'et ndudúzni. Ndan 'utaháobáala, 'en t'ébunúszun. 'En 'utaháobáala, 'et huwa Yak'usda bughunek 'i 'uk'une'úsduguz k'ut dawhútenilh 'et hubugha njan ndutni, 'Ndan lhes sulh 'i'al, 'en sch'a nidenya hoh sazoolhghelh hukwa' nínzun." ¹⁹ Njan 'et ndo whútenilh whutsuh 'et nuhwhudúzni. 'Et ndúhooja t'eh, 'et t'éwhunóhzin, 'et ndan usdli, 'en 'ust'ah. ²⁰ Soo ts'ah'un nuhwhudúzni ndan whuz na'a, 'en budzi yuh hoh hiyílhchoot t'eh, si chah suhílhchoot hoh 'uhoont'ah. 'Et Ndan budzi yuh hoh sílhchoot, 'en ndun whuz de sítel'h'a, 'en chah hiyílhchoot hoh 'uhoont'ah." ²¹ 'Et Sizi njan ndudáni hukw'elh'az buyégha hoh buba dzuh 'uhooja. 'Et hubulh yátelhtuk 'ink'ez njan ndo búlhni, "Soo ts'ah'un nuhwhudúzni 'ilhunuh nuhtah 'en se'óotekulh." ²² 'Et yugha hoodul'eh ts'iyawh lhahunul'en k'us ndan simba 'uyúlhni 'aw nt'éhonízun. ²³ 'Et 'ilhunuh yugha hoodul'eh, Sizi k'us yúk'entsi' soo yuzih k'ut

usda, ²⁴ 'et Simon Peter yuba núlhni hoh Sizi yoodolhkut, soo ndan simba ndi 'uyúlhni yughu yalhtuk 'et huwa. ²⁵ 'Et ye chanenti 'ink'ez 'uyúlhni, "SMoodihti, ndan ho 'int'ah?" ²⁶ 'Et Sizi ndi yúlhni, "Ndan ndi lhesyaz toonasi'ai 'ink'ez butl'ayá'ai, 'en 'int'ah." 'Ink'ez lhesyaz toonayuz'ai 'ink'ez Judas Iscariot Simon buye', 'en yutl'ayá'ai. ²⁷ 'Et ndi lhesyaz yutl'ayá'ai hoh 'aw 'et Satan ye ghínya. 'Et Sizi ndi yúlhni, "Ndet da 'uwhtunanílh, soo 'ah lhaóodinleh!" ²⁸ 'Et 'onghunnah ts'iyawh ndun Sizi yugha hoodul'eh, 'en dant'i ka 'et ndi yulhni 'aw t'éhonízun. ²⁹ Bulunah, 'en 'uhuninzun Judas 'en sooneya zus nuyá'a 'et huwa ndi dzenis whuti wheni buka nudzun, 'i yoket ka ndi yúlhni. K'us tel'en téh hoonliyaz hubugha 'óo'ah ka ndi yúlhni huninzun. ³⁰ 'Aw 'et lhesyaz yílhchoot ibulh, 'ahoh 'a tsih 'az whinya. 'Aw 'et tsahólhgas 'uhoont'ah. ³¹ 'Az whénya hukw'elh'az 'et Sizi 'utni, "Aw 'et yinkak dune ye' buba whudélti 'ink'ez 'en bugha Yak'usda buba whudélti. ³² 'En bugha Yak'usda buba whudélti t'eh, 'et Yak'usda dich'oh chah yinkak dune ye' soo 'ahoh 'et yuba whudutélti. ³³ Suzekkah 'aw sa ilah nohwhulh 'utést'ilh. Suteh'ilh hukwa' ntehzilh, 'et nts'eh na'a Lizwif hubudáni, whuz na'a nuhwheni chah nuhwudúzni, nts'e tésyalh ts'ih 'aw nuhwheni chah sulh tóohdelh ghaít'ah. ³⁴ 'Ilho khunek k'an 'i nuhwhutl'adá'ai 'ink'ez ndi 'i 'int'ah, ts'iyawh lhk'eoohdutsi'. Nts'e na'a si nuh'esi', 'et whuz na'a zeh nuhwheni chah lhk'eoohdutsi'. ³⁵ Ndi be lhk'ezdutsi' 'i nuhtah hoonli t'eh, 'i bugha sugha hoodul'eh ahli ts'iyannah t'éhonózin." ³⁶ 'Et Simon Peter yoodulhkut, "Moodihti, nts'e tanyalh?" 'Et Sizi ndi yúlhni, "Nts'e tesyalh ts'ih, 'aw k'an suntonya ghaít'ah, 'et whunts'ih nk'at lih, suntanyalh." ³⁷ 'Et Peter ndi yúlhni, "Moodihti, 'et di ka k'an 'et 'aw nyun toosya ghaít'ah? Be khúsna, 'i whunts'ih nyun mba bula dutesnih!" ³⁸ 'Et Sizi ndi yúlhni, "Alha ih be khína, 'i suba bula dutatnih? Soo ts'ah'un na'a nyudúzni ligok dune 'uduténilh whutsuh, tat 'et t'ésunuzínzun dutanilh."

14

Sizi yugha hoodul'eh ndo búlhni, "Si sugha zeh se'aBá buts'un téhdulh."

¹ "Khun téh nuhwhudzi ndóoda gunih. Yak'usda nuhwhuba 'alha 'int'ah, whuz na'a si chah nuhwhuba 'alha 'oost'e. ² Se'aBá bukeyah lhat koo whuzdla hoh 'uhoont'ah. 'Aw 'alha cha'hóot'ah t'eh, ndun whudóosni da. Whuz tesyalh nuhwhuba lhawhúdulesleh wheni. ³ Whuz lhadiya 'ink'ez nuhwhuba lhawhúduusla t'eh, doo chah zeh whusanátedalh 'ink'ez ts'iyawh nanwhutelhúchulh, ndet sída, 'et si sulh 'óoht'e. ⁴ 'Ink'ez nts'e whéya ts'ih 'ink'ez nts'e ti whého'a 'et t'éwhunáhzun." ⁵ 'Et Thomas yoodulhkut hoh 'uyúlhni, "Moodihti, nts'e tanyalh 'aw nt'ets'onízun, 'ink'ez nts'e na'a whuz ti nt'ets'ontézin?" ⁶ 'Et Sizi ndi yúlhni, "Si yak'uz ti, 'ink'ez khunek 'alha 'int'ah 'i chah usdli. 'Ink'ez 'ilhuz wheni be ts'ukhuna, 'i chah 'usdli. 'Et huwa 'aw 'ilhunuh whunts'i se'aBá yuts'un tooya ghaít'ah, si sugha zeh 'et ndutenilh. ⁷ Si t'ésunahzun inle t'eh, 'et se'aBá chah da t'enóohzin wule. 'Et k'an whúts'un, 'en 'aw 'et t'enahzun 'ink'ez ah'en chah áhja." ⁸ 'Et Philip ndi yúlhni, "Moodihti, nye'aBá bunenilhtun 'ink'ez uznoolh'en, 'aw 'et zeh hukwa' uzninzun." ⁹ 'Et Sizi ndi yúlhni, "Philip, lhe'hóoldzah nohwhulh 'úst'en, 'et 'awhuz ih t'ésunuzínzun? Ndan sunalh'en, 'en se'aBá chah hinalh'en. 'Ink'ez di ka, 'Nye'aBá bunenilhtun, 'díni?" ¹⁰ Si se'aBá buyudúsa 'ink'ez se'aBá chah suyudínda. 'Et 'aw ih mba 'alha cha'hóot'ah? Khunek be nohwhulh yáhtuk 'i 'aw si sughunek ilah 'int'ah. Se'aBá ndun suyudínda, 'en ndi 'ut'en 'uyulh'en 'en 'int'ah. ¹¹ Nuhwhuba 'alha 'uhot'e si se'aBá buyudúsa 'ink'ez se'aBá 'en suyudínda. 'Et nuhwhuba 'alha cha'hóot'ah t'eh, ndi 'ut'en ndai 'ulya, 'i bugha si sugha nuhwhuba 'alha 'uhot'e. ¹² Soo ts'ah'un na'a ndan nuhwudúzni, ndan buba 'alha 'ust'ah, 'en ndi 'ut'en ndai 'ulh'en, 'i, 'en chah 'uhitelh'ilh. 'Et si se'aBá buts'u nátedalh 'et huwa si 'ut'en 'ulh'en, 'i, 'o nus 'ílhcho 'ut'en, 'i, 'uhiyoolh'en. ¹³ 'Ink'ez ndai si soozí buka' dahni 'i hoh nuhwhuba né'test'en. 'Et huwa se'aBá 'en buYe' buba whudóolhti. ¹⁴ Ndi si soozí buka' dahni, 'et nuhwhuba 'uwhtesdlilh. ¹⁵ Nuhwheni sk'entsi' t'eh, ndai ndi khunek nuht'ádala, 'i buk'üne' 'ooh't'en. ¹⁶ 'Ink'ez se'aBá 'en 'ilhuz wheni nuh'Latet'ilh, 'en nuhwhugha itélhtel, 'et buts'u hukwa' doosni. ¹⁷ 'En Ndoni 'int'ah. Ndi khunek 'alha 'int'ah, 'i zeh buts'u haídults'it. Ndi yun k'ut whudune* 'aw bubeni be t'éhinízun, 'et huwa 'aw huyóolhchoot ghaít'ah. 'Et nuhwheni t'enahzun, nohwhulh 'int'ah, 'ink'ez nuhyudutélts'ulh. ¹⁸ 'Aw ts'unuh ahli lí'ah't'ah hoh nuhghu toosya ghaít'ah. Nuhts'u tóosya. ¹⁹ Dzuh sayaz inle, 'ink'ez yinkak whudune, chasátes'il, 'et whunts'ih nuhwheni suntel'h'ilh. Si khusna 'et huwa nuhwheni chah khutehna. ²⁰ 'Et dzin t'eh, 'et t'éwhunohzin si se'aBá buyudúsa 'ink'ez se'aBá chah syudínda 'ink'ez 'o 'un nuhwheni chah nuhyudusda. ²¹ Ndan khunek 'et nidéla 'i yuk'üne' 'ut'en, 'en sk'entsi' 'uhint'ah. 'Ink'ez ndan sk'entsi', se'aBá chah buk'etesi', 'ink'ez si chah buk'etesi' 'ink'ez ndan usdli 'et t'éhonozin huboolhtsilh." ²² 'Et Judas, 'aw Judas Iscariot 'en ilah, 'en Sizi ndi yúlhni, "Moodihti, nts'e na'a 'uhoont'ah

* 14:17 Ndan ndi yun k'ut Yak'usda huba 'alha cha'it'ah. 'En 'o bulhni bughu yalhtuk.

hoh nyun nyugha t'ets'onózin neba 'uwhtánlilh, 'et whunts'ih yinkak whudune, 'en nyun nyugha 'aw t'éhontészin dini?'²³ 'Et Sizi ndi yúlhni, "Ndunnah sk'entsi', 'en sughunek yootetun. 'En se'aBá buk'etesi' 'ink'ez hubulh 'útet'ilh 'et huwa si bulh hubutah óduke. ²⁴Ndan sk'echaftsi', 'aw sughunek hik'unucha'ust'en. 'Ink'ez ndi khunek nuhwheni dahts'o, 'i 'aw sich'oh sughunek ilah 'int'ah. Se'aBá, whuz de sítel'h'a, 'en bughunek 'int'ah. ²⁵'Aw huz nuhtah 'ust'ah hoh njan 'et nuhwhudúsi. ²⁶'Et nuhLa'ut'en, 'en Ndoni 'int'ah, 'en si sooz bugha se'aBá 'en nuhts'ítel'h'alh, ts'iyaintsuk whunohodutilh'eh 'ink'ez daja nuhwhudáni 'et soo cho whunalhúni hah nuhwhutélhtsilh. ²⁷Be nedzi dezghel, 'i nuhghu nenánust'ai. 'I sich'oh be sudzi dezghel, 'i nuhgha ní'ai. Ndi be nedzi dezghel nuhgha ní'ai, 'i 'aw yinkak whudune nuhgha hýu'aih, 'i 'aw yulh nduchaft'ah ho' 'int'ah. Khun teh nuhdzi úndooda 'ink'ez noolhújut gunih! ²⁸Sudahtso hoh 'un whudúsi. 'Aw 'et nuhghu tesyalh 'ink'ez nuhts'u tóosya. Se'aBá 'en sughanus dezti 'et huwa 'en but's'u nátesdalh, 'ink'ez sk'ehtsi' t'eh, k'an daja nuhwhudáni 'et huwa whunóolhnik. ²⁹'Ink'ez hoh teh ne'whutet'en, k'an nuhwhudáni. 'Et t'eh whusawhélt's'ut t'eh, si sugha nuhwhuba 'alha 'uhot'e. ³⁰'Aw dzuh sayaz 'o 'un nohwhulh yaóolhtuk ghaít'ah. Ndi yun k'ut humoodih† 'az de úyalh 'ink'ez si sugha 'aw ntsolyaz 'i whunts'ih buch'a chayílah 'et huwa. ³¹'Aw 'et didahdelh, 'aw 'et njan huwuztoodelh, 'et huwa yinkak whudune t'éhonózin se'aBá buk'esi' 'ink'ez nts'oh tula khunek st'l'aidan'ai, hoh tune'út'en ne'úst'en.

15

Sizi yugha hoodul'eh hubodulh'eh nts'e na'a mai chun buyooschum but's'u haímulhyeh, 'et whuz na'a zeh yugha hoodul'eh hiyluh zah oot'e. 'Et hubugha hubodulh'eh.

¹"Soo mai chun 'i 'ust'ah 'ink'ez se'aBá 'en mai k'et huwunli unli. ²Ndunnah si sugha 'uzooschum unli, 'en 'aw bumai hoolah t'eh, 'et but's'u haídule, 'ink'ez ndunnah bumai lhái, 'en soo 'obulh'en bumai lhái wule ka. ³Ndi khunek be nohwhulh yalhtuk, 'i be 'uda nuhwhuna'dede hoh 'aht'ah. ⁴Nuhwheni syudoolhúts'i 'ink'ez si chah nuhyudóosda. 'Uzooschum mai chun bunída'a t'eh, bumai whutéleh. 'Et whuz na'a zeh nuhwheni nuhwhugha 'alha 'uhoont'ah. Si syudelhúts'i t'eh, 'et zeh nuhmai whutéleh. ⁵Si mai chun lí'nust'ah 'ink'ez nuhwheni 'uzooschum lí'aht'ah. Ndunnah si syudínda 'ink'ez si chah buyudúnda, 'en zeh bumai lhái téleh. 'Aw si su'et, 'aw hoonliyaz 'uhuhoolé hgaít'ah. ⁶Ndunnah si syudínda ilah, 'en 'uzooschum k'una'a k'uhídut'us 'ink'ez n'un hidutult'oh, 'et dugi, 'et nduhínt'ah. 'Uzooschum ts'iyawh nahidulhdzoooh 'ink'ez tsuh hidulhkuk 'ink'ez hidéhlk'un. ⁷'Et si suyudelhúts'i 'ink'ez sughunek nuhyuh dez'ai t'eh, 'et ndet hukwa' nahzun, 'et ts'iyawh nuhwhuba 'et nduwhténilh. ⁸'Ink'ez mai lhái nuhwhuts'u hánulhyeh t'eh, 'et huwa se'aBá 'en buba whudóolti. 'Et huwa sugha hoodul'eh wahle. ⁹Se'aBá 'en si sk'entsi'. 'Et whuz na'a zeh nuhk'esi', 'et huwa be nuhk'esi' 'i bulh zeh 'ooht'e. ¹⁰Se'aBá nts'e na'a suba lhuhézya buk'úne' zust'en 'ink'ez yé sk'entsi', 'i chah bulh 'utést'e. 'Et whuz na'a zeh khunek nuht'adála 'i buk'úne' 'aht'en t'eh, 'et huwa be nuhwhuk'esi', 'i bulh 'óoh't'e. ¹¹K'an njan nuhwhudúsi, 'et be hóonust'i, 'i be hoonáht'i t'eh, 'et hoonáht'i k'et 'aw 'o 'un 'óoh't'e ghaít'ah. ¹²Ndi sughunek nuht'adái 'i ndutni, 'ilho ahli hoh nts'e na'a nuhk'esi', whuz na'a zeh lhk'eoohdutsi'. ¹³'Ilhunuh dune yuk'entsi' buk'uz dazsai t'eh, 'aw 'o 'un ye búk'eoots'i' hoolah. ¹⁴'Ink'ez khunek nuht'adái 'i buk'úne' aht'en t'eh, 'et nuhwheni sk'entsi' ahli. ¹⁵'Aw 'o 'un sunane'uht'en chanuhuduzúsih. Hubunane'hut'en 'en bumoodih nts'oh tune' 'ut'en, 'aw t'éhonízun. Si nts'oh tula se'aBá bugha whudáts'o, 'et soo ts'iyawh whún whunelhtan, 'et huwa sk'ehtsi' nuhwhudúsi. ¹⁶'Aw nuhwheni 'utahachásulhtel. Si lhtahánhola toohdelh 'ink'ez mai hanóolhyeh 'ink'ez nuhmai 'ilhuz wheni 'óot'e, 'et huwka 'et ninwhunila. 'Et huwa se'aBá ndai si sooz bugha but's'u hukwa' dahni, 'i si nuhgha íyoo'alh. ¹⁷K'an nuhwhudúsi, ts'iyawh lhk'eoohdutsi'. ¹⁸Ndi yun k'ut whudune nuhts'u hudutnik t'eh, whunalhunih nuhwheni nuhts'o dutetnik whutsuh, 'et 'uda si sts'u hudutnik inle. ¹⁹'En buluh ahli t'ah, 'et da nuhk'ehoots'i' wule t'eh, nuhwheni chah hubutah aht'ah 'et huwa. 'Et whunts'ih nuhwheni 'utáhanhóla, 'ink'ez 'aw 'o 'un bulah cháhlah, 'et huwa yinkak whudune nuhts'u hudutnik. ²⁰'Et huwa daja nuhwhudúsi whunalhunih, 'aw hubunane'hut'en, 'en dumoodih gha ndoh cha'ít'ah. Si dzuh nusúhulhdzut t'eh, nuhwheni chah dzuh nunóhotelhdzut. 'Et sughunek hik'úne' 'ust'en t'eh, nuhwheni nuhghunek chah hik'úne' oot'en sih. ²¹'Et nuhwheni sudune ahli, 'et huwa hoh teh ne'nohuhoolh'en, ndun whuz de sítel'h'a, 'aw t'éhinizun 'et huwa. ²²'Aw si whusáchasyal 'ink'ez hubulh yáchalhtih t'eh, lubeshi 'ulh'en hinli 'aw hukwa t'éhonózin ghaít'ah. 'Et k'an whuts'un hubulubeshi 'aw nuhínoolh'i hoolah. ²³Ndunnah sts'u dutnik, se'aBá 'en chah hits'u dutnik hoh 'uhint'ah. ²⁴Ndi 'ut'en 'ulh'en 'i 'aw 'uyoon cha'yulh'en, 'i bunalh cha'whuslel t'eh, 'et t'eh lubeshi 'ulh'en hinli 'aw da t'éhonózin. 'Et k'an 'ut'en

† 14:30 Ndi yun k'ut humoodih, 'en netsudule 'int'ah.

'ulh'en, 'i hinalh'en, 'et huwa si 'ink'ez se'aBá bulh nets'u hudutnik. ²⁵ 'Ink'ez ndi Yak'usda bughunek buba 'uk'une'úsduguz 'et ndutni, "Aw hoonliyaz huwa ilah sts'u hudutnik." Daja ni k'an 'aw 'et ne'whust'en. ²⁶ 'Et whunts'ih nuhLa'ut'en, Ndoni, ndai be 'alha 'uhoont'ah 'i but's'u haidelts'ut, 'en 'int'ah, se'aBá but's'un 'en nuhts'un telh'alh, 'en whusainya t'eh, si sugha ts'iyawh whun whunóolhtun, se'aBá yuts'u haínya 'et huwa. ²⁷ 'Ink'ez nuhwheni chah si sugha 'uyoon whúbuntelhtun, soo 'udechoo da whuts'un sulh 'aht'en 'et huwa."

16

Sizi yugha hoodul'eh 'en nihínudelh hinli, 'et huwa ndi yun k'ut whut'en dzuh nubotelhdeh, 'et huwa 'óbulhni.

¹ 'Et Sizi 'o 'un ndo búlhni, "Nuhwhuba 'alha' hoont'ah doo ka si whuladoolhtnih, 'et 'un whudúsní. ² Luglez 'et chah tinan whuts'unooyoot. 'Aw 'et whuz de whudezuhl, 'et t'eh ndunnah nuhteghan Yak'usda ba 'uhut'en huntezilh. ³ Si 'ink'ez se'aBá bulh t'éhnonízun 'et huwa ne'nohohoolh'en. ⁴ 'Et 'uda 'un whudáni, 'aw 'et ne'nohohulh'en t'eh, 'et whunaoohlúni. Nohwhulh 'ust'en inle 'et huwa 'aw nduchah nuhwhudusnil. ⁵ K'an ndun whuz de súdehl'a, 'en but's'un nátesdahl, 'et whunts'ih 'aw 'ilhunuh nuhtah nts'e tésyahl 'et hukwa chasuzoodúzulhkut. ⁶ 'Et njan 'un whudúsní, 'et huwa nuhwhudzi tso be dézbun, ⁷ 'et whunts'ih khunek 'alha' 'int'ah 'i 'ún whudusni, nuhghu natesdahl, 'et nuhwheni nuhwhuba whutézoo. 'Aw whenáchasdal t'eh, nuhLa'tet'ilh, 'en 'aw nuhts'un tooya ghaít'ah. Whenásja t'eh, 'et 'en nuhts'un téhl'alh. ⁸ 'Et whusainya t'eh bubeni tah dez'ai 'i bugha yinkak whudune lubeshi 'uhulh'en hinli t'éhonorín. 'Ink'ez ndai ts'ah'un 'int'ah 'i 'ink'ez Yak'usda ye náhezya 'i chah 'i bugha t'éhonorín. ⁹ Si sugha 'aw huba 'alha cha'hóot'ah 'et huwa hubunalh t'ewhunoolhzech lubeshi 'uhulh'en hinli. ¹⁰ Se'aBá but's'un nátesdahl 'ink'ez 'aw 'o 'un sooh'en ghaít'ah. 'Et 'i bugha ndai ts'ah'un 'int'ah 'i* Ndoni, 'en bubut'ewhunoolhzech. ¹¹ Ndi yun k'ut humoodih 'en† 'uda buba nahezya, 'et huwa ndi be náhudeh 'i ndi yun k'ut whudune, Ndoni 'en whebunoolhtun, 'en chah whuz na'a zeh buba nahutedeh. ¹² 'Awhuz tube lhat nuhwhudutésnilh whuz'ai, 'et whunts'ih k'an 'aw whulh whuhyin, ghaít'ah. ¹³ 'Et Ndoni, ndun khunek 'alha' 'int'ah 'i but's'u haídults'it, 'en nuhyudánde t'eh, 'en ndi khunek 'alha' 'int'ah, 'i nuhwheni tah nídoo'alh. 'Et ndi 'i be 'ut'en 'int'ah; 'aw dich'oh bughunek be ilah nohwhulh yátelhtuk, ndet whudánts'o, 'et zeh whunoh untelhtun, 'ink'ez nts'oh teh ne'whutet'en, 'et chah t'ewhunáhzun nuhwhutelhtsilh. ¹⁴ Se'ut'en k'ah ts'iyawh whútalhchulh 'ink'ez whunóhuhuntelhtun, 'et si suba whudóolhti. ¹⁵ Ts'iyaitsuk ndai se'aBá be'ilhdzun yinli, 'i si se'ilhdzun 'int'ah. 'Et 'un whudúsní Ndoni 'en ndai se'ut'en k'ah unli, 'i ts'iyawh yutélhchulh 'ink'ez 'i yenewhutelhtun. ¹⁶ 'Aw 'et se'aBá but's'un nátesdahl 'et huwa 'udusni dzuh sayaz whuts'un, 'aw sooh'en ghaít'ah. 'Et doo chah dzuh sayaz inle t'eh, 'et suteh'ilh." hubúlhni. ¹⁷ 'Et yugha hoodul'eh dich'oh chah lhahoodulhtuk, "Ndi khunek ye nelh yalhtuk 'i lhe'utni, 'Se'aBá but's'u nátesdahl,' 'ink'ez, 'Dzuh sayaz whuts'un, 'et 'aw sooh'en ghaít'ah. 'Et doo chah dzuh sayaz whuts'un, 'et suteh'ilh.' 'I daja ni hoh 'utni?" ¹⁸ 'Et 'o 'un chah 'uhutni, "Njan dzuh sayaz whuts'un ní, 'et daja ni hoh 'utni? Wheni 'aw t'ets'onízun." ¹⁹ 'Et Sizi hukwa huyoodutélhkut hukwa' huninzun, 'uda t'ewhunínzun 'et ndo búlhni, "Nuhwhudúsní dzuh sayaz whuts'un, 'et 'aw sooh'en ghaít'ah. 'Et doo chah dzuh sayaz inle t'eh, 'et suteh'ilh. 'Et ih nuhwhenich'oh nuhtah hukwa lhoodulhukut? ²⁰ Soo ts'ah'un na'a 'un whudúsní, tehtso 'ink'ez 'o 'un chah tube sk'enitehleh, 'et whunts'ih yinkak whudune hontélnik. Nuhwheni tube tso tehleh, 'et whunts'ih nuhtso 'i bé hoonah'ti 'i tele. ²¹ 'Et whuz na'a ts'eke buyaz whutéleh, 'en k'una'a 'et ndúhoont'ah. 'Aw 'et wheghah whudezuhl which'a ní unli lhih. 'Et buzki whulih teh, ye ndida 'i yunaoodilnah, 'uski yinkak nenilhti 'et tube hóont'i. ²² 'Et whuz na'a zeh nuhwheni k'an tso ahlí, 'et whunts'ih nanwhutest'ilh 'ink'ez nuhdzi hóotet'i, 'ink'ez be hóonaht'i 'i 'aw nuhghu hayóolhchoot ghaít'ah. ²³ 'Et dzin t'eh, 'aw hoonliyaz sut's'u ka' dooh'tni ghaít'ah. Soo ts'ah'un na'a 'un whudúsní, se'aBá si soozí bugha hoonliyaz but's'u hukwa' dahni t'eh, ndai buka' dahni, 'i nuhgha íte'ah. ²⁴ K'an whuts'un si soozí bugha 'aw but's'o hukwa' dahni hoolah. 'Et se'aBá huboodulhkut, 'et nuhgha whútelts'ulh, 'ink'ez 'et be ts'uhóont'i teht'ilh.

"Ndi yun k'ut humoodih, 'ink'ez be 'ut'en k'ah chah, ts'iyawh buch'a' nílhde," ni Sizi

²⁵ "Whutsuh da khunek whe' hoont'ah hooyah be 'ún whudusni inle. 'Et whunts'ih whuz de whélt's'ulh, khunek whe' hoont'ah hooyah be ilah 'udutésnilh. Se'aBá 'en bugha soo ts'et khunek 'i be nuhwhudutésnilh. ²⁶ 'Et neóodinzut t'eh, 'aw si ilah se'aBá nuhwhuba bóodolhkut nuhwhudusni, nuhwhenich'oh si soozí bugha hóobudutelhkut. ²⁷ Nuhwheni sk'ehtsi 'et huwa se'aBá dich'oh nuhk'entsi', 'ink'ez Yak'usda ts'un haya 'et nuhwhuba 'alha 'uhoont'ah, 'et huwa nuhwheni nuhk'entsi'. ²⁸ Se'aBá 'en but's'u háya hoh ndi yun

* **16:10** Sizi Gri 'en chah ts'ah'un 'int'ah, 'et chah bulh t'ewhunoolhzech. † **16:11** Ndi yun k'ut humoodih, 'en netsudule 'int'ah.

k'ut niníya. 'Aw 'et ndi yun k'ut whuch'a natesdaldh 'ink'ez se'abÁ 'en butsu nátesdaldh," hubúlhni. ²⁹ 'Et yugha hoodul'eh 'uhíyúlhni, "K'an 'aw 'et ts'et khunek be nelh yáilhtuk, 'aw khunek whe' hoont'ah hooyah be ilah 'udini. ³⁰ K'an 'aw 'et t'ets'onínzun soo ts'iyaintsuk 'et t'éwhúnínzun 'et huwa 'aw 'o 'un nts'oodólhkut ghaif'ah. Daja nedáni, 'et huwa Yak'usda butsu'un hainya neba 'alha 'uhoont'ah." ³¹ 'Et Sizi ndo búlhni, "Soo ih nuhwhuba 'alha 'uhoont'ah? ³² Nulh'en whuz de whúdezulh 'aw 'et 'et níoodenzut, ndet 'ilhunah ahli hoh lhch'a dutelhuwus 'ink'ez nuhwhenich'oh nuhwhútk'una'a 'uteht'ílh. Si chah sich'oh úsdli hoh sughu téhdulh, 'et whunts'ih 'aw sich'oh ilah 'ust'ah, se'abÁ 'en sulh 'int'ah 'et huwa. ³³ K'an njan 'et hubugha ndi khunek 'i be nohwhulh yáilhtuk, daja nuhwhudáni, 'et huwa nedzi be dezghel, 'i 'ooht'e. Ndi yun k'ut tube nuhwhé'huzoola, 'et whunts'ih hóht'ah, ndi yun k'ut humoodih 'ink'ez be 'ut'en k'ah chah, ts'iyawh buch'a 'nuldhe 'et huwa.

17

Sizi Gri náwhulnuk degha nus dezti unli hoh de'abÁ yuts'un tenadudli

¹ Sizi njan 'et ndudáni hukw'elh'az, nduk yak'uz yuta'en 'ink'ez 'utni, "ABÁ, 'aw 'et sts'o dezulh 'aw 'et whusawhélt'sut. NYe' buba whudélti, 'et whuz na'a nYe' chah mba whudólhti. ² 'Et whuz na'a zeh 'et ndineh hoh yinkak whudune ts'iyawh hubugha ndoh oot'e, 'et hubugha óoni'ai, 'et ndunnah sughá buninla 'ilhuz wheni hiye khútenalh 'i hubugha ités'alh. ³ 'Et ndez na'a ndi 'ilhuz wheni be khuténalh, nyun zeh ts'ah'un Yak'usda inli, 'ink'ez ndun whuz de haílh'a, Sizi Gri 'en 'int'ah, ndunnah soo hubeni be t'éhonoozeh, ndi 'ilhuz wheni be khuténalh 'et 'uhoont'ah. ⁴ 'Ut'en sugha ní'ai 'i 'aw 'et lhadúsda hoh ndi yun k'ut mba whudálhti. ⁵ ABÁ, ndi yun k'ut 'uwhténilh whutsuh da, ndai nyun bulh hoh da bé whudáti, 'i be k'an doo chah zeh suba whudélti.

Sizi yugha hoodul'eh huba tenadudli.

⁶ Ndunnah ndi yun k'ut whudune hubutah sughá buninla, ts'iyannah nyun ye ne-hobonelhtan. Nyun hube'ílhdzun hinli hoh si sughá buninla 'ink'ez nghunek hik'úne' 'ust'en. ⁷ Ndai sugha nínla, 'i ts'iyawh nyun nts'u haínkat 'i 'int'ah. 'Et k'an bubeni be t'éhonínzun. ⁸ Ndai khunek 'en huba st'áida'ai, 'i chah hubut'áida'ai. Soo cho híyílhchoot 'ink'ez hubeni be t'éhonínzun, 'et huwa nyun nts'u háya 'ink'ez nyun whuz de súdehl'a, 'et chah soo hubeni be t'éhonínzun 'ink'ez huba 'alha 'uhoont'ah. ⁹ Huba tenadusdli. 'Aw ndi yun k'ut whudune, 'en ilah huba tenadusdli. Ndunnah sughá buninla, 'en zeh huba tenadusdli, nyun hube'ílhdzun hinli 'et huwa. ¹⁰ Ndai si se'ílhdzun unli, 'i nyun nye'ílhdzun 'int'ah, 'ink'ez ndai nyun nye'ílhdzun unli, si se'ílhdzun 'int'ah. 'Ink'ez 'en hubugha 'aw 'et suba whudáti. ¹¹ 'Aw 'o 'un ndi yun k'ut sída ílah hoh nts'un usyallh, 'et whunts'ih ndunnah, 'en ndi yun k'ut 'uhint'ah. 'ABÁ, lubeshi bughoh hoolah 'int'ah, 'ink'ez ndunnah sughá buninla, nyoozi be ílhtus, 'i be huboontun, 'i be nyun si bulh 'ilho ídudli, whuz na'a didut chah 'ilho hoole. ¹² Ndunnah sughá buninla, ndi yun k'ut 'awhuz hubulh 'úst'ah da, nyoozi be ílhtus, 'i be huboostun 'ink'ez hubughosdle. 'Et 'aw kwuncho yuh whuye', 'en ilah, 'et huwa nts'oh teh bugha 'uk'une'úsduguz inle, hoh teh whét'en. ¹³ K'an 'aw 'et nts'un téya. 'Et whunts'ih 'awhuz ndi yun k'ut sída hoh njan 'et howu yalhtuk, 'et soo ts'ah'un na ndai be whúnelhnik, 'i be hubudzi doobun. ¹⁴ Nghunek hubugha íde'ai 'ink'ez ndi yun k'ut whudune hubuts'u hudutnik. Nts'e na'a si 'aw ndi yun k'ut whudune hubulh 'ust'ah ílah, 'et whuz na'a 'en chah 'aw ndi yun k'ut whudune hubulh 'uhint'ah ílah. 'Et huwa ndi yun k'ut whudune hubuts'u hudutnik. ¹⁵ 'Aw ndi yun k'ut whuch'a nabónlelh, 'et ílah nts'u húkwa' dusni, 'et whunts'ih ntsi', 'en ch'a soo cho hubughonle, 'et nts'u húkwa' dusni. ¹⁶ Nts'e na'a 'aw ndi yun k'ut whudune hubulh 'uhint'ah ílah, 'et whuz na'a si chah 'aw ndi yun k'ut whudune hubulh 'ust'ah ílah. ¹⁷ Khunek 'alha' 'int'ah 'i nts'u hadélt'sut, 'i be nyunch'oh mba 'udun nibuninle. Nghunek 'i khunek 'alha' 'int'ah 'i 'int'ah. ¹⁸ Nts'e na'a nyun ndi yun k'ut whudune butsu'un whesalh'a, 'et whuz na'a 'en ndi yun k'ut whudune butsu'un whébalh'a. ¹⁹ 'Ink'ez 'en hubugha si 'udun ní'dunlhuti, 'et whuz na'a 'en chah soo ts'ah'un na'a nyun mba 'udun nibuninla hoole.

Sizi Gri ts'iyannah ndan huba 'alha 'uhoont'ah 'en huba tenadudli

²⁰ 'Aw ndunnah, 'en zeh ílah huba tenadusdli, ndunnah bughunek hubugha si sugha huba 'alha 'uwhté'ílh, 'en chah huba tenadusdli. ²¹ 'Et t'éh soo ts'iyannah 'ilho 'ilhu-nahuwésdel hoole. 'ABÁ nts'e na'a nyun syudínda, 'ink'ez si chah nyudúsda, 'et whuz na'a zeh neyuh 'uhoote. 'Et hoh yinkak whudune soo ts'ah'un na'a huba 'alha 'uhot'e nyun whuz de súdehl'a, 'et huwa. ²² 'Ink'ez ndi be dézti sugha ní'ai, 'i 'o 'un hubugha iní'ai. 'I be nyun si bulh da ídut'ah hoh 'ilho ídúdi, whuz na'a zeh 'ilho hoole. ²³ Si 'en hubuyudúsda usdli 'ink'ez nyun si syudínda inli, 'et whuz na'a ndunnah 'ilho hinli hoh lhahádootneh. 'Et huwa yinkak whudune soo bubeni be t'éhonózin nyun whuz de súdehl'a. 'Ink'ez nts'e na'a sk'eintsi', whuz na'a 'en chah hubuk'eintsi'. ²⁴ Ndi yun k'ut 'owhténilh whutsuh da sk'eintsi', 'ink'ez bé dézti

'i sugha ni'ai ínle, 'et soo cho ndunnah huwhute'ilh hukwa' nuszun. 'Et huwa 'aBá ndunnah sughá buninla, k'an nts'e 'ust'ah 'et sulh 'úhoot'e hukwa' nuszun. ²⁵ 'ABá nyun ts'ah'un 'int'ah inli. 'Et yinkak whudune nyun ngha 'aw soo cho bubeni be t'echanyonízun. 'Et si t'ényunúszun 'ink'ez ndunnah sulh 'út'en chah t'éhonínzun nyun whuz de sùtelh'a. ²⁶ 'Ink'ez nyun ngha soo cho bubeni be t'ehonózin hubuzílhsti. 'Ink'ez nyun ngha 'o 'un chah soo cho t'éhontézin hubutélhstih. 'Et huwa ndai be sk'entsi' i hubuyuh doo'a, 'ink'ez si chah hubuyuh 'utesdalh."

18

Sizi 'aw 'et huyilhchoot.

¹ Sizi ndi khunek be tenadedli hukw'elh'az, yugha hoodul'eh tubulh took'oh wheyaz Kedron huwhútni, nyan yahunindel. 'Et haniyeh k'et whuz'ai. 'Et yugha hoodul'eh tubulh 'et dahunindel. ² 'Ink'ez Judas, ndun da ye 'ónket, 'en chah nyo t'éwhunúnzun, Sizi yugha hoodul'eh tubulh lhat 'et 'ilhúnahodulh 'et huwa. ³ 'Et náwhulnuk bumoodih 'ink'ez Pharisee teh, ndunnah nehúghan 'ink'ez néhghel chah, Judas dulh hubutelhudel. Too dízk'un teh, bé nukwunult'a, 'ink'ez soh cho teh, ts'iyawh hiyelelh. ⁴ Sizi nts'oh teh didut bugha ne'whutet'en, soo ts'iyawh t'éwhunúnzun, 'et hubududezya 'ink'ez huboodulhkut, "Ndan kunúhta hoh 'aht'en?" hubúlhni. ⁵ 'Et 'uhiyúlhni, "Sizi Nazareth whut'en, 'en kúnzuta." 'Et Sizi ndo búlhni, "Si 'en 'ust'ah." 'Et Judas ye 'ónket, 'en chah hubutah súyin. ⁶ 'Ndet Sizi si 'en 'ust'ah hubúlhni hoh, ts'iyawh k'ah na'húja 'ink'ez yun k'ut nahánkat. ⁷ 'Et doo chah zeh huboodulhkut, "Ndan kunúhta hoh 'aht'en?" 'Et 'uhutni, "Sizi Nazareth whut'en, 'en kúnzuta." ⁸ 'Et Sizi ndo búlhni, "Uda ndun whudáni, si 'en 'ust'ah. 'Et si skunáhta t'eh, ndunnah, 'en nahutoodelh hubugha óonah'aih." ⁹ 'Et Sizi whutsuh da daja tenadedli ínle da, "Sughá buninla 'aw 'ilhunuh whunts'ih tinta chalhtel," ni, 'et hoh teh whét'en 'et ndo búlhni. ¹⁰ 'Et Simon Peter soh cho ut'i, déhayalhtsus, 'i be náwhulnuk degha nus dezti be 'ustl'en ye yoonilht'o hoh nalnhit ts'ih yudzo habe' yalht'o. 'En 'ustl'en boozí Malchus 'uhiyúlhni. ¹¹ 'Et Sizi Peter ndi yúlhni, "Nyoo soh cho buzus be naftih. 'Alha ilah lah ndi lubot 'aw chatuzésnil se'aBá stl'ayáncái 'i?" ¹² 'Et lhuhudúghan bumoodih 'ink'ez Lizwif néhghel Sizi hiyilhchoot 'ink'ez hiyulghel. ¹³ Soo 'udechoo Annas 'en cho highu hinílhsti. 'En Caiaphas 'et nawhuduzuk huba náwhulnuk degha nus dezti unli ínle, 'ink'ez Annas, 'en buzaz 'int'ah 'et. ¹⁴ 'Et ndun Caiaphas 'en 'utni ínle, Lizwif hubugha 'utni hoh ndutni, 'ilhunuh dune 'en ts'iyannah dune ba dazsai t'eh, 'et whutézoo ni ínle.

Peter, 'aw Sizi t'einúnzun.

¹⁵ Simon Peter 'ink'ez 'ilhunuh yugha hoodul'eh bulh Sizi hiyúntiz'az. Ndun 'ilhunuh yugha hoodul'eh, 'en náwhulnuk degha nus dezti t'einúnzun, 'et 'en Sizi nanist'oo bet yúlh daní'az. ¹⁶ 'Et Peter ndati yoo 'az ts'ih siyin. 'Et ndun Sizi yugha hoodul'eh 'ilhunuh, ndun náwhulnuk degha nus dezti t'einúnzun, 'en 'az tenínya 'ink'ez ndati huwunli yulh yailhtuk hoh Peter chah dainilhti. ¹⁷ 'Et ndun ts'ekkeyaz, ndati huwunli, 'en Peter ndi yúlhni, "Nyun chah ih ndun dune yugha hoodul'eh 'ilhunuh inli?" 'Et Peter, "Awundooh," yúlhni. ¹⁸ 'Et bulunah 'ustl'en 'ink'ez néhghel teh whúzk'uz 'et kwun húdulhk'an. Na'danildzilh hoh Peter 'en chah hubutah siyin 'ink'ez na'dunildzilh. ¹⁹ 'Et ndun náwhulnuk degha nus dezti Sizi yugha hoodul'eh, 'ink'ez hubodulh'eh hukwa yoodulhkut. ²⁰ 'Et Sizi ndi yúlhni, "Soo ts'et gaih 'et ndi yun k'ut whudune hubulh yáhtuk. 'Ahoohyez wheni luglez 'ink'ez luglez wuhocho nts'e Lizwif 'ilhúnahuwúdulh, 'et dune hóodulh'eh. 'Aw 'ilhuwhu'iz khunek be yachálhtih. ²¹ 'Ink'ez di ka hukwa soodulhkut? Daja dusni ndunnah sudánts'o, 'en huboodulhkut, soo ts'ah'un t'éhonúnzun daja dání 'et." ²² 'Et Sizi njan ndutni hoh, 'ilhunuh néhghel yuzih siyin, yunen ts'ih yúnzúkuk 'ink'ez ndi yúlhni, "Ndan na'dunúnzun hoh 'udini? Ndan náwhulnuk degha nus dezti, 'en whuz na'a bulh yailhtuk!" ²³ 'Et Sizi ndi yúlhni, "Dzuh k'una'a yatélhtuk t'eh, 'et nedini daja dání. 'Et ts'ah'un na'a 'un dusni t'eh, di ka sunénkuk?" ²⁴ 'Et Annas 'awhuz Sizi lhughel hoh náwhulnuk degha nus dezti Caiaphas, 'en ts'un wheyalh'a. ²⁵ 'Et Peter 'awhuz tse ba siyin 'ink'ez na'dunildzilh, 'et 'uhiyúlhni, "Nyun chah tulih yugha hoodul'eh hubutah 'ilhunuh inli?" 'Et whuts'oodedlai 'ink'ez, "Awundooh," hubúlhni. ²⁶ 'Et náwhulnuk degha nus dezti be 'ustl'en 'ilhunuh, Peter ndun 'en yudzo haílh'az, 'en bunadun 'int'ah, 'en 'uyúlhni, "Nyun chah tulih haniyeh k'et bulh 'int'en hoh nyunalh'en ínle?" ²⁷ 'Et doo chah zeh Peter whuts'oodedlai hoh soo 'ahoh lígok dune 'udéja.

Sizi, Pilate but nihílnilhti

²⁸ 'Et Sizi, Caiaphas hukwo t'ínahinilhti, yun k'ut humoodih, Pilate hiyulhni 'en bukoo ts'ih whuz whehíyalhti. Bundada tube 'uda 'uhoont'ah 'ink'ez Lizwif 'aw bukoo dachahídulh. 'Et bukoo dahúnindel t'eh, 'en huba me hoonli.* 'Et ndahúja t'eh, 'aw njan Hubutus

* 18:28 Ndan 'en 'udun yun k'ut whut'en unli, 'aw Lizwif yughu daooya huba cha'hóot'ah huninzun.

Lhuseya nayút'et'ah, 'aw 'uhoo'alh ghaít'ah 'et huwa. ²⁹ 'Et Pilate 'az buts'un teninya 'ink'ez huboodulhukut, "Ndun dune ndet buk'éwhah'ai hoh 'ah't'en?" ³⁰ 'Et 'uhiyúlhni, "Aw ndun dune tinta cha'ít'il t'eh, 'aw nts'uz toolhte ghaít'ah." ³¹ 'Et Pilate ndo búlhni, "Ulhchoot 'ink'ez nuwhenich'oh nuhwhuba butulhúhesde 'i k'una'a buba nahahyeh!" 'Et ndunnah Lizwif 'uhiyulhni, "Wheni 'aw dune ts'uzoolhghelhel negha chahóot'al." ³² Njan 'et nduhútni hoh Sizi nts'e na'a datétsah howdu yailhtuk íne, hoh teh ne'hóot'en ka' hutni. ³³ 'Et Pilate bukoo ts'ih whenája. Sizi yukunáwhulh'a 'ink'ez ndi yúlhni, "Nyun ih Lizwif hubudayi cho inli?" ³⁴ 'Et Sizi ndi yúlhni, "Nyunch'oh ih 'et ndunínzun, k'us 'uyoon si sugha nyádani?" ³⁵ 'Et Pilate 'uyúlhni, "Si ih Lizwif usdli nínzun? Nyunch'oh nyulh dune 'ink'ez náwhulnuk bumoodih, 'en stl'ányuhalhti! Ndet hoh tinta 'nint'en?" ³⁶ 'Et Sizi ndi yúlhni, "Nts'e hubudayi cho usdli 'et 'aw ndi yun k'ut ilah 'uhoont'ah. 'Et ndi yun k'ut hubudayi cho usdli t'eh, suhunedulh 'aw da Lizwif tl'achasúhoolhtel wule da. 'Awundooh, hubudayi cho usdli 'aw ndi yun k'ut ilah 'uhoont'ah." ³⁷ 'Et Pilate yoodulhukut, "Et t'eh hubudayi cho inli ho' 'int'ah!" 'Et Sizi ndi yúlhni, "Nyun 'alha 'udini hubudayi cho usdli. 'Et wheni whuzidlí 'et huwa yinkak whudune soo cho hubeni be khunek 'alha 'int'ah 'i t'éhinoozeh 'et ndi yun k'ut neníya. Ndunnah khunek 'alha' 'int'ah 'i t'ehunínzun, daja dusni soo cho suhoozéltsh'ai." ³⁸ 'Et Pilate ndi yúlhni, "Di 'int'ah khunek 'alha' 'int'ah í?" 'Et ndudéja hukw'elh'az doo chah zeh Lizwif 'az buts'un tinanja 'ink'ez ndo búlhni, "Aw hoh tinta 'unt'en bugha nachawhus'al! ³⁹ 'Et nuhwheni nuwhe'út'en k'ah whuz'ai Nuhtus Lhuséya whutah 'ilhunuh dune buda'de'ai, 'en nuhwhuba bulanadustnih sih. Ndun Lizwif hubudayi cho, 'en ih bula nadustestnih hukwa' nahzun?" ⁴⁰ 'Et soo ts'iyawh sulya hulltuk hoh 'uhutni, "Barabbas 'en bula nadintnih, 'aw ndun 'en ílah!" 'Et ndun Barabbas 'en 'undunut'ih 'int'ah.

19

Pilate, Sizi lhdulalghus be nabe'híduletshih ba 'et nihímilhti.

¹ 'Et hukw'elh'az Pilate Sizi hiyilhchoot 'ink'ez hiyolhtsus, ² 'ink'ez nehughan whus cho 'awh nahínelhwut, 'i hítsi nehída'ai, 'ink'ez nalhti duk'un, 'i higha hiwelhnik, ³ 'ink'ez 'uhiyulhni, "Lizwif hubudayi cho sa cho khona." 'Ink'ez hinen ts'ih hiyooukat. ⁴ 'Et doo chah zeh Pilate 'az hubuts'un tinanja 'ink'ez ndo búlhni, "Nulh'en, ndun si 'aw hoh tinta 'unt'en bugha nachawhús'al, 'et nuhwhuts'un tinaníhti." ⁵ 'Et Sizi whus cho butsi niden'ai 'ink'ez nalhti duk'un 'i nait's'uz hoh tinanja Pilate yunilh'en 'et ndo búlhni, "Nulh'en, ndun dune!" ⁶ Náwhulnuk bumoodih 'ink'ez nélhghel teh, hitelh'en ibulh, soo tube cho sulya hulltuk 'ink'ez, "Lhdulalghus yundunulht'ah! Lhdulalghus yundunulht'ah!" hutni. 'Et Pilate ndo búlhni, "Nuhwhenich'oh ulhchoot 'ink'ez lhdulalghus yundunulht'ah! Si 'aw hoh tinta 'unt'en bugha nachawhús'al 'et huwa!" ⁷ 'Et Lizwif 'uhiyúlhni, "Nuwheni khunek neba butulhúhesde 'i ts'ít'i, 'i k'ut 'utni, daóotsah huba 'uhoont'ah. Lhe'utni Yak'usda buYe' 'ududulhútsi 'et huwa." ⁸ 'Et Pilate hubuduzts'ai 'et tube nelhújoot. ⁹ 'Et doo chah zeh bukoo ts'ih danája 'ink'ez Sizi yoodulhukut, "Nts'ez de háinya ho' nint'ah?" yúlhni. 'Et Sizi 'aw yulh yachailhtih. ¹⁰ 'Et Pilate ndi yúlhni, "Aw ih sulya yaóolhtuk ghaít'ah? 'Aw ih t'éwhunuzínzun lhdulalghus whunyunduntélt'us sughá whunt'ai k'us nla nadustestnih chah sughá whunt'ai?" ¹¹ 'Et Sizi ndi yúlhni, "Aw ndus de yak'uz whuts'un ngha chahóot'al t'eh, 'aw sugha ndoh 'ont'e ghaít'ah. 'Et huwa ndun ntl'asálhti, 'en bulubeshi nyun nlubeshi 'o nus 'ulcho." ¹² 'Et Pilate yudúts'ai hoh Sizi yúla nadootnih, 'et nahó'alh hukwa 'ét'en. 'Et Lizwif sulya hulltuk 'ink'ez 'uhiyúlhni, "Ndun dune bula nadantnik t'ah, 'aw hubudayi cho Caesar buk'entsi' ilah 'int'ah! Ndan hubudayi cho na'dudil'i, 'en hubudayi cho Caesar yuch'a détni 'int'ah!" ¹³ 'Et Pilate whuduzts'ai hoh kw'usuda yuk'usda hoh dune ba naheyelh, 'i k'enát'adida. 'Et Sizi hububut neheyóolhtel ndet Hebrew k'una'a Gabbatha huwhútni, 'i khunek 'utni, Tse Buk'ut Hoonzoo, 'i ni hoh 'utni. 'I k'ut kw'uts'uzda yulh'ai dune ba naheyelh wheni. ¹⁴ Ndet dzin da Hubutus Lhuséya, 'et dzin wheni lha húdutneh, 6:00 bat'en 'uhúnet'oh, 'et Pilate Lizwif ndo búlhni, "Ndun nuhwhubudayi cho nulh'en!" ¹⁵ 'Et whunts'ih sulya hulltuk 'ink'ez 'uhutni, "Awh 'udini! Lhdulalghus yundunulht'ah!" 'Et Pilate ndo búlhni, "Nuhwhubudayi cho 'en ih lhdulalghus k'ehítelhteh?" 'Et náwhulnuk bumoodih 'uhutni, "Hubudayi cho Caesar 'aw 'en zeh nehubudayi cho, 'aw 'uyoon nehubudayi cho hoolah!"

Sizi lhdulalghus k'ehíyilhti.

¹⁶ 'Aw 'et hodánts'o Pilate Sizi lhdulalghus k'ehúyolhtel wheni butl'ayálhti. Hiyilhchoot 'ink'ez 'o 'un whenahíyalhti. ¹⁷ 'Et dulhdulalghus yudetilh hoh, nts'e da 'Utsin Ts'un huwhútni, whuz ninya. 'Et Hebrew k'una'a Golgotha huwhútni. ¹⁸ 'Et lhdulalghus k'ehíyilhti. 'Uyoon nanah chah hiyúlh 'ubihinla. 'Ilhunuh hoh 'ílhk'us ts'ih, 'et 'ilhunuh chah bugha náilhnih ts'ih, 'et Sizi 'en soo buniz 'uhíyínla. ¹⁹ 'Et Pilate yuk'úne'uzguz, 'i butl'ayá'ai lhdulalghus hiyundunóhlt'a ka. 'I k'ut 'utni,

Sizi Nazareth Whut'en, Lizwif hubudayi cho 'int'ah.

²⁰ Tube keyah wheghah 'uhiyinla hoh lhdulalhgus k'éhúyilhti 'et huwa, tube lhanah Lizwif ndi Pilate yuk'úne'úzguz 'i hik'eyailhtuk. 'Ink'ez ndi khunek tawh dédowh buk'una'a 'uk'úne'úsduguz. Hebrew k'una'a, Greek k'una'a, 'ink'ez Latin k'una'a chah. ²¹ 'Et huwa Lizwif náwhulnuk bumoodih Pilate hiyúlhni, "Aw ndan Lizwif hubudayi cho 'int'ah dini hoh ilah 'uk'e'inges. 'Ants'ih njan ndutni dini, si Lizwif hubudayi cho 'ust'ah." ²² 'Et Pilate ndo búlhni, "Ndai hukw'úne'zíguz, 'i nts'e na'a usdla, 'et whuz na'a 'oot'e ka usdla." ²³ 'Et ndunnah nehughan, 'en Sizi lhdulalhgus k'ut whehídunilht'o hukw'elh'az, hinaih hiyílhchoot 'ink'ez dink'i hiyulhtsi hoh'ilhunah hinli hoh lhtahíyulya. 'Et ndi 'ude k'ut ye usda, 'i 'aw lhundunílkai ilah hoh 'ilho zeh unli hoh 'ulya. ²⁴ 'I bugha dich'oh 'ulhódutni, "Ndi 'i 'aw yachazdoolhch'oolh. 'Ants'ih buka 'áts'oolih, ndan simba but's'ítooneh." 'Et nduhútni hoh Yak'usda bughunek soo buk'ah teh né'hoot'en 'et 'uhutni. Ndi khunek 'i ndutni inle, "Sunaih, 'i ts'iyawh lhtahuyulya.

'Et 'ude k'ut be sída, 'i hika 'áinlih." 'Et soo ndunnah nehughan ne'húst'en. ²⁵ 'Et Sizi bulhdulalhgus soo begbah 'et 'ama siyin. 'Ama bulhtus chah, 'ink'ez Mary Clopas bu'at chah, 'ink'ez Mary Magdala whut'en chah. ²⁶ Sizi 'ama yunilh'en 'ink'ez 'ilhunuh yugha hoodul'eh, soo degaha nus yuk'entsi, 'en chah yughah siyin. 'Et Sizi 'ama ndi yúlhni, "Ts'eke, ndun nye' nilh'en." ²⁷ 'Et ndun yugha hoodul'eh, 'en chah yunilh'en hoh 'uyúlhni, "Ndu nnyu'ama nilh'en." Soo 'et whuts'un ndun yugha hoodul'eh Sizi 'ama bukoo dáinilhti.

Lhdulalhgus k'ut Sizi ye khúna 'iyula dítnik.

²⁸ Njan hoh teh ne'whust'en hukw'elh'az Sizi t'éwhunínzun soo ts'iyáintsuk lhaoodíja. 'Et didut bugha Yak'usda bughunek 'uk'úne'úsduguz 'i daja ni, 'et ndúhoneh 'et huwa, "Ta'óosde," ni. ²⁹ 'Et nyo 'oosa'yaz mai too ts'ulki' 'i 'et sú'ai. 'Et ndi hitabehiyalhtuk 'i nyoo mai too huyé tóonahiyuz'ai 'ink'ez duchun hyssop hiyúlhni, 'i higha íwelh'oo, 'ink'ez hízek ts'ih díbe' hidunintan. ³⁰ 'Et ndi mai too ts'ulki' 'i yálhka 'ink'ez 'utni, "Aw 'et ts'iyáintsuk lhawhúdíja." Yuk ninent'ai 'ink'ez ye khúna 'iyula detnik. ³¹ 'Et nahulyis dzin huba lhahúdtne, 'ink'ez nats'ulyis dzin whudé'zi hoh 'uhoont'ah. Lizwif 'et dzin dune buyust'e 'aw lhdulalhgus k'ut hoolhte hukwa cha'hunízun, 'et huwa Pilate hiyoodulhkut bukechun k'unuhíyoooyuz* 'ink'ez buyust'e nanáhiyoolhtelh 'et hukwa. ³² Nehughan whuz lghahúdíndel hoh soo 'udechoo ndunnah nanah Sizi hiyulh lhdulalhgus k'ut sulhti, 'en choo bukechun k'unuhíyuzuz. ³³ 'Et Sizi highu nindel hoh 'uda dazsai hinilh'en, 'et 'aw hikechun lhk'uchahayíyus. ³⁴ 'Et whunts'ih 'ilhunuh nehughan sohtuz be yuzih k'ut 'et yúzwut. 'Aho 'uskai 'ink'ez tooyaz bulh, 'i but's'u hayéjul. ³⁵ 'Et ndun howu yalhtuk, soo 'alha whunalh'en hoh 'utni. 'Ink'ez daja ni soo dich'oh t'éwhunínzun hoh 'utni. 'Et huwa nuhwhuba 'alha 'uhot'e. ³⁶ 'Et whuz na'a hoh teh ne'whust'en. 'Et huwa ndai Yak'usda bughunek 'uk'úne'úsduguz, 'i k'una'a lhawhúduja hoh ndutni, "Aw 'ilho but's'un 'i whunts'ih k'uchaítih," ni. ³⁷ 'Et Yak'usda be dustl'us 'uk'úne'úsduguz, 'i k'ut 'udun 'et chah 'utni, "Ndu huyúzwut, hinoohl'en," ni.

Sizi whíhíyalhti.

³⁸ 'Aw 'et hoh teh ne'whust'en hukw'elh'az 'et Joseph, Arimathea whut'en, Pilate yughu ninya 'ink'ez Sizi buyust'e yóolhchoot hukwa yoodulhkut. 'Et ndun Joseph 'en chah Sizi yugha hoodul'eh unli, 'et whunts'ih Lizwif hube nuljut 'et whu'iz Pilate 'aw 'et yugha óoni'ai Sizi buyust'e nayóolchoot 'ink'ez whusainya 'ink'ez buyust'e yílhchoot. ³⁹ 'Et Nicodemus, 'en chah yulh whúsain'az. 'En 'uja inle soo 'udechoo Sizi hoh det'en hoh 'ilhe 'ulh'ek yughu ninya. Yoo sooltsun, 'i myrrh 'ink'ez aloes bulh lhtadilya 'i hoh 100 pounds bat'en 'uldaz, 'i whusayánla. ⁴⁰ 'Et Sizi buyust'e hiyílhchoot 'ink'ez Lizwif hube 'ut'en k'ah hukw'una'a, naih dezti lhuyul 'i hiyílhchoot 'ink'ez yoo sooltsun 'i lhtahidénla 'i hik'únuhíyuzdzai, 'ink'ez Sizi buyust'e higha híwezduz 'ahitelhtelh wheni. ⁴¹ 'Et nyo ndet da lhdulalhgus ye hidunilht'o, 'et wheghah haníyeh k'et whuz'ai. 'Et k'ahoondit tse be tsa k'et 'aw whutsuh da dune whuyuchadílhti whuz'ai. ⁴² 'Et tube nilhdukwh whuz'ai 'et Sizi buyust'e 'et 'uhíyalhti, Lizwif 'et dzin lhahúdtne h'uhooont'ah 'et huwa.

20

Sizi ts'un k'ut dínadíja.

¹ Dimos dzin whutanilghel 'awhuz tsahólhgus hoh Mary Magdala whut'en, ts'un k'uz tezya. Whuz ninya hoh tse cho ts'un k'ut whudadune'ai, 'i 'udun dunez'ai hoh yutelh'en. ² 'Aw 'et Simon Peter 'ink'ez ndun 'ilhunuh Sizi yugha hoodul'eh k'us yuk'entsi, 'en bulh, hubughulgai 'ink'ez ndo búlhni, "NeMoodihti buyust'e hiyílhchoot. 'Uts'un whehíyalhti, 'ink'ez 'aw t'éts'onízun nts'e simba whehíyalhti." ³ 'Et Peter 'ink'ez ndun 'ilhunuh bulh ts'un

* 19:31 'A tsih daootsah.

k'uz ts'ih hutelghai. ⁴ Whuz lhgha hudilgai. 'Et ndun 'ilhunuh 'en Peter 'a bughanush lhgha dilgai 'et huwa 'udechoo ts'un k'uz lhgha dilgai. ⁵ 'Aw 'et whuz núlhgai hoh, nyuk 'uja 'ink'ez whiyah whunalh'en. 'Et naih dezti 'i 'et sula yunalh'en, 'et whunts'ih 'aw dachaiyal. ⁶ 'Et soo yúnelgih hoh Simon Peter whuz lhadilgai. 'En ts'un k'ut daninya 'ink'ez naih dezti 'i 'et sula yutelh'en. ⁷ 'I ndi dzezoh butsigah waiwesúduz inle, 'i 'aw naih dezti 'i butuh cha hóolah. Soo cho lhénintan 'ink'ez 'udun 'et sulhchooz. ⁸ 'Et ndun 'ilhunuh yugha hoodul'eh 'udechoo ts'un k'uz lhadilgai, 'en chah daninya. Soo cho whunalh'en 'ink'ez buba 'alha 'uhooga. ⁹ 'Et 'awhuz soo cho hubeni be t'éhonizun daja ni ndi Yak'usda bughunek 'uk'une'úsduzuguz 'i k'ut, Sizi yaidla tah dináduédal' 'et hubugha. ¹⁰ 'Aw 'et Sizi yugha hoodul'eh bukoo ts'un whenáhet'az.

Sizi, 'en Mary Magdala whut'en, 'en yunalh haínya.

¹¹ 'Et whunts'ih Mary 'en ts'un k'ut 'aw 'et nétl'adinda. Yoo 'az ts'ih siyin 'ink'ez utso. 'Ink'ez utso hoh yuk 'int'ah 'ink'ez ni tse tuz whunilh'en. ¹² Khunyaz nanah lizas soo lhuyul 'i be húzke, njan hoh hubutelh'en. 'Ilhunuh 'en yutsi t'ah, 'et 'ilhunuh chah yutelh'ah ndet Sizi buyust'e ilhte, 'et huzke. ¹³ 'Et hiyoodulh'kut, 'Ts'eke, di ka into?" 'Et ndo búlhni, "SMoodihti 'uts'un whehíyalhti 'ink'ez nts'e simba 'ahíyalhti 'aw t'éwhunuzúszun." ¹⁴ 'Et ndudéja hukw'elh'az n'un nalhu'a hoh khunyaz Sizi 'et siyin hoh yutelh'en, 'et whunts'ih 'aw Sizi 'int'ah 'aw nachayóolts'ulh. ¹⁵ 'Et Sizi ndi yúlhni, "Ts'eke, di ghinto? 'Ndan kunínta hoh 'int'en?" 'Et Mary 'uninzun haniyeh k'et huwunli tulih 'ut'en, 'ink'ez ndi yúlhni, "Nyun ílhchoot 'ink'ez 'uts'un wheíhlti t'eh, nts'e niníhlti ndusudóni, 'et t'eh si naoolhúchoot." ¹⁶ 'Et Sizi, "Mary," uyúlhni. 'Et Mary 'awh nadelhú'a 'ink'ez, "Rabboni!" yúlhni (i khunek nehodulh'eh ni hoh 'utni). ¹⁷ 'Et Sizi ndi yúlhni, "Aw njan soontun ilah. 'Awhuz nduk se'aBá buts'un náchatuzusdak. 'Et whunts'ih sulhutsinkah hubuts'un naíndalh 'ink'ez ndo budíni, nduk se'aBá buts'un nátesdalh. 'En nuhwheni chah nuhwhe'aBá. Si suYak'usda 'ink'ez nuhwheni chah nuhYak'usda unli." ¹⁸ 'Et Mary Magdala whut'en Sizi yugha hoodul'eh hubughu nanja 'ink'ez ndi khunek huba whusanáida'ai, 'ink'ez neMoodihti chah ya'en húbulhni. 'Et Sizi daja yudáni hukw'e hubulh náwhulnuk.

Sizi yugha hoodul'eh hubunalh haínya.

¹⁹ 'Et dzin 'et Dimos dzin whutanilghel whutah 'uhoont'ah, 'et hulhgha zeh, 'et yugha hoodul'eh 'ilhunahuwéedel. Dulh Lizwif hube hunuljut 'et ndati ts'iyawh dá'denla. Khunyaz Sizi hubutah siyin hitelh'en. 'Et ndo búlhni, "Soo cho nuhdzi dooghel." ²⁰ 'Et ndúbudani hoh bula chah, 'ink'ez buyust'e k'ut chah hubunalh hahonla. 'Et yugha hoodul'eh tube cho huhóost'et hubuMoodihti hiya'en 'et. ²¹ 'Et Sizi doo chah zeh ndo búlhni, "Soo cho nuhdzi dooghel. Nts'e na'a se'aBá whuz de sùtelh'a, 'et whuz na'a si chah nuhwhutélh'ah." ²² 'Et ndudéja hukw'elh'az hubuk'uz tésjiz 'ink'ez ndo búlhni, "Ndoni nuhyudóolts'it. ²³ 'Ndunnah bulubeshi huba 'un telldel, 'en 'uda huba 'un tezkát ho' 'int'ah. 'Ink'ez ndunnah hubulubeshi huba 'un chatuzulhdel 'aw huba 'un chatikulh ho' 'int'ah." ²⁴ 'Et ndunnah lanezi 'o 'at nanah (12) hubutah 'ilhunuh, 'ut'udánda, Thomas hiyulhni, 'aw hubutah hoolah hoh Sizi bughu ninya. ²⁵ 'Et ndunnah yugha hoodul'eh, 'en Thomas hiyulhni, "NeMoodihti 'en ts'á'en!" 'Et ndo búlhni, "Soo sich'oh suna be bula lutgloo k'ah whunalh'en, 'ink'ez sulasgek be whune'sílhge, 'ink'ez buyust'e 'et sula be buka nudelhunik, 'et k'an zeh sih suba 'alha 'uhot'e," ni. ²⁶ 'Et 'ilhu whutanilghel inle hoh, doo chah Sizi yugha hoodul'eh koo tuz ts'ih hudelhts'i hoh Thomas 'en chah hubutah usda. Ndati duts'o da'de'ai, 'et whunts'ih khunyaz Sizi hubutah siyin hitelh'en, 'ink'ez ndo búlhni, "Soo cho nuhdzi dooghel." ²⁷ 'Et Thomas 'uyúlhni, "Sula nilh'en 'ink'ez nlasgek be suka k'et nudílnih 'ink'ez nla be suzih k'ut chah nudílnih. 'Et 'o 'un 'aw suts'oodóntlai gunih. Mba 'alha 'uhot'e," yúlhni. ²⁸ 'Et Thomas ndi yúlhni, "SMoodihti 'ink'ez sYak'usda!" ²⁹ 'Et Sizi ndi yúlhni, "Thomas, k'an sa'en, 'et huwa mba 'alha 'uhoont'ah. 'Et whunts'ih ndunnah 'aw chasuhí'il whunts'ih, 'ink'ez huba 'alha 'uhoont'ah, 'en dega nus hoonzoo hubugha whults'ut." ³⁰ 'Et 'o nus lhat yugha hoodul'eh hubunalh Sizi hooncha túne! 'ust'en 'et whunts'ih 'aw ndi dustl'us k'ut 'aw buk'echa'iduguz. ³¹ 'Et ndi zeh kw'uné'úsduzuguz, 'i soo cho bugha t'éwhunhozín 'ink'ez nuhwhuba 'alha 'uhot'e, 'alha Sizi 'en Christ, Yak'usda bu'Ye, 'en 'int'ah. 'Et njan nuhwhuba 'alha 'uhoont'ah hoh 'ilhuz wule be ts'úkhuna, 'i Sizi Gri boozi bugha' téht'ilh.

21

Sizi yugha hoodul'eh lhook ka' hut'en, 'et doo chah hubunalh haínya.

¹ Njan hoh teh ne'whust'en hukw'elh'az, doo chah Sizi yugha hoodul'eh 'en hubunalh haínya. Bun k'ut 'et Tiberias huwhútni, 'et 'uja.* 'Ink'ez hubunalh haínya hoh njan tuné'whust'en: ² Simon Peter, Thomas 'ut'udánda, Nathanael, 'en keyah Cana huwhútni

* 21:1 Ndi bun k'ut Galilee chah hiyúlhni.

Gailele yun k'ut whuz'ai, 'et whut'en, Zebedee buye'kah chah, 'ink'ez 'uyoon nanah Sizi yugha hoodul'eh chah, 'en ts'iyannah 'ilho hudelhts'i. ³ 'Et Simon Peter ndo búlhni, "Lhook ka' test'ilh." 'Et ts'iyawh 'uhiyulhni, "Wheni chah nyulh ts'utoodelh." 'Et 'ahoh soo ts'iyawh ts'i cho be hándel. 'Ulh'ek ndúhoolhyez hoh te'huzdla, 'et whunts'ih 'aw cha'hílooh. ⁴ 'Om bundada sa haín'ai hoh khunyah Sizi taba siyin hitel'h'en, 'et whunts'ih ndunnah yugha hoodul'eh 'aw Sizi 'en 'int'ah t'éhonínun. ⁵ 'Et Sizi ndo búlhni, "Suzkeh† 'aw ih cha'áhlooh?" "Hoolah," hiyulhni. ⁶ 'Et doo chah ndo búlhni, "Nuhlhoombil ts'i bugha nalhnih ts'ih tailhkat, 'et sih be 'óohlooh." 'Et whuz tahiyalhkat, lhook whuz lhai huzdlooh k'et, 'aw lhoombil hanahiyoooleh ghaif'ah. ⁷ 'Et ndun 'ilhunuh Sizi k'us yúk'entsi', 'en Peter 'uyúlhni, "NeMoodihti 'ut'en." 'Et neMoodihti 'ut'en ni Peter yudánts'o hoh soo 'a cho yoo 'az ts'ih ye usda 'i yé nallhah, 'ankw'us 'ust'et 'int'ah inle 'et, 'ink'ez bun k'ut tooz tállhah, Sizi ts'un teyalh 'et wheni. ⁸ 'Aw taba howu nilhza ilah 'uhut'en, lanezi 'o 'at lanezi (200) negan ghútestnih bat'en 'uwuldzuh. 'Et ndunnah yugha hoodul'eh ts'iyaz be hándel 'ink'ez lhoombil hhook tubulh toot hiyé'gus hoh yahíulhdlat. ⁹ Yanahúsduki hoh taba kwunyah dézk'un 'ink'ez hhook buk'ut 'int'ah 'ink'ez lhesh chah 'et sa'ai hotel'h'en. ¹⁰ 'Et Sizi ndo búlhni, "Nyooz lhook suhlooh 'i bulah ndéz ahleh." ¹¹ 'Et Simon Peter ts'i yenya, 'ink'ez lhoombil taba yáyuzguz. Lhook soo ncha 'i zeh dezbun, 153 'uneltsuk. Tube lhai 'ink'ez undaz, 'et whunts'ih lhoombil 'aw k'uchaich'ulh. ¹² 'Et Sizi ndo búlhni, "Anih, njan na'aht'alh." Hiyéntsaz hoh 'aw 'ilhunuh whunts'ih ndan 'int'ah hukwa chahiyoodulhkat, 'uda t'éhonínun neMoodihti 'en 'int'ah 'et huwa. ¹³ Sizi 'et ninínya, lhesh yílhchoot 'ink'ez hubugha íni'ai. 'Et whuz na'a zeh lhook chah hubugha íninla. ¹⁴ 'Aw 'et yaidla tah dinadija whuts'un, whulh tat Sizi yugha hoodul'eh hubunalh hainya. ¹⁵ 'Aw 'et na'het'al hukw'elh'az, Sizi, Simon Peter yoodulhkat, "Simon Jonas buye', ndunnah, 'en huba dega nús ih sk'einti'?" 'Et Peter ndi yúlhni, "A sMoodihti, nyunch'oh t'éwhunínun nk'esi' 'en usdli." "Et t'eh susheepyz hube 'olh'alh," yúlhni. ¹⁶ 'Et doo chah zeh whulh nat yoodulhkat, "Simon Jonas buye', 'usk'einti' ih?" 'Et Peter ndi yúlhni, "A sMoodihti, nyunch'oh t'éwhunínun nk'esi' usdli." "Et t'eh susheep hubughonle," yúlhni. ¹⁷ 'Et doo chah zeh k'an yoodulhkat, "Simon Jonas buye' 'alha ih sk'einti' 'en inli?" 'Et Peter tube buba dzuh sulí, Sizi whulh tat yoodulhkat hoh ndi yúlhni, "Sk'einti' inli ih?" ndi yúlhni. 'Et Peter ndi yúlhni, "SMoodihti, nyunch'oh ts'iyaintsuk t'éwhunínun. 'Ink'ez nyunch'oh t'éwhunínun nk'ensi' 'en usdli." 'Et doo chah Sizi ndi yúlhni, "Susheep hube 'ilh'alh! ¹⁸ Soo ts'ah'un na'a nyudúsní, soo chilh inli da soo cho soo nadint'ih 'ink'ez nts'e hukwa' nínzun teh ninya inle. 'Et whunts'ih hoonyan sinli t'eh, nla nusnidelnik 'ink'ez 'uyoon dune nla ye'dinguz, 'i t'az nts'e hukwa cha'nínzun, hoh teh whunts'ih ninyutélhte," yúlhni. ¹⁹ 'Et Sizi ndi yúlhni hoh nts'e na'a didut datétsah huwa Moodihti yudutélhti, 'et wheinlhtun hoh 'utni. 'Et ndi dani hukw'elh'az 'et huwa, "Sunanyalh," yúlhni. ²⁰ 'Et Peter 'awh nadelhú'a hoh ndun Sizi k'us yúk'entsi', 'en 'uja 'udek'elh'az na'hút'alh yuts'un le'uja 'ink'ez yoodulhkat, "SMoodihti, ndan 'uténilh nye'óotekulh?" ²¹ Peter ya'en hoh Sizi ndi yúlhni, "SMoodihti, ndun 'en do daténilh?" ²² 'Et Sizi ndi yúlhni, "Whusanátésdahl whuts'un 'et khóona hukwa' núnzun t'eh, nyun mba cha'hóot'ah. 'Et nyun sunanyalh." ²³ Ndunnah lhulhutsinkah sulí 'et ndi khunek Sizi ye yátelhtuk 'i ts'iyawh hubutah nidélt'sut, ndun Sizi yuk'entsi' 'aw dachatésa. 'Et whunts'ih Sizi Peter 'aw chadínil ndun 'en 'aw dachatésa. 'Ants'ih yúlhni, "Whusanátésdahl whuts'un 'et 'en khóona hukwa' núnzun t'eh, nyun mba cha'hóot'ah?" ²⁴ 'Et ndun yugha hoodul'eh, ndun Sizi dega hoh yuk'entsi', 'en 'udani njan howu yaillhtuk 'ink'ez 'uk'e'ánguz 'ink'ez daja dani soo 'alha 'uhoont'ah 'et t'éts'onínun. ²⁵ 'O 'un chah tube lhat Sizi ne'úst'en. 'Et hubugha ts'iyawh 'uk'e'ánguz t'eh, dustl'us lhai k'et ndi yun k'ut 'et whunts'ih 'aw soo cha'hoolcho wule t'ah 'et telalh wheni núnzun. 'Et ndoh honeh.

† 21:5 Hoh da hubutah whuz na'a lhk'ehudutsi' bulh yahalhtuk.

Whel'a 'En Hubube 'Ut'en K'ah

Luke, ndun Theophilus dahooja yulhni

¹Sulh dune Theophilus, dahooja. 'Udechoo khunek 'uk'une'úsduguz, 'i 'uk'une'zíguz, 'i Sizi nts'oh tune'úst'en 'ink'ez nehodulh'eh 'et hubugha ndet bube 'ut'en whe' yudilh'en, ²'ink'ez ndet dzin nduk yak'uz whenája 'et whuts'un. 'Et nduk yak'uz natelitelh whutsuh, ndunnah dune whel'a 'en hubulh'etsi, 'en Ndoni bugha huba nahezuya. ³Sizi dazsai hukw'élh'az dit lanezi (40) dzin ndoohoolyez lhat hoh hubunalh'ets'et nusiya, 'et whuz na'a 'alha khuna 'aw whuts'u hoodódlai ghaif'ah. Hinilh'en 'ink'ez Yak'usda dune k'úne' bul'en hubugha hubulh yálhtuk.

Ndoni but's'uh yoosdzi

⁴'Et 'ilhoh hudelhts'i, Sizi khúnek bughu nini'ai hoh ndo búlhni, "Jerusalem huwu toohdelh gunih! Se'abá ye nuhwhuts'un náhezuya, 'i huba oolh'i. Ndai nuhgha tet'alh, 'i bugha 'ún whudusni inle. ⁵John dune too be 'ulh'en, 'en too, 'i be too be' 'un whulh'en inle, 'et whunts'ih 'aw lhadzin ilah inle t'eh, 'et whusawhútelts'ulh, se'abá 'en Ndoni nuhts'uh t'aidute'alh 'ink'ez nuhyudútelts'ulh. 'Et whuz na'a too bé' 'un whutelilh," hubúlhni. ⁶'Et whel'a 'en Sizi teh 'ilhunahuwédel hoh 'et Sizi hiyoodulh'kut, "NeMoodihti, 'aw 'et 'i whusahónzut Israel hubuts'uh hainzut doo chah zeh 'uyoon yun k'ut whut'en bumoodih nahutedleh?" ⁷'Et Sizi ndo búlhni, "Nts'oh t'eh 'uwhuténilh, 'aw nuhwheni nt'oonohzin huba cha'hóot'ah. Se'abá, 'en zeh nt'ooninzun. ⁸'Et whunts'ih Ndoni nuhyudélt's'ut t'eh, soo nuhdzi ulhtus hoh Jerusalem 'et si suba dune whunulhtun tehle, Judea yun k'ut nduhóolcho, Samaria yun k'ut, 'ink'ez ndi yun k'ut nduhóolcho chah," hubúlhni.

Sizi Gri yak'uz whenája

⁹'Et ndi yughu yaílhtuk hoh, 'aw 'et nduk yak'uz whenája. 'Aw 'et hinilh'en hoh, kw'us yuh ts'ih hoolah suli. ¹⁰'Et 'awhuz nduk yak'uz ts'ih hika ités'en hoh khunyaz nanah dune lheyul 'i be dune hinli hubuzih hube hóodiltsai. ¹¹"Galilee whut'en, di ka 'et nudel'húya 'ink'ez nduk yaz ts'ih whunulh'en? Ndon Sizi nduk yak'uz ts'ih nuhwhughu whenája k'an nulh'en nduk yak'uz whenája, whuz na'a zeh whusanátedalh," hubuhútni.

Tenahudutedli huba 'et 'ilhohowudulh

¹²'Et whel'a 'en dzulh Olive hiyúlhni, 'i hiye nádidel hoh Jerusalem ts'ih lhgha hudindel keyah whuts'un dzuh nilhdza 'uhoont'ah. ¹³Jerusalem ts'ih lhgha hudindel hoh, 'ahoh nduk koo huwhut'i danáhundel. Peter, John, James 'ink'ez Andrew, Philip 'ink'ez Thomas, Bartholomew 'ink'ez Matthew, James Alphaeus buye', Simon Lizwif ba huwu daóodit'ah, 'ink'ez Judas James buye', 'en 'et koo húdelhts'i. ¹⁴Ahoolhyez 'ilhunahuwudulh tenahudutedli hukwa. Ts'ekoo bulh chah, Sizi bulhutsinkah, 'ink'ez Mary be'ama chah, ts'iyawh tenahududli.

Judas yuk'enádeja

¹⁵'Et hoh da dzin yugha hodil'e 'ilhohuwezdél ('ilho 120 'uhut'en dune). 'En hubutah Peter hubulh yatélhtuk ka didinya, ¹⁶'ink'ez ndo búlhni, "Sulhutsinkah ndi Yak'usda bughunek 'uk'une'úsduguz, 'i 'et lhaóodoneh huba' hoont'ah. Ndet David hó'en Ndoni 'en bugha Judas datenilh 'et yughu yalhtuk. Judas 'en hobonelhtan hoh, hoh da Lizwif Sizi hiyílhchoot inle. ¹⁷'En chah nelh 'óot'en ka 'utuhaílhtsi inle. 'Et huwa Judas wheni k'una'a en chah whel'a inle." ¹⁸(Ndi sooneya Judas bugha ínenkat tinta' ant'en 'et huwa 'i be yun lhadint'ah, 'i ye'onket. 'Et Judas nadelduz 'ink'ez buyust'e ndulhcho hoh bé buyáh hawheltal. ¹⁹Jerusalem whut'en ts'iyawh whulh 'úhudants'o 'et nahahoozi "Akeldama" huwhútni. 'I khunek, "Uskai Yun" ni hoh 'utni. ²⁰Peter 'et chah ndutni, "Yak'usda bughunek 'uk'une'uzguz, 'i k'ut "Shun" hiyúlhni, 'i ndutni, 'Bukoo 'aw dune chahóot'ih hoole.'

'Ink'ez chah ndutni,
'Bube 'ut'en k'ah 'uyoon yuk'enadóoja.'

²¹⁻²²"Et huwa 'uyoon netaóoya Sizi Gri dinadija hubugha nela ts'ah'un 'udooni ka. Ndon dune 'utaháztelhtel, 'en 'ahoolhyez huba nelh 'ét'en inle, 'en 'uztelilh. 'Udechoo Sizi neMoodihti nelh tezya da 'et whuts'un, 'et ndet John dune too be 'ulh'en too bé' yinla da 'ink'ez nduk yak'uz negho whenája 'et whuts'un." ²³Hukw'elh'az Peter budáni, 'et nanah dune, 'en 'utahaóobahalhti. 'Ilhunuh Joseph 'en Barsabbas hiyúlhni, Justus chah hiyúlhni. 'Et 'ilhunuh chah 'en Matthias hiyúlhni. ²⁴'Et tenahududli hoh nduhútni, "NeMoodihti nyun ts'iyannah dune budzi yuh téooninzun. 'Et huwa whunénilhtun k'us ndan 'en neba 'utuhaílhtsi. ²⁵Judas tinta' ant'en hoh nts'e huba 'int'ah ts'ih wheínya, 'et huwa

ndan yuk'enádutedal, 'en whel'a whunénilhtun ndan simba 'uts'oooleh." ²⁶ 'Et nahúlt'ah huboozi tse k'ehanguz 'ink'ez 'un hinduntelhum, k'us ndan boozí nduk nádelhts'ut, 'en 'utahaitelhtelh. 'Et ndúja hoh Matthias 'en whel'a 'en lanezi 'o 'at 'ilhunuh hinli hoh butaninya.

2

Ndoni ndan huba 'álha' hoont'ah, 'en hubuyídelt'sut

¹ 'Et Lizwif budzenis whucho, Pentecost* huwhútni, whusawhélt'sut hoh ts'iyannah Sizi huba 'alha' hoont'ah 'ilhunuh bukoo 'ilhuhowezdel. ² Khunyaz nduk yat'ah ts'ih 'uhudzts'ai, 'ants'ih nilhts'i cho delts'ulh li'whutni. 'Ink'ez nyo koo hudelhts'i nduhóolhcho 'uwhutni. ³ 'Ink'ez 'ants'ih kwun li'int'ah, 'i hitel'h'en 'ink'ez lhawh tezkak hoh koo hudelhts'i lhuk'inli hoh hubuk'édinkat. ⁴ 'Et hudelhts'i ts'iyawh Ndoni hubuyídelt'sut 'ink'ez khunek whutsuh da t'ehinízun, 'i be yawhehúniltuk, 'et Ndoni bugha óoni'ai 'et ndadooni ka. ⁵ 'Aw 'et lhanah Lizwif, Yak'usda hinedulh hinli Jerusalem húdelhts'i nilhdza keyah ts'ih hahánde njan dzenis whucho 'et wheni. ⁶ 'Et keyah whut'en 'ants'ih whudutni 'et 'uhadánts'o ka, hoh ts'iyawh lhelhts'un keyah whut'en bughunek be hubulh yawhehúniltuk, tube huba hooncha hoh. ⁷⁻⁸ Huba hooncha k'et lht'ah 'ulhahudutni, "Nts'e na'a 'uwhutét'ilh? Ndunnah Galilee whut'en lhe'utni nek'eyáhultuk wheni nek'una'a hubuzdits'o," hutni. ⁹ "Wheni Parthia, Media, 'ink'ez Elam whut'en ts'inli. Mesopotamia whuts'un, Judea 'ink'ez Cappadocia whut'en chah ts'inli. Pontus whuts'un, 'ink'ez Asia ts'ih hahandel chah ts'inli. ¹⁰ Phrygia whuts'un, 'ink'ez Pamphylia whut'en chah ts'inli. 'Et Egypt whuts'un, 'ink'ez Lybia whunat Cyrene whuzih whut'en chah, bulunah chah Rome ts'ih hats'ánde. ¹¹ 'Ilho Lizwif 'ink'ez 'udun yun k'ut whut'en, ndan Lizwif ts'ih nalhéya, netah bulunah chah Crete 'ink'ez Arabia ts'ih hahandel ts'inli. 'Et whunts'ih dahóolcho 'i be Yak'usda ne'úsh'en, 'et nduhóolcho hoh whenich'oh neghunek k'una'a, whuz na'a hubuzdits'o," 'uhutni. ¹² Bugha hané'nesjoot 'ink'ez 'uhoot'e ts'ih hoolah hoh ts'iyawh lhahóodulkut, "Dawhútenilh hoh simba 'uwhutni?" 'Ihahudutni. ¹³ 'Et 'uyoon, 'en Sizi huba 'alha' int'ah ghu hedloh, "Ndunnah dune yatahunatnai," ho' hutni hubuhútni.

Peter; ndunnah Lizwif hubulh yáhtuk

¹⁴ 'Et Peter whel'a 'en hubutah didinya 'ink'ez 'ilhohuwezdel hubulh whenduniltul, "Sulh dune 'ink'ez nuhwheni Jerusalem whut'en chah ts'iyawh soo zélt's'ai, 'et nuhwhudóosni dáhooja njan 'et hubugha. ¹⁵ Ndunnah dune 'aw tachahunítai nuhwheni ndunáhzun whunts'ih, 'ink'ez k'an ts'iyai dzetniz whutsuh 9:00 'uhunet'oh 'uhoont'ah. ¹⁶ Njan dawhút'en, 'et ndun Yak'usda ba nus whunilh'en Joel, 'en huwu yailhtuk hoh ndutni, ¹⁷ 'Nts'e na'a k'an dune ts'inli 'ustle' 'uhóoja t'eh, ni Yak'usda, 'et sih suyeghah si sugha 'en ts'iyannah dune yudutélt'sulh. Nuhwhuzkehkah nus daóotenilh 'et huwu yahutelhtuk. Nuhchilhkah chah hubenghun newhúlt'suk t'ehontézin. Nuhduneti 'en chah nahútes hoh t'ehontezeh. ¹⁸ 'Ink'ez hoh t'eh ndunnah suba 'uhut'en, dune, 'ink'ez ts'ekoo chah ts'iyawh suyeghah si sugha 'en buye ídutelt'sulh, 'et huwa 'en chah nus dawhútenilh huwu yahutelhtuk. ¹⁹ Ndukyaz 'ink'ez ndi yun k'ut chah huwa 'ét'en tuné'whutet'en. 'Et 'uskai, 'ink'ez kwun chah, 'ink'ez lhut lhai chah whutéeh. ²⁰ Sa 'i chah tsahólhgus tele, 'ink'ez 'ulh'ek oozá 'i chah 'uskai tele, ndet whéwhunujut 'ink'ez whudézi dzin neMoodihti whusatéyah 'et whutsuh 'uwhuténilh.' ²¹ 'Et ndet whusahónzut, 'et whusawhútelts'ulh ndan neMoodihti hudutejih hits'u hukwa 'uhutni, 'en hudutejih." ²² Peter 'et chah ndutni, "Nuhwheni ndun Israel hubuts'uh háhzut, sughunek soo cho oozelhts'ai, Sizi, 'en Nazareth whut'en, Yak'usda nuhts'ítelh'a, 'en Yak'usda bugha huwa 'ét'en tune'út'en, 'et hoh whunelhtan njan nuhtah 'uhoot'en 'ink'ez nuhwheni chah soo cho t'ewhunáhzun. ²³ Yak'usda nanínezut 'ink'ez 'uda t'eooinzun, 'i be 'uda Sizi nuht'atélth niwhuni'ai. Nuhwheni nuhgha lubeshi 'ulh'en Sizi lhudulhghus k'ut whehídunilt'oh, 'et whuz na'a sélhghi. ²⁴ 'Et whunts'ih Yak'usda nináidilhti. Be dats'útsaih, 'i yuch'a nilhde, 'aw 'ilhuz daootsah huba cha'hóot'ah 'et huwa. ²⁵ 'Et 'uda David yughu yailhtuk ínle hoh ndutni,

* **2:1** Njan dzin dakelh k'una'a, Ndoni dzin huwhútni. Hoh da Lizwif budzenis whuti 'i ha'nukat dzin huwhútni.

'Ahoohlyez neMoodihti sunen ba nulh'en.

Nalhnih ts'ih sunen ba siyin dzuh noszut whuch'a.

²⁶ 'Et huwa 'ahoolhyez sudzi hóont'i, 'ink'ez whunénik bulh chah yalhtuk, 'ink'ez si 'ast'iyaz yinkak sída.

Datésah t'eh 'aw whenoolhújut ghaít'ah.

²⁷ Naootnilh keyah si suzul 'aw 'et neóolhtelh ghaít'ah 'ink'ez ndunnah Yak'usda be'ildzun, 'en 'aw buyust'e wulhjut ghaít'ah.

²⁸ 'Ilhuz khutesnalh, 'et whusunelhtan.

Sulh 'ínt'ah 'et huwa hoonúst'i satalhtsilh."

²⁹ Peter 'o 'un chah ndutni, "Sulh dune David netsuh da keyah whuduchun unli, 'en bugha ts'ah'un na'a whunwhunoolhtun hukwa' nuszun. David dazsai 'ink'ez 'uhíyalhti 'ink'ez buts'un k'ut 'awhzya nezih whuz'ai. ³⁰ 'En Yak'usda ba nus whúnilh'en 'ínt'ah 'ink'ez Yak'usda ye yúts'u nahezya t'eínínzun. 'Ink'ez Yak'usda whuz na'a yuba niwhuni'ai ho' yulhni, 'David buts'uh haínzut, 'en 'ilhudzin David k'una'a buk'wuts'uzda cho dzeti, 'i k'utedalh,' 'en Christ 'ínt'ah. ³¹ David nus hó'en hoh Yak'usda daténilh t'eoonanzin 'et Christ dinadutédalh 'et huwu yailhtuk hoh ndutni,

'Yaidla tah 'aw 'et néyoolhtelh ghaít'ah, buyust'e chah 'aw wulhjut ghaít'ah."

³² 'Et ndun Sizi 'en dazsai hoh Yak'usda nahighilhna inle 'ink'ez wheni bugha hoodul'eh ts'iyawh khuna hoh ts'a'en 'et huwa. 'Alha nakhít'na t'ets'onínzun. ³³ Nduk yak'uz dega nus whudézi, 'et Yak'usda bunalhnih ts'ih natl'aidalhdá 'ink'ez nets'ú yoozi, 'i bugha Yak'usda buYe' yutl'ahó'ai. 'Et 'en Ndoni nets'ítelh'a 'ink'ez neyudéls'ut. 'Ink'ez 'alha' 'ínt'ah k'an dzin ndi 'i oozelhts'ai 'ink'ez nulh'en. ³⁴ 'Aw David yak'uz nuchaiyal, 'et whunts'ih njan ndutni, 'Moodihti 'en suMoodihti 'et ndi yulhni,

'Njan nalhnih ts'ih sugu sinda,

³⁵ ndet nch'a hudetni, 'en hubuch'a nilhde hukw'élh'az 'et 'ilhuz bumoodih onle."

³⁶ 'Et huwa nuhwheni Israel hubuts'uh háhzut, ts'ah'un nuhwhudúzni, 'alha' ndun Sizi lhdulalhgus k'ut yundunilt'o, Yak'usda, 'en Moodihti 'ink'ez Christ chah yulhtsi." ³⁷ 'Et Peter hidánts'o hoh soo ts'ah'un budzi t'aíghezna. 'Et Peter 'ink'ez 'uyoon whel'a 'en bulh hubuhoolhukut, "Nelhtsínkah, Peter nedani hubugha dáztenilh?" ³⁸ 'Et Peter ndo búlhni, "Ilhunah ahli nuhwhulubeshi whuch'a nuhwhubeni nahadunoohlelh 'ink'ez Sizi Gri boozí bugha too be 'ahneh. 'Et nuhwhulubeshi nuna'doodeh 'ink'ez Ndoni nuhyudóolts'it. ³⁹ Ndunnah Yak'usda neMoodihti buka' dutenilh, 'ilhunah ahli hoh Ndoni nuhts'ú yoozi inle, nuwhuzkeh chah 'ink'ez nilhza yun k'ut whut'en, 'en whunts'ih." ⁴⁰ 'Et Peter sa hoh hubulh yailhtuk 'ink'ez huba nus whúnilh'uk 'ink'ez ndo búlhni, "Ududulhúyis! Ndunnah ntsi' hubuch'a nalhú'ah, 'ink'ez hubulh áht'en ilah, Yak'usda dzuh nobutelhdeh ho' hoon't'ah." ⁴¹ Lhanah huhóont'i hoh highunek hiyíllhchoot 'ink'ez too be' hulya. 3,000 bat'en 'uhínt'ah, 'en hubut'aobuninla. ⁴² 'Ahoohlyez 'iluhowudulh, 'ink'ez whel'a 'en hubuhoolh'eh. Ts'iyawh 'ilho lhulh 'uhut'en. 'Ink'ez 'udek'elh'az hulhgha na'het'al hoh whunahulnih ka lhula'uhut'alh 'ink'ez 'ilho tenahududli.

Nts'e na'a huba 'alha' hoon't'ah yinkak hudelhts'i

⁴³ Whel'a 'en huwa 'ét'en tuné'hust'en 'et hoh 'o nus ts'iyannah huba hooncha. ⁴⁴ Huba 'alha' hoon't'ah ts'iyawh 'ilho nuhúdelh 'ink'ez hiyit'i, 'i ts'iyawh hiyé lhula'dut'en. ⁴⁵ 'Ilhunuh yit'i, 'i be 'óokuk t'eh, 'i ts'iyannah ndunnah 'en ndai hiye dunidzit, 'en ndi sooneya hubutuninunih. ⁴⁶ Lizwif hubuluglez whucho 'et dzin totsuk 'iluhowudulh. Koo 'et 'ilho budzi únzoo 'ink'ez huhóont'i hoh lhula na'hut'alh. ⁴⁷ 'Et ndunnah huba 'alha' hoon't'ah Yak'usda ba whudélhti, 'ink'ez Jerusalem whut'en, 'en chah buts'un hínzoo. Ndunnah hudujih, 'en neMoodihti dzin totsuk 'o nus 'uhunelhtuk hubulhtsi.

3

Peter 'inkez John, 'en dune nuchásyah 'en soo ná'yinla

¹ 'Et 'ilhudzin Peter 'ink'ez John bulh dzetniz hukw'élh'az, 3:00 bat'en 'uhúnet'oh, Lizwif hubuluglez whucho ts'ih hutez'az tenahududli neóoninzut 'et wheni. ² Hukwiti hoonzoo huwhútni, 'et dune 'en whuzdli whuts'un 'aw nuchásyah, 'en 'et 'usda. Dzin totsuk whuz nihiyukaih. Ndunnah Lizwif hubuluglez whucho ts'ih tihúdulh 'en sooneya ka hubuts'un dátso. ³ 'Et Peter 'ink'ez John bulh bukoo ts'ih hutez'az hoh hubutelh'en 'ink'ez hoonliyaz higha óo'ah ka buts'u dátso. ⁴ Soo cho hinilh'en hoh Peter utni, "Nenilh'en!" yulhni. ⁵ 'Et hubunilh'en hoonli higha t'e'alh ka hubuts'un tsi hooli. ⁶ 'Et Peter 'uyúlhni, "Aw silver 'ink'ez gold 'i chah chasúst'ih, 'et whunts'ih ndai 'ust'i, 'i nga tés'alh. Sizi Gri Nazareth whut'en whelhtus 'ink'ez boozí bugha neghá whulhts'ut huwa didinyih 'ink'ez ninya!" ⁷ 'Ink'ez Peter ndun dune nuchásyah nalhnih ts'ih yula ilhchoot 'ink'ez didilhya íbulh buke, bukechunah tubulh hoolhtus nawhusdli. ⁸ 'Aho didillhah 'ink'ez nádinya.

'Et Lizwif hubuluglez whucho ts'ih hubulh tez'az. Nuya hoh nduk túllhuk chah 'ut'en 'ink'ez Yak'usda délhiti. ⁹ Ts'iyannah yunilh'en nuya 'ink'ez Yak'usda délhiti. ¹⁰ Ndun dune nuchásyah nahuyoolhúts'it 'et Lizwif hubuluglez whucho hukwuti hoonzoo 'et 'usda, 'en 'int'ah. Tube huba dahooja hole! Ndun hinilh'en hoh tube huba hooncha.

Lizwif hubuluglez whucho ts'ih Peter hubulh yálhutk

¹¹ Peter, John bulh 'awhuz ndun dune soo na'yinla huboontun zeh 'int'ah hoh, dune ts'iyawh njan Solomon bughu dáti bet huwhútni ts'ih whuz hubuts'un whehélgaz. ¹² 'Et Peter hubunilh'en 'ink'ez ndo búlhni, "Nuhwheni Israel hubuts'uh háhzut, di ka nenuh'en 'ink'ez nohba dahooja hole ih? 'Aw whenich'oh be ts'inzoo k'us be ts'íltus 'i bugha ilah ndun dune nuya nats'úlhiti. ¹³ Netsuh whudelhdzulh Abraham, Isaac, 'ink'ez Jacob lhan'un teh lhuzkehkah hinli hoh 'uhoont'ah. 'Ink'ez hubuYak'usda Sizi Gri yuk'úne' 'ust'en, 'en ncha yulhiti 'ink'ez yudélhiti. Lizwif howuhinli t'ahíyalhti. Pilate yulanadutetnih 'et whunts'ih nuhwheni buch'a nídehdel inle. ¹⁴ 'En lubeshi bughu hoolah 'ink'ez ts'ah'un dune chah unli, 'et whunts'ih buch'a nídehdel 'ink'ez dune selghhi, 'en Pilate nuhuts'u yulanadootni but's'o húkwa' dahni. ¹⁵ Ndun 'ilhuz be ts'ukhutena negha íní'ai, 'en 'ahla sélghhi, 'et whunts'ih Yak'usda naoontnih keyah 'et nahiyílhna, 'et njan nduhooja hoh newhuzneulltan. ¹⁶ 'Et Sizi huba 'alha' yint'ah 'ink'ez ndai yí ulhtus 'i bugha ndunnah dune soo ulhtus sulí hoh soo ná'uja. 'En 'int'ah nilh'en. 'Alha' 'i be hoont'ah ndun dune nuhbut siyin, 'en Sizi huba 'alha' yint'ah, 'et 'i be buyust'e ndulhcho hoh soo ná'uja. ¹⁷ 'Aw 'et sulhutsinkah t'enwhunúszun nuhwheni 'ink'ez k'une' nuwhuhul'en chah Sizi dálh'en t'éoonuzúhzun, 'et huwa 'éht'en. ¹⁸ 'Et 'uda hoh Yak'usda dani 'en ndunnah ts'iyannah Yak'usda be nus whúnilh'en, 'et Christ dzuh nutezut, hutni. 'Et whuz na'a 'uhóoja whúhshi. ¹⁹ K'an nuhwhulubeshi whuch'a nuhwhubeni nahadunoohlelh, 'ink'ez Yak'usda but's'u naóolhu'ah, 'aw 'et sih nuhwhulubeshi nuhwhuba yuna'doolhede. ²⁰ 'Et hoh Yak'usda nuhdzi ulhtus nuhwhuba yoolhtsilh 'ink'ez Sizi Gri 'en chah nuhuts'ítoohl'a. Whutsuh whudelhdzulh 'uda 'en yugha nuhwhudáni inle. ²¹ 'En nduk yak'uz 'et 'usda, ndet ts'iyaintsuk doo chah soo ná'whutelelh nasdli 'et whuts'un. 'Uda huwu yuhalhtuk inle. ²² Nuh'en 'uda Moses ndutni inle, 'Yak'usda neMoodihti 'ilhunuh Yak'usda be nus whúnilh'en si k'una'a 'int'ah, 'en nuhuts'útelh'alh. Nuhkeyah 'ilhunuh 'en 'utenilh. Daja nuhwhuduténilh ts'iyawh oozólh't'a. ²³ Ndunnah ndan Yak'usda be nus whúnilh'en chahiy-oozilht's'ai, 'en Yak'usda budune buch'a baninla, 'ink'ez hoolah hubutelhtsilh." ²⁴ 'Et Peter 'o 'un ndutni, "Ndunnah Yak'usda be nus whúnilh'en ndet 'uwhuténilh huwu yahalhtuk da, Samuel chah 'ink'ez 'uyoon yuk'élh'az khuna chah, ts'iyawh whuz na'a zeh 'uhutni inle. ²⁵ Nuhwheni chah Yak'usda be nus whúnilh'en but's'uh háhde 'ink'ez ndai Yak'usda nuhutsuh whudelhdzulh khunek huba lhaídinla, 'i nuhwheni chah nuhwhuba 'int'ah. Ndi khunek huba lhaídinla, 'i Abraham chah t'adélt's'ut inle hoh Yak'usda, Abraham yulhni, 'Nts'u hafnzut, 'en bugha dune ndi yun k'ut huba hoonzoo tele." ²⁶ 'Ink'ez Yak'usda buYe' Sizi, 'en dinaidilhti hoh nuhwheni 'udechoo 'en nuhuts'ú wheyalh'a. 'Et hoontsi' 'i be túne' aht'en, 'i whuch'a nanwhúninla. 'Et huwa Yak'usda Sizi 'udechoo nuhuts'ítel'h'a hoh nuhwhuba hoonzoo wule ka."

4

Peter 'ink'ez John bulh nahéyelh 'en but nébanilhti

¹ 'Et 'awhuz Peter, John bulh dune hubulh yahalhtuk hoh, ndunnah nawhulnuk luglez whucho howuhinli bumoodih, 'ink'ez Sadducee hubuhútni chah, 'en hubugha nindel. ² Whuts'uhudutnik ndunnah nanah whel'a 'en Sizi dazsai 'ink'ez dinidija, 'et hubugha whebuhodulh'eh. 'Et hoh yaidla dinahudutédulh 'alha' hoont'ah. ³ 'Et 'om bun whuts'un tsak'eoobuha'ai 'aw 'et hulhgha ts'un ye 'un whezulh 'et huwa. ⁴ 'Et whunts'ih lhanah hubudánts'o Sizi dazsai 'ink'ez dinidija huba 'alha' hoont'ah sulí. 'Aw 'et 'ilho huba 'álha' hoont'ah 5,000 bat'en sulí. ⁵ 'Aw 'et 'om bun dzin ndunnah Lizwif k'une'bulhul'en hubumYak'usda be nus whúnilh'enodih, hubutsuh whúdelhdzulh, 'ink'ez Moses be' dustl'us 'uk'ununa'úsduzuguz chah, 'en Jerusalem 'et 'ilhúhowezdel. ⁶ 'Ink'ez náwhulnuk degha nus dezti, Annas hiyúlhni, Caiphas, John, Alexander, 'ink'ez náwhulnuk degha nus dezti ts'ah hahande, 'en chah, ts'iyawh Jerusalem 'et 'ilhúhowezdel. ⁷ Whel'a 'en 'ink'ez ndun soo ná'huyinla, 'en chah hububut níboninla 'ink'ez hubuhodulh'kut "Dáhla hoh ahla? Ndaí be últus, 'i be 'aht'í? Ndan boozí bugha ndun dune soo ná'uhla?" ⁸ Ndoni Peter 'o nus ulhtus yulhiti hoh ndo búlhni, "Israel budune nuhwheni k'une'bulh'ú'en 'ink'ez hubutsuh whúdelhdzulh chah, ⁹ ndun dune nuchásyah, 'en ba 'ut'en unzoo, 'i 'uts'inla, 'i 'ink'ez dats'inla soo ná'ts'inla hoh, 'i k'an buka neoodulh'kut. ¹⁰ 'Et huwa nuhwheni 'ink'ez Israel hits'uh hafnzut 'en ts'iyawh soo cho ndun nuhwhuduténilh, Sizi Nazareth whut'en, 'en lhdulalghus k'éilhti, 'en Yak'usda

nahighilhna. 'En boozii 'ink'ez whéltus 'i be ndun nuchásyah, 'en soo ná'ts'inla. ¹¹ Sizi, 'en 'int'ah Yak'usda be' dustl'us 'uk'une'úzguz, 'i k'ut ndutni hoh bughii yatak, 'Nuhwheni koo 'uwuhul'en tse 'ún dutelh'uz,

'i 'uja dega nus tse tube buka daóodit'ah, 'i suli.'

¹² Yinkak ndulhcho hoh Sizi Gri 'en bugha zeh uzdutejih. 'Aw 'uyoon yé ulhtus, 'i bugha uzdoojih ghaif'ah. 'Et whuz na'a Yak'usda negha ooni'ai." ¹³ 'Et naheyelh 'en t'ehonínzun Peter 'ink'ez John 'en 'ants'ih hoh dune, 'aw whechahodil'uhint'ah. 'Aw chaniljut hoh yahulhtuk, 'et huwa huba hooncha, 'ink'ez t'ehonanzin Sizi Gri hiyulh nusudel hinli. ¹⁴ Ndun nuchásyah soo ná'uja 'ink'ez Peter John bulh hubuzih siyin hinilh'en hoh 'et huwa 'aw dája hudooni ghaif'ah. ¹⁵ 'Et yatak bakoo tinábonilh'a 'ink'ez hukw'u nahuhúlhye. ¹⁶ 'Ink'ez lhahoodulkut, "Ndunnah dune daóobuztelilh? Jerusalem whut'en ts'iyawh t'ehonínzun dega nus huwa 'ét'en, 'et 'uhuhóonla. 'Aw whuts'uts'oodódlai ghaif'ah. ¹⁷ 'Et huwa 'aw 'o 'un 'uyoon t'eeonoozeh whuch'a, ndunnah dune tube cho bube' ts'oonolhjoot Sizi Gri boozii bugha 'aw 'o 'un 'uyoon dune bulh yáhoolltuk gunih." ¹⁸ 'Et hubukoo danáboninla 'ink'ez hubuhútni, "Nts'oh dáhoont'ah 'et whunts'ih, 'aw Sizi boozii bughii yaoolhtuk, k'us dune húhodoohl'eh ílah!" ¹⁹ 'Et Peter, John bulh 'uhútni. "Nuhwhenich'oh hukw'u nuni nulhzut, nuhk'una'a tulih k'us Yak'usda buk'una'a tulih 'uztenilh? Ndet Yak'usda nalh ts'ah'un 'uhoont'ah? ²⁰ Nts'e na'a ts'uh'o'en 'ink'ez whulh 'uts'udánts'o, 'aw 'i zeh huwu yalhts'oolhtuk huba' hoont'ah?" ²¹ Nahéyilh 'en soo khunek ulhtus, 'i be doo chah, "Sizi yughu yaoolhtuk gunih!" hubuhútni, 'ink'ez hubulanahudetnik. 'Aw dzuh nobuhoolhdzut hoolah, dune ts'iyannah Yak'usda ba hodélti njan dáhooja 'et huwa. ²² Ndun dune huwa 'ét'en 'i be soo ná'huyinla, 'en díi lanezi (40) 'o 'un be naodezut ho' int'ah.

Huba 'alha' hoont'ah hunooljut whuch'a ténahududli

²³ 'Aw 'et Peter, John bulh hubulanahudetnik ibulh, ndunnah náwhulnuk dega nus deztii 'ink'ez hubutsuh whudelhdzulh chah, 'et njan daoobuzdáni, 'et hukw'ú nahuwulnuk. ²⁴ 'Et 'uhudánts'o hoh ts'iyawh lhgha Yak'usda ts'un tenawehéhdunidli, "NeMoodihti nyun Yak'usda 'int'ah t'éts'onínzun, yaz, ndi yun, yattoo, 'ink'ez bun k'ut chah íla, 'ink'ez ndai bulh 'úhoonla, 'i tubulh. ²⁵ Netsuh whudelhdzulh David mba nye'ustlen, Ndoni bugha mba yalhtuk ínle hoh ndutni,

"Udun yun k'ut whut'en,

di ka howunílh'e? Di ka ndunnah dune Yak'usda ch'a yahálhtuk?

²⁶ Ndi yun k'ut hubudayi cho,

'en chah lhahudutedughan wheni.

'Ink'ez dune k'une'nuwhuhul'en chah 'ilhúhowezdel Yak'usda 'ink'ez buChrist,

'en hich'a nidendel ho' hut'en."

²⁷ 'Et 'o 'un tenahudedli hoh 'uhutni, "Et 'alha' 'i be njan Jerusalem 'et Herod 'ink'ez Pontius Pilate bulh 'udun yun k'ut whut'en chah, 'et Israel hubuts'uh hainzut 'en chah, ts'iyawh 'ilhuhowezdel hoh nYe' Sizi lubeshi bughoh hoolah, 'en buka tsi hóodli neba yulhtsi, 'en hich'a nidendel 'et wheni. ²⁸ 'Et 'uda be ílhtus, 'i 'ink'ez nyeni be ndunínzun ínle hoh lhawhudinla. 'Et k'an 'et daóotenilh dini ínle, 'et whuz na'a ndunnah 'ilhuhowezdel nduw'hútenilh. ²⁹ 'Et huwa neMoodihti, ne'hunoolhjoot, k'an dzin hubóozelhts'ai 'ink'ez 'aw chats'uniljut hoh wheni, mba' ts'ut'en, nghunek unzoo, 'i be yats'oolhtuk negha ooni'aih. ³⁰ 'Et huwa neMoodihti, be ílhtus 'i be dune soo na'ínle 'ink'ez nYe' Sizi, lubeshi bughoh hoolah, 'en boozii be úlhtus, 'i bugha ts'iyannah hubunalhts'et hooncha 'ink'ez huwa 'ét'en tune' whut'en hóle." ³¹ 'Aw 'et tenahudedli 'ustle' 'uhudéja hoh, nyoh 'ilhúhowezdel ndulhcho noghésnai 'ink'ez Ndoni buyídelts'ut hoh 'aw chaniljut hoh Yak'usda bughunek 'i be hubulh yáwehuhulhtuk.

Huba 'alha' hoont'ah 'ilho lhula' hudut'en

³² Huba 'alha' hoont'ah 'ilho ts'iyannah lhula hudut'en. 'Aw hube'ildzun hoolah. Ndai hiyet'i 'ilho hiyé ne'ut'en. ³³ 'Aw chaniljut hoh whel'a 'en soo khunek ulhtus, 'i be, "alha' hoont'ah hoh Sizi neMoodihti 'en dinadíja," hutni, 'ink'ez Yak'usda tube hubuts'un únzoo.

³⁴ 'Aw 'ilhunuh hubutah ye dunidzit hoolah. Ndunnah bukoo k'us yun lhadint'ah huyit'i, whe' honket, ³⁵ 'et sooneya bugha yúlts'uk, 'i whel'a 'en hubutl'aihinudzih. 'I 'ilho ndunnah 'en yedunidzuk 'en hubutl'áhíyudzih. ³⁶ 'Et whuz na'a 'uja 'ilhunuh dune, Joses hiyúlhni, 'en Levite 'int'ah, 'et Cyprus whuzdli, 'en whel'a 'en "Barnabas" hiyúlhni, ndi boozii 'i, "En nedzi ulhtus ílh'i," ni hoh 'utni. ³⁷ 'En chah yun ut'i, 'i be 'ónket 'ink'ez whel'a 'en hubutl'ayándzai.

5

Ananias bu'at Sapphira bulh dahútenilh 'et

¹ 'Et whunts'ih 'ilhunuh dune, Ananias hiyúlhni, 'ink'ez bu'at Sapphira bulh yun hiyit'i, 'i hiyé 'onket, ² 'ink'ez sooneya bulah dich'oh duba yílhchoot. 'Et bu'at chah t'eeonínzun.

'Ink'ez bulah 'i whel'a 'en butl'ayándzai, 'ink'ez ndo búlhni, "Ndi sooneya 'i ts'iyawh 'int'ah."
³ 'Et Peter 'uyúlhni, "Et di ka Satan buk'úne' tant'en hukwa' nizon? 'Ink'ez lhe'dini sooneya buluh ílhchoot 'ink'ez Ndoni ts'un honts'it? ⁴ Ndi yun be 'ótekhulh whutsuh nuhwhe'íldzun unli inle. Be 'óhket hoh buzooneya 'i chah nuhwhe'íldzun 'int'ah. 'Ink'ez di ka ndzi yuh hoh njan tinta' nint'en? Yak'usda ts'un honts'it 'aw dune ts'un ilah!" ⁵ Soo Ananias whudánts'o íbulh, nadélduz 'ink'ez dazsai. Ndunnah whulh údants'o tube cho whehunelhújoot. ⁶ Chilkhah 'en dahuníndel 'ink'ez hiyust'e highá' wezduz, tihinilhti, 'ink'ez whuyéhiyalhti. ⁷ 'Et tat hukw'e' hoonezt'o bat'en inle, 'et bu'at 'aw dáhooja t'echaonízun hoh danínya. ⁸ 'Et Peter 'uyúlhni, "Sudíni ndi sooneya, nki netl'ayándzai, 'i be 'óhket, 'i buzooneya, ts'iyawh tulih 'int'ah?" "A, ts'iyawh 'int'ah," yúlhni. ⁹ 'Et Peter 'uyúlhni, "Et di ka nki bulh Ndoni ólhzhik hukwa' aht'en? Ndunnah chilkhah nki whuyéhiyalhti ndati hundelhúya, nyun chah whuz na'a tinanyotelhtel!" ¹⁰ 'Et 'ahoh 'en chah yubut nált's'ut 'ink'ez dazsai. Chilkhah dahuníndel 'ink'ez 'en chah dazsai hinilh'en. 'Et 'en chah tihinilhti 'ink'ez buki hizih whuyéhiyalhti. ¹¹ 'Et huba 'alha' hont'ah 'ink'ez 'uyoon dune tubulh ts'iyawh hodánts'o hoh dega nus whéhunelhújoot.

Whel'a 'en huwa 'ét'en tuné'hut'en

¹² 'Et dune tah whel'a 'en lhat huwa 'ét'en tuné'hut'en. Solomon budáti bet huwhútni, 'et ts'iyannah huba 'alha' hont'ah whuz 'ilhuhowezdel. ¹³ Ts'iyannah soo hubughi yahalhtuk, 'et whunts'ih 'aw huba 'alha' hont'ah 'uyoon dune hubutahoodelh ghaít'ah. Njan lhe'hója 'et huwa whéhíntsz. ¹⁴ Sizi Gri huba 'alha' yint'ah 'o nus hulai suli, dune chah 'ink'ez ts'ekoo chah. ¹⁵ Whel'a 'en huwa 'ét'en tuné'hut'en 'et huwa ti whuzih nduda hik'usútez 'i bulh tébuhulih, khun sih Peter hoh wheghah uyalh t'eh, butsen 'i whunts'ih buk'ut lhúyolts'it. ¹⁶ Lhanah hoh dune Jerusalem whunat keyah whut'en, 'en chah whusahándel. Nduda chah 'ink'ez ntsi' nudúdeh buyidélhts'i 'en chah whusábuhule 'ink'ez ts'iyawh soo ná'bulhul'h'en.

Whel'a 'en dzuh nubuhulhdeh

¹⁷ 'Aw 'et Lizwif náwhulnuk dega nus dezti, 'ink'ez yuts'ú dutnik, 'en Sadducee hinli 'en whel'a 'en tube bughe' hoolnih suli. ¹⁸ 'Aw 'et whel'a 'en hubuhílhchoot 'ink'ez dune tsak'edelhts'i 'et tsak'ebahanla. ¹⁹ 'Et whunts'ih 'et 'ulh'ek neMoodihti bulizas tsak'edelhts'i da' duteztan, tinaóobuninla 'ink'ez obúlhni, ²⁰ "Ahdulh 'ink'ez Lizwif hubuluglez whucho nudelhúya 'ink'ez ndi k'an be ts'úkhuna, 'i bugha hubulh yáhtuk." ²¹ 'Et hidánts'o hoh, soo yilhkai 'et Lizwif hubuluglez whucho dahuníndel 'ink'ez 'aw 'et dune wheoobohódulh'eh.

Whel'a 'en doo chah nahéyelh hububut niboninla

'Et Lizwif náwhulnuk dega nus dezti 'ink'ez yuts'úh dutnik, 'en Lizwif butsuh whúdelhdzulh, 'ink'ez nahéyelh chah, bughú nahézya yahatelhtuk hubugha. 'Et 'ink'ez whel'a 'en tsak'edelhts'i ts'ih Israel hits'uh haínzut 'en bukuwhenábuhalh'a hububut nibatelelh ka. ²² 'Et whuz hunindel hoh whel'a 'en tsak'edelhts'i 'en huhóolah hotelh'en. 'Et nahéyelh buts'un náhündel 'ink'ez ndo badáni, ²³ "Dune tsak'edelhts'i ts'ih lghazdindel hoh dá'denla 'aw 'et ndóohont'ah. 'Ink'ez huwuhinli chah 'aw 'et huwuhinli 'et dá'uzdutez'ai hoh, 'aw ndunnah whel'a 'en huhoolah!" ²⁴ Lugez whucho huwuhinli bumoodih, Lizwif náwhulnuk dega nus dezti 'ink'ez Lizwif bunáwhulnuk moodih tubulh whulh 'úhudants'o hoh, 'et huwu yahulhtuk, "whel'a 'en dahúja simba 'uhint'ah?" hutni. ²⁵ 'Et 'ilhunuh dune danínya 'ink'ez ndo búlhni, "Whunulh'en ndunnah dune tsak'ehudelhts'i 'en nyooz lugez whucho ts'ih dune hubodulh'eh!" ²⁶ Lugez whucho huwuhinli bumoodih, budune tubulh whuz whéhandel, 'et ndunnah 'ilhuhowezdel hubé hunulhújut doo ka tse be hubuhoogan, 'et huwa whel'a 'en higha 'ooliyaz hoh nabuhílhchoot. ²⁷ 'Et whel'a 'en dunábuninla 'ink'ez nahéyelh hububut nebaninla 'ink'ez náwhulnuk dega nus dezti, 'et huboodulhuk, ²⁸ "Soo khunek ulhtus, 'i be nuhwuba nats'uhézya inle ndun Sizi bugha dune huboodulh'eh ílah nuhts'utni inle. K'an whunulh'en lhe'ahja, Jerusalem ndulhcho hoh 'aw 'et hubodilh'eh. Ndun dune dazsai, 'et nuwheni nek'éhoh'ah hukwa' aht'en!" hutni. ²⁹ Peter 'ink'ez 'uyoon whel'a 'en bulh whuz yahatelhtuk, "Yak'usda zeh buk'úne' ts'oot'en huba' hont'ah, 'aw dune buk'úne' ts'oot'en huba cha'hóot'ah," húbulhni. ³⁰ "Et Sizi lhdulalhgu hiyundulh't'o hoh sélhghi, 'et whunts'ih netsuh whudelhdzulh buYak'usda 'en nakhiyílhna. ³¹ 'Et Yak'usda yak'uz whenáyalhti dunalhnih ts'ih buzih 'et yulhda, 'ink'ez Moodihti 'ink'ez neulhyis chah yulhtsi. 'Et Israel hubuts'uh hainzut hubeni náhondunoollelh, 'et sih bulubeshi huba 'ún yutooldelh. ³² 'Et nuwheni Yak'usda ne'ust'en ho'en ts'inli 'ink'ez huwu yats'ulhtuk. 'Ink'ez Ndoni, 'en Yak'usda k'úne' 'ut'en hubugha iní'ai, 'en chah nela'ut'en," 'et hubúlhni. ³³ 'Et nahéyelh njan hodánts'o hoh, tube cho 'o nus hukwa ha'nílh'e k'et, whel'a 'en hubotuzelghelh hukwa' huninzun, 'et howu yahalhtuk. ³⁴ 'Et whunts'ih 'ilhunuh dune, Gamaliel hiyúlhni, 'en Pharisee unli ts'iyannah ba ncha, 'en hubutah didinya 'ink'ez ndo

búlhni, “Astl'iyaz 'az hubehlelh.”³⁵ 'Et nahéyelh ndo búlhni, “Israel whudune huwa 'óohli hoh ndunnah dune né'bulh'en.”³⁶ Dzuh sa da inle 'ilhunuh dune Theudas hiyúlhni, 'en ninya 'Dune ncha usdli,' ni hoh dune bulh yálhtuk. 'Et 400 bat'en 'en hits'ú nedindel, 'et whunts'ih hizelghhi, 'ink'ez yuts'ú nidendel inle, ts'iyawh 'ants'ih lhtahanindel. 'Et nduhóoja hoh hoolah huzdli.³⁷ 'Et whuz na'a zeh 'uyoon dune chah nduja, Judas Galilee whut'en hiyúlhni, 'et dune naoodulto hoh 'et ninya. 'Et chah lhanah dune hits'ú nidendel. 'En chah hizelghhi 'ink'ez yuts'ú nidendel inle, 'en chah ts'iyawh lhtanahundel.³⁸ 'Et nduhóoja inle 'et huwa nuhwuhúdsni, ndunnah dune hoonli 'oboohleh gunih, hubuts'uh hachaoozah'ak! 'Et dich'oh duba 'uhut'en 'ink'ez whunohodulh'eh t'eh, 'ahoh hoolah naóotedle.³⁹ 'Et whunts'ih Yak'usda ndi 'ut'en k'ah ts'ih hubugha ini'ai t'eh, 'aw buch'a' oolhdeh ghaít'ah, doo ka sih Yak'usda ch'a ne'aht'en wahle.”⁴⁰ 'Et nahéyelh huba 'alha' deja. Whel'a 'en danábaninla 'ink'ez “Huboolhtsas,” hubuhútni. 'Ink'ez hukw'elh'az, “Sizi boozu bugha dune huhodoolh'eh gunih!” hubuhútni, 'ink'ez bulanahudetnik.⁴¹ 'Et whel'a 'en nahéyelh bughu tínahundel. Yak'usda Sizi Gri ba dzuh nuhude 'et huba soo' huldzoo dich'oh 'et na'hundunudzun, 'ink'ez howu nélnnik.⁴² 'Et dzin totsuk Lizwif luglez whucho 'ink'ez dune bukoo chah, Sizi, 'en Yak'usda buChrist, 'en bugha dune huhodulh'eh 'ink'ez khunek unzoo, 'i be dune hubulh yahúlhtuk, 'aw 'ustl'e' cha'hudínli.

6

Skwunlai 'o 'at nanah dune, ndunnah whel'a 'en la'hut'en

¹ 'Et hoh da yugha hoodul'eh 'o nus hulai suli. Yugha hoodul'eh Lizwif nawh hudedowh, Greek hubughunek k'eyahalhtuk 'ink'ez Lizwif dich'oh hubughunek k'eyahalhtuk, 'en lhts'un lhenah 'ahúdeja. Greek k'eyahalhtuk hutni, 'Netsandelh 'aw hubugha cha'hús'ai dzin totsuk sooneya dune hiye la'ut'en, 'i whutahudzih teh.”² 'Et lanezi 'o 'at nanah whel'a 'en Sizi Gri yugha hoodul'eh, ts'iyawh 'ilhubuhwezda 'ink'ez 'uhutni, “Aw cha'hóozoo Yak'usda bughunek be yats'ulhtuk whulazdutetnih 'ink'ez sooneya dune be la'whut'en, 'i zeh 'uts'oolh'en ghaít'ah.”³ 'Et huwa sulhutsinkah skwunlai 'o 'at nanah dune nuhtah ndunnah t'ebunáhzun Ndoni hubuyidínda 'ink'ez huwhunih chah 'uhint'ah 'utaháooobahle 'en ndi 'ut'en 'uhiyoolh'en wheni 'en huwu hinli hubuts'oolhtsilh.⁴ 'Et nuwheni tenazdudli 'ink'ez Yak'usda bughunek be yáts'ulhtuk, 'et zeh 'uts'otelh'ihl,” hubuhútni.⁵ 'Et 'ilhuhowezdel ts'iyawh whel'a 'en huba soo' hudeja, 'et Stephen 'en 'utahahúyalhti soo cho be 'alha' hoont'ah ut'i, 'i 'int'ah 'ink'ez Ndoni buyudínda. 'Et Philip, Prochorus, Nicanor, Timon, Parmenas chah, 'ink'ez Nicolaus, 'en 'udun yun k'ut whut'en, Antioch whut'en 'int'ah, 'en Lizwif ts'ú nenadenja inle, 'en 'utahaóobahanla.⁶ 'Et whel'a 'en hububut nébaninla hoh whel'a 'en huba tenahudedli 'ink'ez hubuk'událnik.*⁷ 'Ink'ez Yak'usda bughunek 'aw 'et ndulhcho t'enédzin. Yugha hoodul'eh, Jerusalem whut'en chah 'o nus hulai huzdli. Lhanah Lizwif hubunáwhulmuk 'en chah Yak'usda bughunek hiyílhchoot.

'Aw 'et Stephen hiyílhchoot

⁸ 'Et Stephen be 'alha' hoont'ah 'ink'ez Ndoni ye úlhtus, 'i be dézbun, 'i bugha dune tah hooncha huwa 'ét'en túne'ust'en.⁹ 'Et whunts'ih bulunah dune hich'a nidendel, 'en Lizwif Cyrene 'ink'ez Alexandria ts'ih haháandel 'uhint'ah. 'En, 'et 'ulhna hinli hubulanadetnik 'ilhunuh luglez 'et whehúhoozi 'et 'ilhuhowezdel. 'Uyoon chah Cilicia 'ink'ez Asia ts'ih haháandel, 'en chah Stephen hiyenah 'utni.¹⁰ 'Et whunts'ih Stephen, Ndoni bugha whunih k'et yalhtuk, 'et huwa 'aw hich'a oolhdeh ghaít'ah.¹¹ 'Et 'ants'ih hoh dune, 'en huba k'elha háwhulhtsi Stephen, Moses bughunek 'uk'une'úsduguz, 'i 'ink'ez Yak'usda ch'a yalhtuk hu-dooni ka.¹² 'Et nduhútni hoh, hubutsuh whúdelhdzulh, Moses be' dustl'us 'uk'ununa'úsduguz chah, 'ink'ez 'onghunnah chah huba hodi'ai, 'en ts'iyawh Stephen hiyulh húnilich'e. Highu nindel, hiyílhchoot, 'ink'ez naheyelh hububut nihínilhti.¹³ 'Et bulunah dune hiba hoots'it ka whusaóobahanla 'ink'ez naheyelh njan ndo buhútni, “Nduun dune neluglez whucho whudezti 'ink'ez Moses huwa néulh'a 'ahoolhyez whuch'a yálhtuk.¹⁴ Njan ndutni hoh uzdzits'o. 'Nduun Sizi Nazareth whut'en neluglez whucho nawhúduunteyus 'ink'ez Moses khunek netl'áida'ai, 'i chah ts'iyawh 'uts'un na'a zeh na'whutelilh,' 'et ndutni hoh uzdzits'o.”¹⁵ Ndunnah nahúheyelh ts'iyawh Stephen 'en zeh hínihl'en bulun unzoo k'et 'ants'ih lizas nen 'et ndunt'ah.

7

Stephen wheoobunelhtan nts'ena'a Yak'usda Abraham 'utahayalhti

¹ 'Et Lizwif bunáwhulmuk degha nus dezti Stephen yoodulhukut, “Et ndunnah 'alha, hutni hoh ih hutni?”² 'Et Stephen 'uyúlhni, “Sulhutsinkah 'ink'ez 'abákah soo zúlhts'ai! Netsuh

* 6:6 'Et whuz na'a ts'yanah t'ehinízun, hubulh lhulh lhugha hinli.

whudelhdzuhl Abraham 'awhuz Mesopotamia usda, Haran ts'ih natedalh whutsuh hoh, Yak'usda buts'uh hayánduz, 'et bunalhts'et hawhélt's'ut. ³ 'Et Yak'usda 'uyúlhni, 'Nyun-atnekah 'ink'ez nkeyah chah whuch'a sinyih 'ink'ez nts'e keyah whúnyuntelhtun whuz tonya.' ⁴ 'Et Abraham, Chaldea yun k'ut whuch'a síya 'ink'ez Haran ts'ih ninya. 'Et hukw'elh'az be'abá dazsai hoh ndi yun k'an buk'udelhúts'i, 'i Yak'usda whuz wheyáhl'a. ⁵ 'Aw Yak'usda yun ntsolyaz whunts'ih yughá chai'al, 'et whunts'ih yuts'ú yoozi hoh ndi yulhni, 'Nyun 'ink'ez ndan nyehudútedulh, 'en ndi yun hubube'hooldzun tele.' 'Et hoh da Yak'usda ndi yulhni hoh Abraham 'aw buzkeh hoolah inle. ⁶ 'Et Yak'usda ndi yulhni, 'Nts'ahahutedulh 'uts'un yun k'ut ts'ih whuz 'ulhna huteleh 'ink'ez 400 naodezút 'et dune dzuh nubutelhdoh.' ⁷ 'Et Yak'usda ndo búlhni, 'Ndunnah 'ulhna hubuhit'i sich'oh huba nahutesyeh. 'Et hukw'elh'az whuch'a nahúsdel 'ink'ez njan keyah, si zeh sk'úne' hutet'en.' ⁸ 'Et Yak'usda Abraham ndi ye yuts'u nahezya, 'i bugha buts'uh huhafnzut, 'en hika dune unli, 'i k'ut hubuhit'us. 'Et whuz na'a Yak'usda hiyulh 'ilhunuh huzdli. 'Et Abraham buye' Isaac whuzdli 'ink'ez whulh lhk'udít dzin 'et hiyúzt'us. 'ink'ez Isaac chah buye' Jacob hoh Jacob, 'en chah ndunnah buye'kah lanezi 'o 'at nanah, 'en chah netsuh whudelhdzuhl whunih ndúbuhinla. ⁹ 'Et doo chah nuhtsuh whudelhdzuhl, Joseph bulhutsinkah, 'en highe 'oolnih 'et Egypt ts'ih hiye 'ónket 'ulhna tele ka, 'et whunts'ih Yak'usda yulh 'út'en,* ¹⁰ 'ink'ez dzuh nutezut whuch'a nayulhti. 'Et Pharaoh, Egypt hubudayi cho, yubut ninínya hoh Yak'usda whunih chah yulhtsi, 'ink'ez hubudayi cho yót'i ka 'et chah yugha óoni'ai. 'Et huwa hubudayi cho Pharaoh 'en bukoo chah 'ink'ez keyah dulhcho hoh chah whumoodih yulhtsi. ¹¹ 'Et Egypt 'ink'ez Canaan whulh dulhcho hoh dai whuzdli. TUBE DUNE DZUH NUDEH K'ET NETSUH WHUDELHDZULH 'AW TS'UYI, 'i nahóoleh ghait'ah. ¹² 'Et whulh údants'o Egypt ts'ih whuz ts'uyi, 'i 'ilhówezla 'et buzkeh, netsuh whudelhdzuhl, 'en 'udetsah whuz whebalh'a. ¹³ Whúlh nat hanahedel hoh 'et Joseph bulhutsinkah ts'un t'éoonedzin 'ink'ez hubudayi cho Pharaoh 'en Joseph bulh dunékah whulh údants'o. ¹⁴ 'Et Joseph be'abá Jacob yuts'ót'i khunek i'ai, dich'oh 'ink'ez dunatnékah teh ts'iyawh whusháóodelh, hubúlhni. 'Ihlo skwunlai 'o 'at nankoh lanezi 'o 'at skwunlanah, (75) 'en hinli. ¹⁵ 'Et Jacob Egypt ts'ih hunindel, didut chah 'ink'ez netsuh whudelhdzuhl chah 'et hudáls'i 'et keyah yahadla. ¹⁶ Buyust'e 'et keyah Shechem huwhútni ts'ih whuz lhghu naobadinla. 'Et whutsuh da Abraham 'et keyah, ndunnah Hamor whut'en hubuts'un yunyaz onket inle, 'i k'ut whuyo buhanla. ¹⁷ 'Et ndi yun Yak'usda Abraham ye yúts'u nahezya, 'i begnah whúdezulh 'ink'ez nedune Egypt hudelhts'i 'o nus hulai suli. ¹⁸ 'Et 'ants'ih 'uyoon hubudayi cho suli. 'En 'aw Joseph be 'ut'en k'ah 'aw t'éwhunúszun. 'En Egypt whut'en bumoodih suli. ¹⁹ Nedune hubé' whulhts'it 'ink'ez netsuh whudelhdzuhl dzuh nubulhdeh hoh k'anya huhonle 'en tébuhooleh yahódlah ka, 'et whuz na'a hubudayi cho Pharaoh hubúlhni. ²⁰ 'Et hoh da Moses whuzdli, 'en tube dune nzoo 'ink'ez tat sanun 'et be'abá bukoo hinalhyi. ²¹ 'Aw 'et téhinilhti hoh Pharaoh butse' 'en ilhchoot 'ink'ez dich'oh buyaz k'una'a yunelhyi. ²² Egypt whut'en ndai hiyé whunih, 'i ts'iyawh whehiyoodalh'i. 'Et dune ncha suli bughunek bugha 'ink'ez be 'ut'en chah. ²³ 'Et dit lanezi be naodezulh suli hoh ndun Israel hubuts'uh hainzut Moses, 'en dudulh whut'en, 'en hubutah nanátedalh hukwa' nínzun. ²⁴ 'Et whuz ninya hoh 'ilhunuh bulh whút'en, 'en yunilh'en hoh ndun Egypt whut'en dzuh nuyulhdzut 'en yuk'ut duneh hoh k'ut duja 'ink'ez ndun Egypt whut'en yuzelghi. ²⁵ Moses dich'oh ndunínzun, 'Sudune 'en njan t'ewhunúszun si Yak'usda buts'un sútelh'a, si sugha hubulánáhúdtetnih ka.' 'Et whunts'ih 'aw t'echaohonízil Moses Yak'usda buts'ú wheyalh'a. ²⁶ 'Et 'om bun dzin 'et nanah Israel hubuts'uh huhanzut l'ehút'us 'et, 'Dah!' hubúlhni, 'Soo zúlhts'ai sulh dune lhulhtsin ahli, di ka lhéht'us?' hubúlhni. ²⁷ 'Et ndun bughá whut'en Moses 'un be' yunilhtsut 'ink'ez, 'Ndan nemooidih 'ink'ez nahéyilh nyulhtsi hoh 'int'en? ²⁸ Hulhda ndun Egypt whut'en lhé'inla sélhghi! Whuz na'a si chah sutuzalghelhel nínzun ho ih 'int'en?' yúlhni. ²⁹ 'Et Moses whudánts'o hoh, 'et whetsilhya, 'ink'ez keyah Midian huwhútni ts'ih whuz whinya, 'et dune unli, 'ink'ez 'et nanah buye'kah whúzdli. ³⁰ 'Et doo chah dit lanezi naodezulh nadle hoh, nyooz dzulh Sinai hiyúlhni, 'i buzih dune chahóot'ih ts'ih 'et whus delhtan, 'i dézk'un 'i tah neMoodihti bulizas yá'en. ³¹ 'Et Moses ba hooncha ho'en 'et whuz wheinya, soo cho whuntel'ihl ka. 'Et Yak'usda yulh yatélhtuk hoh ndutni, ³² 'Si 'ust'ah, ntsuhda hubuYak'usda usdli. Abraham 'en buYak'usda 'ust'ah, Isaac, 'inkez Jacob chah buYak'usda 'usdli.' Moses nuljut k'et dulduz 'ink'ez 'aw whunoolh'en ghait'ah. ³³ 'Et Yak'usda ndi yulhni, 'Ke hain'es, njan yun whudézi 'int'ah hukw'usinyin. ³⁴ Egypt hudelhts'i sudune hubunulh'en ndulhcho, 'i be dzuh nuhudeh 'ink'ez hubudúts'o l'he'hoelcho, 'i be tehududlih 'en hubutelhyih 'et wheni 'usja ndus háya. 'Anih 'aw 'et Egypt ts'ih nyutélh'ah." ³⁵ 'Et Stephen 'o 'un ndutni, "Moses 'en 'int'ah Israel hubuts'uh huhanzut hich'a nalhúya inle, 'Ndan nemooidih 'ink'ez nahéyilh nyulhtsi ho ih 'int'en?' hiyúlhni

* 7:9 Hubutsuhda 'en yun k'ut Egypt 'et hudalhts'i.

inle. 'En 'uyínla Yak'usda hubuts'ítel'h'a ndun lizas whus dézk'un, 'i tah ya'en, 'en yula'ut'en hoh Moses bumoodih 'ink'ez whuch'a nabuzdla yulhtsi. ³⁶ 'Et hooncha 'ink'ez huwa 'ét'en tune'út'en, 'et huwa Egypt whut'en hubula k'éhanabanla, 'et yatoo dulk'un huwhútni, 'ink'ez 'et dit lanezi naoodezuhl (40), 'et dune chahóot'ih hoh nahudelh inle. ³⁷ Moses 'en 'int'ah Israel hubuts'uh huhanzut hubúhni hoh ndutni, 'Yak'usda be nus whúnih'en, sundult'ah, 'en Yak'usda nuhts'ítel'h'ah. Nuhkeyah 'ilhunuh 'en 'utenilh. 'En hubóozolhts'a.' ³⁸ Moses 'en dune chahóot'ih 'et Israel hubuts'uh huhanzut hiyulh 'ílhodulh inle. Netsuh whudelhdzulh hubutah 'et'en 'ink'ez 'en zeh 'int'ah Sinai dzulh k'ut lizas yulh yaifhtuk inle Yak'usda bughunek netl'aídooh'ah ka. Ndi Yak'usda bughunek bulatah hoolah ho' 'int'ah. ³⁹ 'Et whunts'ih netsuh whudelhdzulh Moses hik'éne' oot'en hukwa cha'humízun, hich'a nalhúya, 'ink'ez Egypt ts'ih nahutedulh zeh hukwa' hunínzun. ⁴⁰ 'Et huwa Aaron 'uhiyúlhni, "Uk'éltsi neba inleh! Neba yak'usda wule huba. 'Et ntse newhuntehntun. Ndund Moses newhusafnla, 'en dája simba 'aw t'ets'onízun 'et huwa.' ⁴¹ Hoh da 'et musdusyaz k'edeltsi 'uhínla inle 'ink'ez Yak'usda bukw'uzdai k'ut hits'e' delhk'un. 'Et huhóot'ih hoh honélnik, hubula be nyoo 'uhiyínla 'et huwa. ⁴² 'Et Yak'usda hubuch'a nálhú'a 'ink'ez n'un hubutelhdel nduk yaz sum 'i hits'un téni' noolhzin ka. 'Et hukwa Yak'usda be nus whúnih'en 'i k'ut 'uk'une'úsguz inle hoh ndutni,

'Dune Israel but's'u huhanzut,

njan dune chahóot'ih dit lanezi naoodezuhl whutah ndi khunai uhghan 'aw si sut's'un ilah Yak'usda bukw'uzdai k'ut dulhk'un ho' 'int'ah.

⁴³ 'Et nuhyak'usda Moloch 'i nuhwhuba luglez 'ulh'en nuhle 'ink'ez sum k'edeltsi 'i chah nuhyak'usda Rephan hiyulhni,

'i 'int'ah hoh 'uk'eltsi 'uhla, 'i but's'un téni'nulhzun, 'et huwa 'aw 'et Babylon 'o 'un ts'ih nuhwhutelh'ah."

⁴⁴ 'Et Stephen 'o 'un ndutni, "Et netsuh whudelhdzulh dune chahóot'ih ts'ih bun choyah Yak'usda hubeghah 'int'ah, 'i nahíyule. 'Et nts'e na'a Moses Yak'usda ndi yúlhni hoh whuz na'a 'uyínla, nts'e na'a 'uk'e'whéltsi 'et Moses whínelhtan inle. ⁴⁵ 'Ink'ez k'at le netsuh whudelhdzulh bun choyah hububákah hubutl'ahúho'ai. 'Et Yak'usda 'udun yun k'ut whut'en yun k'unábuntézyoot hoh hubudune ndi yun hiyílhchoot inle. 'Ink'ez ndi bun choyah 'et whuz'ai Joshua hiyulh tezdel David whusatéyalh whuts'un. ⁴⁶ 'En Yak'usda ba unzoo, 'en 'et Yak'usda yoodulhkt, "Aw ih 'udun koo mba níhos'ah ghaít'ah? 'Ilhuz wheni 'et whuté'ah.' Ndund Yak'usda 'en netsuh whudelhdzulh Jacob, 'en buYak'usda 'int'ah. ⁴⁷ 'Et whunts'ih Solomon 'en 'uja Yak'usda ba koo 'uhóonla inle. ⁴⁸ 'Et whunts'ih dega nus Yak'usda dezti 'aw dune bukoo 'uhóonla chaíadah. 'Et Yak'usda be nus whúnih'en inle 'et ndutni,

⁴⁹ 'Moodihti utni, yak'uz whuts'un ts'iyawh k'úne' whul'en 'ink'ez ndi yun suke buk'usíla huba' 'int'ah.

Nts'e na'a 'usutelhlilh koo suba 'uwhutehlilh 'ink'ez nts'e na'a natelhúyis, 'et suba nióotéh'ah?

⁵⁰ 'Aw t'eóonuzáhzun sich'oh ts'iyaintsuk 'usdla inle,' ni hoh utni."

⁵¹ 'Et Stephen 'o 'un ndo búhni, "Ndi Yak'usda bughunek be nohwhulh yalhtuk, tube 'uts'un únuzhun ahli hoh 'aw oozólhts'a hukwa cha'nuzáhzun 'ink'ez Yak'usda 'aw bulh 'ílhunuh cháhlah! Nuhwheni chah nuhtsuh whudelhdzulh dahánt'e 'et ndaht'ah. Ndoni buk'úne' teht'en 'aw hukwa cha'náhzun! ⁵² Ts'iyannah Yak'usda be nus whúnih'en, 'en nuhtsuh whudelhdzulh hube' huzúla inle. 'Ink'ez ndunnah Yak'usda be nus whúnoolh'en, ndun Yak'usda ba ts'ah'un na'a 'int'ah whusatéyalh hubugha hubunalh húnih hoh, nuhtsuh whudelhdzulh hizelghih inle. Ndund 'en 'int'ah be 'óhket 'ink'ez sélhghih inle. ⁵³ Nuhwheni 'uht'ah, Yak'usda bughunek bulizas nuhtl'aída'ai 'et whunts'ih 'aw buk'únucha'ah't'ill' hubúhni Stephen.

Stephen tse be hizelghih

⁵⁴ 'Et dune nahéyelh Stephen hidánts'o hoh 'o nus huyulh húnilh'e k'et 'et huwa hituzelghel hukwa' huninzun. ⁵⁵ 'Et whunts'ih Ndoni Stephen soo ye yudílt's'ut, nduk yak'uz ts'ih yutá'en hoh Yak'usda but's'uh hayánduz yutelh'en 'i bulh 'ink'ez Sizi Yak'usda nalhnih ts'ih yughu siyin. ⁵⁶ 'Ink'ez utni, "Nduk lhe'hóoja whunulh'en, yak'uz da'dutézkez 'ink'ez yinkak dune ye'† Yak'usda nalhnih ts'ih yughu siyin hoh whunulh'en!" ⁵⁷ 'Et soo 'uhultus hoh 'uhúldzul 'ink'ez hubudzo whudahúdelhnik 'ink'ez ts'iyawh 'ílo hiyúlh telhtus. ⁵⁸ 'Et Jerusalem 'et tinahínino, 'ink'ez tse be whehiyoonilh'uz. 'Et ndunnah Stephen nehínulh'uz† nahiyits'uz, 'i ts'ahahiyelya, 'et dune chilh, Saul hiyúlhni, 'en zih nihíninla yughole ka. ⁵⁹ 'Et whuz na'a zeh Stephen tse be nuhinulh'uz 'ink'ez neMoodihti yulh yalhtuk, "Sizi neMoodihti

† 7:56 Sizi Gri whuz na'a chah hiyóozi. ‡ 7:58 Ndund ninulh'uz, 'en Stephen hich'a halhtuk inle 'uhint'ah.

suzul ilhchoot!" yúlhni. ⁶⁰ Et dugwútsi be nenínya 'ink'ez soo 'ultus 'utni, "SMoodihti ndi lubeshi 'uhiyínla, 'i huba 'un yutolhdelh!" Ndudeja 'ink'ez dazsai.

8

¹ 'Et ndun Saul hiyeni k'una'a 'ayínla.

Saul ndunnah huba 'alha' hoont'ah 'en hube' zula

'Et dzin zeh Jerusalem ts'ih Sizi ba 'ilhuhowezdel hube' túzelah 'ink'ez dzuh nobutelhzut. 'Et ts'iyannah huba 'alha' hoont'ah Judea 'ink'ez Samaria whut'en bukeyah ts'ih whuz ts'iyawh whutabanényoot. Whel'a, 'en zeh 'aw 'et hudelhts'i. ² Bulunah soo Yak'usda ts'un téni' humilhzun, Stephen whuyihyalhti tube hubugha budzi únduda 'ink'ez hutso. ³ 'Et whunts'ih Saul, Sizi Gri bugha 'ilhuhowezdel hoolah hubutelhtsilh hukwa' ninzun. Koo totsuk dune 'ink'ez ts'e koo chah tibusus 'ink'ez tsak'eobulih.

Ndi khunek unzoo, 'i Philip ye yátelhtuk

⁴ 'Aw 'et huba 'alha' hoont'ah ndulhcho hoh nuhúdelh 'ink'ez ndi khunek unzoo, 'i hiye yáhtuk. ⁵ 'Et Philip 'en keyah Samaria whuz'ai whuz ninya 'ink'ez Christ, 'en bugha dune hubulh yáhtuk. ⁶ 'Et 'ilhuhowezdel Philip yáhtuk hidánts'o 'ink'ez huwa 'ét'en tune'út'en chah hinilh'en hoh, ts'iyawh t'ehudusnih 'ink'ez hiyoozélhts'ai. ⁷ Ntsi' nududeh, 'i buyáh hanainanyoot hoh 'ahúzul. 'Ink'ez lhanah dune dechadusnik chah 'ink'ez dzuh nuhudelh chah, 'en soo naóo'balh'en. ⁸ 'Et huwa nyoh keyah Samaria whuz'ai ts'iyawh huhóont'i. ⁹ 'Et whunts'ih whuz 'ilhunuh dune, Simon hiyúlhni, 'et usda. 'En 'ahoolhyez duyun 'ink'ez huba né'dulhde 'et hoh, "Si dune uncha 'ust'ah!" hubúlhni hoh Samaria whut'en huba hooncha. ¹⁰ 'Ink'ez ts'iyannah keyah hudelhts'i soode'a 'int'ah 'ink'ez tel'ennah chah hinilh'en 'ink'ez hiyoozélhts'ai. 'Et, "Ndun Simon 'en 'int'ah Yak'usda ba hooncha túne'ut'en unli," hutni. ¹¹ Soo sa hoh huba duyun unli 'ink'ez huba hooncha 'et huwa bughunek tube hiyoontun. ¹² 'Et whunts'ih Philip ndi khunek unzoo Yak'usda dune k'úne' bul'en hubugha 'ink'ez Sizi Gri boozi bugha, 'i chah ye hubulh yáhtuk inle, 'en 'o nus huba 'alha' 'utni, 'et huwa dune 'ink'ez ts'ekoo chah, ts'iyawh too bé' hulya. ¹³ 'Et huwa Simon 'en chah huba 'alha' hoont'ah suli. 'Et too be' úlya hoh Philip yulh zeh 'ut'en. Nts'oh huwa 'ét'en 'ink'ez hooncha tune'út'en ts'iyawh 'et hubugha Simon buba hóoncha. ¹⁴ 'Et whel'a 'en Jerusalem ts'ih whulh 'uhúdants'o Samaria whut'en Yak'usda bughunek hiyilhchoot, 'et Peter 'ink'ez John bulh whuz whebahalh'a. ¹⁵ 'Et whuz huni'az hoh 'et huba 'alha' hoont'ah Ndoni buyudóolts'it ka huba tenahudedli. ¹⁶ 'Aw huz Ndoni buyúdelhúnik 'en Sizi boozi 'i bugha zeh too be' hulya. ¹⁷ 'Et Peter 'ink'ez John bulh buk'ehúdlilik hoh 'aw 'et Ndoni buyúdelts'ut. ¹⁸ 'Et Simon hubunilh'en whel'a 'en dune hubuk'ut delhúnik t'eh Ndoni hubuyúdelts'uk. 'Et Peter John bulh sooneya hubugha óo'ah hukwa' bulh'en. ¹⁹ 'Ink'ez ndo búlhni, "Si chah ndi be ts'íltus, 'i sughu náh'aih 'et huwa ndan buk'udelhúnik 'en chah Ndoni buyudóolts'it." ²⁰ 'Et whunts'ih Peter 'uyúlhni, "Ndi Yak'usda negha óoni'ai sooneya be ootankulh ninzun t'eh, nyun 'ink'ez nyuzooneya bulh hukw'elha dut'éhk'un ho' hoont'ah! ²¹ Ndi ne'ut'en 'aw nela'olh'en huba cha'ínt'ah 'ink'ez Yak'usda nalh 'aw ndzi ts'ah'un cha'ít'ah 'et huwa, 'ink'ez 'aw nets'ún dentni ilah cha' unim't'ah. ²² Njan tink'us na'a nuní ninzut lht'ananindaih 'ink'ez neMoodihti buts'un ténadinli njan dunínzun, khun teh mba 'ún whutoolhdelh. ²³ Whuz na'a t'enyunúszun, daint'ah 'oolnih ntsi' dembun 'ink'ez lubeshi 'ustl'e' onleh ghaít'ah!" ²⁴ 'Et Simon, 'en John 'ink'ez Peter ndo búlhni, "NeMoodihti ts'un sba tenadahdli njan daootenilh dahni, 'et 'aw sts'un nducha hosne." ²⁵ Soo bughunek ulltus hoh neMoodihti bughunek ghu yáháhtuk hukw'elh'az John 'ink'ez Peter bulh Jerusalem ts'ih nahunt'az. He'us hoh Samaria whutah keyah whuyaz totsuk khunek unzoo, 'i be dune bulh yahúhtuk.

Philip, ndun Ethiopia moodih ye yátelhtuk

²⁶ 'Et neMoodihti bulizas, 'en Philip yulh yátelhtuk hoh ndi yúlhni, "Lhadíntneh 'ink'ez ndet Jerusalem ts'ih t' n'az Gaza ts'ih, whuz ti inyalh," whuz dune chahóot'ih ts'ih. ²⁷⁻²⁸ 'Et Philip lhadúja 'ink'ez whuz whenya. 'Et sih Ethiopia dune, 'en eunuch hubuhútni,* 'en koo ts'ih nádalh. Ethiopia hubudayi cho ts'eke† 'en ba sooneya ghunli dune ncha hiyilhi'. Jerusalem ts'ih Yak'usda ts'un teni' noolhdzin ka whuz nusíya, wagon be whuz de hanaja. Hoh weghah élhbus hoh Isaiah, Yak'usda ba nus whúnooh'en, 'en yuk'une'úgzuz, 'i yuk'uyalhtuk. ²⁹ 'Et Ndoni Philip yulh yáhtuk, "Whuz buts'inyalh 'ink'ez wagon buzih k'ut tonya," yúlhni. ³⁰ 'Et Philip yughulgai 'ink'ez Isaiah yuk'úne'uzguz 'i k'ut 'uk'eyalhtuk yuduzts'ai, 'et yoodulhkt, "Ndai buk'uyailhtuk 'i daja ni, 'et nt'eeonínzun ih?" yúlhni. ³¹ "Nts'e na'a t'entészin? Dune hiye súnulhtun t'eh, 'et sih daja ni hoh 'utni nahós'ah,"

* 8:27-28 Ndi boozi, eunuch, 'i dune 'aw ts'ekoo t'aghóonalh ghaít'ah hiyulhtsi, ni ho 'utni. † 8:27-28 Nduunnah hubudayi cho ts'eke, 'en Candace hiyúlhni.

yúlhni. 'Ink'ez Philip, “Sughu denyih, 'ink'ez suzih sinda,” yúlhni. ³²Ndi Yak'usda bughunek buk'une'úsduzuguz, 'i 'ilhunuh 'et hukw'e yalhtuk ndutni hoh, “Sheep hituzelghelth ts'ih hitelhti, 'i soo dant'ah,

'ink'ez sheepyaz hahiteghus teh t'edusnih,
'et ndunt'ah 'aw yachatilhtih.

³³Ts'iyannah nalh 'et hooncha hoh hukwayá hoonli tuné' hiyulh'en,
'ink'ez 'aw ts'ah'un na'a nucha'hiyilh'il.

Ndi yun k'ut ye khúna 'i hubugha yilchoot, 'et huwa híts'u hainde 'aw dune t'ehinóozin ghait'ah.”

³⁴'Et ndun eunuch Philip 'ulhni, “Sudíni ndan Yak'usda be nus whúnilh'en ndan 'ulhni, dich'oh tulih na'dudútni k'us 'uyoon dune tulih 'ulhni?” ³⁵'Et Philip yawhénilhtuk ndi dune yuk'uyailhtuk, 'i Yak'usda bughunek 'et ho' dini hoh khunek unzoo, 'i Sizi bugha ts'iyawh yudáni. ³⁶'Uhelhbus hoh too hoonli 'uhunilhbaz. 'Et ndun moodih 'utni, “Njan too hooni. Dáhoont'ah huwa 'aw too be' 'óosneh ghaít'ah?” ³⁷'Et Philip 'uyúlhni, “Ndi ndulhcho, 'i be, be 'alha' hoont'ah int'i t'eh, 'et too be' talnilh.” 'Et 'uyúlhni, “Sizi Gri 'en Yak'usda buYe' 'int'ah, 'et suba 'álha' hoont'ah!” ³⁸'Et ndun eunuch be ne'ulbas 'ilhuz nenintan 'ink'ez nahult'ah Philip ndun eunuch bulh dehahá'az 'ink'ez tahá'az. 'Et Philip ndun eunuch too be' yinla. ³⁹'Et tooz hanáhet'az ibulh Philip Ndoni be whedánde 'ink'ez ndun eunuch 'aw 'o 'at nachayít'il hoh didut tube cho whunelhnik hoh dukeyah ts'ih whena'elbaz. ⁴⁰'Ink'ez Philip keyah Azotus huwhútni 'et nuya hoh hitelh'en. 'Et whunat keyah wheyaz whut'en keyah Caesarea ts'ih teyalh whuts'un, ts'iyawh khunek unzoo, 'i be hubulh yáhtuk.

9

Saul, Sizi Gri ts'u nalhú'a

¹'Et whezulh hoh Saul neMoodihti yugha hoodul'eh húnilh'e k'et ts'iyawh hubuteghan huwu yailhtuk, 'et Lizwif náwhulnuk degha nus dezti ts'ú whenya, ²'ink'ez yoodulhktu keyah Damascus huwhutni ts'ih Lizwif hubuluglez be nawhulnuk duba buts'un k'e'ooges buts'u húkwa' 'utni, ndan Sizi k'una'a nuninuzut ts'iyawh dune 'ink'ez ts'ekoo chah tsak'eoobutelelh, 'ink'ez Jerusalem ts'ih nabatoola ka 'et wheni. ³'Et Saul keyah Damascus wheghah uyalh hoh, 'et khunyaz ndus de ts'un bunat tube kwun ulhtus ndult'ah, 'i hadanat. ⁴'I bughah yun 'et nált's'ut 'ink'ez 'uwhtutni, “Saul di ka dzuh nusílhdzut hoh 'int'en?” ⁵“Moodihti ndan inli?” ni Saul. “S'i Sizi 'ust'ah. Si 'usilh'en dzuh nusílhdzut. Ndan tutsus nulé buk'únucha'zint'en t'eh, nyunch'oh zeh dzuh nuná'dudildzut,” yúlhni. ⁶'Et duldz, buba hooncha, 'ink'ez 'utni, “SMoodihti ndet datésnilh suts'u hukwa' ninzun?” 'Ink'ez neMoodihti ndi yúlhni, “Dinadindaih 'ink'ez keyah ts'ih inyalh. 'Et dune daténilh nyudóoni,” yúlhni. ⁷Ndunnah dune Saul bulh nuhudelh 'ilhuz nehúnindel 'ink'ez t'ehudínel, 'aw dune chawhes'en 'et whunts'i njan yatuk 'et 'uhoozélhts'ai. ⁸Saul dinadija 'ink'ez yutá'en hoh chawhés'en suli. 'Et hila ilhchoot 'ink'ez Damascus ts'ih lhgha hidilhya. ⁹Tat dzin 'et 'aw chawhés'en. 'Et nduhoolyeh hoh 'aw cha'us'al 'ink'ez too whunts'ih chayusni. ¹⁰'Et keyah Damascus 'et 'ilhunuh buba 'alha' hoont'ah, Ananias hiyúlhni, 'en bunalh hawhelts'ut hoh neMoodihti yulh yailhtuk 'ink'ez ndutni, “Ananias” yúlhni. 'Et 'ahoh Ananias, “SMoodihti, njan sida,” yúlhni. ¹¹'Et neMoodihti 'uyúlhni, “Lhadíntneh 'ink'ez ti lhts'eodeez'a huwhutni ts'ih whuz inyalh Judas bukoo ts'ih, 'ink'ez dune Tarsus whut'en, Saul hiyúlhni, 'en buka 'oodolhktu. 'En tenadudli ho' 'int'ah. ¹²'En chah bunalh hawhelts'ut hoh Ananias hiyúlhni, 'en daninya yunilh'en 'ink'ez yutsi k'edilnik whe'en naoodle ka.” ¹³Ananias 'et 'uyúlhni, “NeMoodihti nts'e na'a 'utesnilh, lhanah dune ndun Saul 'en bugha whulh 'udats'o. Njan 'et ndúja, Jerusalem whut'en, dune nye'ildzun, 'en lhe'holhcho 'i be dzuh nobulhdeh ho' 'int'ah. ¹⁴'Et 'ink'ez ndez Damascus ts'ih ninya náwhulnuk moodih ndunnah huba 'alha' hoont'ah ilhchoot 'ink'ez nyoozi be yalhtuk, ts'iyawh tsak'eboolelh ka higha óoni'ai.” ¹⁵NeMoodihti 'et 'uyúlhni, “Inyalh 'ink'ez dája nyudúsní 'uhonleh. Saul 'utaháilhti ho' 'int'ah, suba' tet'ilh 'et wheni. 'Udun yun k'ut whut'en, hubudayi cho, 'ink'ez Israel hits'uh hainde chah ts'iyawh si sugha t'ehonózin 'et whúbuntelhtun 'et wheni. ¹⁶'Et 'ink'ez njan si sugha dahóolhcho whe dzuh nituzet 'et whuntelhtun.” ¹⁷'Et Ananias whuz whenya 'ink'ez koo daninya hoh Saul yuk'édilnik 'ink'ez ndutni, “Saul, sulhutsin, neMoodihti sultelh'a, Sizi dich'oh, ndez inyalh hoh ti nyeghah be hóodilts'ai, 'en sutelh'a whe'en naoondle 'ink'ez Ndoni nyudóolts'it ka.” ¹⁸'Et 'ahoh hoonliyaz dugoos li'int'ah, 'i Saul buna k'eháyankat, 'ink'ez 'ahoh whe'en nasdli. Didinya 'ink'ez too bé' ulya. ¹⁹'Et hukw'elh'az 'an'al 'ahoh ulhtus nasdli. 'Et Saul, ndunnah Sizi yugha hoodul'eh 'en dzuh sayaz Damascus 'et hubuzih inda.

Damascus whut'en, 'et Saul khunek unzoo, 'i be hubulh yáhtuk

²⁰'Et 'ahoh Lizwif hubuluglez ts'ih daninya 'ink'ez Christ bugha hubulh yáwhenilhtuk, “En Yak'usda buYe' 'int'ah,” hubúlhni. ²¹Ndan hiduzts'ai ts'iyawh huba hooncha 'ink'ez

'ulhahudutni, "Ndun dune Jerusalem 'en ndi yoozi be yahalhtuk, 'en hubanghan 'en 'int'ah 'ink'ez 'et huwa zeh ndez ninya ndunnah hubutélhchulh 'ink'ez náwhulnuk moodih ts'ih nábuteleh 'et wheni." ²² 'Et whunts'ih Saul bughunek 'o nus ulhtus hoh dune hubulh yalhtuk 'ink'ez Sizi 'en Christ 'int'ah ts'ah'un huba 'álha' hoont'ah hubulhtsi k'et, Lizwif Damascus whut'en 'aw dája hidooni ghaít'ah. ²³ 'Et lhat dzin inle hoh Lizwif 'ilhúhowezdel 'ink'ez Saul nts'e na'a hituzelghelh hubugha wheni lhaóóduleh. ²⁴ Dzin 'ink'ez 'ulh'ek ibulh njan keyah hukwuti 'ahoolhyez huwu hinli hituzelghelh ka, 'et whunts'ih Saul dahítelil 'et n'eeonanzin. ²⁵ 'Et 'ilhu 'ulh'ek Sizi yugha 'eh, 'en Saul hiyílhchoot 'ink'ez keyah whunasú'a, 'i bukoni'a, whuz hukwa hínilhti 'ink'ez k'its'ai cho be híyalhti 'ink'ez yoo 'az ts'ih nahíyalhbal.

Saul Jerusalem ts'ih ninya

²⁶ 'Et Saul Jerusalem ts'ih ninya 'ink'ez Sizi yugha hoodul'eh hubuts'un nidooya hukwa 'ut'en, 'et whunts'ih 'en 'aw Sizi yugha hoodul'eh 'int'ah cha'hunizun, 'ink'ez tube hiyé nuljut. ²⁷ 'Et Barnabas yughu ninya 'ink'ez yula 'uja hoh whel'a 'en yughi nilhti 'ink'ez hubudáni dája hoh Saul ti uyalh hoh neMoodihti i'en 'ink'ez yulh yáilhtuk chah 'uja. 'Ink'ez ndo búlhni dat'en hoh 'aw chaníljut hoh Damascus whut'en Sizi boozu bugha hubulh yáilhtuk. ²⁸ 'Et Saul hubuzih nit'l'adenda 'ink'ez Jerusalem nduhoolhcho hoh neya, 'aw chaníljut hoh neMoodihti Sizi boozu bugha Yak'usda bughunek be hubulh yáilhtuk. ²⁹ Ndunnah Lizwif, Greek k'eyahulhtuk, 'en chah hubulh yáilhtuk 'ink'ez hubulh hukw'u náhulhu, 'et whunts'ih hizoolghelh hukwa' hiyulh'en. ³⁰ 'Et whunts'i huba 'álha' hoont'ah náhuho'o'ai t'eh, Saul keyah Caesarea ts'un buch'a whehiyalhti. 'Ink'ez dukeyah Tarsus huwhútni whuz whehíyalh'a. ³¹ 'Et ndulhcho Judea, Galilee, 'ink'ez Samaria bulh Sizi ba 'ilhúhowezdel 'aw dzuh nulhahuldeh hoolah. 'Et hoh huba hoonzoo hoh lhódezut 'ink'ez chah Ndoni bugha huba 'álha' hoont'ah ulhtus úbulhtsi. 'Et huwa 'o nus lhanah huzdli 'ink'ez neMoodihti zeh hudélti suli.

Keyah Lydda 'ink'ez Joppa huwhútni, 'et Peter huwa 'ét'en tune'út'en

³² 'Aw 'et Peter soo ndulhcho hoh nuya. 'Et keyah Lydda dune Yak'usda bube'ildzun, 'en 'et hudelhts'i, ³³ 'en buts'un nuya hoh 'ilhunuh dune, Aeneas hiyúlhni, yughu ninya. 'En l'k'udit naodezulh (8) whuts'un déchadusnik 'ink'ez sulhti zeh 'int'ah. ³⁴ 'Et Peter 'uyúlhni, "Aeneas Sizi Gri soo na'unyinla! Dinadindaih 'ink'ez nyukw'usti k'ut soo ná'hoonleh," yúlhni. 'Ahoah Aeneas didinya. ³⁵ Ndunnah keyah Lydda 'ink'ez Sharon huwhutni whut'en ndun dune Aeneas hiya'en hoh ts'iyawh neMoodihti hits'u nalhíya. ³⁶ 'Et keyah Joppa huwhútni 'ilhunuh ts'eke 'et whut'en, Tabitha hiyulhni. 'En buba 'álha' hoont'ah. Boozu Greek k'una'a "Dorcas" hiyúlhni, 'et "Yests'e" ni hoh 'utni. 'En 'ahoolhyez hoonzoo túne'ut'en, 'ink'ez tel'annah chah la'ut'en. ³⁷ 'Et hoh da nduda suli 'ink'ez dazsai. Buyust'e toonáhíyulhti 'ink'ez huwhut'i 'et dúlha 'et nehínílti. ³⁸ Joppa, Lydda whuts'un 'aw chanilhdza, 'et Sizi yugha hoodul'eh, Peter, Lydda usda whulh 'úhudants'o nanah dune, 'en whuz wheobahalh'a, "Soo 'a nets'ínyalh!" hiyúlhni. ³⁹ 'Et 'ahoh Peter lhadúja 'ink'ez hubulh whenát'az. Whuz ninya hoh ndoh dune whut'i dulhyah ts'ih, whuz whenya. Ts'iyawh tsandelh higha wézel, hutso hoh ndun ts'eke, Dorcas hiyúlhni, khuna da dzoozt'an 'ink'ez dzoot chah huba 'uyalh'en, 'i hinalhts'et níhíyule. ⁴⁰ 'Et Peter ts'iyannah 'az whenaóobal'h'a, dugwútsi be nenínya 'ink'ez tenadudli. Nyoo buyust'e yuts'un nalhú'a 'ink'ez 'utni, "Tabitha, didinyih!" 'Et yutá'en ibulh Peter yutelh'en hoh 'ahoh nduk ninat'l'adenda. ⁴¹ 'Et Peter yula ilhchoot 'ink'ez didílyha. 'Et dune Yak'usda bube'ildzun, 'en tsandelh tubulh, hubuka' dani 'ink'ez khuna hoh hubut'l'anaiyalhti. ⁴² 'Et Joppa dulhcho hoh njan whulh 'úhudants'o hoh lhanah neMoodihti huba 'álha' yint'ah suli. ⁴³ 'Et Peter, Simon 'uzuz 'úlh'en, 'ast'l'iyaz yuzih inda.

10

Peter, ndun Cornelius, 'en khunek unzoo, 'i be yulh yáilhtuk

¹ Caesarea 'et 'ilhunuh dune Cornelius hiyúlhni 'et usda. Roman nehughan, 'en, "Italy hudedoh" hubuhútni, 'en ndun bumoodih unli. ² 'En teni' nilhdzun dune unli, 'ink'ez Yak'usda yénuljut 'int'ah. Didut 'ink'ez bukoo hudelhts'i ts'iyawh Yak'usda zeh hidelhti. Lizwif tehel'en, 'en chah tube hubula 'ut'en 'ink'ez 'ahoolhyez Yak'usda ts'un tenadudli. ³ Dzetniz hukw'elh'az, 3:00 bat'en, 'et 'uja hoonlyaz bunalh hawhelts'ut. 'Et soo ts'ah'un Yak'usda hubulizas 'ilhunuh 'en danínya 'ink'ez, "Dahooja Cornelius," yúlhni. ⁴ Tube hubugha ha'nejoot hoh lizas yunilh'en 'ink'ez, "Dáhooja?" yúlhni. 'Et lizas utni, "Yak'usda ntenadudli yudánts'o, 'ink'ez nye 'ugha té'nezih chah unzoo, 'et huwa Yak'usda nyunalnik. ⁵ 'Aw 'et Joppa ts'ih 'ilhunuh dune Simon, 'en Peter chah hiyúlhni, 'en bukunáwhulh'a. ⁶ Ndun dune, 'uzuz 'úlh'en, 'en chah Simon hiyúlhni, yatoo taba whut'i, 'en zih usda, 'ink'ez daténilh, 'et hubugha nyuduténilh." ⁷ 'Et hukw'elh'az ndun lizas yulh yáilhtuk whenádede

hoh Cornelius nanah bukoo 'uhut'en, dich'oh budune, 'ink'ez 'ilhunuh nehughan, 'en soo Yak'usda zeh délti, 'en chah dich'oh yunat ne'út'en taháyalti. ⁸ Daja hubugha ts'iyawh hubudáni 'ink'ez Joppa ts'un whébalh'a.

Peter koo whukw'ut hoh benghuni whults'ut

⁹ 'Et 'om bun dzin ndunnah tanah keyah Joppa 'aw 'et wheghah hedulh, 'et wheghah whezulh hoh Peter 'en chah Joppa usda hoh, dzetniz bat'en 'et nduk bun k'ut* whuz hukw'einya tenadutedli 'et wheni. ¹⁰ 'Et Peter buye'élts'ul, 'ute'ulh hukwa' ninzun. Ts'uyi lhaíduleh whutah, 'et hoonliyaz bunalh hawhelts'ut. ¹¹ Nduk yaz ts'ih lhch'az 'úhooja 'ink'ez nalhti cho ndult'ah, 'i dit lhch'az bunedest'uk, 'i t'az ndus de haímbal, 'ink'ez yun ninimbal. ¹² 'I bet 'et khunai lhelhyoo dedowh, 'i tl'ughus, 'ink'ez yinkak dut'ai chah, 'i ts'iyawh yedelhts'i. ¹³ 'Ink'ez, "Peter didinyih, 'inghan, 'ink'ez 'in'all," whutni. ¹⁴ 'Et whunts'ih Peter ndutni, "SMoodihti ndi khunai, 'Me' ts'útni buch'a 'unenjoot ho' int'ah, 'et huwa 'aw wus'alh ghaít'ah!" ¹⁵ 'Et doo chah zeh 'uwútni, "Ndai Yak'usda in'all nyulhni t'eh, 'i 'aw, 'Me' int'ah, 'dini ilah!" ¹⁶ Soo tat whucho 'et njan bunalh hawhelts'ut 'ink'ez ndi naímbal inle, 'i nduk whenalts'ut. ¹⁷ 'Et Peter njan bunalh hawhelts'ut, 'et dawhút'en ho' whut'en, 'et huwu nuní nuzut hoh 'ink'ez ndunnah Cornelius whuz whebalh'a nts'e Simon bukoo 'et t'ehonanzin 'ink'ez hukwuti 'et nahudelhúya. ¹⁸ Hahuhuyih 'ink'ez 'uhoodulhukut, "Aw ih Simon, 'en Peter chah hiyúlhni, njan chaidah?" ¹⁹ 'Et Peter 'awhuz njan ho'en beni taóodoalts'it hukwa' 'ut'en hoh Ndoni 'uyúlhni, "Oozélt's'ai, njan tanah dune, 'en nkahites'en. ²⁰ Dinadindaih 'ink'ez nyuk naíndal. 'Aw mba dahot'e gunih hubulh 'ítanilh, si whuz whebalh'a ho' hut'en," yúlhni. ²¹ 'Et Peter nanája 'ink'ez ndunnah dune ndo búlhni, "Si 'ust'ah, dune bukaiatéh'en. Di ka ndez tehdel?" ²² 'Et 'uhiyúlhni, "Nehughan moodih, Cornelius, 'en netéhl'a ho' ts'ut'en. Dune unzoo 'ink'ez 'ahoolhyez Yak'usda ts'un ténadudli, Lizwif chah ts'iyawh hidélti. Yak'usda bulizas 'ilhunuh 'en bukoo ts'ih nka' doni yulhni, 'ink'ez dája dutenilh 'et nyootuzélt's'ihl wheni." ²³ 'Et Peter koo daóobuninla 'ink'ez 'et hantez. 'Et 'om bun dzin lhadúja 'ink'ez hubúl'nátes'az hoh bulunah huba 'alha' hoont'ah Joppa whut'en, 'en chah hubulh lghu nahudidel. ²⁴ 'Et 'om bun dzin Caesarea ts'ih ninya. 'Et Cornelius yubalh'i, bukoo hudelhts'i 'ink'ez bulh dunekah chah, "Anih," hubudáni. ²⁵ Soo Peter bukoo ts'ih tezya hoh Cornelius yududezya 'ink'ez yubut nacháneti. ²⁶ 'Et Peter, "Dinadindaih. 'Ants'ih hoh dune 'ust'ah," yúlhni. ²⁷ 'Et bukoo ts'ih hute'us whuts'un Peter, 'en Cornelius bulh yálhtuk zeh 'utni, 'ink'ez bukoo ts'ih huni'az hoh lhanah dune 'ilhúhowezdel 'et hubunilh'en. ²⁸ 'Et ndo búlhni, "Nuhwhenich'oh soo cho t'éoonáhzun, Lizwif whuch'a' hunenyoot 'udun yun k'ut whut'en bukoo dats'óoya 'ink'ez hubulh né'ts'oot'en huba cha'hóot'ah. 'Et whunts'ih, Yak'usda whusúnelltan 'aw 'uyoon dune 'Me' suba hinli doosni ghaít'ah. ²⁹ 'Et huwa skunaóozulh'a hoh 'aw 'uts'un cha'dusnil hoh nuhts'un whúsaya. 'Et nuhóodulhukut di ka 'ahja skunaóozulh'a?" ³⁰ 'Et Cornelius utni, "Et ndoh wheghah whezulh bat'en tat dzin inle hoh dzetniz hukw'elh'az 3:00 bat'en 'uk'e' hunint'o hoh sukoo sahá'delhuva, 'ink'ez tenadesdli hoh khunyaz dune naih soo lheyul, 'i be usda, ³¹ subut suyin 'ink'ez 'usúlhni, 'Cornelius, Yak'usda ntenadudli yudánts'o, 'ink'ez whunalnih nts'ena'a dune ba teni'nilhzun. ³² 'Aw 'et Joppa ts'ih 'ilhunuh dune Simon, 'en Peter chah hiyúlhni, 'en bukunáhoolh'a. Ndun dune 'uzuz'ulh'en, 'en chah Simon hiyúlhni, yatoo taba whut'i, 'en zih usda, 'ink'ez whusaínya t'eh nyulh yátelhtuk,' 'et njan lizas ndusúlhni. ³³ 'Et huwa 'ahoh nka whenahóh'a, 'ink'ez soo 'inja nets'un whúsainya. 'Ink'ez njan 'aw 'et ts'iyawh Yak'usda bulh 'úts'int'ah mba ts'ilh'i dája neMoodihti huwá nyulh'a bugha nelh yátalhtuk."

Peter khunek unzoo, 'i be hubulh yálhtuk

³⁴ 'Aw 'et Peter yawhénihltuk hoh ndutni, "Soo ts'ah'un t'éooneszín 'et 'álha' hoont'ah 'ilho lgha Yak'usda nenilh'en. 'Aw 'ilhunuh dune 'o nus yuts'un dutnik hoolah. ³⁵ Ndunnah ndi yun k'ut Yak'usda zeh delhti 'ink'ez tink'us 'utet'ilh whénuljut, 'en Yak'usda buka' dani nts'oh 'udun yun k'ut whut'en 'et whunts'ih. ³⁶ Israel hubuts'uh huhanzut hubulh 'údahts'o dahúja hoh khunek unzoo, 'i be hubudzi dinghel, 'en ts'iyannah dune buMoodihti unli ho' int'ah 'et huwa. ³⁷ 'Ink'ez chah Israel hubuts'uh huhanzut bukeyah ndulhcho hoh nts'oh teh hooncha tune' whust'en, ndet John too be' ts'ul'ih huwu yailhtuk hoh Galilee 'et whuts'un ho' whe'dit'en, ts'iyawh t'éoonáhzun. ³⁸ T'enahzun Sizi, Nazareth whut'en, 'en daja hoh Yak'usda, Ndoni 'ink'ez be ts'íltus, 'i chah ye yudá'ai, 'et huwa ndulhcho nuya hoonzoo tune'út'en 'ink'ez ndunnah netsudule k'une' bul'en 'en chah soo na'bulh'en, Yak'usda, Sizi yulh 'int'ah 'et huwa. ³⁹ Lizwif bukeyah nts'oh tuné'ust'en t'ets'oninzun, nenalh 'úwhet'en 'ink'ez Jerusalem 'et lhdulalghus ye hídunilht'o hoh hízelhghi. ⁴⁰ 'Et whunts'ih, whulh tat dzin 'et Yak'usda nahiyílhna 'ink'ez nenalhts'et neya yulhtsi, ⁴¹ dune ts'iyawh ilah, wheni zeh ndunnah

* **10:9** 'Et hubukeyah hubukoo whukw'ut 'et lhts'e whudez'a huhoolh'i.

nenalh 'úwhet'en Yak'usda 'utahanenla inle. Dinadija hukw'elh'az bulh 'uts'a'al 'ink'ez bulh 'uts'étnai inle. ⁴² 'Et huwa ndi khunek unzoo, 'i dune be hubulh yáts'oolhtuk, huwa nélh'a 'ink'ez 'et 'uzdooni Yak'usda, Sizi 'en 'utahayálhti dune yaidla 'ink'ez khuna chah huba nahooyeh ka. ⁴³ Yak'usda be nus whúnih'en, 'en ts'iyawh highu yailhtuk ndunnah huba 'alha' hoont'ah Sizi Gri 'en bugha bulubeshi huba 'ún yutelhdulh."

'Udun yun k'ut whut'en, 'en Ndoni hubuyidelts'ut

⁴⁴ 'Et Peter 'awhuz yalhtuk hoh ndunnah yoozélhts'ai Ndoni hubuyidelts'ut. ⁴⁵ Ndunnah Lizwif huba 'alha' hoont'ah, Peter bulh whusahandel, huba hooncha 'uhooja hoh 'udun yun k'ut whut'en whunts'ih Ndoni buts'ó t'aidelts'ut 'ink'ez buyidelts'ut. ⁴⁶ 'Ink'ez 'en khunek whuhsud da t'ehinízun, 'i be yawwehúnilhtuk Yak'usda hidélhti hoh hubudíts'o. 'Ink'ez 'et Peter huboodulhtuk, ⁴⁷ "Ndunnah, 'en chah wheni nek'una'a Ndoni buyidelts'ut. Ndunnah too be' telnih t'eh, ndan dah dutenih?" ⁴⁸ 'Et huwa khunek hubugha óoni'ai neMoodihti boozu bugha too be' hutelnih. 'Et hukw'elh'az Cornelius, Peter yughu tedudlih 'astli'iyaz yuzih wuda ka.

11

Jerusalem huba 'alha' hoont'ah Peter hubulh yátelhtuk

¹ 'Et whel'a, 'en 'ink'ez ndunnah huba 'alha' hoont'ah, 'en Judea ndulhcho hoh 'udun yun k'ut whut'en, 'en chah Yak'usda bughunek hiyílhtchoot 'ink'ez hits'un nalhúya 'et whulh úhudants'o. ² 'Et Peter, Jerusalem ts'ih ninya, bulunah Lizwif huba 'alha' hoont'ah Peter hiyenah 'uhutni, ³ "Udun yun k'ut whut'en, Lizwif chailah, 'en hubuzih hoont'i 'ink'ez hubula 'an'al chah 'inja inle," hiyúlhni. ⁴ 'Et Peter ndulhcho hoh 'udechoo whuts'un bulh dahooja hubugha ts'iyawh hubulh náwhelnuk. ⁵ "Keyah Joppa 'et tenadusdli hoh hoonli'iyaz sugha ha whelts'ut, nalhti cho dit bunedest'uk, 'i ndus de haimbal 'ink'ez suzih nenimbal. ⁶ Soo cho nulh'en hoh khunai lhelhyoo dédowh hoh t'l'ughus, 'ink'ez yinkak dut'ai chah, 'i yedelhts'i nulh'en. ⁷ 'Ink'ez khunyaz khunek duzíts'ai 'i 'utni, 'Peter didinyih, 'inghan, 'ink'ez 'in'alh,' whutni. ⁸ 'Et whunts'ih, 'SMoodihti 'awundooh, ndi khunai 'Me' ts'út'ni, buch'a 'unenjoot ho' hoont'ah, 'et huwa 'aw wus'alh ghaít'ah,' dusni. ⁹ 'Et doo chah zeh ndus de 'úwhutni, 'Ndai Yak'usda in'alh nyulhni, 'i 'aw, 'Me 'int'ah,' dini ilah!' ¹⁰ Soo tat whucho 'et njan bunalh ha whelts'ut 'ink'ez ndi námbal inle, 'i nduk whenalts'ut. ¹¹ 'Et wheghah whezulh whuzeh, tanah dune Caesarea whuts'un suts'ú botel'h'a, 'aw 'et koo sida ts'ih hunindel. ¹² 'Et Ndoni 'usúlhni, "Aw buch'a 'uts'un chá'duzinih hoh hubulh í'us.' 'Ink'ez ndunnah lhk'utánah (6) huba 'alha' hoont'ah, 'en chah Caesarea ts'ih sulh hútezel 'ink'ez ts'iyawh Cornelius bukoo ts'ih dáznindel. ¹³ 'Et nedáni ndun lizas bukoo siyin hoh yunilh'en 'ink'ez 'uyúlhni, 'Joppa ts'ih whuz ndun dune Simon Peter hiyúlhni, 'en bukunáhool'h'a. ¹⁴ 'En ndun whuduténih datéhmilh 'et hoh nyun 'ink'ez nkoo hudelhts'i chah hudutejih.' ¹⁵ 'Aw 'et yawhénihltuk hoh, 'udechoo nuwheni lhe'ts'uja, whuz na'a 'en chah Ndoni hubuyidelts'ut. ¹⁶ 'Et whunalhúnih nts'ena'a neMoodihti 'et ndutni inle, 'John dune too be 'ulh'en, 'en too be, 'en too be' 'un whulh'en inle, 'et whunts'ih Ndoni 'en be too be 'un whutelilh.' ¹⁷ 'Et 'alha' hoont'ah wheni danénla inle Sizi Gri neba 'alha' 'int'ah suli hoh Yak'usda hoonzoo negha óoni'ai, ndunnah 'udun yun k'ut whut'en, 'en chah whuz na'a 'obinla. Ndan usdli ka suba Yak'usda buch'a doosni?" ¹⁸ 'Et ndunnah Jerusalem huba 'alha' hoont'ah hodánts'o hoh Peter hich'a yáhtuk 'ustl'e' 'uhudeja 'ink'ez 'en chah Yak'usda hidelhti. 'Ink'ez njan nduhútni, "Udun yun k'ut whut'en, 'en chah hubulubeshi whuch'a hububeni lht'anahídunezdla, 'ink'ez 'ilhuz hukhutena. 'Et whuz na'a Yak'usda hubugha óoni'ai," hutni.

Antioch whut'en Yak'usda bughunek hidutéts'o

¹⁹ Stephen hizehghhi hukw'elh'az ndunnah Yak'usda k'une' hut'en hube húzula, 'et whula gha ts'ih ts'iyawh lhch'a húzdel. 'Et bulunah nilhza Phonecia ts'ih, Cyprus 'ink'ez Antioch ts'ih chah whehándel. Ndi khunek unzoo, 'i ndunnah Lizwif 'aw 'en zeh be hubulh yahúhtuk. ²⁰ 'Et whunts'ih bulunah huba 'alha' hoont'ah dune noo cho Cyprus hiyúlhni, 'ink'ez Cyrene ts'ih hahándel, 'en Antioch ts'ih whehándel 'ink'ez 'et 'udun yun k'ut whut'en, ndunnah Greek hubughunek k'una'a yahalhtuk, 'en Sizi neMoodihti 'en bugha ndi khunek unzoo hubulh yahúhtuk. ²¹ NeMoodihti hiye últus, 'i bugha íni'ai, 'et hoh lhanah dune neMoodihti bughunek hílhchoot 'ink'ez hits'u nalhúya. ²² 'Et Jerusalem huba 'alha' hoont'ah, 'en whulh 'úhudants'o, 'et Barnabas 'en Antioch ts'ih whehíyalh'a. ²³ 'Et whuz ninya whunilh'en daja hoh Yak'usda ndunnah dune ye unzoo, 'i be hubuts'un unzoo. 'Et hóost'et 'ink'ez huba nus whúnihlt'uk, "Nts'oh dáhoont'ah 'et whunts'ih neMoodihti soo bulh zeh 'ooh'te," hubúlhni. ²⁴ Barnabas 'en soo Ndoni yudínda 'ink'ez tube dune buba 'álha' hoont'ah. 'Ink'ez lhanah dune neMoodihti hits'u nalhúya. ²⁵ 'Et Barnabas keyah Tarsus ts'ih whenya Saul 'en yukúnuta. ²⁶ 'Et nayilhti 'ink'ez Antioch ts'ih nainilhti. 'Et

'ilhuh naodezut hoh nahúlt'ah dune Sizi Gri yugha hoodul'eh hubutah lhanah dune whehubahoodalh'i. 'Ink'ez Antioch 'et Sizi Gri yugha hoodul'eh, 'en 'udechoo Sizi Gri budune hubuhútni. ²⁷'Et hoh da zeh Yak'usda be nus whúnilh'en Jerusalem whehúndindel hoh Antioch ts'ih húnindel. ²⁸'Et hubutah 'ilhunuh Agabus hiyúlhni, 'en didinya 'ink'ez Ndoni bugha hubúlhni, "Aw 'et nilhdukw yun k'ut ndulhcho hoh dai whútele." 'Et Claudius hubudayi cho dega nus dezti unli hoh 'et ndúhooja. ²⁹'Et Sizi Gri yugha hoodul'eh lhgha 'úhudeja hoh, 'ilhunuh hinli hoh hubulh huba 'alha' hoont'ah, Judea hudelhts'i, ndet 'úhint'ah hoh hubula' hutet'ilh hutni. ³⁰'Et nduhúja hoh, Barnabas 'ink'ez Saul bulh ndi sooneya hubutl'ahínudzih hoh hubuhútni, "Ndi sooneya nelh huba 'alha' hoont'ah be hubúla'teht'ilh, dune tsuh whudelhdzuhl hubutl'ayóoh'alh."

12

Hubudayi cho Herod ndunnah huba 'alha' hoont'ah, 'en hube té'zela suli

¹'Et hoh da bat'en hubudayi cho Herod ndunnah huba 'alha' hoont'ah hube' zúla suli. ²'Et James, John bulhutsin, 'en tes cho be húzelghí. ³'Et Herod nt'oonanzin Lizwif huhóont'i hoh honilh'en, 'et Peter 'en chah tsak'ehiya'ai, lhes nachantildoh, 'i ut'alh whehúnahulnih, 'et 'uhooja inle. ⁴'Et Peter hiyúlhchoot hukw'élh'az, tsak'ehiya'ai huwunli dinah nehughan lhk'enáhudedulh, 'en highole ka hubutl'ahiyalhti. Njan Hubutus Lhuseya hukw'elh'az ts'iyannah nalh hiyootéhlzhiz 'et wheni.

Peter tsak'ehiya'ai hoh lizas tinínilhti

⁵'Et Peter tsak'ehiya'ai 'et whunts'ih huba 'alha' hoont'ah soo ndet 'úhint'ah, 'et hiba tenadudli. ⁶'Aw 'et Peter 'en Herod yubut niteyalh whutsuh, 'ulh'ek 'et Peter nanah highunli 'en tes be lhghel hoh hube guz nanesti, 'ink'ez hukwuti 'et chah nanah nehughan huwuhinli. ⁷Khunyaz neMoodihti bulizas bughah be hóodiltsai, bukoo chah whét'en suli. 'Et lizas Peter 'ún be yulnih hoh ts'enainílhzut 'ink'ez, "Soo 'ah didinyih!" yúlhni. 'Et 'ahoh ndi tes t'ool be lhúghel, 'i bula buts'u hayákat. ⁸'Et lizas, "Tsunadil'oooh 'ink'ez ke nadil'oooh chah 'ineh," yúlhni. 'Et Peter ndúja 'et lizas, "Nyunait'suz chah t'unásilchoos, 'ink'ez sunanyalh," yúlhni. ⁹'Et Peter tsak'ehiya'ai hubughu téninya 'ink'ez yuneyalh, 'aw nt'éhonízun dat'en ndun lizas 'alha tulih 'int'ah k'us 'ants'ih hubunalh hawhélt'sut ninzun. ¹⁰'Udechoo huwuhinli zih lhunáhust'az, 'et whulh nat chah. 'Et tes dádentan, 'i cho keyah dati huwa ni'az hoh dich'oh ndi dati huba dá'dutezkez. 'Et tináhant'az 'ink'ez ti hutez'az ibulh lizas hoolah suli. ¹¹'Et Peter beni nawhúsdli 'ink'ez 'uninzun, "Aw 'et nt'oonazin 'alha' hoont'ah, neMoodihti bulizas whusayáhl'a 'ink'ez Herod Lizwif tubulh dzuh nusátelhzut, 'et whuch'a sulhyih." ¹²'Et njan huwu ninínizut hoh Mary bukoo 'et howu ninya, 'en John Mark be'ama. 'Et lhanah dune 'ilhúhowezdel 'ink'ez tenahudedli. ¹³'Et Peter yoo 'ah ts'ih ndati whudulghal hoh ts'ekeyaz 'et 'ut'en, Rhoda 'en hiyúlhni, 'et ndati nininya hoh yudánts'o. ¹⁴'Et 'ahoh Peter 'utni natsiyoodelhúts'it hoh hóont'i k'et, 'aw dacha'dutítíil 'ink'ez 'ants'ih koo danálgai 'ink'ez, "Peter ndati siyin!" húbulhni. ¹⁵"Nyeni hooel hoh 'udini," hiyúlhni. 'Et whunts'ih, "Alha' dusni," ni zeh 'utni hoh, "Awundooh, bulizas 'ut'en," hutni. ¹⁶'Et whutah Peter ndati whudulghal zeh 'utni. 'Udek'elh'az hoh hiba da'dutezatan, tube huba hooncha hitel'h'en hoh. ¹⁷'Et huba núlhni hoh t'éhudoosnih húbulhni 'ink'ez huba hukw'u nuhúlhye daja hoh neMoodihti tsak'ehiya'ai hoh tenánilhti. "James 'ink'ez 'o 'unnah huba 'alha' hoont'ah ts'iyawh hubudóohni," húbulhni. 'Aw 'et 'uts'un hubughu whenája. ¹⁸'Et bundada nehughan huwuhinli Peter hik'énentai hoh whewhunujut whe lhtahúwhunt'ai, "Peter 'en dája," lhahudútni. ¹⁹'Et Herod, "Peter hikunoota," húbulhni. 'Aw nahayóhltel'h ghaít'ah 'et ndunnah yughinle hubuhoodalhkut 'ink'ez, "Huboohooghan," húbulhni. 'Et hukw'elh'az Herod, Judea ts'ih whenya 'et whuts'un Caesarea ts'ih chah 'ét'en.

'Aw 'et Herod datétsah

²⁰'Et ndunnah nat keyah Tyre 'ink'ez Sidon whut'en, 'en Herod tube cho hubulh húnilh'e, 'et lhanah hinli Herod highu nindel. Ndun Blastus 'en hubudayi cho bukoo yuba huwunli, 'en ts'ún nehidelti. 'Et 'ants'ih Herod highu nindel 'ink'ez huba soo' hooleh hits'u húkwa' 'utni, hubudayi cho bukeyah ts'ih whuz de zeh hiya'alh, 'i whuz hakat 'et huwa. ²¹'Et dzin huba hoozi Herod 'et hubudayi cho naih yé naja 'ink'ez kw'uts'uzda buba yint'ah, 'i yuk'et'l'adida. 'Et whuts'un dune hubulh yálhtuk. ²²'Et ndunnah dune 'ahúlzul hoh hahuyih, "Aw dune ilah 'int'ah yalhtuk, Yak'usda unli 'utni!" hiyúlhni. ²³'Et Herod 'aw Yak'usda chadílhti, 'et huwa Yak'usda bulizas khunyaz Herod nduda yulhtsi 'ink'ez 'usgoo yulh haneldo, 'et hukw'e dazsai. ²⁴Yak'usda bughunek ndulcho hoh t'enudzun suli, 'ink'ez lhanah dune huba 'alha' yint'ah suli.

Barnabas 'ink'ez Saul bulh Ndoni 'utáhalti 'ink'ez whebalh'a

²⁵ Barnabas, Saul bulh 'uhuwulh'en lhahódinla hoh, Jerusalem ts'ih hanáhedel, John Mark 'en dulh 'uhíyul'en.

13

¹ 'Et keyah Antioch Sizi bugha 'ilhuhowezdel bulunah Yak'usda be nus whúnih'en 'ink'ez bulunah Yak'usda bughunek hubuhodulh'eh 'en chah 'et hudélhts'i. Nduunnah dune, 'en bulunah 'uhint'ah, Barnabas, 'ink'ez Simeon, 'en dune dulhgus hiyúlhni, Lucius chah, Cyrene whut'en 'int'ah, Manaen, 'en yun whu moodih, Herod yulh nézyi, 'ink'ez Saul chah 'int'ah. ² Soo saha'húdelya 'ink'ez neMoodihti hiba 'út'en whutah, Ndoni ndo búlhni, "Barnabas 'ink'ez Saul bulh suba 'udun nébutalhtel, ndi 'ut'en hubugha ini'ai, 'i 'uhiyoooleh 'et wheni." ³ 'Et doo chah zeh soo saha'húdelya 'ink'ez tenahudedli hoh hubutsi k'ehudalnik 'ink'ez whébahalh'a.

Barnabas, Saul 'ink'ez hubulh 'út'en chah, 'en Cyprus noo k'éhindel

⁴ 'Et Ndoni hubutéhl'a hoh Barnabas 'ink'ez Saul bulh Seleucia ts'ih hunindel, 'et whuts'un noo Cyprus hiyúlhni whuz huninki. ⁵ 'Et keyah Salamis ts'ih hunindel hoh Lizwif hubuluglez 'et Yak'usda bughunek be yáhalhtuk. John Mark 'en chah bula 'ut'en 'et wheni dulh 'uhíyul'en. ⁶ 'Et ndi noo ndulyez hoh hiye oosudel 'ink'ez Paphos ts'ih hunindel. 'Et ndun duyun, Joshua buye' hiyúlhni, Lizwif unli, 'en Yak'usda be nus whunílh'en la'dudíl'i, 'en chah 'et 'usda. ⁷ 'Ink'ez njan noo k'ut whumoodih, Sergius Paulus hiyúlhni, 'en dune whunih 'int'ah, 'en ndun duyun yulh dune unli. 'En Barnabas, Saul bulh, "Anih," hubudáni Yak'usda bughunek dutéts'o hukwa' ninzun 'et wheni. ⁸ 'Et whunts'ih ndun duyun Greek bughunek k'una'a Elymas chah hiyúlhni, 'en Yak'usda bughunek yuch'a yunílh't'uk 'et hukwa' yulh'en. ⁹ 'Et Saul, 'en Paul chah hiyúlhni, Ndoni k'une' yul'en hoh soo cho yunen ts'ih yunílh'en ¹⁰ 'ink'ez 'uyúlhni, "Netsudule buye", ndai unzoo, 'i ts'iyawh buch'a déntni. Soo hoontsi' hoh dune nani'ah ts'iyawh hoont'i, Yak'usda bughunek 'i chah whuts'it khunek naoolhtsilh hukwa 'ílh'en. ¹¹ Yak'usda nyulh húnílh'e 'et hoh 'aw chaozoa'en tanleh 'astlíyaz wheni!" 'Et 'ahoh ndun Elymas, dulhgus, 'i buna k'eínde, 'ink'ez chawh'es'en suli. 'Ink'ez dune yula t'az nífelhyalh hukwa hahuyih. ¹² 'Et noo k'ut whumoodih njan dahooja ho'en hoh, Yak'usda buba 'alha' yint'ah suli. Ndai neMoodihti bugha whehiyoodalh'i 'i tube huba hooncha.

Barnabas, Paul bulh Antioch Pisidia buyun k'ut whuz'ai whuz hunindel

¹³ 'Et Paul 'ink'ez yulh nudelth tubulh Paphos 'et nus nihuzki hoh Perga 'et Pamphylia whuz'ai whuz huninki. 'Et John Mark buk'enaja 'ink'ez Jerusalem ts'un whenája. ¹⁴ 'Et Perga whehúndel hoh 'o 'un Antioch, Pisidia whuz'ai, whuz hunindel. 'Et Lizwif nahulyis dzin hubuluglez dahúndel 'ink'ez nátl'ahudelts'i. ¹⁵ Moses bughunek 'uk'une'úsduzug, 'i 'ink'ez Yak'usda be nus whúnih'en bughunek chah hik'eyailhtuk hukw'elh'az, Lizwif luglez whumoodih Paul, Barnabas chah, 'en hubuhútni, "Nelhtusinkah, khunek hiye úlhts, 'i aht'i t'eh, ndunnah dune hubulh yátelhtuk hukwa' uzninzun." ¹⁶ 'Et Paul didinya 'ink'ez buts'un didílnik hoh hubulh yáwhenílh'tuk 'ink'ez ndó bulhni, "Sulh dune 'ink'ez 'udun yun k'ut whut'en chah, k'us ndan Yak'usda delhti, 'en soo zelhts'ai. ¹⁷ Israel hubuts'uh huhanzut buYak'usda 'en netsuh whudelhdzull 'utaháooabanla 'ink'ez Egypt whut'en bunalh híncha hubulhtsi. 'Et hukw'elh'az Yak'usda whelhtus 'et hoh ndunnah Egypt whut'en bukeyah whuts'ahanaóobanla. ¹⁸ 'Ink'ez dune chahóot'ih ts'ih 'et dit lanezi naodezull whutah, 'et hích'a ne'ut'en, 'et whunts'ih k'úne' bul'en hoh inle. ¹⁹ 'Et skwunlai 'o 'at nat dédowh (7), 'en Canaan whuyun k'ut whuzdzla, 'et hudelhts'i, 'en Yak'usda hoolah hubulhtsi, 'ink'ez 'et ndunnah budune, 'et bukeyah whulhtsi. ²⁰ 'Et 450 naodezut whutah 'et dune hanle. 'Et hukw'elh'az Yak'usda be nus whunílh'en Samuel whusatéyaly whuts'un lhanah hoh bumoodih inle. ²¹ 'Et hubudayi cho ka' hutni hoh, Saul, Kish buye', 'en Yak'usda bugha inílh'ti. 'En Benjamin yek'edínzut 'ílhunuh 'int'ah, 'ink'ez dit lanezi naodezull 'et hubudayi cho inle. ²² 'Et Saul Yak'usda whusanáyalhti hukw'elh'az hoh 'et David 'en hubudayi cho yulhtsi 'ink'ez Yak'usda 'en yughi yalhtuk hoh ndutni, 'David, Jesse buye', 'en sudzi k'ah ts'ih dune unli. Ts'iyaintsi hoh suk'úne' tet'en ho' 'int'ah.' ²³ Sizi, David yuts'uh háinzut, 'en Israel hubuts'uh huhanzut hubutelhyis wheni Yak'usda hubuts'ítelh'a hubuts'úyoozi inle 'et huwa. ²⁴ 'Et Sizi whe'dutet'ílh whutsuh 'et John dune too be 'ulh'en Israel hubuts'uh huhanzut hubulh yálhtuk, lubeshi whuch'a hubeni náhondunoolelh 'ink'ez too be' hoolneh, hubúlhni. ²⁵ 'Aw 'et John dune too be 'ulh'en dude 'ut'en lhái whutele hoh 'et hubúlhni, 'Ndan usdli nahzun? 'Aw ndun buba ílh'i, 'en ílah 'ust'ah, 'et whunts'íh whunulh'en, suntéyaly ho' 'int'ah. Buke hana'tesdlelh 'et wheni whunts'ih 'aw huba soo cha'lhudzooh," hubúlhni. ²⁶ 'Et Paul 'o 'un ndo búlhni, "Sulhtusinkah, Abraham yekédinzut, 'ink'ez 'udun yun k'ut whut'en, ndunnah Yak'usda ts'un tenadudli, nuhwheni ts'iyawh, wheni chah, ndi khunek 'i netelhyis wheni nets'ó tl'adelts'ut." ²⁷ Jerusalem 'et whut'i 'ink'ez k'une'nuwhuhul'en chah

'aw t'ehinízun neulhyis 'int'ah. Lizwif nahulyis dzin totsuk ndi Yak'usda be nus whunilh'en 'uk'une'úsduguz buk'eyatuk, 'et whunts'ih 'aw hubeni tachaooodulhts'it. Sizi datétsah ts'ih be' highenya, 'et huwa Yak'usda be nus whunilh'en bughunek 'alha' 'int'ah hiyulhtsi. ²⁸ 'Et 'aw hukwa hízoolhghel'h hoolah, 'et whunts'ih Pilate 'en highu tédudli hízoolhghel'h ka. ²⁹ 'Et ndi bugha 'uk'une'úsduguz, 'i dája ni hoh tune'hiyul'h'en hoh lhdulalhgs k'ut nihinilhti, 'ink'ez wheyehiyalhti. ³⁰ 'Et whunts'ih Yak'usda yaidla tah nahighílhna. ³¹ 'Et Galilee 'ink'ez Jerusalem whuts'un yúl'h lhusudel, 'en hukw'elh'az lhat dzin whuts'un hiya'en. 'En Israel hubuts'uh huhanzut whébonelhtun hinli. ³²⁻³³ 'Et wheni njan whusats'ándel khunek unzoo, 'i buk'unats'otelnuk. 'I Yak'usda netsuh whudelhdzulh, 'en buts'un datenilh ni, k'an wheni, buts'uh hats'ánde nenalh 'et 'en Sizi nahighílhna. 'Ink'ez ndi bulh nankoh Shun 'uk'une'úsduguz, 'i chah ndutni,

'Nyun Si suYe' 'unint'ah,
k'an dzin, nye'aBá síli,' ni.

³⁴ 'Et Sizi nahighílhna 'ink'ez 'aw buyust'e telhjut ts'ih natoools'tit ghaít'ah. 'Et hubugha Yak'usda njan ndutni,

'Ndai bugha 'ét'en unzoo, 'i David buts'un yóozizi inle, 'i k'an nuhgha tés'alh.'

³⁵ 'Et 'udun 'uk'une'úsduguz, 'i chah ndutni,

'Yak'usda 'aw dulh 'int'ah dezti buyust'e wulhjut ghaít'ah yulhtsi.'

³⁶ 'Et David soo hoh Yak'usda k'úne' 'ust'en khuna whutah. 'Et dazsai hoh ndunnah butsuh whudelhdzulh 'uhudinla, 'et whuyihiyalhti 'ink'ez ílhjut. ³⁷ 'Et whunts'ih ndun Yak'usda nahighílhna, 'en 'aw buyust'e chaílhjut." ³⁸⁻³⁹ 'Et Paul 'o 'un ndutni, "Sul-hutsinkah nuhwheni, ts'iyawh, 'alha' hoont'ah ndun Sizi dája 'et huwa nuhwhulubeshi nawhuná'dutedoh. 'Et t'ewhunóhzin ndai Moses ye náhezya, 'i bugha 'aw ts'ah'un dune tehle ghaít'ah inle. 'Et whunts'ih k'us ndan Sizi Gri huba 'alha' yint'ah, 'en hubulubeshi ts'iyawh hoolah huba whulhtsi hoh ts'ah'un dune tele. ⁴⁰ Huwahli ndet Yak'usda be nus whunilh'en huwu yahalhtuk, 'et nohwhulh 'uhóneh gunih! ⁴¹ 'Et ndutni, 'Ughuhedloh ndet huwú ni untehzut,

'ink'ez yatéhdlah.

Ndi yun k'ut delhúts'i whutah,

'i lhk'uz teh whunwhunelhtan,

'et whunts'ih 'aw nuhwhuba 'alha hot'e ghaít'ah tele."

⁴² 'Et Paul, Barnabas bulh Lizwif luglez huwu nahutest'az hoh 'udun yun k'ut whut'en, "Nats'ulyis dzin t'eh nets'u nátooh'tas, 'ink'ez doo chah zeh ndi khunek bugha yahltuk, 'i bugha nelh yaóolhtuk," hubuhútni. ⁴³ 'Et lhtahanahedel hukw'elh'az Paul, Barnabas bulh nahutest'az hoh Lizwif 'ink'ez 'udun yun k'ut whut'en, ndan Lizwif ts'ih nalhíya hiyuntezdel. 'Et Paul, Barnabas bulh, hubulh yahúlhuk, "Yak'usda nuhts'un yé unzoo, 'i zeh bugha yinkak doolhúts'i," hubuhútni. 'Et hoh budzi ulhtus hubuhulhtsi. ⁴⁴ 'Et 'o 'at nats'ulyis dzin 'ankw'us ts'iyawh keyah hudelhúts'i, 'en Yak'usda bughunek hiyootuzéhlts'ilh wheni 'ilhuhowezdel. ⁴⁵ 'Et Lizwif 'ilhuhowezdel hubunilh'en, 'oonih zeh ye dezbun sulí hoh Paul hiye dúdulh 'ink'ez híba whuts'it. Dája ni, 'et chah whuch'a yáhalhtuk. ⁴⁶ 'Et whunts'ih Paul Barnabas bulh 'o nus hoolhtus hoh yahulhtuk, "Ndi Yak'usda bughunek 'i nuhwheni choo be nohwhulh yaóolhtuk huba' hoont'ah. 'Et whunts'ih bukacha'nuzáhzun t'eh, 'ink'ez 'ilhuz khutehna huba soo cha'lhudzooch na'dunáhdzun t'eh, 'ants'ih nuhwhuba 'uhoont'ah náhzun, 'et whute! 'Aw 'et 'udun yun k'ut whut'en, 'en buts'un tadút'us! ⁴⁷ 'Et ndi khunek 'i neMoodihti ye néts'u nahezya 'i 'int'ah, 'et njan ndutni, 'Nuhwheni ndunnah 'udun yun k'ut whut'en be whét'en, 'i huba tehle.

'Et whuz na'a yun k'ut ndulhcho hoh chah nuhgha dune hudutejih," ni, Paul.

⁴⁸ 'Et 'udun yun k'ut whut'en 'uhudánts'o hoh, huhoont'i hoh neMoodihti bughunek híba whudélhti 'ink'ez ndunnah 'ilhuz khutena huba 'utahálya huba 'alha' hoont'ah sulí.

⁴⁹ Ndulhcho hoh 'et keyah neMoodihti bughunek nudúts'ut sulí. ⁵⁰ 'Et ndunnah dune híncha, 'ink'ez ndunnah ts'ekoo híncha soode'a 'uhint'ah, 'en, Yak'usda ts'un tenahududli hinli, bulunah Lizwif bughe' hoolnih 'uts'un húbonilht'uk hoh Paul, Barnabas bulh hube húzula sulí, 'ink'ez dukeyah k'unabontezyoot. ⁵¹ 'Et huwa 'et keyah whulez ch'a hubukegwun nahiyanghat 'ink'ez keyah Iconium ts'ih huni'az. ⁵² 'Et Sizi yugha hoodul'eh Antioch hudelhts'i Ndoni be hilhtus sulí 'ink'ez tube cho honélnhik.

14

Iconium whut'en khunek unzoo, 'i hidánts'o

¹ 'Et Iconium ts'ih huni'az hoh 'et chah nduhóoja. Paul, Barnabas bulh Lizwif luglez ts'ih huni'az hoh degha nus soo hubulh yáhalhtuk, 'et huwa tube lhanah Lizwif 'ink'ez 'udun yun k'ut whut'en chah Sizi huba 'alha' 'int'ah huzdli. ² 'Et whunts'ih ndunnah Lizwif be 'alha' hoont'ah chahiyílhchulh, 'en ndunnah 'udun yun k'ut whut'en hubeni 'uts'un hubunilht'uk

hoh ndunnah huba 'alha' hoont'ah buch'a nahulhúya. ³ 'Et whunts'ih ndunnah whel'a 'en sa 'et hanke. 'Aw chahuniljut hoh neMoodihti bugha hubulh yahúltuk daja hoh Yak'usda ndunnah dune ye únzoo, 'i be hubuts'un únzoo howu yahalhtuk. 'Et Yak'usda njan hooncha 'ink'ez huwa 'ét'en tuné'hut'en hubulhtsi. 'Et huwa bughunek 'alha' 'int'ah t'ehonínzun suli. ⁴ 'Et keyah 'ilhohowezdel bulunah, 'en Lizwif ts'un nihudendel 'ink'ez bulunah chah whel'a 'en ts'un nihudendel. ⁵ 'Et 'udun yun k'ut whut'en, Lizwif chah, 'ink'ez k'une nuwhuhul'en tubulh, whel'a 'en tenabe' whebonilh'en 'ink'ez tse be hubotuzelghelh hukwa' huninzun. ⁶ 'Et whel'a 'en whulh 'úhudants'o hoh, keyah Lystra 'ink'ez Derbe, Lycaonia hoh whuzdla, whuz buch'a whetsihalhdel, 'et whunat chah. ⁷ Whuz khunek unzoo, 'i be hubulh yahúltuk Lystra 'ink'ez Derbe whut'en whel'a 'en khunek unzoo, 'i be hubulh yahúltuk.

Lystra 'ink'ez Derbe whut'en khunek unzoo, 'i hidants'o

⁸ Lystra 'et 'ilhunuh dune buke déchadusnik 'et whut'i, 'en whuzdli whuts'un 'aw nuchasyah. ⁹ 'Et usda 'ink'ez Paul yalhtuk yoozélhts'ai. 'Et Paul yunilh'en, t'éoonínzun ndun dune buba 'alha' hoont'ah 'et hoh soo ná'tetnilh nínzun, 'et soo cho yunen ts'ih yunilh'en hoh ¹⁰ soo 'ultus 'uyúlhni, "Didinyih 'ink'ez ts'ah'un na'a sinyin!" 'Et ndunnah dune didillhah 'ink'ez 'aw 'et nádiyina. ¹¹ 'Et ndunnah 'ilhuhowezdel Paul daja hinilh'en hoh soo 'ultus hubughunek, Lycaonia k'una'a, 'uhutni, "Neyak'usda, 'en chah yinkak dune k'una'a 'uhint'ah huzdli 'ink'ez ndus de nets'un hahá'az." ¹² Barnabas 'en hubuyak'usda Zeus be náhiyoozi 'ink'ez Paul chah 'uyoon hubuyak'usda Hermes hiyúlhni, 'en be náhiyoozi, 'en yalhtuk 'int'ah 'et huwa. ¹³ Hubuyak'usda Zeus hiyúlhni 'en bunáwhulnuk, soo keyah yoo 'az ts'ih 'et luglez huwhulh'ai, 'en musdus dune 'ink'ez 'indak 'i keyah dati 'et nihíninla. Ndunnah 'ilhuhowezdel whel'a 'en hubuts'i hidutéllh'un 'et wheni. ¹⁴ 'Et Barnabas, Paul bulh 'aw 'et ndunnah dune dahútenilh whulh 'úhudants'o hoh, huba dzuh k'et dunaih k'uhídutelhúch'ul* 'ink'ez 'ilhuhowezdel nus buniz 'et nihúlgai 'ink'ez soo 'ultus 'uhutni, ¹⁵ "Di ka 'et ndaht'en? Nuwheni chah nuhk'una'a dune ts'inli, 'aw Yak'usda chats'ílah ho' ts'int'ah. Njan khunek unzoo, 'i nuhghá uzte'alh 'et wheni whusaidút'az. Ndi be natsi' unli, 'i nuhyak'usda buch'a naóolhuyeh 'ink'ez Yak'usda khuna 'en buts'un naóolhuyeh. 'En 'int'ah yaz, ndi yun k'ut, yatoo chah, 'ink'ez ndai buk'ut hoonli, 'i ts'iyawh 'uyíla ho' int'ah. ¹⁶ 'Et whuts'uh da k'úne' hut'en, 'et whunts'ih húbuts'u hachawhus'ak. ¹⁷ 'Et whunts'ih 'ahoolhyez dunábunultun hoh ndus de 'ut'en unzoo, 'i 'uyulh'en, 'i be ndi chan nalhtih, 'i 'ink'ez hanéyeh 'i chah soo 'et 'ut'en yilh'i. 'Et whuz na'a ts'uyi, 'i chah nuhghat'aih hoh nuhdzi chah hoont'iyilh'i." ¹⁸ Ndunnah 'ilhuhowezdel whel'a 'en buts'un hidut'éllh'un, 'et whuch'a 'ankw'us hubuhotun ghaít'ah, 'et whunts'ih Paul bughunek be k'ah hubuhoontun.

Paul tse be hituzelghulh hukwa' huninzun

¹⁹ 'Et bulunah Lizwif Antioch Pisidia whuz'ai 'ink'ez keyah Iconium chah, 'et keyah Lystra ts'ih hanídel 'ink'ez ndunnah Lystra whut'en 'ilhuhowezdel, 'en ts'iyawh hits'un nint'uk hukwa' hut'en. 'Et huwa Paul tse be hízelghhi 'ink'ez dazsai zeh hininzun. 'Et keyah yoo 'az ts'ih 'et nihininguz. ²⁰ 'Et whunts'ih Sizi Gri yugha hoodul'eh higha wezdel hoh dinadíja 'ink'ez keyah ts'ih whenaja. 'Et 'om bun dzin Barnabas bulh keyah Derbe ts'un whehá'az.

Paul, Barnabas bulh Antioch Syria whuz'ai ts'ih whuz nahutest'az

²¹ 'Et Paul, Barnabas bulh keyah Derbe 'et khunek unzoo, 'i be hubulh yahúltuk hoh lhanah Sizi k'úne' hut'en huzdli. 'Aw 'et Lystra ts'ih whenáhet'az. 'Et Iconium ts'ih chah 'ink'ez Antioch, Pisidia whuz'ai hoh wheghah chah lhuhúz'az. ²² Ndunnah yugha hoodul'eh soo budzi ulhtus hoh ndet huba 'alha' hoont'ah whulh hóoyin hubuhulhtsi, 'ink'ez ndo bahútni, "Lhat hoh dzuh nuts'ude, 'et whunts'i whuz na'a nts'e Yak'usda hubudayi cho unli 'et dáztedulh huba' hoont'ah." ²³ Ndet Sizi Gri bugha 'ilhuhowezdel dune tsuh whudelhdzulh huba 'utaháooobanla. 'Et tenahududli 'ink'ez saha'húdeyala hoh whuz na'a neMoodihti huba 'alha' hoont'ah 'en tl'ábahanla. ²⁴ 'Et Pisidia whuyun k'ut lhuhuz'az hukw'elh'az 'et Pamphylia ts'ih huni'az. ²⁵ 'Et Perga whut'en chah Yak'usda bughunek be hubulh yahúltuk 'ink'ez nyoh Attalia ts'un huni'az, ²⁶ 'ink'ez 'et whuts'un Antioch ts'ih nahúsduki. Ndet keyah Paul Barnabas bulh Yak'usda be 'ut'en k'ah butl'aháhonla inle. 'Aw 'et ndi 'ut'en lhahídínla hoh 'uhoont'ah. ²⁷ 'Et Antioch ts'ih nahunt'az hoh Sizi Gri yugha hoodul'eh, ts'iyawh 'ilhóhubughezdla 'ink'ez nts'oh teh Yak'usda bugha ne'húst'en 'ink'ez 'udun yun k'ut whut'en chah be 'alha' hoont'ah, 'i hiyít'i suli hutni hoh hubulh nahuhulnuk. ²⁸ Sa yugha hoodul'eh hubutah hanke.

15

Paul, Barnabas bulh Jerusalem ts'ih whel'a 'en 'ink'ez dune tsuh whudelhdzulh hubulh 'ilhuhowezdel

* 14:14 'Et whuz na'a Lizwif hube 'ut'en buba dzuh t'eh.

¹ 'Et bulunah dune Judea whehudíndel keyah Antioch ts'ih hunindel 'ink'ez ndunnah huba 'alha' hoont'ah Moses bughunek 'uk'une'úsduguz, 'i bugha buka dune ahli, 'i k'ut nuwhuhúzt'us t'eh, 'aw 'et t'eh zeh dutehjij, whuz na'a wheooboohoodalhi. ² Paul, Barnabas bulh tube cho Moses bughunek 'uk'une'úsduguz, 'i bugha dája hutni 'et hubugha lhenah nihúwhunt'ai, ndunnah Judea ts'ih haháandel tubulh. 'Et huwu lhgha 'úhudeja hoh Paul, Barnabas, 'ink'ez 'uyoon Antioch whut'en tubulh, Jerusalem ts'ih toodelh 'ink'ez whel'a 'en ndunnah dune tsuh whudelhdzulh hubulh huwu yahoolhtuk hubuhútni. ³ 'Aw 'et Sizi Gri bugha 'ilhuhowezdel, ndunnah whel'a 'en whebahalh'a. 'Et Phoenicia 'ink'ez Samaria whutuh lhuhúz'az hoh 'udun yun k'ut whut'en dahúja Yak'usda ts'un náhulhéya hubuhútni hoh tube cho ndunnah Sizi Gri k'úne' hut'en huhóont'i suli. ⁴ 'Et Jerusalem ts'ih huni'az hoh ndunnah Sizi Gri bugha 'ilhuhowezdel tube cho hubanelhnik. Ndunnah whel'a 'en 'ink'ez dune tsuh whudelhdzulh, 'en hubulh náhuwhulnuk Yak'usda bugha nts'oh teh ne'whust'en 'et hubugha. ⁵ 'Et bulunah huba 'alha' hoont'ah, Pharisee hubulh hudedoh, 'en dihúndel 'ink'ez 'uhutni, "Udun yun k'ut whut'en hika dune unli, 'i k'ut hubatet'us 'ink'ez ndi Moses bughunek 'uk'une'úsduguz, 'i k'úne' hóot'en hubadooni huba' hoont'ah." ⁶ 'Et whel'a 'en 'ink'ez dune tsuh whudelhdzulh ts'iyawh 'ilhuhowezdel 'ink'ez njan 'uhutni hukw'u nuhúhulhya. ⁷ Sa hukw'u nuhúhulhya hoh Peter didinya 'ink'ez ndo búlhni, "Sulhutsinkah t'eeonáhzun 'uda hoh Yak'usda nuhtáhasálhti Yak'usda bughunek unzoo, 'i bugha 'udun yun k'ut whut'en hubulh yaóolhtuk ka, khun si sudóots'o 'ink'ez huba 'alha' hot'e ka. ⁸ 'Ink'ez Yak'usda dune dahínt'ah t'eeobunínzun, 'et huwa 'udun yun k'ut whut'en, 'en chah hubuk'entsi' hoh wheni danéna da whuz na'a ndunnah chah Ndoni hubuyudélt'us ho' hoont'ah. ⁹ Wheni Lizwif ts'inli 'ink'ez 'en 'udun yun k'ut whut'en hinli 'et whunts'ih 'aw lhelhts'un na'a lhene'ilhdzun. 'Et hoh ndunnah Sizi Gri huba 'alha' hoont'ah suli 'et huwa bulubeshi huba yuna'dalhe. ¹⁰ Ndi Moses bughunek 'uk'une'úsduguz, 'i wheni 'ink'ez netsuh whudelhdzulh, 'en whunts'ih 'aw ts'ah'un na'a hukw'ú nucha'hit'il inle. 'Et 'ink'ez k'an di ka Yak'usda 'en óolhdzih ho' dahni? Ndunnah yugha hoodul'eh 'uhót'e ghaít'ah teh huba né'dahni. ¹¹ 'Et nts'e na'a 'uwhutét'ilh? Neba 'alha' hoont'ah 'ink'ez nts'e na'a 'uhint'ah, whuz na'a wheni chah Sizi Gri neMoodihti ye únzoo, 'i be uzdoojih ka neghá whunt'ai." ¹² 'Et soo hudelhts'i ts'iyawh t'ehudusnih, Barnabas, Paul bulh nahuwhulnuk whutah 'udun yun k'ut whut'en hubutah nts'e na'a Yak'usda bugha hooncha 'ink'ez huwa 'ét'en tuné'hust'en 'et hubugha. ¹³ 'Et yahulhtuk 'ustl'e' 'uhudeja hoh James didinya 'ink'ez utni, "Sulhutsinkah soo sih soo zéllhts'ai! ¹⁴ Simon k'an nuhwhudáni, nts'e na'a Yak'usda 'udechoo ndunnah 'udun yun k'ut whut'en dinabunelhútan hoh dune hubutah 'utahaóobanla. 'En 'uhuja Yak'usda boozí dezti hiyulhtsi." ¹⁵ 'Et James'o 'un ndutni, "Et Yak'usda be nus whunilh'en hubughunek 'uk'une'úsduguz, 'i ts'iyawh lhgha 'uhudeja hoh ndutni,

¹⁶ 'Et hukw'elh'az whusanátesdalh,' ni neMoodihti,

'Ink'ez David bukoo naoonankat, 'et dinaoodutés'alh 'ink'ez yahónkat chah soo ná'whutesdlilh,

'ink'ez lhanaooduteslilh.*

¹⁷ 'Et whuz na'a ndunnah dune 'et nenínkat chah skahunóota 'ink'ez 'udun yun k'ut whut'en, ndunnah sich'oh suba 'udunéibunila soozí be hiyozi ka, 'en chah skahúnoota, neMoodihti utni.

'En 'int'ah ndi ts'iyawh 'uhóonla.

¹⁸ Yak'usda ndi yun 'itelilh 'et whutsuh whudelhdzulh nus de dawhútet'ilh 'et ts'iyawh t'eeonínzun."

¹⁹ 'Et James 'o 'un ndo búlhni, "Si 'et ndunúszun ndunnah 'udun yun k'ut whut'en, ndunnah Yak'usda ts'un nalhúya, 'aw huba hoontsi' ts'ih 'uhót'e huba cha'hóot'ah. ²⁰ 'Et whunts'ih butsó k'e'ts'ooges 'ink'ez hubuzdóoni, 'Ndaí ts'uyi, 'i hubuyak'usda 'uk'elsti, 'i hits'un hítulhdelh 'et buch'a' nenjoot ho' 'int'ah, khun teh wah'alh gunih. Ts'ekoo k'us dune bulh tinta' 'ooh't'en gunih. Khunai buze 'úsduguz, 'i 'ink'ez 'uskai tananji, 'i wah'alh gunih, 'ink'ez 'uskai chah wahnai gunih.' ²¹ 'Et 'alha' hoont'ah Lizwif luglez 'et nats'ulyis dzin totsuk sa whuts'un Moses bughunek 'uk'une'úsduguz, 'i buk'eyatuk 'ink'ez keyah totsuk chah bughunek hiye búbulh yalhtuk," ni, James.

Whel'a 'en 'ink'ez dune tsuh whudelhdzulh 'udun yun k'ut whut'en hubuts'un k'e'hanguz

²² 'Et ndunnah whel'a 'en chah, dune tsuh whudelhdzulh, 'ink'ez Sizi Gri bugha 'ilhuhowezdel tubulh lhulh lhugha 'úhudeja hoh Paul, Barnabas bulh Antioch ts'ih hubulh te'us 'utahábotelhtel. 'Et Judas, 'en Barsabbas hiyúlhni, 'en Silas bulh 'utahaóobahalhti. 'Et huba 'alha' hoont'ah hubutah ndunnah nanah, 'en soo whunih hinli. ²³ 'En ndi hik'une'úgzuz, 'i hubutl'ahíya'ai, 'i ndutni,

* 15:16 David hik'edinzut doo cha hubudelhti naoobulhtsi, ni ho' utni.

“Wheni whel'a 'en, dune tsuh whudelhdzuhl, 'ink'ez huba 'alha' hoont'ah chah Jerusalem delhúts'i, wheni ts'iyawh nuhts'o k'e'ts'uges, newhulhutsinkah, 'udun yun k'ut whuzdli, keyah Antioch, Syria 'ink'ez Cilicia yun k'ut delhts'i, Dahooja nuhts'utni.

²⁴ Whulh 'úzdits'o bulunah dune netaháindel nuhts'un humindel 'ink'ez tink'us na'a 'unohuhútni. 'Moses bughunek 'uk'une'úsduguz, 'i buk'une' 'ooht'en 'ink'ez buka dune ahli, 'i k'ut nahuhoot'us.' Ndi khunek 'i be tink'us nahonilht'uk, 'aw wheni ndo but's'útni 'ilah ho' hutni. ²⁵ 'Et huwa 'ilhuts'owezdel 'ink'ez ts'iyawh lhgha 'úzdeja hoh dune whunih 'en nuhts'un uztehl'alh 'utahaóobats'alhti 'ink'ez soo ndunnah hubuk'ets'intsi' Barnabas 'ink'ez Paul bulh hubulh hutoo'as 'et wheni. ²⁶ 'En 'uhuja Sizi Gri, neMoodihti, bughunek be yáhalhtuk hukw'é dahootsah tulih t'ehonanzun 'et whunts'ih. ²⁷ 'Et Judas 'ink'ez Silas nuhts'ú buztehl'alh, 'en dich'oh daja ts'utni hoh nuhts'un k'e'ts'anguz, 'et ts'iyawh buzek whe ndun whuduteni. ²⁸ 'Et Ndoni 'en bulh lhgha 'úzdeja 'aw 'o 'un chah howu whúlna nuhwuba ts'uhólh'i hukwa cha'uznizun. Ndet k'an nuhgá whunt'ai whuz na'a zeh 'ooht'e hukwa' uzinzun. ²⁹ Ts'uyi, 'i hubuyak'usda k'edeltsi ts'un tulhdelh, 'i wah'alh gunih! 'Uskai chah, khunai buze 'úsduguz, 'i buzkai tananji, 'i chah wah'alh gunih! 'Ink'ez ts'ekoo k'us dune bulh tinta' 'ooht'en gunih! 'Et whuch'a khaadli t'eh, 'et sih soo 'óoht'e. 'Aw 'et zeh.” ³⁰ 'Et khunek na'a 'en whéobahalh'a hoh Antioch ts'ih hunindel. 'Et ts'iyawh huba 'alha' hoont'ah 'ilhobughezdlá 'ink'ez dustl'us hubutl'ahíya'ai. ³¹ 'Et ndi hubuts'un k'ehanguz 'i hik'eyailhtuk hoh buk'une'úsduguz, 'i bugha hubudzi ulhtus nasdli 'ink'ez tube huhóont'i. ³² 'Et Judas, Silas bulh hedich'oh chah Yak'usda ba nus whunilh'en hinli, 'ink'ez huba 'alha' hoont'ah sa hoh Yak'usda bughunek be hubulh yahalhtuk, 'et hoh soo hubudzi unzoo 'ink'ez hilhtus chah hubuhulhtsi. ³³ 'Et hukw'elh'az dzuh sa hubuzih hudelhts'i. 'Et huba 'alha' hoont'ah ndunnah khunek na'a 'en nts'ez de haháindel ts'ih whuz hubudzi hoont'i hoh whel'a 'en hubuts'un whenábahalh'a. ³⁴ 'Et whunts'ih Silas 'en 'aw 'et teda buba hoonzoo ho' hoont'ah. ³⁵ 'Et Paul, Barnabas bulh Antioch 'et chah 'et hanke, 'uyoon chah hubulh khunek unzoo, 'i be hubulh yahúhtuk 'ink'ez neMoodihti bughunek bugha wheóobuhodulh'eh.

Paul, Barnabas bulh ndun John, Mark hiyulhni, 'en bugha lhch'a hust'az

³⁶ 'Et hukw'elh'az dzin Paul, Barnabas 'uyúlhni, “Nts'e keyah totsuk neMoodihti bughunek be yats'ulhtuk, nelhutsinkah hubuts'un nunaoodút'as 'ink'ez nahot'alh dahint'ah simba.” ³⁷ 'Et Barnabas, John, Mark hiyulhni, 'en dudulh too'as hukwa' ninzun, ³⁸ 'et whunts'ih Paul 'aw ts'ah'un buba cha'hóot'ah. Hoh da Pamphylia bughu whenája 'ink'ez 'ut'en hubulh lhacháidilil, 'et huwa hubulh 'útenilh, 'aw Paul hukwa cha'nizun. ³⁹ 'Et tube lhenah 'ahudeja k'et, lhch'a nahust'az. Barnabas, Mark dulh 'iyílya 'ink'ez Cyprus ts'ih whenahedúki. ⁴⁰ 'Et Paul, Silas hubutaháiyalhti 'ink'ez huba 'alha' hoont'ah Yak'usda tl'aóobahanla ye únzoo, 'i be hubughole ka, 'et hukw'elh'az whenáhet'az. ⁴¹ 'Et Syria 'ink'ez Cilicia whuyun k'ut whutah lháhuz'az, 'ink'ez Sizi Gri bugha 'ilhohuwedel' o nus hubudzi ulhtus hubuhulhtsi.

16

Timothy, 'en Paul Silas hubulh tez'az

¹ 'Et Paul 'en keyah Derbe 'ink'ez Lystra ts'ih ninya. Whuz 'ilhunuh dune buba 'alha' hoont'ah Timothy hiyúlhni, 'en hoh whut'en. Be'ama chah buba 'alha' hoont'ah, 'en Lizwif 'int'ah, 'et be'abá, 'en Greek 'int'ah. ² Keyah Lystra 'ink'ez Iconium whut'en, ndunnah huba 'alha' hoont'ah, 'en Timothy soo highu yalhtuk. ³ 'Et Paul 'en Timothy dulh yuté'l'us hukwa' ninzun, 'et yuka dune unli, 'i k'ut hiyúzt'us. 'Et ndihiyinla hoh Lizwif hoh whut'en, 'en Timothy be'abá Greek unli t'ehininzun 'et huwa. ⁴ 'Et keyah whutuh hedulh hoh 'et huba 'alha' hoont'ah ndai whel'a 'en 'ink'ez dune tsuh whudelhdzuhl Jerusalem 'et highu nahezya, 'i zeh k'úne' 'ooht'en hubuhútni. ⁵ 'Et Sizi Gri bugha 'ilhohuwedel' hoh be 'alha' hoont'ah, 'i be 'o nus hilhtus huzdli, 'ink'ez 'et huwa dzin totsuk nus lhe'huneltsuk.

Paul, Ndoni bugha benganh néwhults'ut Macedonia ts'ih yun k'ut tooya ka

⁶ 'Et Phrygia 'ink'ez Galatia yun k'ut wheghah lhuhúzdel hoh Asia yun k'ut 'et Yak'usda bughunek be yáhutelhtuk, 'et Ndoni whuch'a hubunezyoot. ⁷ 'Aw 'et Mysia yun k'ut wha'az nihúnindel, Bithynia yun k'ut ts'un hutoodelh hukwa' hut'en, 'et whunts'ih Ndoni 'aw hubugha chahóo'al. ⁸ 'Et Mysia yun k'ut wheghah lhuhúzdel hoh keyah Troas ts'ih hunindel. ⁹ 'Et 'ulh'ek Paul hoonli bunalh ha whélt's'ut hoh dune Macedonia yun k'ut whut'en yunilh'en 'et siyin 'ink'ez yughu tédudlih, “Macedonia yun k'ut ts'ih nets'inyalh 'ink'ez nela'ineh!” yúlhni. ¹⁰ Soo njan bunalh ha whélt's'ut 'ibulh lhazduja Macedonia yun k'uz ts'ih uztekelh 'ink'ez ndunnah 'et whut'en khunek unzoo, 'i be hubulh yats'oolhtuk ka. NeMoodihti neka dani t'ets'oninzun 'et whuz na'a 'uts'uja.

Lydia buba 'alha' hoont'ah suli 'ink'ez too be' ulya

¹¹ 'Et Troas 'et ts'i cho be nus ts'utezki, 'et soo ts'ihyan whuz Samathrace ts'ih yats'úzki, 'ink'ez 'om bun dzin 'et Neapolis ts'ih ts'utezki. ¹² 'Et whezdindel hoh keyah Philippi ts'ih ts'unindel. 'I yun k'ut Macedonia 'udechoo keyah whudézti 'et whuz'ai. 'Et Roman keyah be'ilhdzun hoonli ho' hoot'ah. 'Et keyah Philippi lhat dzin 'et na'ts'alh'ai. ¹³ 'Et Lizwif nats'ulyis dzin hoh keyah whuch'a ts'uzdel 'ink'ez took'oh taba ts'ih ts'unindel. 'Et Lizwif tenahudedli hoonli 'uzninzun, 'et huwa 'et nátl'azdelts'i 'ink'ez ts'ekoo 'ilhohuwezdel 'en bulh yáts'ulhtuk. ¹⁴ 'Ilhunuh ts'eke, Thyatira whut'en Lydia hiyúlhni, 'en chah nedánts'o. 'En naih dulk'un dezti be 'óoket unli, 'ink'ez 'ahoolhyez Yak'usda ts'un teni' nilhdzun. 'Et huwa neMoodihti Paul Yak'usda bughunek ye yáhtuk, 'i soo cho yoozélhts'ai 'ink'ez beni taódoolts'it yulltsi. ¹⁵ 'Et didut 'ink'ez bukoo hudelhts'i, bulh dunekah chah, ts'iyawh too be' hulya. 'Et hukw'elh'az neghunséya, 'ink'ez neundulhni, "NeMoodihti soo cho but'anunestan nuhwhuba 'alha' hoot'ah t'eh, 'anik sukoo ts'ih suzih doolhúts'i." 'Ink'ez 'ilhu'z 'udeja hoh bulh 'utezdel.

Paul, Silas bulh keyah Philippi 'et tsak'ebaha'ai

¹⁶ 'Et 'ilhudzin nts'e tenazdedli ts'ih ts'enindel hoh, 'ilhunuh 'ulhna, 'en ts'eke nedudezya. 'En ntsi' nudúdeh, 'i buyíndina 'i be nus whunil'h'en 'ink'ez nus daóotenilht ts'iyawh ndo búlhni. 'Et ndunnah yughunli 'en lhai sooneya hiye 'úlh'en. ¹⁷ 'Et 'ut'en Paul 'ink'ez wheni teh nenunéya 'ink'ez 'alzul hoh utni, "Ndunnah dune degna nus nduk Yak'usda budune hinli. Nts'e na'a dutehjih hoh teh nuhwhuba nuhúhuyeh!" ¹⁸ Lhat dzin ndut'en, 'udek'elh'az Paul tube taídeznih, yuts'un náluha 'ink'ez ntsi' nududeh, 'i njan díyulhni, "Sizi Gri boozí bughá buyígha hanaindaih!" 'Et 'ahoh ntsi' nududeh, 'i yeyúh hanadee. ¹⁹ 'Ink'ez ndunnah ts'eke bumoodih t'ehonanzin ndet hoh sooneya 'uhul'h'en, 'ustl'e' 'uhooja, 'et Paul, Silas bulh hubuhúzgooh 'ink'ez huba' hoot'ah, 'et keyah k'une nuwhuhul'en hububut nébanilhti. ²⁰ 'Et lhadudughan moodih but nebanilhti 'ink'ez hubuhutni, "Ndunnah Lizwif 'uhint'ah. Netah 'ahoolhyez dune tehudule. ²¹ Ndet wheni hubugha neba nahesda ts'iyawh whuch'a na'a whubuhodul'h'eh. Wheni Roman 'uts'int'ah 'et huwa 'aw buk'ah ts'ih 'uts'oonéh ghaít'ah 'ink'ez hoh tuné'ts'oot'en ghaít'ah." ²² 'Et 'ilhuhowezdel ts'iyawh hubuch'a nihúdedel, nehughan moodih Paul, Silas bulh hubunaih hubuk'uhidutelhch'ul 'ink'ez hubuholht'ah hubuhútni. ²³ 'Et soo tube hubuholht'o hoh nts'e dune tsak'eha'aih, whuz tsak'ebaha'ai, 'ink'ez ndun huwunli, 'en, "Hubuch'a dana'doo'alh," hiyúlhni. ²⁴ 'Et tsak'edinla ghunli hiyúlhni hoh 'ahoh soo bez tsak'edi'ai 'et tsak'ehiya'ai 'ink'ez duchun dindaz huba' 'int'ah, 'i bukechun ghu níhininla 'ink'ez hiduna'denla. ²⁵ 'Et tuzniz bat'en Paul, Silas bulh Yak'usda ts'un tenahududli 'ink'ez hujun. 'Et ndunnah tsak'ehudelhts'i hubuhoozélhts'ai. ²⁶ Khunyaz tube cho yun nagesnai hoh koo tsak'ehudelhts'i, 'et chah ndulhcho noghutnah. 'Et 'uhooja ndati ts'iyawh dá'dutezkat 'ink'ez 'i bulh tes t'ool hiyelhúghel, 'i hubuts'u háyankat. ²⁷ 'Et tsak'edelhts'i ghunli ts'enandzut hoh ndati ts'iyawh 'udun 'udenla whutel'h'en ts'iyawh tsak'ehudelhts'i tinta hulghaz ninzun, 'et dutes cho hayálhts'us 'ink'ez 'aw 'et na'dutuzelghel. ²⁸ Paul soo 'ultus 'uyúlhni, "Dah! Udundóldah guni, ts'iyawh 'aw 'et 'uzdélhts'í!" yúlhni. ²⁹ 'Et tsak'edelhts'i ghunli kwun nult'a ka 'utni hoh koo dálgai 'ink'ez soo dultuz hoh Paul, Silas bulh hububut nacháneti. ³⁰ 'Et tinábunilhti 'ink'ez huboodulhkt, "Soo sudutéhnih, datésnih hoh dutesjih?" hubúlhni. ³¹ "Sizi Gri neMoodihti, 'en mba 'alha' 'oot'e, 'et hoh dutanjih, nyun 'ink'ez nkoo hudelhts'i chah," hiyúlhni. ³² 'Et neMoodihti bughunek bughá hiyulh yáhtuk 'ink'ez ts'iyawh ndunnah 'et bukoo hudelhts'i chah. ³³ 'Et 'ulh'ek soo hoh whegha whezulh hoh tsak'edelhts'i ghunli daóobunilhti 'ink'ez hubuka k'et tináwhuzguz. 'Et didut 'ink'ez bukoo hudelhts'i chah, ts'iyawh 'ahoh too be' hulya. ³⁴ 'Et Paul Silas bulh bukoo ts'ih nábunilhti 'ink'ez bughu na'unt'ai, 'ink'ez tube cho whunélnik didut 'ink'ez bukoo hudelhts'i chah, ts'iyawh Yak'usda huba' 'alha' 'int'ah suli 'et huwa. ³⁵ 'Et bundada nehughan moodih nélhghel hubuts'un whebuhalh'a, "Ndunnah dune hubulanadintnih!" hubuhútni. ³⁶ 'Et tsak'edelhts'i ghunli Paul 'en 'ídani, "Nehughan moodih but's'á khunek 'ults'ut, 'Nyun 'ink'ez Silas bulh nuhlanazdootnih," hutni, 'et huwa soo cho khohdle hoh natooh'tas," hubúlhni. ³⁷ 'Et whunts'ih Paul 'en nélhghel ndo búlhni, "Hukwa tsak'enhoo'alh hoolah, 'et whunts'ih dune tuz nehohlts'us, nuwheni Roman keyah ts'uwhut'en ho' ts'int'ah, 'et whunts'ih tsak'edelhts'i 'ink'ez k'an wuhú'iz 'et nanehutoohl'a hukwa' hut'en. 'Awundooh, 'aw nducháhoot'ah ho' hoot'ah! Nehughan moodih dich'oh whusháóodel 'ink'ez nelanahudootnih huba' hoot'ah." ³⁸ 'Et nélhghel ndi khunek bughá nehughan moodih hudáni, 'et Paul, Silas bulh Roman keyah whut'en 'uhint'ah whulh 'uhudants'o hoh tube whehunel'hújoot. ³⁹ 'Et ndunnah nehughan moodih, 'en hubuts'un tehududli hoh tsak'ehudelhts'i whuch'a nabuhuzdla 'ink'ez keyah whuch'a nahoodelhubuhútni. ⁴⁰ Paul, Silas bulh tsak'edelhts'i tináhunt'az 'ink'ez Lydia bukoo ts'ih huni'az. 'Et ndunnah huba' 'alha' hoot'ah, 'en chah 'et hudelhts'i. Khunek be ts'íhtus, 'i be hubulh yáhalhtuk 'ink'ez whenáhet'az.

17

Paul 'ink'ez hiyulh nudelh keyah Thessalonica 'et dzuh nubatelhdzut

¹ 'Et hedulh whuzeh keyah Amphipolis 'ink'ez Apolonia whutah lhuhúz'az, 'et keyah Thessalonica ts'ih huni'az. 'Et Lizwif hubuluglez whuz'ai. ² 'Et whutsuh da ne'út'en huwa Paul njan Lizwif hubuluglez ts'ih ninya. 'Et tat nats'ulyis dzin whutah 'et ndi Yak'usda bughunek 'uk'une'úsduguz, 'i bugha wheobunoolhtun hukwa' utni. ³ 'Et huba hukw'ú nuhúlhye Christ 'en 'utenilh dzuh nutezut, datétsah, 'ink'ez nakhutétnalh. 'Et ts'ah'un 'uhoont'ah huba hoolh'i, "Ndun Sizi k'an bugha nohwulh yáhtuk, 'en Christ, 'en 'int'ah," ni, Paul. ⁴ 'Et bulunah huba 'alha' hooja hoh Paul, Silas bulh hubuts'un nihudendel 'ink'ez lhanah Greek whut'en, 'en Yak'usda huba 'alha' 'int'ah 'ink'ez ts'ekoo hincha chah ts'iyawh hubuts'un nihudendel. ⁵ 'Et whunts'ih Lizwif huwe' hoolnih 'et kaldus ti núdelh, 'en nabaháldzoo 'ink'ez lhts'un 'é bodinla keyah ndulhcho hoh whudutni buch'a yáhalhtuk, 'i be 'ilhunuh dune, Jason hiyúlhni, 'en chah bukoo tinta' honílh'en, Paul, Silas bulh nabuhóolhtelh hukwa' hut'en 'ink'ez 'az dune ts'uns títotelhtelh 'et wheni. ⁶ 'Et whunts'ih 'aw nachabuhíltel hoh Jason 'ink'ez bulunah huba 'alha' hoont'ah 'en chah whúske bulh keyah whumoodih 'en ts'un haobuhanguz 'ink'ez hudultul hoh njan nduhútni, "Ndunnah dune ndi yun k'ut ndulhcho hoh tinta' huwhulh'ih 'ink'ez 'aw 'et njan nekeyah chah 'et ndóte'ill wheni whusahánde, ⁷ 'ink'ez Jason 'en bukoo hubuzdla. Ts'iyawh nehubudayi cho dega nus dezti khunek netl'aída'ai 'i k'uhunyis ho' hut'en 'ink'ez 'uyoon hubudayi cho unli, "En Sizi ts'utni," nehútni." ⁸ 'Et ndi khunek 'i be ts'iyawh 'ilhouwezdel 'ink'ez keyah whumoodih tubulh ndulhcho 'ants'ih whuts'uhudutnik hoh huwu yahalhtuk. ⁹ 'Et keyah whumoodih, 'en Jason 'ink'ez 'onghuh chah tínahutedulh wheni sooneya k'enáhudedzai 'et bulanahudetnik.

Paul, Silas bulh Berea keyah ts'ih whebahalh'a

¹⁰ 'Et soo nadálhghel ibulh huba 'alha' hoont'ah Paul, Silas bulh keyah Berea ts'ih whebahalh'a. 'Et whuz huni'az, 'et Lizwif hubuluglez ts'ih dahan'i'az. ¹¹ Ndunnah 'et whut'en, 'en Thessalonica whut'en whuch'a 'o nus hinzoo. Ndi khunek buts'ótl'aidelts'ut, 'i soo hika' nizun hoh Paul hiyoozélhts'ai, 'ink'ez dzin totsuk Yak'usda bughunek 'uk'une'úsduguz, 'i hik'uyalhtuk hiyodol'eh ka, ndi khunek Paul ye yáhtuk, 'i 'alha tulih 'int'ah t'ehontezeh hukwa' huminzun 'et huwa. ¹² 'Et lhanah huba 'alha' hoont'ah suli. Greek whut'en ts'ekoo 'ink'ez dune chah. ¹³ 'Et Lizwif Thessalonica whut'en whulh 'úhudants'o keyah Berea huwhútni 'et chah Paul Yak'usda bughunek be hubulh yaháhtuk hoh whuz lgha hidunindel 'ink'ez hubuch'a tánta' huhoohl'en hukwa' hut'en. ¹⁴ 'Et 'ahoh huba 'alha' hoont'ah Paul yatoo ts'ih whenáhiyalh'a, 'et whunts'ih nahútl'o Silas, Timothy bulh Berea 'aw 'et hanke. ¹⁵ Ndunnah dune ndun Paul bulh 'uhut'en 'en keyah Athens ts'un zeh hiyúlh lhusúdel. 'Ink'ez Silas, Timothy bulh soo 'a cho duts'un hutoo'as hubúlhni hoh hubuts'otl'a khunek yi'ai, 'et 'ahoh hits'un whin'az.

Paul keyah Athens 'et yalhtuk

¹⁶ 'Et Paul keyah Athens 'et Silas, Timothy bulh hubalh'i 'ink'ez bukeyah ndulhcho hoh buyak'usda k'edeltsi zeh hoonli, 'et Paul tube hubugha budzi nduda. ¹⁷ 'Et Lizwif hubuluglez ts'ih, ndunnah Lizwif 'ink'ez ndan whuz ts'ih tenahududli chah, ndi Yak'usda bughunek 'i be hubulh howi yalhtuk, 'ink'ez njan 'uhóoket hoh, dzin totsuk ndan 'et nuhudelh, 'en chah hubulh howi yalhtuk. ¹⁸ 'Et ndunnah Epicurea hudedowh 'ink'ez ndunnah Stoic hudedoh dune hoodulh'eh hubugha hiyulh yáhtuk hoh bulunah howi yahalhtuk, "Ndun ilah teh ne'duni, daja dutenilh hukwa' ninzun ho' 'utni," hutni. 'Et 'uyoonah chah 'uhutni, "Ndun, 'en 'uyoo yak'usda, 'en bughu yalhtuk 'ududil'i ho' 'utni." Paul, Sizi 'ink'ez dinadija hubugha hubulh yáhtuk 'et huwa 'uhutni. ¹⁹ 'Et Paul dzulhyaz, Mars hiyúlhni, yedoh hiyúlh nenindel 'ink'ez 'uhiyúlhni, "Ndi k'an buneoodilh'eh, 'i bugha yaillhtuk soo cho t'ets'untizeh hukwa' uzninzun. ²⁰ Ndi bugha yaillhtuk, tube neba hooncha ho' hoont'ah, 'et huwa daja ni ho' 'utni, soo cho t'ets'onozeh hukwa' ts'uninzun." ²¹ Keyah Athens whut'en 'ink'ez 'uts'un keyah whut'en chah 'et huwhut'i, 'en ts'iyawh k'an khunek bugha yatuk, 'i huhoont'i hoh 'aoholhyez wheni huwu yahulhtuk k'us ndi khunek daja dutenilh hiyoozóhlts'a. ²² 'Et Paul dune dilhts'i dzulhyaz k'ut, 'et 'ilhouwezdel buniz seyin 'ink'ez ndo búlhni, "Athens whaht'en, t'enwhunazin tube 'aoholhyez nuhyak'usda ts'un tenadahdli. ²³ 'Et nuwhu'az usyalh hoh nuhyak'usda bukw'uzdai lhe'ultsuk nulh'en. 'Ilhunuh Yak'usda bukw'uzdai k'ut bukw'one'úsduguz ndutni, 'Yak'usda t'echats'unízun, 'en ba 'int'ah.' 'En t'enuzuhzun hoh buts'un tenadahdli, 'en k'an bugha nohwulh yatelhtuk. ²⁴ Ndun Yak'usda t'énuzuhzun, 'en 'int'ah, ndi yun k'ut 'ink'ez ndai buk'ut 'uyint'ah, 'i ts'iyawh 'uyína. Nduk yak'uz 'ink'ez ndi yun k'ut ts'iyawh whumoodih unli, 'et huwa luglez wuhocho dune 'uhoonla 'et chaídah ho' hoont'ah. ²⁵ 'Et dune buyiz hiye khúna, 'i 'ink'ez

ts'iyaintsuk chah soo dich'oh zeh huwá yúnle ho' 'int'ah. 'Et huwa 'aw dune 'uyínla, 'i yukacha'nizun. ²⁶ Yak'usda 'ilhunuh dune zeh ndi yun k'ut ts'iyannah dédowh 'ulya inle, 'ink'ez ndi yun k'ut nduhoolcho huwhut'i suli. 'Ink'ez 'en zeh ba' hoot'ah hoh nts'e keyah hudutelts'i. Nket'ah ndi yun dune 'utelilh 'ink'ez nts'e 'ahutet'ilh, 'et whutsuh 'uhóoja 'uda t'eoonínzun. ²⁷ 'Et whuz na'a 'uja didut hika itóo'en 'et huwa dune chawhés'en k'una'a hoh hikudúlnih t'eh nahiyóolhtelh tulih. 'Et whunts'ih Yak'usda 'aw nilhdza nehghucha'ít'ah ho' 'int'ah. ²⁸ 'En bugha dune ts'inli 'ink'ez ts'ukhuna. 'Ink'ez bulunah nuhtah 'uk'une'úsduzugz 'uhutni,

'Wheni chah 'en bugha dune 'uts'int'ah.'

²⁹ 'Et huwa wheni Yak'usda bugha dune ts'inli t'eh, 'aw 'uk'edeltsi k'una'a gold k'us silver k'us tse be 'úlya, 'i Yak'usda uznóozen ghaít'ah. 'I ts'iyawh dune yuhoolh'ai, 'i 'int'ah. ³⁰ 'Et hoh da dune ndet t'ehonínzun huwa Yak'usda dzuh nuchaobilh dzulh, 'et whunts'ih 'aw 'et k'an Yak'usda ts'iyannah dune ndulhcho lubeshi whuch'a hubeni nahondunooleh hubúlhni. ³¹ 'Et 'ilhudzin 'utahahó'ai ndet ndi yun k'ut ndulhcho ye ts'ah'un na'a 'int'ah, 'i be dune ba nahuteyeh ka. Ndun 'ilhunuh dune 'en dune ba nahuteyeh ka 'utahayálhti. 'En dinaidilhti 'et huwa 'alha 'et ndó tenilh." ³² 'Et Paul hidánts'o ndun dune dinadíja yughu yailhtuk hoh, bulunah chah highudloh, 'ink'ez bulunah 'uhutni, "Doo chah zeh njan hubugha nelh yaóolhtuk hukwa' uznínzun," hiyúlhni. ³³ 'Ink'ez Paul 'aw 'et 'ilhohuwezedel butahanája. ³⁴ Bulunah dune hits'un nidendel. Hubutah 'ilhunuh, 'en Dionysius hiyúlhni, 'en nahéyilh 'ilhunuh, 'en 'int'ah. 'Ilhunuh ts'eke chah, Damaris hiyúlhni, 'ink'ez 'uyoon chah, 'en huba 'alha' hoot'ah suli.

18

Paul Corinth whut'en khunek unzoo, 'i be hubulh yálhtuk

¹ 'Et hukw'elh'az Paul keyah Athens huwu natesja 'ink'ez keyah Corinth huwhút'ni ts'ih 'et ninya. ² 'Et Lizwif 'ilhunuh Aquila hiyúlhni yughu ninya. 'En yun k'ut Pontius huwhút'ni 'et whuzdlil inle, k'an zeh yun k'ut Italy huwhút'ni ts'ih whuz de bu'at Priscilla bulh whusahá'az. 'Et hubudayi cho Claudius hiyúlhni, Lizwif ts'iyawh keyah Rome whuch'a nahoodelh hubúlhni 'et huwa whusahá'az, 'ink'ez Paul hubuts'ú whenya. ³ 'Et buzih usda 'ink'ez hubulh 'út'en. Didut dahút'en whuz na'a bun 'ulh'en, 'et whuz na'a hoh whuch'a na'duldeh. ⁴ Nats'ulyis dzin totsuk Lizwif hubuluglez 'et Paul whéunoolhtun hukwa' utni. Lizwif 'ink'ez Greek whut'en tubulh ndi Yak'usda bughunek, 'i ts'ah'un be hubulh yaoolhtuk hukwa' utni. ⁵ 'Et Silas, Timothy bulh Macedonia ts'ih hanáhet'az. 'Et Paul Ndoni yula 'ut'en hoh ndunnah Lizwif soo cho whéunoolhtun ndun Christ, 'en Sizi, 'en 'int'ah. ⁶ 'Et whunts'i ndi bughunek hiyoollhoot hukwa cha'hanúnzun, 'ink'ez Yak'usda ch'a hudetni t'eh, 'et bulez ch'a dunaih nayughat 'ink'ez ndo búlhni, "Tinta nahkat t'eh, nuhwhenich'oh zeh nuhwhuba' hoot'ah ho' tehnilh. Si suk'ého'alh ghaít'ah. K'an whuts'un 'udun yun k'ut whut'en, 'en but's'u tóosya!" ⁷ 'Et huwa bughu whenája 'ink'ez 'udun yun k'ut whut'en, Justus hiyúlhni, 'en 'ahoolhyez Yak'usda ts'un teni nilhdzun, 'en yuzih whutet'i ka yuts'un ninya. Bukoo 'et Lizwif hubuluglez whuzih whuz'ai. ⁸ 'Et Crispus, Lizwif hubuluglez whumoodih, 'en, ts'iyawh bukoo hudelhts'i chah, neMoodihti huba 'alha yint'ah 'ink'ez lhanah Corinth whut'en, 'en chah khunek unzoo, 'i hidánts'o hoh huba 'alha' hoot'ah suli, 'ink'ez too be' hulya. ⁹ 'Et 'ilhuh 'ulh'ek Paul bunalh hawhélts'ut hoh neMoodihti ndi yúlhni, "Whéniljut ilah, yailhtuk ze' dini, 'aw 'ust'l'e' doneh gunih, ¹⁰ 'ahoolhyez nyulh 'ust'ah 'et huwa. 'Aw dune nyun dóolhdah hoolah, lhanah njan keyah sulh dune hinli ho' hoot'ah." ¹¹ 'Et Paul 'ilhuh naodézut 'o 'at lhúhoolcho 'et hubutah inda. 'Et Yak'usda bughunek bugha whubodulh'eh zeh inle. ¹² 'Et yun k'ut Greece huwhút'ni, 'et Galio, Roman moodih hiyulhtsi. 'Ink'ez Lizwif 'ilho lhtahundel 'ink'ez Paul hiyilhchoot hoh naheyelh buk'usuda but nihinilhti. ¹³ 'Ink'ez 'uhutni, "Ndun dune ndi khunek néba nahesda, 'i ch'a dune hoodulh'eh. 'Ats'un na'a Yak'usda ts'un tenahudoodli hukwa' bulh'en." ¹⁴ 'Et Paul soo yatelhtuk hoh Galio, Lizwif ndo búlhni, "Alha njan tink'us 'úhoot'ah, k'us 'o nus hooncha hoh tinta' whúnt'en ho' dahni t'eh, 'et sih 'uda, Lizwif, 'alha' hoot'ah hoh nuhoozáhlts'a wule. ¹⁵ 'Et whunts'i ndi khunek 'i bugha hiyenah 'uzdooni, 'i unli khunek 'ink'ez buyust'e chah 'ink'ez be néba nahesda, 'i nuhwhenich'oh lhanadáhle. 'Aw si hubugha nahátesyeh hukwa cha'nuzúsun." ¹⁶ 'Et 'ink'ez nahédulh bukoo 'et tinaóobunenyoot. ¹⁷ 'Ink'ez ndun Lizwif hubuluglez bumoodih, Sosthenes hiyúlhni, ndunnah Greek whut'en, 'en hiyúzoogh 'ink'ez naheyelh buk'usuda but 'et yahiyalht'o, 'et whunts'ih ndun Galio 'aw buba dacháhoot'ah.

Paul keyah Antioch ts'un nanja

¹⁸ 'Et Paul huba 'alha' hoot'ah Corinth 'et sa hubutah inda. Hukw'elh'az Syria ts'ih nahutekelh, Priscilla, Aquila, 'en chah, hiyulh na'uja. 'Et natekelh whuts'uh Cenchrea.

'Et Yak'usda ts'un nahezuya inle, 'et huwa hitsigha ts'iyawh hahinant'az. ¹⁹ 'Et Ephesus ts'ih nahusduki, Priscilla, Aquila bulh bughu whénya. 'Et whunts'i dich'oh zeh Lizwif hubuluglez 'et daninya 'ink'ez Lizwif hubulh yaoolhtuk hukwa' utni. ²⁰ 'Et 'o nus sayaz buzih wuda hiyúlhni, 'et whunts'ih 'aw nduchaínil. ²¹ 'Ink'ez ndo búlhni, "Njan Jerusalem dzenis whuti 'et huwa 'a whuts'u lhunatesdalh hukwa' nuszun. Yak'usda 'uninzun t'eh, 'et sih nuhts'un nátoosja." 'Aw 'et Ephesus whuch'a nasduki. ²² 'Et Caesarea ts'ih lhugha nadiduki 'ink'ez Jerusalem ts'ih whénya. 'Et whuz ninya hoh Sizi Gri bugha 'ilhohuwezdél, "Dahooja," hubúlhni, 'ink'ez Antioch ts'ih whénya. ²³ Sayaz 'et inda 'ink'ez whenája. Galatia 'ink'ez Phrygia wlu yun k'ut wheghah lhuséya hoh Sizi Gri yugha hoodul'eh ts'iyawh hubudzi nduk ná'yinla.

Apollos 'en keyah Ephesus 'ink'ez keyah Corinth chah 'et Yak'usda bughunek be yalhtuk
²⁴ 'Ilhunuh dune, Lizwif, 'en Apollos hiyúlhni, keyah Alexandria 'et whuzdli inle, Ephesus ts'ih ninya. 'En dune soo bughunek dinzoo hubulh yálhtuk 'ink'ez Yak'usda bughunek 'uk'une'úsduguz, 'i soo cho chah t'einínzun. ²⁵ Nts'e na'a neMoodihti be 'ut'en k'ah hubugha hodél'i, 'et soo howu daóodit'ah hoh Sizi bugha ts'ah'un na'a yalhtuk 'ink'ez whebodul'eh. 'Et whunts'ih ndet John, dune too be 'ulh'en too be 'úlya inle 'et zeh t'éoonínzun ho' utni.*
²⁶ Lizwif hubuluglez 'et soo chaníljut hoh yawhénilhtuk. 'Et Priscilla, Aquila bulh hidánts'o hoh, bukoo ts'ih nahiníhli. 'Et soo cho nts'e na'a Yak'usda be 'ut'en k'ah híba hukw'un nahúhulhye. ²⁷ 'Et Apollos 'en yun k'ut Achaia ts'ih teyalh ninzun, 'et keyah Ephesus whut'en Sizi Gri yugha hoodul'eh, 'en huba 'alha' hooht'ah Achaia ts'ih híba whuts'un k'e'anguz hoh híla 'ooneh ka. 'Ink'ez 'et, "Whuz ninya t'eh, soo cho bughohle," hubuhútni. 'Et whuz ninya hoh ndunnah Yak'usda ye únzoo, 'i bugha huba 'alha' hooht'ah sulí, tube cho bula 'et'en. ²⁸ 'Et Lizwif 'ilhohuwezdél hiyenah 'uhutni hoh buch'a 'unilhde, daja ni Yak'usda bughunek 'uk'une'úsduguz, 'i bugha Sizi 'en ts'ah'un 'alha' hooht'ah, Christ, 'en 'int'ah. 'Et whuz na'a huba hukw'u núhelhya.

19

Paul keyah Ephesus 'et Yak'usda bughunek be yalhtuk

¹ 'Et ndez na'a njan ndúhooja, Apollos 'en Corinth ts'ih 'ut'en, 'ink'ez Paul 'en yun k'ut nukéduzut hoh Ephesus ts'ih ninya. 'Et bulunah Sizi yugha hoodul'eh bughu ninya, ² 'ink'ez ndo búlhni, "Nuhwhuba 'alha' hooht'ah sulí hoh Ndoni nuhyudélts'ut inle ih?" "Aw Ndoni hoonli tulih, 'aw whulh chá'uzdusts'ol!" hiyúlhni. ³ 'Et "Ndaí be too be' ts'ulh'ih 'ulhchoot?" hubúlhni.

"Be too be' ts'ulh'ih John dune too be 'ulh'en yughu yalhtuk, 'i," hutni. ⁴ 'Et Paul 'utni, "Be too be' ts'ulh'ih John dune too be 'ulh'en yughu yalhtuk, 'i ndunnah dulubeshi yuch'a naóol'ah, 'en huba' yint'ah. 'Ink'ez Israel hubuts'un huhanzut chah hubúlhni inle, 'Ndun sk'elh'az whusatéyahl, 'en nuhwhuba 'alha' oot'e, Christ 'en Sizi 'int'ah." ⁵ 'Et njan hodánts'o hoh, Sizi neMoodihti boozí be too be' hulya. ⁶ Paul buk'edilnik hoh 'et Ndoni hubuyidélts'ut. 'Ink'ez lhelhts'un na'a khunek be yahalhtuk, 'ink'ez Yak'usda bugha nus húho'en. ⁷ Lanezi 'o 'at anah dune bat'en 'uhint'ah. ⁸ 'Et tat sanun, dzin totsuk Paul Lizwif hubuluglez ts'ih nunádaih 'ink'ez chaníljut hoh Yak'usda dune k'úne' bul'en hubugha whebunulhtun 'ink'ez soo cho huba hukw'un nuhúhlye. ⁹ 'Et whunts'ih bulunah hubeni dúts'o hoh 'aw huba 'alha' cha'hóot'ah 'ink'ez neMoodihti be 'ut'en k'ah 'et 'ilhuhowezdel tah whuch'a yáhalhtuk. 'Et huwa Paul ndunnah Sizi Gri yugha hoodul'eh hubílhchoot 'ink'ez bughó whenaja. 'Ink'ez Tyrannus dune hoodulh'eh bukoo whulh'ai, 'et dzin totsuk Yak'usda bugha whebunulhtun. ¹⁰ Nat naodezut hoh 'et zeh nduhét'en. 'Et huwa Asia yun k'ut whudune, ts'iyawh Lizwif 'ink'ez Greek whut'en chah, Sizi neMoodihti bughunek bulh 'uhúdants'o.

Sceva buye'kah ntsi' nududeh, 'i hiyáhanahinooyoot hukwa' hut'en

¹¹ 'Et Yak'usda, Paul 'en zeh ba' hooht'ah hoh bula be huwa 'ét'en tune'út'en. ¹² Dzezoh 'i whunts'ih 'ink'ez but ts'ulhuchooz teh, Paul 'i ye 'út'en, 'i hubuk'eyilchos teh, 'ahoh nduda soo na'hut'ih 'ink'ez ntsi' nudúdeh 'i chah buts'u hanaíneyukw. ¹³ Bulunah Lizwif 'ahoolhyez nukéhududeh, 'ink'ez ntsi' nudúdeh hit'i bughu whenáhonuyukw. 'Ink'ez neMoodihti Sizi boozí bugha chah 'uhoot'en hukwa' hut'en. 'Et ntsi' nudúdeh 'uhiyúlhni, "Nuwheni 'ún whuts'utni, njan Paul yughu yalhtuk Sizi Gri boozí bugha buyáhl wanaíndaih!" hutni. ¹⁴ Skwunlai 'o 'at anah hínlí ndun Lizwif náwhulnuk dega nus dezti, Sceva hiyúlhni, 'en buye'kah 'en 'uhut'en. ¹⁵ 'Et nduhútni hoh ntsi' nududeh, 'i hubulh yátelhtuk 'ink'ez ndo búlhni, "Sizi 'en t'enuszun, 'ink'ez Paul chah bugha t'éoonúszun, 'et whunts'ih nuwheni, ndan ahli ho' 'uht'ah?" ¹⁶ Ndun dune ntsi' nudúdeh buyudínda soo' hoolhtus hoh hubeninya. 'Aw hich'a 'oolhdeh ghaít'ah. Tenaobudínlak, nukai hubulhtsi 'ink'ez buk'e'dutelhch'ul

* 18:25 Sizi Gri be 'ut'en k'ah, 'aw soo cho t'ewhunizun ho' 'utni.

'et koo tınatsehuldel. ¹⁷ Ts'iyawh Lizwif 'ink'ez Greek whut'en, Ephesus hudelhts'i whulh 'uhudants'o hoh ts'iyawh whéhunilhújoot 'ink'ez Sizi neMoodihti boozí 'o nus huba idézi suli. ¹⁸ 'Ink'ez ndunnah dune nededúle hinli, lhanah hubutah huba 'alha' hoont'ah suli. 'Et whusahándel 'ink'ez ts'iyannah nalh khunahawhelnuh. ¹⁹ Lhanah ndunnah dune nededúle huhóolhdzih ts'iyawh ndi dustl'us higha 'ut'en, 'i 'ilhunahiwezdla. 'Et ndi dustl'us buzooneya hiyoodúltho hoh \$50,000 bat'en suli. 'Ink'ez ts'iyannah nalh hidálhk'un. ²⁰ 'O nus lhanah Yak'usda bughunek hidánts'o hoh 'et whuz na'a Yak'usda bughunek hoolhtus hoh lhannah dune lhba hodit'ai, Sizi hik'úne' tet'en.

Keyah Ephesus 'et lhtahuwhunt'ai

²¹ 'Et njan ndulhcho ne'whust'en hukw'elh'az, Paul, Ndoni nuyúlh'a hoh Macedonia 'ink'ez Greece yun k'ut hoh wheghah lhutéyálh 'ink'ez Jerusalem ts'ih téyálh, whuz na'a bubeni lhaidinla. "Et whuz niya t'eh, 'et Rome ts'ih chah nutésya," ni Paul. ²² 'Et nanah hila'ut'en, Timothy 'ink'ez Erastus, 'en dutsuh whébal'a Macedonia ts'ih 'ink'ez didut 'awhuz Asia yun k'ut 'et 'astl'iyaz inda. ²³ 'Et hoh bat'en Ephesus njan nts'e na'a neMoodihti be 'ut'en k'ah 'et hubugha tube hiyena 'uhutni suli. ²⁴ Ephesus 'et lugez whuz'ai. Ndi ts'eke k'edeltsi, Artemis hiyúlhni, hits'un ténadudli. 'Ilhunuh dune, Demetrius hiyúlhni, silver ulh'uz. Ndi ts'eke k'edeltsi hits'un ténadudli, 'en ndi silver, 'i be yuk'éne'ulhtsi. 'I 'ants'ih hoh dune dezti hoh hiye but's'e' ookset. Whuz na'a sooneya lhai 'uhulh'en. ²⁵ 'Et huwa Demetrius hubulh 'ut'en ts'iyawh, "Anih," hubudáni. 'Uyoon duk'una'a 'ut'en, 'en chah 'ink'ez ndo búlhni, "Sulh dune t'éoonáhzun ndi 'ut'en 'i bugha soozde 'a 'uts'int'ah. ²⁶ Nuhwhenich'oh whunulh'en 'ink'ez whuduhts'o ndun dune Paul dat'en hoh 'ut'en, dune hubúlhni, 'Ndi dune la be 'iyálh'en, 'aw Yak'usda cha'it'ah.' 'Ink'ez lhanah dune Ephesus 'ink'ez Asia yun k'ut ndulhcho chah highunek hiyílhchoot. ²⁷ Neba húwa 'óodli suli. Njan sooneya ho' ts'ulh'en tinta' hot'en. 'Et zeh ilah, njan neyak'usda Artemis hubuluglez whucho hukwa cha'hunízun wule, 'ink'ez dich'oh ye dezti, 'i chah hoonli chailah wule. 'En Asia 'ink'ez yun k'ut ndulhcho ndun ts'eke neyak'usda hits'un tenadudli." ²⁸ 'Ink'ez ndunnah dune ndi khunek hidánts'o hoh tube hahunílch'e hoh 'ultus 'uhúldzul 'ink'ez 'uhutni, "Ephesus ts'uw'hut'en neyak'usda Artemis 'en zeh neba dezti ho' 'int'ah!" ²⁹ 'Et keyah nduhoolcho hoh huwa lhtahawhunt'ai. 'En 'ilho nihúdulh, 'en Macedonia whut'en, nanah Gaius 'ink'ez Aristarchus hubuhútni, Paul bulh nahá'as, hubuhúzgooh 'ink'ez dune nuwhúlyeh huba whuz'ai ts'ih whebuhano 'ink'ez whuz nibanilhti. ³⁰ 'Et Paul dich'oh chah nus 'ilhohuwezdal hubutah netéya hukwa' ninzun, 'et whunts'ih Sizi Gri yugha hoodul'eh, "Dah!" hiyúlhni. ³¹ Bulunah Asia yun moodih, Ephesus hudelhts'i, 'en Paul hubuk'entsi' hinli, 'en chah hits'otl'a khunek i'ai highu tedudlih hoh dune nuwhúlyeh huba whuz'ai ts'ih tóoya gunih. ³² 'Et zeh 'ilhuhowezdel 'awhuz lhtahuwhunt'ai hoh bulunah 'ilhunuh zeh huwa 'uhúldzul 'ink'ez bulunah chah 'udun huwe' hutni. 'Ink'ez bulunah 'aw t'ehonízun ndet huwa 'ilhuhowezdel. ³³ 'Et 'ilhuhowezdel hubutah, 'ilhunuh dune Alexander hiyúlhni, 'en Lizwif nus hububut nihínilhti huba yaoolhtuk wheni. 'Et dula be t'ehudoosnih hubulhni. ³⁴ 'Et whunts'ih ndunnah 'ilhuhowezdel Paul, 'en Lizwif 'int'ah t'ehinanzin hoh, 'et nat hukw'u hoonezt'o whutah 'o nus 'ahúldul ho' hutni, "Ephesus whut'en hubuyak'usda Artemis, 'en zeh neba dezti ho' 'int'ah!" ³⁵ 'Et ndun dune keyah huba 'uk'une'úguz, 'en 'ilhuhowezdel 'ustl'e' 'uhudeja hubulhtsi 'ink'ez ndo búlhni, "Ephesus whut'en soo sih soo zélhts'ai, ts'iyawh ndulhcho hoh t'ehonízun nekeyah Ephesus 'et ndun neyak'usda Artemis buluglez whucho 'et huwa ts'inli ho' hoont'ah, 'ink'ez ndi tse dezti ts'eke k'edeltsi unli ndus de yaz ts'ih hádelts'ut 'i chah. ³⁶ 'Aw dune whuts'oododlai hoolah, 'et huwa t'eduzahnih 'ink'ez ilah tune'óoh't'en gunih! ³⁷ Ndunnah dune 'aw lugez whucho huwe' hutezdla ilah, 'ink'ez neyak'usda chah ch'a yacháulhtuk, 'et whunts'ih njan whusaóobehla. ³⁸ Demetrius 'ink'ez hubulh 'ut'en, 'uyoon hoonli hubugha buk'ehúhoote'ah t'eh, 'et sih dzin dune ba nahudeh whuz'ai, 'ink'ez naheyelh chah 'et delhts'i. 'En hububut 'uhudooni da! ³⁹ 'Et whunts'ih, 'o 'un hoonli nt'eeonóhzin hukwa' nahzun t'eh, 'et sih nts'e keyah whut'en 'ilhodulh teh, 'et ts'ah'un na'a nuwhubá nehóh'ahl. ⁴⁰ K'an dzin 'uhóoja lhtahuwhunt'ai, tube neba huwa 'óodli ho' hoont'ah. Roman bumoodih wheni nek'ého'ahl. 'Aw 'et ndúhóneh huba cha'hóot'ah. 'Aw di ka 'uts'uja 'uzdooni ghaít'ah." ⁴¹ 'Et ndúdeja hukw'elh'az ts'iyawh yanahóodelh hubúlhni, 'et whenáhedel.

20

Paul, Macedonia 'ink'ez Greece yun k'ut whulh doo chah whuz nanátedalh

¹ 'Aw 'et 'ustl'e' 'uhudéja hoh, Paul, ndunnah Sizi Gri yugha hoodul'eh, "Anih," hubudáni. Khunek hubudzi be ulhtus, 'i be hubulh yaílhtuk 'ink'ez, "Aw 'et natesdalh," hubúlhni. "Et hubughu whenája hoh Macedonia ts'ih whénya. ² 'Et lhat keyah whutuh húyálh, dune whut'en budzi ulhtus ka hubulh yálhtuk 'ink'ez Greece ts'ih ninya. ³ 'Ink'ez tat sanun 'et

inda. 'Et whuts'un Syria yun k'ut ts'ih tekelh huba lhadútneh hoh Lizwif hituzelghelhel huwu yahulhtuk whulh 'údants'o, 'et ndoh Macedonia ts'ih whégha lhunátedalh ninzun. ⁴'Et Sopater hiyúlhni, 'en Pyrrhus buye', Berea whut'en, 'en yulh nátest'az, 'et Thessalonica whut'en Aristarchus 'ink'ez Secundus bulh chah 'et Derbe whut'en Gaius hiyúlhni, 'ink'ez Timothy chah 'et Asia whut'en Tychicus 'ink'ez Trophimus, 'en chah. ⁵'En ts'iyawh nus netsuh whehándel 'ink'ez Troas 'et neba hih'i. ⁶'Et lhes chantíldoh, 'i ut'alh, hukwelh'az 'et Philippi 'et nus nasdúki 'ink'ez skwunlat dzin inle 'et Troas 'et bughu nats'undel 'ink'ez skwunlat 'o 'at nat dzin 'et uzdáts'i.

Paul 'aw 'et 'udek'elh'az Troas whut'en butsun nunasja

⁷'Et hukw'enilghel 'et 'udechoo dzin 'et Sizi yugha hoodul'eh 'ilhunahuwésdel lhes tahídahkut nahitet'alh huba. 'Ink'ez tuzniz whuts'un Paul dune hubulh yailhtuk 'om bun dzin bughu natedalh 'et. ⁸Nduk ts'ih 'ilhuts'owudulh lhái be whét'en, 'i dez'k. ⁹'Ink'ez 'ilhunuh chilh, Eutychus hiyúlhni, 'en windah 'et usda. 'Ink'ez Paul yalhtuk zeh utni ndun chilh Eutychus 'en dughu nantutih zeh 'ut'en. 'Udek'elh'az 'aw 'et dughu nantesti hoh tat lhandoh whuz'ai ts'ih nduh ndus de whuts'un nadélduz. 'Ink'ez dazsai hoh dinahidilhti. ¹⁰'Et Paul yughah nininya 'ink'ez dushih bé' yilchoot, "Bugha ni uhli ílah, 'awhuz khuna," hubúlhni. ¹¹'Et 'ink'ez nduk wheyah ts'ih whenaja. Lhes taidalhtuk 'ink'ez 'uha'al. 'Et sa haté'alh whuts'un hubulh yailhtuk 'ink'ez whenája. ¹²'Et ndun chilh khuna hoh koo ts'ih whuz hubulh nant'az 'ink'ez 'et huwa tube huhóont'i.

Paul, Troas whuts'un Miletus ts'ih ninki

¹³'Et nus butsuh ts'ih, ts'i be nats'undel 'ink'ez Assos ts'ih uztezki. 'Et Paul denáztelhtelh wheni, 'et nduts'ooneh neúlhni 'ink'ez didut yun k'ut lhutéyah ni. ¹⁴'Et keyah Assos 'et neghu nanja 'et denáts'alhti 'ink'ez keyah Miletus ts'ih ts'utezki. ¹⁵'Et nus nats'usduki 'ink'ez 'om bun Chios huwanch'az 'et yats'uzki. 'Et 'om bun 'et Samos lhgha ts'udinki 'ink'ez Trogylium nízninki. 'Ink'ez 'om bun 'aw 'et Miletus lhghazdinki. ¹⁶'Et Paul 'en keyah Ephesus hoh wheghah lhutekelh hukwa' ninzun tube 'aóodulni 'et huwa. 'Aw Asia yun k'ut wuda hukwa cha'nízun. Soo 'a cho Jerusalem ts'ih tooya hukwa 'ut'en, soo tulih Pentecost dzin, 'et neóoya hukwa' ninzun.

Ephesus 'et butsuh whudelhdzulh Paul 'aw 'et 'udek'elh'az hoh hubulh yanaltuk, 'ink'ez bugho whenája

¹⁷'Aw 'et Miletus usda whuts'un, Ephesus ts'ih Sizi bughá 'ilhuhowezdel butsuh whúdelhdzulh hidudoodelh hubulhni hoh buts'ot'l'a khunek 'i'ai. ¹⁸'Et highu nindel hoh ndo búlhni, "T'éoonáhzun dast'en hoh nuhtah sída, 'udechoo dzin Asia yun k'ut niniya whuts'un. ¹⁹Soo yuk 'udulhúdzun 'ink'ez sunatsul too hoonli hoh neMoodihti be 'ut'en k'ah 'uhoohl'en, dzuh nuszut, 'et whutah sughá whults'ut ndunnah Lizwif satuzelghelhel huwu yahulhtuk 'et huwa. ²⁰'Aw dant'i be soo nuhwhula' whudutedut'ilh, 'aw hoonliyaz whunts'i whechasaz hoh 'i 'aw nuhwhuch'a k'ah óstun hoolah. 'Et huwa njan ts'et whe nuhwhuhodalh'i, nahkoo ts'un 'ink'ez nahkoo whuts'un. ²¹Lizwif 'ink'ez 'udun yun k'ut whut'en 'ilho tube cho hubugha dáni Yak'usda ts'un lubeshi whuch'a bubeni nahudunoolah, 'ink'ez Sizi Gri neMoodihti 'en huba 'alha 'uhoot'e. ²²'Et k'an tube cho whuts'un cha'dusts'il hoh Jerusalem ts'ih tesyalh. 'Et datésnihl 'aw t'éoonuzúszun. ²³'Et zeh nt'éoonúszun, keyah totsuk Ndoni whusúnelhtan, 'Dzuh nutánzut 'ink'ez tsak'etanda 'et mba whuz'ai, 'súlhni. ²⁴'Et whunts'ih 'et 'ants'ih 'uhoont'ah, 'ink'ez si be k'húsna, 'i chah suba 'ants'ih unli, khun si ndi 'ut'en sughaoolts'it, 'i 'ink'ez Sizi Gri neMoodihti 'ut'en k'ah stl'ahó'ai chah, hoonúst'i hoh lhaóódoosleh khunek unzoo, 'i be Yak'usda ye únzoo, 'i bughá wheobunoolhtun ka. ²⁵Soo ts'iyawh nuhtah nusíya Yak'usda dune k'úne' bul'en hubugha nohwhulh yáhtuk. 'Aw 'et t'éoonúszun 'aw doo chah zeh nasooht'en ghaít'ah. ²⁶⁻²⁷'Aw Yak'usda bughá nuhwhudetesnihl nuhch'a hóostun ílah hoh nuhtah ída. 'Et huwa k'an dzin soo cho 'ún whudusni, 'ilhunuh whunts'ih kwuncho yuh ts'ih whénya t'eh, 'aw si sugha ílah 'uteníhl. ²⁸Nuhwheni chah soo cho khohdle 'ink'ez ndai Yak'usda be sheep Ndoni be hubughohle ka nuhwhútl'aiyanla, njan Yak'usda bughá 'ilhuhowezdel, 'en sheep ghunli huba ahli, buzkai be bube'íldzun hubulhtsi inle 'et huwa. ²⁹Nt'éoonúszun whenásja t'eh, dune hintsi, yus whúske, 'i k'una'a 'int'ah, 'en nuhtah nehútedulh, 'ink'ez nuhóduntéldah, 'ink'ez 'aw nuhghu hoole ghaít'ah. ³⁰'Ink'ez 'ilhudzin whusaóotelts'ulh nuhtuhahándel dune, 'en huba hodul'eh naobanoo'ah hoh nuhch'a nahool'ah 'ink'ez ts'un nebodoolyelh. ³¹'Et huwa 'un whudúsmi, huwahli 'ink'ez whunaoolhunih, lhat sunatsul too hoonli hoh dzin 'ink'ez 'ulh'ek 'i bulh 'ilhunah ahli hoh tat naodezulh 'et whenwhudal'h'i. ³²'Ink'ez sulhutsinkah, k'an 'et Yak'usda 'ink'ez bughunek unzoo, 'et nuht'ahó'ai, 'et sih nuhdzi 'o nus úlhtus naotelhtsilh. 'Ink'ez ndunnah Yak'usda ba 'udun nibuninla, ndi bughunek 'i be 'en hubulh ndi Yak'usda be'íldzun, nuhwheni chah 'i nuhghaftelelh. ³³'Aw 'uyoon

buzooneya, silver 'ink'ez gold, k'us bunaih chah but's'u ka cha'duzusnih. ³⁴Nuhwhenich'oh t'éoonáhzun ndi sich'oh sula be 'ust'en. 'Ink'ez sulh nahudel'h hik'ekhuna, 'i hiye ndunidzit, 'i ts'iyawh huba 'uyul'h'en. ³⁵'Ink'ez ts'iyaintsuk whunwhunelhtan hoh nduts'út'en 'i be ndunnah 'aw 'oot'en ghaif'ah, 'en hubula' ts'oot'en huba' hooht'ah, 'ink'ez Sizi neMoodihti daja ni 'et whunats'oolnih, 'et njan ndutni, 'Dant'i huwats'unle 'i k'us dant'i neghakuk, njan dant'i huwats'unle teh, 'i 'o nus neba ts'un whutezoo ho' hooht'ah." ³⁶'Et Paul lhadúja hoh, ts'iyawh hubulh dugwútsi be nenínya 'ink'ez tenadedli. ³⁷'Aw 'et ts'iyawh hutso hoh dushih be' hiylchhoot 'ink'ez nahidunants'ooz. ³⁸"Aw 'o 'at nachasutuzeht'il," ndo búlhni hoh hubulh yanaltuk, 'et huwa tube cho budzi únduda 'ink'ez ts'i ts'un whuts'un hik'uninandel.

21

Paul Jerusalem ts'ih nanátedalh

¹'Aw 'et nus nats'usduki. 'Et ts'ihyan lhunats'usduki 'ink'ez Cos ts'ih ts'uninki. 'Et 'om bun Rhodes nezninki, 'ink'ez 'et whuts'un Patara ts'ih uztezki. ²'Et Phoenicia ts'ih, ts'i cho ukel'h 'et nats'uhoo'ai hoh, 'i be ts'andel 'ink'ez uztezki. ³Soo noo k'ut Cyprus ts'onilh'en hoh wheghah intl'as ts'ih noo bugha lhuts'úzki, 'ink'ez Syria yun k'ut ts'ih ts'uninki. 'Et keyah Tyre 'et ts'i be deha'hutelelh whutah 'et nyoh uzdálts'i. ⁴'Et Sizi Gri yugha hoodul'eh hubuka' ts'oodulhkut hoh nabuts'inla 'ink'ez 'ilhuh hukw'enilhghel 'et buzih uzdálts'i, Ndoni be Paul Jerusalem ts'ih tóoya gunih hiyúlhni. ⁵'Aw 'et bulh lházduja hoh, bugho whenáts'edel 'ink'ez naztesdel ts'iyawh bu'atkah, 'ink'ez buzkeh chah nelh lhunahusdel hoh keyah whuch'a nats'usdel. Taba 'et negwutsi be níznindel 'ink'ez tenazdedli. ⁶'Aw 'et ts'iyawh lhula nunats'ust'ai 'ink'ez ts'i be náts'edel hoh hedidut chah koo ts'ih whenáhedel. ⁷'Et ts'ekelh ze' ts'ut'en Tyre nus nats'uski hoh Ptolemais ts'ih ts'uninki. 'Et 'ilhuh dzin zeh huba 'alha' hooht'ah buzih uzdálts'i. ⁸'Et 'om bun dzin uztezdel hoh Caesarea ts'ih ts'unindel. Khunek unzoo, 'i be yálhtuk, Philip hiyúlhni, 'en but's'ún ts'unindel, 'en buzih uzdutélts'ilh. 'En Jerusalem skwunlai 'o 'at nanah 'utahálya inle, 'en hubutah 'ilhunuh 'int'ah. ⁹'Ink'ez Philip 'en dinah but's'e'kah, 'aw dune t'echahunizun hinli, 'en Yak'usda ba nus whunilh'en hinli. ¹⁰Lhat dzin 'et uzdálts'i hoh 'ilhunuh Yak'usda ba nus whunilh'en, Agabus hiyúlhni, 'en Judea yun k'ut ts'ih haínya. ¹¹Neghu ninya hoh Paul buse yets'ú delhú'oo, 'i yuts'u hayánla 'ink'ez 'i be duke 'ink'ez dula chah lheyulh'oo 'ink'ez 'utni, "Et Ndoni ndutni, 'Jerusalem whut'en Lizwif ndi se be'ildzun yinli whuz na'a hiye hítelghel, 'ink'ez 'udun yun k'ut whut'en butl'ahítelhtel." ¹²'Et whulh 'úzduzts'ai hoh nuwheni 'ink'ez 'uyoon chah 'et hudelhts'i, Paul bugha tezdudlih Jerusalem ts'ih tooya whuch'a. ¹³'Et nendulhni, "Et di ka ahtso 'ink'ez sudzi tso ulh'i? Jerusalem satelhghel 'et huba lhadúst'ah, 'et whunts'ih 'o 'un Sizi Gri neMoodihti 'en buba 'et datésah huba lhadúst'ah ho' 'ust'ah." ¹⁴'Et whunts'ih 'aw nek'ah ts'ih cha'ínil, 'et huwa, "T'ezdánil, nts'e na'a neMoodihti hukwa' ninzun k'una'a 'ahóneh," ts'utni. ¹⁵'Et hukw'elh'az astl'iyaz 'et nazdélhts'i 'ink'ez ndai ne'ezdlai, 'i lhanázdinla 'ink'ez Jerusalem ts'ih naztesdel. ¹⁶'Et bulunah Sizi Gri yugha hoodul'eh, Caesarea whut'en, 'en chah nelh hítezdel. 'En ndun dune buzih uzdutélts'ilh hits'un nenihuníla, Cyprus whut'en, Mnason hiyúlhni, 'en 'uda whuts'un buba 'alha' hooht'ah 'int'ah.

Paul, James ts'un nuséya

¹⁷Jerusalem ts'ih ts'unindel hoh, ndunnah huba 'alha' hooht'ah, 'en nehunelhnik. ¹⁸'Et 'om bun dzin Paul néh tez'az James uzte'ílh wheni, 'ink'ez ts'iyawh butsub whudelhdzulh, 'en chah 'et hudelhts'i. ¹⁹'Et Paul, "Dahooja," hubúlhni. 'Ink'ez ts'iyawh nts'oh 'udun yun k'ut whut'en hubutah hube 'ut'en be Yak'usda ne'ust'en, 'et hubugha hubulh náwhulnuk. ²⁰'Et hidánts'o hoh ts'iyawh Yak'usda ba hodélhti 'ink'ez Paul 'uhiyúlhni, "nelhtsin whunulh dáhooht'ah tube lhanah Lizwif huba 'alha' hooht'ah sulí hoonli 'ink'ez ts'iyawh Moses bughunek 'uk'une'úsduguz, 'i soo cho hik'úne' 'ut'en. ²¹'En nyulh 'úhudants'o nts'e na'a Lizwif 'udun yun k'ut hudelhts'i, 'en whubodilh'eh. Moses bughunek 'uk'une'úsduguz, 'i hiladootnih, 'ink'ez buzkeh hika dune unli, 'i k'ut hubutét'us, 'ink'ez Lizwif k'una'a dune hinli 'i chah 'ustle' 'uhooneh, whuz na'a hubodilh'eh hutni. ²²Njan whusainya hubugha t'ewhuntedzeh ho' hooht'ah 'ink'ez dats'óneh simba? ²³'Et huwa ne'úzduni tune'ónt'en. Dinah dune Yak'usda ts'un nahezya, 'en njan nezih hudelhts'i ho' hint'ah. ²⁴'En hubulh 'int'en 'ink'ez but's'ún nidenya, 'ink'ez nts'e na'a duna'huldoh nyun huba 'uk'elháhoolltsi, 'et soo dutsi náhunoozo. 'Et ndínja t'eh, 'et whuz na'a nyunch'oh ndi Moses bughunek 'uk'une'úsduguz, 'i ts'ah'un na'a buk'úne 'int'en hunoozin. 'Ink'ez daja nch'a nyuhútni, 'et huba 'alha' cha'whudoosnih. ²⁵'Et whunts'ih ndunnah 'udun yun k'ut whut'en huba 'alha' hooht'ah sulí but's'ó k'e'ts'anguz 'ink'ez nts'e na'a 'uzdeja, 'et ndo buzdáni ndai ts'uyi, 'i buyak'usda k'edeltsi ts'un hífulhdelh, 'i wah'alh gunih. Ts'ekoo k'us dune bulh tinta' 'ooht'en

gunih. Khunai buze 'úsduguz, 'i 'ink'ez 'uskai butantsus, 'i wah'alh gunih, 'ink'ez 'uskai chah wahnai gunih."

Paul luglez whucho 'et hiyílhchoot

²⁶ 'Et huwa Paul ndunnah dinah dune hubílhchoot 'ink'ez 'om bun dzin 'et nts'e na'a duna'huldoh 'et hubulh duna'elde. 'Aw 'et hubuluglez whucho danánja, 'et hoh 'aw 'et Lizwif k'una'a buna'éde. 'Ink'ez Lizwif nawhulnuk hubudáni dáwhuldzah dzin 'et 'uhuter'ilh njan 'et lhahódulelih whuts'un Yak'usda buk'wuzdai k'ut 'ilhunah hinli hoh huba 'uhudutélhk'un. ²⁷ 'Aw 'et skwunlai 'o 'at nat dzin 'ust'l'e 'uwhuténih hoh, bulunah Lizwif, Asia yun k'ut ts'ih huhánde, Paul luglez whucho 'et hiya'en. Bulunah 'ilhohuwezdel tubulh lhba hodit'ai hoh Paul hiyílhchoot. ²⁸ 'Et 'ahúlzul hoh hahuhéyih, "Israel hubuts'un háhzut, nela 'uhneh! Ndun dune 'en 'int'ah, nduhoolchoo nuya 'ink'ez Israel hubuts'uh hainzut Moses bughunek 'uk'une'úsduguz, 'i 'ink'ez neluglez whucho chah ts'iyawh whuch'a yálhtuk. 'Ink'ez k'an 'udun yun k'ut whut'en chah neluglez whucho dáóobuninla, 'et hoh neba me whulhtsi!" hutni. ²⁹ 'Et ndun dune Trophimus, Ephesus whut'en, 'en Jerusalem 'et Paul bulh na'as hoh hinah'en inle. 'Et Paul hubuluglez whucho dáinilhti huninzun 'et huwa 'uhutni. ³⁰ Jerusalem ndulhcho hoh dune dzuh hubutaoodelts'ut. Ts'iyawh 'ilho 'ilhunahowelhúghaz, Paul hiyílhchoot, 'ink'ez hubuluglez whucho 'et t'ínahininguz. 'Et 'ahoh hubuluglez whucho dána'denke. ³¹ Ndunnah luhul nudelh Paul hizoolghelgh hukwa' hut'en hoh nehughan moodih hudáni, "Jerusalem whut'en ts'iyawh lhtahawh'unt'ai!" hubuhútni. ³² 'Et 'ahoh nehughan moodih 'uyoon moodih 'ink'ez nehughan chah hihlchoot 'ink'ez 'iluhowezezel but's'un whehéghaz. 'Et ndunnah dune nehughan bulh hubotelh'en hoh 'et Paul njan hiyedúlh 'ust'l'e 'uhiyínla. ³³ 'Et nehughan moodih Paul yughuninya, yílhchoot, 'ink'ez nankoh tes t'ool be hiyoollghel hubulhni. 'Ink'ez huboodulhuk, "Ndun dune ndan 'int'ah, 'ink'ez daja hoh tinta 'unt'en?" ³⁴ 'Ilhuhowezezel ts'iyawh lhelhts'un na'a 'uhutni hoh hahuhéyih, 'o nus higha 'un ha' dani k'et nehughan moodih dáhooja 'aw t'echaonízil. 'Et huwa budune Paul nehughan delhts'i ts'ih hitoolhte hubúlhni. ³⁵ Soo buk'ut dughaíti ts'ih hitelhti, 'et dune budánde. 'Et 'o nus hiyulh húnilh'e, 'et huwa nehughan 'en hitelhti. ³⁶ Ts'iyawh hiyunelwus 'ink'ez 'uhúldzul hoh, "Sulhge!" hutni.

Paul duba yanaltuk

³⁷ 'Aw 'et Paul nehughan delhts'i ts'ih hitelhti hoh nehughan moodih bulh yátelhtuk, "Nyulh yatelhtuk hukwa' nuszun." 'Et nehughan moodih 'uyúlhni, "Greek k'una'a chah ih yayilhtuk?" ³⁸ "Et Egypt ts'ih háinya dune 'en tulih 'unint'ah? Nyun tulih 'inja, ndunnah 4,000 nehughan dudulh dune dzuh nuhulhdeh hubuzílhtsi? 'Ink'ez dune chahóot'ih ts'ih whuz huba whénya, nyun tulih 'int'ah?" yúlhni. ³⁹ 'Et Paul 'utni, "Si Lizwif 'ust'ah. Tarsus, Cilicia yun k'ut whuz'ai, 'et keyah whudézi", 'et whust'en. Ndunnah dune hubulh yatelhtuk, 'et sugha ooni'aih." ⁴⁰ 'Et nehughan moodih yugha óoni'ai, 'et Paul dughaíti siyin 'ink'ez dune huba núlnih hoh t'ehudínel 'ink'ez Paul, Hebrew bughunek k'una'a hubulh yáwhenilhtuk.

22

¹ 'Et ndo búlhni, "Sulh dune, sulhutsinkah, 'ink'ez 'ubákah, soo sih soo zélhts'ai, k'an nohwulh duba yanatelhútuk!" hubúlhni. ² 'Et Hebrew bughunek k'una'a hubulh yawhénilhtuk hidits'o hoh 'o nus t'ehudínel. 'Et Paul 'utni, ³ "Si Lizwif 'ust'ah. Tarsus, Cilicia yun k'ut whuz'ai 'et whuzíli. Jerusalem 'et néyi, ndun Gamaliel 'en whusodalh'i hoh netsuh whudelhdzulh hik'úne' 'ut'en, 'i soo cho yusodalh'i. K'an nuhwheni Yak'usda ba but's'u nint'uk, si chah whuz na'a zeh ndust'ah inle. ⁴ Ndunnah Sizi hunedulh ts'iyawh dahútetsah whuts'un hubube' zúsdla inle. Dune 'ink'ez ts'ekoo chah ts'iyawh tsak'ebusdle inle. ⁵ Náwhulnuk degna nus dezti 'ink'ez ts'iyawh dune ts'uh whudelhdzulh, 'en ts'iyawh ts'ah'un 'udusni, 'en chah ndun whadóoni, ndai Lizwif dédowh Damascus delhts'i hubuts'un k'e'hanguz, 'i si st'ahíyanla 'i bugha dune hubuts'un téya hubutélhcholh 'ink'ez tes t'ool be hubutélghel 'ink'ez Jerusalem ts'ih dzuh nubotelhdzut wheni, whuz whebusdle inle.

Paul, Sizi ts'ih náih'a howu yalhtuk

⁶ "Et hoh wheghah usyalh ho' hooja, 'aw 'et Damascus wheghah dzetniz bat'en khunyaz ndus de kwun ulhtus, 'i hadanat, 'ink'ez sunat nudéznat. ⁷ 'Ink'ez yun nadelhúduz 'et 'uduzíts'ai 'ink'ez njan nduwhutni oozalhts'a, 'Saul di ka dzuh nusíldzut ho' 'int'en?" ⁸ 'SMoodihti ndan inli? dusni hoh oodulhuk. 'Sizi, Nazareth whut'en usdli, si 'usil'h'en dzuh nusíldzut, 'súlhni. ⁹ 'Ink'ez ndunnah dune sulh nuwuhedelh ndi kwun hiya'en 'ink'ez hoh hunuljut, 'et whunts'ih ndan sulh yatelhtuk 'aw chahidíts'il. ¹⁰ 'Et 'udusni, 'SMoodihti datésnih?" 'Ink'ez neMoodihti 'usúlhni, 'Dinadindaih, 'ink'ez Damascus ts'ih inyalh 'ink'ez 'et ts'iyawh ndun yadooni ndet Yak'usda ba datánt'ilh.' ¹¹ 'Et 'usja ndi kwun tube sunat nudeznat k'et chaozes'en suli, 'et ndunnah sulh nuwuhedelh sula hihlchoot 'ink'ez Damascus

ts'ih sanilhya. ¹² 'Et 'ilhunuh dune Ananias hiyúlhni, 'en Moses bughunek 'uk'une'úsduguz, 'i yuk'úne' 'ut'en 'ink'ez Lizwif Damascus whut'en ts'iyawh hidelhti. ¹³ 'Ink'ez 'et sughu ninya hoh suzih siyin 'ink'ez 'usúlhni, 'Saul sulhutsin, whé'en naoondle!' 'Et ndudeja ibulh 'ahoh nduk yutá'en 'ink'ez whunilh'en nasdli. ¹⁴ 'Ink'ez 'usúlhni, 'Netsuh whudelhdzuhl hubuYak'usda 'en 'utahányalhti Yak'usda be 'ut'en k'ah t'éoononzeh ka 'ink'ez ndun ts'ah'un na'a 'unint'ah 'en ta'ilh 'ink'ez dich'oh chah 'et yulh yátelhtuk. ¹⁵ 'Et nyun ts'ah'un ndun Sizi bugha ndo hubudutánih ndet ho'en 'ink'ez whudánts'o hubugha. ¹⁶ 'Ink'ez k'an dant'i ba ilh'i? Didinyih 'ink'ez neMoodihti boozi 'i be but's'un tedondli hoh too be 'oneh, 'i bugha sih nlubeshi nyuna'doodeh!' "

Yak'usda, Paul 'udun yun k'ut whut'en ts'un yutelh'a

¹⁷ 'Et Paul 'o 'un ndo búlhni, "Et Jerusalem ts'ih whenásja 'ink'ez nuhluglez whucho tenadusdli whutah 'et njan sunalhts'et hawhélt's'ut hoh, ¹⁸ neMoodihti 'en nulh'en 'ink'ez 'usúlhni, 'Soo 'a njan Jerusalem whuch'a nanindaih. Si sugha yailhtuk 'aw nyuhoozóllhts'a hukwa cha'hunízun 'et huwa.' ¹⁹ 'Ink'ez 'udusni, 'NeMoodihti, nts'e na'a hoh luglez totsuk whubulh ndunnah nyun buba 'alha 'int'ah, 'en ts'iyawh hubulhchukw 'ink'ez dzuh nob-ulhdzut inle, soo cho nt'ehonínzun. ²⁰ 'Ink'ez Stephen nyun ngha dune hubulh yáhtuk, 'et hukwa hizelghhi, hoh da si chah 'et siyin inle, suba ts'ah'un 'uhut'en. Ndunnah nehughan hubudzoot, 'i huba bughusdli.' ²¹ 'Et whunts'ih neMoodihti 'usúlhni, 'Inyalh, nilhdza 'udun yun k'ut whut'en butúz nyutéhl'ahl!" ²² 'Et dune 'ilhuhowezdel Paul huyoozóllhts'ai 'et whunts'ih 'et ndudéja hoh soo hubuyiz t'ahúzuhl hoh 'uhutni, "Nalhtel, sulhghe, 'aw khoona huba cha'ít'ah!" ²³ Soo 'uhultus hoh dunaih k'uhídutulch'oolh 'ink'ez whuske k'et lhez chah nduk hótudzih. ²⁴ 'Et ndun Roman nehughan moodih, 'en Paul ndet nehughan délhts'i whuz nahitoolhte 'ink'ez hiyoolhtsas hoh hiyoodolhuk ndet huwa ndunnah Lizwif hiyúlh 'alzul hubúlhni. ²⁵ 'Et whunts'ih 'aw 'et hiyootelhtsus wheni hiyulhghel hoh ndun Paul huwunli, 'et siyin 'en 'uyúlhni, "K'us ndan Roman yun k'ut whut'en, 'en ba nahutedeh whutsuh ootalhtsus mba' hoont'ah ih?" ²⁶ 'Et ndun huwunli whudánts'o hoh nehughan moodih yughu ninya 'ink'ez yoodulhuk, "Daint'en hoh 'int'en? Nduun dune Rome yun k'ut whut'en 'int'ah!" yúlhni. ²⁷ 'Et dich'oh nehughan moodih Paul yughu ninya 'ink'ez yoodalhtuk, "Rome yun k'ut whut'en inli ih?" "A," ni Paul. ²⁸ 'Et nehughan moodih 'en 'utni, "Si lhai sooneya hukw'elha sílshi hoh Rome whut'en sili 'ust'ah." 'Ink'ez Paul 'utni, "Si 'et whuzúsdli 'et huwa hube'ilhdzun usdli." ²⁹ 'Et ndunnah dune Paul hiyoodutelhtuk, 'ahoh hich'a nasdel 'ink'ez ndun nehughan moodih t'éoonanzin Paul Rome yun k'ut whut'en 'int'ah 'ink'ez lhez'ínla yulhghel chah 'uyínla 'et huwa whenelhújoot.

Paul nahéyilh yubut siyin

³⁰ Nduun nehughan moodih soo naóote'alh hukwa' ninzun, ndet hukwa Paul hiyulh whuske. 'Et huwa 'om bun hububa ne'duni Paul, 'en tes t'ool hits'ahanahiyana 'ink'ez ndunnah náwhulnuk degha nus dézti, 'ink'ez nahéyelh chah ts'iyawh, 'anih hubúlhni 'ink'ez Paul hibut nihínilhti.

23

¹ Paul soo cho hubunilh'en 'ink'ez ndo búlhni, "Sulhutsinkah neyah ts'ih bugha t'ets'oninzun* 'i bugha Yak'usda but 'ahoolhyez be khusna, 'i k'an dzin whuts'un ts'ah'un na'a 'ust'ah." ² Nduunah náwhulnuk degha nus dezti, Ananias hiyúlhni, 'en Paul hizih siyin, 'en hizek hokat hubúlhni. ³ 'Et Paul 'uyúlhni, "Yak'usda 'en chah nyunokat. Koo bez whuzih whudutsun, 'i naoodesdul'tus, 'i li'nint'ah hoh nyo 'et sinda 'ink'ez ndai Yak'usda bughunek netl'aída'ai, 'i bugha suba nahutanyeh, 'et whunts'ih suhóonokat hukwa huwaoo bilh'a, 'et whuz na'a Yak'usda bughunek k'uninyis ho' dini!" ⁴ Ndunnah dune Paul zih nuhudelhúya 'uhiyúlhni, "Nduun Yak'usda bunáwhulnuk degha nus dezti buba dzuh 'udenja." ⁵ 'Et Paul 'utni, "Sulhutsinkah 'aw nt'éoonuzúszun 'en náwhulnuk degha nus dezti unli. Yak'usda bughunek 'uk'une'úsduguz, 'i k'ut ndutni, 'Nuhmoodih 'en dzuh ts'ih bughi yaoolhtuk gunih." ⁶ 'Et Paul hubunilh'en 'ilhuhowezdel bulunah Sadducee 'uhint'ah 'ink'ez bulunah chah Pharisee 'uhint'ah hoh tube cho hubulh yátelhtuk, "Sulhutsinkah si chah Pharisee 'ust'ah! Pharisee ye' usdli, 'ink'ez suba 'alha' hoont'ah yaidla dinahudutédluh 'et huwa njan suba nahutedeh huba sída!" ⁷ 'Et ndudéja ibulh Pharisee 'ink'ez Sadducee teh lhéwhendunidulh 'et huwa 'ilhuhowezdel nawh lhk'ehankat suli. ⁸ 'Et Sadducee yaidla dinahudutédluh 'ink'ez lizas chah, nudúdeh chah hoonli 'et 'aw huba 'álha' cha'hóot'ah, 'et whunts'ih Pharisee ndulhcho 'et huba 'álha' hoont'ah. ⁹ 'Et 'o nus 'ulcho, 'i be 'awhéhúnilzul 'ink'ez Moses bughunek 'uk'une'úsduguz, 'i hodulh'eh, Pharisee dédowh, 'en dihúndel 'ink'ez tube cho whuch'a hutni, "Nduun dune 'aw hoontsi' bughú nachats'uhóo'al. Lizas tulih

* **23:1** Ndi khunek "Neyuh ts'ih huwa t'ets'oninzun", 'i hoonli ts'ih'un na'a k'us tink'us 'uhoont'ah, 'i gha t'ets'oninzun, ts'utni ho' ts'utni.

k'us nududeh, 'i tulih yulh yáltkuk hoh tulih 'utni! 'Et huwa Yak'usda buyénah uzdooni ghaít'ah." ¹⁰ Whuz tube lhtah 'uhutni k'et, Roman nehughan moodih whenel'hújoot Paul yahidólhch'oolh ninzun, 'et dulh lhadughan, 'en Paul bugha hanahíyoolhtelh 'ink'ez ndet nehughan delhts'i 'et whuz hitoolhte hubúlhni. ¹¹ 'Et 'ulh'ek zeh neMoodihiti Paul yuzih siyih 'ink'ez 'uyúlhni, "Soo cho ndzi 'ulhtus 'ududíl'i. Njan Jerusalem nts'e na'a si sugha ts'ah'un hubudáni 'et Rome chah whuz na'a zeh 'udutánih."

Bulunah Lizwif Paul hituzelghelh hukwa' huninzun

¹² 'Et 'om bun bundada bulunah Lizwif 'ilhúhowezdel 'ink'ez 'ilho nahúhezya hoh nduhútni, "Cha'ts'oos'al 'ink'ez too chah cha'ts'oosnai Paul ts'utuzilghelh whuts'un." ¹³ Ndunnah ts'iyawh dit lanezi 'o 'un 'uhunelstuk 'en hukw'u núhuhilhye. ¹⁴ 'Aw 'et Lizwif náwhuluk degha nus dézti 'ink'ez hubutsuh whúdelhzulh chah hubugha nindel 'ink'ez hubuhútni, "Ts'iyawh 'ilho nats'úhezya 'aw cha'ts'utes'al Paul ts'utuzelghelh whuts'un. ¹⁵ 'Et huwa k'an 'et nuhwheni 'ink'ez nahuhéyelh tubull ndun Roman lhudugan moodih 'en but's'ótl'a khunek áh'aih 'aonilhka Paul ndez náhitoolhte 'o nus soo cho be 'ut'en k'ah t'ewhuntezeh 'et wheni doohtni. 'Et wheni huba lhzadoot'e njan nenátedalh whuts'un ts'uzoolhghelh," hubuhútni. ¹⁶ 'Et whunts'ih Paul bulhtus buye 'en whulh 'udants'o hoh, 'et nehughan delhts'i ts'ih ninya 'ink'ez Paul ndiyúlhni. ¹⁷ 'Et Paul 'ilhunuh nélhghel, "Anih," yulhni, 'ink'ez 'uyúlhni, "Ndun chilh nehughan moodih ts'ih ílhtelh, hoonliyaz 'un yudutenilh." ¹⁸ 'Et nélhghel yílhchoot 'ink'ez nehughan moodih ts'un wheyalhti 'ink'ez 'uyúlhni, "Paul tsak'edi'ai 'anih sulhni 'ink'ez ndun chilh nts'u tóolhte súlhni, hoonliyaz nyuduténilh 'et." ¹⁹ 'Et ndun nehughan moodih yula ílhchoot 'ink'ez dune hoolah ts'ih nénilhti 'ink'ez yoodulhktuk, "Dahoont'ah hubugha 'usudutánih?" yúlhni. ²⁰ 'Et 'uyúlhni, "Ndunnah Lizwif moodih bunt'ah nyuhóodutélhktuk, Paul nahayelh ts'un tolhte nyoduténilh, 'aonilhka 'o nus soo cho highu t'ewhuntezeh, 'et wheni hudutenilh. ²¹ 'Et whunts'ih khun teh huboozólh'ts'a gunih! Dit lanezi 'o 'un Lizwif, 'en ti hika ódelhts'i, 'en ts'iyawh hituzelghelh whuts'un 'aw cha'hutes'al 'ink'ez too chahutesnil hutni hoh nahúhezya. K'an 'ahoh 'uhutenilh huba lha'húdní'ah, nyun nahútanyeh 'et zeh hubahilhi," yúlhni. ²² 'Et nehughan moodih utni, "Khun teh 'uyoon ndudóni gunih, njan ndusudani 'et." 'Aw 'et chilh whenáyalh'a.

Paul, ndun Felix yun moodih ts'ih whehíyalhti

²³ 'Et ndun nehughan moodih nélhghel moodih nanah, 'en hubuka' dani 'ink'ez ndo búlhni, "200 nehughan lhábudahleh keyah Caesarea ts'ih tehduh, skwunlai 'o 'at nankoh lanezi (70) yeztli be nahúdelh chah, 'ink'ez 200 sohtuz nudúle chah, 'ulh'ek lanezi 'o 'at lhuk'i hoolah hukw'éhunint'o t'eh bat'en (9:00) 'et hutédulh wheni lha'húdoot'e. ²⁴ Paul chah yeztli buba lhadáhleh, soo cho bughohle hoh Felix, yun moodih, 'en but's'un niyóolhtelh." ²⁵ 'Et 'ink'ez nehughan moodih yuts'o k'e'anguz, 'i ndutni, ²⁶ "Felix yun moodih dezti si Claudius Lysias nts'ó k'e'úsages, dahooja. ²⁷ Lizwif ndun dune hiyílhchoot 'ink'ez hituzelghelh ínlé. Rome keyah whut'en unli 'et whulh 'údusts'o 'et sulh nehughan ílhchoot 'ink'ez hubugha hunayunihúti. ²⁸ Ndet hukwa hiyílhchoot 'et naootés'alh, 'et huwa Lizwif yuba nahayelh ts'ih whéhlhti. ²⁹ 'Aw hoonliyaz tink'us 'út'en bugha nachawhús'al datéts'ah k'us huwa 'átelts'ulh huba. 'Ants'ih duk'una'a hiba nahooyeh hukwa' hutni. 'Et huwa hich'a yalhtuk. ³⁰ 'Ink'ez ndet Lizwif ndun dune hituzelghelh hukwa yahulhtuk sudáni hoh, 'ahoh nts'u tóolhte nuszun. 'Ink'ez ndunnah yuch'a yahulhtuk, 'en chah, lha'uhughan hubulh nyun nts'o tooya hubudúáni. Soo cho khondle." ³¹ 'Et nehughan nduhóot'en hubúlhni t'eh, hoh tune'hust'en, Paul hiyílhchoot 'ink'ez 'et 'ulh'ek zeh keyah Antipatris huwhútni ts'ih lhga hidilhti. ³² 'Et 'om bun nehughan yun nuhulghas 'en ts'iyawh nehughan delhts'i ts'ih nahundel, 'ink'ez yeztli be 'uhut'en, 'en zeh Paul bulh hutoodelh ka. ³³ 'Et keyah Caesarea ts'ih hinílhiti, 'et yun moodih chah yuts'ó k'e'anguz, 'i hitl'ahíyaa'ai, 'ink'ez Paul chah hitl'ahíyálhti. ³⁴ 'Et yun moodih ndi yuts'un k'e'anguz, 'i yuk'eyailhtuk 'ink'ez Paul yoodulhktuk, "Nts'ez de yun k'ut haínya?" yúlhni. 'Et yun k'ut Cilicia huwhútni ts'ih haínya t'éoonanzin hoh, ³⁵ 'et utni, "Ndunnah nch'a yáhalhtuk whusaháandel t'eh, 'et nyoozólh'ts'a." 'Et Paul, Herod bukoo whucho ts'ih hitoolhte, 'ink'ez híghole ndo búlhni.

24

Ndunnah Lizwif, 'en Paul ch'a yahalhtuk

¹ 'Aw 'et skwunlat dzin ínlé hoh, náwhuluk degha nus dezti, Ananias hiyúlhni, hubutsuh whúdelhdzulh chah, 'ink'ez 'ilhunuh dune yalhtuk, Tertulus hiyúlhni, 'en ts'iyawh Caesarea ts'ih hunindel. 'En yun moodih, Felix hiyúlhni, hibut 'et Paul ch'a yáhalhtuk. ² 'Et Paul dáhinilhti 'ink'ez ndun Tertulus dune yalhtuk, Paul ch'a yáwhenilhtuk hoh ndutni, "Degha nus dezti hoonih hoh neghinli 'et huwa sa hoh neyun k'ut whudezghel 'et ndúhont'e, 'ink'ez lhat hoh neyun k'ut soo 'uts'oot'e neba ná'hoonla. ³ 'Et huwa 'ahoolhyez ts'uhóont'i neilh'i

tube neul dune nts'útni. ⁴ 'Aw sda sa nyostun ghaít'ah, 'et whunts'ih hoontsolyaz khunek be nyulh yasztéltuk, neozólhts'a nts'u tédusdlih. ⁵ T'éts'onínzun ndun dune tube wheóonujut hoh ntsi' dune unli. Yun k'ut ndulhcho hoh 'en bugha Lizwif chah lhtáhúwhút'aih 'ink'ez Nazaren hubutsuh nuya 'ududil'i. ⁶ 'Ink'ez Lizwif hubuluglez whucho 'et chah me neba whulhtsi, 'et ts'ílhchoot whenich'oh nek'una'a buba nats'ateyeh hukwa' uzninzun. ⁷ 'Et whunts'ih ndun nehughan moodih, Lysias hiyúlhni, danínya 'ink'ez negha hanáyulti. ⁸ 'Et Lysias 'en ndun Paul ch'a yálhtuk nyun nts'ó toodelh hubúlhni. 'Et nyunch'oh ndun dune oodilhkut t'eh, tube lhat hoh bughu yats'ulhtuk t'éwhunonzeh." ⁹ 'Et Lizwif chah Paul ch'a yalhtuk ts'iyawh 'alha' hutni, hutni.

Felix bubut Paul duba yanalhtuk

¹⁰ 'Et yun moodih Paul yatelhtuk yutl'ahó'ai hoh ndutni, "T'éoonúszun ndi yun k'ut lhat naooodezut 'et nahéyelh inle, 'et huwa hoonúst'i hoh mbut duba yanalhútuk. ¹¹ 'Et nyunch'oh nahó'alh 'aw lanezi 'o 'at nat dzin bat'en inle teni' ntesdzilh ka, Jerusalem ts'ih teya. ¹² 'Aw Lizwif hubuluglez whucho 'et dune ch'a ts'un cha'duzusnih hoh Lizwif chasuhés'en, 'ink'ez bukeyah 'et dune lheoobulhdulh 'et chah chasuhés'en. ¹³ Daja suhútni 'aw ts'ah'un mba nehúho'ah ghaít'ah. ¹⁴ 'Et njan nyudúsní ndunnah Sizi k'una'a 'uhuninzun 'et whuz na'a si chah netsuh whudelhdzulh buYak'usda buts'un teni' nulhdzun, 'et whunts'ih ndunnah Lizwif whuch'a yáhalhtuk. 'Ink'ez Moses bughunek 'uk'une'úsduguz, 'i 'ink'ez Yak'usda be nus whúnih'en 'uk'une'huzguz, 'i chah suba 'alha' 'int'ah. ¹⁵ K'us ndan yaidla unzoo k'us ntsi' inle ts'iyawh dinahudutédulh, Lizwif huba 'alha' hoont'ah, whuz na'a si chah Yak'usda suba 'alha' 'int'ah. ¹⁶ 'Et huwa si 'ahoolhyez Yak'usda ts'un 'ink'ez dune chah ts'un nayah ts'ih bugha t'ets'onínzun* 'i bugha ts'ah'un na'a oost'e hukwa 'ust'en. ¹⁷ 'Et hukw'elh'az lhat naooodezut hoh Jerusalem keyah niya. 'Ink'ez sulh whut'en ba ndai sooneya huba 'ilhunanyaghe'ai, 'i hubuts'u naínte'ai 'ink'ez Yak'usda ts'un Yak'usda buk'uzdai k'ut 'udutélhk'un wheni whuz lhgha nadusja. ¹⁸ 'Et hubuluglez whucho Lizwif soo cho hubuna'udeh k'una'a lhaóodusla inle. 'Et whutah ndust'en hoh suhá'en. 'Aw dune 'ilhuhowezdel 'ink'ez 'aw hoonliyaz lhenah cha'hudusnih ilah inle. ¹⁹ 'Et bulunah Lizwif Asia yun k'ut whut'en chah 'et hudelhts'i, 'en mbut nihóodelh huba' hoont'ah 'ink'ez sch'a yáhoollhtuk hoonliyaz hoh senah 'úhint'ah t'eh. ²⁰ K'us ndunnah teh nyodóni ndet hoh tinta' nust'en sughu náháhóo'ai neba nahéyelh hububut síyin hoh, ²¹ 'et whunts'ih nahéyelh but síyin hoh, 'ilhuh ze' dusni, 'Yaidla dinahudutédulh suba 'alha' hoont'ah, 'et huwa k'an dzin 'et suba nahinyeh." ²² 'Et Felix ndai Sizi k'una'a 'int'ah, 'i bugha soo t'éoonínzun. 'Et Paul yuba nahooyeh hukwa cha'nízun 'et ndo búlhni, "Nk'at lih nehughan moodih Lysias whusaínya t'eh, mba nahoosyeh." ²³ 'Et Paul nélhghel yughunli 'ulhni, "Ahooolhyez bughinli, 'et whunts'ih 'o nusyaz k'úne' oot'en whute bulh dunekah hits'ú k'unaoodulh 'ink'ez ye ndunidzit, 'i be highole ka."

Paul, Felix 'ink'ez Drusila hububut ninínya

²⁴ 'Et dzuh lhat dzin inle hoh Felix bu'at Drusila bulh whusahá'az, 'en chah Lizwif 'int'ah. 'Et Paul hikunáwhulh'a, nts'e na'a Christ buba 'álha' 'int'ah 'et hubugha hubulh yálhtuk, 'et hiyoozélhts'ai. ²⁵ 'Et whunts'ih Paul, Yak'usda be ts'ah'un na'a 'uhoont'ah, 'i 'ink'ez nuwwhenich'oh khuts'udli chah, 'ink'ez neba nahutedeh dzin whusaóotelts'ulh t'eh, 'et hubugha wheóobunoolhtun hukwa' utni. 'Et Felix nelhújoot 'ink'ez utni, "Aw 'et k'an naindalh, doo chah nkana'doosni, sughá whults'ut t'eh." ²⁶ 'Et yalhtuk whutah, "khun teh Paul sooneya sughá óo'ah, 'et bulanadoosnih," nínzun. 'Et huwa lhat hoh yuka' dunih 'ink'ez yulh yálhtuk. ²⁷ Nat naooodezut inle, Porcius Festus hiyúlhni, 'en Felix yun moodih yuk'énadeja. Felix 'en Lizwif dune unzoo hunoozin nínzun 'et huwa Paul tsak'edil'h'ai.

25

Paul, Rome whut'en hubudayi cho degha nus dezti, Caesar hiyulhni, 'en yubut níóoya yuts'u húkwa' utni

¹ 'Ink'ez tat dzin inle Festus yun moodih Judea yun k'ut ts'ih ninínya. 'Et keyah Caesarea whédinya 'ink'ez Jerusalem ts'ih ninya. ² 'Et náwhulnuk degha nus dezti 'ink'ez Lizwif bumoodih Festus ts'ih hunindel hoh Paul hich'a yálhtuk 'ink'ez Festus highu tédudlih, ³ Paul, Jerusalem ts'ih naitoolh'a hukwa' hunínzun 'et hoh dula 'ooneh hiyúlhni, 'aonnilhka hiba lhaóodinla hoh wheghah uyalh t'eh, 'et hituzelghelhel 'et wheni. ⁴ 'Et Festus 'utni, "Paul, Caesarea 'et tsak'edi'ai unli ho' 'int'ah. 'Et sich'oh chah 'ahoh 'et whuz natesdalh. ⁵ 'Et nuhmoodih sulh náhutodelh 'et hich'a yaóolhtuk Paul tinta' 'unt'en hoonli t'eh," hubúlhni. ⁶ 'Et lanezi dzin bat'en 'et hubutah índá, 'et 'ink'ez Caesarea ts'ih whenya. 'Et 'om bun 'aw 'et

* **24:16** Ndi khunek "Neyuh ts'ih huwa t'ets'onínzun", 'i hoonli ts'ih'un na'a k'us tink'us 'uhoont'ah, 'i gha t'ets'onínzun, ts'utni ho' ts'utni.

dune ba nahedelh hukw'étl'adida 'ink'ez, "Paul dahíyoolhtelh," hubúlhni. ⁷ 'Et Paul danínya hoh Lizwif Jerusalem ts'ih haíndel higha wezdel 'ink'ez lhat hooncha 'et tinta' 'unt'en hiyúlhni hoh hich'a yálhtuk, 'aw ts'ah'un 'alha' hutni huhoolhtsilh ghaít'ah. ⁸ 'Et whunts'ih Paul duba yanaltuk hoh ndi yúlhni, "Aw Lizwif be huba nahesda, 'ink'ez hubuluglez whucho, 'ink'ez Roman hubudayi cho, 'en chah but's'un tinta cha'ust'il." ⁹ 'Et Festus, Lizwif soo cho huba 'uja, 'et huwa Paul yoodulhuk, "Jerusalem ts'ih ndi hiye nch'a yálhtuk, 'i bugha whuz subut tanyin hukwa' ninzun ih?" ¹⁰ Paul 'utni, "Njan Rome whut'en hubudayi cho dega nus dezti, 'en Caesar hiyúlhni, dich'oh nahéyelh, 'et mbut síyin 'et suba nahooded huba' ust'ah. Lizwif hubuts'un tinta cha'úst'il nyunch'oh soo cho nt'eeonínzun. ¹¹ 'Et be ba nahesda, 'i k'uníyuz t'eh, k'us hoonliyaz hukw'elha daóosah huba' hoont'ah 'usja t'eh, 'aw whuch'a ne'óost'en ghaít'ah. 'Et 'aw soo daja 'uhútni 'alha' cha'hóot'ah t'eh, 'aw dune hubutl'asóolhtelh hoolah. Rome whut'en hubudayi cho dega nus dezti 'en but neóosya 'et nts'u húkwa' dusni." ¹² 'Et Festus yugha utni 'en naboodelkuk hukw'el'h'az, 'et Paul 'uyúlhni, "Rome whut'en hubudayi cho dega nus dezti but nitányalh hukwa' ninzun, 'et huwa Rome whut'en hubudayi cho dega nus dezti, 'en bubut neóonya!" yúlhni.

Festus, hubudayi cho Agrippa, 'en Paul bugha yúlh yalhtuk

¹³ 'Aw sa ilah hukw'el'h'az hubudayi cho Agrippa hiyúlhni 'ink'ez ts'eke yúlh na'as, Bernice hiyulhni chah, Caesarea ts'ih huni'az, Festus dahooja huba hudutenilh ka. ¹⁴ 'Aw 'et lhat dzin hanke hukw'el'h'az Festus hubudayi cho Agrippa Paul bugha dáhoont'ah ts'iyawh yulh náwhelnuk, "Njan 'awhuz 'ilhunuh tsak'edi'ai 'et usda, 'en Felix' aya'ai ínle. ¹⁵ 'Ink'ez Jerusalem ts'ih níya hoh Lizwif náwhulnuk dega nus dezti 'en 'ink'ez hubutsuh whudelhdzulh chah hich'a yálhtuk 'ink'ez datetsah huba buba nahoosyeh ka sut's'un téhudulh. ¹⁶ 'Et whunts'ih ndo hubudusni, 'Rome hubuk'una'a 'et ndúhoont'ah, dune tinta' 'unt'en daóotsah ka dáhni t'eh, 'udechoo yuch'a yálhtuk hububut inyini 'ink'ez hububut yuk'ého'alh huba' hoont'ah, 'aw 'et t'eh zeh huba nahutedeh." ¹⁷ 'Et whusahándel hoh 'om bun 'ahoh dune ba nahudeh, 'et nátl'adesda 'ink'ez, 'Ndun dune dahíyoolhtelh," hubudúzni. ¹⁸ 'Et yuch'a detni, 'en dihudíndel tube yuk'éhóte'alh nuszun hoh, 'aw daja chahidínli. ¹⁹ Lizwif hubuluglez hubugha 'ink'ez 'ilhunuh dune, Sizi hiyúlhni, dazsai ínle 'et whunts'ih Paul utni, 'Khuna,' ni hoh hubugha zeh lhtana' hudentni. ²⁰ 'Aw náhos'alh ts'ih hoolah njan 'uwhutni hubugha, 'et Paul oodalhuk, soo tulih Jerusalem ts'ih tooya 'et nahéyelh hububut ootédzih huba. ²¹ 'Et Paul hubuts'u húkwa' dani tsak'edoo'a 'ink'ez Rome whut'en hubudayi cho dega nus dezti, 'en duba nahoosyeh ni, 'et Rome whut'en hubudayi cho dega nus dezti, 'en ts'un téhl'ah 'et whuts'un tsak'edoo'a dusni," ni Festus. ²² 'Et Agrippa Festus 'uyúlhni, "Ndun dune sich'oh ootuzelhts'ih hukwa' nuszun," yúlhni. 'Et Festus 'utni, "Bunt'ah sih oozólhts'a," yúlhni. ²³ 'Et 'om bun Agrippa, Bernice bulh soo huba hodélhti hoh whusahá'az. 'Et nehughan moodih 'ink'ez keyah whumoodih chah dune 'ilhodulh 'et bulh dahuníndel. 'Et Festus, "Paul dahíyoolhtelh," hubúlhni. 'Et dáhinilhti. ²⁴ Festus 'utni, "Hubudayi cho Agrippa 'ink'ez nuhwheni dune njan delhúts'i ts'iyawh ndun dune nul'en. Lizwif njan 'ink'ez Jerusalem chah sulh náwhulnuk hoh Paul tink'us ne'ust'en, hutni. Soo tube cho 'uhutni, 'aw khoona huba cha'ít'ah. ²⁵ 'Et whunts'ih 'aw tink'us ne'ust'en hukw'elha daóotsah bugha nachawhús'al 'ink'ez dich'oh Rome whut'en hubudayi cho dega nus dezti yuts'u húkwa' dani, 'et huwa 'en but's'ite'alh. ²⁶ 'Et Rome whut'en hubudayi cho dega nus dezti but's'un k'e'tesgus whunts'ih 'aw Paul tink'us 'uja ts'ah'un bugha nachawhús'al. 'Et huwa njan nuhwhubut ninílhti, nyun soo hubudayi cho Agrippa mbut ninílhti, khun sih hoonli bugha náwhuh'ai t'eh, 'et sih whuk'é'oosges. ²⁷ 'Aw ndun dune hoonli bugha nachats'uhó'al whuz whets'álh'a t'eh, 'aw ts'ah'un suba cha'hóot'ah."

26

Agrippa bubut 'et Paul duba yanaltuk

¹ 'Et Agrippa, Paul yúlhni, "Duba yanaltuk 'et nga ooni'ai." Paul didilnik 'ink'ez duba yanawhénituk hoh ndutni, ² "Hubudayi cho Agrippa, Lizwif lhat sk'ehúhoonla hubugha, sich'oh mbut duba yanatelhútk. K'an dzin sugha ooni'ai, 'et huwa tube suba hóolya nuszun. ³ 'Et njan 'alha' hoont'ah nyunch'oh soo t'eeonínzun nts'e na'a Lizwif duk'ah ts'ih dune hinli 'ink'ez lhtah 'uhudutni hoh chah, 'et huwa soo cho soo zélhts'ai nts'u húkwa' dusni. ⁴ Nusol da whuts'un nts'e na'a yinkak sída Lizwif ts'iyawh t'éhonínzun soo 'udechoo whuts'un sich'oh skeyah 'ink'ez Jerusalem chah hoh zeh dune usdli 'et t'éhonínzun. ⁵ 'Udechoo whuts'un soo dega nus duluglez hukw'un né'ut'en, Pharisee, 'en hubulh desdowh 'et t'éhonínzun, 'et huwa hukwa' hunínzun t'eh 'et da sla'hudootni wule. ⁶ Ndai Yak'usda netsuh whudelhdzulh hubuts'ú yoozi, 'i si chah buká tsih hóosdli, 'et huwa k'an njan ootélhdzih

ka mbut síyin. ⁷ 'Et whuz na'a ndunnah lanezi 'o 'at nawh dédowh dune,* 'en ndi khunek but's'ú yoodszi hubugha ítelts'ulh,'et hukwa tsih huhóoli, dzin 'ink'ez 'ulh'ek 'i bulh Yak'usda ts'un téni' 'uhunilhzun whutah. 'Et hubudayi cho Agrippa, ndet ndunnah Lizwif, hukwa tsih huhóoli, si chah hukwa tsih hóosdli. 'Ink'ez 'et hukwa sk'ehúhoo'ai. ⁸ 'Et ndet huwa nuhwuhba 'alha 'uhot'e ghait'ah njan Yak'usda dune yaidla dinabudile hubugha? ⁹ Ndun Sizi, Nazareth whut'en, ts'iyaitsuk hoh buch'a doosni nuszun inle. ¹⁰ Jerusalem 'et ndun inle, náwhulnuk dega nus hudézi stl'ahahó'ai hoh lhanah dune Yak'usda bube'ildzun, 'en tsak'ebesdla 'ink'ez yahutédlah wheni huba nahesda hoh, si chah buch'a dézni. ¹¹ Si 'udusni huwa luglez totsuk dune dzuh nobuhulhdeh Sizi Gri hich'a naóol'ah hukwa' bulh'en. Whuz tube hubulh hínlhkuch'e k'et nilhdza keyah whunts'ih nobunusya dzuh nobutelhzut ka."

Paul, Sizi ts'un budzi náhundunez'ai hukw'un náwhutelnuk

¹² "Njan 'et wheni náwhulnuk dega nus whudézi stl'ahuho'ai 'et Damascus ts'ih teya. ¹³ 'Ink'ez hubudayi cho Agrippa, dzetniz bat'en 'et ti ts'edulh hoh kwun ndult'ah, 'i sa dega nus 'ultus, 'i dune sulh hédulh bulh nenat núdeznat. ¹⁴ 'Et ts'iyawh yun nats'ánkat hoh He-breuw bughunek k'una'a sulh yáztelhtuk hoh nduwúhúni, 'Saul, di ka 'int'en, dzuh nusílhdzut? Ndun tulsus nule 'aw buk'únucha'zint'en t'eh, nyunch'oh zeh dzuh nuná'dudutaldzut,' súlhni. ¹⁵ 'Et oodulhkut, 'Moodihti ndan inli?' dúzni. 'Si, Sizi 'ust'ah. Si 'usilh'en dzuh nusílhdzut. ¹⁶ 'Et whunts'ih didinyih 'ink'ez sinyin, njan nyunalhts'et haíya suba 'int'en nyutesilh ka. K'an dzin sa'en 'ink'ez 'udun chah nus de whúnyuntelhtun, 'et chah hubugha 'uyoon ndo budóni. ¹⁷ Lizwif 'ink'ez 'udun yun k'ut whut'en, 'en hubuts'un nyutéll'ah. Dzuh nunyotelhdzut 'et whunts'ih nla' test'ílh. ¹⁸ Whebuntalhtun nts'e na'a tsahólhgus yáhanahudutedulh 'ink'ez whét'en nihútedulh 'ink'ez 'ants'ih hitá'en lí'huja t'eh Satan huboontun Yak'usda ts'un nahútelyeh. 'En si huba 'alha' 'ust'ah huwa hubulubeshi ch'a hubuna'dutedoh 'ink'ez Yak'usda ba 'udun nibuninla hubutah 'et hubugha óotelts'ulh,' súlhni.

Paul dude 'ut'en k'ah huwu yalhtuk

¹⁹ "Et huwa, hubudayi cho Agrippa, njan ndus de kwun deznukw 'ink'ez oozalhts'a 'aw 'uts'un cha'dúsnil. ²⁰ 'Udechoo Damascus 'et 'ink'ez Jerusalem chah 'et hukw'elh'az Lizwif hubuyun k'ut ndulhcho hoh, 'udun yun k'ut whut'en hubutah chah, lubeshi whuch'a bubeni nahodunooleh huba' hoont'ah 'ink'ez Yak'usda ts'un nahóolyeh 'ink'ez hubudzi náhundunezdla chah, whuz na'a zeh ne'hóot'en, hubudúzni. ²¹ 'Et njan huwa luglez whucho 'ust'en hoh Lizwif suhílhchoot 'ink'ez sazoohlghelh hukwa' hut'en. ²² 'Et hoh da k'an dzin whuts'un Yak'usda sla 'út'en. 'Ink'ez k'an njan nuhbut síyin ts'iyannah dóosni ka, tehul'en 'ink'ez hudézi chah. 'Et daja dusni, Yak'usda be nus whúnilh'en 'ink'ez Moses chah daóotenilh hutni, 'et zeh 'uwhudúzni. ²³ Christ 'en dzuh nutezut 'udéchoo dune utenilh, datétsah, 'ink'ez 'ilhuz dinadutédlah. 'Et huwa Lizwif 'ink'ez 'udun yun k'ut whut'en, 'en hububa be whét'en teleh." ²⁴ 'Et Paul whuz na'a ndutni hoh, 'et Festus yúlh yedúdulh, "Paul nyeni hoolle! 'O nus hodil'eh k'et, nyeni hoolah sulí!" ²⁵ 'Et Paul 'utni, "Festus dezti 'aw seni hoolah ilah, ndi khunek be yálhtuk, 'i khunek 'alha' 'int'ah, 'i 'int'ah 'ink'ez ts'ah'un na'a 'udusni. ²⁶ Hubudayi cho Agrippa soo ts'et whucho 'un yudúzni, nyunch'oh chah soo t'éooninzun hoonliyaz nts'oh tune'whust'en. 'Alha ndunuszun 'aw hoonliyaz nch'a ilah túne'whust'en ho' hoont'ah. ²⁷ Hubudayi cho Agrippa, Yak'usda be nus whúnilh'en khunek hik'une'uzguz, 'i mba 'álha' utni ih? T'éoonúszun mba 'álha' whutni." ²⁸ 'Et Agrippa, Paul 'uyúlhni, "K'an 'astl'iyaz 'et 'ankw'us Sizi Gri yuneyalhh súzilhtsi." ²⁹ 'Et Paul 'utni, "Dahooldukw k'us dawhuldzah nyun chah 'ink'ez ndunnah soo hoozelhts'ai ts'iyawh sundult'ah uncha nuszun hoh nuhwuhba tenadusdli. Ndi tes t'l'ool be sulhghel, 'i zeh nuhwuhba buka cha'núszun." ³⁰ 'Aw 'et hubudayi cho, 'ink'ez yun k'ut moodih, 'ink'ez Bernice, 'ink'ez 'uyoon chah ts'iyawh dináhudidel, ³¹ 'et whenáhedel hukw'elh'az 'ulhóutni, "Ndun dune 'aw hoonlih hukw'elha datétsah k'us tsak'eteda cha'ínli." ³² 'Ink'ez Agrippa, Festus 'uyulhni, "Ndun dune Rome whut'en hubudayi cho dega nus dezti yubut wuyin hukwa cha'dínel t'eh, 'uda da bulanazdootnih inle."

27

Paul, Rome ts'ih whehíyalhti

¹ 'Aw 'et lhgha 'úhudeja hoh yun k'ut Italy ts'ih nilhts'i t'az nuke 'i be uztooke hutni. 'Et Julius hiyúlhni 'en Rome nehughan moodih unli, ndunnah nehughan, 'en Rome whut'en hubudayi cho dezti budune nehughan hubuhútni, 'en Paul 'ink'ez 'uyoon tsak'edelhts'i chah, Julius 'en hitl'ábanla. ² Ts'i cho, keyah Adramyttium ts'ih hainkez, 'i Asia ts'ih yatoo ba ts'i yanadukuk whutuhnutéke, 'i be ts'ándel 'ink'ez 'aw 'et uztezkí. 'Ilhunuh dune Aristarchus hiyúlhni, 'en keyah Thessalonica, Macedonia yun k'ut whuz'ai ts'ih whuz de

* 26:7 Ndunnah lanezi 'o 'at nanah 12 'en Jacob buzkeh 'uhant'e. Lizwif ndunnah hits'uh hainde ho' hant'e.

haínya, 'en chah nelh 'úja. ³ 'Om bun 'aw 'et keyah Sidon ts'ih ts'utezki. Julius 'en Paul ts'un unzoo dulh dunekah naboot'en ka, 'et yugha óoni'ai, ndai ye ndunindzit, 'i higha yóolelh 'et wheni. ⁴ 'Et whuch'az ninki hoh nedudezts'i, 'et whuch'az noo Cyprus 'i buch'az lhuts'úzki. ⁵ Cilicia 'ink'ez Pamphylia, yatoo wheghah 'et nazninki, 'ink'ez keyah Myra, 'et Lycia yun k'ut whuz'ai, 'et yats'úzki. ⁶ 'Et ndun nehughan moodih ts'i cho keyah Alexandria ts'ih haínki, 'i yun k'ut Italy ts'ih tekelh, 'i be nets'anla. ⁷ Lhat dzin whuts'un hoh ndai gha ts'ekelh tube huwa whulna hoh ts'ekelh. 'Et 'udek'elh'az keyah Cnidus 'et whuzih lhuts'úzki. Nedudezts'i 'i bugha 'aw 'á uztooke ghaít'ah. 'Et huwa nus si noo cho Crete hiyúlhni 'i buts'un 'úts'uja, Salmone huwhútni, hoh wheghah lhuts'úzki, 'ink'ez noo bu'ih zeh 'uts'ut'en hoh, ⁸ noo whuzih zeh ts'ekelh, tube huwa whulna hoh Tl'oh Dzeghah huwhútni, 'et keyah Lasea huwhútni, 'et huwu nilhdza ilah, 'et yats'úzki. ⁹ 'Et sa hoh 'et 'uzdálts'i. 'Aw 'et Lizwif sahá'delya dzin 'et chah 'uda whegho dezut, tube huwa 'óodli whudezulh nuts'úke huba.* 'Et Paul hubugha dání hoh njan ndó bulhni, ¹⁰ "Dune 'aw 'et njan whuts'un tube huwa 'oodli tele. Ts'i chah 'ink'ez be yuzdla, 'i chah tinta' tet'ilh, 'ink'ez bulunah chah yahutádlah ho' hooht'ah." ¹¹ 'Et whunts'ih ndun nehughan moodih Paul yuba 'álha' cha'dusnih. Ts'i niz ts'ih usda, 'ink'ez ndun ts'i bube'ildzun unli, 'en zeh hiba 'álha' int'ah. ¹² 'Et hudelhts'i khi hudutélts'ilh huba nek'e' hoot'ah. 'Et ndunnah dune k'us lhanah, 'en nus hutekelh hukwa' huninzun, soo' hutenilh t'eh, keyah Phoenix ts'ih hutekelh hutni. 'Et noo cho k'ut tl'at wuhocho whuz'ai, nyan nilhts'i 'ink'ez nus nilhts'i chah ch'a wu'it whuz'ai, 'et khi hudutelts'i hukwa' huninzun.

Yatoo k'ut whudutelhts'ut

¹³ 'Et nyaz de nezul bulh nilhts'i 'i be tezts'i, 'ink'ez ndunnah dune soo 'uhutenilh huninzun, 'et huwa ts'i bulh too su'ai, 'i too hanahiya'ai 'ink'ez nus wheháni, 'ink'ez noo cho Crete 'i soo buzih k'ut zeh hutezki. ¹⁴ 'Et 'aw chaooutzsit hoh nilhts'i ulhtus, 'i yoo ts'iz tezts'i hiyúlhni, 'i noo soo buts'uh haínts'i hoh tezts'i. ¹⁵ Ts'i buk'eoodilts'uk hoh 'aw nilhts'i buyah uztooke ghaít'ah suli. 'Et hukwa' ts'ut'en 'ustle' 'uts'uja 'ink'ez whute nilhts'i k'una'a uztezki. ¹⁶ 'Uyoo nooyaz Claudia hiyúlhni, 'i bu'it ts'uninki, 'et 'ankw'usyaz neba soo úhónt'e. 'Et soo 'uts'unút'en hoh ts'iyaz whuts'ull'oo, 'i duts'o ts'úlhni, ¹⁷ 'ink'ez dets'ántan. 'Et ts'i cho tl'oolh be bunané'ts'uzguz. Nilhts'i be nuke 'i nanáhiyanla, yun k'ut Lybia whunat taba tadahlukw, 'ink'ez teh whudutle, 'i hik'ételulh 'et whe hunuljut 'et huwa. 'Ink'ez 'ants'ih nilhts'i be hoh nuzdulduz. ¹⁸ 'Whéwhunuljut hoh nilhts'i ze' whut'en. 'Et 'om bun ts'i be sula, 'i bulah táwhehinilhdel. ¹⁹ 'Et doo chah whulh tat dzin nyoo ts'i bet be ne'whut'en, 'i chah whenich'oh tats'álhdel. ²⁰ 'Lhat dzin inle 'et sa chah 'ink'ez sum chah 'aw chats'és'en 'ink'ez whuz tube nilhts'i ze' whut'en. 'Udek'elh'az 'aw 'et uzdutejih 'et cha whulanizdunanzut. ²¹ 'Et sa hoh dune 'aw cha'hus'al hoh Paul hubatuh siyin 'ink'ez ndo búlhni, "Dune soo sih soo zólh'ts'a huba' hooht'ah, noo cho Crete 'aw whuch'a ts'ooke huba cha'hóot'ah. 'Et 'uts'úja t'eh, 'et t'eh da 'aw hoonli nech'a tinta cha'host'en 'ink'ez dachats'útesnil wule da. ²² 'Et whunts'ih k'an nuhghu tédusdlih, nuhdzi ulhtus cho ulh'i! 'Aw nuhtah 'ilhunuh whunts'ih dáchatesa, ts'i zeh tinta' tet'ilh. ²³ 'Yak'usda be'ildzun usdli, 'ink'ez buba ne'ust'en, 'en 'ulh'ek da bulizas 'en suzih be hóodiltsai. ²⁴ 'ink'ez 'utni, 'Paul whéniljut ilah! Rome whut'en hubudayi cho dezti bubut tanyin ho' hooht'ah, 'ink'ez Yak'usda nyudánts'o hoh ye únzoo, 'i bugha nyulh dehúdelhts'i yachahutésdla." ²⁵ 'Et huwa dune nuhdzi ulhtus cho wule! 'Et suba 'álha' hooht'ah nts'e na'a Yak'usda 'usúlhni, whuz na'a 'uhót'e. ²⁶ 'Et whunts'ih 'ilhuu nooyaz k'ut 'et whuniz telhts'ih." ²⁷ 'Aw 'et whulh nat hukw'enilhghel inle, 'et Adria yatoo k'ut 'awhuz uzdelidus. 'Et tuzniz bat'en ndunnah ts'i bet 'ut'en 'en yun yeghah 'uts'ut'en huninzun. ²⁸ 'Tl'oolh ndaz, 'i huyé dinguz 'ink'ez tahíya'ai. 'Et nahuhoo'ai tube takhulh 120 feet 'et ta'delkulh. 'Et hukw'elh'az 'et doo chah zeh whunduna'hoodhdai, 'et 90 feet ta'delkulh. ²⁹ 'Tse k'ez tekelh whéznuljut, 'et huwa dí tse tl'oolh ts'i bulh too sula, 'i ts'i niz ts'ih taháyanla 'ink'ez soo 'a hol'eh huninzun. ³⁰ 'Ts'i bet 'uhut'en neghu déhahunool'ilh hukwa' hót'en. Ts'iyaz tahítetilh 'ink'ez ts'i bulh too sula, 'i nus tahítelelh lahuhoon'eh. ³¹ 'Et Paul ndunnah nehughan 'ink'ez bumoodih chah ndo búlhni, "Ndunnah dune 'uhut'en 'aw ts'i be chahudilts'ih t'eh, 'aw nuhwhenih doohjih ghaít'ah." ³² 'Et ndunnah nehughan tl'oolh k'uhinínt'az 'ink'ez ts'iyaz hiladetnik. ³³ 'Aw 'et haootel'eh hoh Paul ndo búlhni, 'Uhooh'alh, 'aw 'et whulh nat hukw'enilhghel hubal'h, 'et ndúhoolyez hoh 'aw hoonli cha'zah'al. ³⁴ 'Nuhghu tédusdlih 'ah'alh! 'Et whut'az dutehjih ho' hooht'ah. Nuhtsigha lhuk'i whunts'ih tinta cha'dutéskwus." ³⁵ 'Et ndudáni hukw'elh'az, Paul lhes yílhchoot, ts'iyawh hubunalh Yak'usda ts'un, "Suchanailya," dani, taídálhkut 'ink'ez hoh whení'al. ³⁶ 'Et hubudzi ulhtus násdli 'ink'ez 'ilhunuh hinli hoh 'úha'al. ³⁷ 'Nuwheni ts'iyawh 276 ts'inli hoh ts'i bez ts'udelhts'i. ³⁸ 'Ts'iyannah soo 'ultsuk nahét'al hukw'elh'az, ts'i ndaz suli ch'a, lhes haníyeh, 'i desúdzai, 'i tahíyalhdel.

* 27:9 'Et soo dak'et 'uhooht'ah.

Desk'udinki hoh tatsi be ts'i yaidujut

³⁹ 'Aw 'et hoolh'en hoh ts'i bet 'úhut'en nyo yun nachahuhóoltsulh. Tl'ah taba hoonli, 'et hotelh'en, soo 'uhutenilh t'eh whute ts'i yahítejoooh huninzun. ⁴⁰ 'Et huwa ts'i bulh too yuzdla, 'i k'unuhíyuzt'az 'ink'ez nyo 'aw 'et hiladetenik. Tl'oolh ts'i be nuhunukes, 'i be dint'uk 'i chah k'unuhíyuzt'az 'ink'ez nus nilhts'i'i be nuke, 'i hoh náhidintsi nilhts'i be no yádooldis ka. 'Aw 'et whusahudutelhúduz. ⁴¹ Nyo lheghidli ndúwhult'ah sai dutle, 'i hain'a 'i ts'i yuk'énzez 'ink'ez nus ts'i bunintsis duts'o súli, 'aw naghóotnah ghaít'ah. 'Ink'ez niz ts'ih 'aw 'et tatsi be yawheni'el. ⁴² 'Et nehughan ndunnah tsak'ehudelhts'i 'en huboteghan ka lhahódinla, doo ka yahúl'el 'ink'ez tinta nahoolghas. ⁴³ 'Et whunts'ih nehughan moodih Paul yutelhyih hukwa' ninzun 'et, "Dah," hubúlhni. "Ndunnah dune soo nube t'éhonínzun, ts'iyawh 'en choo tahóollhat 'ink'ez yahoobe," hubúlhni. ⁴⁴ 'Et 'onghunnah, 'en lhustel k'us ts'i but's'uh hánidestuk, 'i ndi hit'az yahulhú'el. 'Et whuz na'a ts'iyawh dachats'ínil hoh yats'úzdel.

28*Paul Malta whut'en hubula' tet'ílh*

¹ Soo yats'úzdel ndi noo 'i Malta hiyúlhni 'et t'ets'onanzin. ² 'Et whut'en tube nets'un hínzoo. Návheoonilhtan 'ink'ez whuzk'uz. Kwun neba hídulhk'an 'ink'ez soo cho nene'hulh'en. ³ Paul tsuz 'ílhidughezdlá 'i nus tsídude hoh t'l'ughus neoolhch'oolh, 'i kwun be ninzil hoh Paul yula súlhch'ullh. ⁴ 'Et ndunnah Malta whut'en ndi t'l'ughus Paul yula yé dint'uk hinilh'en 'et 'ulhóduetni, "Ndunnah dune neghan 'int'ah. Wheni neyak'usda, 'en boozi, 'i 'ahoolhyez 'uk'elháhoohl'i ts'útni, 'en hutenalh yughá ho'alh ghaít'ah, yatoo k'ut dujih whúnts'i." ⁵ 'Et whunts'ih Paul 'aw dachánil hoh kwun k'ut dula yughat 'et ndi t'l'ughus yuts'úhaikat. ⁶ Hibalh'i, wulk'et tulih, k'us khunyaz tulih nadooldis 'ink'ez daóotsah. Sa hiba lh'i hukw'elh'az 'aw hoonli chá'ínel. 'Et huwa 'uts'un na'a na'húnuzun 'ink'ez ndun buYak'usda bulh 'ílhunuh 'int'ah huninzun. ⁷ 'Aw bughu nilhdza ilah 'et t'l'o k'ut whuzdla, noo k'ut hubudayi, Publius hiyúlhni, 'en bube'íldzun hoonli. Soo wuhu't teh bugha dáznindel 'ink'ez tat dzin buzih uzdáts'i. ⁸ Publius be'abá kw'usuti k'ut sulhti dada be chah 'ink'ez bubut k'e dzuh nuzut. Nts'e sulhti, 'et Paul yughu danínya 'ink'ez tenadidli, yuk'událni, 'ink'ez soo ná'yinla. ⁹ 'Et ndúhooja hukw'élh'az noo k'ut whut'en hunduda ts'iyawh whusaháandel 'ink'ez 'en chah soo ná'huja. ¹⁰ Hoonliyaz lhái nets'ótelhdel 'ink'ez uztezki hoh ndai buka ts'untezilh, 'i chah netl'anáhíyelya.

Malta whuts'un Rome ts'ih hutezki

¹¹ Tat sanun inle hukw'elh'az, keyah Alexandria ts'ih haínki, 'i Lhulhutsin Lht'adanke hiyúlhni, 'i ts'i khi noo k'ut intan, 'i be uztezki. ¹² Keyah Syracuse huwhútni 'et uzninki 'ink'ez tat dzin 'et uzdáts'i. ¹³ 'Et whezdinki 'et doo chah keyah Rhegium huwhútni whuz ts'uninki. 'Et 'om bun 'et yoo'az tezt's'i, 'et nat dzin inle 'et keyah whuyaz Puteoli huwhútni 'et yats'úzki. ¹⁴ Bulunah huba 'álha' hoont'ah nabuts'ínla hoh 'ílhuh hukw'enílhghel 'et hubuzih uzdoóts'i nehútni. 'Aw 'et yun k'ut 'uts'uja hoh Rome ts'ih t'utezdel. ¹⁵ Ndunnah neulhtsínkah Rome 'et nelh 'úhudants'o hoh, 'e'óket, Appius huwhútni, 'ink'ez ts'uztez bakoo chah tat ts'uyi huwhútni, 'et tazah 'uhooldzah ts'ih whuz nedadezdel. 'Et Paul hubutelh'en hoh, Yak'usda, "Suchanáilya," yudáni 'ink'ez 'aw 'et budzi nduk ná'uja.

Paul keyah Rome 'et Sizi Gri bugha dune hubulh yáhtuk

¹⁶ 'Et Rome ts'ih ts'unindel hoh Paul whute nehughan 'ílhunuh zeh yughunli hoh dich'oh whút'i higha óon'ái. ¹⁷ 'Et hukw'elh'az tat dzin inle hoh Paul 'et whut'en Lizwif dune híncha hubulh yátelhtuk ka usda ts'ih duts'ó toodelh hubúlhni. Whusaháandel hoh 'et ndó bulhni, "Dune 'ink'ez sulh Lizwif 'aw hoonli sulh dédowh hubuch'a nuchá'ust'il 'ink'ez netsuh whudelhdzulh buk'ah ts'ih né'whut'en hoh chah whuch'a nuchá'ust'il. 'Et whunts'ih Jerusalem 'et tsak'etsuha'ai 'ink'ez Rome whut'en, 'en hubut'ásahalhti. ¹⁸ 'Et 'en suhoodalhtuk 'ink'ez hoonli hoh t'inta' nust'en hukw'elha datésah sugha náchahuhóo'alh, 'et huwa sula nahudutetnih hukwa' huninzun. ¹⁹ 'Et whunts'ih Lizwif huwanch'az nehúnindel 'ink'ez sulh dune 'aw hoh tink'us na'a bughu yaoolhtuk ghaít'ah, 'et whunts'ih 'oosneh huba' hoont'ah. 'Et huwa Rome whut'en hubudayi cho dezti bubut nitésyalh 'ink'ez but's'u tédutesdlíh. ²⁰ Ndan Israel hubuts'uh huhainzut hika tsíh hóoli, 'en suba 'álha 'int'ah huwa ndi tes t'l'ool be suhulhghel. 'Et huwa nanwhutes'ílh 'ink'ez nuhwhulh yátelhtuk hukwá nusuzun." ²¹ 'Et njan dhíyulhni, "Aw nyun nyugha yun k'ut Judea whuts'un dustl'us nets'ó t'achahusdlah, 'aw neulhtsínkah chah whuz de háindel chah nyun hoonst's' k'un'a nghu yachahulhtuk. ²² 'Et whunts'ih daja dutenilh nts'óotuzelhts'ílh hukwa' ts'uninzun. T'ets'onínzun dune but's'ú dintnik ndulhcho hoh yinka hubuch'a yáhalhtuk 'et huwa." ²³ 'Et Paul ts'un lhahódinla ndet dzin hits'u tedulh. 'Et 'o nus 'uhuneltsuk, 'en 'et dzin hits'u whúsáindel. 'Et bundada hulhgha whuts'un Yak'usda dune k'úne' bul'en hubugha

hubodoolh'eh. Yak'usda be nus whúnilh'en 'uk'unuhúyuzguz 'ink'ez Moses yuk'une'úzguz, 'i chah 'i bugha Sizi huba 'alha 'oot'e whule hubúlhni. ²⁴ Bulunah huba 'alha deja 'et whunts'ih 'onghunnah, 'en 'aw huba 'alha cha'dusnih. ²⁵ 'Et Lizwif lhelhts'un 'uhutni. 'Et 'az náhedulh hoh Paul njan ndo búlhni, "Dalcho 'i be Ndoni 'en Yak'usda be nus whúnilh'en Isaiah 'uhiyúlhni, yudáni, ndi khunek nuhtsahda hubutl'aídooh'ah ka. ²⁶ 'Et utni,

'Inyalh 'ink'ez ndunnah dune ndubudini,
 soo cho 'oozélh'ts'ai 'et whunts'ih 'aw t'eoonoohzeh ghaít'ah;
 soo cho whunulh'en 'et whunts'ih chaséh'en.

²⁷ Ndunnah dune hubeni dúts'o,
 dudzo chah whudá'hudinla,
 'ink'ez hunilhúts'ul chah 'uhint'ah.

'Et njan 'aw nduchahit'ah t'eh soo da honilh'en,
 'ink'ez 'uhudoots'o, 'ink'ez hubeni chah da t'éoonoohzeh wule.
 'Et t'eh da suts'un náhulheya 'ink'ez da soo ná'boosdeh, ni Yak'usda."

²⁸ 'Ink'ez Paul 'udek'elh'az ndo búlhni, "Njan t'éoonoohzin huba' hoont'ah, Yak'usda bughunek be uzdujih, 'i 'udun yun k'ut whut'en, 'en hubuts'un tl'aida'ai. Hiyoozólh'ts'a huba' hoont'ah!" ²⁹ 'Et Paul 'et ndudáni hukw'elh'az tube cho lhtana'hudentni hoh Lizwif whenáhedel. ³⁰ Nat naodezut 'et Paul njan hukw'elha hoolh'i 'et whut'i. Ndun highundelh 'en du'ih teh hubutulh'ih. ³¹ Soo ts'et whucho Yak'usda dune k'úne' bul'en, 'ink'ez Sizi Gri neMoodihti 'en bugha chah dune hoodulh'eh. 'Aw dune whuch'a chahiniyoot hoh ndutni.

Paul, 'en Rome Whut'en Hubuts'un K'e'anguz

Paul ndi dustl'us keyah Rome 'et ndunnah huba 'alha 'uhoont'ah hubuts'un k'e'anguz

¹ Si Paul Sizi Gri be 'ulhna, 'en ska na'detni whel'a 'úst'ah. Ndi khunek unzoo, 'i dune ndo budoosni huba, Yak'usda 'udun nésunilhti hoh 'ust'ah. ² Tube 'uda hoh ndunnah Yak'usda ba nus whunilh'en, 'en hubugha ndi khunek nets'ú yoozi, 'ink'ez Yak'usda be' dustl'us lubeshi bughu hoolah, 'i k'ut neba hik'e'anguz. ³ Njan Yak'usda nets'ú hoozi buYe' bughu, 'en Sizi Gri neMoodihti 'int'ah. 'En hubudayi cho David yuts'u haínzut. 'Et huwa dune 'int'ah t'éts'onínzun. ⁴ Yak'usda buye' chah unli. Yak'usda ye ulhtus, 'i be dinadija. 'I gha Ndoni, lubeshi bughu hoolah, 'en néwhunelhtan 'en Sizi Gri neMoodihti 'int'ah. ⁵ 'En ye únzoo bughu whel'a usdli 'ink'ez buba 'ust'en. 'Et huwa khunek unzoo, 'i ndi yun k'ut ts'iyannah dune hubudutésniilh highunek hiyóolhchoot ka, 'ink'ez boozu bughu hik'une'oot'en. ⁶ 'En hubutah nuhwheni chah Sizi Gri budune sahli. ⁷ 'Et huwa Rome whut'en ndi dustl'us nuhts'ó t'ates'alh. Yak'usda nuhk'entsi 'ink'ez nuhka na'detni dune hube'ildzun* sahli. Ne'aBá Yak'usda 'ink'ez Sizi Gri neMoodihti ts'un nuhwhuba tenadusdli, nuhdzi dóoghel 'ink'ez Yak'usda ye únzoo, 'i nohwhulh 'óot'e ka.

Paul ndan huba 'alha 'uhoont'ah, 'en Rome ts'ih hubuts'un nutéya hukwa' nínzun

⁸ 'Udechoo 'un nuhwhudutésniilh njan 'et 'uhoont'ah, ndi yun k'ut dune ndulhcho nohwhulh 'uhudits'o, Sizi Gri ts'un be 'alha 'uhoont'ah bughu. 'Et huwa nuhwheni nuhwhugha Sizi Gri bughu suYak'usda nuhwhuba chanailya dusni. ⁹ Yak'usda nalh 'un whudusni, suyégah ndulhcho, 'i be Yak'usda ba ne'ust'en, ndi khunek unzoo, buYe' bughu, be yalhtuk. 'Ink'ez bunalh 'un whudúsní, nuhwhuba tenadusdli 'aw 'ustl'e' cha'duzesne. ¹⁰ 'Ink'ez 'ahoolhyez Yak'usda oodulhkut, 'et nduwhútenilh hukwa' nínzun t'eh, 'et sih nuhts'un tóosya. ¹¹ Tube nuhwhuntel'hilh hukwa' nuszun Sizi Gri be 'ut'en 'i be nawhunelhtun ka. 'I bughu ulhtus wahle 'ink'ez 'aw buch'a naoolhúyeh ghait'ah. ¹² 'Aw nuhwheni zeh ilah, nuhwhuba 'alha 'uhoont'ah, 'ink'ez si chah be 'alha 'uhoont'ah, 'i be 'ilho nús ts'unóot'uk. ¹³ Sulhutsinkah 'et nt'eoonoozhéh hukwa' nuszun, lhat nuhts'u t'étyalh nuwveni lhadúst'ih 'et whunts'ih 'aw 'oosneh ghait'ah. Nts'e na'a 'uyoon 'udun yun k'ut whuten dahája, 'et ndóhneh, si sgha ts'iyawh Sizi Gri ts'un naoolhúyeh ka. ¹⁴ Njan 'et ndósneh huba' hoont'ah, khunek unzoo, 'i Greek k'eyahulhtuk 'ink'ez 'aw soo dune chah hilah, ndunnah whuwunih chah k'us chahuhóonih chah, 'en hubodoolh'eh ka. ¹⁵ 'Et huwa nuhwheni Rome whut'en nuhts'u t'étyalh wheni lhadúst'ah, 'et sih khunek unzoo, 'i bunwhuntelhtun.

Sizi Gri bughu khunek unzoo, 'i Yak'usda ye ulhtus be dune hudujih, 'i 'int'ah

¹⁶ Ndi khunek unzoo Christ bughu, 'aw hukwaya chasdlah hoh be yálhtuk. Yak'usda ye ulhtus hoh ndan huba 'alha 'uhoont'ah, 'en hudutejih 'et huwa. Lizwif choo 'ink'ez 'udun yun k'ut whut'en chah. ¹⁷ Ndi khunek unzoo, 'i Yak'usda ye ts'ih'un 'uhoont'ah yunenélhtan, nts'e na'a neba 'alha 'uhoont'ah 'ink'ez 'o 'un chah 'uts'oot'e. 'Et whuz na'a Yak'usda be' dustl'us yuk'e'ánguz ndutni, "Ndunnah ts'ah'un na'hujá, 'en be 'alha 'uhoont'ah, 'i be hukhutena."

'Udun yun k'ut whut'en tinta' hunt'en ho' hint'ah

¹⁸ Yak'uz whuts'un Yak'usda ye hunilch'oh 'i yunedunelhtán, ndunnah Yak'usda hiyé nah 'ink'ez tink'us 'uhet'ilh, 'en ndi khunek 'alha 'int'ah t'ehinínzun tink'us 'uhut'en hoh yuk hinilh'uk. ¹⁹ Nts'ena'a Yak'usda dant'ah, 'et newhunelhtan, 'et huwa ts'iyannah t'eíninzun 'en 'int'ah. ²⁰ 'Aw 'ilhunuh whunts'i Yak'usda chahes'en, 'et whunts'ih dant'ah t'ehonínzun. Ndi yun 'uyílna k'an 'et whuts'un ndet Yak'usda dát'en huwhunalh'en. 'Et huwa Yak'usda 'int'ah 'ink'ez ye ulhtus, 'i 'aw bula tah nachahuhó'o'al ts'iyannah t'ehonínzun. Njan t'ehonínzun 'et huwa dune 'aw t'éwhunuzúszun hudooni ghait'ah. ²¹ Yak'usda t'ehinínzun 'et whunts'ih 'aw chahidílhiti 'ink'ez 'aw chanailya chahidúsnih. 'Et huwa 'ants'i ilah teh nuni hunuzut 'ink'ez hubudzi yuh tink'us 'uhuninzun. ²² Huwhunih dune na'hundunúdzun 'et whunts'ih 'aw t'ehonínzun hoolah. ²³ Yak'usda 'ilhuz khuna, 'en ye dézti 'et whulahudetnik 'ink'ez ndi 'uk'edéltsi 'uhiyulh'en, 'i dune, dut'ai, khunai, 'ink'ez t'l'ughus chah, ndi ts'iyawh yaidlah, 'i 'int'ah, 'i huba idézti suli. ²⁴ 'Et huwa Yak'usda hubula detnik hoh hukwa' huninzun k'una'a yinkak húdelhts'i. 'Ut'en dutsun, 'i 'uhulh'en. Lhtah hubuyust'e hukwayá hoonli hiye ne'ut'en. ²⁵ Yak'usda ye ts'ah'un 'utni, 'i ndi khunek whuts'it 'i be lhk'ehahída'ai. 'Ink'ez ndai Yak'usda 'uyalh'en, 'i hits'utedudlih 'ink'ez hik'une'ut'en. 'Et whunts'ih Yak'usda 'en ts'iyaintsuk 'uyalh'en 'ink'ez 'en zeh 'ilulhuz wheni dóoti huba' hoont'ah.

* 1:7 Ndan Sizi Gri hik'une'ut'en, 'en ndunnah duneYak'usda hube'ildzun hinli.

Ndoh honeh. ²⁶ Yak'usda huba 'ants'i yúzdli 'et huwa Yak'usda hubula detnik hukwa' huninzun k'una'a yinkak hudóolts'i ka. Lhat whudutsun 'uwuhulh'en. Dune ts'ekoo bulh Yak'usda nuwheni 'obinla, 'et whulahudetnik 'ink'ez bulunah ts'ekoo dudulh ts'ekoo 'en 'uhulh'en. ²⁷ Bulunah dune chah whuz na'a zeh 'uhut'en. Dune ts'ekoo bulh 'et wheni Yak'usda 'obinla, 'et whulahudetnik. Hudézk'un k'una'a dudulh dune buka' huninzun 'ink'ez hukwaya hoonli teh hubulh ne'hut'en. 'Et ndahút'en 'et huwa hubuyust'e dada zeh dubih, 'et bugha whúls'uk. ²⁸ Ink'ez 'aw hoontsolyaz hoh Yak'usda bugha nuni hunoozut hukwa cha'hunizun. 'Et huwa Yak'usda hubula detnik. Hubeni ntsi' s'úli. Nts'oh né'hut'en, 'aw 'et ndoohóot'en huba cha'hít'ah. ²⁹ Ahoohlyez 'aw ts'ah'un na'a nucha'hust'en. Lubeshi hukwaya hoonli 'i 'uhiyulh'en, 'uyoon yit'i ka' huninzun, 'uyoon hundélhaidh, 'uhoolnih, dune hughan, lhéhudulh, huwhuts'it, huwhúske, 'ink'ez dudulh dune ts'iyawh lhghu yuhaltuk chah, ³⁰ dudulh dune ch'a yáhulhtuk, Yak'usda hīts'u dutnik, dune ba dzuh úhutni, 'uhududelhúti, duba na'hoodzo, 'ahoolhyez tink'us 'úhoot'en huninzun, 'ink'ez 'aw dudusnekah hubuk'únucha'hust'en chah, ³¹ 'aw hubeni hoolah, 'aw hubughunek chahuyóotun, 'aw hubulh dune hubuk'echahitsi', 'aw sulh dunekah nahoolhtsilh ghaít'ah, 'ink'ez 'aw técha'hunizun. ³² 'En dune 'et nduhut'en dahútetsah ho' hoont'ah. Njan t'ehonínzun 'et whunts'ih, whuz na'a zeh 'uhet'ilh. 'Et ndunnah dune nduhut'en t'eh huba hóont'i, 'et huwa Yak'usda ts'ah'un na'a huba nahuteyeh.

2

Yak'usda ts'ah'un na'a dune ba nahuteyeh

¹ 'Et nyun ndi dustl'us k'eyailhtuk hoh soo cho dints'o ih? K'us ndan nuhtah dudulh dune ghu yalhtuk tink'us 'úhut'en hubugha, 'et dich'oh chah 'alha tink'us 'ut'en. 'Et dich'oh chah khúyanaltuk hoh 'utni. Dich'oh chah whuz na'a zeh ne'ut'en. ² Whunulh'en, t'ets'onínzun, Yak'usda dune tink'us na'a 'uhut'en t'eh, ts'ah'un na'a huba nahuteyeh ho' hoont'ah. ³ Nyun chah tink'us na'a 'int'en t'eh, 'ink'ez nyulh dune ba nahinyeh t'eh, 'et Yak'usda whuz na'a mba nachahuteyeh ninzun ih? ⁴ Ink'ez Yak'usda lhe'whuldzuh nts'un únzoo 'ink'ez 'aw nyulh chahunlhúch'e. 'Et 'ants'i ih mba' hoont'ah? 'Awhuz ih t'ewhunuzínzun Yak'usda nts'un únzoo, nyeni nahaduno'ah ka huba' hoont'ah? ⁵ 'Et whunts'ih 'aw ndzi náchadunf'al. 'Et zeh 'iltsi'. 'Et huwa ndet dzin Yak'usda ye hunilch'oh dune hubunalhts'et hawhélt'sut sulí t'eh, 'et síh ts'ah'un na'a dune ba nahuteyeh, ⁶ 'et hoh 'ilho ahli hoh nuhwhe'ut'en bugha Yak'usda nuwhuba 'uk'elha whutelhtsilh. ⁷ Bulunah 'aw whechahítsaz hoh ts'ah'un na'a 'uhut'en. 'Et nduhút'en hubugha Yak'usda budóolhti, híncha uboolhtsilh, 'ink'ez 'ahoolhyez dachahútesa 'et hīts'u húbwa' ninzun. 'Et nduhint'un dune Yak'usda 'ilhuz wheni híye khutenalh bugha óote'alh. ⁸ 'Et whunts'i bulunah dune k'úwhulh'ai, dich'oh zeh duk'ah ts'ih ne'hutet'en hukwa' huninzun. 'Ink'ez khunek 'alha 'int'ah, 'i k'unucha'hust'en, tink'us zeh 'uhet'ilh. Ndunnah dune Yak'usda tube whúske hoh huba nahuteyeh. ⁹ 'En wheoonujut hoh dzuh nahatedoh. K'us ndan dune tink'us zeh 'uhut'en, Lizwif choo 'ink'ez 'udun yun k'ut whut'en chah. ¹⁰ 'Et whunts'ih Lizwif choo 'ink'ez 'udun yun k'ut whut'en chah, ndan hubutah ts'ah'un 'uhet'ilh, 'en Yak'usda hubudutélhti, híncha hubutelhtsilh, 'ink'ez hubudzi dutéghel. ¹¹ Yak'usda ndi yun k'ut dune ts'iyana' 'ilho lhulhúgha nenilh'en 'et huwa. ¹² 'Et ndunnah Moses be' dustl'us t'ehinínzun, lubeshi 'uhulh'en t'eh, ndi dustl'us bu'et 'ilhuz wheni dzuh nuhatedoh. 'Ink'ez ndan Moses be' dustl'us t'ehinínzun, lubeshi 'uhulh'en t'eh, 'uk'une'úsduguz, 'i bugha huba nahatedeh. ¹³ Njan whunulh'en, ndunnah Moses be' dustl'us 'ants'i 'et yoozélt's'ai, 'aw Yak'usda ba ts'ah'un cha'hít'ah. 'Et whunts'ih ndunnah Moses be' dustl'us hik'úne' 'ust'en, 'en tinta' hunt'en Yak'usda huba hoolah whutelhtsilh. ¹⁴ 'Udun yun k'ut whut'en Moses be' dustl'us 'aw chahiyust'ih, 'et whunts'ih yinkak húdelhts'i huwa ndi dustl'us hik'úne' 'ust'en t'eh, 'ants'i t'ehinínzun huba li'hoont'ah. ¹⁵ 'En Moses be' dustl'us k'una'a hik'úne' 'ust'en t'eh, 'ants'i hubudzi k'ut 'uk'ununa'úsduguz huba li'hoont'ah. 'Et neyuh ts'ih bugha t'ets'onínzun* 'i bugha dahint'ah, 'et whuz na'a nts'e na'a dahút'en t'ehonínzun, whulahtah tink'us na'a 'uhoont'ah, k'us ts'ah'un na'a 'uhoont'ah, 'et dudzi yuh ts'ih t'ehonínzun. ¹⁶ Ndet dzin Yak'usda dune ba nahuteyeh, nts'oh whu'iz hoh ne'hust'en, 'et Sizi Gri huba nahuteyeh. 'Et ndi sughunek unzoo, 'i dune be hodulh'eh 'et whuz un'a ndutni.

Lizwif'en 'udun yun k'ut whut'en chah, 'aw Yak'usda bughunek hik'únucha'it'il

¹⁷ Lizwif inli 'ink'ez ndi k'eyailhtuk t'eh, nyun Moses be' dustl'us but'áninintan, 'et Yak'usda ts'un ténadusdli dini 'et hoh duba nainzoo. ¹⁸ Nyun Yak'usda ndet nts'u hukwa' ninzun t'ewhunínzun. Moses be' dustl'us hubugha whenyunelhtan 'et tink'us 'uhoont'ah 'ink'ez ts'ah'un na'a 'uhoont'ah t'ewhunínzun. ¹⁹ Ink'ez 'udun yun k'ut whut'en

* 2:15 Ndi khunek "Neyuh ts'ih huwa t'ets'onínzun", 'i hoonli ts'ih'un na'a k'us tink'us 'uhoont'ah, 'i gha t'ets'onínzun, ts'utni ho' ts'utni.

hodiilh'eh nduninzun, 'et huwa dune chawhes'en ndult'ah bula óontun ninzun, 'ink'ez dune tsahólh'gus yuh hudéll'hts'i li'ínt'ah, 'en huba be whét'en huba usdli ninzun. ²⁰ 'Ink'ez 'udun yun k'ut whut'en 'uskehyaz whusnik li'hint'ah hubunínzun, 'et whuz na'a whebudolh'eh ninzun. Moses be' dustl'us int'i, 'et huwa 'i bugha ts'iyawh t'eeonínzun na'dunínzun. Ndaí tink'us na'a 'ink'ez ts'ah'un na'a 'int'ah t'eeonínzun na'dunínzun. ²¹ Ts'iyannah modulh'eh dini. Di ka nyunch'oh nacha'dunuzíltun? Lhe'díni, 'uyoon dune ubudíni, "Udunooht'ih gunih!" Nyun chah tulih 'undunint'ih? ²² 'Uyoon chah ndúbudini, "Ts'ekoo k'us dune bulh tinta' ooh't'en gunih!" Nyun chah tulih 'et ndint'en? "Uk'edélti ts'u dusnik," dini, 'et whunts'ih 'uk'edélti ts'un ténahududli ts'ih, 'alha ih 'aw hubuluglez hoonliyaz chazílhchoot bé' tant'ílh wheni? ²³ Dune dini Moses be' dustl'us dalzoo, 'et whunts'ih bughunek k'inyis t'eh, Yak'usda 'aw chadílhti ho' 'int'en. 'Aw ih hubugha nuní chanuzinzut? ²⁴ Nuhwheni nuhwugha 'udun yun k'ut whut'en Yak'usda ch'a yahalhtuk. Soo whuz na'a Yak'usda be' dustl'us 'utni hukw'u na'a cha'whust'en.

'Et buka dune inli, 'i k'ut nyuhúzt'us t'eh, 'aw nla' whudoneh ghait'ah

²⁵ 'Et hukwa buka dune inli, 'i k'ut nyuhúzt'us t'eh, 'et hoh nyehóodet'en Lizwif 'unint'ah.† 'Ink'ez Moses be' dustl'us buk'úne' zint'en t'eh, nyuhúzt'us mba hóonzoo. 'Et whunts'ih Moses be' dustl'us 'aw buk'únucha'zint'en t'eh, njan nyuhúzt'us 'aw hoonli chahóolah. ²⁶ Njan whunulh'en 'udun yun k'ut whut'en ndet Moses be' dustl'us but's'u húkwa' ninzun tuné' hut'en t'eh, 'et 'ants'i hubuhúzt'us li'hoont'ah, 'et nduchabahilil whunts'i. ²⁷ 'Et 'udun yun k'ut whut'en ndet Yak'usda but's'u húkwa' ninzun tuné' hut'en t'eh, ndi tuné' hut'en, 'i gha nuhwugha nahutedeh. Nuhwheni Lizwif, hubuhánt'az 'et whunts'ih Moses be' dustl'us k'unahyuz 'et huwa lubeshi 'ulh'en ahli. ²⁸ Ndunnah Lizwif hinli 'ink'ez hubuhúzt'us Moses be' dustl'us k'una'a t'eh, 'et nduhúja whunts'i, 'aw ts'ah'un Yak'usda budune chahílah. ²⁹ 'Et whunts'ih ndunnah ndet Moses be' dustl'us hubuts'u húkwa' ninzun hoh túne' hust'en t'eh, 'aw 'en zeh soo Yak'usda budune hinli. 'En soo Lizwif 'uhint'ah. Ndoni bugha 'ants'i Moses be' dustl'us buk'una'a hubudzi k'ut hiyúzt'us be hóodet'en, 'aw Moses be' dustl'us k'una'a ílah. 'En Yak'usda hubudutéll'hti, 'aw dune ílah.

3

¹ 'Et dahoont'ah huwa Lizwif whut'en hinli 'et huwa 'o nus huba hoonzoo? 'Ink'ez dahoont'ah huwa húst'us 'et hubugha 'udun yun k'ut whut'en hubugha ndoh 'uhint'ah? ² Lhat hoh huba hoonzoo. Yak'usda bughunek hubut'l'a ída'ai, 'i be ts'iyannah wheobuhodolh'eh ka. ³ 'Alha 'uhoont'ah, bulunah Lizwif Yak'usda bughunek 'aw hik'únucha'it'il. 'Et ndunt'ah bugha Yak'usda 'onghoh Lizwif hubula dutet'ni ninzun ih? ⁴ 'Aw nts'e na'a? 'Uhót'e hoolah ho' hoont'ah! Dune ts'iyannah whuhuts'it 'et whunts'ih Yak'usda 'aw chawhusts'it ho' 'int'ah. 'Et whuz na'a 'uk'e'ánguz hoh ndutni, "Nghunek bugha 'uyoon dune 'alha' dini t'ehontézin. 'Uyoon nyenah 'uhutni t'eh, hubuch'a' talhdoh." ni.

⁵ Nuwheni Lizwif tink'us 'úts'ut'en t'eh, 'et 'uyoon dune 'aw huwa cháhoonlah hoh t'ehoninzun Yak'usda ts'ah'un 'int'ah. Tink'us 'úts'ut'en huwa Yak'usda neba nahuteyeh t'eh, ts'ah'un cha'ust'en ninzun ih? 'Ants'i hoh dune k'una'a 'udusni. ⁶ Yak'usda nuwheni Lizwif ts'ah'un na'a neba nachahusyeh t'eh, nts'e na'a simba ndi yun k'ut dune ts'ah'un na'a huba nahooyeh? Nts'e na'a? 'Uhót'e hoolah ho' hoont'ah! ⁷ Lhe'hutni, si whusts'it huwa Yak'usda bughunek 'alha 'int'ah, 'i 'o nus dézti sulí 'ink'ez 'uyoon 'aw Yak'usda chawhusts'it 'et t'ehontézin t'eh, 'et di ka sudutéhnilh si lubeshi 'ulh'en 'ust'ah? ⁸ 'Et whunts'ih bulunah dune, nech'a yáhalhtuk hoh hutni, "Tink'us 'úhoot'en but's'utni Yak'usda dézti t'ehonoozeh ka," 'et hoh nech'a yáhalhtuk. 'Et 'alha 'uhoont'ah njan huhonts'it 'et hukw'elha Yak'usda huba nahuteyeh, hubulh dawhútenilh ts'ah'un 'uhoont'ah.

Ndi yun k'ut dune ts'iyannah lhubeshi 'uhalh'en

⁹ Nuwheni Lizwif 'udun yun k'ut whut'en huba nus sóo' ts'inzoo ninzun ih? 'Aw whuz na'a cha'hóot'ah! 'Uda whenyunelhtan nahúlt'ah Lizwif 'ink'ez 'udun yun k'ut whut'en lubeshi 'ulh'en 'uhint'ah. 'Et huwa Yak'usda huba nahuteyeh. ¹⁰ 'Et whuz na'a 'uk'une'úsduguz 'et ndutni, "Aw ndi yun k'ut 'ilhunuh dune ts'ah'un na'a 'int'ah hoolah.

¹¹ 'Aw 'ilhunuh dune Yak'usda yuts'u húkwa' ninzun hoolah. 'Ink'ez 'aw 'ilhunuh dune hukwa tsi chahoolih.

¹² Ts'iyannah Yak'usda ch'a nahulhúya.

Ts'iyannah hintsi' sulí.

'Aw 'ilhunuh dune unzoo hoolah.

† 2:25 Ts'iyannah t'ehoninzun, Lizwif 'en Yak'usda 'utahaooanla budune hoole ka. 4:11 'et cha hukw'e yahalhtuk.

¹³ Bughunek untisi'. Dune dazsai be yust'e ilhjut zeh buzahooltsun li'hint'ah, hubughunek 'i be dune nabuna'a.

Huwhuts'it zeh 'uwuhulh'en.

Khunek hiye yálhtuk, 'i 'ants'i tl'ughus poison ndunt'ah.

Whuz na'a hubughunek be dune hundulhda.

¹⁴ 'Ahoollhey zeh hubuzek hooantsi' 'ink'ez hubuk'eheyih.

¹⁵ 'Ahoollhey zeh dune hughan, 'et zeh huba hilh'i.

¹⁶ Nts'oh nuhúdelh teh, ts'iyaintsuk tinta' hulh'ih, 'ink'ez dune dzuh nuhulhdeh.

¹⁷ Nts'e na'a lhts'un soo' ts'oot'e, 'aw t'ehonínzun.

¹⁸ 'Aw Yak'usda hiye chaniljut cha' hint'ah," ni hoh 'utni.

¹⁹ 'Alha t'ets'onínzun ndan Moses be' dustl'us hik'úne' 'uhut'en, dustl'us daja ni, ts'iyawh hik'úne' oot'en huba' hooant'ah. 'Et huwa ts'iyanaah Yak'usda hibut nihuníndel t'eh, lubeshi 'uhulh'en t'ehonínzun, 'et huwa 'aw hoonliyaz 'uhidoooni ghaít'ah. ²⁰ Ndunnah Moses be' dustl'us k'úne' 'uhut'en 'aw 'et huwa lubeshi 'uhulh'en huba hoolah hoolhtsilh ghaít'ah. Njan Moses be' dustl'us 'i bugha lubeshi 'uhulh'en 'uhint'ah t'ehonínzun 'et huwa.

Sizi Gri neba 'alha 'int'ah t'eh, tinta' ts'unt'en Yak'usda neba hoolah whutelhtsilh

²¹ K'an 'et Moses be' dustl'us bu'et Yak'usda nalh ts'ah'un 'uhutet'ilh, ye ts'ah'un be' hooant'ah 'et ts'iyanaah wheóobunelhtan. Moses be' dustl'us, 'ink'ez Yak'usda be nus whunilh'en hubube' dustl'us chah whuz na'a 'uwuhuténilh hutni. ²² Soo 'o 'un zeh, Yak'usda ye ts'ah'un be' hooant'ah, 'et 'i be ts'iyanaah hububa 'ink'ez ts'iyanaah hububulh, ndunnah Sizi Gri huba 'álha 'int'ah, 'aw 'en zeh ts'ah'un na'huja hinli nahúsdli. Yak'usda ndi yun k'ut dune ts'iyawh lhulhúgha úbunilh'en 'et huwa. ²³ 'Et nuwheni ts'iyawh lubeshi 'uts'alh'en. 'Et huwa Yak'usda ye dézti, 'i dant'ah, 'et nduts'óot'e ghaít'ah. ²⁴ 'Et whunts'ih Christ, 'en Sizi ts'utni, 'en bugha nelubeshi ch'a nenaonket. 'Et huwa Yak'usda ye unzoo, 'i be tinta' ts'unt'en, 'i neba hoolah neba nawhulhtsi. 'Et nuwhuba hukw'elha chats'uhoolhtsil hoh neghaóoni'ai. ²⁵ Yak'usda buYe' 'en ndi yun k'ut whut'en yúbunelhtan Yak'usda soo cho hubuts'u naitoot'en ka. 'Et Sizi Gri buzkaí bugha neba 'alha 'uhoont'ah 'et hoh Yak'usda dulh dunekah nenasulhtsi. 'Et whuz na'a dich'oh ye ts'ah'un be' hooant'ah, 'et whunenulhtan. 'Uda dune lubeshi 'uhulh'en hoh Yak'usda 'ants'i ubunínzun, k'at lih t'eh zeh huba nahuteyeh. ²⁶ 'Et k'an 'et ndi ye ts'ah'un be' hooant'ah 'i be dunabunelhtán, ndan Sizi yuba 'alha 'int'ah, Yak'usda ts'ah'un na'a 'int'ah hoh 'en tinta' hunt'en 'et huwa hoolah whulhtsi. ²⁷ 'Aw ih hoonliyaz 'ónt'e bulh bughu yats'oolhtuk, 'i hoolah? Soo hoolah! Ndet dáhoont'ah simba? 'Ut'en bugha tulih? 'Awundooh! 'Et Sizi Gri neba 'alha 'int'ah, 'i bugha. ²⁸ Njan whuts'odul'eh, ndunnah Yak'usda huba 'alha 'int'ah, 'en tinta' hut'ih huba hoolah whulhtsi. 'Aw 'o 'un Moses be' dustl'us hik'únucha 'oost'en huba' hooant'ah. ²⁹ Daja nuhzun? Yak'usda Lizwif zeh hubuYak'usda unli, k'us 'udun yun k'ut whut'en, 'en chah tulih hubuYak'usda unli nuhzun ih? 'Alha 'udun yun k'ut whut'en, 'en chah hubuYak'usda unli. ³⁰ Yak'usda 'ilhunuh zeh unli. 'Et huwa Lizwif 'ink'ez 'udun yun k'ut whut'en huba 'alha 'uhoont'ah t'eh, 'et t'eh tinta' hunt'en huba hoolah whutelhtsilh. ³¹ 'Et wlu la gha ts'ih, nuwheni Yak'usda buba 'alha' ts'int'ah ts'ah'un na'a na'ts'uja, 'et nduts'int'ah t'eh, Moses be' dustl'us bunats'odutelnah nuhzun ih? 'Awundooh! 'Awuz 'et dez'ai. 'I chah Yak'usda bughunek 'int'ah.

4

Abraham Yak'usda buba 'alha 'int'ah 'et hubulubeshi buba hoolah nasdli

¹ Nuwheni Lizwif ndun netsuhda Abraham, 'en bughu dája uzninzun? Niz t'eh yinkak inda huwa ndet simba nahoo'ai? ² Abraham be 'ut'en gha Yak'usda tinta' ant'en yuba hoolah whulhtsi. 'Et 'alha 'uhoont'ah t'eh, Abraham whé' oot'e da, 'et whunts'ih 'aw Yak'usda nalh ílah. ³ Yak'usda bughunek 'uk'eéduguz bunalhúni ih? 'Abraham Yak'usda buba 'alha 'int'ah 'et huwa ts'ah'un dune unli yúlhni." ⁴ Ndan dune be 'ut'en gha 'i ba 'uk'elha hóle huba' hooant'ah. 'Et whunts'ih 'aw ye únzoo 'i bugha ílah 'uk'elha whulhtsi. ⁵ 'Et whunts'ih dune Yak'usda dája ni buba 'alha 'uhoont'ah t'eh, 'et t'inta' ut'ih, Yak'usda yuba hoolah whutelhtsilh 'ink'ez iduténilh ts'ah'un dune inli. Whuz na'a yuba' whutelilh 'aw hoonliyaz yuba cha'ílil 'et whunts'ih. ⁶ Hubudayi cho David 'en chah 'et huwu yalhtuk, ndan dune 'aw 'ut'en cha'yilh'il whunts'i Yak'usda ndo búlhni, "Nyun ts'ah'un dune 'unint'ah," 'et 'alha degha nus hoonzoo bughá whults'ut ho' 'int'ah. ⁷ Njan 'et dutni,

"Ndan tink'us 'uhét'en hubulubeshi buba 'ún yutelhdel

'ink'ez hubulubeshi 'aw chast'en sulí lí'uja t'eh,

'en degha nus hoonzoo hubugha whults'ut.

⁸ Ndan dune Yak'usda 'aw lubeshi 'ulh'en yuk'echaootes'al,

'en dune degha nus hoonzoo hubugha whults'ut ho' 'int'ah."

⁹ 'Et daja nahzun? 'Et dune buhúzt'us hoh be hóodet'en, 'en zeh tulih Yak'usda bugha 'ukenus hoonzoo hubugha whults'ut? K'us ndunnah chahídut'us, 'en chah tulih Yak'usda bugha dega nus hoonzoo hubugha whults'ut? Njan 'et nduts'útni, Abraham Yak'usda daja ni buba 'alha 'uhoont'ah 'et huwa ts'ah'un dune unli yúlhni. ¹⁰ Nkeda Yak'usda yudáni ts'ah'un dune unli? Hítet'us whutsuh tulih k'us hukw'elh'az tulih? Hítet'us whutsuh 'et be hóodet'en 'aw hukw'elh'az ilah. ¹¹ Abraham Yak'usda daja yudáni 'et buba 'alha 'uhoont'ah, 'et huwa Yak'usda 'utni, ts'ah'un dune yulhni. Yak'usda yudáni hitet'us whutsuh da. Hukw'elh'az hiyúzt'us 'et hoh be hóodet'en be 'alha 'uhoont'ah 'i be ts'ah'un dune 'int'ah. 'Et huwa ndan Yak'usda daja ni buba 'alha 'uhoont'ah, 'aw buba cha'hít'us hoh bube hóodet'en whunts'i, 'en Abraham butsuh whudélhdzulh ínle. 'En chah Yak'usda ubúlhni, ts'ah'un 'uhint'ah. ¹² 'Ink'ez bulunah Lizwif, 'en chah Abraham hubutsuh whudélhdzulh unli. Lizwif ts'iyawh hubuhúzt'us hoh hube hóodet'en. 'Et whunts'ih ndan Lizwif Abraham k'una'a yuka dune unli hik'ut hiyúzt'us whutsuh da Yak'usda bughunek buba 'alha 'int'ah, 'aw 'en zeh Abraham hubutsuh whudélhdzulh unli.

Be 'alha 'uhoont'ah, 'i bugha zeh ndi Yak'usda nets'ú hoozi nets'ó telts'ulh

¹³ Abraham 'ink'ez ye k'édinde 'en ndi Yak'usda buts'ú yoozi, 'i bugha ndi yun bube'ildzun whutele, 'aw Moses be' dustl'us bugha ílah hoh butl'a ída'ai, 'et k'us be 'alha 'uhoont'ah bugha ts'ah'un dune sulí, 'et huwa ndi buts'ú yoozi, 'i butl'a ída'ai. ¹⁴ Njan whunulh'en ndunnah Moses be' dustl'us hik'une' hút'en 'aw 'et huwa ílah ndi yun bube'ildzun whutele. 'Et whuz na'a nduwhútenilh t'eh, 'et t'eh Yak'usda yuts'ú hoozi hoolah nawhutédle, 'ink'ez Yak'usda bughunek neba 'álha 'uhoont'ah 'ants'i 'et 'uwhutét'íh. ¹⁵ Ndi Moses be' dustl'us 'i be dune bulubeshi hubugha huba nahutedeh. 'Et whunts'ih dune Moses be' dustl'us chahiyít'i t'eh, 'aw huba nahookeh ghaít'ah. ¹⁶ 'Et huwa ndi buts'ú yoozi, be 'alha 'uhoont'ah, 'i be dune yitélhcholh. 'Et hoh ndet Yak'usda dune ts'uhóozi ts'iyannah Abraham yuk'édinde, en hubube'ildzun whutele. Ndunnah Lizwif Yak'usda bughunek huba 'alha 'int'ah, 'aw 'en zeh ílah, ts'iyannah Abraham k'una'a Yak'usda bughunek hiyílhchoot t'eh, 'alha ts'iyannah netsuh whudélhdzulh unli wule. ¹⁷ Yak'usda bughunek 'uk'e'edúguz, 'i Yak'usda Abraham ndíyúlhni, "Dune lhelhts'un hudédowh butsuh whudélhdzulh nyuzilhsi." 'Et huwa Yak'usda Abraham lhelhts'un hudédowh butsuh whudélhdzulh unli. Yak'usda yuts'ú hoozi 'aw cha'whúsne, 'et whunts'ih ts'ah'un na'a 'uhooja k'una'a huba 'álha 'uhoont'ah. Ndi Yak'usda 'en 'int'ah, 'en bugha yahadla chah hukhuna, 'ink'ez ndai 'uyínla, 'i hoolah be 'uyínla. ¹⁸ Yak'usda yuts'ú hoozi lhanah hudedowh butsuh whudélhdzulh tele. 'Uhóneh ghaít'ah lí'hoont'ah, 'et whunts'ih huba 'alha 'uhoont'ah 'et nduwhútenilh. 'Et huwa Yak'usda ndi yúlhni, "Nts'uhainde hutelai." 'Et hoh bulh nduhooja. ¹⁹ Tube duneti súli, nts'e na'a simba buzkeh hole? 'Ankw'us 100 naooduzuk be sulí. Bu'at Sarah 'en chah 'et ndunt'ah, buzkeh whutéle 'o 'un hóonyin. 'Et whunts'ih, njan 'aw soo cho howu ni chaílah, Yak'usda daja yudáni, 'et tube cho buba 'alha 'uhoont'ah 'et huwa. ²⁰ Yak'usda ndet Abraham yuts'ú hoozi 'aw 'uts'un na'a cha'nízil 'ink'ez 'aw nawh buba cha'hóot'ah. Yak'usda buba 'alha 'int'ah, 'et hoh ulhtus sulí, 'ink'ez Yak'usda délhti. ²¹ Tube buba 'alha 'uhoont'ah, t'eeonínzun Yak'usda soo úlhtus hoh ndet yuts'ú hoozi 'et nduténilh. ²² 'Et huwa Yak'usda 'utni, "Ts'ah'un dune inli." ²³ Yak'usda bughunek 'uk'e'edúguz, 'i Yak'usda ndun Abraham ndí yulhni, "Ts'ah'un dune inli." Ndi 'aw Abraham zeh ílah huba 'uk'e'edúguz, ²⁴ Nuwheni chah neba 'int'ah. Yak'usda Sizi Gri neMoodihti dazsai hoh dinaidilhti 'et neba 'alha 'uhoont'ah t'eh, 'et t'eh Yak'usda neduténilh, "Ts'ah'un dune ts'inli." ²⁵ Tink'us 'úts'ut'en huwa Yak'usda Sizi Gri hubutl'a yáhlhti. 'Ink'ez dazsai hoh dinaidilhti. 'Et huwa Yak'usda nelubeshi neba hoolah whulhtsi.

5

Dune ne'huzúla 'et whunts'i Ndoni neyudinda 'et huwa 'aw whechats'ítsaz

¹ Yak'usda daja nedáni 'et neba 'alha 'uhoont'ah. 'Et hoh tinta' ts'ut'ih Yak'usda neba hoolah whulhtsi. 'Et whula gha ts'ih Sizi Gri neMoodihti 'en bugha Yak'usda ts'un nedzi dezghel. ² Sizi Gri neba 'alha 'int'ah, 'et huwa Yak'usda ye únzoo, 'i ne'íldzun unli ho' int'ah, 'ink'ez 'i be 'ílhuz wheni 'et nízinindel. 'Et ts'uhóont'i hoh huba ts'ílh'i ndet whusawhútelts'ulh Yak'usda ye dézti 'i be ts'owhuntehnik. ³ 'Ink'ez 'aw 'et zeh ílah, 'et huwa dune ne'huzúla whunts'i, ts'uhóont'i, t'ets'onínzun dune ne'husúla 'i gha whechats'ítsaz. ⁴ 'Et huwa ts'iyannah t'ehonózin ba soo' ts'ujá dune ts'inli. 'Ink'ez 'i gha huba ts'ílh'i ndet whusawhútelts'ulh. ⁵ 'Ink'ez Yak'usda Ndoni nets'ó t'l'aidá'ai 'ink'ez neyudande. 'En bugha Yak'usda dahóolcho 'i be nek'entsi' t'ets'onínzun. 'Et huwa 'et dzin whusawhútelts'ulh 'aw buk'elh'i ts'unoodelh ghaít'ah hoh huba ts'ílh'i. ⁶ Njan whunulh'en, whutsuh da 'aw be ts'íltus, 'i chats'ít'i ínle, Yak'usda ts'ah'un na'a buba yinkak uzdutélts'ílh huba. 'Et whunts'ih ndet dzin Yak'usda 'udun néwhuni'ai, 'et dzin Christ ts'iyannah lubeshi 'uhulh'en huba dazsai. ⁷ Howu nuní

nuhzut, 'aw dune ts'ah'un 'int'ah ba daóotsah hukwa' huninzun hoolah. Nuhtah 'ilhunuh tulih budzi ulhtus hóonli chah 'int'ah, 'en dune unzoo ba datétsah huba. ⁸ 'Et whunts'ih nuwheni 'awhuz lubeshi 'uts'ulh'en hoh Christ neba dazsai. 'Et hoh Yak'usda néwhunelhtan dahóolcho, 'i be nek'entsi'. ⁹ 'Aw 'et zeh ílah, Sizi Gri buz kai 'i bugha ts'ah'un na'ts'úja. 'Et huwa Sizi Gri 'en bugha Yak'usda ye húnilch'oh, 'i ch'a uzdutejih. ¹⁰ Njan whunulh'en, 'awhuz Yak'usda buch'a úzdetni hoh buYe' neba dazsai, 'i bugha Yak'usda ts'un dune nelh soo ninawhunt'ai. 'Et 'o 'un dega nus cha' hoont'ah, Sizi ye khúna, 'i be uzdutejih 'et huwa. ¹¹ 'Aw 'et zeh ílah, Sizi Gri neMoodihti 'en bugha Yak'usda bulh ts'uhóont'i, 'aw 'et Yak'usda ts'un dune nelh soo ninawhunt'ai 'et huwa.

Adam 'en bugha lubeshi 'uts'ulh'en, 'et whunts'i Sizi Gri 'en bugha Yak'usda nelubeshi neba hoolah yulhtsi

¹² Huwú nuni nuhzut, 'ilhunuh dune lubeshi 'ínla, 'en bugha ts'iyana ndi yun k'ut lubeshi 'uhulh'en huzdli. Lubeshi bugha yaztádlah. Ts'iyawh lubeshi 'uts'inla, 'et huwa ts'iyawh yats'adlah. ¹³ Yak'usda Moses bughunek yutl'aída'ai. 'Et whunts'un dune lubeshi 'uhulh'en. Dune Moses be' dustl'us 'aw chahiyít'ih, 'et huwa hubulubeshi ba nahutedeh k'at lih huba 'et niwhuni'ai. ¹⁴ 'Et whunts'ih Adam yinkak inda da hukw'elh'az Moses yinkak ninínya 'et nduhóolhez hoh, dune lubeshi 'uhulh'en, 'et huwa yahadlah. Adam Yak'usda bughunek t'einínzun, 'et whunts'ih k'einínyuz, 'et lubeshi 'ínla. 'Et huwa ts'iyana lubeshi 'uhulh'en huzdli. Ndunnah dune 'aw Adam k'una'a lubeshi cha'híil, 'en whunts'ih lubeshi 'uhulh'en hinli inle 'et huwa yahadlah. Ndunnah whusatéyahl, 'en Adam ndunt'ah. ¹⁵ 'Et huwa ndi hukw'elha chats'uhoolhtsil negha íni'ai, 'i 'aw 'ilhunuh dune 'en bula gha ts'ih 'uts'úja whundúchats'ilt'ah. 'Ilhunuh dune 'en lubeshi 'ínla 'et huwa ts'iyana yahadlah. 'Et whunts'ih Yak'usda ye únzoo, 'i bugha nelubeshi yunaoodelhúnah. 'Et huwa Yak'usda ye únzoo, ndun 'ilhunuh dune, Sizi Gri, 'en bugha ndi huba hukw'elha chats'uhoolhtsil, 'i dega nus hoonzoo hoh lhanah hubugha inínkat. ¹⁶ 'Et ndun 'ilhunuh dune 'en lubeshi 'ínla hoh dáhoaja whunulh'en. Yak'usda ndi hukw'elha chats'uhoolhtsil negha íni'ai, 'i 'aw 'et whundúchait'ah. Ndez na'a njan nduhoont'ah, ndi 'ilho lubeshi 'ulya 'i bugha Yak'usda ye náhuteyeh 'ulya, 'i ts'iyana dune dahútsah. 'Et whunts'i lubeshi lhai 'uts'inla whunts'i, Yak'usda ndi hukw'elha chats'uhoolhtsil negha íni'ai, 'i bugha tinta' ts'unt'en neba hoolah whulhtsi. ¹⁷ Njan whunulh'en ndun 'ilhunuh dune, 'en bulubeshi 'i bugha ts'iyana dune yahádlah suli. 'Ink'ez 'aw highah lhoya ghaít'ah. 'Et whunts'ih Yak'usda ye néts'un unzoo, 'i dega nus unzoo. Ndunnah hiyilhchoot, 'i bugha, ndi 'et huba hukw'elha chats'uhoolhtsil negha íni'ai, 'et Yak'usda ndunélnhi, ts'ah'un dune ts'inli 'ink'ez 'ilhuz wheni khuztena. 'Et ndun 'ilhunuh dune, Sizi Gri, 'en whuz na'a neba 'uhóonla. ¹⁸ 'Et huwa ndun 'ilhunuh dune, 'en lubeshi 'ínla, 'en bugha ts'iyana dune yahutédlah huba nahesda. 'Ink'ez ndun 'ilhunuh dune whuz na'a zeh ts'ah'un 'uhóont'ah hoh neba 'uja. 'Et huwa tinta' ts'unt'en Yak'usda neba hoolah whulhtsi, 'ink'ez 'ilhuz wheni khuztenalh ho' hoont'ah. ¹⁹ 'Ilhunuh dune 'en Yak'usda bughunek 'aw yuk'únucha'it'il, 'et huwa 'en bugha' hooja ts'iyana dune lubeshi 'ulh'en huzdli. 'Et whunts'ih ndun 'ilhunuh dune 'en Yak'usda bughunek yuk'une' 'ust'en huwa lhanah dune ts'ah'un 'uhint'ah tele. ²⁰ 'Et Yak'usda bughunek Moses, 'en chah yutl'aída'ai, 'et 'on nus whénulhtun hoh dawhunélsuk hoh Yak'usda bughunek k'úzninyuz. Ndet t'ets'onínzun lubeshi 'ulh'en ntsi' ts'inli nats'uhoo'aih Yak'usda ye néts'un unzoo, 'i 'o nus 'íltus hoh nelubeshi yuch'a' nílhde. ²¹ 'Et hoh da nts'e na'a lubeshi bugha dune ye dátsah 'aw yughah lhoya ghaít'ah. 'Et whunts'ih k'an 'et whuz na'a Yak'usda ye únzoo, 'i dune hiyilhchoot t'eh, 'i bugha 'ilhuz hukhutenalh. NeMoodihti Sizi Gri 'en bugha whuz na'a neba' hóonla.

6

Netsudule buch'a náts'oolyeh 'ink'ez Sizi Gri buk'úne' ts'oot'en

¹ Dája simba ts'udooni 'et? Lubeshi 'uts'ulh'en zeh ih uzdet'ilh, Yak'usda dalcho, 'i be nets'un únzoo t'ets'ontézin huba? ² Nts'e na'a 'uwhutét'ilh? Nets'en'a lubeshi whuch'a dats'úzsai, 'ink'ez doo chah lubeshi uztelh'ilh? 'Aw nduhót'e huba cha'hóot'ah! ³ 'Awhuz ih t'ewhunuzázhun? Ndunnah Sizi Gri bugha too be' hulya t'eh, 'et sih dune t'ehontézin Sizi Gri budune hinli. 'Et nduts'úja t'eh 'en bulh dats'úzsai líts'int'ah. ⁴ Ndi too be' ts'ulya 'i bugha Christ bulh dats'úzsai, 'ink'ez hiyulh 'áneyalhti líts'int'ah. 'Ink'ez ndet ne'abá ye úlhtus dézti, 'i be Christ yahadla tah dinadilhti da, 'et whuz na'a nuwheni chah 'uyoon nats'usdli k'una'a yinkak uzdóolts'i 'et huba' hoont'ah. ⁵ Njan whunulh'en, Sizi Gri hiyulh 'áneyalhti bulh 'ilhunuh nduts'int'ah t'eh, 'et whuz na'a dinadíja da bulh 'ilhunuh ts'inli lí'uztet'ilh. ⁶ Njan t'ets'onínzun, 'uda dats'ánt'e inle, 'et Sizi Gri 'en yulh lhóulalhgus k'ut whulh dazsai. 'Et 'uda dats'ánt'e inle 'i bugha lubeshi uztelh'ilh hukwa' uzninzun, 'i neba hoolah whulhtsi. 'Ink'ez 'aw 'o 'un lubeshi 'uztelh'ilh hukwa' chats'untészil. ⁷ Ndan dazsai,

'en bulubeshi buch'a hanálti ho' 'int'ah. ⁸ 'Et huwa nuwheni Christ bulh dats'úzsai t'eh, 'et sih 'en bulh khuztenalh, 'et neba 'alha 'uhoont'ah. ⁹ 'Et t'ets'onínzun, Christ yahadla tah dinadíja 'ink'ez 'aw whulh nat daóótsah ghaít'ah ho' hoont'ah. Ndi be yats'adlah 'i 'aw ye nek'une'ool'en ghaít'ah. ¹⁰ Ndi yuk'edazsai, 'i 'et 'ilhuz zeh ts'iyanaah ba dazsai. 'Et whunts'ih k'an 'et khuna 'ink'ez Yak'usda bulh khuna. ¹¹ Nuhwheni chah lubeshi ch'a yáhdla nahzun, 'et whunts'ih Yak'usda, Sizi Gri neMoodihti 'en bulh, khahna hoh 'aht'ah. ¹² 'Et huwa lubeshi nuhdzi yuh hóle gunih, 'ink'ez k'une' nuhool'en! ¹³ 'Aw 'o 'at nuhyust'e tink'us na'a 'uteit'ilh wheni butl'á'dudoolhúyeh gunih, 'et nuhyust'e yaidla buch'a 'i khuna k'una'a Yak'usda butl'á'dudulhúye, 'ink'ez nuhyust'e Yak'usda ba ts'ah'un na'a 'ut'en wahle. ¹⁴ Moses bughunek nuhtl'aída'ai, 'i but'anínoohtan gunih. Yak'usda ye únzoo, 'i zeh but'anínoohtan. 'Et t'eh lubeshi nuhmoodih wule ghaít'ah. ¹⁵ Daja nahzun? Niz de da ndi khunek netl'aída'ai, 'i 'aw 'o 'un but'aníznoohtan huba cha'hóot'ah. 'Et Yak'usda ye únzoo, 'i zeh t'aníznenan t'eh, lubeshi 'uztelilh netl'ahó'ai nahzun ih? 'Aw nduhót'e ghaít'ah. ¹⁶ Njan 'aw nt'ewhunúzhzun? 'Et 'ilhunuh dune tehle ka butl'á'dudelhúya t'eh, ndet hukwa' nínzun hoh nduteht'ilh, 'et t'eh 'en be 'ulhna 'aht'ah. 'Et whuz na'a zeh lubeshi butl'á'dudelhúye t'eh, lubeshi be 'ulhna 'aht'ah, 'ink'ez 'ilhuz wheni kwuncho yuh 'et ts'ih téhdulh, 'i nuhwhuba k'elha tele. 'Et whunts'ih Yak'usda butl'á'dudelhúya t'eh, Yak'usda be 'ulhna tehle, 'ink'ez Yak'usda nuhduténilh ts'ah'un 'aht'ah, 'et whuz na'a nuhwhuba k'elha whutéle. ¹⁷ 'Ink'ez sulhutsinkah tube nuhwhuba hoonúst'i 'et huwa Yak'usda, "Chanailya," dusni. Niz de lubeshi be 'ulhna ahli inle, 'et whunts'ih k'an nuhdzi ndulhcho 'i be ndet whunohoodalh'i hukw'úne' zaht'en. ¹⁸ 'Et k'an lubeshi ch'a dahjih, 'ink'ez ye ts'ah'un be' hoont'ah 'i be 'ulhna sahli. ¹⁹ Ts'iyanaah 'ulhna hube 'ut'en k'ah t'ehonínzun, 'et huwa whuz na'a nohwhulh yáhtuk. 'Et huwa daja nuhduténilh 'aw nuhwhuba huwa cháhoonah hoh sudutéht's'o. Niz de nuhyust'e lubeshi be 'ulhna tehleh huba butl'á'dudelhúya inle. 'Ink'ez hoontsi' 'uhoohl'en nus zeh lhé'whelsti' whulh'i. k'an 'et nuhyust'e ye ts'ah'un be' hoont'ah 'i be 'ulhna tehleh 'et butl'aítelhtel. Whuz na'a ndaht'en t'eh, ts'ah'un uteht'ilh, 'ink'ez Yak'usda ba 'udun nilya tehle ka. ²⁰ Lubeshi be 'ulhna ahli da, 'aw ts'ah'un na'a 'uteht'ilh chanúhzil inle. ²¹ 'Et hukwayá hoonli tune' zaht'en inle. 'Aw cha'áht'il 'ink'ez 'et hukw'elha 'ilhuz wheni kwuncho yuh ts'ih téhdulh ho' hoont'ah. 'Et whuz na'a dune ahli inle. ²² K'an 'et lubeshi 'ulh'en whuladehtnik, 'ink'ez Yak'usda be 'ulhna sahli. Whuz na'a 'áht'en 'et hukw'elha Yak'usda ba 'udun nilya sahli, 'ink'ez hukw'elh'az 'ilhuz wheni yak'uz téhdulh. ²³ Lubeshi 'uts'alh'en, 'i k'elha dazt'étsah. 'Et whunts'ih neMoodihti Sizi Gri, 'en bugha Yak'usda 'ilhuz be ts'ukhutena, 'et huba hukw'elha chats'uhoolhtsil hoh negha óoni'ai.

7

Sizi Gri k'úne' ts'ut'en 'et huwa 'aw Moses be' dustl'us 'i bugha ilah neba nahutedeh

¹ Sulhutsinkah, 'aw ih t'oonuzúzhzun? Yak'usda bughunek Moses yutl'aída'ai, 'i soo ts'ah'un t'enuhzun, 'et huwa' dusni be nuwhulh yáhtuk. Dune khuna húbutah ndai khunek Yak'usda butl'aída'ai hukw'úne'oot'en huba' hóont'ah. ² Njan whunulh'en, ndet ts'eke dune ghusda t'eh, yinkak usda whutah, yulh 'ilhunuh 'ulh'ih. 'Et buki dazsai teh, 'et 'aw yulh 'ilhunuh cháilah nawhudlih. 'Et whuz na'a Moses be' dustl'us ni ho' 'utni. ³ 'Et buki dazsai t'eh, 'et Moses be' dustl'us bugha ndan ts'eke suh natesja ho' 'int'ah. Hukwa' nínzun t'eh, 'uyoon dune ghu natedalh 'ink'ez 'aw lubeshi buba cháhoolah. 'Et whunts'ih buki 'awhuz khuna hoh 'uyoon dune zih usda t'eh, 'et lubeshi 'ulh'en 'uhoont'ah, 'ink'ez 'en lubeshi 'inla. ⁴ Sulhutsinkah ndet whunohoodalh'i nuhwheni 'ants'i Christ bulh dasáhtsai lí'áht'ah inle. 'Et huwa 'aw 'o 'un Moses be' dustl'us but'anínoohtan huba cha'hóot'ah. Christ bulh dats'úzsai, 'et huwa Moses be' dustl'us yuch'a naneninla. K'an 'et ndun dazsai 'ink'ez dinadíja, 'en bulh 'ilhunuh tehleh. 'Ink'ez ndet Yak'usda nuhts'uh hukwa' nínzun, whuz na'a 'uhóhlehuba' hoont'ah. ⁵ Niz de neyust'e lubeshi whuts'u nint'uk hoh Moses be' dustl'us 'i lubeshi yuch'a nenenyoot 'et whunts'ih nedzi hukwa' nínzun k'una'a yinkak uzdelhts'i inle. Neyust'e lubeshi butl'ats'íyalhti lí'ts'inla, 'et ndúts'uja huwa kwuncho yuh 'i neba k'elha suli. ⁶ Moses be' dustl'us but'anízntan inle. 'I bugha 'ants'i ts'ulhúghel lí'ts'ant'e inle. 'Et whuch'a dats'úzsai da, 'ink'ez k'an nela oodetnik lí'ts'uja. 'Et huwa Ndoni bugha k'an beni, 'i be 'ulhna ts'inli hoh buk'úne' ts'oot'en huba' hoont'ah, 'aw 'o 'un 'uda Moses be' dustl'us but'aníznoohtan huba cha'hóot'ah.

Moses be' dustl'us unzoo ih?

⁷ Moses be' dustl'us bughu daja uznoozin simba? Moses be' dustl'us 'i ghá ih lubeshi 'uts'ulh'en? 'Awundooh! 'Aw 'uhót'e ghaít'ah. 'I bugha lubeshi 'ulh'en usdli t'éwhunúszun 'et huwa. Moses be' dustl'us k'e'yáhtuk hoh 'utni. "Uyoon yit'i ka' nonzin gunih," 'i bugha nahóo'ai lubeshi 'ulh'en usdli. ⁸ 'Et whutsuh da Moses be' dustl'us bu'et lubeshi 'ulh'en inle 'aw t'oonuzúszun. 'Et whunts'ih ndi khunekYak'usda netl'aída'ai, 'i t'enazin

hoh, 'et dalcho 'i be suyust'e lubeshi ts'un nint'uk 'et nahóo'ai. ⁹ 'Et whutsuh da Moses be' dustl'us bu'et kwuncho yuh ts'ih t'ésyalh t'éoonuzúszun. 'Et whunts'ih ndi khunek Yak'usda netl'aída'ai, 'i t'enazin hoh lubeshi 'ulh'en usdli, 'ink'ez kwuncho yuh ts'ih tésyalh 'et nahóo'ai. ¹⁰ 'Ink'ez ndi khunek Yak'usda netl'aída'ai, 'i be 'ilhuz ts'ukhutená neshunéltan, 'et whunts'ih buk'eyalhtuk huwa kwuncho yuh ts'ih tésyalh nahóo'ai. ¹¹ 'Et ndi khunek Yak'usda netl'aída'ai, 'i t'enázin hoh suyust'e lubeshi ts'un nint'uk 'i khasúnent'a hoh nanést'a, 'et huwa kwuncho yuh ts'ih tésyalh t'éoonazin. ¹² 'Et huwa 'alha ndi Moses be' dustl'us lubeshi bughu hoolah, 'ink'ez 'uyoo khunek Yak'usda netl'aída'ai, 'i chah lubeshi bughu hoolah. 'Awhunelt'et ye ts'ah'un na'a 'ink'ez unzoo chah ho' 'int'ah. ¹³ Dája ts'un tezilh 'et hubugha? 'Ndi khunek suba unzoo, 'i bughá kwuncho yuh ts'ih t'ésyalh túlih? 'Aw 'uhót'e ghaít'ah! 'Ndi khunek Yak'usda netl'aída'ai, 'i nela' 'oot'en ka negha íninla. 'I bughá lubeshi dáltsi' t'enazin. 'Sich'oh lubeshi ts'un núst'uk, 'et huwa lubeshi 'ulh'en usdli, 'et nahóo'ai, 'ink'ez 'i bughá kwuncho yuh ts'ih t'ésyalh inle.

Neyust'e 'ahoolhyez lubeshi ts'un nint'uk, 'et huwa neba huwa whulna 'aw Moses be' dustl'us buk'úne' ts'oot'en ghaít'ah.

¹⁴ 'Ndoni bughá Moses be' dustl'us neghá yunle, 'et whunts'ih suyust'e lubeshi ts'un nint'uk, 'ink'ez lubeshi be 'ulhna tesdleh 'et t'éoonuzszun. ¹⁵ 'Njan whunulh'en, suyust'e lubeshi ts'un nint'uk teh, si suba 'aw chahóozooh ho' hoon't'ah. 'Ndaí 'óolh'en hukwa cha'nuzúszun 'i zeh 'ulh'en, 'ink'ez ndai dega nus whuts'u dusnik, hoh zeh ne'ust'en. ¹⁶ 'Et ndet hukwa cha'nuzszun 'ust'en teh, 'et Moses be' dustl'us suba ts'ah'un 'int'ah t'ewhunúszun. ¹⁷ 'Et whunts'ih, 'aw si hukwa' nuszun ílah hoh 'ust'en, ndi lubeshi suyust'e ts'un nint'uk, 'i bughá 'ust'en. ¹⁸ 'T'éoonuzszun 'aw suyust'e be whuts'u nint'uk 'et chahóozooh ho' hoon't'ah. 'Hoonzoo teh né'test'en hukwa' nuszun 'et whunts'ih 'aw 'oosneh ghaít'ah. ¹⁹ 'Et hoonzoo teh né'test'en hukwa' nuszun t'eh, 'aw 'uhósdle ghaít'ah. 'Ink'ez hoon'tsi' 'uwhtesilil hukwa cha'nuzúszun whunts'i, 'aw huwa chahoolna hoh tuné'test'en. ²⁰ 'Ink'ez hoon'tsi' teh né'ust'en t'eh, 'aw hukwa cha'nuzúszun, 'et whunts'ih 'aw si hukwa' nuszun ílah hoh 'ust'en, ndi lubeshi suyust'e ts'un nint'uk, 'i bughá 'ust'en. ²¹ 'Et nduwhút'en nahóo'ai, ndet ts'ah'un 'utes't'ih hukwa' nuszun totsuk, ndi lubeshi ts'un núst'uk 'i whuch'a súnilt'uk. ²² 'Sudzi yuh be ndi khunek Yak'usda nets'aída'ai hoonúst'i. ²³ 'Et whunts'ih 'uts'un na'a chah t'éoonuzszun. 'Et ndez na'a suyust'e seni lhena né'tet'en whuts'u nint'uk. 'I be lubeshi soontun t'endust'ah, 'ink'ez suyust'e whuz zeh nint'uk. ²⁴ 'TUBE TELHÚ'EN. 'Ndi suyust'e lubeshi zeh ts'un nint'uk. 'I bughá kwuncho yuh ts'ih t'ésyalh. 'Ndan 'et whuch'a sutélyihy? ²⁵ 'Sizi Gri 'en zeh 'utenilh. 'Et huwa tube cho Yak'usda, "Chanailya," dusni. 'Et ndez na'a 'ust'ah, seni be Yak'usda buk'ah zeh buk'úne' 'ust'en, 'et whunts'ih suyust'e 'awhuz lubeshi ts'un nint'uk zeh 'int'ah.

8

Sizi Gri Ndoni bughá 'ilhuz ts'ukhutená 'et negha óoni'ai

¹ 'K'an 'et, Christ, Sizi ts'utni, ndunnah hiyudúts'i, 'aw kwuncho yuh ts'ih wheni huba nachahídel. 'En 'uhint'ah 'aw buyust'e hoon'tsi' ts'un nint'uk hukw'u nucha'hust'en, 'et Ndoni buk'ah ts'ih zeh hukw'u ne'hut'en. ² 'Njan whunulh'en, Christ, Sizi ts'utni, 'en bughá Ndoni 'ilhuz wheni khuztenalh negha óoni'ai, 'et Moses be' dustl'us 'i bughá nt'ets'oninzun lubeshi 'uts'ulh'en dáztetsah ka, 'et whuch'a suba whuláoodetnik. ³ 'Neyust'e lubeshi ts'un nint'uk, 'et huwa Moses be' dustl'us 'aw nela 'ooneh ghaít'ah. 'Et hukw'elh'az Yak'usda nela 'uja hoh buYe' nets'ítel'h'a. 'En buyust'e neyust'e ndult'ah, 'et whunts'ih neyust'e 'i lubeshi bulh 'int'ah. 'Ink'ez 'en datétsah ka whutl'a'dudelti, ndi yun k'ut dune bulubeshi k'elha whutelhtsilh 'et wheni. ⁴ 'Et hoh Moses be' dustl'us nets'u húkwa' 'utni, ts'iyawh neba lhaóodinla. 'Nuwheni 'uts'int'ah, 'aw neyust'e nint'uk ts'ih hukw'u nucha't'ust'en, 'et Ndoni buk'ah ts'ih zeh hukw'u ne'ts'ust'en. ⁵ 'Ndunnah lubeshi zeh whuts'u nint'uk t'eh, 'ahoolhyez lubeshi 'uhulh'en. 'Ink'ez ndunnah Ndoni k'ah ts'ih zeh nuní hunuzut, 'en Ndoni k'ah ts'ih zeh hukw'u ne'hut'en ho' hint'ah. ⁶ 'Et ndunnah lubeshi ts'un hunínt'uk, 'en kwuncho yuh ts'ih hutedulh, 'ink'ez ndunnah Ndoni k'ah ts'ih dune hinli, 'en Yak'usda whudezghel bube'ildzun whutele 'ink'ez 'ilhuz hukhutenalh. ⁷ 'Njan huwa' dusni, ndunnah 'ahoolhyez lubeshi ghu nuní hunuzut, 'en Yak'usda ch'a detni hinli. 'Aw Yak'usda buk'ah ts'ih k'úne' whét'en whutl'a chá'hududulhti, 'ink'ez Yak'usda k'úne' hutet'en 'et 'aw 'úhóoneh ghaít'ah. ⁸ 'Et ndunnah, buyust'e lubeshi ts'un hunínt'uk, 'aw Yak'usda ba nuchá'zoooh. ⁹ 'Et Yak'usda buyégha nuhyudínda t'eh, 'alha Ndoni budune ahli 'ink'ez nuhyust'e lubeshi ts'un nint'uk 'aw buk'únucha'zant'en. 'Et whunts'ih ndunnah Christ buyeghah* chahit'ih, 'en 'aw budune chahílah. ¹⁰ 'Nuhyust'e lubeshi bughá datétsah, 'et whunts'ih Christ nuhyudínda t'eh,

* 8:9 Yak'usda bughá 'ink'ez Christ yughi, 'ilho zeh unli. 'En Ndoni hiyulhni.

'et sih nuhyéghah 'ilhuz khutena. Yak'usda be ts'ah'un 'uhoont'ah, 'i bugha ahja 'et huwa. ¹¹ Sizi dazsai hoh Yak'usda dinaidilhti, 'en buyégha nuhyudínda t'eh, 'et Yak'usda Christ dinaidilhti, 'en buyégha nuhyudínda, 'en bugha nuhyust'e 'ilhuz khutena yughá oote'alh. ¹² Sulhutsinkah, njan dúhoont'ah ho' hoont'ah, nuhyust'e lubeshi ka' ninzun t'eh, 'aw whuz na'a 'oohneh huba cha'hóot'ah. ¹³ 'Et whuz na'a dune ahli t'eh, 'et kwuncho yuh ts'ih téhdulh. 'Et whunts'ih Ndoni 'en bugha nuhyust'e lubeshi ka' ninzun 'ustl'e' 'uhla t'eh, 'et 'ilhuz wheni khutehnalh. ¹⁴ K'us ndan Ndoni butsu'ú húkwa' ninzun hukw'u na'a 'uhut'en, 'aw 'en zeh Yak'usda budune hinli. ¹⁵ 'Et njan whunulh'en, Ndoni nuhyudélt's'ut hoh 'aw Yak'usda be chats'uníjut wheni 'ulhna chanhohílt'sel. 'Et nuhyudélt's'ut hoh Yak'usda budune nuhwhulhtsi. 'Et huwa whéchats'uniljut hoh bulh yáts'ulhtuk 'ink'ez, "Abba, 'aBá," ts'utni. ¹⁶ Ndoni 'en dich'oh neyéghah wheóobunulhtun, nuwheni Yak'usda buzkeh ts'inli. ¹⁷ 'Ink'ez nuwheni Yak'usda buzkeh ts'inli t'eh, ndai Yak'usda butsu'ú yoozi, 'i bube'ildzun whutele. 'Et whuz na'a Christ bulh úzet'ilh, Christ bulh dzuh nuts'uzut t'eh, 'en bulh uzdutéti 'et huwa.

K'at lih Yak'usda nedutélti

¹⁸ 'Et njan nudúnsi, Yak'usda ye dézti, 'i whuneuntelhtun hooncha k'et njan k'an 'et Sizi Gri buba dzuh nuts'uzut, 'et ants'i 'uhoont'ah. ¹⁹ Ndai Yak'usda 'uyinla, ndi 'uyinla, 'i ts'iyawh soo hukwa tsi húhooli hoh dudune wheoobuntelhtun. ²⁰ Ndi 'uyinla, 'i astl'iyawh wheni 'uyinla. 'Aw dich'oh 'utahacháhoo'al, Yak'usda dich'oh 'utahahó'ai whuz na'a 'uhót'e ka. 'Et huwa ndi 'uyinla, 'i hukwa tsi húhooli 'uts'un na'a na'whuténilh 'et huwa. ²¹ Ndi 'uyinla, 'i whunts'i, njan whusawhélt's'ut t'eh, ndi yun k'ut be whulhjut, 'et 'ustl'e' 'uwhuténilh. Tube whudézi whutéle. 'Et Yak'usda buzkeh k'una'a buk'ena'ét'uk lí'hutenilh. ²² Njan nt'ets'onínzun, ndai Yak'usda 'uyinla, 'i ndunt'i k'an 'et whuts'un khun dutso, nts'e na'a ts'ekoo buyaz whutéle whuz na'a dzuh nuzut. ²³ 'Aw 'i zeh ílah, nuwhenich'oh chah khun dutso Yak'usda buzkeh gaih zeh uzteleh 'et whuts'un. 'Et hoh t'eh, neyust'e 'ants'i buk'ena'et'uk lí'tenilh. 'Et Ndoni nets'ú whusayalh'a inle, 'et hoh t'ets'onínzun Yak'usda nedáni whuz na'a 'et nenaootekulh. ²⁴ 'Et nts'e na'a Yak'usda butsu'ú húkwa tsi ts'úhooli, whuz na'a uzdujih. 'Et hukw'u nuni nulhzut, ndet hukwa tsi ts'úhooli 'uhóoja t'eh, 'aw 'o 'un hukwa tsi ts'úholi ghaif'ah. Ndet dune honalh'en, 'aw 'o 'un hukwa tsi húholi ghaif'ah 'et huwa. ²⁵ 'Et whunts'ih Yak'usda ndet nets'ú hoozi 'awhuz chats'úwhes'en t'eh, 'awhuz hukwa tsi ts'úholi zeh 'uts'oot'e. ²⁶ Lhawh hukw'u na'a 'aw chats'íltus. 'Et huwa Ndoni nela 'ut'en. 'Aw whulutah teh ndet huba tenazdutedli 'aw t'ets'onínzun. 'Et whunts'ih Ndoni neba tedudlih, khudutso lí'utni, khunek 'aw be yaóotuk ghaif'ah, 'i be neba tenadudli. ²⁷ Ndun nedzi yuh nunúta, 'et Ndoni dája ninzun 'et nt'eeonínzun. Yak'usda hukwa' ninzun hukw'u na'a. Ndoni dune Yak'usda bube'ildzun 'en hububa tedudlih 'et huwa. ²⁸ 'Et huwa nt'ets'onínzun ndunnah Yak'usda yuk'entsi', 'en ts'iyaintsuk hoonzoo k'una'a zeh huba whulh. Yak'usda 'en k'us ndet huba hukwa' ninzun hubutelhyih ka hubuka' dani 'en 'uhint'ah. ²⁹ 'Udechoo whuts'un k'us ndan Yak'usda bube'ildzun huteleh, 'et 'uda ts'iyawh t'eeobunínzun. 'Et huwa whutsuh da huba lhaóodinla nuhwheni buYe' k'una'a 'uteht'ilh lí'hutet'ilh. 'Et whuz na'a Sizi Gri lhannah bulhutsinkah hubutah 'Udechoo Whudzli huba unli tele. ³⁰ 'Ink'ez ndunnah whutsuh da hube'ildzun hutele t'ebunínzun, 'en hudutejih ka buka' dani. 'Et tink'us 'uhut'en huba hoolah whulhtsi, 'ink'ez 'en hubudálhti.

Sizi Gri 'en bugha Yak'usda nek'entsi'

³¹ 'Et njan dazdóoni simba? Yak'usda nelh 'int'ah t'eh, ndan simba nech'a dootni? ³² 'Aw Yak'usda buYe' 'en hubuch'a chayóotun hoh neba datétsah wheni hubutl'a yálhti. 'Alha 'uhoont'ah, 'et Yak'usda neba 'udeja t'eh, 'et buYe' bulh 'aw hukw'elha chats'uhoolhtsil hoh ts'iyaintsuk negha íteleh. ³³ Ndunnah Yak'usda 'utahaóobanla, ndan 'udutenilh lubeshi 'uhulh'en buduténilh? Hoolah! Yak'usda 'en 'uja tink'us 'úhut'en, 'en huba hoolah whulhtsi. ³⁴ Ndan 'udutenilh hoontsi' k'una'a neba nahuteyeh? Hoolah! Christ 'en zeh 'uja neba dazsai. 'Aw 'et zeh ílah, 'en dinadíja 'ink'ez Yak'usda nalnhnih ts'ih yuzih usda, 'et neba tenadudli. ³⁵ Ndan 'útenilh Christ ye nék'entsi', 'i yuch'a nanetélhtel? Nech'a hahóonelh'i, k'us howa whúlna neghá whonkat, k'us dune ne'zula, k'us dai ts'inli, k'us tube tets'ul'en, k'us nelh howa 'óodli uzdelhts'i, k'us nehutuzelghelghel túlih? 'Aw hoolah! ³⁶ 'Uda ndi Yak'usda be' dustl'us njan ndutni, "Sheep nahituzelghelghel k'una'a 'uts'int'ah.

Nyun ngha dzin totsuk nehutuzelghelghel li'hoont'ah," ni.

³⁷ Ndi hoontsi' nelh 'uwhut'en 'et whunts'ih, ndunnah nek'entsi', 'en bugha 'aw nech'a 'oodeh ghaif'ah. ³⁸ 'Aw 'et njan tube suba 'alha 'uhoont'ah hoh ndi be dats'utsah, k'us be ts'ukhuna, k'us lizas, k'us nek'une'hul'en, k'us negha ndoh ye últus, k'us k'an nelh 'uwhut'ih, k'us nus de haóotekulh, ³⁹ k'us nduk 'uhoont'ah, k'us ndai nyuk 'uhoont'ah, k'us

'o 'un dant'i 'ulya chah, 'et ndi ts'iyawh Yak'usda ye nek'entsi', 'i Sizi Gri neMoodihti yugha 'int'ah, 'aw yuch'a naneolelh hoolah ho' hoont'ah.

9

Ndai hoonliyaz Yak'usda Lizwifbut's'úyoozi, 'i 'aw bugha chayikuhl, Yak'usda hik'ah ts'ih ne'hoot'en hukwa cha'hunizun 'ink'ez bughunek 'aw chahiyóotun. 'Et huwa 'uja Yak'usda 'udun yun k'ut whut'en dudune hóole ni.

¹ Njan ndunwhudutésnilh Christ bunalh 'úusni. 'Aw chaoozústs'it ho' dusni. Dája nuh-whudutésnilh Ndoni 'en bugha suyuh ts'ih bugha t'ets'oninzun, 'i 'et chah 'álha 'uhoont'ah. ² Njan 'et ndudúsni ho' dusni, Lizwif Yak'usda t'aníchahonitan 'et huwa 'en hubugha tube sudzi únduda, 'ink'ez 'ahoolhyez hubuk'e ni usdli. ³ Lizwif sulh húdedowh 'et huwa bula' tesnilh hukwa' nuszun. 'Et hoh bula 'e'whuduténilh t'eh, whute Yak'usda skehooyeh da 'ink'ez Christ ch'a naosja doosni wule da. ⁴ Ndunnah Israel hits'uh hainde Yak'usda 'utahaóobanla dudune hoolé ka. 'En 'uhint'ah Yak'usda hidálhti 'ink'ez be hubuts'ú nahezya, 'et huba nahoosdzi. 'En 'uhint'ah Moses be' dustl'us hubutl'a ída'ai 'i be nts'e na'a Yak'usda ts'ah'un na'a hiba 'oot'en ka. ⁵ Israel budune 'uda dune tsuh whúdelhdzuls ts'ih hahánde ho' hint'ah, 'ink'ez Christ 'en chah hubuts'u haínzut. 'Et huwa buyust'e dune k'una'a 'uchainya inle. 'En 'int'ah ts'iyaintsuk whuYak'usda unli. 'Et huwa 'ilhuz wheni hoh hidéllhti. 'Et ndoh honeh. ⁶ 'Aw 'et Yak'usda bughunek 'ants'i yuk 'uhooja nahzun ih? 'Awhundoo! 'Aw yuk 'uhooja ilah. Njan whunulh'en, ndunnah Israel hits'uh hainde, 'aw ts'iyawh ilah Israel whudune hinli 'et huwa. ⁷ 'Ink'ez Abraham yuts'u haínzut 'aw ts'iyawh ilah Israel whudune hinli. Yak'usda 'en Abraham 'ídani, 'Isaac 'en bugha zeh nts'u haínzut hootédzilh." ⁸ Njan 'et 'udúsni, Yak'usda budune 'aw dune yust'e ts'un haínde, 'en ilah 'uhint'ah. Ndi khunek ye but's'u nahezya, ndunnah 'i huba 'alha' yint'ah, 'aw 'en zeh Yak'usda budune 'uhint'ah.

⁹ Yak'usda 'en Abraham yuts'u náhezya, "Ndet hoozizi 'et whusanátesdalh 'ink'ez n'at Sarah, 'en dune buyaz tele," yúllni. ¹⁰ 'Aw njan 'et zeh ilah, Rebecca buzkeh lht'adánke, 'en bu'abá, netsuhda Isaac, 'en 'int'ah. ¹¹⁻¹² 'Aw chahuwhúsdle whutsuh da whuts'un, 'aw hoontsi' k'us hoonzoo cha'whuhusdle da, Yak'usda Rebecca 'ídani, "Udechoo, 'en dek'ah yuk'úne' tet'en." 'Et hoh nts'e na'a Yak'usda hukwa' ninzun, 'et whuz na'a 'uhóoja. ¹³ Njan 'et Yak'usda be' dustl'us k'ut 'uk'e'úsduguz, ndutni, "Jacob* 'en buk'esi', 'et whunts'ih Esau 'en 'ants'i suba unli."

Yak'usda buk'ah ts'ih 'aw soo t'echats'onízun

¹⁴ 'Ink'ez dája uzdutenilh nuhzun? Yak'usda 'aw ts'ah'un cha'ít'ah uzdutenilh ih? 'Aw whuz na'a 'uhót'e ghaít'ah! ¹⁵ Yak'usda nts'e na'a Moses 'ídani,

"Ndan bugha té'unteszeh, 'aw 'en zeh bugha té'unteszeh,

'ink'ez ndan bugha sudzi dúnteda, 'aw 'en zeh bugha sudzi dúnteda."

¹⁶ 'Et huwa Yak'usda ye negha té'nuzeh, ndan buka' ninzun, k'us dune dich'oh hukwa' huninzun ilah huwa 'uhooja, Yak'usda 'aw 'en zeh ba' hoont'ah. ¹⁷ Yak'usda bughunek 'uk'une'uzguz, 'i k'ut Pharoah njan ndúyulhni, "Njan 'et huwa Egypt whuhubudayi cho nyuzílsih, nyun ngha ndet whéltus dune whúntelhtun. 'Et whuz na'a soosi ndi yun k'ut nduhoolhcho hoh t'entézin," yúllni. ¹⁸ 'Et njan t'eeonóhzin hukwa' nuszun, ndunnah Yak'usda 'utahaóobanla, 'en bugha te'untezilh. 'Et ndunnah 'uts'un 'úninzun, 'en chah whuz na'a 'uhint'ah hubilh'i. ¹⁹ Bulunah nuhtah 'et tulih sudóohni, "Dant'i ka Yak'usda 'en nek'eóote'alh. K'us ndai nets'u hukwa' ninzun 'aw dune hoolah hoh whuch'a hooyen ghaít'ah." ²⁰ Ndan ahli hoh Yak'usda buyenah 'uduténilh? 'Et dune 'uyínla, 'i ndi 'uyínla, 'i nts'e na'a 'udutenilh, "Di ka 'inja whuz na'a 'usínla dutenilh?" ²¹ Njan whunilh'en, dune whutl'us be 'oosa' inla t'eh, lhuk'i unzoo yulhtsi t'eh, 'i ye' dudetélti huba, 'ink'ez lhuk'i 'i ye' tet'ilh wheni yulhtsi. 'Et whuz na'a 'uyínla t'eh, dich'oh zeh buba' hoont'ah. ²² 'Et whuz na'a Yak'usda lhelyyoo hoh lhelhts'un na'a huba 'uhóonla. Bulunah bulubeshi bugha Yak'usda kwuncho yuh ts'ih whébué, dich'oh kxanáhuwhut'aih huwa' bulh'ih. Sa whuts'un whechait'saz hoh dzuh nobutelhdzut. 'En bugha Yak'usda dáltus ts'iyana' t'éwhuntézin, 'ink'ez dalcho 'i be lubeshi yuts'u dutnik, 'et chah ts'iyawh t'ehontézin. ²³ 'Et nuwheni chah sa neba ulh'i. Whutsuh da 'utahanénla negha te'untezelh ka. 'Et whuz na'a nuwheni chah uzdutéti. Nuwheni negha ts'iyana' t'ehontézin Yak'usda ye dézti, 'i dálzoo ho' 'int'ah. ²⁴ Nuwheni Yak'usda uzdutejih ka neka' dani ts'inli, 'aw Lizwif hubutah zeh ilah, 'udun yun k'ut whut'un chah. ²⁵ Yak'usda 'en 'utni nus whunilh'en Hosea be dustl'us k'ut, whuz na'a 'uwhtuténilh hoh 'utni, "Aw sudune ilah, 'en sudune hubudutésnilh, 'ink'ez hubuk'echasi', 'en hubuk'etesi'.

* 9:13 Ndan Jacob, Israel cha hiyulhni, 'ink'ez bulhutsin cha Esau hiyulhni.

26 Nts'oh yun k'ut whudune,

'aw sudune ilah 'aht'ah hubudáni,

'en whunts'i Yak'usda khuna, 'en dudune hubudutenilh."

27 'Et nus whunilh'en Isaiah, Israel budune bughu yalhtuk hoh 'et khunek ulltus, 'i be ndutni,

"Israel budune taba sai nduhuneltsuk t'eh,

'et whunts'ih whulutah zeh hudutejih.

28 'Ink'ez nts'oh húdelhts' i ndet Yak'usda ubudáni, ye be ts'ah'un 'uhoont'ah, 'i be khunyaz 'et nduténilh,

'ink'ez khunyaz 'ilhuz wheni huba nahuteyeh," hubúlhni.

29 Nts'e na'a nus whunilh'en Isaiah ndutni,

"Nduun ts'iyaintsuk whuMoodihti unli,

'en Lizwif hubulah zeh chabílhyis t'eh,

'et sih Sodom 'ink'ez Gomorrah whut'en 'et da hubulh dahooja,

nuwheni chah 'et ndúztenilh ts'ooole da."†

Israel budune Yak'usda 'aw highunek chahiyilcholph 'et huwa hubula detnik

30 Daja simba ts'udooni 'et? 'Udun yun k'ut whut'en, 'en 'uda Yak'usda nalh 'aw ts'ah'un na'a 'uhoot'e hukwa cha'hust'en, 'en 'uhint'ah k'an 'et Yak'usda nalh ts'ah'un 'uhint'ah, be 'alha 'uhoont'ah hit'i, 'i bugha 'uhuja. 31 'Et whunts'ih Israel budune ndi Moses be' dust'us 'i bugha ye be' ts'ah'un uhoont'ah, hukwa' hét'en, 'et whunts'ih 'i 'aw cha'huhóolil. 32 'Et di ka ndez na'a 'uhóoja? Yak'usda bughunek 'i 'aw huba 'alha cha'yit'ah, 'et huwa 'aw ts'ah'un cha'hít'il. Moses be' dustl'us, 'i zeh hik'úne' oot'en hukwa' hót'en. Ndi tse be hiye dunudaih, 'i hidunudaih 'et huwa. 33 'Et whuz na'a Yak'usda bughunek 'uk'e'usdúguz ndutni,

"Whunulh'en, keyah Zion ts'uwhútni, 'et tse‡ 'i nidúntes'ah, 'i dune hinedúntedaih.

'Et ndunnah Yak'usda bughunek chahiyilcholph, ndi tse huba chayízooh.

'Et whunts'ih ndunnah huba 'alha' yint'ah, 'en 'aw hukwaya hoole ghaít'ah."

10

Israel budune, ndi Moses be' dustl'us dune hik'üne'oot'en, 'i ts'iyaintsuk Christ huba 'ustl'e' uhóonla

1 Sulhutsinkah Yak'usda but'sun ténadusdli khun teh Israel budune hudoojih. Njan 'et sudzi yuh hoh hukwa' nuszun. 2 'En bugha 'alha' dusni, tube nchah, 'i be Yak'usda ndet hubuts'u húkwa' ninzun hukw'ú ne'hutet'en hukwa' huninzun, 'et whunts'ih 'aw soo cho nt'ehonízun. 3 Yak'usda ye be' ts'ah'un 'uhoont'ah k'úne' hutet'en 'et 'aw t'ehonízun. Nts'e na'a dich'oh 'uhuhóonla whuz na'a ts'ah'un na'a 'uhint'ah na'hududil'i. 'Ink'ez ndet Yak'usda hubuts'u húkwa' ninzun 'aw hubutl'acha'hududiltel. 4 Njan whunulh'en, ndi Moses be' dustl'us nets'u húkwa' ninzun, 'i Christ ts'iyaintsuk neba lhaoodinla. 'Et huwa ndan huba 'alha' yint'ah, 'en Yak'usda nalh ts'ah'un dune hinli. 5 Ndunnah Moses be' dustl'us bugha ts'ah'un dune hik'una'a 'uhoot'en hukwa' uhut'en t'eh, njan howa 'et Moses yuk'üne'úzguz hoh ndutni, "Nts'e na'a ndan ndi khunek yuhts'u húkwa' ninzun, whuz na'a 'uhoot'e huba' hooht'ah." 6 'Ink'ez nts'e na'a be 'alha 'uhoont'ah, 'i bugha Yak'usda nalh ts'ah'un na'a 'uts'int'ah, njan 'uk'e'edúguz, "Aw na'ts'oodudolkut ghaít'ah, 'Ndan utenilh nduk teyalh Sizi Gri ndus de haítelhtelh?" 7 K'us ndan utenilh, 'Christ neba whusaítelhtelh, yahadla tuz téyalh 'et wheni?" 8 'Et Yak'usda bughunek daja ni hoh 'utni? Njan 'et 'uk'e'edúguz, "Ndi khunek ndai bugha ts'ah'un na'a 'uztet'ilh, 'i neghah dez'ai ho' int'ah, nezek chah 'ink'ez nedzi yuh chah dez'ai." 'I int'ah, ndi khunek be 'alha 'uhoont'ah, ndai be nohwhulh yáts'ulhtuk, 'i int'ah. 9 'Et 'uyoon dune ndo budíni t'eh, 'Sizi Gri 'en suMoodihti unli, 'ink'ez ndzi yuh hoh mba 'alha 'uhoont'ah Yak'usda Sizi Gri dazsai hoh dinaidilhtih, 'et t'eh dutanjih ho' hooht'ah. 10 Njan 'et ndzi yuh hoh mba 'alha 'uhoont'ah t'eh, Yak'usda nalh ts'ah'un na'a int'ah. 'Ink'ez njan 'et 'uyoon dune budíni t'eh, 'et sih dínjih ho' nint'ah. 11 Yak'usda bughunek 'utni, "Ndan neMoodihti huba 'alha' yint'ah, 'aw yooya chatesdle." 12 Lizwif 'ink'ez 'udun yun k'ut whut'en 'aw lhelhts'un na'a cha'hít'ah. Yak'usda ts'iyannah hubuMoodihti ho' int'ah. 'Et huwa ndunnah hubula' whudóneh hits'u húkwa' 'utni, 'en tube hubuts'un unzoo ho' int'ah. 13 Ndan hinli whúnts'i, neMoodihti hudoojih hits'u húkwa' 'utni t'eh, 'et 'alha 'uhoont'ah hoh hudutejih. 14 'Et ndunnah Sizi Gri huba 'alha cha'ít'ah, 'et nts'e na'a 'uhudutenilh huboolhyis hits'u hukwa' dutenilh? 'Aw hiyulh ch'a'dusts'uk t'eh, 'et nts'e na'a huba 'alha yutét'ilh? 'Uyoon dune hubudáni t'eh zeh. 15 Dune hubuts'un whehalh'a ubuduténilh huba, 'et t'eh zeh hiyulh 'údutets'o. Njan hubugha Yak'usda be' dustl'us k'ut

† 9:29 Njan Sodom 'ink'ez Gomorrah huwhut'en 'o nus hintsi' k'et 'aw nduchaobudinel hoh huhoolah hubulhtsi.

‡ 9:33 Ndi tse, 'i Sizi Gri int'ah.

'et 'utni, "Dáwhulzoo ho' hoont'ah dune khunek unzoo, 'i whuneuntelhtun, nts'e na'a nedzi yuh whudutéghel 'ink'ez Yak'usda be 'ut'en unzoo, 'i ts'óolhchoot huba." ¹⁶ 'Et whunts'ih 'aw ts'iyannah ilah khunek unzoo, 'i hik'úne' 'ust'en. Nts'e na'a nus whunilh'en Isaiiah 'utni, "NeMoodihti ndunnah dune daja hubuts'útni 'aw huba 'alha cha'hóot'ah." ¹⁷ 'Et huwa ndi khunek uzdzits'o, 'i bugha be neba 'alha 'uhoont'ah 'uts'int'ah. 'Ink'ez ndi khunek uzdzits'o, 'i Yak'usda bughunek 'int'ah. ¹⁸ Njan 'et hukwa nuhoodulhkut, Israel budune 'aw ih ndi khunek hiyulh 'udits'il? A, hiyulh 'údants'o. Njan Yak'usda be' dustl'us k'ut 'et ndutni, "Ndunnah naghúnek na'a 'en bughunek ts'iyawh ndi yun k'ut hídants'o.

'Et ndi khunek dune hiyubodulh'eh nts'e dune huwhut'i ts'iyawh hidánts'o."

¹⁹ 'Et doo chah nuhoodulhkut, 'et Israel budune 'aw ih njan whulh cha'hudústs'o? A, hiyulh 'údants'o. 'Udechoo Moses njan 'et 'utni,

"Ndunnah dune buyun k'ut hoolah nuhzun, 'en hubughe 'ootelhúni nuwhutélhsilh.

'Et ndunnah yun k'ut whut'en, 'en ilah tune' hut'en, 'en hubugha tube huntel'húch'oh nuwhútelsilh," ubúlhni.

²⁰ Nus whunilh'en Isaiiah 'aw whéchaniljut daja dutenilh, ndet Lizwif hubulh yaíltuk da 'ink'ez Yak'usda ba yalhtuk hoh ndutni,

"Ndunnah 'aw skacha'hoodulhkut, 'en sughu nahahoo'ai.

Ndunnah 'aw skúchanustah, 'en bubuduna dunel'hútan."

²¹ 'Et whunts'i Yak'usda Isaiiah ndi yúlhni Israel budune hubugha.

"Dzin nduhóolhyez hoh hubuka' dúnis khun teh suts'un hutoodelh ka.

'Et whunts'ih 'aw suk'únucha'hust'en 'ink'ez 'uts'un 'uninzun hinli.

'Ink'ez 'aw suts'un hutóoya hukwa cha'hunízun."

11

Yak'usda Israel budune 'awhuz hubugha te'obuninzun

¹ 'Et njan 'udusni, Yak'usda dudune 'ilhuz ih 'ún hubutelhdel? 'Awundooh! Si chah 'ilhunuh Israel budune 'ust'ah. Abraham 'en be dizut 'ink'ez Benjamin bulh désdoh.

² Yak'usda dudune whutsuh da t'ebuninzun 'en 'aw hubuch'a nachaí'al. 'Et 'aw ih whunachasulhúnik Yak'usda be' dustl'us k'ut daja ni nus whunilh'en Elijah 'en bugha? Nts'e na'a Yak'usda yuts'u tédudli Israel budune, 'en buch'a 'útni, ³ "SuMoodihti nye nus whunilh'en chah huba hanghan 'ink'ez nkw'uzdai k'ut 'i chah nahínanyuz. Si zeh 'et ninlhúts'ut. Si chah suhutuzelghel ka suka hunuta."

⁴ 'Et whunts'ih ndet Yak'usda yadáni? Njan 'et ndi yúlhni, "Awhuz 7,000 dune 'en 'et hubudelhts'i. 'En 'aw ndi 'uk'edélti Baal 'aw 'i hits'u téninoolhzin 'ink'ez hits'u ténadoodli ghaít'ah."

⁵ 'Et whunts'ih k'an dzin 'awhuz bulunah Israel budune dujih hoonli. 'En Yak'usda ye únzoo, 'i be 'utahaóobanla, 'en 'uhint'ah. ⁶ 'Et whuz na'a Yak'usda ye únzoo, 'i be uzdujih, 'aw khunek netl'adét'ai, 'i buk'úne' ts'ut'en 'aw 'et huwa ilah. 'Aw njan ducháhoot'il t'eh, Yak'usda ye únzoo, 'i whutélah ho' hoont'ah. 'Et ndi khunek netl'aída'ai, 'i buk'úne' ts'ut'en huwa uzdujih ts'utni t'eh, 'ink'ez nts'e na'a Yak'usda ye únzoo, 'i be uzdutejih uzduténilh? 'Et dune howu yahalhtuk nts'e na'a hudutejih, ndi khunek Moses be' dustl'us bugha netl'adélt's'ut, 'i buk'úne' ts'ut'en whunts'i, 'i bugha uzdoojih ghaít'ah. Njan 'et 'uw'húlhni. ⁷ Khunek njan ndutni hoh 'utni, Israel budune hubudzi duts'un, 'et huwa hukwa húnuta 'aw nachahuhóo'al. 'Et whunts'ih 'onghoh 'utahálya, 'en nahuhoo'ai. ⁸ Nts'e na'a Yak'usda be' dustl'us k'ut 'uk'úne'whusdúguz, soo whuz na'a 'uhóoja.

"Yak'usda dune 'ants'i nahunestez hubulhtsi.

Hubuna hóoni 'et whúnts'i 'aw hiye chawhes'en.

Hubudzo chah hoonli 'et whunts'ih 'aw hiye cha'dusts'uk.

k'an 'et dzin whuts'un 'awhuz nduhínt'ah," hoh ndutni.

⁹ David 'en chah njan bugha ndutni,

"Ndai Yak'usda, ncha 'i hubugha ínina, 'i whute, bilh 'ink'ez tsagooh buka níyults'ut lí'uja.

Ndai bughá ininla, 'i hikaya wule huboolhtsilh.

'Et whuz na'a hubulubeshi huba k'elha nahuwulhtsi.

¹⁰ Hubuna whute hiye chahuw'hés'en Yak'usda ye únzoo, 'i hiye nóolh'en whuch'a.

'Ink'ez hiyé dzuh nudeh 'i be yuk húnoot'uk dune ndaz, 'i nuyúghe k'una'a," ni.

Yak'usda Israel budune 'aw 'ilhuz ilah bula detnik

¹¹ 'Et chah zeh nuhoodulhkut, Lizwif 'et tse bugha huntézhah, 'et 'ilhuz wheni tintá hutelts'ulh ka ih nahélt's'ut? 'Aw whuz na'a 'uhót'e ghaít'ah! Yak'usda bughunek hika cha'nízun, 'et huwa 'udun yun k'ut whut'en 'et k'an 'et hiye dújih. 'Et whuz na'a 'uhutenilh Lizwif 'udun yun k'ut whut'en bughe' hootelnih. ¹² 'Et whunts'ih tink'us na'a 'uhut'en 'et

huwa 'uyoon dune Yak'usda ye únzoo, 'i be huhóont'i hubulhsti, 'ink'ez Yak'usda Lizwif buch'a hóontun 'i be 'udun yun k'ut whut'en tube huhóont'i hubulhsti. 'Et ndet dzin whusawhéls'tut t'eh, Lizwif, 'en chah Yak'usda buzkeh nahúsdi, 'et 'o nus whutézoo. ¹³ 'Aw 'et nuhwheni 'udun yun k'ut whut'en nohwhulh yálhtuk, Yak'usda 'utáhásálhti nuhwheni nuhwhuba whel'a wúsdle ka. Njan 'et sih tube suba hooncha. ¹⁴ Njan ndun whudutésnilh, 'et sulh Lizwif huwe' hoolnih huwa tulih bulunah hoodoojih. ¹⁵ Yak'usda Lizwif 'ún nubutelhdel, 'ink'ez Sizi Gri 'en bugha nuhwheni 'udun yun k'ut whut'en 'aw 'et Yak'usda ts'un dune bulh soo ninawhant'ai. 'Et Lizwif Sizi Gri hits'u nahulh'éya huboolhyih ka t'eh, 'et Yak'usda nabutelcholh ho' hint'ah. Dune yahadla chah dune nahusdi li'hutenilh. ¹⁶ 'Et whunóhutelhtun nts'e na'a 'uwhténilh. Whunulh'en, lhes nantédoh t'eh, 'udechoo, 'i unzoo 'int'ah t'eh, 'et whulutah chah ts'iyawh unzoo tele. 'Et 'udun, duchun bughih unzoo t'eh, 'et buzooschum chah 'i ts'iyawh dutezoo. * ¹⁷ 'Et whunts'ih ndi duchun unzoo, 'i bulah buzooschum k'unúdestuk. 'Et nuhwheni 'udun yun k'ut whut'en, 'et duchun hoh nunúlhye, 'i Olive duchun hiyúlhni, 'i li'ah't'ah. 'Et ndet buzooschum k'unúdestuk 'et nuhwheni hik'enánohdanla. 'Et huwa ndi duchun bughih bugha 'ink'ez buk'unih unzoo, 'i nuhwhe'ildzun suli. † ¹⁸ Ndi buzooschum k'unúdestuk, 'i buch'a dóohtni gunih! Whuz na'a 'ududelhúti t'eh, 'aw t'ewhunuzúszun ndi 'ughih 'aw bulacha'zajt'en, 'et 'ughih 'i nuhla 'ut'en. ¹⁹ Ndi uzooschum k'unúdestuk wheni buk'enázdoodelh ka doohtni. ²⁰ Njan ndudahni 'álha 'uhoont'ah. Lizwif 'aw Yak'usda bughunek chahuyílchulh 'et huwa 'uhuja k'unúdestuk. 'Et nuhwheni Yak'usda bughunek úlhchoot 'et huwa 'áhja Lizwif buk'enánohodanla. 'Et dudoolhúti gunih, 'et whenoolhújut. ²¹ Whunulh'en, ndi duchun soo buzooschum 'aw Yak'usda yugha técha'nizil t'eh, 'et t'eh nuhwheni chah tulih nuhgha técha'nooszin. ²² Njan whudáhts'o 'et hoodulhú'eh, Yak'usda dalhcho 'i be nets'un únzoo 'ink'ez 'uyoon ts'un dálhcho, 'i be hubúlh whúske. Ndunnah Yak'usda bughunek chahiyílchulh, 'i be nahéls'tut, 'en hubuts'un bughunek tube duts'un ho' 'int'ah. 'Et nuhwheni 'udun yun k'ut whut'en Yak'usda bughunek úlhchoot, 'et ye únzoo, 'i be whuz na'a zeh 'ah't'ah t'eh, 'et huwa 'int'ah nuhts'un únzoo. 'Et Yak'usda buk'una'a 'aw hukwa cha'núszun t'eh, 'et sih nuhwheni chah k'unúdehtuk, uzooschum k'una'a wahle. ²³ 'Et ndunnah Lizwif Yak'usda hits'u nátedulh hukwa' huninzun 'ink'ez highunek hitelhchulh t'eh, 'et t'eh ndi uzooschum k'unúdestuk 'et Yak'usda yuk'ená'budutelilh, Yak'usda dich'oh ye úlhtus 'i be 'et nduténilh 'et huwa. ²⁴ Nuhwheni 'udun yun k'ut whut'en ndi duchun Olive hiyúlhni, hoh nunulhye, 'i buzooschum li'ah't'ah. Yugha 'óoli hoh k'unídezel 'ink'ez Olive duchun unzoo, 'i yughun nenaídenla, 'aw whuz na'a cha'hust'en 'et whunts'ih. 'Et Lizwif ndi duchun dinzoo, 'i 'et duhínt'ah. 'Et huwa Yak'usda 'aw buba howa chahóolan' ndi uzooschum k'unúdestuk, 'i duchun unzoo, 'i yughu nenaíduteleh. ²⁵ Sulhutsinkah njan whe' hooht'ah hooyah, 'et t'ewhunoozhéh nuhwhuba hukwa' nuszun, doo ka ts'iyaintsuk t'ets'onínzun na'dudoolhú'i. Njan 'et dúhoont'ah, 'et bulunah Lizwif budzi duts'un hutele, ndet 'udun yun k'ut whut'en whudezulh, 'en huba 'ustl'e' 'uwhténilh 'et whuts'un. ²⁶ 'Et hukw'elh'az Israel budune ts'iyawh hudutejih. 'Et Yak'usda be' dustl'us'k'ut 'uk'une'usduguz 'et ndutni, "Neulhyis, 'en 'et keyah whuti Zion huwhútni ts'ih whuz de hatéyalh.

'Et Jacob budune ‡ nts'e na'a tink'us 'úhut'en 'et whuch'a naobutélelh.

²⁷ 'Et bulubeshi huba 'ún telhdel t'eh,

'et whuz na'a buts'un khunek lhadúsda inle, 'et huwa' tesnilh."

Yak'usda ts'iyana h'gha te'ninzun

²⁸ Ndi khunek unzoo, 'i be nuhwhubulh yalhtuk, 'i 'aw Lizwif hiyóolhchoot hukwa cha'hunízun, Yak'usda hich'a detni hinli. 'Et huwa nuhwheni 'udun yun k'ut whut'en dáhjih. 'Et whunts'ih Yak'usda ndunnah butsuh da§ 'en hubugha Lizwif 'utahaóobanla 'ink'ez hubuk'entsi'. ²⁹ Ndunnah Yak'usda hudutejih ka buka' dani, 'ink'ez ndai Yak'usda hubugha iyúnle, 'i 'aw 'ats'un na'a na'ootneh ghaít'ah. ³⁰ 'Et nuhwheni 'udun yun k'ut whut'en niz de haóodanzut whuts'un Yak'usda 'aw buk'únucha'zajt'ena. 'Ink'ez ndunnah Lizwif, 'en Yak'usda 'aw hik'unucha'hust'en, 'et huwa k'an 'et ye negha te'ninzun 'i nuhghaíni'ai. ³¹ Ndunnah Lizwif, 'aw hik'únucha'ust'en, 'en hubugha Yak'usda nuhgha te'ninzun. 'Et whuz na'a Yak'usda 'ilhudzin 'en chah hubugha té'noozeh. ³² Ts'iyana yuk'únucha'ust'en 'ink'ez tsak'edínla lí'binla, didut bugha té'nooze ka.

Yak'usda dálzoo Lizwif 'ink'ez 'udun yun k'ut whut'en butelhyih huba

* **11:16** Paul, 'en Abraham yughi yalhtuk. 'En 'udechoo Yak'usda nalh ts'ah'un ho' 'int'ah. Yak'usda bughunek buba 'alha' yant'e ho' 'int'ah. 'En k'una'a hik'elh'az hutezdel Yak'usda buzkeh huzldi ni ho' 'utni. † **11:17** Ndi 'uzooschum k'unúdestuk, 'i Lizwif li'hint'ah. 'Et ndan hik'enadedel, 'udun yun k'ut whut'en li'hint'ah, ni ho' 'utni. ‡ **11:26** 'Et njan "Jacob budune", 'en "Israel budune" ni ho' 'utni. § **11:28** Butsuhda, 'en Abraham, Isaac, 'ink'ez Jacob 'uhint'ah.

³³ Yak'usda ye néts'un unzoo, 'i ye whúnih 'ink'ez ndet ts'iyaintsuk t'ewhunúnzun, 'et tube hooncha ho' hoont'ah.

Nts'e na'a be 'ut'en k'ah 'ink'ez 'utáhawhúle, 'aw dune t'ehonózin hoolah 'ink'ez 'aw nahúho'ah chah hoolah.

³⁴ Yak'usda be' dustl'us k'ut 'uk'une'whusdúguz 'et dutni,

"Yak'usda dája ninzun, 'aw dune t'echaoonízun hoolah.

'Ink'ez 'aw 'ilhunuh whunts'i yugha nádootni chah hoolah.

³⁵ Yak'usda ts'iyaintsuk negha unle,

'aw huba k'elha ts'uhoolhtsilh ghaít'ah."

³⁶ Ts'iyaintsuk inla, 'ink'ez 'en bugha ts'iyaintsuk 'uyínla k'unáa 'int'ah, 'ink'ez 'en ba ts'iyaintsuk 'ulya.

'Et huwa 'ilhuz wheni Yak'usda 'en zeh uzdóolhti. 'Et ndó honeh.

12

Yak'usda budune nts'e na'a Yak'usda hukwa' ninzun, whuz na'a 'uhoont'e huba' hoont'ah

¹ Sulhutsinkah ndai Yak'usda ye negha te'ninzun, 'i be nuhts'u tédusdlih, lubeshi be'et hoh be khahna, 'i 'ilhuz wheni Yak'usda butl'á dudelhúya. 'Et ndahja t'eh, Yak'usda hootét'i 'ink'ez whuz na'a 'en ts'ah'un na'a buba' teht'ilh. ² 'Ink'ez nts'e na'a dune k'an dzin dahint'ah buk'uhne'óoht'en hukwa 'ooht'en gunih. K'an 'et nuhwhubeni 'ats'un na'a na'ahleh. 'Et ndaht'en t'eh, 'et sih t'éwhunóhzin ndet Yak'usda nuhts'u hukwa' ninzun. Yak'usda be 'ut'en k'ah ts'iyawh hoonzoo, ts'iyanaah ba hoonzoo, 'ink'ez ts'ah'un na'a 'uhoont'ah. ³ Yak'usda ye sts'un unzoo, 'i bugha 'un whudúsní, nuhwheni ndan Sizi Gri k'úne' 'uhut'en dubanadudoolhúti gunih. 'Et whunts'i 'ilhunuh ahli hoh dahoon'ah huwa Yak'usda ye be 'alha 'uhoont'ah nuhtl'áida'ai, 'et 'uwhtsuk ye whunih, 'i be huwu nunúnoohzut. ⁴ Njan whunulh'en, neyust'e 'ilho zeh unli, 'et whunts'ih lhai bughah hoonli. 'Et 'i ts'iyawh neyust'e lhelhdun huba 'int'ah. ⁵ Christ budune whuz na'a zeh 'uts'int'ah. Nuwheni ts'ulai whunts'i, ts'iyawh Christ buyust'e bube'ildzun ts'inli, 'et huwa 'ilho zeh ts'inli. ⁶ 'Et whunts'ih ts'iyawh lhelhts'un na'a Yak'usda ba 'uts'ut'en, ye únzoo, 'i bugha 'úja 'ut'en lhelhyoo neghalya 'uts'oolh'en ka. Bulunah Yak'usda be nus honilh'en, 'et hubugha óoni'ai, dahoolcho Yak'usda ye be 'alha 'uhoont'ah hubugha óoni'ai, whuz na'a zeh yahoolhtuk huba' hoont'ah. ⁷ Bulunah Yak'usda ba ne'hut'en, whuz na'a ba ne'hutet'ilh. Bulunah huwhunih hubulhtsi 'uyoon huhodoolh'eh ka. ⁸ Bulunah 'uyoon dune hubudzi úlhtus hubóolh'i ka hubughá whunt'ai, bulunah hiyít'i, 'i 'uyoon hiye hubulá 'oot'en ka 'ink'ez 'aw highu yachoolhtuk. Bulunah ndunnah dune tsuh whudéldzulh soo cho huwa hinli hoh nduhóot'e. Bulunah chah hubudzi hóont'i hoh 'uyoon hubugha te'hunoozeh ka, 'et chah hubughá whunt'ai. ⁹ Whahts'it hoh 'uyoon k'eeohtsi' gunih. Tink'us 'úhoont'ah whuts'u doohtnik. Ts'ah'un 'uhoont'ah 'et hoohtun. ¹⁰ Nts'e na'a lhulhutsinkah lhk'ehudutsi, 'et whuz na'a soo ts'ah'un na'a lhk'ehudutsi. Ts'ah'un na'a né'lhoolhú'en nuhgha whúlt'suk totsuk. ¹¹ Ndai 'ut'en nuhgáhts'ut, soo cho 'oolh'en. Ndai Ndoni ye nuhla 'ut'en, 'i be soo hoonáht'i hoh neMoodihti buba 'ooht'en. ¹² Ndet Yak'usda buts'un hukwa tsi hoohtli, 'et huwa tube hóht'i. Ndet Sizi Gri buk'úne' aht'en huwa dune nuhwhé'zula t'eh, 'ustl'e' 'oohneh gunih, 'ahoolhyez neMoodihti buts'un tenáahdli. ¹³ Dune Yak'usda bube'ildzun*, 'en 'endunidzit, ndai aht'i, 'i bulah be hubula 'aht'en. 'Ahoohyeh huba nuhkoo 'udun 'udóolhtan. ¹⁴ Dune nuhwhe'huzúla t'eh, hubuts'un wahzoo 'ink'ez hubuk'ehoohyeh gunih. ¹⁵ Ndunnah hóont'i hubulh hóonaht'i, 'ink'ez ndunnah hutso hubulh 'ahtso. ¹⁶ Nuhwheni nuhwhulh dune ts'un 'ilhuk'i wulh'i. Ahcha na'dudoolhú'i gunih. Tel'ennah hubuch'a déhti noohzin gunih. Whunih dune la'dudoolhú'i gunih. ¹⁷ Nuhwheni dune tink'us na'a nuhts'un ne'hut'en t'eh, nuhwheni chah tink'us na'a hubuts'un ne'ooht'en gunih. 'Et ts'iyanaah nalh 'ahoolhyez ts'ah'un na'a zeh ne'ooht'en. ¹⁸ Ndet soo 'o 'un 'oohneh ghaít'ah hoh ts'iyanaah dune ts'ah'un na'a lhts'un 'ooht'e. ¹⁹ Nuhwhuk'esi' khun k'unóohdzin gunih. Yak'usda 'en butl'awhá'aih. Njan neMoodihti bughunek 'et 'utni, 'Be k'uznudzun, 'i si se'ílhudzun 'int'ah. Si hukw'elha whutelhtsilh," ni.

²⁰ 'Et huwa nuhch'a hudetni buye'élts'ul t'eh, hubugha 'óoh'alh.

'Et tá'hoosde t'eh, too hubugha óolhdzeh.

'Et ndiz na'a ndáht'en t'eh,

'et 'ants'i kwuntset hubutsi nídahdzaih li'teht'ilh.†

²¹ Tink'us be né'whut'en, 'i be nuhwhuch'a' hoolhdeh, 'aw hubutl'a'dudoolhúyeh gunih, 'et whunts'i be hoonzoo ne'whut'en, 'i be whuch'a' oolhdeh.

* **12:13** Ndan Sizi Gri hik'úne'ut'en, 'en Yak'usda bube'ildzun hinli. † **12:20** 'Et 'ut'en unzoo buts'un ahla t'eh, 'et t'eh Yak'usda ye k'utetnilh ho' 'int'ah. 'Et whuz na'a huwu nunihunoozut, ni.

13

Yun k'ut whumoodih buk'úne' 'ooht'en

¹ 'Aw 'et nuhwheni ts'iyawh ndunnah yun k'ut huwuhinli, 'en hubuk'une' hóot'en huba' hoont'ah. Ndi yun k'ut hiye huwunli, 'et Yak'usda 'uhóonla 'et huwa. ² Ndet keyah dune húdelhts'i, dája hubuhútni, 'et whuch'a ne'hut'en t'eh, 'et t'eh nts'e na'a Yak'usda 'uhóonla, 'et whuch'a ne'hut'en ho' hut'en. 'Et nduhut'en t'eh, 'et sih ndi yun k'ut huba nahutedeh tele. ³ Ts'ah'un na'a ndi yun k'ut delhúts'i t'eh, 'et yun k'ut k'une'nuhwhuhul'en bubé noolhújut ghait'ah, tink'us 'uhut'en 'aw 'en zeh. 'Et ts'ah'un na'a nuhghu yaoolhtuk hukwa' nahzun t'eh, hoonzoo hukw'una'a ooh't'en 'ink'ez ndai khunek nuhtl'aída'ai, 'i be noolhújut huba cha'hóot'ah. ⁴ Ndunnah yun k'ut nuhmoodih, 'en nuhwhuba hózoo ka Yak'usda ba ne'hut'en. 'Et tink'us ne'áht'en t'eh, 'et sih bube noolhújut. Ndai ye úlhtus, 'i butl'á yét'ai, 'i be dzuh nunóhootelhdzut 'et huwa. 'Aw 'ants'i ílah 'uhoont'ah. ⁵ 'Et huwa ndunnah yun k'ut nuhmoodih hinli buk'úne' 'oohten huba' hoont'ah. Nohwhulh huntel'oh whuch'a, 'ink'ez nuhyuh ts'ih bugha t'ets'oninzun, 'i chah. ⁶ 'Et huwa ndunnah yun k'ut nuhmoodih, 'en Yak'usda ba ne'hut'en hinli hoh, bughunek nuhwhutl'ádet'ai, 'i be 'ahoolhyez nus be honoolht'uk. 'Et huwa yun k'elha hole huba' hoont'ah. ⁷ 'Et huwa ndet nuhts'ú whuz'ai, 'uk'elha whulh'i. Ndet nuhwhenich'oh 'ink'ez nuhyun chah nuhts'ú whuz'ai, ts'iyawh hukw'elha whulh'i. K'us ndan neba hinch'a, 'en neba hoocha, 'ink'ez k'us ndan hubudólhti, 'en hubudólhti.

Sizi Gri budune nts'e na'a dich'oh k'engahudutsi', whuz na'a dulh dune hubuk'ehootsi'

⁸ 'Uyoon ts'un 'oht'i gunih, 'uyoon dune k'etehtsi' 'et zeh nuhts'ú whuz'ai. 'Et nyulh dune k'entsi' t'eh, Yak'usda khunek whutl'aída'ai, 'i ts'iyawh lhaoodahla ho' 'aht'ah. ⁹ Ndai khunek Yak'usda whutl'aída'ai, 'i dune 'ulhni, "Ts'ekoo k'us dune bulh tinta' 'ooht'en gunih, dune soolghelghel gunih, 'undunooht'ih gunih, 'uyoon dune be hohts'it gunih, 'uyoon yit'i, 'i ka' noohzin gunih," ni. 'Ink'ez 'onghoh khunek whutl'aída'ai t'eh, ndez na'a lhaoodoohleh, nts'e na'a k'enats'udutsi', whuz na'a nohwhulh dune hubuk'eohtsi' huba' hoont'ah. ¹⁰ Ndan dudulh dune k'entsi', 'aw yuts'un tink'us na'a 'ooneh ghait'ah. 'Et huwa nohwhulh dune buk'ehtsi' t'eh, 'et sih Moses be' dustl'us ts'iyawh lhaoodulhla ho' hoont'ah. ¹¹ 'Et t'ewhunéhzin ndet whudezuhl 'aw 'et neba whulatah tele. Hoh da Sizi Gri neba 'alha 'int'ah inle, k'an 'et 'o nus nilhdukwh whuzdli, 'et huwa ts'ets'oodeh huba' hoont'ah. ¹² 'Aw 'et haootel'h'en, 'et huwa ndai 'ut'en tsahólhghus yuh 'uts'ulh'en, 'i 'ustl'e' 'uts'ooleh 'ink'ez ndai 'ut'en 'uztel'h'ilh, dzenis 'uts'oolh'en. * 'Et nduts'út'en hoh soo cho netsudule 'ets'udulh li'ts'oot'en. 'Ink'ez 'aw nech'a' oolhdeh ghait'ah. ¹³ Ndai dzenis 'uts'ulh'en, 'i zeh 'uts'oolh'en. 'Et whuz na'a zeh ts'ah'un na'a yinkak uzdólts'i. Ndunnah tahatnai bulh cha'ts'oost'en, taznutnai 'et chah 'ustl'e' ts'ooneh, 'ink'ez ts'ekoo k'us dune bulh lubeshi 'uts'ulh'en, 'et chah 'ustl'e' ts'ooneh. Lhe'ts'údulh 'ink'ez 'uts'oolnih 'et chah 'ustl'e' ts'ooneh. ¹⁴ Ndi 'ut'en ntsi', 'i buch'a 'uts'oot'e, 'ink'ez neMoodihti Sizi Gri 'en zeh buk'úna'a 'uts'oot'e, 'ink'ez 'aw 'o 'at neyust'e lubeshi ts'un chats'unoolht'uk.

14

Sizi Gri budune 'aw huba nats'uhoooyeh huba cha'hóot'ah

¹ 'Et ndan dune ye be 'alha 'uhoont'ah, 'i be soo cha'íltus t'eh, whute bulh tenadoohdli, 'ink'ez benah 'udoohni gunih. ² Whunulh'en, bulunah Sizi Gri hunedulh, hiyé 'alha' ninzun, 'i lait'ah huwa, huba 'álha 'uhoont'ah 'aw 'utsun chahús'al. 'Et bulunah ts'iyai tsuk ha'alh, 'et huba 'alha 'uhoont'ah. * ³ Ndan ts'iyai, 'i a'álh, ndan 'uyat chas'al, 'et hukwa yuts'u dootnik gunih. 'Ink'ez ndan 'uyat chas'al, ndan ts'iyai, 'i a'álh, 'en chah 'aw huba nahoooyeh gunih. Yak'usda hóont'i hoh ts'iyawh hubílhchoot 'et huwa. ⁴ Ndan na'dunúhdzun 'uyoon dune ba ne'út'en huba nahutehyeh nahzun? Bumoodih 'en zeh iduténilh, soo 'int'en k'us 'aw soo cha'zint'en. Dich'oh soo teyin, Yak'usda 'en yula' tet'ílh 'et huwa. ⁵ Bulunah dune 'uhuninzun whulutah dzin 'o nus whudézi, 'et bulunah 'uhuninzun, dzin totsuk

* **13:12** Ndi khunek newhunelhtan ho' 'utni, tsahólhghus yuh 'ut'en netsudule be 'ut'en, dzenis 'ut'en, 'i Yak'usda be 'ut'en 'int'ah ni ho' 'utni. * **14:2** 'Et hoh da 'udun yun k'ut whut'en buk'edélt's' hits'un tenahududli, 'i khunai hits'u delhk'un. Bulah kw'uzdai k'ut hidelhk'un, 'i 'o 'un hiye'ooket. Bulunah Sizi Gri hunedulh 'uyat be 'ooket, 'i me 'int'ah hininzun. 'Et huwa 'aw hiyoo'alh ghait'ah. 'Ink'ez bulunah Liwif, ndan Sizi Gri hits'u nalhuya, hukw'el'h'az Moses be' dustl'us gha 'aw goso yat hoo'alh hukwa cha'hunizun. Njan Christ be 'ut'en k'ah whebunelhtan, 'et 'aw whuz toosya hukwa cha'nuzúsun.

ba lhulhugha zeh 'uhoont'ah. 'Et ts'iyana nts'e na'a 'uhuninzun, 'et whuz na'a huba 'alha 'uhot'e. ⁶Ndan whulutah dzin 'o nus whudézi ninzun, 'en njan 'et dzin neMoodihti yudóolhti ka, 'udun neóoni'ai huwa 'útni. Ndan dune dzin 'o nus chahodíti ninzun, whuz na'a neMoodihti wheyúdelhti. Ndan ts'iyaintsuk a'álh Yak'usda chanailya yúlhni 'ink'ez yunalh 'et yu'alh. Ndan 'uyat chás'al, 'en chah Yak'usda chanailya yudáni. ⁷Yinkak uztedalh 'ink'ez dázetsah, 'aw whenich'oh 'utáhats'uhó'alh ghaít'ah. 'Aw nuwhenich'oh duba moodihi nachats'ídlah 'et huwa. ⁸Yinkak uzdelhts'i t'eh, neMoodihti k'úne' ts'oot'en huba' hoont'ah. 'Et dázetsah t'eh, Sizi Gri yununúdelh k'una'a dats'óotsah. 'Et huwa nts'e na'a ts'ukhuna k'us daztetsah t'eh, neMoodihti bube'ildzun ts'inli. ⁹Christ dazsai, 'ink'ez nakhítna hoh dinadija. 'Et 'i be ndunnah yinkak húdelhts'i 'ink'ez yahadla chah buMoodihti tele ka 'uja. ¹⁰'Et di ka Sizi Gri be nuhwhulhtsins hinli huba nahahyeh, k'us 'et di ka 'en hubuka cha'nuzáhzun? Nuwheni ts'iyawh Christ neba nahuteyeh ka bubut núzdutelya ho' hoont'ah. ¹¹Njan hubugha Yak'usda be' dustl'us 'uk'e'anguz 'et 'utni, "NeMoodihti njan ndutni, khusna hukw'u na'a, ts'iyana subut dugwutsi be hóoyin.

'Ink'ez ts'iyana huba 'álha 'uhot'e Yak'usda usdli."

¹²'Et huwa 'ilhunuh ts'inli hoh dats'ét'en, 'et Yak'usda uzduténihl. ¹³Njan whuts'un 'aw 'o 'un 'uyoon ba nachats'uhooesy. 'Aw 'o 'at neyulhtsinkah Sizi Gri hich'a naóol'ah ka whuz chaoobuznoolht'uk, 'ink'ez huba dzuh 'uts'udooni gunih.

Nyun nga t'eh nyulhtsinsizi Gri ch'a naóol'ah gunih

¹⁴Sizi Gri 'en bugha t'ewhunúszun 'alha 'uhoont'ah 'aw 'ut'alh, me ts'utni, 'i hoolah. 'Et whunts'ih bulunah 'uhuninzun 'i 'ut'al, me 'int'ah uninzun t'eh, 'et t'eh 'en dune huba me yinli ho' 'int'ah. ¹⁵Ndai ah'alh 'ink'ez nuhwhulhtsinkah yuch'a' nenyoot ninzun t'eh, 'ink'ez bunalh ah'alh t'eh, 'et sih be nék'ets'intsi', 'i bu'et yinkak delhúts'i ho' aht'ah. Ndai ah'alh, 'i bugha ndunnah Christ hububa dazsai, 'en tinta' bóolh'en gunih. ¹⁶'Et huwa ndai nuhwhuba 'alha 'uhoont'ah 'ink'ez 'uyoon tink'us na'a howu yahutelhtuk t'eh, 'et whuch'a huwahli. ¹⁷Njan whunulh'en, Yak'usda dune k'úne' bul'en hubugha, 'aw ts'a'álh, 'ink'ez ts'utnai, 'i bugha ílah 'uhoont'ah. Ndoni neyudélt's'ut 'et huwa Yak'usda nalh ts'ah'un 'úts'ut'en, 'en bugha nedzi dóoghel, 'ink'ez ts'uhót'i. ¹⁸Ndan Christ ndez na'a ba ne'hut'en t'eh, Yak'usda tube yúlh hoont'i 'ink'ez dune chah huba hoonzoo 'uhut'en. ¹⁹'Et huwa 'ahoolhyez neba whudezghel ts'úznoot'uk 'ink'ez lhula' ts'óodut'en. ²⁰'Ut'alh bugha Yak'usda be 'ut'en hoolah hólhhts'ih gunih. 'Et 'alha 'uhoont'ah 'aw hoonliyaz me unli hoolah. 'Et whunts'ih ndan yute'alh hoh buba náwh 'uhoont'ah 'ink'ez ya'alh t'eh, 'et sih buba dzuh 'uhoont'ah. ²¹'Uyat téh'alh, k'us mai too tehtnilh, k'us ndai 'ilh'en, 'i bugha nuhwhulhtsins huba nawh 'uwhut'ih, k'us huba dzuh chah ulh'ih, k'us ye 'alha' ninzun, 'i chah lait'ah 'ulh'ih t'eh, 'et ndaht'en, 'aw nuhwhuba soo cha'hóot'ah. ²²Nts'oh teh ndaht'en, be 'alha 'uhoont'ah, 'i be ndaht'en t'eh, nuhwheni 'ink'ez Yak'usda bulh zeh nuhwhuba 'uhoont'ah. Ndunnah njan dahút'en 'ink'ez 'aw hoonliyaz be k'enahot'alh hoolah t'eh, 'en dega nus hoonzoo hubugha whults'ut. ²³'Et whunts'ih ndunnah 'uyat 'a'álh 'aw huba 'alha cha'hóot'ah huninzun, 'et hiyu'alh t'eh, 'et dudzi yuh gha t'ehontézin tinta' hunt'en, hiyé 'alha 'uhoont'ah, 'i bugha 'et nduchahinil 'et huwa. 'Ink'ez ndai hoonliyaz 'uts'ulh'en, 'i, be 'alha 'uhoont'ah, 'i bugha cha'ts'ulh'en t'eh, 'et neba lubeshi hoonli.

15

'Uyoon dzi wúlhzoo zeh hukwa 'ooht'en

¹Nuwheni Sizi Gri ba ts'íltus, ndunnah lahít'ah, 'en hubula' ts'oot'en huba 'uhoont'ah. 'Aw whenich'oh zeh nedzi ts'ílhdzoo hukwa cha'ts'oost'en. ²'Ilhunah ts'inli hoh nelh dune ba whutézoo ka hubula' ts'oot'en, 'o nus Sizi Gri ba hiltus tele ka. ³Christ 'en 'aw dich'oh duba hoonzoo hukw'únucha'it'il 'et huwa. Yak'usda be' dustl'us k'ut 'uk'une'úsduzug whuz na'a 'et'en. 'Et ndutni, "Ndan nch'a yáhalhtuk, ndai hiye nch'a yahalhtuk, 'i ts'iyawh si sts'e' hutni." ⁴Ndet 'uda Yak'usda be' dustl'us k'ut 'uk'e'edúguz bugha whúts'o dool'eh ka 'uk'e'edúguz. 'Et huwa soo neba nus whunilht'uk hoh ndet Yak'usda nets'u hoozi, 'i buba ts'ílh'i 'ink'ez 'i buka tsi ts'úhooli. ⁵Njan 'et nuhwhuba hukwa' nuszun, Christ, Sizi ts'utni, 'en bugha Yak'usda soo nilyaz neba ulh'i, 'ink'ez nedzi wuzoo ka, whuz na'a uncha lhts'un 'aht'ah. ⁶Nduht'en t'eh, 'et sih lhugha zeh uznudzun 'ink'ez lhugha zeh lhulh yáts'ooltuk. 'Et 'ilho hoh Yak'usda Sizi Gri neMoodihti be'aBá uzdóolhti wule.

Lizwif 'ink'ez 'udun yun k'ut whut'en 'ilho zeh Yak'usda hidutélh'i

⁷'Et nts'e na'a Christ nenilh'en, whuz na'a zeh lhunoólhú'en. 'Et ndaht'en t'eh, Yak'usda ts'udutélh'i. ⁸Njan nuhwhudúsi, Sizi Gri Lizwif huba ne'ut'en suli whunénoolhtun ka ndet hubutsuh da Yak'usda hubuts'u hoozi 'et 'alha 'uhoont'ah wule. ⁹'Ink'ez 'udun yun k'ut

whut'en, 'en chah huba ne'ut'en suli, 'i bugha Yak'usda ye te'ninzun, 'i yubúnelhtan, 'et huwa hidélhti. Yak'usda be' dustl'us k'ut njan ndutni,

"Et huwa 'udun yun k'ut whut'en hubutah, 'et ndan inli nyulh yaóolhtuk,
'ink'ez nyoozi 'i dóolhti."

¹⁰ 'Ink'ez doo chah 'utni,

"Nuhwheni 'udun yun k'ut whut'en 'ink'ez budune hubulh ts'iyawh neMoodihti dóolhti."

¹¹ Njan chah 'et dutni,

"Udun yun k'ut whut'en ts'iyawh Moodihti délhti

'ink'ez nuhwheni ts'iyawh dóolhti."

¹² Isaiah be' dustl'us k'ut njan chah 'et ndutni,

"Jesse 'en yuts'u haínzut tele.

'En 'alha whusatéyah 'ink'ez 'udun yun k'ut whut'en hubuMoodih tele.

Ink'ez ndet hubuts'u hoozi 'et hukwa tsi huhooli."

¹³ 'Et nuhwhuba tenadusdli, ndet Yak'usda nuhts'u hoozi huba ulh'i whutah, 'en bugha 'et úncha nuhdzi sóo nedinzut, ndet nuhts'u hoozi nuhwhuba 'alha 'uhoont'ah huwa. 'Et whuz na'a 'ilhuz bulh 'óoh't'e, 'ink'ez ndet nuhts'u hoozi 'o nus ulhtus hoh nuhwhuba whulh'i, Ndoni ye úlhtus, 'i nuhyídan'ai 'et huwa.

Paul dustl'us hubuts'un k'e'eduguz, 'i bugha 'aw chanljut hoh hubutsun k'e'anguz

¹⁴ Sulhutsinkah nuhwheni nuhgha, 'alha t'éwhunúszun lhat hoonzoo 'uwuhulh'en, 'inkez lhat be t'ewhunudzun 'i chah t'éwhunúhzun, 'ink'ez soo hoonzoo whe dune whúntelhtun.

¹⁵ Ndi dustl'us k'ut bulah 'i 'aw whechanuzulhújut hoh nuhts'ó k'e'usges, whunaoolhúnih ka Yak'usda ye únzoo 'et sugha whunt'ai 'i bugha 'ust'en. ¹⁶ 'Et 'eh Sizi Gri buba 'ust'en usdli, 'udun yun k'ut whut'en Yak'usda bughunek bugha hubulh yaoolhtuk ka. 'Et ndust'en hoh Yak'usda ba huwa 'dudulti li'hoont'ah, 'ink'ez Ndoni 'en Yak'usda ba 'udun niilya huzdli ka. 'Et whuz na'a Yak'usda hoont'i hubílhchoot wule. ¹⁷ 'Et huwa 'ust'ah hoonúst'i, ndai Yak'usda ba' yulh'en, 'i be Sizi Gri délhti huwa. ¹⁸ 'Ink'ez ndet Christ dája si sugha 'ust'en 'udun yun k'ut whut'en hik'úne' oot'en ka, 'i zeh nohwhulh yátelhtuk. Dája hubudáni 'ink'ez huba dást'en, ts'iyawh si sugha Christ huba daja, 'et hubugha 'aw whechanuzulhújut hoh nohwhulh yátelhtuk. ¹⁹ Ndoni ye ulhtus, 'i be hoolhtus 'ink'ez ba whe' whut'en túne'whut'en chah ne'zust'en, 'et huwa Jerusalem, Ilyricum yun k'ut nduhóolyez ts'ih, 'et ts'iyannah Christ bughunek unzoo, 'i ts'iyawh hubudáni. ²⁰ Ndi khunek unzoo, 'i ndunnah dune cha'hadúst's'o Christ bugha 'en tube hubudut'ésnilh hukwa' nuszun. 'Aw 'uyoon dune bukoo hukw'úwhuz'ai 'aw 'et buk'éhos'ah hukwa cha'núszun. ²¹ 'Et whunts'ih ndez na'a Yak'usda be' dustl'us k'ut 'uk'e'edúguz,

"Ndunnah 'aw hubunalh nacha'dítnil,

'en huwhuté'ilh,

'ink'ez ndunnah hiyulh cha'díts'il, 'en t'ehontezeh."

Paul 'ubulhni Rome ts'ih téyah hukwa' tet'ilh

²² Lhat nuhts'u t'ésyalh hukwa' nuszun inle, 'et whunts'ih Sizi Gri be 'ut'en 'ulh'en inle 'et huwa 'aw nuhts'ún chatúsyal. ²³ 'Et whunts'ih 'aw 'et Sizi Gri be 'ut'en 'ulh'en, 'i ndoh keyah ndulhcho hoh ts'iyawh lhadúsda. 'Et lhat naooduzuk yus k'ut whuts'un nuhts'un t'ésyalh hukwa' nuszun. ²⁴ Spain yun k'ut ts'ih teya t'eh, 'astl'iyaz wheni nuhts'un nutesya. Whuz lhgha díya t'eh, 'et hukwa' nahzun t'eh, 'et 'o 'un tesyalh huba sula 'oohneh. ²⁵ 'Et whunts'ih k'an 'et 'aho Jerusalem ts'un t'esyalh. 'Et dune Yak'usda bube'ildzun hinli, 'en hubula 'oosneh ka. ²⁶ Sizi Gri yunédulh, ndunnah Macedonia 'ink'ez Achaia whut'en tube cho hukwa' huninzun sooneya be ndunnah tehul'en, dune Yak'usda bube'ildzun Jerusalem húdelhts'i, 'en hubula' hutenilh, 'et huwa whuz tesyalh. ²⁷ Huhóont'i hoh ndunnah Jerusalem whut'en sooneya hubugha híne'ai. Ndunnah Jerusalem whut'en hubulh'ai li'hint'ah 'et huwa. Lizwif, 'en hubugha 'udun yun k'ut whut'en Yak'usda huba 'ut'en, 'i be hoonzoo 'uhuja t'eh, 'et sih 'udun yun k'ut whut'en Lizwif hiye ndunidzit, 'i be bula' hooneh 'et huwa. ²⁸ Ndi 'ut'en lhadúsda, 'ink'ez ndi hubugha iyulya, 'i ts'iyawh butl'a yála t'eh, 'et sih Spain ts'ih tesyalh. 'Et sih nuhk'osya. ²⁹ 'Et t'eoonúszun nuhghu níya t'eh, Christ bughunek unzoo, 'i ts'iyawh 'i bulh 'oosneh. 'Et t'ewhunóhzin ndi khunek unzoo, 'i daldzoo. ³⁰ Sulhutsinkah neMoodihti Sizi Gri 'en bugha, 'ink'ez Ndoni bugha be lhk'ets'udutsi' chah, 'et 'i bugha nuhts'un tedusdlih, Yak'usda tube cho súlh buts'un tenadoohdli. ³¹ 'Et ndunnah Judea whut'en ndan 'aw huba 'alha cha'hóot'ah dachasuhóosde, 'ink'ez se' 'ut'en Jerusalem ts'ih, dune Yak'usda bube'ildzun, 'en bube 'ut'en 'úlh'en huba whutézoo. ³² 'Ink'ez Yak'usda hukwa' ninzun t'eh, hoonúst'i hoh nuhts'un tóosya. 'Et sih soo na'ulhts'udootni. ³³ 'Ink'ez ndi be whúdezhel, 'i Yak'usda huwa yú'aih, 'i ts'iyawh uncha nuhwhulh 'óot'e. 'Et ndoh honeh.

16

Paul, ndunnah Rome húdelhts'i dahooja hubúhni

- ¹ 'Et njan Cenchrea keyah Sizi Gri bugha 'ilhuhowezdel hubutah 'ilhunuh ts'eke, Phoebe hiyúhni, 'en 'ahoolhyez nuwhehi neba ne'ut'en. Ndan 'int'ah nt'ewhunoozhin.
² Nuhghuninya t'eh hoonáht'i hoh Sizi Gri boozii bugha koo daóolhtelk ka. Dune Yak'usda bube'ildzun ahli, whuz na'a ts'ah'un na'a nuhwubha 'uhoont'ah 'utehnihl huba. Ndaí ye ndunidzit, 'i chah be hubula 'ooht'en. Lhannah la'et'en ho' 'int'ah. Si chah sula 'et'en.
³ Priscilla 'ink'ez Aquila suba dahooja hubudóohni. Christ Sizi ts'utni, 'en bugha sulh 'úhut'en inle. ⁴ 'En hiye khúna, 'i 'ants'i huba 'int'ah hoh suhúlyih inle. 'Et dahúja huwa, si 'ink'ez 'udun yun k'ut whut'en Sizi Gri huba 'ilhuhowezdel, ts'iyawh chanaiíya hubuts'útni.
⁵ 'Ink'ez ndunnah Christ huba bukoo 'ilhuhowezdel, 'en chah ts'iyawh suba dahooja hubudóohni.
 Sulh dune Epaenetus 'en chah suba dahooja dóohni. 'En Achaia yun k'ut 'udechoo Christ buba 'alha' yint'ah suli.
⁶ Mary 'en chah suba dahooja dóohni. 'En chah tube hooncha hoh nela 'ut'en inle.
⁷ Andronicus 'ink'ez Junias 'en chah suba dahooja hubudóohni. Sunat dunekah 'uhint'ah, sulh tsak'ehudan'a inle. Whel'a 'en hubutah dune ncha hinli 'ink'ez sutsuh da Christ hits'un nalhú'a inle.
⁸ Amplias 'en chah Sizi Gri yunéyah 'int'ah. Tube buk'esi', suba dahooja dóohni.
⁹ Urbanus dune, 'en chah nell 'ét'en Christ be 'ut'en 'uts'ull'en hoh 'ink'ez sulh dune Stachys 'en chah suba dahooja budóohni.
¹⁰ Christ yunéyah, Apeles, ts'iyanaah ba unzoo, 'ink'ez Aristobulus 'et bukoo húdelhts'i, 'en chah suba dahooja hubudóohni.
¹¹ Snadun Herodion 'ink'ez ndunnah Narcisus bukoo húdelhts'i Sizi Gri yunédulh, 'en chah suba dahooja hubudóohni.
¹² Tryphaena 'ink'ez Tryphosa 'en chah Sizi Gri be 'ut'en 'uhulh'en, 'ink'ez sulh dune Persis tube hooncha, 'i be Sizi Gri be 'ut'en tube huwa ghúna inle, 'en chah suba dahooja budóohni.
¹³ Rufus 'en dega nus soo Sizi Gri ba 'ut'en, be'ama chah 'ants'i se'ama li'ínt'ah, 'en chah suba dahooja budóohni.
¹⁴ Asyncritus, Phlegon, Hermas, Patrobas, Hermes, 'et 'onghoh nelhutsinkah hubulh 'út'en, 'en chah suba dahooja hubudóohni.
¹⁵ Philologus 'ink'ez Julia chah, Nereus 'ink'ez bulhtus chah, 'ink'ez Olympas 'ink'ez dune Yak'usda bube'ildzun, 'en hubulh 'út'en, ts'iyawh suba dahooja hubudóohni.
¹⁶ 'Et dahooja lhadáni t'eh, 'et sih lubeshi bughu hoolah be nalhudunoohts'ooos.* 'Et ndunnah njan Christ bugha 'ilhuhowezdel, Rome whut'en dahooja nuhwuhts'útni.

Paul ndo búhni, ndunnah Yak'usda bughunek 'ats'un na'a wheyodulh'eh buka tsi hóhli

- ¹⁷ Sulhutsinkah njan hubugha nuhwughá dúsni, k'us ndan nuhtah ndunnah nts'e na'a whenhodalh'i whuch'a yálhtuk, 'en bugha lhch'a nidutehdulh 'ink'ez nuhwubha hoonstsi' tele. 'Et ndunt'ah buka huwohlle 'ink'ez buch'a naoolh'ah. ¹⁸ 'Et ndunt'ah dune neMoodihti Sizi Gri hik'únucha'ust'en. Dich'oh k'una'a 'uhut'en, 'ink'ez nts'e na'a dich'oh hukwa' huninzun hukw'úne' 'uhut'en. Nanuhona'ah hoh khunek unzoo, 'i be nohwulh yáhalhtuk, 'et ndunnah hukwa tsi chahuhóolih whuz na'a nabonte'ah. ¹⁹ Nts'e na'a Sizi Gri be 'ut'en k'ah hik'une' aht'en ts'iyanaah whulh 'údants'o. 'Et huwa tube nuhwubha hoonstsi'. Whunih wahle nuhwubha hukwa' nuszun ndai 'ut'en unzoo, 'i bugha, 'ink'ez lubeshi k'únucha'zooh't'en. ²⁰ Yak'usda 'en whudezghel negha whu'aih, 'aw chatuszit hoh Satan nuhket'ah hoolah yutelhtsilh. 'Aw' 'et neMoodihti Sizi Gri ye 'únzoo, 'i nuhwubulh 'óot'e ka. ²¹ Timotheus, sulh 'út'en, dahooja nuhwúhni. 'Ink'ez snatnekoó Lucius, Jason, Sospater, 'en chah dahooja nuhwúhni. ²² Tertius suhútni, si 'usja ndi dust'us Paul ba 'uk'une'zíguz. Si chah dahooja nuhwudúsni. ²³ Gaius, 'en bukoo dásunilhti, 'en chah dahooja nuhwúhni. 'En bukoo 'et Sizi Gri hunedulh 'ilhuhowezdel. Erastus, 'et keyah whut'i sooneya ghundli, 'ink'ez nelhutsin Quartus, 'en chah dahooja nuhwúhni. ²⁴ neMoodihti Sizi Gri ye 'únzoo, 'i ts'iyawh nohwulh 'óot'e. 'Et ndoh honeh. ²⁵ Yak'usda uzdóolhti. 'En 'int'ah ye ulhtus, 'i yit'i Sizi Gri buba ulhtus nuhoohltselh ka. Nts'e na'a 'un whudáni whuz na'a 'utehnihl, ndet whehodalh'i, Sizi Gri bughunek unzoo, 'i bugha. 'Uda 'aw dune ndi khunek unzoo, 'i highu t'ehonizun. Hoh da Yak'usda ndi yun k'ut 'uyinla, 'et whuts'un njan whe' hoon't'ah hooyah buch'a nónut'i inle. ²⁶ 'Et k'an 'et ts'iyawh nt'eoonedzin. 'Ink'ez Yak'usda bughunek nus be t'oonudzun, 'i dune hudédowh ts'iyanaah t'ehinanzin. Yak'usda 'ilhuz wheni khuna,

* 16:16 Whuz keyah 'et whuz na'a huhoont'i hoh 'ilhunahowudulh.

'i khunek netl'aída'ai, 'i ndi yun k'ut dune ts'iyawh t'éhinanzin. 'Et t'éhonínzun Sizi Gri bughunek hiyóolhchoot hoh hik'úne' oot'en ka. ²⁷Yak'usda 'en zeh whunih ho' 'int'ah. Sizi Gri 'en bugha 'ahoolhyez uzdóolhti 'ilhuz wheni. 'Et ndoh honeh.

Paul, Corinth Whut'en 'Udechoo Hubuts'un Yuk'e'ánguz

Yak'usda ba 'ilhunahuwúdulh keyah Corinth ts'ih, 'en Paul dahooja hubulhni

¹ Si, Paul ndet Yak'usda hukwa' ninzun k'una'a, 'i be Sizi Gri 'en ba whéla' a suhútni, 'ink'ez ndun nelhutsin Sosthenes hiyulhni, 'en chah, ² ndunnah keyah Corinth ts'ih Yak'usda ba 'ilhunahuwédel hinli, nuhwheni ndi dustl'us k'ut nuhts'o k'e'usges. Christ, Sizi ts'utni, 'en bube'ildzun ahli 'et huwa 'et Yak'usda ba 'udun ninwhuninla. Dune Yak'usda bube'ildzun nuhowhútni. Nuhwheni 'ink'ez ndunnah neMoodihti Sizi Gri yoozi be yuts'u tedudlih, 'en chah dune Yak'usda bube'ildzun 'uhint'ah. 'En hubuMoodihti unli 'ink'ez nuwheni chah neMoodihti unli. ³ Ne'aBá Yak'usda 'ink'ez Sizi Gri neMoodihti ts'un nuhwhuba tenadusdli, 'et hoh nuhdzi dooghel 'ink'ez ye unzoo, 'i nohwhulh 'oot'e.

Yak'usda 'en bugha ts'iyaintsuk nuhghalts'ut

⁴ Sizi Gri bube'ildzun ahli 'et huwa Yak'usda ye unzoo, 'i nuhghalts'ut. 'Et huwa suYak'usda ts'un 'ahoolhyez schanailya dusni. ⁵ Yak'usda ye unzoo, 'i nuhghalts'ut. 'Et huwa nts'e na'a 'en bugha nt'eonehizin 'ink'ez nts'e na'a bughi yalhtuk, 'et whuz na'a 'en bugha ts'iyaintsuk hoh 'o nus unzoo sahlí. ⁶ Nts'e na'a Christ bugha nuhwhudáni, 'i ts'ah'un na'a nuhdzi yudelts'ut. ⁷ 'Et huwa ndi nuhgha unt'ai, 'i 'aw nuhwhuba ndukw chailah ho' hooht'ah, 'ink'ez neMoodihti Sizi Gri netah be hooduteltsilh, 'et huba ilh'i. ⁸ 'Et dek'elh'az dzin whuts'un, 'et 'en bugha be ts'ilhtus, 'i be nidutéhyalh 'et whuts'un. 'Ink'ez neMoodihti Sizi Gri budzin t'eh, 'et dzin 'aw be nuhk'eholts'it, 'i whutélah. ⁹ Yak'usda 'aw nuhla dootnih ghait'ah. 'Et huwa buYe' bulh 'ilho wahle ka nuhka'dani. NeMoodihti Sizi Gri 'en 'int'ah.

Lhch'a uzdetni 'et Christ neba hukwa' ninzun ih?

¹⁰ Sulhutsinkah, neMoodihti Sizi Gri 'en boozí bugha nuhts'un tédusdlih, 'et nuhwhenich'oh nuhtah lhch'a natehdulh whuch'a, 'et huwa nuhwheni 'ilhu k'una'a zeh nuni untehzut nuhts'un hukwa' nuszun. 'Et hoh 'ilhunah ahli hukw'u na'a utehnilh 'ink'ez ts'iyaintsuk lhgha nuni untehdéh 'ink'ez lhk'una'a zeh 'uteht'ilh. ¹¹ Sulhutsinkah ndun Chloe bukoo húdelhts'i, bulunah, 'en bugha nuhwheni lhedahdulh, 'et whulh 'óozalhts'a. ¹² Njan 'et 'un whudusni, bulunah nuhtah njan duhutni, "Paul nényalh 'ust'ah," k'us "Apollos nényalh 'ust'ah," k'us "Cephas nényalh 'ust'ah," k'us "Christ nényalh 'ust'ah," 'et hukwa lhedahdulh. ¹³ 'Et daja nuhzun ih? Christ lhch'a ts'unult'uk ih? 'Awundooh! K'us Paul 'en ih lhdulalghus k'ut nuhwhuba dazsai? 'Awundooh! K'us Paul boozí, 'en bugha ih nuhwheni too be lhúya? 'Awundooh! ¹⁴ Yak'usda chanailya dusni hoh nuhwheni nuhtah 'aw 'ilhunuh whunts'i too be cha'usdlil ho' hooht'ah. Crispus 'ink'ez Gaius 'en zeh too be' busdla, ¹⁵ doo ka bulunah 'uhudooni, sich'oh soozí bugha dune too be' úlh'en hudooni tulih. ¹⁶ 'Ink'ez Stephanas bukoo húdelhts'i, 'en chah too be' busdla. 'Uyoon 'en chah tulih too be' usdla 'et 'aw whunachasulhúnik. ¹⁷ 'Aw dune too be' oolh'en huba ilah hoh Christ nuhtah de ha salh'a. Khunek unzoo, 'i be hubulh yatelhtuk huba 'usinla. 'Aw dune khunek whunih be ilah njan nohwhulh yalhtuk, doo ka Christ bulhdulalghus 'ants'i 'et 'int'ah wule.

Yak'usda ye ulhtus, 'i 'ink'ez ye whunih Christ 'en 'int'ah

¹⁸ Ndunnah tinta' hunesdel, 'en ndi khunek lhdulalghus bugha, 'en 'ants'ih khunek zeh huba yinli. 'Et whunts'ih nuwheni k'us ndan 'i be uzdujih, ndi khunek 'i Yak'usda ye ulhtus, 'i neba' hooht'ah. ¹⁹ 'Et whuz na'a Yak'usda bughunek 'uk'e'edúguz hoh ndutni, "Ndan whunih na'hududil'i,

'en hiye whunih, hoolah telhsilh,

'ink'ez ndan ts'iyaintsuk t'eeoninzun,

'en hiye t'eeoninzun, 'i hoolah telhsilh."

²⁰ Nts'e 'uhoont'ah huwhunih hoonli? 'Aw huhoolah. 'Ink'ez nts'e 'uhoont'ah Moses be' dustl'us 'uk'ununa'úsduguz hoonih? Huhoolah! 'Ink'ez nts'e 'uhoont'ah ndan ndi yun k'ut degna nus whunih na'hudunudzun 'uhint'ah? Huhoolah ho' hooht'ah! 'Et 'alha' hooht'ah ndai ndi yun k'ut whut'en ye whunih, 'i Yak'usda ts'iyawh be ts'uwhusnik yulhtsi? ²¹ 'Et Yak'usda ye whúnih njan nduhoont'ah, ndi yun k'ut whut'en, ndai hiye whunih 'i be 'en 'aw Yak'usda t'ehinízun. 'Et k'us ndi khunek unzoo, 'en huba 'ants'ih k'una'a be yats'ulhtuk li'hoont'ah, 'et whunts'ih 'i be Yak'usda hooht'i hoh ndun huba 'alha' hooht'ah, 'en hubulhyih. ²² Soo cho whunulh'en, ndunnah Lizwif huwa 'et'en zeh hukwanuta 'ink'ez ndunnah Greek, 'en hiye whunih 'i zeh hikunuta. ²³ 'Et whunts'ih nuwheni Christ lhdulalghus k'ut dazsai, 'et zeh howu yats'ulhtuk. 'Et 'alha' 'i be ndunnah Lizwif 'ankw'us huba dzuh sulí, 'ink'ez ndunnah Greek, 'en ndi khunek 'ants'ih huba yuzdli. ²⁴ 'Et whunts'ih

ndunnah hudutejih ka buka' dani, Lizwif hinli 'ink'ez Greek hinli chah, Christ 'en Yak'usda ye ulhtus, 'i hube unli, 'ink'ez ye whunih chah, huba unli. ²⁵ Ndai Yak'usda ye whusnik, 'i dune ye whunih, 'i degha nus 'ultus, 'ink'ez ndai Yak'usda ye laít'ah, 'i dune ye ulhtus, 'i degha nus 'ultus 'et huwa.

NeMoodihti 'aw 'en zeh ts'udóolhti huba' hoont'ah

²⁶ Sulhutsinkah nuhwheni hoh da dutejih ka nuhka' dani inle, 'et dant'ah ahli t'oonahzun. Nts'e na'a ndi yun k'ut whut'en whuz na'a 'uhuninzun ts'iyawh, 'aw lhanah ilah nuhtah duba nahuwhútnih hinli, 'ink'ez 'aw lhanah ilah nuhtah dune be hoolhtus hinli, 'ink'ez 'aw lhanah ilah nuhtah dune ncha hinli. ²⁷ 'Et whunts'ih ndez na'a Yak'usda hukwa' ninzun, ndi yun k'ut ndan hiye whusnik, 'i be ndunnah duba nawhutnih, 'en yooya ubutelhtsilh. 'Ink'ez ndi yun k'ut ndai hiye laít'ah huninzun, 'i be duba nahultus, 'en yooya ubutelhtsilh. ²⁸ 'Et ndunnah tel'en hoh whuzdli, 'ink'ez ndan yuch'a yuk ninelya, 'en Yak'usda 'utahaooanla. 'Ink'ez doo chah ndai 'ants'i unli whunts'i, 'i chah 'utahayanla, 'i be ndai ndi yun k'ut 'int'ah unli, 'i be hoolah yutelhtsilh. 'Et whuz na'a Yak'usda hukwa' ninzun. ²⁹ 'Et whuz na'a 'aw 'ilhunuh whunts'i Yak'usda nalh ncha na'dudool'i ghait'ah. ³⁰ 'Et huwa Yak'usda bugha Christ, Sizi ts'utni, 'en buyudáha. 'En 'int'ah Yak'usda bugha be ts'uwhunih neba yulhtsi, 'ink'ez be ts'ah'un na'a 'uhoont'ah chah neba yulhtsi, 'en bugha 'udun nenínla, 'ink'ez nenaonket chah 'uja. ³¹ 'Et huwa 'et ndez na'a 'uk'e'ánguz hoh ndutni,

“Ndan hidutéhti, NeMoodihti 'aw 'en bugha zeh uzdóolhti huba' hoont'ah.”

2

Sizi Gri lhdulalgus k'ut neba dazsai, 'aw 'et zeh nohwhulh yatelhtuk

¹ Sulhutsinkah ndet nuhwhuts'un whusáya hoh Yak'usda bugha nohwhulh yalhtuk, khunek dezti 'i be 'ink'ez ndi yun k'ut hiye whunih be chah 'aw nohwhulh yachalhtih.

² Seni lhadusdla 'et huwa 'udechoo nuhtaniya hoh 'aw 'udun seni tah whudoo'a hukwa cha'nuszun. Sizi Gri bugha 'ink'ez 'en lhdulalgus k'ut neba dazsai, 'et zeh seni tah whudoo'a hukwa' nuzun inle. ³ 'Et whunts'ih nuhtaniya da, 'et whenlhújut 'ink'ez suyust'e dulduz 'et hubugha chah 'ink'ez hooyasli. ⁴ 'Ink'ez sughunek be nohwhulh yalhtuk, 'aw ndi yun k'ut dune ye whunih khunek ulhtus, 'i be nohwhulh yachalhtih. 'Et whunts'i sughunek Ndoni ts'un hadelts'ut 'ink'ez díltus 'int'ah. ⁵ 'Et hoh Yak'usda nuhwhuba 'alha 'int'ah, Yak'usda ye ulhtus, 'i be, 'aw dune ye whunih, 'i be ilah.

Yak'usda ye whunih, 'i be yats'ulhtuk

⁶ 'Et whunts'ih k'us ndan dune suli, 'en ndi khunek whunih 'i be hubulh yats'ulhtuk. 'Et whunts'ih ndai yun k'ut be whutni, k'us ndi yun k'ut whumoodih, 'en hiye whunih, 'aw 'i be ilah be hubulh yats'ulhtuk. Ndunnah 'ants'i hoolah huteleh. ⁷ 'Et k'us Yak'usda ye whunih, 'i be yats'ulhtuk. Ndi khunek huba whe' hoont'ah hooyah 'ink'ez nunut'i bulh 'int'ah. Yak'usda ndi yun itelilh whutsuh 'et whuz na'a lhaoodinla. 'I neba dézti ho' 'int'ah. ⁸ Ndi khunek neba whe' hoont'ah hooyah, 'i ndi yun whumoodih 'aw 'ilhunuh daja ni t'eininzun huhoolah. 'Et ndi khunek neba whe' hoont'ah hooyah t'ehininzun t'eh, 'et t'eh neMoodihti, ndun dezti, 'en 'aw da lhdulalgus k'echahiyilhtil wule. ⁹ 'Et whunts'ih ndez na'a Yak'usda neba lhaoodinla. Nts'e na'a 'uk'e'éduguz, 'et huwa 'uhooya hoh ndutni,

“Ndunnah Yak'usda k'entsi', ndet Yak'usda huba lhaoodinla,

'i ts'iyawh duna be chahuhós'en,

'ink'ez dudzo be 'aw chahodíts'il,

whuz huba hooncha k'et 'aw howu nuni hunoozut ghait'ah.”

¹⁰ 'Et whunts'ih Yak'usda buyégha 'i be whunéhlhtan. 'Et Yak'usda bugha Ndoni neba nahoole ts'iyawh newhuneilhtan, ndai ye yuk 'int'ah, 'i whunts'i, 'i chah yunenullhtan. ¹¹ 'Et nuhtah nts'e na'a dune dahint'ah 'aw dune ts'ah'un t'ebuninzun huhoolah. Buyégha buyudin'ai, 'i bugha zeh t'oonínzun. 'Et whuz na'a Yak'usda dant'ah 'aw t'eininzun hoolah, Ndoni 'en zeh t'einínzun. ¹² 'Aw ndi yun k'ut ne'whut'en huwa ilah Yak'usda bugha t'ets'oninzun, Yak'usda buyégha negha idé'ai. 'Et ndai Yak'usda 'aw buk'elhachats'uhooldtsil negha iyanlih, 'i ts'iyawh t'ets'unoozeh ka. ¹³ 'Ink'ez ndi bughu yats'ulhtuk, 'i 'aw dune ye whunih ilah 'int'ah hoh whuneodulh'eh. Ndoni 'en bugha whuts'odul'eh. 'I zeh bughu yats'ulhtuk. 'Et whuz na'a nts'e na'a be 'alha' nudzun, 'i Ndoni ts'un hadúts'it, 'i 'ink'ez nts'e na'a Ndoni ye yalhtuk, 'i ts'iyawh lhuzih nizelelh. 'Et whuz na'a Ndoni whuneodulh'eh. ¹⁴ 'Et whunts'ih ndan Ndoni chait'ih, ndai Yak'usda buyégha buts'un haidults'it, 'i 'aw chayulhchoot, whusnik be hoonli k'una'a ba' yint'ah 'et huwa. Soo Ndoni 'en bugha zeh t'ehontezeh, 'et huwa Ndoni daja ni 'aw t'eeonoozeh ghait'ah. ¹⁵ 'Ink'ez ndan Ndoni ye dinda unli, 'en ts'iyawh nt'eeoninzun. 'Aw 'uyoon dune yuba nahuhooyeh hoolah. ¹⁶ 'Et whuz na'a 'uk'e'eduguz hoh ndutni,

“Ndan t'ooninzun neMoodihti daja ninzun,

k'us ndan whuyodulh'eh hoh hoonli t'ewhuntezeh?”

'Et whunts'ih nuwheni Christ beni neghu dez'ai, 'et huwa nuwheni t'ets'oninzun.

3

Ndoni buk'unucha'zaht'en ahli

¹ 'Ink'ez sulhutsinkah nuwheni Ndoni k'une' 'uhet'en k'una'a, 'et 'aw whuz na'a nohwhulh yaoolhtuk ghait'ah. 'Et whunts'ih nuhyust'e lubeshi buts'un hunint'uk k'una'a, 'et whuz na'a nohwhulh yalhtuk. Christ bube'ildzun ahli 'et whunts'ih 'ants'i 'awhuz 'uskeh ahli hukw'u na'a aht'ah. 'Et whuz na'a nohwhulh yaoolhtuk huba' hoont'ah. ² 'Uts'oo nuhgha lhdzoh. 'Ink'ez 'aw duts'un, 'i ilah nuhghas'aih, 'aw teh'ulh huba soo cha'ilcho 'et huwa. 'Ink'ez 'awhuz teh'alh huba soo cha'aht'ah. ³ 'Awhuz nuhyust'e lubeshi ts'un nint'uk. Nuhtah 'oolnih, 'i nuhtah hooni, 'ink'ez lhedádulh, 'ink'ez lhelhdowh ninahdel hukw'u na'a ahja. 'Et whuz na'a ndaht'en t'eh, 'et 'alha 'awhuz nuhyust'e lubeshi ts'un nint'uk hoh aht'ah. Ndi yun k'ut whut'en k'una'a ne'áht'en. ⁴ 'Ilhunuh 'utni, “Si Paul nésyalh 'ust'ah,” 'ink'ez 'uyoon chah 'et ndutni, “Apollos nésyalh 'ust'ah.” 'Et whuz na'a ndudahni t'eh, 'et 'alha ih 'awhuz nuhyust'e lubeshi ts'un nint'uk?

Yak'usda 'en bugha zeh ts'unteyeh. Soo cho khahdli, ndet dzin whusawhélt'sut t'eh, 'et ts'iyawh 'ilho 'ut'en kwun be t'entedzeh

⁵ 'Et huwa sudutehniilh hukwa' nuszun, Paul ndan unli, k'us Apollos 'en chah ndan 'int'ah? 'Ants'i Yak'usda ba ne'hut'en zeh 'uhint'ah. 'En bugha nuwheni huba 'alha' hoont'ah sahli. Nts'e na'a neMoodihti Yak'usda ba ne'ut'en 'ilho hubugha ooni'ai, 'et whuz na'a 'uja. ⁶ 'A'nusdle, Apollos too be nainulhtsul, Yak'usda hainulhyeh. ⁷ 'Et huwa ndan 'a'nanla, k'us ndan too be nainulhtsul, 'en 'ants'i 'uhint'ah. Yak'usda 'en bugha zeh hanteyeh. ⁸ 'Aw 'et 'a'nanla 'ink'ez too be nainelhtsul, 'en 'ilhunah zeh 'uhint'ah. 'Et whunts'ih nts'e na'a 'ilhunah hinli hoh dahét'en huwa, 'et whuz na'a huba 'uk'elha whutele. ⁹ 'Et huwa nuwheni Yak'usda bube'ildzun 'ink'ez 'en ba lhulh 'uts'ut'en ts'inli. 'Ink'ez nuwheni Yak'usda buk'a'niyeh k'et ahli 'ink'ez Yak'usda bukoo chah ahli. ¹⁰ Yak'usda ye unzoo, 'i nts'e na'a sugha ini'ai, 'et 'i bugha si, koo 'uwulh'en be whunih k'una'a li'ust'ah, 'ink'ez ndi koo buk'oh whuz'ai, 'i lhadusdla. 'Ink'ez ndan nts'e na'a 'uwutelilil, soo cho huwohle nts'e na'a koo 'uwulh'en hukw'u na'a. ¹¹ 'Aw dune, 'udun koo buk'ehoolts'uk, 'i ooleh ghait'ah. 'I 'ilho 'uda 'uhooja, 'ink'ez ndi koo buk'oh whuz'ai, 'i Sizi Gri, ndun nets'u yoozi, 'i 'en 'int'ah. ¹² 'Et ndi koo buk'oh whuz'ai, 'i ndan nde na'a 'uwutelil'ih hoh gold, silver, tse dézti, 'i k'us duchun, t'l'o, t'l'o zukw, 'et 'i be 'uhoolya t'eh, ¹³ 'et ndet dzin whusawhélt'sut t'eh, 'et ts'iyawh 'ilho 'ut'en kwun be t'entedzeh. Nts'e na'a be 'uhoolya, 'i kwun be t'enedzin hukw'u na'a. ¹⁴ Ndan ndi be 'uhoolya, 'i kwun be chadik'il t'eh, 'aw 'en zeh whuba k'elha whutele. ¹⁵ 'Et ndan ndi be 'uhoolya, 'i dank'un t'eh, 'et t'eh 'en ts'iyawh tinta hotelelh. 'Et whunts'ih koo 'uhoonla kwun tah hanabanla hukw'u na'a ubutelhyih. ¹⁶ 'Aw t'oonuzuhzun nuwheni Yak'usda hubuluglez whucho ahli 'ink'ez Ndoni nuhyudinda? ¹⁷ Ndan Yak'usda bukoo tinta' whunilh'en, 'en chah Yak'usda tinta' yutel'ih, Yak'usda hubuluglez whucho lubeshi huwu hoolah 'et huwa. 'Ink'ez nuwheni ndi luglez whucho ahli.

Ndi yun k'ut be whutnih 'aw buk'unucha'ts'oost'en

¹⁸ Khun nuwhenich'oh na'dunont'ah gunih. 'Et nuhtah 'ilhunuh usda hoh ndi yun k'ut ye whunih be dune whunih na'dunúdzun t'eh, 'et t'eh dich'oh ndi yun k'ut whusnik hininzun, 'i whuz na'a na'dudooltsilh huba' hoont'ah. 'Et hoh ts'ah'un na'a whunih dune hutele. ¹⁹ Ndi yun k'ut ye whunih, 'i Yak'usda ba whusnik k'una'a 'int'ah. 'Et whuz na'a 'uk'e'éduguz, “Ndunnah whunih dich'oh hiye whúsnik, 'i be Yak'usda uboolhgooh.” ²⁰ 'Ink'ez njan 'uk'e'éduguz hoh ndutni, “Ndunnah whunih nts'e na'a nuni hunuzut, neMoodihti t'ooninzun, 'i 'ants'i gaih unli.” ²¹ Ts'iyawh nuhwhe'ildzun 'uhoont'ah. 'Et huwa 'aw 'ilhunuh dune 'o nus unzoo uzdooni ghait'ah. ²² Paul, k'us Apollos, k'us Cephas, k'us ndi yun k'ut, k'us be ts'ukhna, 'i k'us be yats'adlah, k'us k'an 'et ndai ts'ít'i, 'i k'us ndet whusawhétel's'ulh, 'i ts'iyawh nuhwhe'ildzun 'uhoont'ah. 'Et huwa 'aw 'ilhunuh dune 'o nus unzoo uzdooni ghait'ah. ²³ Nuwheni Christ bube'ildzun ahli, 'ink'ez Christ, 'en Yak'usda bube'ildzun unli.

4

Yak'usda bugha neba whe' hoont'ah hooyah, 'et netl'ahó'ai

¹ 'Aw 'et dune 'et ndez na'a neghu nuni hunoozut, nuwheni Christ be 'ut'en 'uts'int'ah, 'ink'ez ndai Yak'usda bugha huba whe' hoont'ah hooyah, 'et whe nuwhuts'untelhtun ka netl'ahó'ai. ² 'Aw 'et zeh ilah, ndan yutl'aho'ai, 'et ndan dune hit'aninootan huba' hoont'ah.

³ 'Et nuhwheni suba nahuzúhuya t'eh k'us 'uyoon chah but niniya, 'ink'ez suba nahuhezya t'eh, 'et whunts'ih ts'iyawh 'ants'i suba 'uhoont'ah. 'Aw sich'oh whunts'i duba nahoosdeh ghait'ah. ⁴ 'Aw dahóont'ah suts'un ilah, 'aw t'oonuzúszun, 'et whunts'ih 'aw 'et huwa ilah ts'ah'un dune usdli. NeMoodihti 'en 'int'ah suba nahéyelh 'et huwa. ⁵ 'Et huwa ndet dzin whusawhútelts'ulh whuts'un, 'aw hoonliyaz huba nahoochye hoolah. NeMoodihti whusateyahl whuts'un whuba lh'i. 'En 'int'ah ndi tsahóhlgus yuh ts'ih nunúli, 'i ts'iyawh ts'et hanaítelelh. 'Ink'ez nts'e na'a dune budzi yuh ts'ih 'uhuninzun, 'i ts'iyannah ndi ts'iyawh bunalhts'et haóotelelh. 'Et hukw'elh'az Yak'usda 'ilhunah hinli hoh hoonzoo hoh hubulh huba whudutelhti.

Lhanah dóolhti, k'us lhanah nuhwhuba 'ants'i wule gunih

⁶ Sulhutsinkah nuhwheni si 'ink'ez Apollos bulh ndai bugha 'uts'ut'en, 'i k'una'a nuhwheni nuhwhuba. 'Et hoh nuwheni negha 'o nus hodoolh'eh. Ndi 'uk'e'éduguz, 'i 'o 'un khunek butanaóodoo'h'ah gunih. 'Et hoh 'ilhunuh délhti, k'us 'ilhunuh nuhwhuba 'ants'i wule gunih. ⁷ Ndan 'un whinla 'uyoon ndulhút'ah nuhwhulhtsi? Hoolah! Di zeh 'int'i ndai nghá chaíkulh? Hoolah! 'Et hoonli ngha ninkat t'eh, 'et di ka howindloh hoh 'aw hoonli sgha chaíkulh dutenilh? ⁸ 'Aw 'et lhah aht'i. 'Aw 'et soo deh'a aht'ah. Nuwheni nuhwhu'et whunts'i, hubudayi cho k'una'a aht'ah. 'Et 'alha uncha 'et whuz na'a aht'ah. 'Et huwa nuwheni chah nohwhulh hubudayi cho ts'oole. ⁹ 'Ink'ez ndunuszun nuwheni whela 'en 'udék'elh'az 'uts'int'ah 'et whuz na'a Yak'usda ne'inla. 'Ants'i ts'iyannah nalh dahutetsah hukw'u na'a ne'inla. Ts'iyannah ndi yun k'ut whuniz neninla hukw'u na'a hoh nehunilh'en, lizas 'ink'ez dune chah 'en ts'iyawh. ¹⁰ Nuwheni Christ ba ts'uwhusnik ts'inli, 'et nuwheni Christ bulh whunih ahli. Nuwheni lats'ít'ah 'ink'ez nuhwheni nulhtus. Nuwheni dune ncha ahli, 'et nuwheni 'aw chats'uditi ts'inli. ¹¹ K'an 'et dzin whuts'un neye'ults'ilh 'ink'ez t'a'ts'óosde. Nenaih chah chaizoo'h 'ink'ez 'ants'i hoh nuts'iya koo chah chats'uhoot'ih, 'ink'ez dune ne'huzula. ¹² Nuwhenich'oh nela be 'uts'ut'en. Hoonsti, 'i khunek be neghu yahalhtuk 'et whunts'ih nuwheni khunek unzoo, 'i be hubulh yáts'ulhtuk. Dzun nenúhldzut 'et whunts'ih soo whulh ts'uzin. ¹³ Nech'a yahalhtuk 'et whunts'ih nuwheni nelh dunekah k'una'a be hubulh yats'ulhtuk. Ndi yun k'ut 'untulkat li'ts'uja. K'an 'et whuts'un ndi yun k'ut ntsi'yaz k'una'a 'uts'int'ah suli.

Suzkeh k'una'a nuhK'esi, 'et huwa khunek ulhtus, 'i be nuhwhulh yalhtuk

¹⁴ Ndi 'uk'ne'zíguz, 'i 'aw be yooya nuhtelhsilh huba ilah usdla. Suzkeh k'una'a nuhK'esi, 'et huwa khunek ulhtus, 'i be nuhwhulh yalhtuk. ¹⁵ Ndi yun k'ut soo degha nus dune lhanah hoh Christ bugha whenohodulh'eh hoonli t'eh, 'et whunts'ih 'aw lhanah ilah nuhwhe'abá k'una'a chanohonílh'en. Christ, Sizi ts'utni, 'en bughunek unzoo, 'i be si sugha be ts'ukhuna, 'i ahti 'et huwa nuhwhuba sili. ¹⁶ 'Et huwa nuhts'u tedusdli si sk'una'a 'ooht'e. ¹⁷ 'Et huwa ndun Timothy nuhts'u whel'h'a. 'En neMoodihti bugha suye' buk'esi, 'en unint'ah. 'Ink'ez Christ bugha 'i ts'iyawh 'aw yula dootnih ghait'ah. 'Et sk'una'a neMoodihti bulh be 'ut'en k'ah, 'et nuhwhuba nuwhunatelnih. 'Ink'ez ndulhcho hoh ndet Yak'usda ba 'ilhunahuwúdulh, nts'e na'a whubodulh'eh sih, 'i ts'iyawh nuhwhuba whunatelnih. ¹⁸ 'Et nuhtah bulunah 'awhuz 'uhududelhúti, Paul 'aw whusachatesyal huninzun 'et huwa. ¹⁹ 'Et whunts'ih neMoodihti hukwa' ninzun t'eh, 'et sih 'aho nuhts'u tóosya. 'Et nuhghu níya t'eh, 'et ndunnah 'uhududelhúti, 'aw bughunek ilah k'us hiye ulhtus, 'i dant'ah, 'et naootes'alh. ²⁰ Yak'usda huba ne'duni nuhtah, 'i 'aw khunek be ilah, 'et k'us ye ulhtus, 'i be 'int'ah 'et huwa. ²¹ K'us ndet hukwa' nahzun hoh nuhts'u tésyah? Tutsus tulih k'us be nék'ets'ints'i, 'i 'ink'ez nagoostlíyaz ne'nohwhutelh'ilh?

5

'Ithunahuwúdulh hubutah lubeshi tinta 'obulh'ih

¹ 'Et ts'iyannah whulh 'uhudits'o, nuhtah dune ts'eke bulh lubeshi 'uhulh'en. 'Et duhut'en, hukwaya hoonli k'et 'onghun 'udun yun k'ut whut'en 'aw howu yahutoolhtih ghait'ah. Ts'iyannah whulh 'udits'o dune be'abá bu'at 'en yuzih usda. ² 'Ink'ez nuhwheni 'ududelhúti 'et whunts'ih soo cho huwu ni wahle huba' hoon't'ah, 'et ndun nduja, 'en nuhtahanaóolh'ah huba' hoon't'ah. ³ Suyust'e be nuhtah cha'ust'ah 'et whunts'ih sich'oh suyégha be nuhtah 'ust'ah 'ink'ez 'ants'i nuhzih sída li'ust'ah. 'Et huwa si ndun dune lubeshi 'ulh'en, 'en 'uda ba nahesda. ⁴ 'Et huwa ndet 'o 'at Sizi Gri neMoodihti boozí bugha 'ilhunawéhdel t'eh, 'ink'ez sich'oh suyégha chah, 'ink'ez Sizi Gri ye ulhtus, 'i be, ⁵ 'et ndet 'ilhunahuwúdulh, 'et ndun nduja, 'en Satan butf'aitelhtel buyust'e tinta' yutelh'ilh 'et wheni. 'Et Sizi Gri neMoodihti budzin t'eh, 'et ndun dune buyégha yutelhyih ho' hoon't'ah. ⁶ Huwahdloh 'aw chahoozoo. 'Aw t'oonuzuhzun ih 'ants'i ndi lhes ilhjut, 'i nelhútlus t'eh, li'tenilh unteldoh. * ⁷ 'Et

* 5:6 Whuz na'a ndun dune bulubeshi butaidudoh ni ho' utni.

ndi lhes ilhjut, 'i ts'iyawh 'ún telhdulh. 'I be'et 'et nuhwheni k'an lhes únteldoh k'una'a 'ooh't'e. Nuhwheni k'an lhes unteldoh k'una'a 'aht'ah 'et huwa. Christ, 'en Netus Lhusiya whunats'ulnih neba unli, 'et wheni neba hizelhghi 'et huwa. ⁸'Et huwa ndi netus lhusiya whunats'ulnih 'aw lhes ilhjut, 'i bulh ilah hoh whunats'oolnih. Ndi lhes ilhjut, 'i hoon'tsi' 'ink'ez lubeshi 'uts'ulh'en 'i k'una'a 'uhoont'ah. 'Et whun'ts'ih ndi k'an 'et lhes chantéldoh 'i 'int'ah be ts'ah'un 'uhoont'ah 'ink'ez khunek 'alha 'int'ah k'una'a 'uhoont'ah.

Ndunnah nelh 'int'ah, 'en zeh huba nats'oohooyeh huba' hoon't'ah

⁹'Et 'uda dustl'us be ndun whudusni, ndun dune ts'eke bulh lubeshi 'uhulh'en 'en khun 'ilhuz wule bugha' dudoohdli. ¹⁰'Et whun'ts'ih ndunnah huba 'alha cha'hoot'ah, 'aw 'en ilah bugha' dudoohdli hoh dune ts'eke bulh lubeshi 'ulh'en, k'us 'uyoon be'ildzun ka' huninzun, k'us 'undunut'ih, k'us 'uk'edéltsi huba 'alha 'int'ah chah, 'aw 'en ilah bugha' dudoohdli ilah hoh nuhwhudú'sni. 'Et whuz na'a ndaht'en t'eh, 'ants'i ndi yun buch'a tehyalh hukw'u na'a 'uteht'ilh li'hoont'ah, ts'iyana'h ndi yun k'ut 'et nduhút'en 'et huwa. ¹¹'Aw 'et nuhts'un k'e'aguz ndun Sizi Gri bugha nelhutsinkah but's'útni, 'ink'ez dune ts'eke bulh lubeshi 'uhulh'en, k'us 'uyoon be'ildzun ka' ninzun chah, k'us 'uk'edéltsi huba 'alha 'int'ah, k'us 'uyoon dzuh ne'duni chah, k'us tanutnai, 'i chah, k'us 'undunut'ih chah, 'et ndun Sizi Gri bugha nelhutsinkah but's'útni, ndunt'ah dune, 'en 'et nduhút'en t'eh, 'aw 'en ubulh cha'zooht'en, 'aw hubulh 'uteh'alh 'et whun'ts'ih 'aw 'uhot'e ghait'ah. ¹²'Ink'ez ndunnah nelh cha'it'ah, 'en si suba cha'hoot'ah buba nahutesyeh huba. 'Et ndunnah nelh 'int'ah, 'en zeh huba nats'ateyeh huba' hoon't'ah. ¹³'Et whun'ts'ih ndunnah ndune nelh cha'it'ah, 'en Yak'usda huba nahuteyeh. 'Et huwa nelhutsin tink'us ne'út'en, 'en nuhwhenich'oh nuhtahanaóolh'alh.

6

Khun teh Yak'usda ba nelhutsin unli, 'en ndi yun k'ut naheyelh but nióolhtelh gunih

¹'Et k'us ndan nuhtah huba 'alha' hoon't'ah, 'en 'uyoon bulh lhena 'uhutni t'eh, 'et nts'e na'a 'uwhutet'ilh hoh huba 'alha cha'hoot'ah, 'en hububut nibutelhtelhuba nahooodeh ka? 'Aw nduhóot'en huba cha'hóot'ah! Nts'e na'a 'uwhutet'ilh hoh dune Yak'usda bube'ildzun, 'en 'aw hububut niyóolhtelh ghait'ah? ²'Aw t'eeonuzáhzun ih dune Yak'usda bube'ildzun, 'en ndi yun k'ut whut'en huba 'alha cha'hoot'ah, 'en huba nahutedeh? 'Ink'ez nuhwheni ndi yun k'ut huba 'alha cha'hoot'ah, 'en huba nahutehyeh t'eh, 'et nts'e na'a ndi hoonliyaz lhena 'uhutni 'int'ah, nuhwheni ba nahutehyeh huba soo cha'aht'ah? ³'Aw ih t'eeonuzáhzun, Lizas, 'en whun'ts'i huba nats'ahuteyeh? 'Et 'alha 'uhoont'ah. 'Et huwa 'aw howa chahóolnah hoh njan ndi yun k'ut lhena 'uts'utni hoon'tsol whun'ts'i hubugha nats'ateyeh. ⁴'Et njan hoon'tsol ndi yun k'ut 'ut'en lhena 'uts'utni 'int'ah hubugha huba nats'ateyeh t'eh, 'et sih nuhwheni Yak'usda ba 'ilhunahuwé'sdel tah, k'us ndan nuhwhuba soo cha'ildzooch huba 'alha 'uhoont'ah whun'ts'i, 'aw 'en zeh nuhwhuba nahuteyeh ubuzílhtsi. ⁵Hooya wahle 'et huwa 'ún whudusni. 'Et 'alha 'un whudú'sni, nuhwheni nuhtah 'aw ih 'ilhunuh whun'ts'i dune whunih nuhwhuba nahuteyeh hoolah? ⁶'Et whun'ts'ih lhe'ahja! 'Ilhunuh dune dulhutsin ba nahutedeh ts'un wheyalhti. Ndunnah naheyelh huba 'alha cha'hoot'ah, 'et whun'ts'ih hububut ninilhti. ⁷'Ink'ez njan dune ba nahutedeh ts'un ninilhti, 'et 'uda nuhwhenich'oh ch'a'nulhde whuzdli. Dune 'ats'un na'a ne'nohulh'en t'eh, di ka whulachaduzahnik? K'us dune tink'us 'uhut'en t'eh, 'et chah whute 'uhoont'ah. ⁸'Et whun'ts'ih nts'e na'a ndaht'en, 'et hoh tinta' aht'i 'ink'ez nuhulhutsinkah 'ewhulhts'it. ⁹'Aw t'eeonuzahzun ih, k'us ndan 'aw ts'ah'un cha'it'ah, 'en nts'e Yak'usda hubudayi cho unli, 'aw hubutl'achaóotes'al? Khun nuhwhenich'oh na'dunooht'ah gunih! K'us ndan dune ts'eke bulh lubeshi 'ulh'en, k'us 'uk'edéltsi huba 'alha 'int'ah, k'us ndunnah lhghu húdelhts'i 'en lubeshi ts'un hunint'uk hinli, k'us dudulh dune hoon'tsi' k'una'a bulh tinta' ut'ih 'ink'ez ts'ekoo dudulh ts'ekoo bulh tinta' ut'ih, ¹⁰'undunut'ih chah, k'us 'uyoon be'ildzun ka' ninzun, k'us tanutnai, k'us 'uyoon dzuh ne'duni, k'us 'o nus dáhatni chah, 'en ts'iyawh ndunt'ah nts'e Yak'usda hubudayi cho unli, ndai Yak'usda bube'ildzun unli, 'i 'aw hiyóolhchoot ghait'ah. ¹¹'Ink'ez nuhwheni bulunah nuhtah 'et ndaht'en inle. 'Et whun'ts'ih whuz na'a toonanwhuzguz li'aht'ah. Yak'usda ba 'udun ninwhuninla chah, 'ink'ez ts'ah'un dune nuwhulhtsi. 'Et ndi ts'iyawh Sizi neMoodihti boozi bugha 'ink'ez neYak'usda buyégha bugha chah, 'et whuz na'a 'un whínla.

Neyust'e 'ink'ez neyégaha chah, 'i be Yak'usda uzdóolhti

¹²'Et 'aw hoonliyaz be such'a' noojoot hoolah, 'et whun'ts'ih bulah suba chahóozooh. Hoonliyaz such'a' noojoot hoolah, 'et whun'ts'ih 'aw hoonli k'une' sool'en, 'i hoolah. ¹³Ts'uyi nebut ba 'int'ah 'ink'ez nebut 'i ts'uyi ba 'int'ah, 'et whun'ts'ih 'et ndi 'awhunelhts'et 'i Yak'usda hoolah yutelhtsilh. 'Et whuz na'a nduhoon't'ah, neyust'e 'aw dune k'us ts'eke bulh lubeshi 'uhulh'en hukw'u na'a be ts'oof'en huba cha'yilel. 'Et neyust'e neMoodihti ba 'ulya

'ink'ez neMoodihti neyust'e ba 'int'ah. ¹⁴'Et Yak'usda ye ulhtus, 'i be neMoodihti dinaidilhti, 'ink'ez nuwheni chah ye ulhtus, 'i be dinaneduteleh. ¹⁵'Aw ih t'oonuzázhun, nuhyust'e Christ buyust'e bulah unli? Nts'e na'a 'uwwhutet'ilh hoh Christ buyust'e bulah unli, 'i 'ul'en ts'eke buyust'e bulah tes'ilh? 'Aw whuz na'a cha'hoot'ah! ¹⁶'Aw ih t'oonuzázhun, dune ts'eke 'ul'en bulh 'et 'int'ah t'eh, 'et buyust'e 'ilho suli hukw'u na'a 'uhint'ah? 'Et whuz na'a 'uk'e'eduguz hoh ndutni, "Nanah, 'en 'ilho yust'e suli?" ¹⁷'Et ndan Sizi Gri ts'un na'ja, buyégha chah 'en bulh 'ilho suli ho' 'uhoont'ah. ¹⁸'Et huwa dune k'us ts'eke bulh lubeshi 'uhulh'en 'et nduhoont'ah whuch'a ne'ooht'en. 'Et 'uyoo lubeshi 'aw neyust'e bugha 'uchagesnak, 'et whunts'ih ndunnah dune k'us ts'eke bulh tinta' 'ant'en t'eh, 'et t'eh dich'oh buyust'e lubeshi be tinta' yulh'ih. ¹⁹Nuhyust'e 'i Ndoni hubuluglez whucho 'uhoont'ah 'ink'ez nuhyudínda, 'aw t'oonuzázhun ih? 'En 'int'ah Yak'usda nuhgha ini'ai 'et huwa 'aw nuhwhenich'oh be'ilhdzun chahlah. ²⁰Lhe'hoolcho hoh 'un whinla! 'Et Yak'usda nenaonket, 'et huwa nuhyust'e 'i be 'ink'ez nuhwhenich'oh nuhyégha, 'i be chah Yak'usda ba whudóolhti, bube'ildzun sahli 'et huwa.

7

Lhgho delhts'i 'i hubugha

¹'Aw 'et ndai sts'o k'e'éhgz, 'i bugha 'et ndun whudutesnilh, dune ts'eke bulh tinta cha'hust'ih 'et hoonzoo. ²'Et whunts'ih dune k'us ts'eke bulh lubeshi 'uhulh'en 'et nduhoont'ah whuch'a 'et huwa dune 'ilhunah hinli hoh dich'oh bu'at hóle 'ink'ez ts'ekoo chah dich'oh buki hóle huba' hoont'ah. ³'Et dune du'at ts'ah'un na'a yuk'eootsi' yughusda huwa 'ink'ez ts'eke duki chah 'et whuz na'a zeh yuk'eootsi' huba' hoont'ah. ⁴Ndun ts'eke buki hoonli, 'en 'aw buyust'e duba yumoodih chailah, buki 'en zeh yumoodih unli. 'Ink'ez whuz na'a zeh ndun dune bu'at hoonli, 'en cha 'aw buyust'e duba yumoodih chailah, bu'at 'en zeh yumoodih unli. ⁵'Aw lhch'a óóht'as huba cha'hoot'ah. 'Et whunts'ih 'astl'iyaz hoh sahá'delhuya 'ink'ez tenadutehdli hukwa' nuhzun t'eh, 'et 'anelhút'et hoh soo lhgha huhoont'i t'eh, 'et soo 'uwwhuter'ilh. 'Et hukw'elh'az doo chah lhk'eoohdutsi' 'ink'ez lhuzih ninaoht'as, doo ka 'aw nuhyust'e bughu tehle huba soo cha'aht'ah t'eh, 'et Satan nuhootelhdzih, 'et whuch'a. ⁶'Aw nuhwuba ne'dusni ilah, njan 'et ndóht'en hukwa' nuhzun t'eh, 'et huwa 'udusni. ⁷'Et ts'iyannah dune si sk'una'a zeh nduchah 'uhint'ah, 'et whuz na'a hukwa' nuszun. 'Et whunts'ih Yak'usda ts'iyannah 'ilhunah hinli hoh ndai huwa yu'aih, 'i bugha ini'ai. Ts'iyawh 'ilhunah hinli lhulhyoo dedowh, 'i hubugha ini'ai. ⁸'Aw 'et ndunnah suh nuhudelh, 'ink'ez tsandelh chah, 'en ndez na'a 'ubudúdni, si sk'una'a zeh 'uhint'ah t'eh, 'et huba whutezoo. ⁹'Et whunts'ih 'aw 'uhúduodutun ghait'ah t'eh, lhghu hudóolts'i. 'Ants'i kwun k'una'a lhts'un hunint'uk t'eh, 'et lhghu hudéhts'i t'eh, 'et sih 'o nus soo' hoont'ah.

Lhghu húdelhts'i 'aw lhch'a nahoodelh ghait'ah

¹⁰'Aw 'et ndunnah lhghuhusduke, 'aw si ilah dusni, neMoodihti ndi khunek yutulhúhezya 'i 'int'ah, 'aw ts'eke duki ch'a naooja gunih. ¹¹'Et whunts'ih duki ch'a nasja t'eh, 'et t'eh 'aw 'uyoon ghu naooja gunih. 'Et whunts'ih hukwa' huninzun t'eh, huhoont'ih hoh lhuzih ninahoot'as huba' hoont'ah. 'Ink'ez dune du'at 'en 'ún yutooneh gunih. ¹²'Aw 'et bulunah nuhtah, si ndun whudutesnilh, 'aw neMoodihti ilah 'utni. Ndan nelhutsin 'en bu'at buba 'alha 'uhoont'ah chailah t'eh, 'et whunts'ih duki 'ilhuuz wule yuzih wuda hukwa' ninzun t'eh, 'et du'at 'ún yutooneh huba cha'hoot'ah. ¹³'Ink'ez ts'eke 'en duki buba 'alha 'uhoont'ah chailah t'eh, 'et whunts'ih 'ilhuuz wheni yuzih tedalh hukwa' ninzun t'eh, 'et t'eh duki 'ún yutooneh gunih. ¹⁴'Et buki buba 'alha 'uhoont'ah chailah, 'et whunts'ih 'en bu'at 'en bugha Yak'usda ba 'udun nilti ho' 'int'ah. 'Et whuz na'a bu'at buba 'alha 'uhoont'ah chailah, 'et whunts'ih buki 'en bugha Yak'usda ba 'udun nilti ho' 'int'ah. 'Et whuz na'a nduchá'hoot'ah t'eh, 'et t'eh buzkehkah Yak'usda ba 'ats'un na'a 'uhuter'ilh ho' 'uhoont'ah. 'Et whunts'ih 'en Yak'usda ba 'udun nilti nahúsdli. ¹⁵'Et whunts'ih ndun buba 'alha 'uhoont'ah chailah whenája t'eh, whute natooja. 'Et whuz na'a nduhooja t'eh, 'et sih ndun nelhutsin k'us neulhtus hinli, 'aw 'ulhts'un nuwhunoolht'uk wule huba' hoont'ah. 'Et whunts'ih nedzi dooghel, 'i be ndi yun k'ut uzdoolts'i, 'et huba Yak'usda neka' dani. ¹⁶'Et whunulh'en, nuhwheni nuhgha tulih nuhkikah hudoojih. 'Ink'ez nuhwheni nuhgha tulih nuh'atkah hudoojih, 'et huwa 'udusni.

Daht'ah ahli hoh Sizi Gri ts'un nasulhúya sahli, 'et whuz na'a zeh 'ooht'e

¹⁷'Aw 'et nts'e na'a ndulhcho hoh Yak'usda ba 'ilhunahuwédel hube' 'ut'en k'ah huba 'uwhusla, 'et nuhwheni chah 'et whuz na'a nuhwhuba whuter'ilh. 'Et nts'oh da Yak'usda nuhka' dani ndi yun k'ut doolhúts'i ka, whute 'et whuz na'a ndi yun k'ut delhúts'i. ¹⁸Ndan 'uda yuk'e dune unli, 'i k'ut hiyúzt'us 'ink'ez 'utahayalhti t'eh, 'et t'eh chait'us hukw'u na'a 'oot'e gunih. K'us ndan chait'us unli da, 'ink'ez 'utahayalhti t'eh, 'et t'eh yuk'e dune unli, 'i k'ut hiyúzt'us hukw'u na'a 'oot'e gunih. ¹⁹'Et yuk'e dune unli k'ut hiyúzt'us k'us chahiyí'us,

'i 'ants'i 'uhoont'ah. Yak'usda bughunek net'áida'ai buk'une' ts'ut'en t'eh, 'et zeh neba hooncha ho' hooht'ah. ²⁰Nts'e na'a 'ilhunah hinli dahint'ah hoh 'utahabalhti, 'et whuz na'a 'uhoot'e huba' hooht'ah. ²¹Nyun 'ulhna inli hoh 'utahanyalhtih t'eh, 'et huwuni onle gunih. 'Et whunts'ih nyumoodih nladutetnih t'eh, 'et t'eh ndineh. ²²'Et ndunnah neMoodihti 'utahainyalhti 'ulhna unli whunts'i, 'en neMoodihti yula nadetnik k'una'a 'int'ah 'et huwa. 'Et whuz na'a ndunnah neMoodihti dutejih ka yuka' dani, 'ulhna chailah whunts'i, Sizi Gri ye 'ulhna unli. ²³Dahoolcho hoh nanohonket, 'et huwa 'aw dune be 'ulhna wahle gunih. ²⁴Sullhutsinkah nts'e na'a daht'ah dune ahli hoh Yak'usda 'utahanhonla, 'et whuz na'a zeh 'ooh't'e huba' hooht'ah.

Ndan 'aw dune k'us ts'eke t'echahunízun, 'en bugha yatelhtuk

²⁵'Aw 'et ndun dune k'us ts'eke t'echahunízun, 'en bugha nohwhulh yatelhtuk. 'En bugha neMoodihti 'aw khunek st'achadi'al, 'et whunts'ih neMoodihti sugha te'ninzun hoh st'aninentan buba tesdleh, 'et huwa ndez na'a nohwhulh yálhtuk. ²⁶Ndai k'an 'et be dzuh nahdeh 'et huwa bugha ts'ih dune nts'e na'a 'uhint'ah, 'et whuz na'a zeh 'uhoot'e huba' hooht'ah nuszun. ²⁷Ts'eke ghu sinda t'eh, buch'a natandalh hukwa 'ont'en gunih. 'Et suh ninya t'eh, 'et 'uyoon ka' nonzin gunih. ²⁸'Et whunts'ih lhghu sahke t'eh, 'aw lubeshi chahoolah. 'Ink'ez ts'eke 'aw dune t'echanusze ki yit'i t'eh, 'aw buba lubeshi chahoolah. 'Et whunts'ih ndunnah lhghu húdelhts'i, 'en ndi yun k'ut dzuh nahutedeh, 'ink'ez 'et whuch'a whuz na'a nuhwhuba hukwa' nuszun. ²⁹Sulhutsinkah k'an 'et ts'ah'un na'a 'un whudutesnih, ndet nuhts'u whelst'ulh, 'aw 'et nilhduk' ho' 'uhoont'ah. 'Et huwa njan whuts'un ndez na'a dune uzteleh ho' 'uhoont'ah. Ndan bu'at hooni, 'en whunts'i bu'at hoolah k'una'a 'uhint'ah. ³⁰Ndunnah 'uk'enudleh, 'aw 'uk'echanusdle k'una'a 'uhint'ah. 'Et ndunnah huhoont'i, 'aw chahuhoont'i k'una'a 'uhint'ah. 'Et ndunnah hoonli 'uhoont'ah, 'aw hube'ildzun chailah li'hint'ah. ³¹'Ink'ez ndunnah ndi yun k'ut hube'íldzun, 'i hoiyit'i t'eh, 'aw hube'íldzun chailah k'una'a 'uhint'ah. Nts'e na'a ndi yun k'ut uzdelhts'i hukw'u na'a, 'i hoolah whutele 'et huwa. ³²Howuni ahli, 'et whuch'a nuhts'u hukwa' nuszun. Whunulh'en, ndan suh nuya, 'en neMoodihti be 'ut'en k'ah 'ink'ez nts'e na'a ba whutezoo, 'et zeh howu naninahzut. ³³'Et whunts'ih ndan bu'at hoonli 'en nts'e na'a ndi yun k'ut uzdelhts'i hukw'u na'a, 'ink'ez bu'at nts'e na'a buba whutézoo ninzun, 'et zeh howu naninahzut. ³⁴'Et ndunnah buki hoonli 'ink'ez 'aw dune t'echanízun bulh lhelhts'un na'a 'uhint'ah. Ndan 'aw dune t'echanízun neMoodihti 'en zeh bugha nuninzut. 'Et hoh 'en buyust'e 'ink'ez dich'oh buyégha bulh 'i chah lubeshi bughu hoolah unli. 'Et ndan buki hoonli, 'en ndi yun k'ut uzdelhts'i hukw'u na'a, 'ink'ez nts'e na'a buki ba whutezoo, 'et zeh howu nuninzut. ³⁵'Ink'ez 'o 'un nuhwhuba whutezoo, 'et huwa ndi khunek ndun whudusni. 'Aw k'ah nawhunulht'uk ilah ho' dusni. 'Et whunts'ih ndai nuhwhenich'oh be tehzo, 'ink'ez nts'e na'a 'aw whechahtsaz hoh nuhdzi ndulhcho 'i be neMoodihti bugha dunulhyeh. ³⁶'Et 'aw dune t'echanízun ndun dune yulh tinta' tet'ilh ninzun t'eh, 'ink'ez 'aw 'et K'éinyi hoh 'uda teninya ho' 'int'ah, 'et t'eh whute lhghu hooduke huba' hooht'ah, 'aw chahóotsi'. ³⁷'Et whunts'ih ndun dune dudzi ndulhcho 'i be dant'ah hoh dune tele, 'et t'eeoninzun t'eh, 'ink'ez 'et huwa 'aw 'at tet'ilh hukwa cha'ust'en hoh dich'oh hukwa' ninzun hukw'u na'a 'int'ah t'eh, 'et ndez na'a dudzi be nahezya 'et hoh soo' tet'ilh. ³⁸'Et hoh ndan 'at tet'ilh 'et dúja t'eh, 'et hoonzoo ho' hooht'ah. 'Ink'ez ndan 'at chaif'il t'eh, 'et 'o nus whutézoo. ³⁹'Et Moses be' dustl'us ndutni, "Ndan buki hoonli, 'et buki 'awhuz khuna t'eh, 'et 'ilhuz wule lhulh uhoot'e huba' hooht'ah. 'Et buki dazsai t'eh, ndan yuka' ninzun yughu natedalh, 'et whuz na'a 'oot'e, hukwa' ninzun t'eh." 'Et whunts'ih Yak'usda buba 'alha' yint'ah, 'en zeh yughu naooda huba' hooht'ah. ⁴⁰'Et whunts'ih nts'e na'a hooht'i hoh dant'ah t'eh, whuz na'a zeh 'oot'e. 'Et whuz na'a nahuzíya. 'Ink'ez si chah Yak'usda buyégha ust'i nuszun.

8

Nuhulhutsinkah hubugha te'noohzin

¹'Aw 'et ndi ndai ts'uyi, 'i 'uk'edéltsi bugha yút'aih, 'et hubugha nohwhulh yatelhtuk. Soo t'ets'onínzun be t'eeonudzun, 'i ts'it'i, 'ink'ez ndi be t'eeonudzun, 'i 'et bulah chah 'uzdudelhúti neilh'i. 'Et whunts'ih be nek'edutsi, 'i be 'o nus Yak'usda ba ts'ilhtus neilh'i. ²Ndan ts'iyaintsuk duba t'enaonúdzun, 'en ndet t'eeonózin huba' hooht'ah, 'et 'aw t'eeonízun. ³'Et whunts'ih ndunnah Yak'usda k'entsi, 'en Yak'usda t'eeobunínzun. ⁴'Aw 'et ndi ts'uyi 'uk'edéltsi bugha yút'aih uzte'alh, 'i bugha nohwhulh yatelhtuk. 'Et ndi yun k'ut nts'e 'uk'edéltsi 'int'ah 'et whunts'ih 'ants'i unli 'et t'ets'onínzun. 'Ink'ez 'uyoo Yak'usda chailah, 'ilhunuh zeh Yak'usda unli. ⁵Lhanah 'et whuz na'a nduhútni, yak'uz ts'ih yak'usda hulai. 'Ink'ez 'alha' 'uhoont'ah ndunnah nduhutni yak'usda hulai 'ink'ez moodihti chah hulai hutni. ⁶'Et whunts'ih, nuwheni neba Yak'usda 'ilhunuh zeh unli, ne'aBá 'en 'int'ah.

'En ts'iyaintsuk buts'un hayúkat ho' hooht'ah. 'Ink'ez neMoodihti 'ilhunuh zeh unli, 'en Sizi Gri 'int'ah. 'En bugha ts'iyaintsuk 'ulya, 'ink'ez nuwhehi chah 'en bugha zeh ts'ukhuna. ⁷'Et whunts'ih 'aw ts'iyannah ndi be t'oonudzun, 'i chahit'i. 'Ink'ez k'an 'et whunts'un ndi ts'uyi, 'uk'edéltsi bugha yút'aih 'i hiya'alh hoh nyoo 'uk'edéltsi bube'ildzun huninzun 'ink'ez 'awhuz huba 'alha 'uhoont'ah. 'Et huwa 'et ndi hiya'alh 'et buyuh ts'ih bugha t'ets'oninzun* lait'ah 'i be ntsi' yulhti. ⁸'Et whunts'ih 'ants'i ts'uyi, 'aw 'i be Yak'usda nalh ts'inzoo chats'ilah. Ts'an'al t'eh, 'et sih 'aw 'o nus soo ts'inzoo ts'oole ghait'ah. 'Et 'aw chats'i'ulh t'eh, 'et sih 'aw 'o nus neba whuté'ilh le cha'ts'it'ah. ⁹Nuhwhenich'oh khahdl, doo ka ndai khunek nuht'aida'ai, 'i bugha ndunnah lahit'ah tink'us hunoot'uk. ¹⁰Soo cho whunilh'en, nyun be t'oonudzun, 'i int'i, 'ink'ez nyulhutsin chah buyuh ts'ih bugha t'ets'oninzun, 'i lait'ah t'eh, 'en 'uk'edéltsi luglez 'et higha hiya'ai, 'et sinda hoh nyunilh'en ndi ts'uyi, 'uk'edéltsi bugha yút'aih, 'i in'alh t'eh, 'et 'alha 'en chah whuz nilht'uk ndi ts'uyi, 'uk'edéltsi bugha yút'aih, 'ute'ulh ih? A, 'alha 'en chah whuz ntalht'uk yute'alh wheni. ¹¹'Et huwa nyulhutsin 'uk'edéltsi bugha beni tah dez'ai, 'i lait'ah unli, 'en 'et njan be t'oonudzun, 'i int'i, 'i be tinta' whuté'ilh, Christ yuba dazsai whunts'i. ¹²'Et nuhwulhutsinkah nuwhehi nuhgha lubeshi 'uhulh'en t'eh, buyah ts'ih bugha t'ets'oninzun, 'i chah undóhlah. 'Et whuz na'a zeh nduteht'ilh t'eh, 'et sih Christ 'en chah buch'a lubeshi itélhcholh. ¹³'Et huwa ndi ts'uyi huwa t'aih, 'i bugha sulhutsin tink'us 'ut'ih't'eh 'aw 'o 'at 'uyat wús'alh ghait'ah, si sugha sulhutsin tink'us 'óneh 'et whuch'a.

9

Paul dich'oh khunayaltuk nts'e na'a Sizi Gri ba whel'a unli

¹'Alha ih si whel'a usdli? 'Alha ih ndai Yak'usda ba 'utes'ilh, 'i ts'iyawh stl'aho'ai? 'Alha ih neMoodihti Sizi Gri nalh'en? 'Ink'ez 'alha ih ndai 'ut'en neMoodihti 'en ba 'ust'en, 'i be buba 'alha 'uhoont'ah sahli? 'Et 'alha 'uhoont'ah. ²'Et 'onghoh huba whel'a chausdlah t'eh, 'et whunts'ih 'alha nuwhehi nuhwuba whel'a usdli. 'Ink'ez nts'e na'a ts'iyannah t'ehinzin si whel'a 'ust'ah, 'et neMoodihti nuhyudinda 'et huwa suba be hódel'en k'ah ts'ih aht'ah. ³'Et ndunnah such'a detni, 'en 'et ndez na'a 'ubudutesnilh, ⁴'et 'alha ih hukwa' uzninzun totsuk 'uzte'ulh 'ink'ez 'uztetnilh? ⁵Nuwhehi zeh ih netl'achahoo'al hoh ndunnah Sizi Gri bugha neulhutsakah buts'utni, 'en hukwa' uzninzun t'eh, 'en bughu ts'ooda huba' hooht'ah? 'Et 'onghun whel'a, neMoodihti bulhutsin, 'ink'ez Cephas, 'en chah ts'iyawh bu'at hoonli. 'Et 'alha 'uhoont'ah, 'en buk'una'a 'uts'oot'e ka netl'ahó'ai. ⁶'Et si 'ink'ez Barnabas, 'aw nuwhehi zeh ih nela be uzte'ilh uzte'alh huba? 'Awundooh! ⁷'Et ndan lhudughan unli hoh ndai ye ndunidzit, 'i dich'oh yuk'elha chahoolh'ih ih? K'us ndan soo ha' nulhyeh, 'en ndai hainulhyeh, 'i yulah te'alh ih? K'us ndan musdus yughundli unli hoh buts'oo yulai tetnai ih? ⁸'Et njan nohwulhulh yalhtuk dune k'una'a ilah 'un whudusni. Moses be' dustl'us 'i k'una'a chah 'un whudusni. ⁹'Et ndutni, "Ndet musdus dune tl'o mai 'uzte'alh wheni 'uyulh'en, 'aw 'ute'alh whuch'a 'uts'oolhdzin ghait'ah," ni. ¹⁰Yak'usda musdus dune yughu ni unli k'us nuwhehi neba 'et ndi ts'iyawh utni ih? 'Et 'alha nuwhehi neba ndi 'uk'une'uzguz. 'Et ndan haniyeh k'et 'et whulh ch'ul, 'ink'ez ndan tl'o mai nalhdzooch 'en bulah buts'un natoodúkat huninzun. ¹¹'Ink'ez nuwhehi nuhtah Yak'usda bughunek nuhtah ha'nule li'ts'uja t'eh, 'et t'eh nuhwuba hooncha ih hoh nuhts'un ndai be uzunidzit, 'i bulah be neghaóhleh huba' hooht'ah? ¹²'Et 'onghun nuhghunli, 'en hoonli bughahle, di ka nuwhehi negha cha'zalah? 'Et whunts'ih ndai Yak'usda negha ooninla 'aw 'et whuz na'a nducha'ts'it'il inle. 'Et k'us ts'iyawh soo whulh ts'uzyin khunek unzoo, 'i Christ bugha doo ka tinta' ts'uholh'en 'et whuch'a. ¹³'Aw t'oonuzáhzun ndunnah Lizwif hubuluglez wuhocho tuz ts'ih 'uhut'en, 'en ndi luglez wuhocho huwa t'aih buluh oo'alh huba' hooht'ah. 'Ink'ez ndunnah Yak'usda buk'uzdai nat 'uhut'en, 'en ndi Yak'usda buk'uzdai k'ut huwa t'aih 'en chah 'et whuz na'a zeh. ¹⁴'Et whuz na'a ndunnah khunek unzoo, 'i be yalhtuk hinli, ndai hiye ndunidzit, khunek unzoo bugha, 'i bughá yunkat. 'Et whuz na'a neMoodihti nets'u hukwa' dani. ¹⁵'Et whunts'ih neMoodihti nets'u hukwa' dani, 'et 'i be whunts'ih 'aw hoonli nducha'ust'en. 'Ink'ez 'aw 'et whuz na'a ilah nuhts'o k'echa'usgus. Whunulh'en, soo hoonust'i njan nduhooht'ah, 'et howu yalhtuk teh, 'i 'ants'i hóle hukwa cha'nuzúszun. 'Et whunts'ih 'et ndudútesnilh t'eh, 'et whutsuh unducha datésah choo, 'et t'eh sich'oh 'o nus suba whutezoo. ¹⁶'Aw 'ududelhúti ilah hoh ndi khunek unzoo, 'i be nuhwulhulh yalhtuk. Ndi khunek stl'adélts'ut, 'i 'ants'i 'ustl'e' oostl'eh ghait'ah. 'Et ndi khunek unzoo, 'i be yachasulhtuk t'eh, dawhulsi' 'et whuch'a ootelhdoh! ¹⁷Ndi 'ulh'en, 'i sudzi ndulhcho 'i be 'ulh'en t'eh, 'et t'eh suba 'uk'elha whutele. 'Et whunts'ih ndi 'ulh'en wúsdleh huba' hooht'ah 'ink'ez 'et huwa 'ulh'en t'eh, 'et sih 'ants'i 'ut'en stl'alts'ut, 'i k'una'a 'ulh'en

* **8:7** Ndi khunek "Neyuh ts'ih huwa t'ets'oninzun", 'i hoonli ts'ih'un na'a k'us tink'us 'uhoont'ah, 'i gha t'ets'oninzun, ts'utni ho' ts'utni.

hukw'u na'a 'uwwhutet'ilh. ¹⁸ 'Et daja nuhzun? Di zeh suba k'elha tele? Nuhwhudutésnilh. Nts'oh tula ndi khunek unzoo, 'i Christ bugha, 'i be nuwhulh yatelhtuk, 'aw 'uk'elha ilah be nuwhulh yatelhtuk. Whel'a 'ust'ah 'et huwa st'l'awhéts'ut hoh ndi 'ut'en 'ulh'en, 'i ka nuhwheni suba k'elha hoolhtsilh huba' hoon't'ah. 'Et whunts'ih 'aw nducha'ust'ah. 'Aw 'et sughunek ulhchoot t'eh, 'aw 'et 'i zeh suba k'elha whuzdli ho' 'uhoont'ah.

Ts'iyana ba 'ulhna na'duzulhúsi, ni Paul

¹⁹ 'Et 'aw 'ulhna chadlah 'et whunts'ih ts'iyana ba 'ulhna na'duzulhúsi, 'et sih 'o nus 'ahuneltsuk huboolhyih. ²⁰ Lizwif bulh 'ust'ah t'eh, 'et Lizwif k'una'a na'duzulhúsi, 'et tulih Lizwif 'o nus lhanah huboolhyih. 'Ink'ez ndai Moses be' dustl'us yuk'une' 'uhut'en, 'en buk'una'a 'ust'ah na'duzulhúsi, 'et tulih ndunnah 'o nus lhanah huboolhyih. ²¹ 'Et ndunnah Moses be' dustl'us be'et 'uhint'ah, 'en buk'una'a 'ust'ah na'duzulhúsi. 'Et tulih ndunnah Moses be' dustl'us be'et 'int'ah, 'en chah huboolhyih. 'Et whunts'ih ndet Yak'usda neba lhuhezya 'et 'aw whu'et cha'duzusni, et Christ ndet neba 'utni hukw'u na'a 'ust'ah 'et huwa. ²² 'Ink'ez ndan lahit'ah 'en chah hubuk'una'a si chah last'ah na'duzulhúsi, 'et huwa tulih huboolhyih. 'I be whuch'a whunoolhyeh. 'Et huwa njan 'et ndust'en, niz de haoodanzut ndai 'ulh'en, 'i 'et bulunah tulih huboolhyih. ²³ 'Et huwa ndi khunek unzoo, 'i bugha 'ust'en. 'Et t'eh ndai unzoo, 'i negha ínlna, 'i 'lna ts'óolhchoot.

Whuch'a telhdoh hukwa' nuszun, ni Paul

²⁴ 'Aw nt'eoonuzáhzun ndan lhghu natulwus hubutah, 'en 'ilhunuh zeh whuch'a 'alhdoh. Nuhwheni chah 'et whuz na'a whuch'a nilhde k'una'a 'utehnilh. ²⁵ Ndan soo hoolhdzih dich'oh khudli. 'Et lhghu nahutelwus, ndi whuch'a itelhdoh, 'i 'untsi' tele. 'Et whunts'ih nuwheni be whuch'a ts'otelhdoh, 'aw 'untsi' wule ghait'ah. ²⁶ 'Et huwa si chah whuz na'a ndoh 'ulhúgih. 'Ants'i hoh nduhoolcho nulhúgaih ilah hoh 'ust'en. 'Ink'ez ndai be 'ukatatsnih 'aw 'ants'i hoh nudulhúchus ilah ho' 'ust'en. ²⁷ Sich'oh suyust'e be suyah 'et hoh suk'une' tet'en. 'Et 'aw ndez na'a nduchasust'en t'eh, lhenyoo khunek unzoo, 'i be hubulh yalhtuk whunts'i, sich'oh suba dah nahóde.

10

Netsuhda, 'en bugha whuts'odul'eh

¹ 'Aw 'et sulhutsinkah njan netsuhda, 'en hubunats'odoolnah hukwa cha'ts'unízun. Soo kw'us yuh ts'ih 'uhint'ah, yatoo tah lhuhúzdel. ² 'Et netsuhda kw'us 'ink'ez yatoo 'i bulh ts'iyawh Moses ts'un too be' ylna. ³ Ts'iyawh ndai ts'uyi, yak'uz hainkat, 'i ndunnah ts'iyawh hiya'al. ⁴ 'Ink'ez ts'iyawh ndai huyetnai yak'uz ts'ih hahiyana, 'i 'ilho hiyetnai. Ndi yak'uz whutse 'i buwhusainelts'ut, 'et huwa 'i butsu'v hayejal, 'i ts'iyawh 'ilho hiyetnai. 'Ink'ez ndi tse 'i Christ unli 'int'ah. ⁵ 'Et whunts'ih k'us lhanah Yak'usda ba 'aw chahízoo. 'Et huwa dune chahoot'ih ts'ih hubuyust'e ndulhcho hoh nudelhúti suli. ⁶ 'Et ndi ts'iyawh bugha t'ets'oninzun, 'i neba suli hukw'u na'a 'uhooja. 'Et huwa 'aw 'en hubuk'una'a lubeshi uztelh'ilh hukwa 'uznoozin ghait'ah. ⁷ 'Ink'ez bulunah, 'en hubuk'una'a 'uk'edéltsi nuhwhuba 'alha 'oot'e gunih. 'Et whuz na'a 'uk'une'úsduguz hoh ndutni, "Dune húdelhts'i, na'het'al 'ink'ez 'uhetnai cha 'uhuja. 'Aw 'et di hudindel 'ink'ez dega nus hoontsi' k'una'a nohowhulhúya." ⁸ 'En hubuk'una'a ts'ekoo bulh lubeshi wulhchoot gunih! Bulunah 'et whuz na'a lubeshi 'uhinla. 'Et huwa 'ilhudzín 23,000 'et 'uneltsuk yahadla. ⁹ 'En hubuk'una'a Christ ts'oolhdzih li'ts'oot'en gunih. Bulunah hiyóolhdzai 'et huwa tl'ughus be hedughan. ¹⁰ 'Ink'ez 'en hubuk'una'a yuh yaooltuk gunih! Bulunah 'et whuz na'a nduhuja, 'et huwa ndan hoolah 'ulhtsih ndunnah hiyahultuk, 'en ts'iyawh hoolah hubulhtsi. ¹¹ 'Et ndi 'i ts'iyawh huba 'et 'uhooja 'i ts'iyawh bughá t'ets'onozin ka ndúhooja, 'ink'ez neba 'uk'e'anguz hoh neundulhni. Nuwheni 'uts'int'ah nts'e na'a ndi yun k'ut 'uzdelhts'i hukw'u na'a, nuwheni neba 'aw 'et whula tah suli. ¹² 'Et huwa ndan soo siyin unli na'dunúdzun, 'en soo cho howole naoolts'it 'et whuch'a. ¹³ 'Et ndet hoh netsudule dune 'ubóolhdzih, whuz na'a zeh nuhwheni chah nehóolhdzih. 'Et whunts'ih Yak'usda 'aw nela dootnih ghait'ah. Ndet hoh netsudule neóolhdzih, 'et dáwhultus hoh Yak'usda nuhtl'ahó'ai hoh whulh sáhyin. 'Ink'ez nuhóolhdzih t'eh, 'et sih whuch'a natehdulh, whuz na'a Yak'usda nuhba 'uwwhutet'ilh, 'ink'ez soo whulh téhyin.

Uk'edéltsi ts'un teni' noolhdzín gunih

¹⁴ 'Et huwa nuhwhuk'esi, ndi 'uk'edéltsi nuhwhuba 'alha 'int'ah, 'i buch'a ne'ooht'en huba' hoon't'ah. ¹⁵ Whunih k'una'a ahli 'et huwa ndez na'a nuhwhulh yalhtuk. 'Et huwa njan hubugha nuhwhulh yalhtuk nuhwheni'ch'oh soo cho ts'ah'un níoonah'aih. ¹⁶ 'Et ndi lubot 'i be chanailya ts'utni, 'et 'alha Christ buzkai bulh 'úts'int'ah nuhúzín ih? A! 'Ink'ez ndi lhes lhts'ezdalhuk, 'et 'alha Christ buyust'e bulh 'uts'int'ah nuhzun ih? A! ¹⁷ 'Et huwa dazneltsuk ts'inli whunts'ih, ndi lhes 'ilho zeh 'uts'int'ah 'ink'ez ndi yust'e 'ilho zeh

unli. Ndi lhes 'ilho nuwheni ts'iyawh bulh 'uts'int'ah 'et huwa. ¹⁸ Israel budune k'ah ts'ih t'eoonúhzun ih? Whunulh'en, ndan Yak'usda buk'uzdai bugha t'aih hiya'al, 'en ndi Yak'usda buk'uzdai bulh 'úhint'ah. ¹⁹ Njan ndez na'a whunwhunulhtun, 'uk'edéltsi hoonli 'int'ah ih? K'us 'uk'edéltsi bugha t'aih, 'i chah ih hoonli unli? 'Awundooh! ²⁰ 'Et 'udun yun k'ut whut'en ndai 'uk'edéltsi bugha hiya'aih, 'i ntsi' nududeh, 'en butsu hitoolhdelh, 'aw Yak'usda ts'un ilah. 'Ink'ez nuwheni ntsi' nududeh bulh 'uteht'ilh nuwhubha hukwa cha'nuzúszun 'et huwa. ²¹ NeMoodihti bulubot 'ink'ez ntsi' nududeh bulubot bulh 'aw lhtahts'ootnai huba cha'hóot'ah. 'Et neMoodihti buk'uzdai 'ink'ez ntsi' nududeh buk'uzdai chah 'aw 'anelht'et buk'ut 'uts'oo'alh huba cha'hóot'ah. 'Aw whuz na'a 'uhóneh ghaít'ah! ²² 'Et neMoodihti 'ootelnih uztelhtsilh ih? 'Aw 'et nduts'óot'en huba cha'hóot'ah. 'En buch'a 'o nus 'uts'iltus nahzun ih? 'Awundooh!

Nts'e na'a Yak'usda délhti, 'et whuz na'a dune wahle huba' hoont'ah

²³ 'Et 'aw hoonliyaz whuch'a nelhjoot hoolah, 'et whunts'ih whulutah suba chahóozo. Hoonliyaz whuch'a noosjoot hoolah, 'et whunts'ih whulutah ndutest'ilh t'eh, 'aw dune la' whudóneh ghaít'ah. ²⁴ 'Et huwa ndet nuwheni zeh neba unzoo, 'i ka' ts'oot'en ghaít'ah. 'Uyoon ba unzoo, 'i zeh ka' ts'oot'en. ²⁵ 'Et ndai 'ilhunahuwúdlh hiye 'óoket, 'i ts'iyawh ah'alh ho' 'int'ah. 'Ink'ez nuhyuh ts'ih bugha t'ets'oninzun, 'i whunts'i, buka' oodolhkut gunih. ²⁶ Ndi yun k'ut 'ink'ez ndai hoonli, 'i ts'iyawh neMoodihti 'en bube'ildzun 'et huwa. ²⁷ 'Et huba 'alha cha'hoont'ah, 'en ndet nuhghu nuhúzya 'ink'ez whuz tanyalh t'eh, ndai nuhbuh nihiniinla, 'i ooh'alh 'ink'ez nuhyuh ts'ih bugha t'ets'oninzun, 'i whunts'i buka' oodolhkut gunih. ²⁸ 'Et whunts'ih dune njan ndun whudutenilh, "Ndi 'uk'edéltsi bugha it'aih, 'int'ah." 'et t'eh 'aw cha'zoo'h'al. Ndun nuhwhudutenilh 'ink'ez buyuh ts'ih bugha t'ets'oninzun, 'i 'et huwa 'et 'aw cha'zoo'h'al. 'Et whunts'ih ndi yun k'ut 'ink'ez ndai hoonli, 'i ts'iyawh neMoodihti 'en bube'ildzun 'int'ah. ²⁹ Ndi neyuh ts'ih bugha t'ets'oninzun, 'i bughu yalhtuk, 'aw nuhwheni nuhyuh ts'ih bugha t'ets'oninzun, 'i 'et ilah howu yalhtuk. Ndun buyuh ts'ih bugha t'ets'oninzun, 'i yughi yalhtuk ho' dusni. 'Et di ka 'uyoon buyuh ts'ih bugha t'ets'oninzun, 'i be 'aw hoonli hoh whuch'a nelhjoot, nts'e na'a 'uyoon beni taoodez'ai 'i suba nahuteyelh? ³⁰ 'Et ts'uyi ka chanailya dusni hoh us'alh, 'et whunts'ih sughu yahalhtuk. 'Et di ka sughu yahalhtuk chanailya dusni 'et whunts'ih? ³¹ 'Et huwa ndet ah'alh, 'ink'ez ahtnai totsuk, k'us nts'oh daht'en chah, 'et ts'iyawh 'i be 'et nts'e na'a Yak'usda whé delhti, 'et whuz na'a zeh dune wahle huba' hoont'ah. ³² 'Et huwa Lizwif, 'ink'ez 'udun yun k'ut whut'en, 'ink'ez Yak'usda ba 'ilhunahuwúdlh, 'en chah, ndan hinli whunts'i, 'et 'aw hoonliyaz huba dzuh 'oohneh gunih. ³³ Si chah whuz na'a 'et ts'iyanaah ts'un wuszoo hukwa 'ust'en. Sich'oh hootést'i hukwa cha'zust'en. K'us ndet ts'iyanaah ba hoonzoo túne' 'ust'en, 'et huwa 'en sih hudoojih.

11

¹ Nts'e na'a Christ k'una'a 'ust'ah, 'et nuhwheni chah si sk'una'a 'ooht'e.

Netsi gha'wezniik 'i hoh tenazududli hubugha

² 'Aw 'et sulhutsinkah njan dudusni soo 'aht'en. Ts'iyaintsuk bugha sunalhúnih, 'ink'ez whunohodalh'ih, 'i ts'iyawh hoohtun. ³ 'Et njan t'eoonóhzin hukwa' nuszun, Christ 'en zeh dune ts'iyawh gha ndoh 'int'ah. Dune, 'en zeh ts'ekoo gha ndoh 'úhint'ah. 'Ink'ez Yak'usda 'en zeh Christ yugha ndoh 'int'ah. ⁴ K'us ndan dune butsi gha'wezniik hoh tenadudli k'us nus whunóolh'en t'eh, 'et t'eh ndun dune yugha ndoh 'int'ah, 'en hooya yutelhtsilh. ⁵ K'us ndan ts'eké butsi ghacha'winik hoh tenadudli k'us nus whunilh'en t'eh, 'et t'eh ndun ts'eké yugha ndoh 'int'ah, 'en hooya yutelhtsilh. 'Ants'i butsi gha hoolah li'tet'ilh 'et huwa. ⁶ 'Aw butsi gha'wezniik hukwa cha'nizun t'eh, 'et t'eh butsi dulhcho nahinoozo. 'Et whunts'ih hukwaya unli butsi gha dune k'una'a hananedut'az, k'us nanedzo t'eh, 'et t'eh butsi gha'woonik huba' hoont'ah. ⁷ 'Et 'alha dune, 'en Yak'usda k'una'a dant'ah 'int'ah, whuz k'una'a 'uhint'ah, 'ink'ez ye dézti, 'i k'una'a 'uhint'ah. 'Et huwa butsi ghacha'winik huba cha'hóot'ah. 'Et ts'ekoo 'en dune hiye dezti 'uhint'ah. ⁸ Dune, 'en 'aw ts'eké ts'un hachaizulh, 'ink'ez ts'eké 'en dune ts'un hainzú 'et huwa. ⁹ 'Ink'ez Yak'usda dune 'aw ts'eké ba cha'yidil, 'ink'ez ts'eké 'en dune ba 'uyinla. ¹⁰ 'Et huwa ndunnah Lizas, 'en bula sih ts'ih ndet ts'ekoo hubugha óoni'ai, 'i butsi gha'woonik huba' hoont'ah. ¹¹ 'Ink'ez neMoodihti bube'ildzun 'uts'int'ah. 'Et huwa dune, 'en ts'ekoo hubu'et 'uhoot'e ghaít'ah, 'ink'ez ts'ekoo 'en dune hubu'et 'uhoot'e ghaít'ah. ¹² 'Et ts'eké dune ts'un hainzú 'ink'ez dune ts'eké bugha whuzdli, 'ink'ez ts'iyawh Yak'usda ts'un hainde, ho' 'uhoont'ah. ¹³ Nuhwhenich'oh ts'ah'un na'a hoh duba nahutehdeh. K'us ndan ts'ekoo 'en tenahududli 'ink'ez 'aw dutsi gha cha'winik t'eh, 'et nuhwhuba ts'ah'un 'uhoont'ah ih? 'Et nuhwhuba dahoont'ah? ¹⁴ Njan ndet zeh whuts'odul'eh ndi yun k'ut? Soo cho whunulh'en, dune butsi gha dinyez t'eh, 'et buba hukwaya hoonli ho' hoont'ah. ¹⁵ 'Et whunts'ih ts'eké butsi gha dinyez t'eh, 'en ba hoonzoo,

'et butsigah dinyez, 'et bughá whunt'ai butsi gha'weznik li'oot'e ka. ¹⁶ K'us ndan njan lhenah 'uhudutenilh hukwa' huninzun t'eh, 'et ndez na'a zeh njan dudusni, 'et ndez na'a zeh neba' hoont'ah ho' hoont'ah. Nuwheni chah 'ink'ez yun k'ut dune ts'iyawh ndunnah Yak'usda hunedulh 'ilhunawuwudulh totsuk.

NeMoodihti hulgha na'ut'alh huba

¹⁷ 'Aw 'et ndi be nahodulh'eh, ulhtus hoh be nohwulh yalhtuk. Ts'iyawh 'ilhunawuzédel t'eh, 'aw soo 'áht'en chaduzusnih. 'Et k'us 'ats'un na'a aht'en nuhwuhúsní. ¹⁸ 'Udechoo khunek dusts'o, 'i ndet Yak'usda ba 'ilhunawáhdulh totsuk, ndet 'ilhunawuzédel t'eh, 'et whunts'ih bulunah nuhtah lhenah 'udahni, 'et whull 'údusts'o. 'Ink'ez suba 'alha 'uhoont'ah. ¹⁹ 'Et nuhtah lhelhts'un hudédowh hinli, 'et whuz na'a ndótenilh. 'Et ndunah nuhtah Yak'usda ba hinzoo, 'en ts'iyanaht'ebuntezeh ho' hoont'ah. ²⁰ 'Et huwa ndet 'ilhunawuzédel hoh 'et hulgha neMoodihti na'ut'alh huba, 'aw 'et huba ilah whusahdel. ²¹ Lhe'ahja nuhwhenich'oh ahli hoh 'onghoh hubutsuh da ts'uyi ah'al. 'Et huwa bulunah buye'élts'ul 'ink'ez bulunah tahanésnai. ²² 'Aw koo chawhaht'i 'uteh'alh k'us tatehtenilh whuba hoh aht'en? K'us ndi Yak'usda ba 'ilhunawuzehdel t'eh 'ants'i nuhwuhba hoonli ih? 'Ink'ez ndan hoonliyaz chait'ih be yooya ubutelhtsilh. Daja chah nuhwuhudoosni? Soo 'aht'en nuhwuhudoosni ih? 'Awundooh! 'Aw soo 'aht'en nuhwuhudoosni ghait'ah!

NeMoodihti whusanatedalh whuts'un, ndi lhes ts'oo'alh 'ink'ez ndi lubot be ts'ootnai, 'et whuz na'a neba dazsai bunaztelnih

²³ 'Et neMoodihti khunek st'l'aida'ai 'ink'ez 'i 'int'ah nuhtl'ada'ai 'et ndutni, neMoodihti Sizi Gri 'ulh'ek da ndet da butl'a ihitelhtel whutsuh, 'et lhes yilhchoot. ²⁴ 'Udechoo chanailya ni 'ink'ez lhts'eyalhtuk. 'Et ndó bulhni, "Ndi lhes ulhchoot 'ink'ez ah'alh. Ndi suyust'e 'int'ah. 'I nuhwheni nuhwuhba lhts'edahlkuk. 'Et ndulh'en hoh sunaoolhunih." ²⁵ 'Ink'ez ndi lubot 'et whuz na'a zeh 'uja. 'Uha'al hukw'elh'az ndó budani, "Ndi lubot 'i k'andit khunek nuhwuhba lhadúsdlá, 'i 'int'ah. Suzkai be nuhwuhba usdla. 'Et ahnai totsuk, 'et ndaht'en hoh sunaoolhúnih." ²⁶ 'Et huwa ndi lhes teh'alh 'ink'ez ndi lubot tehnilh t'eh, 'et 'ahoolhyez 'et ndutelh'ilh totsuk, neMoodihti whusanatedalh whuts'un, 'et ndólh'en. 'Et 'i be neba dazsai whebuznoolhtun.

Sizi neba dazsai bunaztelnih whutsuh, na'uzdunool'en, 'awhuz tulih lubeshi bulh 'uts'int'ah

²⁷ 'Et huwa k'us ndan ndi lhes yute'alh 'ink'ez neMoodihti bulubot yutetnelh hoh hiba soo cha'hildzoo hoh hiyilhchoot t'eh, 'en nduja t'eh, neMoodihti buyust'e 'ink'ez buzkai bulh 'i bugha lubeshi yilhchoot. ²⁸ 'Et dune dich'oh na'dunul'en 'et hukw'elh'az ndi lhes hiyoo'alh 'ink'ez ndi lubot hiyootnai. ²⁹ 'Et ndan soo cha'hildzoo hoh ndi yu'alh 'ink'ez yutnai t'eh, 'et Yak'usda yuba nahuteyeh, 'et dich'oh kha'náwhunt'ai. Dich'oh 'aw ts'ah'un na'a hoh neMoodihti buyust'e 'i bugha t'ewhunúsuzun 'et huwa. ³⁰ 'Et huwa lhanah nuhtah laihít'ah sulí, bulunah hunduda chah sulí, 'ink'ez lhanah 'ilhuz nahunestez.* ³¹ 'Et huwa t'ena'ts'udunudzun hoh nuwhenich'oh na'ts'udunul'en t'eh, 'et sih neMoodihti 'aw neba nahooyeh ghait'ah. ³² 'Ink'ez neMoodihti neba naheyeh t'eh, 'et neoohltsas. 'Et hoh 'aw ndi yun k'ut whudune bulh neba nahoodé ghait'ah. ³³ 'Et huwa sulhutsinkah, nket'ah 'uteh'alh huba 'ilhunawuzédel t'eh, lhba lhu'i. ³⁴ Ndunnah buye'élts'ul, koo ts'ih hubéhl'ah. 'Et hoh nket'ah 'ilhunawuzédel t'eh, 'aw nuhwuhba nahoodé ghait'ah. 'Ink'ez 'udun chah whenhodutelh'eh, ndet nuhghu niya t'eh, 'et ts'iyawh ts'ah'un na'a nuhwuhba neotes'alh.

12

Lhelhyoo Yak'usda be ts'odóhlti neghá whunkat, 'et whunts'ih 'ilhunuh zeh Ndoni 'en zeh ts'iyawh negha yúnle

¹ 'Aw 'et sulhutsinkah dant'i Ndoni negha yú'aih, 'i neghalts'uk, 'i bugha 'et chah t'eóonóhzin nuhwuhba hukwa' nusuzun. ² T'eóonóhzun nuhwheni 'udun yun k'ut whut'en hoh da 'aw nuhwuhba 'alha 'uhoont'ah cháhlah inle. 'Et huwa ndi 'uk'edéltis yacháhtuk, 'i buk'úne' aht'en inle. ³ 'Et huwa nuhwheni taóodutelts'ulh hukwa' nusuzun. Soo cho whunulh'en, 'aw 'ilhunuh dune Yak'usda buyégha bugha, 'Sizi Gri 'en untsi", dooni ghait'ah. 'Ink'ez 'aw 'ilhunuh dune ndutni t'eh, 'Sizi Gri 'en neMoodihti 'int'ah, Ndoni 'en bugha zeh ndudutenilh ho' hoont'ah. ⁴ 'Aw 'et lhelhyoo neghá nkat, 'et whunts'ih 'ilhunuh zeh Ndoni 'en ts'iyawh negha yúnle. ⁵ 'Ink'ez lhat lhelhts'un Yak'usda huba ne'ts'ut'en, 'et whunts'i 'ilhunuh neMoodihti zeh 'int'ah. ⁶ Lhat hoh Yak'usda ba' ts'oot'en huba' hoont'ah 'et whunts'i 'ilhunuh Yak'usda unli hoh ts'iyawh ye 'út'en lhaídulh'ih. ⁷ 'Et 'ilhunuh ts'inli hoh Ndoni be wheóodiltsih ho' hoont'ah nuwheni ts'iyawh neba hoonzoo tele 'et huwa.

* 11:30 Ndi khunek nahunestez ni, 'et yahadlah ni ho' utni.

⁸ 'Et 'ilhunuh dune, 'en Ndoni bugha khunek be ts'uwhunih, 'i yugha iní'ai. 'Et 'uyoon dune, 'en chah, Ndoni, 'en zeh, khunek be t'oonudzun, 'i yugha iní'ai. ⁹ 'Et 'uyoon chah Ndoni, 'en zeh, be 'alha 'uhoont'ah yugha inínla 'ink'ez 'uyoon, 'en Ndoni, 'en zeh, ndi ye úlhtus, 'i dune soo na'bulh'en, 'et yugha ooní'ai. ¹⁰ 'Et 'uyoon 'en ndi huwa 'ét'en tuné' tet'en 'et yutl'ahó'ai. 'Et 'uyoon buba nus whunilh'en, 'et yugha óoni'ai. 'Et 'uyoon 'et nahooté'ah nts'e na'a buyégha lhelhts'un na'a 'int'ah, 'et yugha óoni'ai. 'Et 'uyoon lhelhts'un na'a yahútelhtuk yutl'ahó'ai. 'Et 'uyoon chah lhelhts'un na'a yahulhtuk, 'et t'ewhüntézin 'et yutl'ahó'ai. ¹¹ 'Ink'ez ndi ndunt'i, 'i ts'iyawh 'i Ndoni zeh nts'e na'a hukwa' ninzun k'una'a, 'et whuz na'a huba lhk'ehónla. 'Ink'ez k'an 'et ndet hubutaóonínla, 'i Ndoni dich'oh 'en be zeh 'uwhut'en.

Christ buyust'e lhawh 'ulya, 'et whunts'ih buyust'e 'ilhunuh zeh 'int'ah

¹² Ndez na'a njan dúhoont'ah, dune yust'e 'ilho zeh unli. Neyust'e lhat lhelhts'un na'a neoodinla wheni ho' 'int'ah, 'et whunts'ih 'ilho zeh unli. Christ, 'en chah 'et whuz na'a ndunt'ah. ¹³ 'Ink'ez 'ilho Ndoni 'en bugha nuwheni ts'iyawh too be' ts'ulya hoh 'ilho yust'e ts'uzdli. 'Et Lizwif ts'inli, k'us 'udun yun k'ut whut'en ts'inli, k'us 'ulhna ts'inli, k'us 'ulhna whuch'a hubula nadutetnih ts'inli, nts'oh dats'int'ah ts'inli whunts'i, 'ilho Ndoni 'en ts'un 'ilho ts'etnai nesulhtsi. ¹⁴ Nulh'en neyust'e 'ilho zeh unli, 'et whunts'ih lhat neoodinla ho' 'int'ah. ¹⁵ 'Et dune ke 'i utni, "Aw 'ula chasdlah, 'et huwa yust'e bube'ildzun cha'ust'ah." 'Et whuz na'a yalhtuk t'eh, 'et ndi yust'e bube'ildzun chailah ih? 'Awundooh! ¹⁶ 'Ink'ez dune dzo 'i utni, "Aw 'una chasdlah, 'et huwa yust'e bube'ildzun cha'ust'ah." 'Et whuz na'a yalhtuk t'eh, 'et ndi yust'e bube'ildzun chailah ih? 'Awundooh! ¹⁷ 'Et dune yust'e ts'iyawh 'una unli t'eh, 'et t'eh nts'e na'a simba hoonliyaz whudóots'o? K'us yust'e ts'iyawh 'udzo unli t'eh, 'et t'eh nts'e na'a simba hoonliyaz whuza hólhtsun? 'Aw 'uhót'e ghait'ah! ¹⁸ 'Et huwa Yak'usda neyust'e lhat neoodinla yulhtsi, 'et whuz na'a hukwa' ninzun 'et huwa 'et ndúyinla. ¹⁹ Nts'e na'a simba 'ilho zeh wule? 'Et 'úja t'eh, 'et nts'e na'a simba yust'e wule? 'Aw 'uhót'e ghait'ah! ²⁰ 'Et hoh yust'e lhat neoodinla unli 'et whunts'ih 'ilho zeh unli. ²¹ 'Ink'ez 'una, 'ula, "Aw nka' nooszin ghait'ah," dooní ghait'ah. 'Ink'ez chah 'utsi, 'uke, "Aw nka' nooszin ghait'ah," dooní ghait'ah. ²² 'Et k'us ndi yust'e whulutah tube lait'ah unli uzninzun, 'et whunts'ih 'i be'et 'aw 'uts'oot'e ghait'ah. ²³ 'Ink'ez ndi yust'e bulah ndai 'aw chaditi uzninzun, 'i 'int'ah 'o nus unzoo 'ink'ez sóo ne'ts'oolh'en huba' hooont'ah. 'Ink'ez ndi yust'e whulutah ndet 'aw dune nalhts' et huba cha'hóozooh, 'i 'int'ah degha nus sóo ne'oolh'en huba' hooont'ah. ²⁴ Ndet buyust'e soo 'oonet'en t'eh, 'aw 'et soo 'int'ah. 'Et whunts'ih Yak'usda ts'iyawh lhkanaídanla. 'Et huwa ndai buyust'e bulah hubutah hoolah, 'i ba 'o nus buba idézti k'una'a 'uyinla. ²⁵ 'Et ndez na'a buyust'e 'aw lhk'eookat ghait'ah. 'Et whunts'ih ndai buyust'e bulah ts'iyawh lhgha hudli. ²⁶ 'Et buyust'e bulah 'ilho whunts'ih dzuh nuzut t'eh, ts'iyawh dzuh nuhudeh. 'Et 'ilho buyust'e bulah hidélhti t'eh, ts'iyawh lhba huóont'i. ²⁷ 'Et whuz na'a zeh nuwheni chah Christ buyust'e 'aht'ah. 'Ilhunah ahli hoh 'i buyust'e bulah 'aht'ah. ²⁸ 'Et huwa 'ilhunahuwúdlh hubutah, Yak'usda dich'oh 'utahábanla hoh whé'l'a, 'en 'udechoo nébuninla. 'Et nus whunilh'en, 'en whulh nat nébuninla. 'Et dune hoodulh'eh whulh tat nébuninla. 'Et 'o 'at huwa 'ét'en túne' 'ut'en nébuninla. 'Et 'o 'at hubutl'a hó'ai hoh dune soo na'bulh'en, 'en nébuninla. 'Et 'o 'at 'uyoon la'ut'en nébuninla. 'Et 'o 'at dune moodih nébuninla, 'ink'ez bulunah lhelh ts'un na'a yahulhtuk nébuninla. ²⁹ 'Et nuwheni ts'iyawh ih whé'l'a ts'inli? Nuwheni ts'iyawh ih nus whunilh'en ts'inli? 'Et nuwheni ts'iyawh ih dune hoodulh'eh ts'inli? Nuwheni ts'iyawh ih huwa 'ét'en túne' uztet'it? ³⁰ 'Et nuwheni ts'iyawh ih netl'awhéts'ut dune soo ná'ts'ulh'en? Nuwheni ts'iyawh ih lhelh ts'un na'a yats'utelhtuk? Nuwheni ts'iyawh ih lhelh yoo khunek t'ets'unuzih netl'awhéts'ut? 'Awundooh! ³¹ 'Et ndi degha nus unzoo, 'i neghant'ai, 'i soo cho hukwa' nuhzun, 'et whunts'i 'o nus hoonzoo, 'et whewhuntehtun.

13

Be nék'ets'intsi, 'i degha nus dézti ho' hooont'ah

¹ 'Et dune bughunek hiye yalhtuk, 'i 'ink'ez lizas hiye yalhtuk, 'i chah, 'et whuz na'a ts'iyawh be yalhtuk, 'et whunts'ih be nék'ets'intsi' chást'ih t'eh, 'et t'eh lhendunuts'o cho 'ink'ez lhendunuts'oyaz 'ants'i 'ilho lhendunuts'o li'dutesnilh. ² 'Et dune huba nus whunilh'en t'eh, 'ink'ez huba whé' hooont'ah hooyah ts'iyawh t'eeónúszun t'eh, 'ink'ez khunek be t'eeónudzun, 'i 'et chah t'eeóniszun t'eh, 'ink'ez ts'iyawh be 'alha 'uhoont'ah 'ust'i t'eh hoh dzulh whunts'i 'udun nités'alh t'eh, whuz na'a 'et ndust'ah hoh be nék'ets'intsi', 'i chást'ih t'eh, 'et t'eh 'aw hoonli chaslah. ³ Ndaí buk'e dune ts'inli ts'iyawh howa níl'a t'eh, 'ink'ez suyust'e chah duték'un whuba nech'ahudetni hubutl'a yálhti t'eh, 'ink'ez be nék'ets'intsi', 'i bu'et 'ust'ah t'eh, 'et t'eh 'aw suba k'elha hole ghait'ah. ⁴ Ndi be nék'ets'intsi', 'i bugha hoonli tacha'dinik. 'I bugha nedzi unzoo hukw'u na'a 'uts'int'ah. 'I bugha 'aw howu

cha'ts'oolhúni, 'ink'ez 'aw dune 'uzdudil'i howu yachats'ulhtuk chah, 'ink'ez 'aw ts'incha nacha'uzdudil'i. ⁵Ndi be nék'ets'intsi', 'i bugha 'aw 'uyoon hoontsi' k'una'a hubulh 'úts'oot'e ghaít'ah. 'Aw nuwchenich'oh hukwa' 'uts'uninzun tuné'ts'oot'en ghaít'ah. 'I bugha 'aw khun ts'uhunóolch'e ghaít'ah 'ink'ez 'aw hoontsi' hubugha nuní uznóozut ghaít'ah. ⁶'I bugha ndai 'aw ts'ah'un na' cha'ít'ah t'eh, 'aw ts'uhót'i ghaít'ah. 'Et whunts'ih ndai khunek 'alha 'int'ah, 'i be ts'uhóont'i. ⁷Ndi be nék'ets'intsi', 'i bugha 'aw 'ustl'e 'uts'ooneh ghaít'ah. Ts'iyaintsuk neba 'alha 'uhoont'ah. Nts'oh dáhoont'ah hoh hukwa ts'ih ts'úhooli, 'ink'ez 'et ts'iyaintsuk whechats'ítsaz. ⁸Ndi be nék'ets'intsi', 'i 'aw bulatah hoolah. 'Et whunts'ih ndi be nus t'oonudzun, 'i 'et 'ustl'e 'uwhuténih. 'Et lhelhts'un na'a yatuk, 'et chah hoolah whutele. 'Ink'ez ndi be t'eóonudzun, 'i chah 'ustl'e 'udutenilh. ⁹K'an 'et ndi be t'eóonudzun, 'i bulah zeh ts'it'i 'ink'ez ndi be nus t'oonudzun, 'i chah bulah zeh ts'it'i 'et huwa. ¹⁰'Et whunts'ih ndet whulatah suli, 'et whusawhélt's'ut t'eh, 'et ndet bulah zeh unli, 'i ts'iyawh 'ustl'e 'uwhuténih. ¹¹'Et 'uski usdli da, 'et 'uski k'una'a yalhtuk, 'uski k'una'a nuní nuszu, 'ink'ez 'uski k'una'a lhtahawúsdle. 'Aw 'et dune sidúdl'i, 'et ndai be 'uski k'úne' zust'en, ts'iyawh 'udun nioónila. ¹²Soo cho whunulh'en, ndai be ná'uzdunul'en, 'i be 'aw soo nacha'ts'udunil'en. 'Et ndet whusawhélt's'ut t'eh, 'et soo ts'ah'un nts'e na'a ts'unul'en, 'et whuz na'a zeh ts'uwhe'en suli. K'an 'et bulah zeh t'eóonúszun, 'et whunts'ih ndet whusawhélt's'ut t'eh, 'et t'eh nts'e na'a Yak'usda t'esunínzun, 'et si chah whuz na'a ts'iyaintsuk t'ewhuntszeh. ¹³'Aw 'et ndi tawh dedowh, be 'alha 'uhoont'ah, be hukwa' tsi hóodli, 'ink'ez be nék'ets'intsi', 'i 'et njan whuzdla. 'Ink'ez degha nus dézti, 'i bé lhk'ets'udutsi', 'i 'int'ah.

14

Bé nus whét'en, 'i degha nus buka' noohzin huba' hoont'ah

¹'Aw 'et ndi be nék'ets'intsi', 'i zeh soo cho ts'un naht'uk. 'Ink'ez ndai Ndoni negha ínina, 'i soo cho buka' noohzin. 'Et ndi be nus whét'en, 'i degha nus buka' noohzin huba' hoont'ah. ²'Et ndan lhelhyoo khunek be yalulhtuk, 'en Yak'usda ts'un yalhtuk, 'aw dune ts'un yalhtuk ilah hoh 'utni, daja ni 'aw dune t'ehonúnun 'et huwa. 'Ants'i huba whe' hoont'ah hooyah, buyégha bugha yalhtuk 'et huwa. ³'Et whunts'ih ndan nus whúnih'en, 'en dune ts'un yalhtuk. 'Et 'o nus Yak'usda ba hilhtus wule, hubudziyuh hoolhtus 'ulheh, 'ink'ez hubudzi nduk óot'e ka. ⁴'Et lhelhts'un na'a khunek be yalhtuk, dich'oh 'o nus Yak'usda ba ulhtus na'dudulhtsi. 'Et whunts'ih ndan nus whunilh'en, 'en ndunnah 'ilhunahuwúdulh 'o nus Yak'usda ba hilhtus wule hubulhtsi. ⁵Ts'iyawh unducha lhelhts'un na'a khunek be yalhtuk 'et whunts'ih nus whunilh'en wahle, 'et 'o nus nuhwhuba hukwa' nuszun. Ndan nus whunóolh'en, 'en nuhwheni nuhwhuba lhelhts'un na'a yalhtuk 'o nus ncha ho' 'int'ah. Ndan lhelhts'un na'a khunek be yalhtuk, ndet 'uwhúlhni, 'aw t'ets'onúnun. 'Et nts'e na'a daja ni t'eoonúszin t'eh, 'et t'eh zeh ts'ah'un na'a daja ni t'ets'ontezeh. 'Et sih 'ilhunahuwúdulh Yak'usda ba hilhtus hutele.

Ndan lhelhts'un na'a khunek be yalhtuk, 'et 'uyoo khunek ye yátelhtuk, 'i daja ni hoh 'utni t'einoozeh 'et huba soo cho tenadoodli

⁶'Aw 'et sulhutsinkah nuhghu nusya t'eh lhelhts'un na'a be yatuk, 'i be nohwhulh yalhtuk t'eh, 'et nts'e na'a simba nuhwhuba hóozoo? 'Et whunts'ih ndai nuhwhuba whé 'utni hooyah, k'us be t'eóonudzun, k'us bé nus whét'en, k'us be whúnhots'odulh'eh, 'et whuz na'a nohwhulh yalhtuk t'eh, 'aw 'et zeh nuhwhuba whútezoo. ⁷Ndai 'i 'aw chakhínah, 'i 'ants'i ndai bulaz dunul'ai hoh be ts'ujun, 'i k'us 'ult'o, 'i be duzít's'ai 'ink'ez 'ilhu k'una'a zeh dusts'o t'eh, 'et nts'e na'a simba shun t'ets'unoozeh? ⁸'Ink'ez be ts'ujun hiye jih 'uts'un na'a be duzít's'ai t'eh, 'et t'eh nts'e na'a simba lhuhutedughan lhahádootneh ih? ⁹Nuhwheni chah 'et whuz na'a zeh lhelhts'un na'a yalhtuk t'eh, 'et nts'e na'a simba daja dahni t'ets'onoozeh? 'Ants'ih yaz ts'un yalhtuk li'dutehni. ¹⁰'Et lhat ndi yun k'ut lhelhts'un na'a khunek be yats'ulhtuk. 'I ts'iyawh 'ilho hoh hoonliyaz 'uwhúlhni. ¹¹'Et huwa daja ni 'aw t'eóonúszun t'eh, 'et sih ndan lhelhts'un na'a khunek be yalhtuk, 'en lhelhyoo dedowh suba li'hoont'ah 'ink'ez si chah lhelhts'un dedowh huba lí'ust'ah. ¹²'Ink'ez ndai Ndoni negha ooní'ai nuhwheni chah tube buka' nahzun 'ilhunahuwúdulh hilhtus huboolhtsilh ka. 'Et huwa 'et zeh buka' nahzun, 'o nus hoolhtus wahle. ¹³Njan howa ndan lhelhts'un na'a khunek be yalhtuk, 'et 'uyoo khunek ye yátelhtuk, 'i daja ni hoh 'utni t'einoozeh 'et huba soo cho tenadoodli. 'Et sih daja ni t'ehonoozeh. ¹⁴'Et ndi lhelhts'un na'a khunek be tenadusdli t'eh, 'et t'eh sich'oh suyéghah 'i be tenadutesdli 'et huwa. 'Et whunts'ih sich'oh seni ba 'et 'ants'i whutéle. ¹⁵Nts'e na'a degha nus neba whutézoo? Daja nuhzun? Ndez na'a 'o nus soo 'uhoont'ah, 'et sich'oh suyégha chah 'ink'ez sich'oh seni be chah tenadutesdli. 'Et sich'oh suyégha chah 'ink'ez sich'oh seni shun be chah tesjun. ¹⁶'Et whunts'ih nyunch'oh nyégha 'i be zeh khunek be yailhtuk, 'et Yak'usda délti hoh yailhtuk t'eh, 'et 'ilhunuh t'oonuszun hubutah usda, ndi khunek dézti, 'i be yailhtuk, 'ink'ez nyudits'o t'eh, 'et sih nts'e na'a ndoh honeh dooni, daja

ni 'aw t'ewhunuszun 'et huwa. ¹⁷ 'Et 'alha nghunek dézti, 'i tube únzoo. 'Et whunts'ih ndan t'echanusze, 'et huwa Yak'usda ba 'aw ulhtus wule ghaif'ah. ¹⁸ Yak'usda suchanailya dusni ndi lhelhts'un na'a khunek be yalhtuk, si nuhghanus lhat hoh lhents'un na'a yalhtuk. ¹⁹ 'Et whunts'ih 'ilhunahuwédsel hubutah, skwunlai khunek be whunts'i nohwhulh yátelhtuk t'eh, 'et lhai cho lhelhyoo khunek be nohwhulh yátelhtuk, 'et 'o nus hoonzoo. 'Et hukwa' nuszun.

Lhelhyoo khunek be yatak, 'i huba 'alha cha'hóot'ah, 'en zeh hubugha 'utni ho' hoont'ah

²⁰ Sulhutsinkah 'uskeh k'una'a 'ooht'e gunih nuhwhubeni be. 'Et 'uskehyaz dahínt'ah 'aw hoontsi' t'ehonízun, 'et whuz na'a 'ooht'e. 'Et whunts'ih dune sulí k'una'a nuní noohzut. ²¹ 'Et Yak'usda bughunek k'ut 'uk'une'úgzuz 'et ndutni,

"Lhanah lhelhyoo khunek be yalhtuk,
'ink'ez dune 'ats'un keyah whut'en,

'en hubugha ndunnah Lizwif 'i be hubulh yátelhtuk,
'et whunts'ih 'aw sodóots'o hukwa cha'hunízun."

²² 'Et sih ndi lhelhyoo khunek 'i be Lizwif, 'en hubugha 'útni ho' hoont'ah. Ndunnah huba 'alha 'uhoont'ah ba chaif'ah. Huba 'alha cha'hóot'ah, 'aw 'en zeh buba 'int'ah. 'Et whunts'ih nts'e na'a dune Yak'usda huba nus whunilh'en, ndunnah huba 'alha 'uhoont'ah 'en huba 'uhoont'ah, huba 'alha cha'hóot'ah, 'en huba cha'hóot'ah. ²³ 'Et huwa Yak'usda ba 'ilhunahuwúdulh, 'en ts'iyawh 'ilho 'ilhunahuwutédulh, 'ink'ez ts'iyawh 'ilhunah lhelhyoo khunek be yahutelhtuk t'eh, 'et whuz na'a nduhójoa whulhuhodul'eh k'us ndunnah huba 'alha cha'hóot'ah, 'en nuhgha nindel 'ink'ez nuhzih húdehts'i t'eh, 'et 'alha tulih nuhwheni whusnik ahli nuhódoténihi ih? A, 'alha 'uhoont'ah! ²⁴ 'Et whunts'ih ts'iyawh Yak'usda ba nus huhó'en t'eh, 'ink'ez 'ilhunuh 'aw soo cho whechaoodulhú'e k'us 'aw buba 'alha cha'hóot'ah, 'en nuhghu ninya 'ink'ez nuhzih usda t'eh, 'et ndunnah nus ho'en, 'en hubugha ndet hoh tinta' ut'ih unli, 'et nahooté'ah. 'Et huboozélhts'ai huwa ts'iyana hiba nahezya. ²⁵ 'Et sih dudzi yuh untelhi, 'i ts'iyana nalhts'et hawhútelts'ulh ho' hoont'ah. 'Et huwa nachánitno, Yak'usda ts'un teni' untelhdzilh, 'ink'ez 'alha Yak'usda nuhwhutah 'int'ah hidutenilh.

Yak'usda ba 'ilhunahowesdel t'eh, ndez na'a ndadutenilh

²⁶ 'Et sulhutsinkah, daja dutehnilh? Ndet 'ilhunawahulh teh, 'ilhunah ahli hoh 'o nus ntehyeh 'ink'ez lhat lhula'daht'en. 'Et sih nus lhúnlhut'uk lí'ah't'ah. 'Ilhunuh ahli hoh Ndoni nuhgha ooni'ai, whuz na'a 'ooht'en. 'Et 'ilhunuh Yak'usda bushun aht'i, k'us 'ilhunuh whebodutel'eh aht'i, k'us 'ilhunuh 'uyoo khunek bé nuhtah yatelhtuk aht'i, k'us 'ilhunuh ndai Yak'usda ts'un be hóoduteltsih aht'i, k'us 'ilhunuh bughunek daja dutenelh aht'i. ²⁷ Ndan nuhtah 'uyoo khunek bé yatelhtuk t'eh, 'et nanah k'us tanah k'us degna nus tahult'oh, 'en 'ilhunah zeh huba yaooltuk. 'Ink'ez 'ilhunah daja hutni, 'et ndun whudóoni. ²⁸ 'Et whunts'ih nuhk'una'a yuba yatelhtuk hoolah t'eh, 'et t'eh 'ilhunahuwédsel hubutah 'ants'i t'edoosnih. Dich'oh dudzi yuh hoh 'ink'ez Yak'usda ts'un chah yaooltuk. ²⁹ 'Et ndan nus hó'en nanah k'us tanah, 'en zeh Yak'usda bughunek be yahoolhtuk. 'Et ndai hiye yaylhtuk, 'i 'et 'onghoh, 'en daja hutni, 'uyoon ba ts'ah'un na'a 'int'ah tulih k'us 'ats'un na'a tulih 'int'ah. ³⁰ 'Ink'ez hubutah 'ilhunuh hoonliyaz benghuh níwhults'ut, 'et howu yatelhtuk t'eh, 'et 'udechoo yatelhtuk, 'en t'edoosnih. ³¹ 'Et whuz na'a 'ilho ahli hoh nus hó'en t'eh, 'et sih ts'iyawh 'o nus soo t'ewhunoohzeh, 'ink'ez ts'iyawh huba nus whúnulht'uk hoh bula 'ooht'en. ³² 'Ink'ez dich'oh buyégha 'i be ndet nus whunóolh'en, dich'oh zeh k'úne' whul'en. ³³ Yak'usda 'en ndai be nédzi dezghel, 'en buts'un hayúkat. 'Et whunts'ih dune ye lhanah 'uhudutni, 'i 'aw 'en buts'un hachayuskat. 'Et whuz na'a nts'oh tulih dune Yak'usda bube'ildzun 'ilhunahuwúdulh, 'en ndi be nedzi dezghel, 'i 'et dez'ai. ³⁴ 'Et nuhwheni 'ilhunawuzehdel t'eh, 'et nuhts'ekoo 'en t'ehudoosnih huba' hoont'ah. 'En yahutelhtuk huba cha'hóot'ah, dune ghanyo 'uhint'ah 'et huwa. Moses be' dustl'us 'i chah 'et whuz na'a zeh 'et ndutni. ³⁵ 'Et ts'ekoo hoonliyaz hodutel'eh hukwa' huninzun t'eh, bukoo ts'ih dukikah 'en hubuhoolhkt. Yak'usda ba 'ilhunahuwúdulh hubutah, ts'eké yatelhtuk t'eh, nuhwhuba hukwaya hoonli ho' hoont'ah. ³⁶ Daja nuhzun, Yak'usda bughunek nuhwheni ih nuhts'u hadéts'ut? 'Ink'ez nuhwheni zeh ih nuhts'u hadúkat? 'Awundooh! ³⁷ 'Et ndunnah nus whunilh'en na'dunúdzun, k'us Ndoni hoonliyaz 'en hubugha íni'ai, 'et whuz na'a ndonínzun t'eh, 'et ndez na'a chah ndunóozin, ndai bugha nuhts'o k'e'águz, 'i Yak'usda khunek netl'aída'ai, 'i zeh 'int'ah. ³⁸ 'Et whunts'ih ndunnah hoonli t'eóonínzun na'dunúdzun, 'en chah whute whuz na'a 'uhoot'e. ³⁹ 'Et sulhutsinkah 'o 'un chah nus ho'en tehle, soo cho hukwa' nuhzun, 'ink'ez ndunnah lhelhyoo khunek be yáulhtuk, 'en chah whuch'a hubunóhyoot gunih. ⁴⁰ 'Et huwa ts'iyawh hoonzoo hukw'u na'a 'ink'ez ts'ah'un na'a 'uhót'e.

15

Christ dinadija 'alha 'uhoont'ah

¹ 'Aw 'et sulhutsinkah ndi khunek unzoo, 'i be nohwhulh yálhtuk. Soo cho t'entehzeh hukwa' nuszun. 'Uda úlhchoot 'ink'ez 'et huwa 'i be ndi yun k'ut delhúts'i. ² 'Ink'ez ndi khunek be nohwhulh yalhtuk, 'i soo cho oohun t'eh, 'et 'i be dahjih. 'Et whunts'ih 'ants'i nuhwhuba 'alha 'uhoont'ah t'eh, 'aw buk'e dóohjih ghaít'ah. ³ 'Et 'udechoo da nuhwheni nuhtl'aho'ai ndet stl'awhéts'ut, nts'e na'a Christ nelubeshi k'elha dazsai. 'Et whuz na'a Yak'usda bughunek 'et ndutni. ⁴ 'Ink'ez nts'e na'a wheyihyalhti. 'Et whulh tat dzin dinadija. 'Et whuz na'a Yak'usda bughunek 'et chah ndutni. ⁵ 'Ink'ez nts'e na'a Cephas yunalh ts'et hainya, 'et hukw'elh'az ndunnah lanezi 'o 'at nanah, 'en hubunalh ts'et hainya. ⁶ 'Et hukw'elh'az 500 neyulhutsinkah 'en ts'iyawh 'ilho hubunalh ts'et hainya. 'Ink'ez lhanah 'awhuz hukhuna, 'et whunts'i bulunah 'ilhuz nahunestez. ⁷ 'Et James 'en chah yunalh ts'et hainya, 'ink'ez whél'a, 'en ts'iyawh hubunalh ts'et hainya. ⁸ 'Ink'ez dega nus, si chah, 'aw soo whughah whudezulh hoh whuzili ilah, 'et whunts'ih sunalh ts'et hainya. ⁹ Whel'a 'en hubutah si dega nus hubuk'elh'ih 'ust'ah na'dunúsdzun. 'Et Yak'usda ba 'ilhunahuwúdulh, 'en dzuh nobulhdeh inle, 'et huwa 'aw whél'a saduténilh 'et huba soo cha'lhúdzoo. ¹⁰ 'Et whunts'ih Yak'usda ye unzoo, 'i buga nts'e na'a dast'ah, 'et whuz na'a zeh 'ust'ah. 'Ink'ez Yak'usda suts'un únzoo, 'et 'aw 'ants'i cha'hóot'ah. 'Et k'us whel'a 'en hubutah huba nus 'ultus, 'i be 'ést'en. 'Aw si ilah, Yak'usda ye unzoo, 'i sulh 'int'ah, 'i be 'úst'en. ¹¹ 'Et huwa si sgha k'us 'onghoh hubugha, nts'e na'a Yak'usda bughunek be nohwhulh yáts'ulhtuk, 'et whuz na'a zeh neghunek nuhwhuba 'alha 'int'ah.

T'ets'oninzun Christ yahadla tah dinadija

¹² T'eóonúhzun Christ yahadla tah dinadija. 'Et whuz na'a nuwheni nelatah ts'ih whudáhts'o. 'Ink'ez nts'e na'a bulunah nuhwheni yahadla 'aw dinahudóodelh ghaít'ah dahni? ¹³ Ndez na'a njan ndúhoont'ah, ndunnah yahadla 'aw dinahudóodelh ghaít'ah t'eh, 'et sih Christ 'en chah 'aw dinachadidal. ¹⁴ 'Ink'ez Christ 'en chah 'aw dinachadidal t'eh, 'et sih 'en buga neghunek 'aw hoonliyaz chailah ho' 'int'ah, 'ink'ez be nuhwhuba 'alha 'uwhutét'ilh, 'i chah 'ants'i 'et 'uwhutét'ilh. ¹⁵ 'Et whunts'ih yahadla dinachahúdidulh t'eh, Christ 'en chah 'aw dinachadidal. 'Et whuz na'a nduhooja t'eh, nuwheni chah Yak'usda buga whuts'it be yats'ulhtuk li'hoont'ah. Njan lhe'ts'utni, Yak'usda 'en buga Christ nakhít'na hoh dinadija 'et huwa. ¹⁶ 'Et yahadla dinachahúdidulh t'eh, Christ 'en chah 'aw dinachadidal ho' hoont'ah. ¹⁷ 'Ink'ez Christ 'aw dinachadidal t'eh, 'et sih be nuhwhuba 'alha 'uhoont'ah 'aw hoonliyaz chailah ho' 'int'ah 'ink'ez 'awhuz nuhwhulubeshi bulh 'áht'ah. ¹⁸ 'Ink'ez ndunnah Christ bube'ildzun hinli hoh yahadla, 'en ts'iyawh 'ilhuz wheni tinta' huninkat hinli. ¹⁹ 'Et ndai Christ ts'un buka tsi ts'úhooli, 'et ndi yun k'ut uzdelhts'i huba zeh 'int'ah t'eh, 'et sih ts'iyannah tah nuwheni dega nus tets'ul'en wule.

Ndi be yats'adla, 'i soo dega nus buch'a detni unli, 'i hoolah tele

²⁰ 'Et whunts'ih 'alha yahadla tah, Christ 'en 'uja dinadija. 'Ilhuz nanestez tah 'en 'udechoo dinadija whuzdli. ²¹ Dune, 'en buga dune yahadlah 'ink'ez dune, 'en buga nahakhít'nah 'et huwa. ²² 'Et nts'e na'a Adam 'en buga ts'iyannah yaída, 'et whuz na'a Christ, 'en zeh nahukhutetnah. ²³ 'Et whunts'ih 'ilhunah hinli hoh nts'oh huwa buba whezulh hubugha óoni'ai, 'et whuz na'a 'uhutet'ilh. Christ 'en choo nakhitnah suli. 'Et hukw'elh'az ndunnah Christ bube'ildzun hinli hoh huba whusanátédalh, 'et t'eh 'en chah. ²⁴ 'Et whulatah suli t'eh, ndoh ts'iyawh 'uda 'uhooja tele. 'Et hoh t'eh bula tah whutéle t'eh, nek'úne' whul'en, ndi yun k'ut neba ye úlhtus chah, ndi nududeh 'i be butl'awhelts'ut chah, 'i ts'iyawh 'ilho hoolah yutelhtsilh. 'Et hukw'elh'az ndai Sizi Gri dich'oh zeh yugha hubudayi cho unli, 'i ts'iyawh Yak'usda ne'aBá, 'en yutl'aítelelh. 'Et whuz na'a dega nus dzin whutéle ho' hoont'ah. ²⁵ 'Et whuts'un buYe' hich'a ne'ut'en, 'en be'aBá duke t'lah nibutelelh 'ink'ez hubuk'edit'ez t'eh, 'et whuts'un ts'iyaintsuk k'üne'butelilh huba' hoont'ah. ²⁶ 'Ink'ez ndi be yats'adla, 'i soo dega nus buch'a detni unli, 'i hoolah tele. ²⁷ 'Et huwa njan ndutni, "Ts'iyaintsuk dega nyoh 'int'ah yulhtsi." 'Et whunts'ih hoh da 'uk'e'ánguz hoh ndutni, "Ts'iyaintsuk dega nyoh 'int'ah yulhtsi," 'et whunts'ih 'aw Yak'usda buYe' Sizi Gri dega nyoh ni'dudóotelh ghaít'ah ni hoh 'utni. ²⁸ 'Et nket'ah ts'iyaintsuk dega nyoh 'int'ah yutelhtsilh t'eh, 'et sih buYe', 'en chah, be'aBá dega nyoh 'int'ah 'udutelhtsilh. 'En 'int'ah ts'iyaintsuk dega nyoh 'int'ah yulhtsi. 'Et sih Yak'usda dich'oh ts'iyaintsuk gha ndoh tele.

Bulunah Sizi Gri dinadija 'awhuz huba 'alha cha'hoot'ah

²⁹ 'Et 'alha yahadla dinachahúdidulh t'eh, 'ink'ez ndunnah yahadla 'uyoon, 'en huba too be' hubuhulh'en, 'ink'ez 'et t'eh dahútenilh? 'Et di ka ndunnah yahadla 'uyoon, 'en huba too be' hubuhulh'en? Hoolah 'ants'i 'et 'uhut'en. ³⁰ 'Ink'ez di ka nuwheni chah dzin totsuk 'ahoolhyez neba wheóonujut? Nuhwheni daja nuhzun? ³¹ 'Ink'ez nts'e na'a hooht'í, si

chah 'et whuz na'a Christ neMoodihti, Sizi ts'utni, 'en bugha hootésti. 'Ink'ez soo ts'ih'un 'un whudusni, ndi khunek be yalhtuk, 'i bugha dzin totsuk dásah. ³² 'Et keyah Ephesus ts'ih nts'e na'a ndi yun k'ut dune howu nuninuzut hoh, 'et si chah khunaiti be núsya t'eh, nts'e na'a 'uhoont'ah suba whutézoo? 'Et yahadla dinachahúdidulh t'eh, whute 'uts'oo'alh, tats'ootnai, bundada yaztádlah 'et huwa. ³³ Nanooh't'ah gunih! Ntsi' hubulh 'áht'en t'eh, 'et sih nuhwhe'ut'en k'ah hoonzoo ts'iyawh tinta' tet'ilh. ³⁴ Ndai ts'ah'un 'int'ah, 'i doo chah zeh nuwheni tánadeh'ai hukwa 'ulh'en. Lubeshi 'ulh'en 'ustl'e 'ahneh! Bulunah 'awhuz Yak'usda bugha ts'ah'un t'ehonízun. Yooya wahle ka 'un whudúnsi.

Yahadla dinahudutédulh t'eh, hubuyust'e dant'ah be whusanáhutedulh?

³⁵ 'Et bulunah nduhútni, "Nts'e na'a yahadla dinahudutédulh? Dahint'ah hoh hubuyust'e be whusanáhutedulh?" ³⁶ Tube whuzahnik! Soo cho whunulh'en, ndai whuyínanla, 'i dazsai t'eh zeh, 'et whuz na'a zeh nakhutétnalh. ³⁷ 'Ink'ez ndai 'ilh'en whuyínanla, 'et ndai tele hanányi t'eh, 'et whuyínanla, 'i ilah 'int'ah 'ants'i bumai 'i zeh 'int'ah. ³⁸ 'Et whunts'ih Yak'usda nts'e na'a hukwa' ninzun, 'et whuz na'a 'uyulh'ih. 'Ink'ez ndi bumai ts'iyawh lhelhts'un dedowh 'i 'int'ah. ³⁹ 'Ink'ez ndai khunai buyat ts'iyawh 'aw lhk'una'a cha'it'ah. Dune buyat 'i uyoo 'int'ah. Khunai buyat 'i chah 'uyoo 'int'ah. 'Et hooch buyat 'i chah 'uyoo 'int'ah. 'Et dut'ai buyat 'i chah 'uyoo 'int'ah. ⁴⁰ 'Et yak'uz whut'en hubuyust'e hoonli 'ink'ez ndi yun k'ut whut'en, 'en chah hubuyust'e hoonli. 'Et whunts'ih yak'uz whut'en hubuyust'e hiyé dézti, 'i 'ink'ez ndi yun k'ut whut'en hubuyust'e hiyé dézti, 'i bulh lhelhyoo 'int'ah. ⁴¹ 'Et sa, 'i chah be yedezti, 'i hoonli. 'Ulh'ek oozá 'i chah be yedezti, 'i hoonli. Sum 'i chah be yedezti, 'i hoonli. 'Et ndi sum ts'iyawh be yedezti, 'i lhelhyoo unli. ⁴² 'Et yahadla dinahudutédulh t'eh, 'et chah lhelhts'un na'a 'uhint'ah. Nts'e na'a buyust'e whuyínanla, 'i k'una'a, 'i telhjut ho' 'int'ah. 'Et dinahududidel t'eh, 'aw hubuyust'e oolhjut ghaít'ah. ⁴³ 'Et buyust'e chadíti hoh whuyíhiyalhti. 'Et whunts'ih dézti hoh dinadutédalh. Lait'ah hoh whuyíhiyalhti, 'et whunts'ih ulhtus hoh dinadutédalh. ⁴⁴ Yinkak dune buyust'e k'una'a unli hoh whuyíhiyalhti. 'Et dinahudutédulh t'eh, 'et chah yak'uz huba 'uyoo buyust'e natedle. 'Et ndi yun k'ut uzdelhts'i huba, neyust'e ts'it'i. 'Et nduk yak'uz whuba 'uyoo neyust'e natéde. ⁴⁵ 'Et whuz na'a 'uk'e'edúguz hoh 'et ndutni, "Et 'udechoo dune 'en Adam yúlhni 'et buzul khuna suli." 'Et dega nus Adam 'en bugha neyéghah khuna, 'et whuz na'a ne'ínlá. ⁴⁶ 'Et whunts'ih neyust'e 'aw yak'uz huba cha'it'ah. Neyust'e ndi yun k'ut be'ilhdzun 'int'ah. 'Et dats'uzsai hukw'elh'az yak'uz huba 'uyoo neyust'e natédeh. ⁴⁷ 'Et Yak'usda 'udechoo dune 'en ndi yun k'ut whutl'us 'i be dune yulhtsi. 'Et whulh nat dune, 'en neMoodihti, 'en yak'uz ts'ih hainzut 'int'ah. ⁴⁸ 'Et ndun dune whutl'us be 'ulya, dant'ah hoh dune unli, 'et ndunnah whutl'us be 'uhulya, 'en k'una'a 'uhint'ah. 'Et whuz na'a ndun yak'uz ts'ih hainzut, dant'ah unli, 'et ndunnah yak'uz huba 'int'ah, 'en k'una'a 'uhint'ah. ⁴⁹ 'Et ndun whutl'us be 'ulya dant'ah dune unli inle, 'et nuwheni chah 'en bundúts'últ'ah. 'Et whuz na'a ndun yak'uz ts'ih hainzut, 'en dant'ah dune unli 'et whuz na'a nuwheni chah 'en bundúts'últ'ah uztele.

Bé dats'utsah 'i chah hoolah tele

⁵⁰ 'Et sulhutsinkah njan ndun whudusni, ndet Yak'usda hubudayi cho unli, 'et ndi yun k'ut neyust'e 'i be ilah. Yak'usda ndai yit'i, 'i 'aw ts'óolhchoot ghaít'ah. Ndi yun k'ut neyust'e telhjut, ndai chatelhjut, 'i be ilah ts'otélhchulh 'et huwa. ⁵¹ 'Aw 'et soo zélhts'ai. Ba whé' hoont'ah hooyah, 'i bugha nohwulh yatéltuk. Bulunah 'aw 'ilhuz nachats'untestus, 'et whunts'ih ts'iyawh lhents'un na'a na'uztetnilh. ⁵² Tube khun 'uwhuténilh, 'ants'i ts'unilts'ilh hukw'u na'a ba 'uwhuténilh. Hoh t'eh dega nus be ts'újun hiye jih be' dests'ai t'eh, 'et whuz na'a 'uwhuténilh. 'Et hoh whuya whudezulh yahadla, hubuyust'e 'aw chaillhjut hoh dinahudutédulh, 'ink'ez nuwheni ts'iyawh lhelhts'un na'a na'uztetnilh. ⁵³ 'Et ilhjut, 'i 'aw chaillhjut natedle huba 'uhoont'ah. 'Ink'ez ndi bé daztétshah, 'i 'aw be dachaztesa, 'i naootedle. ⁵⁴ 'Et nket'ah ilhjut, 'i, 'aw chaillhjut nasdl t'eh, 'ink'ez bé dats'utsah, 'i chah hoolah suli t'eh, 'et hoh whuya whudezulh t'eh, 'uk'e'edúguz ts'iyawh 'aw 'et lhaóodutenilh. 'Et huwa whuz na'a ndutni, "Bé dats'utsah, buch'a' ninde ho' 'int'ah."

⁵⁵ 'Et huwa 'uts'utni, bé dats'utsah 'aw 'o 'at be dats'ootsah ghaít'ah.

'Ink'ez ndet yahadla húdelhts'i, 'aw nehotun ghaít'ah.

⁵⁶ 'Alha ndi bé dats'utsah, 'i lubeshi 'i gha 'uhooja. 'Ink'ez Moses bughunek k'uzninyuz, 'i be t'ets'onanzin lubeshi dáltus ho' 'int'ah. ⁵⁷ 'Et whunts'ih neMoodihti Sizi Gri, 'en bugha Yak'usda whuch'a ts'ulhdeh nets'ulhtsi. 'Et huwa tube cho nechanailya uzinzun. ⁵⁸ 'Et huwa sulhutsinkah, ulhtus wahle. Khun nawh hunoozin gunih! 'Ahoohyez neMoodihti be 'ut'en k'ah soo cho 'uwwhulh'en. T'eóonúhzun k'an 'et nts'e na'a neMoodihti ba 'aht'en, 'et huwa 'aw 'ants'i ilah 'aht'en ho' hoont'ah.

¹'Aw 'et dune Yak'usda bube'ildzun, 'en ndi sooneya huba 'ilhunanuts'owéz'ai, 'i bughu yateltuk. 'Et ndet yun k'ut Galatia 'ilhunahuwudulh, nts'e na'a hubutah budáni da, 'et nuhwheni chah 'et whuz na'a ndóht'en. ²'Et 'ilhunah ahli hoh daltsuk bat'en be hoonzoo 'ahja, 'et whuz na'a k'enilghel 'udechoo dzin, 'i bulah lhadáhle. 'Et t'eh nuhghuniya t'eh, 'et hoh whuya whudezulh 'ilhuna'naghóoh'alh huba cha'hóot'ah. ³Ndet nuhts'uniya, 'et t'eh naootés'alh ndi nuwhe'dustl'us 'i be ndunnah nuhwhuba unzoo hinli, 'en ndi sooneya dune Yak'usda bube'ildzun, 'en huba hubugha íneh'ai, 'i bulh Jerusalem ts'ih hubutelh'alh. ⁴'Et si chah whuz tesyalh huba hootézoó t'eh, 'et sih 'en cha sulh útedulh.

Paul datenilh

⁵'Et yun k'ut Macedonia 'et whegha lhutesyalh. 'Et whegha lhusíya t'eh, 'aw 'et nuhts'u t'éssyalh. ⁶'Astl'iyaz whuba tulih 'et nuhzih wusda k'us khi nduwhulyez tulih nuhwhuzih wusda. 'Et hoh nts'e tesyalh ts'un, nuhwheni sula 'ooht'en ka. ⁷Hoh whegha usyalh t'eh, 'aw nuhghah lhutesyalh. 'Et huwa 'aw k'an 'et nuhwhunoolh'en ghait'ah. 'Et whunts'ih sMoodihti 'usunánzun t'eh, 'et huwa 'astl'iyaz nduchah nuhzih wusda. ⁸'Et whunts'ih ndet dzin 'uhoot'ah, Penticost huwhútni, 'et whuts'un keyah Ephesus 'et tesdalh. ⁹'Et 'ants'i ndati k'us úncha, 'i suba da'duteztan lí'hooja, 'ink'ez lhanah such'a detni unli. ¹⁰'Et Timothy nuhghu ninya t'eh, 'aw hoonli whe chaníljut hoh nuhzih wuda. 'Et ts'iyawh nuhwheni nuhwhuba 'uhoot'ah. Si sk'una'a neMoodihti be 'ut'en k'ah ne'ut'en 'et huwa. ¹¹'Et huwa nuhwheni nuhtah 'en 'ants'i nuhwhuba wule gunih. 'Et whunts'ih budzi dezghel hoh suts'un nátoohl'a. Si 'ink'ez lhulhutsinkah nuwheni ts'iyawh huba ts'ilh'i. ¹²'Et nelhutsin Apollos'en bugha 'unohdutésnilh. k'an 'et nelhutsinkah bulh nuhts'u tóoya 'et huba hukwa' nuszun, 'et whunts'ih 'aw hukwa cha'nizun. 'Et huwa sa howu bulh yáhtuk. 'Et whunts'ih nts'oh whugha whudezulh 'et buba hoonzoo t'eh, 'et sih nuhwhuts'u tóoya.

Soo cho huwahli

¹³'Et soo cho huwahli. Be 'alha 'uhoot'ah, 'i be whuduts'o hoh sahyin. Nuhwheni nuhdzi hóoni hoh 'et nudoolhúya. Ulhtus wahle. ¹⁴Ndai be ne'aht'en, 'i ts'iyawh be nék'ets'intsi', 'i be 'oolh'en. ¹⁵'Et sulhutsinkah khunek ulhtus, 'i be nuhdutésnilh. Nt'eóonáhzun Stephanas 'ink'ez bukoo húdelhts'i, 'en yun k'ut Achaia 'et 'udechoo buba 'alha 'uhoot'ah huздli. 'Ink'ez t'eóonáhzun nts'e na'a dune Yak'usda bube'ildzun, 'en huba né'hutet'en huwa' hududúlya. ¹⁶'Et huwa ndun whudutésnilh, ndunt'ah 'ink'ez ndunnah soo cho hoolhtus hoh nelh 'út'en, 'en nuhwhenich'oh butl'á' dudulye. ¹⁷Nkeda Stephanas, Fortunatus, 'ink'ez Achaicus, 'en sugha hunindel da, 'et huwa hoonúst'i. Ndai sughá chaikulh, 'en bugha sgha níkat. ¹⁸'Et huwa sich'oh suyégha 'ink'ez nuhwhenich'oh nuhyégha chah 'en bugha nduk na'uja. 'Et huwa ndunt'ah, 'en ts'ah'un na'a ne'boolh'en.

Yak'usda ye unzoo, 'i nohwhulh óot'e

¹⁹'Et yun k'ut Asia nts'e 'ilhunahuwudulh, 'en chah ts'iyawh dahooja nuhuwhútni. Aquila, Priscilla, 'ink'ez hubukoo Yak'usda ba 'ilhunahuwúdulh, 'en chah soo cho dahooja nuhuwhútni. ²⁰Ts'iyawh nelhutsinkah, 'en chah dahooja nuhuwhútni. Lubeshi bu'et nalhudunahts'oos. 'I be dahooja lhudahtni. ²¹Si Paul sich'oh sula be 'uk'une'zíguz. 'I be dahooja nuhwhudúni. ²²NeMoodihti Sizi Gri ndunnah 'en yuk'echaítsi!, 'en Yak'usda ye whúske, 'i be hubuk'eóotelts'ulh. O sMoodihti 'a cho nets'ínyalh! ²³NeMoodihti Sizi Gri ye unzoo, 'i nohwhulh 'óot'e 'et zeh nuhwhuba hukwa' nuszun. ²⁴Be nuwhuk'esi!, 'i Christ, Sizi 'en bugha, 'i ts'iyawh nohwhulh 'óot'e hukwa' nuszun. 'Et ndoh honeh.

Paul, Corinth Whut'en Whulh Nat Hubuts'un Yuk'e'ánguz

Yak'usda ba 'ilhunahuwúdulh, keyah Corinth 'et, 'en Paul dahooja hubulhni

¹ Si, Paul, Yak'usda bugha nts'ena'a hukwa' ninzun, 'i be Sizi Gri ba whel'a 'ust'ah. 'Ink'ez ndun nelhutsin Timothy hiyúlhni, 'en chah sulh 'ut'en. 'Et ndunnah keyah Corinth 'et Yak'usda ba 'ilhunahuwúdulh hinli, 'ink'ez ndulhcho hoh yun k'ut Achaia húdelhts'i, ndunnah nohwhulh dune Yak'usda bube'ildzun hinli, 'en nuhwheni ts'iyawh ndi dustl'us k'ut nuhts'o k'e'usges. ² Ne'aBá Yak'usda 'ink'ez Sizi Gri neMoodihti ts'un nuhwhuba tenadusdli 'i ye unzoo, 'ink'ez nuhdzi dóoghel nohwhulh óot'e.

Yak'usda 'en zeh 'int'ah nuwheni ts'iyai, 'i be k'enanwhunoo'ah

³ Yak'usda, Sizi Gri neMoodihti bu'aBá 'int'ah, 'en zeh ts'udélhti. Ne'aBá 'en bugha be négha té'nedze, whuz na'a neghawhulhs'ut. Yak'usda 'en zeh 'int'ah nuwheni ts'iyai, 'i be negha whuna'ah. ⁴ Ndet hoontsi' negha ooninkat 'et whuch'a k'enánenoo'ah. 'Et huwa whuz na'a 'uyoon hoontsi' hubugha ooninkat t'eh, 'et t'eh nuwheni chah Yak'usda ye nek'enana'ah, 'i bugha k'enábuznoo'ah huba' hoont'ah. ⁵ 'Et nts'e na'a Christ dzuh nusúzut, 'et nuwheni chah 'en bugha dzuh nuts'uzde. 'Et whuz na'a nuwheni chah Christ ye nek'enana'ah, 'et negha whulhsuk k'enánena'ah. ⁶ 'Et whunts'ih ndet hoontsi' nets'u whélt's'ulh t'eh, 'et 'i bugha k'enabuts'unoo'ah. Ndi hoontsi' nuhts'u whélt's'ulh hoh dzuh nahde 'et whunts'ih ndi k'enánut'ah, 'i be nuwheni 'ink'ez nuhwheni chah ts'iyawh whechats'ítsaz. 'Et whuz na'a 'uw'hút'en. 'Ink'ez ndet k'enáneni'ah t'eh, 'et nuhwheni zeh nuhwhuba 'uhoont'ah. 'Et 'i be k'enánohuznu'ah. ⁷ 'Ink'ez t'ets'onínzun nts'e na'a nuhwheni dzuh nuts'udeh hoh nets'un nidehdel, 'et 'uw'hultus 'i be zeh ndi ye nek'enana'ah, 'i be nets'un nidehdel.

Ndi tube hoontsi' daztétsah, Yak'usda whuch'a neúlhyis

⁸ Sulhutsinkah 'et whunulh'en, nyan, 'i Asia yun k'ut ndi hoontsi' negha óoninkat, 'et nelh dahooja t'ewhunoozh hukwa' nuszun. Whuz ts'ih nelh dahooja tube hoontsi' k'et 'aw uzdooni ghait'ah. 'O nus neba hoondaz k'et 'aw whúlh nuzdoolya ghait'ah neba li'hoont'ah. Neba hoontsi' k'et yaztáda 'uznanzin neba li'hooja. ⁹ 'Ahoohyez daztétsah hukwa tsi ts'úhoolih. 'Et whuz na'a nelh ndúhooja t'eh, 'et huwa 'aw whenich'oh whut'aníznootan huba cha'hóot'ah. Yak'usda zeh whut'aníznootan, 'en zeh yahadla dinabudutélelh 'et huwa. ¹⁰ 'Ink'ez ndi tube hoontsi' daztétsah, 'et whuch'a neúlhyih. 'Et 'ahoolhyez 'et zeh ndutét'ilh. 'Ink'ez lha'un teh nendutelilh zeh tet'ilh, 'et whuz na'a zeh 'ahoolhyez hukwa tsi ts'uholi. ¹¹ Nuhwheni chah tenadudli be 'ilho nela 'ooht'en hoh nela tenadoohdli. Lhanah neba tenadudli 'et hoh hoonliyaz neghá whunkat. 'Et huwa nelh dáhooja lhanah Yak'usda ts'un chanailya neba hutni.

Ndet neyuh ts'ih bugha nt'ets'onínzun, 'i ndi whunénulhtun, 'et zeh ts'uhóont'i

¹² 'Et ndet neyuh ts'ih bugha t'ets'onínzun, 'i ndi whunénulhtun, 'et zeh ts'uhóont'i hoh 'i bugha yats'oolhtuk. 'Et hoh whunénulhtun ndi yun k'ut uzdelhts'i. Yak'usda bubé 'alha' nudzun, 'i, 'ink'ez 'aw nankoh khunek be yachats'ulhtuk, 'et whuz na'a zeh dega nus nuhtah uzdelhts'i. Ndi yun k'ut whut'en be whútnih, 'i be cha'ts'ilil. Yak'usda ye unzoo, 'i bugha 'uts'út'en. 'Et whuz na'a neni tah whudez'ai, 'i be newhúnulhtun. ¹³ 'Et ndi buk'eyalhtuk, 'i, 'ink'ez ndet t'eoonehizin, 'et whuz na'a zeh nuhts'o k'e'usges. 'Et whulatah whuts'un 'i t'ewhuntehze nuhwhuba hukwa' nuszun. ¹⁴ 'Et whuz na'a hoonliyaz dats'int'ah, 'et negha t'ewhunehszin. 'Et huwa Sizi Gri neMoodihti budzin whusawhélt's'ut t'eh, 'et t'eh nuhwheni neba hoónaht'i, 'ink'ez nuwheni chah nuhba ts'uhootet'i.

'Aw nuwhundóolhdah hukwa cha'nuszun

¹⁵ 'Et dune ts'iyawh t'enwhunúsun daht'ah dune ahli. 'Et huwa soo 'alha' nuszun hoh nuhts'u t'ésyalh inle. 'Et whulh nat hoonzoo nuhgha whúlt's'ut. ¹⁶ 'Ink'ez Macedonia yun k'ut ts'ih 'et nuhwhégha nuhts'ún tésyalh inle. 'Et Macedonia ts'ih hanásja t'eh, doo chah nuhk'unatesdahl inle. 'Et whuz k'ah násdahl hoh Judea yun k'ut ndai be ndunusdzit, 'i be sula tehnilh inle. ¹⁷ 'Ants'i hoh ne'dusni nuhzun ih? K'us nts'e na'a neyuste ts'ih nint'uk, 'et whuz na'a seni be lhaóodusla nuhzún ih? 'Et whuz na'a ndust'ah t'eh, 'et t'eh si khun teh, "A" doosni, 'ink'ez khun teh, "Awundooh" doosni t'ah. ¹⁸ 'Et whunts'ih Yak'usda 'aw nela dootnih ghait'ah. 'Et whuz na'a be nóhts'u yats'ulhtuk 'aw, "A" 'ink'ez, "Awundooh" chailah! 'Aw nawh yachats'ulhtuk. ¹⁹ 'Et Sizi Gri Yak'usda buYe' 'int'ah. 'Et hoh da Sylvanus, Timothy, 'ink'ez si chah 'en bugha 'i be nohwhulh yáts'ulhtuk da, 'aw,

“A” 'ink'ez, “Awundooh” chats'udíníl inle, 'en be, “A” zeh 'int'ah 'et huwa. ²⁰ 'Et Yak'usda yé nets'u nahezuya, 'i ts'iyawh, “A” ní, 'ink'ez 'en be, “Ndoh honeh” ts'utni. 'Et nuwheni negha Yak'usda uzdóolhti. ²¹ 'Ink'ez ndun Christ bulh soo cho 'ilhuz nohwhulh nuzdelhúya nesulhtsi, 'en Yak'usda 'int'ah. 'Ink'ez Yak'usda 'en zeh ne'inla, Ndoni ye ulhtus, 'et negha ooní'ai ho' 'int'ah. ²² 'Ink'ez chah be hóodel'en, 'i be nuwheni chah neye hóodel'en nesulhtsi. 'Ink'ez Ndoni nedzi yida'ai. 'I be bulah neba 'uk'elha whulhtsi. ²³ 'Ink'ez 'o 'un cha Yak'usda bunalh hoh suzul buch'a sut'ak teyin huba, njan nuhwúndoolhdah hukwa cha'núszun. 'Et huwa 'awhuz Corinth ts'ih nachatúsdal. ²⁴ 'Aw nuhwuhba 'alha 'uhoont'ah whumoodih uzteleh hukwa cha'ts'ust'en. 'Et k'us ndet hoonáht'i hukw'u na'a 'un whuts'oolhzin. Bé 'alha 'uhoont'ah, 'i be Yak'usda ba nudelhúya 'et huwa.

2

¹ 'Ink'ez si chah seni lhadúsdla 'aw tso bulh nuhts'u t'ésyah hukwa cha'núszun. ² 'Et si sugha nuhdzi tso sulí t'eh, ndan simba hoonust'i hoh sughá ho'alh? Nts'e na'a simba nuhwheni tso ahli t'eh, hoonúst'i sughá hoh'alh? 'Aw 'uhót'e ghait'ah!

Ndun tinta' ant'en, 'en buba whunats'odoolnah huba' hoont'ah

³ 'Ink'ez njan k'an 'et nuhwudúsní 'i bugha zeh 'uda nuhts'ó t'l'a'aguz inle. 'Et nuhghuniya t'eh, doo ka nuhwheni nuhgha tso wusdle. 'Et whunts'ih nuhwheni nuhgha hoonúst'i sughá holts'it, 'et zeh hukwa' nuszun. 'Et huwa 'awhuz nuhts'úchatuzesyal. Be hóonust'i, 'i ts'iyawh nuhwheni chah be whúnoolhnik hukwa' nuszun. 'Et whuz na'a 'et ndaht'ah t'eh, 'et suba 'alha 'uhoont'ah. ⁴ 'Et sudzi tso be dzuh nuzut inle, 'et whuz na'a ndust'ah hoh 'i be sunatsul too hoonli hoh nuhts'ó t'l'a'aguz. 'Aw nuhdzi tso wulhsilh huba ilah nuhts'ó t'l'a'aguz. 'Et nts'e na'a be nek'ets'intsi, 'i ncha, 'i nuhwuhba ust'i, 'et t'ewhunteh zeh hukwa' nuhzun, 'et huwa nuhts'ó t'l'a'aguz. ⁵ 'Et whunts'ih 'aw si zeh tso chásdlah, nuhwheni chah ts'iyawh 'et hubugha 'en daja 'et huwa tso ahli. 'Et huwa k'an 'et nuhwudúsní, doo ka 'aw tube cho nuhwuhba dzuh 'udoosni gunih. ⁶ Nuhwheni 'ankw'us ts'iyawh ndun nuhwudúsní, 'en 'aw 'et soo hoolcho whe dzuh nus sulhdzut, 'aw 'et soo' hoont'ah. ⁷ 'Et k'an nuhwheni ts'iyawh buba whunats'odoolnah, 'ink'ez k'enáznoo'ah, doo ka 'o nus budzi tso unli t'eh, 'et hoh 'i be buch'a'ooddeh. ⁸ 'Et huwa khunek ulhtus, 'i be nuhwudúsní, ndunnah dune buba whunaoodelnah, 'en whunaoodeltun ts'ah'un na'a buk'ehtetsi'. ⁹ 'Et ndez un'a nuhts'un t'l'a'aguz, ts'iyawh tulih hukw'u ne'zant'en. 'Et 'i be t'ewhunteh zeh danáht'ah dune ahli. ¹⁰ 'Ink'ez ndun hoonli buba whunaoodélnah t'eh, si chah buba whunaoodutelnah. Hoonli buba whunaoodélnah, ndun buba whunaoodélnah, 'en Christ bunalh nuhwheni chah nuhwuhba whunaoodutelnah 'et huwa. ¹¹ 'Et whuz na'a 'uts'ut'en t'eh, 'et t'eh Satan 'aw nech'a' oolhdeh ghait'ah. Ndet whe nech'a' telhdoh hukwa' ut'en, 'et ts'iyawh t'ets'onínzun.

'Et neMoodihti dáti suba da'duteztan li'uja

¹² 'Aw 'et keyah Troas, 'et nusya, ndi Christ bughunek unzoo, 'i be hubulh yatelhtuk, 'et wheni whuz lhughadiya. 'Et Moodihti dáti suba da'duteztan li'uja. ¹³ 'Et whunts'ih sulhutsin Titus 'en buka ités'en, 'et whunts'ih 'aw nachálhtel. 'Et hoh suyégah be suba ts'ah'un cha'hóot'ah li'ust'ah. 'Et huwa hubugho whenásja, 'et Macedonia yun k'ut ts'ih lhughadiya. ¹⁴ 'Et whunts'ih Yak'usda ts'un chanailya dusni. 'En bugha Christ 'en be 'ahool-hyez whuch'a' ts'úlhdeh. 'Ink'ez ndi 'en bugha be t'ets'onínzun, sooltsun, 'i k'una'a nuwheni negha 'un 'ilcho whedándi li'int'ah. ¹⁵ 'Ink'ez ndan hudujih 'ink'ez ndan kwuncho yuh ts'ih hutedulh, 'en hubutah Christ 'en ba Yak'usda ts'un buba sooltsun li'ts'int'ah. ¹⁶ Bulunah dahútetsah whuzahiltsun, 'i be kwun cho yuh hutedulh. 'Et 'onghun chah be ts'ukhuna, 'i zahiltsun, 'i be 'ilhuz wheni hukhutenal, 'et whuz na'a zeh buba li'ts'int'ah. 'Ink'ez dune ndan 'int'ah ndi 'ut'en 'et huba soo 'úldzoo? 'Aw huhoolah! ¹⁷ 'Et whunulh'en, lhanah Yak'usda bughunek 'uts'un na'a ne'hiyulh'en. 'Et hoh sooneya 'uhulh'en. 'Et whunts'i 'aw hubulh ndúchats'it'ah. Yak'usda nehailh'a. 'Et ts'ah'un na'a hoh 'ants'i Yak'usda ba yats'ulhtuk ho' ts'utni, 'et whuz na'a Yak'usda bunalh hoh Christ 'en be yats'ulhtuk.

3

Nuhwheni Christ nuhwhuts'un yuk'e'ánguz 'i lí'ah't'ah

¹ Doo chah zeh 'uztet'ilh ts'ah'un dune ts'inli nuhwhuts'u duténih ih? 'Awundooh! 'Et bulunah ndez na'a njan nduhut'en, nuhwheni nuhwuhba dust'lus k'ut nuhwuhba na'dudóosdzi. Whuz na'a nets'u hukwa' nuhzun. 'Ink'ez nuhwheni nuhts'un dust'lus k'ut, 'i chah huba na'dutésdzi. 'Et whunts'ih nuwheni 'aw nduchá'ts'ust'en. ² Nedzi k'ut 'uk'e'éduguz hoh ts'iyannah hukw'u yahalhtuk. 'Et whuz na'a ts'iyannah dune t'enohonánzin. ³ Nts'e na'a nuhwuhba ne'úzninla hoh nuhla ts'út'en, 'et huwa Christ nuhwhuts'un yuk'e'ánguz, 'i lí'ah't'ah. Ts'iyannah t'éoonínzun 'et hubugha. Ndai 'uk'e'éduguz, 'i 'aw bé 'uk'üne'usduguz

be lí'inil, ndun Yak'usda khuna, 'en buyégha, 'en be 'uk'e'éduguz ho' 'int'ah. 'Aw tse k'ut 'uk'e'echa'íduguz, dune budzi k'ut 'uk'e'éduguz ho' 'int'ah.

'Uda khunek 'uk'e'éduguz, 'i bugha dune yahadlah, 'et whunts'ih Yak'usda buyégha be dune hukhuna

⁴ Christ 'en bugha Yak'usda 'en zeh but'anízntentan, 'et huwa whuz na'a yats'ulhtuk. ⁵ 'Et whunts'ih ndi 'ut'en huba whenich'oh duba sóo uzduhneh hoh ndi 'ut'en 'uts'ulh'ih, 'et 'aw whuz na'a chats'unízun. 'Et k'us Yak'usda 'en bugha zeh neghalts'ut hoh ndi 'ut'en huba sóo uzduhneh 'et huwa. ⁶ 'En bugha neghalts'ut hoh nuwheni chah huba soo uzdujúa. Ndi k'andit khunek nuwhuba lhadúsdlá neba neóoni'ai, 'et huba Yak'usda ba nets'út'en ts'inli. 'Et whuz na'a Yak'usda negha óoni'ai. Njan ndi k'an 'et nets'ú yoozi, dich'oh buyégha gha 'útni. 'Aw 'uda khunek 'uk'e'éduguz, 'i 'aw 'i bugha ilah. 'Et ndi 'uda khunek buk'e'éduguz, 'i bugha dune yahadlah, 'et whunts'ih Yak'usda buyégha be dune hukhuna nasdli 'et huwa. ⁷ 'Et ndi 'uda khunek yuk'e'ánguz, 'i tse k'ut buk'e'éduguz. Ndi khunek 'i bugha yahadlah suli. 'Et ndi ye dézti, 'i be 'uyinla. 'Et huwa Moses bunen k'ut but's'un hayánduz suli. 'Et but's'uh hanáwheoondunide, 'et whunts'ih Israel buzkehkah 'o nus huba hooltus, 'aw hinoolh'en ghait'ah. ⁸ 'Et whunts'ih Yak'usda buyégha, nts'e na'a nela 'ut'en, 'et 'o nus neba ye dézti, 'i 'int'ah. ⁹ 'Et ndi 'uda khunek yuk'e'ánguz, 'i bugha yahadlah suli, 'i dézti t'eh, 'et t'eh ndi k'an 'et 'i be nela 'uwuhudut'en, 'i ts'ah'un dune ts'inli, 'i 'o nus dézti ho' 'int'ah. ¹⁰ 'Et 'uda ndi ye dezti, 'i 'aw 'o nus dega nus ye dézti, chailah. 'Et ndi 'uda ye dezti, 'i k'an ye dezti, 'i 'on nus ye dézti 'int'ah 'et huwa. ¹¹ 'Et ndi 'uda 'int'ah, 'i dézti whunts'i, 'i hoolah wheninle t'eh, 'et ndi k'an dezti, 'i 'ilhuz wheni 'int'ah. 'Et huwa 'i dega nus dézti hó' 'int'ah. ¹² 'Et huwa ndai Yak'usda ts'un hukwa tsi ts'uhooli, 'et hoonchai. 'Et huwa tube cho hoh nohwulhul yáts'oolhtuk. ¹³ 'Aw Moses k'una'a cha'ts'ust'en. Ndi ndai but's'un hayánduz, 'i hoolah whénininle, 'et whuch'a dunen yegha' welhnik. 'Et whuz na'a whulatah wule whuch'a, Israel buzkehkah 'aw 'ahoolhyez honoolh'en ghait'ah. ¹⁴ 'Et whunts'ih hubeni duts'o suli. 'Et k'an 'et dzin whuts'un ndi ndai 'uda khunek huba lhadúsdlá hik'eyalhtuk, 'i but's'oh gha' weznik, 'i, 'ahoolhyez 'et zeh ndunt'ah. Christ 'en zeh yuts'ubut's'uhanaitelhchos 'et huwa. ¹⁵ 'Et whunts'ih k'an 'et dzin whuts'un ndai Moses yuk'une'úgzuz, 'i huk'eyalhtuk t'eh, budzi 'awhuz bugha' weznik li'hint'ah. ¹⁶ 'Et whunts'ih 'ilhunuh neMoodihti ts'un nalhú'a t'eh, 'et t'eh ndi bugha' weznik 'i hubuts'a hanaitelhchos. ¹⁷ 'Et neMoodihti 'en Yak'usda buyégha 'int'ah. 'Ink'ez neMoodihti buyégha nts'e dez'ai, 'et huwa ndi neba yuladetnik. ¹⁸ 'Et nuwheni chah nenen yuts'á hana'alhchooz hoh nts'e na'a be na'uzdunul'en 'i be ts'onilh'en, 'et whuz na'a neMoodihti ye dézti, 'i, 'ahoolhyez uznilh'en. 'Ink'ez ndi 'uk'e'éduguz, 'i uznilh'en, 'et 'i k'una'a 'uts'uja. NeMoodihti ye dézti, 'i 'o nus ye dézti, 'i k'una'a 'uts'int'ah. Dzin totsuk nusyaz zeh 'uts'et'ilh. 'Ink'ez neMoodihti buyégha, 'en bugha whuz na'a 'uhóoja.

4

Christ bughunek unzoo, 'i neba be whét'en, 'i unli

¹ 'Et huwa ndi Yak'usda ba be ne'ts'út'en, 'et whuz na'a Yak'usda ye te'ninzun. Nts'e na'a neghalts'ut, 'et hoh 'aw 'ustle' 'uts'ooneh ghait'ah. ² 'Et whunts'ih dune nunú'i tube hukwaya hoonli tune'hut'en, 'et huwa nuwheni ts'iyawh 'et whuch'a dah ts'utni. Dune ts'una'ah, 'et nuwheni 'aw nduchá'ts'ust'en. 'Ink'ez Yak'usda bughunek 'aw whuts'it bulh chats'úsdloh. 'Et whunts'ih khunek 'alha 'int'ah, hubúznlhtun. 'Et whuz na'a Yak'usda nalh ts'iyana hubuyuh ts'ih bugha t'ets'oninzun, 'i ts'un huba nats'oodútedzi. ³ 'Et ndi khunek unzoo, 'i be yats'ulhtuk, 'i bugha' weznik t'eh, ndunnah kwuncho yuh ts'ih hutédulh, 'en bugha' weznik ho' 'int'ah. ⁴ Ndunnah 'en ndi yun k'ut whuyak'usda dudeni be chawhes'en ubulhtsi. 'Et huwa Christ bughunek unzoo ye dézti, Christ, 'en Yak'usda yunduwhut'en, ndai but's'un háyanduz, 'i ndunnah dudeni be chahuwhés'en 'aw hube yudoodi ghait'ah. ⁵ 'Aw nuwheni'oh khuyanats'ultuk ilah. 'Et k'us Christ, 'en Sizi neMoodihti, 'en bugha 'un whuts'útni. 'Ink'ez nuwheni, Sizi 'en ba 'ulhna ts'inli. ⁶ 'Et Yak'usda tsahólhgus hoh be whét'en, 'i yuka' dani ibulh 'aho whét'en suli, 'et whuz na'a 'uhóoja. 'En zeh 'int'ah 'et huwa nedzi bé dendi li'uja. Ndi Yak'usda ye dézti, 'i bugha t'ezninzun, 'i neba be whét'en, 'i ho' 'int'ah. 'Et 'i nedzi be dendi. 'Ink'ez ndi ye dézti, 'i Sizi Gri bunen but's'un hayánduz ho' 'int'ah.

Ts'iyaintsuk hoonli hoontsi' nets'ó tukat, 'et whunts'ih 'aw nech'a 'oodeh ghait'ah

⁷ Neyust'e 'i whut'us be 'ulya, 'i lí'tsint'ah. 'Ink'ez ndi ye soode'a be 'uts'intah, 'i Yak'usda negha ininla. 'Et huwa ts'iyana t'ehonóozin ndi dega nus ye úlhtus, 'i Yak'usda but's'un haiyankat, 'aw nuwheni nets'u haínkat ilah. ⁸ Ts'iyaintsuk hoonli whe yuk neznílh't'uk, 'et whunts'ih 'aw nech'a 'oodeh ghait'ah. Tube whets'intsaz 'et whunts'ih 'awhuz uznint'uk ze' ts'int'ah. ⁹ Whulah teh nech'a ne'whut'en 'et whunts'ih Yak'usda 'en 'aw nela doot-nih ghait'ah. Khunek be nena'hulhdeh t'eh, 'et whunts'ih 'aw nech'a 'oodeh ghait'ah. ¹⁰ Nts'e na'a Sizi neMoodihti neba dazsai, 'et 'ilhuz neyuh whudez'ai. 'Et 'i be ts'iyana

t'ewhuntezeh Sizi ye khuna, 'i neyust'e hubutah 'uyint'ah. ¹¹ Nuwheni ndi 'ilhuz be ts'ukhuna 'i ts'it'i, nuwheni ts'iyawh Sizi 'en buba dazt'étsah, 'et wheni butl'a'úzdudelya 'et huwa. 'Et ndi yun k'ut neyust'e, 'i be Sizi ye khúna, 'i ts'iyana' t'ehontezeh. ¹² 'Et njan nuwheni be dazt'étsah, 'i neyust'e ghu hoonli. 'Et whunts'i nuwheni njan 'ilhuz be ts'ukhuna, 'i nuwheni nuhghu hoonli. ¹³ 'Ink'ez nuwheni nts'e na'a be nuwhuba 'alha 'uhoont'ah 'ink'ez nuwheni chah nts'e na'a be neba 'alha 'uhoont'ah 'i bulh 'iluhughah zeh 'int'ah. 'Et huwa nts'e na'a 'uda 'uk'e'éduguz, 'i ndet 'uwuhulhni, 'et ndez na'a njan ndutni hoh ndutni, "Et suba 'alha 'int'ah 'et huwa 'i khunek be yalhtuk." 'Et nuwheni chah 'i ts'iyawh neba 'alha 'int'ah, 'et huwa 'i khunek be yats'ulhtuk. ¹⁴ 'Et huwa njan t'ets'oninzun, ndun Sizi neMoodihti dinaidilhti, 'en zeh nuwheni chah Sizi 'en bulh dinánedutéleh. 'Et whuz na'a nuwheni 'ink'ez nuwheni chah ts'iyawh 'ilhunaneoowezdlá hoh dubut neninatelelh. ¹⁵ Nduhoolcho nelh ne'whut'en nuwhuba whútezoo 'et huwa. 'Et whuz na'a ndi dega nus ye únzoo, 'i, nuhtah hoonli, 'et nuwheni nuhgha 'o nus Yak'usda ts'un chanailya ts'utni wule. 'Et huwa hiba whudelhti.

Ndai chats'es'en, 'i whunts'i be 'alha 'uhoont'ah 'i be uznilh'en

¹⁶ 'Ants'i doo ka 'uts'ut'en ts'unoozin gunih. Neyust'e whénihjut 'et whunts'ih ndai neyéghah unli, 'i dzin totsuk ts'iyawh k'andit nadleh. ¹⁷ 'Et ndet hóontsi' neghá honkat, 'et 'astl'iyaz zeh neba 'uwhut'ih 'et huwa. 'Et neba 'ants'i li'uhoont'ah. 'Et k'us njan be hóontsi' neghá honkat, 'i be 'o nus neba be whudezti, 'i neba yulhtsi. 'Ink'ez ndi be whudezti, 'i 'ilhuz nuwheni 'uyinla. 'Et neba hooncha k'et 'aw uzdooni ghait'ah. ¹⁸ Ndai ts'a'en, 'i, neba 'ants'i unli. Ndai 'aw chats'és'en, 'i zeh neba ts'ah'un 'int'ah. Ndai ts'a'en, 'i, 'et 'astl'iyaz neba whutét'ih 'et huwa. 'Et whunts'ih ndai chast'en, 'i 'ilhuz wheni 'int'ah.

5

'Aw ts'a'en, 'i bé ilah hoh ndi yun k'ut uzdelhts'i, be 'alha 'uhoont'ah 'et 'i be zeh ndi yun k'ut uzdelhts'i

¹ 'Et t'ets'oninzun neyust'e unli, 'i bun k'una'a hoh ndi yun k'ut uzdelhts'i. 'Et when'ihjut t'eh, 'et ch'a Yak'usda 'en 'udun koo neba whulh'ai. 'Aw dune dula be 'uhóonla ilah, 'et 'ilhuz nduk yak'uz 'et 'úhoont'ah. ² 'Et huwa 'alha ndi bun be ts'uwhut'ih hoh khudutso li'ts'utni. 'Ink'ez nekoo nduk yak'uz whuz'ai 'et buk'ézntai. 'Et huwa nek'eyútelhbilh buts'un tube hukwa' uzninzun. ³ Nek'éyilhbun 'i be soo nenadinla li'ne'inla, 'et whuz na'a nduts'úja t'eh, 'et zeh 'aw 'ust'et chats'ilah li'ts'int'ah. ⁴ 'Alha nuwheni ndunnah ndi bun be huwhut'ih, nuwheni lhat hoontsi' nek'ut whuz'ai, 'et huwa khuts'udutso. 'Aw nena'ih be'et hukwa cha'uznínun. 'Et k'us 'o nus 'uyoo lhai be' 'uts'oot'e hukwa' uzninzun. 'Et whuz na'a be ts'ukhuna, 'i ndi be dazt'étsah, 'ants'i whélnó li'tet'ilh. ⁵ 'Et ndun nuwheni njan hiba lhanéinla, Yak'usda 'en 'int'ah. 'Uda Ndoni be lhanéinla, 'et 'i be bulah neba 'uk'elha whulhtsi. ⁶ 'Et huwa 'awhoolyez whéchats'uniljut. T'ets'oninzun neyust'e be nduts'int'ah t'eh, 'aw neMoodihti bulh cha'ts'it'ah. ⁷ 'Aw ts'onilh'en, 'i be ilah hoh ndi yun k'ut uzdelhts'i, be 'alha 'uhoont'ah 'et 'i be zeh ndi yun k'ut uzdelhts'i. ⁸ 'Et whunts'i 'o nus nedzi ulhtus hoh neyust'e koo chats'uhoot'ih t'eh, 'ink'ez neMoodihti bulh uzdelhts'i, 'et hoh 'o nus soo ts'uhootét'i.

Dune Yak'usda bube'ildzun, Christ neba naheyelh, 'en bubut nízteyalh

⁹ 'Et huwa ndi yun k'ut uzdelhts'i k'us yak'uz uzdelhts'i, ndet Yak'usda nets'o hukwa' ninzun, 'et 'ahoolhyez buba 'uts'uwuhulh'en whuz uznint'uk. ¹⁰ 'Et 'ilhunah ts'inli hoh Christ 'en neba naheyelh buk'usda bubut nízteyalh. 'Et huwa nts'e na'a ndi yun k'ut dats'últsi', k'us dats'úldzoo, 'et whuz na'a neba k'elha whutele. ¹¹ 'Ink'ez neMoodihti, 'en bé whunutjut, 'et hubugha 'et t'ets'oninzun. 'Et huwa ts'iyana' dune whú uzduznilt'uk. 'Et Yak'usda 'ilhunah ts'inli hoh nuwheni net'enínzun. 'Ink'ez 'et uncha nuwheni chah nuhyuh ts'ih bugha t'ets'oninzun, 'et hoh net'enahzun.

Yak'usda, Christ yudinda hoh yinkak dune ts'iyawh ts'un ninábudelya

¹² Nuwheni doo chah nuwhuba nats'ududoodzi ghait'ah. 'Et k'us nuwheni negha 'uwuhudelhti, 'et nuhts'u hukwa' ts'uninzun. 'Et huwa 'onghoh dune duna be hinilh'en zeh huhoont'i 'et whunts'i dahínt'ah hubudzi be 'aw howu nuni chaoonusde, 'et ndunnah dats'int'ah soo ts'ah'un na'a ubudutéhnih ho' hoont'ah. ¹³ 'Et ne-eni hoolah li'ts'int'ah t'eh, 'et Yak'usda buba' hoont'ah. 'Et ts'ah'un nuníznudeh ts'inli t'eh, 'et nuwheni nuwhuba 'uhoont'ah. ¹⁴ 'Et huwa Christ ye nek'entsi', 'i be 'o nus 'uzdunult'uk. Whunulh'en, 'ilhunuh dune ts'iyana' ba dazsai t'eh, 'et t'eh ts'iyana' yahadlah. ¹⁵ 'Ink'ez ts'iyana' ba dazsai 'et huwa nuwheni ndan ts'ukhuna, 'aw whenich'oh neba zeh ilah hoh ndi yun k'ut uzdelhts'i. 'Et k'us ndun neba dazsai 'ink'ez dinadija, 'en ba zeh ndi yun k'ut uzdoóltsi. ¹⁶ 'Et huwa k'an 'et njan whuts'un ndi yun k'ut dune nena be uznilh'en dahínt'ah, 'et 'aw

whuz na'a ilah hoh dune t'ebuznínzun. 'Et 'alha whutsuh da 'et whuz na'a Christ 'en bugha t'eznínzun. 'Et whunts'ih k'an 'et 'aw whuz na'a zeh 'en bugha t'ets'onínzun. ¹⁷ 'Et huwa ndan Christ yudínda, 'en buyégha nduhóolcho k'ahoondit nawhúsdli. 'Et whutsuh da 'int'ah hukw'u na'a, 'et ts'iyawh buba hoolah whuzdli. 'Et k'us ts'iyaintsuk buba k'andit nawhúsdli. ¹⁸ Ndi Yak'usda ts'un 'int'ah. Yak'usda dich'oh Sizi Gri 'en bugha ts'un dune nuwhulh soo ninawhunt'ai. 'Ink'ez ndi Yak'usda ts'un dune nuwhulh soo ninawhunt'ai, 'et hubugha dune bulh yáztelhtuk, 'et k'an 'et Yak'usda negha ooní'ai. ¹⁹ 'Et whuz na'a, Yak'usda Christ yudínda hoh yinkak dune ts'iyawh ts'un nuwhulh soo ninawhunt'ai. Ts'iyaintsuk hoh hich'a ne'ust'en, 'et 'aw 'o 'un hubuk'echahoo'al. 'Ink'ez ndi khunek Yak'usda ts'un dune nuwhulh soo ninawhunt'ai. 'Ink'ez ndi Yak'usda ts'un dune nuwhulh soo ninawhunt'ai, 'i negha iní'ai. ²⁰ 'Et huwa Christ 'en ba khunek na'a ts'inli. Yak'usda nuwheni nebe nohwhulh yáhtuk li'utni. 'Et hoh nuhts'un tézdudli, k'an 'et whuts'un soo Yak'usda ts'un naoohlúyeh! ²¹ Christ, ndun lubeshi bughu hoolah, 'en Yak'usda nuwheni neba lubeshi sulí 'et huwa. 'En bugha Yak'usda ye ts'ah'un na'a 'int'ah k'una'a 'uts'int'ah ka.

6

Yak'usda ba ne'ts'ut'en

¹ 'Et 'ink'ez nuwheni Yak'usda 'en bugha ndi lhulh 'uts'ut'en ts'inli hoh khunek ulhtus, 'i be ndun whuts'utni, Yak'usda ye unzoo, 'i 'ants'i 'et wulhchoot gunih. ² 'Et njan ndutni, "Soo 'et neóninzut, 'et nyoozálhts'a.

Ndet dzin dinjih, hoh weghah whezulh 'et nla 'usja," ni.

Njan whunulh'en, 'ilhudzin 'aw 'et nela 'ewhuduténih, 'aw 'et neóninzut. Njan whunulh'en, hoh teh uzduutejih neóninzut, 'aw 'et nduhooja. ³ 'Aw nuhwhuba dzuh nuhghá ts'uhó'alh hukwa cha'ts'unízun. 'Et huwa nts'e na'a Yak'usda ba ne'ts'ut'en ts'inli, 'aw hoh hukw'éhóh'ts'it hoolah. ⁴ 'Et whunts'ih ndúhoolcho hoh ts'ah'un na'a Yak'usda ba ne'ut'en 'uts'int'ah. 'Et ndez na'a njan ndúts'int'ah, 'uts'oot'e ghait'ah, 'et whunts'ih whulh ts'ooyin. Nek'éhoot'ah nets'u whélt's'ulh, hoonliyaz ka 'ezdunidzut, whulutah neba howa whúlna, ⁵ 'ink'ez nehoollhtsas, tsak'ezdi'ai, dzuh nenahulhdzut, 'ut'en howa whúlna, chats'ítez, 'ink'ez sahá'ts'udelya 'et chah. ⁶ Lubeshi ch'a khuts'udli, be t'eeonudzun, tacha'ts'udinik, 'uyoon ts'un ts'inzoo, 'ink'ez Ndoni be ts'ukhuna, 'ink'ez ts'ah'un na'a be nék'ets'intsi', 'et chah. ⁷ Khunek be 'alha 'int'ah, be yats'ulhtuk, Yak'usda ye ulhtus, 'i be 'uts'ut'en, be lhts'udúghan, 'i ts'it'i hoh ts'ah'un na'a 'et nuwheni lhelch'a ts'ih nela be nuts'úle. Whuz na'a Yak'usda ba ne'ts'ut'en ts'inli. ⁸ Ndet huba uzdzéti k'us huba chats'uditi, 'ink'ez ndet hoontsi' k'una'a neghu yahalhtuk, k'us hoonzoo k'una'a neghu yahalhtuk, 'ink'ez dune uzna'ah nehutni, ts'ah'un na'a khunek be 'uts'utni 'et whunts'ih. ⁹ Dahoont'ah huwa dune t'enehunínzun hunínzun, 'et whunts'ih ts'iyannah net'ehunínzun. Nts'e na'a hukw'é daztásah li'ts'int'ah 'et whunts'ih dáhooja, 'et whulh ts'úkhuna. Nehutuzelghelhel hukw'u na'a nehoollhtsas t'eh, 'et whunts'ih whulh ts'úkhuna. ¹⁰ Dats'int'ah huwa tso ts'inli, 'et whunts'ih nedzi be ts'uhóont'i. Dats'int'ah huwa tets'ul'en 'et whunts'ih ndai be soo 'uts'oot'e, 'i lhanah hubugha ts'iyu'aih. Dáhoont'ah hoh ndai hoonli be tét's'ul'en 'ink'ez chats'ít'i, 'et whunts'ih ts'iyaintsuk ts'ít'i.

'i but'aghóohnalh gunih

¹¹ Nuhwheni Corinth whut'en ts'et whocho nuhwhuzdáni. Nedzi ndulhcho 'i be nuhk'ets'intsi' ts'ulhtsi. ¹² 'Aw nuwheni neghá ilah k'ah náht'uk. Nts'e na'a nets'un daht'ah, 'et whuz na'a 'aht'ah. ¹³ 'Uzkehka ahli hukw'u na'a nohwhulh yáhtuk. Nts'e na'a nuhts'un 'úts'int'ah, nuhwheni chah 'et whuz na'a nets'un 'óoh't'e. ¹⁴ Nduunnah huba 'alha cha'hoot'ah, 'en hubuts'ú nidoohdelh gunih. Nts'e na'a simba ts'ah'un na'a ne'ut'en 'ink'ez ts'ah'un na'a nucha'ust'en, 'en 'aw lhulh 'uhoot'en ghait'ah. 'Aw whuz na'a 'uhót'e ghait'ah! Nts'e na'a simba whét'en 'et usda 'ink'ez tsahólhgus yuh usda bulh, lhuzih hooduke? ¹⁵ Nts'e na'a simba Christ, 'en Beliar 'en bulh 'ilho 'uhoot'e? 'Et nts'e na'a simba buba 'alha 'uhoot'ah 'ink'ez buba 'alha cha'hoot'ah, bube 'ut'en k'ah lhgha 'uwuhútet'ih? ¹⁶ Nts'e na'a simba Yak'usda hubuluglez whucho 'ink'ez 'ants'i 'uk'edétsi bulh lhgha' tet'ih? Soo cho whunulh'en Yak'usda khúna, 'en hubuluglez whucho ahli. 'Et whuz na'a Yak'usda ndutni, "Hubudzi yuh 'ust'ah 'ink'ez hubutunusya.

HubuYak'usda tesdle 'ink'ez 'en sudune hutele."

¹⁷ 'Et huwa neMoodihtsi nets'u náhezya hoh ndutni, "Nuhwheni 'en hubutah ts'ih hanáhdelh

'ink'ez hubuch'a 'aht'ah.

Ndai dutsun unli, 'i but'aghóohnalh gunih,

'et sih nanhoolhúchoot.

¹⁸ 'Et Si nuhwhe'aBá whúsdle,

'et nuhwheni suye'kah 'ink'ez sutse'kah tehle.
NeMoodihti ts'iyaintsuk hoh ulhtus, 'en 'utni."

7

¹ 'Et huwa nuhwhuk'esi' soo zélhts'ai, ndi yé nets'u nahezya, 'i neghun hoonli. 'Et huwa neyust'e 'ink'ez neyéghah 'i ndai lubeshi be dutsun suli, 'i ts'iyawh buna'ts'oolhdeh. Yak'usda 'en bé uznuljut. Ndi bé uznuljut huwa 'et 'i be ndi lubeshi bughu hoolah, soo ts'ah'un na'a lhats'ódooleh.

'Aw 'ilhunah whunts'i buch'a núcha'ts'ust'en

² Nuhwheni nuhdzi neba da'dútahtih. 'Aw 'ilhunah whunts'i buch'a núcha'ts'ust'en. 'Aw 'ilhunah whunts'i tinta cha'ts'ust'ih. 'Aw 'ilhunah whunts'i bugha hacha'ts'undunest'a. ³ 'Aw nuhk'ehos'ah hukwa ilah 'udusnih. Hoh da nuhwhudáni nedzi yuh ahli hoh nohwhulh yáts'utadlah k'us nohwhulh ts'ukhutena. ⁴ Tube cho 'aw whechasaz hoh 'et hubugha nohwhulh yátelhtuk. Tube cho nuhwhudéllhti hoh nuhghu yalhtuk. Bé k'enaznut'a, sudzi dezibun. Hoontsi', 'i sk'uz nínt'uk, 'et whunts'ih tube cho be ts'úhoont'i, 'i sudzi dezibun. ⁵ Soo ts'ah'un na'a whunulh'en, Macedonia yun k'ut néznindel, ts'iyaintsuk be nech'a dzuh né'whut'en. 'Et bulunah neghu lhena 'uhudutni. Ts'iyaintsuk hoh wheznuljut, 'et huwa 'aw nats'ooyis ghait'ah. ⁶ 'Et whunts'ih ndan hubudzi nduda, 'en ts'iyawh Yak'usda k'ena'bune'a. 'Et Titus neghu ninya, 'et hoh nuwheni chah nek'enane'a. ⁷ 'Aw 'et zeh ilah, nuhwheni ts'iyawh sk'eni sahlí. 'Et huwa ahtso ahli níóonah'ai. 'Et whuz na'a tube ncha, 'i be si ba hukw'úne' teht'en hukwa' nahzun. Titus ts'iyawh 'et hukw'a nelh nawhelnuk, 'et huwa 'o nus whunéllhnik suli. ⁸ Soo cho nulh'en, ndi dustl'us nuhts'o t'l'ai'ai 'et hubugha tso ahli inle. 'Aw sba dachahóot'ah dusni, 'et whunts'ih sudzi únduda hoh 'uk'úne'zíguz. 'Et whunts'ih 'aw sudzi chándidah. T'éoonúszun ndi dustl'us be nuhdzi dúnteda, 'et whunts'ih 'astl'iyaz huba zeh nuhdzi ndúnteda. ⁹ 'Et k'an 'aw 'et whunéllhnik. Tso ahli 'aw 'et huwa ilah. Ndi tso bugha lubeshi whuch'a nuhbeni nahadunehla. Yak'usda hukwa' ninzun k'una'a tso ahli inle 'et huwa. 'Et hubugha tso ahli hoonliyaz hubugha nuwheni negha tinta chawháh'al. ¹⁰ Yak'usda hukwa' ninzun k'una'a tso ts'inli t'eh, 'et 'i gha lubeshi whuch'a ne-eni lht'anaznoolelh uzdoojih ka, whuz na'a 'aw nedzi úndooda ghait'ah 'et huwa. 'Et whunts'ih ndi yun k'ut hiye tso hinli, 'i be yaztádlah. ¹¹ Howu nuní nuhtuz, Yak'usda hukwa' ninzun k'una'a tso ahli inle. 'Et dahoja ts'iyawh 'a tsih ndutéhnih hukwa' nahzun. Yak'usda 'en bulh dunekah dutéhnih hukwa' nahzun. 'Et nuhwhuba dzuh whuzdli. 'Et hubugha whenulhujut lí'ah't'ah, 'et hoh sk'enehtai. Tube cho ts'ah'un nenaóoteh'ah hukwa' nahzun. Nuhwhuba dzuh 'uhoont'ah, 'et chah ts'iyawh nenaóoteh'ah hukwa' nahzun. 'Et huwa ndúhoolcho hoh lubeshi nuhghu hoolah suli. ¹² Ndi dustl'us nuhts'ó k'e'aguz, 'i be, ndun tinta' ant'en 'ink'ez ndun bulh tinta' ant'en 'aw 'en bugha ilah nuhts'ó t'l'a'aguz. 'Et whunts'ih Yak'usda nalh ts'ah'un na'a nuhwhuts'unulhtun, 'et huwa nuhts'ó t'l'a'aguz.

Titus da nedani, 'i bugha tube hoonúst'i

¹³ 'I bula gha ts'ih k'enáneht'a. 'Et 'i be zeh nuwheni chah k'enáznet'a. 'Et 'o 'un chah, Titus buyégha nuhwheni nuhgha 'et k'andít nasdli lí'uja. 'Et huwa 'o nus tube cho ts'onéllhnik. ¹⁴ 'Et nts'oh tulih Titus ts'un nuhoonúst'i hoh zeh nuhghu yalhtuk, 'aw 'et hukwayá chasdlah. 'Et k'us ndi khunek be 'alha 'int'ah be yats'ulhtuk, 'i be zeh nuhwhubúlh yats'ulhtuk. 'Ink'ez 'et whuz na'a nts'oh Titus ts'un nuhoonúst'i zeh nuhghu yalhtuk, 'et chah 'alha 'uhoont'ah Titus nehoni'ai. ¹⁵ 'Et whunalnih nts'e na'a khunek k'une' aht'en. 'Et whuz na'a nuhyust'e dulduz 'ink'ez nuhwhuba wheóonujut hoh n'az de nuhts'un úyalh nulh'en. 'Et huwa 'o nus nuhk'esi' suli. ¹⁶ 'Et ts'iyaintsuk né'ah't'en ts'ah'un na'a ne'ah't'en, 'et huwa 'i be tube cho whunéllhnik.

8

Ts'iyaintsuk ndai ilh'en, 'i degha nus hoonzoo k'una'a 'uhóonla

¹ Sulhutsinkah, 'aw 'et Macedonia yun k'ut Yak'usda ba 'ilhunahuwúdluh, nts'e na'a Yak'usda ye unzoo, 'i 'et butl'a whélt's'ut, 'et hubugha ts'iyawh 'et t'ewhuntehzezh hukwa' uzninzun. ² Tube te'hul'en hubutah 'et hoont'i tube cho huhoont'i. Tehel'en 'et whunts'ih hubula hoonli hoh 'onghoh bula' huja. ³ 'Ink'ez chah dahínt'ah hoh daooneltsuk hubugha húnle, 'et whunts'ih 'et 'o nus 'uwhuneltsuk, 'et zeh hubugha hutelelh, whuz na'a hukwa' huninzun 'ink'ez 'et whuz na'a nduhuja. 'Et t'ewhunészin 'et ts'ah'un na'a 'uhoont'ah. ⁴ Ndi ye unzoo, 'i, 'et Macedonia whut'en butl'a hó'ai, 'et huwa dune Yak'usda bube'ildzun, 'en lhulh 'uhint'ah hukw'u na'a hoh bula hutenilh. 'Et hukwa soo cho nehoodulhkut 'et ts'iyawh dune Yak'usda bube'ildzun 'en huba ts'óolhchoot. ⁵ 'Et ndahúja, 'aw hukwa tsi chats'uhoolih k'una'a ne'hinla. 'Udechoo dich'oh neMoodihti gha' hududulya. 'Ink'ez Yak'usda hukwa' ninzun k'una'a, 'i gha negha' hududulya. ⁶ 'Et huwa Titus khunek ulhtus,

'i be uzdáni, ndi ye unzoo, 'i nuhwheni 'udechoo nohwhulh whe 'idilh'en, 'et ts'iyawh lhaóodooleh huba' hooht'ah. ⁷ 'Et whunts'i ts'iyaintsuk ndai ilh'en, 'i dega nus hoonzoo k'una'a 'uhóonla. Be 'alha 'uhoont'ah 'i be, nuhghunek, be t'éoonudzun, 'a tsih ndutehnilh, 'ink'ez be nek'ehtsi, 'i chah. 'I ts'iyawh dega nus hoonzoo hukw'u na'a 'uhóonla. 'Et whuz na'a ndi ye unzoo, 'i be hoonzoo whuzúhtsi.

Christ 'en k'una'a 'uts'oot'en

⁸ 'Aw 'et ndahneh nuhwhudusni ilah. 'Et whunts'ih nts'e na'a 'uyoon 'en 'a tsih 'uhudute-nilh, 'ink'ez be nek'ehtsi, 'i whunéuntelhtun, 'et whuz na'a 'un whudusni. ⁹ NeMoodihti Sizi Gri, 'en ye unzoo, 'i bughu t'éoonáhzun 'et huwa. Nts'e na'a dalcho 'i be soode'a 'int'ah, 'et whunts'ih nuhwheni nuhwhuba tel'en suli. 'Et ndai ye tel'en, 'i nuhwheni be soo deh'a wahle. ¹⁰ Ndi daja nuszun 'et ts'ah'un nuhwhudutesnilh, 'et dega nus nuhwhuba whutézo. 'Ugha da nuhwheni hukwa' nahzun 'ink'ez hoonáht'i hoh ndaht'en, 'et 'awhuz tulih 'et ndaht'en. ¹¹ K'an 'et lhaóodooleh huba' hooht'ah. 'Et nts'e na'a nuhwhubeni lhadáhla, whuz na'a lhaóodooleh. ¹² 'Et whunulh'en, dune dudení lhaídinla hoh sooneya datsuk huwa yúte'ah, 'i 'aw 'et soo 'úneltsuk ho' 'int'ah. Ndaí huwa yúte'ah, 'o 'unyaz huwa yúte'ah hukwa' ninzun whunts'i, 'aw 'ooneh ghait'ah, 'et soo' hooht'ah. ¹³ Njan nuhwheni nuhwhuba howa whulna 'ink'ez 'onghun 'aw hoonliyaz cha'hust'en, 'aw 'et 'uwhudúsi ilah. ¹⁴ 'Et k'us ts'iyannah ba lhugha 'ahot'e. 'Et whuz na'a nuhwheni lhai aht'i t'eh, ndunnah cha'it'ih, 'en be bulah bughah'aih. 'Et whuz na'a lhula' ts'oodut'en huba' hooht'ah. ¹⁵ 'Et whuz na'a whutsuh da 'uk'e'anguz hoh ndutni, "Et ndan k'us lhai hílhchoot, 'en 'aw dítezkát, 'i whunts'i 'aw chait'i, 'ink'ez ndan dune hukw'elh'ih ilhchoot, 'aw hoonliyaz ye ndunidzit, 'i whutélah."

Yun k'ut Judea 'et Christ bube'ildzun, 'en huba sooneya 'ilhunats'un tuwé'ah

¹⁶ Yak'usda ts'un chanailya ts'utni. 'En 'uja Titus ba hoolhtus whulhtsi, 'en soo cho nuhla tet'ilh 'et whuz na'a hukwa' ninzun. ¹⁷ Neghunek ulhtus, 'i ilhchoot, 'aw 'et zeh ilah, dich'oh hukwa' ninzun hukwa nuhts'u whénya. ¹⁸ Ink'ez 'uyoon nelhutsin, ndunnah khunek unzoo, 'i be yalhtuk, 'et huwa Yak'usda ba 'ilhunahuwúdulh, 'en ts'iyawh hiba budélti. 'En chah Titus bulh whuz nuhts'ún whe buts'alh'a. ¹⁹ 'Et zeh ilah, ndunnah 'en Yak'usda ba 'ilhunahuwúdulh neba 'utahahúyalhti nelh té'us 'ink'ez nela tet'ilh whuba. 'Et whuz na'a ndi 'ut'en unzoo, 'i 'onghoh huba ne'hut'enah ts'inli. 'I be neMoodihti dich'oh ye dézti, 'i t'ehinoozeh. 'Ink'ez 'i be nuhwhubeni lhadint'ah t'ets'onózin. ²⁰ Ndi huwant'ai, 'i hubutazteleh, 'aw hukwa nek'éholts'it gunih. 'Et whuch'a ne'ts'ut'en. ²¹ 'Et neMoodihti nalh 'ink'ez ts'iyannah chah nalh soo ts'ah'un na'a 'uts'otelilh. ²² 'Ink'ez nelhutsin, 'en chah, bulh whets'alh'a. Nduh lhat ts'óolhdzai 'et huwa t'ets'onínzun, 'ahoolhyez huba ilh'i tube cho 'et nduténilh huba. 'En zeh nohwhulh budzi hoonli hoh nuhwheni 'a tsih nuhts'utéyalh hukwa' ninzun. ²³ 'Et k'us ndan Titus hika' 'oodulhkut t'eh, 'en sulh 'ut'en nuhwheni nuhwhuba sulh 'ut'en 'int'ah, budóohni. 'Et ndunnah nelhutsinkah ká' 'oodulhkut, 'en Yak'usda ba 'ilhunahuwúdulh khunek huba na'a 'ink'ez Christ ye dezti 'uhint'ah, budóohni. ²⁴ 'Et huwa Yak'usda ba 'ilhunahuwúdulh hubunalh, ndunnah nuhts'u hunindel, nts'e na'a be nek'ets'intsi, 'i aht'i, 'ink'ez nts'e na'a nuhwhuba ts'odelhti, 'et ts'iyawh bunalhts'et haotehlelh.

9

Lhadóoht'e ndi sooneya huwa teh'alh

¹ 'Aw 'et dune Yak'usda bube'ildzun, 'en hubula' tehnilh, 'aw 'uyoo khunek nuhts'o k'e'óosges huba cha'hoot'ah. ² 'Et ndutéhnilh hukwa' nahzun t'éoonuszun. 'Et huwa ndunnah Macedonia whut'en ts'un nuhwhudélti hoh nuhghu yalhtuk. Achaia yun k'ut nuhwhenghah whut'en ndet lhadóoduteleh, 'et 'ugha da lhadódinla hubudáni 'et huwa. 'A tsih 'uwhténilh hukwa' nahzun, 'et t'éoonúszun. 'Et huwa nuhwheni nuhgha ndunnah Macedonia whut'en k'us lhanah sooneya howa híte'ah 'et huhóost'et. ³ 'Ink'ez nts'e na'a njan be nuhódelhti, 'aw t'eduzoosnih ghait'ah, 'et huwa nelhutsinkah nuhts'un whebalh'a. 'Et whutsuh da nuhwhudáni, 'et huwa nuhzooneya be lhadóoht'e. ⁴ 'Et bulunah Macedonia whut'en, khun teh sulh hútooya, 'et nuhwheni 'aw lhachadaht'ah t'eh, nts'e na'a be nóhwhudélti, 'i nuwheni bukahooyasli uzteleh. 'Ink'ez nuhwheni, 'et do, nuhwhuba dáhoont'ah? ⁵ 'Et ndunúszun huwa nelhutsinkah 'uda sutsuh nuhts'ó toodelh hubudúsi. 'Et hoonáht'i hoh howa téh'alh, 'et t'eh k'udada huwa téh'alh lhaodóoleh. 'Et whuz na'a ndi huwa téh'alh, hoonáht'i hoh howa téh'alh, 'et t'eh 'aw soo 'a tsih ndahneh nuhts'udóoni ghait'ah.

Hoonáht'i hoh ndi sooneya huwa óoh'alh. Whuz na'a Yak'usda nuhts'u húkwa' ninzun

⁶ 'Et ndez na'a njan dúhoont'ah, ndan hoontsol, 'i 'ainule, 'en hoontsol, 'i haíntelelh. 'Ink'ez ndan lhai 'ainanla, 'en k'at li lhai haíntelelh. ⁷ 'Ilhunah hinli hoh ndai dudzi be hukwa' huninzun huwa híte'ah, 'et 'uneltsuk, 'i huwa hóo'ah. 'Aw 'et hukw'edutsi' ilah k'us whuz hinilht'uk huwa ilah. 'Et huwa ndan hoont'i hoh huwa 'a'ah, 'en Yak'usda hubuk'entsi'. ⁸ Yak'usda soo 'últus hoh ndai ye unzoo, 'i 'o nus 'uneltsuk, 'i negha natedukulh. 'Et hoh ndai be ndunahdzit, 'i 'o 'un lhai teht'i. 'Et 'ut'en unzoo, 'i 'ulh'en, 'i, ts'iyaintsuk nuhghanus 'uneltsuk, 'i nuhtl'anatedukulh. ⁹ 'Et khunek 'uk'e'éduguz, 'et ndutni, "Nduhóolcho whe dune tehul'en, 'en chah hubula 'uja.

Ye ts'ah'un na'a 'int'ah, 'ilhuz wheni 'int'ah."

¹⁰ 'Et ndun nuhgha íyunle, 'en 'o nus úncha lhai nuhghanle. 'Et hoh nuhwhe'ut'en ts'ah'un na'a 'int'ah, 'i 'o nus lhai tele. ¹¹ 'Et nduhóolcho hoh soo deh'a 'et ndet lhts'un nahzoo, 'i be 'onghoh hubuts'un nuhla hoonli. 'Et huwa Yak'usda chanailya ts'utni. ¹² 'Et dahoont'ah huwa nuhsooneya bugha nuh'e'ut'en be ne'hut'en ahli, 'et hoh dune Yak'usda bube'ildzun hinli, 'en hiye ndunidzit, 'i huba soo 'uneltsuk. 'I bugha lhanah Yak'usda ts'un tube cho chanailya hutni. ¹³ 'Ink'ez ndet 'uyoon nuh'e'ut'en k'ah whebuntelhtun, 'i be, 'et ndúwhulcho 'onghoh Yak'usda 'o nus huba whudéilhti. Christ bughunek unzoo, 'i daja dahni, 'et zeh hukw'úne' aht'en. 'Et huwa nuhla hoonli hoh Jerusalem whut'en, 'en bula 'aht'en, 'ink'ez 'un whut'en, 'en chah hubula 'ahja. ¹⁴ Yak'usda ye unzoo, 'i, hóont'i hoh nuhyé yuda'ai, 'et huwa nuhk'e ni hinli 'ink'ez nuhwhuba tenahududli. ¹⁵ Yak'usda ndi 'aw buk'elha chats'uhoohltsil hoh negha ín'ai, 'i unzoo k'et, 'aw uzdooni ghait'ah. 'Et huwa tube cho chanailya ts'utni.

10

Ndai be lhts'udughan, 'i, 'aw ndi yun k'ut whuts'u haínzut, 'i ilah 'int'ah

¹ Si, Paul, nuhghu tédusdlih. Christ ye yuh 'ududaldzin, 'ink'ez yé soo nilyaz ne'bulh'en, 'i be' dusni. Nts'e na'a dast'ah hoh nuhtah sída da, 'aw whe chaníljut hoh naheyelh chásdlah. 'Et whunts'ih lhe'utni, nuhwuch'a 'ust'ah t'eh, 'et chaníljut hoh naheyelh 'i be nuhwuts'un 'ust'ah. ² 'Et nts'e na'a neyust'e whuts'u nint'uk hukw'u na'a, 'et whuz na'a zeh 'uts'ut'en huninzun. 'Et nuhtah ndunt'ah, wheóonujut hoh hububut ninátesdalah. 'Et huwa nuhts'u te'dusdli ndet nohwhulh 'ust'ah t'eh, 'aw nuhts'un chaníljut hoh naheyelh hukwa cha'núszun. ³ 'Et ndi yun k'ut uzdelhts'i, neyust'e whuts'u nint'uk, whuz na'a ilah nuts'íya. ⁴ Whunulh'en ndai be lhts'udughan, 'i, 'aw ndi yun k'ut whuts'u haínzut, 'i ilah 'int'ah. 'Et Yak'usda be ts'íltus, 'i be lhts'udughan, 'i 'int'ah. 'Et ndai be néch'a whudetni, 'i ts'iyawh náninezyuz. ⁵ Ndet lhutah 'ilho howa yahalhtuk, 'i chah ts'iyawh hoolah wé nilhtsi. Ndai Yak'usda ye whunih, 'i chah higha ndoh 'oot'e hukwa' hut'en, 'i chah ts'iyawh hoolah yutelhtsilh. 'Ink'ez dune daja huninzun, 'et chah nahuhootéichulh, 'et hoh Christ hik'ah ts'ih ne'hoot'en. ⁶ 'Aw 'et ndai ts'iyaintsuk hukw'u ne'zajt'en t'eh, 'et ndunnah hukw'ú nucha'hit'il, nuwheni 'en ts'iyaintsuk dzuk notedeh hubugha ts'óte'ah.

Nuwheni chah Christ bube'ildzun 'uts'int'ah

⁷ 'Aw 'et njan nuhwhuba dáhoont'ah? Ndet hóh'en, 'et zeh ih whunulh'en? Ndunnah Christ bube'ildzun na'hudunúdzun, dáhoont'ah Christ bube'ildzun 'uhint'ah, 'et whuz na'a zeh, nuwheni chah Christ bube'ildzun 'uts'int'ah. 'Et chah soo cho howu nuní noohzut! ⁸ 'Et neMoodihti dune gha ndoh 'uts'int'ah negha óoni'ai. 'i bugha 'o nus ulhtus nuhwuts'utelhtsilh, 'aw hoolah tehleh k'una'a ilah 'un whuts'uleh. Ndet negha óoni'ai, hóont'i be howu yalhtuk, 'et 'aw hukwa yáchasdlah. ⁹ Njan ndun whudusni, 'aw nuhwhe'oonulhjoot ilah ho' dusni. ¹⁰ 'Et huwa njan ndun whudúdni, bulunah 'uhútni, "Ndi Paul dustl'us yuk'une'úgzuz, 'i tube be óonujut 'ink'ez ulhtus. 'Et whunts'ih netah usda t'eh, buyust'e lait'ah 'ink'ez ndai ye yalhtuk, 'i 'ants'i 'int'ah," hutni. ¹¹ 'Et whunts'ih ndan 'et ndez na'a howu yahalhtuk, soo cho howu nihoole, ndi ne'e'dustl'us, 'i be nts'e na'a neghunek daja ni, 'et nket'ah nuwheni nuhtah 'uts'int'ah t'eh, whuz na'a zeh uzte't'ilh.

Ndai 'ut'en negha ín'ai, 'i zeh 'uts'oolh'en huba' hoont'ah

¹² 'Et bulunah dich'oh ts'ah'un dune na'hududútni, 'aw nuwheni ndúchats'oost'en. Hedich'oh hubutah dahínt'ah, 'et 'en hubuk'una'a nducháts'oost'en. 'Et whunts'ih ndunnah hedich'oh hubutah duba nahududzoo, 'et ndunt'ah 'aw huwhunih ilah ho' hint'ah. ¹³ 'Et whunts'i ndai 'ut'en, 'i Yak'usda neba yoozi, 'aw 'i zeh ts'uhóont'i howu yats'ulhtuk. 'Ink'ez ndi 'ut'en neba yoozi, nuwheni chah soo nohwhulh 'utni. 'Et 'uyoo 'ut'en bughu yats'oolhtuk huba cha'hóot'ah. ¹⁴ 'Et ndet 'ut'en 'uts'oolh'en neba hoozi, 'et 'o 'un ka' ts'oot'en ghait'ah. 'Et huwa nuwheni chah Christ bughunek unzoo, 'i bulh nuhghuznindel. ¹⁵ 'Ink'ez 'uyoon dune Yak'usda 'ut'en hububa yoozi, 'i 'aw ts'uhóont'i hoh bughu yats'oolhtuk ghait'ah. 'Et nket'ah 'uwhuténilh hoh nuhwhuba 'alha 'int'ah 'o nus 'uhoolcho nuhwhuba tele, 'et nuwheni chah nuhtah 'o nus nuhwhuba ts'incha tele. Ndai 'ut'en neba

yoozi, 'et nuhwheni nuhwhuba ts'incha tele. ¹⁶ 'Et 'o 'un yun k'ut ndi khunek unzoo, 'i be yats'oolhtuk. 'Ink'ez 'uyoon 'ut'en buba yoozi, 'i 'aw ts'uhóont'i be yats'oolhtuk ghait'ah. ¹⁷ 'Et whunts'ih ndunnah 'ududálti, 'en neMoodihti, 'en be 'ududóolti huba' hoont'ah. ¹⁸ 'Et ndan dich'oh duba na'hoodudzi, 'en ndunt'ah, 'et 'aw soo hiyulh nechahoo'al hinle. Ndan neMoodihti yoozi, 'en zeh ts'ózi huba' hoont'ah.

11

Paul, Corinth whut'en, 'en hubughu ni unli

¹ Ndi khunek 'ants'ih be nuhwhulh yalhtuk nuhzun, 'et whunts'i 'astl'iyaz nduchah 'o 'un lih sugha óonah'aih. 'Ink'ez 'alha 'i be whuz na'a soo zélhts'ai. ² 'Et Yak'usda be 'oolnih, 'i be si chah nuhwhuba 'oolhunih. Nuhwhuba nahuzíya 'ilhunuh dune bughu tehdalh, Christ 'en 'int'ah. Nuhwheni 'aw dune yut'achagnesnak nuhtsun hoolah lí'ah'tah hoh Christ bughanwhunila. ³ 'Et whunts'ih hoh da ndi t'l'ughus ye 'uts'un 'uninzun, 'i be nts'e na'a Eve naina'a, 'et whenlhújut nuhwheni chah 'et whuz na'a nuhwhubeni tinta itel'hil. 'Et ndúhooja t'eh, 'et t'eh nuhwhubeni Christ ts'un 'aw 'ilho wule ghait'ah. ⁴ 'Ink'ez lhe'ahja whunulh'en, 'ilhunuh dune nuhghu ninya hoh 'uyoon Sizi bugha nohwhulh yalhtuk, 'aw 'en whuz na'a Sizi nuhyulh yachats'ilhdih. K'us 'uyoo yéghah úlhchoot t'eh, 'aw nuwheni neghá ilah úlhchoot. K'us 'uyoo khunek unzoo, 'i úlhchoot t'eh, 'aw nuwheni neghá ilah úlhchoot. 'Et 'alha 'uhoont'ah nahzún ih?

Bulunah Christ ba whel'a na'hududil'i

⁵ 'Ink'ez ndunnah whel'a hincha, 'en 'aw hubugha ndoh nacha'udunuzúszun. ⁶ 'Et yalhtuk soo t'echanuzúszun, 'et whunts'ih lhat nt'éoonuszun hoh 'ust'ah. 'Ink'ez ts'iyaintsuk t'éoonáhzun nuhwhuzúlsih. ⁷ Yak'usda bughunek unzoo, 'i 'aw 'uk'elha ilah bé nohwhulh yalhtuk. Te'dudulhú' 'et hoh 'i be ncha tehle. 'I be lubeshi 'ulhchoot nahzun ih? ⁸ 'Uyoon Yak'usda ba 'ilhuhowezdel 'en buzooneya suba 'uk'elha huhoohl'i. 'Et whunts'ih bughi ndunust'ih lí'ust'en, 'et nuhwheni nuhwhuba ne'úst'en whutah. ⁹ Hoh da nuhtah sída hoh hoonliyaz be whendunidzit, 'et whunts'ih 'aw nuhts'un de' chaduzusnih. 'Et sulhutsinkah Macedonia ts'ih hahándeel hoh ts'iyaintsuk be sula' het'en. 'Et huwa nuhts'un de' dusni whuch'a' dudulhúdzun. 'Et whuz na'a zeh ndutest'ilh nduhoolyez hoh. ¹⁰ Christ khunek yé 'alha 'int'ah 'i be désbun. 'Et huwa njan Achaia yun k'ut ndulhcho hoh ndai bé 'oonust'i, 'i, 'aw 'ustl'e' dóosnih ghait'ah. ¹¹ Di ka njan dudúzni? 'Aw nuhk'echási' nahzún tulih? 'Et whunts'ih Yak'usda t'éoonínzun. ¹² Ndai 'ut'en 'ulh'en, 'i k'elha nuhts'un dé' doosni ghait'ah, whuz na'a zeh 'et ndutést'ilh. 'Et ndunnah nuwheni nek'una'a huhóolhzi hukwa' hut'en 'ink'ez huhóont'i be howu yahulhtuk t'eh, 'et soo 'ustl'e' 'ahuduténiil ubutelhsilh. ¹³ 'En nduhint'ah 'aw ts'ah'un whel'a 'en ilah 'uhint'ah. Dich'oh dude 'ut'en k'ah hukw'u na'a 'uyoon nahuna'ah. Christ whel'a 'en buk'una'a na'hududil'i. ¹⁴ Khun teh nuhwhuba hooncha wule gunih! Satan 'en lizas be whét'en na'dudil'i 'et huwa. ¹⁵ 'Et huwa ndunnah hila 'uhut'en, 'en dich'oh ndunnah ts'ah'un na'a ne'hút'en na'hududil'i. 'Et whunts'ih 'aw chahóocha 'uhoont'ah. 'Et nduhut'en hedich'oh hube 'ut'en k'ah hukw'u na'a huba k'elha whutéle!

Si whuzusnik usdli noohzin gunih

¹⁶ 'Et doo chah zeh ndun whudusni, 'aw dune whusnik 'int'ah sunóohzin gunih. 'Et whunts'ih whuz na'a zeh 'unahzun t'eh, whute, whuzusnik k'una'a nisunulhti, 'et hoh hoontsolyaz hoonúst'i be yatelhtuk. ¹⁷ Daja nuhwhudúzni, 'aw neMoodihti yalhtuk hukw'u na'a ilah, si yalhtuk. 'Ants'i whuzusnik k'una'a 'unohdusni. Sudzi hooni hoh ye hóont'i sughu dez'ai. ¹⁸ Lhanah buyest'e ts'ih nint'uk hukw'u na'a hóont'i be yahalhtuk. 'Et si chah whuz na'a hoonúst'i be 'et yatelhtuk. ¹⁹ Nuhwhubeni hoonli 'et whunts'ih ndunnah dune 'aw cha'hoot'ah k'una'a dune hinli nuhtah húdelhts'i, 'et whunts'ih 'aw nuhwhuba dacháhoot'ah. ²⁰ Lhe'ah't'en, 'ilhunuh nuhtah usda hoh buba 'ustl'enah nuhwhulhtsi, k'us 'ilhunuh nuhwhúlhgooh, k'us 'ilhunuh ndai aht'i, 'i nuhghu yilhchoot, k'us 'ilhunuh nuhtah ncha na'dudulhtsi, k'us 'ilhunuh nuhóonúkat, 'et ndúwhulcho nuhwhuba dachahoot'ah. ²¹ Hooya usdli hoh nohwhulh yatelhtuk. Hoh da nuhtah 'uzdélhts'i da, 'ants'i lats'ít'ah lí'ts'int'ah. 'Et whunts'ih ndan njan hubugha lhoojah, 'en buk'una'a, whuz na'a si chah lhóosjah hoh yatelhtuk. 'Ants'i whuzúsnik k'una'a 'udusni.

Christ 'en ba dzuh nusúzt

²² Ndunnah Hebrew bughunek yahalhtuk na'hududútni, 'et si chah 'ilhunuh 'ust'ah. Israel whudune na'hududutni, 'et si chah 'ilhunuh 'ust'ah. Abraham hits'u haínde ih, 'et si chah 'ilhunuh 'ust'ah. ²³ Ndunnah Christ ba ne'hut'en ih 'uhint'ah? 'Ants'i seni hoolah hukw'u na'a yalhtuk, 'et whunts'ih si 'o nus 'ust'ah. Si 'o nus 'ut'en huba nus 'ultus 'i be 'ust'en. 'O nus lhat suhólhtsus k'et 'aw uzdooni ghait'ah. 'O nus lhat hoh tsak'esá'ai, 'ink'ez

k'us lhat hoh 'ankw'us dásaih. ²⁴Ndunnah Lizwif skwunlat suholhtsus. 'Ilhuh suhoolhtsas totsuk, tat lanezi 'o 'at lhuk'i hoolah (39) suts'e 'uhulhtsus. ²⁵Tat tuz be suholht'o. 'Ilhuh tse be suzoolhghel' hukwa' suhal'h'en. Tat hoh ts'i sulh nádezghuz. 'Ilhuh ya too k'ut lhulcho 'et nusdlat, 'ilhuh 'úh'ek 'ink'ez 'ilhudzin whuts'un. ²⁶'Ahoohlhyez lhelh ts'un kédészulh. 'Et took'oh chah tube suba wheoonujut. 'Undunut'ih 'en chah buts'un suba howa 'óodli. Sulh hudedowh, 'en whunts'i, buts'u tsi hoosli. 'Udun yun k'ut whut'en, 'en chah buts'u tsi hoosdli. Keyah sída, 'et whunts'ih suba howa 'óodli. Dune hoolah sída t'eh, 'et whunts'ih suba howa 'óodli. Ya too k'ut 'et chah suba howa 'óodli. 'Ink'ez ndunnah sulh dedowh na'hududil'i, 'en hubutah chah suba howa 'óodli. ²⁷'Ut'en ulhtus, 'i be 'ust'en. 'Et huwa whulutah tube nenúsih. Lhat 'aw chástah. Lhat hoh suye'últ's'ilh 'ink'ez ta'óosde. Lhat hoh sahá'delhúya k'us lhat hukw'uz yuh nusíya dzuh 'et dune usdli hoh. ²⁸'Aw 'et zeh ilah, nts'e na'a Yak'usda ba 'ilhunahuwúdluh bughusdli, 'et chah 'ants'i nisunilhts'ut li'ust'ah. ²⁹'Aw t'eeonuzáhzun ih 'ilhunuh budzi lait'ah sulí t'eh, si chah sudzi lait'ah 'ulhíh. 'Ink'ez ndan nelh dune 'onghoh lubeshi be nalts'uk li'ut'ih 'et hubugha whuske 'ink'ez 'ants'i desk'un li'ust'ah. ³⁰Hoonli hubugha hootest'i t'eh, 'et ndet dast'ah hoh lait'ah 'et whé 'oost'e. ³¹Yak'usda, Sizi Gri 'en neMoodihti be'aBá, 'en zeh 'ilhuz wheni uzdelíhti, 'en t'eeonínzun 'aw chaoozústs'it. ³²'Et hubudayi cho Aretas hiyulhni, 'en bukeyah Damascus huwhútni, 'et humoodih dune, 'en sutélhchoh hukwa' nínzun. ³³'Et whunts'ih, ndi be 'uzdla cho, 'i be súhalhti 'ink'ez windah k'et, 'et nasuhálhbalh hoh hubula k'éhanasja.

12

Yak'usda dune yunalhts'et haho'ai

¹Alha ndi 'udelhúti khunek be yalhtuk, 'aw suba chahóozooh ho' dusnih. Ndet neMoodihti bengahun newhúkat 'ink'ez ba be wheóodiltsih, 'i bugha nohwhulh yátelhtuk hukwa' nuszun. ²Ilhunuh Christ yunéyah, 'en t'enuszun. 'Et ndun hoh da lanezi 'o 'at díit naooduzuk inle hoh 'en whulh tat yak'uz 'et 'ants'i khun be' dúzgooh li'uja. Buyust'e bulh k'us be'et, si 'aw t'eeonuzúszun, Yak'usda 'en t'eeonínzun. ³'Et ndun 'en t'enuszun. Buyust'e bulh k'us be'et, si 'aw t'eeonuzúszun, Yak'usda 'en t'eeonínzun.

Yak'usda 'int'ah hoh nuwheni ts'iyai, 'i be k'enána'ah

⁴K'us hoonzoo ni'dudulti li'uja, 'et 'ants'i khun be' dúzgooh hukw'u na'a 'int'ah. 'Et whuts'un ndai khunek 'aw ye yátooltih ghait'ah, 'et hubuduzts'ai. 'Aw ye yátelhtuk yutl'acháwhus'ai 'et huwa. ⁵'Et ndunt'ah dune, 'en bé hoonust'i hoh bughu yatelhtuk. 'Et whunts'ih 'aw se' 'ut'en k'ah huwa ho' hoonust'i k'una'a howu yaoolhtuk ghait'ah. Ndet dast'ah last'ah, 'et zeh hóonust'i hoh howu yalhtuk. ⁶'Et be hoonust'i k'una'a yatelhtuk hukwa' nuszun t'eh, 'et whunts'ih 'aw whuzusnik tesdle hukwa cha'núszun. 'Et huwa ndai khunek 'alha 'int'ah, 'i bugha zeh yatelhtuk. Ndi be hóost'e'i whuch'a whuz na'a 'utest'ilh. Doo ka n'awh dune suhunilh'en 'ink'ez chasadits'o t'eh, 'et whuz na'a zeh dune unli suhúntezin.

Ntsi' nududeh, 'i Satan bugha 'ust'en dzuh nuszut

⁷'Et njan ndet senghuh niooninkat, 'et whula gha ndi 'uzdudelhúti whuch'a 'ink'ez ncha na'duteltsilh 'et whuch'a, 'et huwa whus cho soo donat li'ust'en. Satan, bugha ndi ntsi' nududeh, 'en bugha 'ust'en dzuh nuszut. 'Et whuz na'a 'aw 'ududoolhúti ghait'ah. ⁸Tat neMoodihti buts'un tédesdlih, khun teh whus cho suts'ahanadoodúkat. ⁹'Ink'ez 'usúlhni, "Be úszoo, 'i 'aw 'et 'i mba soo 'int'ah. Be úlhtus, 'i be lait'ah, 'i ts'iyawh lhaóodija 'et huwa." 'Et huwa hoonústi hoh ndi be last'ah, 'i bugha 'et hoonust'i. 'Et Christ ye 'ulhtus, 'i sulh 'óot'e. ¹⁰'Et huwa ndet suba last'ah, sghu hudloh, hoonli suba howa whúlna, ndet dzuh nusahalhdzut, 'ink'ez hoontsi' sughá honinla, 'i ndi ts'iyawh 'ilho, Christ 'en bugha suba 'uhóoja t'eh, 'et hoonust'i. 'Et whuz na'a be last'ah 'i be úlhtus nasdleh.

Whel'a 'en hube 'ut'en k'ah

¹¹Njan hoonust'i, 'et 'i be whuzusnik li'ust'ah. Nuhwheni whuz sunulht'uk 'et dóosni ka. 'Et nuhwheni nuhgha huba na'óodudoosdzi huba' hoon't'ah. Ndunnah whél'a hincha, 'aw hoonliyaz hubuk'elh'ih cha'úst'ah, 'ants'i 'ust'ah 'et whunts'ih. ¹²'Et 'alha ndai whél'a be hoh hóodel'en, 'i ts'iyawh si sugha lhawhúdt'ah nuhwhuba whuzilhsí. Dzuh nuszut whulh síyin, huwa ét'en, 'ink'ez honcha túne' zust'en chah, hoolhtus chah túne' 'ust'en, 'et ts'iyawh nuhtah 'awhúsdla. ¹³'Onghoh Yak'usda ba 'ilhunahuwéedel, nuhwheni nts'e na'a hukw'elh'ih 'uteht'ilh? 'Et 'aw hoonli nuhts'un húkwa cha'duzusnih. 'Et huwa ih tinta' ust'ih nahzún ih? Ndi ndai 'uts'un na'a be ne'zust'en, 'i ts'iyawh suba whunawhudoolnah!

Dahoont'ah huwa hubuk'entsi'

¹⁴'Aw 'et lháduja hoh whulh tat nuhts'un nátesdalh. 'Aw ndai aht'i buka' cha'núszun, nuhwheni zeh nuhka' nuszun. 'Et huwa nuhts'un dáteso ka ilah. Whunulh'en, 'uskehyaz

'aw dudusnekah hubonoolhyeh huba cha'hóot'ah. K'us budusnekah buzkeh 'en hubonoolhyeh huba' hoot'ah. ¹⁵ 'Ink'ez dega nus be nuhk'esi', nuhwheni hukw'elh'ih sk'ehtsi', 'et whunts'ih suba 'uts'un na'a cha'hóot'ah. Nuhzul 'i ba hoonúst'i hoh buk'elha whutelhsilh. Be khusna, 'i whunts'i k'elha yutelhtsilh. ¹⁶ Nts'oh dája nahzun 'et whunts'ih hoonliyaz nuhch'a nuchá'zust'en, nuhwhenich'oh t'éoonúhzun. 'Et whunts'ih lhe'usja, nunú'l'i hukw'u na'a whuts'it bulh nuwhílhchoot lí'usja. ¹⁷ Ndan nuhts'ú haho'ai, 'en buga 'et hoh nuhgha há' dunest'ah nahzun tulih? ¹⁸ 'Et Títus khunek ulhtus, 'i be dáni hoh ndun nelhutsin 'en bulh nuhts'ó whebalh'a. 'En chah ih nuhgha há' dunent'ah? 'Awundoo! Ts'uhóont'i hoh lhgha hoh nuhtah 'uts'ut'en? Lhk'una'a zeh ih uzdet'us? A! ¹⁹ 'Et doo chah nuhoodutelhukut, nuwheni nuhts'un k'úzdutetnilh nahzun ih? 'Awundoo! Yak'usda nalh Christ 'en bugha njan duts'útni, buk'entsi' ndai hoonliyaz nuhtah 'uts'alh'en, 'et ndúwhulcho hoh nuhwheni zeh nuhba 'uts'ut'en. 'Et nus zeh lhé'teltus hoh nuhwhuba 'uts'ut'en. ²⁰ 'Et tube whesaz hoh doo chah nuhts'un nátesdalh. Khun 'et ndusja t'eh, 'et sih ndez na'a tulih nahós'alh. 'Et ndet nuhts'ó húkwa' núsuzun, 'et 'aw whuz na'a tulih chahzoo. 'Ink'ez 'et whuz na'a nuhwheni chah sts'o hukwa' nahzun, 'aw whuz na'a cha'ust'ah tulih nahóh'alh. Nuhghu niya t'eh, 'et ndez na'a tulih 'ooht'e, ts'iyawh lhédahdulh 'ink'ez lhughe' 'oolhunih. 'Et khun lhulh húnulhúch'oh 'ink'ez lhch'a nidahdulh. Lahoot'ah hoh lhch'á dehni. Ts'iyawh lhch'a ne'dahni. Ncha na'dudulhú'i 'ink'ez ts'iyaintsuk hoontsi' nuhwhuba lht'awhú't'en. ²¹ 'Et huwa whesaz hoh doo chah nuhts'un nátesdalh. K'us lhanah nuhtah lubeshi 'uhalh'en 'ink'ez 'aw lubeshi whuch'a hubeni lht'anachahundunusle. 'Awhuz tulih chahóozoo tune' hut'en. Dune ts'eke bulh tinta' hunt'en. 'Ink'ez lubeshi dutsun, 'i 'uhulh'en. 'Et whuz na'a 'et ndúhooht'ah t'eh, 'et howa sudzi yuk 'utenilh 'ink'ez howu ni tesdle. 'En hubugha Yak'usda 'et yuh 'usutelilh.

13

Paul buga ndoh 'int'ah, 'i Yak'usda yutl'ahó'ai, 'et whuz na'a hubuts'un teyalh

¹ 'Et njan 'aw 'et whulh tat nuhts'un natésdalh. Nanah k'us tanah 'en hubunalh ne'whut'en, ts'iyaintsuk nuhwheni nuhtah, ndai be 'uk'ehoot'aih 'en hubughunek buga ts'iyaintsuk lhaóodutenilh. ² Whutsuh da njan nuhwhudani whusdlah 'et whunts'ih nuhzih sída hukw'u na'a whulh nat nuhts'o k'e'aguz 'ink'ez ndun whudú'sni, ndunnah lubeshi 'alh'en 'ink'ez 'onghoh tubulh ndun whudú'sni hoh dzuh nutehzut, 'aw hukw'ut dihudóoya ghait'ah ho' hoot'ah. ³ Si sugha Christ yalhtuk t'ewhúntézhin, 'et huwa nuhwheni si soo zélhts'ai. 'Et huwa whuz na'a nuhwhudáni. 'Ink'ez 'alha 'en 'int'ah nuhwhuts'un lait'ah cháilah, 'ink'ez nuhtah dega nus úlhtus 'int'ah. ⁴ Christ 'en ye lait'ah, 'i be lhdulalghus k'ehíyilhti, 'et whunts'ih Yak'usda yé ulhtus, 'i bugha khuna. 'Ink'ez nuwheni chah, s'et whuz na'a zeh buyuzdúts'i whunts'i lats'ít'ah. 'Et whunts'ih ndi Yak'usda yé ulhtus nohwhulh 'uhooht'ah, 'i be ts'ukhuna. 'Et huwa Christ 'en bulh ts'ukhutena. ⁵ Na'oodulhúdzih! Ndi be 'alha 'uhooht'ah, 'i bulh áht'ah k'us bu'et áht'ah, 'et 'i be nuhwhenich'oh whuná'dumulhú'tun. Sizi Gri nuhyuh 'int'ah, 'aw t'éoonuzáhzun ih? 'Aw soo cho nt'éoonuzáhzun t'eh, 'et tulih n'ún hutezkat ahli. ⁶ 'Et whunts'ih 'aw n'ún hutezkat 'aw 'en ilah 'uts'int'ah. Soo cho nduchah t'éoonáhzun.

Nuhwheni soo ts'ah'un na'a lhadint'ah tehle, 'et whuz na'a nuhwhuba tenazudli

⁷ 'Et whunts'i hoontsi' uteht'ilh, 'et whuch'a, Yak'usda ts'un nuhwhuba tenazudli. 'Aw nuwhenich'oh nats'oodududzi hukw'u na'a ilah. 'Et whunts'ih nuhwheni hoonzoo k'ah ts'ih 'uteht'ilh, 'et whuz na'a nuhwhuba tenazudli, 'et whunts'ih 'ants'i 'ún hutezkat hukw'u na'a nuhwhuba 'uts'int'ah tulih. ⁸ 'Et ndai 'alha' be 'uhooht'ah 'i 'aw buch'a 'uts'oot'e ghait'ah. 'Et k'us ndai 'alha' be 'uhooht'ah 'aw 'i zeh howu yats'ulhtuk. ⁹ 'Et nuwheni lats'ít'ah 'ink'ez nuhwheni ulhtus ahli t'eh, nuwheni 'o nus ts'uhóont'i. 'Ink'ez soo ts'ah'un na'a lhadint'ah tehle, 'et whuz na'a nuhwhuba tenazudli. ¹⁰ 'Et huwa nuhch'a 'úst'ah hoh whuz na'a nuhts'ó k'e'usges. 'Et whuz na'a nohwhulh 'úst'ah t'eh, ndet hoh dune hubugha ndoh 'ust'ah 'et neMoodihti stl'ahó'ai, 'i be 'aw nuhdách'e ne'doosni ghait'ah. Ndi be dega ndoh 'ust'ah, 'i be 'o nus Yak'usda ba ulhtus tehle. 'I 'aw be nuhwhundóolhdah ghait'ah.

Nohwhulh 'úhot'e

¹¹ Sulhutsinkah soo dega nus 'ún whudusni. Whunoolhnik! Soo ts'ah'un na'a lhadulya tehleh. Yak'usda k'enaine'a tehleh. 'Ilo zeh nuhwhubeni tehle. Whudezghel, 'i be ndi yun k'ut delhúts'i. 'Ink'ez Yak'usda, ndun nek'entsi' 'ink'ez nedzi bé dezghel, 'i negha ini'ai, 'en nohwhulh 'óot'e. ¹² 'Et lubeshi bugu hoolah be nalhadunoohts'oos. ¹³ Dune Yak'usda bube'ildzun nezih húdelhts'i, 'en chah ts'iyawh dahooja nuhowhú'tni. ¹⁴ Sizi Gri neMoodihti ye unzoo, 'ink'ez Yak'usda ye nek'entsi', 'ink'ez Ndoni bulh 'ilho ts'indli chah, 'et 'i ts'iyawh nohwhulh 'úhot'e. 'Et ndoh heneh.

Paul, Galatia Whut'en Hubuts'un K'e'anguz

Yak'usda ba 'ilhunahuwúdulh, Galatia yun k'ut húdelhts'i, 'en Paul dahooja hubulhni

¹ Si Paul whel'a usdli. 'Aw lhanah dune, k'us 'ilhunuh whúnts'i ilah bugha 'usja. 'Et whunts'ih Sizi Gri 'ink'ez Yak'usda ne'aBá, 'en 'int'ah Sizi yahadla hubutah dinaidilhti, 'ink'ez 'en bugha whel'a 'ust'ah. ² 'Ink'ez nelhutsinkah ndunnah suzih húdelhts'i, 'en ts'iyawh nuhwheni yun k'ut Galatia ts'ih Yak'usda ba 'ilhunahuwúdulh ahli, nuhwheni ts'iyawh dahooja nuhwhents'útni. ³ Yak'usda ne'aBá 'ink'ez Sizi Gri neMoodihti, 'en ye unzoo, 'i 'ink'ez nuhdzi dinghel, nuhgha óoni'ai, 'i ts'iyawh 'i bulh 'óoht'e. ⁴ 'En 'uja nelubeshi bugha huwa' dudulti. 'Et hoh ndi yun k'ut ntsi' yuch'a naneuzdla. Yak'usda ne'aBá, 'et whuz na'a hukwa' ninzun. ⁵ 'Ilhuz wheni buba ts'odélhti, 'et ndoh honeh.

'Aw 'uyoo khunek unzoo 'i be yats'oolhtuk hoolah

⁶ Christ ye unzoo, 'i be dutehjih ka nuhka' dani, 'et whunts'ih 'en 'ahoh buch'a nasulhúya 'ink'ez 'uyoo khunek unzoo, 'i nahzun, 'i ts'un nasulhúya. Tube suba hooncha hoh aht'en. ⁷ 'Et whunts'ih 'aw 'uyoo khunek unzoo, 'i hoolah. Bulunah dune nuhwhuba lhtanahuhólelh hukwa' hut'en. Christ bughunek unzoo, 'i 'uts'un na'a nuhwhuba na'huyooleh hukwa' hut'en. ⁸ 'Et whunts'ih nuwheni k'us yak'uz whulizas 'en whunts'i, 'uyoo khunek unzoo, 'i be nohwulh yats'ulhtuk t'eh, 'et t'eh ndan whunts'i 'utni, Yak'usda hoontsi' ts'ih yulh niuntezulh wule da. ⁹ Nts'e na'a nuhts'udáni, 'et doo chah zeh nuhwhunts'útni, ndi khunek unzoo, 'i 'uda ulhchoot, 'ink'ez ndan 'uts'un na'a 'un nuhwulhni t'eh, ndan whunts'i 'utni, Yak'usda hoontsi' ts'ih yulh niuntezulh. ¹⁰ Daja nuhzun? Yak'usda tulih k'us dune tulih ba whudóolhti? Soo cho whunulh'en, dune ba uszoo na'dudulhú'i t'eh, 'et t'eh Christ be 'ulhna tesdle, 'aw oosdle ghait'ah.

Yak'usda 'utahásalhti 'en ba whel'a tesdle

¹¹ 'Et sulhutsinkah njan ndun whudúsní t'eoonóhzin ka ndi khunek unzoo, 'i be nohwulh yalhtuk, 'aw dune khunek be cha'duzusnih. ¹² 'Et 'aw ndi dune ts'un ilhchoot ilah, 'ink'ez 'aw dune whusodalh'i chah ilah, Sizi Gri 'en whusúnelhtan. ¹³ 'Et hoh da nts'e na'a si Lizwif hube 'ut'en k'ah huwaghusna inle, 'et ts'iyawh whulh 'udahts'o. Nts'ena'a ndunnah Yak'usda ba 'ilhunahuwúdulh, 'en tube dzuh nobulhdeh 'ink'ez hoolah huboolhsilh hukwa' 'ust'en. ¹⁴ 'Ink'ez sutsuh da dahánt'e 'et ts'iyawh soo cho hostun hukwa' 'est'en. 'Et hoh ndi Lizwif hube 'ut'en k'ah hubugha, ndunnah sulh hudedowh, ndunnah sunduhult'ah, 'et whunts'ih ts'iyawh huba 'o nus unzoo síli. ¹⁵ 'Et 'awhuz chadusdah da, 'et Yak'usda ba hoonzoo hoh 'utahásalhti 'ink'ez ye unzoo, 'i be dutesjih ka ska' dani, ¹⁶ 'ink'ez buYe' yusunelhtan. 'Et 'en bugha 'udun yun k'ut whut'en, 'en ndi khunek unzoo, 'i be hubulh yátelhtuk ka. 'Et hoh da sulh 'et dúhooja hoh 'et 'awhuz 'uyoon dune ts'un huwu yachalhtih hoh ¹⁷ ndoh Jerusalem ts'ih whunts'i chatúsyal hoh ndunnah sutsuh whel'a hinli, 'en hubulh yachalhtih. 'Et whunts'ih yun k'ut Arabia whuz whéya. 'Et hukw'elh'az doo chah zeh keyah Damascus ts'ih lhghu nadusja.

Nts'e na'a dat'en keyah whuti Jerusalem ts'ih

¹⁸ 'Et tat naooduzuk hukw'elh'az, 'et nde Jerusalem ts'ih whéya. Peter 'en buzih tesdall hukwa' nuszun 'ink'ez 'et lanezi 'o 'at skwunlat dzin buzih ída. ¹⁹ 'Et 'onghoh whel'a 'en 'aw chabus'il. NeMoodihti bulhutsin James, 'en zeh nalh'en. ²⁰ 'Ink'ez ndi nuhts'o k'e'águz, 'i, Yak'usda nalh 'un whudúsní, 'aw chaozúst'sit. ²¹ 'Ink'ez 'et hukw'elh'az yun k'ut Syria 'ink'ez Cilicia, 'ahoh hoh nusýa. ²² Judea yun k'ut 'et, ndunnah Christ ba 'ilhunahuwúdulh, 'en 'awhuz chasuhes'en. ²³ 'Ants'i ndez na'a zeh sulh 'uhudants'o, "Nduhah hoh da dzuh nunenulhdzut inle, 'en 'aw 'et ndi be 'alha 'uhoont'ah bugha, ts'iyannah khunek unzoo, 'i be hubulh yalhtuk sulí, ndi khunek unzoo 'uda hoolah yoolhtsilh hukwa' yalh'en whunts'i." ²⁴ 'Ink'ez si sugha Yak'usda hudélhti.

2

Khunek unzoo, 'i soo ts'ah'un na'a bughu yaoolhtuk

¹ 'Et lanezi 'o 'at dit naooduzuk hukw'elh'az, Barnabas bulh doo chah ndoh Jerusalem ts'ih nahutes'az. Titus 'en chah nayilchoot 'ink'ez nelh tez'az. ² Senen hawhélt's, 'et huwa doo chah Jerusalem ts'ih nunásusja hoh Jerusalem whut'en nduhoolcho 'obudáni. Nts'e na'a ndi khunek unzoo, 'i be ndunnah 'udun yun k'ut whut'en hubulh yalhtuk, 'et nduhoolcho ndo budáni. 'Ink'ez ndunnah ncha hinli, 'en whu'iz 'et hubulh yalhtuk. 'Et hoh 'aw 'ants'i 'et cha'úst'il whuzdli. ³ 'Et whunts'ih Titus, ndun sulh 'ut'en, 'en Greek whut'en unli, 'et whunts'ih 'aw yuka dune unli, 'i hitet'us whuts'un chahinilht'uk. ⁴ Ndez

na'a njan dúhooja, bulunah, 'en nelhutsinkah na'hududil'i. 'En nunú'ti be netaboníla. Neghu hoole ka dats'int'ah hoh dune ts'inli. Dáhoont'ah 'et Sizi Gri 'en bugha Moses be' dustl'us whuch'a whulazdetnik. Nuwheni doo chah zeh Moses be' dustl'us k'ut 'i be 'ulhna k'una'a nehoolhtsilh hukwa ne'hull'en 'et huwa. ⁵ 'Et whunts'ih ndunt'ah dune, 'aw 'iluh hukw'e huntet'oh buk'ah 'ahuntét'oh whunts'ih hubutl'a' dudoolhútelh ghait'ah. 'Et huwa ndi khunek unzoo, 'i be 'alha 'uhoont'ah 'i be whuz na'a zeh 'ooht'e. ⁶ 'Et ndunnah hincha unli hubuts'utni, 'en lhugha zeh 'obulh'en. Ndunnah hinli dahint'ah, 'et whunts'ih suba dachahit'ah. Yak'usda nalh lhulhúgha zeh 'uts'int'ah 'et huwa. ⁷ 'Et whunts'ih nts'e na'a Peter ndi khunek unzoo, 'i yutl'aidá'ai hoh 'i be ndunnah dune yuka dune unli, 'i k'ut hiyuzt'us hiyúlhni, 'en hubulh yateltuk ka, 'et whuz na'a si chah ndi khunek unzoo, 'i stl'aida'ai. 'I be 'udun yun k'ut whut'en hubulh yaóolhtuk ka. 'Et huwa ndunnah ncha, 'en ts'iyawh ts'ah'un na'a t'ehonanzin. ⁸ Nts'e na'a Yak'usda, 'en Peter ndunnah Lizwif huba whel'a yulhtsi, 'et whuz na'a si chah 'udun yun k'ut whut'en huba whel'a sulhtsi 'et huwa. ⁹ 'Et huwa James, Cephas, 'ink'ez John, 'en but's'utni keyah whuduchun hinli, 'et ts'ah'un na'a t'ehonanzin, ndi ye unzoo 'et stl'ahó'ai, 'et huwa Barnabas 'ink'ez si chah nela nahúz'ai. 'Et 'i be ts'iyanaah whenéhuntelhtan, nuwheni 'ink'ez James, Cephas 'ink'ez John chah lhulh 'uts'int'ah zeh hubúzedulh. Nuwheni 'udun yun k'ut whut'en hubuts'úztedulh, 'ink'ez ndunnah 'en Lizwif hubuts'á tedulh. ¹⁰ Ndan tehel'en, 'en hubunaztelnih, 'et whuz na'a zeh hukwa' huninzun. 'Et si chah whuz na'a zeh hukwa' nuszun.

Moses be' dustl'us 'aw doo chah buk'une' ts'oot'en huba cha'hóot'ah

¹¹ 'Et Peter hoh da keyah Antioch nusiya hoh tink'us 'uja. 'Et huwa soo bunen ts'un 'ídani. ¹² James 'en ndunnah hiyulh 'uhut'en, keyah Antioch nehútedulh whutsuh, 'et Peter 'ahoolhyez 'udun yun k'ut whut'en hubula 'a'alh. 'Et whunts'ih James hiyulh 'uhut'en whusahándel hoh, 'et Peter hubuch'a nasja, ndunnah Lizwif hube nuljut 'et huwa. ¹³ 'Ink'ez 'onghoh Lizwif, duba nahududzoo hoh 'en chah Peter bulh hubuch'a nahusdel. 'Ink'ez Barnabas, 'en whunts'i, hinalh nduhút'en 'ink'ez 'en chah hubundul'en suli. ¹⁴ Ndi khunek unzoo, 'i 'alha 'int'ah 'i daja ni, ndunnah Lizwif 'aw ts'ah'un hik'únucha'ust'en. 'Et nahoo'ai hoh, ts'iyanaah nalh 'et hukwa Peter njan ndúdsni, "Nyun Lizwif 'unint'ah 'et whunts'ih 'udun yun k'ut whut'en k'una'a ndi yun k'ut inda. 'Ink'ez di ka 'udun yun k'ut whut'en Lizwif k'una'a dune hoole hukwa' bilh'en? ¹⁵ Nuwheni Lizwif ts'inli hoh ts'uwuzdli. 'Aw 'udun yun k'ut whut'en lubeshi 'uts'uleh k'una'a cha'ts'it'ah. ¹⁶ T'ets'onínzun Moses be' dustl'us 'i bugha 'uts'ut'en t'eh, 'aw ts'ah'un dune chats'ilah. Sizi Gri neba 'alha 'int'ah 'et huwa whuz na'a zeh ts'ah'un dune ts'inli 'et t'ets'onínzun. 'Ink'ez nuwheni Sizi Gri 'en neba 'alha 'int'ah unli 'et hoh njan Christ neba 'alha 'int'ah, 'et 'i be ts'ah'un dune ts'uzdli. Moses be' dustl'us k'une' ts'ut'en t'eh, 'aw 'et huwa ilah ts'ah'un dune ts'uzdli. Moses be' dustl'us k'une' 'uhut'en, 'et 'aw 'ilhunuh whunts'i ts'ah'un na'a cha'hínli 'et huwa. ¹⁷ 'Et whunts'i nuwheni Lizwif, Christ 'en bugha ts'ah'un dune ts'ooole 'et hukwa' uznínzun t'eh, 'ink'ez nats'uhoo'ai 'awhuz lubeshi 'uts'ulh'en ts'inli t'eh, 'et Christ 'en chah ih lubeshi ts'un nuhwúnihlt'uk unli? 'Et 'aw 'uhót'e ghait'ah! ¹⁸ 'Et ndi Moses be' dustl'us k'ut 'udun nínla 'ink'ez doo chah zeh nalhúchoot 'ink'ez buk'une' test'en t'eh, 'et t'eh khunek lkh'uníyuz ho' test'ilh. ¹⁹ Moses be' dustl'us k'ut, 'ants'i 'i be dasítsai li'ust'ah, 'aw 'o 'at buk'únucha'tuzest'il. 'Et whuz na'a Yak'usda ba khutesna. ²⁰ Christ lhdulalghus k'ut bulh dasítsai li'ust'ah, 'et 'aw 'o 'un chakhúsnah li'ust'ah, 'et whunts'ih Christ syudinda. 'Ink'ez ye khuna, 'i be khusna. Yak'usda buYe' suba 'alha 'int'ah, 'et 'i bugha ndi yun k'ut khusna. 'En 'uja sk'ents'i' k'et suba whutl'a' dudelti. ²¹ Ndi Yak'usda ye unzoo, 'i 'aw 'udun nioos'alh ghait'ah! 'Alha Moses be' dustl'us k'ut, 'i be ts'ah'un dune ts'ooole ghait'ah. 'Et whuz na'a 'uhoont'ah t'eh, 'et Christ 'ants'et hoh neba dazsai li'whutet'ilh," Peter 'et ndudúsní.

3

Be 'alha 'uhoont'ah, 'i be zeh Yak'usda nalh ts'ah'un dune ts'uzdli

¹ Nuhwheni Galatia whut'en whuzahnik! Ndan duyun nest'i hoh nuhnan'a ndi khunek 'alha 'int'ah buk'unucha'zooht'en ka? Nuhwhenich'oh Christ lhdulalghus k'ut neba dazsai, 'ants'i whunulh'en li'hoont'ah. 'Et whuz na'a nuhwhuba be hóódet'en. ² Ndi 'aw 'i zeh nts'un nt'ewhuntehzeh hukwa' nuszun.

Nts'e na'a Ndoni nuhyudélt's'ut? Moses be' dustl'us buk'une' 'uht'en, k'us ndi be 'alha 'uhoont'ah nuhwhuba whulhúdaht's'o tulih? ³ Whuz na'a stabe whuzahnik! Ndoni 'en be whe' dah't'en. 'Ink'ez k'an 'et nuhyust'e dálh'en, 'et whuz na'a ts'ah'un lhadulhúya telehe, nahzún ih? 'Awundooh! ⁴ Nuhwheni lhat hoh dzuh nusahde ho' hooht'ah. 'Et ndúwhulcho hoh 'ants'i 'uhoont'ah nahzun ih? 'Et 'alha 'ants'i nuhwhuba 'uwhutét'ilh nahzun ih? ⁵ 'Et huwa Yak'usda 'en 'int'ah Ndoni nuhyeida'ai 'ink'ez nuhtah huwa 'et 'en tune' 'ut'en. Nts'e na'a 'uhoonla? Moses be' dustl'us buk'une' 'uht'en k'us ndet whudáht's'o nuhwhuba 'alha

'uhoont'ah? ⁶ Abraham, 'en chah, nts'e na'a Yak'usda yuba 'alha 'int'ah hoh Yak'usda 'en Abraham ts'ah'un dune unli yúlhni, ⁷ 'Et t'ewhunoozh, ndan be 'alha 'uhoont'ah hit'i, 'aw 'en zeh Abraham buzkeh hinli. ⁸ Yak'usda bughunek ndet nus de dawhútenilh, 'et whunénulhtun. Be 'alha 'uhoont'ah 'i be Yak'usda ndunnah 'udun yun k'ut whut'en, 'en ts'ah'un 'int'ah hubutelhtsilh. 'Et whutsuh 'uwhuténilh, 'et Yak'usda 'en Abraham njan ndrúyulhni, "Nyun ngha ndunnah 'udun yun k'ut whut'en, 'en ts'iyawh dáwhulzoo hubugha whútelts'ulh." ⁹ 'Et huwa ndez na'a njan dúhoont'ah, Abraham, 'en Yak'usda yuba 'alha 'int'ah 'et huwa degha nus hoonzoo hubugha whults'ut. 'Ink'ez ndan Yak'usda buba 'alha yint'ah, 'en chah whuz na'a zeh njan degha nus hoonzoo hubugha whútelts'ulh.

Moses be' dustl'us, 'i be 'aw dune Yak'usda nalh ts'ah'un wule ghait'ah

¹⁰ 'Et ndan Moses be' dustl'us yut'anihinintan, 'ink'ez ndi khunek k'uhíninyuz t'eh, 'et t'eh Yak'usda hoolah hubutelhtsilh. 'Et whuz na'a 'uk'e'edúguz hoh ndutni, "Moses be' dustl'us, ndai yuk'e'ánguz, 'i ts'iyawh hik'une'oot'en huba 'uhoont'ah. Ndunnah ts'iyawh hik'unucha'ust'en t'eh, 'et t'eh ndet hoolah ubutelhtsilh, ts'iyana hote'ilh." ¹¹ 'Ink'ez soo ts'ih'un 'uhoont'ah, ndi Moses be' dustl'us, 'i be 'aw dune Yak'usda nalh ts'ah'un 'uhoont'ah. 'Et Yak'usda bughunek njan ndutni, "Ndunnah ts'ah'un na'huja, 'en be 'alha 'uhoont'ah, 'i be hukhutama." ¹² 'Et whunts'i ndi Moses be' dustl'us, 'i, be neba 'alha 'uhoont'ah 'aw 'i bugha ilah. 'Et whunts'i ndan dune Moses be' dustl'us yuk'une' 'ut'en t'eh, 'i be whuz na'a ndi yun k'ut hukhutenalh. ¹³ Ndan Moses be' dustl'us k'ahunyis, 'en hoolah wule huba' hooht'ah. 'Ink'ez 'et whuch'a Christ nenaonket. Ndet hoolah netelhtsilh dich'oh neba k'éhoot'ai. 'Et whuz na'a 'uk'e'edúguz hoh ndutni, "Ndu duchun yundunilt'o, 'en hoolah tele ho' 'int'ah," ni. ¹⁴ 'Et huwa Abraham dawhuldzoo bughá whults'ut, 'udun yun k'ut whut'en, 'en chah Sizi Gri bugha húbugha whútelts'ulh. 'Et whuz na'a ne'abÁ Ndoni 'en nets'u yoozi. 'Et neba 'alha 'uhoont'ah, 'i be Ndoni neyudoolts'it ka.

Yak'usda ndi khunek neba lhaidínla, 'i, 'aw 'ats'un na'a na'hótnéh ghait'ah

¹⁵ Sulhutsinkah ndi yun k'ut hubube 'ut'en k'ah, 'et hubugha nohwhulh yalhtuk. Ndan dune khunek yutl'aída'ai, 'i 'aw 'uyoo khunek yutaoodoo'alh k'us yutahanaho'alh ghait'ah. ¹⁶ 'Et Yak'usda Abraham 'ink'ez but's'un hayánzut, ndai ye yuts'u náhezya, 'aw 'en zeh 'ink'ez but's'un hayánzut, 'en zeh but's'ú yoozi. 'Aw Abraham ts'u haínde, 'en ilah 'ubudusni. 'Aw lhanah ilah 'ulhni. 'Et whunts'ih Yak'usda 'ilhunuh dune zeh yughu yalhtuk ho' 'utni. 'Et whuz na'a 'udéja hoh Abraham, "Nts'u haínzut," yúlhni. 'Ink'ez ndun Christ 'en Abraham but's'un hainzut 'int'ah. ¹⁷ Daja nuhwhudusni, 'et ndi khunek yutlaída'ai, 'uda Yak'usda Christ bulh lhahódnla ho' hooht'ah. 'Et 430 be naooduzuk hukw'elh'az 'et Moses be' dustl'us 'uk'une'usdúguz. 'Et whunts'i Yak'usda njan Abraham khunek yutl'aída'ai, 'i, ndi khunek ye yuts'u náhezya, 'aw hoolah nahoolhsilh ghait'ah. ¹⁸ 'Et whuz na'a ndi Yak'usda yit'i, 'i, 'et Moses be' dustl'us bugha ilah hoh dune hubugha íteleh. 'Et nduhoont'ah t'eh, 'aw ye nets'unáhezya 'i bugha ilah dune hubugha íteleh. 'Et whunts'i Yak'usda ndi yit'i, ye nets'unáhezya 'i be Abraham 'i yugha ooní'ai.

Moses be' dustl'us 'i ndet huba unzoo?

¹⁹ 'Et ndi Moses be' dustl'us ndet huba unzoo nahzun? Tinta 'uts'ut'ih 'et whuch'a neba 'uhóonla. 'Ink'ez nket'ah 'uwhuténilh hoh whusawhútelts'ulh, Abraham but's'un hayánzut whusatayalh, 'et whuts'un ndi Moses be' dustl'us neba 'uhóonla. 'Ink'ez ndun yuts'u hainzut, ndi yé nets'u náhezya, 'i, 'en gha 'uhoont'ah. 'Ink'ez 'et ndun dune yeguz unli, 'et lizas daja hidáni, 'en chah 'o 'un ndo búdani. ²⁰ 'Et ndan dune yeguz unli, 'aw 'ilhunuh zeh ba cha'ít'ah. 'Et whunts'ih Yak'usda 'en 'ilhunuh zeh unli. ²¹ Daja nahzun? Ndi Moses be' dustl'us 'ink'ez Yak'usda Abraham ndi ye yuts'u náhezya, 'et lhgeh 'uts'un na'a ih 'int'ah? 'Awundooh! 'Et whunts'ih Moses be' dustl'us daja ni, 'et butl'a hó'ai, 'et 'i be dune 'ilhuz wheni hukhutama t'eh, 'et t'eh 'alha Moses be' dustl'us 'i be dune ts'ah'un na'a 'uhint'ah hutele inle. ²² 'Et whunts'ih Yak'usda bughunek njan ndutni, ts'iyana dune lubeshi bulh 'uhint'ah. 'Et huwa ndi ye hubuts'u náhezya, 'i be ndunnah Sizi Gri buba 'alha' yint'ah, 'aw 'en zeh hubugha whútekulh. ²³ 'Et whunts'ih ndi be neba 'alha 'uhoont'ah zyt'er'ilh whutsuh da, 'et Moses be' dustl'us 'i be ts'ak'ezdanla li'ts'ant'e. 'I be duts'o nehulhtsi, nket'ah be neba 'alha 'uhoont'ah buneuntelun 'et whuts'un. ²⁴ 'Et whuz na'a ndi Moses be' dustl'us nehodalh'i inle, 'ink'ez Christ ts'un netezdla. 'Et huwa be neba 'alha 'uhoont'ah 'i be ts'ah'un dune ts'oole ka. ²⁵ 'Aw 'et be 'alha 'uhoont'ah ts'it'i. 'Et huwa ndi whuneodalh'i 'i 'aw 'o 'un buk'une' ts'oot'en huba cha'ít'ah.

Nuhwheni ts'iyawh Christ, Sizi ts'utni, 'en bugha Yak'usda buzkeh ahli

²⁶ 'Et nuhwheni ts'iyawh Christ, Sizi ts'utni, 'en bugha 'et be neba 'alha 'uhoont'ah, 'i be Yak'usda buzkeh ahli. ²⁷ 'Et nuhwheni nuhtah ndunnah Christ ba too be 'ulya, whuz na'a bulh 'áht'ah sahli. ²⁸ 'Et huwa 'aw 'o 'un Lizwif k'us 'udun yun k'ut whut'en hoolah. 'Ink'ez

'aw' o 'un 'ulhna k'us 'ulhna ch'a hubula nahudetnik chah hoolah. 'Ink'ez 'aw' o 'un dune k'us ts'ekoo chah hoolah. Nuhwheni ts'iyawh Christ, Sizi ts'utni, 'en bulh 'ilhunuh aht'ah. ²⁹ 'Et Sizi Gri budune ahli t'eh, 'et Abraham ts'un hainde chah ahli. 'Ink'ez ndi Yak'usda Abraham ye yuts'u náhezya, 'i bugha ts'iyawh nuhts'un whutekulh.

4

Dune 'awhuz 'uski unli t'eh, 'ants'i 'ulhna unli li'int'ah, 'et whunts'ih 'ilhudzin t'eh moodih tele

¹ 'Et ndez na'a 'ún whudusni, ndan lhk'echaniyel, 'en 'awhuz 'uski unli t'eh, 'ants'i 'ulhna unli li'int'ah, 'et whunts'ih 'ilhudzin t'eh moodih tele. ² 'Et nket'ah ba'abá yuba hoozi whusawhútelts'ulh 'et whunts'un, ndunnah highundli 'ink'ez koo huwuhindli, 'en 'awhuz highunli. ³ Nuwheni chah whuz na'a zeh 'et nduts'ánt'e. 'Uskeh k'una'a nduts'int'ah hoh nduts'ant'e. Ndi yun k'ut hube 'ut'en k'ah ne'ts'ust'en. 'Et huwa ndi yun k'ut 'ulhna ts'anle. ⁴ 'Et whunts'ih 'aw' 'et whusawhélts'ut hoh Yak'usda buYe' whusayá'h'a. Ts'eke bugha whuzdli, Moses be' dustl'us yuk'úne' tet'en ka. ⁵ 'Et whuz na'a 'en ndunnah Moses be' dustl'us k'úne' 'uhut'en, 'en ts'iyawh naoobonket. 'Et whuz na'a nuwheni neba t'ananets'anla li'ts'uja hoh Yak'usda buzkeh ts'oole ka. ⁶ 'Ink'ez Yak'usda buzkeh sahli. 'Et huwa Yak'usda buYe' buyégha, 'en nuhts'un whusayá'h'a, nuhdzi yuh wuda ka. Tube cho "Abba" ni. Ne'abá ni hoh 'utni. ⁷ 'Et huwa 'aw' o 'un 'ulhna cháhhah, k'us 'en buzkeh sahli. 'Ink'ez buzkeh sahli t'eh, 'et t'eh Christ 'en bugha Yak'usda yit'i, 'i nuhwhe'ildzun tele.

Paul Galatia whut'en ubulhni, "Et nuhwhuba whénhujut! Ndet hoh da nuhwhuba 'uwhúsdla, 'et 'ants'i 'est'en whutele."

⁸ 'Et whunts'ih niz de whudezulh da 'aw Yak'usda t'echanuzahzun inle. Bulunah 'ants'i Yak'usda la'dadil'i, 'et whunts'i 'aw Yak'usda chahíhah, 'en whunts'i buba 'ulhna aht'ah inle. ⁹ 'Ink'ez k'an 'aw 'et Yak'usda t'enehzin, k'us ndez na'a tulih 'udoosni, Yak'usda nuhwheni ts'iyawh soo cho t'enwhunanzin. 'Et di ka nuhwheni doo chah ndai ndi yun ye lait'ah 'i, 'ink'ez ndai cházhoo, 'i ts'iyawh buts'un naoolhúyeh hukwa' aht'en? Ndi doo chah zeh be 'ulhna tehleh hukwa' nahzun ih? ¹⁰ Lhe'aht'en! Whulutah dzin, sanun teh, 'ink'ez nts'oh whegha whudezulh, k'us nts'oh naoodezulh chah, 'i ts'iyawh nuhwhuba whudézi duhni! ¹¹ 'Ants'i 'et tulih tube nuhwhuba 'est'en, 'et huwa nuhwhuba whénhujut. ¹² Sulhutsinkah nuhwheni nuhts'u tedusdlih sk'una'a 'ooht'e ka. Nuhwheni si nuhk'una'a 'ust'ah 'et huwa. 'Aw chasúndulhdal. ¹³ T'eeonahzun ndai bé suyust'e lait'ah, 'et huwa soo 'udechoo ndi khunek unzoo, 'i be nohwhulh yalhtuk inle. ¹⁴ 'Ink'ez nts'e na'a suyust'e be dzuh nuszut, 'et whunts'ih nduhoolhcho nuhwhuba dachahoot'ah. 'Et huwa 'aw tichasunahyulh. 'Et whunts'ih Yak'usda bulizas usdli nuhwhuba li'ust'ah. 'Et whuz na'a nuhkoo ts'ih dasunulhti. Christ, Sizi ts'utni, 'en nuhwhuba li'ust'ah, 'et huwa 'anih sudahni. ¹⁵ Ndet hoh ndi 'uk'enus hoonzoo nuhwhugha whults'ut? 'Et dáhooja? Ts'ah'un na'a 'un whudusni, 'et whuz na'a da 'oohneh, nuhna hanéhla 'ink'ez da sugha nóohlela suna natelhtsilh ka. ¹⁶ 'Et dahooja? Ts'ah'un na'a 'ún whudusni. 'Et huwa nuhch'a ndideya nahzun ih? ¹⁷ 'Et 'uyoon nunút'i be kxanhonoot'ah hukwa' hut'en, hubuts'un nenádoohdelh ka. 'Et hoh nuhwheni nuhwhuba hinchá na'hudutel'i 'et hukwa' hut'en. ¹⁸ 'Et whunts'ih ndet ts'ah'un 'uhoont'ah, 'et zeh soo cho hukwa' aht'en nohwhulh 'ust'en k'us 'aw nohwhulh chá'zúst'en 'et whunts'ih. ¹⁹ Suzkehka nket'ah whusaootelts'ulh soo ts'ah'un na'a Christ nohwhulh 'utest'ilh 'et whunts'un, 'ants'i ski ka sulh 'ulh nuhwhuba li'ust'ah. ²⁰ K'an 'et 'aho nohwhulh 'utest'ilh hukwa' nuszun. 'Et khunek be 'o nus hoonzoo hukw'u na'a nohwhulh yaoolhtuk. Nohwhulh nawh 'unuszun 'et huwa.

Nanah ts'ekoo, Sarah 'ink'ez Hagar, 'en nawh hukw'u na'a khunek neba t'l'aida'ai, 'i hinli li'hint'ah

²¹ Nuwheni ndan ahli Moses be' dustl'us buk'une' teht'en hukwa' nuhzun ka, 'et ts'ah'un na'a 'usudúhni, ndi Moses be' dustl'us daja ni, soo ts'ah'un na'a t'eeonúhzun ih? ²² Ndez na'a 'uk'e'anguz 'et njan ndutni, Abraham nanah buzkeh buyekah, 'ilhunuh, 'en ts'eke hubunane'út'en, 'en buyaz. 'Ink'ez 'ilhunuh ts'eke 'aw hubunane'út'en cháilah, 'en buyaz. ²³ 'Et ndun ts'eke hubunane'út'en buyaz, 'en neyuste' k'ah ts'ih whuzdli. 'Et whunts'ih ts'eke hubunane'út'en cháilah buyaz, 'en nts'e na'a Yak'usda 'en Abraham yuts'ú hoozi, 'et hukw'u na'a whuzdli. ²⁴ 'Et ndi 'i ts'iyawh bugha ne'ts'ut'en, 'i neba unli. Njan dahoot'ah hoh ndunnah ts'ekoo 'en nawh hukw'u na'a khunek neba t'l'aida'ai, 'i hinli li'hint'ah. 'Et 'udechoo ndi khunek neba t'l'aida'ai, 'i dzulh Sinai ts'un hadelts'ut, 'i int'ah. 'Ink'ez ndunnah 'et huwhuzdli, ts'iyawh 'ulhna hinli. 'Ink'ez ndi khunek neba t'l'aida'ai, 'i ndun ts'eke hubunane'út'en Hagar hiyulhni, 'en k'una'a int'ah, ni ho 'utni. ²⁵ Ndez na'a njan dúhoont'ah, ndun ts'eke Hagar, 'en ndi dzulh Sinai, yun k'ut Arabia ts'uwhutni, 'et whuz na'a int'ah. 'Ink'ez njan keyah Jerusalem, 'et ndun Hagar k'una'a 'uhoont'ah. Njan keyah, 'et 'ulhna

keyah 'uhoont'ah. 'Ink'ez ndunnah 'et huwhuzdli, 'en ts'iyawh 'ulhna 'uhint'ah. ²⁶ 'Et whunts'ih 'udun keyah ts'ih 'et chah Jerusalem ts'uwhutni. 'Et nduk yak'uz 'uhoont'ah. 'Et 'ulhna keyah cha'hoot'ah 'ink'ez nuwheni ts'iyawh njan keyah newhe'ama 'uhoont'ah li'hoont'ah. ²⁷ 'Et njan keyah ndez na'a njan duhoont'ah hoh Yak'usda be dustl'us k'ut 'et ndutni,

“Whunélnik ts'eke!

Nuwhúzekh hoolah.

Nyun 'int'ah 'aw nuwhúzekh hóle ghait'ah.

'Aw nyaz whutele hukw'u na'a whé Chadintnih.

'Aw 'et k'an 'et hotánt'! TUBE CHO HOONÍNT'!

Ndun ts'eke buzkeh hoolah, 'en buzkeh hooni,
degha nus buzkeh hai tele 'et huwa,” ni.

²⁸ 'Et sulhutsinkah, nuwheni chah Isaac k'una'a 'uts'int'ah. Nuwheni chah ndet Yak'usda Abraham yuts'u hoozi, 'i bugha buzkeh ts'inli. ²⁹ 'Et whunts'ih hoh da ndun ts'eke Hagar, 'en buye' neyust'e k'ah ts'ih whuzdli, 'en ndun Sarah buye', 'en Ndoni ye ulhtus, 'i be whuzdli, 'et ndet huwa dzuh nuyulhdzut, 'et k'an 'et dzin 'awhuz 'et zeh neba ndúhoont'ah. ³⁰ 'Et whunts'ih Yak'usda be dustl'us daja ni? 'Et ndez na'a Sarah Abraham njan duyulhni, "Et ts'eke hubunane'út'en, buye' bulh tenabunenyoot. 'Alha ndun ts'eke hubunane'út'en buye', 'aw but's'e'tookat ghait'ah. Si ts'eke hubunane'út'en chasdlah, si suye' 'en zeh but's'e'tookat wule,” yulhni. ³¹ Sulhutsinkah 'aw 'et njan nuwheni 'aw ts'eke hubunane'út'en buzkeh chats'ilah. 'Et ts'eke hubunane'út'en chailah, 'en buzkeh 'uts'int'ah.

5

Christ 'en bugha 'ulhna buch'a nelaoodetnik 'i be soo cho whulh nudoolhúya

¹ 'Et huwa Christ 'en bugha 'ulhna hubuch'a nelaoodetnik, 'i be soo cho whulh nudoolhúya. 'Aw 'o 'at 'ulhna k'una'a walhúghel gunih. ² Soo zelhts'ai. Paul si 'ust'ah hoh njan ndun whudusni, 'et nuwheni buka dune ahli, 'i k'ut nuhotet'us t'eh, ndet Christ nuwhuba 'uhoonla, 'aw hoonli nuwhuba hole ghait'ah. ³ Doo chah zeh ndi whenwhuntelhtun. Ndan dune yuka dune unli, 'i k'ut hiyúzt'us t'eh, 'et ndunt'ah dune, 'en Moses be' dustl'us, 'i ts'iyawh yuk'une' oot'en huba' hooht'ah. ⁴ Nuhweni ndunnah ndi Moses be' dustl'us 'i be Yak'usda nalh ts'ah'un na'a 'ooht'e hukwa' aht'en t'eh, 'et t'eh Christ buch'a nasulhúye hoh aht'en. Ye unzoo, 'i chah buch'a náhkak hoh 'ahja. ⁵ Ndoni bugha ndi be 'alha 'uhoont'ah, 'i be zeh nuwheni buka tsi ts'úhooli hoh ts'ah'un na'a dune ts'oole ka, 'et whuba ts'ilh'i 'et huwa. ⁶ 'Et nuwheni ts'iyawh Christ, Sizi ts'utni, 'en bulh 'uts'int'ah t'eh, 'et t'eh yuka dune unli, 'i k'ut hiyuzt'us, k'us 'aw chahiyít'us, 'et 'aw 'ants'i 'uhoont'ah. 'Et whunts'ih be neba 'alha 'uhoont'ah 'et zeh hooncha ho' hooht'ah. 'I bugha 'o nus lhk'ets'oodútsi'. ⁷ Soo ulhúwus inle! Ndan bugha njan khunek 'alha 'int'ah buch'a nasahdel? ⁸ Ndan nuwhulhgoo, 'et Yak'usda 'anicho nuwhulhni, 'aw 'en but's'un ilah 'int'ah. ⁹ Ndi ntsoalyaz lhes untuldoh, 'i bugha ndulhcho untuldoh. ¹⁰ NeMoodihti suba 'alha 'int'ah 'aw 'uts'un na'a 'unoozhin ghait'ah. Ndan dune tink'us nuhnill'uk, 'en ndan unli whunts'i, Yak'usda yuba nahuteyeh. ¹¹ 'Et sulhutsinkah ndi buka dune ulhli, 'i 'awhuz hiyoot'as dusni t'eh, 'et di ka 'awhuz hukwa dzuh nusulhdzut? Nk'acha whuz na'a howu yalhtuk t'eh, 'et Sizi Gri lhdulalhugus k'ut dazsai howu yalhtuk, 'aw da buba dzuh cha'duzoosnih wule da. ¹² Nduunnah tink'us nuhnill'uk, 'en dich'oh únchah na'hududoodut'us. ¹³ Sulhutsinkah whunull'en, Moses be' dustl'us hik'úne' 'ust'en whula nahudutetnih ahli ho' aht'ah. 'Et hoh Yak'usda nuhoozi. Ndi hoh whula nadetnik 'et whaht'i, 'et whunts'ih soo cho khohde. Nuhyust'e tinta' tet'ilh, 'et whuts'u nint'uk t'eh, 'et hólhchoot gunih! 'Et whunts'i be nék'ets'intsi', 'i be lhuba ne'óoht'en. ¹⁴ Moses be' dustl'us daja ni 'et nduhóolcho 'ilho khunek be lhaooduja, ndi khunek 'et ndutni, "Nts'e na'a nyunch'oh k'enaindutsi', whuz na'a nyulh dune chah hubuk'eoontsi',” ni. ¹⁵ 'Et whunts'ih 'ants'i lhika k'una'a lheddulh t'eh, doo ka si tinta' lhoohlú'en. 'Et whuch'a soo cho huwohle!

Ndoni 'en be ndi yun k'ut delhúts'i

¹⁶ 'Et njan 'ún whudusni, Ndoni 'en be ndi yun k'ut delhúts'i. 'Et huwa nuhyust'e 'uts'un nóot'uk ghait'ah. ¹⁷ 'Et neyust'e whuts'un nint'uk, 'i Ndoni buch'a ts'unint'uk. 'Et doo chah Ndoni nets'un nint'uk, 'i neyust'e whuts'un nint'uk ho' 'int'ah. 'Et hoh lhch'a húhool'i. 'Et huwa nts'e na'a hukwa' nahzun, 'et whunts'ih 'aw whuz na'a ndohneh ghait'ah. ¹⁸ 'Et Ndoni 'en zeh k'une' nuwhul'en t'eh, 'et t'eh Moses be' dustl'us daja ni, 'aw 'o 'un k'úne' nuhoohl'en ghait'ah. ¹⁹ 'Et neyust'e be 'ut'en k'ah, 'et nduhoolhcho t'ets'oninzun. 'Ink'ez ndez na'a njan nduhooht'ah. 'Uyoon 'at bulh tinta' ts'ut'ih, k'us lhghu chahídukah, 'en hubulh tinta' ts'ut'ih, k'us lubeshi dutsun, 'i 'uts'ulh'ih. 'Ink'ez 'ahoolhyez dune k'us ts'ekoo bulh lubeshi 'uztelih whuts'un ts'unint'uk. ²⁰ 'Et 'uk'edélt'si neba 'alha 'int'ah chah, 'ink'ez dune dezduhli chah.

Ts'iyawh lhuts'uzdutnik, 'ink'ez lhch'a ts'onel'i. 'Ink'ez lhghe' ts'oolnih 'et whé neba dzuh. Whenich'oh nek'una'a zeh 'uts'et'ilh. 'Et lhelhts'un 'uts'int'ah hoh 'ilho hudédowh, nuwheni ts'iyawh whenich'oh nek'una'a 'onghoh whubuts'odulh'eh t'eh. ²¹ 'Uyoon dune yit'i ka' uzninzun 'ink'ez dune ts'ughan. Taznutnai 'ink'ez ts'iyaintsuk hoh hootsi' tune' ts'ut'en. Ndi ndunt'ah, 'ink'ez ndet tink'us neyust'e whuts'u nint'uk, 'et whutsuh 'un whudusni, whuz na'a 'uda chah ndun whudani. Ndunnah 'et ndúhóont'ah tune' 'út'en, 'aw Yak'usda whuhubudayi cho unli, 'et 'aw butl'a hólts'it ghait'ah. ²² 'Et whunts'ih ndi 'ut'en Ndoni be 'uts'ulh'en, 'i 'int'ah, be lhk'ets'udutsi, 'i be ts'onélnhnik, 'i chah, be nédzi dezghel 'i chah. 'Ink'ez sa hoh hoonli tachats'odinik, 'ink'ez 'uyoon ts'un ts'ínzoo 'i chah. 'Et ndai ts'iyaintsuk unzoo, 'i 'uts'ulh'en, Yak'usda neba 'alha 'int'ah, 'i chah. ²³ 'Uyoon gha nagoostl'iyaz chah, 'ink'ez k'ah 'uzdunult'uk. 'Et nduts'int'ah, 'et t'eh 'aw hoonli nek'eholts'it hoolah. ²⁴ 'Ink'ez nuwheni Christ bube'ildzun ts'inli, 'et nduhóont'ah neyust'e lubeshi ts'un nint'uk, 'ink'ez 'ants'i lubeshi 'uts'oolh'en hukwa 'uzninzun, 'et njan ts'iyawh lhdulalghus whé uzduhilht'o. ²⁵ Ndoni 'en be ts'ukhuna t'eh, 'et t'eh Ndoni 'en zeh bulh úztoodelh huba' hoot'ah. ²⁶ Khun teh 'uzdudoolti gunih. Khun teh ts'uhoske gunih. 'Ink'ez khun teh 'uyoon yit'i 'i ka 'uznoozin gunih.

6

Ndet huwa whúlna lhula dáht'en

¹ Sulhutsinkah nuwheni Ndoni k'une' 'aht'en, 'ink'ez ndan nuhtah lubeshi be lhúgooh, 'en nalhúchoot. Nagoostl'iyaz ts'ah'un ninanulhtih. Nuhwhenich'oh na'dunlhu'en, doo ka si nuwheni chah tink'us nóoht'uk. ² 'Ilho ahli ndet nuhwhuba howa whulna whunts'i lhula 'oohdut'en. 'Et t'eh Christ bughunek netl'adélt's'ut, 'i, buk'une' teht'en ho' hoot'ah. ³ Ndan hoonli 'ust'ah na'dunúdzun, 'en dich'oh na'dunut'ah. 'Aw hoonli chailah ho' 'int'ah 'et huwa. ⁴ 'Et 'ilhunuh ahli hoh nuhwé 'ut'en k'ah soo cho whunóolh'en. 'Et 'ut'en unzoo, 'i 'inla t'eh, 'et dich'oh duba hót'i, 'ink'ez 'aw 'uyoon ba ilah. ⁵ 'Ilhunuh ts'inli hoh nuwheni'oh ne'ut'en 'uts'oolh'en huba' hoot'ah.

Tube cho dune za'ahli 'ink'ez hoonzoo tune' 'aht'en

⁶ 'Et ndan Yak'usda bughunek hodulh'eh, 'en ndan whuyoodalh'i, 'en ndai unzoo, 'i yít'i, 'i bulah ye yula 'oot'en huba' hoot'ah. ⁷ Khun nanooht'ah gunih. 'Aw Yak'usda bughohdloh ghait'ah. 'Et ndai dune 'ainulih, 'i zeh hayuntelelh ho' 'int'ah. ⁸ 'Et nts'e dune buyust'e nint'uk ts'ih, 'et buyust'e whuts'u nint'uk, whuz na'a datetsah. 'Et whunts'ih ndan Ndoni yunilht'uk k'una'a ne'ut'en, 'en Ndoni bugha 'ilhuz khutena. ⁹ 'Et hoonzoo 'uts'uwhulh'en 'et huwa niznootsilh gunih. 'Et 'aw whulachats'udustnik t'eh, whusawhélt's'ut t'eh, 'et t'eh ka há'uznoolelh. ¹⁰ 'Et huwa negha whults'ut t'eh, 'uyoon la' ts'oot'en. Ndunnah be 'alha 'uhoont'ah hinli, 'en dega nus bula' ts'oot'en huba' hoot'ah.

Sizi Gri lhdulalghus k'ut dazsai, 'et zeh ts'uhót'i

¹¹ Ndi nulh'en sich'oh nuhts'o k'e'aguz, 'i 'int'ah. Lhe'ilhcho silhsi hoh buk'une'zíguz. ¹² 'Et ndunnah hubuyust'e 'et huba soo 'uldzoo, 'en 'et hukwa' hut'en, 'en 'uhint'ah, nuwheni buka dune ahli, 'i k'ut nuhotet'us whuts'un nahonilht'uk. 'Et njan huwa' hut'en, Christ lhdulalghus k'ut neba dazsai howu yats'ulhtuk, 'et huwa dzuh nunéhulhdzut, 'et whuch'a ne'hoot'en hukwa' hut'en. ¹³ 'Et ndunnah yuka dune unli, 'i k'ut ts'ant'az, 'en whunts'i Moses be' dustl'us 'aw hik'unucha'ust'en. 'Et whunts'ih whuz na'a buka dune ahli, 'i k'ut nuhotet'us whuz nuhonilht'uk. 'Et ndunwhuhinla t'eh, 'et whuz na'a hoh nuhwughu yahulhtuk wule da. ¹⁴ 'Et NeMoodihti Sizi Gri bulhdulalghus, 'i bugha zeh sudzi whudóoti. 'En bulh dasítsai li'ust'ah. 'Et huwa ndi yun k'ut 'ants'i suba whuzdli. 'Ink'ez si chah 'ants'i whuba usdli suli. ¹⁵ Nuwheni ts'iyawh Christ, Sizi ts'utni, 'en bulh 'uts'int'ah t'eh, 'et t'eh yuka dune unli, 'i k'ut 'uts'ant'az, k'us dune chats'ít'us, 'et 'ants'i 'uhoont'ah 'et huwa. 'Et whunts'ih njan hooncha ho' hoot'ah, nuwheni ndunnah Christ, Sizi ts'utni, 'en bulh 'int'ah, doo chah zeh ts'uwhuzdli ho' ts'int'ah. ¹⁶ 'Ink'ez ndunnah ndi khunek 'i bugha yuk'úne' 'úst'en t'eh, 'et t'eh be nedzi dezghel, 'i 'ink'ez be negha te'nedzeh, 'i ndi hiyulh 'oot'e. Israel hits'uh haínzut, ndunnah Yak'usda budune hinli, 'en chah.

Yak'usda ye unzoo, 'i nohwulh 'óot'e

¹⁷ K'an 'et whuts'un 'aw 'u 'un dune dzuh nusoolhdzut gunih! Sizi Gri ba 'ust'en da dzuh nusízut, 'et huwa suyust'e ndulhcho be hóodet'en ho' 'int'ah. ¹⁸ Sulhutsinkah, neMoodihti ye unzoo, 'i nohyeghah bulh 'oot'e. 'Et ndoh honeh.

Paul Ephesus Whut'en Hubuts'un K'e'anguz

Ephesus whut'en Paul dahooja hubulhni

¹ Si Paul Sizi Gri 'en bugha whel'a usdli. 'Et whuz na'a Yak'usda sts'u hukwa' ninzun. Nuhwheni dune Yak'usda bube'ildzun, 'en keyah Ephesus 'et whut'en, nuhwheni Sizi Gri 'aw bula doohtni ghait'ah, ndet nuhwhuba 'alha 'uhoont'ah, nuhwheni ts'iyawh dahooja nuhwhudusni. ² Yak'usda ne'aBá 'ink'ez Sizi Gri neMoodihti, 'en ts'un ye unzoo, 'ink'ez nuhdzi dezghel nuhwhugha óoni'ai, 'i ts'iyawh nohwhulh óot'e.

Christ, 'en 'uja nenaonket

³ Yak'usda, Sizi Gri neMoodihti be'aBá 'int'ah, 'en uzdélhti. 'En 'int'ah Sizi Gri be ndet yak'ut whudézi, 'et nduhóolcho Ndoni bugha ndi neghant'ai. ⁴ Ndez na'a ne'aBá njan nduja, ndi yun 'utelilh whutsuh 'utahanhonla Sizi Gri buyúzdutelts'ilh whuba. 'Et hoh lubeshi bughu hoolah ts'ooole sih, 'ink'ez 'aw nek'eootelts'ulh hoolah. Ndi be lhk'ets'udutsi', 'i be ne'aBá bubut 'et whuz na'a 'uts'oot'e huba' hoont'ah. ⁵ 'Et hoh ne'aBá ndez na'a 'uda neba lhaóodinla, nuwheni Sizi Gri 'en be dich'oh buzkehkah uztele. Ndet ne'aBá 'en ba hoonzoo, 'ink'ez nts'e na'a dich'oh hukwa' ninzun, 'et whuz na'a 'uhoonla. ⁶ 'I bugha ndi ye unzoo dézi, 'i uzdóolhti. 'Et whuz na'a buYe' yuk'entsi', 'en buba soo' ts'uldzoo nesulhtsi. ⁷ Sizi Gri 'en buzkai be nenaonket. 'Ink'ez tinta' ts'unt'en neba whuna'dalhde. Ye unzoo, 'i be whudezti, 'i bugha neba 'uhóonla. ⁸ Ndi ye unzoo, 'i be lha'un teh ye whunih, 'ink'ez be t'oonudzun, 'i ts'iyawh 'i be 'et whuz na'a neba 'uhóonla. ⁹ Ndet ne'aBá dich'oh hukwa' ninzun, 'i neba whe' hoont'ah hooyah, 'et chah newhúnelhtan. Ndet dich'oh dudeni lhaidínla, 'et hoont'ah, duYe', 'en bugha 'uhóoja. ¹⁰ 'Et ndez na'a nduwúhtni, nts'oh whugha whezulh huwhu whusawhéls'tu't'eh, 'et ndan yak'uz húdelhts'i, ndi yun k'ut húdelhts'i chah, 'en ts'iyawh Christ 'en bugha 'ilho ubutelhtsilh. ¹¹ Nts'e na'a ne'aBá dich'oh dudeni lhaidínla, 'et whuz na'a 'uwhut'en 'et huwa. 'Et whuz na'a 'uda neba lhaoodinla hoh Sizi Gri 'en be nets'ó tekulh ne'ilhdzun whuzdli. ¹² 'Et nuwheni Lizwif 'udechoo Christ, 'en buka tsi ts'uhooli. 'Et huwa nuwheni negha Yak'usda ye dézi, 'i ndót'e. ¹³ 'En be khunek 'alha 'int'ah nuwheni negha nuhwheni 'udun yun k'ut whut'en dáhts'o. 'Et whuts'un Sizi Gri nuhwhuba 'alha 'uja. Ndi khunek, 'i bugha dujhij. Sizi Gri hukw'elh'az nuhwhuba 'alha 'uja, 'et Ndoni, nets'úyoozi, 'en be nuhwheoodet'en Yak'usda bube'ildzun sahli. ¹⁴ Ndi ne'aBá yít'i, 'i nets'un whutekulh, ne'aBá, Ndoni negha idé'ai. 'I be 'et bulah neba 'et nilts'ut, ndunnah Yak'usda dich'oh bube'ildzun hubulhtsi, 'en nabootekulh 'et whuts'un. 'Et hoh ne'aBá ye dézi, 'i dutéti.

Yak'usda ye whunih nuhgha ídoo'ah, 'et huba tenadáhli

¹⁵ 'Et nts'e na'a Sizi Gri neMoodihti nuhwhuba 'alha 'int'ah, 'ink'ez dune Yak'usda bube'ildzun, 'en ts'iyawh hubuk'ehtsi', 'et nohwhulh 'údsts'o. ¹⁶ 'Et huwa si chah nuhwhuba tenadusdli hoh nuhwhuba chanailya dusni, 'aw 'ustl'e' 'udóosneh ghait'ah. 'Ahoohyez stenadudli tah 'i be nuhwhunalhúnih. ¹⁷ NeMoodihti Sizi Gri buYak'usda, 'en be'aBá ye dézi, 'i bulh 'int'ah, 'en ts'un nuhwhuba tenadusdli hoh Ndoni 'en be whutnih, 'ink'ez nuhwhubeni taoodutekulh, 'et nuhtl'ahó'ai. 'Et hoh Yak'usda dant'ah unli, 'o nus t'entehzeh. ¹⁸ 'Et whuz na'a nuhwhubeni be whunul'en k'una'a 'o nus hooch'en hoh soo ts'ah'un na'a lhat whuntel'hil. 'Et whuz na'a njan uzdoojih ka neka' dani negha óoni'ai, 'et whuz na'a hukwa itóoh'en, 'et 'o nus t'ewhuntehzeh. 'Ink'ez dune Yak'usda bube'ildzun, 'en bulh ndi yít'i, 'i nets'ú whutekulh ts'otet'i, dáwhulzoo ho' hoont'ah, 'et chah 'o nus t'ewhuntehzeh. ¹⁹ Nuwheni chah ndan buba 'alha 'uhoont'ah, Yak'usda ye ulhtus, 'i daltus hoh nets'un 'int'ah, ndi hooncha hoh ye úlhtus, 'i be 'ut'en. 'Et whuz na'a nuhwhuba tenadusdli. ²⁰ Hoh da Christ, 'en yahadla tah dinaidilhti. 'Ink'ez nduk yak'uz dughu nalnih ts'ih natl'aidalhad. ²¹ Christ, 'en ts'iyawh hubugha ndoh 'int'ah. Ndunnah nek'úne'hul'en, 'ink'ez ndi nududeh 'i be butl'awhelts'ut, 'ink'ez negha ndoh ye úlhtus, 'ink'ez ndunnah neba moodih hinli chah, 'en ts'iyawh. K'an 'et 'aho 'ink'ez whuz de whudezulh, 'et whunts'ih ndunnah boozi ncha, 'en ts'iyawh Christ bugha ndoh 'int'ah. ²² Ndaí ne'aBá degha nus ye ulhtus, 'i be ts'iyaintsuk Christ duketl'ah níninla. 'Ink'ez Yak'usda ba 'ilhunahuwúdulh ts'iyai be 'en ts'iyawh hubutsuh whudélhdzulh 'int'ah. ²³ Yak'usda ba 'ilhunahuwésdel, 'en ts'iyawh Christ buyust'e 'uts'int'ah. Buyust'e lhadúlya ts'inli. 'En ts'it'i t'eh, 'aw 'uts'un na'a 'uts'oot'e hukwa cha'ts'unteszi

2

Ye unzoo, 'i be dahjih

¹ 'Ink'ez nuhwheni tinta' naht'en 'ink'ez nuhwhulubeshi be dasántsai, 'et nakhúhna nanwhúhltshi. ² 'Et hoh da ndi yun k'ut 'ut'en k'una'a yinkak delhúts'i inle. Ndun tazai k'uz ye úlhtus, 'i moodih tele, 'et yutl'ahó'ai, 'en netsudule 'en k'une'un whul'en inle. Ndunnah 'awhuz Yak'usda yuk'unucha'hust'en, 'en ye yúinda. ³ Hoh da nuwheni chah whuz na'a zeh buk'una'a 'uts'int'ah inle. Nts'e na'a hoh neyust'e lubeshi ts'un nint'uk, 'et whuz na'a zeh neyust'e 'uter'ilh hukwa' ninzun, 'ink'ez neni chah, 'et ts'iyawh 'ots'uwhulh'en inle. 'Ink'ez Yak'usda ndet hoh hubulh hunilch'e, 'et chah neba whusaóotekulh ínle, ndunnah hubuk'una'a. ⁴ 'Et whunts'ih Yak'usda dahóolcho 'i be nek'entsi, 'et huwa tube cho negha te'nanzin. ⁵ Hoh da tinta' ts'unt'en 'et huwa yats'adla, 'et whunts'ih Christ 'en be Yak'usda ts'ukhuna nesulhtsi. Ye unzoo, 'i be dahjih. ⁶ 'Ink'ez yak'uz ts'ih Christ, Sizi ts'utni, 'en bulh ne'aBá nedinadinla. Lhelhdun nduk yak'uz ts'ih, 'en yuzih nitl'azdelts'i. ⁷ 'Et whuz na'a ne'aBá dalcho ye unzoo, 'i nus de whudezulh whusawhútelts'ulh, nduwhulyez Christ, Sizi ts'utni, 'en be ne'aBá whunéuntelhtun. 'I be nets'un tézoo ho' hoont'ah. ⁸ Ye unzoo, 'i be, be neba 'alha 'uhooht'ah bugha uzdujih 'et huwa. 'Aw whenich'oh negha ilah hoh uzdujih. Yak'usda 'en negha óoni'ai. ⁹ 'Aw 'ut'en 'uts'ulh'en, 'i bugha ilah uzdujih. Doo ka bulunah dune hundunoolti. ¹⁰ Nuwheni Yak'usda 'un whinla 'uts'int'ah. Christ, Sizi ts'utni, 'en buyúzdults'i hoh 'en be k'andit nats'usdli, 'ut'en unzoo, 'i 'uztelh'ilh ka. 'Et hoh whutsuh Yak'usda neba lhaóodinla. 'Et buk'ah nuts'óodelh ka.

Christ buzkai 'i be Yak'usda begnah ninwhuninla

¹¹ 'Et huwa whunalhúnih, nuhyust'e be 'udun yun k'ut whut'en aht'ah. Ndunnah Lizwif, ndan dune dula be hika dune unli, 'i k'ut 'usdút'us, 'en buka dune hinli, 'i k'ut 'aw chánwhuts'it'us nuwhuhútni. ¹² Hoh da nuhwheni Christ bu'et 'aht'ah inle. Israel hits'uh haínde 'aw hubutah cha'áht'ah inle. Ndai Yak'usda budune khunek huba lhaídinla, 'i hubuts'ú yoozi hubuts'un whusaóotekulh, 'aw hoohtsolyaz whunts'i hoh'en ghait'ah inle. 'Aw hukwa itooh'en hoolah 'ink'ez Yak'usda bu'et 'aht'ah inle. ¹³ K'an 'et Christ, Sizi ts'utni, 'en bulh 'aht'ah. Hoh da Yak'usda bughu nilhza 'aht'ah inle, 'et whunts'ih Christ, 'en buzkai, 'i be k'an 'et begnah 'aht'ah suli.

Christ 'en bugha nedzi dezghel

¹⁴ Christ 'en bugha nedzi dezghel. Ndi sih li'int'ah 'i ne-éguz, 'i be lhelhdun uzdelhts'i inle. 'En bugha ndi sih 'i neba hoolah yulhtsi, 'ink'ez 'ilho hudedowh nats'usdli 'et huwa. ¹⁵ Ndi Moses be' dustl'us yuk'e'ánguz, 'i be Lizwif 'ink'ez 'udun yun k'ut whut'en lhch'a uzdetni inle, 'et ne'aBá, Sizi Gri buyust'e be neba hoolah whulhtsi. 'Et huwa nuwheni whutsuh da nawh uzdedowh inle, k'an 'et Sizi Gri bulh 'uts'int'ah. 'Et whuz na'a nawh hudedowh 'ilho uzdedowh zeh nenasulhtsi. 'Et huwa netah whudezghel whulhtsi. ¹⁶ 'Ink'ez dulhdulalhghus 'i bugha nawh hudedowh 'ilho zeh nesulhtsi. 'Et hoh neul dunekah nabulhtsi. 'Et whuz na'a Yak'usda ts'un nenainílna. Ndi lhch'a uzdetni, dulhdulalhghus, 'i bugha 'et ts'iyawh neba hoolah whulhtsi. ¹⁷ 'Ink'ez nuhwheni Yak'usda bughu nilhza 'aht'ah inle, 'ink'ez ndunnah Yak'usda begnah 'uhint'ah, 'en chah Sizi Gri whusainya 'ink'ez 'en ts'iyawh khunek unzoo, 'i be nuhwhulh yaflhtuk dáhooht'ah ts'ah'un na'a lhts'un 'uhoot'e. ¹⁸ 'Et huwa Sizi Gri 'en be nuwheni nats'ult'oh, 'ilhunuh Ndoni, 'en be ne'aBá netl'ahó'ai hoh ts'iyawh buts'uztoodelh ka.

Christ 'en tse koo buk'uwhez'ai unli

¹⁹ K'an 'et ndóohooht'ah, 'uts'un whut'en 'ink'ez 'uts'un keyah whut'en ahli inle, k'an 'et 'aw nducháht'ah. 'Et k'us dune Yak'usda bube'ildzun, 'en hubulh hudedowh sahli. Yak'usda koo húdelhts'i hubutah 'aht'ah sahli. ²⁰ Nuhwheni Yak'usda koo li'ah'ah. Ndunnah whel'a 'en 'ink'ez Yak'usda be nus whunilh'en, 'en ts'iyawh koo buk'uwhez'ai hinli. 'Ink'ez nuhwheni 'en whunohodalh'i, 'et huwa hubulh 'áht'ah. Christ 'en dich'oh degna nus tse koo buk'uwhez'ai, 'i unli ho' 'int'ah. ²¹ Sizi Gri 'en be njan koo ndulhcho hoh ts'iyawh whuduts'o hoh 'uhóolya. 'Et 'i be neMoodihti koo 'o nus whudézi suli. ²² Nuhwheni chah 'en be lhadúlya ahli. 'Et Yak'usda Ndoni be nuhyúinda.

3

Whe' hoont'ah hooyah ts'et hawhélt's'ut

¹ 'Et ndi bugha si, Paul nuhwheni 'udun yun k'ut whut'en nuhwhuba Christ, Sizi ts'utni, 'en ba 'ust'en. 'Et huwa tsak'esída usdli. ² 'Et Yak'usda dich'oh ye unzoo, 'i nuhwheni nuhwhuba sughant'ai, 'et whulh údahts'o t'eh. ³ Dahóont'ah suba wheóodiltsai, 'et 'i be Yak'usda sut'eoonalhdzin, ndi huba whe' hoont'ah hooyah hubugha. Whutsuh da khunek ntsolyaz be nuhts'ó k'e'aguz. ⁴ 'Et buk'eyalhtuk t'eh, 'et sih Christ 'en bugha buba whe' hoont'ah hooyah, nts'e na'a t'eoonúszun, nuhwheni chah whuz na'a t'ewhuntehze. ⁵ 'Uda niz dak'ez ndi yun k'ut whut'en ndet 'uwhúhni, 'aw t'echahonízil inle. 'Et k'an dzin ts'ah'un

na'a ts'iyawh t'ets'onanzin. Ndoni be ndunnah Yak'usda ba whel'a, 'ink'ez Yak'usda be nus whunilh'en chah, 'en ts'iyawh hubunalh nt'eonedzin. ⁶ Uduun yun k'ut whut'en 'ink'ez Lizwif, 'en chah 'ilho yust'e hoole huba' hoont'ah. 'Ink'ez ne'aBá, Christ 'en be ndi khunek unzoo, 'i be nets'u hooszi. Nuwheni ts'iyawh neba' hoont'ah ho' hoont'ah. ⁷ Khunek unzoo, 'i be ne'úsle síli. Dahooont'ah hukw'u na'a Yak'usda ye ulhtus, 'i be 'uwhut'en, 'et whuz na'a ye unzoo, 'i be stl'awhélt'sut.

Whe' hoont'ah hooyah ts'et hawhélt'sut 'et hubugha

⁸ Si whunts'i, dune Yak'usda bube'ildzun hubutah, 'en hubuk'éh'ih 'ust'ah hukw'u na'a 'udulhúdzun 'et ndunúszun. 'Et whunts'ih ndi ye unzoo, 'i sughált'sut. 'Et 'i be 'udun yun k'ut whut'en, khunek unzoo, 'i be nduhóolhcho hubudutésnilh. Christ ye dézti, 'i hooncha k'et, 'aw whu la tah hoolah, 'et hubugha hubudutésnilh. ⁹ 'Et hoh buba whe' hoont'ah hooyah, 'et 'i be ts'iyana 'ilho hudedowh ts'ooole. Soo 'udechoo da whuts'un, Yak'usda ts'iyana hubuch'á whuntez'i. 'Ink'ez ts'iyana dune honilh'en hubutelhtsilh ka. 'En 'uja Sizi Gri 'en be ts'iyaintsuk inla. ¹⁰ 'Et huwa yak'uz ts'ih ndunnah k'une'buhol'en, 'ink'ez ndi nududeh 'i be butl'awhélt'sut, 'en ts'iyawh Yak'usda ba 'ilhunahuwédel hubugha ndunnah nduk yak'uz húdelht'si, Yak'usda ye whunih ts'iyawh ndet 'uwhúlhni hububut nt'eonedzin. ¹¹ Udechoo whuts'un ne'aBá nduninzun, whuz na'a Christ, Sizi ts'utni, 'en neMoodihti, 'en bugha 'uhóonla. ¹² 'En be 'aw whéchts'oojah hoh be 'alha 'uhoont'ah, 'i bugha 'aw whechats'uniljw hoh ne'aBá bubut nézteyalh. ¹³ 'Et huwa nuhts'u tedusdli, nuhwhuba dzuh nusuzat'ulwa, nuhdzi k'ah 'ooneh gunih, 'et nuhts'u hukwa' dusni. 'Et hoh whunoolhnik.

Whe' hoont'ah hooyah ts'et hawhélt'sut neba hooncha

¹⁴ 'Et huwa Sizi Gri neMoodihti be'aBá, 'en bubut sugwutsi be niniya. ¹⁵ Boozi bugha ndunnah yak'uz húdelht'si 'ink'ez ndi yun k'ut hukhuna chah, 'en ts'iyawh buzkehkah hoodzi. ¹⁶ 'En ts'un ndez na'a nuhwhuba tenadusdli, Ye dézti, 'i hooncha k'et 'aw uzdooni ghait'ah, 'et 'uwhtulsuk Ndoni bugha ye úlhtus, 'i nuhgha ite'ah. 'Et hoh nuhyégha unli, 'i be ulhtus tehle. ¹⁷ Be nebe 'alha 'uhoont'ah 'i be Christ nuhdzi yuh nidoolts'it. 'Ink'ez be nek'ets'intsi, 'i be ndi koo buk'uwhez'ai, 'i bughih hoonli k'una'a duts'o. ¹⁸ 'Et hoh dune Yak'usda bube'ildzun, 'en bulh nuhwheni chah Sizi Gri be nek'ets'intsi, 'i soo cho be t'éwhuntehzeh, dádeltel 'ink'ez dadelye, dádeltai 'ink'ez nduk dawhdzuh ts'ih chah, 'et 'uhoolcho, 'i be. ¹⁹ Christ ye nék'entsi, 'i hooncha k'et, 'aw t'ets'onózin ghait'ah, 'i be t'eoonohzeh. 'Ink'ez ndai Yak'usda yé dezbun, 'i be dóohbun. ²⁰ 'Aw 'et ne'aBá ndet buts'un hukwa' ts'utni 'ink'ez howu nuni uznuzut chah, 'et 'o nus 'ultsuk, 'i negha itelelh ho' int'ah. Ndai Ndoni ye ulhtus, 'i neyuh int'ah, 'et 'i be' whut'en. ²¹ 'Et huwa ndi yun 'ustl'e' utenel' whuts'un 'ink'ez hukw'elh'az 'ilhuz wheni, 'et whuz na'a Christ, Sizi ts'utni, 'en ba 'ilhunahuwúdulh ne'aBá uzdóolhti huba' hoont'ah. 'Et ndoh honeh.

4

Ilho wahle

¹ Si, neMoodihti buba tsak'esída 'ust'ah. Njan dutehjij ka Yak'usda nuhka' dani, 'et huba soo 'ulhúdzoo hoh whuz toohdelh, 'et nuhts'u hukwa' dusni. ² 'Ahoohyeh yuh 'udulhúdzun, 'ink'ez nagoostl'iyaz né'boolh'en. Dzuh nahdeh whuts'udoohtnik gunih. Lhk'edahtsi' hoh 'ilho dune wahle. ³ Ndoni 'en be ts'iyawh lhulh dune wahle. Ts'ah'un na'a lhts'un 'ooht'e, 'i be 'ilho wahle. 'Et 'i be nuhdzi ndulhcho, 'i be whuz na'a zeh hukwa 'ooht'en. ⁴ 'Ilho yust'e ts'uzdli 'ink'ez 'ilho Ndoni neyudinda. Nts'e na'a Yak'usda dutehjij ka nuhka' dani 'et hukwa tsi hóhli. ⁵ 'Ilhunuh neMoodihti 'ink'ez be néba 'alha 'uhoont'ah, 'i chah 'ilho zeh. 'Ink'ez 'ilho zeh be too be' ts'ul'ih hoonli. ⁶ 'Et 'ilhunuh Yak'usda, 'en buba 'alha 'uhoont'ah, ts'iyawh be'aBá unli. Ts'iyai gha ndoh int'ah 'ink'ez nuwheni ts'iyawh netah 'ut'en. 'Ink'ez nuhwheni ts'iyawh, 'ilhunuh ahli hoh nuhyudinda.

Ndai Christ negha ínla

⁷ 'Et Christ, 'ilho ts'inli hoh ndi yun k'ut lhelhdun huwa ts'ughuna, ye unzoo, 'i be negha óoninla. ⁸ 'Et huwa Yak'usda bughunek njan ndutni, "Hoh da Christ nduk whenya hoh ndunnah naobilchukw, whuz whe naoobanla.

'Ink'ez dune bugha' ninla."

⁹ K'an 'et nuhwhudutésnilh daja ni hoh 'utni. Lhdulalhgus k'ut dazsai hoh yahadla tuz whenya, 'et 'uwhúlhni. ¹⁰ Nduun nyuk whenya, 'en zeh dega ndoh yak'uz whenája. Whuz ts'iyaintsuk lhaoodútelih ka. ¹¹ 'En zeh 'ut'en, bulunah chah whel'a 'en butl'a hó'ai. Bulunah nus whunilh'en butl'a hó'ai. Bulunah khunek unzoo, 'i be yahutelhtuk, 'et butl'a hó'ai. Bulunah Yak'usda ba 'ilhunahuwédel bughu tele 'ink'ez dune hoodutel'eh, 'et chah butl'a hó'ai ho' hut'en. ¹² Dune Yak'usda bube'ildzun, 'en lhadúlya nabulhtsi 'et wheni. 'Et whuz

na'a Sizi Gri ba ne'úsle 'ut'en 'uhiyulh'en 'ink'ez Christ buyust'e nus zeh lhe'eltus, 'et wheni 'uhut'en. ¹³ 'Et njan whuts'un ndet be neba 'alha 'uhoont'ah chah, 'ink'ez ndet 'ets'oninzun Yak'usda buYe' bugha, 'et whuts'un ts'iyawh 'ilho 'uztele. 'Et whuz na'a soo lhadúlya uztele. 'Ink'ez Christ nts'e na'a soo 'et ndunt'ah, 'en buk'ah ts'ih hukw'u na'a 'uztenilh. ¹⁴ 'Aw 'o 'un 'uskehyazkah k'una'a cha'ts'oost'e 'et huwa. Dune buka hóodelhts'i nabante'ah ka. Lhelhts'un na'a dune wheeobohodulh'eh, 'i be 'ants'i nilhts'i k'una'a lhelh ts'un náhutukuk li'hut'en. ¹⁵ K'us ndet khunek 'alha 'int'ah be lkh'ets'udutsi, 'i be yats'ulhtuk, 'ink'ez Christ netsuh whudéldzulh, 'en ts'un soo cho uznooyeh hukwa' ts'ut'en. ¹⁶ 'En be buyust'e ndulcho lkh'eyánla. Whuz na'a ye ulhtus, 'i be hóotun. 'Et ts'iyawh lhghu naoodelhúghun 'i be' whut'en. 'Et whuz na'a zeh 'uwhut'en t'eh, 'et t'eh buyust'e be lkh'ets'udutsi, 'i be 'o nus ulhtus 'ink'ez unzoo tele.

K'an dune, dant'ah dune tele

¹⁷ 'Et huwa njan hubugha ndun whudutesnilh, neMoodihti nalh 'udusni, 'udun yun k'ut whut'en hubeni lait'ah hukw'u na'a nuni hunudeh. 'Aw 'o 'un 'en buk'una'a 'ooht'e gunih. ¹⁸ Hubeni tsahólhgus yuh 'int'ah, 'et huwa Yak'usda ye khuna, 'i be'et 'uhint'ah. 'Aw hoonli t'echahonízun, budzi duts'un sulí 'et huwa. ¹⁹ 'Aw ts'iyaintsuk hukw'u ní chanulhdzut. Ts'iyaintsuk whulahudetnik. Buyust'e whuts'u nint'uk, 'et zeh hukwa' huninzun. Soo hunint'uk hoh 'ut'en dutsun, 'i 'uhutelh'ilh, 'et zeh whuts'u nint'uk. ²⁰ 'Et whunts'ih nuhwheni Christ, 'en 'aw ndoohoont'ah be whuchaoodulhú'il. ²¹ 'Alha tulih, 'en bugha whulh 'údahts'o 'ink'ez 'en be hoodelhú'i, nts'e na'a hoh Sizi 'en bugha be 'alha' nudzun, 'en unli 'et huwa. ²² 'Et 'uda dats'int'ah inle, 'et ts'iyawh 'ustl'e 'uwahleh 'ink'ez whuch'a whúnulht'uk. 'Et nduhoot'ah, 'et ts'iyawh tube hoontsi' ho' hoot'ah. 'Ndet whuts'u náht'uk, 'et hoh nanáht'ah. ²³ 'Ink'ez nuhwhubeni be howu nuní nahzut, 'et nduhóolcho 'et k'andit nahoolhtsilh. ²⁴ 'Et k'an hukw'u na'a yun k'enahtdelh, 'et whuz na'a whulhchoot. 'Et Yak'usda be 'ut'en k'ah 'uhoont'ah. 'Ndet be ts'ah'un 'uhoont'ah, 'ink'ez be 'alha 'int'ah, 'i lubeshi bughu hoolah, 'et whuz na'a Yak'usda neba 'uhóonla.

Ndoni khun butso wahle gunih

²⁵ 'Et huwa 'ilhunah ahli whahts'it 'ustl'e 'udóohneh! 'Ink'ez k'an 'et whuts'un 'ilhunah ahli hoh nuhwheghah huwhut'i 'en chah khunek 'alha 'int'ah, 'i be hubulh yaoolhtuk, ts'iyawh 'ilho uzdedowh ts'inli, 'et huwa. ²⁶ Nuhwhuske be lubeshi wulhchoot gunih. Khun teh nk'achah hunlhúch'e hoh sa yuk tóo'ah gunih. ²⁷ Khun teh netsudule hukwa' ninzun tune' nuhóolh'en gunih. ²⁸ Ndunnah 'udunut'ih, 'en ts'iyawh 'ustl'e 'uhooneh, 'et hubula be 'uhoot'en, 'et sih huba 'uk'elha hole. 'Ndai dula be hoonzoo huwa ghóona. 'Et sih dune hoonli whedunidzit hoonliyaz be bula 'ooneh. ²⁹ Khunek ntsi' be yaoolhtuk gunih. 'Et khunek unzoo, 'i hiye yalhtuk, 'i be 'o nus hilhtus hutele. 'Et t'eh ndunnah nuhoozéhts'ai, 'en huba whútezoo. ³⁰ Yak'usda buyégha lubeshi bughu hoolah, 'en khun butso wahle gunih. 'En nuhe hóodet'en nuhwhulhtsi ndet dzin nanhootekulh 'et wheni. ³¹ 'Ndet nuhwhuba dzuh 'uhoont'ah, 'ink'ez whúske k'et 'ants'i nuhdzi dézk'un li'ah'tah, 'ink'ez whúske 'i be 'ahoolhyez lhulh whuzahke, 'ink'ez 'ahoolhyez lhughí yalhútuk, 'ink'ez dune hubuch'a dahni chah, 'i ts'iyawh buch'a naoohlúye. ³² 'Ink'ez nuhwheni ts'iyawh lhts'un wazoo, 'ink'ez ts'iyaintsuk nuhdzi wúldzoo hoh lhugha te'untehdzin, 'ink'ez nts'e na'a Christ, 'en be Yak'usda nuhwhulubeshi nuhwhuba yuna'alhde, 'et nuhwheni chah whuz na'a zeh 'ilho ahli hoh lhba 'un whutoolhdelh.

5

Be lkh'ets'udutsi, 'i be ndi yun k'ut ts'udelhts'i

¹ 'Et nuhwheni Yak'usda nuhk'entsi' aht'ah, 'ink'ez 'en buzkeh ahli, 'et huwa buk'ah ne'óht'en. ² Nts'e na'a Christ nék'entsi' hoh dulhdulahlhgus k'ut neba butl'a' dudelti, 'ink'ez Yak'usda 'en ts'un buk'uzdai k'ut ba ts'idalh'k'un lí'uja 'ink'ez ndi huwa t'aih, 'i ye khuna 'int'ah, 'i chah buk'uzdai k'ut butl'a' dudelti lí'uja, ndi yoo ba soo yíltsun li'hoont'ah, 'et nuhwheni chah whuz na'a zeh hoh ts'iyana'ah buk'eohtsi'. ³ 'Et whunts'ih ndet hoh tinta' aht'ih, 'ink'ez 'ut'en dutsun, k'us 'uyoon dune yit'i ka' nahzun, 'aw hoontsolyaz whunts'i nuhwheni nuhtah 'et ndóht'en gunih. 'Ndunt'i, 'i nuhtah hóle gunih. 'Nuhwheni dune Yak'usda bube'ildzun ahli 'et huwa whuz na'a ndi yun k'udoolhúts'i huba' hoot'ah. ⁴ 'Et ndai dutsun 'ink'ez la hoot'ah be yats'ulhtuk. 'Hoontsi' hoh dlo k'une'uzduni chah, ndi ts'iyawh 'aw whuz na'a nuhwhuba cha'hóot'ah. 'Et k'us tube cho Yak'usda ts'un chanailya dahni. ⁵ Njan t'eeonahzun, ndunnah tinta' 'ut'ih, k'us 'ut'en dutsun, 'i 'ulh'en, k'us 'uyoon dune yit'i ka' huninzun, 'en 'uk'edélti ts'un tenahududli bubúlh lhulhugha 'uhint'ah, 'et 'en ts'iyawh, Yak'usda 'ink'ez Christ, nts'e hubudayi cho unli, 'aw hoontsolyaz whunts'i 'aw bughá hokat ghait'ah. ⁶ Khun dune khunek hubutah huhoolah be nuhwhunoo'ah

gunih. Ndunt'ah Yak'usda yé whúske, 'i, Yak'usda hik'unucha'hust'en buk'eóodutelts'ulh ho' hooht'ah. ⁷'Et huwa buts'ún nidoóhdelh gunih.

Whét'en, 'i niz náhdelh

⁸Whunullh'en, hoh da tsahólhghus yuh delhúts'i inle. K'an 'et neMoodihti, 'en be whét'en, 'i nuhwhuba sulí. 'Et huwa 'uskehyaz k'una'a be whét'en, 'i niz nuhdelh 'et ndóht'e huba' hooht'ah. ⁹Ndoni be 'ut'en k'ah, ts'iyaintsuk ndet hoonzoo, ts'ah'un na'a 'uhoont'ah, 'ink'ez khunek 'alha 'int'ah, 'i chah ts'iyawh Ndoni búlh buts'un hawhúkat 'úhoont'ah ho' hooht'ah 'et huwa. ¹⁰'Et ndaht'en t'eh, 'et whuz na'a neMoodihti hooht'i telhtsilh. ¹¹Tsahólhghus yuh húdelhts'i hube 'ut'en k'ah ndúhoolcho hoh 'aw cha'hóozooh. Khun buts'un nidoóhdelh gunih, 'et k'us njan nduhut'en ts'ih'un whunaobuts'unultun. ¹²Ndet whunest'i hoh ne'hut'en, 'et hukwaya hoonli k'et, 'aw howu yats'oolhtuk huba cha'hóot'ah. ¹³'Et whunts'ih ndi Yak'usda be whét'en, 'i be ts'iyanaah hiye t'ewhunilhdzun. 'Et nts'e na'a ts'iyanaah t'ehonanzin, ndi Yak'usda be whét'en, 'i be 'uwhut'ih. ¹⁴'Et huwa njan ndutni, "Ndan usti, 'en ts'enindzit!

Yaidla tah dinadindaih.

'Et Christ buts'uh hayánduz,
'i nk'édoodi."

Ye whúnih 'i be yinkak delhúts'i

¹⁵Soo cho khahdli. Ye whúnih 'i be yinkak delhúts'i. Huwhusnik hubuk'una'a ilah. K'us huwhunih k'una'a 'ooht'e. ¹⁶K'an 'et dzin whudezulh 'ahoolhyez dune tink'us 'uhet'ilh ze' hut'en. 'Et huwa njan yun nadalhdukw sulí, 'et hoolah whutele whutsuh, soo cho ts'ah'un na'a 'uts'uholeh hukwa' ts'oot'en. ¹⁷'Et huwa khun ilah tune' ooh't'en gunih. K'us neMoodihti 'en ndet nuhts'o hukwa' ninzun, 'et zeh t'eeonohzeh hukwa 'aht'en. ¹⁸Khun tanooh'tnai gunih. 'I be khahna, 'i tinta 'ulh'ih. 'Et k'us Ndoni be doohbun huba' hooht'ah. ¹⁹Yak'usda bughunek be ahjun. Shun teni' uznilzhun, 'i be chah ahjun, 'ink'ez Ndoni shun be ahjun. Nuhdzi yuh hoh nuhMoodihti shun be délhti, 'et whuz na'a lhulh yalhútuk. ²⁰Sizi Gri neMoodihti, 'en boozí be Yak'usda ne'abá, 'en ts'un ts'iyaintsuk hubugha 'ahoolhyez chanailya dahni. ²¹Yak'usda ts'un te'nahzun 'i gha lhl'á'dulhúye hoh nuhwheni 'ilho dune wahle.

Ndi yun k'ut lhghuzdelhts'i, 'i Christ 'ink'ez hubuluglez nduwht'ah

²²Nuh'atkah nts'ena'a neMootihti butl'a'dudelhúya, whuz na'a nuhwhukikah butl'a'dudoolhúyelh. ²³Nuhkikah 'en nuhtsuh hudelhdzulh 'et huwa. Nts'e na'a Christ, Yak'usda ba 'ilhunahuwúdulh butsuh unli, 'et whúz na'a 'et ndúhooht'ah. 'Ink'ez Christ, nuwheni buyust'e 'uts'int'ah, 'en neulhyis 'int'ah. ²⁴'Et huwa nuwheni Yak'usda ba 'ilhunahuwúdulh, nts'e na'a Christ negha ndoh 'int'ah buk'une' ts'ut'en, 'et whuz na'a ts'ekoo chah dich'oh dukikah ts'iyaintsuk buk'úne' hóot'en. ²⁵Nuhkikah, nts'e na'a Christ nuwheni Yak'usda ba 'ilhunahuwúdulh nek'entsi' k'et neba huwá' dudulti, 'et whuz na'a nuhwheni'ch'oh nuh'atkah buk'eeohtsi'. ²⁶'Et Christ neba daja, nuwheni Yak'usda ba 'ilhunahuwúdulh Yak'usda ba 'udun nenínla. Soo ts'ah'un too zai, 'i k'una'a bughunek be netsun hoolah nenasulhtsi. ²⁷'Et whuz na'a nuwheni Yak'usda ba 'ilhunahuwúdulh soo dega nus lhadint'ah ts'inle hoh Christ dich'oh dubut nenítelel. 'Aw tsunyz whunts'i nek'ut be chaóodest'en. 'Ink'ez 'uts'un na'ayaz whunts'i cha'ts'ít'ah. 'Et whuz na'a 'et nduts'uwhut'en uztele. 'Ink'ez lubeshi bu'et uzte't'ilh, 'aw whuz na'a nek'eho'alh chaootélah. ²⁸'Et whuz na'a dune du'atkah buk'ehootsi'. 'Et dahint'ah dich'oh k'enahudutsi', whuz na'a zeh du'atkah chah buk'ehootsi' huba' hooht'ah. ²⁹'Et 'aw 'ilhunuh dune dich'oh buyust'e ts'udutni hoolah, k'us dich'oh buyust'e soo cho né'yulh'en. 'Et whuz na'a zeh neMoodihti Yak'usda ba 'ilhunahuwúdulh ts'iyawh hubughunli. ³⁰Christ buyust'e ndulhcho hoh nuwheni ts'iyawh bulah ts'inli 'et huwa. ³¹Njan 'et huwa, dune be'abá, be'ama chah buch'a ooya 'ink'ez du'at zeh yulh 'oot'e, 'et nahúlt'ah 'en 'ilho zeh hoole. ³²Ndi huba whe' hooht'ah hooyah, 'et hooncha ho' hooht'ah. 'Et njan 'udusni, 'i Christ ts'utni, 'en 'ink'ez Yak'usda ba 'ilhunahuwúdulh, 'et 'udúnsi. ³³Njan 'et doo chah zeh nuhwhudutesnilh, dáhooht'ah hoh ts'iyawh nuhwheni'ch'oh k'enahudutsi', 'et whuz na'a zeh nuh'atkah buk'eeohtsi' huba' hooht'ah. 'Ink'ez nuhwheni ts'ekoo nuhkikah soo cho hubudóolhti.

6

'Uskehyaz nuhwe'abá 'ink'ez nuhwe'ama 'en hubadóolhti huba' hooht'ah

¹Nuhwheni 'uskehyaz neMoodihti 'en bugha nuhwe'abá 'ink'ez nuhwe'ama hubuk'une' 'ooht'en. 'Et ts'ah'un na'a 'uhoont'ah. ²Nuh'abá nuh'ama bulh hubudóolhti. Ndi khunek 'i 'udechoo netl'aída'ai 'i bulh nets'u yoozi ho' 'int'ah. ³'Et huwa 'i be sa ndi yun k'ut

khutehnalh 'ink'ez ts'iyaintsuk sóo' teht'ilh. ⁴ Ink'ez nuhwheni ndan dune buzkeh hooni, nuhwhuzkeh khun hubunóolhch'eh gunih. 'Et whunts'ih neMoodihti whuneoodulh'eh, 'et 'i be soo cho hubugha dahni, 'et whuz na'a hubunoolhyeh.

'Ulhna 'ink'ez moodih chah soo cho ne'lhuhul'en

⁵ 'Ulhna ahli nuhwheni chah, nts'e na'a Christ nuhdzi ndulhcho, 'i be buk'une' aht'en, 'et ndunnah ndi yun k'ut nuhmoodih hinli, 'en chah whuz na'a zeh nujut be dulhúduz hoh hubuk'une' 'ooht'en. ⁶ Nuhmoodih nuhwhunilh'en ncha na'dudulhú'i t'eh, 'et whuz na'a ndaht'en ilah, k'us Christ be 'ulhna sahli hoh nuhzul 'ink'ez nuhyust'e ndulhcho, 'i be ndet Yak'usda nuhts'u hukwa' ninzun, 'et hukw'u na'a 'ooht'en. ⁷ Nuhbeni hoonáht'i hoh neMoodihti ba 'ulhna ahli, 'aw dune ba 'ulhna cháhlah. ⁸ T'eeonáhzun, dune 'ulhna k'us 'ulhna hubula nahudetnik whunts'i, 'ut'en unzoo, 'i ahla, 'et whuz na'a neMoodihti ts'un nuhwhuba k'elha whutéle. ⁹ Ink'ez nuhmoodih ahli, nuhwheni chah nuhwhudutesnilh, nuhwhe'ulhna hoonst'i ne'boohl'en gunih. T'eeonuhzun nuhwhenich'oh nuhMoodihti, 'en nduk yak'uz usda 'ink'ez 'en bunalh ts'iyana hluh hulhgha 'uts'int'ah ho' ts'int'ah.

Nts'e na'a netsudule buch'a' ts'ulhdeh

¹⁰ Sulhutsinkah, ndi khunek dega nus 'int'ah 'i be nohwhulh yatelhtuk. NeMoodihti, 'en bé ts'ilhtus. Ndaí ye úlhtus, 'i be ts'ilhtus. ¹¹ Lhts'utedúghan wheni be sóo nazdutetnilh hukwa, Yak'usda negha ininla, 'i, ts'iyawh be soo nadahtneh. 'Et t'eh netsudule ye 'uyoo unli, 'i, 'aw nuhch'a' oolhdeh ghait'ah. ¹² 'I ilah ndi yun k'ut dune bulh hube chats'úsdulh. 'Et whunts'i ndunnah nek'une'whuhul'en, 'ink'ez ndi nududeh 'i be butl'awhelts'ut, 'ink'ez ndi yun k'ut tsahólhgus yuh whumoodih, 'ink'ez ndunnah ntsi' nududeh ndus de haíndel chah, 'en ts'iyawh hubulh lhets'údulh ho' ts'ut'en. ¹³ 'Et huwa lhts'utedughan wheni be sóo nazdutetnilh ka, 'et Yak'usda negha ininla, 'i ts'iyawh be soo nadoohtneh huba' hoont'ah. 'Et hoontsi' whusawhéts'ut t'eh, 'aw nuhch'a' 'oodeh ghait'ah. Ts'iyawh lhadahája t'eh, 'et sih soo cho nudoolhúya! ¹⁴ 'Et huwa didahdelh 'ink'ez nuhwhuts'i tah ndi khunek 'alha 'int'ah, 'i be soo cho sunadulhú'oo. Nuhyust'e ndi be ts'ah'un na'a 'uhoont'ah, 'i chah be náhdel. ¹⁵ Lhadóoht'e ndi khunek unzoo, 'i nedzi ba be soo' hoont'ah, 'i be óoh'es li'oohtneh. ¹⁶ Ndi neba be 'alha 'uhoont'ah, 'i 'ants'i nebut ústan li'int'ah. Ink'ez wulhchoot. 'I be k'aza kwun li'int'ah, 'i ndun ntsi' 'en nets'ítutsoh t'eh, ndi neba be 'alha 'uhoont'ah, 'i be nanoolhneh. ¹⁷ Ndi be uzdujih, 'i be uznelhú'ai li'ts'int'ah. Ink'ez Ndoni butes cho, 'i wulhchoot. 'I Yak'usda bughunek 'int'ah. ¹⁸ Be tenadudli, 'i, 'ink'ez Yak'usda ts'un teni' uznilhdzun, 'i chah, 'et whuz na'a tenadahdli. Ndoni 'en be 'ahoolhyez 'ustl'e' cha'duzéne hoh tenadahdli. Ink'ez nts'oh dawhut'en 'et whunts'ih, huwahli hoh dune Yak'usda bube'ildzun, 'en ts'iyawh huba tenadahdli. ¹⁹ Ink'ez sich'oh chah soo cho suba tenadahdli. 'I be khunek unzoo, 'i sugha tékulh 'ink'ez 'aw whechasaz hoh ndi khunek 'i be yatelhtuk. 'Et huwa be whe' hoont'ah hooyah 'i bugha 'onghoh daja ni, 'et ts'iyawh whebuntelhtun. ²⁰ 'Et Yak'usda ba síyin 'ust'ah, tsak'esída whunts'i. 'Et huwa soo cho suba tenadahdli. 'Et 'aw whechasaz hoh 'uyoon chah hubulh yatelhtuk, 'ink'ez si ts'ah'un na'a 'uwhtesdlilh.

Ye unzoo, 'i nohwhulh 'óot'e

²¹ Si nts'e na'a dast'en 'ink'ez si sts'un sulh dahooja, 'et Tychicus 'en ts'iyaintsuk nuhduténilh. 'En 'int'ah nelhutsin buk'ets'intsi, ndun neMoodihti 'en ts'ah'un na'a ba ne'út'en, 'en 'int'ah. ²² 'Et huwa ndun nuhts'ú telh'a. 'Et sih dats'út'en t'eeonoozhé, 'ink'ez soo cho nuhdzi hoont'i yoolhtsilh. ²³ Nuhwheni sulhutsinkah ts'iyawh be nédzi dezghel, 'i nuhgha tékulh. Yak'usda ne'aBá 'ink'ez Christ neMoodihti 'en be, be nék'ets'intsi, 'i 'ink'ez be 'alha 'uhoont'ah, 'i bulh nuhgha tet'alh. ²⁴ Ndunnah Christ neMoodihti soo 'alha 'i be yuk'entsi, 'en ye unzoo, 'i bulh 'utet'ilh. 'Et ndoh honeh.

Philippi Whut'en 'En Paul Hubuts'un K'e'anguz

Paul, Philippi whut'en, dahooja, hubulhni

¹ Nuwheni Paul 'ink'ez Timothy 'et Sizi Gri be 'ulhna ts'inli. Nuhwheni keyah Philippi whut'en ndunnah Christ, Sizi ts'utni, 'en bugha dune Yak'usda bube'ildzun 'aht'ah, 'ink'ez ndunnah huwunli 'ink'ez yula 'ut'en chah, nuhwheni ts'iyawh dahooja nuhwhuts'utni. ² Yak'usda ne'abá 'ink'ez Sizi Gri neMoodihti, 'en ts'un ye unzoo, 'i 'ink'ez be nedzi dezghel, 'i nuhgha íni'ai, 'i ts'iyawh nohwhulh 'óot'e nuhwhuba hukwa' nuszun.

Nuhnalhúnih totsuk 'et huwa Yak'usda ts'un chanailya dusni

³ Nuhwhunalhúnih totsuk, 'et huwa Yak'usda ts'un chanailya dusni. ⁴ Tenadusdli totsuk hoonust'i hoh nuhwheni ts'iyawh nuhwhuba tenadusdli. ⁵ Udechoo dzin 'ink'ez k'an 'et whuts'un ts'iyannah khunek unzoo, 'i be yalhtuk, 'et nuhwheni chah sula 'aht'en. ⁶ Njan 'et suba nawh cha'hoot'ah, ndun nuhwheni nohwhulh ndi 'ut'en unzoo, 'i whe' yudílh'en, Sizi Gri budzin, 'et t'eh lhaídutelílh. ⁷ Ts'ah'un 'uhoont'ah hukw'u na'a hubugha nuni nuszut. 'Et huwa sudzi yuh 'un whunusdzun. Nts'e na'a dast'ah njan 'utes tl'ool be whédust'uk, 'et whunts'ih ndi khunek unzoo, 'i ba síyin 'ink'ez ts'iyannah t'e'hontézin 'et 'alha 'uhoont'ah. 'Et whuz na'a nuhwheni chah ye unzoo, 'i ts'iyawh lhundúneltsuk hoh lhtats'úlya. ⁸ Yak'usda nalh 'ún whudusni, nts'e na'a Sizi Gri dudzi ndulhcho, 'i be nek'entsi, 'et whuz na'a si chah tube nuhwhuk'enusdli. ⁹ Ndez na'a nuhwhuba tenadusdli, be t'éoonudzun, 'i be 'ink'ez ye whunih chah ts'iyawh 'i be, 'et whuz na'a be nek'ets'intsí, 'et lhat lhuk'uz teh nuhwhuba whutéle. ¹⁰ 'Et whuz na'a ndet dega nus hoonzoo, 'et t'ewhuntehze. 'Et huwa Christ budzin ndet whusawhutélts'ulh, 'et nuhtsun hoolah 'ink'ez 'aw hoonliyaz nuhk'éholts'it whutélah. ¹¹ 'Ink'ez Sizi Gri 'en bugha 'ut'en ts'ah'un 'int'ah, 'i be dóohbun. 'Et whuz na'a Yak'usda ba ts'odóolhti 'ink'ez 'o nus uzdóolhti.

Christ 'en bughu yatuk

¹² Sulhutsinkah sulh dahooja, 'et whula gha ts'ih 'o nus lhanah dune ndi khunek unzoo, 'i hiyoózéllhts'ai suli. 'Et t'ewhuntehzhin hukwa' nuszun. ¹³ 'Et huwa hubudayi cho bukoo wuhocho, ndunnah lhadudughan 'ink'ez 'onghoh, 'en chah, 'et ts'iyannah t'ehoninzun, Christ 'en bugha 'utes tl'ool be whédust'uk. ¹⁴ 'Ink'ez ndunnah neMoodihti be lhulhutsinkah hinli, 'en ndi 'utes tl'ool 'i bugha 'en 'o nus 'uhoolcho, 'i be whéchaniljut Yak'usda bughunek unzoo, 'i ye yatelhtuk ka. ¹⁵ 'Alha bulunah sughe' hoolnih, 'ink'ez suhundóolhdah hukwa' hut'en. 'Et whunts'ih bulunah si sts'un hubudzi unzoo. 'Et whuz na'a Christ 'en highu yailhtuk. ¹⁶ Ndunnah sughe' hoolnih, dich'oh 'ahuminzun hukw'u na'a, Christ 'en highu yailhtuk. 'Aw ts'ah'un na'a ilah 'uhut'en. Njan tsak'esida 'et 'o nus suba hoonstí huhoollhtsilh hukwa' hut'en. ¹⁷ 'Et whunts'ih bulunah 'en be nek'ets'intsí, 'i be Christ 'en highu yailhtuk. T'ehonínzun ndi khunek unzoo, 'i ba njan siyin, 'et hukwa tsak'esahulh'ai. ¹⁸ 'Et nts'e na'a yahalhtuk 'et nduhóolcho suba 'ants'i 'uhoont'ah. Dich'oh duk'un'a'a tulih yahalhtuk k'us khunek 'alha 'int'ah tulih 'uhutni. Christ 'en highu yalhtuk 'et huwa hoonust'i. 'Ink'ez 'et whuz na'a hootést'i. ¹⁹ Nuhwheni ts'iyawh t'enwhunuszun, ndunnah suba tenahududli, 'ink'ez ndai Sizi Gri buyégha 'i be sula' whudíja, 'et 'i be 'et huwa sula nahudutetnih. ²⁰ Ndet hukwa tsi hoostli, 'et daodulhúne nts'oh ne'ust'en, 'et whunts'ih 'aw hukwaya oosdle ghait'ah. 'Et k'us whutsuh da ndést'en inle, 'et k'an 'et whuz na'a zeh 'utest'ílh, 'et huwa 'aw hukwaya chatesdle. Khusna k'us dasitsai 'et whuz na'a zeh be khusna, 'i be Christ 'et hoh délhti. ²¹ Ndez na'a suba njan nduhoont'ah, 'awhuz khusna zeh 'ust'ah t'eh, Christ, 'en zeh 'int'ah. K'us dasitsai, 'et t'eh whuch'a ootéldoh. ²² 'Et 'awhuz khusna zeh 'ust'ah t'eh, se' 'ut'en 'i mai li'tenilh. Nts'e na'a 'utahaootes'alh 'aw t'éoonuzúsum. ²³ 'Et suba nawh 'uhoorja njan 'et whéguz ninlhúts'ut. Nts'e suba hoolhtus wule, 'et whuz na'a 'oosneh. Nduk Christ buts'un 'inkez buuzih tesda hukwa' nuszun. 'Et dega nus whutézoo ho' hoonst'ah. ²⁴ 'Et whunts'ih dachásal t'eh, 'et 'o nus nuhwheni nuhwhuba whutézoo. ²⁵ 'Et whuz na'a dega nus soo' hoonst'ah, 'et dulhcho suba 'alha 'uhoont'ah. 'Et huwa t'éoonuszun dachásal t'eh, 'ink'ez njan tesdalh 'ink'ez nuhwheni ts'iyawh nohwhulh zeh test'ílh. 'Et whuz na'a be nuhwhuba 'alha 'uhoont'ah 'o nus t'eyeh, 'ink'ez 'o nus hootést'i. 'Et whuz na'a 'uwhuté't'ílh. ²⁶ 'Et whuz na'a nuhghu nanúsja t'eh, 'et sih si sugha lkh'uz teh Sizi Gri dutéllhti.

Christ ba soo uznoot'uk 'ink'ez 'en ba dzuh nuts'oozut

²⁷ Nts'oh dahooja whunts'i, Christ bughunek unzoo, nts'e na'a nuhwhuba hukwa' ninzun, whuz na'a zeh yun k'ut delhúts'i. Khun nohwhulh 'ust'ah, k'us nuhch'a 'ust'ah t'eh, ts'iyaintsuk nohwhulh údutests'o nuhyégha 'ink'ez nuhzul bulh 'ílho zeh wahyín. Ndi

khunek unzoo, 'i be, be 'alha 'uhoont'ah ts'it'ih, 'i be 'ilho zeh hukwa 'aht'en. ²⁸ Ink'ez ndunnah nuhch'a detni, 'en hube noolhújut gunih. 'Et whuz na'a ndaht'ah t'eh, 'et soo ts'et whucho wheóobunulhtun, 'en hoolah tele 'uhint'ah. 'Et whunts'ih nuhwheni dujih ahli. Yak'usda 'en nuhwhuba 'uhoonla. ²⁹ Christ 'en ba ndez na'a nuhtl'awhélts'ut, 'aw nuhwhuba 'alha 'int'ah zeh ilah, buba dzuh nahdeh chah. ³⁰ 'Et huwa ndet dzuh nuszut, 'et whunullh'en 'ink'ez whudahts'o, 'et nuhwheni chah whuz na'a zeh 'et ndaht'ah.

2

Te'uzdudil'en hoh 'ilho zeh ts'oolle

¹ 'Et huwa Christ 'en nohwhulh 'int'ah nuhla' tenilh ka ih? Christ ye nuhwhuk'entsi, 'i be ih k'enanwhuna'ah? Ndoni 'ilho ih nohwhulh 'int'ah? 'Ink'ez nuhts'un únzoo ih? 'Ink'ez nuhgha te'ninzun ih? ² 'Et whuz na'a 'uhoont'ah t'eh, 'et be hóonust'i, 'i ts'iyawh lhadáhla. 'Et nuhwhubeni ts'iyawh 'ilho 'ooht'e. Be lkh'edahtsi, 'i chah 'ilho zeh 'uteht'ilh. Nuhzul bulh 'ilho sahli li'ooht'e. 'Et hoh nts'e na'a daja nahzun, 'et 'ilho zeh wahle. ³ 'Et nuhwhenich'oh hukwa' nahzun zeh ne'óoht'en, 'ink'ez ahcha na'dudoolhú'i gunih. 'Et whuch'a yuk 'ududulhúdzun 'ink'ez 'uyoon nuhghanus hinzoo noohzin. ⁴ Nuhwhenich'oh zeh khun nuni noohzut gunih. 'Et k'us 'uyoon chah hubughu nuni nahzut hubula teht'ilh ka.

Christ, Yak'usda unli, 'et whunts'ih te'dudil'en hoh ndi yun k'ut inda

⁵ Hoh da ndet Christ, Sizi ts'utni, 'en howu nuni nuzut, nuhwheni chah 'et zeh howu nuni noohdeh. ⁶ Yak'usda dant'ah, whuz na'a zeh 'int'ah. 'Ink'ez Yak'usda yundult'ah ho' 'int'ah. 'Et whunts'ih dich'oh Yak'usda yulh lhúgha 'int'ah 'aw hoh cha'dudilti. 'Et huwa 'aw Yak'usda gho te'z'ai chanizun. ⁷ 'Et k'us ts'iyawh whuladetnik hoh be 'ulhna dahint'ah, 'et hóolhchoot, 'ink'ez dune nduwhtú'en suli. ⁸ 'Ink'ez dune nduwhtú'en hoh hinilh'en 'ink'ez dich'oh ts'iyana'hubughan yuk 'int'ah na'dudulhútsi. Datétsah whuts'un de'abá yuk'une' 'ut'en lhdulalghus k'ut datétsah 'et whunts'ih. ⁹ 'Et huwa Yak'usda ts'iyaintsuk gha ndoh yudálhti 'ink'ez boozí dega'ha nus hooncha hukw'u na'a yoozi whulhtsi. ¹⁰ 'Et whuz na'a ndi Sizi boozí, 'i bugha ts'iyana'hubughan dugwutsi be hits'un nuhudútelya ho' hooht'ah. Yak'uz whut'en 'ink'ez ndi yun k'ut whut'en, 'ink'ez yun t'ah 'int'ah, 'en chah ts'iyawh. ¹¹ 'Et ts'iyawh lhelh yoo khunek be yahalhtuk, 'en ts'iyawh njan dawhúdutenilh, Sizi Gri neMoodihti 'int'ah. 'Et whuz na'a ndahútenilh, 'et Yak'usda ne'abá, 'en hidutélti ho' hutni.

Ndi khunek be ts'ukhuna, 'i zeh soo cho oohtun

¹² 'Et huwa nuhwhuk'esi' nts'e na'a daht'ah nohwhulh —'ust'en inle hoh Yak'usda k'une' 'aht'en. K'an 'et 'aho 'aw nohwhulh cha'ust'ah, 'et whunts'ih 'o nus buk'une' 'aht'en tehle, 'et nuhts'un hukwa' nuszun. 'Et huwa soo ts'ah'un na'a 'un whudútsni, nts'e na'a dahjih inle, 'et whénlhujut 'ink'ez nuhwhuyust'e duldúz hoh 'et whuz na'a lhaodáhleh hukwa 'aht'en. ¹³ Yak'usda 'en 'un whulh'en. Ndaí yuka' ninzun 'ink'ez hooht'i hoh nts'e na'a hukwa' ninzun, hoh tuné'nohulh'en. ¹⁴ Ts'iyaintsuk hoh hiyena'hubughan 'udoohtni gunih. 'Ink'ez khun teh lhch'a whunoolhú'i gunih. ¹⁵ Nuhk'ehóotelts'ulh, 'et whu'et 'uht'ah 'ink'ez soo nahtsun noolah wahle, 'et whuz na'a Yak'usda buzkeh tehle, 'et hoh 'aw nuhk'e holts'it ghait'ah. Nduunnah tink'us 'uhint'ah 'ink'ez lubeshi dega'ha nus ntsi' 'ooleh hukwa' hut'en, 'en hubutah 'ulh'ek be whét'en, 'i k'una'a 'ooht'e. ¹⁶ Ndi khunek be ts'ukhuna, 'i zeh soo cho óhtun. 'Et whuz na'a Christ budzin t'eh, dahóolcho 'i be hootést'i. Hoh t'eh, whusúntelhtun niz de ndet hukwa 'est'en 'ink'ez ndai 'áhl'en, 'i ts'iyawh 'aw 'ants'i 'et cha'úst'il. ¹⁷ 'Et whunts'ih be nuhwhuba 'alha 'uhoont'ah 'ink'ez Yak'usda ba 'aht'en, ndi Yak'usda bugha t'ah, li'int'ah. 'Ik'ut be khusna, 'i nadésjul li'ust'ah, 'et huwa hoonúst'i, 'ink'ez ts'iyawh nohwhulh whúnelhník. ¹⁸ 'Et hubugha zeh nuhwheni chah hoonáht'i 'ink'ez sulh whunelhník.

Paul, Timothy yughu yalhtuk

¹⁹ 'Et Sizi neMoodihti 'en but'anínestan hoh Timothy 'aho nuhts'un telh'alh. 'Et whusanája t'eh, daht'ah sudáni, 'et sih hóst'i. ²⁰ 'Aw dune yulh ndult'ah hoolah. 'En soo cho nuhghutele. ²¹ 'Uyoon ts'iyawh dich'oh dunde 'ut'en k'ah zeh hukwa hunuta, 'aw Sizi Gri be 'ut'en k'ah ilah. ²² 'Et whunts'ih Timothy nts'e na'a dune unli, nuhwheni ts'iyawh t'eeonúhzun. Dune buye' nts'e na'a de'abá yula 'ut'en, 'et whuz na'a zeh 'ulhna k'una'a ndi khunek unzoo, 'i be sula 'ut'en. ²³ 'Et huwa 'et njan nts'e na'a sulh dawhúdutenilh, 'et nahó'oi t'eh, 'aw 'et sih nuhts'un tóolh'a. ²⁴ 'Et whunts'ih neMoodihti 'en but'anínestan si chah 'aho nuhts'un tesyalh nuszun.

Paul, Epaphroditus yudálhti

²⁵ 'Et howu nuni nuszut, Epaphroditus 'en nuhts'un tóolh'a huba' hooht'ah. 'En nelhutsin 'int'ah. Sulh 'ut'en chah 'int'ah 'ink'ez 'iluh sulh lhudúghan idúdi. 'Et nuhwheni nuhwhuba khunek na'á chah unli. 'En 'int'ah ndet hukwa' nuszun, 'et nduhóolcho hoh

sula 'ut'en. ²⁶ Hoh da ndun bulh údahts'o nduda inle. 'En hubugha budzi nduda 'ink'ez nuhwheni ts'iyawh nuhk'éninli. ²⁷ 'Ink'ez 'alha tube nduda. 'Ankw'us dazsai, 'et whunts'ih Yak'usda yugha té'nanzin. 'Aw 'en zeh ilah, si chah sugha té'nanzin. 'Et huwa 'o 'un lha'un teh tso chásdlah. ²⁸ 'Et huwa 'aooduneh be nuhts'un whelh'a. Ah'en t'eh, 'et sih hóht'i. 'Ink'ez 'aw tube sudzi chandoosdah. ²⁹ 'Et huwa neMoodihti 'en bugha hoonáht'i hoh koo danúlhti. 'Et ndunt'ah, hubudélhti. ³⁰ Christ 'en be 'ut'en k'ah huwa, 'ut'en buba lhái k'et, 'ankw'us dazsai. Dich'oh ye khuna, 'i whunts'i buba 'ants'i yint'ah. 'Et huwa ndet hoh sula' tehnilh inle, ndai be sula cha'áhnli, 'i ts'iyawh dich'oh be sula 'uja.

3

¹ Sulhutsinkah njan 'et degha nus 'uhoont'ah, 'et ndun whudusni. NeMoodihti 'en bulh ts'ónilhník ndai nuhts'ó k'e'aguz, 'i zeh 'int'ah. 'Et whunts'ih suba 'ants'i hoonli, 'ink'ez bé dóohjih sih. ² Ndunnah dune lhikah li'hint'ah buch'a huwahli. 'Ink'ez ndunnah 'ut'en ntsi' 'ulh'en, 'en chah buch'a huwahli. 'Ink'ez ndunnah hika dune unli 'i ka hubuhut'az, 'en chah buch'a huwahli. ³ 'Et nuwheni ts'ah'un na'a nets'ant'az 'et huwa. 'Ink'ez nuwheni Ndoni 'en be Yak'usda ts'un teni' uznilhazun. 'Ink'ez Christ, Sizi ts'utni, 'en ba ts'odelhti. 'Ink'ez neyust'e k'ah ts'ih 'et 'aw whut'ananichats'unitan. ⁴ 'Et whunts'ih si chah hukwa' nuszun t'eh, suyust'e k'ah ts'ih, 'et zeh whut'anínustan, 'et whunts'ih hukwa cha'núszun. Soo cho whunulh'en, 'et 'uyoon chah buyust'e k'ah ts'ih 'uhint'ah, 'et si 'o nus whuz na'a 'ust'ah. ⁵ Whuzíli whuts'un lhk'udit dzin 'et nts'e na'a buka dune ts'inli k'ut nehoot'as, 'et ndusihihla. Israel buts'uh haizut usdli. Benjamin bulh hudedowh, 'en 'ilhunuh 'ust'ah, 'ink'ez Hebrew bughunek k'ah ts'ih degha nus soo yalhtuk 'ust'ah. 'Ink'ez ndunnah Pharasee, 'en dahoot'ah hoh Moses be' dustl'us k'une' hut'en, 'et si chah hubulh désdowh 'ust'ah. ⁶ Soo tube cho hoolhtus hoh 'ust'en. 'Ink'ez ndunnah Yak'usda ba 'ilhunahuwúdluh, 'en dzuh nobulhdeh inle. 'Ink'ez nts'e na'a dune Moses be' dustl'us be ts'ah'un 'int'ah tele t'eh, 'et huwa 'aw hoh sk'éóotelts'ulh hootélah hoh 'ust'ah. ⁷ 'Et whunts'ih nduhoolcho hoh 'o nus suba hoonzoo sutelhtsilh inle, 'et Christ 'en ba 'ants'i 'et 'ést'en whuzdli 'et nahoo'ai. ⁸ 'Aw 'et zeh ilah 'un whudusni, Christ, Sizi ts'utni, 'en suMoodihti dant'ah t'ezninzun, 'et hooncha k'et 'aw uzdooni ghait'ah. 'Ink'ez ndai niz de nts'oh tune'zúst'en hoh, dáhoot'ah bughu t'eeonúszun, 'i bugha sghu hóolhchoot t'eh, 'et nduhóolcho whuladesnik. 'I ts'iyawh 'un tukat, 'i suba 'unli 'et huwa 'o nus Christ t'eeonoszeh ka. ⁹ 'Ink'ez 'en buyudúsa. Ndi Moses be' dustl'us, 'aw 'i bugha ts'ah'un dune chásdlah inle. 'Et k'us Christ suba 'alha 'int'ah 'et huwa ts'ah'un dune síli. Ndi be ts'ah'un na'a be dune ts'inli, 'i, be 'alha 'uhoont'ah 'i be Yak'usda ts'un hawhúts'uk. ¹⁰ 'Et Sizi Gri 'en soo cho t'enteszeh hukwa' nuszun. Ye ulhtus, 'i be dinaidilhti, 'ink'ez dahoot'ah hoh dzuh nusuzut, 'et chah t'ewhuteszeh. 'Et nts'e na'a dazsai, si chah whuz na'a zeh 'utesnilh. ¹¹ 'Et 'alha 'uhoont'ah, si chah yahadla tah ye dinadija, 'et si chah nduchah ndúsa.

Nduk whuz zeh hukwa' ts'oot'en

¹² 'Awhuz 'aw nduhoolcho huba soo cha'ust'ah. 'Ink'ez soo 'et lhadúlya síli, 'aw howu yachazulhtuk. 'Et whunts'ih nust'uk zeh 'ust'ah. Di ka Christ, Sizi ts'utni, 'en sílhchoot, 'et whuz na'a si chah itélhcholh. ¹³ Sulhutsinkah sich'oh ndi 'awhuz 'aw hóolhchoot chanuzúszun, 'et whunts'ih 'ilhunuh huba zeh 'et ndust'en. Ndi niz sulh ne'whust'en, 'i ts'iyawh bunasulhúnah, 'ink'ez sutsuh 'uwhet'ilh, 'i zeh wúlhchoot hukwa 'ust'en. ¹⁴ Christ, Sizi ts'utni, 'en beYak'usda ndai nduk negha whúte'ah, 'et whuts'un zeh hukwa 'ust'en. ¹⁵ 'Et huwa ndunnah lhadúlya, 'en chah whuz na'a zeh nuni hunookeh, 'ink'ez nuhwheni 'uts'un na'a 'unahzun t'eh, 'et whunts'ih ts'iyawh Yak'usda t'ehowhuntehldzeh. ¹⁶ 'Et whunts'ih ndet 'uda neghá whults'ut, whuz na'a zeh nuts'óodelh 'ink'ez lhk'una'a zeh nuni uznoodeh.

'Aw 'et ndi yun k'ut uzdelhts'i 'et whunts'ih yak'uz nekeyah ho' hoont'ah

¹⁷ Sulhutsinkah sk'una'a 'aht'en. 'Ink'ez 'uyoon si sk'una'a neMoodihti ba yinkak húdelhts'i, 'en chah bunulh'en. Nuwheni nek'ah ts'ih 'ooht'e ka 'uts'int'ah. ¹⁸ 'Et whunulh'en lhanah ndi yun k'ut húdelhts'i hoh 'en Christ bulhdulalhgus ch'a detni 'uhint'ah. Ndunnah tso bulh lhat 'un whudáni. Doo chah zeh snatsul too hoonli hoh 'un whudúsi. ¹⁹ 'Et ndunnah huba 'alha cha'hoot'ah tinta' hutet'ilh. Hubut 'i buba Yak'usda unli. Ndi yun k'ut hooya ts'iyawh hiyulh 'int'ah 'ink'ez 'i zeh hiba whudélhti. Ndi yun k'ut hoonli, 'i zeh ghu nuni hunudeh. ²⁰ Nuwheni 'et yak'uz nekeyah ho' hoont'ah 'et huwa. 'Et whuts'un neulhyis nets'u teyall, 'et huba níznindel. Sizi Gri neMoodihti, 'en 'int'ah. ²¹ 'Ink'ez neyust'e tel'en, 'i buyust'e dézti, 'i k'una'a 'int'ah yutelhtsilh. Ndi ye ulhtus, 'i be ts'iyaintsuk buk'une' whut'en, 'i be 'uyoo neyust'e neba itelhtsilh.

4

¹ 'Et huwa sulhutsinkah nuhwhuk'esi', nuhk'énisli chah 'ust'ah. Nuhwheni nuhgha hoonúst'i, 'ink'ez nuhwheni suba be whuch'a whundeh ahli. Nuhwhuk'esi', neMoodihti 'en ba soo cho nudelhúya. ² Nuhwheni ts'ekoo Euodia 'ink'ez Syntyche, nuhts'u tedusdli, neMoodihti 'en be lkh'una'a zeh nuni nuhzut.

'ink'ez tenazdoodli

³ 'Ink'ez nyun ts'ah'un sulh dune inli, nts'u tedusdli, ndunnah ts'ekoo, khunek unzoo, 'i be sula 'ét'en, 'en bula 'oneh. Clement, 'en chah, 'ink'ez 'onghoh chah sula 'uhét'en, 'en ts'iyawh ndi dustl'us be ts'ukhuna huboozi k'e'usdúguz, 'i k'ut 'en chah huboozi 'uk'une'úsduzuguz. ⁴ NeMoodihti 'ahoolhyez 'en be whunélnhnik! Doo chah zeh 'udusni, whunélnhnik! ⁵ Ts'iyannah dune soo ne'bulh'en. NeMoodihti whusanátedalh 'aw 'et wheghah 'úhoont'ah. ⁶ Hoonli howu ni wahle gunih! 'Et k'us ts'iyaintsuk huba tenadahdli. 'Ink'ez tedahdlih, 'ink'ez chanailya dóohni. Ndai be ndunuhdzit, 'i ts'iyawh Yak'usda ts'un buka' dahni. ⁷ 'Ink'ez Yak'usda be nedzi dezghel, 'i hooncha k'et 'aw t'eznoozeh ghait'ah. 'Et Christ, Sizi ts'utni, 'en be ndi nedzi dezghel, 'i nuhdzi yuh 'ink'ez nuhwhubeni yuh chah 'et ts'iyawh yughu tele.

Ts'iyawh ndet nuhwhuba whudézi, 'et zeh howu nuni noohzut

⁸ Sulhutsinkah ndi khunek, 'i 'udek'elh'az 'int'ah. Ndai 'alha 'int'ah, ndai k'us hóoncha, ndet ts'ah'un 'uhoont'ah, ndai netsun hoolah, ndai unzoo, ndet 'et hoonzoo howu yats'ulhtuk, ndi ts'iyawh nuhwhuba whudézi t'eh, 'et zeh howu nuni nahdeh. ⁹ Ndet si sugha hoodelhú'i, ndai sugunek ullchoot, whudáhts'o, nuhnalh 'ést'en, 'et sih, whuz na'a ne'ooht'en. 'Ink'ez Yak'usda be whudezghel, 'en sih nohwhulh 'óot'e.

Philippi whut'en dahúdzoo

¹⁰ 'Et sa inle hoh doo chah sughu nuni nahzut 'ink'ez 'ahoolhyez sunalhúni, 'et whunts'ih sula 'teht'ilh 'aw nuhgha chawhulhtuk. 'Et huwa neMoodihti 'en be tube hoonúst'i. ¹¹ 'Aw be ndunusdzit, 'i bughi yachasulhtuk. Nts'e na'a dast'ah, 'et whunts'ih hoonúst'i. 'Et whuz na'a hodelhú'i. ¹² T'eeonuszun nts'e na'a hoonliyaz whezdunidzit, 'ink'ez lhái ust'i, 'et chah t'eeonuszun. 'Et huwa nts'oh dahoont'ah whunts'i suye'últ's'ilh, 'ink'ez unusdai, 'ink'ez 'ulhúdlai, 'ink'ez 'endunúsdzit, 'i ts'iyawh nt'eeonuszun. ¹³ Christ ye úlhtus, 'i sugha oon'i'ai, 'et huwa 'en be ts'iyaintsuk 'uwulh'en. ¹⁴ 'Et whunts'ih dzuh nuszut huwa, 'et hoonzoo hoh 'ahja sula 'eht'en. ¹⁵ Philippi whut'en, nuhwheni zeh sula 'áhja. 'Udechoo khunek unzoo, 'i be yawhenilhtuk hoh, 'ink'ez hukw'elh'az yun k'ut Macedonia howu natésja, ndunnah Yak'usda ba 'ilhunahuwúdulh ts'iyawh, 'aw 'ilhunuh whunts'i hoonliyaz sgha cha'í'al. Nuhwheni zeh 'et ndúsahla. ¹⁶ Keyah Thessalonica 'et sída hoh, ndai chást'i inle, nat lkh'élh'az suts'ó t'l'ah'ai. ¹⁷ 'Aw hoonliyaz sugha' teh'alh, 'i 'aw nuwhuts'o hukwa' nuszun ilah. Nus de nuhwhuba 'uk'elha tele, 'i zeh nuhwhuba buka' nuszun. ¹⁸ 'Alha ts'iyai lhái ust'i. Epaphroditus 'en be ndai sutsuh t'l'ahla, 'i ts'iyawh ílhchoot, 'ink'ez 'unésdai. Sooltsun, 'i ndulhcho hoh buzahoolsun lí'int'ah. 'I huwa t'aih 'int'ah. 'I be Yak'usda tube cho hoon'ti. ¹⁹ 'Ink'ez Christ, Sizi ts'utni, ye dézti, 'i bugha suYak'usda ndai be ndunáhdzit, 'i, ts'iyawh nuhgha íteleh. ²⁰ 'Et neYak'usda 'ink'ez ne'abÁ, 'en ts'un 'ilhuw wheni tube cho uzdelhti. 'Et ndoh honeh.

Ts'iyannah dune Yak'usda bube'ildzun, 'en ts'iyawh dahooja hubudóohni

²¹ Ndunnah Christ, Sizi ts'utni, 'en be dune Yak'usda bube'ildzun, 'en ts'iyawh dahooja suba hubudóohni. 'Et ndunnah sulhutsinkah suzih húdelhts'i, 'en chah dahooja nuhowhútni. ²² 'Ink'ez dune Yak'usda bube'ildzun, 'en njan húdelhts'i, 'en ts'iyawh dahooja nuhowhútni. Ndunnah Ceasar bukoo húdelhts'i, 'en soo dahooja hutni. ²³ NeMoodihti Sizi Gri ye unzoo, 'i, nuhwheni ts'iyawh nohwhulh 'oot'e. 'Et ndoh honeh.

Paul, Colossia Whut'en 'En Hubuts'un K'e'anguz

Colossia whut'en Paul dahooja hubulhni

¹ Si Paul Sizi Gri 'en be whel'a 'ust'ah. Yak'usda whuz na'a suba hukwa' ninzun. Ink'ez nelhutsin Timothy, 'en bulh, ² nuhwheni Colossia whut'en ndunnah Christ bulh dahooja nuhwhuts'utni. Christ 'en buyudelhúts'i. Yak'usda bube'ildzun ahli. Nuhwheni nelhutsinkah huba 'alha 'uhoont'ah ahli. Yak'usda ne'aBá 'ink'ez Sizi Gri neMoodihti, 'en ts'un nuhdzi dóoghel 'ink'ez ye unzoo, 'i chah nohwhulh óot'e ka, 'et whuz na'a zeh 'ooht'e hukwa' nuszun.

Dahoont'ah hoh Christ, Sizi ts'utni, 'en nuhwhuba 'alha 'int'ah

³ 'Et Yak'usda Sizi Gri neMoodihti be'aBá, 'en ts'un chanailya ts'utni, 'ink'ez 'ahool-hyez nuhwheni nuhwhuba tenazdudli. ⁴ Nuhwheni nohwhulh uzdzits'o dahoont'ah hoh Christ, Sizi ts'utni, 'en nuhwhuba 'alha 'int'ah 'ink'ez dune Yak'usda bube'ildzun unli, 'en ts'iyawh buk'ehtsi'. ⁵ Ndai yak'uz ts'ih nuhwhuba 'ilhowezkat, 'i buka tsi hóhli. 'Et huwa buk'eohtsi', 'ink'ez ts'ah'un khunek unzoo, 'i whutsuh da whulh údahts'o. ⁶ Nts'e na'a khunek unzoo, 'i ndi yun k'ut ndulhcho hoh núdelhts'ut 'ink'ez 'i be 'uznesdai li'hint'ah. Nuhwheni chah whuz na'a zeh nuhgu delts'ut. Ndet dzin 'udechoo whudáhts'o hoh khunek 'alha 'int'ah 'i bugha Yak'usda ye unzoo, 'i t'ewhuhnehzin, 'et whuz na'a 'o nus soo náhyeh. ⁷ Epaphras 'en 'ilhunuh be ne'úst'en, 'en nelh 'ut'en 'int'ah 'ink'ez buk'ets'ints'i. 'En bugha ye unzoo, 'i bodulhú'eh. 'En nuhwheni nuhwhuba Christ 'en yuba 'ulhna unli 'int'ah, 'ink'ez 'aw nuhla dootnih ghait'ah. ⁸ Ink'ez Ndoni be ts'iyana k'ehtsi', nuwhúlhni.

Christ 'aw 'en zeh ts'iyaintsuk ch'a dezti 'int'ah

⁹ 'Et whulagha ts'ih ndet dzin whulh 'úzdants'o da, 'et whuts'un nuhwhuba tenazdudli, 'aw 'ust'l'e' cha'ts'udéni. Whuz na'a Yak'usda nuhwhuba ts'oodulhkut nuhts'o hukwa' ninzun, soo ts'ah'un na'a t'ewhunoozh. 'Et hoh Ndoni 'en be, be whutnih, 'ink'ez be t'oonudzun, 'i ts'iyawh be dutéhbun. ¹⁰ 'Et neMoodihti 'en ba soo ts'ah'un na'a ndi yun k'ut delhúts'i. Ndai 'ulh'en, 'i ts'iyawh yé hot'i. 'Ut'en unzoo, 'i buts'un hayóokat, 'ink'ez Yak'usda 'o nus t'entehz. ¹¹ Ye ulhtus, 'i dézti, 'i ts'iyawh 'i be 'o nus ulhtus wáhle. 'Ink'ez hoonáht'i soo hoonli tachaoodahtnik 'ink'ez dzuh nahdeh whulh nudelhúya. ¹² Ink'ez ne'aBá chanailya dahni. Dune Yak'usda bube'ildzun, 'en be whét'en, 'i buniz nudelhúya, 'en ndai yit'i, 'i hubugha íteleh 'i bulah negha tekulh, 'et nuwheni soo ts'uldzoo nesulhtsi. ¹³ Ne'aBá ndi tsahólhgus yuh ulhtus, 'i ts'un hanánhonla, 'ink'ez buYe' yuk'entsi', nts'e whuhubudayi cho unli, 'et nenáneninla. ¹⁴ 'En duduzkai be nenaonket. 'Et hoh nelubeshi ts'iyawh neba 'un yutelhdel. ¹⁵ Yak'usda 'aw chast'en ho' 'int'ah 'et whunts'ih buYe' 'en yundult'ah ho' 'int'ah t'ets'ominzun. Ndi ts'iyaintsuk 'ulya, 'i 'udechoo whuzdli unli, 'et huwa ts'iyawh whumoodih unli. ¹⁶ 'En be ts'iyaintsuk 'ulya 'et huwa. Ndai yak'uz 'ink'ez ndi yun k'ut, ndai uznill'en, 'ink'ez chats'és'en chah. Ndunnah yak'uz ts'eh kw'uts'uzda cho dézti, 'i k'uhudelhts'i, 'ink'ez nududeh wheúltus. Ndet neba moodih unli 'ink'ez be nek'úne'whul'en chah. Ndi ts'iyaintsuk, 'en bugha 'úhoolya 'ink'ez buba' hoolya. ¹⁷ 'En 'int'ah ts'iyai 'et whutsuh da unli, 'ink'ez 'en bugha ts'iyai lhube'whudilhtun. ¹⁸ Ink'ez Yak'usda ba 'ilhunahuwúdulh, buyust'e hinli, 'en butsuh whudéldzulh 'int'ah. Ndun 'udechoo whe' whudilh'en, 'en 'int'ah. 'Ink'ez yahadla hubutah, 'en 'udechoo whuzdli 'int'ah. 'Et whuz 'aw 'en zeh ts'iyaintsuk ch'a dezti 'int'ah ho' hoont'ah.

Christ, 'en bugha be'aBá duts'un nelh soo ninawhuntut'ai

¹⁹ Yak'usda hoont'i hoh nts'e na'a dant'ah, buYe' yulh lhulhgha 'int'ah ho' 'int'ah. ²⁰ 'En bugha ts'iyaintsuk 'ink'ez nuwheni chah be'aBá duts'un dune bulh soo ninawhuntut'ai. Ts'iyaintsuk ndi yun k'ut 'int'ah 'ink'ez yak'uz chah 'et whunts'ih, lhdulalhghus k'ut buzka yun nadélt'ik, 'i be whudezghel neba whulhtsi. ²¹ Ink'ez hoh da nuhwheni chah Yak'usda buch'a nisinzut 'aht'ah inle. Nuhwhubeni be buch'a dehtni ahli inle, 'ink'ez hoonst' tune' zaht'en. 'Et whunts'ih duts'un dune bulh soo ninawhuntut'ai. ²² BuYe' ndi yun k'einya hoh nuwheni nek'un'a buyust'e whuzdli, 'ink'ez 'i be neba dazsai. 'Et huwa 'aw 'o 'un nelh chahiskah. 'Et hoh nuhtsun hoolah tele. Nuhk'éholts'it chah ghait'ah. 'Ink'ez 'aw 'o 'un nuhch'a yaootuk ghait'ah. 'Et whuz na'a be'aBá ts'un nuhwhutelh. ²³ Be nuhwhuba 'alha 'uhoont'ah soo duts'o, 'i be óhtun. 'Ink'ez whuduts'o koo buk'uwhuz'ai, 'i li'aht'ah. 'Ink'ez khunek unzoo, 'i bulh udahts'o, ndi khunek buka tsi hóohli khun bula doohtnih gunih. Ndi yun k'ut nduhóolcho hoh ndi khunek unzoo, 'i bugha ídelts'ut. 'Et huba sí, Paul, Christ ba ne'ust'en síli.

Soo hooltus hoh 'ust'en

²⁴ K'an 'et Christ 'en bugha nuhwhuba dzuh nuszut hoonúst'i. 'Et ndai suyust'e k'ah 'uhoont'ah 'i be 'en buyust'e ba lhaoodutesdleh. Ndi buyust'e, 'i Yak'usda ba 'ilhu-nahuwúdulh, 'et 'uwuhúlhni ²⁵ 'Et huba huba ne'ut'en síli. Yak'usda ye soo whulh'en, 'i ndet nuhwheni nuhgha sugha whunt'ai, 'et hoh nuhwhuba bula 'ust'en síli. 'Et whuz na'a Yak'usda bughunek ts'ah'un na'a lhaoodutesdlilh. ²⁶ Njan whe' hoont'ah hooyah, 'aw niz de haodanzut whuts'un, ts'iyanaah buch'a whunest'i. 'Et whunts'ih 'aw 'et dune Yak'usda bube'ildzun, 'en nuwheni ts'iyawh ts'et gaih newhunénelhtan. ²⁷ Ndi whe' hoont'ah hooyah, 'et t'ets'ontezeh 'et Yak'usda nets'u hukwa' ninzun. Dawhuldzoo 'ink'ez dahoolcho 'uhoont'ah 'ink'ez 'udun yun k'ut whut'en, 'en buba' hoont'ah. Christ 'en nuhyudínda, 'et 'uhoont'ah. 'En 'int'ah ndi Yak'usda ye dézti, 'en bugha 'i buka tsi hooqli. ²⁸ 'En bugha ts'iyanaah bulh yats'ulhtuk. Be whutnih, 'i be ts'iyanaah bugha ts'útni, 'ink'ez ts'iyawh whubuts'odulh'eh. 'Et síh ts'iyanaah Christ, Sizi ts'utni, 'en be lhadulya 'uhoot'e. 'Et whuz na'a zeh 'uhint'ah hoh ne'abÁ buts'un buzteleh. ²⁹ 'Et huba soo hoolhtus hoh 'ust'en. Nts'e na'a ye úlhtus, 'i be nulltus 'ust'en, 'et 'uwuhultus hoh hukwa 'ust'en.

2

Ndi njan yun k'ut hubughunek, 'i 'aw Christ yulh nducháit'ah

¹ 'Et nuhwheni, ndunnah Laodicea whut'en, 'en chah, 'ink'ez ndunnah 'aw chasuhi'l, nuhwheni ts'iyawh t'ewhuntehzeh 'et nuhts'u hukwa' nuszun, dahoolcho, 'i be soo hoolhtus hoh nuhwhuba hukwa 'ust'en. ² 'Et budzi nduk na'ootneh 'ink'ez be lhk'ets'udutsi, 'i be 'ilho nahoodle. 'Et whuz na'a ndet Yak'usda be whe' hoont'ah hooyah, daooneltsuk hoonzoo, 'i be 'uhoont'ah, 'i ts'iyawh soo ts'ah'un na'a t'ewhuntehseh. Ne'abÁ chah 'ink'ez Christ chah, 'en bugha 'uhoont'ah. ³ Dawhuldzoo, 'i be ts'uwuhuni, 'ink'ez daldzoo, 'i be t'oonúdzun chah, 'i ts'iyawh Christ 'en buyuh ts'ih neba nonulh'i. ⁴ Njan 'et 'un whudusni khun 'uyoon soo yahulhtuk 'et nanwhunoo'ah gunih. ⁵ 'Aw suyust'e be nohwhulh cha'ust'ah. 'Et whunts'ih suyégah 'i be nohwhulh 'ust'ah. 'Ink'ez hoonust'i hoh ts'ah'un na'a ne'ah't'en 'ink'ez Christ ye úlhtus, 'i be nuhwhuba 'alha 'int'ah, 'et ts'iyawh t'oonúszun. ⁶ 'Et huwa nts'e na'a neMoodihti, Christ, Sizi ts'utni, 'en úlhchoot, 'et whuz na'a ndi yun k'ut delhúts'i. ⁷ 'En be nuhghih whuzdli li'ah't'ah, 'ink'ez 'en be ulhtus sáhli. 'Et whuz na'a nuhwhuba 'alha 'uhoont'ah, 'en bulh 'ilho wahle ka. 'Et nts'e na'a whunanohodalh'i, 'et hoh 'o nus ulhtus tehle. 'Et huwa lhk'uz teh chanailya dáhtni. ⁸ Soo cho khohdle doo ka 'uyoon nanwhunoo'ah buk'úne' 'ooh't'en ka. Nts'e na'a dune dich'oh duk'ana'a nuni hunuzut, k'us 'ants'i khunek be yáhalhtuk, k'us dune dich'oh duk'ah ts'ih 'uhutni, k'us ndi yun k'ut hubuk'úna'a hoh dune hohodalh'i chah, 'aw njan Christ ts'un hachahoozulh. ⁹ Yak'usda dant'ah unli, 'et Christ 'en chah ts'iyawh 'ilho buyust'e zeh yundina 'et huwa. ¹⁰ 'Ink'ez nuhwheni chah buyudelhúts'i, 'et huwa lhadáhja sahli. Njan ndet neba moodih unli 'ink'ez be nek'úne'whul'en chah, Christ 'aw 'en zeh ts'iyaintsuk k'úne' whul'en.

Ndi Moses be' dustl'us buk'úne' ts'ut'en, Christ ts'iyawh neba hoolah whulhtsi

¹¹ 'Ink'ez 'en bugha nuhwhúzt'us li'ah't'ah. 'Aw dune bula be cha'hóonil. Lubeshi nuhyust'e be 'ulh'en, 'i, ts'iyawh nuhyust'e yuch'a nayuzdla. Whuz na'a Christ nuhwhúzt'us li'ah't'ah. ¹² Too be 'ulhúneh hoh 'et hiyulh 'anwhalhti li'ah't'ah. 'Ink'ez Yak'usda be 'ut'en, 'i be yahadla tah Christ dinabudinla, 'et nuhwhuba 'alha 'uhoont'ah. 'Et 'i be nts'e na'a dinabudinla, 'et whuz na'a nuhwheni chah hiyulh dinanwhudinla ho' hoont'ah. ¹³ 'Ink'ez nuhwheni tinta' aht'ih 'ink'ez nuhyust'e k'ut 'aw chanwhuhít'us, 'et huwa dasáhtsai hoh aht'ah. 'Et whunts'ih k'an 'et 'en bulh nakhúhna hoh aht'ah. Ts'iyawh hoh tink'us 'úts'et'en neba whuladetnik. ¹⁴ Dune ne'hutet'en Moses bughunek 'uk'úne'úsduguz, 'i nech'a 'uhoont'ah, 'et ts'iyawh neba whusanáho'ai. Ndi yuk'e'ánguz, 'et neba nets'oh 'uhoont'ah. 'Et huwa 'aw whenghut ts'óoya ghait'ah. 'Et Sizi ndi khunek yílhchoot 'ink'ez lhdulalhgus k'ut wheyondunilht'o hoh ts'iyawh neba hoolah whulhtsi. ¹⁵ Ndi ndet neba moodih unli 'ink'ez be nek'úne'whul'en chah, 'et ts'iyawh bughu nahóolchoot, 'ink'ez ts'iyanaah nalh hooya ubulhtsi. 'Et huwa buch'a' nilhde. ¹⁶ 'Et huwa ndai ah'alh, ndai ahtnai, k'us budzenis whudézi, k'an 'ulh'ek oozá, 'ink'ez Lizwif nahulyis dzin chah, ndi 'i ts'iyawh 'et hubugha nuhwhudoolhtsi' gunih. ¹⁷ 'Et ndi 'ants'i tsagwusts'it li'hoont'ah. 'Et whunts'ih ndet nus de whusawhutelts'ulh, Christ bube'ildzun 'uhoont'ah, 'et zeh ts'ah'un 'uhoont'ah. ¹⁸ Ndet whuch'a oonúlhde nuhghá whults'ut, khun 'uyoon nuhghu haóodontet'ah t'eh, khun hubuk'ah ts'ih 'oohneh gunih. Ndu't'en huhoont'i hoh huwhuts'it dudzi yuh 'uhilhdzun na'hududil'i. 'Ink'ez lizas ts'un tenahududli. Ndet 'aw chahuhóo'il chah t'ehonínzun na'hududil'i. 'Ink'ez buyust'e whuts'u nint'uk, 'et whuz na'a 'uhuninzun. 'I be 'ants'i nahudúchun li'hut'en. ¹⁹ 'Ink'ez Sizi netsuh whudélhduh, 'en buyust'e 'uts'int'ah. 'En 'aw soo cho chahiyoootun. 'Et whunts'ih 'en bugha 'o nus ts'ilhtus 'ulheh. 'Ink'ez 'en bugha ts'iyawh 'ilho uzteleh. 'Et whuz na'a buyust'e nuyeh. Ndai nuyeh, 'i Yak'usda 'en 'uhóonla.

²⁰ 'Udak'ez ndi yun k'ut nuhwhuba 'alha 'uhoont'ah, 'et whuch'a Christ 'en bulh dasátsai li'ahja. 'Ink'ez k'an 'et dzin 'et di ka 'awhuz hukw'une' aht'en? ²¹ But'aghoónalh gunih! Khun ólhkah gunih! Nóhle gunih! 'Et zeh whenhóodalh'i. ²² Ndi ndunt'ah, 'i ts'iyawh hoolah whulhíh. Ndi khunek netl'adet'ai, 'ink'ez dune whunhodalh'i, 'et whuz na'a zeh 'uhoont'ah. ²³ 'Et ts'iyawh be ts'uwhunih bulh 'int'ah li'int'ah. 'Et hoh dune dich'oh duk'una'a tenahududli huwhulhisi. Te'hududil'en na'hududil'i. 'Ink'ez buyust'e dzuh nehíyulhdzut. 'Et whunts'ih ndi ts'iyawh 'aw hoonli chahoolah. 'Et ndúhoont'ah ts'iyawh 'aw neyust'e lubeshi whuts'u nint'uk, 'aw 'et whuch'a nela 'ewhudoneh ghait'ah.

3

Neyust'e lubeshi whuts'u nint'ukwhulazdootni 'ink'ez Christ nets'u hukwa' ninzun, 'et zeh hukwa' uznoozin

¹ 'Et huwa Christ 'en bulh dinadahdel t'eh, 'et nduk yak'uz ts'ih dahoont'ah 'et zeh hukwa' ntehzilh. 'Et Christ Yak'usda nalnih ts'ih yuzih usda. ² Nduk yak'uz ts'ih dahoont'ah 'et zeh nuhwhubeni tah whudóh'a, ndi yun k'ut 'uhoont'ah, 'et huwununi cha nusóhzut. ³ Dasásai li'aht'ah 'ink'ez 'ilhuz be kháhna, 'i Christ 'en bulh Yak'usda bulh 'ilho sahlí li'ahja. ⁴ Christ be ts'úkhuna, 'en 'int'ah. 'Ilhudzin ts'iyanaah ba be hooduteltsilh, et nuhwheni chah ye dézti, 'i be 'en bulh whuz na'a 'utehníh. ⁵ 'Et huwa ndi yun k'ut nuhyust'e daootsah howa núlhtih. Tinta cha'zooh't'en, tinta' ts'ut'ih, 'ink'ez whudutsun tune' 'ooht'en gunih, 'ink'ez tinta' uzteht'íh, 'et hukwa cha'uznooszin, hoontsi' tune' uteht'en hukwa' noohzin gunih, 'ink'ez 'uyoon yit'i ka' noohzin gunih, 'et 'uk'edélti neba 'alha 'intáh li'hoont'ah. ⁶ 'Et bulagha ts'ih, ndunnah nduhut'en, 'en hubugha Yak'usda ye hunilch'oh, ndunnah hik'unucha'ust'en, 'en ts'iyawh hubuts'u whélt's'ulh. ⁷ Hoh da nuhwheni chah 'et zeh ndáht'en inle. ⁸ 'Et whunts'ih k'an 'et njan daht'en ts'iyawh whuladoohtnih huba' hoont'ah. Huzahke, hunlhóh'oh chah, k'udáht'en, Yak'usda ch'a yalhtuk, khunek unt'si, 'i bé yalhtuk, ⁹ 'ink'ez nalhunoóht'ah gunih. 'Et 'uda dats'int'ah inle, 'un whutulhdelh 'et huwa. ¹⁰ 'Ink'ez k'an 'et 'uyoon nasahdli. 'Et ndan whuz na'a 'un whímla, ndet bugha t'ets'oninzun, 'et 'i be 'o nus ulhtus nats'usdli. 'Et hoh nts'e na'a Christ unli, 'en buk'una'a 'uts'oot'e ka. ¹¹ Ndunnah huba 'alha 'uhoont'ah, 'en ts'iyawh lhunduhúlt'ah. Greek k'eyahalhtuk k'us Lizwif whut'en, yuka dune unli, 'i k'ut ts'ut'us, k'us 'aw chahíut'us chah, nts'iz de hainde k'us Scythia whut'en chah, 'ulhna k'us hubula nahudetnik dune chah, 'en ts'iyawh. 'Et whunts'ih Christ 'en zeh ts'iyai unli 'ink'ez ts'iyawh nelh 'int'ah.

Dant'ah k'an dune nasdli

¹² Yak'usda 'utahanhónla 'et hoh bube'ildzun ahli, 'ink'ez nuhk'entsi'. 'Et huwa ndez na'a 'óoht'e. 'Uyoon hubugha te'noohzin, 'uyoon ts'un wahzoo, yuh 'ududoolhúdzin, 'uyoon soo nilyaz ne'boohl'en. 'Ink'ez ts'iyaintsuk sa hoh dzuh nuteh'uz 'et chah whulh wahyin. ¹³ Lhulh soo' ts'int'ah, 'ink'ez ts'iyaintsuk lhuba whunaoodulhúnah. Nuhtah 'ilhunuh 'uyoon k'ehoo'ai t'eh, nts'e na'a Christ nuhwhuba whunaoodelhúnah, nuhwheni chah whuz na'a zeh huba whunaoodoolhúnah. ¹⁴ Be lkh'ets'udutsi', 'i 'udetsuh nets'óo'ah. 'I be degha nus hoonzoo hoh 'ilho 'uts'int'ah. ¹⁵ 'Ink'ez Yak'usda be nedzi dezghel, 'i be nuhdzi yuh k'une' hool'en. 'Et whuz na'a 'utahanhónla 'ilho yust'e wule ka. 'Ink'ez 'ahoolhyez chanailya noohzin. ¹⁶ Christ bughunek be whutnih soo cho nuhdzi yuh hóle. Yak'usda bughunek be ahjun. Shun be teni' uzníhldzun, 'ink'ez Ndoni be ahjun. Lhodulhú'eh 'ink'ez lhgha dáhtni. Be hoonzoo, 'i be nuhdzi yuh hóle, 'ink'ez neMoodihti ts'un ahjun. ¹⁷ Nts'e na'a daht'en nuhghunek 'ink'ez nuhwe'ut'en 'et chah, Sizi neMoodihti boozí, 'i be ndaht'en. 'Ink'ez 'en be Yak'usda ne'aBá, 'en ts'un chanailya dahni.

Nts'ena'a nuhwhukoo 'et Sizi Gri ba ne'ooht'en

¹⁸ Nuhwheni ts'ekoo nuhkikah hubutl'a' dudoolhútelh, 'et neMoodihti ba hoonzoo ho' hoont'ah. ¹⁹ Dune nuhwhu'atkah hubuk'oohtsi'. 'Ink'ez hube' zóohla gunih. ²⁰ 'Uskeh'yaz ts'iyaintsuk hoh nuhwe'abá 'ink'ez nuhwe'ama hubuk'une' 'ooht'en. 'Et whuz na'a ndaht'en t'eh, neMoodihti hoont'i. ²¹ 'Ink'ez dune nuhwhuzkeh hubunóolhch'eh gunih! Doo ka si ilah tune' hut'en hole. ²² Nuhwheni 'ulhna ahli, ndi yun k'ut nuhmoodih hinli, 'en ts'iyawh hubuk'une' 'ooht'en. Nuhmoodih nuhwhunil'h'en 'et zeh 'ooht'en gunih. 'Et whunts'ih nuhdzi ts'ah'un na'a Yak'usda bé noohlh'út, 'ink'ez nuhmoodih hubuk'une' 'ooht'en. ²³ 'Ink'ez daht'en nuhdzi ndulhcho, 'i be ndóht'en. Ndaht'en neMoodihti zeh ba 'aht'en 'aw dune ba ilah 'aht'en. ²⁴ Teoonúhzun ndai neMoodihti nuhts'u yoozi, 'i nuhgha íteleh. Christ neMoodihti 'en be 'ulhna ahli 'et huwa. ²⁵ 'Et whunts'ih tink'us 'ahét'íh, 'en whuz na'a huba k'elha whutele. 'Ink'ez ne'aBá nalh ts'iyawh lhgha zeh 'uts'int'ah 'et huwa.

4

¹ 'Ink'ez nuhwheni moodih ahli, nuhwhe'ustlen ts'ah'un 'int'ah 'ink'ez lhgha 'int'ah, 'i huba k'elha yulh'ih. T'eoonuhzun nuhwheni chah nduk yak'uz ts'ih nuhMoodihti hoonli.

Ye unzoo, 'i bulh Christ ba ts'oot'en

² Soo cho huwahli hoh tenadahdli. 'Ink'ez chanailya dahni. ³ Nuwheni chah neba tenadoohdli. Yak'usda neba dá'dutootan bughunek be yats'oolhtuk ka. 'Et whuz na'a Christ bugha whe' hoont'ah hooyah, 'et ts'iyanaah ts'un howu yats'oolhtuk. K'an 'et, 'et huwa tsak'esída. ⁴ 'Ink'ez suba tenadoohdli, 'et hoh nts'e na'a yateltuk whuba 'et ts'ah'un newhútes'alh. ⁵ Ndunnah huba 'alha cha'hoot'ah, 'en huwahli hoh hubulh yalhtuk. Ndet k'an 'et nuhghá whults'ut, whunih be 'uhoolh'en. ⁶ Nuhwhughunek 'ahoolhyez unzoo, 'i be hubulh yaoolhtuk. 'Et huwa t'eoonóhzin nts'e na'a huba whutézoo k'una'a, 'et whuz na'a 'ilhunuh hinli hoh hubulh yáteltuk.

Dek'elh'az khunek butl'a naidet'ai

⁷ Ndun Tychicus, 'en nelhutsin buk'ets'intsi', 'ink'ez neMoodihti 'en ba ts'ah'un na'a nela'ut'en, 'ink'ez Sizi Gri ba sulh 'ulhna unli. 'En si sugha ts'iyawh nuhduténiih. ⁸ 'Et huwa njan nuhts'ú télh'a. 'Et nts'e na'a daht'ah t'ewhuntezeh, 'ink'ez nuhdzi nduk na'yooleh. ⁹ Onesimus 'en yulh te'us. 'En chah ts'ah'un na'a nelhutsin 'ink'ez nuwheni ts'iyawh buk'etsintsi', 'ink'ez nohwhulh 'ilhunuh 'int'ah. 'En bugha njan ts'iyawh dawhut'en t'ewhuntezeh. ¹⁰ Aristarchus, 'en chah sulh tsak'esda 'ink'ez dahooja nuhwhúlhni. 'Et Barnabas bunat, Mark, 'en chah dahooja nuhwhúlhni. Nts'e na'a datét'ilh, 'et 'uda t'eoonáhzun. Nuhghu ninya t'eh, soo cho hoonáht'i hoh nuhghoya. ¹¹ 'Et ndun Sizi, Joosta chah hiyulhni, 'en chah dahooja nuhwhúlhni. Ndunnah, 'en ts'iyawh yuka dune unli, 'i k'ut ust'us 'úhint'ah. Ndunnah 'en zeh Yak'usda dune k'úne' bul'en, 'et huba sula' hut'en, 'ink'ez sóo ne'suhulh'en. ¹² Epaphras 'en chah nohwhulh 'ilhunuh 'int'ah, 'ink'ez dahooja nuhwhúlhni. Christ buba 'ulhna 'int'ah. Soo k'us hooncha hoh nuhwhuba tenadudli. 'Et hoh Yak'usda nuhts'u hukwa' ninzun, 'et 'i be ts'ah'un na'a 'en ba nudutelhúya 'ink'ez lhadúlya chah tehle. ¹³ 'En buba 'alha' ts'ah'un na'a 'udusni, hooncha hoh nuhwhuba nint'uk. 'Aw nuhwheni zeh ilah, ndunnah Laodicea whut'en 'ink'ez ndunnah Hierapolis whut'en, 'en chah. ¹⁴ Luke, 'en yoo be duyun unli, 'en nuwheni ts'iyawh buk'ets'intsi' 'ink'ez Demas 'en chah dahooja nuhwhúlhni. ¹⁵ Ndunnah Laodicea whut'en, ndunnah nelhutsinkah, 'en ts'iyawh dahooja neba hubudóohni. 'Ink'ez Nymphas, 'ink'ez ndunnah bukoo Yak'usda ba 'ilhunahuwúdulh, 'en chah dahooja suba hubudóohni.

Ye unzoo, 'i nohwhulh 'óot'e

¹⁶ Nuhwheni'oh nuhtah ndi dustl'us buk'eyalhtuk t'eh, ndunnah Laodicea Yak'usda ba 'ilhunahuwúdulh, 'en chah hik'eyaoollhtuk huba' hoont'ah. 'Et ndai dustl'us hubuts'o tl'aiya'ai, 'i nuhwheni chah buk'eyaoollhtuk. ¹⁷ 'Ink'ez Archippus 'en dóohni, neMoodihti ndet yutl'ahó'ai, ts'iyawh lhaodooleh. 'Et whuz na'a 'en ba ne'ust'en tele. ¹⁸ Sich'oh sula be dahooja dusni hoh 'uk'une'zíguz, 'i, "Paul". Ndi tes tl'oolh be tsak'esída bunaoodoollhúnah gunih. Ye unzoo, 'i nuhwhulh 'oot'e. 'Et ndoh honeh.

Paul, Thessalonica Whut'en Ndi 'Udechoo Dustl'us 'I Hubuts'un K'e'anguz

Thessalonica whut'en Paul dahooja hubulhni

¹ Nuwheni tanah ts'inli Paul, Silvanus, 'ink'ez Timothy, nuhwheni keyah Thessalonica ts'ih Yak'usda ne'aBá 'en ba 'ilhunahuwúduh, dahooja nuhwhuts'útni. Ne'aBá Yak'usda 'ink'ez Sizi Gri neMoodihti ts'un nuhwhuba tenazdudli, 'et hoh ye unzoo, 'ink'ez nuhdzi dooghel nohwhulh 'oot'e.

Hoonzoo k'una'a ne'hut'en

² 'Ahoohyez nuhwheni nuhwhuga Yak'usda ts'un chanailya ts'utni. Ndet tenazdudli totsuk 'aw 'et nuhwhunats'ulnih. ³ Nuhwhunats'ulnih 'aw 'ustl'e cha'susne, be 'alha 'uhoont'ah, 'i bugha nuhwe'ut'en, nts'e na'a be nék'ets'intsi', 'i be soo cho 'aht'en, 'ink'ez neMoodihti Sizi Gri 'en bugha hukwa tsi hooqli, 'aw whulachadzahnik. Yak'usda ne'aBá 'en bunalh 'et whuz na'a ndaht'en. ⁴ Nelhutsinkah nt'ets'oninzun Yak'usda nuhk'entsi' 'ink'ez 'utáhanóhonla. ⁵ 'Et neghunek unzoo, 'i 'aw khunek zeh ilah unli hoh nuhtl'adélt'sut. 'Et whunts'ih be hoolhtus, 'i be Ndoni bugha chah, 'et whuz na'a nuhtl'adélt'sut. Nts'e na'a nuhtl'adélt'sut 'et nt'oonuhzun ndi khunek 'i ts'ah'un na'a 'int'ah. 'Et huwa hoh da nuhtah uzdelhts'i, nuhwheni nuhwhuba dant'ah dune ts'inli, 'et ts'iyawh nt'oonahzun. ⁶ 'Et nuwheni 'ink'ez neMoodihti chah, ts'iyawh nek'una'a aht'ah sahli. Tube dzuh nusuhde hoh Ndoni ye whunelhnik, 'i be Yak'usda bughunek unzoo, 'i hoonáht'i hoh ulhchoot. ⁷ 'Et huwa nuhwheni nuhgha nts'oh tune' aht'en, 'et ndunnah Macedonia 'ink'ez Achaia yun k'ut chah, ndunnah Sizi Gri buba 'alha' 'int'ah, 'en nuhk'una'a 'uhint'ah huzdli. ⁸ 'Et Macedonia whut'en 'ink'ez Achaia whut'en chah, 'en neMoodihti bughunek, 'i ts'iyawh nuhwheni nuhgha hiyulh uduzts'ai. 'Aw 'et zeh ilah, Yak'usda ts'un nuhwhuba 'alha' hoont'ah, 'ilhuz nduhooolcho hoh t'ehinanzin, 'et huwa nuwheni 'aw 'o 'un daja uzdooni ghait'ah. ⁹ 'Et hedich'oh nuhwheni nuhwhuga nelh nahuwulhuk nts'e na'a nuhkoo danwhunulhla inle. 'Ink'ez nts'e na'a 'uk'edélt'si nuhwhuba 'alha' 'int'ah, 'et whuch'a nasahdel 'et Yak'usda ts'un nasulhúya. Yak'usda 'en khuna, 'ink'ez 'alha unli, 'en zeh buba 'ulhna sahli. ¹⁰ 'Ink'ez buYe', yak'uz ts'ih hainya, 'en chah buba ilh'i. Sizi 'en 'int'ah, 'en yahadla hubutah dinadulhti 'ink'ez Yak'usda ye nelh hunilch'e negha itekulh, 'i whuch'a neulhyis.

2

Paul 'en Sizi Gri ba bube 'ut'en k'ah 'int'ah

¹ Nelhutsinkah nuhwheni'oh nt'oonahzun 'aw 'ants'i 'et nuhwhuts'un nachats'utedulh. ² 'Et keyah Philippi whut'en, 'en hubugha tube dzuh nuts'uzde, 'et ts'iyawh t'oonuhzun. 'Et whunts'ih hukw'elh'az Yak'usda 'en bugha 'aw whechats'itsaz hoh bughunek unzoo, 'i be nohwhulh yats'ulhtuk, lhat hoh nehienyah 'uhant'e 'et whunts'ih. ³ 'Et ndi khunek ulhtus, 'i be nohwhulh yatak inle, 'aw tink'us cha'it'ah, k'us dutsun, 'i bulh cha'it'ah, 'aw ntsi' 'i chah hubutah hoolah. ⁴ 'Et whunts'ih Yak'usda nelh soo neooni'ai hoh bughunek unzoo, 'i be netl'ahó'ai, 'et whuz na'a zeh ts'iyawh 'ilho yats'ulhtuk. 'Et whunts'ih nts'e na'a dune hodutéts'o 'et hukwa' huninzun, 'i khunek 'aw whuz na'a ilah yats'ulhtuk. 'Et whunts'i Yak'usda nets'u hukwa' ninzun, 'et zeh howu yats'oolhtuk. Yak'usda 'en nedzi yoolhdzih. ⁵ T'oonahzun 'aw khunek 'uyoo unli, 'i be ilah nohwhulh yats'ulhtuk. 'Aw hoonliyaz aht'i, 'i negha óohlelh, 'et whuz na'a ilah nohwhulh yats'ulhtuk. 'Et Yak'usda nalh njan ts'ah'un na'a 'ún whudusni. ⁶ Nuhwheni k'us 'uyoon chah nedutelhti hukwa chats'it'i'en, Christ buba whel'a 'en ts'inli 'ink'ez netl'ahó'ai 'et huwa be hóolhtus, 'i be nuhgha ndoh 'uts'int'ah. ⁷ 'Et whunts'ih nuhtah uzdelhts'i da, nuhts'un ts'inzoo. Nts'e na'a ts'ekoo hubuzkeh nulhyeh 'ink'ez hubuk'ehintsi', 'et whuz na'a nagoostl'iyaz ne'unwhuts'ulh'en. ⁸ Nuhk'enits'inli, 'et huwa ts'uhoot' 'i hoh Yak'usda bughunek unzoo, 'i be nohwhulh yats'ulhtuk. Be ts'ukhuna, 'i whunts'i nuhwheni nuhgha huwázte'alh, nuhk'ets'intsi' 'et huwa. ⁹ Nelhutsinkah soo cho whunalhúnih, hoh da nts'oh tune' ts'ut'en 'ulh'ek 'ink'ez dzin 'i bulh lhula' ts'óodut'en! Tube neba howa whulna t'oonahzun. Doo ka nuhwhuba howa whulna ts'uhoolhtselh 'et whuch'a. 'Et whuz na'a Yak'usda bughunek unzoo, 'i be nohwhulh yats'ulhtuk. ¹⁰ Nuhwheni nuhnalh 'uts'ut'en, Yak'usda bunalh chah, dalcho 'i be soo cho buk'une'ts'ut'en 'ink'ez ts'ah'un na'a ne'ts'ust'en, nuhwheni huba 'alha' hoont'ah nuhtah nek'éholts'it whuch'a. ¹¹ 'Ink'ez t'oonuhzun nts'e na'a nuhbákah nuhk'entsi' hoh nuhgha hanle, 'et whuz na'a nohwhulh 'uts'int'ah. 'Et huwa khunek ulhtus, 'i be nohwhulh yats'ulhtuk, 'ink'ez k'enánohwhuts'une'a. Dateht'ilh, 'et

whunohuznulhtun. ¹² Ink'ez Yak'usda ba soo whuldzoo, whuz na'a toohdelh. 'En 'int'ah nts'e usda, 'et hubudayi cho unli, 'et hoh ts'iyaintsuk k'une' whut'en unli, 'ink'ez ye dézti, 'i chah bulh 'int'ah. 'Et whuz de 'anìh nuhwùlhnì.

Sizi Gri hits'u nalhúya

¹³ Nuwheni negha Yak'usda bughunek dáhts'o 'et ts'iyawh hoonáht'i hoh ulhchoot. Yinkak dune ghunek ilah k'una'a ulhchoot. 'Alha' hoon't'ah Yak'usda bughunek 'int'ah. Nuwheni huba 'alha' yint'ah, 'i be 'o nus ulhtus nuhwulhtsi. 'Et huwa 'aw 'ustl'e cha'ts'udésnik hoh Yak'usda chanailya ts'utni. ¹⁴ Nelhutsinkah ndunnah Christ, Sizi ts'utni, 'en bube'ildzun hinli, ndunnah Judea yun k'ut Yak'usda ba 'ilhunahuwúdulh, 'en hubuk'una'a zeh aht'ah. 'Et nts'e na'a ndunnah Judea húdelhts'i, 'en 'onghoh Lizwif dzuh nubuhulhdeh, 'en hubuk'una'a zeh nohwulh keyah whut'en, 'en dzuh nunóhohulhde. ¹⁵ Lizwif, 'en 'uhuja neMoodihti Sizi Gri hizelghì. 'Ink'ez ndunnah huba Yak'usda be nus whúnìlh'en, 'en chah hubuwhangan. 'Ink'ez nuwheni chah hubuyun k'ut hukw'u nanehüntézyoot. Ts'iyannah ch'a hudetni, 'et huwa 'aw Yak'usda hoon't'i hukw'u na'a nuchá'hust'en. ¹⁶ Khun teh 'udun yun k'ut whut'en hudoojih ka hubulh yazelhtuk, 'et whuch'a nehúnenyoot. Ndunnah Lizwif ndai 'uhiyulh'en, 'i bugha lubeshi be hudezbun. 'Et huwa Yak'usda ye hubulh hunilch'e, 'i 'ilhuz wheni hiyulh utet'ilh.

Thessalonica whut'en hubuk'eninli

¹⁷ 'Et nelhutsinkah, 'astl'iyaw wheni nuhwuch'a nehunézyoot, 'et whunts'ìh nedzi be nohwulh 'uts'int'ah. Tube cho nanwhuts'utet'ilh, 'et 'o nus hukwa ts'uninzun. ¹⁸ 'Et huwa tube nuhts'uztedulh hukwa' uznanzin. 'Alha si, Paul, nat hoh nuhts'u toosya hukwa 'est'en, 'et whunts'ìh ndun Satan 'en nedádenya. ¹⁹ 'Et ndet 'uhoont'ah hukwa tsi ts'uhooli, k'us ndai be ts'uhoon't'i? Ndaì neba k'elha tele, 'i be ih ts'ótet'i? NeMoodihti Sizi Gri nket'ah whusanatedalh 'ink'ez nuhwheni chah ts'iyawh hubuhubulh 'uteht'ilh, 'et zeh 'uhoont'ah! ²⁰ Nuwheni be uzdézti 'ink'ez be ts'úhoont'i, 'i ahli 'et huwa.

3

Be 'alha' hoon't'ah, 'i 'aw huba chayilhtus tulih, 'et huwa Paul hubughuni unli

¹ 'Et hoh da 'aw 'o 'un whulh ts'ooyin ghait'ah suli. 'Et neba hoonzoo nidúdzun hoh whenich'oh keyah Athens íduke. ² 'Et huwa nelhutsin, Timothy, 'en Yak'usda ba ne'ut'en, 'en nuhts'u whets'alh'a. 'En 'int'ah Christ bughunek unzoo, 'i be nela'ut'en. 'En bugha nuwhuha 'alha 'uhoont'ah, 'et 'ilhuz wule hukw'u na'a zeh 'uteht'ilh, 'ink'ez bughunek be nus nuhwunilht'uk. ³ 'Et njan dune dzuh nuhwulhdeh hoh nuwhuha dzuh wule gunih. Nuwheni'oh t'eeonahzin njan neba 'uhóolya ho' hoon't'ah. ⁴ 'Et nuhzih íduke da dzuh nuztedeh ho' hoon't'ah nuhwulh'udáni inle. 'Et whuz na'a 'uhooja 'ink'ez k'an 'et nt'eeonehzin. ⁵ 'Et huwa si chah 'aw 'o 'un whulh wusyin ghait'ah. 'Et huwa Timothy, 'en nuhts'u whelh'a ndi be 'alha 'uhoont'ah bugha daht'ah ts'iyawh neba naoote'alh. Doo ka sih ndun neóolhdzih, nuwheni chah tulih nuhóolhdzai t'eh, 'et sih ne'ut'en, 'i 'ants'i 'et tele.

Timothy daja nedani, 'et huwa nedzi hoon't'i

⁶ 'Aw 'et Timothy nuhts'u hanája 'ink'ez neghu nanja. 'Ink'ez daht'ah 'et hukw'un nelh nawhelnuk. Ndi be 'alha 'uhoont'ah, 'ink'ez be nek'ets'intsi, 'i chah, 'et ts'iyawh nahoo'ai. 'Et nets'un ahzoo 'ink'ez nuwheni neteh'ilh hukwa' nahzun, 'et chah hukw'un nelh nawhelnuk. 'Ink'ez nuwheni chah whuz na'a zeh nanwhuts'untel'ilh hukwa' uzninzun. ⁷ 'Et huwa nelhutsinkah 'uyoon bugha dzuh nuts'udeh 'ink'ez dzuh nelh 'uhoont'ah, 'et whunts'ìh be 'alha 'uhoont'ah aht'i, 'i be nedzi nduk na'uja. ⁸ NeMoodihti 'en bulh ulhtus hoh nudelhúya t'eh, ts'uhoon't'i k'et ts'ukhuna li'ts'int'ah. ⁹ Nts'e na'a simba soo 'uhoolcho, 'i be Yak'usda nuwhuha chanailya uzdóoni? Ndaì be simba ts'uhoon't'i, 'i be ts'iyawh Yak'usda nalh nuwhuha ts'uhootet'i? ¹⁰ Nuhts'ute'ilh hukwa' ts'uninzun. Be 'alha 'uhoont'ah aht'i, ndet ts'ah'un t'eeonuzahzun 'et ts'iyawh nuwhuha lhats'odutelilh. 'Et hukwa 'ulh'ek 'ink'ez dzenis 'i bulh tube Yak'usda ts'un hukwa' ts'utni.

Yak'usda ba 'ilhunahuwúdulh huba tenahududli

¹¹ 'Et tenazdudli, Yak'usda 'en dich'oh ne'aBá, 'ink'ez neMoodihti Sizi Gri, 'en nuhts'un nétoohl'a wule. ¹² 'Ink'ez nts'e na'a hoh nuhk'ets'intsi, 'et whuz na'a neMoodihti 'en bugha tube cho lkh'uz teh lkh'ets'oodutsi'. 'Ink'ez 'uyoon chah 'en ts'iyawh nduchah hubuk'ehtsi'. ¹³ 'Et huwa neMoodihti Sizi Gri 'ink'ez dune bube'ildzun hinli, 'en bulh ts'iyawh whusanahedel t'eh, 'et ne'aBá, Yak'usda bunalh, 'aw nuhdzi lubeshi bu'et hoh be ye nuhk'eho'alh hootelah.

4

Lubeshi bughu hoolah 'et hubuts'u hukwa' ninzun

¹ 'Et huwa nelhutsinkah, ndi dek'elh'az khunek be nohwhulh yáts'ulhtuk, 'i neghunek úlhchoot hoh nts'e na'a Yak'usda hóont'i ka tóohdelh nuhwhuts'útni inle. 'Et doo chah whuz na'a zeh Sizi neMoodihti, 'en be khunek ulhtus, 'i be 'un whuts'útni, tube cho lha'un teh wahzoo, 'ink'ez whuz na'a zeh 'ooht'e. ² Nt'eoonahzun neMoodihti Sizi khunek netl'aída'ai, 'i ts'iyawh nuhwhuts'údani. ³ 'Et Yak'usda ba 'udun ninwhuninla, 'et lghudelhúts'i k'us 'awhuz lghudelhúts'i hoh lhulh tinta' 'ooht'en gunih, 'et whuz na'a Yak'usda nuhwhuba hukwa' ninzun. ⁴ Ts'iyawh 'ilhunuh ahli nuhyust'e 'i Yak'usda ba 'udun neóolhtelhuba' hoont'ah 'ink'ez soo cho bughohle. ⁵ Nuhyust'e ulhtus hoh lubeshi ts'un nint'uk, 'et 'aw whuz na'a aht'ah ilah! 'Udun yun k'ut whut'en, ndan Yak'usda t'ehinízun, 'aw 'en buk'una'a ilah aht'ah. ⁶ Khun teh nelhutsin hinli neghá' whunesdút'en hoh bu'at bulh tinta' ts'oot'en gunih. 'Et whuz na'a whutsuh da nuhwhudáni. 'Ink'ez doo chah ndun nuwhudusni, neMoodihti 'en zeh ndóohoont'ah hubugha ts'iyawh k'útneh 'int'ah. 'Et huwa njan ndun whudusni, soo cho khandli! ⁷ Yak'usda 'aw 'ut'en untshi, 'i 'uztelh'ilh huba ilah uzdoojih ka neka' dani 'et huwa. 'En ba lubeshi bughu hoolah uztelilh ka 'et wheni neka' dani. ⁸ 'Et huwa ndan ndi khunek hidoots'o hukwa cha'hunizun, 'aw dune ch'a nult'uk chahilah. Yak'usda ch'a hunint'uk zeh 'uhint'ah. 'Ink'ez Yak'usda 'en 'int'ah Ndoni 'en negha iní'ai.

Ndi yun k'ut whut'en, 'en hubunalh soo ts'ah'un na'a tóohya

⁹ Lhulhutsinkah yé lhk'edutsi, 'i bugha 'aw nuhts'o k'e'oosges huba cha'hoot'ah, Yak'usda dich'oh whunohodalh'i lhk'eoohdutsi' ka. ¹⁰ 'Et whuz na'a ndaht'en ts'iyawh nelhutsinkah Macedonia yun k'ut húdelhts'i, 'en hubuts'un. Nelhutsinkah khunek ulhtus, 'i be nuhwhuts'útni, lha'un hoh lhk'eoohdutsi'. ¹¹ 'Ink'ez whunist'iyaz yun k'ut doolhúts'i hukwa' 'ooht'en, 'ink'ez nuhwe'ut'en zeh noolh'en. Nuhwhenich'oh nuhla be 'ooht'en. 'Et whuz na'a ndóht'en nuhts'údani. ¹² 'Et whuz na'a ndaht'ah t'eh, 'et t'eh ndunnah huba 'alha cha'hoot'ah, 'en hubunalh soo ts'ah'un na'a toohya. 'Et 'aw hoonliyaz whendunonli ghait'ah.

Sizi Gri whusanatedalh, 'et whut'aníznintan

¹³ 'Aw 'et sulhutsinkah, ndunnah 'uda nahunestez, * 'en hubughu t'ewhuntehzeh nuhwhuba hukwa' nuszun. Huba 'alha cha'hoot'ah 'aw huba whulanachahóo'ah hukw'u na'a tso hinli, doo ka sih whuz na'a ndoht'e. ¹⁴ Sizi dazsai 'ink'ez dinadija, 'et neba 'alha' hoont'ah t'eh, 'et whuz na'a zeh ndunnah Sizi huba 'alha' yint'ah hoh yahadla, 'en ts'iyawh Yak'usda, Sizi 'en dulh 'ubutelilh. ¹⁵ 'Ink'ez neMoodihti bughunek be njan ndun whudusni, neMoodihti neka whusanatedalh, nts'e na'a dawhútenilh, ndunnah 'awhuz hukhuna, 'ink'ez ndunnah nahunestez, 'en 'aw hubutsuh 'uztoodelh ghait'ah. ¹⁶ 'Et neMoodihti dich'oh soo 'ultus 'aw 'et 'udutenilh, 'ink'ez lizas degha nus dezti, 'en 'udutenilh, 'ink'ez Yak'usda ba be ts'ujih, 'i chah 'udutenilh. 'Et whuz na'a Sizi Gri yak'uz ts'ih whusanatedalh. 'Ink'ez ndunnah Sizi Gri huba 'alha' yint'ah, 'et whuz na'a yahadla, 'en choo dinahudutéduh. ¹⁷ 'Et hukw'elh'az nuwheni 'awhuz ts'ukhuna, 'ink'ez ndunnah, 'en 'ilho 'aw chats'odutéh'il khun ne'eduzgooh li'ts'uja hoh nduk kw'us tah 'ilho neMoodihti yazai buduzdutéduh. 'Et whuz na'a 'ilhuz nuwheni neMoodihti bulh 'úztet'ilh. ¹⁸ 'Et huwa ndi khunek 'i be ts'iyawh k'unulhunóoh'tah.

5

NeMoodihti budzin dawhútenilh

¹ Nelhutsinkah nker'ah 'uwwhutenilh 'ink'ez nts'oh huwa whezulh hoh 'uwwhutenilh, 'aw 'et huwa nuhts'o k'eosges ghait'ah. ² Nuhwhenich'oh soo ts'ah'un na'a nt'eoonahzun, nts'e na'a 'undunut'ih 'en k'una'a 'ulh'ek whusanúl'ih, whuz na'a zeh neMoodihti budzin neba whusawhútelts'ulh. ³ Njan nduhútni t'eh dachahoot'ah 'ink'ez 'aw howa cha'oodli, 'et khunyaz hubulh haoodutelts'ulh. Nts'e na'a ts'ekoo ulchan bubulh 'útelhúts'ul, 'et whuz na'a 'et nduwhútenilh, 'et 'aw whe g'ah hóoya ghait'ah. ⁴ 'Et whunts'ih nuwheni sulhutsinkah 'aw tsahólhgus yuh chadulhúts'ih. 'Et huwa njan dzin whusawhélts'ut t'eh, 'aw 'undunut'ih k'una'a nuhgha húnool'ih ghait'ah. ⁵ Nuhwheni be whét'en, 'ink'ez dzenis be whét'en, 'i buniz delhúts'i. 'Aw nuwheni 'ulh'ek 'ink'ez tsahólhgus yuh chats'udílt's'ih. ⁶ 'Et huwa 'uyoon k'una'a chats'oostez, whenich'oh khuts'oodle. ⁷ Whunulh'en, ndunnah huztez, 'en 'ulh'ek 'uhoot'e. 'Ink'ez ndunnah tahatnai, 'en 'ulh'ek tahunutnih. ⁸ 'Et whunts'ih nuwheni soo whunih be 'uts'oot'e huba' hoont'ah. Neba 'alha' 'int'ah, 'ink'ez be lhk'ets'udutsi, 'i 'utes dzoot ndukw k'una'a nuhwhuba li'tet'ilh. 'Ink'ez be uzdujih, buka tsi ts'uhooli, 'i 'utes ts'ah, 'i k'una'a nízdool'a. ⁹ 'Aw Yak'usda ye whúske, 'i be neootelhtus, 'et huba ilah 'udun neninla 'et huwa. 'Et whunts'i neMoodihti Sizi Gri 'en bugha be úzdutejih, 'i ts'utélhchulh. ¹⁰ Neba dazsai. 'Et huwa nts'oh dahooja whunts'i, 'awhuz ts'ukhuna k'us

* 4:13 Yahadla ni ho 'utni.

yats'adla, nuwheni ts'iyawh 'en bulh 'uts'oot'e huba' hoont'ah. ¹¹ 'Et huwa 'ilhunah ahli hoh k'unulhunáht'ah 'ink'ez lhba nus lhúnulht'uk. K'an hoh ndaht'en, whuz na'a zeh 'et ndoht'en.

Lhelhts'un na'a ndi yun k'ut uzdóolts'i

¹² Nelhutsinkah nuwheni soo cho nuhts'un tezdudlih, ndunnah nuhtah Sizi Gri ba 'uhut'en, 'en neMoodihti bugha nuhghu hinli 'ink'ez nuhwhuba huwhunih hoh nuhghu-nanek hulye, 'en 'uhint'ah nuhwhuba hinchá hubulh'i. ¹³ 'Ink'ez hubube 'ut'en bugha degha nus be nek'edutsi', 'i bugha ndaht'en. Ts'iyawh wunistl'iyaz hoh lhutah dune ahli. ¹⁴ 'Ink'ez nelhutsinkah khunek ulhtus, 'i be njan ndun whudusni, ndunnah nuhtah tsihudutnik soo cho bugha dahtni. Ndunnah hubudzi yuk 'int'ah, soo nenabuneh'ah. Hunuljut 'en chah hubula 'aht'en. Ts'iyana nagoostl'iyaz né'boolh'en. ¹⁵ Ndan hoontsi' nuhts'un 'uja, khun teh hoontsi', 'i be huba k'elha hoolhtsilh gunih! 'Et k'us nuhwhenich'oh chah 'ink'ez 'uyoon ba chah, ndai unzoo, 'i ts'unóoh't'uk, 'i zeh nehduh. ¹⁶ 'Ahoohlheyz whunélnhnik. ¹⁷ Tenadahdli, 'ustl'e 'udóohneh gunih. ¹⁸ Ts'iyaintsuk hoh chanailya dahni. Sizi Gri 'en bugha 'et whuz na'a Yak'usda nuhts'un hukwa' ninzun 'et huwa. ¹⁹ Ndoni 'en ch'a ne'doolhú'en gunih. ²⁰ Khunek be nuhwhuba nus whét'en, 'i khun teh 'ants'i 'uhoont'ah noohzin gunih. ²¹ Ts'iyaintsuk naoodúlhdzih. Ndaí unzoo, 'i soo cho óhtun. ²² Ndaí untsi', 'i ts'iyawh buch'a 'aht'ah.

Yak'usda ye unzoo, 'i nohwhulh 'óot'e

²³ 'Aw 'et Yak'usda 'en be nedzi dezghel, 'i negha íni'ai, 'en soo 'et hoh nuhwheni dich'oh duba 'udun neníninla. 'Ink'ez nuhyust'e, nuhzul, nuhyéghah, 'ilho 'aw hoonli hoh nuhk'éholts'it hoolah neMoodihti Sizi Gri whusanatedalh whuts'un, 'et whuz na'a Yak'usda nuhwhuba 'uhooleh hukwa' nuszun. ²⁴ Ndan dutejih ka nuhka' dani, 'en 'aw neladootnih ghait'ah, 'ink'ez 'en nuhwhuba 'uwhtelilh. ²⁵ Nelhutsinkah neba tenadoohdli. ²⁶ 'Et lhulhutsinkah nalhatul'ih teh soo cho dushih be' lhoohlhun hoh lubeshi bughu hoolah be nalhadunuhts'oos.* ²⁷ NeMoodihti nalh 'unohdusni, nelhutsinkah 'en Yak'usda bube'ildzun hinli, 'en ts'iyawh ndi dustl'us huba buk'eyaoolhtuk. ²⁸ NeMoodihti Sizi Gri, 'en ye unzoo, 'i nohwhulh 'óot'e. 'Et ndoh honeh.

* 5:26 Whuz keyah 'et lhula nunahut'a.

Paul, 'En Thessalonica Whut'en Whulh Nat 'I Hubuts'un K'e'anguz

Thessalonica whut'en Paul dahooja hubulhni

¹ Nuwheni tanah ts'inli Paul, Sylvanus, Timothy, nuwheni keyah Thessalonica ts'ih Yak'usda ne'aBá 'ink'ez Sizi Gri neMoodihti ba 'ilhunahuwúdulh, dahooja nuhwhts'útni. ² Ye unzoo, 'i 'ink'ez nuhdzi dóoghel, 'et Yak'usda ne'aBá 'ink'ez neMoodihti Sizi Gri buts'un hayúkat, 'i nohwulh 'óot'e.

Yak'usda degha nus neba nahuteyeh 'ink'ez ye dézti, 'i bugha

³ Huba 'alha' hoont'ah 'i lhk'uz teh aht'i 'ink'ez 'ilhunuh ahli lha'un teh lhk'ehdutsi'. 'Et huwa nelhutsinkah 'ahoolhyez Yak'usda ts'un nuhwhuba chanailya 'uzdooni huba' hoont'ah. ⁴ 'Et huwa 'onghoh Yak'usda ba 'ilhunahuwúdulh, 'et hubugha degha nus nuhwubá ts'uhóont'i nuwheni nuhwughá. Dune dzuh nunwhuhulhdeh 'ink'ez howa whulna nuhwughá whunkat, 'et whunts'ih nuhwubá 'alha' hoont'ah, 'i be tachahudinik 'ink'ez whecháhtsaz. ⁵ 'Et huwa ts'iyannah t'ehininzun Yak'usda 'en ts'ah'un naheyelh 'int'ah. 'Et huwa nts'e Yak'usda hubudayi cho unli, 'et soo unzoo wule ndai bube'ildzun 'i nuhtl'aóote'ah. 'Et huba k'an dzuh nahde. ⁶ Ndan dzuh nunwhahulhdeh, 'en whuz na'a Yak'usda hubuk'elha ootelhtsilh. 'Et ts'ah'un na'a ho' hoont'ah. ⁷ 'Ink'ez nuwheni dzuh nudeh nelh natelhúyis. Whuz na'a neba k'elha whutelhtsilh. Ndet neMoodihti Sizi Gri 'ink'ez bulizas ulhtus bulh, 'et yak'uz ts'un hube hóoduteltsilh. ⁸ 'Et t'eh ndunnah Yak'usda t'einizun 'ink'ez neMoodihti Sizi Gri bughunek unzoo, 'i k'únucha'ust'en, 'en kwun dullhuk be huba k'elha whutele. 'Et whuz na'a 'en hubuts'un k'utetnilh. ⁹ NeMoodihti 'ink'ez degha nus ye dézti, 'i 'ilhuz wheni yuch'a nabutéleh. 'Et 'ilhuz wheni hiye dzuh nutedeh 'ink'ez 'aw huba bulatah nachahóo'ah. 'Et whuz na'a huba k'elha whutelhtsilh. ¹⁰ 'Et dzin whusanája t'eh, 'et ndoh whutenilh. Dune Yak'usda bube'ildzun hoinli, 'en ts'iyawh huba whudutelhti. 'Ink'ez ndunnah huba 'alha' hoont'ah, 'en huba hooncha tele. Nuwheni neghunek bugha nuhwubá 'alha' hoont'ah, nuwheni chah hubulh 'úteht'ilh. ¹¹ 'Et huwa 'alhoohyiz Yak'usda ts'un nuhwubá tenazdudli. Yak'usda dutehjilh ka nuhka' dani, 'et soo unzoo nuhwulhutsi. Ts'iyaintsuk unzoo, 'i yughunli, 'ink'ez 'ut'en 'ulh'en, 'i be 'alha 'uhoo'ah be 'ulh'ih, 'i ts'iyawh ye úhtus, 'i bulh 'int'ah, 'et ts'iyawh lhaóodutehliih. ¹² 'Et whuz na'a neMoodihti Sizi Gri boozi, nuwheni nuhgha dutéti. 'Ink'ez nuwheni chah 'en bugha dutéti tele. Yak'usda 'ink'ez Sizi Gri ye unzoo, 'i bugha ndoh whútenilh.

2

Whuch'a nahusdel whutéle

¹ 'Et nelhutsinkah, neMoodihti Sizi Gri whusanátedalh 'ink'ez 'en ts'un huba 'ilhunats'owutédulh, 'et hubugha soo cho neoozélhts'ai. ² Dune Ndoni bugha nohwulh yalhtuk na'dudil'i hoh 'ún whulhni Christ budzin, 'et dzin 'uda whusawhélt's'ut. K'us dune dich'oh bughunek be nohwulh yálhtuk, k'us 'uyoon nuhts'o k'e'anguz 'ink'ez si 'usda li'int'ah t'eh, 'et nduhúja t'eh, khun hubugha khunantóohdelh gunih, 'et whuz na'a nuhts'u tezdudliih. ³ Khun teh dune nanwhunoo'ah gunih. Sizi Gri budzin whusawhútelts'ulh 'et whutsuh, 'et 'udechoo whuch'a nahusdel whutéle, 'ink'ez ndun lubeshi 'ulh'en, 'en ts'iyannah nalh be hoodetelhtsilh. Ndon lubeshi 'ulh'en, 'en ts'iyaintsuk hoolah yulhtsi, 'en buye' int'ah. 'Et hukw'elh'az 'et zeh njan dzin whusawhútelts'ulh. ⁴ Yak'usda ch'a detni, 'ink'ez yugha ndoh 'int'ah na'dudil'i, 'en ts'iyannah hubudutenilh, "Si zeh Yak'usda usdli. 'Uyoon Yak'usda ts'un tenadoodli gunih!" 'Et whuz na'a Yak'usda hubuluglez whucho 'et dayih 'ink'ez 'et Yak'usda buba na'dudil'i. ⁵ 'Aw ih whunachasulhúnik? Nohwhulh 'ust'en hoh da ndun nuhwuhadáni. ⁶ 'Aw 'et ndai k'ah whúnilt'uk, 'i nuwheni nt'enahzun. 'Et hoh t'eh ndun lubeshi 'ulh'en ts'iyannah ba be hoodet'en tele. ⁷ 'Et ndi dune hukw'un nuchá'ust'en hubulhtsilh, 'et whe' hoont'ah hooyah, 'et 'uda k'an 'et nduwúht'en ho' hoont'ah. 'Et whunts'ih ndun k'ah nenilht'uk, 'et zeh ndutet'ilh whusanátelht whuts'un. ⁸ 'Ink'ez 'et t'eh ndun yuk'unucha'ust'en, 'en be hóoduteltsilh. 'En itelilh neMoodihti dich'oh ye usjiz, 'i be ndun yuch'a 'utelhdoh. 'Et whuz na'a neMoodihti whusanátedalh, ndi buts'un hayánduz, 'i be ndun yuk'unucha'ust'en, 'en 'ilhuz wheni be 'ut'en hoolah yutelhtsilh. ⁹ Ndon yuk'unucha'ust'en whusatayalh, 'en be 'ut'en k'ah, nts'e na'a Satan 'ut'en, 'et whuz na'a zeh 'utet'ilh. Hoolhtus tuné' tet'en, 'ink'ez hooncha tuné' tet'en chah 'utet'ilh. 'Ink'ez degha nus whuts'it, 'et huba hooncha tele. ¹⁰ Nduunnah kwuncho yuh ts'ih hutudelh, 'en ts'iyawh ts'ah'un na'a cha'hoot'ah, 'i be nabuna'ah. Khunek 'alha' int'ah, 'i hik'echafts'i, 'et huwa 'aw hudoojih ghait'ah. ¹¹ 'Et huwa hoonli nabuna'ah 'et Yak'usda whuz na'a whute

hubula dutetnih. 'Et ndai whuts'it, 'i zeh huba 'alha' 'utét'ilh. ¹² 'Et ndunnah khunek 'alha' 'int'ah huba 'alha cha'yit'ah, 'et ndunt'ah, 'en ndet ts'ah'un cha'hóot'ah, 'et zeh 'et huhoont'i tuné'hut'en, 'en ts'iyawh Yak'usda huba nahuteyeh ho' hoont'ah.

Yak'usda bughunek 'i soo cho bulh nudoolhúya

¹³ 'Et whunts'ih nelhutsinkah neMoodihti nuhk'entsi'. 'Et 'udechoo whuts'un 'utáhanóhanla dutehjih ka. 'Et huwa Yak'usda 'ahoolhyez chanailya nuhwhuba ts'utni. Ndoni be Yak'usda ba 'udun ninwhuninla, ndi khunek 'alha' 'int'ah, 'i nuhwhuba 'alha' 'oot'e. ¹⁴ 'Et whuz na'a neghunek unzoo, 'i be Yak'usda dutehjih ka nuhka' dani. 'Et neMoodihti Sizi Gri ye dézti, 'i nuhgha tékulh. ¹⁵ 'Et huwa nelhutsinkah, soo cho nudelhúya. 'Ink'ez nts'e na'a ndi be hoodulh'eh, 'et nuwheni negha hoodulh'eh, 'i neghunek bugha, k'us ne'dustl'us bughah chah, 'i ts'iyawh soo cho óohtun. ¹⁶ 'Et neMoodihti Sizi Gri dich'oh, 'ink'ez Yak'usda ne'abÁ, 'en nek'entsi'. 'En ye unzoo, 'i be 'ilhuz wheni whuz nenilht'uk hoh 'et whuz na'a buka tsi ts'uhooli. ¹⁷ Nuhdzi wúzoo, 'ink'ez khunek unzoo, 'i chah, 'ink'ez 'ut'en unzoo, 'i hubutah ninhoolelh.

3

Nelhutsinkah neba tenadoohdli

¹ 'Et ndi dek'elh'az khunek be nohwhulh yats'ulhtuk, 'i nelhutsinkah neba tenadoohdli. NeMoodihti bughunek 'a tsih nuhtadookat 'ink'ez nuhwhuba dóoti nuhwheni dáhja, whuz na'a. ² Ndunnah tink'us ne'hut'en 'ink'ez dune hintsi', 'en hubuch'a ninaneznoollelh. 'Aw ts'iyawh ilah huba 'alha' hoont'ah 'et huwa. ³ 'Et whunts'ih neMoodihti but'aníuznootan huba' hoont'ah. 'En soo cho ulhtus, 'i be nudelhúya nuhwhulltsi. 'Ink'ez ndun ntsi', 'en buch'a nuhghunli. ⁴ 'Ink'ez nuhwheni nuhwhugha neMoodihti but'aníuznitan ndi khunek be nuhwhugha uzdani, 'et ndaht'en 'ink'ez 'et zeh ndóht'en. ⁵ Yak'usda ye nék'entsi', 'i 'ink'ez nts'e na'a dune Christ hoolhtus be síyin, 'et whuz na'a nduchah neMoodihti nuhdzi wheinulltun.

Tsi'doohtnik gunih

⁶ 'Aw 'et nelhutsinkah, neMoodihti Sizi Gri boozi bugha njan ndun whúts'utni, ndunnah huba 'alha' hoont'ah nelhutsinkah hinli, 'ilhunuh teh tsi'udutnik 'ink'ez 'ants'i hubugha ítekulh zeh yubalh'i t'eh, 'et ndunt'ah, 'en ts'iyawh hubuch'a nahdelh, 'ink'ez hubu'et 'aht'ah. Ndi Yak'usda bughunek whebut's'odel'i, 'aw chahuhóotun 'et huwa' hint'ah. ⁷ 'Et nuwheni nohwhulh 'uts'ut'en inle 'aw ts'icha'ts'uditnik. 'Et hoh t'eooníhzin nuwheni nek'una'a 'ooht'e huba' hoont'ah. ⁸ 'Uyoon dune hubuts'uyi 'i 'aw chats'al. Tube neba howa whulna hoh 'ull'ek 'ink'ez dzenis 'i bulh 'uts'ut'en. 'Et huwa 'aw nuwheni naht'aznínootan whuch'a. ⁹ Ts'iyai be nela 'ooht'en huba' hoont'ah 'et whunts'ih 'aw nduchá'ts'ust'en. Nohgha ndoh huwa 'uts'int'ah ilah, nek'una'a 'ooht'e ka whuz na'a 'uts'int'ah 'et huwa. ¹⁰ Hoh da nohwhulh 'uts'int'ah, ndi nuhwhuba nuts'úhezya, 'et bulunah 'aw 'uhutet'ilh hukwa cha'hunízun t'eh, 'aw 'uhoo'alh huba cha'hóot'ah. ¹¹ 'Et nuhwheni nuhtah whulh 'úzdits'o, tsi'hudutnik chah hoonli 'ink'ez 'aw cha'hust'en. 'Et whunts'ih 'uyoon e'ut'en k'ah huwu hinli. ¹² 'Et ndunt'ah neMoodihti Sizi Gri boozi bugha ndi khunek ulhtus, 'i be ndun whúts'utni, nagoost'iyaz 'uhoot'en hoh hedich'oh 'uha'alh nahoodle. ¹³ 'Et whunts'ih nelhutsinkah, 'ut'en unzoo, 'i 'ulh'en, khun 'ustl'e' 'oohneh gunih. ¹⁴ 'Ink'ez ne'e'dustl'us be, neghunek yuk'unucha'ust'en, 'en t'enoohzeh 'ink'ez bulh cha'zooht'en. 'Et t'eh sih hooya wule. ¹⁵ Khun nuhwhulhutsinkah 'uts'un na'a ne'hut'en t'eh, 'aw nuhch'a detni nóohzin gunih. Nuhwhulhútsin k'una'a hubugha dóohni.

Yak'usda ye unzoo, 'i nohwhulh 'óot'e

¹⁶ Nedzi whúdezhel whuMoodihti, 'en dich'oh 'ahoolhyez 'ink'ez ts'iyaintsuk nuhdzi whudóoghel nuhghá holelh. 'Et nuhwheni ts'iyawh neMoodihti nohwhulh 'óot'e. ¹⁷ Si, Paul, sich'oh sula be 'uk'une'úsguz, 'i be dahooja nuhwhudúsi. Ndet k'e'águz totsuk 'et whuz na'a 'uk'e'águz. ¹⁸ NeMoodihti Sizi Gri ye unzoo, 'i nuhwheni ts'iyawh nohwhulh 'óot'e. 'Et ndoh honeh.

Paul 'Udechoo Dustl'us 'I Timothy Yuts'un K'e'anguz

Paul, 'en Timothy dahooya yúlhni

¹ Si, Paul, Sizi Gri ba whel'a 'ust'ah. Yak'usda, neulhyis, 'en bughunek bugha whel'a sili. 'Ink'ez neMoodihti Sizi Gri but'aníuznentan, 'en bughunek bugha whel'a sili. ² Timothy ts'un, ndi be 'alha 'uhoont'ah, 'i bugha soo suye' inli. 'Ink'ez ndi dustl'us nts'o t'ái'ai, Yak'usda ne'aBá 'ink'ez Sizi Gri neMoodihti, 'en bugha ye unzoo, be ugha te'nudzun, 'ink'ez be nedzi dooghel, 'i chah, 'i ónt'i hukwa' nusuzun.

Khunek whuts'it, 'i whuch'a khondle

³ Macedonia yun k'ut ts'ih téya hoh keyah Ephesus 'et nenyunilhti. Soo cho mba nust'uk hoh 'ut'en 'utalh'ilh. White, 'et zeh sinda. Daja nyudani, 'et doo chah 'inyudutesnilh, soo khunek ulhtus, 'i be bulunah dune whuts'it be dune hubohodoolh'eh 'et whuch'a. ⁴ 'En 'udada huba 'alha' yint'ah, 'ink'ez ilhelhdun butsu da huba 'alha' hoot'ah. Ndoohoont'ah huwa hukwa lhena 'uhudutni. 'Aw Yak'usda be 'ut'en k'ah ilah 'uhoont'ah. Be 'alha 'uhoont'ah Yak'usda negha ini'ai, 'i bugha 'o nus ts'inzoo 'et huwa. ⁵ Hubudzi chaditsun, 'ink'ez buyuh ts'ih bugha t'ets'oninzun* unzoo, 'ink'ez huba 'alha' hot'e chah, 'et whuz na'a lkh'ets'oodutsi'. 'Et nuwheni ndi khunek Yak'usda netl'aída'ai. ⁶ 'Et bulunah ilah ts'ih whehandel. 'Et huwa tink'us 'uhuja 'ink'ez lahoot'ah 'et howu yahalhtuk. ⁷ Ndunnah Moses be' dustl'us k'ut 'uk'une'uzguz, 'i hubodutelh'eh hukwa' huninzun 'ink'ez daja hutni 'aw nt'ehonízun, 'et whunts'ih 'alha' hoot'ah hutni. ⁸ 'Et t'ets'oninzun, Moses be' dustl'us 'uk'une'uzguz, 'i ndunnah soo ts'ah'un na'a hiye 'ut'en t'eh, 'en huba yinzoo. ⁹ Ndi Moses be' dustl'us 'uk'une'uzguz, 'aw dune ts'ah'un 'int'ah ba cha'it'ah 'et t'ets'oninzun. 'Et njan nduhint'ah, 'en huba' yilya. Ndunnah ndi khunek netl'adélt's'ut, 'i k'uníyuzuz, 'ink'ez 'aw hik'unucha'it'il, budzi dutsun, lubeshi 'ulh'en, k'us ndan Yak'usda ghudloh, buzek hootsi', ndunnah be'ama, be'ubákah hubanghan, 'ink'ez dune hughan, 'en chah, ¹⁰ ts'ekoo k'us dune bulh tinta' ut'ih, 'en ts'iyawh, bulunah dune dudulh dune bulh tinta na'dut'ih, dune 'ulhna be 'ahóoket, huwhuts'it, dich'oh bughunek k'uneyuz chah, 'et ndunt'ah dune, 'en ndi Moses be' dustl'us buba' yilya. Yak'usda bughunek unzoo, 'i ts'iyaintsuk unzoo hoh dune whubodulh'eh. 'Et 'udun huwa ts'ah'un khunek hiyoodel'i, 'i hich'a detni t'eh, 'en chah buba' yilya. ¹¹ Ndi khunek unzoo, 'i degaha nus dézti, 'ink'ez Yak'usda zeh unzoo, 'en bugha zeh 'int'ah. 'Et si st'aninintan hoh stl'aída'ai.

Yak'usda ye unzoo, 'i ts'udóolhti

¹² Christ, Sizi ts'utni, 'en neMoodihti 'en st'aninintan hoh 'ulhtus sulhtsi 'ink'ez de'ut'en k'ah buba' test'ilh, 'et stl'aho'ai, 'et huwa 'en ts'un schanailya dusni. ¹³ Niz de haoodanzut Yak'usda ch'a desni inle 'ink'ez huba 'alha' hoot'ah, 'en dzuh nobuzilhde. 'En ts'iyawh ba dzuh 'udusni inle. 'Et whunts'ih 'aw hoonli t'oonuzusuzun, suba 'alha cha'hoot'ah 'et huwa 'est'en, 'et whunts'ih sugha te'ninzin. ¹⁴ 'Et neMoodihti ye suts'un unzoo, 'i tube lhai ho' 'int'ah, 'ink'ez Christ, Sizi ts'utni, 'en ye sk'entsi, 'i be 'alha 'uhoont'ah, 'i chah 'en bulh 'uhoont'ah. ¹⁵ Ndi khunek be nyulh yalhtuk, 'i 'alha' 'int'ah 'ink'ez soo ts'iyawh but'anínontan, 'et ndutni: Christ, Sizi ts'utni, 'en ndi yun k'uz nusiya lubeshi be né'hut'en hubutelhyih 'et wheni, 'ink'ez si degaha nus dune untsi' usdli inle. ¹⁶ 'Et whula gha ts'ih sugha te'nanzin. 'I be dune tah si 'udechoo sili hoh ts'iyaneh hobuntelhtun, nts'e na'a Sizi Gri sa whuts'un suba ilh'i sugha te'nanzin. 'Et sugha idéz na'a ndunnah 'aw 'et nilhdukw 'en huba 'alha' yint'ah, 'ilhuz hukhutenalh ho' hutet'ilh. ¹⁷ K'an 'et ndun 'ilhuz wheni whuhubudayi cho unli, 'en ba ts'odélti. 'En degaha nus dezti unli. 'En 'int'ah dachátesa 'ink'ez 'aw ts'oo'en ghaít'ah. 'En Yak'usda whunih unli. 'En 'ilhuz wheni ba ts'odélti uztele. 'Et ndoh honeh.

Be neba 'alha 'uhoont'ah, 'i soo cho bulh onyin

¹⁸ Timothy suye', ndi khunek ncha 'i ntl'ada'ai. 'I Yak'usda be nus whunólh'en, 'uda nghu yahalhtuk inle, 'et si chah whuz na'a ntl'aho'ai. Ndi be 'alha 'uhoont'ah, 'i soo cho be but'ayonya. ¹⁹ Be 'alha 'uhoont'ah 'ink'ez nyuh ts'ih bugha t'ets'oninzun, 'i ndi 'ut'en wheni, 'i be soo ubontun. Bulunah ndai hubeni tah yudez'ai, 'i ts'iyawh hukwa cha'hunizun. 'Et huwa be 'alha 'uhoont'ah, 'i tinta' honilh'en. ²⁰ Ndunnah Hymenaeus 'ink'ez Alexander 'en nduhint'ah. 'En Yak'usda ch'a yahalhtuk. 'Et huwa Satan† t'l'aobalhti inle. 'I be Yak'usda ch'a yahalhtuk 'et nduchah hudoosneh wule ka.

* 1:5 Ndi khunek "Neyuh ts'ih huwa t'ets'oninzun", 'i hoonli ts'ih'un na'a k'us tink'us 'uhoont'ah, 'i gha t'ets'oninzun, ts'utni ho' ts'utni. † 1:20 Ndunnah Satan 'en netsudule cha hiyulhni. 'Et whunts'i 'aw 'en bugha ilah. Ne'aBá 'en zeh neba nahuteyeh.

2

¹ Et huwa soo cho 'un nyudusni, 'udechoo Yak'usda ts'un ts'iyannah huba buts'un tedindli, 'et bula 'ooneh. 'Ink'ez hukwa' ninzun k'una'a 'et whuz na'a bula' tet'ilh, 'ink'ez Yak'usda ts'un chanailya dini. ² Hubudayi cho 'ink'ez ts'iyawh negha ndoh 'ududildzun, 'en chah huba tenadindli. 'Et t'eh t'ezdusnih 'ink'ez nedzi dooghel hoh ndi yun k'ut uzdoolts'i. 'Et whuz na'a Yak'usda ba ndi yun k'ut uzdoolts'i' 'ink'ez ts'iyannah ba ts'inzoo wule. ³ 'Et whuz na'a yinkak uzdelhts'i, 'et hoonzoo ho' hoont'ah 'ink'ez Yak'usda neulhyis whuz na'a neba hukwa' ninzun. ⁴ 'En 'int'ah ts'iyannah butelhyih hukwa' ninzun 'ink'ez ndi khunek 'alha' 'int'ah, 'i t'ehinoozeh ka. ⁵ Yak'usda 'ilhunuh ze' 'int'ah. Yak'usda 'ink'ez ndi yun k'ut húdehlts'i hubéguz 'ilhunuh huba yalhtuk ze' 'int'ah, ndun dune Christ, Sizi ts'utni, 'en 'int'ah. ⁶ Nuwheni ts'iyawh nenaootekulh ka butl'a' dudelti. Ndet whusawhélt's'ut soo 'et 'uja, ts'iyannah whunilhtan 'et whuz na'a. ⁷ 'Et wheni Yak'usda 'utahásalhti whel'a tesdle ka 'ink'ez buba yatélhtuk. Si 'utesnilh 'udun yun k'ut whut'en be 'alha' uhoont'ah 'ink'ez khunek 'alha' 'int'ah, 'i chah be whubuntélhtun ka. 'Et Christ bunalh daja dusni 'alha' 'int'ah be' dusni, 'aw chaozústs'it.

Dune 'ink'ez ts'ekoo ndunnah huba 'alha' hoont'ah, Yak'usda ba 'ilhunahuwudulh dahutet'ilh

⁸ 'Aw 'et ndi yun k'ut nduhoolcho hoh dune tenahudoodli. 'Et huwa bula hoonliyaz lubeshi bughu hoolah hoh dihudoolnih. 'Aw whúske hubeni tah hoolah 'ink'ez huba nawh cha'host'e hoh tenahudoodli. 'Et whuz na'a sudzi ndulhcho, 'i be 'en huba hukwa' nuszun. ⁹ 'Ink'ez whuz na'a ts'ekoo 'en chah ts'ah'un na'a hoh soo nahudootneh. Huwhunih hukw'u na'a soo 'uhoot'e, buyust'e ts'iyawh buk'e 'uzdla hukw'u na'a. Dutsigha lhat teh cho nahíoolhtsi gunih. K'us gold, k'us kw'usul nehíduya, 'i k'us naih 'o nus dézti, 'i 'et ndóohoont'ah. ¹⁰ 'Et whunts'ih ts'ekoo, 'en 'ut'en unzoo, 'i 'uhitelh'ilh. 'Et whuz na'a whubuntelhtun ndunnah Yak'usda ts'un teni' hunilhdzun 'uhint'ah. ¹¹ 'Et ts'ekoo dune butl'a' hududoolyelh 'ink'ez t'ehudoosnih hoh soo cho Yak'usda bughunek hiyoodol'eh. ¹² 'Et ts'eke 'aw dune hoodolh'eh ka, 'ink'ez yumoodih wule ka butl'achawhus'al. 'Ink'ez t'edoosnih huba' hoont'ah. ¹³ Yak'usda Adam 'en choo 'uyinla, 'et hukw'elh'az Eve 'uyinla 'et huwa. ¹⁴ 'Ink'ez Adam 'aw nachanit'ah, k'us ndun ts'eke 'en naina'a 'ink'ez tink'us 'uja. ¹⁵ 'Et whunts'ih ts'ekoo ts'ah'un na'a dudení be khuhudli hoh be 'alha' uhoont'ah hit'i, Yak'usda k'ehints'i, 'ink'ez buyust'e lubeshi bughu hoolah, 'et zeh nduhint'ah t'eh, buyaz whulhíh teh hudutejih.

3

Yak'usda ba huwunli, 'en ndez na'a dune wule huba' hoont'ah

¹ Ndi khunek but'anízntentan, 'i 'et ndutni: Ndan dune Yak'usda ba huwunli tele hukwa' ninzun t'eh, 'en 'ut'en unzoo, 'i 'itelh'ilh hukwa' ninzun ho' 'int'ah. ² 'Ink'ez Yak'usda ba huwunli, 'aw dune hoonli hoh tink'us cha'oost'e. 'Ilhunuh zeh bu'at wule. Duba whutnih. Ts'ah'un ni nezulh. Dune bukoo dalih. Soo dune hodulh'eh unli, ³ 'ink'ez mai too 'i ka dachasne. 'Aw khun chahunlhots'e 'int'ah. 'Aw sooneya ka datne. Dune ch'a nucha'ust'en. Dune yenah cha'dusnih. 'Uyoon dune be'ildzun ka cha'nizun. ⁴ Ts'ah'un na'a bukoo húdehlts'i bughole 'ink'ez dich'oh duduzkeh, 'en chah hube'abá hubutl'a'dudoolyelh hoh budzi k'ah hik'une' 'ut'en huboolhtsilh. ⁵ 'Et ts'ah'un na'a bukoo húdehlts'i bughunli 'aw t'eeonízun t'eh, nts'e na'a Yak'usda ba 'ilhunahuwúdulh bughu tele? ⁶ K'an 'et buba 'alha' hooja ilah 'oot'e. Doo ka sih ut'udelhúti wule, 'ink'ez netsudule be ba nahesda, 'et didut chah sih whuz na'a 'ooneh. ⁷ 'Ink'ez ndunnah huba 'alha' cha'hoot'ah, 'en chah soo highu yaoolhtuk, doo ka sih tink'us 'uja 'ink'ez netsudule yoolhgooh.

Yak'usda ba ne'út'en, 'et nts'e na'a dune tele

⁸ Whuz na'a zeh Yak'usda ba ne'út'en hukwa' hut'en: 'en Yak'usda buba dóoti. 'Aw nankoh bughunek chailah. 'Aw mai too 'i ka datne ilah, 'ink'ez 'aw sooneya chah ka datne ilah. ⁹ 'Et whe' hoont'ah hooyah, be neba 'alha' whuter'ilh 'i bulh, buyuh ts'ih bugha t'ets'oninzun, 'i soo netsun hoolah 'et hahotun. ¹⁰ 'Et whunts'ih ndunnah Yak'usda ba ne'hút'en, 'udechoo soo cho dune t'ebunoozeh 'ink'ez 'aw hoonliyaz hik'eho'alh hoolah t'eh, 'en Yak'usda ba né'tet'en. ¹¹ Whuz na'a zeh ts'ekoo 'en chah Yak'usda buba dóoti, 'uyoon ch'a yachahoolhtuk, duba whutnih hoole, 'et huwa ts'iyaintsuk hoh but'aníuznootan ka. ¹² 'Ink'ez ndunnah Yak'usda ba ne'hút'en, 'en chah 'ilhunuh zeh bu'at wule. Dich'oh duduzkeh 'ink'ez bukoo húdehlts'i chah ts'iyawh ts'ah'un na'a bughole huba' hoont'ah. ¹³ Ndan soo Yak'usda ba ne'hust'en, 'en ndunnah dune hínzoo hubuhútni, 'ink'ez Christ, Sizi ts'utni, 'en ye 'alha' 'int'ah, 'aw whechaniljut hoh 'i be 'uyoon bulh yaoolhtuk.

Hooncha whe' hoont'ah hooyah

¹⁴ 'Aw 'et nilhdukwa nts'un tesyall hukwa' nuszun 'et whunts'ih nts'un k'e'usges. ¹⁵ 'Et whunts'ih sayaz ne'zust'en t'eh, 'et ndi dustl'us 'i bugha t'eeononzin Yak'usda bukoo dahutet'ilh. 'Et ndan Yak'usda bugha 'ilhunahuwúdulh, 'en Yak'usda khuna bukoo hinli ho' hint'ah. Ndunnah 'ilhunahuwúdulh ndi khunek 'alha' 'int'ah be highunli 'ink'ez ts'ah'un na'a highu yalhtuk. ¹⁶ 'Ink'ez 'aw hubugha lhenah cha'hudusnih, njan whe' hoont'ah hooyah 'et hooncha ho' hoont'ah:

Yak'usda ba ndi yun k'ut 'uzdoolts'i ka.

Yak'usda dich'oh dune suli 'et whubunelhtan.

Ndoni ts'ah'un 'int'ah unli yulhni.

Lizas hiya'en.

'Udun yun k'ut whut'en,

'en hubugha whulh 'uhudants'o.

Ndi yun k'ut whut'en,

'en hubugha hiba 'alha' 'int'ah huzdli.

Yak'uz ts'ih huhoont'i hoh danahinilhti.

4

Sizi Gri whubodulh'eh dune whuch'a nahusdelh whutéleh

¹ 'Aw 'et Ndoni soo ts'ah'un na'a ts'et gaih yalhtuk hoh ndutni, k'at lih nts'i' nududeh bulunah dune nabunte'ah. 'Et huwa ndet whubodutelh'eh, 'aw 'et zeh 'uhooutzelhts'ilh. 'Ink'ez ndi be 'alha' 'uhoont'ah, 'i hila dutetnih ho' hoont'ah. ² Ndunnah duba nahududzoo 'en whuts'it, 'i be yahalhtuk. 'Et buyuh ts'ih bugha t'ets'oninzun, 'i kwun be hubuk'eyíduguz li'hut'ih. ³ Lghu dutelts'ilh, 'et whuch'a honenyoot, 'ink'ez buluh ts'uyi 'i chah hich'a buntéyoot. 'Et whunts'ih ndunnah huba 'alha' hoont'ah 'ink'ez khunek 'alha' 'int'ah, t'ehininzun, 'en hika' ninzun, 'i ts'iyawh hiyoo'alh huba' hoont'ah, Yak'usda 'uyinla 'et huwa. 'Et 'udechoo ndi ts'uyi ka Yak'usda ts'un chanailya hudooni 'ink'ez hiyoo'alh. ⁴ Yak'usda 'uyinla, 'i ts'iyawh unzoo ho' 'int'ah, 'ink'ez buka cha'ts'unooszin gunih. 'Et huwa Yak'usda ts'un chanailya ts'utni 'ink'ez ts'oo'alh. ⁵ Yak'usda bughunek 'ink'ez tenadudli bulh 'i be neba unzoo unli hoh ts'u'alh.

Sizi Gri ba soo ne'ut'en onle

⁶ Ndunnah lhulhutsinkah hinli, 'en Yak'usda bugha hubodilh'eh t'eh, 'et sih Sizi Gri ba soo ne'int'en tanle. 'Ink'ez ndi khunek be 'alha' 'uhoont'ah, 'i bugha t'eeonanzin, 'ink'ez 'i soo chok'une' zint'en. ⁷ 'Et whunts'ih khunek chaizoo, 'i 'ink'ez 'ants'ih khunek, 'i oozólhts'a gunih! 'Et Yak'usda ba ndi yun k'ut uzdoolts'i ka, 'i be ilhtus onle. ⁸ 'Et neyust'e ba ne'uzdunuldze, 'et 'astl'iyaz zeh neba whutézoo, 'et whunts'ih Yak'usda ba ndi yun k'ut uzdoolts'i ka, 'et ts'iyaintsuk whudézi. 'I bugha ndi yun k'ut uzdelhts'i nela' 'uwhtet'ilh 'ink'ez yak'uz nizteyall, 'et chah nela' 'uwhudutenilh. ⁹ Ndi khunek be nyulh yalhtuk, 'i but'aininontan 'ink'ez tálhchulh huba soo 'uldzoo ho' 'int'ah. ¹⁰ 'Et nuwheni 'uts'ut'en 'ink'ez hukw'elha dzúh nuts'udeh. Yak'usda khuna, 'en but'aniuznentan 'et huwa. 'En ts'iyannah hubulhyis 'int'ah ndunnah yuba 'alha' yint'ah, 'en soo hubulhyis.

Yak'usda ba ne'int'en, soo cho howinli

¹¹ 'Et ndi khunek ntl'ada'ai, 'i be 'uyoon hoodutalh'eh. ¹² Chilh inli whunts'i, 'uyoon ba 'ants'i onle gunih. 'Et huba 'alha' hoont'ah, nyun nyanilh'en t'eh, 'et huwa huhodool'eh. Nda khunek be yailhtuk, 'i nts'e na'a ndi yun k'ut sinda, nts'e na'a 'uyoon k'eintsi', 'i nyegha be, mba 'alha' hoont'ah, 'ink'ez nts'e na'a lubeshi ch'a 'utdunelt'uk chah. 'Et ndi ts'iyawh 'i be huba dobutaltun. ¹³ 'Et ndet nts'u tesyall whuts'un, khun ndi Yak'usda bughunek buba hukw'eyailhtuk, 'et 'ustl'e cha'duzoneh. Nda khunek be ts'oolhtus ka be nelh yailhtuk, 'i be hubulh yailhtuk, 'ink'ez 'o 'un chah wheobunilhtun. ¹⁴ 'Et hoh da ndunnah 'utsuh whudélhdzulh bula be ntsi k'ut hudalnik. 'Et mba nus huho'en 'ink'ez 'i nggant'ai, 'i 'ants'i mba wule gunih. ¹⁵ 'Et njan howun nuni ninzut 'ink'ez whutl'a dudilhtik. 'Et t'eh but'az ninyeh, 'et ts'iyannah hinoolh'en. ¹⁶ Nyunch'oh soo cho khinli 'ink'ez khunek be whuts'odul'eh chah, 'i bulh zeh 'ont'e. 'Et ndint'ah t'eh, 'et sih nyunch'oh 'uduzilyih 'ink'ez ndan nyuhudits'o, 'en chah hubalhyiz ho' 'int'ah.

5

Yak'usda ba 'ilhunahuwúdulh, soo cho né'bilh'en

¹ Dune nghanus whudélhdzulh, hoonliyaz né'doni gunih. 'Et nyu'abá k'una'a bulh yailhtuk. Dune nk'ah whudélhdzulh, 'en nyulhutsinkah k'una'a hubulh yailhtuk. ² Ts'ekoo nghanus whudélhdzulh, nyu'ama k'una'a hubulh yailhtuk. 'Ink'ez ts'ekoo nk'ah whudélhdzulh, nyulhtuskah k'una'a khunek netsun hoolah be hubulh yaoolhtuk.

Ndunnah soo tsandelh hinli hubuzdóolhti

³ Ndunnah soo ts'ah'un tsandelh hinli, 'en chah hubudólhti. ⁴ 'Et whunts'ih ndunnah tsandelh buzkeh hoonli, k'us buchaikah hoonli, ndunnah tsandelh hits'u hainde, 'en be'ama ts'ah'un na'a highole. 'Et hoh Yak'usda be 'ut'en k'ah whutele. 'Et 'udechoo bukoo húdelhts'i hubudoolhti, 'ink'ez dudusnekah bula' hóot'en. Ndez na'a hoonzoo ho' hooht'ah 'ink'ez Yak'usda, whuz na'a huba hukwa' ninzun. ⁵ Ndan soo ts'ah'un tsandelh unli 'ink'ez bunat 'e'hoolah t'eh, Yak'usda 'en zeh yut'aninootan yula' tet'ilh huba. 'Et dzin 'ink'ez 'ulh'ek, 'i bulh 'ahoolhyez Yak'usda ts'un teni' nilhdzun hoh tenadoodli. ⁶ 'Et whunts'ih tsandelh, ndan lubeshi ts'un dene'dut'en hoh ndi yun k'ut usda, ndunt'ah hukhuna hoh dahuzsai ho' hint'ah. ⁷ Daja nyudáni 'i khunek ulltus 'i be ts'iyannah hubulh yailhtuk. 'Et hoh buk'eholts'it hoolah. ⁸ 'Et whunts'ih ndunnah 'aw dunatnekah bughu chailah, 'ink'ez bukoo húdelhts'i, 'en cha bughu chailah t'eh, 'et ndunt'ah ndi be 'alha 'uhoont'ah yuch'a nal'alh, 'ink'ez huba 'alha cha'hoot'ah ba nus chaizoo ho' int'ah. ⁹ Tsandelh lhk'utai lanezi 'o 'at naodezut be naodezúk (60), 'ink'ez 'ilhunuh zeh ghinda t'eh, 'en zeh huboozi hubuk'e'ooduguz huba' hooht'ah. ¹⁰ Unzoo, 'i zeh 'uhulh'en huwa t'ehunoodzin. 'Uskehyyaz nelhyi t'eh, dune t'eoobunízun, 'en whunts'i bukoo dabulih, dune Yak'usda bube'ildzun, 'en buke toonagus, dzuh nuhuzut 'ut'en t'eh, 'et ndi 'ut'en unzoo, 'i soo cho ts'iyawh 'uyoolh'en. ¹¹ 'Et whunts'ih k'us ndan k'an hezulh tsandelh hinli, 'en huboozi buk'e'onges gunih. Nts'un na'a ne'hoot'en 'ink'ez Christ ch'a nahulhú'a t'eh, ki ka hudutedut'ilh hukwa' huninzun. ¹² 'Ink'ez 'udechoo hubughunek hiye nahezya, 'i k'uhinínyuz t'eh, 'et t'eh huba nahutedeh. ¹³ 'Ink'ez tsehudutnik chah huhodel'i 'ink'ez kwun tah nuhuya. 'Aw tsihudutnik zeh 'uhint'ah, 'ughu yahulhtuk 'ink'ez 'uyoon 'e'ut'en k'ah huwu hinli cha' hint'ah. 'Aw ne'hoodoni huba cha'hoot'ah, hoh teh ne'huduni. ¹⁴ 'Et huwa ndez na'a but's'u hukwa' nuszun, ndunnah tsandelhyaz, 'en ki náhoot'i 'ink'ez bubuzkeh hole, 'ink'ez bukoo chah huwo hoole. 'Et njan nduhut'en t'eh, 'aw nech'a detni nelh yatelhtuk bughá holts'it ghait'ah. ¹⁵ Bulunah 'uda Sizi Gri hich'a nalhú'a hoh Satan hik'une' 'ut'en 'et huwa. ¹⁶ Ndan dune k'us ts'eke 'en huba 'alha' hooht'ah unli, 'ink'ez be'ama tsandelh unli t'eh, 'et sih ndai ye ndunidzit, 'i be bula' hóot'en. 'Et whuz na'a 'onghoh Yak'usda ba 'ilhunahuwúdulh hoonliyaz hubugha hoo'ah ghait'ah. 'Et nduhut'en t'eh, 'et soo ts'ah'un tsandelh hinli, ndai hiye ndunidzit, 'i be bughu hoole.

Yak'usda ba 'ilhunahuwúdulh, ndunnah netsuh whudélhdzulh hubuzdóolhti

¹⁷ Netsuh whudélhdzulh soo dune tsuh nuya, 'en soo hubuzdóolhti 'ink'ez nawh 'ultsuk, 'i be bughonle. Ndan 'ut'en ulltus, 'i be 'ut'en hoh Yak'usda be 'ut'en k'ah dune hodulh'eh 'ink'ez Yak'usda bughunek be yahulhtuk, 'en dega nus soo ne'boolh'en. ¹⁸ Yak'usda bughunek 'et chah ndutni, "Ndet musdus dune t'l'o mai 'uzte'ilh wheni, 'uyulh'en t'eh, 'aw 'ute'alh whuch'a 'enool' a huba cha'hoot'ah." 'Ink'ez 'et chah ndutni, "Dune 'ut'en be 'ut'en buba 'uk'elha whutele ho' hooht'ah." ¹⁹ Ndunnah 'utsuh whudélhdzulh hoonli hubugha hik'eoote'alh t'eh, 'et nanah k'us tanah, 'en hiyulh t'ewhuninzun t'eh, 'et zeh huwu yahoolhtuk huba' hooht'ah. ²⁰ Ndunnah lubeshi hihlchukw, ts'iyannah nalh hoh tinta' hunt'en hukwa' bodóni huba' hooht'ah. 'Et sih 'onghoh 'en chah whe hunooljut. ²¹ Yak'usda, Sizi Gri neMoodihti, 'ink'ez lizas 'utahalya chah, 'en ts'iyawh bunalh soo ts'ah'un na'a 'un yudutesnilh, ndi khunek be daja nyudáni 'et huwa 'ilhuz wule ontun. Ndaí 'ut'alh'ilh, 'i ts'iyawh dune ch'a wule hukw'u na'a 'oneh gunih. 'Ink'ez 'aw 'ilhunuh zeh k'entsi' 'ink'ez hoonliyaz whuts'un nolht'uk gunih. ²² Khunyyaz dune k'edolnih gunih. 'Ink'ez 'uyoon lubeshi 'ulh'en 'e'ut'en k'ah ts'ih tonya gunih! Nyunch'oh chah lubeshi 'et 'ududoldzin. ²³ 'Et lhat hoh mbut bugha ndinda, 'et huwa 'aw too zeh ontai gunih, mai too ntsolyaz buk'e'i'ontnai. ²⁴ Bulunah bulubeshi ts'iyannah yunilh'en, 'et huwa ndai ye huba nahutedeh whutsuh, 'i dahaja, ts'iyannah t'ehontezin. 'Ink'ez bulunah bulubeshi nahinulh'i, 'et hukw'elh'az ndai ye nahezya, 'i dahaja, ts'iyannah t'eyuntezeh ho' hooht'ah. ²⁵ 'Ink'ez whuz na'a zeh ndan 'ut'en unzoo, 'i 'ulh'en, ts'iyannah t'ewhuntezeh 'ink'ez 'ut'en unzoo, 'i nahinulh'i t'eh, 'i whunts'i ts'iyannah t'ewhuntezeh.

6*'Ulhna hinli, 'en chah hubumoodih hidóolhti*

¹ Ndunnah 'ulhna hinli, 'en chah hubumoodih ts'ah'un na'a bughu nuni hunoodeh, soo cho hidóolhti. 'Et nduhut'en t'eh, Yak'usda boozí 'ink'ez ye whubodalh'i, 'i chah 'aw 'uyoon yuch'a dootni ghait'ah. ² 'Et 'ulhna bumoodih huba 'alha' hooht'ah hinli, 'en hubuts'u hudootni gunih, lhulhutsinkah hinli 'et huwa. 'Et ndunnah 'ulhna, 'en 'o nus 'ulltus, 'i be huba' hut'en. Ndunnah bumoodih, 'en Sizi Gri bugha huba 'alha' yint'ah hinli 'ink'ez hubuk'entsi'. 'Et huwa 'o nus 'ulltus, 'i be huba' hut'en hoh hube' 'ut'en be hubula' hut'en

ho' hut'en. 'Et ndi khunek be nyulh yalhtuk, 'i 'uyoon chah hubodulh'eh 'ink'ez hubudzi nduk na'inleh.

Sooneya nuhyak'usda wule gunih

³ 'Et ndan dune whuts'it be dune hodulh'eh, 'en Sizi Gri neMoodihti bughunek un-zoo, 'i yutélhchulh hukwa cha'nizun. 'Ink'ez nts'e na'a Yak'usda ba ndi yun k'ut 'uz-doolts' ka hukw'u na'a huboodutelh'eh hukwa cha'nizun t'eh, ⁴ 'en dune 'ududélhúti ho' 'int'ah. Hoonliyaz nt'oonizun. 'Et huwa 'ahoolhyez dune yehah zeh 'udenilh 'ink'ez lkh'enahudidzuk 'utni. 'Et huwa ndunt'ah dune 'oolnih bughu dez'ai hinli 'uhint'ah. 'Uyoon chah lkh'enahudidzuk utni, khunek ntsi' be 'uyoon chah ghu yahalhtuk. 'Et 'uyoon lubeshi e'ut'en zeh ghu nuni hunudeh. ⁵ Ndunnah hubeni ntsi' suli hoh 'ahoolhyez lkh'enahudidzuk huninzun. Khunek 'alha' 'int'ah chahit'ih. Ndunt'ah 'uhuninzun ndan Yak'usda be 'ut'en k'ah hukw'u ne'ut'en, 'en dune soode'a 'utenilh. Nduhint'ah 'en hubuch'a na'ónja. ⁶ 'Et whunts'ih nedzi soo ts'uhooont'i hoh Yak'usda be 'ut'en k'ah 'uts'uwulh'eh t'eh, 'et hooncha 'otanlilh ho' hooont'ah. ⁷ Ts'uwuhzdli da, 'aw hoonliyaz whusachats'ilel, 'ink'ez 'alha neba dzin wulatah suli t'eh, 'aw hoonliyaz naztoola ghait'ah. ⁸ 'Et huwa ts'uyi, 'ink'ez be dune ts'inli, 'i ts'ít'i t'eh, 'aw 'et neba soo' hot'e. ⁹ 'Et whunts'ih bulunah soode'a 'uhutenilh hukwa' huninzun, 'en tinta' tet'ilh ka hubóolhdi. 'I be hubutelhgooh. 'Et huwa yuk hubunilh'tuk, 'et hoh ndi yun k'ut húdelhts'i tinta' whutet'ilh 'ink'ez hoontsi' ts'ih huteyalh. ¹⁰ Sooneya huba dézti, 'i 'int'ah lhat hoontsi' bugha whe' whudit'ih. 'I bugha bulunah dahatni k'et, be 'alha 'uhooont'ah ch'a hedulh 'ink'ez lhat budzi unduda khaanáhuwhut'aih.

Dune hodelh'i 'ink'ez nyunch'oh chahsoo cho khondle

¹¹ Timothy, nyun Yak'usda budune inli. 'Et huwa ndi be hoontsi' nyudáni, 'i ts'iyawh buch'a ilgh, 'ink'ez be ts'ah'un 'uhooont'ah, be Yak'usda k'une' whut'en, be 'alha 'uhooont'ah, be nek'ets'ints'i, be whulh ts'uzyin, 'ink'ez be yuk uzduhdildzun, chah, ndi 'i ts'iyawh whunanyalh hukwa 'int'en. ¹² Neba 'alha 'int'ah 'i bugha 'o 'un 'uts'oonah ghait'ah 'et whunts'i hukwa' ts'ut'en. Nyun chah 'o 'un oneh ghait'ah 'et whunts'i hukwa' 'ont'en. 'Ilhuz be ts'ukhuna, 'i duts'o cho óntun, nyun chah dutanjih ka nka hesda 'et huwa. 'Ink'ez lhanah nalh soo hoonzoo hoh hubudáni. ¹³ Njan soo cho 'indusni, Yak'usda, 'en bugha ts'iyait'suk khuna, 'ink'ez 'et whutsuh da Christ, Sizi ts'utni, bunalh hoh Pontius Pilot soo cho hoh yuts'un khunawhelnuk, ¹⁴ nyun chah khunek netl'aída'ai, 'i buk'une' 'ont'en. Ndai dune be dutsun tele, 'ink'ez hoonliyaz nk'eootelts'ulh, 'i ts'iyawh buch'a huwonle. 'Et neMoodihti Sizi Gri whusatayalh whuts'un, 'et zeh ndont'e. ¹⁵ Sizi Gri whuz hanátedalh, ndet 'uwhtutenilh t'eh, 'et neMoodihti 'en hukwa' ninzun, 'et 'uwhtutenilh. 'En dega nus unzoo 'ink'ez neMoodihti 'en zeh k'une' 'ut'en unli. Hubudayi cho ts'iyawh buhubudayi cho unli 'ink'ez moodih chah ts'iyawh bumoodihti unli. ¹⁶ 'Aw 'en zeh be dachats'usa, 'i yit'i. Nts'e usda, 'et ndi but'sun hayanduz, 'i bugha 'aw dune yuzih neooya ghait'ah. 'Aw dune chayes'en, 'ink'ez 'aw dune yoo'en hoolah. 'En 'aw 'en zeh 'ilhuz be hoolhtus, 'i yit'i. 'Et huwa uzdelhti. 'Et ndoh honeh.

Soode'a t'eh 'aw cha'duzoolhúti

¹⁷ Ndan ndi yun k'ut soo hude'a 'uhint'ah, 'en khunek 'ulhtus, 'i be hubudóni, 'aw ndi yun k'ut be soode'a 'i 'aw di cháilah. 'Et huwa 'aw 'i but'anínoohtan huba cha'hoot'ah. 'Et ndun Yak'usda khuna, 'aw 'en zeh but'anínoohtan. Yak'usda 'en 'ut'en 'aw hukw'edutsi' ilah hoh ts'iyaintsuk be soo 'ats'oot'e ka negha yunleh. ¹⁸ Ts'ah'un na'a 'uhooont'eh hubudoni. Hukw'edutsi' ilah hoh 'ut'en unzoo, 'i 'uhoolh'en. 'Ahoolhyez 'uyoon hiye ndunidzit, 'i be bula' hutet'ilh huba lha'húdoote. Soo ts'uhooont'i hoh lhta'ts'oolyelh. ¹⁹ 'Et nduhut'en t'eh, 'i be nduk yak'uz dézti, 'i dich'oh duba 'ilho'howesdle, whusaootelts'ulh wheni. 'Et 'ilhuz be ts'ukhuna, 'i hitélhchulh ho' hooont'ah.

Khunek be 'alha 'uhooont'ah, 'i soo cho bughondle

²⁰ Suye' Timothy ndi khunek ntl'ada'a, 'i soo cho buk'une' 'ont'en, 'et wheni 'usdla. Ndunnah dune 'ants'i howi yahalhtuk 'ink'ez Yak'usda ch'a yahalhtuk, khun buzih nioonya gunih. Ndunnah whuz na'a yahalhtuk, t'ehoninzun huninzun whunts'i, 'en nech'a detni hinli. ²¹ Ndi howi yahalhtuk ndi neba 'alha' hooont'ah, 'en bulunah, 'en tink'us hedulh ho' hutni. 'Et Yak'usda ye unzoo, 'i nyulh 'oot'e. 'Et ndoh honeh.

Paul Whulh Nat Dustl'us 'I Timothy Yuts'un K'e'anguz

Paul, 'en Timothy dahooja yulhni

¹ Si Paul, Sizi Gri ba whél'a usdli. Ndi 'ilhuz be ts'úkhuna, 'i Christ, Sizi ts'utni, 'en yit'i 'ink'ez 'ilhuz wheni 'int'ah nedáni. 'I bugha Yak'usda ndet suts'u hukwa' ninzun 'et huwa whél'a síli. ² Nyun Timothy suye' nk'esi' inli 'ink'ez ndi dustl'us nts'o t'l'ai'ai. Yak'usda ne'aBá 'ink'ez Christ, Sizi ts'utni, 'en neMoodihti, 'en bugha ye unzoo, be 'úgha te'nudzun, 'ink'ez be nedzi dezghel, 'i chah, 'i be 'ónt'e hukwa' nuszun.

Paul 'en Timothy yuba whunalnih nts'e na'a Sizi Gri ts'un nalhú'a

³ 'Et Yak'usda ts'un schanailya dusni. Sutsuhda hukw'u na'a, suyuh ts'ih bugha t'ets'oninzun, 'i, lubeshi bughu hoolah hoh Yak'usda buba ne'ust'en. Dzin 'ink'ez 'ulh'ek, 'i bulh, ndet tenadusdli totsuk 'aw 'et nyunalhúnih. ⁴ Nyunats'ultoo' nulh'en 'et whunalhúnih 'ink'ez 'o nus nyuntel'h hukwa' nuszun, 'et sih sudzi hót'i. ⁵ Ndi soo be 'alha 'uhoont'ah, 'i nyulh 'int'ah, 'i bunalhúnih. Ntsoo Lois, 'en 'udechoo ndi be 'alha 'uhoont'ah yulh 'int'ah inle, hukw'elh'az nyu'ama, Eunice, 'en chah. 'Ink'ez nyun chah 'et whuz na'a zeh 'unint'ah, 'et suba 'alha' hoont'ah. ⁶ 'Et huwa mba whunalhúnih ndet ntsi k'ut delhúnik hoh Yak'usda huwa yú'aih, 'i ntl'aída'ai. 'I ants'i bulh nughilnah li'ilh'en, 'et 'i be 'o nus ilhtus wule. ⁷ Soo cho whunaoolnih, Yak'usda, Ndoni neyida'ai hoh 'aw chats'unooljut. 'Ink'ez Ndoni bugha be ts'ilhtus be lhk'ets'udutsi', 'i ts'utet'i, 'ink'ez ne-eni be whunih ts'inli chah.

Khunek unzoo, 'i 'aw buka hooya onle gunih

⁸ 'Et huwa 'uyoon neMoodihti bugha hubulh yailhtuk t'eh, khun 'aw buka hooya onle gunih. Si chah tsak'esida 'et khun 'aw buka hooya onle gunih. 'Et 'uyoon khunek unzoo, 'i be hubulh yailhtuk dzuh ninzut t'eh, 'et Yak'usda ye ulhtus, 'i bugha 'int'en. ⁹ 'En 'uja nélyih. Nedzi lubeshi bughu whutélah, 'et whuz na'a neba hukwa' ninzun. 'Aw ne-e'ut'en k'ah bugha ilah neka' dani. Dich'oh ye unzoo, 'i bugha uzduzejih ka neka' dani, 'et whuz na'a hukwa' ninzun. 'Ink'ez ndi ye unzoo, 'i Christ, Sizi ts'utni, 'en but's'un hayélt's'ut hoh neghals'ut. 'Et 'udechoo whe' whudutét'ilh, 'et whutsuh da 'uhoonla. ¹⁰ 'Aw 'et Sizi Gri nenalhts'et hainya. 'Et whuz na'a Yak'usda ndet dich'oh hukwa' ninzun 'ink'ez ye unzoo, 'i chah, 'i yunenélhtan. Nuwheni be dázetsah 'i Sizi Gri neba hoolah yulhtsi 'ink'ez khunek unzoo, 'i be 'ilhuz be ts'úkhuna, 'i negha íni'ai. Ndi 'aw dáchats'utesa, 'et neba whusahó'ai, 'et hoh whunénelhtan. ¹¹ 'Et wheni si 'udun yun k'ut whut'en, 'en hubuts'u tesyalh. 'En hubutah húbulh yátelhtuk, 'ink'ez whubodutelh'eh, 'et whuba hubuts'u whel'a síli. ¹² 'Et huwa si chah dzuh nuszut, 'et whunts'ih 'aw hooya cha'usdlah. Ndun suba 'alha' int'ah, 'en t'enuszun 'et huwa. 'Ink'ez ndet butl'ahó'ai, dega nus dzin whuts'un soo 'ultus hoh suba hootetun, 'et suba 'alha' hoont'ah.

Ndi khunek unzoo, 'i soo cho ontun

¹³ Ndi khunek 'ulhtus, 'i bugha 'uts'ut'en, 'i li'int'ah si sts'un dánt's'o, 'i duts'o cho ontun. Ndi be 'alha 'uhoont'ah 'ink'ez be lhk'ets'udutsi', 'i Christ, Sizi ts'utni, 'en but's'un hayande 'et huwa. ¹⁴ Ndaí unzoo, 'i ntl'álya, 'i ts'iyawh Ndoni be ulhtus, 'i be soo cho ontun. 'En 'int'ah neyudínda. ¹⁵ Njan t'ooninzun ts'iyana Asia whut'en such'a nahulhúya. Phygellus 'ink'ez Hermogenes 'en chah. ¹⁶ Onesiphorus 'en lhat sudzi nduk yilh'i. 'Ink'ez ndi tse t'ool be whe dust'uk, 'i, 'aw yooya chailah hoh sunalh'en. 'Et huwa 'en bukoo húdelhts'i neMoodihti bugha te'nonzeh nt'úcha. ¹⁷ 'Et keyah Rome lhgha dínya hoh soo cho skunúta hoh nasilhti. ¹⁸ 'Et njan dzin whusawhútelts'ulh t'eh, 'et neMoodihti* ye únzoo, 'i unchah ndun Onesiphorus yulh 'int'ah, 'ink'ez neMoodihti yugha te'noozeh. 'Ink'ez keyah Ephesus ts'ih lhat hoh sula 'uja inle, 'et chah soo t'ooninzun.

2

Ndi Sizi Gri ye unzoo, 'i be soo 'iltus onle

¹ 'Et huwa suye' nyun Sizi Gri ye unzoo, 'i be soo 'iltus onle. ² 'Ink'ez lhanah nalh daja sugha nyudáni, ndi khunek whulh 'údants'o, 'i 'uyoon ts'ah'un dune, 'en butl'aída'ai, ndan Sizi Gri hit'anínintan, 'en soo ts'ah'un hoh 'o 'un 'uyoon hóbodolh'eh ka. ³ 'Et huwa Sizi Gri hiba llahudughan unzoo k'una'a, nyun chah whuz howu whúlna whunts'ih whechaínsaz. ⁴ Dune llahudughan unli t'eh, 'et nts'e na'a sooneya ka ndi yun k'ut uzdelhts'i, 'aw whuz 'udunolt'uk ghait'ah. 'En dumoodih ndun llahudughan huba ne'duni, 'en yulh hootét'i, 'et hukwa 'en zeh yuba 'ut'en. ⁵ 'Ink'ez chah, ndan nuwhújeh tah whuch'a 'ulhdeh, ts'ah'un

* 1:18 'Et ndi boozi "neMoodihti", 'i 'ilhunuh ne'aBa 'int'ah, 'ink'ez 'ilhunuh Sizi Gri 'int'ah, ni ho'utni.

na'a whuch'a nilhde t'eh, 'et zeh hiba k'elha whulhtsih. ⁶ Ndan dune tube 'ut'en hoh ha' nullhyeh, 'en ndi haínalhyi, 'en choo yulah wulhchoot huba' hoont'ah. ⁷ Ndet ndi nyudúsní howu nini ninzut. 'Ink'ez neMoodihti, 'en nla 'ut'en hoh ts'iyaintsuk t'eeononzeh. ⁸ Soo whunailnih, Sizi Gri yahadla hubutah dinadija. David yuts'u haínzut chah 'int'ah. 'Et whuz na'a ndi sughunek unzoo, 'i 'int'ah hoh nyudáni. ⁹ 'Et huwa si dune untsi' k'una'a tsak'esída hoh dzuh nuszut. 'Et whunts'ih Yak'usda bughunek 'i 'aw chailghel ho' 'int'ah. ¹⁰ 'Et huwa ndunnah 'utahálya, 'en huba hubugha whechástsaz. 'Et 'utahálya, 'en chah Christ, Sizi ts'utni, 'en ndi ye néulhyis, 'i hiyóolhchoot 'ink'ez 'ilhuz whuts'un ts'odólhí. ¹¹ Ndi khunek 'i soo cho but'aneznootan 'et ndutni,

"En bulh dats'uzsai t'eh,

'et 'ilhuz wheni bulh 'úztet'ilh.

¹² Nts'oh dawhut'en whunts'i whulh ts'úzyin t'eh,

'et 'en bulh dune k'une' ts'ul'en uztele.

Buch'a nats'ul'ah t'eh,

didut chah nech'a nátel'a.

¹³ Bulazdetnik t'eh,

'et whunts'ih 'aw didut nela dootnih ghait'ah,

'ink'ez 'aw 'ats'un na'a na'ootneh ghait'ah 'et huwa."

Sizi Gri ba ne'ut'en, 'en bulunah hínzoo 'ink'ez bulunah chah hintsi'

¹⁴ 'Et ndi khunek 'i huba bunailnih. NeMoodihti nalh hubuduténilh, 'et khun 'i khunek bugha hukwa lhena 'ahudootni gunih. Ts'iyawh huba chayízooh. 'Ants'i ndan yudánts'o 'en ts'iyawh tinta' hubutélh'ilh. ¹⁵ 'Et Yak'usda ba ts'ih'un dune onle, whuz na'a hukwa' 'int'en. Nye 'ut'en 'aw hukwa yachasonle. Ndi khunek 'alha' 'int'ah ts'ah'un na'a nt'eeononzeh. ¹⁶ 'Et whunts'ih 'ants'i nts'oh howi yahalhtuk 'ink'ez Yak'usda ghuhedloh, 'en hubuzih nioonya gunih. Nduhínt'ah, 'en 'uyoon 'o nus Yak'usda ch'a yahalhtuk hubuhutelhtsilh. ¹⁷ Hubughunek, dada k'una'a hubutaidoozit. Ndunnah Hymenaeus 'ink'ez Philetus chah, 'en nduhínt'ah hinli. ¹⁸ 'En njan nduhint'ah dune ndi khunek 'alha' 'int'ah tink'us 'uhint'ah 'et huwa hich'a súdel. 'En 'uhutni, ndi dinahudutéduh, 'uda 'uhooya hutni. 'Et huwa bulunah nebe 'alha' hoont'ah, 'i huba hoolah suli. ¹⁹ 'Et whunts'ih Yak'usda bukoo buk'uwuhuz'ai, 'i whuduts'o. 'Aw hoolah wúle ghait'ah. 'I k'ut ndi khunek yuk'e'ánguz, 'i ndutni, "Ndunnah neMoodihti bube'ildzun hinli, 'en ts'iyawh t'ebunínzun." 'Ink'ez chah, "Ndunnah 'uhutni, Christ ts'inli t'eh, 'en 'ut'en untsi', 'i ts'un nint'uk, 'et ndoohoont'ah, 'et ts'iyawh whuch'a náhooleyeh huba' hoont'ah." ²⁰ Nts'e bukoo whucho whubez ts'ih ts'iyaintsuk 'et sula. Be' ts'utnai, bé 'uts'u'alh, buluh 'i gold, 'ink'ez silver chah, 'i be 'ulya. Buluh 'i duchun 'ink'ez whutl'us be 'ulya, 'i chah 'et sula. Buluh 'i unzoo 'ink'ez buluh 'i 'aw chaízooh. ²¹ 'Et whuz na'a, ndan dich'oh lubeshi yuch'a nalhú'a t'eh, 'et t'eh duMoodihti ba 'udune'ududulti 'ink'ez buMoodihti ye' tet'ilh, 'ut'en unzoo, 'i ts'iyawh yeni lhadínt'ah ho' 'int'ah. ²² 'Ink'ez nts'e na'a chilkah ntsi' buyust'e buts'un nint'uk, 'i buch'a telgai. 'Et ts'ah'un 'uhoont'ah, be 'alha' uhoont'ah, be lhk'ets'udutsi', 'i be nedzi soo 'óot'e, 'i chah, ndi 'i ts'iyawh bunanyalh. 'Ink'ez ndunnah budzi yuh lubeshi bughu hoolah hoh neMoodihti ts'un tedudlih, 'en hubulh ín'us. ²³ 'Et whunts'ih whusnik khunek 'ink'ez khunek t'enusdzun, 'i whunts'i be yáhalhtuk, 'i ts'iyawh buch'a huwonle. T'eeonínzun ndi khunek ndunt'ah, 'i dune hiye lhá'dutnih 'utni, 'i 'int'ah. ²⁴ 'Et k'us ndan neMoodihti be 'ulhna, 'en 'aw dune yédooyih huba chahóot'ah, 'et whunts'i ts'iyanaah dune nagóosdliyah ne'boolh'en, 'ink'ez soo dune hodulh'eh tele. Ts'iyanaah soo nilyaz ne'bulh'en. ²⁵ Yuh 'údudildzun 'ink'ez buch'a detni ts'ah'un hubulh nenáhoho'alh. 'Et tulih Yak'usda lubeshi whuch'a dudeni nahundunezdla huboolhtsilh. 'Et sih khunek 'alha' 'int'ah t'ehinoozeh. ²⁶ 'Ink'ez 'et sih hubeni bugha nádoalts'it, 'ink'ez netsudule hubilhchoot inle hik'une' 'oot'en ka, 'et nts'oh teh hoh tink'us hunint'uk whuch'a nahooja.

3

'Et 'udek'elh'az dzin wheghah t'eh, tube whewhuntejut whutele ho' hoont'ah

¹ 'Et njan t'eeononzin, 'et 'udek'elh'az dzin wheghah t'eh, tube whewhuntejut whutele ho' hoont'ah. ² 'Et nilhdukw suli t'eh, dune dich'oh lhk'engahudutetsi', sooneya ka dahútni, ts'iyaintsuk hoh 'ahuduléhúti, tube lhóok'a' hinli, Yak'usda 'ink'ez budune, 'en buch'a yahatelhtuk, hube'ama 'ink'ez hube'abá chah k'únucha'hutest'en, 'aw chanailya chahunteszin, 'ink'ez Yak'usda ghuhedloh chah hutele. ³ Dudulh dune k'echahítsi', 'aw hoonli lhba whunachahodulhunah. Dudulh dune dzuh ne'huduni hukwa' huninzun teh zeh ne'hut'en. 'Ants'i 'et 'uyoon dzuh nuhulhdeh, 'ink'ez ndet hoonzoo hukwa cha'hunteszil. ⁴ 'Uyoon k'ehintsi' lahoohoolh'i 'ink'ez yooya 'i be dune hundulhda, 'inkez butsi dunuts'un. Duba na'hutedzoo, Yak'usda k'echahítsi', 'ink'ez ndet whunénik, 'et zeh hukwa' huntezilh. ⁵ 'Et

Yak'usda ba ndi yun k'ut hudélhts'i na'hududil'i, 'et whunts'ih Yak'usda yé ulhtus, 'i hits'oodedlai. Timothy, nduhínt'ah, 'en hubuch'a naóónja. ⁶ Ndunt'ah 'uyoon koo ts'ih dahánul'ih 'ink'ez ts'ekoo huwhusnik, lubeshi be dezibun, 'en 'ilhuz hubihilhchukw. Ndun-nah lhelhts'un 'ut'en dutsun, 'aw 'i zeh hits'u nint'uk. ⁷ Ahoolhyez hohodul'eh 'et whunts'ih khunek 'alha' int'ah daja ni 'aw t'ehonoozeh ghait'ah. ⁸ 'Et ndunnah Jannes 'ink'ez Jambres bulh Moses hich'a hoonelh'i inle. 'Et whuz na'a ndunnah khunek 'alha' int'ah, hich'a hoonelh'i. 'En hubeni soo dega nus untsi' suli. 'Ink'ez ndi be 'alha' uhoont'ah buga huba 'ants'i uhoont'ah suli. ⁹ 'Et whunts'ih 'aw 'o 'un hutooya ghait'ah. Hoh tinta' hunt'en ts'iyannah t'ewhuntezin. Nts'e na'a Jannes 'ink'ez Jambres hubulh dahooja, 'en buk'una'a hiye whusnik, 'i ts'iyannah hubugha t'ewhuntezilh.

K'us ndan Yak'usda yunéyalh, 'en 'aw dune hube túzelalh

¹⁰ 'Et whunts'ih huwa 'óonli hoh khunek bunyodalh'i, 'i buk'una'a 'ant'en. Timothy nyunch'oh njan t'ewhuninzun. Nts'e na'a dune usdli, nts'e hukwa 'ust'en, 'ink'ez Yak'usda suba 'alha' int'ah. Howa whúlna whulh síyin, 'ink'ez ts'iyannah be k'ési' i chah, 'aw hoonliyaz cha'duzusnih. ¹¹ Dune se'zula inle, 'ink'ez dzuh nusuhulhdzut. 'Et whuz yun k'ut Antioch, Iconium, 'ink'ez Lystra, whuz sulh 'et 'úhooja inle, 'i soo ts'iyawh t'eeonanzin. Dune se'zula 'aw whechástsaz, 'ink'ez neMoodihti ts'iyawh whuch'a sula 'uja. ¹² A, 'Alha' hooht'ah, k'us ndan Christ, Sizi ts'utni, 'en buga Yak'usda ba khutena hukwa 'ut'en, 'en dune hube híye' tuzela ho' hooht'ah. ¹³ 'Et dune hintsi', 'uyoon na'dudil'i, 'en 'o nus hintsi' tele 'ink'ez 'o 'un chah hintsi' hutele. 'Et 'uyoon nahunte'ah 'ink'ez dich'oh chah na'hunduntet'ah. ¹⁴ 'Et whunts'ih nyun ndet hoodal'i hoh 'i ts'iyawh 'alha' int'ah t'enínzun whuz na'a zeh 'int'ah. 'Ink'ez ndunnah buga hoodal'i, 'en t'ebuninzun. ¹⁵ 'Et nyun ski inli da whuts'un ndi Yak'usda bughunek lubeshi bughu hoolah hoh 'uk'e'éduguz, 'i nt'enanzin. 'I buga be whutnih int'i hoh dinjih. Christ, Sizi ts'utni, 'en mba 'alha' int'ah 'et huwa. ¹⁶ Yak'usda bughunek 'i ts'iyawh Yak'usda ye sjiz, 'i bulh 'int'ah. 'Ink'ez buga whúts'odul'eh huba unzoo, tinta' ts'ut'ih whunénuhlun, neba ts'ah'un niwhu'aih, 'ink'ez 'et whuneodulh'eh ts'ah'un na'a yinkak uzdóolts'i ka. ¹⁷ 'I be Yak'usda budune lhadúlya hutele, ts'iyaini 'ut'en unzoo, 'i wheni lhadúnt'ah.

4

Yak'usda bughunek bé hubulh yaíhtuk

¹ 'Et huwa Yak'usda 'ink'ez neMoodihti Sizi Gri 'en bunalh soo ts'ah'un na'a 'un yudutésnih, 'en 'utenilh ts'iyannah nalh be wheóoduteltsilh, ndai k'úne' yul'en, 'i bulh. Hoh t'eh hukhuna 'ink'ez yahadla chah, 'en huba nahuteyeh. ² Ahoolhyez lhadínt'ah Yak'usda bughunek be dune hubulh yaíhtuk. Wheóobunilhtun ndet hoh tinta' hut'ih, 'ink'ez tink'us 'uhut'en hukwa' budini, 'ink'ez budzi nduk na'inle. Howa whúlna whulh síyin, 'ink'ez dune hodílh'eh. ³ Whuz de whúdezulh hoh, ndi khunek ts'ah'un na'a 'int'ah, 'i 'aw hiyodool'eh hukwa cha'hunteszin. 'Et dich'oh hukwa' huninzun k'una'a, 'et zeh hodutets'o hukwa' huninzun. Ndunnah dich'oh hukwa' huninzun 'et zeh whuz na'a dune hodulh'eh, 'en zeh huhuhootuzélhts'ih hukwa' huntezilh. ⁴ Khunek 'alha' int'ah, 'i 'aw hidóots'o hukwa cha'hunteszil. 'Et huwa khunek 'ants'i unli, 'aw 'i zeh hika' ntezilh. ⁵ 'Et whunts'ih Timothy nyun ts'iyaintsuk whuch'a soo cho khinli. Ndi Yak'usda be 'ut'en k'ah bulah mba howa whulna 'et whunts'ih 'aw whecháintsaz zeh 'ilhdzun. 'Ink'ez Yak'usda bughunek be yaíhtuk hoh dune ilhyis, 'et zeh ndónt'en. 'Ink'ez Yak'usda be huba 'int'en, 'i ts'iyawh lhadónleh.

Paul datétsah da howu yaíhtuk

⁶ Si 'aw 'et be khusna, 'i Yak'usda ba huwa t'aih k'una'a nadusyulh li'usneh.* 'Ink'ez nduk tesyalh 'aw 'et nilhdukw suli. ⁷ Hoonzoo hoh ts'ah'un na'a lhesdughan. 'Aw 'et Yak'usda be 'ut'en k'ah 'uwuhul'en, ts'iyaintsuk lhaoodusdla. Ts'ah'un na'a be neba 'alha' hooht'ah, 'i óntun. ⁸ 'Aw 'et ndet ts'ah'un na'a 'uhoont'ah hoh whuch'a whunilhde, 'et suba sú'ai. NeMoodihti ts'ah'un na'haheyelh, 'en yutelhtsilh. Ndet dzin whusawhútelts'ulh, 'et dzin sugha íte'ah. 'Ink'ez 'aw si zeh ilah. Ndan dudzi ndulhcho, 'i be bunalh be hóoduteltsilh 'ink'ez yute'ilh hukwa' huninzun, 'en 'ilhunuh hinli hoh ts'iyawh si sk'una'a zeh 'úbutelilh.

Ts'iyannah sula detnik

⁹ A cho sts'u tónya. ¹⁰ Demas sula detnik. Ndi yun k'ut núkat, 'i 'o nus yuka' ninzun. 'Et huwa keyah Thessalonica whuz whinya. Crescens 'en yun k'ut Galatia ts'ih whinya 'ink'ez Titus 'en chah yun k'ut Dalmatia whuz whinya. ¹¹ Luke 'en zeh suzih usda. Mark 'en bukunainda 'ink'ez ndez nyulh tóo'as, 'en suba 'ut'en huba unzoo 'et huwa. ¹² 'Ink'ez

* 4:6 Ndaí mai too dezi, 'I kw'uzdai zih nahideyulh inle, 'i Lizwif hube 'ut'en 'int'ah. 'Ink'ez ndi nahideyulh, 'i Paul khuna lí'int'ah ni ho' 'utni.

Tychicus 'en keyah Ephesus ts'ih wheíl'h'a. ¹³Ndez tanyalh t'eh, sudzoot suba tolhchoos. 'I Carpus keyah Troas ts'ih 'en da buzih neiníl'hchooz. Nyoo khunek 'úk'e'éduguz, 'i chah to'a, 'ink'ez ndai ndi khunai zuz 'i buk'une'úsduguz, 'i bunaoodolnah gunih. 'I soo buka' nuszun.†
¹⁴Ndunah 'utes 'út'l'us be 'ut'en, Alexander hiyulhni, 'en tube lhat hoh sundálhda. Be 'ut'en k'ah huwa uncha neMoodihti yuba 'uk'elha holhtsilh. ¹⁵Nyun chah 'en bughonle. 'En dune ulhtus, 'i be neghunek buch'a 'et'ilh 'int'ah 'et huwa.

NeMoodihti 'aw neladootnih ghait'ah

¹⁶'Et 'udechoo soo whe suhuduníl'hkut da, 'aw 'ilhunuh whunts'i sut'ak níchaiyal. 'Et ts'iyannah sula hudetnik, 'et whunts'ih 'aw buk'ehoolts'it hukwa cha'núszun úncha. ¹⁷'Et whunts'ih neMoodihti suzih inyin 'ink'ez 'en ye ulhtus, 'i bughu ulhtus íle. 'Et ndi ulhtus, 'i be si sugha ndi Yak'usda be ba yatuk, 'i ts'iyawh ts'ah'un na'a hiyoozólhts'a. 'Et t'eh 'uyoon 'udun yun k'ut whut'en chah ts'iyawh hiyoozólhts'a. 'Ink'ez chah neMoodihti 'en khunaiti sutuzelghel, yuch'a sulhyih.‡ ¹⁸'Ink'ez yak'uz neMoodihti 'en hubudayi cho unli, 'et wheni sughunli, 'ink'ez buzih tesdahl whuts'un, 'ut'en untsi, 'i ts'iyawh yuch'a sutelhtelh. 'Et huwa 'en 'ilhuz wheni 'ink'ez 'o 'un chah 'uzdóolhti. 'Et ndoh honeh.

Khi whutsuh whusaóonya

¹⁹Ndunnah Prisca 'ink'ez Aquila, 'ink'ez Onesiphorus bukoo húdelhts'i chah, 'en ts'iyawh dahooja suba hubudóni. ²⁰Erastus 'en keyah Corinth 'et usda. Trophimus 'en nduda 'et huwa keyah Miletus ts'uwhútni, 'et ninílhti. ²¹'Et khi tele whuts'un, 'et soo 'unint'ah hoh sts'u tonya. Eubulus, 'en chah dahooja nyulhni, 'ink'ez Pudens, Linus, Claudia, ts'iyawh lhulhutsinkah, 'en chah dahooja nyuhútni.

Ye unzoo, 'i nyulh 'óot'e

²²NeMoodihti Sizi Gri 'en ndzi yuh wúda 'ink'ez ye unzoo, 'i nyulh 'óot'e. 'Et ndoh honeh.

† 4:13 Paul khuna hoh da, khunai zuz lhahidulh'ih lhts'enahiyut'as, 'i hik'une'uguz inle.

‡ 4:17 Ndi khunaiti sutuzelghel, 'et whuz na'a hubudayi cho Caesar, lhanah Sizi Gri yulh 'uhint'ah, 'en chah hubuhanghan inle, ni ho' 'utni.

Paul Ndi Dustl'us 'I Titus Yuts'un K'e'anguz

Paul 'en Titus dahooja yulhni

¹ Si Paul Yak'usda be 'ulhna 'ink'ez Sizi Gri ba whel'a usdli. Ndunnah Yak'usda buba 'alha' yint'ah, 'et wheni 'utahábanla. 'Ink'ez khunek 'alha' int'ah, t'ehontezin Yak'usda ba ndi yun k'ut uzdoolt'si ka. ² 'Ihuz be ts'ukhuna, 'i buka tsi hoodli, 'i Yak'usda 'aw chawhusts'it 'ink'ez soo 'udechoo da whuts'un 'i nets'u yoozi. ³ 'Aw 'et nts'oh huwa whudezuluh Yak'usda hukwa' ninzun, 'et whusawhélt'sut. Ndi Yak'usda be ba yatuk, 'i yubunilhtan. 'Et Yak'usda, neulhyis, ndi khunek 'i stl'aida'ai. ⁴ Titus ndi be neba 'alha' hoont'ah 'i bugha suye' sinli. 'I bugha nts'oh k'e'usges. Yak'usda 'ink'ez neMoodihti Sizi Gri, neulhyis, 'en bugha ye unzoo, 'i be negha te'nudzun, 'ink'ez be nedzi dezghel, 'i ts'iyawh nyulh 'oot'e.

Yak'usda ba 'utsuh whudéldzuhl, whuz na'a 'uhoot'e huba' hoont'ah

⁵ 'Et wheni Crete 'et ninyunilhti, ndai khunek ntl'ada'ai, 'i be ndet lhaoodint'ah ts'iyawh ts'ah'un na'a lhaoodutanlelh 'ink'ez lhelhdun keyah 'utsuh whudéldzuhl 'utahaoodutanlelh. ⁶ 'Et ndez na'a dune hoole huba' hoont'ah. Dune buk'éhot'alh bughu hoolah. 'Ihunuh zeh bu'at unli. Buzkeh chah hubuk'ah na'a 'uhoot'e, 'aw huwhusnik cha ílah, 'ink'ez khunek k'une' 'uhut'en hoole. ⁷ Dune huwunli unli t'eh, 'en Yak'usda be 'ut'en k'ah yutl'áwhulh'ai, 'et huwa buk'éhóotelts'ulh whu't' 'oot'e. 'Aw dich'oh duk'una'a hukwa' noozin huba cha'hóot'ah. 'Aw khun chahunhúch'e, mai too ka dáchasni. 'Et dune yédulh chaílah wule, 'ink'ez 'aw sooneya chah ka cha'dusnih. ⁸ 'Et k'us dune bukoo dalih wule. Ndet honzoo ts'iyawh hóont'i. Ts'ah'un ni nezulh, 'ink'ez ts'ah'un dune unli. 'Et budzi lubeshi bughu hoolah, 'ink'ez dich'oh ts'ah'un na'a khudli chah wule. ⁹ Ndi khunek 'i be Yak'usda neba 'alha' 'int'ah, nts'e na'a hiyoodel'i, 'i ts'iyawh hiyotun. 'Et sih ndi ts'ah'un na'a be whuts'odel'i, 'i be 'uyoon 'o nus budzi ulhtus hitelhtsilh. 'Ink'ez ndunnah ndi be whuts'odel'i, 'i yuch'a yahalhtuk, 'en ndi khunek 'i be tinta' hut'ih 'et whubuntelhtun.

'Utsuh whudéldzuhl hube 'ut'en

¹⁰ Tube lhanah ndi khunek hik'úne' tet'en hukwa cha'hunizun 'ink'ez 'ants'i lahóot'ah hoh ne'huduni. 'Ink'ez 'uyoon nahuna'a, hubutah Lizwif hinli, 'en degha nus hintsi'. ¹¹ Ndunt'ah yahalhtuk whuch'a bonteyulh. Ndut'en 'en tink'us na'a dune huhoodul'eh. 'I be 'uyoon dune bukoo húdelhts'i tinta' 'ubuhulh'ih. 'En tink'us na'a dune hubodalh'i, sooneya hininzun 'et huwa. ¹² 'Et Crete whut'en hubutah, 'ilhunuh dune nus whumíh'en 'en 'utni, "Crete whut'en 'ahoolhyez howhuts'it, khunai unt'si, 'i nduhult'ah, tsi'hudutnik cha'uhint'ah, 'ink'ez bucha hooncha cha'uhint'ah." ¹³ 'Et daja hubulhni, 'alha' 'utni. 'Et huwa tube cho hubugha 'utni. 'Et t'eh be neba 'alha' hoont'ah, 'i be 'o nus hilhtus wule. ¹⁴ 'Et huwa Lizwif be 'udada 'aw huba 'alha cha'yít'ah suli. 'Ink'ez ndunnah khunek 'alha' 'int'ah ch'a nahulhúya, 'en hubughunek uboozóhlts'a gunih. ¹⁵ 'Et ndunnah hubuyuh ts'ih chaooditsun, 'en ts'iyaintsuk huba me chailah. 'Et whunts'ih ndunnah hubudzi dutsun suli, 'ink'ez hube 'alha cha'hóot'ah, ts'iyai huba me yinli. 'En hubeni 'ink'ez hubuyuh ts'ih 'i bugha t'ets'oninzun, 'i ts'iyawh dutsun ho' int'ah. ¹⁶ Nduhínt'ah, "Yak'usda t'ets'uninzun," hutni, 'et whunts'ih hube 'ut'en be hich'a detni. 'En hubuts'u hoont'si hinli, 'ink'ez hedich'oh k'une' hutet'en 'et zeh hukwa' huninzun. 'Et huwa ndet 'ut'en unzoo, 'i 'uhutelh'ih, 'aw huba soo cha'hildzooch ho' hint'ah.

2

Yak'usda ba 'ilhunahuwúdluh hube 'ut'en k'ah

¹ 'Et whunts'ih Titus ndi ts'ah'un na'a be whuts'odul'eh, 'et nududóni. ² Ndunnah dune ye'un uzulh, tachanoosnai huba' hoont'ah, teni'hunoolhdzin, 'ink'ez ts'ah'un ni hunoodeh. Whuduts'o hoh huba 'alha' hot'e. Be lkh'ets'udutsi, 'i 'ink'ez 'aw tachahudinik, 'et whuz na'a 'uhoot'e. ³ Ts'ekoo ye'un uzulh, 'en chah whuz na'a 'uhoot'e. 'En teni' hinilhdzun hoole. 'Uyoon hoont'si k'una'a bughi yachahoolhtuk. Mai too 'i lhai hiyootnai hukwa cha'hunooszin. 'Ink'ez honzoo zeh 'uyoon huhoodoolh'eh. ⁴ 'Et t'eh t'etkeh hubukikah 'ink'ez hubuzkehkah chah buk'éhoot'si, whuz na'a hubugha hudooni. ⁵ Ts'ah'un ni hunedoh, Yak'usda ba 'udun nibuninla hutele. Bukoo chah ts'ah'un na'a howu hinli, budzi wúzo, 'ink'ez hubukikah hubuk'une' hoot'en. 'Et t'eh 'aw 'uyoon Yak'usda bughunek ch'a yahoolhtuk ghait'ah. ⁶ 'Et chilhkah hinli, 'en chah ts'ah'un ni hunedoh hoole. ⁷ 'Ink'ez Titus nyun chah ts'iyaintsuk hoh nye 'ut'en unzoo, 'i 'uholh'en, whuz na'a 'ont'e. 'Et ndi be whuts'odul'eh, 'i ts'iyawh 'aw chadootsun, dóolhti, 'ink'ez 'aw hoonliyaz hoh 'ats'un na'a 'oot'e gunih. ⁸ Khunek ts'ah'un ye yailhtuk, 'i buba nahooodeh ghait'ah, 'i 'et nch'a detni hooza wule. 'Aw khunek ntsi', 'i be nghu yaootuk ghait'ah. ⁹ K'us ndan 'ulhna

'en chah dumoodih buk'une' hoot'en budini. Nts'e na'a budzi wúzoó hoh zeh ne'hoot'en. 'Ink'ez 'aw hiyena cha'hoodoonih. ¹⁰ 'Aw bughu chá'hundunoost'ih. 'Et whunts'i dumoodih ts'un ts'ah'un na'a 'uhoot'e, hoonzoo k'una'a whéooobunelhtan, 'et whut'az 'uhoot'e. 'Et sih Yak'usda neulhyis bughunek be whuts'odul'eh, ts'iyaintsuk hoh 'o nus hoonzoo wule.

Yak'usda ye unzoo, 'i ts'iyannah nalhts'et haholts'it

¹¹ 'Et Yak'usda ye unzoo, 'i be uzdujih, 'i ts'iyannah nalhts'et haholts'it. ¹² 'Et whu-neoodulh'eh, ndet Yak'usda be 'ut'en chahoolah, 'ink'ez whenich'oh ndi yun k'ut hukwa' uzninzun, 'et ts'iyawh dah uzdooni. 'Et whunts'i ts'ah'un ni uznezulh, ts'ah'un dune ts'inli, 'i chah, 'ink'ez Yak'usda ts'un teni' uznilhdzun k'ah ts'ih ts'oot'e, k'an 'et whuz na'a zeh 'uts'oot'e. ¹³ 'Et neYak'usda dega nus uzdóolhti, Sizi Gri neulhyis, 'en 'int'ah buts'un hayánduz, 'i bulh 'et nenalhts'et haóotelts'ulh whuts'un, njan dega nus hoonzoo huba ts'ilh'i. ¹⁴ Sizi Gri nuwheni neba huwa' dudulti nelubeshi ch'a nenaootekulh ka. 'Ink'ez nuwheni dich'oh dune 'ut'en unzoo, 'i zeh 'uts'oolh'en huba' hoot'ah. ¹⁵ Titus ndúhoont'ah hubugha hubulh yailhtuk, huba nus whunilht'uk, 'ink'ez mba' hoot'ah, 'et huwa hoh tinta' hut'ih hukwa' budini. 'Aw 'ilhunuh dune whunts'i 'ants'i nyuhóolh'i gunih.

3

Ye unzoo, 'i be ndi yun k'ut 'uzdóolts'i

¹ 'Et ndunnah Crete whut'en 'en huba whunalnih ndunnah keyah huwunli 'ink'ez hubumoodih 'uhinli, 'en hubuk'une' whút'en. 'Ahoolehze 'ut'en unzoo, 'uhutelh'ilh wheni lhaádoot'e. ² 'Uyoon hoontsi' k'una'a bughu yahoolhtuk gunih, 'ink'ez 'aw lhena 'uhudootni gunih. 'Et whunts'i ts'iyannah nagoost'iyaz né'boohoolh'en 'ink'ez 'uyoon ts'un yuk 'uhududooldzin. ³ Nuwheni chah whuz na'a zeh ts'uwhusnik ínle. Khunek k'unuchats'ust'en. Naznut'ah. Lhelhdun ts'uhóont'i hoh hoontsi' tune'ts'ust'en. Ts'intsi' hoh ndi yun k'ut uzdálts'i, 'ink'ez 'uts'oolnih bulh chah 'uts'ant'e. 'Uyoon ts'uzdutnik 'ink'ez ts'iyawh lhuts'uzdutnik. ⁴ 'Et whunts'ih hoh da 'uja neYak'usda nesulhyis, 'en nets'un yé nek'entsi', 'ink'ez yé nets'un unzoo bulh, 'i ts'iyannah nalh be wheóodiltsai, 'et hoh 'uzdujih. ⁵ Ndet ts'ah'un na'a 'uts'ut'en ínle, 'aw 'et huwa ílah 'uzdujih. 'Et whunts'ih ye te'ninzun, 'i bugha, 'i be neulhyih. 'Et ndi toonáts'uzguz li'yinla hoh doo chah ts'uwhuzdli, 'ink'ez Ndoni be k'an 'et nats'usdli. ⁶ Whuz na'a Yak'usda nets'un bula hoonli hoh Ndoni nets'itell'a. Sizi Gri neulhyis, 'en be 'uja. ⁷ 'Et hoh ye unzoo, 'i bugha nelubeshi ts'iyawh neba hoolah yulhtsi. 'Ink'ez 'ilhuz whuts'un be ts'ukhuna, 'i be 'uts'int'ah. 'I bugha ndai ne'ildzun whutele, 'i hukwa tsi hoodli 'et huwa. ⁸ Ndi khunek 'alha' 'int'ah, 'ink'ez 'ahoolhyez 'et zeh ndudóoni nts'u hukwa' nuszun. Ndunnah Yak'usda huba 'alha' yint'ah, huwu hinli 'ut'en unzoo, 'i zeh 'ahoolhyez higha 'ooneh. Ndi khunek ts'iyannah huba unzoo 'ink'ez dune soo 'uhutet'ilh.

Lhenah 'uhudóoni gunih

⁹ 'Et whunts'ih Moses bughunek 'uk'une'úsduguz, 'i bugha, whusnik khunek, lhelhyoo whutsuh da hiye yailhtuk, 'ink'ez lhenah 'uhudutni chah, 'et ts'iyawh hubuch'a 'ont'e. 'Aw ts'iyannah ba chahoozoo 'ink'ez 'ants'i hoonli ho' hoot'ah. ¹⁰ Ndan dune lhch'a nilht'uk, 'en whulh nat dah dáni, 'ink'ez 'aw chanyudústs'o t'eh, tenaóolh'a. ¹¹ T'eeonínzun ndunt'ah dune 'en dudeni be tink'us úninzun 'ink'ez lubeshi 'ulh'en 'et zeh hoot'i. 'Et huwa 'i be dich'oh tinta' dudulti ho' 'int'ah.

Dek'elh'az khunek yé bubulh yánaltuk

¹² 'Et Artimas k'us Tychicus 'en 'ilhunuh nts'u téll'ah t'eh, 'et 'aho ndez tonya, njan keyah Nicopolis ts'uwhútni, 'et khi wheni njan tesdall lhaóodusdla 'et huwa. ¹³ 'Et (Zenas), 'en Moses be' dustl'us k'ut, daja ni hoh beni hoonli be yalhtuk unli, 'ink'ez Apollos, 'en khun nk'uhun'as t'eh, di hika' ninzun, 'i butl'a yónlelh, 'a cho hutoo'as. 'Ink'ez khun hoonli 'ehudunits'it hubuch'a yontun gunih. ¹⁴ 'Ink'ez nets'un detni, tehonoozeh 'ut'en unzoo, 'i zeh 'uhoolh'en. 'Uyoon hiye ndunidzit, 'i hiye búla' whét'en. 'Et t'eh ndi yun k'ut 'ants'i 'et chaduzoolhúts'i.

Ye unzoo, 'i nohwhulh 'óot'e

¹⁵ Ndunnah suzih húdelhts'i, 'en dahooja nyuhútni. Ndunnah huba 'alha' hoot'ah nek'entsi', 'en chah ts'iyawh neba dahooja hubudíni. 'Et ndi Yak'usda ye unzoo, 'i nuwheni ts'iyawh nohwhulh 'óot'e. 'Et ndoh honeh.

Paul 'en Ndi Dustl'us 'I Philemon Yuts'un K'e'anguz

Paul 'en Philemon dahooja yúlhni

¹ Si Paul 'ust'ah. 'Et Sizi Gri ba tsak'esída. 'Et Timothy nelhutsin, 'en chah sulh 'int'ah. Philemon nyun nts'un k'e'tesgus. Nelhutsin, buk'ets'intsi' inli 'ink'ez nelh 'ut'en inli. ² 'Et ndun Apphia 'en chah buk'ets'intsi'. 'Ink'ez Archippus 'en chah ne'aBá ba nelh nehughan unli. 'Ink'ez nkoo Yak'usda ba 'ilhunahuwúdulh, 'en ts'iyawh dahooja hubuts'utni. ³ Yak'usda ne'aBá 'ink'ez Sizi Gri neMoodihti, 'en ye unzoo, 'i 'ink'ez nuhwudzi dooghel, 'i nohwulh 'óot'e.

Sizi Gri mba 'alha' 'int'ah 'ink'ez buk'entsi'

⁴ SuYak'usda schanailya dusni. Tenadusdli totsuk nghu nuní nuszut. ⁵ Whulh 'údusts'o Sizi Gri mba 'alha' 'int'ah 'ink'ez buk'entsi'. 'Et dune Yak'usda bube'ildzun, 'en chah whuz na'a zeh hubuk'entsi'. ⁶ 'Et huwa be mba 'alha' hoont'ah, 'i be whútnih wule. 'Et Christ, Sizi ts'utni, 'en bugha 'ut'en unzoo, 'i bugha 'int'en, 'et t'oonoodzeh. ⁷ Sulhutsin nyun nga dune Yak'usda bube'ildzun hubudzi nduk ná'uja. 'Et huwa be nek'ets'intsi', 'i ínt'i, 'i bugha tube ts'uhóont'i 'ink'ez sóo k'unuznut'ah cha' ts'int'ah.

Paul 'en Onesimus yuba tedudlih

⁸ 'Et hoh Christ 'en be khunekti be nts'un hukwa' dusni hoh tune' ont'en. 'Et whuz na'a ts'ah'un na'a ne'ónt'en. ⁹ 'Et huwa be nek'ets'intsi', 'i bugha nts'un tedusdlih. Sunilh'en nts'e na'a dast'ah ye 'un uzulh usdli. 'Ink'ez k'an 'et Sizi Gri 'en ba tsak'edsída. ¹⁰ Suye' Onesimus 'en ba nts'u tedusdli. 'En 'int'ah nke da 'utis t'ool be sulhghel hoh buba 'alha' hoont'ah sulhsi. ¹¹ Whuts'un da nyun nts'un 'aw hoonli huba unzoo hoolah inle. K'an 'et nyun 'ink'ez si suba chah unzoo suli. ¹² k'an 'et 'en nts'un natélh'ah 'ink'ez naóolchoot. 'Et 'ants'i sich'oh sudzi ilhchoot li'tanilh. ¹³ Njan suzih tedalh hukwa' nuszun inle, njan khunek unzoo, 'i bugha sulhghel. 'Et da nyun nga sunat ne'óot'en wule da. ¹⁴ 'Et whunts'ih nyun, "A," chaduzinih t'eh zeh, 'aw hoonli 'uwhuteslilh hukwa cha'nuszun. 'Et whuz na'a nyunch'oh hoonínt'i t'eh zeh. ¹⁵ 'Et huwa tulih 'astl'iyaz nghu whinya inle. 'Et sih 'ilhuz wheni naóolchoot t'eh, 'ilhuz nzih wúda. ¹⁶ 'Aw'o 'un nye 'ulhna chatesdle. 'Et k'an 'et 'ulhna unli dega nus 'int'ah. Nelhutsin buk'ets'intsi' unli. Si tube suba dézti 'et whunts'ih dalcho 'i be suba nyun 'o nus mba dézti. 'Et náwhult'ah, ndi yun k'ut huba chah 'ink'ez neMoodihti ba chah.

Si sk'una'a nailchoot

¹⁷ Si nyulh 'úst'en suninzun t'eh, si nasilchoot hukw'u na'a naóolchoot. ¹⁸ 'Et ndun hoonliyaz hoh nts'un tinta' 'ant'en t'eh, k'us buts'un whuzilh'ai t'eh, si suba 'uk'une'onguz. ¹⁹ Si, Paul, sich'oh sula be nts'o k'e'usges. Si buk'elha hólhsilh. 'Et whunts'ih hoonliyaz mba whunatelhúnih, nyunch'oh be khina, 'i be whunts'i, 'i be ntse' 'ust'i li'hoont'ah. ²⁰ A, sulhutsin neMoodihti be nyun nga 'o nus hoonzoo nts'oh hukwa' nuszun. Nts'e na'a suyuh ts'ih ho' dusni, 'et neMoodihti be sudzi soo na'inleh. ²¹ Nts'ó k'e'usges, 'i buk'una'a 'utenilh suba 'alha' hoont'ah. Daja dusni, 'i be 'o nus 'utant'ilh nuszun. ²² 'Et whunts'ih nts'e tesdali suba lhaóodonleh. Ntenadudli bugha 'et ndoh honeh. 'Ink'ez nts'un sula nahudootnih.

Ye unzoo, 'i nyulh 'óot'e

²³ Epaphras ndun Sizi Gri bugha sulh tsak'esda, 'en chah dahooja nyulhni. ²⁴ Mark, Aristarchus, Demas, 'ink'ez Luke 'en chah, sulh 'uhut'en, 'en ts'iyawh dahooja nyuhútni. ²⁵ NeMoodihti Sizi Gri 'en ye unzoo, 'i nyégha bulh 'óot'e. 'Et ndoh honeh.

Hebrew Bughunek K'eyahalhtuk Hubuts'un K'e'éduguz

K'an 'et degaha nus dzin hoh Yak'usda buYe' 'en be newhulh yalhtuk

¹ Hoh da lhat 'ink'ez ihelhts'un na'a, niz haóodanzut, Yak'usda ba nus whunilh'en, 'en hubugha netsuhda hezulh, 'en Yak'usda hubulh yailhtuk. ² 'Aw 'et njan dek'elh'az dzin hoh Yak'usda buYe' 'en be nelh yailhtuk. 'En zeh 'uja be'aBá ndai yit'i, 'i ts'iyawh bube'ildzun tele, 'et whuz na'a be'aBá yutl'ahó'ai. BuYe' 'en be 'uja ts'iyaintsuk 'uhóonla. ³ 'En zeh 'int'ah be'aBá ye dézti, 'i newhunelhtan. 'Ink'ez be'aBá dant'ah, 'et buYe' 'en soo ts'ah'un yundult'ah. Ndai 'uhóonla, bughunek ulhtus, 'i be yalhtuk, 'i be ndulhcho hootun. 'En dich'oh 'uja, nelubeshi 'i ts'iyawh neba yuna'dalhde. 'Et hukw'elh'az yak'uz ts'ih ndun degaha nus ncha, 'en nalhnih ts'ih yughu nát'adeda. ⁴ 'Et huwa ndunnah lizas huba 'o nus ncha 'int'ah. Ndi boozi bugha ídelt'sut, 'i lizas buboozi ba 'o nus dézti ho' 'int'ah. 'Et nduhóolcho hoh bugha ndoh 'int'ah.

Yak'usda buYe' 'en lizas hubugha ndoh 'int'ah

⁵ Ndez na'a njan ndúhoont'ah, Yak'usda 'aw 'ilhunuh lizas 'et nduchaoobudínli, "Nyun suYe' 'unint'ah.

'Et huwa k'an 'et dzin suYe' sinli, whuz na'a nyoozízi." 'Ink'ez njan chah Yak'usda 'utni, "En ba 'aBá tesdle

'ink'ez si suba 'uYe' tele."

⁶ 'Ink'ez 'udechoo whuzdli, Yak'usda doo chah ndi yun k'ut nítelhtelh hoh 'et ndutni, "Yak'usda bulizas,

'en ts'iyawh hits'u teni' noolhdzin."

⁷ 'Et dulizas bughu yalhtuk hoh njan ndutni,

"Bulizas nilhts'i k'una'a 'obinla.

'En hiba 'uhut'en 'uhint'ah 'ink'ez kwun nudúnat, 'i k'una'a hubulhtsi."

⁸ 'Et whunts'ih buYe' yughu yalhtuk hoh ndez na'a 'et ndutni,

"O Yak'usda nts'e hoh hubudayi cho inli, 'et 'i 'ilhuz wheni 'int'ah.

'Ink'ez ts'ah'un na'a k'une' whutel'en.

⁹ Ts'ah'un 'uhoont'ah zeh hukw'entsi'.

'Uk'únucha'ust'en, 'i but's'u díntnik.

'Et huwa O Yak'usda, nYak'usda ndi khe,

'i dune be ba ts'odelhti,

'i bugha budzi hoont'i,

'i nyulh dune ba nus lhai be nyúlhlho."

¹⁰ 'Ink'ez 'udun chah bughunek 'i 'uk'e'edúguz hoh 'et ndutni,

"Moodihti nyun 'udechoo whe'whudit'en 'et whunts'un, ndi yun inla.

Nyula be yaz chah 'uhóonla.

¹¹ 'I ts'iyawh hoolah whutéleh, 'et whunts'ih nyun 'ilhuz wheni 'int'ah.

Ndai inla, 'i 'ants'i naih jut 'ulh'ih teh whuz na'a 'uwwhutenilh.

¹² 'Ink'ez nahiyits'uz, 'i k'una'a lhenántetelh,

'ink'ez 'uyoo natedle.

'Et whunts'ih nyun whuz na'a zeh 'et ndint'ah.

Nye naooduzuk 'et 'aw whulátahchahóolah," Yak'usda 'et ndi yúlhni.

¹³ 'Et whunts'ih Yak'usda bulizas 'aw 'ilhunuh whunts'i njan nduchaoobudínli,

"Nch'a hudetni ts'iyawh nke hubuk'ut natelyis mba hubutelhtsilh.

'Et whunts'un 'et duhóoja t'eh,

nalhnih ts'ih suziha tanda."

¹⁴ 'Et ndez na'a njan dúhoont'ah, ndunnah lizas, 'en nudúdeh 'ink'ez be ne'úst'en 'uhint'ah. Yak'usda whébalh'a 'et t'eh ndunnah ndi bé uzdujih, 'i nuhts'ite'alh, 'et huba neba ne'hut'en 'uhint'ah.

2

Ndi 'ilhuz be ts'ukhutena, 'i bulazdootnih gunih

¹ 'Et huwa Yak'usda bughunek ndet whulh úzdants'o, 'et soo ts'ah'un na'a ts'uhotun 'ink'ez nedzi yuh nits'ú ho'alh. 'Et nduchats'inil t'eh, 'et sih bulazdootni. ² 'Et hoh da ndai khunek lizas, 'en be Yak'usda ba yahálhtuk, 'i khunek ts'iyawh 'ilhuz wheni 'utni. 'Ink'ez ndunnah ndi khunek hidutét's'o hukwa cha'nizun 'ink'ez k'uhiyeyus, 'en hootsi' k'una'a huba k'elha whuzdli. ³ 'Ink'ez ndi whe uzdujih, 'et hooncha ho' hoont'ah. 'Et ts'iyawh neba 'ants'i 'uhoont'ah t'eh, 'et t'eh 'en buk'una'a neba k'elha whutele. Nemoodihti ndi yun k'ut

nuséya, 'et whuts'un ndi whe uzdujih howu yalhtuk, 'ink'ez ndunnah ndan hidants'o, 'en ndi khunek ts'iyawh whunehunelhtan 'et ts'ah'un 'uhoont'ah. ⁴ 'En lhat hoolhtus huwa 'ét'en tune' hust'en, 'ink'ez nts'e na'a Ndoni hukwa' ninzun k'una'a hubut'l'a hó'ai, whuz na'a ndunnah 'i be neyulh yahalhtuk, 'en Yak'usda hubulh 'ut'en hoh whunéhunelhtan daja nehudáni 'et ts'ah'un 'uhoont'ah.

Yak'usda buYe' 'en lizas 'astl'iyaz degha nyoh 'ant'e

⁵ 'Et njan howu yats'ulhtuk ndi k'an 'et, 'i yun 'i buk'uzdutélhts'i huwa, neba whuz de whélt's'ulh, 'et Yak'usda 'aw lizas dune k'une' hool'en 'uhoont'e chaoobudáni. ⁶ 'Et whunts'ih 'udun chah 'uk'e'éduguz hoh 'et ndutni, "Dune di hinli ho' hint'ah?"

Yak'usda di ka bughu nuní ninzut?

K'us dune ye' di ka bughu ni tanle?

⁷ 'Astl'iyaz huba lizas degha nyoh 'int'ah silhtsi inle.

Degha nus ncha silhtsi 'ink'ez hoh dezti,

'et hubut'l'ahó'ai.

Ndai nyula be 'inla,

'i ts'iyawh huwandoh 'int'ah bugha ooní'ai.

⁸ Ts'iyaintsuk buke yah ninínla yuMoodihti wule ka." 'Ink'ez ndi buke yah nenínla, 'i 'aw hoonliyaz be'et cha'inel. 'Et whunts'ih t'ets'oninzun 'awhuz ts'iyaintsuk buke yah nicháskat.

⁹ 'Et whunts'ih ndun 'astl'iyaz huba lizas hubugha nyoh 'int'ah yulhtsi, 'en uznilh'en. Sizi 'en 'int'ah. Dzuh nusuzut hoh dazsai, 'et huwa degha nus ncha yulhtsi 'ink'ez hoh dezti, 'et chah yut'l'ahó'ai. 'Et whuz na'a Yak'usda ye unzoo, 'i be ts'iyana'ba dazsai.

Yak'usda buYe' 'en bugha lhanah Yak'usda ba 'uduni' dudulya huzdli

¹⁰ 'Et be'aBá 'en bugha ts'iyaintsuk 'uhoont'ah, 'ink'ez ts'iyaintsuk buts'un hahonkat. Lhanah hubuzkeh, 'en Sizi whudézi, 'et hubut'l'a óote'alh hukwa' ninzun. Sizi 'en whez-dutejih 'et neba netsuh nusiya 'int'ah. 'Et huwa Yak'usda 'en buba ts'ah'un 'uhoont'ah hoh Sizi dzuh nusuzut, 'et 'i bugha ts'ah'un 'ulya sulí yulhtsi. ¹¹ 'Et ndun Yak'usda buba 'uduni' dudulti, 'ink'ez ndunnah Yak'usda ba 'uduni' dudulya chah nuwhe'ni ts'iyawh lhulhugha zeh 'uts'int'ah. 'Et Sizi 'aw hukwaya chailah hoh sullhutsinkah nélni. ¹² 'Et whuz na'a be'aBá ndi yúlni hoh njan ndutni,

"Nyoozi 'uwuhluni,

'i bugha sullhutsinkah hubudutésnilh.

Yak'usda buba 'ilhunahuwúdulh hubutah,

mba whudutélti hoh mba tesjun."

¹³ 'Ink'ez doo chah ndez na'a njan ndutni, "Si, but'aníuntestan."

'Ink'ez doo chah zeh ndez na'a chah ndutni,

"Njan si 'ust'ah.

Ndunnah 'uskehkah Yak'usda sugha óobuninla,

'en chah ts'iyawh sulh 'úhint'ah."

¹⁴ 'Et nuwhe'ni yinkak dune ts'inli neyust'e 'i 'uskai bulh 'úlya. 'Et huwa Sizi Gri buyust'e nuwhe'ni nek'una'a 'int'ah. 'Et hoh lhdulalhgs k'ut neba dazsai, 'i be ndun yé datetsah, ye ulhtus, 'i yít'i, 'en yuch'a' nilhde, 'en netsudule 'int'ah. ¹⁵ Ndunnah ndi yun k'ut hukhuna, 'en dzin totsuk dahútetsah whe húnuljut, 'et huwa netsudule dude 'ulhna ubulhtsi, 'en ts'iyawh Sizi Gri lhdulalhgs k'ut huba dazsai, 'et 'en bugha whuch'a neba whuladetnik. ¹⁶ 'Ink'ez 'aw Sizi Gri lizas hubula' tet'ilh huwa ilah whusainya, 'et k'us Abraham ts'u haínde, 'en hubula' tet'ilh, 'et huwa whusainya. ¹⁷ 'Et huwa dudulhutsinkah k'una'a ts'iyaintsuk whuz na'a dune k'una'a 'oolneh huba' hoont'ah. 'En huba náwhulnuk degha nus dezti tele, 'et hoh Yak'usda ba hubugha te'ninzun 'ink'ez 'aw hubula dootnih ghait'ah. 'Et whuz na'a Yak'usda huba ne'ut'en. 'Et huba dazsai huwa lubeshi 'ulh'en Yak'usda huba 'un whutoolhdelh, 'et t'eh soo cho hubuka naíet'ilh. ¹⁸ 'Et neMoodihti Sizi Gri, lhat hoh 'óolhdzai, 'et huwa dzuh nusuzut. 'Et huwa ndunnah óolhdzai, 'en nts'e na'a hubula' tet'ilh t'ewhuninzun.

3

Christ, 'uYe' k'una'a hoh be'aBá bukoo huwole

¹ 'Et huwa sullhutsinkah, nuwhe'ni Yak'usda bube'ildzun ahli, 'et yak'uz ts'un ndi khunek ts'un whúlni soo ts'ah'un hukw'u na'a ndi yun k'ut doolhúts'i ka, 'et nuwhe'ni cha hubugha whutelhchulh. 'Et huwa nuwhe'ni ts'iyawh Christ, Sizi ts'utni, 'en zeh bughunek ghéhtan 'ink'ez 'en k'una'a 'ooht'e. 'En whel'a 'int'ah, 'ink'ez be neba 'alha 'uhoont'ah, 'et huba neba náwhulnuk degha nus dezti unli. ² 'Et whuz na'a Yak'usda 'utaháyalhti. 'Et huwa

nts'e na'a yuts'u hukwa 'utni, 'et ts'iyawh lhaóodinla. Nts'e na'a Yak'usda Moses bukoo datet'ilh 'et yuts'u hukwa' ninzun, ts'iyawh lhaóodinla. Sizi Gri 'en chah Moses k'una'a 'int'ah. ³ Nts'e na'a 'uhoont'ah ndan bukoo 'uwuhulh'en, 'en koo huwa nus dezti 'int'ah, 'et whuz na'a Sizi Gri Moses degha nus dezti 'int'ah. ⁴ 'Et koo totsuk lhelhyoo 'uhóonla, 'et whunts'ih Yak'usda 'en zeh ts'yaintsuk 'uhóonla. ⁵ 'Ink'ez Yak'usda bukoo ts'ih Moses 'en huba ne 'úst'en unli, 'ink'ez Moses ts'iyawh lhaóodinla. 'Et whuz na'a 'en bugha ts'yaintsuk lhaóodutetneh, 'et t'eh nts'e na'a Moses dat'en inle, whunenulhtun Yak'usda dawhútenilh t'ets'ontezeh. ⁶ 'Et whunts'ih Christ, 'uYe' k'una'a hoh be'abÁ bukoo huwole. 'Et ndai buka tsi ts'úhooli, 'i nedzi nduk soo cho 'uts'udóolhti, 'ink'ez but'aníuznootan, 'ink'ez degha nus dzin whunts'un soo cho ts'oontun t'eh, 'et sih bukoo whut'its'inli hoh 'uts'int'ah.

Nuwheni chah whulachats'udoosnih ts'oole

⁷ 'Et huwa Ndoni 'alha 'utni hoh ndez na'a njan ndutni,

"K'an 'et dzin Yak'usda bughunek dahts'o t'eh,

⁸ khun nuhdzi doolhts'un gunih!

'Et whuz na'a 'uhóoja hoh da ndunnah sch'a detni,

'aw skacha'hunízun.

'Et huwa ndi dzin dune Yak'usda 'en hiyóolhdzai, 'i hiyúlhni.

'Et nts'e dune chahóot'ih,

'et whuz na'a 'uhóoja.

Khun nuhdzi 'aw 'en buk'ah ts'ih 'oohleh gunih!

⁹ 'Et whuz na'a nuhtsuhda suhóolhdzai inle.

Dit lanezi (40) naooduzuk, 'et ndúwhulyez hoh se' 'ut'en k'ah honilh'en.

¹⁰ 'Et huwa ndunnah, 'en hubulh hunlhuch'e,

'ink'ez njan dudúzni,

'ahoolhyez hubudzi yuh tinta' huwhulh'ih 'ink'ez se' 'ut'en k'ah 'aw t'ehonízun.

¹¹ 'Et huwa hubulh hunlhuch'e hoh but'su nahuzíya 'et njan dudúzni,

"Ndet dune nalyis huba 'aw dahóodelh ghait'ah," ni.

¹² Sulhutsinkah nuhwhenich'oh soo cho huwahli! Nuwheni nuhtah bulunah tulih nuhdzi tink'us 'int'ah 'et 'aw nuhwhuba 'alha' cha'hóot'ah. 'Et huwa Yak'usda ndun 'ilhuz wheni 'int'ah, doo ka sih 'en buch'a naoolhú'ah. ¹³ 'Et whunts'ih dzin totsuk, 'awhuz khahna da, 'et ts'iyawh lhba nus whunoolht'uk hoh lhula 'oohdut'en. Doo ka sih lubeshi be naniht'a t'eh, nuhdzi duts'un wule. ¹⁴ 'Et 'udechoo whunts'un Christ buk'úne' ts'ut'en, 'et whulatah whuts'un whulh ts'uzyin t'eh, 'et sih Christ be 'ut'en k'ah 'i chah nuwheni be ne'ut'en ts'uzldi. ¹⁵ 'Et whuz na'a 'uk'une'úgzuz hoh 'et ndutni,

"K'an 'et dzin Yak'usda bughunek dahts'o t'eh,

khun nuhdzi doolhts'un gunih!

Ndunnah Yak'usda ch'a yahalhtuk 'aw 'en buk'una'a 'ooht'en gunih."

Dune chahoot'i ts'ih húdelhts'i, huba 'alha cha'hóot'ah, 'et huwa ndet Yak'usda but'su hoozi, 'aw dahóoya ghait'ah

¹⁶ 'Et bulunah ndunnah Yak'usda bughunek dánt'so 'ink'ez 'et whunts'ih hich'a detni. Moses yun k'ut Egypt ts'ih hanaóobanla, 'en 'uhint'ah, 'et whunts'ih 'aw ts'iyahan whuz na'a nducháhusht'en. ¹⁷ Ndunnah nduhut'en, 'en dit lanezi (40) naooduzuk nduhóolhyez hoh Yak'usda hubulh whúske? Ndunnah 'en dune chahóot'ih ts'ih lubeshi hílchhoot, 'et huwa whuz yahadla. ¹⁸ 'En 'uhint'ah Yak'usda bughunek hik'unucha'it'il, 'et huwa ndez na'a Yak'usda but'su hoozi, ndet hoh Yak'usda nalyis, 'aw dahóoya ghait'ah. ¹⁹ 'Et huwa ndez na'a whuts'odul'eh, ndunnah ndan huba 'alha cha'hóot'ah, 'et huwa ndet Yak'usda but'su hoozi, 'aw dahóoya ghait'ah.

4

Yak'usda yunéyah 'en 'et nahutelyis 'et huba whuz'ai

¹ Nuwheni njan Yak'usda nalyis nets'u hoozi, nuwheni nuhtah 'aw tulih chawhulhchulh. 'Et huwa nuwheni ts'iyawh whéznooljut huba' hoot'ah. ² 'Et 'alha 'en buk'una'a nuwheni chah ndi khunek unzoo, 'i be nelh yaintuk. 'Et whunts'ih ndi khunek be nelh yaintuk, 'i 'aw chahidits'il, 'aw huba 'alha cha'hóonil' et huwa. 'Aw bubeni tachaoodikulh. 'Et huwa 'aw bula cha'whudínil. ³ 'Et nuwheni ndunnah huba 'alha 'uhoont'ah, nuwheni njan Yak'usda nalyis nets'u hoozi negha whútelts'ulh. 'Et whunts'ih ndunnah huba 'alha cha'hoot'ah, 'en ndez na'a 'et Yak'usda ndo búlhni,

"Hubulh hunlhuch'e hoh hubuts'u nahuzíya,

ndet nalhúyis, 'aw dahóodelh ghait'ah." 'Et whunts'ih nts'e 'udechoo whe'whudit'en ndi yun 'ulya da, hoh da 'et dude 'ut'en lhaídinla.

4 'Et 'ilhun Yak'usda bughunek 'uk'une'usduguz, 'et skwunlai 'o 'at whulh natdzin (7) whunedalh'i hoh ndez na'a njan ndutni, "Yak'usda ts'iyawh dude 'ut'en lhaidinla 'ink'ez skwunlai 'o 'at whulh nat dzin (7) 'et nalyiz." 5 'Ink'ez ndi dustl'us 'et whuz na'a ndutni, "Nts'e na'a but's'u nahuzi'ya dune nahutelyis, 'aw dahóoya ghait'ah." 6 Ndunnah ndi khunek unzoo, 'i 'udechoo yudánt's'o, 'en 'aw hoh da hik'únucha't'il. 'Et huwa ndet nalyis, 'et 'aw dachahiyal. 'Et whunts'ih bulunah, 'en 'awhuz hubugha whútelts'ulh ho' hoot'ah. 7 'Et huwa Yak'usda 'et 'ilhut dzin 'uhoont'ah neba 'udun nióoni'ai. "K'an 'et dzin whudezulh," 'et 'uhoont'ah. 'Et sa hukw'elh'az 'et Yak'usda David be yailhtuk hoh njan ndutni, "K'an dzin 'et bughunek daht's'o t'eh,

khun teh nuhdzi doolht's'un gunih!"

8 'Et ndun Joshua hiyúlhni, 'en Moses k'edanya, 'en Israel ts'un hainzut Yak'usda nalyis, 'et hubugha óote'alh t'eh, 'et Yak'usda hukw'elh'az 'udun dzin whudézi 'aw doo chah 'o 'un howu yaoolhtuk ghait'ah. 9 'Et huwa t'ets'oninzun Yak'usda 'awhuz nahutelyis, 'et huba whuz'ai. 10 Ndez na'a njan dúhoont'ah, ndan Yak'usda nalyis bugha whults'ut, nts'e na'a Yak'usda be 'ut'en lhaidinla, 'en chah whuz na'a zeh be 'ut'en lhadinla.

'Et Yak'usda bughunek khuna ho' 'int'ah, 'ink'ez hoolhtus túne' 'ut'en

11 'Et huwa Yak'usda budune nahulyis, nedzi ndulhcho 'i be whuz na'a zeh ts'uhólhchoot. 'Et 'aw ndúchats'ust'en t'eh, 'et t'eh ndunnah 'uk'unucha'ust'en whuz na'a nuwhehi chah 'en buk'una'a zeh tinta' ts'ote'alh ho' hoot'ah. 12 'Et Yak'usda bughunek khuna ho' 'int'ah 'ink'ez hoolhtus túne' 'ut'en. 'I ndi 'utes cho lhch'az buk'a hoonli, 'i whunts'i 'on nus huba nus khundenyin ho' 'int'ah. Ndez na'a njan dúhoont'ah, 'utes cho nets'un lhghu nunádez'a 'ink'ez neghe 'i ndi chazet'us, 'et whuz na'a Yak'usda bughunek nezul 'ink'ez neyégha lhk'éiteleh. Nedzi yuh hoh daja uzinzun 'ink'ez nts'e na'a dázte't'ilh hukwa' ts'ut'en, 'et ts'iyawh whunenulhtun. 13 'Ink'ez ndai ndi yun k'ut 'uts'ulh'en, 'i 'aw 'ilhuk'i Yak'usda buch'a ntest'i, 'i hoolah. Ts'iyaintsuk whunilh'en, 'ink'ez 'i k'una'a ts'et' niooninkat li'int'ah. Yak'usda 'en dats'ét'en, 'et ts'iyawh nduzduténih ho' hoot'ah.

Nenáwhulnuk degha nus dezti negha te'ninzun

14 'Et huwa 'ilhunuh náwhulnuk degha nus dezti neba 'int'ah. 'En 'uja yaz nduhoolcho whutuh lhuséya. Sizi, Yak'usda buYe' 'en 'int'ah. 'Et huwa ndet neba 'alha 'uhoont'ah, ts'iyawh duts'o cho ts'uhotun. 15 Nenáwhulnuk degha nus dezti, 'en ndunt'ah ho' 'int'ah. Nda'i be laits'it'ah 'i bulh 'ilho negha te'ninzun dats'int'ah t'eeoninzun. 'En lubeshi bu'et 'int'ah, 'et whunts'ih 'en chah nuwhehi nek'una'a ts'iyaintsuk tink'us óoneh hukwa 'óoldzih inle. 16 'Et huwa Yak'usda buk'usúda cho dézti, 'i whuz de ye únzoo, 'i negha yú'aih. 'Et huwa 'aw whechats'uniljút hoh whuz uztooya. 'Et whuz de negha te'ninzun, 'ink'ez whé nets'un unzoo, 'et nduwulhcho hoh ts'otélhchulh. 'Et whuz na'a 'en ba ndi yun k'ut uzdelht's'i, ndet nela 'ewhuduténilh 'et negha óotelts'ulh.

5

Nawhulnuk degha nus dézti dant'ah tele

1 'Et ts'iyana' náwhulnuk degha nus dezti hubulh dedowh hubutahayálhti, Yak'usda but huba nitéyalh ka. 'Et huwa 'uyoon hubulubeshi bugha 'et huba Yak'usda buk'uzdai k'ut huwa t'aih hidutélhk'un 'ink'ez ndai Yak'usda higha hiya'aih huba Yak'usda buk'uzdai ts'un wheyúlih. 2 Ndan Yak'usda yuk'una'a t'echahonízun 'ink'ez tink'us 'ahét'ilh, 'en bugha nagostl'iyaz ne'bulh'en, dich'oh chah lhat hoh lait'ah 'et huwa. 3 'Et huwa nts'e na'a 'onghoh hubulubeshi k'elha huwa ite'alh, whuz huba wheyú'aih, 'et whuz na'a 'en whunts'i dich'oh dulubeshi ba huwa ite'alh, 'i chah whuz wheyá'aih. Whuz na'a ndóte'en huba' hoot'ah. 4 'Et nts'e na'a náwhulnuk degha nus dezti hulh'ih, 'aw dune dich'oh 'et nduhóoneh ghait'ah. 'Et whunts'ih nts'e na'a Yak'usda Aaron 'ut'ahayalhti, 'en k'una'a zeh 'uyoon náwhulnuk degha nus dezti 'utahaóoltelh huba' hoot'ah.

Christ 'en 'ilhuz wheni náwhulnuk degha nus dezti 'int'ah

5 'Et whuz na'a zeh Christ, 'en chah 'aw náwhulnuk degha nus dezti 'ududooltsilh ghait'ah. 'Et whunts'ih ndun yadáni, 'en 'et ndi yúlhni, "Nyun SuYe' 'unint'ah.

K'an dzin whuz na'a SuYe' nyuzílhsi."

6 'Ink'ez 'udun chah 'uk'e'éduguz hoh ndutni, "Ndun Melchizedek, nts'e na'a náwhulnuk 'int'ah,

nyun chah 'en k'una'a 'ilhuz wheni náwhulnuk inli."

7 Hoh da Sizi Gri ndi yun k'ut nuseya, 'et be'aBá 'en ye ulhtus, 'i yít'i, 'et hukwa' ninzun t'eh datétsah whuch'a yutelhyih, ndez na'a Sizi Gri yuts'u tenadédli. Tube budzi tel'en 'ink'ez bunatsul too hoonli hoh Yak'usda yuts'u téduhlh yula 'ooneh ka. Be'aBá yudélhti,

'et huwa yudánts'o daja ni 'et. ⁸ BuYe' yinli 'et whunts'ih ndet dzuh nusúzut, 'et hoh yuk'úne' 'út'en hodel'i. ⁹ 'Et huwa 'uja ts'ah'un 'ulya suli. 'Et huwa ndunnah hi'úne' 'ut'en, 'en 'ilhuz wheni hudujih, 'et hubugha óoni'ai. ¹⁰ 'Et whuz na'a Yak'usda ndi boozi yugha idé'ai hoh ndi dáni, "Ndun Melchizedek nts'e na'a náwhulnuk degha nus dezti 'int'ah, nyun chah 'en k'una'a 'ilhuz wheni náwhulnuk degha nus dezti inli." ¹¹ 'Aw 'et lhat ndun whuzduténilh, 'et whunts'ih neduténts'o nuhwhuba 'ants'i hoonli. 'Et huwa neba howa whúlna hoh ndi khunek ts'ah'un na'a t'ewhunoozh k'una'a nuhwhunts'útni.

Ndunnah Yak'usda bughunek hiyoozélhts'ai tahodeznih 'en 'ants'i 'uskehyaz nduhúlt'ah

¹² 'Et k'an 'et dune hoodulh'eh wahle huba' hoont'ah, 'et whunts'ih soo 'udechoo be whuts'odul'eh, 'i Yak'usda khunek daja ni, 'et bulunah, 'en doo chah zeh nduhóolcho hoh whunanohodutel'h huba' hoont'ah. K'an 'et 'uskehyaz k'una'a 'uts'oo 'i zeh buk'e k'hahna, 'aw ts'iyi duts'un, 'i ilah. 'Et whuz na'a 'ahja. ¹³ 'Et ndunnah 'uts'oo zeh k'e dune hinli, 'en ndi Yak'usda bughunek ts'ah'un 'int'ah, 'et dzuh nt'ehoninzun. 'Awhuz 'uskehyaz hinli 'et huwa. ¹⁴ 'Et whunts'ih ndi ts'iyi duts'un, 'i híncha huba' yint'ah. 'En ndunnah hoodul'eh howun nuni hunuzut, 'en 'ink'ez hik'une' 'ut'en 'et hubeni ulhtus 'ulheh, 'en 'uhint'ah. 'En unzoo 'ink'ez ntsi' bulh t'ehininzun.

6

Yak'usda bughunek but's'oodool'eh. Hukwachats'unízun t'eh tube howa 'óodli ho' hoont'ah

¹ 'Et huwa ndi 'udechoo Christ bugha hodulhú'eh, 'et zeh hodooolhú'eh gunih, 'et 'o 'un chah hodooolhú'eh. 'Et sih soo ts'ah'un na'a lhadulya k'una'a 'ooht'e. Ndi 'udechoo whuts'odel'i, 'et koo bukw'uwhuz'ai, 'i ndúlt'ah, 'ink'ez 'i nuwhenich'oh 'aw 'uyoo na'ts'ooleh hukwa cha'uznizun. Ndi 'udechoo whuts'odel'i, 'et ndez na'a njan dúhoont'ah, ndai 'uts'alh'en, 'i 'ants'i 'et 'uhoont'ah, 'aw nela ooneh ghait'ah, 'i ts'iyawh buch'a náts'ool'ah. 'Et nts'e na'a 'uhoont'ah Yak'usda neba 'alha 'int'ah, 'et chah. ² 'Ink'ez nts'e na'a dune too be 'úl'en. Nts'e na'a 'uyoon dune k'ehúdiilnih chah, 'ink'ez 'et nts'e na'a 'uhutenilh dune yahadla tah dinahudutédah. 'Ink'ez nts'e na'a 'ilhuz neba nahutedeh whuz uztedulh. ³ 'Et whuz na'a Yak'usda netl'ahó'ai t'eh, 'et sih ndet soo ts'ah'un na'a lhadulya uzteleh. ⁴ 'Et ndunnah Christ bugha hohudul'eh 'ink'ez t'ehoninzun, ndi yak'uz howat'aih, 'i hiyíllchoot 'ink'ez Ndoni chah buyídinda. ⁵ 'Ink'ez Yak'usda daja ni, 'et dalzoo, 'i chah hiyíllchoot, 'ink'ez ndet ye ulhtus, 'i whuz de whélt's'ulh, 'et chah t'ehoninzun. ⁶ 'Et ndunnah ndunt'ah 'et Yak'usda ch'a nahusedl t'eh, 'en nts'oh dahoont'ah whunts'i, 'aw doo chah whuz na'a dudzi nahodunoooleh ghait'ah. Ndunt'ah dich'oh Yak'usda buYe' lhdulalhuz K'enáhiyilhti li'hiyulh'en, 'ink'ez ts'iyannah nalh highudloh. ⁷ Whunulh'en, 'et tube cho nawhúlhtih t'eh, haníyeh ba hoonzoo. 'Ink'ez ts'iyaintsuk ts'uyi, neba hanúlyeh. 'Et whuz na'a Yak'usda nets'un unzoo. ⁸ 'Et whunts'ih, 'i yun whus 'ink'ez 'ut'an untsi', 'i zeh haníyeh t'eh, 'et t'eh 'aw hoonliyaz chailah ho' 'int'ah. 'Et huwa bukacha'ts'unízun. K'at lih t'eh ts'iyawh uzdtulélk'un. 'Et soo cho howu ni óohtan!

Yak'usda buba ne'ts'ut'en 'aw whunaoodoolnah ghait'ah

⁹ Nuhk'ets'intsi', nuhwheni ndi khunekti be ndun whuhts'utni, 'et whunts'ih Yak'usda ch'a nasahdel chahlah, 'et neba 'alha 'uhoont'ah. 'Et k'us be uzdujih, 'i bugha 'o nus hoonzoo hukw'u na'a 'uteht'ilh, 'et neba 'alha 'uhoont'ah. ¹⁰ Dune Yak'usda bube'ildzun, 'en nuhwheni buba ne'hút'en ahli ínle, 'ink'ez 'awhuz whuz na'a nduht'en. Nuhbe 'ut'en 'ink'ez Yak'usda tube buk'ehtsi' hoh aht'en, 'et ts'iyawh Yak'usda whunilh'en. Yak'usda ts'ah'un na'a zeh 'int'ah, 'et huwa 'aw whunaoodoolnah ghait'ah. ¹¹ 'Et 'ilhunah ahli hoh 'et whulatah whuts'un, nuhdzi ndulhcho, 'i be whuz na'a 'et ndóht'en, 'et nuhwhuba hukwa' uzninzun. 'Et whuz na'a ndet hukwa tsi hooqli, 'et nawh cha'hoot'ah nuhts'un whutekulh. ¹² 'Ink'ez tsi'dahtnik wahle gunih. 'Et ndai Yak'usda ye nets'u náhezya, 'et ndunnah bé 'alha 'uhoont'ah 'ink'ez sa huba whulh huzyin, 'en hubugha íte'alh whuts'un, 'et nuhwheni chah 'en buk'una'a 'ooht'en.

Yak'usda dich'oh nets'u hoozi Christ buka tsi ts'uholi, 'en 'int'ah

¹³ 'Et 'aw dune Yak'usda gha ndoh 'int'ah hoolah. 'Et huwa hoh da 'et ndi Yak'usda Abraham ye yuts'un náhezya, 'i dich'oh dudoozi be yuts'un náhezya. ¹⁴ 'Ink'ez Yak'usda Abraham yudáni, "Tube nats'un tézsoo. Si sugha nuts'u haínde hutelai." ¹⁵ 'Ink'ez 'et whuz na'a 'uhooja. Yak'usda Abraham daja yudáni sa hoh whechaítsaz, 'et whunts'ih ye yuts'u náhezya, 'et bughá whuts'ut. ¹⁶ 'Et ndet dune hoonliyaz hubugha 'uyoon dune yuts'un nahuteyeh t'eh, 'et ts'ah'un néhote'alh hukwa' huninzun, 'et ndan yugha ndoh 'int'ah, 'en boozi be ts'ah'un nehoho'alh huba' hoont'ah. ¹⁷ 'Et whuz na'a Yak'usda 'uja. Ndaí hubuts'u yoozi, 'i bugha íte'alh. Ndaí hubuts'u yoozi, 'i 'aw 'ats'un na'a na'hótneh ghait'ah. Soo ts'ah'un na'a t'ehonoozeh ba hukwa' ninzun, 'et huwa dich'oh buboozi be

hubuts'un náhezya. ¹⁸ Yak'usda 'aw hots'it ghait'ah. 'Et huwa ndet howu yalhtuk 'ink'ez but's'un náhezya, 'et náwhult'ah 'aw 'ats'un na'a na'hotneh ghait'ah. 'Et huwa t'ets'oninzun Yak'usda 'aw nela dootnih ghait'ah. Nuwheni chah ndet hukwa tsi ts'úhooli, 'et ts'ohótun huba' hoont'ah. 'I bugha nedzi nduk ná'ut'ih. ¹⁹ Ndai hukwa tsi ts'úhooli, 'i nezul, neba bulh tat tsedez'ai li'int'ah. 'Et 'ilhuz duts'o 'ink'ez 'aw naghóotnah ghait'ah. 'Et njan hukwa tsi ts'úhooli, 'et huwa whúlh nat whuts'oh hukwa delhchooz 'et hukwuz tedulh. ²⁰ 'Et Sizi Gri 'uda 'uja netsuh nusiya, 'en whuz danínya. Melchizedek 'en k'una'a 'ilhuz wheni náwhulnuk degaha nus dezti suli.

7

Melchizedek hubudayi cho degaha nus ts'ah'un ne'ut'en

¹ 'Aw 'et ndun Melchizedek 'ilhun keyah Salem huwhútni, 'et whuhubudayi cho unli. Yak'usda ts'iyaintsuk huwhandoh 'int'ah, 'en bunáwhulnuk unli. 'Et whuz na'a 'uhóója hoh, hoh da Abraham 'en whuz na'a lhanah hubudayi cho bulh lhedúghan 'ink'ez lhanah ángahan. 'Et hukw'elh'az dukeyah ts'ih náhutesdel hoh ndun Melchizedek, 'en Abraham yududezya hoh 'et ndez na'a Yak'usda ts'un yuba tenadédli, degaha nus hoonzoo yugha hó'alh ka. ² 'Ink'ez ndunnah hubuhangan ndai hiye 'ánt'e, 'i ts'iyawh huyílhchoot. 'Et ndi bulah, 'i 10% k'ah, 'i Abraham, 'en ndunnah Melchizedek tl'áyanla. 'Et Melchizedek boozí, 'i ndí 'int'ah, ts'ah'un na'a hubudayi cho unli ní, ní ho' 'utni. 'Ink'ez keyah Salem whuhubudayi cho chah unli. 'I be nedzi whudooghel hubudayi cho unli ní ho' 'utni. ³ Be'abá, 'ink'ez be'ama chah chahoolah. Ndun yuts'u haínzut, 'en chah chahoolah. Nkeda hooni, 'ink'ez nkeda dazsai hoolah. 'Et whuz na'a Yak'usda buYe' k'una'a 'ulya hoh 'ilhuz wheni náwhulnuk unli. ⁴ Ndun 'en Melchizedek nts'e na'a dune ncha unli, 'et howu nuní nuhzut. Netsuhda 'int'ah Abraham 'en lhanah yé dinzut, 'et whunts'ih ndai dune hikabuhangan, 'i 10% k'ah, Melchizedek tl'áyanla. ⁵ 'Ink'ez 'alha 'uhoont'ah 'i be, Levi hits'uh hainde, 'en zeh náwhulnuk hulhih. Yak'usda hubut'l'a hó'ai hoh dune 10% k'ah hiyít'i, 'i náwhulnuk hitl'anáhiyoo'alh huba' hoont'ah. 'En Abraham ts'uh hahánde 'uhint'ah 'ink'ez bubulhutsinkah hinli, 'et whunts'ih 'en whuz na'a 'et nduhút'en inle. ⁶ 'Et Melchizedek 'aw Levi yuts'u hachaizulh, 'et whunts'ih Yak'usda, Abraham ye yuts'u náhezya, 'i yugha óoni'ai, 'ink'ez Abraham 'en 'uja 10% k'ah yutl'áyanla. 'Ink'ez Melchizedek, Yak'usda ts'un yuba tenadédli degaha nus hoonzoo yughá ho'alh ka. ⁷ 'Et nawh chah'hoont'ah ndan degaha ndoh 'int'ah unli, 'en duk'elh'ih 'int'ah, 'en ba tenadédli. ⁸ 'Et dez na'a 'et 'úhoont'ah, ndunnah Levi, 'en chah 'ants'i yinkak dune zeh 'uhint'ah, 'ink'ez whuz na'a zeh yahadlah, 'et whunts'ih ndí 10% k'ah, 'i chah whuz na'a zeh nahiyulhdzoo. 'Et Melchizedek, 'en 'int'ah 'ilhuz wheni khuna hiyúlhni, 'en 'uyinla Abraham 10% k'ah yugha yú'aih. ⁹ 'Et ndez na'a njan dúzdutenilh, Levi 'en 10% k'ah nalhdzoo 'int'ah, 'en whunts'i Abraham bugaha Melchizedek 10% k'ah yugha yú'aih. ¹⁰ Whunulh'en, whutsuh da Melchizedek, 'en Abraham ghu ninya hoh, 'et Levi 'awhuz chawhusle hoh.

'Uyoon náwhulnuk whusatéyalh

¹¹ 'Et huwa ndunnah Levi ts'uh hahánde, 'aw 'en zeh dune ba náwhulnuk hulhih 'ink'ez 'en hubugha Yak'usda bughunek netl'aída'ai, 'et whunts'ih 'en hubugha ndet Yak'usda nets'u hukwa' ninzun, 'et ts'iyaintsuk lhachaóodusneh. 'Et whuz na'a ts'iyannah t'ehonózin huba' hoont'ah, 'uyoon náwhulnuk whusatéyalh. Ndun náwhulnuk whusatéyalh, 'aw Aaron nduchailt'ah. 'Ink'ez Melchizedek k'una'a ootedzi. ¹² 'Et ndet howa ndunnah zeh náwhulnuk hulhih, 'et Yak'usda lhk'enaóoda'ai t'eh, 'et bughunek butl'aída'ai, 'et chah 'uts'un na'a na'whutét'niilh huba' hoont'ah. ¹³ 'Et ndun bughu yats'ulhtuk, 'en neMoodihti 'int'ah, 'en 'udooh dedowh hubuts'uh haínzut 'int'ah. 'Ink'ez ndunnah 'udooh dedowh 'aw náwhulnuk hoole ghait'ah. 'En Yak'usda bukw'uzdaí k'ut 'aw hoonli hudóolhk'un huba cha'hit'ah. ¹⁴ 'Et neMoodihti 'en Judah dedowh ts'ih haínzut 'int'ah, 'et ts'iyannah t'ehonínzun. 'Ink'ez 'en náwhulnuk huteleh hubugha, Moses 'aw howu yachafíhtih. ¹⁵ Njan 'o nus soo t'ewhuntehzeh 'et nuhts'u hukwa' nusuzun, 'et Melchizedek k'una'a 'uyoon náwhulnuk whusatéyalh t'eh, ¹⁶ 'et ye khuna, 'i be 'aw hoolah hiyoohsilh ghait'ah, 'et whuz na'a Sizi Gri náwhulnuk suli. 'Et whunts'ih nts'e na'a Yak'usda bughunek be dune Aaron ts'ah hainzut hoh náwhulnuk tele, 'aw 'et huwa ilah. ¹⁷ 'Et whuz na'a Sizi Gri bugaha Yak'usda bughunek njan ndutni, "Ndun Melchizedek, nts'e na'a hoh náwhulnuk unli, nyun chah 'ilhuz wheni náwhulnuk inli."

¹⁸ 'Et ndez na'a njan dúhoont'ah, 'udechoo khunek butl'aidélt's'ut da, 'aw dune la'hoont'ah ghait'ah. 'Et huwa Yak'usda 'udun niwhum'ai. ¹⁹ 'Et ndai 'udechoo Yak'usda bughunek netl'aída'ai, 'i be 'aw dune soo lhadílya hoole ghait'ah. 'Et whunts'ih hoonli hoh 'et 'o nus hoonzoo hukwa tsi ts'úhooli. 'Et t'eh 'o nus Yak'usda begah uzter'ilh.

Njan 'et ndez na'a Sizi Gri náwhulnuk degaha nus dezti neba unli

²⁰ 'Et Yak'usda dich'oh bughunek be Sizi Gri yuts'un náhezya 'et ndi dáni, "Nyun 'ilhuz wheni náwhulnuk inli." ²¹ 'Et whunts'ih ndunnah Aaron nawhulnuk Yak'usda 'aw whuz na'a buba nachahíyel hoh náwhulnuk huzdli. 'Et whunts'ih dich'oh ts'ah'un yuts'un náhezya, 'et huwa Sizi Gri náwhulnuk unli. 'Et whuz na'a Yak'usda bughunek 'et ndutni,

"Moodihti bughunek yutl'aída'ai,

dudeni 'aw 'ats'un na'a na'yooleh ghait'ah.

Melchizedek k'una'a nyun chah 'ilhuz wheni náwhulnuk inli."

²² 'Et whuz na'a ndi k'an khunek nets'un lhaidinla, 'i, Sizi Gri neba dazsai, 'et 'i be nets'un whutekulh ho' hoont'ah. ²³ 'Et ndunnah náwhulnuk lhanah hinli 'et whunts'ih 'ilhunuh hinli hoh ts'iyawh yahadla. 'Et huwa 'aw 'ilhunuh 'ilhuz wheni náwhulnuk wule ghait'ah. ²⁴ 'Et whunts'ih Sizi Gri 'ilhuz wheni khuna, 'et huwa neba náwhulnuk unli, 'aw 'uyoon dune yuk'édooya hoolah. ²⁵ 'Et huwa ts'iyannah, 'en be bughah Yak'usda hiyeghah hutet'ilh, ts'iyawh 'en huba ye ulhtus, 'i yit'i hoh soo ts'ah'un na'a hubutelhyih ka. 'En 'ilhuz wheni khuna 'ink'ez neba tenadudli 'et huwa. ²⁶ Njan 'et ndez na'a Sizi Gri náwhulnuk degha nus dezti neba unli. Lubeshi bughu hoolah, 'aw buk'eholts'it chah hoolah. 'Ink'ez tink'us 'uhoot'ah 'aw hootsolyaz whunts'i buk'uz chawhést'en. Lubeshi 'ulh'en hubulh 'ut'en inle, 'et whunts'ih 'aw 'en buk'una'a ndi yun k'ut chaidal. 'Ink'ez buch'a nasja. 'Ink'ez 'en yak'uz whanus dézti sulí. ²⁷ 'Aw Lizwif huba náwhulnuk degha nus dezti nahutedle. 'Et ndai Yak'usda bughunek Moses yuk'une'úzguz, 'i buk'elh'az, Yak'usda buYe 'en bughah nets'un náhezya náwhulnuk degha nus dezti tele. 'En 'int'ah, buYe 'en 'ilhuz wheni soo 'et lhadulya sulí.

8

Sizi k'an 'et náwhulnuk degha nus dezti unli hoh dude 'ut'en k'ah huwaghúna

¹ 'Aw 'et njan daja uzdaní, soo ts'ah'un na'a t'ewhunoozhéh nuhts'u húkwa 'uzninzun, nuwheni neba náwhulnuk degha nus dezti ts'it'i, ndun yak'uz k'us úncha, 'en buk'usúda cho dézti, 'i nalnhih ts'ih yughu nátl'adedá. ² Ndi ndai bun cho neMoodihti nené'ai, 'i ts'ah'un na'a 'uhoot'ah. 'I 'aw dune ilah neni'ai. 'Et huwa 'udéni bun bet whubez, 'et degha nus whudézi ts'ih, 'et chah Sizi Gri neba ne'ut'en. ³ 'Et ndunnah náwhulnuk degha nus dezti hinli, 'en Yak'usda buk'uzdai k'ut 'udelhk'un 'ink'ez hoonliyaz Yak'usda bughah hoo'alh huba' hoont'ah. 'Et whuz na'a ndun dune bughu yats'ulhtuk, 'en chah hoonli huwa oo'alh huba' hoont'ah. ⁴ 'Et lhanah nawhulnuk ndi yun k'ut, 'en nts'e na'a Moses bughunek k'una'a, 'et whuz na'a 'et nduhút'en. 'Et huwa Sizi Gri 'awhuz ndi yun k'ut usda t'eh, 'aw da náwhulnuk chailah wule. ⁵ Ndunnah bun cho t'ah ts'ih dune huba ne'hut'en t'eh, 'et ndi bun cho 'et yak'uz whuz'ai, 'et whunduhúl'en ho' hut'en. 'I yak'uz dahoot'ah 'et whunduhúl'en li'hut'en. Hoh da Moses bun cho nité'alh hoh, Yak'usda yudáni, "Nts'e dzulh k'ut bun cho nitélt's'ulh whunyunelhtan, 'et wheni bughá ne'tant'en, 'i mba 'usdla, 'i k'una'a 'onleh. 'Et nts'e na'a whunyunelhtan, nduhóolcho hoh whuz na'a 'onleh!" ⁶ 'Et whunts'ih Sizi Gri ndunnah 'o nus soo huba ne'út'en sulí. Ndi degha nus hoonzoo khunek nets'un lhaidinla, 'i, 'et huwa Sizi Gri 'en hubéguz unli. Yak'usda 'o nus hoonzoo k'una'a nets'ú hoozi, 'et whuz na'a neba 'uhóonla.

K'andit khunek nets'u lhaidinla

⁷ 'Et njan khunek 'udechoo khunek hubuts'u lhaidinla, 'i huba hoolhtus, 'aw hik'unecha'ít'il. 'Et huwa 'i bughah dune Yak'usda nalh ts'ah'un cha'hit'ah. 'Et huwa doo chah whulh nat nets'u náhezya. ⁸ 'Ink'ez Yak'usda, 'en ts'iyawh hukwa' hubudáni. 'Et whuz na'a bughunek 'uk'e'edúguz hoh njan ndutni,

"Sih soo zélt's'ai, 'ilhudzin whuz de whélt's'ulh,

'et whusawhélt's'ut t'eh,

'et Israel hubuyun k'ut húdelhts'i,

'ink'ez Judah hubuyun k'ut húdelhts'i, 'en chah

njan k'andit khunek huba lhaidutesdilh.

⁹ Hoh da dunnah 'udechoo khunek huba lhaidusdla,

'et whulh nat 'aw hukw'u na'a cha'whutést'il.

'Et hoh da hubula ílhchoot

'ink'ez Egypt yun k'ut hukw'u nabutéla.

'Et whunts'ih sughunek 'aw chahiylhchulh,

'et huwa hubula desnik.

- ¹⁰ Et hukw'elh'az Israel buzkehkah soo k'andit,
 'i khunek huba lhaídutesdlilh.
 Ndez na'a ndótet'ilh, suk'ah ts'ih 'et hubeni taóodutesdleh,
 'ink'ez hubudzi k'ut chah 'uk'e'tesgus.
 'Ink'ez si hubuYak'usda tesdleh,
 'ink'ez 'en sudune hutele.
- ¹¹ Hoh t'eh ts'iyawh 'ilhunuh hinli hoh 'uskehyaz
 'ink'ez ye 'un hudedoh bulh 'ilho, Si t'esontezeh.
 'Et datést'ilh,
 'et huwa hubéghah whut'i,
 k'us dudulhutsinkah 'aw 'ilhunuh whunts'i,
 doo chah zeh 'neMoodihti bugha hoodulh'eh!' hudooni huba cha'hoot'ah.
- ¹² 'Et dáhoot'ah 'aw ts'ah'un cha'hust'en t'eh,
 'et huwa bugha té'untsezeh.
 'Ink'ez hubulubeshi 'ink'ez sk'unúcha'ust'en,
 'et 'i ts'iyawh 'o 'un 'aw huba whunaoolhunih ghait'ah."
- ¹³ 'Et huwa Yak'usda ndi soo k'andit khunek neba lhaídinla, 'i howu yailhtuk, 'et dája ni hoh ndutni, 'i bugha njan 'udechoo khunek huba lhaídinla, 'i 'aw hoh cha'hoot'ah sulí, 'et huwa Yak'usda neba lhk'enaooda'ai, 'ink'ez 'udechoo khunek huba lhaídinla 'aw 'o 'un buk'une' ts'oot'en ghait'ah.

9

Hoh da bun cho 'ulya

¹ 'Ink'ez njan 'udechoo khunek huba lhaídinla, 'i be wheóobunelhtan nts'e na'a nawhulnuk Yak'usda ba ne'hóot'en huba' hoot'ah. 'Ink'ez ndet bun cho 'uhuhóonla, 'et Yak'usda ts'un teni' hunalzhin 'uhoont'ah. ² 'Ink'ez bun cho be 'uhóolya, 'et ndez na'a njan dúhoot'ah. 'Udechoo whabez ts'ih, 'et skwunlai 'o 'at nankoh (7) kwun buk'udezk'un, 'i 'et sukai. 'Ink'ez kw'uzdai lhes buk'úyuzdla, 'i nul'en, 'i chah 'et sukai. 'Et njan 'udechoo whabez ts'ih, 'et whudézi 'uhoont'ah. ³ 'Et 'o ni whulh nat whuts'uh hukwa' delhchooz, 'et dega nus whudézi ho' 'uhoont'ah. ⁴ 'Et whabez ts'ih kw'uzdai 'i ndulhcho 'i bunat gold be 'ulya, 'i chah 'et sukai. 'Ink'ez Yak'usda khunek huba lhaídinla, 'i buchunkhelh 'int'ah. 'I bez ts'ih gold 'oosa' chah be sa'ai. 'Et ndi gold 'oosa', ndi lhes manna hiyulhni, 'i bé yuz'ai. Aaron butuz, ndi tuz 'i 'int'ah, 'ut'an buts'un haínalhyi inle, 'i chah be idéztan. 'Ink'ez ndi lanezi khunek net'l'aída'ai, 'i tse k'ut 'uk'une'úsduguz, 'i chah be idéz'ai. ⁵ 'Ink'ez ndi chunkhelh cho k'ut, ndunnah Cherubim hubuts'útni, 'en hube Yak'usda yé dezti t'ets'oninzun, 'et huwa ndi chunkhelh 'i k'ut 'uhint'ah. But'agha whutus lht'aghútnaih hiyulhntsi, 'i t'ah, 'et 'i k'ut 'uskai yuk'unédelht'ik hoh Yak'usda soo cho nets'un náitoot'en ka ts'uwwhútni. 'Aw ndi ts'iyawh howu yats'oolhtuk ghait'ah.

'Udechoo bun cho 'ulya, 'i buyah Yak'usda buk'uzdai k'ut hidelhk'un, 'i 'aw 'et hoh tinta' ts'unt'en neba 'un whutookat ghait'ah

⁶ 'Et ndi ts'iyawh nts'e hubula huba' hoot'ah, 'et nihíninla. 'Aw 'et 'udechoo whabez ts'ih 'et ndunnah nawhulnuk, 'en dzin totsuk ne'hut'en. ⁷ 'Et whunts'ih náwhulnuk dega nus dezti, 'en 'ilhuh naoduzuk totsuk 'ilhuh zeh 'o ni whulh nat ts'ih nuyih. 'Uskai bu'et t'eh, 'aw whuz tooya ghait'ah. 'Et ndi 'uskai dich'oh duba chah 'ink'ez ndunnah 'aw t'ehonízun hoh lubeshi hilhchukw, 'en huba chah, 'en ts'iyawh hubulubeshi huwa whuz Yak'usda nalh wheyúkaiah. ⁸ Ndez whuz na'a Ndoni whuneoodulh'eh, ndi bun cho 'awhuz 'et sa'ai t'eh, 'et dega nus whudézi ts'ih, nts'e Yak'usda 'int'ah, 'aw whuz dats'óoya ghait'ah. ⁹ 'Et ndúhoot'ah, 'et huwa hoonli whuts'odul'eh huba' hoot'ah. Ndan Yak'usda ba huwa íte'alh, 'ink'ez Yak'usda buk'uzdai k'ut yudutélhk'un, 'en 'i be Yak'usda ba ne'tet'en, 'et whunts'ih 'awhuz buyuh ts'ih bugha nt'ets'onínzun* 'aw ts'ihnus lhadulya ho' hoot'ah. ¹⁰ 'Ants'i ndai hite'alh, hitetnilh, lhelhnt'sun na'a toonahuwhúgus, 'ink'ez ndai buyust'e ba ts'ah'un 'int'ah, ndi 'i ts'iyawh nus de k'an 'et Yak'usda ba ne'hutet'en, hoh t'eh huba whusawhútelts'ulh, 'et whuts'un, 'et whuz na'a 'uhoot'en whuba' hoot'ah inle.

Sizi Gri dich'oh buzkaí be tinta' ts'unt'en neba hoolah whulhntsi

¹¹ 'Et whunts'ih Christ náwhulnuk dega nus dezti unli hoh whusainya. Ndet hoonzoo whusaóotekulh, 'en 'et negha whúteleh. Ndi bun cho dega nus ncha, 'i 'ink'ez 'o nus ts'ah'un na'a 'uhoont'ah, 'et hoh neba ne'ut'en. 'Aw dune ilah 'uyinla. 'Aw ndi yun k'ut ilah 'uhóolya.

* 9:9 Ndi khunek "Neyuh ts'ih huwa t'ets'oninzun", 'i hoonli ts'ih'un na'a k'us tink'us 'uhoont'ah, 'i gha t'ets'oninzun, ts'utni ho' ts'utni.

12 Sheep 'ink'ez musdusyaz bubuzkai, ndi dega nus whudézi ts'ih 'aw whuz whechayikal. K'us dich'oh duduzkai, 'i be dega nus whudézi ts'ih whuz whinya. 'Ilhuh zeh 'ink'ez 'ilhuz wheni, whuz whinya. 'Et ndúja hoh 'ilhuz wheni nenaneonket. 13 'Et ndunnah Moses be' dustl'us bugha dahúja 'et huwa 'aw bun cho su'ai ts'ih 'aw whuz hutoodelh ghait'ah, ndunt'ah musdus dune 'ink'ez sheep bubuzkai buk'ehídutelht'ih. 'Ink'ez musdus hidéllh'kun, 'i bulez 'i buk'unuhfedzih, 'et whuz na'a Yak'usda nalh buyust'e 'aw chaditsun nahídlih. 'Et whuz na'a 'et nduhúja t'eh bun cho su'ai, 'i whuz hutedulh. 14 'Et whunts'ih Christ 'en dich'oh duduzkai, 'i be 'o nus dahóolcho hoh neyuh ts'ih bugha t'ets'oninzun, 'i 'et ts'iyawh neba whuna'alhde. Ndai 'uts'ulh'en, 'i 'aw nela 'oot'en ghait'ah, 'ants'i 'et 'uhoont'ah. 'Et huwa Yak'usda, 'en buba né'ts'oot'en huba' hoont'ah. Christ 'en 'uja 'aw hoonliyaz bulh chadí'ah hoh Ndoni ndun 'ilhuz whuts'un khuna, 'en be Yak'usda yutl'a'dudelti, neba datétsah ka. 15 'Et huwa ndi k'an khunek neba lhaidinla, 'i 'et Christ 'en hubéguz neba unli. 'Et whuz na'a ndunnah njan 'udechoo khunek huba lhaidinla, 'i 'et hukw'úne' whút'en hukwa 'uhet'en, 'et whunts'ih lubeshi 'uhalh'en, 'en ts'iyawh lhdulalhug k'ut huba dazsai 'et hoh njan 'udechoo khunek huba lhaidinla, 'i bugha lubeshi neba whulanaoodeetnik huzdli. 'Et hoh ndunnah 'ilhuz wheni hudutejih ka hubuka' dani, 'en ndi k'an khunek huba lhaidinla, 'i hiyóolhchoot ka.

Dune hoonli khunek huba lhaidinla, 'en dune dazsai, 'et zeh butsi tékulh

16 'Et dune hoonli khunek huba lhaidinla, 'en dune dazsai, 'et zeh butsi tékulh, whuz na'a 'uhoont'ah. 17 'Et whunts'ih ndi khunek ba lhaidinla, 'i khuna whutah, 'et 'awhuz bube'ildzun unli ho' 'int'ah. 18 'Et whuz na'a 'uhoont'ah, hoh da 'udechoo hoh Yak'usda ndi 'udechoo khunek huba lhaidinla, 'et Yak'usda buk'uzdai k'ut 'ink'ez dune buk'ut chah, Moses 'uskai be buk'eídilht'ik. 19 'Et Yak'usda bughunek Moses yutl'aída'ai, 'i nts'e na'a 'uwuhúhni, 'et hubugha ts'iyawh Moses hubudáni. 'Et hukw'elh'az musdusyaz 'ink'ez sheep bubuzkai too bulh 'int'ah, 'i yílhchoot. Sbai bugha dúlk'un, 'i duchunyaz 'i hyssop hiyúlhni, 'i buzooschum, 'i yulaídah'oo 'ink'ez ndi 'uskai yé tunayuzsi 'ink'ez Yak'usda be' dustl'us yuk'uné'delht'ik 'ink'ez dune chah, ts'iyawh buk'uné' delht'ik. 20 'Et ndoh búlhni, "Njan ndi 'uskai 'i be Yak'usda khunek nuhwhuba lhaidinla," ni Moses. 21 'Ink'ez ndi bun cho, 'i chah, 'ink'ez tuz ts'ih ndai Yak'usda bé ba 'uwhut'en, 'i 'int'ah, 'i chah ts'iyawh, ndi 'uskai yuk'unídelht'ik. 22 'Et Moses be' dustl'us 'i be 'ankw'us ts'iyaintsuk 'et ndi 'uskai 'i be whuz na'a chaditsun nahudleh. 'Et 'aw 'uskai buk'échadulht'ih t'eh, 'aw hubulubeshi ba hubuna'odeh ghait'ah.

Christ 'ilhuh zeh neba dazsai dáhoolcho ho' hoont'ah

23 'Et huwa ndi yun k'ut hoonli, 'i ndi ts'iyawh yak'uz sula, 'i ndult'ah ho' 'int'ah. Nts'e na'a Moses dát'en, 'et whuz na'a chaditsun suli. 'Et whunts'ih soo yak'uz ts'ah'un 'int'ah ndai 'et 'int'ah, dutsun wule wuch'a, 'i 'o nus hoonzoo be huwat'aih, hóle huba' hoont'ah. 24 Christ 'en ndi yun k'ut njan bun cho bet, ndet k'us whúdezi, dune bula be 'uhuhóonla, 'aw 'et dachayal. Njan 'et 'ants'i yak'uz whunduwhut'en huwhulhtsi 'et huwa. 'Et k'us nduk yak'uz ts'ih whuz whenya. 'Et whuz na'a Yak'usda but neba neninya. 25 'Et njan náwhulnuk dega nus dezti, 'en khunai buzkai be, naodezuhl totsuk, njan dega nus whudézi, whuz k'unádaih. 'Et whunts'ih Christ 'aw dich'oh lhat cho huwá dudóltel'huba cha'hóot'ah. 26 'Et ndúja t'eh, ndi yun 'ulya da whuts'un, k'an 'et whuts'un, 'et t'eh tube lhat da daootsah wule. 'Et k'an 'aw 'et ndi yun 'ustl'e' 'utenilh nilhdukwh whuzdli, 'et 'ilhuh zeh ndi yun k'ut nusíya, 'ink'ez neba huwa' dudulti. 'Et huwa whuz na'a nelubeshi neba yunaoodeelhúnah. 27 'Ink'ez dune 'ilhuh zeh dahútetsah, whuz na'a 'uhóolya, 'et dahúzsai hukw'elh'az 'et t'eh huba nahutedeh. 28 'Et whuz na'a Christ, 'en 'ilhuh zeh huwá' dudulti. 'Et whuz na'a lhanah hubulubeshi hubughu yílhchoot 'i yuk'elha dazsai. 'Et whunts'ih whulh nat, 'aw lubeshi bugha ilah hoh whusanatedalh. 'Et k'us ts'iyannah ndunnah tube buka tsi hooli, 'en hubunalhts'et be hóoduteltsilh, 'et hudutejih.

10

Khunai Yak'usda buk'uzdai k'ut hidéllh'kun, 'i be 'aw hubulubeshi hubuna'doodeh ghait'ah.

1 'Et Moses yuk'e'ánguz dalzoo, 'i whuz hatekulh, 'et 'aw soo cho nduchanedinil. Ndunnah ndi khunek yuk'une' 'ust'en, 'en naoduzuk totsuk ndai huwa t'aih Yak'usda buk'uzdai k'ut hidutéllh'kun, 'et whunts'ih 'aw Yak'usda nalh lhadulya uboohltsilh ghait'ah. 2 Lhadulya hubutelhtsilh t'eh, ndai huwa t'aih, 'ustl'e' hiyooleh huba' hoont'ah. 'Et doo chah hubulubeshi ts'iyawh ba hubuna'dede t'eh, 'et sih buyuh ts'ih bugha t'ets'oninzun, 'i be t'ewhuntezeh. 3 'Et whunts'ih naodezuhl totsuk, ndai huwa t'aih, 'i be 'et hoh ts'iyawh t'ehonínzun 'awhuz lubeshi hit'i. 4 'Et musdus dune 'ink'ez sheep buzkai, 'i nts'oh dáhoont'ah 'et whunts'ih hubulubeshi 'aw 'i be hubuna'doodeh ghait'ah 'et huwa.

Christ buzkai 'i be zeh nelubeshi yuna'alhde

⁵ 'Et huwa nkeda Sizi Gri ndi yun k'eínya hoh, 'et njan ndutni,
 "O Yak'usda ndai huwa t'aih

'ink'ez Yak'usda bukw'uzdai k'ut hidéllh'k'un,
 'i ts'iyawh buka cha'nínzun.

'Et whunts'ih 'ilho yust'e 'i suba lhadinla.

⁶ Ndai Yak'usda bukw'uzdai k'ut lubeshi ba dézk'un,

'ink'ez 'et 'uyoo huwa hiyulih, chah,

'i ts'iyawh 'aw mba soo cha'ildzoo.

⁷ 'Et huwa 'et njan dúdusni,

'O Yak'usda ndi dustl'us sugha 'uk'une'zínuz 'et 'alha 'uhoont'ah.

Nyun hukwa' nínzun k'una'a tune'test'en, 'et huwa whusaíya."

⁸ Njan ndutni hoh 'utni, "Ndai Yak'usda bukw'uzdai k'ut lubeshi ba dézk'un, 'i 'ink'ez 'et 'uyoo huwa hiyuli inle chah, 'i ts'iyawh 'aw mba soo cha'ildzoo," 'et whunts'ih Moses be' dustl'us 'i bugha 'et nduwuh't'en inle. ⁹ 'Ink'ez Sizi Gri njan chah ndutni, "O Yak'usda nyun hukwa' nínzun k'una'a tune'test'en 'et huwa whusaíya." 'Et whuz na'a Yak'usda njan 'udechoo khunek huba lhaídinla, 'i hoolah yulhtsi. 'Ink'ez bulh nankoh khunek huba lhaídinla, 'i yuk'enaída'ai. ¹⁰ 'Ink'ez Yak'usda ndet hukwa' nínzun, 'et hoh 'ilhu 'ink'ez 'ilhu wheni Sizi Gri buyust'e be neba huwa' dudulti. 'Et whuz na'a 'uda bube'ildzun ts'uzdli.

Christ neba dazsai, 'et 'i be ndunnah 'utahalya, en ts'iyannah lhadúalya hubulhtsi

¹¹ 'Ink'ez ndi Yak'usda bukw'uzdai k'ut hidéllh'k'un, 'et dzin totsuk 'i zeh ndunnah náwhulnuk whusayulih. 'Ink'ez 'et whuz na'a zeh dune huba ne'hut'en. 'Et whunts'ih 'et nduhút'en 'aw hubulubeshi hubuna'doodeh ghait'ah. ¹² 'Et whunts'ih Sizi Gri nelubeshi k'el'ah 'ilhu zeh 'ink'ez 'ilhu wheni 'uja dich'oh huwá' dudulti. 'Et hukw'elh'az Yak'usda nalhni ts'ih yughu nátl'adedá. ¹³ 'Ink'ez k'an 'et 'et usda nket'ah 'uwuhutenil hoh yuch'a detni, 'en 'ants'i neke buk'ut nályis, 'i k'una'a duke yuh nébutelelh, 'et huba ulh'i. ¹⁴ Ndunnah Yak'usda ba 'udun nibuninla, 'en huba Sizi Gri 'ilhu zeh huwa dudulti, 'i be 'ilhu wheni lhadúalya ts'uzdli. ¹⁵ Ndoni 'en chah whuz na'a 'et ndunélni. Hoh da 'et ndutni,

¹⁶ "NeMoodihtí njan ndutni,

'Et hoh dzin hukw'elh'az ndi khunek huba lhaídu'sdleh,

'i 'uyoo 'int'ah. Sk'ah ts'ih budzi yuh chah newhudutes'alh

'ink'ez bubeni tah chah 'uk'e'tesgus."

¹⁷ Hubulubeshi 'ink'ez 'uk'únuchá'hust'en,

'i ts'iyawh chah 'o 'un huba whunaoolhúnih ghait'ah."

¹⁸ 'Aw 'et ndai nelubeshi ts'iyawh neba whunaoodelhúnah, 'ink'ez 'aw 'o 'un nelubeshi ba 'udóolk'un ghait'ah.

Sizi Gri neba daja, khun teh neba nawh 'uhot'e gunih 'ink'ez soo cho ts'uhotun

¹⁹ 'Et huwa sulhtsínkah, Sizi buzkai bugha tube nedzi hoonli hoh ndet dega nus whudézi ts'ih 'ahoolhyez whuz uztedulh, 'et netl'ahó'ai. ²⁰ 'Et ndi ti, 'i k'ahoondit, 'ink'ez ts'ah'un na'a 'int'ah, neba whulhtsi. 'Et dich'oh neba dazsai, 'et 'i be ndi whuts'oh hukwadelhchooz, 'i neba lhch'a yilhchoot. ²¹ 'Ink'ez Yak'usda bukoo húdelhts'i, 'en huba 'en náwhulnuk dega nus dezti unli. ²² 'Et huwa nuwheni chah soo cho neba 'alha 'oot'e 'ink'ez nedzi ts'ah'un 'int'ah, 'i be whuz na'a 'ahoolhyez but's'útooya. 'Ink'ez buzkai be 'uda nedzi k'únidelht'ik. 'I be ndet neyuh ts'ih bugha t'ets'onínzun, 'i whudutsun, 'et ts'iyawh neba whuna'alhde. 'Ink'ez neyust'e too unzoo, 'i be toonáyuzguz li't's'oot'e. ²³ Ndet buka tsi ts'úhooli, 'et neba 'alha 'uhoont'ah ts'utni, khun teh neba nawh huhot'e gunih 'ink'ez soo cho ts'uhotun. Nduun nets'úhoozi, 'en 'aw nela dootnih ghait'ah 'et huwa. ²⁴ 'Et ts'iyawh lhghu nuni uznootut 'et t'eh nus lhts'un noolt'uk, 'et t'eh ts'iyannah hubuk'ets'ootsi' 'ink'ez 'ut'en unzoo, 'i be hubula' ts'oot'en. ²⁵ Nts'e na'a 'ahoolhyez 'ilhunats'owúdulh khun teh whulazdootnih gunih! 'Et bulunah 'ustl'e' hut'ih. 'Et whunts'ih 'aw 'et dega nus dzin whuz de whélt's'ulh 'aw 'et neba nilhdukw suli. 'Et huwa 'o nus soo cho nus lhts'unoolt'uk hoh 'ahoolhyez Yak'usda ba 'ilhunats'owódelh huba' hoont'ah.

Ts'ah'un na'a 'int'ah, 'en be 'alha 'uhoont'ah, 'i be ndi yun k'ut hudóolts'i

²⁶ 'Et huwa 'udusni, khunek 'alha 'int'ah t'eznínzun hoh ts'iyawh ts'ilhchoot, 'ink'ez hukw'elh'az ts'ah'un na'a t'ets'onanzin t'eh, 'et whunts'i 'aonilhka lubeshi ts'ilhchoot t'eh, 'et nduts'út'en, 'aw be huwá t'aih, 'i neba cha'ít'ah suli. ²⁷ K'us njan ndet neba nahutedeh, 'et wheoonujut k'et 'aw uzdooni ghait'ah. Yak'usda ye hunilch'oh, 'i be neba nahutedeh. Ndi ye hunilch'oh, 'i kwun ulhtus k'et 'i be dulk'us li'utni, 'i k'una'a ndunnah Yak'usda ch'a detni, ts'iyawh 'i be huduté'k'un. ²⁸ Ndi Moses be' dustl'us k'ut 'uk'e'éduguz, 'i ndan n'un whutulhdelh, 'en nanah k'us tanah nalh 'et duhút'en t'eh, 'et t'eh be 'ugha te'nidzeh, 'i bu'et

dahútetsah inle. ²⁹ 'Et ndez na'a 'o nus whutétsi'. Ndunnah Yak'usda buYe' ants'i yuba unli hoh yuk'unuya t'eh, 'ink'ez Sizi buzkai be k'an 'et khunek huba lhaidinla, 'i huwhut'i, 'et Yak'usda ba 'udun niobuninla, 'et whunts'ih ndi buzkai 'aw hoonliyaz huba chailah t'eh, 'et Ndoni 'en chah, 'en be ye unzoo, 'i but's'un haídult's'uk, hich'a yalhtuk t'eh, 'et ndi ts'iyawh ndunnah whuz na'a nduhut'en, 'et 'o nus whéoonujut hoh huba nahutedeh. ³⁰ 'Et neMoodihti, 'en buk'ah ts'ih t'ets'oninzun. 'En 'utni, "Ndi be k'uznudzun, 'i si zeh hukw'elha whutelhsilh." 'Ink'ez chah 'utni, "NeMoodihti dudune, huba nahuteyeh." ³¹ Yak'usda khuna, 'en ndunnah hubuzkeh hinli 'et whunts'ih hich'a nalhúya t'eh, 'en wheoonujut hoh huba nahuteyeh. ³² 'Et whunts'ih nuhwheni whunalhúnihi ndi khunek niz dakez daja hutni, soo cho t'eeonáhzun 'ink'ez ulhchoot. Hukw'elh'az tube cho dzuh nusahdeh 'et whunts'ih 'aw nuhwhuch'a cha'ílhoh. 'Et ts'iyawh 'aw whecháhtsaz hoh whutah lhusáhdel. ³³ Whulutah Yak'usda bugha ts'iyannah nalh dzuh nunóhuhulhdeh 'ink'ez nuhch'a yahalhtuk. Whulutah ndan whuz na'a Yak'usda dzuh nuhudeh, 'en but's'ú nidahyih. ³⁴ Hoh da tsak'esuhan'ai hoh sugha te'nahzun 'ink'ez sula 'aht'en inle. 'Et ndai aht'i, 'i 'ants'i nuhghu hiyílhchoot 'et whunts'ih hoonáht'i. T'eeonáhzun nuhwhenich'oh 'o nus hoonzoo 'ink'ez 'ilhuz 'uhoont'ah, 'et yak'uz nuhwhuba whuzdla ho' hooht'ah. ³⁵ 'Et huwa be nuhdzi ulhtus khun whuladoohtnihi gúnihi! 'I bugha hooncha nuhgha whutelts'ulh. ³⁶ 'Et njan 'et ts'iyawh bula doohtnihi gúnihi! 'Et Yak'usda nuhts'u hukwa' ninzun, lhaoodahla t'eh, 'et nuhts'u nahezya, 'et nuhgha óotekulh. ³⁷ Uda khunek 'et njan ndutni, "Et ndun whusatéyalh, 'aw sa ilah whusatéyalh.

³⁸ 'Et ndunnah ts'ah'un na'huja,

'en be 'alha 'uhoont'ah,

'i be hukhutena huba' hooht'ah.

'Et whunts'ih ndunnah k'ah na'huja t'eh,

'aw si huba hóst'i ghait'ah."

³⁹ Ndunnah dune Yak'usda huba 'alha' yint'ah 'ink'ez k'ah na'huja t'eh, 'en ndai Yak'usda bugha whúte'ah, 'aw hiyóolhchoot ghait'ah. Nuwheni 'aw 'en hubuk'una'a cha'ts'ít'ah. 'Et k'us nuwheni Yak'usda buba 'alha' yint'ah ts'inli, 'et hoh 'uzdujih 'uts'int'ah.

11

Be 'alha 'uhoont'ah, 'i be Yak'usda be 'ut'en k'ah nt'ets'onínzun

¹ 'Et ndai buka tsi ts'uhóoli, 'i be 'alha 'uhoont'ah, 'i be t'ets'onínzun neba whusaootékulh. 'Ink'ez ndi ndet chats'uwhes'en, 'et whunts'ih be 'alha 'uhoont'ah, 'i be t'ets'onínzun 'et whuzíla ho' hooht'ah. ² Ndi be 'alha 'uhoont'ah, 'i be ndunnah Yak'usda ba 'utsuh whudéhdzulh, 'en soo ts'ah'un na'a howu yahalhtuk. ³ Be 'alha 'uhoont'ah, 'i be zeh t'ets'onínzun Yak'usda daja ni, 'et hoh ts'iyaintsuk ndi yun k'ut 'ulya. Ndai chats'es'en, 'i whunts'i, bughunek 'i be ts'iyawh 'uyinla, 'i 'int'ah.

Yak'usda ndi yun 'uyinla hoh da whuts'un be neba 'alha 'uhoont'ah, 'i bugha zeh Yak'usda bunalh ts'ah'un 'uts'int'ah

⁴ Ndun Abel, 'en Yak'usda buba 'alha' yint'ah. 'I be zeh 'uja dulhutsin Cain 'en dega nus unzoo, 'i Yak'usda buk'uzdai k'ut yuba 'údalk'un. Ndi huwa íni'ai, 'et Yak'usda hoonzoo k'una'a yughu yalhtuk. 'Et Abel dazsai hukw'elh'az whunts'i nts'e na'a daja, 'et bugha nelh yaintuk, Yak'usda nalh 'en ts'ah'un dune 'int'ah hutni. ⁵ Njan be 'alha 'uhoont'ah, 'i be zeh Enoch nts'e na'a Yak'usda yuts'u hukwa' ninzun, 'et 'uhóonla 'et whuz na'a bugha t'ewhunúdzun. 'Aw dachait'sal. Khuna hoh Yak'usda yak'uz wheyalhti. 'Et whuz na'a Yak'usda bughunek 'et ndutni, "Yak'usda yak'uz ts'ih whenáyalhti. Hoolah. 'Et huwa hiyulh 'uhut'en 'aw chahiyés'en sulí." ⁶ Bé 'alha 'uhoont'ah, 'i bu'et t'eh, 'aw Yak'usda buba dzuh ts'oozoo ghait'ah. 'Et huwa ndunnah Yak'usda ts'un hutedulh hukwa' huninzun t'eh, Yak'usda hoonli ho' hooht'ah, 'et huba 'alha' hot'e huba' hooht'ah. 'Ink'ez soo ts'ah'un dudzi huwa' hooli hoh hik'ah ts'ih hukwa hites'en, 'en zeh bula' tenilh. ⁷ Noah 'en chah Yak'usda buba 'alha' yint'ah. 'I be ndet 'aw chawhes'en whúnts'i, ndet Yak'usda 'uyúlhni, "Huwondle 'aw 'et whuz de whélt's'ulh." 'Et huwa whenuljut hoh ndi ts'i cho 'i 'uyínla. 'Et huwa Noah hikoo húdelhts'i, 'en ts'iyawh hubúlhyih. Ndet ndi ts'i cho 'uyínla, 'i bugha ndi yun k'ut nduhóolcho hoh dune huba nahesda. Nts'e na'a hoh be 'alha 'uhoont'ah be ts'ah'un na'a 'int'ah ts'inli, Noah 'en chah whuz na'a Yak'usda buba 'alha' yint'ah sulí, 'i be ts'ah'un dune inle.

Abraham buba 'alha 'uhoont'ah

⁸ Abraham, 'en chah Yak'usda ndi yúlhni, "Udun yun k'uz tonya. K'at lih t'eh njan yun k'ut 'et nye'hoolhdzun whutele." 'Et be 'alha 'uhoont'ah be Abraham whuz na'a yuk'úne' 'ust'en. 'Et nts'e teyalh 'aw nt'éoonízun 'et whunts'ih 'aw 'et tezya. ⁹ Be 'alha 'uhoont'ah, 'i be ndi yun yuts'u yoozi, 'i bube'hooldzun tele. 'Et njan yun k'ut 'uts'un keyah whut'en

unli, 'et whuz na'a njan yun k'ut usda. Bun bet zeh whut'i. Ndunnah Isaac 'ink'ez Jacob 'en chah 'en k'una'a bun be zeh huwhut'i. 'En chah ndi Abraham ye yuts'u náhezya, 'en bulh bube'ildzun whutele. ¹⁰ 'Et njan keyah 'ilhuz 'uwwhutet'ilh, 'et Yak'usda, 'en 'uhóonla, 'et Abraham huba ilh'i hoh bun be zeh 'ant'e inle. ¹¹ Be 'alha 'uhoont'ah, 'i be Sarah 'en chah Yak'usda ye ulhtus, 'i yutl'anaho'ai wulchan ka. Tube ye 'un uzulh 'aw buyaz hóle buba cha'hóot'ah. 'Et whunts'ih nts'e na'a Yak'usda yuts'ú hoozi, Sarah nt'eooninzun Yak'usda 'aw yula dootnih ghait'ah. ¹² 'Et huwa 'ilhunuh dune, 'en tube hoonyan k'et 'ants'i dazsai li'int'ah, 'et whunts'ih yé dinde hulai. Nduk sum 'et 'i bundineltsuk 'ink'ez taba sai, 'i 'aw oodólto ghait'ah, 'et 'uhuneltsuk.

Ndunnah 'uda Yak'usda huba 'alha' yint'ah, 'en ts'iyawh 'awhuz huba 'alha 'uhoont'ah hoh whulh yahadla

¹³ Ndunnah 'uda Yak'usda huba 'alha' yint'ah, 'en ts'iyawh 'awhuz huba 'alha 'uhoont'ah hoh whulh yahadla. 'Et ndai Yak'usda yé but's'ú náhezya, 'i 'aw butl'acháyizulh. 'Et whunts'ih ndai nus huho'en, 'et huwa 'aw nawh huba cha'hóot'ah. Hubudzi hóont'i hoh huhoontun. 'Ink'ez ts'iyannah 'uhutni, 'aw ndi yun k'ut whut'en chahílah. 'Ants'i ndi yun k'ut whuk'uhundelh ho' hint'ah. ¹⁴ 'Et dahutetsah whutsuh ndunnah whuz na'a yalhtuk, 'en soo ts'et gaih hoh ts'iyannah wheoobuhonulhtun, hedich'oh hubuyun k'ut 'et zeh hukwa' huninzun. ¹⁵ 'Et 'alha ndet yun k'ut whuch'a huzdel, 'et howu nuni hunudeh t'eh, 'et whuz nahutoodelh wule da. ¹⁶ 'Et whunts'ih 'o nus keyah hoonzoo hukwa' huninzun. Njan keyah 'uwuhúlhni, 'et yak'uz whuz'ai. 'Et huwa Yak'usda 'en neYak'usda hidáni. 'Ink'ez Yak'usda 'en neYak'usda hiyulhni, 'en 'aw hukwaya chailah, keyah whuti 'et huba lhaóodinla 'et huwa.

Israel hitsuh dedowh, 'en ndi be huba 'alha 'uhoont'ah

¹⁷ Be 'alha 'uhoont'ah, 'i be hoh da Yak'usda Abraham yóolhdzai hoh 'aw 'ilhunuh buye' Isaac Yak'usda bukw'uzdai k'eyilhti 'ink'ez Yak'usda ba yutuzelghelk ka. Ndet Yak'usda yuts'ú hoozi hoh buye' but's'ah hainde huteldlai, 'et ts'iyawh hóolhchoot. ¹⁸ 'Ink'ez whutsuh 'uja 'en Yak'usda Abraham yudáni, "Isaac 'en bugha nyédinde 'en ts'iyawh whusahátedulh." ¹⁹ 'Et whunts'ih Isaac, 'en Yak'usda bukw'uzdai k'eyitelhtelh whutsuh Abraham whunalnik Yak'usda daja yudáni. 'Et huwa 'et duninzun, Yak'usda 'en soo 'últus hoh Isaac dazsai t'eh, 'et whunts'ih yahadla tah dinaidutélhtilh. 'Ink'ez 'alha 'uhoont'ah, yahadla hanáyalhti li'yinla. ²⁰ 'Ink'ez be 'alha 'uhoont'ah, 'i be ndet ts'iyaintsuk whusaóotekulh ka, Isaac, 'en Yak'usda yoodalhtuk, ndunnah Jacob 'ink'ez Esau bulh but's'un wúzoo ka. ²¹ Be 'alha 'uhoont'ah, 'i be Jacob dawhénintsai hoh Yak'usda yoodalhtuk Joseph buye'kah but's'un wuzoo ka. 'Et dutuz nichandunuti hoh Yak'usda ts'un teni' nalhdzin. ²² 'Ink'ez be 'alha 'uhoont'ah, 'i be Joseph 'aw 'et buyiz lait'ah whéninle hoh Israel whudune Egypt yun k'ut whuch'a nahutedulh hoh hubugha hubulh yaíhtuk. 'Ink'ez but's'un 'i chah dahútelilh, 'et hubudáni.

Moses buba 'alha 'uhoont'ah

²³ Hoh da Moses whuzdli, 'en ski daldzoo, 'et huwa be 'alha 'uhoont'ah, 'i be be'abá 'ink'ez be'ama chah, hubudayi cho daja ni, 'aw hik'una'a cha'inil, 'et k'us tat sanun nduhóolyez 'et be'abá 'ink'ez be'ama 'et nduhínulh'i. ²⁴ Moses 'aw 'et k'énényi hoh Pharaoh butse', 'en buyaz hiyúlhni, 'et be 'alha 'uhoont'ah, 'i be nduhíyulhni 'ilhuz ch'a oobunésjoot. ²⁵ 'Et k'us Yak'usda, 'en bulh tube lhat hoontsi' dzuh notezut, 'et whuz na'a Moses 'utahahó'ai. 'Astl'iyaz lubeshi be hooté'ti, 'aw 'et ilah 'utahahó'ai. ²⁶ Christ 'en bugha ndunnah Egypt whut'en, 'en Israel hits'uh hainde hubuch'a yahalhtuk. 'Et Moses njan duninzun ndi buch'a yahalhtuk, 'et Egypt whuhubudayi cho daneltsuk sooneya, 'i ts'iyawh ba nus yinzoo ho' int'ah. Yak'usda, 'en nts'e na'a hoh hube'ildzun huba k'elhla whutele, 'et huba neóoni'ai, 'et huwa 'et ndúhoont'ah zeh Moses hukwa ités'en. ²⁷ Yak'usda chast'en, 'en whuz na'a 'ants'i ya'en hukw'u na'a 'uja, 'et huwa huba howa whulna whechatsaz. 'Et huwa be 'alha 'uhoont'ah, 'i be yun k'ut Egypt whuch'a nasja. 'Aw hubudayi cho ye yulh hunilch'e, 'i Moses 'aw yé chaniljut. ²⁸ Be 'alha 'uhoont'ah, 'i be Moses ts'iyaintsuk Yak'usda k'une' ust'en. 'Et huwa ndet koo 'uskai be hoodel'en, 'et lizas whutus lhuseya. 'Et huwa koo 'uskai be wheooduter'en, 'udechoo huwhuzdli, 'en ndun lizas buzoohlghelgh ghait'ah. ²⁹ Ndi ya too dulk'un, 'i Yak'usda huba lhch'a 'úyinla 'ink'ez yun whudezgi hoh be 'alha 'uhoont'ah, 'i be hik'ut naníndel. 'Et Egypt ba nehugan, 'en chah huba huntezdel hoh ts'iyawh too hubangan.

'Uda lhanah huba 'alha 'uhoont'ah, 'i be whuch'a' honílhde

³⁰ Be 'alha 'uhoont'ah, 'i be Jericho keyah 'et skwunlai 'o 'at nat dzin 'et whunahudedulh hoh khunyas hukw'elh'az ndi tse dutai, 'i whunasá'a, 'i nanánkat. ³¹ Be 'alha 'uhoont'ah, 'i be ndun ts'eke 'ul'en, Rahab hiyúlhni, 'en ndunnah Moses ba nunúl'i, 'en bula' tenilh ka bukoo dábininla. 'Et huwa ndunnah Yak'usda k'unucha'ust'en, 'en 'aw hubulh dachaltsal. ³² 'Aw 'et njan lhe'whultsuk be 'alha 'uhoont'ah k'une' hust'en, ndunnah hulai k'et 'aw ts'iyawh

hubugha nuhwudóosni ghait'ah. Gideon ndet 'uhóonla. Barak 'en chah. Sampson, Jephthah, David, Samuel, 'ink'ez nus whunilh'en, 'en ts'iyawh, ³³ be 'alha 'uhoont'ah, lhelhdun keyah whut'en, 'en chah ts'iyawh buch'a' hunilhde. Ndet ts'ah'un na'a 'uhoont'ah, be 'alha 'uhoont'ah, 'i be 'uhuhóonla. Ndet Yak'usda but's'ú hoozi, be 'alha 'uhoont'ah, 'i be bube'ildzun whutele t'ehoninzun. Be 'alha 'uhoont'ah, 'i be Yak'usda ndi khunaiti, lion hiyúlhni, 'i hizek lht's'una' hoonla hubundóolhdah whuch'a. ³⁴ Be 'alha 'uhoont'ah, 'i be kwun dez'kun, 'i chah nahinelhno. Yak'usda ch'a hudetni, 'en tes cho be hubuhuteghan inle, 'et whunts'ih be 'alha 'uhoont'ah, 'i be buch'a hudujih. Lahit'ah 'en chah 'i be ulhtus nahusdli. Lhuhutedúghan ts'ih hutezdel hoh 'et chah be 'alha 'uhoont'ah, 'i be hilhtus suli. 'Et whuz na'a hubulh lhúhudugan, 'en chah hubube oonújut hiyida'ai 'et whuz na'a whenábuhunanyoot. ³⁵ Be 'alha 'uhoont'ah, 'i be bulunah ts'ekoo bughu yahadla chah zeh dinahudidel 'ink'ez bughu nahundel. 'Ink'ez 'uyoon chah dzuh nubuhulhdeh, 'et whunts'ih be 'alha 'uhoont'ah, 'i be zeh hedich'oh 'aw hubula nahudutetnih hukwa cha'hunízun. 'Et 'o nus hoonzoo hukw' na'a dinahudutélelh 'et nahohoot'éalh. ³⁶ 'Et 'uyoon, 'en bughu hedlo 'et hoh hubuhóolhdzai, 'Et bulunah hubuhoolhtsas. 'Ink'ez bulunah t'oolh be hubuhulghel 'ink'ez tsak'ebuha'ai. ³⁷ Bulunah tse be hubuhangan. Bulunah dugwt be buyust'e tánuhidezghut. Bulunah chah tinta' hutet'ilh whuts'un bonalht'uk. Bulunah tes cho be hubuhangan. 'Ink'ez bulunah ndai khunai zuz, sbai teh, sheep teh, 'i ts'iyawh lhelhyoo zuz 'i zeh be dune hinli. 'Ink'ez 'ants'i hoh nuhudelh. Hik'u khútena, 'i whunts'i chahuyít'i inle. Dune dzuh nobuhulhdeh. Lhat hoh hoontsi' k'una'a ne'bahalh'en. ³⁸ 'Et ndunt'ah 'aw ndi yun 'i whunts'i huba soo cha'yildzoo. 'Aw dune chahóot'ih 'ink'ez dzulh tah hoh lhelhts'un náhutudulh. Tse 'an teh k'us yun 'an teh, 'et huwhut'i. ³⁹ 'Et ndunnah ts'iyawh be huba 'alha 'uhoont'ah, 'et huwa hoonzoo k'una'a bughi yaintuk. 'Et whunts'ih ndet hubuts'u hoosdzi, 'aw butl'acháhoozulh. ⁴⁰ Whuz na'a nuwheni ts'iyawh nus t'eh, Yak'usda 'o nus hoonzoo neba' 'uhóonla. 'Et whuz na'a ndunnah ts'iyawh nuwheni ts'uhoolah t'eh, ndet hoh Yak'usda but's'ú hoozi, ne'et 'aw ts'ah'un na'a lhadílya hoole ghait'ah.

12

Neba 'alha 'uhoont'ah, 'i be lhghu naztoolghas

¹ 'Et huwa ndun whudutésnilh, ndunnah hubugha 'un whudani, 'en Yak'usda be 'ut'en k'ah whunéhunulhtun, 'en hulai k'et, nenat nduhóolcho 'ants'i kw'us li'hint'ah. 'Et huwa ndai neba ndaz, 'i k'ah nenilht'uk, 'i 'ink'ez ndi lubeshi 'aw huwa chahoolna hoh nélhghel, 'i ts'iyawh 'un uztoolhdelh. Ndi Yak'usda ba lhghu naztulwas, 'i neba níwhults'ut hoh howa wulnah whunts'i soo cho wulh ts'ooyin hoh uztoolghas. ² Netsuh ts'ih Sizi Gri uznoolh'en. 'Aw 'en zeh neba bé 'alha 'uhoont'ah dant'ah, 'en ts'ah'un na'a whunéhunulhtun 'int'ah. 'Ink'ez ndi yun k'ut usda, 'et ye khuna, 'en nduhóolcho hoh neba 'alha 'uhoont'ah neba lhaodulh'ih 'int'ah. Nus de ye whúntelhnik, but's'un yékulh, 'et whunts'i lhdualahgus yulh ínyin inle. Ndi yugha hooya suli, 'i huba 'ants'i 'uhoont'ah inle. 'Ink'ez Yak'usda bukw'usúda cho dezti, 'et nalhni ts'ih nátl'adeda.

Yak'usda khunek yé nelh yailhtuk, 'i khun teh 'ants'i nuhwhuba 'oot'e gunih

³ 'Et Sizi daja 'et soo cho hubugha nuní noohzut. 'Et ndunnah lubeshi 'ulh'en, 'en ts'iyawh hich'a detni, 'et whunts'ih soo whechátsaz. Nuhwheni chah ts'iyawh 'en zeh bughu nuní nahdeh t'eh, 'et 'aw ninoohtsilh ghait'ah 'ink'ez 'aw lait'ah wahle ghait'ah. ⁴ Nuhwheni lubeshi ch'a ne'ah't'en, tube nuhwhuba huwa whúlna 'et whunts'ih 'aw hukw'e yachazadla. ⁵ 'Et Yak'usda khuneki be buye'kah k'una'a nohwhulh 'et whunaoodelhúnah. Ndez na'a nuhMoodihti 'ún whúlhni,

"Suye'kah ndi khunek be nohwhulh yalhtuk, 'i 'ants'i wúlh'i gunih.

Ndet tinta' aht'ih hukwa' nuhwhúlhni t'eh,
khun teh nuhwhéyuh 'ustl'e' 'oohneh gunih.

⁶ 'Et ndunnah neMoodihti buk'entsi',

'en ts'iyawh khuneki be hubulh yalhtuk.

Ndunnah buzkehkah hinli,

'en ts'iyawh huboolhtsas."

⁷ 'Et Yak'usda khunek ulhtus, 'i be nohwhulh yalhtuk, 'ink'ez whulh whechátsaz t'eh, 'et t'eh buzkehkah k'una'a nuhwhunulhyeh. 'Et ndan dune simba 'int'ah buye' tink'us 'uja t'eh yuts'ahachahós'al? ⁸ 'Et nuhwheni nehyelh hoh Yak'usda khunek ulhtus, 'i be nohwhulh yalhtuk t'eh, 'ink'ez ts'iyawh whuz na'a 'ilhunuh ts'inli hoh uzneyzi, 'et 'aw buk'unucha'zaht'en t'eh, 'aw nuhwhé'abá hoolah, 'ink'ez Yak'usda buzkeh chahlah hoh 'ah't'ah. ⁹ Njan 'o 'un chah 'ún whudusni, ndi yun k'ut ne'abákah 'en khunek ulhtus, 'i be neyulh yahalhtuk 'ink'ez buk'úne' ts'ust'en. 'Ink'ez Yak'usda, 'en neyégha be'aBá ts'utni, 'en ne'aBá degha nus dézti 'int'ah, 'en 'o nus butl'a'úzdúoolyelh ts'ah'un na'a ndi yun k'ut

uzdutelts'ilh huba. ¹⁰ Ndi yun k'ut ne'abákah 'astli'yaz zeh hubulh 'uts'int'ah, ndet degha nus neba hoonzoo, 'et t'ehoninzun, 'et whuz na'a khunek ulhtus, 'i be nehunelhyi. 'Et whunts'ih Yak'usda ne'aBá, 'en ndet 'ilhuz wheni neba whutezoo k'una'a khunek ulhtus, 'i be nelh yaillhtuk. 'Et 'en k'una'a 'o 'un lubeshi neghu hoolah ts'ooole ka. ¹¹ Nts'e na'a ts'ah'un na'a khunek ulhtus, 'i be nelh yaintuk hoh uznezyi, whulutah teh whuts'uzdutnik, 'et whunts'ih hukw'elh'az 'et whuz na'a uznezyi t'eh, 'et t'eh soo ts'ah'un 'int'ah dune uztele hoh Yak'usda nalh ts'ah'un na'a lhts'un uztet'ilh.

Yak'usda bughunek khun teh bula doohtnih gunih

¹² 'Et huwa 'ants'i ninéhtsai li'ah't'ah hoh nuhgan naintle 'ink'ez nuhwugwut chah lait'ah suli t'eh, soo 'o 'un 'oohneh ghait'ah hoh ulhtus naoolhtsilh. ¹³ Nuhke ba ti chah lhk'odez'a naholhtsilh. 'Et whuz na'a ndunnah nuhtah lahit'ah 'en tinch'a hooya ghait'ah, 'et k'us soo hihltus na'hutede. ¹⁴ Ts'iyannah ts'un ts'ah'un na'a lhts'un 'ooh't'e hukwa' 'ooh't'en. Lubeshi bughu hoolah dune wahle hukwa 'ooh't'en. 'Et whu'et, 'aw neMoodihti ts'oo'en ghait'ah. ¹⁵ Soo cho nuhtah nuhwhenich'oh nuhwulhutsinkah bughohle! Doo ka sih Yak'usda ye unzoo, 'i hiye ghoya. 'Et whuz na'an nduhooja t'eh, 'et bulunah nuhwutah ntsi' bulh nuni hunuzut wule. 'Et ndihint'ah t'eh, 'et 'en hubugha lhanah ntsi' bulh nuni hunuzut hutele ho' hoont'ah. ¹⁶ Doo ka sih nuhtah bulunah, 'uyoon ts'ekoo k'us dune bulh lubeshi wulhchoot whuts'u nooh't'uk. K'us Esau k'una'a 'en Yak'usda bughohdloh. 'En 'udechoo whuzdli 'int'ah 'ink'ez ndai be'abá yuts'u yoozi, 'i bube'ildzun yutele, be'abá nahuyoosdzi, 'i didut buts'itekulh, 'i 'uyinla, 'ilhuh yute'ah zeh k'elha yutez'ai. ¹⁷ T'eoonáhzun hukw'elh'az dáhooya. Ndai hoonzoo yuk'eoot'e'ah hukwa' ninzun, 'et whunts'ih be'abá yuch'a nalhú'a. Lhat hoh huwintse, 'et whunts'ih 'aw be'abá dudeni nahudunoo'ah ghait'ah. Nts'oh dát'en whunts'i, 'aw hiba lhk'enaóodoo'ah ghait'ah.

Ndunnah yak'uz húdelhts'i, 'en hubuts'un ts'utelwus

¹⁸ Ndez whuz na'a 'un whudóosni hukwa 'ust'en, ndunnah Israel buzkehkah, 'aw 'en buk'una'a ilah hoh ndi dzulh Sinai* dune yut'aghunah, 'et 'aw whuz chatéysal. Ndi dzulh ndulhcho dezku'un, 'ink'ez tsahólhgus cha' hoont'ah. 'Ankw'us 'aw hoonli honoolh'en ghait'ah, 'ink'ez nilhts'i dus cho chah hoonli. ¹⁹ 'Et Yak'usda ba be ts'újih, 'i chah hidíts'o 'ink'ez Yak'usda yalhtuk, 'et chah hódants'o. 'Et ndunnah yudánts'o, 'aw 'o 'un hidóots'o hukwa cha'humizun. 'Et whuz na'a hits'u tedudli 'aw 'o 'at huwhudutéts'o hukwa cha'humizun 'et huwa. ²⁰ 'Et Yak'usda khunek butl'a ída'ai, 'et 'aw whulh hooyen ghait'ah 'et huwa. Khunek njan ndutni, "Khunai whunts'i ndi dzulh yut'agheznai t'eh, 'et t'eh tse be hizóolhghel, k'us k'aza be hiyooch'ih." ²¹ 'Et huho'en hoh tube whehunelhúoot. Moses 'en whunts'i, "Wenlhujut k'et duhlúduz," ni. ²² 'Et ndi dzulh bugha nuhwuzdáni, 'aw whuz chatahdulh. K'us ndi dzulh Zion ts'utni, 'i buts'un lhghadahdel. Yak'usda khuna, 'en bukeyah whuti 'uhooht'ah. 'Ink'ez keyah whuti Jerusalem ts'uwhútni, 'et yak'uz whuz'ai. 'Et lizas hulai k'et, 'aw uzdooni ghait'ah. ²³ 'Ink'ez ndunnah Yak'usda huba 'alha' yint'ah, ts'iyannah 'ilhunahuwúdulh huba whuz'ai. Ndun 'udechoo whuzdli 'en oosdzi, 'en ndunnah bube'ildzun yinli, 'en yak'uz ts'ih huboozi 'uk'une'úsduzug, 'en chah 'et húdelhts'i. Yak'usda 'en ts'iyannah ba naheyelh, 'en chah 'et usda. 'Ink'ez ndunnah ts'ah'un na'a lhadúlya, 'en hubuyegha, 'i chah 'et 'int'ah. ²⁴ 'Et Sizi ndi k'an khunek neba lhaíndinla, 'en neba hubéguz unli, 'en chah 'et usda. 'Ink'ez ndi 'uskai neba nadélt'ik, 'i be nelubeshi ts'iyawh neba hoolah suli, 'et nts'e na'a Abel yuzelghighi hoh buzkai yun nadélt'ik, 'i 'o nus hoonzoo néwhunelhtan, 'et chah 'et whuz'ai. Ndi ts'iyawh 'et whuts'un whets'elghaz.

Yak'uz whuts'un nelh yaillhtuk ts'oozólhts'ai

²⁵ 'Et Yak'usda nohwulh yálhtuk, 'et hubugha nohwulh yalhtuk, khun dah doohtni gunih! Whunulh'en, ndi yun k'ut 'et ndúbulhni, 'et whunts'ih 'aw hik'unucha'it'il, 'et huwa hoolhtus hoh huba nahezya. K'an 'et yak'uz whuts'un nelh yaillhtuk, 'en buch'a nats'ulhúya t'eh, 'et 'o nus dáwhultus hoh neba nahutedeh. ²⁶ Hoh da Yak'usda hubulh yaillhtuk hoh ndi yun dulduz. 'Ink'ez doo chah zeh nets'ú hoozi hoh njan ndútni, "Doo chah zeh ndi yun dutelduz. 'Aw 'i zeh ilah, yaz chah ndúhoolcho hoh whudútelduz." ²⁷ 'Ink'ez ndi khunek, "Chah zeh," 'utni, 'et ndez na'a néwhunulhtun, ts'iyai ndai 'ulya, 'i ts'iyawh dutelduz. 'Et whuz na'a dullhuk, 'i hoolah whutele. 'Et ndai 'aw ndoollhuk ghait'ah, 'i 'ilhuz wheni 'utet'ilh. ²⁸ Nts'oh huwa hoh nts'e Yak'usda hubudayi cho unli, 'et 'aw nughóotnah ghait'ah. 'Et nets'u whutekulh. 'Et huwa ndi ye unzoo, 'i be ts'ah'un na'a hoh Yak'usda, 'en neba dézti 'ink'ez neba be óonujut, 'en huba ne'ts'oot'en. ²⁹ Nuwheni neYak'usda kwun ts'iyai delhk'un, 'i 'et ndunt'ah ho' 'int'ah 'et huwa.

* **12:18** 'Et 'udechoo khunek nuwhuba lhaíndinla, 'I k'ut whunulh'en, Moses dzulh Sinai nusiya inle, ni ho' 'utni. Exodus 19:21-22, 20:18-21, Deuteronomy 4:11-12, 5:22-27

13

Ndi yun k'ut lubeshi buch'a nasulhúye

¹ 'Ahoohlhyez nuhwhulhutsinkah hubuk'eoohsi'. ² Ndunnah whutsuh da chabuzeh'en, hoonáht'i hoh nuhkoo dáboohlelh. Bulunah lizas tusih 'uhint'ah, 'aw t'eeonuzahzun 'et huwa. ³ Ndunnah Sizi Gri hunedulh 'et huwa tsak'eeobaha'ai, bunalhúnih 'ink'ez bula 'ooht'en, 'en bulh tsak'edahla lí'ah't'ah 'et huwa. Ndunnah be dzuh neoobahalh'en, 'en chah whuz na'a nuhwhubeni tah 'obulhdzun. Ts'iyawh 'ilho just'e zeh 'uts'int'ah 'et huwa. ⁴ Lghuzdelhtsi, 'i ts'iyannah ba' hoont'ah, 'ink'ez whudézi. Lghu húdelhtsi whu'iz hoh dukw'usti k'ut dawhut'en, 'aw chahóotsi' ho' hoont'ah. 'Et whunts'ih ndan 'uyoon ts'ekoo k'us 'uyoon dune bulh tinta' 'uhut'ih, 'en Yak'usda huba nahuteyeh ho' hoont'ah. ⁵ Nts'e na'a ndi yun delhúts'i huwahli. Ndai k'an 'et aht'i, 'i 'o nus 'uyoo ka daoohtni gunih. 'Et huwa neMoodihti njan ndutni, "Aw nuhghu toosya ghait'ah, 'ink'ez nuhla doosnih ghait'ah."

⁶ 'Et huwa nedzi ulhtus whé 'uzdooni, neMoodihti 'en nela 'ut'en 'int'ah.

Dune danehulh'en 'et whunts'ih 'aw chats'unoolhújut.

Ndunnah lhelhts'un na'a nehóodulh'eh, 'en buk'une' 'ooht'en gunih

⁷ Yak'usda ba 'ilhunahuwúdulh ndunnah nuhtsuh whudélhdzulh, 'en bunaoolhúnih. 'En 'uhint'ah Yak'usda bughunek be nohwhulh yáhalhtuk. Nts'e na'a niz dak'ez ndi yun k'ut hudélhtsi'da hubulh dáhoaja, 'et howu nuní noohzut. 'En hiye 'alha 'int'ah, 'en buk'una'a ne'ooht'en. ⁸ Sizi Gri 'en hulhda, k'an dzin, 'ink'ez 'ilhuz wheni chah, 'et zeh ndunt'ah. ⁹ Lhelhts'un na'a 'ink'ez hootsi' hukw'u na'a dune hohodulh'eh, 'en huboozóolhts'a 'ink'ez buk'une' 'ooht'en gunih. Ndai Lizwif hiya'alh, 'i ants'i unli ho' 'int'ah. 'Et ndunnah buk'una'a 'uhut'en, 'aw bula 'uwhudóneh ghait'ah. 'Et huwa ye unzoo, 'i be whuz na'a nedzi yuh dez'ai t'eh, 'aw 'et zeh ts'ah'un 'uhoont'ah. ¹⁰ Nuwheni Sizi Gri buba 'alha' yint'ah 'uyoo Yak'usda buk'uzdai ts'it'i. 'Ink'ez ndai Yak'usda buk'uzdai neba k'einkat, 'i ts'oo'alh huba' hoont'ah. 'Et whunts'ih ndunnah Lizwif ndi yun k'ut bun cho but'ah ne'hút'en, 'aw hiyoo'alh ghait'ah, 'aw whuz na'a but'achahoolts'ulh. ¹¹ 'Et náwhulnuk degha nus dezti khunai buzkai, ndet degha nus whudézi, lubeshi ba 'et whuz dainínkai. 'Et ndi khunai buyust'e, dune whut'i, yoo 'az ts'ih hidélhk'un. ¹² 'Et whuz na'a zeh Sizi keyah whuti whunanesdút'oo dati 'o 'az ts'ih 'et dzuh nuhiyulhdzut. 'Et hoh dich'oh duduzkai, 'i be Yak'usda ba 'udun neniníla. ¹³ 'Et huwa ts'uwhut'i 'o 'az ts'ih, nts'e Sizi Gri 'int'ah, 'et nuwheni chah 'et 'uts'oot'e. 'Ink'ez nts'e na'a hoh hooya hiyulhtsi, nuwheni chah ts'uhóolhchoot. ¹⁴ 'Et ndi yun k'ut 'aw keyah 'ilhuz 'uwhutet'ilh hoolah ho' hoont'ah. 'Et whunts'ih ndet keyah 'ilhuz 'uwhutet'ilh, 'et whuz de whéts'ulh, 'et zeh hukwa ts'ités'en. ¹⁵ 'Et huwa Sizi Gri boozí bugha 'ahoolhyez Yak'usda chanailya uzdooni. 'Et whuz na'a Yak'usda uzdoólhti. ¹⁶ 'Et hoonzoo 'uwulh'en 'ink'ez ts'iyawh 'ilho lhula' daht'en, 'et khun whunaoodoolhúnah gunih. 'Et whuz na'a Yak'usda bugha whut'aih, ts'iyawh 'et tube hóont'i. ¹⁷ Nuhtsuh whudélhdzulh, 'en hubuk'une' 'ooht'en 'ink'ez hubut'á' dudoolhúyelh. 'En nuhul nuhwhuba ghuhindli 'uhint'ah 'et huwa. 'Ink'ez nts'e na'a nuhwhuba highunli, 'et hube 'ut'en whugha Yak'usda but huteyin. 'Et huwa soo ts'ah'un na'a niwhúnah'aih. 'Et whuz na'a ndaht'en t'eh, 'et ndunnah whutsuh whudélhdzulh huhót'i hoh Yak'usda ba nuhghú hoole huba' hoont'ah wule. Khun teh nuhwheni nuhgha khunani wahle gunih. 'Et ndaht'en t'eh, 'et zeh nuhwhuba whutézoo.

Neba tenadoohdli

¹⁸ Ts'ah'un na'a t'ets'oninzun neyuh ts'ih bugha t'ets'oninzun, 'i 'aw hoonliyaz hootsi' bughah hoolah. Whuz na'a zeh ts'otétun hukwa 'uzninzun. Whuz na'a neba tenadoohdli. ¹⁹ 'Et 'o 'un chah nuhts'u tédusdli, suba tenadoohdli, 'et sih 'aho Yak'usda nuhts'ó t'lanasoolhtelh.

Ye unzoo, 'i nohwhulh 'óot'e

²⁰ 'Aw 'et Yak'usda 'en be nedzi ts'ah'un 'oot'e negha óoni'ai, 'en neMoodihti Sizi Gri buzkai be neba nadélt'ik, 'et huwa yahadla tah dinaidilhti. 'En sheep ghunli ncha 'int'ah. 'Ink'ez ndi 'uskai 'i be 'ilhuz wheni khunek neba lhaidinla, 'i ho' 'int'ah. ²¹ 'Et Yak'usda soo ts'ah'un na'a lhadulya nuhtelhtsilh, 'et whuz na'a nuhwhuba tenadutesdli. 'Et hoh Yak'usda nts'e na'a nuhts'u hukwa' ninzun, 'et ts'iyawh huba 'uwhála. 'Ink'ez ndai Yak'usda Sizi Gri be'et nuhwhuba 'uwulh'en, 'et 'uhóonla t'eh, 'et nduhóolhcho hoh hootét'i. 'En zeh 'ilhuz wheni buba ts'odóolhti. 'Et ndoh honeh. ²² 'Et sulhutsinkah, soo cho nuhts'u tédusdli ndi khunek 'i be nus nóoht'uk, 'i ts'iyawh soo cho óozelhts'ai 'ink'ez nuhwhuba 'alha 'oot'e. 'Et whunts'ih 'aw lhat 'uk'échá'iduguz. ²³ Nelhutsin Timothy tsak'esda, 'en 'aw 'et tinánja,

'et t'ewhunoohzeh hukwa' nuszun. 'Et 'aho whusanája t'eh, 'en bulh nuhts'un tadút'us.
²⁴ Nuhtsuh whudéldzuhl chah, 'ink'ez dune Yak'usda bube'ildzun, 'en chah suba dahooja
budóohni. Yun k'ut Italy whut'en, 'en chah dahooja nuhwuhútni. ²⁵ Nuhwheni ts'iyawh ndi
Yak'usda ye unzoo, 'i nohwulh 'oot'e nuwhuba hukwa' nuszun. 'Et ndoh honeh.

James Ndi Dustl'us Yuk'e'ánguz

Ndunnah Lizwifhuba 'alha' hoont'ah James dahooja hubulhni

¹ Si James, Yak'usda 'ink'ez neMoodihti Sizi Gri ba 'ulhna usdli. Nuhwheni Lizwif, ndunnah Sizi Gri huba 'alha' 'uhint'ah, nuhwhukeyah nuhwuch'a nuhwhuts'unézyoot ahli, ndi dustl'us nuhts'ó k'e'ezges, 'i be dahooja nuhwhudúsní.

Dzuh nahudeh huwa hohóodul'eh

² Sulhutsinkah lhat hoh lhelhts'un na'a dzuh nahzut t'eh, 'et whunts'ih hoonah't'i hoh whuz na'a zeh 'ooht'e'. ³ T'ewhunáhzun nts'e na'a Yak'usda but'aninehtan hoh lhelhts'un na'a dzuh nahzut, 'et whunts'i soo ulhtus hoh nudoolhúya, 'et whuz na'a hodoolhú'eh. ⁴ 'Et whunts'ih nts'e na'a Yak'usda ba ulhtus sahli, 'et 'alha' soo ts'ah'un na'a ts'iyawh hodoolhú'eh. 'Et t'eh Yak'usda ba lhadúlya wahle. 'Ink'ez soo ts'ah'un na'a 'ut'en k'ah lhaóodahla. 'Et whuz na'a Yak'usda ba hoonliyaz wuh'et cha'ánnil. ⁵ 'Et nuhwheni bulah Yak'usda be whútnih 'aw ts'iyawh chaht'ih t'eh, 'et sih Yak'usda hika hiyoodolhkut. 'Et ndan hika hiyoodulhkut, ye dinzoo 'i bugha ite'ah. 'Ink'ez 'aw hooya huboolhtsilh ghait'ah. ⁶ Ndun hiyoodulhkut, bé 'alha' hoont'ah 'i be hiyoodolhkut. Khun teh huba nawh 'uhot'e gunih. 'Et ndun ba nawh 'uhoot'ah, 'en nts'e na'a nilhts'i too hubulh nudutun li'hint'ah. ⁷ 'Et huwa ndunt'ah dune khun teh neMoodihti 'aw hoonliyaz bugha óote'ah hunooin gunih! ⁸ Ndunt'ah, 'en 'aahoolhyez nawh 'uhet'ilh hinli.

Hoonzoo 'int'ah 'ink'ez tehul'en chah Yak'usda ba lhgha zeh 'uhint'ah

⁹ Ndun nelhutsin tehul'en, 'en Yak'usda dune dega nus ncha yulhtsi, 'et huwa huhót'i huba' hoont'ah. ¹⁰ 'Et whunts'ih soo de'a 'int'ah duzooneya be nduk 'ududildzun, 'en Yak'usda yuk na'yinla, 'et huwa hót'i huba' hoont'ah. 'Et t'ewhunónzin nts'e na'a 'indakyaz dátsaih, whuz na'a zeh ye soo de'a 'int'ah, 'i bugha khoona ghait'ah. ¹¹ 'Et sa ha'aih teh 'i be tube whunizulh. 'I be 'indak chun dugih teh, bindak nakuk. 'Et lhe'ildzoo nduwút'en 'et whunts'ih hoolah 'ulhiih. 'Et whuz na'a zeh ndunnah soo de'a 'int'ah 'awhuz dude 'ut'en 'uhulh'en hoh dich'oh whunts'i huholah hutele.

Dzuh nuts'uzut 'et whunts'ih Yak'usda buk'ets'intsi'

¹² Ndan ts'óolhdzih, 'et whunts'ih 'awhuz whechaitsaz, 'en dega nus hoonzoo hubugha whutelts'ulh. 'En 'int'ah 'ilhuz ye khútena bughá whunt'ai. Ndet whuch'a nílhde, 'et chah hubugha whútelts'ulh. Ndun neMoodihti yuk'entsi, 'et whuz na'a but's'ú hoozi. ¹³ 'Ilhunuh lubeshi ts'unínt'uk t'eh, khun teh Yak'usda sóolhdzih dooni gunih. 'Aw Yak'usda ntsi' be ólhdzih ghait'ah. 'Ink'ez dich'oh chah whuz na'a zeh 'uyoon hoontsi' ts'ih bunoolht'uk ghait'ah. ¹⁴ 'Et whunts'ih nuwheni 'ilhunuh ts'inli hoh nuwhenich'oh hukwa' uzninzun, 'et huwa lubeshi 'uztelh'ilh ts'ih whuts'úznint'uk. ¹⁵ Nduts'ut'en t'eh, 'et nts'e na'a hukwa' uzninzun k'una'a hoh lubeshi 'uts'ulh'ih, 'et lubeshi whe'whudit'en. 'Et lubeshi 'uts'ulh'en t'eh, 'et 'i bugha dats'útsaih. ¹⁶ Sulhutsinkah nuwhuk'esi, nanooh't'ah gunih! ¹⁷ Ne'abá, 'en yak'uz be whét'en, 'i ts'iyawh 'uyinla. Ndi be whét'en, 'i whulatah teh 'uts'un na'a na'ut'ih 'ink'ez tsakwúts'it li'whulh'ih. 'Et whunts'ih ne'abá 'aw nawh 'uninzun unli ilah. 'Et huwa ndai ndus de nega whúninla, 'et unzoo 'ink'ez soo ts'ah'un 'uhoot'ah, 'i ts'iyawh 'en zeh but's'un ha whúkat ho' hoont'ah. ¹⁸ Nts'e na'a dich'oh hukwa' ninzun, 'et whuz na'a 'uja hoh ndi khunek 'alha' 'int'ah, 'et 'i be doo chah ts'uwuhzdli. 'Et whuz na'a ndúhooja ndai 'uyalh'en, 'i hubutah 'et hoh nuwheni 'udechoo bube'ildzun ts'uzdli.

Ilhunuh ahli hoh soo cho 'udooh'ts'o

¹⁹ 'Et huwa sullhutsinkah nuwhuk'esi, 'ilhunah ahli hoh Yak'usda bughunek soo cho dooh'ts'o. Sayaz hukw'u nuní nuhzut k'an zeh yatulhtih. 'Et khun hunoolhúch'eh gunih. ²⁰ Whuzáhke t'eh, Yak'usda ye ts'ah'un na'a 'int'ah, 'aw whuz na'a buk'une' ooht'en ghait'ah.

Yak'usda bughunek buk'une' aht'en 'ants'i oozéhts'ai ilah

²¹ 'Et huwa ts'iyai whudutsun k'una'a ne'ah't'en, 'ink'ez lhat hoh tink'us na'a ne'ah't'en, 'et 'i ts'iyawh whula dooh'tnih. 'Ink'ez Yak'usda bughunek nuhyudánde, 'i nuh'dzi yuk úlhdzun hoh wúlhchoot. Ndi khunek 'i be zeh nuhtelhyih. ²² 'Et nuhwheni Yak'usda bughunek daja ni, 'et whuz na'a buk'une' ooht'en. 'Ants'i oozéhts'ai ilah. 'Et ndaht'en t'eh, nuhwhenich'oh na'dunaht'ah hoh aht'en. ²³ 'Et ndun ndi khunek 'ants'i hidits'o 'et whunts'ih chayúlhchoot, 'en ndunt'ah, 'en 'uhint'ah, ndai be na'uzdunul'en 'i be na'hundunul'en, whuk'ah ts'ih 'uhint'ah. ²⁴ Dich'oh na'dunul'en, 'ink'ez 'et nts'e na'a nul'en, 'et 'aw 'et whunaoodilnah. ²⁵ 'Et whunts'ih Yak'usda bughunek lhaóodinla, 'i be lubeshi ch'a nanenilhti, ndunnah 'en soo cho hik'eyalhtuk 'ink'ez whunachahodulhúnah, 'ink'ez daja ni 'aahoolhyez hukw'úne'

hut'en t'eh, ndan nduhut'en, 'en 'et whuz na'a dude 'ut'en k'ah huwa dega nus hoonzoo hubugha whutelts'ulh. ²⁶ Ndun nuhtah Yak'usda ba ne'hut'en huninzun, 'et whunts'ih 'aw bughunek bugha cha'oolih, 'et dich'oh zeh na'hundunut'ah. 'Et 'ants'i 'et ndunt'ah Yak'usda ba hut'en, 'et 'aw hoonli चाहóolah. ²⁷ 'Et nts'e na'a ts'ah'un 'uhoont'ah, 'ink'ez 'alha' uhoont'ah hoh Yak'usda ne'aBá, 'en ba né'ts'ut'en, 'et njan dúhoont'ah: ts'unah 'ink'ez tsandelh, 'en dzuh nahudeh huwa buzih nuts'oodelh huba' hooht'ah bula ts'oot'en ka. 'Ink'ez ndi yun k'ut dawhút'en lubeshi 'ul'en, 'i bugha dutsun wahle gunih.

2

Khun teh 'ilhunuh, 'en 'uyoon 'o nus unzoo ho' 'int'ah noohzun gunih

¹ Sulhutsinkah, neMoodihti Sizi Gri whudézi, 'en nuhwhuba 'alha 'int'ah, 'et huwa khun teh 'ilhunuh 'uyoon 'o nus unzoo noohzin gunih. ² Khunyez tulih 'ilhunuh dune nuhluglez nuhwhughut danínya hoh lande'ai dézti, 'i nidelya, 'ink'ez naih unzoo, 'i be dune unli. 'Ink'ez 'et zeh 'uyoon dune, 'en chah yunéyalh. 'En tel'en 'int'ah, 'ink'ez bunaih untsi, 'i be dune unli. ³ 'Et ndan bunaih unzoo hoonáht'i hoh, "Njan hoonzoo sinda," dahni. 'Et ndan tel'en, 'en 'udahni, "Ants'i njan yun neke zih sinda, k'us 'ants'i hoh sinyin." ⁴ 'Et whuz na'a ndaht'en t'eh, 'et 'alha nuhwheni 'ilhunuh 'en 'uyoon 'o nus unzoo nahzun. 'Et whuz na'a nuhwheni untsi, 'i be 'uda huba nahuzáhya. ⁵ Sulhutsinkah nuhwhuk'esi, soo zúlhts'ai. Ndi yun k'ut t'ehul'en, ndan Yak'usda k'entsi, 'en 'utahábanla huba 'alha' hooht'ah 'i be soo hude'a 'int'ah hubulhsti. 'Aw ndi yun k'ut be 'uts'int'ah ilah. 'Ink'ez nts'e Yak'usda hubudayi cho unli, ne'aBá yit'i, 'i hubugha íteleh 'et 'i hubugha ítekuh. 'Et whuz na'a zeh ndan yuk'entsi, 'en chah hubugha íteleh. ⁶ 'Et ndan tel'en nuhghu ninya hoh buts'u dudelhúti. 'Et whunts'ih soo de'a 'int'ah, 'en hoonsti' hukw'u na'a ne'nohwhuhul'en. 'Ahoohyez nahéyelh but nenóhohugus. ⁷ Ndi boozu unzoo, 'i be nuhwhúhni, 'alha 'i hich'a yalhtuk. ⁸ 'Et Yak'usda nehubudayi cho, ndi bughunek netl'aída'ai, 'i neba 'uke'éánguz, 'et njan ndutni, "Nts'e na'a nuhwhenich'oh k'enedahtsi," 'et whuz na'a zeh 'uyoon buk'eoohsi." 'Et nduht'en t'eh, 'et soo' hooht'ah. ⁹ 'Et whunts'ih 'ilhunuh 'uyoon 'o nus unzoo nahzun t'eh, 'et lubeshi 'ahla hoh 'aht'ah. 'Et whuz na'a ndi Yak'usda bughunek netl'aída'ai, 'i whunówhunulhtun khunek k'unyis ahli. ¹⁰ 'Et ndi Yak'usda bughunek netl'aída'ai, 'i ts'iyawh buk'une'ts'ut'en 'ink'ez hoonstolyaz k'uzninyuz t'eh, 'et ts'iyawh k'uzninyuz ho' hooht'ah. ¹¹ Ndun 'et nendulhni, "Dune k'us ts'eke bulh tinta' ooh't'en gunih." Njan chah 'et ndutni, "Dune soolhghelg gunih." 'Et njan dúhoont'ah, 'uyoon 'at bulh tinta' cha'int'il t'eh, 'et whunts'ih dune sílhghih t'eh, 'et ndi Yak'usda bughunek netl'aída'ai, 'i ts'iyawh k'uninyuz ho' hooht'ah. ¹² 'Et huwa Yak'usda bughunek netl'aída'ai, 'i be lubeshi ch'a nenilhti, 'aw 'et nilhdukw hoh 'i be nuhwhuba nahutedeh noohzin. 'Et huwa 'et whuz na'a nuhwhenich'oh lhutah ts'ah'un na'a lhulh yaoolhútuk, 'ink'ez whuz na'a zeh ne'óoh't'en. ¹³ 'Et huwa ndet dzin tele neba nahutedeh whusawhútelts'ulh, ndan 'ugha techa'nízun, 'en bugha techa'nízun hoh Yak'usda yuba nahuteyeh. 'Et ndan 'uyoon bugha té'ninzun, 'en Yak'usda yugha te'untézeh hoh yuba nahuteyeh.

Be 'alha 'uhoont'ah, 'i 'ut'en unzoo be'et t'eh, 'aw hoonli cha'hóolah ho' hooht'ah

¹⁴ Sulhutsinkah, ndan dune 'utni, "Be 'alha 'uhoont'ah 'ust'i," 'et whunts'ih Yak'usda 'aw yuk'unucha'ust'en t'eh, 'i 'aw huba cha'hóozoo ho' hooht'ah! 'Et ndunt'ah be 'alha 'uhoont'ah soo butelhyih nahzun ih? 'Awundooh! ¹⁵ 'Et nelhutsinkah k'us neulhtuskah naih चाहít'i, k'us k'an 'et dzin huba whúnts'i, 'aw hiyoo'alh, चाहít'i t'eh, ¹⁶ 'et 'ilhunuh nuhwheni nuhtah ndo búhni, "Soo óoh't'e. Noohzul. Soo cho na'ooht'ah." 'Et whunts'ih ndai hoonli hiye ndunidzit, 'i 'aw hiye bula cha'ánnil t'eh, nts'e na'a nuhwhuba whutézoo? 'Aw khunek zeh hik'ekhoóna ghaít'ah. ¹⁷ 'Et whuz na'a zeh dune ndutni, "Be 'alha 'uhoont'ah ust'i," 'et whunts'ih Yak'usda 'aw yuk'unucha'ust'en t'eh, 'aw hoonliyaz chailah. ¹⁸ 'Et whunts'ih 'ilhunuh tulih ndez na'a njan ndúsudooni, "Nyun be 'alha 'uhoont'ah int'i, 'ink'ez si 'ut'en 'ust'i." Ndint'en t'eh, 'aw 'et nye 'ut'en be'et be, be mba 'alha' hooht'ah whusunílhun, 'et t'eh si chah se' 'ut'en be, 'i be suba 'alha' hooht'ah whunyunoolhtun. ¹⁹ 'Et chah sudóni, "Yak'usda 'ilhunuh zeh 'int'ah." 'Et mba 'alha' hooht'ah, 'et huwa 'ut'en unzoo, 'i 'ilh'en. 'Et whunts'ih nts'i nudude, 'en whunts'i 'et whuz na'a huba 'alha 'uhoont'ah hoh nujut bulh hudulduz. ²⁰ 'Et nyun tube whuzinik! 'Awhuz ih t'eóonuzínzun? 'Ut'en bu'et t'eh, 'et t'eh ndunt'ah be 'alha 'uhoont'ah, ndi yun k'ut 'aw hoonli chailah ho' hooht'ah. ²¹ Ndez na'a njan nduhooja, netsuh da, Abraham, 'en buye, Isaac, 'en Yak'usda bukw'uzdai k'eyilhti, Yak'usda ba yutuzelghelg ka. 'Et huwa dude 'ut'en be ts'ah'un dune suli. ²² Soo ts'ah'un na'a t'ewhunonzeh, Abraham be 'ut'en k'ah, be 'alha 'uhoont'ah, 'i be 'uja. 'Et be 'ut'en k'ah huwa, be 'alha 'uhoont'ah soo ts'ah'un na'a lhadúlya suli. ²³ 'Et Yak'usda bughunek daja ni 'en bugha, 'i ts'iyawh 'uhóonla. Ndez na'a njan ndutni, "Abraham 'en Yak'usda yuba 'alha' 'int'ah. 'Et huwa Yak'usda ts'ah'un dune inlí," yúhni. 'Ink'ez Yak'usda

bulh t'eke yedét'i suli, hiyúlhni. ²⁴ Soo cho whunoolh'en, 'aw be 'alha 'uhoont'ah bugha zeh ilah hoh ts'ah'un dune ts'ulhlhíh. Ne'ut'en 'i bugha zeh chah. ²⁵ Ndun lubeshi 'ul'en, Rahab hiyúlhni, 'en dich'oh dude 'ut'en k'ah huwa, dune nalh ts'ah'un 'int'ah suli. 'Et ndez na'a ndúja, ndunnah Joshua ba khunek na'a, 'en dabúninla hoh 'et hukw'elh'az 'udun titi tinaóobuninla. ²⁶ 'Et huwa njan dúhoont'ah, neyust'e neyégha bughi yoolah t'eh, 'aw khoona ghait'ah. 'Et whuz na'a zeh be 'alha 'uhoont'ah, 'ink'ez ne'ut'en k'ah chah bughi yoolah t'eh, 'et be 'alha 'uhoont'ah 'aw hoonli chahóolah.

3

Neghunek bughu chats'ilah t'eh

¹ Sulhutsinkah nuhtah khun teh stalhanah dune hodulh'eh wahle hukwa 'ooh't'en gunih. Nuwheni hodulhú'eh, 'et 'o nus hooncha hoh neba nahutedeh 'et huwa. ² Lhat hukw'u na'a lubeshi 'uts'ull'h'en 'et huwa. 'Et dune dich'oh bughunek be 'aw lubeshi chaílhchulh t'eh, 'en dune soo beni lhadúlya suli. Buyust'e dulhcho hoh ts'ah'un na'a né'yulh'en 'et huwa. ³ Njan howu nuni noohzut, ndi yeztli buza yant'uk, 'i buza ts'uyulih t'eh, nts'oh tula núznulht'i, buyust'e hoh túne' 'ut'en. ⁴ Njan 'et chah howu nuni noohzut, ts'i cho ncha, 'i be ts'ekelh 'ink'ez tube nilhts'i t'eh, hoh teh nulhts'i. Nts'oh tatsi dalcho 'et whunts'ih niz chos lhe'ítso, 'i 'et whunts'ih yuk'úne' 'ut'en. ⁵ 'Ink'ez netsoola lhe'ultsol, 'et whunts'ih hooncha howu yalhtuk. 'Ink'ez whunulh'en, kwunyaz dik'aih teh, dáwhulcho chuntah be whúdatek'un ho' 'uhoont'ah. ⁶ Netsoola 'ants'i kwun li'int'ah. Ndai khunek ts'ah'un na'a cha'ít'ah be yats'ulhtuk, 'i be dubih. 'I be ndulcho neyust'e tinta' yulh'ih. Ndi yun k'ut neyust'e whunts'u nint'uk, 'ants'i kwun k'una'a hoolhtus whulhtsih. 'Ink'ez netsoola 'i kwuncho yuh whumoodih, 'en be dik'aih. ⁷ 'Et ndi yun k'ut khunai lhelyoo dedowh, dut'ai, ndai yun k'ut núlh'as, 'ink'ez ndai toot hoonli, 'i chah, nuwheni ndi yun k'ut dune, 'i ts'iyawh k'une' ts'ool'en huba' hoon't'ah. ⁸ 'Et whunts'ih 'aw 'ilhunuh netah whunts'i, khunek be yats'oolhtuk, 'i 'aw k'une' ts'uhool'en ghait'ah. 'Ahoohyez bé hoontsi' tune' uzduni, 'aw 'ustl'e 'uzdóoneh ghait'ah. 'Et neghunek poison li'int'ah, 'i be 'uyoon ts'ughan li'ts'ut'en. ⁹ Nezek be Yak'usda ne'aBá tube cho buba ts'odélhti. 'Ink'ez 'i be zeh nelh dune hubézdüyih, 'en Yak'usda duk'una'a 'obinla 'ink'ez. ¹⁰ 'Et whuz na'a zeh nawh k'una'a yats'ulhtuk. Whulutah hoonzoo k'una'a neuzduni. 'Ink'ez whulutah hoontsi' hoh tuné' uzduni. Sulhutsinkah 'et 'aw whuz na'a cha'hóst'e huba' hoon't'ah. ¹¹ Too unzoo, 'i 'ink'ez too ntsi' 'aw 'ilho haóoli ghait'ah. ¹² Sulhutsinkah, ndi duchun fig hiyulhni, 'i bumai olive chah but's'u haínooyeh ghait'ah. 'Ink'ez mai chun, 'i chah 'aw bumai, fig hiyulhni, but's'u haínooyeh ghait'ah. 'Et whuz na'a zeh ya too, 'i 'ink'ez too unzoo, 'i bulh 'aw 'ilho haóoli ghait'ah.

Yak'usda ye whunih 'ink'ez netsudule ye whunih

¹³ Ndan nuhtah whunih dune unli 'ink'ez lhat nt'ooninzun? 'Et ndunt'ah hoonzoo k'una'a nuhtah dune wule. 'Et whuz na'a bube 'ut'en k'ah whunih be 'ink'ez yuh 'ududildzun 'i be 'utet'ilh ho' hoon't'ah. ¹⁴ 'Et whunts'ih nuwheni degha nus lhghe 'oolhúni' aht'ah, 'ink'ez 'ahoolhyez 'uk'une' dut'en hukwa' nahzun. 'Et whuz na'a nuhdzi yuh whudez'ai t'eh, 'i be 'óont'e' be howu yaoolhtuk gunih! Ndet khunek 'alha' 'int'ah, khun teh hubugha hóhts'it gunih. ¹⁵ Ndi be whútnih, 'aw ndus de hachadilts'ulh. K'us ndi yun k'ut hiye whunih, 'i 'int'ah. Nts'e na'a neyust'e whunts'u nint'uk hukw'u na'a 'uhoont'ah. Ntsi' nududeh, 'en ye whunih, 'i 'int'ah. ¹⁶ 'Et nts'e 'uhoont'ah dune lhghe' hoolnih 'ink'ez 'ahoolhyez dich'oh zeh k'ununi hunudzut, 'et whuz na'a ts'iyawh huba whe' hoon't'ah hooyah dawhútenilh simba, 'ink'ez ts'iyaintsuk hoontsi' hoh 'uwahulh'en. ¹⁷ 'Et whunts'ih ndus de be whutni, ndez na'a njan ndut'en, 'udechoo, 'i netsun hoolah neilh'i, nedzi dezghel yulhtsi, 'ink'ez nagoosdiyaz né'ts'ut'en. 'Et hoh 'uyoon hukwa' huninzun k'una'a bugha ts'úwhunle. Be te'nudzun, 'i be uzdaté'bn, 'uyoon ba 'ut'en unzoo, 'i 'uts'oolh'en, ts'iyana' lhgha zeh nebut's'oolh'en, 'ink'ez 'aw nawh cha'ts'unizun hoh ne'ts'oot'en. ¹⁸ Ndunnah 'uyoon bugha ts'ah'un 'uhoot'e 'et huba hukwa' huninzun, 'i bube 'ut'en bugha ts'ah'un na'a huba ne'hoot'en. 'Et sih lhanah ts'ah'un na'a lhts'un 'uhútet'ilh.

4

Ududelhúti 'i be dune lhtah huwhulyih

¹ Nuhwheni nuhtah di ka ts'iyawh lhenah lhutah 'udahnih, 'ink'ez lhéhdulh? 'Et nts'ez de hawhélt's'ut ho' hoon't'ah? Ts'iyana' duk'una'a hukwa' huninzun, 'et whuz de hawhélt's'ut ho' hoon't'ah. ² Tube hoonliyaz hukwa' nuhzun 'et whunts'ih 'aw chawháht'ih. 'Et huwa dune sulhghíh. Dune ghe' 'oolhúni' 'et whunts'ih ndet hukwa' nahzun 'aw chawháht'ih. 'Et huwa ts'iyawh lhenah lhutah 'udahnih 'ink'ez lhédáhdulh, 'ink'ez Yak'usda but's'un 'aw buka cha'yooduzulhkut, 'et huwa 'aw chawháht'ih. ³ Yak'usda buka yoodulhkut 'et

whunts'ih 'aw nuhghá yo'alh ghait'ah. Hoonstsi' hukw'u na'a buka yoodulhukut 'et huwa. 'Ants'i nuhwhenich'oh nuhwhuba hoonzoo hukwa' nahzun teh, bé ne'teht'en, 'et huwa 'aw nuhgha yóo'alh ghait'ah. ⁴ Nuhwheni dune 'ink'ez ts'ekoo lhulh tinta' aht'ih lí'ah't'ah, soo zélhts'ai, ndi yun k'ut hoonstsi' t'úne 'aht'en, 'et zeh hoonáht'i t'eh, 'et 'alha' Yak'usda ch'a dehtni ahli. 'Et huwa ndunnah ndi yun k'ut hoonstsi' tune' tet'en hukwa' huminzun, 'en Yak'usda ch'a detni na'hududulhtsi. ⁵ Yak'usda bughunek 'ants'i 'et cha'dusnih hoh njan ndutni, "Ndoni neyudinda, 'en tube cho 'uyoon neba ka cha'nizun." ⁶ 'Et Yak'usda lha'un ye unzoo, 'i negha íni'ai, 'et huwa ndez na'a bughunek njan ndutni, "Ndunnah 'ududélti,

'en Yak'usda ch'a detni 'int'ah.

'Et whunts'ih yuh údudildzun,

'en ye unzoo, 'i bugha yú'aih ho' 'int'ah."

Be yuh 'uzdudildzun, 'i ndi yun k'ut hoonli zeh ghu nuni uznuzut t'eh, 'aw netsudule nech'a 'oolhdeh ghait'ah

⁷ 'Et huwa Yak'usda 'en zeh butl'a' uzdudooltelh. Netsudule, 'en buch'a uzdetni, 'et t'eh nuhghu nátsitelyalh. ⁸ Yak'usda begghah ninahya t'eh, 'et t'eh Yak'usda didut chah nuhghah niteyalyh. Nuhwheni tinta' 'uhut'ih, 'et whuch'a nuhla tóonahgus. Nuhwheni nawh naninahdeh, nuhdzi butsun hoolah naoolhtsilh. ⁹ 'Et dáhja, 'et nuhwhenich'oh tube cho yuh 'ududoolhúdzin! 'Ink'ez howuni 'oohle! Ndet hoonstsi' howahdloh, 'et 'ustl'e 'udoohneh, 'et huwohtso! Ndi nuhwhuba whunenik tune' 'aht'en, 'i ts'iyawh whuladootnih, 'ink'ez nuhdzi undooda. ¹⁰ NeMoodihti bubut yuh 'ududoolhúdzin, 'et sih nawhudoolhti.

Newhulhutsin buts'un nahonyeh gunih

¹¹ Sulhutsinkah lhuch'a yaoolhtuk gunih! Ndan dulhutsin duch'a yalhtuk 'ink'ez yuba nahezya t'eh, 'en Yak'usda bughunek netl'aída'ai, 'i yuch'a yalhtuk hoh 'utni. 'I'o nus unzoo na'dunúdzun. 'Et ndint'en t'eh, 'aw Yak'usda khunek netl'aída'ai, 'aw kw'unucha'zint'en, Yak'usda k'una'a naheyelh 'int'ah na'duninzun. ¹² 'Aw 'ilhunuh zeh 'int'ah ndi khunek netl'aída'ai. 'Aw 'ilhunuh zeh dune hubulhyis k'us kwuncho yuh ts'ih hubutelh'alh. 'Et huwa ndan inli na'duninzun hoh 'uyoon ba nahanyelh?

Bunt'ah nts'oh datánt'ih 'et huwe' dudelti howu yaoolhtuk gunih

¹³ 'Ink'ez nuhwheni ts'iyawh sih soo zélhts'ai. Bulunah ndez na'a tulih njan ndudóohtni, "K'an dzin k'us 'om bun tulih nts'un keyah ts'utedulh. Whuz 'ilhuh naooduzuk 'et 'uzdutéltis'ih, whuz sih sooneya lhái 'uts'oolleh." ¹⁴ 'Et whunts'ih bunt'ah 'aw dawhútenilh t'eóonuzáhzun. Be kháhna, 'i ndai ho' 'int'ah? 'Ants'i lhut lí'int'ah. 'Astl'iyaz ndoh hoh nudúdeh, 'ink'ez hoolah 'ulhíh. ¹⁵ 'Et k'us ndez na'a njan ndudóohtni huba' hoon'tah, "NeMoodihti hukwa' ninzun, 'ink'ez 'awhuz ts'ukhuna, 'et t'eh ndi k'us ndai, 'et whuz na'a njan dúztenilh." ¹⁶ 'Aw 'et nuhwheni 'ududélti ndet 'ududelti be yalhtuk, 'et ndi ts'iyawh hoonstsi' ho' hoon'tah. ¹⁷ 'Et huwa ndan t'ehoninzun ts'ah'un na'a ne'hoot'en huba' hoon'tah, 'ink'ez nduchahúst'en t'eh, 'et sih huba lubeshi hoonli.

5

Nuhwheni soo deh'a, ndunnah tehul'en hube soo de'at 'et huwa nuwhuba nahutedeh

¹ 'Et nuhwheni soo deh'a 'aht'ah sih soo zúlhts'ai. Dawhultsi' nuhts'u whekulh, 'et huwa tube cho ahtso 'ink'ez 'alhúdzul. ² Be soo deh'a, 'et ts'iyawh holhjut. Nuhnaih 'i whunts'i, 'i chah musdzoombai ts'iyawh ya'al. ³ Nuhwhugold 'ink'ez silver 'i bulh, 'i ndulhcho k'una'didutsan. 'Ink'ez ndi k'ena'didutsan, 'et hoh nahuhooté'ah dant'ah ahli. Ndi ndai kwun hoolah ilh'i, 'i, 'et whuz na'a ndaht'en tinta' nuhté'lh'ih. 'Et dek'elh'az dzin 'et huba 'uwáhla! ⁴ 'Et ndunnah t'l'o nuhwhuba nalhdzoo, 'en chah ts'iyawh hube whulhts'it. 'Et huwa nuhch'a tsó yahalhtuk. 'Ink'ez ndunnah nuhwhuba whut'as, 'en chah whuz na'a zeh 'ubulh'en. 'Ink'ez Yak'usda, ndun ts'iyaintsuk whuMoodih unli, 'en nuhch'a khunahudúts'o hoh ts'iyawh hubudánts'o. ⁵ Nuhwheni soo de'a 'unaht'ah, ndi yun k'ut hoonah't'i zeh 'uwulh'en, 'ink'ez hoonzoo hukw'una'a zeh dune ahli. 'Et nuhwheni 'et ts'iyawh hukwa' nahzun tune' aht'en. 'Et nts'e na'a musdus nats'utuzelghelhel teh whutsuh 'et naznulhk'ah, 'et whuz na'a zeh nuhwheni chah 'et ndaht'en. ⁶ Ndunnah ts'ah'un na'a 'uhut'en, 'en nuhwheni hubuk'éwhah'ai, 'ink'ez 'et ubahghan, 'et whunts'ih 'aw k'uhootneh chanizun.

Dzuh nahdeh nuhwhuba huwa whúlna, 'et whunts'ih whulh sahyin

⁷ 'Et huwa sulhutsinkah neMoodihti whusanatedalh whuts'un, 'et huba ilh'ih. Soo zúlhts'ai, ndan dune haníyeh 'ulh'en, ndi haínulhyeh, 'i soo 'úlcho tele whuts'un, sa hoh yuba ilh'i. 'Olulh 'ink'ez dak'et naootelhtil, 'et huba ilh'i ho' hoon'tah. ⁸ Nuhwheni chah neMoodihti whusanatedalh, 'et whuz na'a zeh huba ilh'i, 'ink'ez nuhdzi soo cho ulhtus wulh'i. 'Aw 'et neba nilhdukw suli 'et huwa. ⁹ Sulhutsinkah lhch'a ne'doohntni gunih, doo ka

sih nuhk'éholts'it. Nulh'en Yak'usda, naheyelh, 'en ndati 'et seyin 'et huwa. ¹⁰ Sulhutsinkah ndunnah nus whunílh'en, 'en ndunnah neMoodihti boozi be yahulhtuk, 'en dude 'ut'en k'ah huwa dzuh nuhúde t'eh, 'et whunts'ih neMoodihti datenilnh, 'et huba hih'i. 'En hubugha hodoolhú'eh! ¹¹ Soo zúlhts'ai, ndunnah howa whúlna whunts'i whechahítsaz, 'en degha nus honzoo hubulh 'úhooja hubuts'utni. 'Et ndun Job ts'utni, 'en chah nts'e na'a dzuh nusuzut, buba howa whúlna whunts'i whulh ínyin. 'Ink'ez nts'e na'a neMoodihti tube yugha te'nanzin, 'ink'ez hukw'elh'az soode'a 'int'ah yutl'anáho'ai, 'et ts'iyawh whulh údahts'oh. ¹² 'Ink'ez sulhutsinkah ndi 'uhoont'ah 'un whudusni, 'et hoonliyaz dune ts'un nahuzinya t'eh, khun yak'uz whunalh 'udúsni k'us ndi yun k'ut whunalh 'udusni, k'us 'uyoo khunek be, whuz na'a teh yatoolhth gunih. 'Et k'us, "A," dutehnilh t'eh hoh, "A," doohtni. 'Et, "Dah," dutehnilh t'eh, 'et chah, "Dah," doohtni! Doo ka sih nuhwhuba nahookeh.

Lhula ts'oodut'en

¹³ Nuhwheni nuhtah dzuh nuzut hoonli t'eh, 'en tenahudoodli. 'Ink'ez nuhtah hoont'i hoonli t'eh, 'en chah shun 'i be Yak'usda hudóolhti. ¹⁴ Nuhwheni nuhtah hubuyust'e soo cha'ít'ah t'eh, ndunnah Yak'usda ba 'ilhunahuwúdulh nuhtsuh whudélhdzulh, 'en 'anih hubudóohni. 'Ink'ez ndi khe neMoodihti boozi be 'i ndan hubuyust'e soo cha'ít'ah, 'i hubuk'ut huboolhlho 'ink'ez hiba tenahudoodli. ¹⁵ Be 'alha 'uhoont'ah, 'i be tenahudoodli. 'Et sih ndan hubuyust'e soo cha'ít'ah soo na'tetnilh. 'Ink'ez neMoodihti duk ná'yooleh. 'Et lubeshi ut'i t'eh, 'i yuba whunawhudoolnah. ¹⁶ Lhts'un tink'us aht'en t'eh, ndulhudóohtni 'ink'ez lhuba tenadoohdli. 'Et ndaht'en t'eh, 'et t'eh soo na'oohneh. 'Et ts'ah'un dune, 'en ts'ah'un na'a hoh tenadudli t'eh, 'et whuz na'a hubutenadudli bugha lhat hooncha túne' whutet'en 'et huwa. ¹⁷ 'Et Elijah ts'utni, 'en nuwheni nek'una'a dune unli inle. 'En 'uja soo chan ch'a tenadédli. 'Et tat naooodezuk 'o 'at lhúhoolcho, 'et ndi yun k'ut 'aw nachahoolhtil. ¹⁸ 'Ink'ez doo chah tenadédli hoh chan 'ants'i yak'uz ts'ih hájulh. 'Et yun doo chah zeh mai buk'ut hananyi.

Tink'us hunínt'uk, 'en nahundunooya ka hubula'oohneh

¹⁹ Sulhutsinkah nuhtah 'ilhunuh khunek 'alha' 'int'ah, 'i yuch'a nasja t'eh, 'et nuhtah 'ilhunuh neMoodihti ghu nainilhti t'eh, ²⁰ 'en 'et nduja, 'et njan dudóohni, "Ndan lubeshi 'ulh'en, 'en be 'alha' nudzun yuch'a nasja t'eh, ndan ndúja neMoodihti ghu nainilhti t'eh, 'en ndi yun k'ut datétsah whuch'a nayulhti ho' 'int'ah. 'Ink'ez 'en hubugha lhat lubeshi hubuk'é'imbal li'tenilh."

'Udechoo Dustl'us Peter Yuk'e'ánguz

Lizwif lhelhdun keyah whut'en huzdli, 'en Peter dahooja hubulhni

¹ Si Peter, Sizi Gri 'en bugha whel'a usdli. Nuhwheni Lizwif bukeyah whut'en ahli inle. 'Aw 'et lhelhdun keyah whut'en sahli. Yun K'ut Pontus, Galatia, Cappadocia, Asia, 'ink'ez Bithynia 'et chah. 'Et 'onghoh ndulhcho hoh 'astl'iyaz whuba nináhtna. Yak'usda ba 'utahálya aht'ah. 'Et huwa nuhwheni nuhts'o k'e'usges. ² Yak'usda ne'aBá nus whudezulh ts'iyawh t'eooninzun. 'Et huwa 'utahálya aht'ah. Ndez na'a nuhwhuba 'et 'úhooja, Ndoni Yak'usda ba 'udun ninwhuninla Sizi Gri buk'une' teht'en ka, 'ink'ez buzkai nuhwhuba nadélt'ik 'i be nuhwhulubeshi ts'iyawh nuhwhuba hoolah sulí. Ye unzoo, 'i 'ink'ez Yak'usda ts'un be ts'ah'un aht'ah, 'i lha'un teh nuhgha óokat.

Yak'uz ts'ih neba 'et sula

³ Yak'usda, Sizi Gri neMoodihti be'aBá, 'en uzdelhti. Hooncha hoh negha te'nanzin et hoh nenakhilhna. 'Et huwa hoonzoo hukwa tsi ts'úhóoli huba' hoon'tah. Sizi Gri 'en yahadla hubutah dinadija. 'Et huwa nuwheni chah 'ilhuz ts'ukhutena, 'et hukwa tsi ts'úhóle. ⁴ K'an 'aw 'et ne'aBá yit'i, 'i negha íteleh, 'i chah nuwheni neba 'int'ah. 'Aw wulhjut ghait'ah. 'Aw ntsi' chah wule ghait'ah, 'ink'ez dutoodeh ghait'ah. 'I 'uda yak'uz ts'ih nuhwhuba 'et whuzdla. ⁵ Nduunnah Yak'usda ye ulhtus, 'i be búghudli, 'ink'ez hit'aninentan 'et hoh whéhudutejih 'et hotéhlhchulh. 'Et deke'lh'az dzin t'eh, yak'uz ts'ih 'et neba whuzdla, 'i ts'iyawh ts't'et haóotekulh 'et wheni lhaóodint'ah. ⁶ 'I be nuhwhudzi ndulhcho hoonáht'i. 'Et whunts'ih k'an 'et 'astl'iyaz whuts'un nuhwhubeni lhelhdun tulih be dzuh nahzut, 'et huwa nuhóohdzih. ⁷ 'Et whuz na'a nuhwhuba 'alha 'uhoont'ah, 'et nuhwhuba 'o nus hoonzoo tele. Nts'e na'a gold kwun 'i be lhtuhadúkat hiyulltsih, 'et hoh soo ts'ah'un 'i zeh 'ulhíh, 'et whunts'ih 'i chah hoolah tele. 'Et ndi ye nuhwhuba 'alha 'uhoont'ah, 'i gold ch'a degha nus whudéti ho' hoon'tah. 'Et whuz na'a zeh hoh t'eh ndet dzin Sizi Gri nenalhts'et be wheóodiltsai t'eh, 'et t'eh bé nuhwhuba 'alha 'uhoont'ah huwa Sizi Gri nuhwhuba whudutélti, 'ink'ez huba hooncha tele. ⁸ Sizi Gri 'aw chaséh'en 'et whunts'ih buk'ehtsi'. 'Aw chaséh'en 'et whunts'ih nuhwhuba 'alha 'int'ah. 'Ink'ez ndi be ts'uhoont'i, 'i ncha k'et 'aw uzdooni ghait'ah, 'ink'ez tube dézi ho' 'int'ah. 'Et huwa hoonáht'i. ⁹ Ndi ye nuhwhuba 'alha 'uhoont'ah lhawhúdulyeh 'et hoh nuhzul dutejih ho' hoon'tah. ¹⁰ Nduunnah Yak'usda be nus whunilh'en, 'en ndi ye unzoo, 'i nuhts'u whélt'sulh, 'et hubugha nus huho'en. Njan whézdújih, 'et hubugha 'et soo ts'ah'un degha nus huwa' hooli hoh nahahooté'ah hukwa' hut'en. ¹¹ Hoh da Christ buyéghah hubuyudinda 'ink'ez 'uwwhutenilh whutsuh, 'en bughi yalhtuk nts'e na'a Christ dzuh nutezut, 'et hukw'élh'az huba hooncha tune' tet'en 'uwwhutenilh. 'Et nduhoont'ah nket'ah njan 'et nduwhutenilh, 'ink'ez nts'e na'a 'uwwhutenilh, ndunnah nus whunilh'en nahahooté'ah hukwa' hut'en. ¹² 'Ink'ez ndunnah nus whunilh'en, 'en Yak'usda wheóobunelhtan 'aw 'en huba cha'hoot'ah. 'Et k'us nuwheni zeh neba nus húho'en. 'Aw 'et ndunnah khunek unzoo, 'i be yahalhtuk, 'en Ndoni yak'uz ndus de hál'a, 'en be ndun hódani. 'Ink'ez nduhoont'ah, 'et lizas, 'en whunts'i nahahooté'ah hukwa' huninzun.

Yak'usda ne'aBá, 'en buk'una'a zeh 'uts'oot'e

¹³ 'Et huwa nuhwheni lhadáhleh. Nuhwhenich'oh duba naootéhtnih. 'Et whuz na'a ye unzoo, 'i nuhts'u tekulh, 'et whulatah whuts'un buka tsi hóohli. Ndet dzin 'utenilh Sizi Gri nenalhts'et be hóoduteltsilh. Hoh t'eh njan whézdújih, 'et nuhgha whútelts'ulh. ¹⁴ 'Uskekah k'una'a 'uk'une' hut'en wahle. 'Aw niz de ndeht'en Yak'usda t'enuzahzun, 'et huwa hoontsi' ts'unáht'uk. 'Aw 'o 'un ndóht'en gunih. ¹⁵ 'Et whunts'ih 'aw 'et ndan dutejih ka nukha' dani, 'en nts'e na'a lubeshi bughu hoolah, nuhwheni chah ndaht'en 'en buk'una'a zeh toohdelh. ¹⁶ 'Et huwa whuz na'a 'uk'e'éduguz hoh njan ndutni, "Si lubeshi bughu hoolah 'ust'ah. 'Et huwa nuhwheni chah 'et ndóht'e huba' hoon'tah." ¹⁷ 'Ilhunuh ts'inli hoh nts'e na'a dats'é't'en, ne'aBá 'aw ndan ts'un chadítini hoh neba nahuteyeh. 'Et huwa 'en ts'un zeh tenadahdli t'eh, soo cho khahdli. 'En benlhújut hoh ndi yun k'ut hukw'ut lholdelh. ¹⁸ Hoh da ndet nuhwhudusnekah whunohodalh'i, whulutah teh 'aw hoonliyaz chahoolah inle. Silver, gold ndunt'i, 'i be ilah Yak'usda nanhonket. 'I ts'iyawh hoolah tele 'et huwa. ¹⁹ 'Et whunts'ih Christ buzkai dézi, 'i be nanhónket. 'En sheepyaz 'aw hoonliyaz buchaoodí'ah k'una'a 'int'ah. ²⁰ 'Alha 'uda ndi yun 'utelnilh whutsuh da, Sizi Gri daóotenilh 'uda t'ewhunínzun. 'Et njan degha nus dzin nuhwhuba whuz'ai, k'an 'et nuhwhuba ts'et hawhélt's'ut. ²¹ 'En bugha Yak'usda but'anioonúhtan. 'En 'uja yahadla hubutah dinadilhti 'ink'ez ye dézi, 'i chah yugha ní'ai. 'Et Yak'usda but'anahtan, 'ink'ez ndet hukwa tsi hoolhi, 'et Yak'usda 'en bugha ts'iyawh whusaóotelts'ulh.

Khunek 'ilhuz 'int'ah,

²² Ndoni 'en be ndi khunek 'alha 'int'ah 'i buk'une' aht'en, 'i be nuhdzi 'aw lubeshi bughu hoolah sulltsi. 'Et ndan huba 'alha 'uhoont'ah, 'en nuhdzi ndulhcho 'i be, buk'ehtsi'. 'Aw nuhdzi chaditsun hoh 'ilhunuh ahli soo cho lkh'eohdutsi'. ²³ Yak'usda bughunek 'i be doo chah zeh nawhuzáhdli. Nedusnekah hubugha 'ilhuz ts'ukhoona ghait'ah. 'Et whunts'i Yak'usda bughunek 'i be zeh 'ilhuz ts'ukhutena ho' hoont'ah. ²⁴ 'Et huwa ndi khunek njan ndutni,

"Ts'iyannah 'ants'i tl'o li'hint'ah.

Ndi tl'o 'astl'iyaz 'int'ah.

Ink'ez dune ye dézti,

'i bumai li'int'ah.

Ndi tl'o bindak dugih 'ink'ez nakuk.

²⁵ 'Et whunts'ih neMoodihti bughunek 'ilhuz wheni 'et dez'ai."

'Et ndi khunek 'i khunek unzoo, 'i be nohwulh yaintuk, 'i int'ah.

2

¹ 'Et huwa 'uyoon ts'un nuhwhubeni untsi', 'i, whuts'it be yalhtuk, duba nahzoo, 'uyoon ghe 'oolhúni, 'ink'ez khunek untsi', 'i be yalhtuk chah, 'et ts'iyawh 'ilhuz wheni whuladoohtni. ² K'an 'et 'uskehyaz huwhuzdli 'uts'oo 'i zeh hika dátni, nuhwheni chah 'en buk'una'a ndi khunek ts'ah'un 'int'ah, 'i zeh buka daóohtne, 'o nus ulhtus wahle ka. ³ NeMoodihti daldzoo 'et nawhah'ai t'eh, 'et t'eh ndi khunek 'i zeh buka daóohtne.

Sizi Gri 'en 'utahayálhti, 'ink'ez nuwheni chah 'utahálti 'uts'int'ah

⁴ Sizi 'en 'int'ah tse khuna, 'i ndult'ah. Lizwif, 'en 'uhiyina lhanah 'un hitezno li'huja. 'Et whunts'ih Yak'usda 'utahayálhti 'ink'ez 'en tube dézti ho' int'ah. 'En zeh but'sun tóohdelh.

⁵ Ink'ez nuhwheni chah tse khuna, 'i k'una'a aht'ah. 'Et whuz na'a Ndoni 'en luglez wuhocho nuhwheni nuhbé' whulneh. 'Ink'ez 'en be nuhwheni Yak'usda ba nawhulnuk 'aht'ah. 'Et hoh ndai Ndoni nuhts'o hukwa' ninzun, 'en Sizi Gri 'en be ndai Yak'usda buba soo' yint'ah,

'i hubugha iyóohlelh. ⁶ 'Et huwa Yak'usda njan ndutni hoh 'uk'e'éduguz,

"Whunulh'en, nuhwheni keyah Zion whut'en,

'et koontl'at tse,

soo degha nus buka dawhútni, 'i 'et níde'ai.*

'En 'utaháilhti, 'ink'ez dézti ho' int'ah.

'Et 'alha 'uhoont'ah ndunnah huba 'alha' yint'ah,

'aw hooya hoole ghait'ah."

⁷ 'Et huwa ndunnah nuhwhuba 'alha 'uhoont'ah, nuhwhuba dézti ho' int'ah. 'Et whunts'ih ndunnah hik'unucha'ust'en, 'en hubugha njan ndutni,

"Ndunnah koo 'uwulh'en ndi tse 'un hidutelh'uz li'huja,

ndi koontl'at tse soo degha nus buka dawhútni, 'i sulí."

⁸ Ink'ez njan chah ndutni,

"Ndi tse hit'az nunúghalh

'ink'ez 'i be 'ahoolhyez huba dzuh 'ulhih." Yak'usda bughunek hik'unucha'ust'en, 'i bugha nonúghalh. 'Et whuz na'a Yak'usda buba' hoonla.

⁹ 'Et whunts'ih nuhwheni dune 'utahálya ahli. Yak'usda hubudayi cho bunawhulnuk ahli. Yak'usda bube'ildzun aht'ah. Nuhwheni budune 'int'ah ahli. 'Onghoh, 'en ts'ah'un na'a daldzoo ho' int'ah, ts'iyawh budutéhniil ka. 'Awhuz tsahólhgus yuh delhúts'i hoh 'anih nuhwhudáni, but'sun toohdelh ka. Bughi yet'en, 'i be whét'en, 'i 'et 'uhoont'ah.

¹⁰ 'Uda Yak'usda budune cháhlah inle. K'an 'et Yak'usda budune sahli. 'Uda 'aw bé nuhgha te'whunizeh chalhchulh inle. K'an 'aw 'et bé nuhgha te'whunezesh nuhghant'ai.

'Udun yun k'ut whut'en tah ts'ah'un na'a yinkak doolhúts'i

¹¹ Nuhwheni nuhwhuk'esi' ahli, bukeyah hoolah k'una'a, 'astl'iyaz zeh ndi yun k'ut ahdulh. 'Et huwa nts'e nuhyust'e whuts'u nint'uk, whu'et 'ooh't'e, 'et hukwa nuhts'u tédusdli.

¹² 'Udun yun k'ut whut'en tah ts'ah'un na'a yinkak doolhúts'i. 'Et hoh nuhch'a hudetni, 'en hoontsi' tune' aht'en nuhohútni, 'ink'ez 'ut'en unzoo, 'i ahla 'et honiilh'en t'eh, 'et t'eh nket'ah Yak'usda dune tah nuteyalh, 'et huwa 'o nus hoonzoo k'una'a hidutélhiti.

Nts'e na'a dune ne'hutet'en 'uk'e'hanguz, 'et ts'iyawh whuk'úne' 'ooht'en

¹³ 'Et huwa neMoodihti, 'en bugha nts'e na'a dune ne'hutet'en 'uk'e'hanguz, 'et ts'iyawh whuk'úne' 'ooht'en. Dant'ah dune hinli 'et whunts'ih, buk'une' 'ooht'en. Nduh hubudayi cho unli, soo 'udetsuh whudéldzulh, 'en chah buk'une' 'ooht'en. ¹⁴ K'us ndi yun whu-moodih, 'en chah. Ndunnah, 'en hubudayi cho ba whel'a 'en 'uhint'ah. 'Et hoh ndunnah

* 2:6 Sizi ndi tse ndult'ah ho' int'ah.

hoontsi' 'uwuhlh'en, 'en hubudayi cho ba hube' whudutelhayah. 'Et hoonzoo 'uwuhlh'en, 'en budutélhiti. ¹⁵ 'Et whuz na'a Yak'usda hukwa' ninzun, ts'ah'un na'a ne'ah't'en t'eh, 'i be whusnik be yahalhtuk buzek whudána'dooh'alh. ¹⁶ Sizi bugha lubeshi ch'a nahusdel aht'ah. 'Et whunts'ih 'et whut'anínehtan hoh nuhwhuba 'ants'i hoonli hoh lubeshi 'oolh'en gunih! 'Et Yak'usda be 'ulhna k'una'a yinkak doolhúts'i. ¹⁷ 'Ink'ez ndunnah huba 'alha 'uhooht'ah, 'en ts'iyawh soo cho hubudóolhti 'ink'ez hubuk'eohtsi'. Yak'usda be noolhújut 'ink'ez hubudayi cho 'en chah dóolhti.

Nuhwheni 'ulhna nuhmoodih hubenlhújut hoh hubut'l'a' dudoolhúyelh huba' hoont'ah

¹⁸ 'Et nuhwheni 'ulhna nuhmoodih hubenlhújut hoh butl'a' dudoolhúyelh huba' hoont'ah. Hinzoo 'ink'ez soo ne'hut'en, 'en zeh ilah buk'úne' 'ooht'en. 'Aw ts'ah'un cha'hit'ah, 'en whunts'i hubuk'úne' 'ooht'en. ¹⁹ Ts'ah'un 'aht'ah 'et whunts'ih dzuh nunóhohulhdeh t'eh, 'ahoolhyez Yak'usda ghu nuní nahzut whecháhts'ud hoh dzuh nahdeh t'eh, 'et Yak'usda ba hoonzoo ho' hoont'ah. ²⁰ 'Et huwa tink'us na'a ahja, 'et hukwa yanohahulhts' t'eh, t'ezahnih hoh whúlhchoot, 'ink'ez di simba nuhgha óokat? 'Et hoonzoo 'uwuhlh'en 'ink'ez 'ants'i nuhwhuba hoonli hoh hukw'elha dzuh nahzut t'eh, 'et Yak'usda ba hoonzoo ho' 'uhooht'ah. ²¹ 'Et ndez na'a zeh Yak'usda nuhts'un húkwa' ninzun. Christ 'en chah neba dzuh nusúzut. 'En buk'una'a ne'ts'óot'en ka whunénilhtan. 'Et huwa 'en zeh buts'un úztoodelh huba' hoont'ah. ²² 'En 'aw lubeshi cha'ilel, 'ink'ez 'aw whuts'it, 'i be yachalhtuk. ²³ 'Et ndi khunek untsi', 'i be hiyulh yalhtuk, 'et whunts'ih 'aw khunek untsi' be hubuts'un k'uchaitnil. Hoh da dzuh nusúzut hoh, 'et whunts'ih 'aw hubuts'un k'uchasne. Nduun soo ts'ah'un na'a naheyelh, 'en yut'l'a' dudelti. ²⁴ Nelubeshi dich'oh buyust'e be lhdulalhgus k'ut nininla, 'i be 'aw 'o 'un nelubeshi nemoodih wule ghait'ah. 'Et sih ts'ah'un na'a ts'ukhoona, buka k'et 'et ts'iyawh soo ná'whulya' et huwa. ²⁵ 'Ants'i sheepyaz tinta nilh'az, 'i li'ah't'ah inle. K'an 'et ndun sheep ghuunli 'ink'ez nezul ghúndli chah, Sizi 'en 'int'ah, 'en bughu nanahdel.

3

Nuhwheni ts'ekoo nuhkikah huba nyuh 'udúdooldhizin

¹ 'Et whuz na'a zeh nuhwheni ts'ekoo nuhkikah huba nyuh 'udúdooldhizin hoh hubut'l'a' dudoolhúyelh. Bulunah Yak'usda bughunek hik'únucha'ust'en hoh hubu'atkah, nts'e na'a 'uhint'ah huwa 'et khunek bu'et whunts'i hubeni náhondunoolelh. ² Dálhdzoo 'ink'ez Yak'usda ye nuljut, 'et whuz na'a nuhonilh'en t'eh, 'et huwa hubeni náhondunoolelh. ³ Yoo 'az ts'ih dawháht'en 'et whuz na'a zeh ilah. Nts'e na'a nuhtsigha dalhdzun, gold nidelhúya, khusulhúya teh be 'ulhdzun, k'us naih unzoo, 'i be dune ahli t'eh, ndunt'i, 'i ts'iyawh 'en ndoh t'e gunih. ⁴ 'Et k'us nts'e na'a be nahzoo 'ink'ez nuhdzi unzoo chah, 'i nuhyuh be 'adulhúdzun teh. 'Et ndi Yak'usda bunalh whudézi ho' hoont'ah. ⁵ 'Et niz t'eh haóodanzut nduwuhlyez hoh ndunnah ts'ekoo Yak'usda bube'ildzun, 'en Yak'usda t'aníhonenan, 'en chah soo cho soo nahudut'ih. Dukikah hubut'l'a' hududulyih. ⁶ Whuz na'a Sarah, 'en Abraham yuk'une' 'ust'en hoh, "Smoodih" 'uyulhni. Nuhwheni chah 'aw whechanzulhújut hoh 'ut'en unzoo, 'i 'ulh'en t'eh, 'et sih nuhwheni chah Sarah k'una'a 'uteht'ilh. 'Et whuz na'a nuhkikah hubut'l'a' dudoolhúyelh.

Nuhwheni dune nuh'atkah ts'ah'un na'a ne'boolh'en

⁷ Nuhwheni chah dune nuh'atkah ts'ah'un na'a ne'boolh'en hoh hubuzih doolhúts'i, 'ink'ez hubudóolhti. Soo nilyaz hoh ne'boolh'en, chahíhtus ho' hint'ah 'et huwa. 'Et ndi 'ilhuz be ts'ukhuna, 'i nuhghant'ai nanlhút'ah be 'áht'ah 'et huwa. 'Et ndúchah't'ah t'eh nuhtenadudli, 'i Yak'usda 'aw yoozólh'ts'a ghait'ah.

'Uk'únoodzin gunih

⁸ 'Et njan degna nus nuhdutésnilh. Nuhwheni ts'iyawh nuhwhubeni 'ilho zeh wahle. Lhugha te'noohdzin 'ink'ez lhulhutsinkah ts'iyawh lhk'eoohdutsi'. Lhuts'un nuhdzi wuzoo 'ink'ez soo cho lh'ts'un dunekah wahle. ⁹ 'Et khun 'uyoon nuhts'un tink'us 'uhuninzun t'eh, khun 'uk'unóohdzin gunih. 'Uyoon nuhch'a yáhalhtuk t'eh, nuhwheni chah khun hubuch'a yaóolhtuk gunih. 'Et whunts'i khunek unzoo, 'i be hubulh yaóolhtuk. T'eeonáhzun 'et whuz na'a Yak'usda nuhts'o húkwa' ninzun. 'I Yak'usda yit'i, 'i nuhgha óolts'it wule sih. ¹⁰ Ndez na'a 'uk'e'anguz hoh njan ndutni,

"Nduunnah k'an khuna 'et hóont'i' 'ink'ez dzin totsuk ba hoonzoo,

ndunt'ah ndunnah 'et whuz na'a hukwa' huninzun,

'en hoontsi' túnucha'hudoosnih,

'ink'ez khunek whuts'it, 'i be yachahoolhtuk.

¹¹ Hoontsi' tune' hut'en whuch'a naoohlúyelh 'ink'ez 'ut'en unzoo, 'i zeh 'oolh'en.

Be ts'ah'un na'a lh'ts'un 'uts'oot'e, 'et zeh hukwa' ts'óot'en huba' hoont'ah.

¹² 'Et 'alha neMoodihti ndunnah ts'ah'un 'int'ah, 'ahoolhyez bughunli.

Hits'un tedudlih totsuk uboozélhts'ai.
'Et whunts'ih ndunnah lubeshi 'uhulh'en,
'en whúske be hubunilh'en."

Ts'ah'un na'a 'aht'en hukw'elha dzuh nahdzut t'eh, 'et t'eh dega nus hoonzoo nuhgha whútelt's'ulh

¹³ Ndet hoonzoo hukw'u na'a 'aht'ah t'eh, 'et t'eh ndan 'utenelh nuhwunduntéldhad?
¹⁴ 'Et whunts'ih ts'ah'un na'a 'aht'en hukw'elha, huwa dzuh nahdzut t'eh, 'et dega nus hoonzoo nuhgha whútelt's'ulh. 'Ink'ez nuhwhé' hoonulhjoot t'eh whenoolhújut gunih, k'us huwuni wahle gunih! ¹⁵ 'Et whunts'ih Yak'usda neMoodihti, nuhdzi be soo dega nus dóolhti. 'Et whuz na'a ndun nuhoodutelhkut ndet hukwa tsi hooohli, 'et huwa 'ahoolhyez khuneklhádóolhdzin. 'Et whunts'ih soo ts'ah'un na'a hubunulh'en 'ink'ez soo cho ne'bulh'en hoh hubudóohni. ¹⁶ 'Et lubeshi nuhghu hoolah 'ink'ez 'uyoon hoontsi' k'una'a nuhch'a yáhalhtuk, 'et whunts'ih t'ehoninzun Christ, 'en be hoonzoo hukw'u na'a hoh ndi yun delhúts'i, 'et sih hukwaya hoole. ¹⁷ Khun teh 'ut'en unzoo, 'i bugha dzuh nahzut, 'inkez whuz na'a Yak'usda hukwa' ninzun t'eh, 'et nuhwhaba hoonzoo. 'Et whunts'ih tink'us na'a aht'en huwa dzuh nahzut t'eh, 'et 'aw nuhwhaba chahóozooh ho' hoont'ah.

Christ neba dzuh nusuzut, 'i be whuts'odul'eh

¹⁸ Christ 'en chah dich'oh 'iluh zeh nelubeshi k'elha dzuh nusuzut. 'En ts'ah'un 'int'ah 'ink'ez nuwheni 'aw ts'ah'un na'a cha'ts'it'ah. Whuz na'a neba 'et ndúja hoh Yak'usda ts'un néooteléh ka. 'En buyust'e hizelghí 'et whunts'ih Ndoni be buyust'e nakhítna. ¹⁹ 'En be nts'e nududeh tsak'edinla ts'ih, whuz hubuts'un whinya 'ink'ez ndet hubuts'u whélt's'ulh hubugha ubulh yailhtuk. ²⁰ Ndunnah, 'en 'uhint'ah, hoh da 'aw hik'únucha'it'il inle. Noah ts'i cho 'uleh hoh, 'et nduhóolez Yak'usda yubulh dzuh nuzut hoh buba ilh'i. 'Ink'ez bulunah lhk'udinah (8) 'aw 'en zeh, too hubuteghan which'a hudujih. ²¹ 'Et njan huwa t'ets'onanzin. 'Et njan too be' ts'ulya whézdújih. 'Aw neyust'e dutsun buna'ts'ulhdeh, whuz na'a ilah. K'us Yak'usda ts'oodulhkut hoonzoo neyuh ts'ih bugha t'ets'oninzun, 'i whudoo'a, 'et whuz na'a uzdujih. Sizi Gri dinadija, 'et 'uhoont'ah. ²² 'En 'int'ah, yak'uz whenaja 'ink'ez k'an 'et Yak'usda yughu nalnhnih ts'ih usda. Ndunnah lizas, 'ink'ez ndi nududeh 'i be butl'awhelts'ut, 'ink'ez ndunnah ye ulhtus, 'i hiyit'i, ndi ts'iyawh Sizi Gri hik'une' oot'en huba' obínla.

4

¹ Christ, 'en buyust'e 'i be neba dzuh nusuzut. 'Et huwa nuwheni chah nuhwhubeni ulhtus wahle 'ink'ez 'en k'una'a nuni noohzut. Ndunnah dich'oh hubuyust'e be dzuh nuhudeh, 'en ts'iyawh lubeshi hunedulh 'ustl'e' uhuja 'et huwa. ² 'Et whuz na'a dahóoldzah ndi yun k'ut neba whuz'ai, 'aw 'uyoon hubuk'ah ts'ih lubeshi ts'úznoot'uk huba' cha'hóot'ah. 'Et k'us Yak'usda nets'o hukwa' ninzun, 'et whuz na'a ts'ukhoona huba' hoont'ah. ³ 'Alha niz de haóodanzut whuts'un, 'udun yun k'ut whut'en hukwa' huninzun tune' hust'en, 'et nuwheni chah 'et whuz na'a zeh 'et nduts'é't'en. 'Aw 'et sóo' hooldzah 'et nduts'é't'en. 'Et hoh da 'ut'en dutsun, 'i 'uts'alh'en, neyust'e whuts'u nint'uk, 'ink'ez nzoodil'i 'i be lhutah 'uts'ut'en, 'ink'ez 'ahoolhyez nutaznutnai inle, 'ink'ez 'uk'edélt'si neba 'alha 'ant'e. ⁴ Ndunnah 'udun yun k'ut whut'en huba whe' hoont'ah hooyah dáhoont'ah huwa 'ustl'e' ahja. 'Aw 'o 'un zoodil'i hubulh chá'tuzest'il. 'Ink'ez 'aw 'o 'un lahoot'ah teh hubulh nucha'zacht'en. 'Et huwa hoontsi' k'una'a nuhghu yahalhtuk. ⁵ 'Et naheyelh 'aw 'et lhaduja. Ndunnah yahadla 'ink'ez hukhuna chah, hibut nitedulh huba nahuteyeh ka. Dahét'en, 'et ts'iyawh hiduténilh. ⁶ 'Et huwa ndunnah dahútetsah whutsuh 'en khunek unzoo, 'i be hubulh yailhtuk. Nts'e na'a hukhuna huba nahuteyeh, 'et whuz na'a zeh 'en chah huba nahuteyeh. 'Et nts'e na'a Yak'usda khuna, 'en chah whuz na'a buyégha khutena.

Ne'ut'en be Yak'usda uzdóolhti

⁷ 'Aw 'et ndi yun nadalhduk wuli. 'Et huwa nuhwhenich'oh duba whahtnih 'ink'ez 'ahoolhyez khahdli. 'Et sih soo ts'ah'un na'a tenadoohdli. ⁸ Soo hoolhtus 'i be lkh'eooh'tsi'. 'I soo dega nus hooncha ho' hoont'ah. 'Et 'alha 'uhoont'ah, lhat hoh dune nech'a lubeshi 'uhulh'en, 'et whunts'i ndi be lkh'ets'udutsi', 'i bugha lubeshi buch'a buka' delhchooz li'uja. ⁹ Nuhdzi hoont'i hoh dune nuhkoo bez ts'ih hubuts'u daóohzoo. ¹⁰ 'Ilhunah ahli hoh ndai Ndoni nuhgha iní'ai, 'i be lhula 'oohdut'en. Yak'usda ye unzoo, 'i lhat lhelhts'un na'a nuhghant'ai. 'Et sih 'uyoon soo cho whuz na'a huba ne'ooht'en. ¹¹ Ndunnah dune yatelhtuk, 'en Yak'usda k'una'a yahoolhtuk huba' hoont'ah. Ndunnah 'uyoon dune ba ne'hút'en, ndai ye ulhtus Yak'usda bugha iní'ai, whuz na'a 'uyoon huba né'hoot'en. 'Et nduhút'en, 'i bugha ts'iyannah Sizi Gri 'en be Yak'usda hidóolhti. Sizi Gri 'ilhuuz wheni 'ink'ez 'ilhuuz wheni, 'en 'o nus uzdóolhti huba' hoont'ah. 'En ts'iyawh bube'ildzun 'ink'ez ye úlhtus bulh 'int'ah 'et huwa. 'Et ndoh honeh.

Dzuh nuts'uzut, 'i be Yak'usda dóoti

¹² Nuhwhuk'esi' khun 'uyoon hubugha dzuh nahzut, 'et hoh óolhdzih, 'ants'i kwun k'una'a be dáhtnih. Nohwhulh 'et ndúhooja t'eh, khun teh ndez na'a nohwhulh 'et duchaóotesnil noohzin gunih. ¹³ Ndai Christ ye dzuh nusuzut, 'et whuz na'a zeh dzuh nahzut t'eh, 'et soo cho hóht'! Christ ye dézti, 'i nuhwhunalh ts'et hawhéls't'ut t'eh, 'et tube cho whunoolhnik. ¹⁴ 'Et Christ bunehdulh ahli huwa nuhwhulh'tsi t'eh, 'et soo degha nus hoonzoo 'uda nohwhulh 'úhooja. Yak'usda buyégha ye dézti, 'i 'ilhuz wheni nohwhulh 'int'ah 'et huwa. Ndunnah, 'en hich'a yalhtuk, 'et whunts'ih nuhwheni délhti whuz na'a bughu yalhtuk. ¹⁵ 'Et dudulh dune hughán, 'undunut'ih, tink'us et'ilh, k'us 'uyoon 'ahoolhyez dahóot'en buhútni, 'en ts'iyawh 'et ndunt'ah, khun teh 'en buk'una'a ne'óoht'en gunih. Doo ka sih buk'una'a dzuh nohzut. ¹⁶ 'Et whunts'ih ndun Christ budune hinli 'ink'ez 'et huwa dzuh nuhúzut t'eh, khun hukwaya hoole gunih! 'Et k'us njan huwa Yak'usda hidóolhti. ¹⁷ 'Aw 'et neba whusawhéls't'ut, nuwheni Yak'usda bukoo ts'inli hoh neba nahuteyeh. 'Et nuwhenich'oh neba nahuteyeh t'eh, 'et ndunnah Yak'usda bughunek unzoo, 'i daja ni hukwa cha'nízun, 'en hubulh dawhútenilh simba? ¹⁸ 'Ink'ez njan ndutni, "Ts'ah'un na'a 'int'ah tube huba howa whulna hoh hudutejih.

'Et ndunnah Yak'usda chahidílh'ti 'ink'ez lubeshi 'ulh'en, 'en dahútenilh nahzun?"

¹⁹ 'Et huwa ndunnah Yak'usda hik'úne' 'ut'en hukwa dzuh nuhuzut t'eh, 'ut'en unzoo, 'i 'uhooh'en. 'Et whuz na'a Yak'usda hiye khuna, 'i buba ghóle. 'En 'uja ts'iyaintsuk inla 'ink'ez 'aw neladootnih ghait'ah.

5*Nuhwheni dune tsuh whudéldzuhl, soo cho bughahl'i*

¹ Nuhwheni Yak'usda ba 'ilhunahuwúdulh, ndunnah nuhtah 'utsuh whudéldzuhl, si chah nohwhulh 'ilhunuh 'ust'ah. 'Ink'ez Christ, 'en dzuh nusuzut da, si chah 'et whunalh'en. 'Ink'ez ndi ye dézti, 'i 'aw 'et nilhdukwenalhts'et haootels'ulh, si chah sulh 'uwhtenilh. 'Et huwa khunek ulhtus, 'i be njan nuhwhudutésnilh. ² Yak'usda busheep hubutah delhúts'i, 'en huba sheep ghundli wahle. 'Uyoon nunhoneyoot 'et huwa 'et ndóht'en gunih. Nuhwhenich'oh hukwa' nahzun huwa 'et hughohle. Nuhwhuba k'elha whutele noohzin gunih, nuhwhenich'oh hoonáht'i huwa 'ooht'en. ³ Ndunnah nuht'álya, 'en hubumoodih cho wahle gunih. 'Et ndunnah 'ilhu nuyeh, 'en bunalh ts'ah'un na'a 'ooht'en, 'en chah nuhk'una'a 'ahoot'e. ⁴ 'Ink'ez Sizi Gri, 'en hubusheep ghundli hubutsuh whudéldzuhl, 'en ndet nenalhts'et haínya t'eh, 'et ndi whudézti whuch'a oonúlhde, 'aw hoolah nahodde ghait'ah, 'et nuhgha óotelts'ulh.

Yak'usda butl'a' dudulhúye 'ink'ez netsudule buch'a dehtni

⁵ 'Et whuz na'a nuhwheni k'an nehyelh, 'et ndunnah ye 'un hezulh, 'en butl'a' dudoolhyelh. 'Alha nuhwheni chah ts'iyawh whuz na'a lhutl'a' dudoolhúyelh. Be yuh úzdudildzun, 'i, 'ants'i naih k'una'a bé doolhúts'i. Ndez na'a 'uk'e'anguz hoh njan ndutni, "Ndunnah 'ududélti, 'en Yak'usda buch'a detni.

'Et whunts'ih ndunnah yuh údudildzun, 'en ye unzoo, 'i bughu yú'aih."

⁶ 'Et huwa Yak'usda soo cho bubut yuh 'údudoolhdzun. 'Et sih whusawhéls't'ut t'eh nuhwhudóolhti. ⁷ Ndet huwu ni ahli, 'et ts'iyawh Yak'usda butl'awháhle. 'Ahoohyez nuhghunli 'et huwa. ⁸ Duba whahtnih 'ink'ez soo cho huwahli! Netsudule, nuhch'a detni, 'en ndi khunaiti, lion ts'utni, 'i k'una'a nutuhnudúghoo. Ndan tinta' butel'h'ilh 'en bukunúta. ⁹ Ndun buch'a déhtni 'en ndi be nohba 'alha 'uhoont'ah soo cho óhtun. Nt'eeonáhzun ndet dzuh nahdeh, ndunnah ndi yun k'ut nuhwhulhutsinkah ndulhcho hoh huba 'alha' yint'ah, 'en chah whuz na'a zeh dzuh nuhudeh. ¹⁰ 'Et Yak'usda, ye unzoo, 'i ts'iyawh yulh 'int'ah, 'i bughu Christ, Sizi ts'utni, neba daja, 'et huwa uzdutejih ka neka' dani. 'Et huwa 'ilhuz wheni yak'uz whudézti ts'ih uzdulelts'ilh. 'Et whunts'ih 'ast'iyaz dzuh nutehdoh. 'Et hukw'elh'az dich'oh soo cho lhanwhudutelilh. 'Et ulhtus nuhwhutelilts'ilh 'ink'ez koo buk'u whuz'ai, 'i k'una'a 'aw noghóotnah ghait'ah nuhwhutelilts'ilh. ¹¹ Yak'usda 'en ts'un ye dézti, 'ink'ez ts'iyawh ye ulhtus, 'i ts'iyawh bube'ildzun 'int'ah. 'I 'ilhuz wheni 'ink'ez 'ilhuz wheni, 'et ndoh honeh.

Nuhwheni ts'iyawh nuhdzi unzoo nohwhulh 'uhot'e

¹² 'Et nelhutsin, Silvanus ts'utni, 'en but'aníwhunentan unli, daja nuhwhudáni, 'en hoontsolyaz be suba 'uk'une'uzguz. Ndi khunek 'i be nuhdzi 'ulhtus wule hoh ndi Yak'usda ye unzoo, 'i ts'ah'un na'a 'alha 'int'ah, 'ink'ez 'i bughu ndun whudáni. 'I be nudelhúya. ¹³ Njan keyah Babylon, 'et ndun ts'eke, 'en nohwhulh 'utahálti 'int'ah, 'en dahooja nuhwhúlhni. Mark suye', 'en chah dahooja nuhwhúlhni. ¹⁴ Lhk'ehdutsi' be nalhudenáhts'oos, 'i be dahooja lhudahtni. Ndunnah Sizi Gri yulh 'int'ah, nuhwheni ts'iyawh nuhdzi unzoo nohwhulh 'uhot'e. 'Et ndoh honeh.

Whulh Nat Dustl'us Peter Yuk'e'ánguz

Yak'usda soo hoolhtus hoh yulh súyin, Peter dahooja ubulhni

¹ Si Simon Peter, Sizi Gri, 'en be 'ulhna 'ink'ez whel'a chah usdli. NeYak'usda neulhyis Sizi Gri, 'en ye ts'ah'un na'a 'int'ah, 'i njan be 'alha 'uhoont'ah dézti, 'et nuwheni chah 'ilho neghalts'ut. 'Et hubugha nuhts'o k'e'usges. ² Yak'usda 'ink'ez Sizi neMoodihti, soo ts'ah'un na'a 'en bugha t'ets'oninzun, 'i be Yak'usda ye unzoo, 'ink'ez ye ts'ah'un 'int'ah, 'i lha'un teh nuhgha óokat. ³ Nts'e na'a Yak'usda ba ndi yun k'ut uzdoolt'si ka, Yak'usda dich'oh whéulhtus, 'i be nduwulcho negha óoni'ai. 'En bugha nt'ets'onínzun, 'i bugha neghá whults'ut. 'Et ndai Yak'usda ye dézti, 'ink'ez 'aw 'o 'un 'o nus hoonzoo chahoolah, 'et 'uzdutejih hukwa neka' dani. ⁴ 'I be njan khunek k'us hooncha 'ink'ez khunek dezti, 'et whulh nets'un náhezya. Njan 'et huwa Yak'usda dant'ah, 'et nuhwheni chah whuz na'a zeh buk'una'a 'óoh't'e. 'Et njan yun k'ut ntsi' netelhtsilh, 'i bugha ndi yun k'ut be' whut'en 'et zeh whuts'u nint'uk, 'et nuhwheni 'uda ts'iyawh buch'a nasahdel.

Sizi Gri 'en bugha t'eeonahzin, 'i be 'o nus soo nóohyeh

⁵ Njan 'et huwa, 'uda Yak'usda nuhwhuba 'alha 'int'ah, nuhdzi ndulcho 'i be ndez whuz na'a chah 'ooh't'e. Ts'ah'un na'a dune unzoo wahle, 'ink'ez 'o nus chah Yak'usda t'eenoozhé. ⁶ Hoontsi' whuch'a khóhde, 'ink'ez howa whulna whunts'i whulh wahyin. 'Ahoohyeh Yak'usda bughu nuni noohzut, 'ink'ez buba whudóolhti. ⁷ Ndunnah Yak'usda buba 'alha' yint'ah, 'en hubuk'eohtsi', 'ink'ez be lhk'ets'udutsi', 'i be lhk'eoohdutsi'. ⁸ Ndi ts'iyawh 'et ndaht'en, 'ink'ez 'i be 'o nus ulhtus 'ulheh t'eh, 'et sih ndi neMoodihti Sizi Gri 'en bugha t'eeonehzin, 'i be 'o nus soo nóohyeh, 'ink'ez nuhwe'ut'en soo ts'ah'un na'a 'ooh't'e. ⁹ 'Et ndunnah Sizi Gri buba 'alha' yint'ah, 'en njan ducháhust'en t'eh, 'en nilhdukwyaz zeh honilh'en li'hint'ah 'ink'ez 'ankw'us chahuwhés'en li'hint'ah. 'Ink'ez niz dak'ez bulubeshi 'uhiyalh'en, 'uda Yak'usda ts'iyawh yuna'alhde inle, 'et whunahodelhúnah. ¹⁰ 'Et huwa sulhutsinkah nuhdzi ndulcho 'i be 'ink'ez 'o 'un chah, 'et nts'e na'a dutehjih ka nukha' dani, 'ink'ez 'utahalya 'ahli soo ts'ah'un na'a njan 'et whunaoodoolhúnah gunih. Ndi ts'iyawh 'i be whuz na'a ndaht'en t'eh, 'et 'aw ntóohghal ghait'ah. ¹¹ Ndez na'a neMoodihti 'ink'ez neulhyis Sizi Gri, nts'e 'ilhuuz wheni hubudayi cho unli, 'et hoonzoo hoh nuhwhuba da'dutekwus.

Peter 'aw 'et datésah

¹² 'Et huwa njan ts'iyawh t'eeonáhzun 'ink'ez khunek 'alha 'int'ah, 'i chah úlhchoot hoh soo cho óhtun. 'Et whunts'ih 'ún whudáni 'ahoolhyez lhk'uz teh nuhnalhts'et hanáwhus'aih. ¹³ 'Et t'eeonúszun 'awhuz khusna 'et whuts'un, 'ún whudani nuhwhuba whunalhúnih 'ink'ez nuhnalhts'et hawhús'aih. 'I be whahnih wahle. ¹⁴ T'eeonúszun 'aw 'et nilhdukwh hoh datésah. Nts'e na'a datésah, 'et neMoodihti Sizi Gri whusúnelhtan. ¹⁵ 'Et huwa 'o 'un oosneh ghait'ah 'et hukwa 'ust'en, 'et ndust'en 'et huwa dasítsai hukw'elh'az njan hodelhúh 'i ts'iyawh whunaoolhúnih.

Ndunnah Yak'usda bube'ildzun, 'en nts'e na'a Ndoni hubunelhtan yahutelhtuk, 'et whuz na'a zeh yahalhtuk hoh 'uk'e'hanguz

¹⁶ 'Et neMoodihti Sizi Gri, 'en ye úlhtus, 'ink'ez whusanatedalh chah, 'et whúnwhuznelhtan. Ndunnah tube whunest'i be yahalhtuk, 'en whuz na'a bulunah ts'ah'un na'a khunek cha'it'ah 'uhulh'en. 'En buk'una'a ilah nuwheni whúnwhuznelhtun. 'Et whunts'i hoh da nuwhenich'oh 'et nena be hooncha hoh but's'uh hayanduz, 'et ts'onalh'en. ¹⁷ Nts'en'a' ne'abá Yak'usda, 'en buYe' yudélhti 'ink'ez deghunla dézti ho' 'int'ah, 'et newhunélhtan. K'us hooncha, 'en bube'ildzun 'uhoont'ah, 'et dich'oh buYe' yugha ooni'ai. Ndez na'a njan nduhoja. Yak'uz ts'un dega nus hooncha, 'et Yak'usda bughunek ndus de hadélt's'ut 'et ndutni, "Ndun 'en SuYe' buk'esi', 'en 'int'ah. 'En bugha tube hoonúst'i." ¹⁸ Hoh da njan dzulh k'ut whudézi 'et, Sizi 'en bulh nuts'udelh hoh ndi bughunek, 'i yak'uz ts'un hadel't'ut, 'i 'uzdánt's'o. ¹⁹ Ndi Yak'usda be nus whunilh'en bughunek, 'i k'an 'o nus but'az 'uhoont'ah. 'Et ndi khunek soo cho ulhchoot t'eh, 'et sih dega nus nuhwhuba whutézoo. Nts'e na'a tsahólhgus kwun be whét'en, 'et ndi khunek nuhwhuba 'et ndunt'ah. Christ, sum cho ts'utni, 'en nuhdzi be whet'en tele li'tehnilh, 'et whuts'un nuhdzi ndulhcho 'i be ndi khunek wúlhchoot. ²⁰ Ndi soo dega nus hooncha t'ewhunoohzeh huba' hoont'ah. Yak'usda bughunek nus t'eznanzin, 'i, ndet 'uwhulhni, 'aw dune dich'oh duk'una'a na'huyooleh ghait'ah. ²¹ 'Et ndi khunek 'i be nus t'eznanzin, 'i, 'aw dune dich'oh hukwa' huninzun whuz na'a ilah hoh neba 'uk'e'hanguz. 'Et k'us Yak'usda, ndunnah hube'íldzun, 'en nts'e na'a Ndoni wheóobunelhtan yahutelhtuk, 'et whuz na'a zeh yahalhtuk hoh 'uk'e'hanguz.

2

Khunek whuts'it, 'i be whenets'odulh'eh, 'i whuch'a kkhadli

¹ 'Et hoh da 'uhooya ndunnah whuhuts'it hoh nus whunill'en, 'en chah dune tah húdelhts'i inle. 'Ink'ez whuz na'a zeh khunek whuts'it, 'i be whebodulh'eh, 'en chah nuhtah hudutélts'ih. Ndunnah whu'iz hoh khunek whuts'it, 'i be nuhwhuba 'alha 'uhoont'ah, 'i hoolah hitelhtselh hukwa' tutet'ih, 'et whuz na'a whunohodutelh'eh. NeMoodihti, ndun nenaónket, 'en whunts'i hits'oodutéldai. Ndunnah whuz na'a dune hodulh'eh, 'en 'ilhudzin t'eh Yak'usda ye whúske, 'i khunyz hubugha whútelt'ulh. ² 'Ink'ez khunek ts'uwhts'it, 'i be lhanah nahuntet'ah hubuhuntoodelh ka. 'Et huwa 'en hubugha 'uyoon njan Yak'usda buznedulh, 'et ts'uwhts'it hoh ts'ut'en, hudutenilh. ³ 'Uyoon hiyít'i ka' huminzun 'et huwa hubughunek whuts'it, 'i be nuhgha há' huduntet'ah. 'Et whunts'ih Yak'usda ndun huba nahuteyeh, 'uda huba lhadint'ah. 'Ink'ez 'en 'int'ah ye whúske, 'i hubugha whúte'ah, 'en 'aw chaitah ho' 'int'ah.

Dune nahuna'a 'en Yak'usda dabutelilh

⁴ Hoh da ndunnah lizas lubeshi inla, njan dahét'en, 'et Yak'usda 'aw whulachaditnih. 'Et huwa tsak'et whut'ah hoolah, Tartarus ts'utni, 'en whuz whébalhdel. 'Ink'ez whuz tsahólhgus yuh huba nahuteyeh whuts'un 'utes tl'ool be whenábadezguz. ⁵ 'Ink'ez yoo niz haóodanzut da whuts'un, 'uda yun k'ut whut'en, ndunnah Yak'usda highu nuni chahunízut 'ink'ez 'aw chahidilhti, Yak'usda 'en chah 'et 'aw whulachaditnih. 'En 'uja ndi yun k'ut ndulhcho hoh too hadambun 'ink'ez too hubangan. Hoh da lhk'udinah 'aw 'en zeh 'et whuch'a Yak'usda hubulhyih. Too hadutébilh whutsuh, Noah, 'en Yak'usda ye ts'ah'un na'a 'int'ah, 'i be dune hubulh yailhtuk, 'en hubulh 'ilhunuh 'int'ah. ⁶ 'Ink'ez nat keyah Sodom 'ink'ez Gomorrah huwhútáni, 'et nawhult'ah kwun nailhtan hoh whudálhk'un 'ink'ez lhez gaih zeh whulhtsi. 'Et whuz na'a hoolah hubulhtsi, 'et hoh huba nahezya. Nus de ndunnah Yak'usda highu nuni chanteszut 'ink'ez 'aw chahidilhti, 'en huwa t'ehonozin ka 'et huwa 'uhóonla. ⁷ 'Ink'ez ndun ts'ah'un dune Lot hiyúlhni, 'en keyah whuduték'un whutsuh, 'et whuch'a Yak'usda bulizah hiyúlyih. Ndunnah hubutah inda, 'en hube 'ut'en k'ah whudutsun huwa ni unli. ⁸ 'En dune ts'ah'un 'int'ah, 'en hoh da hubutah inda inle, 'et 'ahoolhyez 'aw khunek k'únucha'hust'en hoh whunill'en 'ink'ez whudits'o, ndóhoont'ah huwa dzuh nuná'duduldzut. ⁹ Ndunnah Yak'usda yé hunuljut, 'en lubeshi 'uhulh'en whuts'u hunint'uk, nts'e na'a whuch'a nabutélelh, 'et neMoodihti t'eeoninzun. 'Ink'ez ts'ah'un cha'it'ah, 'en chah ndet dzin huba nahuteyeh, 'et whuts'un hube' whudúyah, 'et huboontun. ¹⁰ Ndunnah soo degha nus buyust'e whudutsun zeh whuts'uh hunint'uk 'ink'ez bumoodih huba 'ants'i hinli hoh hik'unucha'ust'en. 'En 'uhududelhúti 'ink'ez hukwa' huninzun tune' hut'en. Ndunnah ncha 'aw whechaniljut hoh hoontsi' hukw'u na'a bughu yahalhtuk. ¹¹ 'Et whunts'ih lizas, ndunnah khunek whuts'it, 'i be dune hoodulh'eh, 'en huba nus hilhtus 'ink'ez huba 'o nus hincha ho' hint'ah. Ndunnah lizas, 'en whunts'i ndunnah ncha nduhut'en, 'aw neMoodihti but hubodilhtsi' hoh hubuk'echahawhus'ai.

Ndunnah khunek whuts'it, 'i be dune hodulh'eh, dawhúltsi' ho' hint'ah

¹² 'Et whunts'ih ndunnah khunek whuts'it, 'i be dune hodulh'eh, 'en tintah khunai yunduhúlt'ah. Hoh nduhint'ah 'aw t'ehonízun, 'et whunts'ih hoontsi' hukw'u na'a howu yahalhtuk. 'Et huwa tintah khunai k'una'a dahutetsah, 'et ndi hiye untisi, 'i bulh Yak'usda but huteyin. ¹³ Hubuyust'e whuts'u nint'uk dzin duhóolyez hoh 'et zeh 'uw'húwhulh'en. Ts'ah'un cha'hoot'ah tune' hust'en, 'et hukw'elha huba k'elha whutele. Nuhtah bukaya hoonli. Tube huhoont'i hoh nanhona'ah 'et whulh lhulhúgha nuhla 'uha'ah. ¹⁴ 'Uyoon 'at bulh tinta' hut'ih, 'et zeh honilh'en. Lubeshi 'uhulh'en, 'aw 'ust'le' 'uhooneh ghait'ah. Ndunnah buzul soo cha'ítus, 'en tink'us hubanilh'uk. 'Uyoon yit'i ka' huninzun, 'et whuz na'a hubudzi hodulh'eh. Ndunt'ah Yak'usda hubulh hunilh'e hoh 'uda huba nahezya ho' hint'ah. ¹⁵ Ts'ah'un ti 'et tinch'u hunédel. Balaam, Beor buye, 'en be 'ut'en k'ah huhoólhchoot. Dat'en inle 'et whuz na'a 'uhut'en. 'En ts'ah'un cha'hoot'ah tune' 'ut'en, hooht'i hoh 'et sooneya be buba k'elha hoonli. ¹⁶ 'Et whunts'ih hoontsi' k'una'a et'ih 'et huwa. Khunai donkey hiyúlhni, 'i, 'aw yachalhtuk, 'et whunts'ih ndun nus whunih'en, 'en whusnik k'una'a ne'ut'en hoh donkey dune k'una'a khunekti be yulh yalhtuk hoh Balaam, "Dah!" yulhni. ¹⁷ 'Et ndunnah ndunt'ah, 'en 'ants'i too k'et whuzdla, 'aw too hoolah whunduhúlt'ah. 'Et nduk kw'us búlh nodults'ut, li'uhint'ah. Ndunt'ah whuz na'a khunek be 'alha 'uhoont'ah whu'et 'uhint'ah. Soo nts'e tsahólhgus 'ink'ez 'aw whét'en chahoolah, 'et 'ilhuz wheni 'et huba 'udun whuz'ai.

Bulunah dune nana'ah

¹⁸ K'us ndan huba 'alha 'uhoont'ah, 'en ndi yun k'ut tink'us 'et'ih, 'en buch'a nahusdel. Ndi khunek whuts'it, 'i be hubodulh'eh, ndunnah huba 'alha 'uhoont'ah hubuhoolhgooh

hukwa' hubuhulh'en. Nts'e na'a hoolhtus hoh neyust'e lubeshi whuts'u nint'uk, 'en whuts'it, 'i khunek ncha, 'i be hubulh yahalhtuk hoh tink'us húbanilht'uk hukwa' ba halh'en. ¹⁹ Ts'iyaintsuk k'une' uhoot'en 'et but's'ú hoozi. 'Et whunts'ih dich'oh whudutsun 'uhuwuhulh'en, 'et hoh netsudule be 'ulhna huzdli. 'Et nawh cha'hóot'ah, ndan whuch'a' bunílhde, 'en bube 'ulhna hinli. ²⁰ 'Et ndunnah neMoodihti 'ink'ez neulhyis Sizi Gri, 'en soo ts'ah'un highu t'ewhuninzun, 'i be ndi yun k'ut hoontsi', 'et ts'iyawh whuch'a' hudujih, 'ink'ez doo chah zeh hubuch'a' ninde, 'ink'ez ntsi' hubutanahandel t'eh, 'et whutsuh da Yak'usda t'ehunuszun da, dahét'en, 'et degha nus huba whutétsi'. ²¹ 'Et ndunt'ah, 'en njan ts'ah'un ti 'aw t'ehonízun t'eh, 'et sih da huba soo' hot'e wule. 'Et hukw'elh'az t'ehonanzin t'eh 'ink'ez butl'a hida'ai hoh 'i hich'a nalhúya, 'et whuz na'a dek'elh'az 'i 'udechoo degha nus hotétsi'. ²² 'Ink'ez nts'e na'a hubulh dahooja, ndi khunek 'i bugha whuts'odul'eh, nts'e na'a daja ni, 'et whuz na'a 'uhooja hoh ndez na'a njan ndutni, "Lhi nahiyulkoo, doo chah zeh nahiyudlat." 'Ink'ez njan chah ndutni, "Goso too be soo cho bubuna'hulhdoh, 'ink'ez hukw'elh'az whutl'us tanahalgok." Ndunnah 'et whuz na'a 'et duhint'ah.

3

NeMoodihti nts'e na'a nets'u náhezya, 'aw sa nuchá'ust'en

¹ 'Aw 'et nuhwuk'esi', ndi bulh nankoh dustl'us nuhts'o k'e'úsages. 'I be nuhwubeni unzoo, 'et whunts'ih nuhwubha whunalhúnih. ² 'Et ndunnah nus whunilh'en Yak'usda bube'ildzun hinli, 'en hoh da daja hudani. 'Ink'ez nuwheni whel'a 'en 'uts'int'ah, neMoodihti neulhyis bughunek, 'i be nohwulh yats'alhtuk 'ink'ez nuhwuzdáni, 'et huwa ts'iyawh whunaoolhúnih. ³ Njan 'et 'udechoo soo cho t'ewhunoozhzeh huba' hoont'ah. Dek'elh'az dzin t'eh, 'et ndan Yak'usda ghudloh, 'en nts'e na'a buyust'e whuts'u nint'uk, 'et whuz na'a zeh 'uhutet'ilh hukwa' huninzun, 'en chah nuhtah 'uhutet'ilh. ⁴ 'Ink'ez 'uhudutenilh, "Alha ih Sizi Gri nuhts'u nahezya doo chah whusanatedalh. Ndan 'udáhni, 'en nts'é 'ut'en? Netsuh da ts'iyawh yahadla 'et whunts'ih 'awhuz whusanáchasdaih. 'Udechoo ndi yun 'ulya 'ink'ez k'an 'et dzin whuts'un, ts'iyaintsuk dawhút'en, 'et zeh nduwhút'en." ⁵ 'Uda dahooja 'aw whunahoolnih hukwa cha'hunízun. Yak'usda bughunek, 'i be 'udechoo 'uda nduk yaz 'uhóolya inle. 'Ink'ez ndi yun bulah teh t'ah 'int'ah 'ink'ez bulah yun unli inle. ⁶ Yak'usda bughunek 'i be too hadambun. 'Et whuz na'a yun k'ut too be' hoonla. 'Et hoh ts'iyawh hoolah whulhtsi. ⁷ Ndunnah Yak'usda yughu nuni chanizut 'ink'ez 'aw chahidilhti, 'en huba nahuteyeh Yak'usda ye whúske, 'i hubugha whútelts'ulh ka, 'et ndet dek'elh'az dzin whuts'un bughunek be huba k'ah hoontun. 'Et k'an 'et yun 'ink'ez nduk yaz chah, hoh t'eh kwun be ts'iyawh whuduték'un. ⁸ 'Et whunts'ih nuwheni nuhwuk'esi', njan 'ilhun 'et whunaoodoolhúnah gunih. NeMoodihti 'ilhudzin 'et ants'i 1,000 be naooduzuk ba lí'hoont'ah. K'us 1,000 be naooduzuk 'et 'ilhudzin ba lí'hoont'ah. ⁹ NeMoodihti nts'e na'a nets'u náhezya, 'aw sa nuchá'ust'en. 'Et bulunah sa stla 'ut'en huninzun. 'Et whunts'ih tube sa neba ilh'i. 'Aw 'ilhunwhunts' i tinta oolts'it hukwa cha'nízun. 'Et ts'iyannah lubeshi ch'a hubeni nahadunóoleh 'et zeh hubuts'u hukwa' ninzun.

NeMoodihti budzin whusaóotelts'ulh

¹⁰ 'Et buka tsi cháhoodli hoh dune 'undunut'i 'ulh'ek whusayih, 'en k'una'a buka tsi cháhoodli hoh neMoodihti budzin whusaóotelts'ulh. Ndet ndúhooja t'eh, 'et nduk yaz 'ants'i kwun delhútulh hukw'u na'a hoolah whutele. 'Ink'ez ndai 'ulya, 'i, ts'iyawh kwun ulhtus, 'i be ts'iyaintsuk natelgheh. Ndi yun 'ink'ez ndai buk'e yuzda, 'i bulh ts'iyawh duték'un. ¹¹ 'Et whutsuh ndótenilh t'eh, ndez na'a dune unli wahle huba' hoont'ah, lubeshi bu'et 'ink'ez Yak'usda be 'ut'en k'ah 'et zeh hukw'u ne'ooht'en. ¹² Yak'usda budzin whuz de whélt's'ulh, 'ahoolhyez hukwa tsi hóhli 'ink'ez 'a cho whusahólt's'it whuz na'a hukwa' holh'en. Nts'oh whégha whezulh hoh 'et nduwútenilh, 'et t'eh nduk yaz ndulhcho hoh kwun be hoolah whutele. 'Et ndai ts'iyaintsuk 'ulya, 'i, kwun dullhuk 'i be ts'iyaintsuk natelgheh. ¹³ 'Et whunts'ih njan ndet nets'u hoozi, ndi yun 'ink'ez yaz 'et k'ahoondit, 'et 'ahoolhyez hukwa tsi ts'úhole. Njan 'et ye ts'ah'un na'a 'int'ah, 'i 'et zeh 'ilhuz wheni 'et 'utet'ilh.

Soo ts'ah'un zeh 'ooht'e

¹⁴ 'Et huwa nuwheni nuhwuk'esi' ndi 'i ts'iyawh buka tsi hóhle. Soo ndet 'o 'un 'oohneh ghait'ah hoh hóolhdzih. 'Et hoh 'aw hoonliyaz hukwaya chasóohle. 'Et t'eh hoonliyaz nuhk'echáholht's'it, 'ink'ez Yak'usda be ts'ah'un aht'ah, 'et whuz na'a 'en ba hóolhdzih. 'Et Sizi Gri whusanája t'eh, 'et whuz na'a 'ooht'e. ¹⁵ 'Ink'ez neMoodihti tube sa neba ilh'i, 'et lhanah hudoojih huba, 'et whuz na'a huwu nuni noohdeh huba' hoont'ah. 'Ink'ez nelhutsin buk'ets'intsi', 'en Paul hiyulhni, 'en ye whunih, 'i hubugha whults'ut, 'et 'i bugha Yak'usda bughunek nuhts'o k'e'anguz. ¹⁶ 'Et ts'iyawh be' dustl'us 'i k'ut 'et howu yalhtuk. Bulah khunek tube howa whúlna hoh t'eznezeh. 'Et ndunnah 'aw whechaoodíl'il, 'ink'ez 'aw soo cha'ítus chah, Yak'usda bughunek 'i dich'oh hukwa' huninzun k'una'a na'huyínla.

'Et whuz na'a zeh 'onghoh bughunek 'i chah 'et ndihíyinla. 'I bugha hoontsi', 'et dich'oh kxanáhwhunt'ai. ¹⁷ 'Et huwa nuhwheni nuwhuk'esi', njan 'et nduwhútenilh whutsuh, 'uda t'eoonaázun. 'Et huwa howahli! Nts'e na'a 'aht'ah, whuz na'a zeh 'ooht'e. Doo ka ndunnah hintsi', 'en tinta' hut'ih, 'en hubuk'una'a 'oohneh. 'Et hubuk'una'a 'ahja t'eh, 'et laht'ah tehle. ¹⁸ 'Et whunts'ih neMoodihti 'ink'ez neulhyis Sizi Gri ye unzoo, daja ni 'ink'ez ndet bughu t'ets'oninzun, 'i chah, 'o nus bugha hodoohlú'eh. 'En ts'un ye dézti, 'i nawhult'ah k'an 'et 'ink'ez 'ilhuz wheni. 'Et ndoh honeh.

'Udechoo Dustl'us John Yuk'e'ánguz

Ndi khunek be ts'úkhuna, 'i bugha

¹ Soo 'udechoo da whuts'un hoonli soo ts'ah'un na'a 'uts'udánts'o, nena be chah ts'onalh'en, 'ink'ez nela be chah but'ats'úgheznai khunek be ts'úkhuna, 'i bugha. ² Ndi be ts'ukhuna nenalh hawhélt's'ut 'ink'ez ts'uhon'en 'ink'ez howu yats'alhtuk. Ndi 'ilhuz be ts'ukhuna ne'aBá bulh 'int'ah. 'Et nenalh hawhélt's'ut, 'i hubugha nuhts'udáni. ³ Ndet ts'uhó'en 'ink'ez 'uts'udánts'o, 'et bugha 'un whuts'útni. 'Et huwa lhulh 'uts'óot'e wule. 'Et 'alha ne'aBá 'ink'ez buYe' Sizi Gri 'en bulh 'ilho ts'udédowh. ⁴ 'Ink'ez ndi ts'iyawh huba nuhwhts'un k'e'ts'anguz, 'et huwa tube cho whunoolhnik.

Ndi be whét'en, 'i buniz ts'edulh t'eh, 'et 'ilho 'uts'int'ah ts'inli

⁵ Ndi khunek 'uts'udánts'o 'i 'int'ah, 'en but's'uhayélt's'ut, 'i bugha ndun whuts'útni, Yak'usda be whét'en, 'i 'int'ah, 'ink'ez 'aw tsahólhgus 'i 'aw bugu cháíhoolah. ⁶ 'En bulh lhulh 'uts'int'ah ts'utni, 'ink'ez tsahólhgus yuh ts'ih ts'édulh t'eh, 'et ts'uwhts'it ho' ts'utni, 'ink'ez 'aw khunek 'alha 'int'ah, 'i buk'uncha'ts'ust'en. ⁷ 'Et whunts'ih be whét'en, 'i bulh 'int'ah, 'i buniz ts'edulh t'eh, 'et 'ilho lhulh 'uts'int'ah ts'inli 'ink'ez buYe' Sizi Gri buzkai be nelubeshi ts'iyawh yuna'dalhe. ⁸ 'Aw lubeshi chats'it'ih ts'utni t'eh, na'uzdunut'ah 'ink'ez khunek 'alha 'int'ah, 'i neghu hoolah. ⁹ Lubeshi 'uts'alh'en ts'utni t'eh, 'aw nelachadutesni 'ink'ez ts'ah'un 'int'ah hoh nelubeshi neba yunaoodutélnah 'ink'ez tink'us na'a 'uhoont'ah, ts'iyawh whuch'a yuna'dutélhoh. ¹⁰ 'Aw lubeshi cha'ts'fíl ts'utni t'eh, Yak'usda whuts'it 'int'ah ts'utni ho' ts'utni, 'ink'ez bughunek, 'aw neghu hoolah.

2

¹ Suzkehyaz, 'aw lubeshi 'utelh'ilh whuch'a 'et huwa ndi khunek 'i be nuhwhts'un k'e'usges. Nduannah lubeshi 'ulh'en, 'en huba ne'aBá Yak'usda bubut neba yatelhtuk, Sizi Gri, ts'ah'un na'a 'int'ah, 'en 'int'ah. ² 'Ink'ez 'en 'int'ah nelubeshi k'elha dazsai. 'Aw nuwheni zeh ilah. Yinkak nduhóolcho hoh whulubeshi k'elha chah. 'I be ne'aBá soo cho nets'u naitóot'en 'et hukwa.

Sizi Gri ndan unli, whuz na'a t'ezninzun

³ Khunek netl'aída'ai, 'i buk'une' ts'ut'en t'eh, 'et whuz na'a t'ets'onínzun 'i bugha Sizi Gri t'ezninzun. ⁴ Ndu'n 'en t'enuszun ni, 'ink'ez yughunek yuk'unucha'ust'en t'eh, 'en whuts'it 'int'ah 'ink'ez ndi khunek 'alha 'int'ah, 'i 'aw chayít'ih ho' 'int'ah. ⁵ 'Et ndan yughunek k'une' ut'en, 'en 'alha Yak'usda ye nék'entsi', 'i be ts'ah'un na'a lhadúlya ho' 'int'ah. Njan huwa t'ets'onínzun Sizi Gri buyúdelhts'i ho' ts'int'ah. ⁶ Ndan ye yudínda ni t'eh, nts'e na'a nusíya, 'et whuz na'a zeh nóya huba' hoot'ah. ⁷ Sulhutsinkah* 'aw khunek k'andit, 'i netl'aída'ai, 'i bugha ilah nuhts'un k'e'usges. 'Udechoo whuts'un t'enahzun ndi khunek 'uda, 'i 'int'ah. Ndi khunek 'uda, 'i 'udechoo whuts'un déhts'o, 'i 'int'ah. ⁸ Tsahólhgus yuh 'aw 'et whedúdeh 'ink'ez ts'ah'un be whét'en, 'i 'aw 'et be whét'en sulí. 'Et huwa nuhts'un k'e'usges 'ink'ez doo chah 'un whudúsní, k'an 'et khunek netl'aída'ai, 'i ndi 'alha khunek 'i yulh 'int'ah, 'ink'ez nuwheni chah bulh 'áht'ah. ⁹ Ndan be whét'en niz 'int'ah ni t'eh, 'ink'ez dulhutsin ts'udutnik, 'en 'awhuz tsahólhgus yuh usda ho' 'int'ah. ¹⁰ Ndan dudulhutsin k'entsi', 'en be whét'en tah 'int'ah 'ink'ez 'aw tink'us'utét'ilh whuts'u nóot'uk ghait'ah. ¹¹ 'Et whunts'ih ndan dudulhutsin ts'udutnik, 'en tsahólhgus yuh 'int'ah 'ink'ez tsahólhgus yuh núya. 'Ink'ez nts'e tezya 'aw t'echaonínzun, ndi tsahólhgus be chawhes'en sulí 'et huwa.

Yak'usda ba hilhtus nahúsdi

¹² 'Uskehyaz Sizi Gri boozí bugha nuhwulubeshi nuwhubá buna'déde, 'et huwa nuhts'un k'e'usges.

¹³ Nuwheni 'ubákah yulh ndult'ah ndun 'udechoo whuts'un hoonli, 'en t'enahzun, 'et huwa nuhts'un k'e'usges.

Chílhkah ntsi' buch'a nulhde 'et huwa nuhts'un k'e'usges.

'Uskehyaz ne'aBá t'enahzun, 'et huwa nuhts'un k'e'usges.

¹⁴ Nuwheni 'ubákah ndun 'udechoo whuts'un 'int'ah t'enahzun, 'et huwa nuhts'un k'e'isguz.

Chílhkah ulhtus 'ink'ez Yak'usda bughunek nuhyudín'ai,

'ink'ez ntsi' buch'a nulhde,

'et huwa nuhts'un k'e'águz.

* 2:7 Ndi khunek "sulhutsinkah", ndan Sizi Gri huba 'alha' yint'ah, 'en lhuzkehkeh hinli li'hint'ah. 'Et huwa lhulhutsin 'ink'ez lhulhtuskeh hudli ho' hint'ah.

Ndez na'a ndi yun k'ut uzdóolts'i

¹⁵ Ndi yun k'ut tink'us 'uwhut'en 'ink'ez ndi yun k'ut hoonli, 'i chah, whuts'u nóóht'uk gunih. Ndan ndi yun k'ut tink'us ne'whut'en ndóohoon't'ah whuts'u nint'uk t'eh, 'aw ne'aBá ye nék'entsi', 'i bughi yoolah ho' 'int'ah. ¹⁶ Neyust'e whuts'u nint'uk, 'ink'ez nena chah whuts'u nint'uk, 'ink'ez ndai aht'i be 'ududelhuti t'eh, ndi 'i ts'iyawh ndi yun k'ut huba 'int'ah, 'ink'ez 'aw ne'aBá ts'un hachahoolts'ut 'et huwa. ¹⁷ Ndi yun 'aw 'et whewhúts'it 'ink'ez buts'úznint'uk, 'i chah, 'et whunts'ih Yak'usda hukwa' ninzun teh ne'út'en, 'en 'ilhuz khuténa.

Ndunnah Christ ch'a detni, 'en buch'a huwahli

¹⁸ 'Uskehyaz 'aw 'et dek'elh'az 'et né'hunent'o ho' hoon't'ah. 'Ink'ez ndun Christ ch'a detni, 'en whuz de úyah whulh údahts'o. K'an 'et whunts'i Christ ch'a hudetni hulai ho' hoon't'ah. 'Et huwa nt'ets'onínzun 'aw 'et dek'elh'az 'et né'hunent'o ho' hoon't'ah. ¹⁹ Nets'u haháandel 'et whunts'ih 'aw nelh hudedowh ilah 'uhint'ah. Nelh hudedowh 'uhint'ah t'eh, nelh zeh da hoot'e wule. 'Et whunts'ih whehandel 'et huwa ts'iyannah t'ebunózin 'aw nelh hudedowh chahílah. ²⁰ 'Et whunts'ih ndun Christ lubeshi bughu hoolah, 'en Ndoni nuhyída'ai 'ink'ez ts'iyaintsuk t'eeonáhzun. ²¹ Ndi khunek 'alha 'int'ah, 'i t'enuzahzun huwa ilah nuhts'un k'e'águz. Ndi khunek t'enahzun 'et huwa nuhts'un k'e'úsges 'ink'ez ndi khunek 'alha 'int'ah, 'i whuts'it bughu hoolah. ²² Ndan Sizi 'en Christ 'unli 'et whuts'oodedlai, 'en whuts'it 'int'ah. 'En Christ ch'a détni 'int'ah. 'En 'int'ah ne'aBá 'ink'ez buYe' bulh whuts'oodedlai. ²³ Ndan ne'aBá buYe' ts'oodedlai, ne'aBá chah chayít'ih ho' 'int'ah. Ndan ne'aBá buYe' buba 'alha' yint'ah t'eh, be'aBá chah yit'i ho' 'int'ah.

'Udechoo whuts'un whudáhts'o 'ilhuz wheni bulh 'óóht'e

²⁴ 'Et huwa 'udechoo whuts'un whudáhts'o 'ilhuz wheni bulh 'óóht'e. 'Et 'udechoo whuts'un whudáhts'o nohwhulh 'úhoont'ah t'eh, 'et sih ne'aBá 'ink'ez buYe' chah bulh úteht'ih. ²⁵ Njan nets'ú hoozi, 'ilhuz ts'ukhutena, 'et 'uw'húlhni. ²⁶ Ndunnah nanohunte'ah hukwa' 'ut'en, 'en bugha ndi nuhts'un k'e'úsges. ²⁷ 'Et whunts'ih Ndoni ne'aBá nuhyída'ai, 'i 'ilhuz nohwhulh 'int'ah, 'ink'ez 'uyoon dune 'aw 'o 'un whunohodoolh'eh huba cha'hóot'ah. 'Et k'us ndi nuhyudéhts'ut, 'i ts'iyaintsuk whunohdulh'eh 'ink'ez ts'ah'un 'int'ah, 'aw whuts'it, 'i ilah 'int'ah. 'Et soo nts'e na'a whunohdálh'i, whuz na'a zeh bulh 'óóht'e.

Nuwheni Yak'usda buzkehkah 'aw hoonli hukwaya chats'ilah hoh bubut nuts'udóolya

²⁸ 'Uskehyaz ndun 'en zeh bulh 'óóht'e. 'Et hoh nuhnalhts'et hainya, 'ink'ez whusanája t'eh, nedzi ulhtus unli 'ink'ez 'aw hoonli hukwaya chats'ilah hoh bubut núzdoolya. ²⁹ 'En ts'ah'un na'a 'int'ah t'eeonáhzun t'eh, t'eeonahzun ndun ts'ah'un ne'út'en 'en Yak'usda yé ulhtus, 'i be huwhuzdli ho' hint'ah.

3

¹ Dalcho, 'i be ne'aBá nek'entsi' negha óoni'ai, Yak'usda dich'oh nendúlhni buzkeh 'uts'int'ah soo cho whunulh'en. 'Et huwa ndi yun k'ut whut'en net'echahúnizun, didut 'aw t'ehinízun 'et huwa. ² Nuhwhuk'esi' k'an 'et Yak'usda buzkeh ts'inli. Daztét'ih 'awhuz nenalhts'et hachawhulhts'it. 'Et whunts'ih nt'ets'onínzun ts'a'en t'eh, soo bunduztel'ih, soo nts'e na'a dantah, whuz na'a uzteht'ih 'et huwa. ³ 'Ink'ez ndunnah whuz na'a hits'un hukwa tsi hooli, dutsun hoolah na'hudutelhtsilh, dant'ah butsun hoolah, whuz na'a.

Lubeshi 'uts'ulh'en ts'iyawh whulazdootnih huba 'uhoont'ah

⁴ Ndan lubeshi 'ulh'en, 'aw khunek yuk'únucha'ust'en ho' 'int'ah. 'Et khunek k'uts'uyus t'eh, lubeshi 'uhoont'ah. ⁵ 'Ink'ez t'eeonáhzun nelubeshi neba 'ún yutoolhdelh ka ndi yun k'ut nuséya. 'Ink'ez didut 'aw lubeshi bugbah hoolah ho' 'int'ah. ⁶ Ndan ye yundina, 'aw lubeshi oolh'en ghait'ah ho' 'int'ah. Ndan lubeshi 'ulh'en, 'aw chayít'il 'ink'ez 'aw t'echainízun. ⁷ 'Uskeh 'uyoon nanwhunoo'ah gunih. Ndan ts'ah'un ne'ut'en, 'en ts'ah'un 'int'ah. Dant'ah Sizi Gri ts'ah'un 'int'ah, whuz na'a ndunt'ah ho' 'int'ah. ⁸ 'Udechoo whuts'un netsudule lubeshi 'ulh'en. Ndan lubeshi 'ulh'en, 'en netsudule yunéyah 'int'ah. Njan 'et huwa Yak'usda buYe' ndi yun k'ut nuséya, 'et huwa netsudule be 'ut'en ts'iyá yóolhtsilh 'et whuba. ⁹ K'us ndan Yak'usda yé ulhtus, 'i bé whuzdli, 'en lubeshi cha'ulh'en. Ndi Yak'usda ts'un hainzut, 'i be 'ilhuz wheni ts'ukhuténa, 'ink'ez 'ilhuz wheni yulh 'int'ah. 'Et ndunnah 'i be whuzdli, 'en 'aw lubeshi 'uhoolh'en ghait'ah.

Nuwheni Sizi Gri uznedulh ts'iyawh lhk'ets'oodúts'i

¹⁰ 'Et ndez na'a Yak'usda buzkeh 'ink'ez netsudule buzkeh chah t'ehunudzun: ndan ts'ah'un nucha'ust'en, k'us dudulhutsin k'echaíts'i, 'en Yak'usda yuneyalh ilah ho' 'int'ah. ¹¹ Soo 'udechoo whe' whudit'en whuts'un ndi khunek dahts'o njan ndutni, lhk'ets'oodúts'i, ni. ¹² Ndan dune Cain 'en k'una'a ilah. 'En ntsi' niyalh 'int'ah 'ink'ez dudulhutsin yuzilghí. 'Et di ka 'uyinla? Be 'ut'en untisi' 'ink'ez bulhutsin 'en ts'ah'un ne'ut'en, 'et hukwa'

yinla. ¹³ Sulhutsinkah ndi yun k'ut whut'en nuhts'u hudutnik t'eh, khun teh nuhwhuba hócha gunih. ¹⁴ Nelhutsinkah hubuk'ets'ints'i, 'et huwa t'ets'oninzun dats'uzsai 'ink'ez nats'ukhítina li'ts'int'ah. Ndundulhutsin k'echahits'i, 'awhuz yahadla li'hint'ah. ¹⁵ Ndan dulhutsin ts'udutnik, 'en néghan 'int'ah. 'Ink'ez t'eeonáhzun ndan néghan, 'en 'ilhuz be ts'ukhuna, 'i bughi yoolah ho' 'int'ah.

Sizi Gri neba daja 'et huwa be lkh'ets'udutsi', 'i t'ezninzun

¹⁶ Sizi Gri 'en ye khuna, 'i neba yuladetnik, 'et huwa be lkh'ets'udutsi' t'ezninzun. 'Ink'ez nuwheni chah nelhutsinkah be ts'úkhuna, 'i huba hubulazdootnih huba' hoont'ah. ¹⁷ 'Et whunts'ih ndan ndi yun k'ut hoonli ut'i hoh bulhutsin ye dunidzud, 'ink'ez dudzi be 'aw yugha techa'nizil t'eh, nts'e na'a Yak'usda ye nék'entsi', 'i yulh 'útet'ih? 'Et ndut'en t'eh, nts'e na'a Yak'usda k'etetsi'? ¹⁸ 'Uskehyaz 'aw khunek be zeh ilah lkh'ets'udutsi' uzdooni. Soo ts'ah'un na'a ne'e'ut'en be chah lkh'ets'oodutsi'. ¹⁹ Njan 'et huwa nt'ets'oninzun khunek 'alha 'int'ah, 'i bulh 'uts'int'ah. 'Et t'eh bubut nedzi ts'ah'un 'oot'e. ²⁰ Nedzi bugha neba nahezya t'eh, Yak'usda 'o nus negha te'ninzun ho' 'int'ah, ts'iyaintsuk t'eeonínzun 'et huwa. ²¹ Nuhwhuk'esi' nedzi neba chahesye t'eh, whécharts'uniljut hoh Yak'usda bubut nuzdútélya. ²² Dant'i buts'un ka' ts'utni, 'i negha íyunle, bugha 'i ts'oontun 'ink'ez hoonzob hoh bunalh ne'ts'ut'en 'et huwa. ²³ Ndi bughunek netl'aída'ai, buYe' Sizi Gri, 'en ndan unli, 'et neba 'alha 'oot'e 'ink'ez lkh'ets'oodutsi'. 'Et whuz na'a bughunek netl'aída'ai.

Soo cho huwohle, lhanah nus whunilh'en na'hadudil'i, 'en 'uda netah 'uhut'en ho' hoont'ah

²⁴ Ndan yughunek oontun, 'en Yak'usda yudínda 'ink'ez Yak'usda chah yulh 'int'ah. Ndoni neyída'ai 'en be t'ets'oninzun neyuh ts'ih nelh 'int'ah.

4

¹ Nuhwhuk'esi', nudúdeh, 'i ts'iyawh ilah nuhwhuba 'alha 'oot'e. Ndi nududeh, 'i óolhdzih Yak'usda ba ts'ah'un 'int'ah tulih. Lhanah huwhuts'it hoh nus whunilh'en yun k'ehindel 'et huwa. ² Ndaí nududeh, 'i Sizi Gri buyust'e be ndi yun k'ut nuseya, ni t'eh, 'i Yak'usda ba ts'ah'un ho' 'int'ah. 'Et huwa Yak'usda buyégha ndan unli t'ets'onínzun. ³ Ts'iyai nududeh, 'i Sizi Gri buyust'e be ndi yun k'ut nuseya, 'aw nduchadusnih t'eh, 'aw Yak'usda bulh cha'it'ah ho' 'int'ah. 'Et ndi nududeh, 'i Christ yuch'a détni, 'i 'int'ah. Whusatayalh whulh 'udahts'o 'ink'ez 'uda ndi yun k'ut hoonli ho' 'int'ah. ⁴ 'Uskehyaz, Yak'usda bulh 'áht'ah 'ink'ez ndunnah Christ ch'a hudetni 'uda hubuch'a' núlhde. Ndunduhudínda, 'en, ndi yun k'ut netsudule 'en buch'a dega nus 'ultus ho' 'int'ah 'et huwa. ⁵ Ndund'ah ndi yun k'ut humoodih hube'ílhdzun hinli. 'Et huwa yun k'ut whut'en hubuk'una'a yahalhtuk 'ink'ez yun k'ut whut'en hubuhoozélhts'ai. ⁶ Nuwheni Yak'usda bube'ílhdzun ts'inli. Nduunnah Yak'usda t'eninzun, 'en nehudits'o. Nduunnah Yak'usda hube'ílhdzun chailah, 'en 'aw chanehoozélhts'ai. 'Et huwa njan nududeh, 'i ts'ah'un 'int'ah 'ink'ez tink'us 'int'ah nudúdeh, 'i t'ebuznínzun.

Ts'iyannah lkh'edutsi', 'en Yak'usda yé ulhtus, 'i bé huwhuzdli 'ink'ez Yak'usda t'ehinínzun

⁷ Nuhwhuk'esi' ts'iyawh lkh'ets'oodutsi'. Bé lkh'ets'udutsi', 'i Yak'usda ts'un hált's'ut ho' 'int'ah. Ts'iyannah lkh'edutsi', 'en Yak'usda yé ulhtus, 'i bé huwhuzdli 'ink'ez Yak'usda t'ehinínzun. ⁸ Ndan, 'en 'aw 'ilhunah k'echaíts'i, 'en Yak'usda 'aw t'enízun ho' 'int'ah, Yak'usda 'en nek'entsi' 'int'ah 'et huwa. ⁹ 'Aw 'ilhunuh zeh buYe' 'en ndi yun k'uz yútel'h'a. 'En be 'ilhuz wheni ts'ukhoona 'et whuba. 'Et whuz na'a Yak'usda ye nék'entsi', 'i yunénilhtan. ¹⁰ Ndez na'a njan duwhutni, nuwheni Yak'usda buk'echats'ítsi' inle, 'et whunts'ih nek'entsi' 'ink'ez buYe' whusayáhl'a nelubeshi k'el'ha datatsah' 'et whuba. 'I be soo cho nets'u náitar'en. ¹¹ Nuhwhuk'esi', 'et whuz na'a Yak'usda nek'entsi' t'eh, nuwheni chah lkh'ets'oodutsi' huba' hoont'ah.

Lkh'ets'udutsi' t'eh, Yak'usda neyudínda

¹² 'Aw dune Yak'usda ya'en hoolah. Lkh'ets'udutsi' t'eh, Yak'usda neyudínda 'ink'ez ye nék'entsi', 'i nedzi yuh soo ts'ah'un na'a lhaóodulya. ¹³ Njan 'et huwa t'ets'oninzun Ndoni negha iní'ai 'et hoh bulh 'uts'int'ah 'ink'ez didut chah neyudínda. ¹⁴ Ndi yun k'ut whut'en hubutélhyi huba ne'aBá buYe' whusayáhl'a. 'Et ts'uw'ha'en 'ink'ez howu yats'ulhtuk. ¹⁵ Ndan Sizi Yak'usda buYe' 'int'ah ni, 'en Yak'usda yuyudínda 'ink'ez didut chah Yak'usda bulh 'int'ah ho' 'int'ah. ¹⁶ Ndi Yak'usda ye nék'entsi', 'i t'eznanzin 'ink'ez neba 'alha 'uhoont'ah. Yak'usda nek'entsi' 'int'ah. Ndan bé lkh'ets'udutsi', 'i bulh 'int'ah, 'en Yak'usda bulh 'int'ah 'ink'ez Yak'usda yuyudínda ho' 'int'ah.

Ndez na'a be lkh'ets'udutsi', 'i soo ts'ah'un na'a neba lhadúlya suli

¹⁷ Neba nahudeh dzin 'et sih nedzi wúlhtus huba, 'et whuz na'a be lkh'ets'udutsi', 'i soo ts'ah'un na'a neba lhadúlya suli. Christ didut 'et dunt'ah huwa, nuwheni chah ndi yun k'ut 'et nduts'int'ah 'et huwa. ¹⁸ Bé lkh'ets'udutsi', 'i 'aw nujut bughu hoolah. 'Et

whunts'ih bé lhk'ets'udutsi' soo ts'ah'un na'a lhadúlya sulí, 'i nujut 'un whenaínuyukw. Nujut dzuh nénéulhdzut ho' 'int'ah. Ndan nuljut, 'en bé lhk'ets'udutsi', 'i buyuh soo ts'ah'un na'a lháchadit'ah ho' 'int'ah. ¹⁹Yak'usda didut 'udechoo nek'entsi' 'et huwa buk'ets'intsi'.

Be 'alha 'uhoont'ah, 'i be Yak'usda buk'une' ts'oot'en

²⁰Ndan Yak'usda buk'esi' ni t'eh, 'ink'ez dudulhutsin ts'udutnik, 'en whuts'it 'int'ah. Nts'e na'a dudulhutsin yunilh'en whunts'i yuk'echaitsi' t'eh, Yak'usda 'aw chayes'en, 'ink'ez nts'e na'a yuk'etetsi'? ²¹'Ink'ez ndi khunek net'l'aída'ai, 'i ndez na'a njan dúhoont'ah; ndan Yak'usda k'entsi', dudulhutsin chah k'eootsi' huba' hoont'ah.

5

¹Ndan Sizi, 'en Christ 'int'ah, huba 'alha 'uhoont'ah, 'en Yak'usda yé ulhtus, 'i be whuzdli 'int'ah. Ndunnah ndan 'ilhuz be ts'ukhutená neghá óoni'ai, hik'entsi' t'eh, ndunnah 'en be yé ulhtus, 'i whuzdli, 'en chah buk'ehootsi' huba' hoont'ah. ²Yak'usda buk'ets'intsi' 'ink'ez bughunek ts'oontun t'eh, 'et njan 'et huwa t'ets'oninzun Yak'usda buzkeh buk'ets'intsi'. ³Ndi bughunek ts'oontun t'eh, 'et whuz na'a Yak'usda buk'ets'intsi'. 'Ink'ez ndi bughunek 'aw bughá chahoolnah hoh buk'une' ts'oot'en. ⁴Ndunnah Yak'usda yé ulhtus, 'i be whuzdli, 'en ndi yun k'ut 'ut'en ntsi' ch'a' nilhde. Bé neba 'alha 'uhoont'ah, 'i be whuch'a' nilhde. ⁵Ndan Sizi 'en Yak'usda buYe' unli huba 'alha 'uhoont'ah, 'en ndi yun k'ut 'ut'en ntsi', 'i ch'a' ulhdeh.

Yak'usda buYe' dant'ah 'int'ah whunéulhtun

⁶Sizi 'en Christ 'int'ah. 'En too 'ink'ez 'uskai be whusainya. 'Aw too be zeh ilah. Too 'ink'ez buzkai be whusainya. Ndoni ts'ah'un be' hoont'ah, 'i 'int'ah. 'Et huwa 'en 'uja bunalh 'úhooja. ⁷'Et tanah 'en yak'uz whuts'un bunalh 'úhooja. Ne'aBá, 'ink'ez ndun khunek, 'ink'ez Ndoni chah. Ndunnah tanah 'ilhunuh zeh hinli. ⁸'Et ndi tahált'ah, 'i ndi yun k'ut bunalh 'úhooja. Ndoni, too, 'ink'ez buzkai chah. Ndun tahált'ah 'i lhgha 'uhudéja. ⁹Dune bunalh 'úhooja bughunek ts'ilhchoot t'eh, Yak'usda bunalh 'úhooja 'o nus hooncha ho' hoont'ah, 'ink'ez ndi Yak'usda buYe' yughu yailhtuk, 'i 'int'ah. ¹⁰Ndan Yak'usda buYe' huba 'alha' yint'ah, Yak'usda daja ni, 'et chah huba 'alha 'uhoont'ah whuzdli. Ndan Yak'usda huba 'alha cha'yit'ah, 'en Yak'usda whuts'it ninzun. Yak'usda buYe' yughu yailhtuk huba 'alha cha'yit'ah 'et huwa. ¹¹Ndi bunalh 'úhooja, 'i Yak'usda 'ilhuz ts'ukhutená neghá óoni'ai. Ndi 'ilhuz be ts'úkhuna, 'i buYe' bulh 'int'ah. ¹²Ndan buYe' ut'i 'ilhuz be ts'ukhuna, 'i ut'i ho' 'int'ah. Ndan Yak'usda buYe' chait'ih, 'en 'aw 'ilhuz be ts'ukhuna, 'i chait'ih ho' 'int'ah. ¹³Ndunnah Yak'usda buYe' boozí huba 'alha' yint'ah ndi nuhts'un k'e'anguz. 'Et hoh 'ilhuz khutehna whaht'i t'eeonóhzin, 'ink'ez Yak'usda buYe' boozí nuhwhuba 'alha 'oot'e zeh 'ooh'te.

Yak'usda yunéyah, 'en ndet buts'un hukwa' hutni, ts'iyawh hubudits'o

¹⁴'Et whechats'uniljut hoh buts'un tezdudlih, 'et 'i 'int'ah, ndet hoonli buts'un hukwa' ts'utni, 'et whuz na'a hukwa' ninzun t'eh, nedits'o 'int'ah. ¹⁵'Ink'ez nedits'o t'ets'oninzun t'eh, ndet buts'un húkwa' ts'utni, ndi whutsuh da buts'un húkwa' ts'utni, 'et nawh cha'hoot'ah neghá tékulh. ¹⁶Ndan bulhutsin lubeshi 'aw yuk'é dachatesah, 'i 'ulh'en, yunilh'en t'eh, Yak'usda yoodolhukut 'ink'ez 'et ndan lubeshi 'aw yuk'é dachatesah 'ulh'en, 'en khutena yughá óote'alh. 'Et lubeshi bughá daztéstah, 'i chah hoonli. 'Aw 'et huba tenadondli chaduzúsnih. ¹⁷Ts'ah'un be nucha'ts'ust'en, 'i ts'iyawh lubeshi 'int'ah. 'Ink'ez lubeshi bughá daztéstah, 'i chah hoonli.

Ndan Yak'usda yé ulhtus, 'i bughá whuzdli, 'aw lubeshi cha'ulh'en

¹⁸Ndan Yak'usda yé ulhtus, 'i bughá whuzdli, 'aw lubeshi cha'ulh'en, 'et t'ets'oninzun. 'Et whunts'ih ndan Yak'usda yé ulhtus, 'i bughá whuzdli dich'oh khudli ho' 'int'ah, 'ink'ez ndunnah ntsi', 'en 'aw yut'aóonalh ghait'ah. ¹⁹Nuwheni Yak'usda bulh 'úts'int'ah 'et nt'ets'oninzun. 'Ink'ez ndi yun k'ut whut'en, ndunnah ntsi', 'en ts'iyawh k'úne' bul'en. ²⁰Yak'usda buYe' whusainya 'ink'ez t'ets'oninzun njan t'ets'onózin, 'et neghá óoni'ai. 'Et hoh ndan 'alha 'int'ah t'eznoozeh 'et whuba. Ndan 'alha 'int'ah, 'en bulh 'uts'int'ah. BuYe' Sizi Gri 'en chah bulh 'uts'int'ah. Ndan 'en 'int'ah soo 'alha Yak'usda 'int'ah 'ink'ez 'ilhuz be ts'úkhuna, 'i unli ho' 'int'ah. ²¹'Uskehyaz 'uk'edélti, 'i buch'a khahdlí. 'Et ndoh honeh.

Whulh Nat Dustl'us John Yuk'e'ánguz

Dahooja nuhwhudúsní, ní John

¹ Si dune netsuh whedelhdzulh, ts'eke 'utahálti 'ink'ez buzkeh chah hubuts'un k'e'usges. 'En hubuk'esi'. 'Aw si zeh ilah. Nduunnah khunek 'alha 'int'ah, 'i t'eninzun, 'en chah hubuk'ehintsi'. ² Ndi khunek 'alha 'int'ah neyúdezdlá, 'i 'ink'ez 'ilhuz wheni nelh utét'ilh, 'i bughá 'udusni. ³ Yak'usda ne'aBá 'ink'ez neMoodihiti Sizi Gri ne'aBá buYe', 'en but's'un ye unzoo, 'i ye negha té'ninzun, 'i chah, 'ink'ez nedzi whudezghel, 'i ts'iyawh 'ilhuz wheni nelh 'óot'e. Khunek 'alha 'int'ah, 'i 'ink'ez be lhk'ets'udutsi', 'i bulh.

Ne'aBá khunek netl'aída'ai, 'i lhk'ets'oodutsi', ní

⁴ Ne'aBá khunek netl'aída'ai, 'i ts'ilhchoot k'una'a, whuz na'a bulunah nyuzkeh khunek 'alha 'int'ah, 'i bulh hédulh. 'Et nahoo'ai hoh tube hoontúst'i. ⁵ 'Ink'ez ts'eke nts'un tédusdlíh. 'Aw ndi k'an 'i khunek 'i 'et netl'aóoda'ai ilah 'udusni. Ndi khunek 'i soo 'udechoo da 'i njan lhk'ets'oodutsi', ní. ⁶ Ndai khunek netl'aída'ai bughá nuts'óodelh huba' hoont'ah. Ndi 'i bé lhk'ets'udutsi', 'i 'int'ah. Soo 'udechoo da dahts'o ndi khunek netl'aída'ai, 'i bughá nóhdelh huba' hoont'ah.

Lhanah dune nana'ah 'en yun k'éhindel, 'et huwa kháhli

⁷ Lhanah dune nana'ah 'en yun k'éhindel. 'Et huwa ndunt'ah 'aw Sizi Gri ndi yun k'ut buyust'e be nuséya chahudusnih. Ndan ndunt'ah, 'en dune nana'ah 'int'ah 'ink'ez Christ ch'a hudetni chah 'int'ah. ⁸ Nuhwhenich'oh khahtli! Ndai 'ut'en be né'ts'ust'en, 'i tinta ts'oolelh whuch'a. 'Et sih soo cho neba 'uk'elha hóle. ⁹ Ndan tinta 'ut'ih 'ink'ez Christ khunek be bughu yatuk, 'i 'aw chayóotun t'eh, 'aw Yak'usda chah chaít'ih. Ndan ndi Christ bughu yatuk, 'i yoontun t'eh, ne'aBá buYe' bulh nahúlt'ah hubit'i ho' 'int'ah. ¹⁰ Ndan Christ khunek be bughu yatuk, 'i chayóotun hoh whenhodutéh'eh huba nuhghu ninya t'eh, ndunt'ah 'aw nuhkoo daóoya gunih, k'us danínyih dóohtni gunih! ¹¹ Ndan danínyih yúlhni, 'en chah ndi tink'us ne'út'en yula 'ut'en ho' 'int'ah 'et huwa.

John 'ubulhni, 'Ilhudzin t'eh nuhts'un tésyalh hukwa' nuszun."

¹² Njan whulat nuhwhuts'un k'etésgus. 'Aw dustl'us too bulh k'une'úsduguz, 'i 'udutésni hukwa cha'nuzúszun. 'Ants'i nuhwhuts'un tésyalh 'ink'ez soo nuhwhunen ts'un nuhwhulh yatelhtuk 'et hukwa' nuszun. 'Et huwa tube cho ts'uhót'i. ¹³ "Nuhwhulhtus 'utahálti buzki, 'en dahooja nuhwhuhútni. 'Et ndoh honeh.

Whulh Tat Dustl'us John Yuk'e'ánguz

John, Gaius ts'iyannah yuk'entsi', 'en yuts'un k'e'anguz

¹ Si John dune netsuh whedelhdzuhl Gaius ts'iyannah yuk'entsi', 'en soo 'alha buk'esi', 'en bunts'un k'e'usges. ² Nk'esi' nzul dáldzoo, 'et whuz na'a ts'iyaintsuk be soo de'a 'ont'e 'ink'ez soo 'ont'e, 'et whuz na'a mba tenadusdli. ³ Daint'en ts'ah'un na'a inyalh, neyulhutsinkah whusahándel 'ink'ez ndi khunek 'alha 'int'ah, 'i bulh 'int'ah, 'et hukw'un nahuwulnuk. 'Et huwa tube cho hoonúst'i. ⁴ Suzkehkah unli, 'en khunek 'alha 'int'ah, 'i be ts'ah'un na'a hedulh whulh 'údusts'o t'eh, 'et dáhoolcho, 'i be hoonúst'i ho' hoont'ah.

Gaius 'ahoolhyez ts'iyannah hubula 'ut'en

⁵ Nk'esi' neyulhutsinkah 'ink'ez 'uts'un whut'en 'ahoolhyez hubula 'int'en. ⁶ 'En 'uhint'ah nts'e na'a hubuk'entsi', Yak'usda ba 'ilhunahuwúdulh, 'en hubuts'un nk'unahuwulnuk. Nts'e na'a Yak'usda hootét'i hukw'u na'a hutedulh ts'ih whébilh'aih t'eh, 'et tube soo 'int'en hoh 'int'en. ⁷ Yak'usda boozi bugha whehándel 'ink'ez 'udun yun k'ut whut'en hubula k'ez cha'híhchulh 'et huwa. ⁸ Nuwheni chah ndunt'ah nekoo dábut's'oolelh huba' hoont'ah. 'Et t'eh khunek 'alha 'int'ah, 'i ba 'ilho 'uts'ut'en ts'oole.

Ilhunuh dune, 'en hoont'i hoh Yak'usda ba 'ilhunahuwúdulh hubutah dune 'int'ah na'dudíl'i, 'ink'ez 'ilhunuh dune, 'en ts'iyannah soo híghu yalhtuk

⁹ 'Et Yak'usda ba 'ilhunahuwúdulh hubuts'un k'e'isguz. 'Et whunts'ih 'ilhunuh hubutah usda, Diotrephes hiyulhni, 'en hoont'i hoh hubughun nus dézti na'dudíl'i, 'et hukwa' ninzun. 'En 'aw nekacha'nízun. ¹⁰ 'En khunek buk'ewhúnduda 'i be 'ants'i ulgih li'utni nech'a yálhtuk. 'Et huwa nuhts'un tésyah t'eh, nts'oh tune'út'en ne'ut'en nuwhunalh howu yatelhtuk. 'Aw 'et zeh ilah ndut'en, nelhutsinkah 'aw hubuka cha'nízun. 'Ink'ez ndunnah hubuka' ninzun, 'en tenazdudli bakoo 'et tenábulh'aih. ¹¹ Nk'esi' ndai ntsi', 'i be ne'ont'en gunih. Unzoo, 'i zeh ne'ont'en. Ndan 'ut'en unzoo, 'i 'ulh'en, 'en Yak'usda bulh 'int'ah. 'Et whunts'ih ndan tink'us 'ut'en, 'en 'aw Yak'usda chayí'il ho' 'int'ah. ¹² Ts'iyannah Demetrius soo híghu yalhtuk. 'Ink'ez khunek 'alha 'int'ah, 'i bugha whunénuhtun dant'ah unli. 'Ink'ez nuwheni chah soo bughu yats'ulhtuk. 'Ink'ez 'alha ts'utni t'oonáhzun.

Ts'iyannah hubudzi whudooghel, 'et hubuts'u hukwa' ninzun

¹³ Njan whulat nyuwhts'un k'etésguz, 'aw dustl'us too bulh k'enezdguz 'i 'udutésnilh hukwa cha'nuzúszun, ¹⁴⁻¹⁵ 'et whunts'ih 'a tsih nyutés'ilh hukwa tsi hóosdli. 'Et sih soo lhunídul'en hoh yatádultuk. Ts'ah'un na'a lhts'un 'óoh't'e. Ndunnah nek'entsi' nezih hudélhts'i, 'en dahooja nyuhútni. Nek'entsi' nyuzih hudélhts'i, 'en 'ilhunuh hinli hoh dahooja hubudóni.

Jude Ndi Dustl'us Yuk'e'ánguz

Yak'usda 'utahábanla, Jude dahooja hubulhni

¹ Si, Jude, Sizi Gri be 'ulhna 'ink'ez James bulhutsin 'ust'ah. Nuhwheni Yak'usda ne'aBá, 'en ba 'udun ninwhininla 'ink'ez Sizi Gri 'en be huboontun. 'Et ndunt'ah, 'en 'utáhalya 'uhint'ah. ² Ye té'ninzun 'ink'ez be nedzi dezghel, 'ink'ez be lhk'ets'udutsi', 'i chah, 'i ts'iyawh nuhwhuba lhk'uz tookat ka nuhwhuba tenadusdli.

Neba 'alha' hooant'ah, soo cho whulh nudoolhúya

³ Nuwhuk'esi' ndet hoh whézdújih, 'et hubugha da nuhwhuts'un k'e'tesgus, 'et whunts'ih be neba 'alha' hooant'ah, 'et hubugha 'o nus nuhts'o k'e'osges huba' hooant'ah. Ndi neba 'alha' 'int'ah, 'ilhuh zeh 'ink'ez 'ilhuz wheni dune Yak'usda bube'ildzun, 'en Yak'usda hubutl'ahónla, 'i ba soo cho nudoolhúya, 'et ndun whudutesnilh ka nuhts'o k'e'águz. ⁴ 'Et bulunah dune tube nunul'i hinli hoh nuhtáh hunindel. Niz t'eh whudezulh sa inle, 'et whuts'un nts'ena'a huba nahuteyeh, 'et ts'iyawh 'uk'e'whusduguz. 'En dune Yak'usda bu'et 'uhint'ah. NeYak'usda ye unzoo, 'i 'uts'un na'a na'huyulh'ih hoh 'et nduhútni, ndai ts'iyawh 'ut'en dutsun, 'i 'uts'ulh'en t'eh, 'et soo' hooant'ah nehútni. Yak'usda 'en zeh k'üne'hiyul'en, 'ink'ez Sizi Gri neMoodihti, 'en chah hits'oodedlai.

Uda 'ink'ez k'an 'et Yak'usda lanadetnik

⁵ 'Et hoonliyaz nuhwhuba whunatelhúnih, 'uda t'eeonáhzun 'et whunts'ih. 'Et whenghah whudezulh njan Egypt yun k'ut 'et whuch'a neMoodihti hubudune, 'en ts'iyawh 'ubulhyih. 'Et hukw'elh'az ndunnah huba 'alha cha'hoot'ah, 'en ts'iyawh hoolah hubulhtsi. ⁶ 'Et ndunnah lizas, 'en chah Yak'usda huba' hoonla, 'et whunts'ih whulahudetnik. 'Ink'ez ndunnah neMoodihti tsahólhgus yuh ts'ih, 'en huboontun. Tl'oolh 'ilhuz 'int'ah, 'i be whénobudezguz, dzin hooncha whuz de whélts'ulh hoh t'eh huba nahuteyeh. ⁷ 'Et whuz na'a ndunnah Sodom 'ink'ez Gomorrah whut'en, 'et whunat whudune, 'en chah 'et whuz na'a zeh hubuk'ah ts'ih 'uhut'en. 'Ut'en dutsun, 'i 'uhiyulh'en, 'et wheni hedich'oh whutl'a' hududelya. Ts'iyai hudedowh bulh tinta' hutet'ilh. 'Alha ndi kwun 'aw nachanusne, 'i be dzuh nuhudeh ho' hooant'ah. 'Et huwa 'en hubugha t'ets'onanzin. ⁸ 'Et whuz na'a zeh ndunnah 'et nduhutenilh nuninzun, 'en hubuyust'e lubeshi be dutsun hiyilh'i. 'Ink'ez ndai hik'úne' oot'en huba gha ndoh 'int'ah hubuk'unucha'hust'en. 'Ink'ez ndunnah butsu' ha 'ánduz lizas, 'en whunts'i hukw'u na'a bughu yahalhtuk. ⁹ 'Et whunts'ih Michael 'en degha ndoh lizas 'int'ah, 'et hoh da netsudule 'en Moses dazsai hoh hukw'elh'az buyust'e 'i bugha lhená 'uhudutni hoh yahalhtuk. 'Aw dich'oh buba' hooant'ah chanizun hoh yuch'a detni be yalhtuk 'ink'ez yuba nahuteyeh. 'Et whunts'ih Michael ndez na'a netsudule ndi yúlhni, "NeMoodihti hukwa' nyudóoni!" ¹⁰ 'Et whunts'ih ndunnah ndet t'ehonízun, 'et whunts'ih hukw'u na'a howu yáhalhtuk. 'Ink'ez nts'e na'a neyust'e hukwa' ninzun, 'et whuz na'a zeh 'ants'i khunai ne'út'en, 'et whuz na'a buyust'e tinta' hiyulh'ih. ¹¹ Dawhultsi' hubuts'u whélts'ulh! 'En chah Cain hiyundul'en. 'Et huwa dawhultsi' hubuts'u whélts'ulh! 'Et ndun Balaam nanet'a hukw'u na'a 'uja. 'En chah whuz na'a zeh tube sooneya ghu dahóodi'ah. 'Et ndun Korah dahooant'ah huwa Moses ch'a nedinja, 'en chah 'en k'una'a yahadla.

Yak'usda lanahudetnik, 'en tube hintsi' suli 'ink'ez huba nahesda

¹² Lhk'ehdutsi' hoh lhulana'ah't'ah, 'et whunts'ih ndunnah hubughu yalhtuk 'aw whechaniljut hoh nuhwhula'ha'ah. 'En 'ants'i huwa'óodli, 'i teh noo duhúlt'ah. Dich'oh zeh soo ne'hududul'en. 'Antsi kw'us too bughu hoolah li'hint'ah. 'Et kw'us k'una'a nduwúlcho bubúlh nuts'i. 'Antsi dak'et mai chun mai bughu hoolah li'hint'ah. 'Ink'ez bughih bulh 'ants'i hánahuyulhch'ulh li'hint'ah. Nat daházsai li'hint'ah. ¹³ 'Antsi' ndulhcho tatsi nudútun li'hint'ah. Ndai dune huba hukwaya hoonli, 'i huwus 'et dunt'ah. Sum k'una'a lhtanahekulh li'hut'en. 'Et ndunt'ah dune, 'en soo tsahólhgus t'es li'int'ah, 'i 'ilhuz wheni 'et Yak'usda huba 'udun whulh'ai. ¹⁴ 'Et ndun Enoch 'en whulh skwunlai 'o 'at nankoh Adam ts'u hainzut 'int'ah, 'en ndunnah dune, 'en bughu nus hó'en hoh njan ndutni, "Whunulh'en neMoodihti 'aw 'et whusáinya! 'en ts'iyawh dune bube'ildzun, lhanah k'et 'aw 'ubuts'oodóilho ghait'ah, 'en hubulh whusatayalh. ¹⁵ 'Ink'ez ndunnah Yak'usda bu'et 'uhint'ah, 'en ts'iyawh huba nahuteyeh. 'En Yak'usda bu'et 'uhint'ah, dahooant'ah hukw'u na'a Yak'usda ch'a ne'hust'en whuz na'a hubuk'ehóote'ah. 'Et ndunnah Yak'usda bu'et 'uhint'ah, 'en lubeshi 'ulh'en 'uhint'ah. Nts'e na'a khunek duts'un, 'i be hiyena hoh yahalhtuk, 'et whuz na'a huba nahuteyeh!"

Yak'usda lanahudetnik, 'en njan dúhint'ah

¹⁶ Nduint'ah, 'en tsakhunek huldelh, 'ink'ez hanílh'oh hoh huba dzuh hinli. Hubuyust'e nint'uk ts'ih hedulh. Khunek ncha, 'i be yahalhtuk. 'Et hoh hoonzoo hukw'u na'a dune ghu yahalhtuk 'et hoh whuch'a nahootéldoh. ¹⁷ 'Et whunts'ih nuhk'esi', neMoodihti Sizi Gri ba whel'a 'en ndai khunek hiye yailhtuk, 'i soo cho bunaoolhúnih. ¹⁸ Nts'e na'a 'ún whudani dega nus whusawhútelts'ulh lhanah ne'abá buk'ah ts'ih huwudloh whutele. Ndunnah nts'e Yak'usda ch'a nint'uk ts'un, 'et whuz na'a zeh hutedulh. ¹⁹ Ndunnah, 'en ndi yun k'ut whuba zeh 'uhint'ah. 'En dune lhch'a hunilht'uk 'ink'ez Ndoni bu'et 'uhint'ah.

Soo cho Yak'usda bulh 'óoh't'e

²⁰ 'Et whunts'ih nuhk'esi' be nuhwhuba 'alha' hoont'ah, 'i be 'o nus ulhtus 'ududulhtsi. Ndoni 'en be tenadahdli. ²¹ Ndaí Yak'usda ye nék'entsi', 'i zeh bulh 'óoh't'e. NeMoodihti Sizi Gri ye te'ninzun, 'i be 'ilhuz ts'ukhoona ts'uwhut'i, 'et zeh hukwa itóoh'en. ²² Dune t'ebunoozhaz nts'e na'a hoh lhents'un na'a 'uhint'ah. Bulunah hubugha te'noohzin. ²³ 'Et whunts'ih 'onghoh huba whenlhujut hoh huboolhyih, kwun ch'a huboohgoo. Ndi naih hubuyust'e t'aigheznai, 'i whunts'i hubuts'u doohnik.

Yak'usda 'uzdóolhti

²⁴ 'Aw 'et ndun Yak'usda ch'a nahútel'ah whuch'a neghundli, 'ink'ez buts'u hayanduz, 'i zih ninhotelilh, 'aw be 'uk'ehóotelts'ul bu'et. 'Et soo dega nus hóont'i hoh whuz na'a nuhwhuba 'uwhtelilh. ²⁵ 'Aw 'en zeh Yak'usda whunih 'ink'ez neulhyis unli. 'Aw 'en zeh buts'un hayánduz, 'ink'ez k'us ncha 'int'ah. 'En zeh nék'une'ul'en 'int'ah. 'En zeh ts'iyaintsuk gha ndoh 'int'ah. K'an 'et whuts'un 'ink'ez 'ilhuz wheni, 'et whuz na'a 'uwhtét'ilh. 'Et ndoh honeh.

Sizi Gri, 'En Dune Ba Ts'et Hahónla

¹ Ndi khunek 'i Sizi Gri, 'en dune huba ts'et hahónla, 'i 'int'ah. Yak'usda yutl'aída'ai be 'ulhna bunalh ts'et hahókat 'et huba. 'Aw 'et dawhútenilh, 'et hubugha 'int'ah. Dulizas 'en dude 'ulhna John 'en yughe nilh'a. ² John 'en Yak'usda bughunek yughu yailhtuk 'int'ah. Sizi Gri ndet howu yailhtuk hubugha chah 'et dune budáni, 'ink'ez ts'iyai ho'en, 'et chah ubudáni. ³ Ndan ndi dustl'us yuk'uyalhtuk 'ink'ez ndi nus be whét'en, 'i khunek hidánt's'o huyoontun t'eh, tube dega nus hoonzoo bughá whutelts'ulh, 'aw 'et nilhdukwi sulí 'et huwa.

Skwúnlai 'o 'at nankoh dune Yak'usda ba 'ilhunahuwúdulh, dahooja hubulhni

⁴ Yun k'ut Asia ts'ih Yak'usda ba skwúnlai 'o 'at nankoh lhelhdun keyah dune 'ilhunahuwúdulh, nuwheni si John nuht's'un k'e'usges hoh njan dudusni: k'us ndan 'int'ah, 'en ant'e, whuz de ha téyalh, 'en ye unzoo, 'i nedzi be whudezghel 'ink'ez skwúnlai 'o 'at nankoh nududeh, 'i Yak'usda yuk'usda, 'i bubut 'int'ah, 'en chah ye unzoo 'ink'ez nedzi be whudoóghel nuhwulh 'oot'e. ⁵ Sizi Gri 'en chah whuz na'a 'ún whulhni. 'En 'int'ah soo ts'ah'un na'a newhunulhtun unli. 'En 'uja 'udechoo whuzdli yahadla tah dinadija 'int'ah. Ndi yun k'ut hubudayi cho k'une' bul'en. 'En nek'entsi 'ink'ez duduzkai be nelubeshi tóonayuzguz. ⁶ Yak'usda ba'aBá, 'en ba nuwheni hubudayi cho 'ink'ez nawhulnuk nesulhtsi. 'En ts'un ts'odóolhti, 'ink'ez hoolhtus hoh k'une' ne'ool'en. 'Ilhuz 'ink'ez 'ilhuz wheni 'et nduhóot'e, 'Et ndoh honeh.

⁷ Whunulh'en! Kw'us tah whuz de ha téyalh.

Ts'iyannah hite'ilh.

Ndan lugloo cho be hikunuhínelht'o, 'en chah.

'Ink'ez ndi yun k'ut lhelht's'un hudedowh, 'en ts'iyawh hubugha khunahudutétso.

'Et ndó ténéh, 'et ndó honeh.

⁸ NeMoodihti njan ndutni, "Si 'ust'ah Alpha 'ink'ez Omega usdli. 'Udechoo whe' whudít'en 'ink'ez 'ustl'e' 'uwwhuténilh, 'en 'ust'ah. K'us ndan usdli 'ink'ez est'e, 'ink'ez whusatéyalh 'ust'ah, 'ink'ez ts'iyai 'i wanus ulhtus, 'en 'ust'ah."

John noo Patmos ts'utni, 'i k'ut tsak'esda hoh Sizi Gri in'en

⁹ Si John nuhwulhutsin 'ust'ah. Dzuh nahdeh teh si chah nohwulh dzuh nuszut. Njan Yak'usda hubudayi cho unli 'ink'ez Sizi Gri buba howa whúlna 'et whunts'ih neba whulh ínyin, si chah whuz na'a zeh nohwulh síyin. Yak'usda bughunek be yáilhtuk 'ink'ez Sizi Gri t'ehinoozeh huwa chah, 'et huwa ndi noo Patmos ts'utni, 'i k'ut 'ust'ah inle hoh, ¹⁰ 'et hoh da neMoodihti budzin, 'et Ndoni bulh sulh wheóodande lí'usja. 'Et sk'ah ts'ih dune tube yatelhtuk, be ts'udujih, 'i k'una'a, 'et whuduzíts'ai. ¹¹ 'Et njan ndutni, "Si Alpha 'ink'ez Omega usdli. 'Udetsoo 'ink'ez dek'elh'az, 'en 'ust'ah. Ndet whunilh'en dustl'us k'ut buk'e'ónges 'ink'ez skwúnlai 'o 'at nat Yak'usda ba 'ilhunahuwúdulh, yun k'ut Asia húdelht's'i, 'en ndi dustl'us but's'un tl'ayónlelh. Ndi hubukeyah boozí 'int'ah: Ephesus, Smyrna, Pergamos, Thyatira, Sardis, Philadelphia, 'ink'ez Laodicea whuz chah." ¹² Ndi khunek sut'ak ts'ih be yátuk, 'i oozáhlts'a hoh but's'un nasulhú'a. 'Et whuz nasulhú'a hoh ndi skwúnlai 'o 'at nankoh be whét'en, 'i gold be 'ulya, 'ink'ez 'et nandez'a, 'i télh'en. ¹³ 'Et njan skwúnlai 'o 'at nankoh be whét'en, 'i nanusa'a, 'i tah, yinkak dune ye' k'una'a 'et siyin. Bunaih buke t'ayughanaih, 'i be usda. Se gold bulh 'ulya, 'i be but's'i tah 'on doh ye sudelhú'oo. ¹⁴ Butsi 'ink'ez butsigah bulh sheep bugha k'una'a lhéyul, tsil k'una'a lhéyul. Buna kwun k'una'a tezdi lí'int'ah. ¹⁵ Buke tse dulk'un tsáhazda'ai nduwwhút'en. Bughunek too natéjilh lí'utni. ¹⁶ Bula nalhnih ts'ih skwúnlai 'o 'at nankoh sum 'i yoontun. 'Et soh cho 'i buzek haya'a. Lhch'az ts'ih buk'a hoonli. 'Ink'ez bunen sa ulhtus, 'i k'una'a be hóódet'en. ¹⁷ Télih'en hoh bubut dasásai hukw'un na'a nalhúts'ut. Dula nalhnih ts'ih 'i be sk'édilnik 'ink'ez 'usulhni, "Niljut ílah! 'Udechoo 'ink'ez dek'elh'az, 'en 'ust'ah. ¹⁸ Khusna 'ust'ah. Dasítsai inle 'ink'ez sunilh'en, 'ilhuz 'ink'ez 'ilhuz wheni khusna. 'Et ndoh honeh! Hades 'ink'ez yats'adlah 'i be whuda'de'ai nusdle. ¹⁹ Ndet whunalh'en 'et hukw'e'ónges. Hoonli 'int'ah, 'i 'ink'ez ndi hukw'elh'az nus dawhútenilh, 'et chah 'ukw'e'ónges. ²⁰ Ndi skwúnlai 'o 'at nankoh sum sunailhnih ts'ih sula k'et nalh'en, 'i 'ink'ez skwúnlai 'o 'at nankoh nanusa'a, 'i gold be 'ulya be whét'en, 'i chah, 'i bugha whe' hoont'ah hooyah, 'et ndez na'a njan ndúhoont'ah: Skwúnlai 'o 'at nankoh sum 'i skwúnlai 'o 'at nat Yak'usda ba 'ilhunahuwúdulh, 'en bulizas 'int'ah. 'Ink'ez skwúnlai 'o 'at nankoh be whét'en, 'i yunalh'en, 'i skwúnlai 'o 'at nat Yak'usda ba 'ilhunahuwúdulh 'int'ah."

2

Keyah Ephesus dune Yak'usda ba 'ilhunahuwúdulh 'udechoo hoh Sizi Gri 'ink'ez nohwhulh dune chah buk'ehtsi' inle, 'et whuladehtnik, suba hubudóni.

¹ “Et keyah Ephesus dune Yak'usda ba 'ilhunahuwúdulh bulizas 'en buts'un k'e'inges:

Ndun skwúnlai 'o 'at nankoh sun nalhnih ts'ih bula k'et 'ink'ez skwúnlai 'o 'at nankoh be whét'en, 'i tah nuya, 'en njan ndutni:

² Nuhwhe'ut'en k'ah t'eeonuszun, nuhwhe'ut'en ulhtus, 'i chah. Nuhwhuba howa whulna 'et whunts'ih whulh sahyin, 'ink'ez ndunnah ntsi' 'en 'aw hubulh 'óoht'e ghait'ah. Ndunnah whel'a na'dudil'i, 'et whunts'ih 'alha 'aw whel'a chahílah, 'en huboozélhts'ai 'ink'ez t'ebunanzin whuts'it 'uhint'ah.

³ Soozí bugha soo cho whulh sáhyin 'ink'ez 'aw hoonliyaz cha'duzóohni hoh tube 'éht'en 'et whunts'ih 'aw nichanahtsil. ⁴ Et whunts'ih njan 'ilhun 'et hoh 'uts'un na'a suba 'aht'ah. 'Udechoo hoh Sizi Gri 'ink'ez nohwhulh dune chah buk'ehtsi' inle, 'et whuladehtnik. ⁵ Et huwa ndet nailhúts'ut 'et whunaoolhunih. Lubeshi whuch'a lht'ananahdaih 'ink'ez 'udechoo nuhe'ut'en, 'i nalhuchoot. 'Aw lht'anachanuhdulh t'eh, khunyaz nuhts'un tésyalh 'ink'ez nyoo nuhbe whét'en, 'i nuhghu natelhucholh. ⁶ Et whunts'ih 'ilhunuh hoonzoo, 'et whaht'i, Nicolas hinedulh bube 'ut'en buts'u dahnik. Si chah tube whuts'u dusnik ho' hooht'ah.

⁷ Ndan 'udits'o, Ndoni Yak'usda ba 'ilhunahuwúdulh, daja hubúlhni, 'en hiyoozóhlts'a huba' hooht'ah. Ndunnah 'ut'en ntsi', 'i yuch'a 'ulhdeh, ndi duchun bugha khutna, 'i bumai hiyoo'alh bugha óotes'alh. Ndi duchun 'i Yak'usda bukeyah dega nus hoonzoo, 'et whuniz ts'ih nadí'a.”

Keyah Smyrna dune Yak'usda ba 'ilhunahuwúdulh, nuhwhe'ut'en chah, be dzuh nahzut, 'ink'ez hoh télh'en chah, ts'iyawh t'eeonuszun, suba hubudóni

⁸ “Et keyah Smyrna dune Yak'usda ba 'ilhunahuwúdulh bulizas 'en buts'un k'e'inges, njan dudóni:

Ndun 'udechoo 'ink'ez dek'elh'az, 'en dazsai inle, 'ink'ez nakhítma, 'en njan ndutni: ⁹ Nuhwhe'ut'en, be dzuh nahzut, 'ink'ez hoh télh'en chah, ts'iyawh t'eeonuszun. 'Et whunts'ih 'alha soo deh'a 'aht'ah. Ndunnah nuhch'a detni nduhutni, 'Nuwheni Lizwif 'uts'int'ah,' 'et whunts'ih Lizwif chahílah. 'En ndun Satan hiyúlhni, 'en hubuluglez 'et be'ílhduzun hinli ho' hint'ah, 'et chah t'eeonuszun. ¹⁰ Ndet hoh dzuh nutehzut, 'aw 'et nilhdukwh nuhghu whutélts'ulh. 'Et whenoolhújut gunih! Soo zélhts'ai! 'aw 'et nilhdukwh bulunah netsudule 'un whutélih. 'Et hoh nohootélhduzih. 'Et lanezi dzin 'et dzuh nutéhdeh. 'Et yatahdlah whuts'un 'et nuhwubha 'alha 'uhoont'ah zeh 'uhót'e. 'Et hukw'elha 'ilhuz khutehna nuhghá whunt'ai, 'o 'un whuch'a 'unúlhde, 'et chah nuhgha whutés'alh.

¹¹ Ndunnah 'udits'o, Ndoni Yak'usda ba 'ilhunahuwúdulh, daja hubulhni, 'en huyoozóhlts'a. Ndunnah 'ut'en ntsi', 'i ch'a nilhde, 'et dune whúlh nat dahútetsah, 'i be 'aw hundóodah ghait'ah.”

Keyah Pergamos dune Yak'usda ba 'ilhunahuwúdulh, se'ut'en k'ah bulah buladehtnik, suba hubudóni

¹² “Et keyah Pergamos dune Yak'usda ba 'ilhunahuwúdulh bulizas 'en buts'un k'e'inges. Njan dudini:

Ndun soh cho lhch'az ts'ih khundenyin, 'i ut'i, 'en njan ndutni:

¹³ Nuhwhe'ut'en k'ah 'ink'ez nts'e whaht'i t'eeonuszun. Ndet Satan buk'usúda cho dézti, 'i su'ai, 'et whaht'i. Soozí, 'i soo cho oohtun. Nts'e Satan whut'i 'ink'ez hoh da ndun Antipas hiyúlhni, 'en soozí bugha nuhtah hizelghí. 'Et whunts'ih nuhwubha 'alha 'ust'ah 'aw whuchaoodáhdlai ilah. ¹⁴ Et whunts'ih bulah 'uts'un na'a suba aht'ah. Bulunah nuhtah Balaam bughunek 'i hiyoontun 'et huwa. 'En 'int'ah Balak hodalh'i. 'En 'uja Israel hits'uh hainde 'en whubodalh'i but 'uk'e déltsi bugha t'aih, 'i hiyoo'alh 'ink'ez 'uyoon ts'ekoo 'ink'ez 'uyoon dune chah tinta' hoot'ih hoh huboolhgooh hukwa 'ut'en. ¹⁵ Nuwheni nuhtah 'et chah Nicolas bughunek oontun hoonli. 'I tube buts'u dusnik ho' 'int'ah. ¹⁶ Lubeshi whuch'a lht'ananoohdelh! 'Et nduchahní t'eh khunyaz nuhts'un tésyalh 'ink'ez soh cho suzah hai'a, 'i be ndunnah Nicolas hiyunedulh, 'en buch'a nidutésyalh.

¹⁷ Ndan 'udits'o, Ndoni Yak'usda ba 'ilhunahuwúdulh, daja ubulhni, hiyoozóhlts'a huba' hooht'ah. Ndunnah 'ut'en ntsi' 'i yuch'a 'ulhde, 'en ndi 'ut'alh manna hiyúlhni, 'i dune buch'a yuntélh'i, 'i bulah bugha ités'alh. 'Ink'ez tse dulyul, 'i chah bugha yuntés'alh. 'Ink'ez ndi tse buk'ut k'an ndi boozí 'i buk'eitedúguz. 'Aw dune boozí t'ehinuszun. Ndan bugha ídelts'ut, 'en zeh t'eyuntézin.”

Keyah Thyatira dune Yak'usda ba 'ilhunahuwúdulh, bulunah tube tink'us ne'ut'en, 'en suba hubudóni

¹⁸ “Et Keyah Thyatira dune Yak'usda ba 'ilhunahuwúdulh bulizas 'en butsun k'e'inges. Njan dudini:

Yak'usda buYe' buna kwun k'una'a tezdí nduwút'en 'ink'ez buke tse dulk'un tsáhazda'ai, 'i nduwút'en, 'en 'utni:

¹⁹ Nuhwhe'ut'en t'enuszun, ndi be lhk'ets'udutsi', 'uyoon be hubula'aht'en, be nuhwhuba 'alha 'uhoont'ah, 'ink'ez hoonli cha'lhoduzahni. 'I 'ut'en 'udechoo ho' daht'en k'an 'et 'o nus soo 'aht'en. 'I chah ts'iyawh t'enuszun. ²⁰ 'Et whunts'ih hoontsolyaz hoh suba 'uts'un na'a 'aht'ah. Ndun ts'eke Jezebeel nus whunílh'en na'dudútni. Hubodulh'eh 'ink'ez se' 'ulhna tink'us húbunilht'uk. 'Uyoon dune 'ink'ez 'uyoon ts'ekoo bulh tinta' hoot'ih. 'Ink'ez ndi 'uk'edélti bugha t'aih, 'i hiyoo'alh hukwa' bulh'en. 'En ts'eke 'aw whuch'a chanuzáhyoot. ²¹ Ndun ts'eke 'uyoon dune bulh tinta' 'ut'ih, 'et 'ust'le' 'ooneh dúsnih, 'et 'aw bulubeshi whuch'a bubeni nachahudunile. ²² Soo zúlh'ts'ai, kw'usti k'ut dunteda bugha ootés'alh. Ndan dune yulh tinta' 'ant'en, 'en chah nduhút'en, 'aw lht'anachahunídulh t'eh, dzuh notedoh hubugha ootés'alh. ²³ 'Ink'ez ndun ts'eke buzkeh chah hubutesghan. 'Ink'ez Yak'usda ba 'ilhunahuwúdulh, ts'iyawh t'ehontézin, si 'ust'ah dune hubeni tah 'ink'ez hubudzi bet chah hoonli hukwu nústa. 'Ink'ez 'ilhunah ahli hoh nuwhe'ut'en k'ah huwa nuhwhuba k'elha whutelshih. ²⁴ 'Et whunts'ih nuhwheni 'ink'ez 'uyoon Thyatira whut'en, ndun ts'eke bughunek chahiyóotun t'eh, 'ink'ez soo Satan be 'ut'en degha nus whut'ah 'int'ah, 'i whuz na'a nduhutni, 'i chah t'ehinizun t'eh, nuhwhudusni, 'aw 'o 'un howa whúlna nuhgha chaootuzes'al. ²⁵ 'Et whunts'ih whusats'iyalh whuts'un, ndai 'ut'en unzoo 'ulh'en, 'i soo cho ohtun.

²⁶ Ndan 'ut'en untisi', 'i yuch'a 'ulhdéh 'ink'ez degha nus whuts'un se' 'ut'en huy-oontun t'eh, 'en lhelhdun keyah whut'en humoodih hutéle, 'et hubugha óotes'alh. ²⁷ Ndunt'ah 'ut'es tuz be susheep k'una'a butsuh nutéyálh 'ink'ez lheztl'us busa 'i k'una'a yanúbuduteyuz. Whuz na'a 'et bughu tesle. Su'abá si chah whuz na'a stl'ahó'ai. ²⁸ 'Ink'ez bundada sum chah bugha yutés'alh ²⁹ Ndan 'udits'o, Ndoni Yak'usda ba 'ilhunahuwúdulh, dája hubulhni, 'en hiyoozólhts'a huba' hoont'ah.”

3

Keyah Sardis dune Yak'usda ba 'ilhunahuwúdulh, lhanah dune 'uhutni, khahna hoh aht'ah hutni, 'et whunts'ih yahadla ahli hoh aht'ah, suba hubudóni

¹ “Et keyah Sardis dune Yak'usda ba 'ilhunahuwúdulh bulizas, 'en butsun k'e'inges. Njan dudini: Ndun Yak'usda skwúnlai 'o 'at nankoh nududeh, 'i 'ink'ez skwúnlai 'o 'at nankoh sum chah nule, 'en 'utni:

Nuhwhe'ut'en k'ah t'eeonúsun. Lhanah dune chah 'uhutni, khahna hutni, 'et whunts'ih yahadla ahli hoh aht'ah. ² Yak'usda ba nuhwhe'ut'en 'aw soo cha'ildzoo, 'et nahó'oi. 'Et huwa soo cho huwahli! Bulah 'ut'en unzoo 'i nohwhulh 'int'ah, 'aw 'et nilhdukw hoh hoolah tele. 'Et huwa 'ut'en unzoo 'i chah 'o nus ulhtus ulhtsi. ³ 'Et huwa whunalhúni nts'e na'a ndi khunek dáhts'o 'ink'ez úlhchoot. Soo cho ohtun 'ink'ez nuhwhulubeshi whuch'a nuhwhubeni nahadunoohlehl! 'Et 'aw whuz na'a zeh huwu cháhlah t'eh, soo 'undunut'ih k'una'a nuhgha hatésyálh, 'ink'ez nts'owhúya 'uhunet'oh nuhts'un tésyálh 'aw t'ewhuntutézhzin.

⁴ Bulunah nyulh 'uhint'ah Sardis whut'en, 'en 'aw dunaih chahudíhtsun. 'En lheyul 'i be hudéhts'i hoh sulh nahútedulh. 'Et huba soo húnzoo 'et huwa. ⁵ Ndunnah 'ut'en untisi' 'i ch'a 'ulhdeh, 'en naih lheyul 'i be hudutéhts'ilh. Ndi 'ilhuz ts'ukhuna 'i be dust'us k'ut, 'aw buboozi 'uk'unatoosges ghait'ah. Se'abá 'ink'ez bulizas bulh 'en bubut 'en se'ilhdzun hinli budutéshih. ⁶ Ndan 'udits'o, 'en Ndoni Yak'usda ba 'ilhunahuwúdulh, dája hubulhni, 'en hiyoozólhts'a huba' hoont'ah.”

Keyah Philadelphia dune Yak'usda ba 'ilhunahuwúdulh dzuh nusahde soo whulh nudalhúya, suba hubudóni

⁷ “Et keyah Philadelphia dune Yak'usda ba 'ilhunahuwúdulh bulizas, 'en butsun k'e'inges. Njan dudini: Ndun lubeshi bughu hoolah, ts'ah'un 'int'ah chah, 'ink'ez hubudayi cho David be da'dutut'aih na'a. Ndun dahúduta'aih, 'aw dune dana'doo'alh ghait'ah. 'Ink'ez dána'dú'aih 'aw dune dahana'doo'alh ghait'ah. 'En 'utni:

⁸ Nuhwhe'ut'en t'enuszun. Whunulh'en ndati 'udun 'udéntan nuhbut nióoni'ai. 'Ink'ez 'aw dune dána'dootan ghait'ah. Be ulhtus, 'i ntsolyaz áht'i, sughunek chah ohtun, 'ink'ez soozí hubuts'un 'aw whuchaoodáhdai ilah 'et huwa. ⁹ Soo zulhts'ai, ndunnah Satan buluglez huwhut'en, 'en Lizwif hinli hutni 'et whunts'ih huwhuts'it'ho' hutni, 'aw

Lizwif chahílah. 'Aw nawh cha'hoot'ah, nuhghu buníla 'ink'ez nuhbut teni' hunilhdzun ubutéhsilh. 'Et huwa t'ehonózin nuhk'esi' inle.

¹⁰ Nuhwhudáni dzuh nusahde soo whulh nudalhéuya. 'Et whuz na'a sk'une' zaht'en. 'Et huwa ndi yun k'ut ndulhcho hoh dune dzuh nutedoh whusaóotelts'ulh hubootéldzhiz 'et whuba. 'Et whutsuh whuch'a nanohtésdlelh. ¹¹ Soo zúlhts'ai, khunyaz 'utesnilh whusatésyalh. Ts'ah'un aht'ah soo cho hoohtun. 'Et hukw'elha aht'en 'aw 'uyoon nuhgho hólhchoot ghait'ah. ¹² Ndunnah ndi 'ut'en untsi', 'i ch'a 'ulhdeh, ndunt'ah suYak'usda hubuluglez whucho whut'ah nain'a, 'i hubutelhsilh. 'Ink'ez 'aw tenáchahutésdulh. SuYak'usda boozí, 'i buk'ut buk'e'tesgus. 'Ink'ez suYak'usda bukeyah whuti boozí, k'an 'et Jerusalem huwhutni, 'i chah buk'ut buk'e'tesgus. Yak'uz ts'ih suYak'usda but's'un haootelts'ulh. 'Ink'ez k'an 'et 'i soozí, 'i chah buk'e'tesgus. ¹³ Ndan 'udits'o, Ndoni Yak'usda ba 'ilhunahuwúdulh, daja hubulhni, 'en hiyoozóhlt's'a huba' hoont'ah."

Keyah Laodicea dune Yak'usda ba 'ilhunahuwúdulh, bulunah sughunek 'ants'i nuhwhuba 'int'ah, suba hubudóni

¹⁴ "Et keyah Laodicea dune Yak'usda ba 'ilhunahuwúdulh bulizas, 'en but's'un k'e'inges. Njan dudini:

Ndun ndóh honeh, bunalh 'úwhut'en, but'aníuznitan, ts'ah'un na'a 'int'ah chah, ndai Yak'usda 'uyinla, 'i 'en 'udechoo whé'whudilh'en 'int'ah, 'en 'utni:

¹⁵ Nuhwe'ut'en k'ah ts'iyawh t'eeonúszun. Nts'e na'a Yak'usda ba aht'en, 'aw tube chaník'uz 'ink'ez 'aw tube chah chanízul soo cho náhk'uz k'us nehzul 'et da nuhwhuba hukwa' nooszin wule. ¹⁶ 'Aw chaník'uz chah aht'ah 'ink'ez 'aw chanízul chah 'aht'ah. 'Ants'i nahzulyaz li'aht'ah. 'Et huwa suzek hoh n'un nuhwhutéldzhoh. ¹⁷ Lhe'dahni, 'Soode'a 'uts'int'ah 'o nus chah soo de'a 'uts'uja. 'Aw 'uyoo hoonliyaz ka cha'uznízun,' dahni. 'Et ndahint'ah dalhúts'i' ts'iyaintsuk nuhwhuba nek'e' hoot'ah aht'ah. Telhú'en aht'ah. Chaozeh'en aht'ah, 'ink'ez ust'et aht'ah. ¹⁸ Ndai gold kwun be 'o nus 'uldzoo sulí, 'i si sts'un óohket nuhwhudusni. 'Et sih soo deh'a 'ooht'e. Naih lheyul, 'i chah sts'un óohket. 'Et sih 'et dune wahle, 'ink'ez 'ust'et ahli 'et 'aw hukwa yáchazoohle. Na yoo, 'i na k'et dulhúye, 'et sih soo hóh'en. ¹⁹ Ndunnah hubuk'esi', 'en ts'iyawh khunek ulhtus 'i be hubulh yálhtuk 'ink'ez ts'ah'un na'a nenábusdlih. 'Et huwa nuhdzi ulhtus cho ulh'i 'ink'ez nuhwhulubeshi nuhwheni whuch'a náhandunoohlelh.

²⁰ Soo zulhts'ai, ndati síyin 'ink'ez ndati whudúlhghalh. Ndan sudits'o 'ink'ez suba dahúduteztan, bughu datésyalh, bulh na'tést'ulh 'ink'ez didut chah sulh na'hutét'ah. ²¹ Ndan ndi 'ut'en ntsi' 'i ch'a 'ulhdeh, sukw'usda cho k'ut suzih tedalh hubugha ootés'ah. Si chah whuz na'a chah whuch'a nulhde 'ink'ez se'aBá bukw'usúda cho dézti, 'i k'ut buzih nat'adisdá. ²² Ndan 'udits'o, Ndoni Yak'usda ba 'ilhunahuwúdulh, daja hubulhni, 'en hiyoozóhlt's'a huba' hoont'ah."

4

John nduk yak'uz ndati 'udun 'udentan 'et whutéh'en

¹ 'Et hukw'elh'az whunulh'en 'ink'ez nduk yak'uz ndati 'udun 'udentan et whutéh'en. 'Et ndun 'udechoo yatelhdúk duzít's'ai, be ts'ujih be yálhtuk li'utni. "Ndez sut's'un dugha inyih, 'ink'ez k'an 'et hukw'elh'az daóotenilh whényuntéltun," sulhni. ² 'Et 'aho Ndoni bulh sulh wheóodande lí'usja. 'Ink'ez yak'uz kw'uts'uzda cho dézti, 'i 'et su'ai 'i k'ut 'ilhunah yuk'usda, 'et whutéh'en. ³ 'Ink'ez ndun hukw'usda tse dunézi, 'i jasper hiyulhni, 'ink'ez carnelian tse chah, 'et whuz na'a ndoonent'en. 'Ink'ez ndi kw'uts'uzda cho dézti, 'i ditnik nayúgus, 'i bunayuzt'uk, tse, emerald hiyulhni, 'i ndoonent'en. ⁴ Ndi kw'uts'uzda cho dézti bunat nat lanezi 'o 'at dit kw'uts'uzda cho dézti, 'i bunaidelhéuya. 'Ink'ez ndi kw'uts'uzda cho dézti, 'i nat lanezi 'o 'at dinah 'utsuh whudéldzulh hik'udelhts'i. Naih lheyul, 'i be dune hinli. Gold nanezbaz 'i but's k'éyuzda. ⁵ Ditnik oolghes, ditnik chah, 'ink'ez lhái yatak 'i chah ndi kw'uts'uzda cho dézti, 'i but's'un haídukat. 'Ink'ez ndi kw'uts'uzda cho dézti, 'i bubut skwúnlai 'o 'at nankoh be whét'en, 'i dez'kun. 'I ndi skwúnlai 'o 'at nankoh Yak'usda bunududeh, 'i 'int'ah. ⁶ 'Et ndi kw'uts'uzda cho dézti, 'i bubut 'et bun k'ut whucho dezghel k'et too 'i khe li'int'ah, 'et whuz'ai li'hoont'ah. Lhum dant'ah bukíyúnt'en, 'et nduwhtú'en. Ndi kw'uts'uzda cho dézti buk'ut chah 'ink'ez bunat chah dink'i hoonliyaz usjiz, 'i 'una zeh unli, bubut ts'ih chah 'ink'ez but'a ts'ih chah 'una bughu nezdlá. ⁷ 'Udechoo usjiz, 'i khunaiti, lion, ndúwhut'en. Bulh nankoh usjiz, 'i musdusyaz ndúwhut'en. Bulh tak'i usjiz, 'i dune k'una'a bunen hoonli. Bulh dink'i usjiz, 'i sbalyan 'út'oh li'int'ah. ⁸ 'I nyoh dinah usjiz, 'i lhuk'i hoh lhk'utak'i ye nut'o, 'i bughu yuzdlá. 'Ink'ez ndulhcho hoh 'una zeh unli buyuh ts'ih chah. 'Aw 'ulh'ek 'ink'ez dzenis íbulh nachahulhúyiz hoh njan nduhútni, "Lubeshi bughu hoolah, lubeshi bughu hoolah,

lubeshi bughu hoolah,
Yak'usda neMoodihti,
'en ts'iyai tsuk bughanus ulhtus 'int'ah.
Ndun 'ant'e, 'ink'ez 'int'ah,
'ink'ez whusatéyah," hutni.

⁹Ndun 'ilhuz 'ink'ez 'ilhuz wheni khuna, 'en kw'uts'uzda cho dézti 'i k'usda, 'en ndunnah hoonliyaz usjiz, soo cho ne'hiduni, hidélhti, 'ink'ez 'ahoolyiz nenachail'en hiyúlhni, ¹⁰'et ndunnah nat lanezi 'o 'at dinah dune dune netsuh whedelhdzulh, ndun kw'uts'uzda cho dézti, 'i k'ut usda, 'ilhuz 'ink'ez 'ilhuz wheni khuna, 'en hibut nacháhunedel, hits'u téni' humilhdzun ho' hut'en. 'Ink'ez butsi nanezbaz 'i hibut nihíninla, 'ink'ez 'uhutni, ¹¹"O neMoodihti nts'u ha ba'nduz, dénti, 'ink'ez ilhtus chah 'int'ah. 'I ts'iyawh 'et ndan ts'idóni huba soo 'ulzoo, ts'iyaintsuk inla 'et huwa. Nyun inla 'et huwa 'int'ah, 'et whuz na'a hukwa' ninzun."

5

Dustl'us buk'une'úsdugez, Yak'usda be busheepyz, 'i yílhchoot

¹Njan 'et whunulh'en, ndun kw'uts'uzda cho dézti yuk'usda, 'en nalhni' ts'ih dula be dustl'us lhch'az ts'ih buk'une'usdúgez, 'i 'ink'ez dustl'us lhegha ndunenduz. 'Ink'ez skwúnlai 'o 'at nankoh 'et bune'delhdzede. ²'Et 'ilhunuh lizas soo ulhtus, 'en télh'en. 'Ink'ez tube cho njan ndutni, "Ndan soo 'uldzoo, 'en ndi dustl'us yadáha' dutelhch'ulh 'ink'ez lhk'etuwélelh?" ³Nduk yak'uz, k'us yun k'ut, k'us yun f'ah chah, 'aw 'ilhunuh soo cha'ildzoo hoolah ndi dustl'us yadáha' dutelhch'ulh k'us yuntel'hil huba. ⁴'Ink'ez 'aw 'ilhunuh soo cha'ildzoo ndi dustl'us yadáha' dutelhch'ulh, 'ink'ez yuk'uyatelhtuk k'us yuntel'hil. 'Aw nahiyóolhtel'ghait'ah, 'et huwa tube nasdotu. ⁵'Et 'ilhunuh dune netsuh whedelhdzulh, 'en 'usúlhni, "Intso ilah! Nílh'en Judah bulh hudédow hubukhuna' cho, lion hiyúlhni, ndun hubudayi cho David ts'ih hainzut, 'en 'uja ts'iyaintsuk whuch'a' nilhde. 'En zeh soo 'úldzoo ndi dustl'us yadáha' dutelhch'ulh, 'ink'ez ndi skwúnlai 'o 'at nankoh be lhunedelhe, 'i yadáha' dutelhch'ulh. ⁶'Et ndet whutélh'en tube suba hooncha. Ndi kw'uts'uzda cho dézti 'ink'ez ndi dinah hoonliyaz 'usjiz, 'ink'ez dune netsuh whedelhdzulh hubutah chah, 'et sheepyz 'ilhuk'i, 'i hizelghí, 'i nduwhút'en 'et siyín. Bude skwúnlai 'o 'at nankoh 'ink'ez skwúnlai 'o 'at nankoh 'una chah unli. 'I buna 'i 'int'ah Yak'usda be'íldzun unli skwúnlai 'o 'at nankoh nududeh. 'I ndi yun k'ut nduhóolcho whé'la. ⁷'Et ndun sheepyz ndun kw'uts'uzda cho dézti, 'i k'usda, 'en nalhni' ts'ih dustl'us yootun, 'i yula k'ehíya'ai.

Yak'usda busheepyz 'aw 'en zeh soo 'uldzoo

⁸'Et ndi dustl'us yílhchoot ibulh, ndi dinah hoonliyaz 'usjiz, 'ink'ez nat lanezi 'o 'at dinah dune netsuh whudelhdzulh chah, ndun sheepyz hibut nacháhunedel. 'Ilhunuh hinli ts'iyawh nela be, be ts'ujun nuhúle, 'ink'ez tsets'ai gold unli, 'i ndi dez'k'un sooltun, 'i bet whudézbun. 'I ndi 'i 'int'ah dune Yak'usda bube'ildzun, 'en hiye tenadudli 'int'ah. ⁹K'an 'et shun 'i hiyé whenijun hoh njan nduhutni, "Ndi dustl'us tálhcholh 'ink'ez buda' dutálhch'ulh 'et huba soo' nildzoo. Dune nyazelghí 'ink'ez nyuzkai be Yak'usda ba nenaonket.

'Ink'ez lhelhts'un hudedowh,

'ink'ez lhelhts'un na'a yahulhtuk,

'ink'ez 'uyoon dune, 'ink'ez lhelhdun keyah whut'en 'en chah.

¹⁰'Ink'ez neYak'usda ba hubudayi cho 'ink'ez nawhulnuk nesilhsi.

'Ink'ez ndi yun k'ut k'úne' ts'otel'ilh ka uzdutélt's'ih."

¹¹'Et njan whutélh'en 'ink'ez whudáts'o ndi kw'uts'uzda cho dézti, 'ink'ez hoonli usjiz, 'i chah, 'utsuh whudélhdzulh, 'en chah, 'en bunat lhanah lizas, 'en whuz hulai k'et 'aw whe hubuts'oodolhto ghait'ah, ¹²'en tube cho njan duhútni, "Ndun sheepyz hizelghí, 'en ye ulhtus, hiye soode'a 'int'ah, be whútnih, 'ink'ez nut'uk chah, be ts'udézti,

'ink'ez be whét'en,

'ink'ez ba ts'odélhti,

'en 'int'ah ndi ts'iyawh huba soo 'úldzoo hoh whuz na'a uzdóolhti."

¹³'Ink'ez ndai usjiz nduk yak'uz 'int'ah, 'i ndi yun k'ut chah, 'ink'ez ndi yun but'ah ts'ih chah, 'ink'ez k'us ndai ya too k'ut hoonli, 'en ts'iyawh njan nduhútni hoh ubudusts'o, "En ba ts'odélhti, be ts'udézti, be whét'en,

'ink'ez ts'iyaintsuk buk'une' whut'en, 'i chah,

ndun kw'uts'uzda cho dézti k'usda chah, 'ink'ez sheepyz hizelghí chah,

'ilhuz 'ink'ez 'ilhuz wheni be'íldzun wule."

¹⁴ 'Et ndi dinah usjiz, 'i 'utni, "Et ndoh honeh!" 'Ink'ez nat lanezi 'o 'at dinah 'utsuh whudélhdzuhl, hibut nacháhuneldel 'ink'ez ndun 'ilhuz wheni khuna hits'u teni' nalhdzin.

6

'Udechoo dustl'us lhudildze

¹ 'Et ndi dustl'us be lhídildze lhuk'i 'i ndun sheeypaz 'i yuts'u hayálhch'ul 'et whutélh'en 'ink'ez dinah usjiz hubutah 'ilhuk'i 'i duzít's'ai. 'Ants'i ditnik k'una'a 'utni 'ink'ez "Anih 'ink'ez whunilh'en!" ni. ² 'Et whunalh'en 'ink'ez yeztli lheyul, 'i telh'en. Ndun yuk'usda k'aza nudútun. 'Ink'ez ndai netsi k'ustan nanezbaz, 'i butl'ayélt's'ut. 'Et whuz na'a ts'iyannah ch'a telhdoh 'ink'ez whuch'a butélhdoh ka, 'et whuz whinya.

Bulh nankoh dustl'us lhudildze

³ 'Et bulh nankoh dustl'us lhudildze, 'i yuda' dutelch'ul. 'Ink'ez bulh nanah usjiz, 'i 'utni 'et 'oozálh's'a, "Anih 'ink'ez whunilh'en!" ni. ⁴ 'Ink'ez 'uyoo yeztli, tube dúlk'un, whuz whellhah. Ndun yuk'usda, 'en be ts'ah'un na'a lh's'un 'uts'int'ah, ndi yun k'ut whut'en bughu hootélhchulh, 'et yutl'aho'ai dune lhuhoodughan ka. 'Ink'ez soh cho 'i butl'ayánkez.

Bulh tat dustl'us lhudildze

⁵ Ndet bulh tat dustl'us be lhídildze yuda' dutelch'ul. Ndi bulh tanah usjiz 'et 'oozálh's'a 'ink'ez 'utni, "Anih, whunilh'en!" Whuz yuta'en 'ink'ez yeztli dulh'k'us, 'i yutélh'en. Ndun yuk'usda, 'en bé ne'uldas, 'i bula k'ét yuzdla. ⁶ 'Ink'ez ndi dinah usjiz hubutah ts'ih 'uwhutni, "Lhes haniyeh busa 'ilhuz dezibun, 'i lhuk'i sooneya denarius hiyúlhni, 'i k'elha yutez'ai. 'Ink'ez tak'i busa ndultsuk tl'o mai, barley hiyúlhni, 'i lhuk'i sooneya denarius hiyúlhni, 'i k'elha yutez'ai. 'Ink'ez khe be 'ut'es 'ink'ez mai too chah, ndi ts'iyaintsuk khun teh tinta' oolh'en gunih."

Bulh dink'i dustl'us lhudildze

⁷ 'Et bulh dink'i dustl'us lhídildze, 'i yuda' dutelch'ul hoh bulh dinah usjiz 'et ndutni, "Anih 'ink'ez whunilh'en!" ⁸ Whunulh'en 'ink'ez yeztli bodane nduwhút'en. 'Ink'ez yuk'usda boozí, 'i be yáts'adlah hiyúlhni. 'Et niz t'eh yadhla delht's'i, Hades huwhút'ni, 'et buwhunel't's'ulh. Ndi yun k'ut whut'en hoontsolyaz, nedo k'ah, (¼) huwhutni, 'et 'uwulcho hubuhuteghan, 'et bughá whult's'ut. Soh cho be, 'ink'ez dai chah, dada nudúzut, 'i chah, 'ink'ez chuntah khunai, ndi be dune yahutádlah.

Bulh skwúnai dustl'us lhudildze

⁹ Ndet bulh skwúnai dustl'us be lhídildze yuda' dutelch'ul hoh ndunnah Yak'usda bughunek bughá 'ink'ez highunek highi yalhtuk, dune hubanghan buzul, 'en Yak'usda buk'w'uzdai t'ah hubutélh'en. ¹⁰ 'Et tube cho njan nduhút'ni, "Nek'une' 'ul'en nyun lubeshi nghu hoolah, 'ink'ez ts'ah'un 'int'ah chah inli. Ndi yun k'ut ndunnah neanghan dawhuldzuh neuzkai bughá huba nahutanyeh 'ink'ez neba k'uténtnih?" ¹¹ 'Ink'ez 'ilhunuh hinli hoh lheyul, 'i nahuyit's'uz hubutl'a hínanla. 'Ink'ez hubuhút'ni, hubulh 'ulhna 'en 'ink'ez hubulh utsinkah 'en chah ts'iyawh 'en buk'una'a zeh hubuhuteghan, 'et lhaoodutenilh whut's'un, naoohlúyis.

Bulh lhk'utak'i dustl'us lhudildze

¹² 'Et sheeypaz 'et bulh lhk'utak'i dustl'us be lhídildze yuda' dutelch'ul hoh khunyaz tube yun nughésnai, 'ink'ez sa chah dulh'k'us suli, naih dulh'k'us nduwhút'en. 'Ink'ez 'ulh'ek ooza chah, 'uskai nduwhút'en suli. ¹³ 'Ink'ez sum 'i chah yun k'ut nainkat. Ndi duchun figs mai nte't'ai whutsuh 'ants'i nilht's'i ulhtus, 'i be yun nanukuk, 'et whuz na'a sum, yun k'ut nainkat. ¹⁴ 'Ink'ez nts'e na'a dustl'us lhenahinudus, 'et whuz na'a yat'a lhenáwhuneduduz 'et whuz na'a hoolah whuzdli. Dzulh chah 'ink'ez noo teh, ts'iyawh whuzdla 'udun neooninkat. ¹⁵ Ndi yun hubudayi cho dune ncha, dune soode'a 'int'ah, nehughan bumoodih, dune ulhtus, 'ulhna ts'iyawh, 'ink'ez 'ulhna bula nadetnik, 'en chah, 'en ts'iyawh tse 'an 'ink'ez dzulh tah tse t'ah, hoh huntelhu'i. ¹⁶ 'Ink'ez 'uhutni, "Tse 'ink'ez dzulh tubulh nek'oonóot'ah. 'Et t'eh ndun kw'uts'uzda cho dézti k'usda, 'en bunen 'ink'ez ndun sheeypaz ye húnilch'e, 'i ch'a neúntoolh'i. ¹⁷ 'Alha ye nelh hunilch'e, 'i 'aw 'et whudzin whusawhélt's'ut. 'Aw 'ilhunuh whunts'i whulh wuyin ghait'ah."

7

Israel ts'un hainde 144,000, 'en hubunintak hube hoodet'en téleh

¹ 'Et hukw'elh'az dinah lizas ndi yun k'ut dit nódelhúya hoh ubutélh'en. Ndi nilht's'i dink'i ndi yun k'ut 'ink'ez yatoo k'ut, 'ink'ez duchun chah, ndi buk'ut noolht's'i ka, 'et whuch'a k'ah hiyoontun. ² 'Et 'uyoon lizas ndaz de yedoh út'oh hoh télh'en. Yak'usda khuna, 'en ye hóodalh'eh, 'i ye'alh. 'Et ndunnah dinah lizas, 'en yun chah 'ink'ez yatoo bulh tinta

'otélh'ihl ka bughá whults'ut. Soo 'ultus hoh ³ 'en 'ubulhni, “Ndunnah neYak'usda be 'ulhna hinli, 'en 'et Yak'usda ye hóodalh'en, 'i be hubunintak hube hóodet'en hubuts'u telhtsilh, 'et whutsuh ndi yun, ya too, 'ink'ez duchun chah tinta oolh'en gunih!” ubúlhni. ⁴ 'Et danéltuk hubunintak hubube hóodet'en suli whudáts'o. Israel hits'ah haínde hubuzkeh, lhelhts'un hudedowh, 'en ts'iyawh 144,000 hinli. 'En ts'iyawh hubunintak hube hoodet'en hubuhulhtsi.

⁵ Judah hudedowh ts'ih haínde, 'en 12,000 hube hoodat'en hubuhulhtsi.

Reuben hudedowh ts'ih haínde, 'en 12,000 hube hoodat'en hubuhulhtsi.

Gad hudedowh ts'ih haínde, 'en 12,000 hube hoodat'en hubuhulhtsi.

⁶ Asher hudedowh ts'ih haínde, 'en 12,000 hube hoodat'en hubuhulhtsi.

Naphtali hudedowh ts'ih haínde, 'en 12,000 hube hoodat'en hubuhulhtsi.

Manasseh hudedowh ts'ih haínde, 'en 12,000 hube hoodat'en hubuhulhtsi.

⁷ Simeon hudedowh ts'ih haínde, 'en 12,000 hube hoodat'en hubuhulhtsi.

Levi hudedowh ts'ih haínde, 'en 12,000 hube hoodat'en hubuhulhtsi.

Issachar hudedowh ts'ih haínde, 'en 12,000 hube hoodat'en hubuhulhtsi.

⁸ Zebulun hudedowh ts'ih haínde, 'en 12,000 hube hoodat'en hubuhulhtsi.

Joseph hudedowh ts'ih haínde, 'en 12,000 hube hoodat'en hubuhulhtsi.

Benjamin hudedowh ts'ih haínde, 'en 12,000 hube hoodat'en hubuhulhtsi.

Ndunnah lheyul, 'i be húdelhts'i

⁹ 'Et hukw'elh'az whunilh'en 'ink'ez lhanah dune, hulai k'et 'aw hubuts'oodolhto ghait'ah, 'en hubunulh'en. Lhelhdun keyah whut'en, lhelhts'un hudedowh chah. Yinkak dune chah. Ts'iyawh lhelhts'un na'a yahúltuk 'uhint'ah. 'En ts'iyawh kw'uts'uzda cho dézti, 'i 'ink'ez ndun sheepyaz hibut nudelhúya. Ts'iyawh lheyul, 'i nahiyits'uz, 'i be dune hinli 'ink'ez 'ul tl'otel nduwhút'en, 'i hídelelh. ¹⁰ 'Et 'en tube cho 'uhutni

“NeYak'usda kw'uts'uzda cho dézti k'usda 'ink'ez ndun sheepyaz chah, be uzdujih, 'en buts'u hawhélts'ut!”

¹¹ 'Utsuh whudéldzulh, 'ink'ez dinah usjiz, lizas chah, 'en ts'iyawh ndi kw'uts'uzda cho dézti, 'i hinat nudelhúya, hibut nacháhunedel 'ink'ez Yak'usda hits'u teni' nalhdzin. ¹² 'Ink'ez 'uhutni,

“Ndoh honeh! Uzdóolhti.

'Et huwa ye dézti,

be ts'uwhunih,

be ts'ilhtus 'ink'ez nut'uk,

be chanailya ts'utni,

be uzdézti chah,

ndi ts'iyawh neYak'usda be'ilhdzun wule 'ilhuz 'ink'ez 'ilhuz wheni.

'Et ndoh honeh!”

¹³ 'Aw 'et 'ilhunuh 'utsuh whudéldzulh, 'en 'usúlhni, “Ndunnah lheyul, 'i be hudelhts'i, ndunnah ndan ho' hint'ah? 'Ink'ez nts'ez de haháandel?” ¹⁴ 'Et 'udúsni, “SMoodih nyun t'oonínzun.” 'Et 'usúlhni, “Hoh t'eh soo dega nus dune dzuh nuhutedoh, 'en 'uhuja hoh da whuz na'a dzuh nuhuzde. 'Ink'ez ndun sheepyaz buzkai be dunaih toonáhizyuzguz 'ink'ez lheyul suli. ¹⁵ 'Et huwa Yak'usda bukw'usúda cho dézti, 'i hinat nudelhúya. 'Ink'ez dzin 'ink'ez 'ulh'ek íbulh hiluglez whucho hiba ne'ut'en. 'Ink'ez ndun ndi kw'uts'uzda cho dézti yuk'ut usda, 'en hubutah 'int'ah 'ink'ez bughu tele. ¹⁶ 'Aw 'o 'un buyuh nucha'telhts'ul 'ink'ez 'aw 'o 'un ta'óde ghait'ah. 'Aw sa zul niz chah 'uhot'e ghait'ah, 'ink'ez 'aw tube cho huba whunoozul ghait'ah. ¹⁷ 'Et huwa 'ubinla, ndun sheepyaz kw'usúda cho dézti, 'i hubutah 'int'ah, 'en bughu tele hoh butsuh teyalh 'ink'ez ndi too 'ilhuz wheni buk'u ts'ukhuna, 'i ts'un úbutelilh. 'Ink'ez Yak'usda bunatsul too ts'iyawh buna k'et whúna'idutelhdoh.”

8

¹ 'Aw 'et ndunah sheepyaz ndi búlh skwunlai 'o 'at nankoh dustl'us be lhídildze yuda' dutelch'ul hoh lhulcho (½) hukw'e' hunint'o, 'et nduhooldzah bat'en, 'et yak'uz nt'eoodinil. ² Skwunlai 'o 'at nanah lizas Yak'usda but nudelhúya hubutélh'en. 'Ink'ez skwunlai 'o 'at nankoh be ts'újih, 'i hubutl'a yáncat. ³ 'Et 'uyoon lizas kwun tsit be nut'a, gold be 'ulya, 'i na'a, whusainya 'ink'ez Yak'usda bukw'uzdai but siyin. Bet yudutélhk'un sooltsun, 'i lhai hitl'aindzai. 'I dune Yak'usda bube'ildzun, 'en hubutenadudli, 'i bulh Yak'usda bukw'uzdai gold be 'ulya, 'i k'ut néyoooleh ka. Ndi Yak'usda bukw'uzdai 'i kw'uts'uzda cho dézti bubut yuzkai. ⁴ Ndi kwun tsit be nut'o sooltsun bulut 'ink'ez dune Yak'usda bube'ildzun, 'en hubutenadudli 'i bulh, ndun lizas bula k'et ts'ih Yak'usda ts'un whédukat. ⁵ 'Et ndun lizas kwun tsit be nut'o yilhchoot 'ink'ez Yak'usda bukw'uzdai k'ut kwun 'i be yudélbhun. Yun k'éyilhat hoh khunek lhai, 'i be taoonetnik, ditnik dutni, ditnik oolhges, 'ink'ez yun chah

noghésnai. ⁶ 'Et ndunnah skwunlai 'o 'at nanah lizas, skwunlai 'o 'at nankoh be ts'ujih nuleh, hiye téjih wheni liaháduja.

'Udechoo be ts'ujih, 'iyé' déja

⁷ 'Et 'udechoo lizas be ts'ujih, 'iyé' déja, 'ink'ez ooloo tsan 'ink'ez kwun 'i 'uskai bulh 'int'ah, 'i yun k'e híyilhkat. 'Et ndi yun k'ut whuduchun (¼) 'i dánk'un. 'Ink'ez yun whut'an neyelh ts'iyawh chah dánk'un.

Be ts'ujih, 'i bulh nankoh, 'iyé' déja

⁸ 'Et lizas bulh nánah be ts'ujih, 'i be 'udéja. Dzulh cho ndulh cho kwun be dez'k'un, 'i yatoo k'ut tahíyalh'uz. 'Et yatoo (½) 'i 'uskai zeh suli. ⁹ Yatoo k'ut khunai (½) 'i yahadla. 'Ink'ez ts'i cho nukat (¼) 'i chah hoolah suli.

Bulh tak'i be ts'ujih, 'iyé' déja

¹⁰ 'Et bulh tánah lizas be ts'ujih, 'i be 'udéja. 'Ink'ez sum cho yaz ts'ih halts'ut. Be nekwunult'a k'una'a dez'k'un 'ink'ez 'ukoh (¼) 'et 'uwuhultsuk hukw'eilts'ut. 'Ink'ez too yun ts'ih hánusuli k'ut chah. ¹¹ Ndi sum, 'i wormwood, 'i boozi. Ndi boozi ts'ulki, 'i híyúlhni. 'Ink'ez too (¼) 'i wormwood, 'i suli. 'Ink'ez dune lhanah ndi too hik'eyaida, ts'iyawh ts'ulki suli 'et huwa.

Bulh dink'i be ts'ujih, 'iyé' déja

¹² 'Et lizas bulh dinah be ts'ujih, 'i be 'udéja hoh dzenis ooa, 'ulh'ek ooa, 'ink'ez sum chah ts'iyawh whenghaz (¼) ndi ts'iyaintsuk but'aghezna. 'I ts'iyawh dulghus suli. 'Et huwa dzenis whenghaz (¼), 'ulh'ek chah (¼) tsahólhgus suli. ¹³ 'Et yaz ts'ih 'ilhunuh lizas yedoh hut'oh, 'et nalh'en, 'ink'ez soo 'ultus hoh njan ndutni, "Nuhwheni ndi yun k'ut delhúts'i, degha nus hoontsi' nuhts'u whékulh, degha nus hoontsi' nuhts'u whékulh, degha nus hoontsi' nuhts'u whékulh, ndi tanah lizas be ts'ujih, 'i be 'aw 'et hiye téjih 'et huwa!"

9

Bulh skwunlai be ts'ujih, 'iyé' déja

¹ 'Et bulh skwunlat lizas be ts'ujih, 'i be 'udéja, 'ink'ez sum ndus de yun k'élts'ut, 'et whunalh'en. 'En ndi tsak'et whucho whutl'ah hoolah 'i be whuda'de'ai, 'en butl'ayélts'ut. ² 'Ink'ez njan tsak'et whucho whutl'ah hoolah whudá' dutéz'ai. 'Et 'ants'i koo tube whunezul cho k'una'a lhut nyus de hanéldo. 'I be dzenis ooa chah 'ink'ez yat'ah 'i bulh ndulhcho hoh tsahólhgus suli. ³ 'Et ndi tulk'us cho lhut tuz haíndel 'ink'ez yun k'eíndel. Ndi tulk'us cho nts'e na'a hukwa' ninzun ne'tet'en, 'et bughá whults'ut. Ndi poison unli, 'i scorpion hiyulhni, nts'e na'a hukwa' ninzun tune'tu'en 'i k'una'a. ⁴ Ndi tulk'us cho 'i khunek hitl'adánla yun k'ut t'l'o haníyeh, k'us haníyeh, duchun teh, ndi tinta' yóolh'en gunih híyúlhni. Ndunnah dune Yak'usda ye 'ehóodalh'i hubunintak hubuk'uhoolah, 'en zeh hubundólhдах hubudáni. ⁵ 'Ink'ez hubuteghan hubugha chahoolts'ulh. 'Ants'i skwunlai sanun 'et dzuh nuboolhdzut. Ndi scorpion hiyulhni ubooget whuz na'a hukw'e húdunteda. ⁶ Hoh dzin whusawhélt's'ut t'eh, 'et dune hoh yahutadlah hukwa huntetalh 'et whunts'ih 'aw nahohó'alh ghait'ah. Yahutadlah tube hukwa' huntezilh 'et whunts'ih 'aw yahódlah ghait'ah. ⁷ Ndi tulk'us cho yeztli dune lhutedughan ts'ih telh'az nduhóotet'en. Butsi nainezbaz gold nduw'hút'en, 'i butsi nanezbaz. 'Ink'ez bunen 'i chah dune nen nduw'hút'en. ⁸ Butsigha, 'i chah ts'ekoo tsigha nduw'hút'en. Bughoo, 'i chah khunaiti, lion hiyulhni, bughoo 'et nduw'hút'en. ⁹ 'Et 'utes dzoot ni'delya hiye délh'ts'i. 'Ink'ez but'a 'i chah 'ants'i yeztli lhai 'elhbus dune nehughan ts'ih telhughaz 'et ndutni. ¹⁰ 'Ink'ez buche 'i scorpion buche nduw'hút'en. 'Ink'ez buche be neooget 'ink'ez buk'e whúnduda. 'Et dune skwunlai sanun whunts'un dune hubundoolhda, 'et hubughá whults'ut. ¹¹ 'Ink'ez tsak'et whucho whutl'ah hoolah whulizas 'en ba hubudayi cho unli. 'En Hebrew buk'una'a Abaddon hiyulhni, 'ink'ez Greek buk'una'a Apollyon be húyoozi. ¹² 'Aw 'et 'udechoo degha nus hoontsi' hoh whélt's'ut. Soo zélh'ts'ai, nawh degha nus 'o nus hoontsi' whuz de whélt's'ulh.

Bulh lkh'utak'i be ts'ujih, 'iyé' déja

¹³ 'Aw 'et bulh lkh'utak'i lizas be ts'ujih, 'i be 'udeja. 'Ink'ez ndi Yak'usda buk'uzdai gold be 'ulya, Yak'usda bubut yuz'ai, 'i Yak'usda buk'uzdai dink'i bude yinli, 'i butuz 'uw'whutni. ¹⁴ Bulh lkh'utak'i lizas be ts'ujih nutun, 'en 'uts'utni, "Ndunnah dinah lizas lhughel 'ukoh whucho, Euphratis huwhút'ni, 'en bula nadontnih." ¹⁵ 'Et ndunnah dinah lizas nts'oh huwa 'uhunet'oh, ndet dzin, ndet sanun, 'ink'ez ndet naooduzuk wheni, 'et wheni liahúdt'ah ndi yun k'ut dune (¼) 'en huboohooghan ka bula hudétnik. ¹⁶ Ndunnah nehughan yeztli k'ahúdelh'ts'i, 200,000,000 hinli hutni, 'et 'uhuneltsuk huboozálh'ts'a. ¹⁷ Njan ho'en, 'et yeztli chah i'en. 'Et ndunnah hik'udelh'ts'i, 'es dzoot nihúdeleya kwun lí'int'ah dulk'un, duldzan 'ankw'us dulghus lí'int'ah, 'ink'ez sulphur k'una'a dul't'uz 'i be húdelh'ts'i. 'Ink'ez yeztli butsi

'ants'i khunaiti, lion, butsi dónet'en. 'Ink'ez buzek ts'ih kwun, lhut, 'ink'ez sulphur ndi buzáhaidukat. ¹⁸ Ndi tak'i hiye dzuh nutédeh, 'i be ndi yun k'ut dune (¼), 'en yahadla. Ndi kwun 'ink'ez lhut, 'ink'ez sulphur 'i yeztli buzáhaidankat, 'i hik'eyaídla. ¹⁹ 'Et yé ulhtus buzek chah, 'ink'ez buche chah, whuz de haidukat 'et huwa. Buche tl'ughus lí'int'ah 'ink'ez 'utsi bulanduni'ai. 'I be dune hundéldah. ²⁰ Ndunnah ndi yun k'ut dune, ndi hiye dzuh nutedehe ye k'eyáchahadal, 'en nduhút'en 'et 'aw hubulubeshi whuch'a hubeni náchahudunílel. 'En 'awhuz ntsi' nududeh, 'i hits'u teni' nilhdzun 'et huwa. 'Ink'ez 'uk'edéltsi, gold, silver, dulk'un t'eh, tse, 'ink'ez duchun be 'ulya, ndi 'uk'edéltsi chawhes'en 'int'ah, cha'dústs'uk 'int'ah, 'ink'ez nuchásyah chah 'int'ah, ndi hits'un teni' nilhdzun, 'et 'ustl'e' cha'hinil. ²¹ Dune hughan, 'ink'ez hudeyun, k'us dune 'ink'ez ts'ekoo bulh tinta' hút'ih, k'us 'uhundunut'ih, 'et ts'iyawh nuhwhulubeshi whuch'a nuhwhubeni nachahadunílel.

10

'Uyoon lizas ncha dustl'usyaz 'i nuyúlhchoos

¹ 'Et doo chah 'uyoon lizas ncha ndus de yak'uz ts'ih hainya yutélh'en. Kw'us tah 'int'ah 'ink'ez ditnik na'nanguz, 'i butsi k'ut nanesdúguz. Bunen sa nduwhút'en 'ink'ez buke kwun nduwhút'en. ² 'Ink'ez dustl'usyaz 'i nuyúlhchoos. Nalhnih ts'ih duke be yatoo k'edit'ez, 'ink'ez 'intl'as ts'ih duke be yun k'edit'ez. ³ 'Ink'ez ndun lizas ncha soo khunaiti lion dulghoo, whuz na'a 'udeja. Soo hahuyih ibulh skwunlai 'o 'at nankoh ditnik 'udéja. ⁴ Skwunlai 'o 'at nankoh ditnik 'udeja hoh, 'aw 'et 'uk'e'tesgus. 'Et ndus de yak'uz ts'ih sulh yáztelhtuk. 'Et 'usúlhni, "Skwunlai 'o 'at nankoh ditnik daja déja, nyunch'oh zeh t'eeonónzin, 'aw 'uk'e'ónges gunih!" ⁵ 'Ink'ez ndun lizas ncha yatoo 'ink'ez yun k'ut siyin, 'en yak'uz ts'ih didilnik nalh'en. ⁶ 'Et yak'uz 'ink'ez ndai 'et hoonli, yun 'ink'ez ndai buk'ut hoonli, yatoo 'ink'ez ndai hubutah hoonli, ndun 'ilhuz 'ink'ez 'ilhuz wheni khuna, 'en ts'iyawh 'uhoonla, 'en boozu be lizas ncha njan ndutni 'aw 'et neóodinzut! 'Aw 'o 'un hubaoolh'g' ghait'ah. ⁷ 'Et whunts'ih ndun bulh skwunlai 'o 'at nannah lizas 'aw 'et ndet dzin be ts'ujih, 'i be 'udutenilh hoh Yak'usda ho' hoot'ah wheyuh lhaóodutetnilh. 'Et whuz na'a Yak'usda hube 'ulhna nus whunilh'en, 'en 'et hubugha ubudáni inle.

Ndi dustl'usyaz 'i Johnya'al

⁸ 'Et whutsuh da yak'uz ts'ih sulh yailhtuk whudáts'o, doo chah sulh yatelhtuk 'ink'ez 'utni, "Ndun lizas yatoo 'ink'ez yun k'ut siyin buts'un yínyalh 'ink'ez dustl'us nuyúlhchoos, 'i ólhchoot." ⁹ 'Ink'ez lizas bughu níya 'ink'ez 'udusni, "De' dustl'us sutl'ailhchoos." 'Et 'usúlhni, "Nah! Ilhchoot 'ink'ez 'al! Mbut ba ts'ulki' tele, 'et whunts'ih nzek 'et honey k'una'a mba telki." ¹⁰ Lizas dustl'us bula k'e hayálhchooz 'ink'ez í'al. Sást'ai hoh honey k'una'a suba lhuki. 'Et whéllhno hoh subut bet ts'uwulhki' suli. ¹¹ 'Ink'ez 'usúlhni, "Lhanah dune, lhawh hudedowh, lhelh ts'un na'a yahúlhtuk, 'ink'ez hubudayi cho chah, doo chah 'en hubugha nus whunóolh'en hubudóoni huba' hoot'ah."

11

Nanah bunalh 'uhooja

¹ 'Et doo chah tl'oghazilh be 'ún de'oordzih duchun lí'int'ah, 'i stl'aidantan 'ink'ez lizas 'et siyin 'ink'ez 'utni, "Didinyih 'ink'ez Yak'usda hubuluglez whucho, Yak'usda bukw'uzdai chah ndi bunduná'olhdzih. 'Ink'ez nyooz luglez whucho Yak'usda ts'ih teni' nilhdzun, 'en chah huboodolhito. ² 'Et whunts'ih luglez whucho whuzih tse whunalhtun ba n'az ts'ih, 'et whute 'aw whunducha'zolhdzih. 'Et 'udun yun k'ut whut'en bughá whunt'ai ho' hoot'ah. 'Ink'ez ndi yun k'ut Yak'usda bukeyah whuti, 'et dit lanezi 'o 'at nankoh sanun (42) 'et 'ants'i buba' hoonli hukw'u na'a hoh ndulhcho nahutedulh ho' hoot'ah. ³ 'Et ndunnah nanah suba bunalh 'uhooja, doso dulh'k'us, 'i be hízke, 'en 1,260 dzin 'et nus hontel'h'ilh, 'et butl'a óotes'alh. ⁴ Ndunnah nanah, 'en nankoh duchun, Olive hiyúlhni, 'ink'ez nankoh be whé't'en, 'i neMoodihti, ndi yun k'ut whuYak'usda, 'en bubut nanídez'a, 'i hinli ho' hint'ah." ⁵ Ndunnah bunalh 'uhooja ubundóldah hukwa 'ut'en, kwun buzek haidutenolh 'ink'ez hubuch'a detni hoolah hubuhutelhtsilh. 'Ink'ez ndan hubundóldah hukwa' ninzun, 'en ndez na'a hizóolhghelh huba' hoot'ah. ⁶ Ndunnah nanah, 'en nduk yaw chan ch'a whudána'hudute'alh huba' hoot'ah. 'Aw nus whuhunoolh'en whutah 'et 'aw nachaootelhtil 'et huwa. 'Ink'ez ndi too 'i chah 'uskai hitelhtsilh. Ndi yun k'ut hukwa' huninzun totsuk hiye dzuh nutedehe, 'i nudétezut, 'et nduhóot'en 'et hubutl'a whélt's'ut.

Ndunnah nanah bunalh 'uhooja, 'en 'ubuhuzelghhi

⁷ 'Aw 'et ndunnah nanah bunalh 'uhooja dune hubulh yáhalhtuk, 'ustl'e' 'uhudéja hoh, khunaiti ntsi', 'i tsak'et whucho whutl'ah hoolah halget, 'i hubulh hutedughan, hubuch'a telhdoh, 'ink'ez hubutuzelghelh. ⁸ 'Ink'ez hubuyust'e, keyah whuti, 'et ti yun nibanílhti.

Njan keyah whuti 'et 'uts'uwhutni, keyah Sodom 'ink'ez yun k'ut Egypt ndúwhult'ah. 'Et neMoodihti lhdulalhgus k'ehiyilhti inle. ⁹ 'Et bulunah dune, lhelhts'un hudedowh, lhelhts'un na'a yahúlhuk, 'ink'ez lhelhdun keyah whut'en chah, ndi buyust'e tat dzin 'o 'at lhuoolcho dzin hubuhuntel'hil. 'Ink'ez 'aw dune whuyihítelhtel butl'a huhoo'alh ghait'ah. ¹⁰ Ndi yun k'ut whut'en huhootét'i 'ink'ez hóntelhnik. 'Ink'ez lhts'e' hutéldulh. Ndunnah nanah nus whunílh'en dazsai, 'en dzhun nunéhlde hutni 'et huwa.

Ndunnah bunalh 'uhoofa dune hubanghan dinahudidel

¹¹ Tat 'o 'at lhuoolcho dzin inle hoh Yak'usda buyiz be ts'ukhuna biye délts'ut 'ink'ez dinahudit'az. Ndunnah hubunalh'en tube hunel'hújoot. ¹² Nds de yak'uz ts'ih tube cho 'uwuhudeja, "Ndez áh'us!" ni. 'Ink'ez buch'a detni bunalh kw'us k'ut yak'uz ts'ih whehá'az. ¹³ 'Et whulhugha 'uhunet'oh hoh tube yun nughésnai. 'Ink'ez keyah whuti (1/10) 'et nawhúnet'ai. 'Et yun nughésnai hoh 7,000 dune hedúghan. 'Et 'onghun tube whéhunel'hújoot 'ink'ez yak'uz whuYak'usda, 'en hidálhti. ¹⁴ 'Et whúlh nat degha nus hoontsi' whewhélt's'ut. Soo zelh'ts'ai whulh tat 'o nus degha nus hoontsi' 'a hoh whuz de whélt's'ulh.

Bulh skwunlai 'o 'at nankoh be ts'ujih, 'i ye' déja

¹⁵ 'Aw 'et whúlh skwunlai 'o 'at nanah lizas be ts'ujih, 'i be 'udéja. 'Et yak'uz ts'ih lhanah tube njan duhutni,

"Ndi yun k'ut hubudayi cho bukeyah neMoodihti 'ink'ez buChrist, bube'ílh'dzun whuzdli.

'Ink'ez 'ilhuz 'ink'ez 'ilhuz wheni hubudayi cho tele."

¹⁶ 'Et nat lanezi 'o 'at dinah 'utsuh whudé'lh'dzulh Yak'usda but dukw'usuda cho dézti k'uhudelhts'i, 'en Yak'usda but nachahunedel 'ink'ez hubuts'un teni' hunalhdzin. ¹⁷ 'Ink'ez 'uhutni,

"O Yak'usda neMoodihti degha nus ulhtus inli.

Ndan inli, 'ink'ez ndan ant'e,

'ink'ez ndan whuz de téyalh inli.

Ndai be ílhtus, 'i cho ílhchoot 'ink'ez hubudayi cho inle 'et huwa.

Chanailya nts'útni.

¹⁸ 'Udun yun k'ut whut'en huhunílh'e 'ink'ez nyoo be húnílh'e, 'i 'aw 'et whusawhélt's'ut.

Yahadla huba na'dutédeh whusawhélt's'ut.

Nye 'ulhna nus whunílh'en 'ink'ez dune nye'ildzun,

ndunnah nyoozi ye nuljut,

ntsol 'ink'ez ncha, 'en chah,

'en ts'iyawh huba' k'elha whutele.

'Ink'ez ndunnah ndi yun k'ut dune nilh'en,

'en chah tinta' ant'en hubutelhtsilh."

¹⁹ 'Ink'ez Yak'usda hubuluglez whucho yak'uz whuz'ai whudáha' dankez. Ndi chunkhelh dézti, 'i bet khunek neba lhaídlna, ndi nankoh tse k'ut 'uk'uné'uzguz, 'i bé dezdlá, 'i nyo hubuluglez whucho nul'en. 'Ink'ez ditnik oolhges, tube tawhúdetnik, ditnik dutni cha' whutni. Yun nughútnah, 'ink'ez 'oondloo tsan nincha, 'i chah nanánkat.

12

¹ 'Aw 'et nduk yat'ah ts'ih huwa ít'en, 'et hoh wheóodiltsai, ts'eke bunaih sa ts'un hainduz nduw'hút'en, 'i be dune unli. Buket'ah 'et 'ulh'ek oozá 'us'ai. 'Ink'ez lanezi 'o 'at nankoh sum 'i butsi náyuzt'uk. ² 'Ink'ez ski bulh 'int'ah. Ka' dutni 'aw 'et ski whutéleh. ³ 'Ink'ez doo chah zeh 'uts'un na'a nduk yat'ah ts'ih huwa ít'en, 'et hoh wheóodiltsai. Whunulh'en t'l'ughus cho khunai k'una'a núlget dulk'un, skwunlai 'o 'at nankoh butsi 'ink'ez lanezi chah bude unli. 'Ink'ez skwunlai 'o 'at nankoh butsi, 'i 'ilhuk'i hoh hubudayi cho butsi nayuzt'uk nduw'hút'en, 'i butsi nayuzt'uk. ⁴ Duche be nduk yat'ah sum (½) ndi ndus de hayáhlhel 'ink'ez yun k'éyilhdel. Ndun ts'eke 'aw 'et buyaz whutéleh, 'en yubut siyin, soo ski whuzdli íbulh yutelhnoh 'et hukwa. ⁵ 'Ink'ez ts'eke duneyaz sulhtsi. 'En ndi yun k'ut lhelhts'un hudedowh, ts'iyawh 'ut'es tuz be k'une' butel'en. 'Ink'ez buyaz 'en Yak'usda 'ink'ez bukw'usúda cho dézti, 'i whuz whehíyalhti. ⁶ 'Ink'ez ts'eke chuntah dune chahóot'ih ts'ih whetsílhya. 'Et Yak'usda yuba lhaóodilhdzun, 'et usda. 'Et 1,260 dzin 'et 'uwuldzah, 'et ya'al, 'i be bughu tedleh.

Satan yak'uz tinahinino

⁷ 'Ink'ez nduk yat'ah whel'hónidughan. Michael 'ink'ez dulizas teh t'l'ughus cho khunai k'una'a nulget ch'a nihúdenel. 'Ink'ez ndi t'l'ughus cho khunai k'una'a nulget, 'i dulizas teh huba nch'a nihúndel. ⁸ 'Aw ndunnah t'l'ughus khunai k'una'a núlget 'ink'ez bulizas teh, 'aw whuch'a cha'híldoh. 'Ink'ez yat'ah húdelhts'i whuch'a hubuhunézyoot. ⁹ 'Et ndi t'l'ughus cho khunai k'una'a núlget ncha, 'en téhinino. Ndi 'uda whut'l'ughus, netsudule 'ink'ez Satan

hiyulhni. Ndi yun k'ut ndulhcho hoh dune nana'ah, 'en 'int'ah. Bulizas tubulh ndi yun k'Ébuhuninyoot. ¹⁰ 'Et nduk yak'uz ts'ih tube cho njan nduhudéja,
 "Aw 'et be uzdujih, 'i 'ink'ez be ts'ilhtus, Yak'usda hubudayi cho unli chah,
 'et buChrist, 'en moodih tele whusawhélt's'ut.

Netsudule ndun nelhutsinkah hubuk'eho'ah,
 'en ndi yun k'Éhininyoot 'et huwa.

Netsudule 'en 'ut'en Yak'usda but seyin hoh dzin 'ink'ez 'ulh'ek ibulh nelhutsinkah hubuk'Éhoo'aih.

¹¹ Ndu sheepyaz buzkaí be,
 ndi khunek Yak'usda ghu yalhtuk chah,
 'i ndi ts'iyawh hoh netsudule ch'a hunilhde,
 'ink'ez 'aw hukw'elha yahutadlah whechahuniljut.

¹² 'Et huwa yak'uz whut'i 'ink'ez Yak'usda bubun whucho t'ah húdelht's'i,
 nuhwheni ts'iyawh whuné!hnik!

'Et ndunnah ndi yun k'ut húdelht's'i, ya too k'ut chah nuhwheni ts'iyawh dega nus hoont's'i nuhgha whutelts'ulh.

Netsudule ndus de nuhghu ninya tube hunilch'e.
 T'ooninzun huba nilhduk'w suli 'et huwa."

Ts'eke dzuh niyulhdzut

¹³ 'Et nyoo t'l'ughus cho khunai k'una'a nulget ndus de hahínanyoot t'ewhunanzin hoh, 'et ndun ts'eke duneyaz buyaz suli, 'en tube dzuh niyulhdzut. ¹⁴ 'Et whunts'ih ndun ts'eke sbalyan cho but'a nankoh butl'ayá'nkát. 'I be keyah dune chahóot'i ts'ih 'et tedalh whuz toot'ah ka. 'Et tat naoduzuk 'o 'at l'huhooolcho 'et ya'ah, 'i be bughudli hoh t'l'ughus khunai k'una'a nulget, 'i ch'a 'et inda. ¹⁵ 'Ink'ez t'l'ughus khunai k'una'a ts'eke ts'un too lhái buzá hayangoo. 'I be sih ndun ts'eke too bulh tólat ninzun ka. ¹⁶ 'Et whunts'ih ndoh yun ts'eke yula 'uja. Nyo yun lhch'az 'uja 'ink'ez ndi t'l'ughus cho khunai k'una'a nulget too buzá hayangoo, whuz 'ajul. ¹⁷⁻¹⁸ 'Ink'ez ndi t'l'ughus cho khunai k'una'a nulget tube ts'eke bulh húnilch'e, 'ink'ez ndun ts'eke but's'un hainzut hubulh úteghan ka but's'ú whelget. Yak'usda ubudani hik'une' 'ut'en 'ink'ez Sizi Gri ghu yalhtuk, 'i chah hiyoontun, 'en 'uhint'ah.

13

Khunaiti ntsi', 'i tooz haduki

¹ 'Et yatoo k'ut taba síyin hoh khunaiti ntsi', 'i tooz haduki hoh téh'en. Skwunlai 'o 'at nankoh butsi únli 'ink'ez lanezi bude únli. 'Ink'ez ndi bude lanezi hubudayi cho butsi nayuzt'uk nduwút'en, 'i buk'ene' yuzdla. 'Ink'ez lhuk'i hoh butsi khunek Yak'usda ch'a yalhtuk, 'i buk'ene' úsduguz. ² Ndi khunaiti ntsi' t'el'h'en, 'i chuntah boos cho, leopard hiyúlhni, 'i nduwút'en. Buke 'i chah sus ke nduwút'en. 'Ink'ez buzek khunai cho lion hiyulhni, 'et nduwút'en. 'Ink'ez ndi t'l'ughus cho khunai k'una'a nulget 'i úlhtus chah, kw'uts'uzda cho dézti, 'ink'ez ts'iyaintsuk k'une' oot'en ka, 'et ts'iyawh yutl'ahónla. ³ Butsi lhuk'i, 'i tube nukai suli. 'I buga dazsai suba lí'nt'ah. 'Et buka whuzdli nawhéje. 'Et ndi yun k'ut ndulhcho hoh huwa hoho'en 'ink'ez ndi khunaiti ntsi', 'i hiyuntezdel. ⁴ Ndu t'l'ughus cho khunai k'una'a nulget, khunaiti ntsi' k'une' oot'en ka yugha óoni'ai, 'en hits'un teni' nalhdzin. 'Ink'ez ndi khunaiti ntsi', 'i chah hits'un teni' nalhdzin 'ink'ez 'uhutni, "Ndi khunaiti ntsi' 'aw yundult'ah hoolah. 'Aw hiyooghan ghait'ah." ⁵ Ndi khunaiti ntsi' tooz haduki, 'i hooncha howu yalhtuk 'ink'ez Yak'usda ch'a yalhtuk, 'et wheni buzek bughá whults'ut. Dit lanezi 'o 'at nankoh sanun (42) 'et ndúwhuldzah hoh k'une' oot'en ka bughá whults'ut. ⁶ Yak'usda ch'a yawhénilhtuk. Bun cho whuch'a yawhénilhtuk, 'ink'ez ndunnah yak'uz húdelht's'i, 'en chah, 'et ts'iyawh hubuch'a yawhénilhtuk. ⁷ Dune Yak'usda bube'ildzun 'en hubulh lhatedúghan 'ink'ez buch'a telhdoh, 'et bughá whults'ut. Lhelht's'un hudedowh, lhelht's'un na'a yahulhtuk, 'ink'ez lhelhdun keyah whut'en, 'en k'úne' butel'en ka bughá whunt'ai. ⁸ 'Ink'ez ndi yun k'ut húdelht's'i, 'en ts'iyawh ndi khunaiti ntsi' hits'un teni' huntelhdzilil. Ndu sheepyaz 'udechoo ndi yun 'uhóolya whuts'un 'uda lháoodint'ah hituzelghelhel, 'en ndi 'ilhuz 'ink'ez 'ilhuz wheni ts'ukhuna be dust'lus k'ut huboozi hubuk'echa'iduguz, 'en 'uhint'ah. ⁹ Ndan budzo hooni 'en 'uhoozóilht's'a huba' hoont'ah.

¹⁰ Ndan 'uyoon 'ulhna hubulhtsi,
 dich'oh chah whuz na'a zeh 'ulhna tele.

Ndan soh cho be dune ghan t'eh,
 dich'oh chah soh cho be datetsah ho' hont'ah. 'Et huwa dune Yak'usda bube'ildzun, njan hiye 'alha 'uhoont'ah 'ink'ez 'i be whulh huzyin, 'et 'uwúlhlhni.

'Uyoo khunaiti ntsi', 'i yun ts'ih hálgét

¹¹ 'Et doo chah 'uyoo khunaiti ntsi' 'et yun k'ut nyus de úlgwulh hoh telh'en. Sheeppaz k'una'a nankoh 'ude hoonli 'ink'ez t'l'ughus cho khunai k'una'a núlget, 'en k'una'a yalhuk. ¹² Ndun 'udechoo khunaiti ntsi', 'i ye k'une' 'ut'en whuz na'a ts'iyawh yubut 'et ndut'en. 'Ink'ez ndi yun 'ink'ez yuk'ut whut'i chah ndi khunaiti ntsi' dazsai inle 'ink'ez naje, 'i hits'u teni' noolhdzun hubulhsti. ¹³ 'Ink'ez ndi bulh nanah khunaiti ntsi' hooncha whehóodet'en tune'út'en. Dune nalh ndus de kwun yun k'éyilhukuk 'et chah ndut'en. ¹⁴ Ndi bulh nanah khunaiti ntsi', 'i 'udechoo khunaiti ntsi' nalh lhat teh huwa 'et'en tune'út'en bughá whunt'ai, 'et hoh ndi yun k'ut whut'en nabuna'ah. Ndun khunaiti ntsi' soh cho be nukai suli inle 'ink'ez khana ndi yun k'ut whut'en, 'i buk'edéltsi 'uhooleh hubúlhni. ¹⁵ 'Ink'ez ndi 'uk'edéltsi usjiz yutelhtsilh, 'et bughá whulst'ut. 'Et t'eh ndi khunaiti ntsi' buk'éyíltsi yalhuk chah yulhsti. 'Ink'ez ndunnah ndi 'uk'edéltsi 'aw hits'un teni' noolhdzin ghait'ah, 'en ts'iyawh hubuhooghan, ni. ¹⁶ Ntsol 'ink'ez ncha, soo hude'a 'uhint'ah 'ink'ez tehul'en, 'ulhna 'ink'ez 'ulhna which'a bula nahudetnik chah, 'en ts'iyawh nalhni ts'ih bula k'us bunintak hube hóodet'en hubulhsti. ¹⁷ Ndunnah hube hóodet'en, k'us khunaiti ntsi' boozí, ndi be 'oodulto boozí be 'i bunintak k'us bula nalhni ts'ih 'aw hubuk'echa'iduguz t'eh, 'aw 'uhoket 'ink'ez whé'hoket ghait'ah. ¹⁸ Ndi 'i be ts'úwhumih, ndan beni hooni, 'en ndi khunaiti ntsi' boozí yoodolhto huba' hoont'ah. Dune boozí 'int'ah. Ndi 'i lhk'utak'i lhk'utak'i lhk'utak'i ndi yúlhni (666).

14

144,000 ne'aBá boozí bunintak buk'une'úsduguz, 'en Yak'usda busheepyz hizih nudelhúya

¹ Njan 'et ho'en, dzulh Zion hiyulhni, 'i buk'ut ndun sheeppaz 'et siyin téll'en. 144,000 ne'aBá boozí bunintak buk'une'úsduguz, 'en hizih nudelhúya. ² 'Ink'ez ndus de 'uw'hútni. Too najilh li'whutni. 'Ink'ez ditnik, tube dutni k'una'a li'utni. 'Ink'ez nela be, be ts'újun be 'ujun, 'i chah oozálhts'a. ³ 'Et kw'uts'uzda cho dézti, nyoo dinah usjiz, 'ink'ez 'utsuh whudéldzulh chah, 'en bubut soo k'an dit shun be hújun. Ndi shun yoodool'eh hoolah. Ndunnah 144,000 ndi yun k'ut nabuhonket, 'en zeh ndi shun hiyodutel'eh. ⁴ Ndunnah, 'en ts'ekoo bulh tinta' ut'ih chahílah, but'acha'ughésnai 'uhint'ah 'et huwa. 'En 'uhint'ah ndun sheeppaz nuya teh totsuk nuhínudelh. Dune tah 'uhooket 'uhint'ah. Yak'usda 'ink'ez busheepyz, Sizi hiyúlhni, 'en huba 'udechoo bube'ildzun hinli. ⁵ 'Ink'ez buzek 'aw whuts'it hoolah. 'Alha Yak'usda buk'usda cho dézti yuk'usda 'en but 'aw hoh tink'us 'uhint'ah bughu hoolah.

Tanah lizas, 'en 'uhudéja

⁶ 'Et doo chah 'uyoon lizas nduk yaz nut'o hoh whunulh'en. Ndi yun k'ut whut'en, lhelhdun keyah whut'en, lhelhts'un hudedowh, lhelhts'un na'a yahúlhtuk, 'ink'ez soo ts'iyannah, 'en ndi khunek unzoo 'ilhuz 'int'ah, 'i bugha buduténilh, 'et huba ndun lizas ndi khunek 'et yudelh'ai. ⁷ Tube cho njan ndutni, "Yak'usda be nulhújut 'ink'ez délhiti. Dune ba nahuteyeh 'aw 'et hoh wheghah 'uhunet'oh 'et huwa. Yaz 'ink'ez yun k'ut, yatoo 'ink'ez yun ts'ih hainli chah, ts'iyawh 'uhoonla, 'et huwa but'sun teni' nulhdzun." ⁸ 'Ink'ez 'uyoon lizas yunet'oh 'ink'ez 'en chah njan ndutni, "Keyah whuti Babylon 'aw 'et hoolah whuzdli, hoolah whuzdli! Nyoh keyah whuti soo nint'uk hoh 'uyoon dune bulh tinta' 'ut'ih, mai too k'una'a lhelhdun keyah whut'en hube yulhnaí." ⁹ 'Et bulh tanah lizas 'et hubunet'oh. Dultul hoh njan ndutni, "Ndi khunaiti ntsi' 'ink'ez buk'edéltsi chah, ndunnah yuts'un teni' nilhdzun, 'ink'ez bunintak k'us bula k'ut bube hóodet'en t'eh, ¹⁰ 'et t'eh dich'oh Yak'usda ye húnilch'oh mai too k'una'a ulhtus, 'i hitetnilh. Ndi lubot mai too k'una'a ulhtus dezibun, 'i whuz na'a ndi Yak'usda ye húnilch'e, 'i be dézbun. 'Et ndunnah khunaiti ntsi' hits'un teni' nilhdzun, 'en Yak'usda bulizas 'ink'ez busheepyz bunalh kwun 'ink'ez sulphur hiyúlhni dezk'un, 'et 'i be dzuh natedeh. ¹¹ Ndi hiye dzuh nudeh whulut, 'ilhuz wheni nduk whedjoot. Ndunnah ndi khunaiti ntsi' 'ink'ez buk'edéltsi hits'un teni' nilhdzun 'ink'ez bunintak k'us bula k'ut bube hóodet'en, ndunnah 'et nduhut'en, 'en dzenis 'ink'ez 'ulh'ek 'i bulh nachahutelhúyiz." ¹² 'Et whunts'ih ndunnah dune Yak'usda bube'ildzun, 'aw 'eni hubuk'una'a cha'hít'ah. Yak'usda bughunek net'láida'ai howa whulna whunts'i whulh huzyin hoh Sizi Gri huba 'alha' yint'ah, 'en 'uhint'ah. ¹³ 'Et nduk yak'uz ts'ih 'usuhútni, "Ndi 'uk'e'ínges, k'an 'et whuts'un ndunnah neMoodihti t'einínzun hoh yahadla t'eh, 'en dega nus hoonzoo hubulh 'úhooja." Ndoni, "A," ni. "Ut'en 'uhalh'en, 'et huwa nahutelyis. 'Ink'ez dahét'en hube 'ut'en unzoo 'aw tinta hiyóolelh ghait'ah."

Ndi yun k'ut ha' nukat 'aw 'et whusahónzut

¹⁴ Njan 'et ho'en, kw'us lheyul, 'i téll'en. 'Ilhunuh dune ye nduw'hút'en, 'en ndi kw'us yuk'usda. Butsi k'éyuztan, 'i gold 'int'ah, 'ink'ez t'l'o be udút'as khundenyin, 'i niyútun. ¹⁵ 'Et 'uyoon lizas luglez whucho tenínya 'ink'ez soo 'ultus hoh kw'us k'usda njan ndiyulhni, "Nyoo be udút'as, 'i be 'int'as. 'Aw 'et 'utant'us whusawhélt'sut. Ndi yun k'ut ha' nukat 'aw 'et

whusahónzut 'et huwa." ¹⁶ 'Et huwa kw'us k'usda ndi be whudut'as yun k'ut ye whútet'us. 'Et ndi yun ndulhcho hoh 'ada hont'az.

Yak'usda ye húnilch'oh, 'i

¹⁷ 'Et yak'uz whuluglez whucho, 'et 'uyoon lizas tenínya. 'En chah be udút'as khundenyin 'i nutun. ¹⁸ 'Et doo chah 'uyoon lizas 'en Yak'usda bukw'uzdai ts'ih haínya. 'En kwun k'une' 'ul'en unli. Ndu be whudút'as khundenyin nótun, 'en soo 'ultus hoh njan ndí yulhni, "Ndi be 'udút'as khundenyin, 'i be 'int'as 'ink'ez ndi yun k'ut mai nezt'ai buduchun bulh nailhdzook, 'aw 'et nezt'ai 'et huwa." ¹⁹ 'Aw 'et ndun lizas dube whudút'as, 'i be ndi yun k'ut hont'az 'ink'ez mai nezt'ai buduchun bulh nayalhdzook. 'Ink'ez njan tse cho buk'ut hawhedúkai, 'et ndi mai 'ayalhkat, 'ink'ez ke 'et ndi mai yuk'unuya hoh butoo buts'un hayútsu 'et hukwa. 'Et whuz na'a ndi Yak'usda ye húnilch'oh 'int'ah. ²⁰ 'Et keyah whuti whan'az, 'et njan mai too 'ul'en whuz'ai, 'et mai hik'unúdelh 'ink'ez 'uskai buts'un hayijul. Yeztli buzek yuzdla 'et 'uskai tadékhulh suli. 'I 200 miles bat'en, 'et 'uwuhulez.

15

Skwúnlai 'o 'at nankoh lhests'ai, 'i Yak'usda ye húnilch'oh 'i be dezibun

¹ 'Et doo chah yat'ah 'udun whe hóodet'en whutelh'en. Hooncha 'ink'ez huwa 'ét'en. Skwúnlai 'o 'at nanah lizas, 'en ndi skwúnlai 'o 'at nankoh dega nus hiye dzuh nuzut, 'i be whunujut, 'i nihíyule. 'I be yak'usda ye húnilch'oh lhaóodutenilh. ² 'Et doo chah, bun k'ut whucho dezghel khe li'int'ah, kwun hubutah hoonli, 'i nduwhút'en telh'en. Ndunnah ndi khunaiti ntsi' buk'edéltsi, 'ink'ez be hóodet'en, 'ink'ez ndi be 'oodulto boozu yuch'a nilhde, ndi bun k'ut whucho dezghel k'ut nahudelhiya. Nela be ts'ujun, 'i Yak'usda be'ilhdzun, 'i nahíyule. ³ Moses, 'en Yak'usda be 'ulhna, 'ink'ez ndun sheeppaz bulh buyun 'i be hújun. Ndi shun njan ndutni, "NeMoodihti Yak'usda 'o nus ulhtus inli.

Nye 'ut'en uncha 'ink'ez bugha 'ét'en.

Ndi yun k'ut whut'en huba hubudayi cho inli.

Nye 'ut'en k'ah ts'ah'un 'ink'ez 'alha 'uhoont'ah.

⁴ O neMoodihti ndan nyechantelhújut 'ink'ez nyoozi ts'udutélhti?

'Alha 'i be nyunch'oh zeh lubeshi bughu hoolah inli.

'Alha 'udun keyah whut'en ts'iyawh whusahatédulh 'ink'ez mbut nts'un teni' huntelhdzin.

Ts'ah'un be né'int'en, 'i 'aw 'et hoolsai 'et huwa."

⁵ 'Et hukw'elh'az whunulh'en 'aw 'et yak'uz ts'ih Yak'usda hubuluglez whucho whut'ah, Yak'usda bughunek chunkhelh be dezdla, 'i buk'ut bun k'ut whucho whuz'ai, 'et da' dutékez. ⁶ 'Ink'ez ndunnah skwúnlai 'o 'at nanah lizas skwúnlai 'o 'at nankoh dune ye dzuh nudeh, 'i hiyelelh hoh luglez whucho tihúnindel. Naih dézti chaditsun 'ink'ez be hóodet'en be húdelh'si. 'Ink'ez buts'i tah 'on doh, se gold unli, 'i be tsuhudelhú'oo. ⁷ 'Et ndunnah dinah khunai usjiz, hubutah 'i lhuk'i skwúnlai 'o 'at nankoh lhests'ai, gold unli, 'i Yak'usda 'ilhuz 'ink'ez 'ilhuz wheni khuna, ye húnilch'oh, 'i be dezibun, 'i lizas skwúnlai 'o 'at nanah hubutainla. ⁸ 'Ink'ez Yak'usda buts'un hayánduz 'ink'ez yé ulhtus bulut 'i be luglez whucho whudezbun. Skwúnlai 'o 'at nankoh dune ye dzuh nudeh skwúnlai 'o 'at nanah lizas nihíyule, lhaóodutenilh whutsuh luglez whucho dune daóoya ghait'ah.

16

¹ 'Et oozáhlts'a nyez de luglez whucho ts'ih 'uwhutni, tube 'uwhutni 'ink'ez skwúnlai 'o 'at nanah lizas hubulh yatelhtuk 'et njan ndutni, "Ahdulh 'ink'ez ndi lhests'ai, 'i Yak'usda ye húnilch'oh, 'i be dezibun ndi yun buk'ut nadulhkuk!"

Udechoo lhests'ai, 'i

² 'Et huwa 'udechoo lizas ndi lhests'ai, 'i yun k'ut naidélhkat. Ndunnah dune ndi khunaiti ntsi' bé hoodet'en, 'i yit'i, 'ink'ez buk'edéltsi ts'un teni' nilhdzun, 'en ndai yun k'ut naidélhkat, 'i be ntsi' 'ink'ez buba' whuninzun be ndunnah dune bukak wheoonílhjut.

Bulh nankoh lhests'ai, 'i

³ 'Et bulh nanah lizas, 'en dulhests'ai yatoo k'ut naidélhkat. 'Ink'ez ndi yatoo dune dazsai buzkai nduwhút'en suli. 'Ink'ez ndai toot khunai ts'iyawh yaidla.

Bulh tat lhests'ai, 'i

⁴ 'Et bulh tanah lizas dulhests'ai 'ukoh ts'iyawh 'ink'ez yun ts'ih hanusuli chah, ndi k'ut naidélhkat. 'Ink'ez too ts'iyawh 'uskai suli. ⁵ 'En lizas zeh njan ndutni hoh dústs'o, "O neMoodihti ts'ah'un 'int'ah.

Nyun 'int'ah 'ink'ez nyun 'ant'e 'ink'ez lubeshi bughu hoolah inli.

Whuz na'a huba nahuzínya 'et huwa.

⁶ Dune Yak'usda bube'ildzun, 'en 'ink'ez ndan nus whunilh'en hububahanghan.

'Et huwa khunaiti ntsi' hinedulh, 'en 'uskai hiyootnai ka huba 'iyinla.

Njan 'et whuch'a honílhde 'et huwa."

⁷ 'Ink'ez Yak'usda bukw'uzdai ts'ih 'uyoon yatélhtuk whudusts'o hoh njan ndutni,
"Yak'usda neMoodihti,

ts'iyawh whanus 'ultus inli.

'Alha 'uhoont'ah! Nyun ts'ah'un na'a 'ink'ez 'alha hukw'u na'a dune ba nahinyeh."

Bulh dit lhests'ai, 'i

⁸ 'Et bulh dinah lizas dulhests'ai sa k'ut naidílhkat. 'Ink'ez dune kwun be buka nóduitek'un ka bughá whunt'ai. ⁹ 'Ink'ez kwun tube nezul, 'i be buka nódezk'an. 'Ink'ez Yak'usda boozí hiyenah yalhtuk. 'En ye úlhtus, 'i be ndi dune ye dzuh nudeh hoonli 'et huwa. 'Ink'ez 'aw hubulubeshi whuch'a hubeni nachahadunilel 'ink'ez 'aw chahidíhlti.

Bulh kwulai' lhests'ai, 'i

¹⁰ 'Et bulh skwulanah lizas dulhests'ai khunaiti ntsi' bukw'usúda cho dézti, 'i yuk'usda, 'i k'ut naidílhkat. 'Ink'ez bukeyah hubudayi cho unli ndulhcho hoh tsahóhghus whuzdli. 'I bugha tube hukw'e hünduda k'et hubutsoola hiya'alh. ¹¹ 'Ink'ez Yak'usda yak'uz usda, 'en hiyenah yalhtuk. Stabe buka whunduda 'i be hubulh 'últ's'ulh 'et huwa. 'Ink'ez dahút'en 'aw whuch'a nachahidulh.

Bulh lhk'utak'i lhests'ai, 'i

¹² 'Et bulh skwúnlai 'o 'at nanah lizas dulhests'ai 'ukoh whuti, Euphratis huwhútnei, 'i k'ut tayálhkat. 'Ink'ez too hoolah suli. 'Et hoh ndunnah hubudayi cho ndaz de hahutéduh, hoh lhuhutedulh 'et wheni 'et huba 'uhóonla. ¹³ 'Ink'ez tl'ughus cho khunai k'una'a núlget, 'ink'ez khunaiti ntsi', 'ink'ez whuts'it hoh nus whunilh'en tahult'ah nudúdeh ntsi', 'i tsasli nduwút'en, buzek hayánde'l 'et whutéh'en. ¹⁴ Ndowh netsudule bunudúdeh, 'i 'int'ah, hoh huwa 'út'en tune'ut'en. Yun k'ut ndulhcho hoh whuhubudayi cho 'ilho hubutughélel. Yak'usda ndun whanus ultus budzin, 'et dzin, 'en bulh lhatedúghan 'et wheni lhadútneh. ¹⁵ "Soo zélhts'ai, 'undunut'ih k'una'a whuz de nél'ilh. Ndunnah 'ahoolhyez khudli 'ink'ez bunaih chadidzun, 'en 'et nduhút'en t'eh, 'aw 'ust'et nuhooya ghait'ah 'ink'ez bube 'ust'et wút'en ghait'ah, 'en dega nus hoonzoo hubugha whutélt's'ulh." ¹⁶ 'Et Hebrew bughunek k'una'a Armageddon huwhútnei, 'et wheni netsudule bunudúdeh ndi yun k'ut whuhubudayi cho 'ilhobohowezdla.

Bulh skwúnlai 'o 'at nankoh lhests'ai, 'i

¹⁷ 'Et bulh skwúnlai 'o 'at nanah lizas dulhests'ai ndoh tazai k'uz naidílhkat. 'Ink'ez nduk yak'uz whuluglez whucho kw'uts'uzda cho dézti su'ai ts'ih, whuz tube cho njan nduwútnei, "Aw 'et lhaodíja!" ¹⁸ 'Ink'ez tawhudetnik, ditnik 'ink'ez ditnik chah oolghes, 'ink'ez hooncha hoh yun nughesnai. Ndi yun k'ut dune whúzdlí 'et whuts'un 'aw ndulhcho be whuz na'a yun nuchághesnai. ¹⁹ 'Ink'ez njan keyah whuti tawh lhk'ehonkat. 'Ink'ez 'udun keyah whut'en bukeyah whuti, hoh chah nawhúnankat. 'Ink'ez nyoh keyah whuti Babylon huwhútnei, 'et chah Yak'usda whunalnik, 'ink'ez Yak'usda ye húnílh'oh, mai too k'una'a ulhtus, 'i yugha étalhdzoh 'et huwa. ²⁰ 'Et 'ink'ez noo ts'iyawh chah hoolah suli, 'ink'ez dzulh chah hoolah suli. ²¹ 'Ink'ez ndus de yak'uz ts'ih 'indloo tsan nincha cho, 'i dune k'ut naílhlan. 'Ilhuk'i 'indloo tsan 100 lbs 'et 'uldaz. Ndi 'indloo tsan be óonujut k'et 'i bugha dune Yak'usda hiye duyih.

17

Ts'eke 'ul'en khunaiti ntsi' soo dulk'un, 'i yuk'usda

¹ 'Aw 'et ndunnah skwúnlai 'o 'at nanah lizas skwúnlai 'o 'at nankoh lhests'ai nule, 'en hubulh 'ilhunuh sghu ninya 'ink'ez 'usulhni, "Anih ndun dega nus 'ul'en, lhat too yuk'usda, huba nahezuya whúnuyntelhtun. ² Ndi yun k'ut hubudayi cho hubulh tinta 'ut'ih. 'Ink'ez ndi ye tinta 'ut'ih 'ants'i mai too k'una'a, 'i be ndi yun k'ut whut'en hubínelh'nai li'uja." ³ 'Et Ndoni be dune chahóot'ih ts'ih sunilhti. 'Et njan whunulh'en, ts'eke khunaiti ntsi' soo dulk'un, 'i yuk'usda. Yak'usda yulh yeduyih khunek, 'i khunai ntsi' buyust'e ndulhcho hoh buk'e'úsduguz. Skwúnlai 'o 'at nankoh butsi hoonli 'ink'ez lanezi bude hóoni. ⁴ Dulk'un mai too nduwút'en 'ink'ez soo dulk'un, 'i ndun ts'eke ye usda. 'Ink'ez gold 'ink'ez tseyaz dunezti, 'ink'ez kw'usul dunezti chah, ndi be nudelhútsi. Lubot gold unli, 'i nuyúka. Ndaí ndi yun k'ut whut'en tink'us whudutsun tune'húst'en 'ink'ez hube 'ut'en buba' whuninzun, 'i be ndi lubot dézbun. ⁵ Bunintak 'et boozí 'uk'e'úsduguz, 'ink'ez ndez na'a njan ndutni, "whe' hoont'ah hooyah Babylon uncha, 'ul'en be'ama 'ink'ez ndi yun k'ut dega nus hoontsi' chah be'ama", ni. ⁶ 'Et ndun ts'eke téh'en. Ndunnah Sizi bugha dune hubulh yálhtuk, 'et

hukwa hizelghhi 'ink'ez k'us ndan Yak'usda bube'ildzun, 'en chah, hubuzkai 'i be ndun ts'eke tanésnai. Nalh'en hoh suba hooncha k'et 'aw suba 'alha cha'hóot'ah.

Ts'eke 'ul'en 'ink'ez khunaiti ntsi' daja ni hoh 'utni

⁷ 'Et lizas 'usúlhni, "Di ka mba hooncha? Ndun ts'eke, 'ink'ez ndi khunaiti ntsi' skwúnlai 'o 'at nankoh butsi hóonli 'ink'ez lanezi bude únli k'usda, 'et bugha whe' hoont'ah hooyuh, 'et nyudutésnihl. ⁸ Ndi khunaiti ntsi' nalh'en, 'i 'ant'e inle 'ink'ez k'an 'et hoolah, 'ink'ez tsak'et whucho whutl'ah hoolah whuz de hatélgwulh 'ink'ez nts'e hoolah tele ts'ih telgwulh. 'Ink'ez ndi yun 'udechoo 'ulya whuts'un, ndunnah ndi yun k'ut whut'en, ndi 'ilhuz ts'ukhuna be dustl'us k'ut, 'i k'ut 'aw huboozi 'uk'echa'iduguz, ndi khunaiti ntsi' 'ant'e inle, 'ink'ez k'an 'et hoolah, 'et whunts'ih hoonli ho' 'int'ah, 'en ndet hiya'en t'eh huba whutécha. ⁹ Ndan beni whúnih njan huwa nuni noozut. Ndi skwúnlai 'o 'at nankoh 'utsi, 'i skwúnlai 'o 'at nankoh dzulhyaz 'int'ah. 'I k'ut ts'eke yuk'usda. ¹⁰ 'Ink'ez skwúnlai 'o 'at nanah hubudayi cho hoonli. Skwunlatnah 'en huhoolah suli. 'Ilhunuh 'en 'awhuz hubudayi cho unli 'ink'ez 'ilhunuh 'awhuz whusachásyak. Whusainya t'eh, 'astl'iyaz zeh hubudayi cho tele. ¹¹ 'Ink'ez ndi khunaiti ntsi' 'ant'e inle 'ink'ez 'aw k'an 'et hoolah, 'en lhk'udínah hinli. 'Et whunts'ih ndunnah skwúnlai 'o 'at nanah 'en hubulh 'ilhunuh 'int'ah 'ink'ez ndet hoolah tele ts'ih telgwulh. ¹² Ndi lanezi 'ude i'én, 'i lanezi hubudayi cho, 'awhuz hubudayi cho huteleh butl'acháwhuskat 'uhint'ah. 'Et whunts'ih 'iluh hukw'e'hunint'o 'uwulhdzah, 'et ndi khunaiti ntsi' 'en bulh k'une' hutét'en hubugha óotelts'ulh. ¹³ 'En ts'iyawh lgha 'uhuninzun. Hiye últus 'ink'ez hiye k'une' 'ut'en, ndi khunaiti ntsi' 'et higha óotelelh. ¹⁴ Ndunnah, 'en ndun sheeypaz bulh lhahutedughan. 'Ink'ez ndun sheeypaz 'en hubuch'a' telhdoh! 'En 'int'ah ts'iyawh moodih, 'en ts'iyawh huba Moodihti unli 'ink'ez hubudayi cho chah unli, 'en ts'iyawh huba hubudayi cho unli 'et huwa. Ndunnah yulh 'int'ah, 'en 'utahálya 'ink'ez bughu nusja, 'en 'aw Sizi hilachaditnihl hinli." ¹⁵ 'Et doo chah lizas 'usúlhni, "Nyo lhat too k'ut 'ul'en yuk'usda whunalh'en, ndi too, 'i lhanah dune, lhelhts'un hudedowh, 'ink'ez lhelhts'un na'a yahúltuk hoonli whuz na'a ndi too 'et 'en 'uhint'ah. ¹⁶ Ndi khunaiti ntsi' bude lanezi i'en, ndun 'ul'en hits'u dutetnik. Ndaí yit'i, 'i ts'iyawh higha hahitelyelh 'ink'ez 'ust'et gaih tele. Hiyust'e hite'ulh 'ink'ez kwun be hidutélhk'un. ¹⁷ Yak'usda nts'e na'a dawhútenih hukwa' ninzun, 'et budzi yé danla soo lhk'una'a zeh nuni hunoozut ka. 'Ink'ez hubudayi cho hiye k'une' 'ut'en, ndi khunaiti ntsi' hitl'aóotelih, ndet Yak'usda bughunek lhawhúdutenih 'et whuts'un. ¹⁸ 'Ink'ez ndun ts'eke i'en, 'en njan keyah whuti unli ho' 'int'ah. Ndi yun k'ut hubudayi cho bumoodih unli."

18

Njan keyah whuti Babylon 'aw 'et hoolah whuzdli

¹ 'Et ndoh hoh hukw'elh'az 'uyoon lizas yak'uz ndus de út'oh hoh téhl'en. Soo ulhtus hoh k'úne' 'ut'en nduwhút'en. Buts'un hányuzduz ndi yun k'ut be whét'en. ² 'Ink'ez soo dultul hoh njan ndutni,

"Njan keyah whuti Babylon 'aw 'et hoolah whuzdli
hoolah whuzdli

'Ink'ez njan keyah whuti Babylon, ndi ntsi' nududeh lhai bukeyah whúzdli.

Nududeh dutsun ts'iyawh delhts'i whuzdli.

ndaí dut'aíyaz dutsun 'ink'ez buts'uz dutnik,

'i chah 'et delhts'i.

³ Soo nint'uk hoh 'uyoon dune bulh tinta' 'ut'ih,

mai too k'una'a 'udun yun k'ut whut'en,

'et whuz na'a zeh hube yulhnaí.

Ndi yun k'ut hubudayi cho chah hiyulh tinta' 'ut'ih inle.

'Ink'ez ndi yun k'ut 'uhóoket, 'en

ndun ts'eke hoh soode'a 'int'ah 'ink'ez whéltus,

'et huwa higha soode'a huzdli."

⁴ 'Et doo chah ndus de yak'uz ts'ih 'uwhutni whudáts'o hoh njan nduwhútini,

"Sudune buts'uh hanáhdelh doo ka sih 'en bulh lubeshi 'oolh'en.

'Ink'ez doo ka sih ndi dune ye dzuh nudeh,

'i nuhghá doolts'it.

⁵ Bulubeshi nduk yat'ah ts'ih 'udéltai suli 'et huwa.

'Ink'ez yé tink'us 'int'ah, 'i ts'iyawh Yak'usda yunalni.

⁶ Danwhúhinla whuz na'a zeh huba 'uk'elha hoolhtsi.

'Ink'ez be 'ut'en nawh 'ultsuk huba 'uk'elha hoolhtsi.

Ndi lubot mbez nuhwhuba lhtainílhze,

'i nawh 'et 'ultsuk 'i huba lhtanaoolhdzeh.

7 Duba naducha 'ink'ez whudézi hukw'u na'a zeh yinkak usda,
whuz na'a dzuh nuzut 'ink'ez tso unli bugha óonah'aih.

Dudzi yuh hoh njan ndutni,
'Hubudayi cho ts'eke k'una'a sída.
'Aw tsándelh chásdlah,
'ink'ez tso chah chasés'en.'

8 'Et huwa dune ye dzuh nudeh,
'ilhudzin zeh 'et ndi ts'iyawh bugha whútelts'ulh.

Bé dats'utsah, tso,
'ink'ez dai chah ts'iyawh.
'Ink'ez kwun be soo ts'iyawh duték'un.
NeMoodihti Yak'usda yuba naheyelh, 'en ulhtus 'et huwa."

Ndi yun k'ut whut'en, 'en Babylon hoolah whuzdli hukw'e hunudleh

9 "Ndi yun k'ut whuhubudayi cho yulh tinta' 'ut'ih, 'en soo hiyulh soode'a 'uhánt'e ndun ts'eke dez'k'un bulut hinilh'en hoh, hik'e tetso 'ink'ez hik'e ni unteleh. ¹⁰ Ndi ye dzuh nadinzut hinilh'en 'ink'ez hiye nuljut 'et huwa ye 'un cho nodelhúya 'ink'ez 'uhutni, 'Keyah whuti Babylon degha nus hoontsi' huwá whults'ut, degha nus hoontsi' huwá whults'ut.

Nyo hoolhtus keyah whuti,
'ilhuh hukw'e hunint'o, 'et mba nahezya, whusawhélt'sut.'

11 'Et whulagha ts'ih ndi yun k'ut 'uhóoket hik'e tetso, 'ink'ez 'en chah hik'e ntedleh. Ndai hiye ooket, 'aw dune chahuyoosket suli 'et huwa. ¹² Gold, silver, tse dunezti, kw'usul dunezti, naih dézti, naih dulk'un 'ankw'us dulhk'us, seluk soo dulk'un, khunai ncha bude, ivory hiyülhni, hoonliyaz hiyilh'i ts'iyai dézti duchun, dulk'un t'eh, iron, tse, marble hiyulhni, 'ants'i ts'iyai dézti, ¹³ 'ink'ez bulh buta'whut'en, cinnamon hiyulhni, 'ink'ez sooltsun dez'k'un, khe sooltsun, yoo, Frankincense hiyulhni, mai too, 'ink'ez khe, olive hiyulhni, lhes 'ink'ez lhes hanúyeh, musdus, sheep, yeztli 'ink'ez nuyülhas tubulh, dune hubuyust'e 'ink'ez hubuzul chah, ts'iyawh ye 'óoket." ¹⁴ 'Et 'uhutni, "Ink'ez soo ts'uyi unzoo zeh kúndunut'a, ndai tube hika' ninzun, 'i chah ts'iyawh nch'a hoolah suli. Ndai dézti 'ink'ez soo 'uwhut'en, ndi ts'iyawh nch'a hoolah suli, 'aw naóonlelh ghait'ah." ¹⁵ Ndunnah ndi be 'ooduket, 'en ndun ts'eke soode'a 'int'ah ubulhtsi, ndun ts'eke ye dzuh nuzut, 'i hiyé nuljut 'et huwa ye 'un cho highu nudelhúya, tube cho hutso, 'ink'ez hukw'e ni hunudleh.

¹⁶ 'Ink'ez chah 'uhutni,
"Degha nus hoontsi' nghá whults'ut!
Degha nus hoontsi' nghá whults'ut!
'Iyuge! 'Iyuge!

Nyo keyah whut'i naih dulk'un 'ankwus dulhk'us,
'ink'ez dulk'un be húdelhts'i,
'ink'ez gold, tseyaz dunezti,
'ink'ez kw'usul dunezti be nahudelhúts'i.

¹⁷ Soo ts'ah'un 'ilhuh hukw'e hunint'o ndi be soo uzde'a whucho, 'i ts'iyia whuzdli."

'Ink'ez ndunnah ts'i cho be nuke, bumoodih chah, ndunnah whuz na'a 'uhooket 'ink'ez 'oohooket, 'en ts'iyawh ye 'un cho nuhudelhúya. ¹⁸ 'Ink'ez nyoo dez'k'un bulut, 'i hinalh'en hoh tube cho njan nduhútni, "Aw ndóohoont'ah keyah whuti 'aw 'udun whuz na'a keyah whuti hoolah!" ¹⁹ 'Ink'ez lhez hubutsi k'ehúyidzeh, 'ahúldzul, hutso, hukw'e ni hunudleh, 'ink'ez 'uhutni,

"Degha nus hoontsi' bughá whults'ut!
Degha nus hoontsi' bughá whults'ut!

Nyo keyah whuti ts'i yatoo k'ut núkat ts'iyawh soo hude'a hubulhtsi.
'Ilhuh hukw'e hunint'o soo ts'ah'un ts'iyia whuzdli."

²⁰ "Nuhwheni yak'uz whut'en 'ink'ez nuhwheni Yak'usda be'ildzun 'ink'ez nuhwheni whel'a,

'ink'ez nus whunilh'en chah ndun ts'eke 'ul'en bulh dahooja,
'et huwa soo cho whunélhnik!

nts'e na'a nuhwhuba nahezya whuz na'a Yak'usda nuhwhuba yuk'elha whulhtsi 'et huwa."

Keyah whuti Babylon 'aw 'et 'ilhuz 'ustl'e' 'uhóoja

²¹ 'Et lizas ulhtus tse cho buk'ut lhes dunutsut nduwút'en, 'i yílhchoot 'ink'ez yatoo k'ut taínalh'uz. 'Ink'ez 'utni,

"Soo wheóonujut hoh keyah whuti Babylon whuz na'a Yak'usda nawhüntéyus
'ink'ez 'aw 'o 'at dune nahó'ah ghait'ah.

²² Nela be ts'ujun, 'i 'ujun chah, buzek whé hiye ujun

'ink'ez be ts'újih be hújih,
 'aw 'o 'at dune hubuhudóts'o ghait'ah.
 Ndunnah lhelhts'un dedowh 'ulh'en,
 'en chah 'ilhuz huhoolah tele.
 'Ink'ez tse k'ut lhes hundunutsut be duts'o 'et chah 'ilhuz 'uwhuduténilh,
 'aw 'o 'at dune 'uhudoots'o ghait'ah.
 23 'Aw be whét'en, 'i chah chahootélah.
 'Aw nyoh dune lhghu delhts'i,
 'et chah 'ilhuz 'uwhuduténilh.
 Ndunnah mba 'óoket ndi yun k'ut dune ncha 'uhant'e.
 Duyun k'una'a ndi yun k'ut dune lhelhts'un hudedowh nyun nabuna'a 'et huwa.
 24 'Ink'ez ndunnah nus whunilh'en, dune Yak'usda be 'ilhdzun, 'en hubuzkai,
 'ink'ez ndi yun k'ut dune hubanghan,
 'en chah ts'iyawh 'en hubuzkai 'i 'int'ah!"
 ni, lizas ulhtus.

19

Keyah whuti Babylon ts'iyá whuzdli, 'et huwa ndunnah yak'uz húdelhts'i, 'en 'et hubugha howhunélnik

¹ 'Et njan hukw'elh'az whudusts'o nduk yak'uz ts'ih tube lhanah soo tube cho njan nduhútni,

"Yak'usda uzdoólhti!

Be ts'udujih, 'ink'ez ye dézti,

'ink'ez ye úncha,

'ink'ez ye úlhtus,

ndi ts'iyawh neMoodihti Yak'usda buba' yint'ah.

² Ye nahéyelh ts'iyawh 'alha 'int'ah 'ink'ez ts'ah'un 'int'ah 'et huwa.

Ndun degha nus 'ul'en hoontsi' tune'ut'en, 'et hoh ndi yun k'ut dune tinta' hubunílh'en,

'ink'ez Yak'usda be 'ulhna hubuzkai whulhtsi,

'et hukw'elha Yak'usda yuba nahezya."

³ Doo chah zeh 'uhutni,

"Yak'usda uzdoólhti!

Ndun ts'eke 'ilhuz 'ink'ez 'ilhuz wheni bulut nduk whedújoot!"

⁴ 'Et ndunnah nat lanezi 'o 'at dinah 'utsuh whudélhhdzulh, 'ink'ez ndunnah dinah 'usjiz nacháhuneldel 'ink'ez Yak'usda bukw'usda cho dézti, 'i yuk'usda hoh, hibut dugwutsi be nachahuneldel 'ink'ez hits'u teni' nalhdzin hoh nduhútni,

"Et ndoh honeh!

Yak'usda nts'udéhlhti!"

⁵ 'Et kw'usuda cho dézti ts'ih njan nduwhútni,

"Nuhwheni ts'iyawh Yak'usda be 'ulhna 'ink'ez hiye nuljut chah,

ntsol 'ink'ez ncha chah,

neYak'usda déhlhti!"

⁶ 'Et whudáts'o 'ants'i dune lhanah 'ilhuh yahatelhtuk li'hutni. 'Ants'i too najilh k'una'a 'uwhutni. 'Ink'ez tube cho ditnik dutni li'whutni, hoh njan nduhútni,

"Yak'usda uzdoólhti!

NeMoodihti Yak'usda degha nus ulhtus,

'en ts'iyaintsuk k'une' whul'en 'et huwa.

⁷ Ts'ohót'i 'ink'ez ts'onólnik 'ink'ez uzdoólhti.

Ndun sheeppaz 'at tet'ilh huba whusahónzut 'ink'ez bu'at yutéleh 'aw 'et dich'oh lhadúja.

⁸ Naih dézti,

chadítsun 'ink'ez be hóodet'en,

'i ye t'edalh ka bughá whulhts'ut."

Ndi naih dézti, 'i dune Yak'usda bube'ildzun hubube 'ut'en ts'ah'un 'int'ah, 'i 'int'ah.

⁹ 'Et ndun yalhtuk, 'en 'usúlhni, "Njan 'uk'e'onges, ndun sheeppaz 'at 'utet'ilh na'hutet'alh, ndunnah hubughu nusja, 'en degha nus hoonzoo hubugha whútelts'ulh." 'Ink'ez 'usulhni, "Ndi 'i soo ts'ah'un na'a Yak'usda bughunek 'utni." ¹⁰ 'Ink'ez bubut nachánesno butts'un teni' untelhdzilh ka. 'Et 'usúlhni, "Et ndint'en ilah! Nyulh 'ulhna usdli. 'Ink'ez nyulhutsinkah, 'ink'ez Sizi bughunek bughu yalhtuk, 'en ts'iyawh hubulh 'ulhna usdli hoh 'ust'ah. Yak'usda 'en zeh butts'un téni' nilhdzun! Whunilh'en, ndi khunek Sizi be ghú yatuk, 'i mba nus whunólh'en ho' hooht'ah."

Christ yeztli lheyul, 'i 'et yuk'usda

¹¹ 'Et yak'uz dáha' dankez 'et whutel'hen, 'ink'ez yeztli lheyul, 'i téhl'en. Yuk'usda, 'en bu'taníuznitan 'ink'ez ts'ah'un 'int'ah hiyúl'ni. Soo ts'ah'un na'a dune ba nehughan 'et whuz na'a zeh huba nahuyeh. ¹² Buna kwun k'una'a tezdi nduwhút'en. Butsi k'ut hubudayi cho butsi k'eyúzdla nduwhút'en, 'i lhái butsi k'usula. Boozi buk'e'usdúguz, 'i 'aw dune t'einínzun, dich'oh zeh t'einínzun. ¹³ Nayits'uz 'uskai be toonalhuchooz, 'i be dune unli. 'Ink'ez boozi, 'i Yak'usda Bughunek ts'utni. ¹⁴ 'Ink'ez yak'uz nehughan, naih dézti lheyul 'ink'ez chadítsun, 'i be hudél'hts'i. Yeztli lheyul, 'i k'ut delhts'i hoh huyunedulh. ¹⁵ 'Et ndi soh cho, khundenyin buzá hayedúki. Ndi 'i be 'udun yun k'ut whut'en ye hubut ts'e' telht'oh ka. Dich'oh 'ut'es soh be k'une' hubutel'en. 'Ink'ez Yak'usda dega nus ulhtus, 'en ye whúske 'ink'ez ye húnilch'oh, 'et njan mai too 'ul'en whuz'ai k'una'a, 'i dich'oh yuk'unutéya. ¹⁶ Nayits'uz 'ink'ez buwuz k'ut 'et boozi 'uk'une'úsduguz hoh njan ndutni, "Hubudayi 'en hubudayi cho 'ink'ez moodih hubuMoodihti," ni.

Khunaiti ntsi, 'i 'ink'ez hiyulh lhúdughan tubulh hubuch'a ninde

¹⁷ 'Et doo chah lizas sa níz séyin hoh téhl'en. 'Ink'ez soo dultul hoh ndai dut'aiyaz ndoh núdelh, 'i ndi yúl'ni, "Ndez 'ilhowéhdel Yak'usda ncha, ndi teh'alh nuhwhuba lhaídínla. ¹⁸ 'Et hubudayi cho hubuyust'e, nehughan hubumoodih hubuyust'e, dune ncha hubuyust'e, yeztli 'ink'ez yuk'udelhts'i, 'ink'ez ts'iyannah yust'e, 'ulhna 'ink'ez 'ulhna whuch'a bulawhudetnik, ntsol 'ink'ez ncha chah, hubuyust'e, 'i ts'iyawh teh'alh." ¹⁹ 'Et khunaiti ntsi' telh'en, ndi yun k'ut hubudayi cho nehughan tubulh 'iluhowezedel, ndun yeztli yuk'usda 'ink'ez yuba nehughan, 'en hubuch'a nehúdedel hubulh lhahtedughan ka. ²⁰ 'Et ndi khunaiti ntsi' hiyúl'choot. 'Ink'ez whuts'it hoh nus whunil'hen, 'en chah hiyúl'choot. 'En 'int'ah khunaiti ntsi' nalh huwa 'ét'en tune'úst'en. 'I be ndunnah khunaiti ntsi' 'i be hubuk'une'del'húk'an, 'ink'ez ndunnah buk'eyélti ts'ih teni' nalhdzin, 'en ts'iyawh nabuna'a. 'Et ndunnah nahúlt'ah hukhuna hoh kwun sulphur be dézk'un, bun k'ut dúwhulcho, 'et tsabadano. ²¹ 'Et 'onghun khunaiti ntsi' ba nehughan, 'en ndun yeztli yuk'usda, soh cho buzá hayedúki, ndi soh cho 'i be ts'iyawh 'ubanghan. 'Ink'ez dut'aiyaz ts'iyawh dune yust'e húnésdai.

20

Satan 1,000 naooduzuk 'et lhughel

¹ 'Et yak'uz ndus de ts'ih lizas ut'oh hoh téhl'en. T'es tl'oolh cho 'ink'ez nyo tsak'et whucho whutl'ah hoolah 'i be whuda'de'ai bulh 'i yeleh. ² 'Et ndun tl'ughus cho khunai k'una'a nulget, ndun 'uda whút'l'ughus, 'en netsudule hiyúl'ni 'ink'ez Satan chah hiyúl'ni. 'En yíl'choot 'ink'ez 1,000 naooduzuk 'et wheni yulhghel. ³ Tsak'et whucho whutl'ah hoolah, 'et wheyano 'ink'ez yuch'a dána'de'ai 'ink'ez whudána'delhdze. 'Et whuz na'a ndi 1,000 naooduzuk lhaóodutenil' 'et whuts'un, ndi yun k'ut ndulhcho hoh lhelhts'un hudédowh dune 'aw 'o 'un nabunoo'ah ghait'ah 'et huwa. 'Et whunts'ih 'et hukw'elh'az, 'astl'iyaz hila nadootnih huba' hoont'ah.

Christ be'ildzun, 'en 1,000 naooduzuk hiyulh hubudayi cho hanle

⁴ 'Et kw'uts'uzda cho dézti lhái téhl'en. 'Ink'ez yuk'udelhts'i, 'en dune ba nahuteyeh, 'et bughá whunt'ai. 'Et ndunnah Sizi bughunek bughu yalhtuk, 'ink'ez Yak'usda bughunek chah, 'et huwa 'en hoh da butsi k'unónutselh. 'Ink'ez ndunnah nyuk khunaiti ntsi' k'us buk'edélti hits'u teni cha'níldzil, 'ink'ez ndunnah buk'une'del'húk'an be bunintak k'us bula k'ut buk'echa'iduguz, 'en ts'iyawh buzul nulh'en. 'En nahukhítina 'ink'ez 1,000 naooduzuk ndúwhulyez hoh ndun Christ 'en bulh moodih hinli. ⁵ Njan 'et 'udechoo dinazdutédulh 'uhoont'ah. 'Et whunts'ih 'onghoh yahadla, 'en 1,000 naooduzuk lhaóodija t'eh zeh di-nahudutédulh. ⁶ K'us ndan njan 'udechoo dune dinadutédulh hubulh 'uhooja, 'en dega nus hoonzoo hubugha whutelts'ulh, 'ink'ez lubeshi bughu hootelah huteleh. 'Ink'ez whulh nat dune yatádlah, 'aw 'en huba cha'hóot'ah. 'Et k'us Yak'usda 'ink'ez Christ bunáwhulnuk huteleh 'ink'ez 1,000 naooduzuk 'i hiyulh moodih huteleh.

Netsudule ndi kwun, sulphur be dez'k'un bun k'ut dúwhulcho, 'et tsuh hídano

⁷ 'Et 1,000 naooduzuk 'i lhawhúduja t'eh, Satan tsak'et usda hila nadutetnih. ⁸ 'Ink'ez 'udun yun k'ut whut'en ndi yun k'ut ndulhcho hoh húdelhts'i, 'en nabunte'ah. Gog 'ink'ez Magog whut'en, 'en lhatedughan ka, Satan 'ilho hubuteghelelh. 'En yatoo taba sai 'et 'uhuneltsuk. ⁹ 'Et ndi yun k'ut ndulhcho hoh whudune whusahátédulh 'ink'ez njan keyah whuti 'et dune Yak'usda bube'ildzun huwhut'i, 'et 'uhoont'ah keyah whuti Yak'usda hukw'entsi', Jerusalem huwhutni 'et whunat 'et 'ilhunahowetughédulh. 'Ink'ez nduk yak'uz Yak'usda usda whuz de kwun hatékulh. 'I be ntsi' ts'iyawh ts'iya hutele. ¹⁰ 'Et ndi kwun, sulphur be dez'k'un bun k'ut dúwhulcho, 'et khunaiti ntsi' 'ink'ez whuts'it be nus whunil'hen 'et huzke,

'et netsudule, dune nana'ah, 'en chah 'et tsu hídano. 'Et dzenis 'ink'ez 'ull'ek ibulh 'ilhuz 'ink'ez 'ilhuz wheni dzuh nuhutedeh.

Kw'uts'uzda cho lheyul, Yak'usda 'i k'ut usda hoh, ndan yuk'unucha'it'el huba nahuteyeh

¹¹ 'Aw 'et kw'uts'uzda dega nus ncha lheyul, 'ink'ez ndun yuk'usda 'en téhl'en. Ndi yun k'ut 'ink'ez yat'ah chah Yak'usda usda, 'et buch'a oonínkat, 'i 'ink'ez ts'iyawh hoolah whuzdli. ¹² 'Ink'ez yahadla ntsoL, ncha chah Yak'usda but nahúdelhúya hubutéhl'en. 'Ink'ez dustl'us lhái buk'une'úsduguz, 'i lhk'enankat. 'Ink'ez 'uyoo dustl'us buk'une'úsduguz, 'i ts'ukhuna ho' dustl'us, 'i chah lhk'enankat. 'Ink'ez yahadla bube 'ut'en k'ah huwa ndi dustl'us lhái 'uk'e'edúguz, 'i bugha huba nahesda. ¹³ 'Et yatoo k'ut yahadla, 'ink'ez be yats'adlah, 'i be yahadla 'ink'ez Hades húdelhts'i chah, 'en ts'iyawh whutl'ábahunla huba nahutedeh ka. 'Ink'ez 'ilhunuh hinli hoh bube 'ut'en hubugha huba nahesda. ¹⁴ 'Et be yáts'adlah 'ink'ez Hades bulh njan sulphur be dez'k'un bun k'ut dúwhulcho tsuh bodalhdel. Njan 'et whulh nat yats'itádlah 'uhoont'ah. ¹⁵ 'Et hoh ndunnah ts'ukhuna dustl'us k'ut huboozi 'uk'echa'iduguz, 'en ts'iyawh ndi kwun bun k'ut ndulhcho 'et tsuh ba hudalhdel.

21

Ts'iyaintsuk k'an 'et nasdli

¹ 'Et k'ahoondit yat'ah 'ink'ez yun chah k'ahoondit, 'et whutéhl'en. 'Udechoo yat'ah 'ink'ez 'udechoo yun 'et whehónkat 'et huwa. 'Ink'ez 'aw yatoo chah hoolah sulí. ² 'Et si, John, njan keyah whuti whulubeshi hoolah, k'an 'et Jerusalem huwhútni, 'et ndus de yak'uz ts'ih Yak'usda ts'un hawhélt's'ut, 'et whutéhl'en. Ts'ekeyaz kí tet'ilh ba soo naduja, 'et nduwhut'en. ³ 'Et ndus de yak'uz ts'ih tube cho 'uwhutni, njan nduwhútni, "Nilh'en 'et Yak'usda dune hubulh 'uwhutet'ilh, 'ink'ez hubulh dune tele, 'ink'ez hubudune tele. 'Ink'ez Yak'usda dich'oh hubulh útet'ilh 'ink'ez buYak'usda tele. ⁴ 'Ink'ez Yak'usda bunatsul too buna k'et whuna'itelhdoh. Yats'adlah chah 'ustl'e' 'uwhtenilh. Tso ts'indli 'ink'ez ts'utso chah 'ustl'e' 'uwhtenilh. 'Aw 'o 'un hukw'e ts'unduda chah hootélah. Whuts'un da 'uhoont'ah ts'iyawh ts'iya whuzdli 'et huwa." ⁵ 'Et kw'uts'uzda cho dézti k'usda 'utni, "Soo zilhts'ai ts'iyai tsuk k'ahoondit 'uwhusdleh." 'Ink'ez 'usúlhni, "Ndi khunek ts'ah'un 'int'ah 'ink'ez but'aníwhunitan ho' 'int'ah, 'et huwa 'uk'e'inges." ⁶ 'Ink'ez 'usúlhni, "Aw 'et lhaóoduja! Si Alpha 'ink'ez Omega usdli. 'Udechoo whe' whudít'en 'ink'ez lhawhúdulya usdli. Ndan ta'óosde, 'en ndi too be ts'ukhuna hajilh whutoo 'i hubugha itéldzoh. ⁷ Ndunnah 'ut'en ntsi' ch'a 'alhdéh ts'iyaintsuk buba' yutét'ilh. HubuYak'usda tesdleh 'ink'ez suzkeh hutele. ⁸ 'Et whunts'ih ndunnah whénuljut, huba 'alha cha'hóot'ah, huba' whuninzun tune'hut'en, nehughan chah, hootsi' túne'hut'en, duyun, 'uk'edélt'si ts'un tenahududli, 'ink'ez huwhuts'it chah, 'en ts'iyawh nyo bun k'ut dúwhulcho kwun sulphur be dez'k'un, 'et 'uwhutet'ilh. 'Et whúhl nat yats'itádlah 'uhoont'ah."

Keyah whuti Jerusalem k'ahoondit nawhusdli

⁹ 'Et ndun skwunlai 'o 'at nanah lizas, skwunlai 'o 'at nankoh lhests'ai hiye dzuh nutedeh, skwunlai 'o 'at nanah hudedowh, 'i be dez'bun, 'en hube 'ilhunuh lizas sghu nininya 'ink'ez sulh yailhtuk. Njan ndúsulhni, "Anih ndun sheepez bu'at tele, 'en búnyuntelhtun."¹⁰ 'Et Ndoni be dzulh ye doh hadet'ai whuz whe salhti. 'Ink'ez keyah whuti Jerusalem 'aw whulubeshi hoolah, yak'uz ts'ih Yak'usda ts'un ndus de whélt's'ull, 'et whusúnelhtan. ¹¹ Yak'usda but's'un hayánduz, 'i bulh 'úhoont'ah. 'Ink'ez but's'un hayánduz 'i tseyaz duneziti, jasper hiyulhni, 'i 'uyoo tse be nduwhut'en, crystal hiyulhni, 'aw 'i bundoh whut'en. ¹² Sih dutai 'ink'ez duts'o 'ink'ez ye doh 'int'ah. Lanezi 'o 'at nankoh 'et ndati. 'Ink'ez lanezi 'o 'at nanah lizas ndati nuhudelhúya. 'Et lanezi 'o 'at nanah Israel hits'uh hainde hudedowh, 'en huboozi ndati 'uk'e'usdúguz. ¹³ Ndaz de ts'un tat ndati, 'ink'ez nyaz de ts'un tat ndati. 'Ink'ez nts'iz de ts'un tat ndati. 'Ink'ez nus de ts'un chah tat ndati. ¹⁴ Nyoh keyah whuti sih whunasa'a, 'i lanezi 'o 'at nankoh tse lhelhts'un hudedowh buk'uwhez'ai. 'Ink'ez lanezi 'o 'at nanah ndun sheepez ba whel'a huboozi hukw'une'usduguz. ¹⁵ Ndun sulh yalhtuk gold t'ozel' ut'i, keyah whuti whudati 'ink'ez whusih chah whunduná'ootelhdzih ka. ¹⁶ Keyah whuti busih ts'iyawh lhundúwhulcho. Dáhoolyez, 'et zeh 'uwhtel. 'Ink'ez keyah whuti t'ozel' be whunduná'oolhdzai. Dahoolyey, dahooltil, 'ink'ez nts'oh ndunaoodalhdzah nduwulcho hoh whunduná'oolhdzai. 12,000 furlongs 'uwhtulyez.* 12,000 furlongs 'uwhtel, 'ink'ez 12,000 furlongs ná'dalhzat. ¹⁷ 'Et sih doo chah whunduná'oolhdzai. 'I, 144 cubits huyulhni.† Dune whunduná'oolhdzih, whuz na'a lizas whunduná'oolhdzai. ¹⁸ 'Ink'ez sih jasper hiyulhni, tse 'i be' hoolya. 'Ink'ez nyoh keyah whuti soo dandit'az bukiúnt'en ndunt'ah, 'i soo gold gaih zeh keyah whuti be' hoolya 'uhoont'ah. ¹⁹ 'Ink'ez nyoh keyah sih whunasa'a, 'i but'ah soo ts'iyaintsuk tseyaz duneziti, 'i be nyoh keyah

* 21:16 †1,500 miles 'uwhtulyez. † 21:17 †216 feet bat'en.

whusih whunasa'a buk'uwhez'ai, 'i be buk'ut nodelhútsi. 'Udechoo tse whutl'ah dez'ai, 'i jasper 'int'ah. Bulh nankoh tse, 'i sappire hiyulhni, 'i 'int'ah. Bulh tak'i tse, 'i chalcedony hiyúlhni. Bulh dink'i tse, 'i emerald 'int'ah. ²⁰ Bulh skwúnla tse, 'i sardonyx hiyúlhni. Bulh lhk'utak'i tse, 'i sardius hiyúlhni. Bulh skwunlat 'o 'at nankoh tse, 'i chrysoliti hiyúlhni. Bulh lhk'udink'i tse, 'i beryl hiyúlhni. Bulh lhuk'i hoolah lanezi tse, 'i topaz hiyulhni. Bulh lanezi tse, 'i chrysoprase hiyulhni. Bulh lanezi 'o 'at lhuk'i tse, 'i jacinth hiyulhni. 'Ink'ez bulh lanezi 'o 'at nankoh tse, 'i amethyst hiyúlhni. ²¹ 'Ink'ez lanezi 'o 'at nankoh ndati, 'i lanezi 'o 'at nankoh kw'usul dunézi 'int'ah, pearl hiyulhni, 'et 'ilho kw'usul dunezti cho, 'i 'ilho ndati unli. 'Ink'ez buti keyah whuti nówhuz'a, soo windah k'una'a bukiúnt'en, soo gold gaih zeh 'uhoont'ah.

Keyah Jerusalem k'ahoondit, 'i Yak'usda buts'un hayánduz be whét'en tele

²² 'Et whunts'ih 'aw luglez whucho chawhús'il. NeMoodihti Yak'usda dega nus ulhtus, 'ink'ez busheepyz bulh nyoh keyah whuluglez hinli 'et huwa. ²³ 'Aw 'ulh'ek oza 'ink'ez sa chah 'aw nyoh keyah buka cha'whunizun Yak'usda buts'un hayánduz, 'i be whét'en. 'Ink'ez ndun sheepyz 'en hubuniz be whét'en. ²⁴ 'Ndunnah 'udun yun k'ut whut'en hubutah hudujih, 'en hiniz nutedulh. 'Ink'ez ndi yun k'ut hubudayi cho hiyé dézti 'ink'ez hiyé ncha, 'i hedich'oh hubudayi cho dahítelhtel. ²⁵ 'Dzin dúwhulyez hoh whudati 'aw dá'doola ghait'ah 'aw 'ulh'ek chawhutesdle 'et huwa. ²⁶ 'Lhelhts'un hudedowh hiyé dézti 'ink'ez hiyé úncha, 'i dahítelhtel. ²⁷ 'Et whunts'ih hoonliyaz dutsun 'et daóolts'it ghait'ah. K'us ndan huba' whuninzun tune' 'ut'en, 'ink'ez whuts'it chah, 'aw dahóodelh ghait'ah. 'Ndunnah ndun sheepyz ts'ukhuna be' dustl'us k'ut 'uk'une'úsduguz, 'en zeh huba' hoont'ah 'et huwa.

22

Ndi 'ukoh bugha ts'úkhuna

¹ 'Ink'ez 'ukoh soo too unzoo, bugha ts'ukhuna, 'i soo unzoo k'et ndulhcho hoh whét'en, 'et whusúnelhtan. Yak'usda 'ink'ez ndun sheepyz buk'usúda cho dézti, 'i 'ukoh buts'un hayáni. ² 'Ti soo whuniz hoh whúya lhusúli. 'Ukoh lhch'az ts'ih taba 'et duchun bugha ts'ukhuna nanúdez'a. 'I lanezi 'o 'at nankoh bumai yinli. 'Ilho duchun 'i sanun totsuk bumai whulhlhli. 'Ink'ez duchun but'an 'i lhelhdun yun k'ut whut'en hiye naóojeh ka 'int'ah. ³ 'Aw ndai Yak'usda yuk'e hanya, 'i hootélah. 'Et k'us Yak'usda 'ink'ez ndun sheepyz buk'usúda cho dézti, 'et te'alh. 'Ink'ez be 'ulhna hinat né'tet'en 'ink'ez hiba ne'hutet'en hoh hits'u teni' untelhdzun. ⁴ 'Hinen hiyuntel'ihl, 'ink'ez boozi bunintak hukw'e dute'alh. ⁵ 'Et 'ulh'ek chah hootélah. 'Aw be whét'en, 'i k'us sa be whét'en, 'i chah hi'e 'utet'ihl. NeMoodihti Yak'usda buts'un hayánduz, 'i buniz 'uwhuté'ihl 'et huwa. 'Ink'ez 'ilhuz 'ink'ez 'ilhuz wheni hiyulh dutéti.

'Aw 'et neba nilhduk w suli

⁶ 'Ink'ez lizas 'usúlhni, "Ndi khunek but'aníwhunentan 'ink'ez ts'ah'un 'int'ah." 'Ink'ez ndunnah buMoodihti Yak'usda be nus whunilh'en, daóotenilh, 'aw 'et nilhduk w suli. 'Et huwa, dude 'ulhna but'oonoolhdzeh ka bulizas buts'ú wheyalh'a. ⁷ "Soo zélhts'ai, nilhduk w whusatésyalh. Ndi dustl'us 'i k'ut khunek be nus whét'en, 'i ndunnah hiyoontun t'eh, tube dega nus hoonzoo hubugha whútelts'ulh." ⁸ 'Ink'ez sí, John, ndoh hoh whunalh'en 'ink'ez whudáts'o hoh lizas whusúnelhtan, 'et huwa 'en bubut nachániso buts'un teni' untesézilh ka. ⁹ 'Et 'usúlhni, "Et ndint'en ilah! Nyulh 'ulhna usdli hoh 'ust'ah. 'Ink'ez nyulhutsinkah nus whunilh'en, 'ink'ez ndunnah ndi dustl'us bughunek óontun, 'en chah hubulh 'ulhna usdli hoh 'ust'ah. Yak'usda, 'aw 'en zeh ts'un teni' nilhdzun!" ¹⁰ 'Ink'ez 'usúlhni, "Ndi dustl'us nus whunilh'en, 'i khunek budána'dolhdzeh gunih! 'Aw 'et nilhduk w suli 'et huwa. ¹¹ 'Ndan ts'ah'un cha'it'ah, whute 'et zeh ndót'e. 'Ndan dutsun, whute 'et zeh ndót'e. 'Ink'ez ndan ts'ah'un 'int'ah, 'et zeh ndót'e. 'Ndan Yak'usda ba 'udun nibuninla, 'et zeh ndót'e," ni lizas.

Sizi 'utni, "Ts'iyannah hube 'ut'en bugha huba 'uk'elha yutelhtsilh, 'i nusdle."

¹² "Whunilh'en, 'aw 'et nilhduk w whusanátesdalh 'ink'ez ts'iyannah hube 'ut'en bugha whuz na'a huba 'uk'elha yutelhtsilh, 'i nusdle. ¹³ 'Si 'ust'ah Alpha 'ink'ez Omega usdli. 'Udechoo whe' whudit'en 'ink'ez 'ustl'e' 'uwhuténilh, 'en 'ust'ah. 'Udetsuh 'ink'ez 'udék'elh'az 'ust'ah." ¹⁴ 'Ndunnah yughunek k'une' 'ut'en, 'en dega nus hoonzoo hubugha whútelts'ulh. Ndi duchun bugha khútna, 'i 'ink'ez njan keyah whuti whudati dahítédulh, 'et 'en zeh bughá whunt'ai ho' hoont'ah. ¹⁵ 'Et whunts'ih njan keyah whuti ye 'az ts'ih, 'et lhikah hiyulh ndult'ah, huduyun, dune k'us ts'ekoo bulh tínta' hut'ih, nehughan, 'uk'edéltsi ts'un tenahududli, 'ink'ez ndunnah huhóont'i hoh huwhuts'it chah, 'en ts'iyawh yoo 'az ts'ih 'uhint'ah. ¹⁶ "Sí, Sizi sulizas nuhwheni Yak'usda ba 'ilhunahuwúdulh, 'en nuhts'ú whélh'a. Ndi khunek Yak'usda ba 'ilhunahuwúdulh, 'en hubudóhni ka David hits'uh haínde, 'en

buts'uh haizut hoh 'ust'ah. Bundada sum tube be hóodet'en, 'i li'ust'ah!" ni Sizi. ¹⁷'Et Ndoni 'ink'ez Sizi bughu tedalh bulh, "Anih!" hutni. 'Ink'ez ndan whudits'o, 'en chah, "Anih!" hudooni. Ndan ta'óosde chah dez tóoya 'ink'ez ndi be ts'úkhuna whutoo, ndet hukwa' ninzun totsuk, hiyootnai.

Ts'iyannah bugha 'utni

¹⁸ Ndi dustl'us be nus whét'en, 'i be dustl'us dits'o, huwahli nuhwhudúsní. Ndunah dich'oh khunek 'uyoo chah inla, ndi dune ye dzuh nuzut ndi dustl'us k'ut bugha 'uk'une'úsduguz, 'i 'o 'un chah ndi dune ye dzuh nuzut, 'i Yak'usda bugha óote'alh wule. ¹⁹ 'Ink'ez ndi dustl'us be nus whét'en, 'i ndunnah whulutah 'i khunek 'uk'una'itézguz, ndi be ts'úkhuna be dustl'us, njan keyah whuti whulubeshi bughu hoolah chah, 'ink'ez ndi duchun be ts'úkhuna, ndai be'ilhdzun yutele, ndi ts'iyawh Yak'usda bughu naooté'chulh wule.

Khunyaz whusanátesdahl, ni Sizi

²⁰ Ndun ndi 'i nuhwhudáni, 'en 'utni, "Alha 'aw 'et nilhdukwh whuz de úsyah!" 'Et ndoh honeh! NeMoodihti Sizi, whuz na'a zeh dezinyah! ²¹ NeMoodihti Sizi Gri ye unzoo, 'i ts'iyawh nohwhulh 'óot'e. 'Et ndoh honeh.